


Yompor Po'ñoñ ñeñf attõ Yepartseshar

Jesucristo e'ñe etserra a'pochtaterrnay

Yomporesho



New Testament in Yanesha' (PE:ame:Yanesha')

**Yompor Po'ñoñ ñeñĩ attō Yepartseshar Jesucristo e'ñe etserra a'pocdaterrnay
Yomporesho
New Testament in Yanesha' (PE:ame:Yanesha')**

copyright © 2008 Wycliffe Bible Translators, Inc.

Language: Yanesha'

Translation by: Wycliffe Bible Translators, Inc.

Yanesha'[ame], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yanesha'

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

SAN MATEO	1
SAN MARCOS	82
SAN LUCAS	131
SAN JUAN	217
HECHOS	269
ROMANOS	334
1 CORINTIOS	369
2 CORINTIOS	402
GÁLATAS	424
EFESIOS	436
FILIPENSES	448
COLOSENSES	456
1 TESALONICENSES	463
2 TESALONICENSES	469
1 TIMOTEO	473
2 TIMOTEO	482
TITO	489
FILEMÓN	493
HEBREOS	495
SANTIAGO	521
1 PEDRO	530
2 PEDRO	539
1 JUAN	544
2 JUAN	552
3 JUAN	554
JUDAS	556
APOCALIPSIS	559

COHUEN ÑOÑETS ÑEÑT̃ QUELLCA' SAN MATEO

*Arrpa' all aquellcaret allohuen pa'so'chñechno ñeñt̃ pa'tañneshañ pen Jesús
(Lc. 3.23-38)*

¹ Arrpa' all aquellcaret Jesucristo pa'tañneshañ e'ñe pa'so'chñechnohuenet. Jesucristopa' David po'm'reneñ, e'ñe Abrahamoteñ. Allohuen añ so'chñetspa' ñeñtara mereñtsorecmuet.

² Abrahampa' chemere'tana Isaac. Isaacña' chemere'tana Jacob. Jacobña' chemere'tana Judá epuet ñaña pa'mo'nasheñechno. ³ Judáña' chemere'tana Fares epuet ñaña Zara. Ñet pachoretpa' añ pa'so'cheñ Tamar. Faresña' chemere'tana Esrom. Esromña' chemere'tana Aram. ⁴ Aramña' chemere'tana Aminadab. Aminadabña' chemere'tana Naasón. Naasónña' chemere'tana Salmón. ⁵ Salmónña' chemere'tana Booz. Ña pachorpa' añ pa'so'cheñ Rahab. Boozña' chemere'tana Obed. Ña pachorpa' añ pa'so'cheñ Rut. Obedña' chemere'tana Isai. ⁶ Isaiña' chemere'tana David ñeñt̃ añcha'tarettatse't. Davidña' chemere'tana Salomón. Ñeñt̃pa' arrot Uriás puetaporot.

⁷ Salomónña' chemere'tana Roboam. Roboamña' chemere'tana Abías. Abíasña' chemere'tana Asa. ⁸ Asaña' chemere'tana Josafat. Josafatña' chemere'tana Joram. Joramña' chemere'tana Uzías. ⁹ Uzíasña' chemere'tana Jotam. Jotamña' chemere'tana Acáz. Acázña' chemere'tana Ezequías. ¹⁰ Ezequíasña' chemere'tana Manasés. Manasésña' chemere'tana Amón. Amónña' chemere'tana Josías. ¹¹ Josíasña' chemere'tana Jeconías epuet ñaña pa'mo'nasheñechno. Ñehua, Josíaspa' alla chemere'tos allempo a'chapatarettet alla'par all anetso ñeñt̃ pa'so'cheñ Babilonia.

¹² Allempo hua'cherret Babilonio'tpa' Jeconíasña' chemere'tuerrana Salatiel. Salatielña' chemere'tana Zorobabel. ¹³ Zorobabelña' chemere'tana Abiud. Abiudña' chemere'tana Eliaquim. Eliaquimña' chemere'tana Azor. ¹⁴ Azorña' chemere'tana Sadoc. Sadocña' chemere'tana Aquim. Aquimña' chemere'tana Eliud. ¹⁵ Eliudña' chemere'tana Eleazar. Eleazarña' chemere'tana Matán. Matánña' chemere'tana Jacob. ¹⁶ Jacobña' chemere'tana José ñeñt̃epa'tcha' puerrollar ña' María. Maríaña' cheyore'tana Jesús, ñeñtara ñeñt̃ Cristotats.

¹⁷ Allempoteñ corre't Abraham tarrempohua allempo corre't ñaña David, ñeñt̃ña allponsheña chemere'shatnomuetspa' allo'tsenca'ye 'charrasheña puechenet pa'tatssheña. Ñaña allempoteñ corre't David tarrempohua allempo a'chapatarettet Babilonio, ñeñt̃pa'cho'ña allo'tsenerrerr 'charrasheña puechena pa'tatssheña ñeñt̃ allponsheña chemerasha'terrtserr allempo. Ñaña allempoteñ a'chapatarettet Babilonio tarrempohua allempo eñalleta Cristo, ñeñt̃pa'cho'ña allo'tsenerrerr 'charrasheña puechenet pa'tatssheñet ñeñt̃ allponsheña chemerasha'tnerrtserr tarrempohua allempo eñalleta ñaña Cristo.

*Arrpa' atto eñalleta Jesucristo
(Lc. 2.1-7)*

¹⁸ Te'pa' o'ch neserrpare'tatas atto allempo eñalleta Jesús. Allempoña María ñeñt̃cha' pachor ña' Jesús pa' añca'ye o'patenaya José ño'ch yore'. Ama yoreña'pa' Maríaña' ahuepa't a'chomenta Parets Puecamquëño't. ¹⁹ Joséña' ñeñt̃cha' puerrollar ña'pa' ñaña' e'ñe cohuen acheñer ñeñt̃o'marña ñapa' ama mueno o'ch pencach. Ñaña'pa' atet cotape'ch

o'ch ser e'ñe a'nahuota. ²⁰ Allempoña atet cotape'chenpa' machayoto' orrtoña Yompor po'mllañoñeñer. Ñeñt orrtoya puechopoñoña' atet otos:

—José Davidna'tare, amach pa'llpatsto; pocte'ca'ye o'ch peyore María ñeñtcha' petapor peña' tarro'mar ñapa' o'ca'ye achomenta Parets Puecamquëñoñ. ²¹ Te'pa' eñalletatancha' asheñorr, ñeñtña' pesochocha' Jesús tarro'mar ñapa' ñeñtcha' a'queshpaterre' pa'cheñer po'chñarofet. Arrpa' allohua ñeñt atet och mellañoñeñ.

²² Ñeñtña' tarro'mar atet pa' attoch etsota ñeñt atet eñorana'tane't Isaiás ñeñt a'mtahuete't Yompor po'ñoñ, ñeñtña' atet ote't:

²³ Ñeñtña' shopshesha'pa' amach a'plaretotey'e' achomento; cheyore'tanach asheñorr, ñeñtña' sochetcha' Emanuel.

Ñeñt ña so'chñetspa' atet oten: Te'ña Paretspa' e'ñe parro'tseney.

²⁴ Allempoña José oyerr ñemoñ, atet och Yompor po'mllañoñeñerpa' ñaña'pa' atetcho' pa'. Yoran María ñeñtcha' puetapor pa'. ²⁵ Tarraña ñapa' ama a'pñeñe tarremphua allempoch emare'tua; ñeñtña' asheñorrpa' soch JESÚS.

2

Atto eñotañnesha'pa' huacha'tet o'ch enteñeta' Jesús allempo eñalleta

¹ Allempo eñalleta Jesús all Beléño, e'ñe alla Judeopa' añ añcha'tarettatset Herodes. O'ña eñalletuapa' eñotañnesha'ña huacha'tet allot huena atsrretpa' o' cha'cha'tet Jerusaléño. ² Ñetña'pa' atet otyesoset:

—¿Erro'tsena'tña ñeñt eñalletatsa ñeñtcha' pa'mcha'tareter pa' judionesha'? Yapa' yeñoteñ o' eñalleta tarro'mar yapa' o' yentoñ po'rantor allot huena atsrret; yapa' ñeñtecopña yehuena o'ch yeconcorpana'teña'.

³ Allempoña añcha'taret Herodes e'man atet ñoñetspa' ñaña'pa' ñeñt na' pueyo'chro ama eñmato pueyo'chro. Allohuen jerusaléño'marnesha'pa'cho'ña ama esesha' eñmatatseto ñamet pueyo'chreto. ⁴ Allempoña'pa' agotatan añcha'taretnesha' ñeñtara judioneshet; o'ch ap'chet allohuen cornanesha' ñeñt atarr sherba'yets judioneshacop. O'ch ap'chet ñaña ñeñt atarr etsotayene' ñoñets ñeñt atet anaret judioneshacop. Allña a'p'to'tyesanet:

—¿Erra't otete'tña allcha' eñalletaña ñeñtcha' Cristoterrets?

⁵ Ñetña'pa' atet ochet:

—Arr anetso Beléño allara Judeo tarro'mar quellcopa' atet anuaret, atet quellquë't ñeñt a'mtaye't Yompor po'ñoñ. Ñeñtña' Yomporña atet otatset:

⁶ Añ Beléñ ñeñt judana'tarnesha' po'patseñ, e'ñe po'ño'ch ñeñt anetser ñeñt atarr asherben entyeñet allohuen ñeñt añcha'taretyetsa allo'marnesha'. Tarro'mar all Beléño allcha' eñalleterra ñaña ñeñtcha' atarr añcha'tare'terrtsa ñeñtcha' cohuanperre' allohuen neyochreshachno ñeñtara israelnesha'.

⁷ Allempoña otuoset atetpa' Herodesña'pa' e'ñe a'nahua agotaterran ñaña po'potantañ eñotañnesha' ñeñt cha'cha'tats allempo Jerusaléño. Allña'pa' e'ñe aco'pa a'p'to'tare'tyesapanet:

—Rantopa' ¿e'ñe'tña esempoteñña señch ñeñt sorrtoya ñenmañ?

⁸ Allempoña eñotatosetpa' ñaña'pa' otanet:

—Te'pa' o'ch ahues Beléño, e'ñech aco'pa se'nyesos ñeñt cheshatoll. Ñerra'm o'ch señchpa' o'ch sotuerren allochña'pa' napa'cho'ña o'ch ahuen o'ch neconcorpana'teña' ñaña.

⁹ Ñetña'pa' allempo e'mhuanmuet atet otanet añcha'taretpa' allempoña'pa' ahuanmuet. Rantona' ñeñt entnenet allot huena atsrretpa' ta'nettsa allenet senet, attotapa' o' chap e'ñe allo'tsen cheshatoll. O'ña chap allo'tsen cheshatollpa' o' muechachosa e'ñe alla

ento e'ñe pocto. ¹⁰ Allempoña enterreterr rantopa' atarr nanac coshet. ¹¹ Allempoñapa' o' be'toset pocollo, allña entoset cheshatoll epuet pachor María. Concorpana'tosyetpa' ma'yochosyet. Toram'pesyesoset po'tsapotpa' aposet e'ñe atfa oro, aposet tsach puese' ñeñt' atarr eñmosať. Aposet ñaña eñmosať puerets. ¹² Allempoña ñetpa' eñotatanet Yompor puechopoño allochñapa' attoch ama oñerreto Herodesesho'mar. Allempo puerrerret pa'nyetopa' aña coferret po'poñ toñ.

Allempo cheshatoll Jesúsapa' anmet Egipto allcha' a'queshpachet

¹³ Puerraçhertsetpa' Yomporña po'mllañoñeñerpa' alla orrterranerr José puechopoñoť. Ñeñtpa' atet otererr:

—Petantaye'cha o'ch pa'yech cheshatoll pachore'na, orraye'chař all anetso Egipto allcha' seyçhosa. Esemphuañenñapa' o'ch alla noterrperr atetcha' pepa. Herodes po'ñoçhpa' e'natancha' añ cheshatoll attoch muetsatach.

¹⁴ Allempoña o' tantapa' anman cheshatoll, pachore'na yeta tsapo, ahuanmuet Egipto. ¹⁵ Allñapa' alleneta atfoña' o' rromuen Herodes. Atfoña etsota Yompor po'ñoñ atet ote't ñeñt' a'mtaye't po'ñoñ; ñeñtpa' Yompor atet otatse't: "Egiptotcha' nagotater Nechemer."

Allempo Herodespa' mueñan ñeñtcha' muetsue' allohuen asheñorroťollesha'

¹⁶ Ñehua, allempoña Herodespa' o' eñoch ÷ha sheca'neñ eñotañnesha'pa' ñaña' ñeñta atarr atsrre'mate'. Atto atsrre'ma nanacpa' allempoñapa' mueñan ñeñtcha' muetsue' allohuen asheñorroťollesha' ñeñt Beléño'tsa'yen ñaña ñeñt allohuen allampaño'tsa'yen Beléño. Allohuen asheñorroťollesha' ñeñt echene' epa po'charña ama't ñaña allohuen ñeñt eñalletyetsa chenta' e'ñe poctacma muetsanatu. Ñehua, ñeñt atet eñotatos eñotañnesha'pa' ñaña' atet cotape'ch ahuo'te' epa char eñalletuaña ñeñt cheshatoller. ¹⁷ Atfoña etsota ñeñt atet ote't Jeremías ñeñt a'mtaye't Yompor po'ñoñ ahuať; ñeñtpa' atet ote't:

¹⁸ Ñeñt anetser Ramopa' atarrcha' e'morrterra yahueñets, atarr gogatstena; allpa' Raquelca'ye ya'na'tene' puechoyoresha'; ama mueno o'ch esesha' emya'te' tarro'mar puechoyoresha'pa' ama eñallmeñe, o' e'ñe muetsanatu.

¹⁹ Allempoña rroma Herodespa' Yomporña po'mllañoñeñerpa' alla orrterranerr José puechopoño all Egipto. ²⁰ Allñapa' otererr:

—Te'ñapa' o'ch petanterra, o'ch alla paner cheshatoll pachore'na o'ch alla pepuererra israelnesha' pa'nyo; o'ca'ye colla'huaña ñeñt o'pataye't añ cheshatoller ñeñto'ch muetsayen.

²¹ Atet otuepa' ñaña' allenta tantena o' alla anerran cheshatoll pachore'na alla ahuerret israelnesha' pa'nyo. ²² Allempo ahuerretpa' ñetñapa' e'mare'tueret añ añcha'tarettertsa Judeo ñeñt Herodesoñ puechemer ñeñt soçhetsa Arquelao. Ñeñto'marña mecha'tenet serrtset all. Puechopoñoñapa' alla eñotatererr ñeñto'marña allempopa' alla serr Galileo. ²³ Cherr Galileopa' ahuerret pa'terr anetso ñeñt pa'so'cheñ Nazaret. Allñapa' alla yeçha'huerra. Atfo'tca'yeña etsotaña ñeñt atet otyese't ñeñt a'mta'yesaye't Yompor po'ñoñ; ñetpa' atet otyese't ñeñtcha' Cristoterretspa' "oteñetcha' nazareto'marnesha'."

3

*Allempo orrta Juan ñeñt serrpare'tosets all amayo
(Mr. 1.1-8; Lc. 3.1-9, 15-17; Jn. 1.19-28)*

¹ Allempoñapa' orrta Juan ñeñt apatose' acheñenesha' Yomporcop. Ñaña' arr serrpare'tatosanet amayo e'ñe alla Judeo. ² Allñapa' atet otosanet:

—Te'pa' o'ch soctape'cherr ello cohuen Yomporecop tarro'mar o' chapmoch allem-poch ayochreshatterra Yompor ñeñt' pue'ntañ'o'tsen.

³ Ñehua, añmapa' ñocopca'ye eñose'ña Isaiás ñeñt' a'mítaye't ahuat' Yompor po'ñoñ. Allempopa' atet' ote't:

E'morrterrach puesheñarr po'ñoñ all amayo allcha'ña serrpare'taterranña acheñenesha'.

Puerranarotpa' añcha' toma'ntaterranet' toñ, ñeñt'pa' atetcha' o'terranet: "Te'pa' o'ch sa'cohuenetyes toñ allcha' oñmos Partsesha', o'ch e'ñe sa'pa'charretyesoñ pa'teḡ." Arrpa' allohua ñeñt' atet' aquellcare't ahuatoteñ Cristocop.

⁴ Ñeñt'ña Juanpa' camello pue'ch apomotare't ñeñt' pa'shtam pen. Allo chanena ñeñt'pa' pa'rrom. Allñapa' rra'yesane't ahuañchenclla* ñeñt' puerran pe't epuet pets po'moñ. ⁵ Allempoña jerusaléno'marnesha'pa' chocma hua'cha'tyenet' ñesho ñaña allo-huen judeo'marnesha'. Hua'cha'tyeññaña ñaña allohuen jordanaso'marnesha'. ⁶ Allña ñetpa' a'meta'yesoset po'chñaret, Juanñapa' apatyesianet' Yomporecop. Ñeñt'ña oñ all apatyesianet' añ pa'so'cheñ Jordanas.

⁷ Allempoña entapan shonte' saduceonesha' ñaña fariseonesha' ñeñtareta ñeñtet' judioneshet. Ñetpa' tarro'mar hua'chenet' añ muenenet' o'ch apatapanet' Juan. Juanña serrpare'tatapanetpa' otapanet:

—Sapa' ama cohuenayayso atarr ashcarñañes, cha sottena ñerra'mrrate' shechpa som-por sepen. Po'ño'chca' ama eseshaye' sotenaye e'ñech sapatareteñoña o'ch sequestherra allochñapa' amach coñchatuerrso Yompor allem-poch yoro'chtatuer tsapatonet. ⁸ Napa' añcha'ña notapas o'ch sorrtatyes ñeñt' e'ñe cohuen enten Yompor ñeñt' atet' pena ñeñt' po'ño'ch o' cotape'cherran ello cohuen Yomporecop. ⁹ Sapa' cha soteneñ seyo'chro año' es sepallteno, sapa' año' e'ñe seyemtena satañ Abrahamañ. Tarraña napa' o'ch notas amach atet' soctape'chatsto tarro'mar ñeñt'pa' ama esoye' enteñe Yompor. Tarro'mar o'ch notas ñerra'm Yompor muenetseñ ama't añ mapue' ñeñt' senten arr o'ch a'pnasereñ Abraham po'mreneñ. ¹⁰ Ñeñto'marña napa' o'ch notas ñerra'm amach soctape'cherro cohuen Yomporecop o' mameshamerra o'ch chaponasa attoch coñchaterres Yompor. O'ch netma'ntatasa atet' ñerra'mrrate' allempo o'ch a'mata'tmochet tsach. O' e'ñe onañchachet gach allcha' tet e'ñe allohua huañen puepallactar. Ñeñt' allohuen tsache'chno ñeñt' ama cohuenaye' me'tetsopa' a'mata'tueretcha' saprrochetcha' all huorten tso' allcha' e'ñe a'poyatatueret.

¹¹ Elloña Juanpa' atet' o'terraneterr:

—Ñeñtes cotape'cherre' cohuen Yomporecop napa' ama't e'ñe po'ño'ch napatensoñ Yomporecop, napa' e'ñeca'ye oñochaya napatenes. Tarraña Cristo ñeñt'cha' huapatsa chenta'pa' ñapa' añcha'ca'ye chorratossa Parets Puecamquëñ ñeñt' atet' ñerra'm tso'. Ñapa' ñeñt' atarr ahuañcatesha' nañapa' ama tama ahuañcatesayayno. Ñapa' ñeñt'ña atarr sherbets, nañapa' ama es nesherbena attoch ama't po'sapatapa' o'ch nanmoñ. ¹² Ñapa' atarr ahuañcates ñapa' ñach acerre' allohuen acheñenesha'. Ñapa' añ toma'ntena ñeñt' orrene' puehoshnat alloch shoshnan po'trigo o'ch e'ñe pue'llomirochayama. Ñeñt'ña pue'llomerpa' o'ch a'yapache' o'ch año'ch allecma año'teñ e'ñe cohuen. Pue'she'marñapa' o'ch huapore'ch tso allcha' e'ñe poyhua. Ñeñt'ña tso'pa' ama emaya'pahuo ama't errponaña. Ñeñt'pa' allohua atet' serrpare'tatanet' Juan.

*Allempo apataretta Jesús Yomporecop
(Mr. 1.9-11; Lc. 3.21-22)*

* **3:4** Ñeñt' ahuañchencllapa' arrapo' enteñ palestino'marnesha'.

¹³ Allempo huapa Jesús Galileoġ, ċhap Jordanaso allo'tsen Juan, ñapa' añ muenen o'ch apataġ Juan Yomporecop. ¹⁴ Juanña' eñoratsa ċha mueneñeñ o'ch emman Jesús. Ñeñġpa' atet otaġ:

—Ama pocteyaye o'ch napatapaġ ġa, añña poctetsa ġachña napatose'. Papa' eso'maruachña'ye ġonña nesho, ġaca'yeña ñeñġeġ atarr sherbets.

¹⁵ Jesúsña' atet otererr:

—Papatapno'tach Juanacha' tarro'mar atetca'ye poctetsa o'ch yetsoa allohuen ñeñġ poctetsa Partsocop.

Allempoña Juanpa' e'ñe pocte' eñċh, ¹⁶ allempoña' apatapan Jesús. E'ne apatue'pa' o' ċha'nerrña Jesús oñoġ, enetña' ahuepa't atorareġta. Alloġña e'ñe sohua'nma Parets Puecamquēñ, Jesúsña' e'ñe atet entaġ ñerra'mrrate' yeġ o' sohua'nma entoġ, e'ñe ċhap ñesho. ¹⁷ Allempoña' ċha e'morrtatsa ñaña ñoñets entoġ atet eñorena Yompor. Ñeñġña ñoñetspa' atet oten:

—Añmapa' ñeñġña Nechemer ñeñġ atarr nemorrentena. Ña atarr nanac nocshatene'.

4

Allempo oneñġpa' topatenan Jesús, mueneñ o'ch atet ġatan Jesús ñeñġ ama pocteye' enteno Yompor

(Mr. 1.12-13; Lc. 4.1-13)

¹ Allempoña Parets Puecamquēñpa' anman Jesús all amayo. Ñeñġpa' añecop atet ġa attoċña allpa' o'ch huapoña oneñġeġ, tarro'mar ñapa' añ mueneñ o'ch atet ġatyey ñeñġ ama pocteye' enteno Yompor.

² Allña' ama rreno e'ñe aña torrena attoċ etsotuan ora allohuen ñeñġ cohuentetsa Pomporecop. Ñeñġo'marña ama't o' pa'tatsoċ ċharramatpa' ama't coñe'tapa' ama es rreno yeġo ama't ñaña tsapo. O'ña pa'tatsoċ ċharramatuapa' ċho cheporratsa.

³ Allempoña' huapoña oneñġeġ. Atto topatosan Jesús'pa' atet otos:

—Pa ñerra'm po'ñoċhte' Parets Puechemereġpa' o'ch ġot: Añ mapue' puenasepa' pan.

⁴ Jesúsña' atet otaġ:

—Napa' ama nemno o'ch atet neġa tarro'mar Yompor po'ñoñ ñeñġ anuaret ahuatoteñ ñeñġpa' atet oteney: “Allohueney acheñeneshohueneypa' ama e'ñe rreñtsa ñapueġ yocrrañ yepeno. Añe'ñaña yocrrañ yepen yecamquēñecop ñeñġ allohuen allpon oteney Yompor.”

⁵ Allempoña oneñġpa' o' anemñ all Jerusaléño, ñeñġ anetserpa' anaret Partsocop. Allña' a'tapatos nanac eno allohuanen Parets pa'paquēll. ⁶ Allña' otuererr:

—Papa' ñerra'm po'ñoċhte' Parets Puechemereġ te'pa' ġomacha arroġ tarro'mar amach ġa'tserrġo tarro'mar Parets po'ñoñ ñeñġ anuaret ñeñġpa' ama'tña atet oten:

Yomporpa' o'ch mueñoñaġ po'mllañoġeñnaneshar ñeñġċha' pecuamġsapue'. Ñetċha' ġagapapuet, o'ch enatapapet attoċ amach ġa'tserrġatca'toso mapyo.

⁷ Allempoña Jesús'pa' alla otererr:

—Añpa'ċho'ña anuaret Yompor po'ñoño: “Amach ya'llocchame'tatsche Yompor ñeñġ Yepartseshar yepen.”

⁸ Allempoña oneñġpa' o' alla anerranerr Jesús all atarr aspenġo e'ñe a'noso. Alloġña gatyuesuererr allohuen ñeñġ allpon all añċha'taretetyena pa'namen acheñenesha' ñeñġ yeċha'yetsa erraġaren añe patsro, gatyuesuererr all atarr cohuentatyeñet. ⁹ Oneñġña'papa' alla otuererr:

—Ñerra'm na pema'yocheñoġen o'ch peconcorpana'tna, napa' napaġċha' ora allohuen ñeñġ cohuen pentyen arr.

¹⁰ Jesúsña'papa' alla otererr:

—Te'pa' o'ch orrerreḡ oneñeḡ. Napa' ama nemno o'ch atet neḡa tarro'mar Yompor po'ñoñ ñeñḡ anuaret ñeñḡpa' atet oteneḡ: “Añach ñapueḡ yema'yochena Yompor ñeñḡ Yepartseshar yepen, e'ñech ñapḡa yesherbe'.”

¹¹ Allempoña oneñeḡ topatuahuan Jesús'pa' o' ahuer' o' queḡhpa'ner. Allempoñapa' ḡhaḡha'toña Yompor po'mllañoḡeñnaneshar; ñetñapa' e'ñe cohuen sherḡoset Jesús all. Arrpa' allohua huañ atto oneñeḡpa' topatenan Jesús allempo.

Allempo e'ñe ñenmaḡ torrena Jesús Partsocop all Galileo
(Mr. 1.14-15; Lc. 4.14-15)

¹² Allempoña Jesús e'mare'tan Juan o' yottamḡset, ñaña'pa' allenta ahuer' Galileo.
¹³ Cherr Galileopa' ama a'pohuerro anetso Nazareto, arraña serr Capernaumo, allña yeḡha'huerra. Ñeñḡ Capernaumpa' e'ñe sa'patopño'tsen, allara ñeñḡ otenet Zabulónnanesha' pa'netser ñaña Neftalenesha' pa'netser. ¹⁴ Ñeñḡpa' allña yeḡha'huerra allochñapa' attoch etsota Isaías po'ñoñ ñeñḡ a'mḡtaye't Yompor po'ñoñ; ñeñḡ ñapa' atet ote't ñeñḡ anetsrecop:

¹⁵ Ñeñḡ Zabulónnanesha' pa'netsro ñaña Neftalenesha' pa'netsro ñeñḡ all sa'patopño all Jordanas yomḡta'n, allara Galileo all yeḡha'yena pa'namen acheñenesha' ñeñḡ ama judioneshayayeto.

¹⁶ Ñeñḡ acheñenesha'pa' ñetpa' aña yeḡha'yenet ñeñḡ ama cohuenaye' enteno Yompor; ñetpa' ḡha ottenet ñerra'm checmeto'tseneta. Tarraña te'ñapa' o' enteret ñeñḡḡha' e'ñe cohuen a'puetarsamḡperrahuet poḡḡapñet. Ñetña ama't aña o'patyesahuetañe't rromueñets ñeñḡara chenqueñets, te'ñapa' ama't ñocpuetpa' o' a'puetarsamḡsaretterret e'ñe cohuen. Arrpa' allohua atet nane't Isaías po'ñoñ.

¹⁷ Allempo cherr Jesús Galileo allempoña e'ñe ñenmaḡ serrpare'tatuerranet all. Ñeñḡpa' atet otuerranet:

—Te'pa' o'ch soḡtape'cherr ello cohuen Yomporecop tarro'mar te'pa' o' ḡherrmoch allempoch ayochreshatterra Yompor ñeñḡ pue'ntaño'tsen.

Atto Jesús'pa' ḡhore'tosan pa'tatssheña ñeñḡ e'ñe caca torrenet rromuet
(Mr. 1.16-20; Lc. 5.1-11)

¹⁸ Allempo Jesús'pa' chopeñe'chyen all sa'patopño'mar; ñeñḡña sa'ppa' añ pa'so'cheñ Galileas. Allña'pa' entosan acheñ epsheña; ñeñḡña puesheñarrpa' añ pa'so'cheñ Simón ñeñḡara soḡhetsa Pedro epuet pa'mo'nasheñ Andrés. Ñetñapa' terrayetsset e'ñe alla sa'po tarro'mar ñetpa' e'ñe ñeñḡa po'taruas penet. ¹⁹ Jesúsñapa' atet otosanet:

—Te'ñapa' o'ch notas, soḡta'n na attoch neyochresha' neperres. Ñeñḡ atet sepena ahuatoteñ e'ne' cac te'ñapa' o'ch neyḡhatterres attoch se'nerr ñaña acheñ ñeñḡḡha' same'ñaterra.

²⁰ Ñetñapa' allorocma na'nmu'et po'terrayapa' o' coḡet Jesús.

²¹ Allempoña meterrerr allotpa' entuerranerr po'poñ acheñ epsheña; ñeñḡña puesheñarrpa' añ pa'so'cheñ Jacobo* epuet pa'mo'nasheñ Juan; ñeñḡpa' Zebedeo puechemeresha'. Ñetñapa' po'noñḡo'tsa'yenet; allo'tsen ñaña pomporet all a'cohuenetyenet po'terraya. Jesúsñapa' ḡhore'tuerraneterrpa' atet otuerraneterr ñamet:

—Te'pa' o'ch soḡta'n saña.

²² Ñetpa'ḡho'ña e'ñe allorocma na'nmu'et po'noñḡ ñaña pomporet o' coḡet ñamet Jesús attoch pueyochresha' perranet ñamet.

Allempo Jesús'pa' yeḡhatenan shonte' acheñenesha'
(Lc. 6.17-19)

* 4:21 Jacobopa' ñeñḡara ñeñḡ sochenet Santiago.

²³ Allempoñapa' chopeñe'chyes Jesús erraḡaren Galileo'mar. Yečhatyesosan judione-sha' e'ñe ñet po'prahuet. Allña'pa' serrpare'tatosanet cohuen ñoñets atto ayochreshattena Yompor. A'crratyesosan acheñenesha'; ama't pa'namen osyenahuet, ama't pa'namen a'prrama'yenahuet, ñaña'pa' e'ñe a'crratyesuosanet. ²⁴ Atteña'pa' e'mare'tuet erraḡaren ama't Sirio'mar. Huapatyesoñet allohuen ñeñt' muerochtatyen atsnañets. Huapatyesoñet ñeñt' osyen pa'namen atsnañets ñaña ñeñt' atserrpañachno. Huapatyesoñet ñaña ñeñt' chorra'yena oneñet ñaña ñeñt' otañachno ñaña echarrañachno. Allohuenetpa' ñaña'pa' e'ñe a'crratyesuerranet. ²⁵ Shonte' acheñenesha' ñeñt' co'ta'yese'. Co'ta'yese galileo'marnesha', ñaña decapoliso'marnesha' ñaña jerusaléno'marnesha', ñaña judeo'marnesha'; ama't ñeñt' yečheta Jordanaso yom'ta'npa' o' e'ñe co'ta'yese.

5

Allempo Jesús'pa' serrpare'tatosanet all aspen'to

¹ Allempoña entan shonte' acheñenesha' ñeñt' co'tene', Jesúsña'pa' ahuo' aspen'to. Allña anorrospa' hua'cha'toña allohuen pueyochreshachno. ² Ñaña'pa' yečhatapanetpa' atet otapan acheñenesha' ñeñt' po'ño'ch atarr cosheñtso'tsa'yenet:

Acheñenesha' ñeñt' po'ño'ch atarr cosheñtso'tsa'yenet (Lc. 6.20-23)

³ —Nanac cosheñtso'tsa'yen allohuen ñeñt' ama esoye' asherbenaye' entyetso pueyochreto Yomporecop tarro'mar ñetpa' o'paterretcha' Yompor po'cohuenña atto ayochreshattena pue'ntañot.

⁴ 'Nanac cosheñtso'tsa'yen allohuen ñeñt' lleca'yetsa Yomporecop tarro'mar ñetpa' coshaterranetcha' Yompor.

⁵ 'Nanac cosheñtso'tsa'yen allohuen ñeñt' ama añeye' e'neneto ñeñt' e'ñe ñocpueta tarro'mar ñetpa' o'pataterranetcha' Yompor allohuanen pats.

⁶ 'Nanac cosheñtso'tsa'yen allohuen ñeñt' nanac muenene' o'ch e'ñe orrtatyenet ñeñt' e'ñe pocte' enten Yompor. Ñetpa' e'ñe atet mueneñet ñerra'mrrate' cho nanac yachporrena ñaña nanaccha' yo'ñpa'ten. Nanac cosheñtso'tsa'yenet ñet tarro'mar Yomporña e'ñe atet muenaterranet.

⁷ 'Nanac cosheñtso'tsa'yen allohuen ñeñt' nanac cohuen muerannetsa tarro'mar elloña Yomporpa' atarrcha' muererranet ñet.

⁸ 'Nanac cosheñtso'tsa'yen allohuen ñeñt' e'ñe pueyochretopa' ama eñalle sosya'tsañ ama't coñe'ta tarro'mar ñetpa' enteretcha' Parets.

⁹ 'Nanac cosheñtso'tsa'yen allohuen ñeñt' chocma amo'tstanna'tatenahuet tarro'mar ñetpa' po'ño'chcha' Yompor puechemer perranet.

¹⁰ 'Nanac cosheñtso'tsa'yen allohuen ñeñt' e'moñe'tyenet atto ñetpa' e'ñe pocte' es pa'yenet Yomporecop. Nanac cosheñtso'tsa'yenet tarro'mar ñetpa' o'paterretcha' Yompor po'cohuenña atto ayochreshattena pue'ntañot.

¹¹ 'Sapa'cho'ña nanac cosheñtso'tsa'yenes ñerra'm esempo erro'tuanen penset no'mar. Nanac cosheñtso'tsa'yenes ñerra'm cho sapa' sasare'tyenset, e'moñe'tyenset, pa'namen sosey toma'tam'pesyenset. ¹² Chocmuepa'chña socsha tarro'mar shonte' ñeñt' o'patatensa Yompor pue'ntañot; ñeñt'cha'ña atarr socshaterre'. Ama't ahuatoteñ allempo ama se'ñalletena' attecma e'moñe'tyesete't ñaña ñeñt' a'm'ta'yese't Yompor po'ño'.

Acheñenesha' ñeñt' sherbets Yomporecop arr patsro ñetpa' atet atma'ntatarettenet ñerra'm pos ñaña puetare' (Mr. 9.50; Lc. 14.34-35)

¹³ 'Sapa' ñeñtes name'ñenaya añ netma'ntatensa atet ñerra'm pos ñeñt' atarr sherbene' allohuen acheñenesha' arr patsro. Tarraña pospa' ñerra'm o'ch huañer po'poserrteña amach erro'tenot ello'pa' ya'poserrtatere. Allempopa' o'huañcha' es

sherba' acheñeneshacop; añecpach sherberr o'ch yehuapore'ch a'yo allcha' atmama'ch acheñenesha'.

¹⁴ Ñaña añ netma'ntatensa puetare' elloña ñeñña atarr sherbene' acheñenesha' arr patsro. Sapa' chocmach cohuen es sorrtatyen. Atetcha' sepene ñerra'mrrate' paterr anets ñeñt' e'ñe a'noso'tsen aspento. Ñeñña anetserpa' chocmach cohuen orrtena allemateñ, amach errotenot ma'natacheto. ¹⁵ Ñaña ñerra'm esempo ya'llchaten lampareña' ñeñtpa' ama tarrecpaye' ya'llchateñe o'ch ye'rramam̄pes coym̄o. Ñeñtpa' añecopña ya'huortateñ o'ch yene' enonet attoch e'ñe choyo'tam̄pesuan allohuen ñeñt' pocollo'tsa'yen. ¹⁶ Sapa' attecmuepa'chña sorrtatyen ñeñt' cohuen enten Yompor. Allochña' po'potantaña'cho'ña e'ñech cohuenare' entennaset atet es sorrtatyen cohuen. Attochña ñetpa'cho'ña cohuentatapreterrasetcha' Seyomporer ñeñt' pue'ntañ'o'tsen.

Atto Jesús'pa' ye'chatosanet atarr sherben Yompor po'ñoñ ñeñt' atet anaret ahuatoteñ

¹⁷ Jesús'ña'pa' atet oterraneterr:

—Amach soctape'chatsto napa' añecopte' nohuapa o'ch nehuapore'taterr Yompor po'ñoñ ñeñt' ahuatoteñ atet anaret atet ñerra'm Moisés po'ñoñ ñaña añ po'ñoñ ñeñt' quellca'yese't ñeñt' a'mta'yese't Yompor po'ñoñ. Napa' ama añecpaye' nohuapo o'ch nehuapore'tach, napa' e'ñechca'yeña netsotatuer. ¹⁸ E'ñe po'ño'ch notenes: Ama ahuapore'tpahuoyaye Yompor po'ñoñ ñeñt' atet anaret ahuatoteñ, ama't tayoteñ tarrempohuach esempohuañencha' chenca'huerra pats ñaña enet. Ama't patrra ñoñets ñeñt' atet anaretpa' amach chenquerro ama't e'ñe patrra quellec puehempotollohuenpa' amach chenquerro ama't tayoteñ tarrempohuach esempohuañencha' e'ñe etsotuerra ñeñt' atet oten ahuatoteñ. ¹⁹ Ñeñto'marña ñerra'm esesha' o'huañ e'ñeye' ame'ña'po' entan ama't patrratolla ñoñets ñeñt' atet anaret ahuatoteñ ñaña ñerra'm attach ye'chatan po'potantañ, ñeñña acheñerpa' amach tama sherbeno Yomporecop ñeñt' atto ayochreshattena ña pue'ntañ'o'. Tarraña ñerra'm esesha'chña e'ñe etsoterre' ñaña ñerra'm e'ñech atet ye'chatan po'potantañ, ñeñña acheñerpa' ñeñt'cha'ña atarr sherberrets Yomporecop attoch ayochreshatterra ña. ²⁰ Napa' o'ch notas, po'ño'chca'ye sa atet e'ñe pocte' es sorrtatyen, ellochña semtana'tuerepa'ch atet es cohuen orrtatyeneñ fariseonesha' ñaña añ ñeñt' atarr etsotayenayeñ ñoñets ñeñt' atet anaret. Ñerra'm amach semtana'tuerranetopa' amach errotenot so'pataprechoña Yompor po'cohuenña atto ayochreshattena ña pue'ntañ'o'. Attoña ama't ahuatapa' amach se'cherro all amcha'tare'ttena pue'ntañ'o'.

Atto Jesús'pa' ye'chatosanet ama e'moñe'tanna'tpahuoyaye

(Lc. 12.57-59)

²¹ Jesús'ña'pa' alla yerpaterraneterr ñeñt' atet anarettete't ahuatoteñ ñoñets, ñeñtpa' atet oterraneterr:

—Sa ahuatoteña' se'marte'ña atet otare'tte't ahuat' acheñenesha'. Ñeñtpa' atet otare'tte't: “Amach muetsatsteto acheñ. Ñerra'm esesha' muetsene' acheña' ñapa'cho'ña muetseretcha' tarro'mar ñeñtotcha'ña o'patateret coñcheñets.” ²² Elloña na te'pa' o'ch noterres, ama't ñeñt' atta e'moñe'tene' pamo'tspa' ñapa'cho'ña ñeñtotach o'patateret coñcheñets. Ñaña ñerra'm esesha' atarr sosyot sochatse'teñet pamo'ts ñeñtpa'cho'ña ñeñtotach o'patateret coñcheñets allo'tsa'yen amcha'taretnesha'chno allecma a'pocatenet ñoñets. Ñaña ñerra'm esesha' puepencare'teñot atarr sosyot sochatse'teñet pamo'ts ñeñtpa'cho'ña acheñerpa' añ o'patenaya tso' ñeñt' parrarets eraparen.

²³ Ñeñto'marña napa' o'ch notas: Ñerra'm esempo cho es papuen Yomporecop allecma sherbene't Yompor allña'pa' taya o' peyerposya pamo'tsña'pa' cha patrrate'mateñ, ²⁴ paña'pa' ñeñt'cha' pap Yomporpa' pena'ner alla. O'ch ahuerrep, pemo'nasheñña ñanom

řamo'tsterra'. Allempochña pepuerrerra allecma sherbeñet Yompor allempochña řaphuer Yompor ñeñř řo'patateña.

²⁵ 'Ñaña ñerra'm esempo esesha' setmantene' o'ch anmaset añcha'taretesho allcha' sa'pocataerra' señoñ, sañapa' e'ñech allorocma samo'tstera ñeñř se'moñe'tene' řayepa'tñapa' ama seçhena' añcha'taretesho. Chosachña amo'tsterraya ñeñř setmantene' ře't attoř pomataterrset añcha'taretesho ñaña'pa' o'ch pomuensa' guardiyesho ñeñřcha' seyottamřse'. ²⁶ Po'ñoçhca'ye o'ch notas, ñerra'm çhoch yottamřsasetpa' allenasachca'ye o'pono allotpa' amachca'ye ahuen çha'nmaterrseto. Esemphuañencha' çhoch seçha'nmaterret ñerra'm esempoch e'ñe setsa'tuerra ora allohuen ñeñř allpon quelle muenenet. Ama't e'ñe eptalla centavotollña ñerra'm ama setsa'tueña'pa' amachca'ye çha'nmaterrseto allot. Ñeñřo'marña notenes o'ch e'ñe cohuen samo'tstera ñeñř se'moñe'tene' řayepa'tñapa' ama çhennasa' ñeñř atarr yoroçhen senten socop.

Atto Jesús'pa' yeçhatosanet ama achtapretpahuoyaye taporets

²⁷ 'Ñaña sapa' ahuařoteñ se'marte'ña atet otarettete'ř acheñenesha': "Amach chetapre-tatsteto řaporets." ²⁸ Elloña na ře'pa' o'ch noterres, ñerra'm esesha' cohueñe' coyanesha' pueye'cheñoř, o'ca'ye ochña'tet pueyoçhreto.

²⁹ 'Ñeñřo'marña notenes: Ñerra'm seclle' řatyenes ñeñř ama pocteye' enteno Yompor, añ pocetsa o'ch sequeçhpurr ñeñř seye'çhena seclloyoř. Ñeñřpa' e'ñe atet ñerra'mrrate' çho serroten seclle' o'ch sehuapore'çh, ama't ñeñř seclle' secohuenrote'tsen ñeñř atarr sesherbene'. Añña ama tama yoroçhenayaye socop o'ch sa'ypo'ñer e'ne řayecma ñeñř soçtape'chatene' sosya'tsañ. Añcha'ña atarr yoroçhen socop ñerra'm ama řayecma sa'ypo'ñerepa' esempohuañenpa' orach huapore'terrset coñcha'puetso all parraren tso'. Ñeñřpa' añ toma'ntena atet ñerra'mrrate' o' ya'çhencaterr pařerr yechets ama't yeclle' ama't yot, ře't esempohuañen ora yechtsohuenpa' huapore'terryet coñcha'puetso. ³⁰ Attecma ñaña ñerra'm sotpa' řatyenes ñeñř ama pocteye' enteno Yompor añ pocetsa o'ch sequeçhpurr ñeñř atet çhocma řatse'tatyenes sot. Ñeñřpa' e'ñe atet ñerra'mrrate' çho sepechen sotpa' o'ch sehuapore'çh, ama't ñeñř secohuenrote'tsen sot ñeñř atarr sesherbene'. Ñeñřpa' o'ch alla noterrser. Añña ama tama yoroçhenayaye socop o'ch sa'ypo'ñer e'ne řayecma ñeñř soçtape'chatene' sosya'tsañ. Añcha'ña atarr yoroçhen socop ñerra'm ama řayecma sa'ypo'ñerepa' esempohuañenpa' orach huapore'terrset coñcha'puetso.

Atto Jesús'pa' yeçhatosanet ama asanna'tpahuoyaye

(Mt. 19.9; Mr. 10.11-12; Lc. 16.18)

³¹ 'Ñaña ře'pa' o'ch noterrser po'poñ: Sapa' ahuařoteñpa' señoñe'ña atet otarettete'ř: "Ñerra'm esesha' serre' puetaporpa' apa'nme'pa'ña papell all aquellcareř attoch queçhpurr puetapor." ³² Elloña na ře'pa' o'ch noterres: Ñerra'm ama añeçpaye' queçhpurrano puetapor atto ama çhoje' aguëñano po'psheñeñ yacma, ñerra'm attořa serran puetapor, ñaña'pa' ochña'taterrancha' puetaporeshe'mañ po'psheññeshoř; ñeñřpa' ama cohuenaye' enteñe Yompor. Ñaña ñerra'm esesha'ña yorerre' ñeñř asareřpa' ñeñřña yacmarpa' çhach chetapretenan po'psheñeñ puetapor; ñeñřpa'çho'ña ama cohuenaye' enteñe Yompor.

Atto Jesús'pa' yeçhatosanet amach natsteto po'ñoñ Parets pa'so'chño

³³ 'Ñaña ře'pa' o'ch noterrser po'poñ: Sa ahuařoteñpa' se'mare'ña ñeñř atet otarettete'ř: "Amach e'ñe orrena na'yeneto po'ñoñet Parets pa'so'chño řarro'mar ñerra'm erra'tsen nene' po'ñoñ Parets pa'so'chño ñeñřpa' atarr huomenc ñoñets amach atta puesatscheto, çhocmachña e'ñe a'pocatyenet ñeñř atet o' nohuetña po'ñoñet Parets

pa'so'chño." Ñeñtpa' atetca'ye otarettete'tña ahuatoteñ. ³⁴ Tarraña elloña na te'pa' o'ch noterres: Ama't e'ñe erra'tsena pa'so'chño'pa' amach senatsto señoñ. Amach sotatsto o'ch sena' señoñ Yompor pue'ntañ pa'so'chño; ñeñtpa' ama tama huomencaye' senteññe ñeñtecop atet senen señoñ. Tarro'mar napa' o'ch notas ama't pue'ntañpa' ñeñt po'conañ pen Parets ñeñto'marña attera atarr huomenc ñerra'm Pamo'mte'. ³⁵ Ñaña amach sotatsto o'ch sena' señoñ Yompor po'patseñ pa'so'chño tarro'mar ñeñtpa'cho'ña attera atarr huomenc tarro'mar ñeñtpa' ñeñtña nen Parets pa'tconet. Ñaña amach sotatsto o'ch sena' señoñ Jerusalén pa'so'chño tarro'mar ñeñtpa'cho'ña attecma atarr huomenc tarro'mar ñeñtpa'cho'ña ñeñt pa'netser pen Parets. ³⁶ Ñaña amach sotatsto o'ch sena' señoñ e'ñe sa soñ pa'so'chño tarro'mar ñeñtpa'cho'ña ama soyaye seye'chcatar. Ama't e'ñe pue'parra sechpa' amate' errotentō sello'tacheña sa. Ñaña ñerra'm esempoch sello'tenpa' amach errotentō alla sa'quelluetatereña sa. ³⁷ Ama't errotena sepa'yesa'chpa' atetcha' sotanna'tyesa: Ñeñtpa' atetcha'ca'ye yepe'. Ama palltenoña o'ch sena'yen señoñ ama't e'ñe esa pa'so'chño tarro'mar ñerra'm atet sepa'yenapa' ñeñtpa' oneñe'feshota huena.

Atto Jesús'pa' ye'chatosanet ama atsa'tatpahuoyaye atto e'moñe'tenyet
(Lc. 6.29-30)

³⁸ O'ch alla noterrser po'poñ: Ñaña sapa' ahuatoteñ se'mare'tña ñeñt atet otete't: "Ñerra'm esesha' pochocle'che' pamo'ts, semoñseñoñ ñeñt apochocle'charetpa' sepo'chocle'ch ñaña ñeñt pochocle'chene' pamo'ts. Ñaña ñerra'm esesha' pue'moñe'teñoñan a'cayam'psan pamo'ts pa'spa' semoñseñoñpa' sa'cayam'pes ñaña pa's ñeñt a'cayam'pene' pamo'ts pa's." Ñeñtpa' atetca'ye otarettete'tña ahuat. ³⁹ Tarraña na te'pa' o'ch notas ellonet: Amach semoñsatstoña sa e'ñe sañeña ñerra'm esempo e'moñe'tyenset. Atet ñerra'm esempo esesha' pue'moñe'teñoñetas o'ch tacllaset setsa'po secohuenrot, sañapa' poctepa'chña señch tacllerrserrepa' ñaña po'pshem'tañot. ⁴⁰ Ñaña ñerra'm esempo esesha' muenene' o'ch temantaset attoch puerratan'psaset seshtam, sañapa' poctepa'chña señch puerratan'psasetepa' seshtam ñeñt muenenet ama't ñaña po'pmañ seshtam allo sepmatena. ⁴¹ Ñaña ñerra'm esesha' sanmatsre'tatene' e'ñe atta paterr kilómetro, sañapa' poctepa'chña señch o'ch sanmatsre'ch ama't epa kilómetro. ⁴² Ñaña ñerra'm esesha' es senamuene', sañapa' sapepa'ch. Ñaña ñerra'm esesha'ch senamuene' o'ch es sarchapa' sañapa' sarchepa'ch.

Atto Jesús'pa' ye'chatosanet amorrentpo'ch yeñch ñeñt ye'moñe'tyene'
(Lc. 6.27-28, 32-36)

⁴³ Ñaña sapa' se'marte'ña atet otete't ahuat: "Mueryetcha' pamo'tset ñeñt muerenahuet. Tarraña ñeñt e'moñe'tenahuetpa' ñetpa'cho'ña o'ch e'moñe'chet ñamet." Ñeñtpa' atetca'ye otete't ama't ahuatoteñ. ⁴⁴ Tarraña naña te'pa' elloña o'ch noterres: Semueryach ama't ñeñt se'moñe'tene'. Ñaña ñeñt sarrnomare'tenaya sañapa' o'ch senamaterrñañ Yompor pa'nateña. Ñaña ñeñt erroñ sepene'pa' sañapa' añcha' atet sepoñ ñeñt atarr cohuen enten ña. Ñaña ñeñt sa'muero'chtatene' sañapa' o'ch sema'yocham'pesya. ⁴⁵ Attochña sapa' eñotenset po'ño'ch puechemer penes Yompor ñeñt pue'ntañot'sen tarro'mar sapa' añ sorratyen cohuen ama't e'ñe allohuenacop e'ñe atet pena Sompōr ñapa' e'ñe cohuenare' es orrtatyen ama't allohuenacop. Atet ñapa' chocma huapata'muenane't po'puetarenña allohuenacop ama't atsrre'mña'fecop ñaña ñeñt cohuenacop acheñer. Ñaña ñapa' chocma huatateñ añecop ñeñt e'ñe pocte' es pets ama't ñaña añecop ñeñt ama pocteye' es pa'yetso. ⁴⁶ Ñeñto'marña notenes: Ñerra'm aña e'ñe semorrentena ñeñt semorrentenaya saña ñeñtpa' amach e'ñeye' sorratenoña ñeñt e'ñe po'ño'ch cohuentetsa, attoña Yomporpa' amach es apuerro ñeñtcha' atarr

socshaterre'. Tarro'mar ñeñt ama ame'ñenayo Yompor, ñetpa' aña morrentenet ñeñt e'ñe morrentenahuet ñamet. Sapa' e'ñeca'ye señoñe e'ñe atet pena ñeñt puehquëñoñe'na cobrenan acheñenesha' shonte' quelle. Añña atarr cohuentetsa ama't ñeñt ama yemor-
rentenayepa' o'ch yemorreñcha e'ñe cohuen. ⁴⁷ Ñaña ñerra'm e'ñe aña cohuen saguën ñeñt e'ñe samo'ts sepen, ñeñtpa' amach errotenoñ semtanoña ñeñt ama ame'ñetso, tarro'mar ñetpa' e'ñe aña cohuen aguënet ñeñt e'ñe pamo'ts penet. ⁴⁸ Ñeño'marña napa' notenes: Sapa' e'ñepa'chña cohuenare' es sorrtatyen allohuenacop e'ñe atet pena Somp por ñeñt pue'ntaño'tsen e'ñe cohuenare' es orrtatyenña ña.

6

Atto Jesúsapa' yeçhatosanet amach pommo'cheñoñe'na es cohuen orrtatatsteto

¹ Jesúsñaapa' atet oterraneterr:

—E'ñech señoña, amachña e'ñe sommo'cheñoñe'naña es sorrtatyeno cohuen Yompor-
cop attoch acheñenesha'pa' o'ch entenset sapa' atarro' cohuen acheñeseñ. Tarro'mar ñerra'm ñeñtecpa'na es sorrtatyen cohuen, Yomporña ñeñt pue'ntaño'tsenpa' amach es apuerrsoña sa ñeñtcha' atarr socshaterre'. ² Ñerra'm esempo es sapueñ huoc-
chañnesha'pa' e'ñechña a'nahua sapuenanet. Sommo'cheñoñpa' amach sotatsto en-
tasepa' allohuen acheñenesha' attoch e'ñe cohuen entasetañ. Tarro'mar ñeñtpa' om-
moñañenesha' atet petsa. Ñeñt ommoñañenesha'pa' ñerra'm esempo es apueñet huoc-
chañnesha'chnopa' o'ch orrtachet allo'tsa'yen allohuen acheñenesha' all puerahuo'mar
ama't ñaña toño'mar; attochña allohuen acheñenesha'pa' e'ñech cohuen entenanetañ.
Tarraña napa' o'ch notas, ñeñt atet petsapa' Yomporñaapa' amach es apuerraneto
ñeñtcha' atarr coshaterrahuet. Tarro'mar ñetpa' aña e'nenet acheñeneshach cohuentate-
nahuet. Ñetpa' e'ñech alla atsa'taretterret. ³ Tarraña sapa' ñerra'm esempo es sapueñ
huocchañnesha'chno amach esesha' sota'psa'tatsto ama't ñeñt e'ñe parro seyemtannena.
⁴ E'ñechña a'nahua es cohuen sepa'yen, allochñaapa' Somp or ñeñtña entene' allohuen
ñeñt a'nahua es sepa'yen, ñachña sapuerre' ñeñtcha' ello atarr socshaterre'.

Atto Jesúsapa' yeçhatosanet e'ñech cohuen ma'yochet

(Lc. 11.2-4)

⁵ Jesúsñaapa' atet oterraneterr:

—Ñaña ñerra'm esempo sema'yochena sapa' amach atet sepatsto atet pena om-
moñañenesha'. Ñetpa' añecpaña ma'yochenet attoch acheñenesha'pa' e'ñech cohuen
entenanetañ. Ñeño'marña allempo ma'yochenetpa' arrach tomyesoset all shontena
acheñenesha' puerahuo'mar amapa' all etsape'tyena toñ allecma huachena shonte'
acheñenesha' attochña allohuen acheñenesha'pa' e'ñech cohuen entenanetañ. Tarraña
napa' po'ñoçhpa' o'ch notas: Ñeñt atet ommo'chetsa Yomporñaapa' amach apuer-
raneto ñeñtcha' coshaterrahuet tarro'mar ñetpa' aña e'nenet acheñeneshach cohuentate-
nahuet. Ñetpa' e'ñech alla atsa'taretterret. ⁶ Sañapa' ñerra'm esempo sema'yochenapa'
o'ch sebe'tosyes so'ponro çochña seyottam'psa attochña sapa' amach sommo'cheñoña
sema'yochenoña Somp or, ñeñtpa' e'ñech ñapueñ allo'tsenes epas. Allochñaapa' Somp or
ñeñt e'ñe ñapña sentene' ñachña sapuerre' ñeñtcha' ello atarr socshaterre'.

⁷ Sa ñerra'm çho sema'yochenapa' amach atta nanac señosatsto atarr aton e'ñe orrena
ñeñt atet pena po'poñ acheñenesha' ñeñt ama ame'ñenayo ñeñt ya Yeyomporer. Ñetpa'
atarr tematen ma'yochenetañpa' tarraña ñeñtchach alla oterrete't. Chate' otenapuetañ
ñerra'm atarr tematen eñosetpa' e'ñeñe' cohuen entenanet Yompor attoch e'ñe cohuen
e'mñnotenat. ⁸ Sañapa' amach atet sepatsto atet penet ñet tarro'mar sapa' ama't ama
es senamuena' sema'yochenoñ, Somp orña e'ñe eñotuennas ñeñt sepallta'yena. ⁹ Sañapa'
atetcha'ña cohuen sema'yochaña sa:

Yompore Partso ñeñteḡ pe'ntaño'tsen, yentapepa'ch ḡa atarr Partsoḡ.

¹⁰ Chapuepa'ch Nompore allempoch atarr ḡa'yochreshatterra arr patsro. Yetsotonapepa'ch arr patsro ñeñt atet pemnen ḡa Nompore ñeñt atet penet ñaña all pe'ntaño.

¹¹ Chocmuepa'ch Nompore ḡapueney ñaña yocrrañ ñeñt allpon yepallta'yena pate'tets yeḡ.

¹² Peḡretna'huonayepa'ch Nompore allohuen yo'chñar ñeñt ama pocteye' pentapretenye atto Nompore yapa'cho'ña yeḡretnannena ñerra'm esempo erroḡ yeḡannena.

¹³ Ñaña amach Nompore pemnatatsche sosya'tsañ o'ch atarr topateney. Añcha'ña ḡhoch Nompore ḡa'ypo'ñataterrey allohuen sosya'tsañeḡhno. Tarro'mar e'ñe ḡa Nompore ayochreshattetsa ñeñteḡ atarr Partseshatets, e'ñe ḡapḡa ñeñteḡ Nompore aye'choḡtataretetsa e'ñe errponañohuen. Ñeñtach nenamaḡ; ñeñḡpa' attepa'ch Nompore.

¹⁴ 'Ñerra'm sa ḡhocma seḡretnannena atto erroḡ seḡannena' sapa'cho'ña ḡhocmach peretnerresña Sompore ñeñt pue'ntaño'tsen. ¹⁵ Tarraña ñerra'm ama ḡhoc seḡretnannena' Somporepa'cho'ña amach peretnerrnasoña saña so'chñar.

Atto Jesúsḡa' yeḡhatosanet ñeñt e'ñeḡ po'ñoḡh tore'teñets Yomporecop

¹⁶ Jesúsḡapa' atet oterraneterr:

—Ñaña ñerra'm esempo semneñ sema'yocheñoḡ Yompore o'ch sequeḡpa' serrar ñeñḡpa' e'ñe pocte'. Tarraña ñeñḡpa' ama añeḡpayaye attoch entas acheñenesha' ñerra'm ḡha sellca'huenta. Tarro'mar ñeñḡpa' ommoñatenesha'ña atet petsa. Ñetpa' ñerra'm esempo queḡhpunenet puerrar Yomporecop ñetpa' attach atsocḡloyayenet allochñapa' attoch eñotenanet acheñenesha' ñetpa' Yomporecop' atet penet. Tarraña na po'ñoḡhpa' o'ch notas: Ñeñt atet ommo'chetsa pueḡore'teñoḡ Yomporeña' amach es apuerraneto ñeñḡcha' atarr coshaterrahuet. Tarro'mar ñetpa' aña e'nenet acheñeneshach cohuentatenahuet. Ñetpa' e'ñeḡh alla atsa'tareḡterret. ¹⁷ Tarraña sa ñerra'm esempo e'ñe sema'yocheñoḡ Yompore o'ch sequeḡpa' serrar sapa' atterachña sorrtena e'ñeḡ cohuen satsaño'tyena ñaña se'pacḡe'chyena. ¹⁸ Allochña acheñenesha'pa' amach ḡha eñotaseto sapa' ḡhoc sequeḡhpunenet serrar ma'yochaya Yompore. Sapa' e'ñeḡ ñapḡa Sompore sentene' ñeñt pue'ntaño'tsen. Allochñapa' Sompore ñeñt e'ñe ñapḡa sentene' ñachña sapuerre' ñeñḡcha' ello atarr socshaterre'.

Atto ñeñḡcha' seshonterr ñeñt atarr sherbets arrca'ye seshonteñ all Yompore pue'ntaño (Lc. 12.33-34)

¹⁹ Jesúsḡa' alla oterrer:

—Ñaña amach seshonta'yestatsto checmañats aña patsro ñeñḡcha' atarr semorrentena. Ñeñḡpa' atarr apomḡpere'chña atarr aptsaña. Ama't eñeḡpa' o'ch be'tosamḡponasapa' o'ch yoratsre'tamḡpesuas. ²⁰ Yompore pue'ntañoḡhña seshonta'yeseña ñeñt e'ñe po'ñoḡh sherbets. Ñeñḡpa' ama apomḡpere'chño ñaña ama aptsaño. Allpa' ama't eñeḡpa' ama be'teno attoch yoratsre'tamḡpesuas. ²¹ Tarro'mar ñerra'm all Yompore pue'ntaño seshonta'nen ñeñt atarr cohuen senten, yeñoteñ e'ñe ñeñḡa paterr senen seyoḡhro ñeñḡña atarr sherbets Yomporecop. Tarraña arr patsro ñerra'm aña seshonta'nen ñeñt atarr semorrentena, yeñoteñ e'ñe ñeñḡa paterr senen seyoḡhro ñeñḡña' ama es sherbenoña Yomporecop.

Atto yeḡḡle'pa' añ toma'ntena ñeñt po'lampareñ pen allohuen yeḡhets (Lc. 11.34-36)

²²⁻²³ Jesúsḡapa' alla oterraneterr:

—Yecle'pa' añ toma'ntena atet ñerra'm ñeñt po'lampareñ pen ora yechets. Ñerra'm e'ñe cohuen huomech yecle'pa' e'ñech cohuen entateney puetare'. Allochñapa' attoch e'ñe cohuen torratyenana allemeñ yechets tarro'mar e'ñe cohuen a'puetarsam̄psarettenet. Tarraña yecle'ña ñerra'm ama e'ñe cohuen huom̄cheyayepa' amach e'ñe cohuenaye' entatenye puetare' attochña amach eshcaye' torratyenano allemeñ yechets tarro'mar čha ottena ñerra'mrrate' checmeto'tsa'yeneta. Attecma pena ñaña yeyočer. Ñerra'm e'ñe cohuen yoctape'chyen yeyočhro, ama aña es ye'nyeno ñeñt e'ñe yocpa, attoña čhennayaña e'ñe ora allohuen Yompor poctaṗña ñeñt po'cohuenña pen. Attoña ora yoctaṗña e'ñech a'puetarsam̄psarettena Yomporeshot. Tarraña ñerra'm ama cohuenaye' yoctape'cheno yeyočhro, ñerra'm aña ye'nyen ñeñt e'ñe yocpa ñeñtṗa' amach errotenot a'puetarsam̄penyeña ñeñt yoctaṗña yepen. Ñeñtña yoctaṗña yepenpa' atarrcha' a'checmetaṗennay yeyočer.

Amach aña yema'yočhratsto ñeñt e'ñe yocpa attoch yegana aton quelle; ñeñt atetṗa' amach errotenot yema'yočhroña ñaña Yomporecop

(Lc. 16.13)

²⁴ 'Ñeñtṗa' atetcha' yetma'ntacha: Ama't puesheñarroṫeyapa' amach errotenot e'ñe cohuen yetaruasoña epsheño'mar yamo'mtayecop. Tarro'mar ñerra'm atet yeṗapa' puesheñarr e'ñech cohuen yemorrenteñoṫ yocsheñeshocmañen yesherbeñ, po'psheñeñña' amach e'ñeye' yemorrenteño; čhach yottena ñerra'm čha yetsena'teñ. Ñeñto'marña ñeñtṗa' amach cohuenaye' yesherbeñe. Ñerra'm aña e'ñe sema'yočhrena ñeñt e'ñe socpa attoch segana aton quelle, ñeñt atetṗa' amach errotenot sema'yočhroña ñaña ñeñtecop atarr sherbets Yomporecop.

Atto Yomporpa' ñach e'ñe cohuen cohuaṗpene' ñeñt puechemerasha' pen

(Lc. 12.22-31)

²⁵ 'Ñeñto'marña te'pa' o'ch noterrser: Amach aña sellcatsto ñeñt atto yocrrena arr patsro. Ama't seyočhrapa' amach sotatsto, esuachca' yerrerrerrte' tsapaṫoneṫ, esuachca' yorrte'. Ñaña amach aña sellcatsto ñeñt e'ñe sechtsocpa. Amach sotatsto, esuachca' yehorrate'. Tarro'mar Yompor ña yapuene' yo'rrerrña allo yocrrena ñeñtña atarr nanac sherbets. Ñeñto'mar yeñoteñ ña yapuene' ñaña yerrar ñeñtña ñocoppa' ama esoye' enteñe. Ñaña ña yečcatene' ye'chets ñeñt atarr sherbets. Ñeñto'mar yeñoteñ ña yapuene' ñaña ama't ñeñt yehorra'yena ñeñtña ñocop ama esoye' enteñe. ²⁶ Senteñte' atto correna oñneshachno ñeñt anomčha'tyetsa entoneṫ. Ñetpa' ama čhoye' nare'tatseteneto ñaña ama čhoye' aṗčha'yeneto puerrar ñeñtcha' rra'yenet. Ñetpa' ama es echenaye allcha' es añño'tyenet. Ama't atto correnet Somporña ñeñt pue'ntaño'tsenpa' e'ñe yečcatyesuanet ñeñtcha' puerrar ṗa'yenet. Elloña sa Yomporpa' atarr morrentensa sa; ello semtaneñ ñeñt atto atarr morrentenana oñneshachno. ²⁷ Ñaña amach sellcatsto attoch amach serromo tarro'mar ama't sellquenañ attoch atarr atomat socra arr patsro, tarraña ama't e'ñe puesheñarroṫesapa' ama't errotenot so'chtatoña socreña ama't e'ñe pamtarra.

²⁸ 'Eso'mare'tcha'ña sellca'yesaña attoch sepashta. Senteñte' atet yečquena rorečhno ñeñt chopyets ñota allemeñ. Ñetpa' ama čhoye' taruasa'yeneto ama't mamesha ama čhoye' taneneto ñeñt chorra'yenet atto e'ñe cohuen orreyenet. ²⁹ Tarraña napa' o'ch notas: Ama't añcha'tareṫ Salomón atto e'ñe a'cohuentate't ahuat, ama't ñapa' ama chorrane'teña ñeñt atarr cohuen ñeñt atet atarr cohuentena ror. ³⁰ Ñaña ñeñt ror pue'chorpa' ñeñtara ta'te' ñeñt chopyets allemeñ ñeñt sentyen te' tarraña ñeñtṗa' mamecpa. Ama't cohuen chopyleneñ te'pa' tsapaṫoneṫña' o'ch etoman̄peretpa' e'ñech colla'huerrapa' o'huañcha' cohuenta. Ñehua, Yompor atto cohuentatyenan ama't ñeñt e'ñe mamecpa, elloña sapa' atarr chorratyensañ saña; sañapa' eso'marte'ña amaña

e'ñeye' seyemteño. ³¹ Ñeñto'marña notenes: Amach atarr sellca'yesatsto. Amach sotatsto: "Esuachca'ye yerra'te'. Esuachca'ye yorrte'." Amach sotatsto: "Esuachca'ye yehorrate'." ³² Tarro'mar allohuen acheñenesha' arr patsro ñeñt ama ame'ña'yetso, ñetpa' ñeñtaña e'ñe paterr e'nenet. Ñehua, Somporña ñeñt pue'ntaño'tsen ñapa' e'ñe entuenes ñeñt allpon pa'namen sepallta'yena arr patsro. ³³ Sapa' añcha'ña e'ñe ñanom sema'yoçhrena Yomporecop attoch atarr ayochreshattena ña. Ñaña añcha'ña sema'yoçhrena ñeñt e'ñe pocte' enten ña, allochñapa' ñachña sapa'yene' ñeñt allpon sepallta'yena samña. ³⁴ Amach e'ñe tayecma sellca'yesatsto ñeñtcha' setantyesoya tsapa'tonet. Tarro'mar ama't e'ñe tayoteñpa' çhocma eñall ñeñt allcatañetyetsa ama't e'ñe pate'tets yet.

7

E'ñe attotapa' amach yotteñe'channa'tatsto (Lc. 6.37-38, 41-42)

¹ Jesúsapa' atet oterraneterr:

—Sapa' e'ñe attotapa' amach sotteñe'chatsche po'psheñeñ allochñapa' amach otteñe'cherrso samña Yompor. ² Tarro'mar ñerra'm atet sotteñe'chyeñ po'potantañ, Yomporpa'cho'ña e'ñech attecma otteñe'cherres samña. Ñerra'm errponochcha' sotteñe'chyeñ po'potantañpa' sapa'cho'ña e'ñech allponoch otteñe'cherres samña Yompor. ³⁻⁵ Amach atet sentatsche po'potantañ ñerra'm ñetpa' ama cohuenaye' es peneto, ama't sapa' ama sentenoña ñeñt atet sepa'yena sa ñeñtpa' ello semtaneña po'potantañ ñeñt atet es pa'yenet ñet. Ñerra'm ama cohuenaye' es sepeno samapa' amach sotatscheña po'potantañ: "Napa' o'ch noctape'chatuerres e'ñe cohuen." Tarro'mar ñerra'm atet sepenapa' cha sommo'chena. Ñanomcha'ña añ sehuapore'terr ñeñt ama cohuenaye' sepeno sa, allochñapa' attoch señoçh cotape'chate' samo'ts e'ñe cohuen. Ñeñtpa' añ toma'tena o'ch sentoñ po'psheñeñ pa'clloyo'tsen puepachña ama't sa seclloyopa' allo'tsen tsach; ñeñtñapa' ama senteñe. Ñerra'm atetpa' amach erroteno't socheña po'psheñeñ napa' o'ch nechterrnañ pecloyo't pepachña tarro'mar añ tsach ñeñt seclloyo'tsenpa' cha a'npuennasña attoch e'ñe cohuen es sentyen. Ñanomcha'ña añ sehuapore'terr tsach seclloyo't allochñapa' attoch e'ñe cohuen es sentyen. Attochña e'ñe cohuen sechtterrñañ po'psheñeñ puepachña pa'clloyo't.

⁶ Jesúsapa' atet oterraneterr po'poñ:

—Ñeñt ama quechpuenaye pachmãareñ ñaña patpareñ amach alla seserpare'taterranete'te Parets po'cohuenña. Tarro'mar ñetpa' atta penet ñerra'mrrate' ochec. Ñehua, ochec ñerra'm esempo ama'tcha' atarr cohuen ya'ppa' ya'nach rrema'pes çhach açhota'teypa' o'ch shetsay. Ñaña ama't atet ñerra'm chañcho ñerra'm esempo es yena' ñesho ama'tcha' atarr cohuen yenten ya, yeser, chañchoñapa' attach a'mama'tamãsey tarro'mar chañchopa' ama esoye' entenano ama't ñeñt atarr cohuen.

Chocmach es yenamueñ Yompor ñaña çhocmach ye'neñ (Lc. 11.9-13; 6.31)

⁷ Jesúsapa' alla yeçhaterraneterr po'poñ, ñeñtpa' atet oterraneterr:

—E'ñe senamueño't, Yomporña'apascha'. Se'name'teño'tpa' señchcha'; seçhore'teño't, Yomporña' e'ñe pue'mñoteño'tespa' e'ñech cohuen toramãpsapas. ⁸ Tarro'mar ñeñt es enamare'tetspa' ñetña es aguëtset; ñaña ñeñt es e'name'tets ñetña'pa' çhocmach eñchet ñaña erra'tsen ñeñt çhore'tyene' ñetña'pa' e'ñe e'mñotenanet Yompor.

⁹⁻¹¹ 'Yompor ñeñt pue'ntaño'tsen çhocmach e'ñe cohuenare' es apa'yeney ñerra'm esempo es yenamueñ. Ñapa' amach añ apuentye ñeñt ama cohuenaye' yenteno ya. Ama't sa ñeñtes arromñates atet sepeñ samña sechemer, e'ñech cohuen es sapueñ

ñerra'm esempo es enamuenes. Atet ñerra'm allempo pa'chporrñoť es enamuenes, o'ch enamas mam* ñeñťcha' rra', sapa' ama't puesheñarroťesapa' amach aña sapueñeña sechemer mapue' ñeñť ama arrapahuoyaye. Amapa' ñerra'm cac enamuenes sañapa' ama't puesheñarroťesapa' amach aña sapueñeña sechemer shechep' ñeñť atarr amue-rochtatañ. Ñeñťo'marña sa ama't arromñaťes ama't ñaña atsrre'mñaťes sapa' e'ñe señoťeñ apa'yese' sechemerasha' e'ñe cohuenare'. Añña ñeñť Seyomporer sepen saña ñeñť pue'ntaño'tsen elloña ñapa' e'ñe eñoťeñ atto e'ñe cohuenare' es apa'yenes saña ñeñťes es enamuene'.

¹²Ñeñťo'marña atet notenes: Ñerra'm erra'tsente' e'ñe cohuen senten ñeñť semnen sa ñeñťcha' atet ponas po'psheñeñ, sapa'cho'ña e'ñech attecma sepanet saña. Tarro'mar ñeñťpa' atet oteneý Yompor po'ñoñ ñeñť ahuatoteñ, ama't Moisés po'ñoñ ñeñť atet anareť ama't ñaña ñeñť a'mta'yese'ť Yompor po'ñoñpa' e'ñe attecma otyesete'ť.

Atto Jesúsapa' toma'ntaterraneterr ñerra'mrrate' yetarroťollo yebe'ten esheccha' yečhap Yomporesho
(Lc. 13.24)

¹³Jesúsñaapa' atet toma'ntaterraneterr, ñeñťpa' atet otanet:

—Sebe'os yetarro añeťoll tarro'mar ñeñť atarr yetarr, atarr toñ ñeñťpa' alla sen chenca'puetso. Shonte' acheñenesha'pa' e'ñe alla be'tosčha'tyenet. ¹⁴Ñeñťña añeťoll yetarr, añeťoll toñ ñeñťñaapa' arr sen corra'puetso allña sapa' corretsasach. E'ñe puesheña'ttsa entene'ña ñeñť toñer.

Ñeñťpa' añ toma'ntena attoch yocťer Cristo, čoch yesuanemña ñeñť ama cohuenaye' entapreťenye.

Allohuen acheñ ñeñť e'ñe po'ñoč cohuen acheñer, ñetñaapa' añcha' orrtatyenet ñeñť e'ñe cohuenare'
(Lc. 6.43-44)

¹⁵Jesúsñaapa' atet oterraneterr:

—Sapa' señoťa'tach tarro'mar huaponasach ñeñťcha' ayčha'natatsa ñetpa' a'miteneto' Yompor po'ñoñ. Ñetpa' puešquēñoťetpa' ottenetañ atet ñerra'm atarr cohuen acheñret e'ñech attetañ ñerra'mrrate' carrnero ñeñť ama erroť apañeyaye ama't mamesha. Tarraña ñetpa' atta shequēnet tarro'mar e'ñe po'ñoč ñetpa' e'ñe attet ñerra'mrrate' ma'yarr ñeñť añach e'nyen ñeñť e'ñe ñocpa. Attotčha'ña e'ñe a'chencatuerran acheñenesha'. ¹⁶⁻²⁰Tarraña sapa' attotčha'ña e'ñe sechme'tyesanet. Tarro'mar allohuen acheñenesha' ñeñť e'ñe po'ñoč cohuen acheñeneshar, ñetpa' añcha'ña orrtatyenet ñeñť e'ñe cohuenare'. Tarraña po'potantañ acheñenesha' ñeñť po'ñoč ama cohuenayaye, ñetñaapa' añach orrtatyenet ñeñť ama cohuenayaye. Ñeñťpa' atetčha' netma'ntacha. Ora allohuen ñeñť e'ñe cohuenare' narmetsochečhno'pa' pue'merpa'cho'ña e'ñech cohuenare'. Ama't parrochapa' amach me'toña ñeñť ama cohuenayaye. Añña po'pchañečhno narmetsochečhno ñeñť ama cohuenayaye, pue'merpa'cho'ña amach cohuenayaye. Ñeñťpa'cho'ña ama't parrochapa' amach me'tenoña e'ñe cohuen. Ñaña yapa' e'ñe yeñoťeñ ama't erroťenapa' ama arroteye' yetoquēñoña llo'm ajchoť. Ñaña ama't erroťenapa' ama arroteye' yetoquēñoña ap rrenagachot.† Ñeñťo'marña attoña yeñoťeñ erra'tsente' ñeñť e'ñe cohuenare' narmetsoch, ñaña ñeñť ama cohuenayaye; pue'merotña yechme'teñ. Ñaña allohuen narmetsochečhno ñeñť ama cohuenaye' me'tyetsopa' a'mata'tueretcha' saprotueretcha' tso.

Atto amach allohuenacmaye' čhapueto all añcha'tareťtena Yompor pue'ntaño
(Lc. 13.25-27)

* **7:9-11** Ñehua, Jesús añ toma'ntatanet pan ñeñť puerrar penet all pa'nyo. † **7:16-20** Ñehua, Jesús añ toma'ntatanet uva ñaña higo ñeñť puenare'ñ penet all pa'nyo.

²¹ Jesúsñapa' atet oterraneterr:

—Ñeñt notyenayeñ: “Papa' po'ñoçh na'yochreshater nepeneþ”, tarraña amach allohuenacmaye' çhapueto all amcha'tarettena Nompore Parets ñeñt pue'ntaño'tsen. Añach çhapyerrets all ñeñt e'ñe po'ñoçh atet pene' ñeñt atet muenen Nompore ñeñt pue'ntaño'tsen. ²² Allempopa' shonte'ch acheñenesha' ñeñtcha' notyerrayeñ: “Po'ñoçh Ayochreshate e'ñe peso'chñopa' çhocmaca'ye ya'mtonape'tña peñoñ. Ñaña yeçhore'teñoþ peso'chñopa' çhocmaca'ye yequeçhpatache'tña shonte' oneñeteçhno. Ñaña yeçhore'teñoþ peso'chñopa' epaye'ca'ye yorrtatyese'tña partsoteñets.” ²³ Naña allempopa' na'meta'huerranetcha', notyerranetcha': “Ama't ahuaþapa' ama nentarlo, ama neyochreshayayso. Te'pa' orrerres, sapa' aña setsoten ñeñt ama cohuenaye' nenteno.”

Atto Jesús toma'ntatana acheñ ñeñt e'ñe eñotene' ñeñt po'ñoçh sherbets ñaña ñeñt ama eñotenaye ñeñt sherbets

(Lc. 6.47-49; Mr. 1.22)

²⁴ Jesúsñapa' atet oterraneterr:

—Allohuen ñerra'm erra'tsencha' e'mñotene' neñoñ ñeñt atet e'ñe cohuen neyçhatenanet, ñerra'm ñetña e'ñech atet penet, ñetñapa' e'ñech eñoteñet ñeñt e'ñe po'ñoçh sherbets. Ñeñt acheñer ñeñt atet petsapa' ñapa' e'ñe atet ñerra'mrrate' puesheñarr yacma ñeñt atarr es eñotets. Ñañaapa' tomatan pa'paquell, e'ñe echarr pe'. ²⁵ E'ñe tomatue'pa' huata huomenc, apellchena oñ, orrnota, pocollñapa' orrnotamþsa. Ama a'matamþse tarro'mar quellpachpa' e'ñe echarr atomatareþ. ²⁶ Tarraña po'potantaña ñeñt e'mñotene' neñoñ ñetña ñerra'm amach atteye' peneto ñeñt notenanet, ñetñapa' e'ñech atteta ñerra'mrrate' puesheñarr yacma ñeñt ama es eñoteno. Ñapa'cho'ña tomataneñcha'ña pa'paquell, tarraña amach echarroye' pe. ²⁷ E'ñe tomatue'pa' huata huomenc, apellchena oñ, orrnota, pocollñapa' orrnotamþsatsapa' çhepa'tcha' mata'nerretspa' e'ñe muellotsetuerra.

²⁸ Allempo serrpare'tatuanet Jesús, acheñenesha'ñapa' epaye' cohuanrrorteñet ñeñt atet yeçhatenanet ña. ²⁹ Tarro'mar ñapa' atarr cohuen yeçhatenanet ñerra'mrrate' ñeñt allsensarettetsa Partseshot. Judionesha' pa'mcha'tareternesha' ñeñt atarr etsotayenayeñ ñoñets ñeñt atet anareþ, ñetñapa' ama e'ñeye' atteye' yeçhateneto.

8

Atto Jesús a'crraterran puesheñarr yacma ñeñt aptsarña

(Mr. 1.40-45; Lc. 5.12-16)

¹ Allempoña err Jesús aspentotpa' cota'huanererr acheñenesha' nanac shonte'.

² Allñapa' huapoña puesheñarr ñeñt osen puetsarñats ñeñt otenet lepra. Chap Jesúseshopa' allenta concorposana Jesúsapa' atet otos:

—Ayochreshate ñerra'm þa muenats þapa' ñeñteþ atarr ahuaamencateshaþ þa'crrataye'cherren allochñapa' attoch e'ñe cohuen entuerren acheñenesha'.

³ Jesúsña anretapa' allenta a'þlle', atet och:

—Napa' nemneñca'ye, metuerrepa'ña peptsarña allochñapa' attoch e'ñe cohuen entuerreþ allohuen acheñenesha'.

Yacmañapa' allorocmuepa'tcha' metuerña pueptsarñapa' çha cohuenterrtsa.

⁴ Jesúsñapa' alla otererr:

—Te' atto o' na'crraterreþpa' po'ñoçh ama't e'ñe puesheñarrapa' amach þotaþsa'tatsche ama't mamesha. Corneshachña pegatena' all peptsarse't. Atet nane't Moisés ñoñets añ acheñrecop ñeñtcha' a'crratare'tterrtsapa' te'ñapa' o'ch es þanom ñeñtcha' þapos all ñeñt Yomporecop allochñapa' attoch e'ñe cohuen enterreþ allohuen acheñenesha'.

Atto Jesús a'crraterran puesheñarr capitán pueñañra; ñeñtpa' romo'marnesha'
(Lc. 7.1-10)

⁵ Allempoña çherr Jesús Capernaumopa' allña'pa' huapoña puesheñarr solltar po'cañtaner, ñeñtña'pa' romo'marnesha' ama judioneshayaye. Ñaña'pa' atarr otare'tosan Jesús, ⁶ ñeñtpa' atet otos:

—Nomporka' nepaclopa' atarr pa'nattenapa neñañra. Alla ãanena po'mayo nanac mueroçhtena çha echarrtena.

⁷ Jesúsña'pa' atet och:

—Ama'tpa' napa' o'ch ahuen o'ch na'crratera'.

⁸ Capitánña puepatare'teño'pa' atet och:

—Na Nomporka'pa' ama cohuenayayno attoch pebe'tosapo'tam̃pesna nepaclo. Arrotach ãot: “Ama'tpa' correrrepa' peñañra”, neñañraña'pa' acrrerroche'ch. ⁹ Tarro'mar napa' ñeñten ñeñt atet petsa ñeñt atet otenen ñeñt neyechenaya na. Napa'çho'ña eñall ñeñt neyechena naña ñeñt nesolltarer nepen. Ñerra'm puesheñarr solltar noteñ: “Papa' o'ch ahuep̃ a'yo”, ñaña'pa' o'chçho' ahuo'. Naña po'psheñeñ solltar ñerra'm noch: “Papa' apon arr”, ñaña'pa' o'chçho' huapa. Naña po'psheñeñ na'taruasañer ñerra'm noch: “Papa' arrcha' petaruasa'muen”, ñapa' allcha'çho' taruasa'muen. Ñeñto'marña napa' neñoteneñ ñerra'm erroten ãotenpa' e'ñechca'ye atet pena.

¹⁰ Allempo e'man Jesús ñeñt atet oten capitán, ñaña'pa' atet otan allohuen acheñenesha' ñeñt cota'nene':

—Ñapa' atarrca'ye yemtena, ama't ñapa' amaca'ye judioneshayaye. Napa' po'ñoçh o'ch notas: Ama't ahua'apa' ama nentareña acheñ ñeñt e'ñe atet neyemtenaya, ama't allohuen israelena'tarnesha'pa' ama't puesheñarra ama nentareña ñeñt atet atarr neyemtenaya. ¹¹ Ñeñto'marña te'pa' o'ch notas: Shonte'ch acheñenesha' ñeñt ama judioneshayaye ñeñtcha'ña e'ñe neyemterraya. Allochña'pa' esempohuañenpa' ñetña'pa' allenmateñcha' e'ñe huaçha'tuerret ñeñtcha' anorrçha'tyesuerrets all e'ñe Yomporesho all añcha'tarettena ña pue'ntaño. Allcha'ña rrallme'chapreteret yatañneshaçhno Abraham, ñaña Isaac ñaña Jacob. ¹² Shonteña judionesha' ñetcha'ña çapatsetañ all añcha'tarettena Yompor, tarraña ñetña'pa' amach çapueto all tarro'mar ñetpa' ama naye' yemteneto. Ñetña'pa' allach ahupore'taretterret a'yoç checmeto. Allña'pa' allcha' yahuanrrorterret, panmueño'et atserrpa' rraso'tyesosetcha' pa's.

¹³ Allempoña Jesús'pa' alla oterranerr capitán:

—Te'pa' o'ch ahuerreñ pepaclo, e'ñe atto atarr peyemtenapa' attetepa'ch ãocop. Pueñañraña'pa' e'ñe allempocma correrra.

Allempo a'crratosan Jesús Simón Pedro pa'so'mue
(Mr. 1.29-31; Lc. 4.38-39)

¹⁴ Alloñña'pa' çhap Jesús Pedro pa'paclo. Allña'pa' entosñañ pa'so'mue alla ãanena po'mayo çha atsna'ten, çha hueraten. ¹⁵ Jesúsña'pa' allenta a'p̃llosñañ potpa' çha metuerretsña po'urateña. Allenta tantapa' o' yema'tallme'çhaña.

Allempo Jesús'pa' a'crraterran shonte' pa'namen atsnañe'çhno
(Mr. 1.32-34; Lc. 4.40-41)

¹⁶ Ñeñte yetrocma allempo ellerrenpa' huaçha'tateññañeterr shonte' ñeñt chorra'yena oneñe'. Jesúsña'pa' e'ñe po'ñoño'ña queçhpatuerranet oneñe' ñeñt chorra'yenahuet. Naña allohuen ñeñt atsna'tyetspa' o' a'crratyesapanet. ¹⁷ Ñeñtpa' tarro'mar atet ãa allochña'pa' attoch etsota Isaiás po'ñoñ ñeñt a'm̃taye't Yompor po'ñoñ; ñapa' atet ote't: “Ñapa' ñach yahuanmañperre' ñeñt yemueroçhtatyene', ñapa' ñach ahuanerre' allohuen ñeñt ya'tserrpa'yene'.”

*Allempo Jesússpa' yeçhatan ñeññ muenene' o'ch coter
(Lc. 9.57-62)*

18 Po'pocheño allempo Jesússpa' entapuananerr shonte' acheñenesha' çha emchorra'hueñerr, ñaña'pa' atet otan pueyochresha':

—Te'pa' o'ch ahuañpsey yomta'n.

19 Allña'pa' huapoña puesheñarr ñeññ atarr etsotene' ñoñets ñeññ atet anaret. Ñaña'pa' atet otos:

—Na te'pa' Maestrocha' nemneñ o'ch noctare'tyeseñ ama't errohuanencha' pechopeñe'chyes.

20 Jesúsña'pa' atet och:

—Te'pa' napa' peñotencia' ama't nepacllapa' ama necheñe allcha' neyçhenañ. Ro'quëppa' çhocma eñall pa'pon allecma yeçhena.* Oteçhnopa'çho'ña çhocma eñall pa'ma' allecma yeçha'yenet. Tarraña naña Ñeñten Acheñetosetspa' ama eñalle ñeññ e'ñe nepaquëll nepen allcha' neñanena.

21 Po'pocheño Jesússpa' atet otenanerr po'psheñeñ pueyochresha':

—Te'pa' o'ch pöc'ta'n attoch e'ñe po'ñoçh neyochresha' neperreñ.

Tarraña ñeñña'acheñerpa' atet otan Jesús:

—Te'pa' arrcha'ña ñanom pemnaterren o'ch ahuerren apuesho o'chña nepampa'huera' apañpa' allempochña nohuerrapa' o'ch noctañ.

22 Tarraña Jesússpa' atet otererr:

—Acheñenesha' ñeññ ama yerpa'penaye Yompor, ñetña'pa' pampanna'tetepa' parro arromña'fecmuet. Tarraña pöcoppa' ñeñteñ o' peyerpuera Yompor añ pöc'tetsa o'ch pöc'ta'n attoch po'ñoçh e'ñe neyochresha' neperreñ.

*Allempo a'mchecherran Jesús huomenquësha' ñaña sa'p ñeññ emo'yarertetsa
(Mr. 4.35-41; Lc. 8.22-25)*

23 Allempoña Jesússpa' a'tapos noñto pueyochresha'ña'pa' co'ta'huanmet, ahuañpset rroçha'sonet atarr sa'po. 24 Allña'pa' machayotepa'tcha' huomenquëshatañpesnomuet. Emo'yare'ña çha esha'tena noñto, atteña oñña'pa' chorrामoch noñto. Jesúsña'pa' çha muen. 25 Atteña pueyochresha'ña'pa' poneniyet Jesús all muenpa' opueret atet ochet:

—¡Pa'queshpataye'chey Ayochreshate po'ñoçhuachca'ye yoclla'huerrate'!

26 Ñaña'pa' atet otanet:

—Eso'mare'tña nanac seyoren. Sapa' ama e'ñeye' seyemtenno.

Jesúsña tanterrapa' e'ñe po'ñoñoña a'mtsoññetueran huomenquësha' ama't ñaña emo'yare'pa' o' e'ñe a'mtsoññetuer. Attoña ñetpa' o' alla e'ñe cohuen mueçhettañperret.

27 Atta cohuanrrorteñet ñetña'pa' atet otanna'tyeset:

—Ta'mca'ye, añ acheñerpa' esona'tarte'ca'ye. Atarropa't es a'mchechaten, ama't po'ñoñoña'pa' a'mchechaterran huomenquësha' ama't ñaña emo'yare' oñ.

*Atto gadaro'marnesha' ñeññ chorrena oneñeñ ñetña'pa' huapuet Jesúsesho
(Mr. 5.1-20; Lc. 8.26-39)*

28 Allempoña'pa' o' etsotaset yomta'n all sechenet. Allpa' añ pa'ney pene' gadaro'marnesha'. Allña'pa' huapoña ñaña epsheña acheñ tarraña ñetpa' añ chorrenahuet oneñeñ. Ñeñña'pa' arrot huenet allecma pampa'yeñet arromña'etchno. Allenetña'pa' ama eseshaye' setso tarro'mar ñeññ chorra'yena oneñeñ ñetpa' atarr añcha'noçhetyenet allenet. 29 Allempoña'pa' rranare'tapet Jesús, atet ochet:

—Eso'maruachca'ye, Parets Puechemerecha' pa'tsrre'moçhtana'tosey. Papa' añecop'te' pehuena o'ch pecoñchaterrey ama't ama çhena' allempoch ya'coñchataretterra.

* 8:20 Ñehua, Jesús añ toma'ntacha zorra ñeññ berrotets all pa'nyo.

³⁰ Ñehua, allpa' a'yente'tsa'yen shonte' chañchočno all rratse'tyen. ³¹ Ñeñto'marña oneñeñechnopa' atet otare'tapet Jesús:

—Ñerra'm choch pequechpatosey acheñpa' arrña pemñaye'chosey chañchesho allochñapa' o'ch yehorra'yerrerr ñaña chañchočno.

³² Jesúsñapa' allenta otanet:

—Ama'tca'yepa' orrasca'ye.

Allempoña oneñeñechnopa' quechpa'neret acheñpa' o' chorrereter ñaña chañchočno. Chañchoña allempo chorrosya oneñeñechnopa' chepa'tcha' matrra'tua allohuen ñegoneñ, shorcha'tuos allotpa' e'ñe ño'shrra'tuosa oño.

³³ Acheñenesha'ña ñeññ cohuañpene' chañcho, ñetñapa' allenta matrra'tet ñamet po'yorñoñ, ahuanmuet anetso. Allñapa' serrpare'tyesoset ora atet o' perra ñeññ chorra'yese't oneñeñ. ³⁴ Allentepa'tcha' ahuanmaña allohuen anetso'marnesha' ahuo'ch enteñeta' Jesús. Ñetña entoset Jesúsapa' atet otoset:

—Te'pa' o'ch ahuerreñ arroñ, yenyot.

9

Atto Jesúsapa' a'crraterran ñaña ñeññ echarraña

(Mr. 2.1-12; Lc. 5.17-26)

¹ Allotña Jesúsapa' a'terr noñtopa' pechaterra, cherr anetso all a'puena. ² Allñapa' huapatañpsoñet echarraña, puechecnape'na. Jesúsñapa' eñotapanet ñetpa' atarr nanac yemteñet. Allempoña ñapa' otapan echarraña:

—Chochña neyochre pöchsherra tarro'mar te' ñeññ pö'chñarpa' a'pretna'huareterra.

³ Puesheña'tetsña ñeññ etsotayenayeñ ñoñets ñeññ atet anaret ñetñapa' atta otatse'tyeset pueyoçhreto e'ñe ñagattseta, ñeññpa' atet otet: “Añ acheñerpa' cha achmenan Yompor.” ⁴ Jesúsñapa' o' eñotanet ñeññ atet otyenet ñocop, ñañaapa' atet otanet:

—Sapa' eso'mare'tcha'ña atet soctape'chatse'tyesña seyoçhro. ⁵ Sapa' çhate' soten ñeññ atet o' notue echarraña po'chñar o' a'pretna'huareta ñeññpa' ama torrapahuoyaye. Sapa' añña atarr torrapo' senten attoch na'crrater çhoncha'ña ote': “Petantena pechöpe'chnen.” ⁶ Ñehua, napa' o'ch neñotatas na Ñeññen Acheñetosets, napa' ñeññen apareten llesens attoch nach peretnerre' ochñarets añe patsro.

Ñeñto'marña Jesúsapa' atet oterranerr echarraña:

—Te'pa' o'ch petantena, pechta'nen pemue'pa' pechöpe'chnen, ahuenepñ pepaclo.

⁷ E'ñe otue' atetpa' echarrañañapa' cha tantetsa allorocma, ahuer pa'paclo.

⁸ Acheñenesha'ña all ñeññ entene' ñetñapa' cha yorenet, elloñapa' alla cohuentaterrñañet Yompor. Atet otyenet:

—Yomporca'yena o' llesenserran ñeññ ama't e'ñe acheña.

Allempo Jesúsapa' hua'ña'nman Mateo attoch pueyoçhresha' per

(Mr. 2.13-17; Lc. 5.27-32)

⁹ Jesúsña meterrerr allotpa' entnoman puesheñarr acheñ ñeñññaapa' añ pa'so'cheñ Mateo.* All anen allecma cobra'yenan acheñenesha' quelle ñeññ gobiernocop. Jesúsñapa' atet otosan Mateo:

—Te'pa' o'ch pöcta'n attoch neyoçhresha' neperreñ.

Mateoñapa' cha tantnomtsapa' allenta cotan Jesús.

¹⁰ Allempoña chap ñaña allempoch rrallme'chen Jesús pocollo. Allñapa' huaçha'ta po'potantañ shonte' ñeññ po'taruas pene' o'ch cobra'yeneñt acheñenesha' quelle ñeññ gobiernocop. Ñeññpa' atarr ashcañnesha' entyeñ allohuen acheñenesha'. Ñaña epuet po'potantañ ochñateneshachno ñetñapa' all anorrcha'tyesoset all anen Jesús epuet

* **9:9** Mateopa' ñeññara ñeññ sochenet Leví.

pueyochreshačno. ¹¹ Añña fariseonesha' ñeñt' allo'tsa'yen ñetña allempo atet eñchetpa' allenta otoñet pueyochresha':

—Eso'mare'tña ñeñt' semaestror sepenpa' rrallme'chapretenanña añ acheñeneshar ñeñt' puehquẽño'te'na cobra'yene' acheñenesha' ñaña epuet acheñenesha' ñeñt' atarr ochña'teneshačno.

¹² Atto e'manet Jesús, ñaña'pa' atet toma'ntatanet:

—Ñeñt' e'ñe huomech entetsapa' ñetpa' ama e'neñetoña apartañ. Añña ñeñt' at-sna'tetspa' ñetña'pa' chocma e'nenet ñeñt'cha' a'crraterrahuet. ¹³ Napa' ama añecpaye' no-huapo attoch neçhore'tos ñeñt' e'ñe atet entetsañ ñetpa' e'ño' cohuen es pa'yenet. Napa' añecopña nohuapa attoch neçhore'tos ñeñt' atarr ochña't entyetsa. Allochña'pa' attoch o'ch cotape'cherret ello e'ñe cohuen Yomporecop. Socoppa' añ poctetsa ñerra'm o'ch ahuerrespa' señotuerrepa'chña ñeñt' atet yeçhateney añ Yompor po'ñoñ ñeñt' atet anaret ahuatoteñ. Ñeñt'pa' atet otaney Yompor: “Napa' ama e'ñe añña cohuen nenteno o'ch sapuenen sayara ñeñt' semtsen nocop. Añe'ñaña atarr cohuen nenten o'ch semuereña allohuen samo'tsesha'.”

Allempo Jesús'pa' eñotatanet atet'cha' tore'tet Yomporecop ñeñt' po'ñoçh sherbets

(Mr. 2.18-22; Lc. 5.33-39)

¹⁴ Allempoñapa' ñeñt' pueyochresha' pen Juan ñeñt' apataye't acheñenesha' ñetña huaçha'toñet Jesús'pa' atet otoset:

—Yapa' tore'tetsay Yomporecop ñaña fariseonesha'pa'cho'ña tore'tetset. Pañapa' ¿eso'mare'tña ama tore'tenoña peyochresha'?†

¹⁵ Jesús'ña'pa' alla toma'ntatanet, atet otanet:

—Ñeñt' ahua'ñareteçhno all rrallme'chapreteñet ñeñt' errte' sena'tetsa, ama pocteyaye o'ch yotanet amach es serra'yesatsto. Amach yellcatatstaneto tarro'mar atet coshapreteñet ñeñt' sena'tetsa. Tarraña ñerra'm esempo machayo'ta sa'nerranet ñeñt' sena'tetsa, ñeñt'ña parro yemuetyena allempoña ñetpa' e'ñe puellquẽño'tet queçhpa'huerretcha' puerrar, amach arrenaye' enterreto. Ñeñt'pa' attochña tore'terret allempo Yomporecop e'ñe po'ñoçh. Arrpa' allohua huañ ñeñt' atet Jesús toma'ntata ña sena'tostsa.

¹⁶ Elloñapa' alla toma'ntaterraneterr ñeñt' atet yeçhen judionesha' arr patsro, ñeñt'o'marña atet otanet:

—Yapa' ñerra'm mellashañ yeshtampa' amach yelltatsche emarr lletamtso. Tarro'mar ama't atet yeçatse'çhpa' ñeñt'pa' e'ñech orrena yellteñ tarro'mar ñeñt' emarr lletamuetspa' ñerra'm esempo yatsama'tam'pespa' çhach chellama'ta çhach martse'tatanña shetamtso'she'm. Ñeñt'ña yelltenpa' allo'nach sen rrrartse'tats nanac.

¹⁷ Jesús'ña'pa' alla toma'ntaterraneterr po'poñ ñeñt' atet yeçhen judionesha' o'ch yeçcatenet pa'rrom orro't. Ñeñt'o'marña atet otanet:

—Ama't puesheñarro'teyapa' amach yeshatstoña vinos emasa mellasha'mañ orro'to ñeñt' ayeçcataret pa'rrom. Tarro'mar ñerra'm atet yepe'pa' o'ch chasa'ña vinospa' çhach a'ptsan orro't, vinos'ña'pa' e'ñech shebhua, ñeñt'ña orro'tpa' ama't mameshapa' amach es sherberro. Añña ñerra'm emasa vinos, arrcha'ña yeshe' emerra orro'to ñeñt' ayeçcataret pa'rrom. Allochña'pa' ama'tcha' chasa' vinospa' amach cha potsa'psoña vinos, ñeñt'pa' allach yeçhen epo'mar.

Ñeñt'pa' attoña Jesús'pa' eñotatanet ña poçtapña e'ñe etserra.

Atto Jesús'pa' tantaterran Jairo po'señ ñaña all a'crratnoman puesheñarr coyanesha' ñeñt' a'p'lla'nmue' pa'shtam

(Mr. 5.21-43; Lc. 8.40-56)

† 9:14 Añ tore'teñetspa' añecop o'ch yetorra Yomporecop. Amach añecpayaye atomat, ñeñt'pa' añecpa mameshacop o'ch yequeçhpa' yerrar.

18 Allempo atet eñorena Jesús pa' huapa ñaña puesheñarr ñeñt añcha'tarettetsa judioneshacop, concorposñañapa' atet otos:

—Nesñeñpa' e'ñe errte' rromuets. Tarraña ama't o' rromañpa' te'pa' o'ch p̄octerren, ama't attapa' o'ch p̄a'p̄lleña' p̄otot attoch o'ch alla correrra.

19 E'ñe otue'pa' allempoñapa' allenta cota'ner Jesús epuet pueyochresha'. 20 Allñapa' cota'nmanet ñaña puesheñarr coyanesha' ñeñt atsna'tets. Charra' puechena epa char ñeñt atto chocma yella'yena. Ñaña' allenta cota'nenan Jesús chenta' pa'che'ñoñ, allñapa' a'p̄llerrñaña' pa'shtam pa'rrpe'mot. 21 Tarro'mar, ñapa' atet oten pueyocho: "Ama't pa'shtama na'p̄lloñpa' ñeñtach na'crraterre'." 22 Allempo atto a'p̄lla'huoñ pa'shtampa' Jesúsña allenta puetallerra pa'che'ñone'pa' entan coyanesha', ñeñtpa' atet och:

—Choña nesñeshacha' p̄ocsherra tarro'mar atto atarr peyemtenna na, attoña te'pa' o' e'ñe na'crratnomuep̄.

Coyanesha'ñapa' allorocma correrra.

23 Jesúsña allempo chap añcha'tareñ pa'paclo allñapa' entosan ñeñt penclla'tañpesyene' arromñañ llequẽntsorecho, entosan ñaña shonte' acheñenesha' all puellquẽñoñtet atarr ano'tatse'tyenet. 24 Jesúsña' atet otosan acheñenesha':

—Sahuanerra arrot, añ shopshesha'pa' amaca'ye choye' rromueno, chaca'ye muen.

Ñetñapa' pachñare'teñoñetpa' atta che'tatsetyesapet tarro'mar ñetpa' e'ñeca'ye eñoteñet choca'ye rromuen. 25 Allempoña cha'nma'cha'tatuosan ñeñt shontetsa all, ñaña' be'tosos o'pono. Allempoña Jesús pa' rromota'tosan shopsheshañ potot ñaña'pa' chepa'tcha' tanterrtsa. 26 Allempoñapa' e'mare'tuet errañaren anetso'mar Jesús pa' o' tantaterran arromñañ.

Atto Jesús pa' a'crraterran epsheña aporo'yet

27 Ahuerrerr Jesús allotpa' cota'neñ ñaña epsheña aporo'yet. Rranare'tneñet chenta' atet otneñet:

—Pemueraye'cherrya ñeñtep̄ Davidna'tare.

28 Chap Jesús pocollopa' all be'tosos allña rromuera'ña ñaña aporo'yet. Jesúsña'pa' a'p̄to'tapanet:

—¿Seyemtennafe' napa' ahuamencaten attotcha' necuaterres?

Ñetñapa' atet otoset:

—Yeyemtenp̄aca'ye, Ayochreshate.

29 Allempoñapa' allenta a'p̄llacle'chanetpa' atet otanet:

—Atto atarr seyemtennapa' attetepa'ch socop.

30 Allempocma e'ñe cohuen cohuerret. Jesúsña'pa' atet otanet:

—Po'ñoñ te'pa' o'ch notas: Amach esesha' sota'psa'tatsto, ama't e'ñe puesheñarra.

31 Elloña ñetñapa' ahuanmuet a'metare'tyeset Jesús. Errañaren allampaño'mar e'mare'tuet Jesús atet pena.

Atto Jesús pa' a'crraterran ñaña ñeñt opanatets

32 Allempo ahuen epsheña aporo'yet allña Jesúseshopa' huapaterrñañeterr ñaña opan ñeñt chorrena oneñet. 33 Jesúsña'pa' allenta quechpatan oneñet ñeñt atto opanatateñ, opanñapa' allenta eñorerra. Acheñenesha'ñapa' cohuanrrorteñetpa' atet otyenet:

—Israelnesha'pa' ama't ahua'apa' ama puentarano ñeñt atet pena te' Jesús.

34 Fariseonesha'ñapa' puesasare'teñoñetpa' atet otyeset:

—Oneñette' pompor ahuamencat pene' attot quechpatenan oneñetechno acheñenesha'.

Atto Jesús pa' atarr muerenana allohuen acheñenesha'

35 Allotñapa' asuahuanom Jesús allohuen anetso ama't ñaña all ama tama eñalle acheñ. All yechatyesosanet puerahuo'mar. Serrpare'tatosanet ñeñt cohuen ñoñets

atto ayochreshattena Yompor. A'crratyesosan ñeñt' osyen pa'namen atsnañets ñaña ñeñt' pa'namen atsotyenet. ³⁶ Allempo entosan shonte' acheñenesha'pa' ñaña'pa' nanac muerenanet. Tarro'mar e'ñe atet entenanet ñerra'mrrate' carrnero ñeñt' ama acuam̄psareteyaye; ñeñto'marña nanac allpatatarettenet tarro'mar ama eñalle ñeñt'cha' ahuaument' penahuet. ³⁷ Ñeñto'marña atet otan pueyochresha':

—Shonte' narmets ñeñt' nanac ellom̄re'tets ñeñt'cha' a'yapaçhetañ. Tarraña ataru-asañña ñeñt'cha' a'yapaçhe'pa' ama atarr atonayayeto. ³⁸ Te'pa' añcha'ña sanamoñ pamo'mte' mueñanepa'ña ñeñt'cha' a'yapaçherrets pa'mro.

Ñeñt'pa' atet toma'ntatanet Jesús atto atarr shonte' acheñenesha' ñeñt'cha' ame'ñerrtsañ tarraña ñeñt'cha' ame'ñaterrahuetpa' ama atarr atonayayeto. Añcha'ña yanam Yompor ñeñt' Yamo'mte' yepen mueñanepa'ña pa'taruasañer ñeñt'cha' torra'yerrtsa ñocop allemeñ anetso'mar.

10

Allempo Jesús'pa' acran çharrasheña ñeñt' puechetsa epsheña ñeñt'cha' llesensa'
(Mr. 3.13-19; Lc. 6.12-16)

¹ Allempo çhapa'muen allempo Jesús agota'mueñan pueyochresha' çharrasheña ñeñt' puechetsa epsheña. E'ñe apçha'huet ñeshopa' ñaña'pa' apanet llesens attoch queçhpatyaset oneñeteçhno acheñenesha'. Ñaña llesensanet attoch a'crratyaset acheñenesha' ñeñt' osyen allohuen pa'namen atsnañtsoçhno ñaña ñeñt' pa'namen atso-tyenet.

² Ñehua, ñetpa' arro'tsa'yenet pa'so'chñeçhno; allohuenetpa' çharrasheñet puechena epsheña ñeñt' llesensa'. Ñeñt' ñanom atarr sherbets ñeñt'pa' Simón ñeñt'ara sochetsa Pedro, allotpa' ñaña Andrés ñeñt' e'ñe pa'mo'nasheñ; alloñt'pa' ñaña Jacobo ñeñt' Zebedeo puechemer epuet pa'mo'nasheñ Juan. ³ Alloñt'pa' ñaña Felipe ñaña Bartolomé; alloñt'pa' ñaña Tomás ñaña Mateo ñeñt' cobraye't acheñenesha' quelle ñeñt' gobiernocop; alloñt'pa' Jacobo ñeñt' Alfeo puechemer; allotpa' ñaña Tadeo. ⁴ Alloñt'pa' ñaña Simón ñeñt' cananistanesha' ñeñt' nanac torrattse't pa'netsrecop, allotpa' ñaña Judas Iscariote ñeñt'cha' pomuerre' tsapatonet Jesús.

Allempo Jesús'pa' llesensan pueyochresha' o'ch ahuanemyeset allcha' serrpare'tyeneta'
(Mr. 6.7-13; Lc. 9.1-6)

⁵ Ñeñt'ña çharrasheña puechena epsheña llesensanet attoch ahuanemyeset pa'namen anetso'mar, ñeñt'pa' atet otapanet:

—Amach arrenta setatsto all yeçha'yena ñeñt' ama judioneshayaye. Ñaña amach arrenta setatsto samario'marnesha' pa'netsro all yeçha'yenet. ⁶ Arrcha'ña seta all yeçha'yena israelena'tarnesha'. Ñetpa' e'ñe atet nentenanet ñerra'mrrate' carrneroçhno ñeñt' paya'tyetsa. ⁷ Allcha' soñemyespa' seserrpare'tatyeshomanetcha' atetcha' sotyeshomanet: “Te'pa' o' çherr allempoch ayochreshattena Yompor ñeñt' pue'ntaño'tsen.”

⁸ Ñaña alla o'terranerr pueyochresha':

—Ñeñt' atsna'tyetspa' sa'crratyeshomanetcha', ñeñt' rromayetspa' setanta-tyeshom̄cha', ñeñt' osyen puetsarñatspa' sa'crratyeshom̄cha' attoch e'ñe cohuen entuerranet acheñenesha', sequeçhpatatyetscha' ñaña oneñeteçhno ñeñt' chorra'yenaya acheñenesha'. Sapa' e'ñe atta aparetes huomencñats atto es cohuen sorrtatyen Yomporcop, ñeñto'marña sapa'cho'ña e'ñech atta sapa'yeshanet sam̄a, amach secobratstaneto ñeñt' atet o' sepa'yeshanet.

⁹ Ñaña o'ch notas: Ñerra'm o'ch sahuammapa' ama't puetallarrapa' amach se-sha'tatsetnomo quelle. Ama't orotlullen, ama't huallatlullen, ama't cobretlullen

amach sasha'tatsetnome. ¹⁰ Ama't e'ñe coñe'ta amach es sanmatsto allcha' sechopeñe'chyes, ama't sebolsa, ama't e'ñe epma seshtam, ama't sesapata, ama't secarra, amach sanmatsche tarro'mar ñeñtescha' torra'yetsapa' e'ñe pocte' rratyeesapasetcha'.

¹¹ 'Ama't erra'tsena anetser ama't ñaña all ama tama eñalle acheñ ñerra'm erra sechapa'chpa' chochña ñanom sa'p'to'tyesosanet erro'tsente' cohuen acheñpa' allcha'ña sechap. Allña'pa' allcha'ña sa'posa tarrempohuach esempoch seserrerr ñaña allot. ¹² Ama't erra'tsena pocoller allcha' sechap, e'ñe sehuomñcha'teño' o'ch senamatosanet Yompor pa'nateña. ¹³ Ñetña ñerra'm e'ñe cohuen acheñret, Yomporña'pa' a'natenanetcha'. Ñerra'm ama cohuenayaye acheñretpa' Yomporña'pa' o'ch alla apuerres sa pa'nateña. ¹⁴ Ñerra'm erra anetsro ñeñt' allo'marnesha'ña ama cohuenaye' agapaseto tarro'mar ñetpa' amach mueneto o'ch e'mñnotapaset ñeñt' atet seserrpare'ten, sañapa' o'ch semterrrerr ñaña allot. Ñerra'm allempo semterrrerrña ñaña allot, ñeñt'ña setco'tsa'yen pañe'te' patspa' choch sepa'shetca'tyesnomña setac. Attochña allo'marnesha'pa' o'ch señoatnomanet ñetpa' amaca'ye pocteye' entenanetoña Yompor. ¹⁵ Po'ño'ch te'pa' o'ch notas: Esemphuañen allempoch acrare'tetuerra allohuen acheñenesha'pa' añ anetso'marnesha' ñeñt'cha' ama cohuenaye' sagapaye te', ñetña'pa' nanaccha' a'coñchatare'terretña allempo. Ama't sodomo'marnesha' ñaña gomorro'marnesha' ñetpa' amach tama a'coñchatare'terreto atet ñerra'm ñeñt' anetso'marnesha' ñeñt'cha' ama cohuenaye' sagapaye te'.

Allempo Jesús'pa' e'ñotatenan pueyochresha' chochmach eñall ñeñt'cha' e'moñe'tahuet

¹⁶ 'Ñaña sapa' ñerra'm o'ch ahues te'pa' seño'chcha' po'ño'ch chochmach eñall ñeñt'cha' se'moñe'te' ama't sapa' amach cho erro't sepenaneto ñet. Ñeñto'marña notenes te'pa' o'ch nemñas e'ñech attes ñerra'mrrate' carrnero o'ch ahuo' allo'tsa'yen ma'yarro'chno. Ñeñto'marña sapa' seño'ta'tach atet ñerra'm sheche'ppa' atarr eñote'. Tarraña sapa' amach erro't a'pañso atet ñerra'm ye'ppa' ama erro't a'pañeyaye. ¹⁷ Ñeñto'marña notenes: Seño'ta'tach tarro'mar acheñenesha'pa' erro'tuanencha' perrset, sanmare'terrach añcha'tare'tesho allcha' otteñe'cherrset. Nalle'tyerrsetcha' all judionesha' po'prahuo'mar. ¹⁸ Po'ño'ch e'ñe no'marpa' rremanaterrsetcha' attoch muero'chtatyerrset, sanmare'terrach añcha'tare'tesho ñaña allo'tsa'yen ñeñt' nanac añcha'tare'te'chno allcha'ña sa'meta'yesosnancha' neñoñ. Ñaña arrcha' sa'meterannan neñoñ allo'tsa'yen ñeñt' ama judioneshayaye. ¹⁹ Ñaña allempoch sanmare'tetyesapa' ama't mameshapa' amach cha sellca'psatsto, amach sota'psa'tatsto: Errotuachca'ye notoste' añcha'tare'tesho ñerra'm o'ch a'p'to'tare'tapuen. Tarro'mar allempopa' Somporca'ña Puecamquëñ seño'tatyesose'ña all. ²⁰ Attoña amach e'ñe sochaya se'ñora'yesos, añcha'ña Somporca'ñeñt'cha'ña se'ñoratyese'.

²¹ 'Allempoch atet perrsetpa' ñeñt' e'ñe semo'nasheñ sepen ñato' ñeñt'achca'ye se-pomuerre' attoch muetsaterres tarro'mar ñapa' amaca'ye ame'ñenno. Amapa' ñato' pomporpa' o'ch pomuerran ñaña puechemer. Ama't ñaña puechemerpa' ñato' patparño'p'a' o'paterranach pamo'mte' attoch muetsatater. ²² Shonte'ch acheñenesha' ñeñt'cha' se'moñe'terre' tarro'mar sapa' naca'ye e'ñe same'ñena. Ama'tcha' atarr muero'chtaterrsetpa' tarraña esesha'ch e'ñe ahuañta'huanmue' e'ñe pueyemteño'ten na, ñeñt'cha'ña a'queshpatare'terrtsa. ²³ Ñerra'm esempo e'moñe'terrset ñeñt' anetsro allo'tsenes o'ch seyeta'mpsanetpa' o'ch sahuanna po'poñ anetso. Allpa'cho'ña ñerra'm attecma e'moñe'terrseterrpa' o'ch seyeta'mperraneterr o'ch sahuannerrerr ñaña po'poñ anetso. E'ñe po'ño'ch notenes: Amach e'ñe sepa'huenta' ora allohuen israelnesha' pa'netsropa' na Ñeñten Acheñetosets o'ch alla norrtierra.

²⁴ 'Ñaña o'ch noterrser: Ñeñt' yochreshatspa' ñerra'm e'moñe'teññañet po'maestror, e'ñech attecma e'moñe'terrñañet ñaña ñeñt' pueyochresha'chno pen. Ñaña ñeñt'

ñañretsotyets ñerra'm e'moñe'teññañet pamo'mte' e'ñech attecma e'moñe'terrñañet ñaña pueñañreshachno. ²⁵ Ñeñt yochreshatsochnopa' e'ñepa'chña pocte' entyeñet o'ch atet aþaretterret atet ñerra'm po'maestroret. Ñaña ñeñt ñañretsochnopa' e'ñepa'chña pocte' entyeñet ñaña o'ch atet aþaretterret atet ñerra'm pamo'mte'. Ñaña señocheþa'ch ñerra'm na puesochatse'teñoetan otenet napa' oneñeto' pomporen ñeñt otenet Beelzebú, sapa'cho'ña ellochña atarr sochatse'terrset. Ama't na ñeñten e'ñe samo'mte' sepenen atto atarr sochatse'tennet na, sapa'cho'ña ñeñtes nechemerreshachno nepen, elloña sapa' atarrcha' nanac sochatse'terrset saña.

Atto amach yemcha'tatsto ñeñtcha' muetse'yechets, añcha'ña yemcha'na't Yompor (Lc. 12.2-9)

²⁶ 'Ama't atteñpa' tarraña sapa' amach señcha'tatstaneto tarro'mar yapa' yeñoteñ allohuen ñeñt atto e'ñe a'nahua shecare'tyenet te', esempohuañenñapa' a'metamþsaretterretcha'. Ama't allohuen ñeñt e'ñe a'nasotyenet te'pa' esempohuañenñapa' e'ñech eñotatareñtetuerret. ²⁷ Ñeñto'marña ama't erra'tsena neserrpare'tatyenes te' e'ñe saptoche', esempoña sapa' e'ñech señotatuer ora allohuen acheñenesha'. Ama't erra'tsen ñeñt atet neserrpare'tatyenes te' e'ñe a'nahua o'pono pocollo, esempoña sapa' seserrpare'terrcha' allcha' e'ñe cohuen e'muerres allohuen acheñenesha' atet ñerra'mrate' enot seserrpare'ten shelleto. ²⁸ Amach aña señcha'tatsto ñeñtcha' semtse'. Tarro'mar añach muetsonaset sechets, secamquëññapa' amach errotenot muetsonaseto. Añcha'ña señcha'na't Yompor tarro'mar ñerra'm ña muenatspa' e'ñe ña po'huamencoþpa' o'ch a'chencatonay ye'chets yecamquëñpa'cho'ña o'ch a'chencatonay coñcha'puetso all parraren tso'.

²⁹⁻³¹ 'Elloña te'pa' napa' o'ch notas: Chocmach seyemcha Yompor, po'ñooh ñapa' ñach secuanþpene'. Ama't otetollesha'pa'cho'ña chocma cohuanþpeñ. Ñehua, ama't yapa' yeñoteñ otetollpa' ama tama sherbeno. Ama't yepomatset epa otetollesha'pa' ñeñtþa' ama tsa'teyaye, e'ñe puetallarratolla centavo tsa'tena. Tarraña ama't atteñpa' ama't patrira otetoll amach rromo attoch shora'nom ñerra'm ama Sompor muenataye atet. Ñeñto'marña notenes: Ama't mameshapa' amach señcha'tatsto, Yomporcha'ña e'ñe seyemta. Atto atarr morrentenana otetollesha' elloña sapa' atarr nanac morrentensa. Ñehua, ama't allpon sechetollesha' allpon soño'tsen ñapa' e'ñe eñotennas.

Atto ama a'nasotþahuo Jesucristo acheñesho'mar (Lc. 12.8-9)

³² 'Elloña napa' o'ch noterrser: Allohuen ama't erra'tsencha' ñeñtcha' ama na'nasotenaye acheñeneshesho, napa'cho'ña Ñeñten Acheñetosetspa' amach na'nasotuerraneto nanña Nomporesho all pue'ntaño. ³³ Tarraña ñerra'm esesha' na'nasotenaya na arr patsro acheñeneshesho, napa'cho'ña na'nasoterranetcha' Nomporesho all pue'ntaño.

Atto Jesúsþa' orrtatosan e'ñe ño'mar elloptanna'teñets (Lc. 12.51-53; 14.26-27)

³⁴ 'Sapa' chate' sotenapañ añecopþe' nohuapa o'ch e'ñe cohuen namo'tstanna'tatera acheñenesha' arr patsro. Ñeñtþa' ama atteyaye. Añeþa'naña nohuapa allochñapa' e'ñe no'marpa' acheñenesha'ñapa' o'ch atta elloptanna'tyeset. ³⁵⁻³⁶ Ñehua, ñeñt noten te' ama't ñeñt e'ñe pamo'tsna'tarecmuet ñato' no'marach e'moñe'tannerret. Tarro'mar ñato' eñallcha' ñeñtcha' nameñerraya, pamo'tseshetñapa' ñato' amach ameñerrneto. Ñeñto'marña notenes e'ñe no'marpa' ñato' puechemerpa' o'ch epatare'tenan pompor, ñaña ñato' puecheyorþa' o'ch epatare'tenan pachor, ñaña ñato' ñeñt pa'to'ñen pen o'ch epatare'tenan ñaña pa'so'mue.

³⁷ 'Tarraña ñerra'm erra'tsencha' nemorrenterrayañ ñerra'm ñetña pompora atarr morrentenet ñamet pachoret ñeñña acheñerpa' ama e'ñeye' pocte' nenteñe attoch neyochresha' neperranet. Ñaña po'potantañ ñeñña' nemorrenterrayañ ñetpa'cho'ña ñerra'm puechemera atarr morrentenetpa' ñaña po'sñet ñeñña'cho'ña acheñerpa' ama e'ñeye' pocte' nenteñe attoch e'ñe neyochresha' neperranet. ³⁸ Tarro'mar ñerra'm erra'tsen ama e'ñeye' sehuanmaye ñeññ atet muenenet e'ñe ñocueta attoch coterrnet e'ñe poctacma, nañapa' amach pocte' nenteñe o'ch neyochresha' neperranet. Ñeñña' añ toma'ntena atet ñerra'mrrate' cho sechechen secorsoch alloch semueroçhta samã. ³⁹ Tarraña ñerra'm esesha' e'ñe añ e'nenet o'ch correna atomat attoch e'ñe coshenet arr patsro, ñetña' a'chencaterretcha' ñañeñeta. Tarraña ñerra'm esesha' e'ñe pocte' entene' o'ch es sehuanmuet nocop ñeññ atet muenenet ñeññ e'ñe ñocueta arr patsro ñeñña' acheñerpa' corretsach pocsheñeshocmañen e'ñe tayoteñ errponañohuen.

Ñeñña' apuerrey Yompor attoch atarr coshaterrey
(Mr. 9.41)

⁴⁰ Jesús'pa' alla oterranerr pueyochresha':

—Ñerra'm o'ch sahanma, ñerra'm esesha'ch e'ñe cohuen sagapue' sa, ñetpa' na'naca'yeña aguënet e'ñe cohuen. Ñaña ñeññ e'ñe cohuen naguëne' na, ñetpa' Nom-pore'naca'yeña aguënet ñeññ nellensene' na. ⁴¹ Ama't erra'tsena ñeññ e'ñe cohuen aguëne' ñeññ a'mtene' Yompor po'ñoñ tarro'mar ñapa' Yomporca'ye po'ñoñ a'mten, ñeñña' acheñer ñeññ e'ñe cohuen aguëne'pa' Yomporcha'ña apuerre' ñeñña' atarr coshaterre'. E'ñech attecma apuer ñeññ atet coshatenan ñeññ a'mtene' po'ñoñ. Ñaña ama't erra'tsena ñeññ e'ñe cohuen aguëne' ñeññ e'ñe pocte' es orrtatyets Yomporecop tarro'mar ñapa' Yomporecopca'ye e'ñe pocte' es orrtatyen, Yomporcha'ña apuerre' ñeñña' atarr coshaterre'. E'ñech attecma apuer ñeññ atet coshatenan ñeññ e'ñe pocte' es orrtatyets Yomporecop. ⁴² Ñaña añ ñeññ ama esoshe'maye' enteneto, erra'tsencha' apapue' ñeñña' orros tarro'mar ñapa' noca'ye neyochresha', ama't coñe'ta oñ apapet, napa' po'ñoçh o'ch notas, Yomporcha'ca'yeña apuerrahuetña ñeñña' atarr coshater-rahuet.

11

Juan ñeññ apatañtatse'tpa' mueñan pueyochresha' Jesúsesho
(Lc. 7.18-35)

¹ Yeçhatuahuan Jesús pueyochresha' ñeññ çharrasheña ñeññ puechetsa epsheña atetcha' pa'yeset, allempoñapa' ahuo' ñaña Jesús allot yeçhatysets; serrpare'tatyesan acheñenesha' all pa'netsreto.

² Añña Juanpa' allo'tsena all yottañpeñet. Allña'pa' o' e'mare'tan Cristo atet pa'yena, allenta mueñan pueyochresha' Jesúsesho. ³ Ñetña o' çhapuet allpa' atet otoset:

—Ñato' pate'ña ñeññep e'ñe po'ñoçh Cristotets ñeññ atarr yecuen ahuatoteñ o'ch huapa. Ñerra'm amate' ñeññeyaypepa' o'ch e'ñe potey allochña'pa' añcha' yecua' po'psheñeñ ñeñña' huapatsa ñeññ e'ñe Cristo.

⁴ Jesúsñapa' anapanetpa' atet otapanet:

—Te'pa' o'ch ahuerres seserrpare'tatuercha' Juan ora allpon ñeññ atet sentye-suennana' arr ñaña ora allpon ñeññ atet se'myesuennana' arr. ⁵ O'ch e'ñe seserrpare'tatuer ora ama't atto aporo'yetechnopa' te'ña'pa' o' e'ñe necuatyesuerranet ñaña ñeññ checa'repayetspa' te'pa' o' e'ñe chope'chyesuerret cohuen, ñaña ñeññ a'ptsaresyen leprapa' te'ña'pa' o' e'ñe a'cohuentataretetuerret ñamet, ñaña ñeññ paquetnesha'chnopa' ama't ñetpa' te'ña'pa' o' e'ñe e'myesuerret cohuen, ama't ñaña ñeññ rromayets te'ña'pa'

o' alla atantataretetuerret, ñaña ama't ñeñt huocchañneshachno te'ñapa' o' e'ñe neserpare'tatuerranet añ cohuen ñoñets alloch queshperret ñamet.

⁶ Jesúsñapa' alla oterranerr Juan pueyochresha':

—Ñaña ellonetpa' o'ch sotuer Juan ñeñt atet notenes, atarr cosheñtso'tsen ama't allohuen ñeñt atarr neyemtenaya na, ñeñt ama e'nenaye po'psheñeñ ñeñtcha' coshater-rahuet.

⁷ Allempoña Juan pueyochresha'pa' o' ahuanerret. Jesúsñapa' alla serpare'taterranerr acheñenesha' ñeñt atet pe't ahuaña Juan, ñeñtpa' atet otanet:

—Ahuaña allempo sete't amayo all serrpare'ten Juan, sapa' amaca' añecpaye' sete'teña all o'ch sentena' amuesma' atet a'yma'tateñ mōrr. ⁸ Ñaña amaca' añecpaye' sete'teña all o'ch senteña' ñeñt atarr cochnesha'tetsa pa'shtam all, tarro'mar yeñoteñ amayopa' amaca'ye eñalleña all ñeñt atarr cochnesha'tetsa pa'shtam. Yapa' yeñoteñ arrña yentenna' ñeñt atarr cochnesha' chorra'yenaya shetamuets añcha'taretepahuo. ⁹ Sapa' añecopca'yeña sete'tña amayo o'ch senteña' all ñeñt po'ñoçh a'mtene' Yompor po'ñoñ. Napa' o'ch notas: Juanpa' atto atarr sherbenan Yomporpa' ello metana'tuan allohuen ñeñt atto a'mtenet Yompor po'ñoñ. ¹⁰ Tarro'mar Juanpa' ñocop eñose't Yompor ahuat. Ñehua, allempopa' atet otne't na ñeñt atetcha' pōsa Juan nocop esempoch huapa, ñeñtpa' atet anaret ñoñets ahuatoteñ:

Papa' peñoche'pa'ch napa' o'ch nemñona'p puesheñarr ñeñtcha' ñanom otatsa ñeñtcha' pa'cohuentatyese' pōcop allcha' pōñmos.

¹¹ Ñeñto'marña na te'pa' e'ñe po'ñoçh atet notenes: Allohuen allpon acheñenesha' ñeñt eñalletetsa arr patsro ama't puesheñarra ama eñalleña ñeñt atarr sherbets atet ñerra'mrrate' Juan ñeñt apatyese't ahuaña acheñenesha' Yomporcop. Tarraña ñeñt ama esoshe'maye' enteneto ama't mamesha, tarraña ñerra'm pueyochresha' peñ Yompor ñeñt pue'ntañ'o'tsen atto te'pa' ayochreshatena ña, ñeñtña acheñerpa' atarrca'ye sherben, ello metanenan atto atarr sherben Juan.

¹²⁻¹³ 'Tarro'mar añña ñoñets, Moisés po'ñoñ ñeñt atet anaret ñaña añ ñoñets ñeñt quellca'yese't ñeñt a'mta'yese't Yompor po'ñoñ, ñetpa' ñeñtña serrpare'tete't attoch atarr ayochreshaterra Yompor tarremphua allempo orrtosa Juan. Ñaña allempoteñ serrpare'tatosanet Juan ama't teme'ttsen e'ñe po'huamencocma serrpare'tatyese't atet penaña Yompor po'cohuenña attoch ayochreshaterra ña ñeñt pue'ntañ'o'tsen. Ama't atrre'mñañnesha'pa' e'ñe ñeñt atarr muenet pueyochrocmañen. ¹⁴ Ñaña ñerra'm po'noçh same'ñyañcha' Juanpa' ñaca'yeña Elíasoterrets ñeñt atarr secuen ñeñtcha' sehuerroya. ¹⁵ Allohuenes ñeñtes ne'mñotene' neñoñ, çhaponasepa'chña seyoçhro ñeñt atet notenes.

¹⁶⁻¹⁹ Jesúsñapa' atet oterranerr acheñenesha':

—Ñehua, napa' o'ch neñotatas ñeñt atet pena patantarr acheñenesha' ñeñt yentyen te' ñeñt ama't errotena ama acshatpoteneto. Ñeñtpa' fariseonesha' atet petsa. Tarro'mar ama't allempo orrta Juan ñeñt apatañtatse't ñapa' ama rrane'te ñeñt yocrrañ yepen allohueney, ama orrane'te ñeñtecma yorren allohueney. Ñeñto'marña ñapa' cha so-tyese't çho'te' chorreña oneñet; ama't e'ñe mameshapa' ama pocteye' señche'te. Te'ñapa' o' norrtarra naña Ñeñten Acheñetosets. Napa' pa'namen nerra'yen ñaña norryen. Saña te'pa' atta sesochatse'tyenen naña atarro' arratsñañen ñaña atarro' orraññañen napa' año'chña e'ñe neyemuetyena ñeñt atarr ochñañenesha' ñaña ashcarñañeçhno ñeñt atarr cobra'yene' acheñenesha' quelle. Tarraña ama't atet sepennoñpa' Nomporña e'ñe eñotene' ñeñt po'ñoçh atarr sherbets ñocop. Ñaña allohueney ñeñtey e'ñe puechemerasha' pōhueney ñeñtey co'tene' ña poçta'ña yapa'çho'ña e'ñe yeñotuenña ñeñt po'ñoçh atarr sherbets. Ñeñto'marña yorrtatyeneñña ñeñt cohuen enten ña. Sañapa'

ama't e'ñe mameshapa' ama acshatpahuoyayso, e'ñe attes ñerra'mrrate' cheshanesha' ñeñt' chocma po'poñ entanna'tuenet amach mueno o'ch yemtana all yellsheñen po'potantañ pacmachoresha' all plazo all shontena acheñenesha'. Ñetñapa' amach mueneñeto o'ch coshaprechet pacmachoresha'. Ñeñto'marña ñetpa' atto yellsheñenetpa' atet oteñet po'potantañ pacmachoresha': "Yapa' ama't o' yerequërca'hua allo yocshame'tenapa' sañapa' amaña seshe'rarampenye; allotpa' ama't o' yepoctorare'tua ñeñt' ya'chpeñtsorech' allo yellcanrrortenapa' sañapa' amaña sellcapretenyo."

*Atto Jesúsapa' eños epo'mar anetsocop all ama ame'ñyeto
(Lc. 10.13-15)*

²⁰ Allempoña Jesúsapa' cha muene' che'ptare'tyen an acheñenesha' all pa'netsreto all epaye' entatyenanet po'partsoña ahuañmo'choteñ. Ama't entatyenanetañ po'partsoña ñetñapa' ama es cotape'chenaye ello cohuen Yomporecop, ñeñto'marña allpa' cha muene' che'ptare'tyesanet. Ñeñtpa' atet otyesanet:

²¹ —Nanaccha' llequëñtso'tsa'yenes coraziño'marneshacha', nanaccha' llequëñtso'tsa'yenes samña betsaido'marneshacha'. Tarro'mar ama't atarr norrtatyennaseñ nepartsoña sesho, sañapa' amaña soctape'cherroña ello cohuen Yomporecop. Ñerra'm arrcha'ña norrtatañ nepartsoña tiro'marneshesho ñaña sidóno'marneshesho, ñetñapa' ahuatoteñte' cotape'cherretañ e'ñe cohuen Yomporecop. Ñetpa' attoch e'ñe orrtetañ cha llecatenanet po'chñaret, cotnashe'mach chorra'yesetañ, tsapñach epachshema'tyenetañ all anorrcha'tyenet puellquëñoñet. ²² Ñeñto'marña te'pa' notenes: Esemphuañen allempoch acrare'tetuerra allohuen acheñenesha'pa' tiro'marnesha' ñaña sidóno'marnesha' ñetñapa' amach tama a'coñchatare'terretoña allempo. Coraziño'marneshacha' ñaña betsaido'marneshacha' saña allempopa' atarrcha' a'coñchatare'tes. ²³ Ñaña sa capernaumo'marneshacha' chate' sotenapañ atto e'ñe cohuen sentyena sañeña, Yomporñapa' allentach a'tapaterres pue'ntaño. Ñeñtpa' amachca'ye atteye' perrsoña Yompor, allachca'ye huapore'terres o'pono coñcha'puetso all parraren tso'. Tarro'mar ama't atarr norrtatonaseñ nepartsoña sesho, sañapa' amaña semnoña o'ch soctape'cherr cohuen Yomporecop. Ñerra'm arrcha' ñanom norrtatañ ahuatoteñ nepartsoña sodomo'marneshesho ñetpa' allorocmate' cotape'cherretañ cohuen Yomporecop. Allempopa' amate' a'poyatatare'terretañeña pa'netser. Orate' allo'tsenaraña. ²⁴ Ñeñto'marña te'pa' notenes: Esemphuañen allempoch acrare'tetuerra allohuen acheñenesha'pa' sodomo'marnesha' ñetpa' amach tama a'coñchatare'terretoña allempo. Capernaumo'marneshacha' saña allempopa' atarrcha' a'coñchatare'tes.

*Jesúsapa' atet oten, e'ñe same'ñeñoñen na, napa' na'huañañperrescha' ñeñt' atarr amue-rochtatañ sentyen
(Lc. 10.21-22)*

²⁵ Allempoña Jesúsapa' ma'yochenana Pompor, ñeñtpa' atet oten:

—Na Apacha' o'ch na'ye'chochtatonañ, p'apa' p'a ñeñte'p' atarr ayochreshattetsa pe'ntaño ama't ñaña arr patsro. Na'ye'chochtatonañ tarro'mar ora añechno ñeñt' pecohuenña pepen, ñeñtpa' ama arreye' pechapateñe pueyo'chro ñeñt' atarr eñotañ entyetsa. Papa' aña pechapaten pueyo'chreto ñeñt' ama eñotañe'ye' entyetso. ²⁶ Tarro'mar Apa e'ñe pemuereño't' ñeñtpa' atetña e'ñe pocte' penten p'a. Arrpa' allohua ñeñt' atet ma'yochenana Pompor.

²⁷ Jesúsapa' alla oterranerr acheñenesha':

—Nomp por allohuen po'cohuenña e'ñe eñotatuenen. Na ñeñten Puechemerenpa' ama po'ño'ch eseshaye' neñotenaye, ñapñaña Nomp por e'ñe eñotenen. Nomp porpa'cho'ña ama po'ño'ch eseshaye' eñotenaye napñaña na ñeñten Puechemeren e'ñe neñoteñ Nomp por,

ñaña erra'tsencha' ñeñt e'ñe pocte' nenten na ñeñten Puechemeren ñeñña'pa' o'ch neñotater Nompör. ²⁸⁻³⁰Sehua'cha'ta nesho allohuenes ñeñtes nene' seyo'chro ñeñt atarr amuero'chtatañ sentyen. E'ñe same'ñeño'ten na, napa' na'huaña'mperrescha' ñeñt atarr amuero'chtatañ sentyen. Napa' aña'ña nenerrnas ñeñt amach 'cha muero'chtaterrso; ñeñña sapa' e'ñech pocte' senteñ. Attochña sapa' señotenen napa' atarr nemuerensa ama atsrre'mo'chen entñoeno ama't e'ñe puešeñarrocpa. Ama't e'ñe mamesha ama añeye' ne'nen ñeñt e'ñe nocpa. Attochña e'ñe cohuen nocshatterres seyo'chro ama't e'ñe secamqu'ño'huen.

12

Allempo Jesús pueyochresha' taso'tam'pesyesnomuet trigo añe yetro allempocma amesen judionesha'

(Mr. 2.23-28; Lc. 6.1-5)

¹ Allempoña 'cherrerr pam'tarr allempo 'hocma amesen judionesha'. Allempoña Jesús'pa' arr oñem chetso'mar epuet pueyochresha'chno. Allempo oñenet pueyochresha'ña'pa' e'ñe pa'chporrño'fetpa' taso'tam'pesyesnomuet puechña'tets trigo o' rra'yenommet. ² Fariseonesha'ña ñeñt entahuet atet 'pa'nmu'etpa' ñetña'pa' allenta otyeset Jesús:

—Pecue'ñaca'yeña añ peyochresha' taso'tam'pesyesnomuet trigo; atet penet ñeñt ama pocteyaye o'ch atet ye'pa taruasats añe yetro tarro'mar te'pa' añe yetro ñeñt atet anaret ahuatoteñ allempocmach yamesen.

³ Jesús'ña'pa' atet otanet:

—Sapa' ama'trra selleyareña ñeñt atet 'pa' ahuat David allempo cheporra'nma epuet ñaña allohuen ñeñt cotene'. ⁴ Ña allempo'pa' be'tosos Yompör pa'pacillo allña'pa' rrosan pan ñeñt atma'ntataret atet ñerra'mrrate' ñeñt nenet all Partsocop. Ñehua, ñeñt panpa' ama pocteyayñe o'ch rros David ñaña ñeñt epuet. Ñeñt'pa' añach ñapue't rrene' cornaneshachno; ñeñt'pa' atet anuaret judioneshacop. ⁵ Ñaña ama't selleyareña ñoñets ñeñt atet anaret ñeñt Moisés po'ñoñ all oten atet pena ñaña cornaneshach' Parets pa'pacillo. Ñehua, ñet puesherbeño'fetpa' ama ameseneto añe yetro allempocma yamesen. Ñetpa' ama't atet penetpa' Yompörña'pa' e'ñe pocte' entenamet. ⁶ Napa' o'ch notas: Napa' ñeñten arro'tsenen nanac nesherben ello nem'taneñ ñeñt atet sherben Parets pa'paqu'ell. ⁷ Ñehua, añ ñoñetspa' ñeñña atet ote't Yompör ahuat: "Napa' ama e'ñe añe cohuen nenteno o'ch sapu'enen sayara ñeñt semtsen nocop. Añe'ñaña atarr cohuen nenten o'ch semuereña allohuen samo'tsesha'." Ñerra'm 'cho 'chennasañ seyo'chro ñeñt atet oteney Yompör, amach erro't sotatscheña ama't erra'tsena acheñer ñeñt e'ñe pocte' enten Yompör. ⁸ Ñeñto'marña te'pa' o'ch notas, na Ñeñten Acheñetosets ñeñten allsensare'ten, naca'yeña atet otets este' poctetsaña ñeñt'cha' atet ye'pa añe yetro allempocma yamesen.

Allempo Jesús'pa' a'crraterran ñeñt chelletsapöt

(Mr. 3.1-6; Lc. 6.6-11)

⁹ Metuerrerr Jesús allo'tpa' be'tosuerrerr judionesha' po'prahuo. ¹⁰ Allña'pa' allo'tsen puešeñarr yacma ñeñt 'cha chellena pot. Fariseonesha'ña'pa' allenta a'p'to'chet:

—Añe yetro allempocma yamesenpa' ta'm 'pocte'te' penteñ o'ch 'pa'crrateñerr acheñ? Tarro'mar atet a'p'to'teñet allochña'pa' esheccha' otteñe'chet.

¹¹ Ñaña'pa' atet otanet:

—Sapa' ñerra'm 'cho shora'nen ama't puemocarra secarrneror añe yetro allempocma yamesen, ama'tcha'ña allenta sechtere ama't ñeñte yetro allempo yamesen allohueney.

¹² Ñehua, acheñpa' elloca'ye metanenanña ñeñt atto sherben carrnero. Ñeñto'marña

napa' notenes e'ñe pocte' o'ch atet yeḡa ñeññ cohuentetsa ama't a'ñe yetro allempocma yamesen.

¹³ Allempoña Jesús pa' atet otan yacma ñeññ chelletsa pot:

—Te'pa' o'ch notaḡ petapuerr ḡot.

E'ñe otue'pa' ñaña pa' allentepa'tcha' tapuerran pot, e'ñe allorocma cohuenterra pot e'ñe attecmaterr ñerra'm po'pshemñtañot pot. ¹⁴ Fariseonesha'ña ḡha'nmaḡherretpa' cotape'chatanna'tyesnerret, atarr o'pateñet Jesús attoch muetsatachet.

Atet ote't Yompor ahuat Jesúsocop

¹⁵ Jesúsña eñotanetpa' ahuerr allot. Shonte' acheñeneshaḡhno coḡa'huanereter. Allohuen ñeññ atsna'tyetspa' e'ñe a'crratyesuerranet. ¹⁶ Atet otyesamet:

—Po'ñoḡ amach esesha' sotaḡsa'tatsto napa' na ñeññen Yompor Puechemeren.

¹⁷ Ñehua, ñeññpa' atet ḡa alloḡhñapa' attoch etsota Isaías po'ñoñ ñeññ a'mñtaye't Yompor po'ñoñ, ñeññpa' atet ote't Yompor Puechemerecop ñeññcha' Cristoterrets:

¹⁸ Añmapa' ñeññcha' atarr torrerrets nocop, ñapa' ñeññ nenen ñeññcha' atarr sherberrets. Ñapa' ñeññ atarr nemorrentena ñeññ e'ñe nocshatene'. Ñapa' ñach ahuamencat neperr necamquēñot, ñach eñotaterre' allohuen pa'namen acheñenesha' ama't ñeññ ama judioneshayaye. Añcha' eñotateranet ñeññ e'ñe cohuen ñoñets attoḡña e'ñe pocte' nentuerranet.

¹⁹ Ñapa' amach es otnare'tyerraneto ama't mameshapa' amach ama'toḡhetyerro. Ama't mameshapa' amach ḡhame'tyerraneto ama't allecma choḡeñe'ḡhyen acheñenesha'.

²⁰ Ama't ñeññ mueroḡhetyetsapa' ñapa' e'ñech muererranet. Ñeññpa' atetcha' netma'ntacha ñerra'mrrate' ama't puecharra ḡo'ne'ḡ tsopa'ne'pa' ñaña pa' amach ḡha a'meyatere. Ñaña ñerra'm lampareñ ḡha muene' mayen ñeññpa'ḡo'ña amach emayatere. Ñapa' amach ḡha es añcha'noḡhtana'tyerro, tarraña esempohuañenpa' e'ñech atḡa a'mḡhechatuerran ora allohuen ñeññ ama pocteye' enteno Yompor.

²¹ Ñeñño'marña allohuen pa'namen acheñeneshaḡhno ñachña e'ñe yemuetuerret. Arrpa' allohua huañ atet ote't Yompor ñeññ quellquē't Isaías.

Atto puesheña'tets oteñet Jesús ñapa' oneñeño' po'huamencot queḡhpatenanña po'potañ oneñeḡeḡhno acheñenesha'

(Mr. 3.19-30; Lc. 11.14-23; 12.10)

²² Jesús pa' alla huapaterrñañeterr puesheñarr yacma ñeññ aporo'ye't ñeññ chorrena oneñeḡ ḡha opanatateñ. Jesúsña pa' a'crrataḡ, ñeññña opanerpa' o' alla eñorerra, ñaña o' e'ñe cohuen cohuer. ²³ Allohuenña acheñenesha'pa' atarr cohuanrrorteñet, ñetñapa' atet otyeset:

—Ñato' añte'ca'yeña David po'mñreneñ ñeññcha' Cristotosets.

²⁴ Fariseonesha'ña allempo e'mare'chetpa' ñetñapa' atet otyeset:

—Atto queḡhpatatyenan oneñeḡeḡhno acheñenesha' añaca'ye ahuamencat pene' Beelzebú ñeññ pompor pen allohuen oneñeḡeḡhno.

²⁵ Jesúsña pa' eñotanet ñeññ atet cotape'chatse'tyenet pueyoḡhreto ñocop ñeññ atto otyeñet ñapa' oneñeḡa pompor po'huamencot queḡhpatatenan oneñeḡeḡhno acheñenesha'. Ñeñño'marña ñapa' atet otanet:

—Ñerra'm puesheñarr añcha'tare't elloptannena pa'cheñer e'ñe ñagattsetpa' e'ñech poctacma a'ḡlatanna'tuerret. Attecmaḡ ḡannerra ñeññ parro yeḡhetsa pa'terr anetso, ñerra'm ḡho elloptannenet e'ñe ñagattsetpa' ñeññña atto huomencatenetpa' ñeññpa'ḡo'ña ḡhachca'ye huañerrets. Attecmaḡ ḡannerra ama't ñeññ e'ñe pamo'tsna'tarecmuet ñerra'm elloptannerret e'ñe ñagattsetpa' ñeññña atto huomencatenetpa' ñeññpa'ḡo'ña

chachca'ye huañerrets. ²⁶ Attecmach panna'ta ñaña oneñe pueyochreshachno ñerra'm oneñe'echno e'moñe'tannenet, ñerra'm huapore'tannenet e'ñe ñagattseta amach errotenot allo'na atarr huomencatneneto. Po'ño'ch oneñe'pa' amaca'ye huapore'tanneno. ²⁷ Sapa' atet sotenen napa' Beelzebo' po'huamencot

nequechpateñña e'ñe ña pueyochresha', ñehua, te'pa' o'ch notas: Ñeñ' seyochresha' sepen sa ñeñ' eñotene' ñamet o'ch quechpatachet oneñe'echno acheñenesha', ñetpa'cho'ña amaña Beelzebú po'huamencoteye' quechpateñetoña oneñe'echno acheñenesha'. Ñetpa'cho'ña Yomporoña po'huamencot quechpateñetña oneñe'. Ñeñ'tña o' eñotatas ñeñ' atet sotenoñ ñeñ'pa' amaca'ye po'ño'ch atteyaye. ²⁸ Po'ño'chca'ye Yompor e'ñe Puecamquënoñ ñeñ'tña ahuamencat nepene' attoñ nequechpateñña oneñe'echno acheñenesha', ñeñ'tcha'ña señotate' te'pa' o' nechapatonas Yompor po'cohuenña ñeñ' atto po'ño'ch atarr ayochreshattena ña.

²⁹ Ñehua, yapa' yeñoteñ ñeñ' atarr ahuamencattetsa atto atarr ahuamencattena oneñe', ñaña'pa' e'ñe po'huamencot cohuan'pesyenan allohuen e'ñe cohuen ñeñ' pa'paquëll pa'yen. Tarraña ñerra'm esempo o'ch huapoña ñeñ' atarr ahuamencatesha' ñeñ'tcha' metanose'ña po'huamenc atet ñerra'm na Nompor, ñeñ'tcha'ña rromose' o'ch huancos, alloch'ñapa' o'ch be'tosos all ñeñ' pa'paquëll pa'yen o'ch e'ñe puerrata'psos ñeñ' allpon o'patyena ña.

³⁰ Ñeñ'to'marña te'pa' o'ch notas allohuenes: Ñerra'm eseshas ñeñ'tes ama netorrapretenaye ñeñ'tña acheñerpa' chaca'ye epatare'tennan ñeñ' atet netorra'yena na. Ñeñ'tpa' o'ch netma'ntatasa atet: Ñerra'm esesha' ama na'yapa'chapretenaye ñeñ' na'yapa'chen na, ñeñ'tñapa' cha a'parratse'tam'penen a'yenet.

³¹ Ñeñ'to'marña te'pa' o'ch notas: Allohuen pa'namen sosya'tsañe'chno ñeñ' ama pocteye' enteno Yompor ama't ñaña achm'are'tanna'teñets ñeñ'tpa' a'pretna'po' nenteñ.

³² Ñaña ñerra'm esesha' nesasene' na Ñeñ'ten Acheñetosets ñeñ'tpa' a'pretna'po' nenteñ. Tarraña ñerra'm esesha' añ achm'are'teññañet Parets Puecamquëñ ñeñ'tñapa' amaca'ye a'pretna'pahuoye' nenteñe. Ñeñ'tpa' amach a'pretna'pahuoterro e'ñe tayoteñ errpono-huañen.

Allohuen acheñ ñeñ' e'ñe po'ño'ch cohuen acheñer, ñetñapa' añcha' orrtatyenet ñeñ' e'ñe cohuenare'

(Lc. 6.43-45)

³³ Ñehua, yeñoteñ allohuen acheñ ñeñ' e'ñe po'ño'ch cohuen acheñer, ñetcha'ña orrtatenet ñeñ' e'ñe cohuenare'. Tarraña po'potantañ acheñenesha' ñeñ' po'ño'ch ama cohuenayaye ñetñapa' añach orrtatenet ñeñ' ama cohuenayaye. Ñeñ'tpa' atetcha' netma'ntaterra: Ora allohuen ñeñ' e'ñe cohuen narmetsoch pue'merpa'cho'ña e'ñech cohuenare'. Añña po'pchañ narmetsoch ñeñ' ama cohuenayayepa' pue'merpa'cho'ña amach e'ñe cohuenayaye. Ñeñ'to'marña attoña yeñoteñ erra'tsente' ñeñ' e'ñe cohuenare' narmetsoch ñaña ñeñ' ama cohuenayaye narmetsoch, pue'merotña e'ñe yechme'tenanet. ³⁴⁻³⁵ Sapa' ama cohuenayayso. Cha sottena ñerra'm shech'pa e'ñe sompor sepen allohuenes. Ñeñ'to'marña amach errotenot señoso cohuen tarro'mar sapa' po'ño'chpa' ama cohuenayayso. E'ñe atet atarr soctape'chatse'tyen seyochro ñeñ' ama cohuenayaye, atto'ca'yeña señosats'e'tyen. Ama't erra'tsena acheñer ñeñ' e'ñe po'ño'ch cohuen ñapa' añcha'ña orrtatyen ñeñ' e'ñe cohuenare' cotape'chen pueyochro tarro'mar pueyochroña all cotape'chenan shonte' ñeñ' e'ñe cohuentetsa. Tarraña po'poñ acheñer ñeñ' po'ño'ch ama cohuenayaye, ñapa'cho'ña añach orrtatyen ñeñ' atet cotape'chen pueyochro ñeñ' ama cohuenayaye tarro'mar pueyochroña all cotape'chenan shonte' pa'namen sosya'tsañ. Tarro'mar ñerra'm shonte' yoctape'chen yeyochro ñeñ' cohuentetsa, ñeñ'tpa' e'ñech ñeñ'ta cohuen yeserrpare'ten. Tarraña

ñerra'm shonte' yocape'chen ñaña yeyochro ñeñt' ama cohuenayayepa' ñeñt'pa'cho'ña e'ñech ñeñta yemnen o'ch yeserrpare'tyen. ³⁶ Po'ño'ch napa' o'ch alla noterrerr, es-empohuañen allempoch acrare'tetuerra allohuen acheñenesha'pa' allohuen ñoñets ñeñt' atfa otatse'tyen acheñenesha' ñeñt'ña'pa' a'metatatyeretcha'. ³⁷ Tarro'mar ñerra'm e'ñe cohuenare' seserrpare'tyen te' Yomporña'pa' e'ñech pocte' entuerrnas señoñ allempo. Tarraña te'pa' ñerra'm cha señosatse'tyen ñeñt'ña señoñerpa' ñeñtachña secoñchatterre' allempo.

Atto Jesús'pa' otan acheñenesha' ñeñt' ama cohuenaye' cotape'chetso ñetña'pa' chocma e'nenet partsoteñets

(Mr. 8.12; Lc. 11.29-32)

³⁸ Allempoña allponsheña ñeñt' atarr etsotayenayeñ ñoñets ñeñt' atet anaret epuet ñaña allpon fariseonesha' ñetña e'ñe pueshquëño'fetpa' atet ochet Jesús:

—Yapa' Maestrocha' yemneñ o'ch porrtatonay pepartsoña ñeñt'cha' yeñotate' p'apa' po'ño'chte' Parets Puechemerep' ñeñtep'te' Cristototsets.

³⁹ Ñaña'pa' atet otanet:

—Acheñenesha' ñeñt' corra'yetsa te' ñetña'pa' ama cohuenaye' cotape'chyeneto, ama añeye' cosheneto Yompor ñeñto'marña ñetpa' e'ñe orrena otannet ahua'ch norrtatanet nepartsoña. Tarraña amach es norrtataneto. Napa' añach pa'terr neñotatanet atet eñotatanet Jonás ahua't nínivo'marnesha' allempo a'mtane't Yompor po'ñoñ.

⁴⁰ Ñehua, yeñoteñ Jonás allempopa' allo'tsena cacacotmo ma'pamuet, yeto ama't ñaña tsapo ñeñt' añecmuen cac. Atet'cha' neperra namña Ñeñten Acheñetosets, napa'cho'ña nema'pamuet'cha' o'pono e'ñe allohuanen patso, yeto ama't ñaña tsapo. Ñeñt'cha'ña eñotaterahuet atet penaña ñeñt' huetsa Yomporeshot. ⁴¹ Tarro'mar ahua't allempo serrpare'tatane't Jonás nínivo'marnesha', ñetña'pa' allempocma cotape'cherret e'ñe cohuen Yomporecop. Te'ña arr seshopa' allo'tsenen na ñeñten ello metanene' ñeñt' atet serrpare'tate't Jonás. Tarraña sañapa' amaña soctape'chenoña ello cohuen Yomporecop. Ñeñto'marña esempohuañen allempoch acrare'tetuerra allohuen acheñenesha' ñeñt'ña nínivo'marnesha' ñeñt' e'ñe cohuen cotape'cherrets Yomporecop ahua't, ñetpa'cho'ña orrterret'cha', ñeñt'cha'ña señotaterre'ña sapa' ama't mameshapa' ama pocteyayeña ñeñt' atet sepa'yese't tarro'mar ama soctape'cherro ello cohuen Yomporecop. ⁴² Ñaña te'pa' o'ch neyerpatasa ñeñt' atet p'a ahua't puesheñarr coyanesha' ñeñt' amcha'tarettatse't atarr ba'chayo allohuanen pats sa'ponet. Ñeñt'ña coyanesha'pa' allot'eñ on o'ch e'mñotenana' Salomón pueserrpareñ ñeñt' atet atarr eñotañte't. Te'ña arr e'ñe seshopa' allo'tsenen ñeñten puesheñarrana ñeñten atarr es neñoten namña, ello nemtaneñ atto eñotañte't Salomón. Tarraña sañapa' amaña es sotapoteno. Ñeñto'mar esempohuañen allempoch acrare'tetuerra allohuen acheñenesha', ñeñt'ña coyanesha' ñeñt' e'ñe cohuen e'mñotatse't ñapa'cho'ña orrterrach, ñeñt'cha'ña señotaterre' sapa' ama pocteyayeña ñeñt' atet sepa'yese't tarro'mar sapa' ama es same'ñe'te ama't e'ñe mamesha.

Atto Jesús'pa' eñotatanet ñato' oneñe'pa' o'ch alla chorrerranerr acheñ allot' cha'nom ahuaña

(Lc. 11.24-26)

⁴³⁻⁴⁵ 'Ellonetpa' o'ch alla neñotatererr serr po'poñone't ñeñt'cha' atet a'pare'tterra acheñenesha' ñeñt' te'pa' ama e'ñeye' cohuen cotape'cheneto Yomporecop. Ñehua, oneñe't ñerra'm esempo cha'nom acheñenesheshot, ñeñt'ña oneñe'pa' o'ch auyes erraparen ama't amayo'mar e'nyese' po'psheñeñ allcha' ye'cherrerr allcha' e'ñe amesurrerr cohuen. Tarraña ñerra'm amach erra eñchepa' atteñapa' o'ch ot: “Napa' o'ch alla ahuerren nepaclo allot' necha'nom ahuaña.” Atet'cha'cho' p'a. O'ch alla ahuerren allot' cha'nom ahuaña. Allña o'ch cherrpa' e'ñech cohuen entuerran pa'paquëll, e'ñech cohuen

atarrapo'tuaret, e'ñech cohuen añño'tyesaret, tarraña amach eseshaye' yeçhetso all. Allempoñapa' o'ch alla ahuer allo'tsa'yen pamo'tsesha'pa' o'ch enana' po'poñ cançherrsheña oneñe'fēchno ñeñt nanac sosyare', ñeñt ello metana'tuene' ñeñt atet sosyaten ñeñt hua'ñene' o'ch yeçhaprecha. Allohuenetpa' o'ch chorreñet ñeñt acheñer. Allempoña tsapa'tonetpa' allo'nach sen ñeñt acheñer sosyatnomuets huomenc. Elloch metanerran ñeñt atet pātse'tyese't ñenmañ. Po'ñoçhcha'ca'ye atet perraña acheñenesha' ñeñt te'pa' ama e'ñeye' cohuen cotape'cheneto Yomporecop.

Allempo huapoña Jesús pachor ñaña pa'mo'nasheñnesha'
(Mr. 3.31-35; Lc. 8.19-21)

⁴⁶ Allempo atet eñorana'tenana acheñenesha'pa' o' huapa Jesús pachor epuet ñaña pa'mo'nasheñnesha'. O' çhapuet allpa' ñetñapa' alla tomçhenet a'yot. Añ muenenet ahuo'ch serrpare'tatoset. ⁴⁷ Allempoña puešeñarrpa' atet otan Jesús:

—O'ca'ye huapaña p̄achor ñaña pemo'nasheñnesha'. Ñetpa' a'yote'tsa'yenet, mueneñet o'ch serrpare'tatospet.

⁴⁸ Ñaña'pa' atet otan ñeñt otene':

—¿Ama't seño'teñe ñeñt e'ñe po'ñoçh nachor nepen ñaña ñeñt e'ñe po'ñoçh nemo'nasheñ nepen?

⁴⁹ Allempoñapa' yochan pueyochresha'pa' atet otanet:

—Napa' añca'yeña ñeñt e'ñe po'ñoçh nachor nepen ñaña ñeñt e'ñe po'ñoçh nemo'nasheñnesha' nepen. ⁵⁰ Ñehua, ama't erra'tsena ñeñtcha' e'ñe atet p̄ohuene' ñeñt atet muenen Nomp̄or ñeñt pue'ntañ'o'tsen ñeñtca'yeña e'ñe po'ñoçh nemo'nasheñ nepen ñeñtña noçh nepen ñeñtña nachor nepen.

13

All toma'ntatanet Jesús ñeñt a'parre'tene' puerets
(Mr. 4.1-9; Lc. 8.4-8)

¹ Ñeñte yetropa' çha'nerrerr Jesús pocolotpa' anorruerr sa'patop̄ño. ² Allña'pa' emchorra'huererr shonte' acheñenesha' ñeñto'marña Jesús'pa' a'tap noñtopa' ahuañpes mame' allpononet allña'pa' anorros noñto. Acheñenesha'ña allohuenetpa' alla tomçha'tet sa'patop̄ño. ³ Allña'pa' esocmañen yeçhatyenan acheñenesha' pa'namen toma'nteñtsoçhno. Ñeñt ñanompa' atet otanet:

—Ñeñtña a'parrene' puerets ñaña'pa' ahuo' allcha' a'parre'tyenana' puepuer. ⁴ All a'parre'tyeñ patanta'tetsña'pa' alla çhapyes toño'mar. Allña'pa' huacha'tyesa ot e'ñe añyallmechuenana' puerets. ⁵ Po'poñeçhnoñapa' alla çhapyes mapuetro'meso'mar all ama tama eñalle pats. Ama nanac o'pono'tseno patso ñeñto'marña mametollapa' cheparesuañ. ⁶ O'ña enome'ta'muen atsrretpa' alla a'uyatuer. Ama erçha'tena' ñeñto'marña alla hueya'huerra. ⁷ Po'potantañña pueretspa' alla çhapyes allcha' chepares aj. Allpa'çho' mameshapa' cheparesuañpa' ajña'pa' mameshapa' atesha'tua alla ca'matuerranña narmets alla a'cllatuer. ⁸ Po'potantañeçhno ñeñtña'pa' arr çhapyes all e'ñe cohuen patso. Ñeñtña'pa' e'ñe cohuen chepares. Allempoña atesha'tuapa' ñeñtña'pa' atarr aton ellom̄re'tyes—puecha'tetspa' çharroch çharra' pue'llomer, po'pchañeçhnopa' pechapoch çharra' pue'llomer, po'pchañeçhnopa' ma'poch çharra' pue'llomer.

⁹ Allempoña Jesús'pa' alla otarraneterr:

—Ñeñtes po'ñoçh ne'mñotene', çhaponasepa'ch seyoçhro ñeñt atet netma'ntatensa añ noñets.

Atet otanet Jesús ñeñtecop atet toma'ntatyenanet
(Mr. 4.10-12; Lc. 8.9-10)

¹⁰ Allempoñapa' ponem̄ya pueyochresha'pa' atet otoset:

—¿Eso'mare'tña peserrpare'teño'tpa' atfa es petma'ntatyenanet?

¹¹ Jesúsñapa' atef oterraneterr:

—Sa te'pa' Yomporña o' muenaterres attoch seño'terr ñeñt ama eñotpahuoyaye ama't ahua'toteñ ñeñt atef penaña Yompor po'cohuenña atto ayochreshattena ña pue'ntañof. Tarraña po'potantañechnoñapa' ñeñt atfa es puecha'yetsa, ñocpuetñapa' amach erro'tenof eñoterrñañeto Yompor po'cohuenña. ¹² Esha'te' o' çherranet pueyoçhreto ama't e'ñe allpona Yompor po'ñoñ elloña Yomporpa' allo'nach eñotatnenanet nanac shonte'. Tarraña esesha'ña ñerra'm ama çhenaneto pueyoçhro tarro'mar ñetpa' ama po'ñoçhaye' aguëññañeto Yompor po'ñoñ, ama't allpon eñotyenetañ pueyoçhro ñeñtñapa' çhach puerratanmperranet Yompor. ¹³ Ñeñto'marña ama't neserrpare'tatenanet toma'nteñtso, ñocpuetñapa' ama eñoteñetoña ñeñt atef netma'ntatenanet. Attoña ama't enteñetañ, ñetñapa' ama amnataretteneto o'ch es çchapahuet pueyoçhreto. Ama't e'mueñetañ amaña çhenanetoña pueyoçhreto ñeñt atef yeçhateney Yompor po'cohuenña. ¹⁴ Atef penet ñetpa' te'ñapa' po'ñoçh o' etsotua Isaías po'ñoñ ñeñt a'mtaye't Yompor po'ñoñ ahua't. Ñeñt'pa' atef ote't Yompor:

Ama'tcha' po'ñoçh e'mueñetañ ama't e'ñe ahua'tapa' amach çchapanetoña pueyoçhreto.

Ñaña ama'tcha' çho e'ñe es entenetañpa' amach çchapanetoña pueyoçhreto.

¹⁵ Tarro'mar ñeñt acheñeneshar te'ña ñet pueyoçhretopa' nanac echarrtenet attochña amach es çchenahueto pueyoçhreto. Te'ña ñetpa' amach mueneñeto o'ch es e'mñotet taye'to'te' es çchenahueto pueyoçhreto. Te'ñapa' amach mueneñeto o'ch es entet taye'to'te' çherranet pueyoçhreto. Attochña amach es cotape'cherreto nocop ama't e'ñe mamesha attochña na'queshp'aterranetañ.

¹⁶ Allempoña Jesús'pa' alla oterranerr pueyoçhresha':

—Saña po'ñoçhpa' atarr cosheñtso'tsenes sa tarro'mar atto o' senterrñañ Yompor po'cohuenña seclloyot te'ñapa' o' e'ñe çherrnasa seyoçhro. Ñaña atto se'muerrñañ Yompor po'ñoñ, te'ñapa' o' e'ñe çherrnasa seyoçhro. ¹⁷ Po'ñoçhca'ye notenes e'ñe ahua'toteñpa' shonte' ñeñt a'mta'yese't Yompor po'ñoñ ama't ñaña ñeñt e'ñe pocte' es pa'yestse't allempo, ñetñapa' atarr muenetañe't o'ch enterrñañetañ Yompor po'cohuenña ñeñt o' senter sa te'. Tarraña allempo ñetpa' amaña eseshaye'ña enterrapaye Yompor po'cohuenña. Ama't atarr muenetañe't o'ch e'mñoterrñañet Yompor po'ñoñ ñeñt o' se'muerr sa te'. Tarraña allempo ñetpa' amaña eseshaye'ña e'muerrapayeña Yompor po'ñoñ.

*Arrpa' all eñotatanet Jesús ñeñt toma'ntatenanet ñeñt a'parre'tene' puerets
(Mr. 4.13-20; Lc. 8.11-15)*

¹⁸ Jesúsñapa' alla oterranerr pueyoçhresha':

—Ñeñto'marña te' sapa' se'mñoten o'ch neñotatas ñeñt atef yeçhateney ñeñt atef o' netma'ntatua atef ñerra'mrrate' pueheñarr ñeñt a'parrene' puerets. ¹⁹ Ñehua, añ puerets ñeñt çchapyesets toño'mar, ñeñt'pa' añ notenes acheñenesha' ñeñt e'mñotenayeñ Yompor po'ñoñ ñeñt atto ayochreshattena ña. Ama't e'mñotenetañ tarraña ama çhenaneto pueyoçhreto ñeñt po'ñoçh atef oteney Yompor. Ñeñto'mar allorocmach huapa oneñetpa' o'ch alla puerratanmperranet Yompor po'ñoñ e'ñe pueyoçhreto. ²⁰⁻²¹ Ñaña ñeñt çchapyesets mapuetro'meso'mar ñeñt'pa' añ notenes acheñenesha' ñerra'm esempo e'mñoteññañet Yompor po'ñoñ e'ñech allorocma pocsheñesha' aguëññañetañ Yompor po'ñoñ. E'ñech cohuen ame'ñeretañ tarraña ñeñt'pa' mamecpach atef penet. Tarro'mar ñetpa' e'ñe atef penet ñerra'mrrate' narmets ñeñt chepuets mapyo amach eñalle puereçh. Tsapatonetña ñerra'm o'ch huapanet topateñets ñeñt'cha' mueroch'tatahuet tarro'mar ñetpa' o' ame'ñeretañ Yompor po'ñoñ, ñetñapa' allorocmach alla queçhp'uerretña Yompor po'ñoñ. ²² Ñaña puerets ñeñt çchapyesets ajmo'mar, ñeñt'pa' añ

netma'ntatena po'potantañ acheñenesha' ñeñt e'mñnotenayeñ Yompor po'ñoñ. Ama'tcha' çhapanetañ pueyoçhreto, tarraña ñetpa' allo'nach senet e'ñech aña atarr cotape'chenet ñeñt lleca'yenet arr patsro ñeñt e'ñe ñocpueta. Añach muenenet o'ch esocmañen es echyenet, tarraña ñeñtpa' çhaca'ye shequënanet. Attoña ñetpa' amach errotenot ortatyensñañetoña ñeñt e'ñe cohuen enten Yompor. Ñetpa' e'ñe atteta ñerra'm narmets ñeñt çha a'cllaten ajma' ñeñto'marña amach errotenot me'teneto o'ch ellomire'tyeset. ²³ Ñaña añ puerets ñeñt çhapyesets e'ñe cohuen patso ñeñt e'ñe cohuen cheparsatspa' ñeñtña toma'ntenaya po'potantañ acheñenesha' ñeñt e'mñnotene' Yompor po'ñoñ, ñoñetspa' e'ñech cohuen çhenanet pueyoçhreto. Ñetña'pa' ñeñtet po'ñoçh orrtatyenet ñeñt atarr sherbets Yomporecop. Attoña ñetpa' e'ñe atet penet ñerra'm narmets ñeñt atarr aton ellomire'tyets —pate'tets çharroch çharra' pue'llomer, po'poñpa' pechapoch çharra' pue'llomer, po'poñpa' ma'poch çharra' pue'llomer.

Atto Jesús'pa' toma'ntaterranet atet pena ñeñt a'parre'tene' ta'tllom e'ñe all a'parraret cohuen trigo

²⁴ Allempoña Jesús'pa' alla toma'ntaterraneterr, ñeñtpa' atet oterranelerr:

—Yompor po'cohuenña ñeñt atto te' ayochreshattena ña pue'ntañot, ñeñtpa' atet pena ñerra'mrrate' puesheñarr yacma ñeñt a'parrene' cohuen puerets pa'mro. ²⁵ E'ñe cohuen a'parre'tuepa' tarraña allempo manrenet allohuenet, e'ñe't a'nahua huapa ñeñt e'moñe'tene'pa' allña'pa' ahuo't a'parre'tyesuenana' ta'tllom e'ñe all a'parraret cohuen trigo. Ahuo'tña a'parre'tueña'pa' o' ahuer a'nahua. ²⁶ Narmetsña'pa' o' cheparesua o' me'tyesuapa' allempoña'pa' entet ñaña ta'te' o' chepares epuet trigo. ²⁷ Allempoña'pa' huacha'ta pamo'mte' pa'taruasañer, ñetña'pa' atet otoset: “¿Ama't, Nompocha' cohuenaye' pa'parrenoña puerets pa'mro? Errotenotuañaca'ye o' chopña ñaña ta'te' all.” ²⁸ Ñaña'pa' atet otanet: “E'ñeca'ye cohuen na'parraña nepuer all. Ñeñt ne'moñe'tene'pa' ñeñte'ca'yeña o' atet pamñsen.” Pa'taruasañerña'pa' atet ochet: “¿Ama't pemno o'ch ahuey o'ch ya'mare'tuerra'ña ta'te'?” ²⁹ Ñaña'pa' atet otanet: “Amachca'ye sa'mare'tatsche te't çha sa'maramñennan netrigror. ³⁰ Allepa' chepuepa' epuet. Es-empoch pomella'hua trigopa' allempochña noch ñeñtcha' a'yapaçhe' trigo: Ñanomcha' añ sa'yapaçha' ta'te' o'ch sehuancachmech attoch ya'poyatater. Sehuanca'huepa' çhoscha'ña a'yapaçhe'ña ñaña trigo o'ch sañño'teña' allecma neshontateñ.”

Atto Jesús'pa' toma'ntaterranet atet pena pue'llomer ñeñt otenet mostazllom (Mr. 4.30-32; Lc. 13.18-19)

³¹ Allempoña Jesús'pa' alla oterranelerr:

—Añ Yompor po'cohuenña ñeñt atto ayochreshattena ña pue'ntañot, ñanompa' e'ñech puesheña'ttsa ame'ña'yetsa. Allempoteñña'pa' allo'nach sen atonetnomtsa ñeñtcha' ame'ñerrtsa attochña e'ñe epa'huerra erracmañen Yompor po'cohuenña.

Ñeñtpa' añ toma'ntaterraneterr mostazllom:

—Ñeñtña pue'llomiretollpa' puesheñarrña'pa' o' anem pa'mro allcha' nare'teña'.

³² Ñehua, e'ñe yeñoteñ mostazllom ñeñtpa' atarrca'ye nanac añeñolleshallmerr, tarraña ñerra'm o'ch yenare'çpa' allempoña choppa' allo'nach sen rrorranmats cohuen, atarrchetnomuets, elloch metana'tuan po'pchañ narmetsoçhno. Ñeñtña narmetsocherpa' o'ch huacha'toña o'çhno ñeñtcha' ama'tanatyesosets puetaçro'mar.

Atto Jesús'pa' toma'ntaterranet ñeñt atet pena chase' (Lc. 13.20-21)

³³ Jesús'pa' alla serrpare'taterraneterr ellonet ñeñt atet pena Yompor po'cohuenña ñeñt atto atarr ayochreshattena ña pue'ntañot. Ñeñtpa' ama'tcha' añeñolla ñeñtcha' ñanom

orrtatsa tarraña e'ñe ña po'huamencot mame'tollapa' o'ch e'ñe epa'hua ora errañaren. Ñeñtpa' añ toma'ntaterraneterr atet pena chase':

—Ñeñt chase'pa' allo tsetenan coyanesha' harina' ñeñt oñetsetstaten attoch a'chasatan harina' esheccha' e'ñe a'muesatue. Ñeñña chase'pa' ama'tcha' añetolla net, ama'tcha' aton harina' ñeñt ma'pa arroga, mame'tollapa' o'ch e'ñe a'muesatuanña ama't atarr aton harina'.

Jesúspa' ora allpon ñeñt atet ye'chatyenan acheñenesha' ñeñtpa' attoña pa'namenot es toma'ntatyenanet

(Mr. 4.33-34)

³⁴ Ora allpon ñeñt atet ye'chatenan Jesús acheñenesha', ñeñtpa' atto es toma'ntatyenanet. Allempopa' ama serrpare'tataneto e'ñe atta, chocmaña serrpare'tatenanet toma'nteñtso. ³⁵ Attoña o' etsoterra ñeñt atet ote't ñeñt a'mtaye't Yompor po'ñoñ ahuat ñeñt atetcha' ye'chaterr Cristo:

Napa' neñerrcha' e'ñe toma'nteñtso; na'poterrcha' ñeñt ama a'potareteyaye ama't ahuatoteñ allempoteñ Yompor ye'chcatan añ patser.

Atto Jesúsapa' eñotaterranet ñeñt atma'ntatarettetsa ta'tllom epuet trigo

³⁶ Alloña Jesúsapa' sa'nman acheñenesha'pa' o' cherr pocollo. Allña hua'cha'toña pueyochresha'pa' atet otoset:

—Te'pa' o'ch potey e'ñe eñotochen ñeñt toma'ntena ta'te' ñeñt chepuets pa'mro.

³⁷ Ñaña'pa' atet otanet:

—Ñeñt nare'tene' e'ñe cohuen pueretspa' ñeñtpa' naca'ye Ñeñten Acheñetosets. ³⁸ Ñeñt na'muer nepenpa' ñeñtca'yeña añe patser. Ñeñt cohuen pueretspa' ñeñtca'yeña Yompor pueyochresha' ñeñtcha'ña cherrets all añcha'tare'ttena Yompor. Ñeñt ta'te'pa' ñeñtca'yeña oneñet pueyochresha'. ³⁹ Ñeñt e'moñe'tene' ñeñt nare'tam'pse' ta'te' ñeñtca'yeña oneñet pompor. EsemPOCH cherr allempoch pomella'huapa' ñeñtpa' añ toma'ntena allempochña mellapoterra. Ñeñtcha'ña a'yapa'cherretspa' ñeñtca'yeña mellañoteñnanesha' ñeñtcha' hua'cha'ttsa entot. ⁴⁰ Atet ap'chenet ta'te' te' o'ch a'poyatachet tsopa' atetcha' perrñañetña oneñet pueyochresha'chno allempoch mellapoterra. ⁴¹ Ñehua, na Ñeñten Acheñetosetspa' nach mueñerre' nemillaño'teñnaneshar ñeñtcha' a'yapa'cha'tuerre' allohuen ñeñt cotape'chatyenuet sosey ñaña allohuen ñeñt e'ñe añe etsotayen patpareñ. Arro'tcha' a'yapa'chare'tterra allo'tsa'yen ñaña Yompor pueyochresha'chno, ama't e'ñe all ayochreshatena ña. ⁴² O'ch e'ñe a'yapa'chare'tetuerre'tpa' allempochña asaprrotare'ttet o'pono all huorten tso'. Allña'pa' allcha' yahuanrrorterret, panmueño'tet atserrpa' rraso'tyerretcha' pa's. ⁴³ Allempoña allohuen ñeñt e'ñe pocte' es pa'yets ñetña'pa' poptetsetach e'ñech atet ñerra'm atsrret. E'ñech cohuen popuetyenet all añcha'tare'ttena ñeñt pompor penet. Allohuenes ñeñtes ne'mñotene' neñoñ chaponasepa'chña seyochro ñeñt atet notenes.

Atto Jesúsapa' toma'ntaterraneterr shonte' quelle ñeñt e'potare'ttetsa patso

⁴⁴ Po'pocheño Jesúsapa' alla toma'ntaterranet po'poñone't. Ñeñtpa' añ toma'ntatanet Yompor po'cohuenña atto atarr ayochreshatena ña, ñeñtña'pa' atarr aye'chochen. Ñeñtpa' atet toma'ntatanet ñerra'mrrate' shonte' quelle ñeñt e'potare'ttetsa e'ñe patso. Ñeñña quelle puesheñarr yacmapa' machayotach entos. O'ña entuepa' o' alla pampa'ner ñaña'pa' o' ahuer e'ñe pocsheñesha' allenta pomhuahueran ora ñeñt allpon echyen allochña'pa' attoch echan quelle alloch rañterrana ñeñt patser allo'tsen quelle. Attochña ganam'perrana atarr shonte' quelle ñeñt atarr ye'chena.

Atto Jesúsapa' toma'ntaterraneterr ñeñt atarr co'chnesha' serets

⁴⁵ Po'pocheñopa' atet toma'ntaterraneterr:

—Yompor po'cohuenña atto atarr ayochreshattena ña ñeñt'pa' atarr aye'chochen atet ñerra'mrrate' ñeñt' atarr cochnesha' serets. Puesheñarrña ñeñt' pomatsre'tyetsa ñeñtach atarr e'nyen ñeñt'cha' rañta. ⁴⁶ Pamtarrñapa' entosan serets ñeñt' atarr nanac cochnesha' ñeñt'ñapa' atarr tsa'te'. Ñaña'pa' allentach ahuer o'ch pomhuahuerran ora ñeñt' allpon echyen allochñapa' attoch echan quelle alloch rañterrana serets ñeñt' atarr nanac cochnesha'.

Atto Yompor po'cohuenña e'ñe atet pena ñerra'mrrate' añecmuen terraya

⁴⁷ Jesús'pa' alla toma'ntaterraneterr; ñeñt'pa' atet otanet:

—Yompor po'cohuenña atto atarr ayochreshattena pue'ntañot' ñeñt'ñapa' e'ñe atet ñerra'mrrate' terraya añecmuen. O'ch terrayet sa'papa' o'ch e'ñe ap'cha'huan allohuen pa'namen cacachno. ⁴⁸ Ñerra'm o'ch e'ñe chorra allempoñapa' o'ch chetamperet to'pñaso, o'ch anorr'cha'tet allcha' acret ñeñt' e'ñe cohuenare' ñeñt'cha'ña esha'tanetet puecañtro. Ñeñt'ña ama cohuenayayepa' o'ch saprrchet. ⁴⁹ Ñeñt'pa' atet'cha'ca'ye perraña allempoch mellapoterra. Cha'nma'cha't'cha' mellañoteñnesha' ñeñt'cha' ellopa'tetstaterre' ñeñt' atsrre'mñañnesha' ñaña ñeñt' e'ñe pocte' es pa'yets. ⁵⁰ Ñeñt'ña atsrre'mñañnesha'pa' huapore'teretcha' o'pono all huorten tso'. Allñapa' allcha' yahuanrrorterret, panmueñotet atserrpa' rraso'tyerretcha' pa's.

Attoch e'ñe cohuen yorrtatyen cotapñats ñeñt' ahuatoteñ atarr sherbets ñaña attoch e'ñe cohuen yorrtatyen cotapñats ñeñt' e'ñe etserra atarr sherbets

⁵¹ Allempoñapa' allenta a'p'to'tanet:

—¿Eñotochenca't sentenña allohuen ñeñt' atet notyenes?

Ñetñapa' atet ochet:

—Eñotochenca'ye yenteñ.

⁵² Allempoñapa' atet otanet:

—Ñeñto'marña ama't allohuen erra'tsen ñeñt' atarr etsotene' ñoñets ñeñt' atet anaret' ahuatoteñ, ñerra'm elloña ay'chatarettet ñamet ñeñt' atet pena Yompor po'cohuenña atto atarr ayochreshattena ña, ñeñt'ña acheñer atarrcha' cohuen orrtatenan cotapñats ñeñt' ahuatoteñ, elloña cohuencha' orrtaterran ñaña ñeñt' e'ñe etserra cotapñats. E'ñech atet pena ñerra'mrrate' ñeñt' apacllatesha'. All año'tyenan ñeñt' atarr morrentena errotenopa' o'ch orrtatenan ñeñt' errote' año'ten all; errotenoñapa' o'ch orrtatyenan ñaña ñeñt' año'ten ahuatoteñ all pa'paclo.

Allempo serrpare'tatan Jesús acheñenesha' all Nazareto

(Mr. 6.1-6; Lc. 4.16-30)

⁵³ Serrpare'tatuanet Jesús ñeñt' atet toma'ntatyesanet, ñaña'pa' ahuererr allot.

⁵⁴ Cherr pa'nyo all Nazareto yechatuerraneterr all po'prahueto. Allñapa' nanac cohuanrrorteñet, atet otyeñet:

—Ñapa' errahuañaca'yeña eñotanña ora allohuen ñeñt' atet pa'yena. Esha'huañaca'yeña eñotatene'ña atot' orrtatenan partsoteñets. ⁵⁵ Ñapa' año puechemer ñeñt' po'taruas pene' o'ch torrenana tsach attoch es yechcatyen pa'namen. Pachorpa' año María. Pa'mo'nasheñpa'cho'ña año Jacobo, José, Simón, Judas. ⁵⁶ Allohuen po'chanesha'pa' e'ñeca'ye yechme'tuenanet parro'marneshayarramche'. Ta'm ñaña'pa' errotenotte'ña atarr es eñotyen.

⁵⁷ Ñeñto'marña all e'ñe ña pa'nyo ama eseshaye' acua'penaye entenaye. Allempoña Jesús'pa' atet otanet:

—Ñeñt' a'mítene' Yompor po'ñoñpa' chocmaca'ye añcha'na'tpo' entyeñña allohuen acheñenesha', arrña pa'nyo allo'tsen e'ñe ña pamo'tsna'tarnesha' ñetñapa' ama

acua'penaye' enteñeto. Ama't ñaña ñeñt̃ parro yechenet pa'pacleto, ñetpa'cho'ña ama acua'penaye' enteñeto.

⁵⁸ Ama ame'ñeñeto ñeñto'marña allpa' ama atonocheye' orrtataneto po'partsoña.

14

Allempo e'ñe cohuen es orrtatyes Jesús, Herodesñapa' cha otapañ Juanañte' o' tanterra ñeñt̃ apataye't̃ acheñ Yomporecop
(Mr. 6.14-29; Lc. 9.7-9)

¹ Allempoña amcha'taret Herodespa' e'mare'tenan atet̃ pa'yena Jesús. Ñehua, Herodespa' all amcha'taret̃tena anetso Galileo. ² Allempoñapa' atet̃ otan ñeñt̃ sherbene':

—Añepa'tca'yeña Juanañ ñeñt̃ apataye't̃ acheñ Yomporecop; ta'mca'ye chate'ca'ye tanterraña rromot̃. Ñeñto'marte'ca'yeña te'pa' orrtaterranña partsoteñets.

³ Ñehua, allempopa' ahuañmo'chacma rrematenana' Juanañ o' huancachpa' allña yottam̃psach attoch coshatan Herodías ñeñt̃ pa'mo'nasheñ Felipe puetapor. ⁴ Tarro'mar Juanañpa' ña otaye't̃ Herodes:

—Amaca'ye pocteyaye o'ch peyoram̃pes pemo'nasheñ puetapor.

⁵ Ama't atarr mueneñeñ o'ch muetsatacheñ e'ñe allempocma tarraña Herodespa' mecha'tenan acheñenesha' ñeñto'marña ama eshcaye' muetsatache. Tarro'mar acheñenesha'pa' e'ñe cohuen enteñet Juanañ atet̃ ñerra'mrrate' ñeñt̃ a'mtene' Yompor po'ñoñ. ⁶ Allempoña coshame'tapreteñet Herodes allempo eñalletña allñapa' o' tancsosa Herodías puechoyor. ⁷ Herodesñapa' ñeñta atarr cohuen ent. Ñeñto'marña och:

—Na po'ñoçhpa' o'ch nena' neñoñ e'ñe Parets pa'so'chño, ama't es penamuenpa' napa' napa'pcha'.

⁸ Pachorñapa' allenta otare'ch e'ñe a'nahua:

—O'hua p̃ochte' amcha'taret̃: “Añcha' p̃apuen Juan poñ.”

Allempoña shopshesha'pa' atet̃ otan Herodes:

—Napa' añ nemnen o'ch pepechennana' Juan poñ ñeñt̃ apataye't̃ acheñenesha', o'ch penon platopa' o'ch p̃aphuerren e'ñe arrma.

⁹ O'ña enamhuepa' amcha'taret̃ñapa' cha lleca. Tarraña ama't llecañpa' o' nohuanña po'ñoñ huomenc e'ñe Yompor pa'so'chño ñaña allo'tsa'yen ñeñt̃ hua'ñen ñeñt̃ e'muene' atet̃ oten ñeñto'marña otanet:

—Te'pa' o'ch saḡ Juan poñ.

¹⁰ Allempoñapa' o' mueñan pa'cheñer o'ch pecheñeta' Juan all yottam̃peñet.

¹¹ Allempoña o' huapaterrñañet poñ platopa' aphueret shopshesha'. Ñaña' anem̃ pachoresho o'ch apueña'.

¹² Allempoñapa' ahuanma Juanañ pueyochresha' o' aneret apecharet̃ o'ch pam-puereta'. O'ña pampa'huereta'pa' o' ahuanerret o'ch e'mare'tateñeta' Jesús.

Allempo Jesúsapa' rratenan shonte' acheñenesha'; ñeñt̃ña acheñenesha'pa' allo'tsen am-naroch mil

(Mr. 6.30-44; Lc. 9.10-17; Jn. 6.1-14)

¹³ Jesúsapa' allempo e'mare'tan Juanañ, ñaña'pa' ahuanm̃pes noñto o' sa'nman acheñenesha' o'ch ahuo' all ama acheñempaño'yaye. Acheñenesha'ñapa' allempo e'mare'chet̃ ñetñapa' allenta ahuanmuet̃ ñamet. Allohuen anetso'tpa' e'ñe ahuanmuet̃ o'ch entereta' Jesús. Ñetñapa' alla oñmach'a'tet patso'mar. ¹⁴ Allempoña sehuosa Jesús noñto'tpa' alla entuerraneterr o' alla shonta'huerrerr acheñenesha'. Ñaña'pa' atarr nanac muera'huerraneterr. Allñapa' o' alla a'crratyesuerraneterr patsnañe'er. ¹⁵ Atteñapa' ellerren pueyochresha'ñapa' oteñeta' Jesús:

—Te'pa' arro'tseney all ama acheñempaño yaye ñaña o'ca'ye ellerren. Te'pa' o'ch p'och acheñenesha' ahuanemyerretepa' anetso'mar allcha' rañta'y esuerret puerraret ñeñtcha' rra'y esuerret.

¹⁶ Jesúsñapa' otanet:

—Amachca'ye ahuanmatsterreto. Sachca'ye apa'y esahuet ñeñtcha' rret.

¹⁷ Ñetñapa' atet ochet:

—Ya arrpa' amaca'ye es yechenoña ama't coñe'ta; yapa' e'ñeca'ye amnara pan yechen ñaña epatoll cac.

¹⁸ Allempoña Jesúsapa' atet otanet:

—Sanmon arrma o'ch sapuenna'.

¹⁹ Allempoñapa' otan acheñenesha':

—Te'pa' o'ch sanorrcha'tyes e'ñe all cohuen emmo'ratyen pasetma'.

Allempoña agapan ñeñt amnar pan ñaña epatoll cac, o' cohua' enonet, parasyoso'tamñsan pan alloñapa' shota'tan pan, apanatyesan pueyochresha'. Ñetñapa' o' epatyeset allohuen acheñenesha'. ²⁰ E'ñe epa'huet, allempoña o' rrallme'chet allohuenet e'ñepa'tcha' yetrra'tuahuet. E'ñe yetuahuetpa' cha a'pchatyeset ñeñtñapa' a'yapa'cheret. Ñeñtña a'yapa'cherretepa' chepa'tcha' chorrats charra' puechena epa cañter e'ñe tamo'yare'. ²¹ Ñeñtña rrallme'chatspa' atarr shonte' acheñenesha'; ñato' allo'tsente' amnaroch mil ñeñt e'ñe yacmaneshoche'. Ellonetpa' allo'tsa'yen ñaña coyaneshachno ñaña cheshaneshachno.

Atto Jesúsapa' e'ñe cohuen chope'chnen enot oño

(Mr. 6.45-52; Jn. 6.16-21)

²² Allempoña Jesúsapa' otan pueyochresha':

—Te'pa' o'ch sa'ta'cha't noñto o'ch sota sanom o'ch se'pchaterra yot. Napa' o'ch neso'tnom' ora acheñenesha'.

²³ O'ña so'tuanmanetpa' ñaña' ahua' aspeno e'ñe ñapueñ allña ma'yochosa. Ama't o' tsapuenpa' ñaña' allo'tsena ñapueñ. ²⁴ Noñtñapa' ñeñta rro'chaso'tsenara sa'po, emo'yare'ñapa' cha anmape'chamñpenanet, a'puerrame'tamñpenanet orrno.

²⁵ Atteña allempoña puetarenmochpa' huenanet Jesús cha chope'chnen enot oño.

²⁶ All chope'chnen allempoña entapueñ pueyochresha', ñetñapa' cha toratsetyeset pueyochret, atet otanna'tyeset:

—Choyeshe'matste'ca'ye huaponaya.

Pueyorñotetpa' atta rrannartet.

²⁷ Jesúsñapa' eñorana'tuenanet, atet otuenanet:

—Choñaca'ye socshapuenna, naca'ye o' nohuapa, amach atta sem'cha'tatstapno.

²⁸ Allempoña Pedropa' eñorana'cha ñeñtapa' atet och:

—Ñerra'm po'ño'chte' pa Partseshacha', te'pa' o'ch p'otosen, a'ponca'ye nesho, pe-chope'chnom p'ama enot oño.

²⁹ Jesúsñapa' allenta och:

—A'ponca'ye.

Ñaña' allenta sohua noñto'tpa' o' chope'chnom ñaña enot oño o'ch ahua' Jesúsesho.

³⁰ Chope'chnomtsapa' o' cohua'nman huomenquësha' ñeñt cha emo'yartatenan sa'ppa' cha yore'ch. Cha yore'chpa' alla muene' esha'ta oño. Allña' rranare'ta atet otan Jesús:

—¡Pa'queshp'atosen Partseshacha'!

³¹ Jesúsña tecma rrema'ppa' atet och:

—Papa' ama't e'ñeye' peyemtenno. Eso'mare't cha pe'charrtatenña peyo'cher.

³² E'ñe a'ta'cha'tatseta noñtopa' huomenquësha'ñapa' chepa'tcha' muetsoñeñterrtsa.

³³ Ñeñtña noñto'tsa'yenpa' allentepa'tcha' concorpanrrortana'tapetpa' atet otyeset:

—Po'ño'chepa't p'apa' e'ñe Parets Puechemerep'.

*Allempo Jesúsapa' a'crratyesosan pa'namen atsnañeēchno all Genesareto
(Mr. 6.53-56)*

³⁴ Allempoña pechatam̄setpa' arr etsotaset all oteñet Genesareto. ³⁵ Ñeñña ane'tañnesha' allpa' o' cheme'tapetpa' ñetña' allenta mueñet acheñ, o'ch e'mare'tatenana' acheñnesha' allampaño'mar. Allotña' huapatyesoñet allohuen atsnañeēchno. ³⁶ Ñeñña atsnañeēchnopa' o' enemyesoset ama't poso'moña o'ch a'plla'yesosñañet pa'shtam. Allpon ñeññ a'plla'yesose' Jesús pa'shtam allponcho' e'ñe corra'yessersta.

15

*Atto Jesúsapa' eñotatenanet ama añeye' ya'sosyatenaye Partsocop ñeññ yerra'yen yenamot
(Mr. 7.1-23)*

¹ Allempoña fariseonesha' ñaña ñeññ atarr etsotayenayeñ ñoñets ñeññ atet anaret judioneshacop ñetña' arroñ hua'cha'tet Jerusaléñoñ. Cha'cha'tet Jesúseshopa' atet otye-soset:

² —Eso'mare'tña peyochresha'ñapa' quechpuerretña ñeññ atet yeyche't ya ahua't yatañeshohuen. Ñeñño'mar o'huañ e'pota'tetña Partsocop allempo rrenet.

³ Ñaña'apa' atet otanet:

—Sapa'cho'ña ñeñño'mare'traña satpare'teññañña samña Yompor po'ñoñ ñeññ atet anaret allochña'apa' e'ñech sañeña seycheña e'ñe setsotayen. ⁴ Ñehua, po'ño'chca'ye yeñoteñ Yomporpa' atet otene: “Semorrenteño'tpa' señcha'na'chcha' sompor ñaña sachor.” Elloña ñaña po'poñoneñ atet otene: “Ñerra'm esesha' sasare'tene' pompor ñaña pachor ñeñña' muetsetpa'.” ⁵ Tarraña saña'apa' amaña atteye' sepeno tarro'mar sapa' chaña atet sotyen:

—Ñerra'm esesha' atet otene' pompor ñaña pachor: “Ñeññ nechen o'ch napapeña' tarraña amach napape te'pa' o'ch nene' Yomporecop” ⁶ ñeñña acheñerpa' saña'apa' atetcha' soteñ: “Pocoppa' ama pallteno o'ch es pa'p̄ p̄amo'mte'.” Sapa' attoca'yeña sehuapore'teññañña Yompor po'ñoñ allochña'apa' e'ñech aña setsoten ñeññ e'ñe sañeña seycheña. ⁷ Sapa' atarra'ye ommoñañeshas tarro'mar atarr seshcare'ten amaña Yomporeye'ña sesherbene. Isaíasapa' e'ñe cohuen a'mtane't Yompor po'ñoñ, saña te'pa' e'ñe atet sepena atet ote't; allempopa' atet ot Yompor:

⁸ Ñeññ acheñesharpa' e'ñe puenamoña cohuentatennanetañ; pueyo'chretoña'apa' ama chenaneo ñeññ cohuen nenten na.

⁹ E'ñe orrena ma'yochennet, ñeññ atet ye'chatannenetpa' ñeñña'apa' e'ñe acheña naye't ahua't po'ca'ña.

¹⁰ Allempoña Jesúsapa' chore'tan acheñnesha' ñeññ shontetsa, ñetña'apa' atet otanet:

—Saña'apa' e'ñepa'chña cohuen se'mñoten allochña'apa' attoch e'ñe cohuen chaponasa seyo'chro. ¹¹ Ama añeye' ya'sosyatenaye Partsocop ñeññ yerra'yen yenamot. Añca'yeña ya'sosyatene' yeññoñ ñeññ cha'nets yenamot ñeññ atet yeñosatse'tyen.

¹² Allña'apa' atet oteña' pueyochresha':

—¿Peñoteñe't fariseonesha'ñapa' allempo e'monapet peñoñ ñeññ atet p̄otyenanet ñetña'apa' cha'atsrre'muet?

¹³ Ñaña'apa' atet toma'ntatanet ñeññcha' atet a'pare'terra fariseonesha', ñeñña'apa' atet otanet:

—Allohuen narmetso'chno ñeññ ama añeye' nare'taye Apa ñeññ pue'ntaño'tsen ñeñña'apa' a'mare'tare'tetuerrach. ¹⁴ Ñetpa' ottetepa'ta. Ñetpa' e'ñe atet penet ñerra'mrrate' pueheñarr ñeññ aporo'yetpa' ñapa' o'ch echa'nman po'psheñeñ ñeññ parro aporo'yete'muet. Allempo atet penet ñerra'm aroro'tonta echa'nmana'tnomuet epsheño'maret chach shora'nmoset aroro'to. Arrpa' allohua ñeññ atet toma'ntatanet

atef ñerra'm ya allempo ama yocape'cherra' ñeññ cohuentetsa Yomporecop amach errotenof yocape'chache po'psheñeñ ñeññ ama eñotenaye ñeññ cohuen enten Yompor.

¹⁵ Allempoña Pedropa' atef ot:

—Yapa' chochña peserrpare'tatey e'ñe cohuen eñotochen ñeññ atef petma'ntatena ñorra'.

¹⁶ Ñaña' atef otanet:

—Ama't sapa'cho'ña ama'tña señoña'. ¹⁷ Sapa' ama't chennasoña seyoçhro ñeññ yerra'yen yenamotpa' alla sen yafo ñeññpa' choçmach yener a'yo. ¹⁸ Añña ñeññ cha'nets yenamot ñeññ atfo yeñosatse'tyen ñeññpa' e'ñe yeyoçhrot huena ñeñña choçma ya'sosyatene'ña Partsocop. ¹⁹ E'ñe yeyoçhrot huena cotapñats ñeññ ama't mameshapa' ama cohuenayaye, ñeññpa' añ: muetsanna'teñets, chetapretanna'teñets, cañoresha'teñets, etatsre'tyeñets, toma'tamñpsanna'teñets, sasare'teñets. ²⁰ Ñeññ allohuen sosya'tsañeçhno ñeññ huetsa yeyoçhrot ñeñña po'ñoçh ya'sosyatene' Partsocop. Tarraña allempo yerrallme'chyen ama't ama ye'pota'tyesopa' ñeññpa' amaña ñeññeye'ña ya'sosyatene'ña Partsocop.

Atfo puesheñarr coyanesha' ñeññ ama judioneshayaye ñapa' atarr yemtapana Jesús (Mr. 7.24-30)

²¹ Ahuerrerr Jesús allotpa' alla chap allampaño anets Tiro ñaña Sidón. ²² Allña' o' huapa puesheñarr coyanesha' ñeññ allo'marnesha' ñeññ canano'marnesha'. Ñaña' allenta rranare'tospa' atef otos:

—Pemueraye'chosna, Nepapareshacha' papa' ñeññep Davidna'tarep. Na nacñe'terpa' atarr mueroçhtateñ oneñe't.

²³ Jesúsña' ama't mameshapa' ama eñorana'teño. Atteña' o' ponenña pueyoçhresha' otoset:

—Pe'mñoçhñaca'ye tecma allochña' o'ch ahuer, çhaca'ye co'ta'neney perranare'tnomue'.

²⁴ Ñaña' atef otanet:

—Napa' e'ñe añeçpa allsensareten ñeññ israelena'tarneshacop; ñetpa' e'ñe atef nentenanet ñerra'm carrneroçhno ñeññ paya'tyetsa.

²⁵ Coyanesha'ña ñeññ ama israelena'tareyayepa' ñaña' allenta on e'ñe ñesho concorposña' atef otos:

—Choña Nepapareshacha' pebensamñpsaye'cherrnan nacñe'ter.

²⁶ Jesúsña' toma'ntatana acheñenesha' ñeññ ama israelena'tarneshayaye ñeñño'marña atef och:

—Ama pocteyaye o'ch yeprratamñpes yacñe'ar puerrar o'ch yehuapore'tamñpes allo'tsen ochec o'ch rre' ñaña ochec.

²⁷ Coyanesha'ña' atef otererr:

—Ama't atteñ Nepapareshacha' tarraña ama't ochepa'cho'ña rra'yenan ñeññ a'shore'tatyen pamo'mte' po'mesa'naçho.

²⁸ Allempoña Jesús' atef otererr:

—Chepa't nesñeshacha' atarr nanac peyemtenna ñeññepña' atetepa'ch pocop atef pemnen pa.

Pacñe'terña' allorocma correrra.

Atfo Jesús' a'crraterranerr po'potantañ atsnañe'çhno

²⁹ Ahuerrerr Jesús allotpa' alla oñem sa'pato'ño'mar e'ñe Galileaso. Allotpa' ahua' aspeno allña' anorros. ³⁰ Allña' alla huacherrñañerr shonte' acheñenesha'. Huapatyerrñañeterr checa'repaçhno, mancoçhno, aporo'yeteçhno, opananeshaçhno ñaña hua-patoñet shonte' po'potantañeçhno. Ñeñña' alla nanatyesosña'et pa'rrpõt. Ñaña' e'ñe a'crratyesuerranet. ³¹ Allña' acheñenesha'pa' cha atarr cohuanrrorteñet allempo

eñchet atto opanachno cha eñora'yerrtsa, mancochnopa'cho'ña cha cohuenetyerrtsa, checa'repachnopa'cho'ña cha chope'chyerrets, aporo'yetechnopa'cho'ña cha e'ñe cohuen cohua'yerrts. Ateť e'ñe cohuen eñchetpa' allohuenetñapa' cohuentateññañet israelnesha' Po'yomporer.

Allempo Jesúsapa' rratenan shonte' acheñenesha', ñeñña acheñenesha'pa' allo'tsen pa'tatsoch mil

(Mr. 8.1-10)

³² Allempoña Jesúsapa' agotan pueyochresha'pa' atet otapanet:

—Napa' cha atarr nemuereña allohuen acheñenesha' ñeññ shontetsa arr. O' ma'pamtoset nesho ama eñallmeñeto ñeññcha' rret. Ama pocteye' nenteñe o'ch ahuanerret e'ñe pa'chporrñesha' te't ama a'ñshe'mterreto ñoño.

³³ Pueyochresha'ñapa' atet otoset:

—Errahuachca'ye yentña allpon rreñets ñeññcha' yerrach shonte' acheñ, arrpa' amayaca'ye.

³⁴ Jesúsñapa' atet oterraneterr:

—Sapa' ¿errpona't sechenña pan?

Ñetñapa' otereterr:

—E'ñeca'ye canchrra ñaña coñe't cacatollesha'.

³⁵ Allempoñapa' otan acheñenesha':

—Te'pa' sanorrcha'tyes patso.

³⁶ Allñapa' agapan ñeññ cancherr pan ñaña cacatollesha'. Agaphuepa' o' parasyoso'tenanerr Pompor allotñapa' o' shota'tan pan, shetse'tan ñaña cac, apanatyesan pueyochresha'. Ñetñapa' o' epatyaset ñamet allohuen acheñenesha' e'ñe epa'huet. ³⁷ Allempoñapa' o' rrallme'chet allohuenet, e'ñe yetrra'tuahuet. O' e'ñe yetuahuetpa' cha a'pchatyaset ñeññapa' a'yapa'cheret. Ñeñña a'yapa'cherretpa' chepa'tcha' chorrats cancherr cañter e'ñe tamoyare'. ³⁸ Ñeññ rrallme'chats atarr aton acheñenesha' ñato' allo'tsente' pa'tatsoch mil ñeññ e'ñe yacmaneshoche'. Ellonetñapa' allo'tsa'yen ñaña coyaneshachno ñaña cheshaneshachno. ³⁹ Allempoña Jesúsapa' so'tnerran acheñenesha'pa' ahuer, a'tapos noñtopa' ahuañperr o'ch ahuo' anetso ñeññ pa'so'cheñ Magdala.

16

Atto fariseonesha' ñaña saduceonesha' enamaset Jesús gatapanetepa'to' po'partsoña (Mr. 8.11-13; Lc. 12.54-56)

¹ Fariseonesha' ñaña saduceonesha' ñetpa' o' ahuanmuet o'ch enteñeta' Jesús. Cha'cha'tet Jesúsesho ñetña puehquënoťetpa' atet otyesoset:

—Yapa' añ yemnen o'ch pegatapuey pepartsoña entoť allochñapa' attoch yeñotosep po'ño'ch p'apa' Parets Puechemerep.

Ñetpa' cha mueneñet o'ch topatoset Jesús. ² Ñañaapa' añ yerpatapanet ñeññ atet otyenet ñet pa'nyeto:

—Sapa' ñerra'm esempo sentnen o'ch tsatatetnena enet, sañapa' chocmach atet so'tyesnene't: "Tsapa'tpa' atarrcha' char." ³ Aromtañañapa' ñerra'm esempo senta'muen enet cha tsatatta'muena, sañapa' chocmach atet so'tyesa'muene't: "Choch huata'muena ñeñño'mar o' cha rrenarsa'muen." Sapa' atarr señoteneñña ñeññ sentyen ento ñeñña señotatene'. Tarraña ñeññ atet norrtatyennas nepartsoteña eso'marte'ña ñeññapa' amaña eñotatensoña ñeññ atet pennas Yompor te' o'ch orrtatonas po'cohuenña. Ñeñña' attate' seshquën. ⁴ Acheñenesha' ñeññ corra'yetsa te' ñetñapa' ama cohuenaye' cotape'chyeneto, ama añeye' cosheneto Yompor ñeñño'marña ñetpa' e'ñe orrena otennet

ahuo'ch norrtatanet nepartsoña. Tarraña amach es norrtataneto. Napa' añach paterr neñotatanet atet eñotatane't Jonás ahua't nínivo'marnesha'.

Jesúsñapa' sa'nerranetpa' ahuer.

Atto Jesús toma'ntaterraneterr ñeñt' po'chaser pen fariseonesha'

(Mr. 8.14-21)

⁵ Allempoña pechatrra'tet yom'ta'n o' chapuet all, pueyochresha'ñapa' o' yerpuerret ñetpa' ama anmueto pan ñeñt'cha' rroset all. ⁶ Jesúsñapa' atet otapanet:

—E'ñech señota ñato't semeñe'teña'ña fariseonesha' ama't ñaña saduceonesha' po'chaser allo tsetenet pan.

⁷ Ñetña cotape'chyesetpa' atet otanna'tyeset:

—Amaca'ye yanmoña pan ñeñto'marte'ca'yeña oteney año'ch yemeñe'tatscheña fariseonesha' po'chaser.

⁸ Jesúsña allempo eñotanet atet cotape'chyenet ñaña'apa' atet otarraneterr:

—Eso'mare't sellquëñesha' sotanna'tyena año' eñalle ñeñt'cha' serra'. Sapa' ama'tña e'ñeye' seyemtenno. ⁹ Teme'ttsena'tña ama es sechenoyoña seyo'chro. Ama'tña seyerpuenoña allempo natontat amnar pan ñeñt' nerratallme'chpa' allo'tsen amnaroch mil acheñenesha'. Ama't seyerpuenoña ñaña ñeñt' allpon chorrarerrets cañtro ñeñt' sap'cherr allempo. ¹⁰ Ama't ñaña allempo natontaterrerr ñeñt' can'cherr pan ñeñt'ña nerratallme'cherrerra' allo'tsen pa'tatsoch mil acheñenesha'. Ñaña ñeñt' allpon chorrarerrets cañtro ñeñt' sap'cherrerr allempo. ¹¹ Erroteno'tuañaca'yeña ama señotenoña ñeñt' atet notas ñorra' attoch ama semeñe'tatsche fariseonesha' ama't ñaña saduceonesha' po'chaser ñeñt'pa' ama rreñtsoye' notenso.

¹² Allempoña ñetpa' o' chapamet pueyo'chreto, atet otanna'tet:

—Amuepa'tca'ye añeye' otenye pan po'chaser; añepa'tca'yeña oteney amach yemeñe'tatsche fariseonesha' ama't ñaña saduceonesha' po'cap'ña ñeñt' atet ye'chatannenet ñeñt' ama cohuenayaye, te't mamesha epa'hua erracmañen e'ñe atet pena chase' mameshapa' o'ch a'chasa'huan ora all yeneñ.

Atto Pedropa' otan Jesús, p'apa' p'aña Yompor Puechemerep' ñeñtep' Cristotosets

(Mr. 8.27-30; Lc. 9.18-21)

¹³ Allempoña chap Jesús all Cesarea ñeñt'ara Filipo, allñapa' otosan pueyochresha':

—¿Erro'tena't otyenenña allohuen acheñenesha', na Ñeñten Acheñetosets eseshante'?

¹⁴ Ñetñapa' atet otyeset:

—Patantarr acheñenesha'pa' atetca'ye otyenpet p'apa' Juanañpo'te' ñeñtepo' apatañtate't Yomporecop. Po'potantañña' atet otyenpet p'apa' Elíasopo'te'; po'potantañña' atet otyenpet p'apa' Jeremíasopo'te' amapa' añeño'te' po'psheññ ñeñt' a'mtaye't Yompor po'ñoñ ahua't.

¹⁵ Allempoñapa' alla a'p'to'terraneterr:

—Sañapa' ¿erro'tena'tña sotenenna sa?

¹⁶ Simón Pedroñapa' eñoratsapa' atet och:

—Papa' ñeñtep'ca'ye atarr yecuen ama't ahua'toteñ; ñeñtep'ca'ye Parets Puechemerep' ñeñtep' Cristotosets. Ñeñt'ña Parets ama arromña'teshayaye.

¹⁷ Jesúsñapa' atet och:

—Nanac cosheñtso'tsenep', Simóna ñeñtep' Jonás puechemerep' tarro'mar atto peñotenenpa' ñeñt'pa' ama arromña'teshaye' peñotatenaye; naña Nompor peñotatene' ñeñt' pue'ntaño'tsen. ¹⁸ Napa'cho'ña te'pa' o'ch notap' p'aña, p'apa' añcha' nesocherre'p Pedro. (Ñehua, añ so'chñets Pedropa' añ toma'ntena ñeñt' atarr es echarr atet ñerra'm mapue'.) Ñaña p'a e'ñe peyemteño'ten na, na po'ño'chpa' naña Cristotosets, ñeñt'pa' allochca'yeña norrtaterrña allohuen ñeñt'cha' name'ñerraya ñeñt'cha' ap'cha'yerrtsa

e'ñe na pame'ñeñotet. Atarrcha' huomenc echarr ne'pa'yerranet allohuenet ñeñtetcha' ap'cha'yerrtsa pame'ñeñotetan na attochña ñocpuetpa' amach eñalle ñeñtcha' huapore'terrahuet, ama't ahuata. Ama't rromueñets po'huamencpa' amach errotenot metanerranetoña ñet po'huamenc. ¹⁹ Ñaña na te'pa' o'ch napuerre' llesens attoch pa'poterrñañ Yompor po'cohuenña ñeñt atto ayochreshattena ña pue'ntañot; ñeñt'pa' añ toma'ntena atet ñerra'mrate' llave alloch petoramper allohuen ñeñt muenene' o'ch pueyochresha' perranet. Ñaña ñerra'm erra'tsencha' e'ñe pocte' pent ñeñtcha' pena'yes arr patsropa' Yomporpa'cho'ña ñeñt ento'tsen e'ñech attecma pocte' enterranet. Ñaña ñeñtcha' ama pocteye' penteno ñeñtcha' pena'yes arr patsro, Yomporpa'cho'ña ñeñt ento'tsen e'ñech attecma amach pocteye' enterraneto.

²⁰ Allempoñapa' otan pueyochresha':

—Amach esesha' sota'psa'tatsto ama't pueheñarra napa' na ñeñten Cristotosets.

*Atto Jesúsapa' eñotatan pueyochresha' ñapa' amsaretterrach
(Mr. 8.31–9.1; Lc. 9.22-27)*

²¹ Jesúsña e'ñe allempoteña' motetnomñ eñotatyesnomue' pueyochresha' ñeñt atet anaret ñocop, ñapa' muerochtateretcha'; o'ch ahuo' Jerusaléño allña' allcha' muerochtateret. Añcha' erro'uanen perre' ñeñt pompornesha' pen allohuen judionesha' ñaña ñeñt pa'ncha'tareternesha' pen allohuen po'cornaneshar ñaña ñeñt atarr etso-tayenayeñ ñoñets ñeñt atet anaret judioneshacop. Allña' allcha' muetsatateret tarraña puema'pamtañoña Pomporpa' o'ch alla tantater. ²² Pedroña' allenta anemñ a'yenetpa' allña' atet otos:

—Arepachña Partseshacha' atteye' perrpeto ama't errponaña. Yomporepa'chña e'ñe pecuam'pene'.

²³ Ñaña' puetallsa a'yenet mame'pa' atet otan Pedro:

—Orra'p a'yo neshot oneñete, papa' e'ñe orrena pepatare'tenen; papa' amaca'ye Yomporeye' atet poctape'chatenaye, ñeñt'pa' acheñarramche' pocta'ña.

²⁴ Allempoña Jesúsapa' atet otan pueyochresha':

—Ñerra'm esesha' muenene' o'ch coterrnet na e'ñe po'ño'ch attoch neyochresha' neperranet, añ poctetsa sehuanmuetepa'ña ñeñt atet muenenet e'ñe ñocpueta. Attochña ñetpa' o'ch e'ñe toma'nteret ñeñt chechnene' po'corsoch allcha' muerochtet ñamet. Attochña coterrnet e'ñe po'ño'ch. ²⁵ Tarro'mar ñerra'm esesha' e'ñe aña muenenet o'ch correna atomat attoch e'ñe coshenet arr patsro, ñetña' chach a'chencatenet e'ñe ñañeñeta. Tarraña ñerra'm esesha' e'ñe pocte' entene' o'ch es sohuanerret e'ñe pocreñohuenet nocop, ñeñtña' acheñerpa' ñaña' corretsach pocsheñeshocmañen e'ñe tayoteñ errponañohuen. ²⁶ Ama't errponena'paren esocmañen es yeyoratse'tyes ora allpon ñeñt yentyen añe patsro, tarraña ñerra'm ñeñtach e'ñe ya'chencaterre' yecamquëñohuen, ñeñtña' ama't coñe'tapa' amach es sherberrye. Tarro'mar ama eñalle po'poñ ñeñt atarr sherbets, añña atarr nanac sherbets ñeñtcha' a'queshpaterre' yecamquëñ. Tarro'mar yocoppa' ama es eñalle ñeñtcha' yepomuerr alloch alla yerañterra yecamquëñ. ²⁷ Po'ño'ch napa' Ñeñten Acheñetosets o'ch nohuerra epan ñaña nemñllañoñeñneshar. E'ñech Nompore po'cohuenñot nohuerra. Allempochña netsa'terranet e'ñe pueheña'ttso'cmet erro'tente' pa'yesete't. ²⁸ Po'ño'chca' te'pa' o'ch notas, patanta'ttsos ñeñtes arro'tsa'yenes ama't ama serromhuena'pa' o' senterrñañ Yompor po'cohuenña atto napa' Ñeñten Acheñetosetspa' atarrcha' na'yochreshaterra.

17

*Allempo Jesúsapa' po'poñeta'm'psana pueyochresha'
(Mr. 9.2-13; Lc. 9.28-36)*

¹ Allempo pechapmaterrerr, Jesúsñapa' ahuanerranerr pueyochresha'; añ anem Pedro ñaña Jacobo ñaña Juan ñeññ Jacobo pa'mo'nasheñ. Ñetpa' arr anmanet atarr aspeno e'ñe ñaptochayet. ² Allña Jesúsapa' machayotepa'tcha' po'poñetañpsosanet. Pa'clloyotpa' cha popiosa e'ñe atet ñerra'mrrate' atsrret poptetsa. E'ñe pa'shtamohuen atarr huallama'to popiosa cha a'puetaresue a'yohuen. ³ Allñaapa' machayotepa'tcha' orrtanet Moisés ñaña Elías. Ñetñapa' alla serrpare'toset epuet Jesús. ⁴ Pedroña eñoratsapa' atet otan Jesús:

—Atarruaca'ye Partseshacha', cohueno'tseneyte' arr. Ama't pocte' penteñe napa' o'ch natomatonas ma'ppahua querpachet—puepahuarrrpa' p'ocopcha', po'ppahueña' Moisésocopcha', po'ppahueña' Elíasocopcha'.

⁵ Allempo eñorena Pedropa' cha orrtosahuet os ñeññ atarr cohuen poptetsa chepa'tcha' a'pomamñpsosanet. Cha e'morrtostsa ñoñets osot; ñeññña ñoñetspa' Yompor otosahuet; ñeññpa' atet ot:

—Añmapa' ñeññ no Nechemer ñeññ atarr nemuerena ñeññña atarr nocshatene', ñeññcha'ña e'ñe cohuen se'mñnoterr.

⁶ Allempo atet e'muet ñoñets pueyochresha'ñapa' alla rrema'rrtet patso atarr nanac yorenat. ⁷ Jesúsñapa' allenta ponerranetpa' a'p'lla'huerranet, atet otanet:

—Setanterra, amach cha seyorenatsto.

⁸ Allempoña o' cohuerretpa' arepa'tcha' eseshaye' enterreto, ñapña enteret Jesús.

⁹ Allempo ona'cherret aspenot Jesúsñapa' atet otanet:

—Te'pa' amach esesha' sota'psa'tatsto ama't e'ñe puesheñarra ñeññ atet o' sentua. Tarremphuach allempoch netanterra rromot na Ñeññen Acheñetosets, allempochña seserrpare'taterña allohuen acheñenesha'.

¹⁰ Pueyochresha'ñapa' atet otnerret:

—¿Eso'mare'tña otenña ñeññ atarr etsotene' ñoñets ñeññ atet anaret, Elíaso'ch ñanom huerrtsa?

¹¹ Ñañaapa' atet otaneterr:

—Elías po'ño'chpa' ñachca'yeña huerrtsa, ñapa' e'ñechca'ye a'cohuentatuer ora allohuen. ¹² Tarraña napa' o'ch notas: Elíaspa' o'ca'ye huaphuerrañ arr tarraña amaca'ye eseshaye' cheme'tapueraye ñeññapa' chaña erro'tuanen p'apueret ñeññ atet muena'yenet ñet. E'ñech attecma perrnet namña Ñeññen Acheñetosets.

¹³ Allempoñaapa' o' chapamet pueyo'chreto ñeññ otenanetpa' añepa'tca'ye Juanañ ñeññ apataye't acheñenesha' Yomporecop ñeññepa'tca'yeña Elíasoterrets.

Atto Jesúsapa' a'crraterran cheshachor ñeññ otetsa

(Mr. 9.14-29; Lc. 9.37-43)

¹⁴ Cherreterr all shontena acheñenesha' puesheñarrña yacmapa' ponmapuerrana Jesús concorposñaña. ¹⁵ Atet otos:

—Pemueraye'chosnana, Ayochreshate, nacñe'ter cha o'tena, nanac muero'chtana. Epaye' coya'nmame'tateñ tso, erro'tenopa' o'ch coya'nmame'tach ñaña oño.

¹⁶ Nanomhue peyochresheshopa' ñetñapa' ama erro'teye' peto attoch a'crrateret.

¹⁷ Jesúsñapa' atet ot:

—Sa ñeññes acheñres ama't mamesha'pa' ama ayemtenaye' sentpenno; chach po'poñ sentuena seyo'chro nocop. O' allponmatuanen allo'tsenen arr patsro napa' atfa atarr na'huantennas, atfa necuenes ñato' atto'tpa' o'ch same'ñerrna.

Allempoñaapa' atet otanet:

—Ama'tpa' sanmonca'ye chesha' arr.

¹⁸ Jesúsñapa' atet otapan oneñe't ñeññ otatene':

—Te'pa' po'ño'ch o'ch nota'p, peque'chpuer cheshachor.

Oneñe'tñaapa' allentepa'tcha' que'chpa'ner. Cheshachorñaapa' allorocma correrra.

¹⁹ Allempoñapa' ponemñya pueyochresha', e'ñe ñap̄tochayetpa' atet otoset:

—Yañapa' ¿eso'mare'tña ama eshcaye' yequechpatereña oneñeñ atto otatenan chesha-chor?

²⁰ Ñañapa' atet otanet:

—Tarro'marca'ye amaca' e'ñeye' seyemtenno ñeññ atet notenes. Napa' o'ch notas, ñerra'm po'ñoçh e'ñe na seyemtenañ napa' e'ñeca'ye na'pocatenña neñoñ ñeññ atet notenes. Ama'tcha' allponatollota seyemtenna ñerra'mrrate' mostazllometoll sañapa' ama't erra'tsena senamuennonñ ama't ñeññ atarr echarr sentenpa' nañapa' atetcha' nepennaseñ. O'ch netma'ntatasa atet ñerra'm o'ch sot: “Añ aspenetpa' rrote'tepa' a'yenet”, aspenetñapa' atetcha'cho'ña pennasañ ñeññ e'ñe atet soteñ. Ama't mame-shapa' amach eñalleña ñeññ torrapo' senten ñerra'm e'ñe po'ñoçh na seyemtena.

²¹ Ñehua, ñeññ atet oneñetpa' amach errotenoñ yequechpatacheña acheñ e'ñe atta. Chochña yema'yochena ñaña yema'yochreñoñ ama't yerrarpa' o'ch yequechpue'mame'. Attotcha'ña yequechpaterña oneñeñ ñeññ atet.

*Jesúsapa' eñotaterraneterr puepocheño ñapa' çhocmach muetseret
(Mr. 9.30-32; Lc. 9.43-45)*

²² Allempo chopeñe'chyenet parro all Galileo'mar, Jesúsña allpa' eñotatan pueyochresha', ñeññpa' atet otnomanet:

—Na Ñeññen Acheñetosetspa' pomuerrnetcha' attochña erroñuanencha' pernet.

²³ Atteñapa' o'ch muetsataterret tarraña poma'pamtañoñapa' o'ch alla netanterra. Ñetñapa' ñeñña atarr nanac lleca'rrtatyeshuet.

Atto Jesúsapa' tsa'ta impuesto añecop Parets pa'pacillecop

²⁴ Allempoña Jesús epuet pueyochresha'chnopa' o' alla çhaçherreterr Capernaumo. Allñapa' huapanet ñeññ tsa'tatenaya acheñenesha' quelle ñeññ impuesto; ñeññpa' Parets pa'pacillecop. Ñetpa' atet otoset Pedro:

—Semaestrorpa' ¿ama't pomuenana'ña quelle impuesto añecop Parets pa'pacillecop?

²⁵ Pedroñapa' atet otanet:

—Chocmach tsa'ta.

Allempo çhap pocollopa' Pedroñapa' ama otenana'ña Jesús, ñañaapa' ñanmacma otapan Pedro:

—¿Erroñena't, Simóna, penteñña pa? Ñeññ añcha'tareteçhno ñeññ añe patsro'tsa'yen, ¿eseshatña cobrenetña quelle ñeññ impuestocop, ñato' añate' cobrenet ñeññ e'ñe ñet pamo'tsna'tarecmuet amapa' añte' cobrenet ñeññ ello'marnesha'?

²⁶ Pedroña atet otan Jesús:

—Añca'ye cobrenet ñeññ ello'marnesha'.

Jesúsñaapa' atet och:

—Ñeññepñapa' ñeññ e'ñe pamo'tsna'tarecmuetpa' ama'trra ñeññeye' cobreneto.

²⁷ Ama't pocten amach netsa'tatsto tarro'mar napa' ñeññen Puechemeren ñeññ pa'paquell pene' ñeññecop tsa'tenet, tarraña attoch ama ya'tsrre'matanetopa' e'ñeca'ye pocte' o'ch netsa'ta. O'ch ahuep̄ oño o'ch pego'tena' all. Erra'tsencha' ñanom peçhta' pegoroñ ñeñññaapa' o'ch peçhete. Puenamopa' allcha'ca'ye pent puetallarr quelle. Ñeññña quellepa' o'ch ñaner ñeñññaapa' alloch petsa'tanet nocop ama't ñaña p̄ocop.

18

*All eñotateney ñeññ acheñer e'ñe po'ñoçh atarr asherben enteñ Yompor
(Mr. 9.33-37; Lc. 9.46-48)*

¹ Allempoña Jesúsapa' a'p̄to'teña' pueyochresha', ñeññpa' atet ochet:

—Ñeñfey allponey ñeñtcha' e'ñe pueyochresha' perr Yompor ñeñt pue'ntaño'tsen, yapa' añ yemnen te'pa' o'ch potey, ¿erra'tsenofeyte'ñaca'yeña ñeñfey atarr sherbets ñeñfey atarr añcha'taretuyen entyeneyet?

² Jesúsñapa' cheshatolla chore'tpa' tomach e'ñe allo'tsa'yenet. ³ Allempoñapa' atet otanet:

—Po'ñoçh napa' o'ch notas: Ñerra'm ama cho sequeçhpa'huerro sommo'cheña attoch o'ch atet sepena cohuen ñerra'mrrate' añ cheshatoll ñeñt ama eñotenana' o'ch ommo'chena, sañapa' amate' errotenof es so'paterroña atto atarr ayochreshattena Yompor pue'ntaño't. ⁴ Ñeñt allpon ñeñtcha' e'ñe pueyochresha' perr Yompor ñeñtña acheñer atto o'huañ cohuen enta ñañeña ñeñt'pa' o' e'ñe atet perra ñerra'm cheshatoll ñeñt ama eñotenana' pommo'cheña. Ñeñtñapa' atarr nanac asherben enteñ Yompor. ⁵ Erra'tsenotes sa ñerra'm e'ñe same'ñeño'ten na e'ñe cohuen saguëñ ama't ñeñt ama asherbenaye' entyenet atet ñerra'm añ cheshatoll, na'naña e'ñe cohuen saguën.

Atto çhocmach huaponaya ñeñtcha' yetpatyene' o'ch atet patyese'y ñeñt ama pocteye' enteno Yompor

(Mr. 9.42-48; Lc. 17.1-2)

⁶ 'Ama't erra'tsena ñeñt ama pommo'cheño'teye' ame'ñenno atet ñerra'm cheshatoll ñeñt ama eñotenana' o'ch ommo'chena, tarraña ñerra'm esesha'ña po'psheñeñ o'ch atet patach ñeñt ama pocteye' enteno Yompor, ñeñtña acheñerpa' atarrcha' yoroçheno'tsen tarro'mar ñapa' añña o'patenaya coñcheñets ñeñt atarr huomenc. Ama't ñocoppa' ama tama yoroçhenayayñe ñerra'm ama atet patenana' po'psheñeñ, e'ñech allorocma o'ch çharachetañ mapue' añecmuen pa'çhnoço allpon ñerra'm puetse'tamets o'ch huapore'chet oño epo allcha' ño'shach mapue'. ⁷ Atarr llequëñets acheñeneshacop arr patsro ñerra'm esempo esesha'pa' o'ch atet patyenenet ñeñt ama pocteye' enteno Yompor. Tarro'mar çhocmach huaponaya ñeñtcha' yetpatyene' o'ch atet patyey ñeñt ama pocteye' enteno Yompor. Tarraña napa' o'ch notas, atarrcha' yoroçheno'tsen ama't erra'tsena acheñer ñeñt orrtatene' ñeñtcha' topatyene' po'psheñeñ ñeñt name'ñenaya o'ch atet patyenenet ñamet ñeñt ama't mameshapa' ama pocteye' enteno Yompor.

⁸⁻⁹ 'Ñaña o'ch noterrser: Ñerra'm sechets patyenes ñeñt ama pocteye' enteno Yompor atet ñerra'm sot, setac, seclle', añ poctetsa o'ch sequeçhpuerr ñeñt çhocma atet patse'tatyenes sechets. Ñeñt'pa' e'ñe atet ñerra'mrrate' e'ñe allorocma o' sepecherr sot, setac, o' serroterr seclle', o'ch sehupore'ter. Añ cohuen socop ama't e'ñe sepo'yota'teño't corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar sotpa' o'ch huapore'terrset coñcha'puetso all parraren tso' ñeñt ama ahuañaño ama't errponaña. Ñaña añ cohuen socop ama't e'ñe setco'tpa' sepshemtatquëño't corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar setacpa' o'ch huapore'terrset coñcha'puetso all parraren tso' ñeñt ama ahuañaño ama't errponaña. Ñaña añ cohuen socop ama't seclloyot sepshemtaçllo'yeño't corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar seclle'pa' o'ch huapore'terrset coñcha'puetso all parraren tso'.

Acheñ ñeñt ama ame'ñetsopa' arrpa' all atma'ntatarettet atet ñerra'm carrnero ñeñt chenquëtsa

(Lc. 15.3-7)

¹⁰ Jesús'pa' alla o'terranerr pueyochresha':

—E'ñech seño'ta, añepa'chña atarr asherben senten ñeñt ama ommo'chetso ñeñt atet petsa ñerra'm cheshatoll ñeñtñapa' e'ñech pueñmañesha' yemtena. Tarro'marña te'pa' o'ch notas, ñeñt ama pommo'cheño'teye' name'ñenayo ñocpuetpa' eñalletca'yeña

po'millañoñeñer ñeñtcha' cohuanpenahuet. Ñeñtña po'millañoñeñretpa' chocma Yomporsho'tsenet allña e'ñe cohuen e'mñotenanetña Yompor pue'ntañ. ¹¹ Po'ñoçh na Ñeñten Acheñetosets añecopña nohuapa attoch na'queshpatyesos acheñenesha' ñeñt chenquëtsa.

¹² 'Ñehua, ¿ama't atet senteñeña? Ama't erra'tsen acheñer ñeñt echene' shonte' po'carrneror, çharroch çharra' echen tarraña ñerra'm puemocarrña machayoña a'chencachpa' pamo'mte'ñapa' o'ch sa'nman allohuen po'potantañ ñeñt o' noventa nuebama all aspeno o'ch ahuo' e'nerraya' puemocarr ñeñt chenquëtsa. Allcha' e'name'tyera'pa' attotach enter. ¹³ Ñerra'm ña o'ch enterpa' ñeñtcha'ña atarr coshaterre'. Elloch metanan atto coshenana po'potantañ noventa nueve po'carrneror ñeñt ama paya'tetso. ¹⁴ Atetca'ye penaña ñaña Sompör ñeñt pue'ntañ'tsen; ñapa'çho'ña amaca' mueno o'ch chenca ama't puesheñarrotolla acheñ.

*Attoch e'ñe cohuen yamo'tstera yemo'nasheñ
(Lc. 17.3)*

¹⁵ Jesúsña'p' alla oterraneterr; ñeñt'pa' atet otanet:

—Ñerra'm erroten p'onas semo'nasheñpa' o'ch ahues ñesho e'ñech sapuet o'ch soctape'chatera' e'ñe cohuen. Ñerra'm çho e'mñoterrespa' allempoñapa' o'ch amo'tsof senterra. ¹⁶ Ñerra'm soctape'chatueña' amach e'mñotasopa' se'ñ puesheñarr amapa' epsheña ñeñtcha' sa'pocatatpreterre'. Atetcha' seña allochñapa' ñeñtcha' eñosets epsheña amapa' ma'psheño'marescha' eñosets allempopa' e'ñech po'ñoçh same'ña ñeñt ñoñets tarro'mar e'ñech attecma otenet. ¹⁷ Ñerra'mña atetña o' señoñuerña' amach e'mñoterr'sopa' allempoñapa' o'ch soch allohuenet ñeñt chocma apçhetsa pame'ñeñoñ Yompor. Co'tape'chateretepa' ñamet. Ñerra'm o'ch co'tape'chatuet allohuenetña', ama't ñetña amach e'mñoterranetopa' sañapa' e'ñech atta senter ñerra'm po'poñ acheñer ñeñt ama semo'nasheñeyaye. E'ñech atet senteñ ñeñt acheñer ñeñt ama ame'ñetso, atet ñerra'mrrate' ñeñt puehquëño'te'na cobra'yene' acheñenesha' quelle ñeñt gobiernocop.

¹⁸ 'Ñehua, te' po'ñoçhpa' o'ch alla noterr'serr: Ñerra'm errotencha' e'ñe pocte' sent ñeñtcha' sena'yes arr patsro, Yomporpa'çho'ña ñeñt ento'tsen e'ñech attecma e'ñech pocte' enterranet. Ñaña ñeñtcha' ama pocteye' senteno ñeñtcha' sena'yes arr patsro, Yomporpa'çho'ña ñeñt ento'tsen e'ñech attecma amach pocteye' enterraneto.

¹⁹ 'Ñaña o'ch alla noterr'serr: Po'ñoçh ñerra'm epsheñas arr patsro o'ch e'ñe sa'pocataue epsheño'mares ñeñtcha' senamuennan Nompör ñeñt pue'ntañ'tsen ñapa' ama't erra'tsena senamueñ chocmach e'ñe atet pennas. ²⁰ Tarro'mar ñerra'm erro'tsen ama't e'ñe epsheña amapa' ma'psheña ñeñt apçhetsa e'ñe pame'ñeño'tetan na, ñaña allpa' allo'tsenencha' e'ñe ñesheto.

²¹ Allempoña Pedropa' a'p'to'tenana' Jesús, ñeñt'pa' atet otos:

—Partseshacha', ñerra'm chocma epaye' errof penen namo'ts, ta'm ¿errponoche'tcha'ña ne'p'retne' ñato' e'ñech cançh'rrocha ne'p'retne'?

²² Jesúsña'p' atet och:

—Napa' ama notenpe e'ñech cançh'rrocha pe'p'retne', añña notene'p' atonochcha' pe'p'retne'—ama't cançh'rrochcha' çharra', ñaña po'poñ cançh'err, allponochcha' se'p'retne'ña samo'ts.

Atto Jesús'pa' eñotatanet ñerra'm amach e'ñe cohuen ye'p'retnannenopa' Yomporpa'çho'ña amach peretnerrye yaña

²³ Jesús'pa' atet oterraneterr:

—Ñeño'marña Yompor po'cohuenña ñeñt atto ayochreshattena ña pue'ntañ'o' ñeñt'pa' atet ñerra'mrrate' puesheñarr añcha'taref. Ñeñtña'p' añcha' muenen o'ch a'pocatyasan

atto teña'yeñ allohuen pa'taruasañrečno. ²⁴ Allempoña all e'ñe a'pocatyesanetpa' allña'pa' huapatoñet puesheñarr pa'cheñer ñeñt tebene' patoner quelle ñeñt allpon tebenpa' ñeñt oteñet shonte' millones. ²⁵ Ñaña'pa' ama echenano allpon quelle alloch tsa'terra ñeñt allpon teben. Po'patronarña'pa' atet otanet: "Te'pa' o'ch sepomuer epuet puetapor epuet ñaña puechemerasha' ñaña o'ch sepomhuerrñañ errponte' echyen allochña'pa' ama't allapa' o'ch tsa'terna atto tebenen." ²⁶ Allempoña'pa' allenta concorpana'cha pa'taruasañer ñeñt tebene', ñeñt'pa' atet otare'ch: "Amach nomporcha' pema'yore'tatsetno, netsa'tuerrpach acoña." ²⁷ Po'patronarña'pa' alla morrentera allenta a'rroyer allempocma e'shohuerrñañ all quellquëññañet ñeñt allpon teben. ²⁸ Ñeñtña pa'taruasañerpa' o' cha'nerr entuerran po'psheñeñ ñeñt parro ataruasatarettenet ñeñt tebene' ñaña, ñeñt'pa' e'ñe coñe'ta quelle. Ñaña'pa' cha rrema'huerre'pa' allenta mueñoche' atet otuer: "Petsa'ternañaca'ye ñeñt allpon petebenen." ²⁹ A'rroyerpa' ñaña'pa' allenta concorpana'tana ñaña ñeñt o' mueñocho'tue. Allña'pa' atet och: "Amach pema'yore'tatsetno, netsa'terrpach acoña allpon ñeñt netebeneñ." ³⁰ Ñaña'pa' ama't mameshapa' ama pocteye' eñche, ñeñt'pa' anemñ allcha' yottamñsach. Allña'pa' allach esempohuach e'ñe tsa'tuerra ñeñt allpon teben. ³¹ Añña po'potantañečnoña ñeñt parro ataruasatarettenetpa' ñetña'pa' ama't mameshapa' ama pocteye' eñcheto ñeñt atet pa' ñeñt e'ñe atta e'shohuaretterrtsa ñeñt allpon tebane't po'patronar. Allempoña ñetpa' allenta ahuanmuet po'patronaresho. Allña'pa' a'metañperet. ³² Allempoña'pa' o' alla agotater po'patronar. O' cherr po'patronareshopa' atet otapuer: "Pa na'taruasañre, ama't mamesha ama cohueneshayape. Paña'pa' atta potare'ten napa' ahuo'ch nepretnerreñ naña'pa' e'ñe atta ne'shohuerrnañ ñeñt allpon petebenen. ³³ Ama't e'ñe pocteñ papa'cho'ña o'ch pemueryañ ñeñt parro petaruasen. Atet nepena na e'ñe cohuen nemuererrpa." ³⁴ Allempoña po'patronarpa' e'ñe patsrre'mueñsha' pomuer, o' apuer ñeñt'cha' coñchate' esempohuañen allcha'ña e'ñe tsa'tuerrana ñeñt allpon teben.

³⁵ 'Sapa'cho'ña e'ñe puesheña'ttsosña ñerra'm amach sepretnerre samo'tspa' e'ñech attecma perres saña Nompot ñeñt pue'ntañotsen. Chocmuepa'ch e'ñe cohuen sepretannenaña sa e'ñe seyo'chrocmañen.

19

*Atto Jesús'pa' ye'chatosanet ama asanna'tpahuoyaye
(Mr. 10.1-12; Lc. 16.18)*

¹ Serrpare'tuanerr Jesús'pa' err Galileo't. Arr cherr Judeo, ñeñtña Judeapa' e'ñe alla Jordanaso yom'ta'n. ² Co'ta'huanererr shonte' acheñenesha' allña'pa' a'crratyesuerraneterr allohuenet patsñañe'teret.

³ Allña'pa' o' alla huacherrñañerr ñaña fariseonesha'. Ñetpa' añ muenenet e'ñe puehquëñotetpa' o'ch eñorachet ñeñt ama cohuenayaye. Attoña ñetpa' atet otoset:

—Ta'm ¿pocte'te' o'ch yeser yetapor ñerra'm esempo erro'tenot'?

⁴ Jesús'pa' atet otapanet:

—Ama't selleyareña atet oten Yompot po'ñoñ ñeñt aquellcare't ahuatoteñ. Ñehua, allpa' atet oten, Yomporpa' e'ñe ahuatoten allempoteñ es ye'chcatyes allempo ye'chcatan ñaña asheñorr, ye'chcatan ñaña peno. ⁵ Allempo Yomporpa' atet ot: "Ñeñto'marña yacmapa' ñerra'm esempoch sena'ta, coyanesha'pa' o'ch echan puerrollar, añ poc'te' o'huañcha' tama yemteñet pamo'mte' allochña'pa' yacmapa' attochña e'ñe parrocmat epuet puetapor. Attoña epsheño'maretpa' e'ñech patrra po'chets penet." ⁶ Atto'tcha'ña o'huañcha' puesheña'tetstet, allochña'pa' o'ch e'ñe puesheñarratet. Ñeñt atto Parets e'ñe patrratatan yacma epuet puetapor amach cha ellopa' alla sannerreto.

⁷Ñetñapa' atet otereterr:

—Ñerra'm po'ñoch atetpa' ¿eso'mare'tña nanña Moisés ñoñets all oteney o'ch yaḡ yetapor papell aquellcareḡ attoch yesannerra, allempoñapa' e'ñech pocte' o'ch yeser?

⁸Ñaña'apa' atet otteraneterr:

—Sapa' ama es sechenoyo seyoçhro ñeñto'marca'yeña Moisés'pa' muenatas o'ch sese' setapor. Ama't atet muenataseña' tarraña Yompor e'ñe ahuatoteña' amaca'yeña atteye' oteno. ⁹ Na te'pa' o'ch notas: Ñerra'm esesha' serre' puetapor, puetaporñapa' ñerra'm ama çho aguënano po'psheñeñ yacma, ñeñt e'ñe atta serre' puetapor, ñaña'pa' çhach ochña'tamḡperrana puetaporeshe'mañ ñerra'm o'ch alla yorerranerr po'poñ coy-anesha'. Ñeñtpa' ama pocteye' enteñe Yompor. Ñaña ñeñtcha' yorerre' coyanesha' asareḡ, ñeñña yacmarpa' çhach chetapreten taporets. Ñeñtpa'çho'ña ama pocteye' enteñe Yompor.

¹⁰Pueyochresha'ñapa' atet ochet:

—Ñerra'm amate' asapahuo yetapor ama't ahuaḡapa' amate' tama pocteyayeña yocop o'ch yeyore coyanesha' ñeñtcha' yetapor yeḡa'.

¹¹Ñaña'apa' atet otanet:

—Tarraña atetpa'çho'ña e'ñeca'ye poctet tarraña ama allohuenacmaye' çhennasoña seyoçhro atet tarro'mar ama allohuenacmaye' seyçhenoña atet. Ñeñtpa' aña eñotene' ñeñt atet cotape'chaten Yompor. ¹² Ñehua, atet ñerra'm puesheña'tets yacma ñeñt atta eñalletenet e'ñech atta yeçhquënet po'çhets amach mueneñeto coyanesha'. Ellonetpa' eñall ñaña po'potantañ yacmanesha', ñetñapa' çhoch acaparettenet ñeñto'marña amach mueneñeto coyanesha'. Ellonetpa'çho'ña eñall ñaña po'potantañ yacmanesha', ñetñapa' añecpach ama mueneñeto coyanesha' esheccha' e'ñech aña ma'yoçhrenet Yomporecop attoch atarr ayochreshattena ña pue'ntañot. Ñeñt atet cotape'chenet Yomporecop ñeñtpa' e'ñe pocte'. Attepa'chña pet ñerra'm Yompor cotape'chatenahuet atet.

*Atto Jesús'pa' bensare'tamḡsapan cheshanesha' ñeñt huapatoñet
(Mr. 10.13-16; Lc. 18.15-17)*

¹³ Allempoñapa' huaçha'tachet ñaña shonte' cheshatollesha' Jesúsesho. Ñetpa' añecopña huaçha'tachet o'ch a'ḡlla'yesapanet Jesús attoch bensare'tamḡsapanet. Jesúsña pueyochresha' allempo entapan ñeñt huaçha'tate' cheshanesha'çhno ñetñapa' ama pocteye' eñcheto o'ch anmoset cheshatollesha' Jesúsesho ñeñto'marña ama amnataretapueto. ¹⁴ Tarraña Jesúsña'apa' atet otanet:

—Pocte'ñaçho' semnachñaca'yeña cheshanesha' onosetepa' e'ñe nesho. Amachca'ye çha sepatare'tatstapaneto tarro'mar allohuen ñeñt atarr neyemtenaya na e'ñe atfet ñerra'mrrate' cheshatoll, ñetcha' o'patenetña Yompor po'cohuenña ñeñt atto ayochreshattena ña pue'ntañot.

¹⁵ Allempoña Jesús'pa' a'ḡlla'yesapan cheshanesha' allohuenet e'ñe puesheña'ttset. Allempoñapa' ahuer allot.

*Atto puesheñarr ñeñt huepueshameñ ñeñt atarr ecḡllayoreḡ ñaña'apa' eñorana'tosana Jesús
(Mr. 10.17-31; Lc. 18.18-30)*

¹⁶ Allempoñapa' huapa puesheñarr yacma Jesúsesho, ñeñtpa' ora huepueshameñ. Ñaña'apa' atet otos:

—Maestro, ḡapa' atarr cohuen acheñreḡ, te'pa' o'ch ḡotapuen ¿erroḡena'tcha'ña neḡaña na e'ñe cohuen attochña napa' corretsanach e'ñe tayoteñ ama't errponañohuen?

¹⁷ Jesúsña'apa' atet otapḡ:

—Eso'mare't ḡotenenña napa' atarro' cohuen acheñren. Arr arromñañenesha' ama't e'ñe puesheñarrapa' ama eñalleña ñeñt e'ñe cohuen acheñer. Ñapña Yompor ñeñt e'ñe

po'ñoçh cohuen. Ñerra'm añte' pemnen attoch p̄apa' corretsaṗach e'ñe tayoteñ ama't errponañohuen añ poctetsa p̄ocop o'ch e'ñe peṗohuoñ ñeñt atet oten Yompor.

¹⁸ Huepuesha' ñapa' alla a'ṗto'tererr:

—¿Erra'tsente'ña ñoñets ñeñt'cha' atet neṗohua?

Jesúsñapa' atet otererr:

—Ñeñt'pa' añca'ye, amach pemtsatsto acheñ, amach pechtapretatsto taporets, amach petyesatsto, amach petoma'tamṗsatsche p̄amo'ts e'ñe atta. ¹⁹ Ñaña e'ñe pemor-renteñoṗpa' peñcha'na'chcha' p̄ompor ñaña p̄achor. Ñaña añcha' atarr cohuen pemor-renta p̄amo'ts e'ñe atet atarr pemorrentena e'ñe p̄añeña.

²⁰ Huepuesha' ñapa' alla oterranerr Jesús:

—E'ñe cheshoteñ ora añechnopa' napa' e'ñeca'ye netsotueñ. Ta'm ¿erra'tsenmeñte'ña ñeñt nepalltena?

²¹ Jesúsñapa' atet otererr:

—Ñerra'm añ pemnen o'ch e'ñe petsotua ñeñt pepalltenmeñ te'pa' añcha'ña atet peperra, o'ch ahuerreṗpa' o'ch pepomhuerr ora allpon ñeñt pechyen o'ch p̄apa'yera' huocchañneshachno ñeñt atarr es pallta'yetsa, attochña p̄apa' pecherrcha' ñeñt atarr nanac sherbets Yompor pue'ntaño. Allempochña pehuerrapa' o'ch p̄oc'terren attoch e'ñe neyochresha' neperreṗ e'ñe poctacma.

²² O'ña e'mhuan huepuesha' ñeñt atet och Jesús'pa' ñaña'pa' puellquëñesha' ahuer tarro'mar ñapa' shonte' esocmañen echyen.

²³ Jesúsñapa' atet otan pueyochresha':

—Po'ñoçh napa' o'ch notas: Ñeñt atarr eçllayoreṗpa' atarrca'ye nanac echarr attoch agapoñet Yompor po'cohuenña ñeñt atto ayochreshattena ña pue'ntaño. ²⁴ Ñeñt'pa' atet'cha' netma'ntacha. Yapa' yeñoteñ berr añecmuen allpon ñerra'm huaquësh* atarrca'ye torrapo' o'ch esho'tosa añeṗollponatollo atet ñerra'mrrate' acosh puetaṗollo. Ñeñt'pa' atetca'ye penaña acheñ ñeñt eçllayoreṗ ello atarr torrapo' o'ch agapan ñaña Yompor po'cohuenña ñeñt atto ayochreshattena ña (tarro'mar ñetpa' ama mueneñeto o'ch sehuanmuet ñeñt atarr morrentenet ñet attoch pueyochresha' perranetañ Yompor).

²⁵ Pueyochresha'ña allempo e'met Jesús atet oten, ñetñapa' cha muene' lleca'rrtetpa' atet otanna'tyenet:

—Tarraña ñerra'm atette'pa' amate' esesha' a'queshp̄atareṗterrtso ama't puesheñarra tarro'mar yapa' yeñoteñca'ye huaquëshpa' amaca' esho'tenoña acshequeto.

²⁶ Allempoña Jesús'pa' atta cohua'yesanetpa' atet oterraneterr:

—Sa arromñateneshaspa' amach es errotenaye' apen senteno. Tarraña Yomporpa' ama eñalle ñocop ñeñt atarr torrapo' enten.

²⁷ Allempoña Pedropa' atet och:

—Partseshacha', po'ñoçh yapa' o' e'ñe yesuanom ora allohuen attoch e'ñe yoçterreṗ. Yapa' ¿eso'tcha'ña apuerreyña Yompor?

²⁸ Jesús'pa' atet otanet:

—Po'ñoçh notenes, allempoch etserrater pats allempoch nanorruerr neconaño allcha' necohuenetuerra nepartsoteñoñ na Ñeñten Acheñetosets sapa'cho'ña allcha' sanorriesuerr seconañechno e'ñe puesheña'ttsos çharra' puechena epa seconañ ñeñtes noctene'. Sa ñeñtes noctene' allcha' sanorriesos allotcha'ña sa'mcha'tareṗterraña añecop ñeñt çharra' puechena epa Israel po'mrenñenesha'.

²⁹ Jesús'pa' alla oterraneterr:

* **19:24** Ñehua, Jesús añ toma'ntatanet camello ñeñt payara penet all pa'nyo, ñeñt e'ñe allpon ñerra'mrrate' huaquësh.

—Allohuen erra'tsencha' acheñer ñeñtcha' e'ñe sehuanmue' allohuen ama't pa'paclohuen, ama't pa'mo'nasheñnesha' ñato' po'chanesha' ñato' pompoy, pachor ñato' po'patseñ, attochña na e'ñech cohuen sherberrnet, ama't erra'tsencha' ñeñtcha' sehuanmue' allohuen, elloña ñetpa' o'ch alla aguërret shonte' esocmañen ñeñt atarr cohuen. Ama't allponapa'tets sehuanomyesnomuet, elloña çharrochcha' çharra' alla agapyerret. Elloña tsapa'netpa' o'ch aguërret ñeñt alloch ñetpa' corretsetach beñecpuen pocsheñeshocmañen. ³⁰ Te'pa' señoche'pa'ch, eñall shonte' acheñ ñeñt ama esoye' senteno sa te' tarraña ñetña allempopa' atarrcha' asherben enterranet Yompor. Ñaña eñall shonte' acheñ ñeñt atarr asherben sentyen sa te', tarraña ñetña allempopa' amach asherbenaye' enterraneto Yompor.

20

Atto Jesús'pa' toma'ntaterraneterr e'ñech allponeshacma atsa'taretta allohuen ataru-asañechno pamtarr yet

¹ 'Yompor po'cohuenña ñeñt atto ayochreshattena ña pue'ntañof, ñeñt'pa' añ toma'ntena ñeñt atet pena puesheñarr ane'tañ. Ñaña'pa' ahua'ecma ahua'muen e'nyenaya' acheñ ñeñtcha' taruasat pa'mro o'ch toteññañeta' puenarem. ² Ñeñt allpon entospa' atet otosanet: "Ama't semno o'ch setaruasena' na'mro. Pamta'tetspa' netsa'tasach allpon quelle ñeñt paterr denario."* Ñetña'pa' e'ñe pocte' eñchet allenta mueñanet pa'mro, allcha' totoset narmetsmo. ³ O'ña enome'ta'muenpa' o' alla ahuererr allecma shontena acheñnesha' ñeñt e'nyene' taruas. Allña'pa' entuerranerr tama allponsheña, ñetpa' ama es otteneto. ⁴ Ñaña'pa' atet otosanet: "Sapa'cho'ña ñerra'm semne'pa' o'ch setaruasa' na'mro; napa' netsa'tasach allpon ñeñt poctetsa." Ñetpa'cho'ña allenta ahuanmuet pa'mro allcha' totoset ñamet narmetsmo. ⁵ Allempo çhap poctopa' alla ahuererr ane'tañ, alla entuerranerr po'potantañ acheñ. Ñetpa'cho'ña attecma otuerraneterr ñeñt atet otan ñorra' po'potantañ. Ñetpa'cho'ña allenta mueñerraneterr pa'mro allcha' totoset ñamet narmets. O'ña ellerrenmochpa' o' alla ahuererr, allña'pa' entuerranerr po'potantañ acheñ. Ñetpa'cho'ña e'ñe attecma otuerraneterr ñeñt atet otan ñorra' po'potantañ. Ñetpa'cho'ña allenta mueñerraneterr pa'mro. ⁶ Atteña o' ellerrenpa' o' alla ahuererr, allña'pa' entuerranerr po'potantañ acheñ, ñetpa'cho'ña ama es otteneto. Ñetpa'cho'ña atet otuerraneterr: "Sapa' ¿eso'mare'tña atta sellapene't tomçha'tyesetsña arrma? Amaña es sotteno." ⁷ Ñetña'pa' atet ochet: "Yapa' amaca'yeña eseshaye' yetaruasatenaye ñeñto'marca'ye ama es yotteno." Ñaña'pa' atet otanet: "Ñehua, sapa'cho'ña o'ch ahues na'mro, ama't mameshapa' setaruasa'nen. Napa' netsa'tasach allpon ñeñt poctetsa." ⁸ O'ña puenaso'tenpa' ane'tañña'pa' otosan ñeñt cohuañpene' allohuen pa'taruasañer: "Te'pa' o'ch peçhore'ter ataruasañnesha', o'ch petsa'tyesapuerranet e'ñe puesheña'ttsocmuet. Añcha' ñanom petsa'tapuerra ñeñt taruasosets chenta' alloteñach pamotech tsa'tyesapuerrahuet atotach petsa'tuanet ora allohuenet ama't ñeñt aromtañohuen." ⁹ Ñeñtña taruasosets ellerronet ñetña'pa' o' huacherret. E'ñe allponeshacma atsa'taretetyesapuerret ñeñt paterr denario. ¹⁰ Atteña allempo o' huacherra ñaña ñeñt taruasosets ahua'ecma, ñetña'pa' çha otenapuetañ ñato' atoncha' atsa'taretta'puerret. Tarraña ñetpa'cho'ña e'ñe puesheña'ttsocmuetpa' e'ñe allponeshacma atsa'taretta'puerret ñeñt paterr denario. ¹¹ Allempo agapetpa' ñetña'pa' çha po'poñ entet, çha e'moñe'tueret ane'tañ. ¹² Ñeñto'marña atet ochet: "Añenesha' ñeñt huapatsa chenta'pa' ñetña'pa' mamesha taruasoset. E'ñe allponeshacma

* **20:2** Denariopa' quelle ñeñt allpon tsa'tenet pamtarr ñeñt taruasets all pa'nyo.

petsa'tapuerranet ñeñt e'ñe allpon petsa'tapuerrya yaña. Ama't yapa' o' yellapen ya'ñetse' yetaruas, nanac etay atsrret all yetaruasen. Eso'mare'tña e'ñe allponeshacma petsa'tapuerrya ñeñt allpon petsa'tapuera ñaña ñeñt taruasosets mame'." ¹³ Allempo atet otuer ataruasañ, ane'tañña'pa' atet och: "Ama, masheñcha', çhoje' neshquënpe, e'ñe allpona netsa'tenpa ñeñt allpon ya'pocata'muen aromtaña. ¹⁴ Te'pa' panerr peçllayor, orrerreþ. Napa' e'ñe pocte' nenteñ na allponcha' netsa'cha ñeñt huapatsa chenta' allpon netsa'tasa saña. ¹⁵ Sapa' ama't pocteye' senteñe allpon ñeñt e'ñe nocma napa' e'ñech atet nepe' ñeñt atet nemnen na. Ñato' tarro'marte' cha muene' se'moñe'tenenña' napa' atarrca'ye amuerañan." ¹⁶ Ñeñto'mar te'pa' o'ch noterrser: Ñeñt ama esoye' senteno sa te' tarraña ñetña allempopa' atarrcha' asherben enterranet Yompor. Ñeñtña atarr asherben sentyen te', ñetña allempopa' amach tama asherbenaye' enterraneto Yompor. Ñeñto'mar te'pa' o'ch alla noterrser: Ama't shonteñña ñaña ñeñt ahua'ñareñ ñeñtcha' neyochresha' nepperreñ, tarraña ñetpa' e'ñe puesheña'ttseta ñeñtcha' e'ñe pocte' nenterr na ñeñtcha'ña e'ñe neyochresha' neperr pocmacma.

*Allempo Jesús'pa' alla eñotaterraneterr ñapa' çhocmach amtsaretterra
(Mr. 10.32-34; Lc. 18.31-34)*

¹⁷ Jesús'pa' ahuenerr Jerusaléñoneñ pueyochreshohuen. O' ahuanenan pueyochresha' a'yenteye' allña'pa' atet otnenanet:

¹⁸ —Te' po'ñoçh o' ahueney Jerusaléño, allcha' pomataterrnet na Ñeñten Acheñetosets. Añcha' nerrmaterre' ñeñt pa'mcha'tareternesha' pen allohuen judionesha' po'cornaneshar ñaña ñeñt atarr etsotayenayeñ ñoñets ñeñt atet anareñ. Ñetña'pa' atetcha' otyesnet na'mtsaretterrepa'to', ¹⁹ o'ch pomuerrnet po'poñ acheñesho ñeñt ama judioneshayaye. Ñetña pueche'tatseteñoçetanpa' allcha'ña achmare'terrnet, ashterrnetcha', atotcha'ña o'ch corso'tamperrnet, tarraña poma'pamtañoçh alla netanterra.

*Ñeñt pachor pen Jacobo ñaña Juan, ñaña'pa' enamuenan Jesús attoch anorrcha'tyesuerr
puechyoresha' Jesúsesho
(Mr. 10.35-45)*

²⁰ Allempoñapa' ponmosya ñeñt pachor pen Jacobo ñaña Juan ñeñt Zebedeo puechemerasha'. Huapa epuet epsheño'mar puechyor, ñaña'pa' concorpana'tosana Jesús attoch es enamos. ²¹ Jesúsñapa' atet otaþ:

—¿Eso'tña pemnen?

Ñapa' atet otos:

—Napa' añ nemnen te'pa' o'ch pemnatapon añ nechyor epsheño'mar o'ch anorrueret pesho allcha' pa'mcha'tareterra e'ñe pecohuenño. Puesheñarrpa' anorrosepa'ch pecohuenroñ, po'psheñeñña'pa' anorrosepa'ch pe'chcoferoñ, allcha' cohuentapreterrpel.

²² Jesúsñapa' atet otanet:

—Sapa' amaca'ye señoñe ñeñt po'ñoçh senamuenen. Añca'yeña senamuenen attoch semueroçhtapreterrna saña. Ta'm çe'ñete' po'ñoçh pocte' senteñ o'ch semueroçhterra saña tarro'mar napa' çhocmach na'mueroçhtatareterra?

Ñeñt mueroçhteñetspa' Jesús'pa' atet toma'ntatanet ñerra'mrrate' atarr pesherr es yorren orranñtso ñaña atto yapatareñtana e'ñe atet ñerra'mrrate' çho ya'mtsareterra Yomporecop. Ñetña'pa' atet ochet:

—Yapa'çho'ña atetcha'ca'ye yepe'.

²³ Ñaña'pa' alla oterraneterr:

—Ñehua, po'ñoçhpa' sa'mueroçhtatareterrach saña attescha' ñerra'm na, sa'mtsareterrach saña. Tarraña añña attoch sanorryesos nesho necohuenroñ ñaña

ne'chcoterot allcha' secohuentapreterrna ñeñt'pa' amachca'ye naye' semnaterraye. Añcha'ña anorryesuerrets all ñeñt' e'ñe o'patatenna Nompör.

²⁴ Añña po'potantañ pueyochresha' ñeñt' çharrasheña allempo e'met ñeñt' atet ena-muen Jacobo epuet pa'mo'nasheñ Juan, ñetñapa' ama pocteye' eñcheto çha muene' e'moñe'chet. ²⁵ Allempoña Jesús pa' alla çhore'terranet allohuen e'ñe ñesho ñeñt'pa' atet otanet:

—Sapa' señoñe' ñeñt' atet pena po'poñ acheñenesha' ñeñt' ama judioneshayaye. Ñet ñeñt' pa'm'cha'tareter penet e'ñech pa'm'cha'noçhteñocmañen pomnaren pa'yenan allohuen pueyochresha'çhno. ²⁶ Sapa' arepa'chña atteye' sepanna'tatsto e'ñe sommo'cheñoñ. Socoppa' añña poctetsa o'ch atet sepena. Ñerra'm erra'tsenotes ñeñtes atarr am'cha'taretoyen entetsañ ñeñtes acheñres socoppa' añ poctetsa o'ch atet senterra ñerra'm ama esoshe'mayayso ñeñt' atet pena ñeñt' atta atarr taruaset po'potantañecop. ²⁷ Ñaña ñerra'm erra'tsenotes ñeñtes muenene' o'ch atarr asherben entenset ñeñtesña acheñrespa' añ poctetsa o'ch atet senterra ñerra'm ama esoyayso allochñapa' attochña e'ñech cohuen setorrana po'potantañecop atet ñerra'mrate' acheñ ñeñt' atarr taruaset e'ñe atta. ²⁸ Atet ñerra'm na Ñeñten Acheñetosets, napa' ama añecpaye' nehuapo añe patsro allochñapa' sapa' o'ch atta atarr sesherbapuen na atet ñerra'mrate' napa' atarr am'cha'taret sentenen. Napa' añecopña nehuapa allochñapa' nachña sesherbosena sa, ñeñto'marña napa' naña pomosta nañeña o'ch nerromos socop attochña netsa'tuerrnasa so'chñar ñeñtes shontes pa'namen acheñres. Attochña sapa' amach sañeña rromatso so'chñarecop.

Allempo Jesús a'crraterranerr epsheña aporo'yet

(Mr. 10.46-52; Lc. 18.35-43)

²⁹ Allotñapa' alla meterreterr Jericótpa' co'ta'huanererr shonte' acheñenesha'. ³⁰ Allcha' oñmuetpa' allñapa' ahuepa't anorros epsheña aporo'yet e'ñe toñetopño. Ñetña eñotatarettet añ huetsa Jesús. Ñeñtña aporo'yetpa' allenta rranare'tapet Jesús, ñeñt'pa' atet otapet:

—Pemueraye'chnomya, Ayochreshate, p'apa' ñeñtep Davidna'tarep.

³¹ Acheñenesha'ñapa' çha muene' che'ptare'tnometña aporo'yet, atet otoset:

—O'hua semma.

Aporo'yetñapa' elloña alla rranare'terreterr atet otereterr:

—Pemueraye'chnomyañaca'ye, Ayochreshate, p'apa' ñeñtep Davidna'tarep.

³² Jesúsñapa' alla tomos o' çhore'tanetpa' atet otanet:

—¿Eso'tña semnen ñeñt'cha' atet neposes?

³³ Ñetñapa' alla otereterr:

—Ayochreshate, yapa' añ yemnen o'ch pecuatnomuey attoch o'ch cohuen yenterrapa.

³⁴ Jesúsñapa' allenta muerosanet attoña ñapa' a'p'llacle'chosanet. A'p'llacle'chuanetpa' aporo'yetñapa' allorocma enterret e'ñe cohuen. E'ñe cohuertsetpa' çha co'ta'nmuet ñamet Jesús.

21

Allempo çhap Jesús Jerusaléño

(Mr. 11.1-11; Lc. 19.28-40; Jn. 12.12-19)

¹ Atteñapa' o' çha'cha'tet allame'tets Jerusaléño. Chapuet aspento ñeñt' pa'so'cheñ Olivopen. Allñapa' allo'tsen anets ñeñt'pa' añ pa'so'cheñ Betfagé. O'ña çhapmochet all anetso, ² Jesúsñapa' atet otnoman epsheña pueyochresha':

—Sapa' o'ch sota o'ch seçhap a'yenteye' e'ñe allara anetso. Allñapa' allcha' sentos ashen all huanquëñet epuet ñaña puechoyor ñeñt' rre'ptor. Ñeñtña ashenpa' o'ch

sepyam̄psospa' o'ch sanerrnan. ³ Ñerra'm esesha' erroṭ sotapue' sañapa' atetcha' soto-sanet: "Yepartsesharca'ye muenene'ña añ ashen. Mameshapa' o'ch alla apuerrsa'."

⁴ Ñeñṭpa' tarro'mar atet ṗa allochñapa' attoch etsota añ po'ñoñ ñeñṭ a'mṭayeṭ ahuat Yompor po'ñoñ. Ñeñṭpa' Yompor eñoratayeṭ atet:

⁵ Atetcha' soch sióno'marnesha' ñeñṭara jerusaléño'marnesha': "Secueṭach, te'chca'yeña huaponasaña ñeñṭcha' Sa'mcha'tareter seperr. Atto huena ñapa' amaca'ye pommo'cheñoṭeye' ṭhapaña all, ñeñṭo'marña ama't rre'ptorechora ashenpa' ñeñṭachca'ye monta'nena." Arrpa' allohua huañ añ po'ñoñ ñeñṭ a'mṭayeṭ ahuat Yompor po'ñoñ.

⁶ Allempoña pueyochresha'ña ñeñṭ mueñapa' ñetñapa' allenta ahuanmuet all anetso. E'ñe atet otapanet Jesús, ñetñapa' e'ñeṭho' atet ṗoset. ⁷ Allempoñapa' huapaterrñañet ashen epuet ñaña puechoyor. Ñetñapa' nohuerret pa'shtam ashnache'ñopa' montatueret Jesús. ⁸ Shonte' acheñenesha' ñetñapa' toṭma'tyesoñet pa'shtam toño allcha' oñem Jesús. Po'potantañeṭhnoñapa' tsorrmore'tyeset tsach pue'mo'rer allo topanetyeset toñ. ⁹ Allohuen acheñenesha' ñeñṭ otaṭhetsa ñaña ñeñṭ coṭa'huanene' chenta' ñetñapa' puerrannarteñoṭetpa' atet atarr cohuentatyeseññañetpa' atet otenet:

—¡Acsherrapo'ch allohueney! ¡Aye'choṭhtaterrapo'ch Jesús ñeñṭ añcha'tareṭ David po'mṛeneñ! ¡Aye'choṭhtaterrapo'ch Jesús ñeñṭ llesensen Yompor! ¡Ya'ye'choṭhtaterrñañepa'ch Yompor Parets ñeñṭ pue'ntaño'tsen!

¹⁰ Atteñapa' o' ṭhap Jesús Jerusaléno. Chap allpa' allohuen anetso'marnesha' epaye' cohuanrrortapet. Ñetñapa' atet otyeset:

—¿Esesha'ṭe'ña añ acheñer?

¹¹ Acheñenesha' ñeñṭ coṭa'nene'pa' ñetñapa' atet otoset:

—Añca'yeña Jesús ñeñṭ a'mṭene' Yompor po'ñoñ. Ñapa' Galileoṭca'ye huena allara anetso Nazareto.

Atto Jesúsapa' a'cohuentatosan Parets pa'paquëll
(Mr. 11.15-19; Lc. 19.45-48; Jn. 2.13-22)

¹² Allotña Jesúsapa' beṭosos Parets pa'paclo. Allñapa' mueño'tuosan allohuen ñeñṭ pomatsre'tetsa all ñaña allohuen ñeñṭ rañta'yetsa. E'ñe ṭha'nmaṭha'tatosanet al-ṭot, a'coye'tam̄psosanet po'mesaṭhno allecma cam̄yatyenet po'ṭllayoret, a'coye'tuosan ñaña allecma anorryen ñeñṭ pomuene' yepeṭhno. ¹³ Allempoñapa' atet otosanet:

—Yompor po'ñoñ ñeñṭ atet anuaret ahuatoteñ allñapa' atetca'ye oten Yompor: "Añ ñeñṭ nepaquëll nepenpa' añeṭpacayena sherben allecmach ma'yochennet." Tarraña sañapa' e'ñe atet sepeññaña Yompor pa'paquëll ñerra'mrrate' eñeñ ñeñṭ epotyetsa mapuetpono.

¹⁴ Allña Parets pa'paclopa' huaṭha'toña aporo'yeteṭhno ñaña ñeñṭ checa'repayets. Ñañaapa' e'ñe a'crratyesianet. ¹⁵ Añña ñeñṭ pa'mcha'tareternesha' pen allohuen judionesha' po'cornaneshar epuet ñaña ñeñṭ atarr etsotayenayeñ ñoñets ñeñṭ atet anaret, ñetñapa' entoñet ñeñṭ atarr coṭhnesha' atet orrtatyen Jesús ñeñṭ ama't eseshapa' ama puentareto. Ñaña e'mueññañet cheshaneshapa' all Parets pa'paclo puerranarotetpa' atet otyenet:

—¡Aye'choṭhtaterrapo'ch Jesús ñeñṭ añcha'tareṭ David po'mṛeneñ!

Ñetña atet entetpa' ñeñṭepa'tcha' atarr atsrre'matahuet. ¹⁶ Allempoñapa' atet ochet Jesús:

—¿Ama't pe'muenoña atet otaṭhre'tapaṭ cheshaneshapa'?

Jesúsñapa' otanet:

—Ne'mueñca'ye. Sañapa' ama't selleyareña Yompor po'ñoñ. All anaret ñoñetspa' ñeñṭña atet oten:

Ama't cheshatollesha' e'ñe puenamotet e'ñech cohuen pe'ñoratos ačhotachre'teñtso.
Ama't ñeñt ora momuenmeñ pe'morrtatoscha' e'ñe cohuen p̄ocop.

¹⁷ O'ña yerpatuerranet añ ñoñets ñeñt atet anaret ahuatoteñ ñocop, allempoña sa'nerranet ñeñte anetsrotpa' o' alla ahuererr Betanio. Allpa' allecma ommuena.

Allempo Jesúsapa' eñora higohecop amach eñalletatsto pue'mer
(Mr. 11.12-14, 20-26)

¹⁸ Tsapat puetaren alla ahua'muenerr Jesús anetso Jerusaléño. Toñoñapa' čha cheporra'nma. ¹⁹ Allñapa' entnoman higoch toñetoñño'tsen. Ponmosya ama entoñe pue'mer, pasopanrepa'tcha' entosñañ. Jesúsña čhepa'tcha' eñorostsa higohecop, ñeñtpa' atet otos:

—¡Arepa'ch eñalleterro pue'mer ama't e'ñe ahuaña!

E'ñe otue'pa' allorocmuepa'tcha' hueya'huaña pasopaner. ²⁰ Pueyochresha'ñapa' e'ñe enteñet o' hueya'huaña higochpan. Ñetñapa' atta cohuanrrorteñet, atet otanna'tet:

—Errotenoñuañaca'yeña o' a'uyatachña e'ñe mamecma'te'.

²¹ Jesúsña atet otanet:

—Po'ñočha'ye o'ch notas: Ñerra'm seyemteña Yompor, ama čhoye' se'charrtateno seyočher, amach añayaya atet sepo atet nepa' higoch. Añe'nachña e'ñe setsoten ñeñt ello atarr torrapo' senten. O'ch netma'ntacha atet ñerra'mrrate' añ aspenet. Ñerra'm eseshascha' otets aspenetecop, “Añ aspenetpa' rrote'tepa'ch arrot, arrepa'chña esha'tosa sa'po allcha' e'ñe chencosa”, aspenetñapa' atetcha'cho' p̄onasa. ²² Ama't allohuen erra'tsencha' es senañ Yompor e'ñe sema'yocheñoñ, ñerra'm čho senamueñ e'ñe seyemteñoocmañen, ñeñtñapa' sagañcha'.

Atto allsensarettena Jesús
(Mr. 11.27-33; Lc. 20.1-8)

²³ Allempoña Jesúsapa' o' alla čherrerr Jerusaléño, allñapa' be'tosuerrerr Parets pa'paclo. Allñapa' yečhatuerranerr acheñenesha'. Atto yečhatenan acheñenesha'pa' allempoña huačha'toña ñaña ñeñt pa'mčha'tareñenesha' pen allohuen judionesha' po'cornaneshar epuet puesheña'tets ñeñt pompornesha' pen allohuen judionesha'. Ñetñapa' atet otoset:

—Ñehua, yapa' añecop yohuena yemneñ o'ch p̄otey ¿erro'te't apuenpetña llesens? ¿Esha'tña p̄apueñe'ña llesens attot p̄orrtatyenña ñeñt čhocma attecma pepa'yena?

²⁴ Jesúsñaapa' atet otapanet:

—Ñehua, napa'cho'ña nemneñ o'ch na'p̄to'tapas saña ama't patrra ñoñets. Ñerra'm sanaposencha'pa' napa'cho'ña attochña notapas naña allot apuennetña llesens ñeñto'mar atet nepena. ²⁵ Sapa'cho'ña o'ch sotosen, ahuañmo'cha allempo apate't Juanañ Yomporecop, ñapa' ¿eseshatña llesense' ñato' Yompor amapa' acheña'te' apue'ña llesens? Nemnen o'ch sotosen ñeñt atet soctape'chen sa.

Ñetñapa' e'ñe a'nahua otanna'tyeset:

—Ta'm erro'tcha'ca'ye yochte'. Ñerra'm čha yoch Yomporeshotca'ye apetña llesens, ñapa' čhate'ca'ye otey: “Ñehua, sañapa' eso'mare'tña ama se'mñocheña ahuaña allempo serrpare'tatosan acheñenesha'.” ²⁶ Elloña ñerra'm čha yoch acheñeshoña apet llesenspa' acheñenesha'ñapa' čhate' e'moñe'tyet, tarro'mar ñetpa' e'ñe cohuen eñchete't Juanañ, čhocma otyeñet ñapa' ñeñtca'yeña a'mtose' Yompor po'ñoñ.

Ñeñto'marña ñetpa' mecha'teñet acheñenesha'. ²⁷ Ñeñto'marña ñetpa' atet ochet Jesús:

—Ta'm yapa' amaca'yeña yeñoteñe; erro'tte' huapaña Juanañ, erro'tte' apetña ñaña llesens.

Allempoña Jesúsapa' atet oterraneterr:

—Napa'cho'ña te'pa' amach notaso samña allot apareten namña llesens attot atet ne'pa'yena.

Atto Jesús'pa' toma'ntaterraneterr puesheñarr yacma atet penaña epsheña puechemer
28-32 Jesús'ñapa' alla oterranerr judionesha' pa'm'cha'tareternesha':

—Ahuañmo'cha allempo huapa Juanañ, ñapa' añecop huapa attoch ñach sey'chaterre' allohuen ñeñt e'ñe pocte' enten Yompor. Tarraña sañapa' ama same'ñyo. Aña e'ñe cohuen ame'ñapaya ñeñt atarr ochñañenesha'chno atet ñerra'm añ ñeñt po'taruas pa'yene' e'ñe puehquëño'tet cobra'yenet acheñenesha'chno quelle ñeñt gobiernocop ñaña aña e'ñe cohuen ame'ñapayaña Juanañ ñeñt atarr ecañoresha'echno. Allempo sentanet atto ñetpa' cotape'cherret ello cohuen Yomporecop, sañapa' amaña eseshas cotape'cherrayeña cohuen Yomporecop attoch o'ch same'ñera samña. Ñeñtña te'pa' o'ch netma'ntacha. Ñehua, puesheñarr yacma eñall epsheña puechemer. Ñaña'pa' atet otenana' puesheñarr puechemer: “Te'pa' nechemere, o'ch ahua'muene'p ya'mro allcha' petaruasa'muen.”* Ñaña'pa' ellonta otapan pompor: “Amaca'ye nemno, amachca'ye neto.” Tarraña elloñapa' cotape'cherran cohuen allempoñapa' ahua' pompor pa'mro taruasats. Allempoña pomporpa' ahua' ñaña po'psheñeñ puechemeresho, ñapa'cho'ña atet otos atet otuan po'psheñeñ puechemer: “Te' nechemere, o'ch ahua'muene'p ya'mro allcha' petaruasa'muen pa'ma.” Ñaña'pa' e'ñe cohuen otapan pompor: “Ñehua, apacha' o'ch ahuen o'ch netaruasa'muen ya'mro.” Tarraña ñaña'pa' ama't atet otañpa' ama to.

Jesús'ñapa' alla oterraneterr:

—Te'pa' o'ch na'p'to'tas sa, ñeñt epsheña puechemer, ¿erra'tsena't sentenña sa ñeñt e'ñe po'ño'ch atet petsa ñeñt atet muenen pompor?

Judionesha'ña pa'm'cha'tareternesha'pa' ñetñapa' atet ochet:

—Añca'ye ñeñt ñanom, ñeñt otapue' ñapa' año'ch to taruasats tarraña elloñapa' allenta ahua' taruasats pa'mro. Ñeñtca'yeña etsotene'ña ñeñt atet muenen pompor.

Jesús'ñapa' atet oterraneterr:

—Ñeñto'marña te'pa' o'ch notas: Ñeñt puehquëño'te'na cobra'yene' acheñenesha'chno ñaña ñeñt atarr ecañoresha'echno, ñetñapa' po'ño'ch allenta aguëret Yompor po'cohuenña ñeñt atto ayochreshattena ña. Sañapa' amaña allentaye' saguëreña samña tarro'mar sapa' chaña atarr se'charrtatenña seyo'cher.

Atet atma'ntatare'ttena ñeñt ataruasa'ne'chno ñeñt ama cohuenayaye
(Mr. 12.1-12; Lc. 20.9-19)

³³ Jesús'ñapa' alla oterranerr judionesha' pa'm'cha'tareternesha':

—Te'ñapa' se'mñnotencha', napa' o'ch netma'ntatasa po'poñ. Eñall puesheñarr ane'tañ, ñaña'pa' nare'tanatatnoman shonte' uvach; pa'muerñapa' e'ñe ora uvachmatatue. E'ñe concha'tam'pesue allotñapa' eñan ñaña allcha' a'pecho'toñet uvas po'ñer. Allña'pa' tomatatnoman torrepo' allotcha' cohua'm'psoñet pa'muer.

'Tomatuepa' na'nman ñeñtcha' taruasatats ñeñtcha' coyerrahuet allpon ñerra'm esempoch toteñet. O'ña nare'tanatatuepa' o' ahua' po'poñ anetso ba'chayo. ³⁴ Chap allempo yen uvachllom'pa' ñaña'pa' mueñerran po'psheñe'ne'chno pa'taruasañer ñetcha' enamuer'rtseta' uvachllom' po'psheñeñ pa'taruasañeresho ñeñt cohua'm'pene' uvachma'. ³⁵ Allempoña chenit allpa' enamosan ñeñt allpon o'patena pamo'mte', arepa'tcha'ña es apapuenayeña uvachllom', elloña ñeñtapa' cha rremapoñet pa'taruasañer, cha nalle'tapueñet puesheñarr, cha muetsapet po'psheñeñ, po'psheñeñpa'cho'ña cha rrolle'tapoñet. ³⁶ Allempoña ñeñt pamo'mte' pen uvachma'pa' o' alla mueñerranerr po'psheñe'ne'chno pa'taruasañer shonte'. Allempo chapuet ñamet allpa' attecma erro'tuanen a'pare'ttapuet ñamet.

* 21:28-32 Ñeñt po'taruas penet ñetpa' toteneta' uva.

³⁷ 'Allempoña ñeñt pamo'mte' penetpa' ñaña'pa' atet ot: "Te'pa' o'ch nemñe all ñeñt e'ñe na nechemer. Ñato'rraña ñeñt'pa' mecha'na'tapetcha'." ³⁸ Ñeñt'pa'cho'ña ama't mameshapa' arepa'tcha'ña mecha'na'tapeto. Allempo entapoñet puechemer ñetñapa' atet otanna'tyeset: "Añmapa' ñeñtca'yeña puechemer ñeñtcha' o'paterraya pompor puenarem' esempo. Ñapa'cho'ña te'pa' o'chca'ye yemtsa'p allochñapa' yachca'yeña e'ñe o'paterrayaña pompor puenarem'. Te'pa' o'ch ahuey o'ch yemtsa'p ñaña." ³⁹ Allempoñapa' o' rromapet o' chetare'tnomet narmetsmot a'yenet, allña muetsapetña ñaña. Arrpa' allohua atet toma'ntata Jesús e'ñe ñañaña.

⁴⁰ Allempoña Jesús'pa' atet oterraneterr:

—Ñehua, ñerra'm esempoch huerra ñeñt pamo'mte' pen ataruasañechnopa' ¿señoteñe'tña ñetpa' atetcha' a'paretterret?

⁴¹ Judionesha'ña pa'm'cha'tareternesha'pa' atet oterreterr:

—Ñerra'm huerrachpa' ñeñtña ama matsrre'mñopa' e'ñech a'clatuerranet pamo'mte', nanaccha' coñchatuerranet; narmetsmoñapa' elloch nerranerr po'potantañ ñeñtcha' taruaserttser all uvachmo. Nerranerrcha' ñeñtcha' e'ñe po'ño'ch apuerre' pue'mer ñerra'm esempoch yen.

⁴² Allempoña Jesús'pa' atet oterraneterr:

—Sapa' ama't ahua'apa' ama'tña selleyareña ñeñt atet anuaret Yompor po'ño'ñ ahua'toteñ. Tarro'mar ñeñt'pa' atet oten nocop, na atma'ntataret mapue'. Ñeñt'pa' atet oten:

Añ mapue' ñeñt ama pocteye' entyeno ñeñt tomatyene' pocoll, ñeñtña te'pa' o' anaretterra ñeñtcha' ello atarr cohuen sherberrets e'ñe atet ñerra'm quellpach allo e'ñe cohuen echarr orratenet pocoll. Ñeñt'pa' Yomporca'yeña atet patene', ñeñto'marña yapa' e'ñe cohuen yenteñ. Arrpa' allohua atet toma'ntaterrerr Jesús e'ñe ñañaña.

⁴³ Ñeñto'marña sa ñeñtes judioneshaspa' te'ña Yomporpa' puerratanperrescha' po'cohuenña ñeñt atto ayochreshattena ña. Añcha'ña apuerr ellonet po'potantañ acheñenesha' ñeñt ama judioneshayaye ñeñtcha' po'ño'ch orrtaterre' e'ñe ña po'cohuenña atto atarr ayochreshattena ña. ⁴⁴ Allohuen erra'tsencha' atetsa añ mapyo ñeñtña mapue'pa' e'ñech a'yosatse'tuanet. Ñaña ñerra'm eseshesho shora'nom ñeñt mapyerpa' e'ñech a'peptse'tuosanet.

Attoña Jesús'pa' toma'ntatanet ñerra'm ama esesha' pocteye' entenaye Cristo ñerra'm erra'tsencha' ama aguërraye, ñeñtña acheñerpa' chocmach huapoña ñeñtcha' atarr muerochtaterahuet.

⁴⁵ Allempo atet e'myes ñeñt pa'm'cha'tareternesha' pen allohuen judionesha' po'cornaneshar ñaña fariseonesha', ñeñt atet toma'ntatenanet Jesús, ñetña allempopa' chapamet pueyo'chreto ñocpuetepa't serrpare'tenña Jesús. ⁴⁶ Ñetñapa' mueneñetañ o'ch rremuetañ tarraña ama esesha' rromaye tarro'mar ñetpa' cha mecha'teñet acheñenesha'. Ñehua, acheñenesha' e'ñeca'ye cohuen enteñet Jesús ñapa' po'ño'ch ñeñt a'mtene' Yompor po'ño'ñ.

22

Atto atma'ntatarettena puesheñarr am'cha'taret puetare'tatan shonte' rreñets ñeñtcha' rret allempoch sena'ta puechemer

¹ Jesús'pa' alla toma'ntaterraneterrpa' atet oterraneterr:

² —Yompor po'cohuenña ñeñt atto ayochreshattena ña pue'ntañeñt ñeñt'pa' o'ch netma'ntacha atet ñerra'mrrate' puesheñarr am'cha'taret. Ñeñtña am'cha'taret'pa' o' puetare'tatan shonte' rreñets ñeñtcha' nanac rret allempoch sena'ta puechemer. ³ O'ña a'potatuan rreñetspa' o' mueñan pa'taruasañrenesha' o'ch otyeñeta' ñeñt ahua'ñareñ o'ch

rrapreteneta' rreñets. O'ña otyesuarettetpa' ñetñapa' arepa'tcha' eseshaye' sechatso o'ch ahuet all. ⁴ Po'pocheñopa' o' alla mueñerranerr po'potantañ pa'taruasañrenesha'. Ama seneta'pa' atet otapanet: "Sotoscha' acheñenesha' ñeññ ahua'ñaref: 'Amicha'taretca'ye sagotatene', atetca'ye oten: Rreñetspa' o' e'ñe na'potatue. Huacshečno ñaña beserečno ñeññ ne'soya'tatyen o' e'ñe nemtsatue ñaña o'ca'ye e'ñe na'potatue. Te'pa' sona'cha'tepa'to' ahuo'ch serrapreteña.' " ⁵ Ahua'ñareñnesha'ñapa' arepa'tcha' a'cua'psenaye' eñchetoña ñeññ hua'ñenahuet. Ñeññapa' ahuanemyeset ñopa'tets. Puesheñarrpa' ahuo' pa'mro, po'psheñeñpa' ahuo' pomatsre'tatsa. ⁶ Po'potantaññapa' ñeññapa' o' rremapoñetña pa'taruasañrenesha'pa' errotuanen pet, atteñapa' o' muetsanatuet. ⁷ Amicha'tareñña' ñeññña atarr atsrre'mate'. Allempoñapa' o' mueñan ñaña po'solltar-renesha' ñeññcha' a'cllatenaya' ñeññ amtsañečno, ñeññcha' a'poyatatuenaya' ñaña pa'netser. ⁸ Alotña amicha'taretpa' atet oterranerr po'potantañ pa'taruasañrenesha': "Rreñtsočnoña po'ño'chpa' epaye'ca'ye. Tarraña ñeññña ahua'ñaretpa' ñetpa' amaca'ye cohuenaye' nentenaneto. ⁹ Te'pa' orras samia allo'tsen toñečno tarro'mar allpa' shonte' chopeñe'chyen acheñenesha'. Allohuen errponcha' sentyes o'ch sotyapanet onetepa' arr o'ch rrapretneta' rreñets ñeññ shonte' na'potaten." ¹⁰ Allempoña alla ahuanerrerr pa'taruasañrenesha', ñetñapa' añ co'ta'yeset toñ. Ñeññ allpon pocta'yeset toño'mar e'ñe sechatyesuahuet, ama't atsrre'mña'ečno ñaña ñeññ cohuen acheñ. Atteñapa' o' cha shontosa ñeññ hua'ñenet. Allña pocollo all sena'tena puechemerpa' e'ñe quechcosa ñeññ ahua'ñaref.

¹¹ 'Amicha'tareñña' allenta be'tos o'ch entapan ñeññ hua'ñatyen ñeññcha' rrallme'chosets all. Allña'pa' entan puesheñarr yacma. Ñaña'pa' ama añeye' chorreno shetamuets emarr ñeññecma chorrenet all atto coshapreteñet ñeññ sena'tetsa. ¹² Amicha'tareñña'pa' atet och: "Eso'mare'tña masheñe pebe'tenña arr amaca'ye añeye' pechorreno shetamuets emarr attoch p'ochshaprecha ñeññ sena'tetsa." Ñaña'pa' ama eñoro. ¹³ Allempoña amicha'taretpa' otan pa'taruasañrenesha': "Sehuancoñ pa'tac ñaña potpa' chosa huapore'terre' a'yo't checmeto't. Allña'pa' allcha' yahuanrrorterret, panmueño'tet atserrpa' rraso'tyerretcha' pa's." ¹⁴ Tarro'mar ama't shonteñña ñeññ ahua'ñaretpa' tarraña puesheña'ttsaña ñeññ e'ñe cohuen a'craref.

*Atto a'p'to'chet Jesús, pocte'te' o'ch tsa'tet impuesto
(Mr. 12.13-17; Lc. 20.20-26)*

¹⁵ Allempoña fariseonesha'pa' ahuanerra. Ñetñapa' cha atarr co'tape'chatanna'teneta'. Ñetpa' añ atarr e'nenet attoch e'ñe puehquëño'tetpa' ama't parrochapa' o'ch eñorachet Jesús ñeññ ama pocteyaye. Allochñapa' attotcha'ña otteñe'chet. ¹⁶ Ñetñapa' e'ñe a'nahua mueñet ñet pueyochresha' epuet ñaña puesheña'tets Herodes pueyochresha'. Ñetña chapuet Jesúseshopa' e'ñe puehquëño'tet atet otoset:

—Maestrocha' yapa' yeñotene'p' p'apa' ama peshquëno ama't mamesha ñaña ñeññ atto peychaten Yompor pocta'p'ña ñeññpa'cho'ña e'ñe cohuenacma, ama shequëñtsoyaye ama't mamesha. Ñaña p'apa' ama añ ñapue't pemorrenteno ñeññ atarr amicha'na'tpo' entyen allohuen acheñenesha'. Allohuen acheñ e'ñe cohuen pentueñ. ¹⁷ Ñeñño'marña te'pa' yapa' yemneñ o'ch peñotatapuey erra'tsente'ña e'ñe po'ño'ch cohuentetsa. ¿Pocte'te' penteñña p'a o'ch yetsa'ta impuestos añecop ñeññ amicha'tarettetsa all anetso Romo ñeññ ama judioneshayaye? Ñato' amate' pocteyayeña yocop ñeññey judioneshay o'ch yetsa'cha amicha'taref romo'marnesha' ñeññ ama judioneshayaye.

¹⁸ Jesúsña'pa' eñotapanet ñeññ atet co'tape'chyenetañ ñocop, ñaña'pa' atet otanet:

—Sapa' atarr ashcarñates, eso'mare'tña semneñña o'ch seshcare'tenen. ¹⁹ Ñehua, ama't atteseñpa' segatenca'ye puetallarr quelle ñeññ alloch setsa'ta impuestos.

Allempoñapa' gachet puetallarr quelle ñeñt otenet denario. ²⁰ Ñaña' atet oterraneterr:

—Ñehua, sapa' o'ch soten, ¿essha't sentenña ñeñt atma'ntarettetsa all? ¿Esesha't pa'so'cheñ aquellcarettetsa all?

²¹ Ñetñapa' atet ochet:

—Añcha'taretca'ye atma'ntarettetsaña all, ñaña ñoca'yeña pa'so'cheñ ñeñt aquellcarettetsa all.

Jesúsñapa' alla oterraneterr:

—Ñeñtepnapa' añ poctetsa o'ch yañ añcha'taret ñeñt ño ñeñt atet poctetsa gobier-nocop, tarraña ellonetña ñeñt Yomporo o'ch yañ ñaña ñeñt atet poctetsa ñocop.

²² Ñetña atet e'mueñet Jesús atet anapuenanetpa' atta cohuanrrorteñet tarro'mar Jesús'pa' atarrca'ye cohuen anapuenanet. Atteñapa' quechpa'huaneretpa' ahuanerret.

Atto a'pto'chet Jesús, ñerra'm po'ñochte' atanterrapo' rromot, ta'm, allempopa' er-rotencha'ña yeperra

(Mr. 12.18-27; Lc. 20.27-40)

²³ Ñeñte yetrocma hua'cha'toña ñaña patantarr ñeñt saduceoneshatets. Ñehua, ñeñt saduceoneshatets ñetñapa' ellonet echenet poctapña ñeñto'marña ñetpa' atet otenet amate' errotent yetanterroña rromot ama't errponaña. Ñetñapa' atet otoset Jesús:

²⁴ —Añ Maestrocha' ñeñtca'yeña atet otye'tña Moisés ñeñt poctetsa ñeñtcha' atet yeña. Ñerra'm esempo rroma yacma o'ch sa'nman puetapor tarraña ñerra'm ama chemere'tnomopa', añ poctetsa pa'mo'nasheñcha' alla yorerre'ña po'norrar allochñapa' attoch eñalletteraña ñeñtcha' puechemer perr pa'mo'nasheñeñ. Ñeñt'pa' atetca'ye quellca'nmonayña ahua't Moisés. ²⁵ Ñehua, te'pa' eñall cancherrsheña yamo'ts ñeñt e'ñe poctacma pa'mo'nasheñecmuet. Ñeñt puesheñarr popo'naretpa' o' yoran coy-anesha' ñeñt puetapor pa'. E'ñe allponmatatsapa' o' rroma, atta sa'nman puetapor ama chemere'tnomo. Allempoña ñeñt po'rrocho'merpa' o' yorerran pa'mo'nasheñeñ puetapor. ²⁶ E'ñe allponmatatsapa' ñapa'cho'ña o' rromuerrerr ñaña, ñeñt'pa'cho'ña ama chemere'tnomo. Allempoña po'psheñeñ pa'mo'nasheñpa' o' alla yorerran-err ñaña po'norrar. E'ñe allponmaterrtsapa' ñapa'cho'ña o' rromuerrerr ñaña, ñeñt'pa'cho'ña ama chemere'tnerrero o' atta rromuerrerr. E'ñe attecma pohuet cancherrsheño'maretpa' e'ñe pueyoruarocheña ñeñtara puesheñarr coyanesha'. Al-lohuenetpa' e'ñe attecma pet rromayestset ama't puesheñarro'tetapa' amaca'yeña chemere'tnomueto. ²⁷ Allempoñapa' cho rromatsña ñaña coyanesha'. ²⁸ Te'ña ñerra'm po'ñochte' atanterrapo' rromot'pa' añña coyanesha'ñapa' allempopa' ¿essha'tcha'ña e'ñe ñapueñ puetapor perre' tarro'mar allohuenet cancherrsheño'maretpa' e'ñeca'ye puey-oruaroche't?

²⁹ Jesúsñapa' atet otapanet:

—Chaca'ye atarr sepanteñ tarro'mar amaca'ye chennasoña seyo'chro ñeñt e'ñe po'ño'ch atet ye'chateney Yompor po'ñoñ ñeñt atet anuaret ahua'toteñ. Ñaña aña sepantatene' tarro'mar sapa' ama sepocteññañe Yompor po'hua'menc. ³⁰ Tarro'mar esempohuañen allempoch tanterret po'pocheño, allempopa' ama't puesheñarro'teta amach sena'terreto, ama't coyanesha'pa'cho' amach eseshaye' apuerraye ñeñtcha' yorerrahuet. Tarro'mar allempopa' e'ñech atet ñerra'm Yompor po'mllaño'teññaneshar ñeñt pue'ntaño'tsa'yen. ³¹ Sapa' ama'tña selleyare ñeñt atet ote't ahua't Yompor e'ñe socop attoch seño'ch po'ño'chpa' ama't ñeñt o' colla'huapa' ñetñapa' corretseta. ³² Ñehua, ñeñt'pa' atet oteney Yompor: “Napa' na ñeñten Po'yomporer pen Abraham ñaña Isaac ñaña Jacob ama't ñetpa' o' rromhuet ahua'toteñ.” Ñehua, yapa' yeñoteñ Yomporpa' ama aye' Po'yomporer penaye ñeñt rromuets e'ñe poctacma, ñapa' añca'yeña Po'yomporer

pene' acheñ ñeñt corretsetach. Attoña Yomporpa' e'ñe allame'ttsa entenanet allohuen ñetñapa' e'ñe beñtetseta.

³³ Allempoña allohuen acheñenesha' ñeñt e'muene' Jesús atto emma'huan saduceonesha', ñetñapa' atet otanna'tyeset:

—¡Erroñenoñuañaca'yeña atarr es eñoten, atto atarr cohuen yeçhatyeny!

Añmapa' ñeñt ñoñets ñeñt atarr sherbets, e'ñe metana'tuenan allohuen po'poñeçhno ñoñets
(Mr. 12.28-34)

³⁴ Ñaña allempo fariseonesha' e'mare'chet atto Jesús emma'huan saduceonesha' ñetñapa' apçhanna'tet parro. ³⁵ Allempoña puesheñarroñet ñeñt atarr etsotene' ñoñets ñeñt atet anaret ñañapa' otenana' Jesús. Ñeñtpa' tarro'marña atet a'pñto'tos ñetpa' çhoca'ye mueneñet o'ch topachet Jesús. ³⁶ Ñeñtpa' atet otos:

—Maestrocha' çerra'tsena't ñoñtsor ñeñt atet anaret ñeñt atarr sherbets ñeñt ello metana'tuene' ora allohuen po'poñeçhno ñoñets ñeñt e'ñe parro atecma anaret?

³⁷ Jesúsñapa' atet otaþ:

—Añca'yeña ñeñt ello atarr sherbets, ñeñt ñoñetspa' atet oten: “Atarrepa'ch yemorreneteña Yeyomporer ñeñt Yepartseshar yepen e'ñe ora yeyoçhrocmañen. Ñaña e'ñe yecamquẽñoñ yemorrenchach, ama't ñaña ora yocþaþñohuen.” ³⁸ Ñeñtpa' ñeñtca'ye ñoñets ñeñt po'ñoçh atarr sherbets, ñeñtpa' ellocaya'yeña metana'tuenan po'poñeçhno ñoñtsoçhno. ³⁹ Alloþpa' po'poñ ñoñets ñeñt atarr sherbets ñeñtpa' atet oten: “Atarrcha' yemorreneteña yamo'ts e'ñe atet atarr yemorreneteña yañeña.” ⁴⁰ Añ epo'mar ñoñets ñeñtña e'ñe etsotatuene' allohuen po'poñeçhno ñoñtsoçhno ñeñt atet ana'yese't, ñaña allohuen Yompor po'ñoñ ñeñt a'nñta'yese't ahuat.

Atto Cristo ñeñt Po'partseshar pe't David ahuat, elloñapa' o' alla po'mñreneñ per
(Mr. 12.35-37; Lc. 20.41-44)

⁴¹ Allempoña fariseonesha'pa' ñetñapa' allo'tsenareta all apçhenet e'ñe ñoçhayet, ⁴² Jesúsña allpa' atet otanet:

—Sapa' çerroñena't sotenña sa añecop ñeñtcha' Cristotosets? çEsesha't soten ñeñtcha' po'mñreneñ perre'ña ñeñtcha' Cristotosets?

Ñetñapa' atet ochet:

—Davidcha'ca'ye po'mñrenñoñ huapaña ñeñtcha' Cristotosets. ⁴³ Ñaña' alla oterraneterr:

—Ñerra'm po'ñoçhcha' David po'mñreneñ perre'pa' sapa' ama't señoñeña Davidpa' allempo eñorache't Parets Puecamquẽñ ñapa' atetca'ye ote't po'mñrenñecop ñeñtara ñeñtcha' Cristoterrets: “Napa' ñeñtca'yeña Nepartseshar nepen.” David allempopa' atetca'ye eñose'tña añecop ñeñtcha' Cristoterrets:

⁴⁴ Yompor Paretpa' atet otennan ñeñt e'ñe Nepartseshar nepen na (ñeñtara ñeñtcha' Cristoterrets): “Te'pa' o'ch þanorruerr arr necohuenrot allcha' pecohuentapreterrna. Attochña ama't ñeñt pe'moñe'tene' napa' o'ch e'ñe name'ñatuerranet allochña'pa' o'ch atet perret ñeñt pemnen þa.”

⁴⁵ Ñeñtpa' atetca'ye ote'tña David, ñeñtcha' Cristoterretspa' ñeñtca'yeña Po'partseshar pe'tña ama't allempoteñ. Ñehua, ama't señoñeña Cristo ñeñt Po'partseshar pe't Davidpa' ñeñtña te'pa' o' alla po'mñreneñ per ñaña.

⁴⁶ Ñetñapa' ama't puesheñarroñetapa' ama eseshaye' anapuenaye' entaye. Ñeñto'marña allempoteñpa' ama't puesheñarroñetapa' ama eseshaye' a'pñto'tenaye' enterraye.

23

*Atto Jesúsapa' a'metare'tenan fariseonesha' ñeñt atet ye'chenet ñetpa' ñeñtapa' ama cohue-
naye' entapretenaneto Yompor*

(Mr. 12.38-40; Lc. 11.37-54; 20.45-47)

¹ Allempoña Jesúsapa' alla serrpare'taterran allohuen acheñenesha' ñaña e'ñe ña puey-
ochreshachno. Ñeñtapa' atet otanet:

² —Añña fariseonesha' epuet ñaña ñeñt atarr etsotayene' ñoñets ñeñt atet anaret,
ñetpa' añecpa anarettenet ñetcha' señotatene' ñoñets ñeñt atet nonaset Moisés ahuat.

³ Ñeñto'marña socoppa' e'ñe pocte' o'ch sephojuena ñeñt atet otanet, amachña chaña
satpare'teñe. Tarraña sapa' amachña atet sepatsto ñeñt atet patse'tyenet ñet. Tarro'mar
ama't atarr cohuen serrpare'tenetaña' amaca'yeña e'ñeye' atet peneto ñeñt atet ser-
rpare'tatenset.

⁴ Ñetpa' chaca'ye atarr atontatennasetña ñoñets ñeñtcha' e'ñe atet
sephojueneñ ñetpa' ñeñtaca'yeña nennaset ñeñt atarr torrapo' sentyen. Ñeñtapa' atetcha'
netma'ntacha ñetpa' chaca'ye ottenet ñerra'mrrate' añ huanquennaset ñeñt atarr eñerr
se'muen attoch sechechnom.

Tarraña ñet ama't mameshapa' amaña anmapretenseto,
ama't potapotetapa' ama echantapretenseto ñeñt chechatnenset.

⁵ Fariseonesha' allohuen ñeñt atet etsotayeneña' ñeñtapa' e'ñe pommo'cheñofteta atet penet allochñapa'
acheñenesha'ñapa' e'ñech cohuen entyeñet ñeñt atto atarr torra'yenetañ Yomporecop.

Tarraña ñeñtapa' e'ñeca'ye orrena. Ñaña ñetpa' chaca'ye ateshatomuerrtatenet poreñ
allñapa' all quellquëññañetañ Yompor po'ñoñ ama't ñeñtapa'cho'ña alloca'yeña huan-
cato'tenet.

Tarraña ñeñtapa' e'ñe añecpa atet penet attoch acheñenesha'pa' e'ñech cohuen
entenanet.

Tarraña ñeñtapa' e'ñe orrena atet penet ñeñt atto ommo'chenet. Ñaña
ñetpa' añe'naca'yeña allpocha'ptatenet ñeñt chera'rrtenet pa'shtamueto pa'rrpe'monet.

Tarraña ñeñtapa'cho'ña e'ñe añecpa atet penet e'ñe pommo'cheñoftet.

⁶ Ñaña ñetpa' ñerra'm cho rrallme'chapretenetpa' añaca'ye atarr muenenet o'ch anorrcha'tyenet al-
lecma anorryen ñeñt atarr añcha'na'tpo' entyen allohuen acheñenesha'.

Ñaña ñetpa' e'ñe attecma penet ama't all judionesha' po'prahuo.

⁷ Ñaña ñetpa' e'ñe pommo'cheñoftet añe'naña atarr muenenet acheñenesha'pa' o'ch huomcha'tyesapanet pue'mcha'nañoftet
ñerra'm esempo chopeñe'chyenet toño'mar allecma shontena acheñenesha'.

Ñaña pommo'cheñoftetpa' añe'naña atarr muenenet o'ch otanet acheñenesha' ñetpa' e'ño' part-
sesharerochet.

⁸ Tarraña saye'ña neyochreshacha' ñato'tña semnena'ña o'ch otas acheñenesha' sapa'
e'ño' partseshareroches. Ñaña sa allohuenespa' e'ñechña semo'nasheñecma sepannena,
tarro'mar sa allohuenacpaspapa' naptaca'yeña Separtseshar sepenen na ñeñten Cristoto-
sets.

⁹ Ñaña arr patsro ama't puesheñarra amach seyomporer sepatstaneto. Tarro'mar
sapa' e'ñeca'ye patraña Sompore ñeñt pue'ntaño'tsen.

¹⁰ Ñaña sapa' amach semnatsche ama't puesheñarra e'ñe puechore'teñoftetaspapa' o'ch otaset: Na'yochreñerneshacha'.
Tarro'mar sa allohuenacpaspapa' naptaca'yeña Sa'yochreshater sepenen na ñeñten
Cristotosets.

¹¹ Tarro'mar ñeñt po'ñoñ cohuen añcha'tarettetsa sesho ñeñtapa'
ñeñtaca'yeña atarr torretsaña po'potantañecop attoch orrtatanet ñeñt atarr sherbets
ñoopuet.

¹² Tarro'mar allohuen ñeñt e'ñe cohuen entetsa e'ñe pommo'cheñoft ñeñtña
tsapatonetpa' amach esoshe'maye' entereto. Tarraña allohuen ñeñt ama esoshe'maye'
entetso te' ñeñtña tsapatonetpa' atarrcha' cohuen enteret.

¹³ 'Atarr nanac llequëntso'tsenes fariseoneshacha' ñaña samña ñeñtes e'ñe etso-
tayanayeñ ñoñets ñeñt atet anaret judioneshacop tarro'mar sapa' sommo'cheñoftena
atarr seshcare'tyen. Tarro'mar ama't sapa' amaca'ye senteññañeña Yompor
po'cohuenña, ellonetpa'cho'ña chocma sepatate'neña po'potantañ ñeñt e'nene' Yompor

po'cohuenña. Cha sa'npampeñña acheñenesha' attoch ñetpa'cho'ña amach enterrñañeto Yompor po'cohuenña ñeñ atto atarr ayochreshattena ña pue'ntañot.

14 'Atarr nanac llequëntso'tsenes fariseoneshacha' ñaña samña ñeñtes e'ñe etsotayenayeñ ñoñets ñeñ atet anaret judioneshacop, tarro'mar sapa' sommo'cheño'te'na seshcare'tyeñ. Ama't rretorrnanasha'pa' ñeñte'naña seprratam pesyenña pa'paquëll. Elloña e'ñe sommo'cheño'tpa' aña atarr semnen o'ch atet sepena ñerra'm atarr cohuen acheñres ñeñto'marña all sema'yochena allecma shontena acheñenesha'pa' amach tematenayaya sema'yocheno. Ñeñto'marña na te'pa' o'ch notas, sapa' elloña atarrcha' sa'coñchataretterra.

15 'Atarr nanac llequëntso'tsenes fariseoneshacha' ñaña samña ñeñtes e'ñe etsotayenayeñ ñoñets ñeñ atet anaret tarro'mar sapa' sommo'cheño'te'na atarr seshcare'tyen. Sapa' chocma sechopeñe'chyen erracmañen patso'mar, sepchatyena ama't ñaña sapo'mar. Ñeñtpa' añecpa atet sepena attoch same'ñatyeyaya ama't e'ñe puesheña'ttsa e'ñe sa soctañña ñeñtes judioneshas. Ñeñ allpon same'ñatyenapa' ñetñapa' aña seychatyenamet ñeñ ama cohuenayaye ñeñ e'ñe atet sepena samña. Ñeñto'mar ñetpa'cho'ña ello atarr nanac o'patatarettenet coñcheñets, e'ñe epoche'ttsocma so'patatenamet coñcheñets.

16 'Atarr nanac llequëntso'tsenes tarro'mar ama't ñeñ ama sechenoyo seyo'chro sañapa' ñeñtara seychateñña po'potantañe'chno. Ñeñtpa' e'ñe atet sepena ñerra'mrrate' aporo'yete'cmas echa'nmannetsa. Ama't seychateneñ ñeñ po'ño'chpa' amaca'ye atteyaye. Ñeñtpa' atet soteneñ: "Ñerra'm esesha' nene' po'ñoñ ñerra'm aña Parets pa'paquëll pa'so'chño nenan po'ñoñ saña ñeñtpa' cha soten año' esoyaye ama pallteno o'ch e'ñe po'ño'ch a'pocatan po'ñoñ." Tarraña po'poñpa' atet soteneñ: "Ñerra'mña añ oro pa'so'chño yena' yeñoñ ñeñ Parets pa'paclo'tsen allempoña po'ño'chpa' chocmach e'ñe ya'pocatat yeñoñ." 17 Sapa' atarr otatsña'etes, ama añeye'ña sechenoyoña seyo'chro ñeñ cohuen enten Yompor. Chaca'ye sottena ñerra'mrrate' aporo'yete'cmas. Ama't seño'teñeña atet sherben oropa' e'ñeca'ye attecma sherbenña ñaña Parets pa'paquëll. Tarro'mar allempo nete't oro Parets pa'paclo, ñeñtña oropa' añca'ye e'ñe cohuen a'pocatataye't Partsocop ñeñtara Partsopo'. 18 Ñaña po'poñpa' atet soteneñ: "Ñerra'm esesha' nene' po'ñoñ e'ñe altar pa'so'chño allecma neñet ñeñ amtsarettetsa Yomporecop, ñeñtpa'cho'ña cha soten año' esoyaye, ama pallteno o'ch e'ñe po'ño'ch a'pocatan po'ñoñ." Tarraña po'poñpa' atet soteneñ: "Ñerra'mña añ pa'so'chño yena' yeñoñ ñeñ amtsarettetsa Yomporecop ñeñ nenet altarro enot, allempoña po'ño'chpa' chocmach e'ñe ya'pocatat yeñoñ." Tarraña ama't atet sotatse'tyeneñpa' ñeñtpa' amaca'ye po'ño'choyaye. 19 Sapa' ama añeye' sechenoyoña seyo'chro ñeñ cohuen enten Yompor. Cha sottena ñerra'mrrate' aporo'yete'cmas. Ama't seño'teñeña altarpa'cho'ña atarrca'ye sherben. E'ñe attecma sherben ñerra'mrrate' ñeñ amtsarettetsa Yomporecop ñeñ nenet all altarro enot. Tarro'mar altarpa' ñeñtca'yeña a'pocatatene'ña Yomporecop ñeñ nenet all. 20 Ñeñto'marña yeño'teñ ñerra'm esempo yenen yeñoñ altar pa'so'chño, ama e'ñe ñapña altar pa'so'chño yenenña yeñoñ; añohuenca'yeña yenenña yeñoñ e'ñe pa'so'chño allohuen ñeñ na'yenet all, allecma sherba'yenet Yompor. 21 Ñaña ñerra'm esempo yenen yeñoñ Partsopo' pa'so'chño, ama e'ñe ñapña Partsopo' pa'so'chño yenenña yeñoñ. Yompore'naca'yeña pa'so'chño yenenña yeñoñ tarro'mar ñapa' e'ñeca'ye ño pa'paquëll. 22 Ñaña ñerra'm yenen yeñoñ Yompor pue'ntañ pa'so'chño, Yompore'naca'ye pa'so'chño yenenña yeñoñ ama't ñaña Yompor po'conañe'naca'ye pa'so'chño yenenña yeñoñ tarro'mar enetpa' Yomporca'ye po'conañ pene' tarro'mar allpa' allo'tsenca'yeña Yompor.

23 'Atarr nanac llequëntso'tsenes fariseoneshacha' ñaña sa ñeñtes e'ñe etsotayenayeñ ñoñets ñeñt atet anaret judioneshacop tarro'mar sapa' sommo'cheño'te'na atarr se-shcare'tyen. Ora allohuen ñeñt senarem sepen ama't chocma sapueñeñ Yompor allpon ñeñt poctetsa ñocop —mentapan, anísopan, cominopan—sapa' cha sepsenña ñeñt ñoñtsor ñeñt atet anaret ñeñtca'yeña ello nanac sherbets. Ñeñtpa' attoch e'ñe cohuen es sepa'yeññañ po'potantañ. Ñeñña sapa' chaña sepseñ. Ñaña attoch se-mueranna'ta ñeñtpa'cho'ña sañapa' chaca'yeña sepseñ. Ñaña attoch po'ño'ch e'ñe cohuen same'ñañatena Yomporecop ñeñtpa'cho'ña sañapa' chaca'yeña sepseñ. Sapa' e'ñe ñeññaña sepalltena. Ñaña atto chocma es sapa'yen Yomporecop ñeñtpa'cho'ña chocmach atet sepena amach cha sepsatstere. 24 Sapa' ama't ama choye' chennaso seyo'chro ñeñña atarr semneñ o'ch sey'chach po'potantañ acheñenesha'. Ñeñtpa' e'ñe atet sepena ñerra'mrrate' aporo'yecmas echa'nmannetsa. Añ ñoñets ñeñt atet anaret socop ñeñt setseten e'ñe so'na soc'paña ama't ñeñtpa' atarr coñe'tot sherben Yomporecop, sañapa' ñeñtaca'ye atarr semneñ o'ch sey'chateñ po'potantañ. Tarraña añ ñoñtsor ñeñt atarr nanac sherbets Yomporecop, saña ñeñtpa' ama chennasoña seyo'chro ama't e'ñe mamesha. Ñeñtpa' o'ch netma'ntacha atet ñerra'mrrate' ñeñt atarr es añetoll allpon ñerra'm chopo'yetoll saña ñeñtpa' chaca'yeña seyorasoteñ tarraña ñeñña atarr añecmuen allpon ñerra'm huaquësh* sapa' ñeññaña sañyen e'ñe atta.

25 'Atarr nanac llequëntso'tsenes fariseoneshacha' ñaña sa ñeñtes e'ñe etsotayenayeñ ñoñets ñeñt atet anaret judioneshacop. Sapa' e'ñe se'pame'teneñña setaza eno'tpa' o'pono'tña'pa' ama se'parro'teñe. Seplatopa'cho'ña eno'ta e'ñe se'pata'teñ o'pono'tña'pa' ama se'pata'teñe. E'ñe atet sepena saña. E'ñe sa'cohuentatena ñeñt eno'mar ñeñt atet sey'chena sa allochñapa' attoch entenes allohuen acheñenesha' sapa' e'ño' cohuenes, tarraña o'pono seyo'chropa' amaca'yeña sa'cohuentateñe, allñapa' e'ñe chorren shonte' sosya'tsañe'chno ñeñt atto e'ñe seshquëñote'na chocma es seprratam'pesyen, atarr es seye'chapretannena, ñeñtña'pa' e'ñeca'ye socpa. 26 Ñeñtes fariseoneshas, sapa' ama añeye' sechenoyoña seyo'chro ñeñt cohuen enten Yompor. Chaca'ye sottena ñerra'mrrate' e'ñe aporo'yecmas. Socoppa' añca'yeña poctetsa, ñanomcha'ña o'pono't se'pame'tña setaza, seplatopa'cho'ña ñanomcha'ña o'pono't se'patach. Allochñapa' o'ch e'ñe cohuenta emoshen'to'mar.

27 'Atarr nanac llequëntso'tsenes fariseoneshacha' ñaña sa ñeñtes e'ñe etsotayenayeñ ñoñets ñeñt atet anaret judioneshacop. Sapa' e'ñe attes ñerra'm apampaña ñeñt a'huallama'ttam'penet. Eno'tpa' e'ñech cohuen orrtenañ. O'pono'tña'pa' e'ñech chorren arromña'tap ñaña pa'namen ñeñt nanac sosey. 28 Sapa'cho'ña e'ñerramche' attesña saña. Po'ño'chca'ye ñeñt atet sorrtatyen acheñenesha'ñapa' e'ñe atet entenset ñerra'mrrate' sapa' e'ñe cohuenare' es sepa'yen. Tarraña o'ponoña seyo'chropa' e'ñe añña shontetsa alloch sommo'chyena, atarr se-shcare'tanna'tyena, pa'namen sorrtatyen ñeñt ama't mamesha ama cohuenaye' entapretenso Yompor.

29 'Atarr nanac llequëntso'tsenes fariseoneshacha' ñaña sa ñeñtes e'ñe etsotayenayeñ ñoñets ñeñt atet anaret judioneshacop tarro'mar sa te'pa' satomaten eno't ñeñt atarr cohuen senten sa all pampa'yesete't ñeñt a'm'ta'yesaye't Yompor po'ñoñ. Ñaña añe'na sa'cohuentam'pesyen all pampa'yesete't ñeñt acheñeneshar ñeñt e'ñe pocte' es pa'yesete't. 30 Saña te'pa' atet sotyeneñ: "Ñerra'm allempocmach ye'ñalletañ allempo corre't yatañneshañ, atto ñetpa' muetsanachete't ñeñt a'm'ta'yesaye't Yompor po'ñoñ, yañapa' amate' eso'mar yemtsapretaneto." 31 Ñeñt atet sotyeneña'pa' te'ña e'ñe sa señoñotpa' o' sa'metam'psa e'ñe sañeña po'ño'ch sapa' po'm'reñnesca'ye ñeñt

* 23:24 Ñehua, Jesús añ toma'ntatanet camello ñeñt payara penet all pa'nyo, ñeñt e'ñe allpon ñerra'mrrate' huaquësh.

muetsanataye't ahuat ñeñt a'mta'yesaye't Yompor po'ñoñ. ³² Ñeñto'marña sa te'pa' ñeñfaca'yeña e'ñe setsoteññañ satañneshañ ñeñt allpon sosya'tsañechno ñeñt e'ñe mo'tetnomnas ahuatoteñ e'ñe sa satañneshañ.

³³ 'Sapa' ama cohuenayayso atarr ashcarñañes, čha sottena ñerra'mrrate' shechp̄a sompor sepen. Sapa' erro'tenohuachñaca'yeña sequeshperrate'. Sapa' añaca'ye so'patenaya coñcheñets ñeñt parrare' tso' all o'pono. ³⁴ Ñeñto'marña te' napa' o'ch nemñerrnas ñeñtcha' a'mta'yerre' neñoñ, ñaña ñeñt atarr eñotañ ne'pa'yen, ñaña ñeñt atarr etsotayene' neñoñ ñeñt atet anaret ahuatoteñ. Tarraña saña ñeñt'pa' čhachca'yeña semtsanatuerrnan ñeñt patanta'tets, po'potantañña' e'ñech secorso'tam̄pesuerrnan. Po'potantañña sapa' čhach senalle'tyesuerrnan e'ñe all sa seprahuo'mar. Atarr se'moñe'tenanet ñeñto'marña čhocma soctare'tenanet anetso't o'ch sa'yetatuanet ñetñapa' o'ch ahuanemyeset po'poñ anetso'mar. ³⁵ Atto'ca'yeña ora allohuen ñeñt e'ñe pocte' es p̄a'yestse't ñeñt amtsanatyese'rettatse't ashatare'tetyesete't po'rras, sañapa' allempoteñ e'ñe sa'yohuare'ttena ama't teme'ttsen, sa ñeñtes corretsa te', ama't allempoteñ amtsare'tta Abel ñeñt ama es yečcatetso ama't coñe'ta tarremphua allempo semtser ñaña Zacarías ñeñt Berequías puechemer. Ñeñtña sapa' alla semtser Parets po'ponro puecha'petaro't allo'tsen altar allotecma sherbete't Yompor. Ama't allohuen ñeñt amtsanatyese'rettatse't allempo sañapa' e'ñe allempoteñ sa'yohuare'tterra. ³⁶ Po'ñočca'ye notenes, acheñenesha' ñeñt corretsa te' ñetñapa' atsa'tatare'tterretcha' e'ñe ora allpon atserrp̄atse'tyesonete't ñeñt e'ñe pocte' es p̄a'yestse't Yomporecop.

Atto Jesús'pa' puellquëñoñan jerusaléño'marnesha' atarr ya'na'tosanet
(Lc. 13.34-35)

³⁷ 'Te'pa' e'ñe nellquëñoñ o'ch notas sa ñeñtes jerusaléño'marneshas, ñeñtes muetsanatyese'ye't ñeñt a'mta'yesaye't Yompor po'ñoñ, sa ñeñtes rrollapechyesaye't ñeñt amñare'ttatse't sesho, te'ña napa' o'ch notas: Napa' atarr atonoche'tats nemneñeñ o'ch na'yapačha'huerrsoñ allohuenes nesho attoch e'ñe cohuen necuam̄pensoñ. Nemneñeñ o'ch na'yapačha'huerres atet ñerra'mrrate' atollop a'yapačhene' puechoyoresha' o'ch e'ñe seto'tuanet. Tarraña sañapa' ama't e'ñe mameshapa' amaña semno. ³⁸ Te'ñapa' all seyčhena sa, Yomporñapa' o'ch a'ypo'ñerres. ³⁹ Tarro'mar te'pa' o'ch alla noterrser: Na po'pocheñopa' amach alla senterrne'te. Esemphuañeñña' senterrencha', allempoñapa' atetcha' soterren: "Aye'chočtatpahuepa'ch Jesucristo ñeñt huapatsa ñeñt llesensen Yeyomporer."

24

Atto Jesús'pa' eñotatanet e'ñech a'mata'tare'tetuerra Partsopo' all Jerusaléño
(Mr. 13.1-2; Lc. 21.5-6)

¹ Jesús'ña'pa' čha'nerrerr Parets pa'paclo't. Alla ahuenerr allempoñapa' pomenya pueyochresha'. Ñetñapa' allenta cohuatyese't ñeñt atarr cočhnesha'tyetsa allo orratare'ttena Partsopo'. ² Allempo Jesús'pa' atet otanet:

—Ama't senteñeñ ora allohuen ñeñt cočhnesha're' tarraña napa' o'ch notas: Po'ñočca'ye čherrcha' allempoch e'ñe a'mata'tare'tetuerra. Ama't e'ñe pueñarra mapyetpa' amach a'puerroña all allo orratenet Partsopo' e'ñechca'ye poctacma a'coye'tare'tetuerra.

Atto Jesús'pa' eñotatanet shonte'ch entyerret pa'namen ñeñtcha' eñotaterrahuet o' cherrmoch allempoch mellapoterra
(Mr. 13.3-23; Lc. 21.7-24; 17.22-24)

³ Ñeñta otuanenanetpa' allenta ahuen Olivo'pno. Allña'pa' anorruen, pueyochresha'ña'pa' o' alla huacherrñañeterr, e'ñe ñaptochayet. Ñetñapa' atet otuereterr:

—Yapa' yemneñca'ye o'ch p̄otey ¿esempo'tcha'ña atet perra? Ñaña ¿eso'tcha' yenty-errña ñeñtcha' yeñotaterre' allempoch pehuerrmocha o'ch mellapoterra?

⁴ Jesúsñapa' atet otanet:

—E'ñech seño terra, allochñapa' amach esesha' seshquërraye. ⁵ Tarro'mar shonte'ch orrtertsa ñeñtcha' ay'cha'nataterre' neso'cheñ, ñeñtcha' otyerrets: “Napa' ñeñfenca'yeña Cristotets.” Ñetñapa' shonte'ch shequëret acheñenesha'. ⁶ Ñaña allempoña sapa' se'mare'tyerrcha' o' quellareñtsotyerr allampaño'mar, ñaña se'mare'tyerrcha' o' quellareñtsotyerra ora errañaren anetso'mar. Saña allempopa' amach cha seyorenatsto ama't e'ñe mamesha. Ñeñtpa' atetcha'ca'ye e'ñe po'ño'ch perra. Tarraña allempopa' amach chena' allempoch e'ñe mellapoterra. ⁷ Pa'namen acheñ ñeñt e'ñe po'poñe'ttso'cma mereñtsoretpa' ñetpa' quellaranna'terretcha'. Ñaña pa'namen anetso'f añcha'tarete'chnopa' quellaraterrancha' pueyochrenesha'chno. Orrterrach allemeñ muecheñets o'ch e'ñe chaporrñatsotyerr errañaren. Ñaña orrterrach pa'namen at-snañtso'chno ñeñt atarr apatanna'tpo'. Pella'yerrach pats ora errañaren. ⁸ Ñeñt atet o' notuas te'pa' ñeñtña allempopa' ñeñtcha'ña ñanom muero'chtaterrahuetña allempo.

⁹ 'Allempoña sapa' pomuerrsetcha' attoch erro'tuanen perrset allcha'ña muetsatyerrset. Atarrcha' e'moñe'terres allohuen acheñenesha'chno tarro'mar sapa' naca'yeña e'ñe same'ñena. ¹⁰ Ñaña shonte'ch acheñ allempo ñeñtcha' que'chpuerre' Yompor. E'ñe ñagattsetapa' e'moñe'tanna'terretcha' atto'cha' pomatatanna'tyerret. ¹¹ Ñaña allempopa' orretyerrach shonte' ñeñtcha' ay'cha'naterrtsa ñetpa' año' a'mñtenet Yompor po'ñoñ. Tarraña po'ño'ch amach Yomporeye' po'ñoñ a'mñterreto, ñetpa' attachña shequëretña shonte' acheñenesha'. ¹² Allempopa' atonterrach errañaren pa'namen sosya'tsañe'chno allochña atarr atpare'terrñañet Yompor po'ñoñ. Ñeñto'marña shonte' acheñpa' o'huañcha' allo'na morrentanna'tnenet. ¹³ Tarraña ama'tcha' erro'tuanen a'pare'tterret, esesha'ch e'ñe ahuañta'huanmue' ñeñtcha' ama neque'chpuerraye, ñeñtñapa' ñeñtcha'ña a'queshpatare'tterrtsa. ¹⁴ Ñaña allempopa' añ cohuen ñoñets atto ayochreshattena Yompor ñeñtcha'ña ñanom serrpare'tatyeretña acheñenesha' ora errañaren allohuanen añe patsro. Attochña eñotateretña ora allohuen pa'namen acheñenesha' ñeñt po'ño'ch atet oteney Yompor. Allempochña po'ño'ch mellapoterra.

¹⁵ 'Ñehua, ahua't Daniel ñeñt a'mñtaye't Yompor po'ñoñ, ña po'quellcopa' atet ote't: “Cherrcha' allempo ama't ñeñt ama masosyaye' enteno Yomporpa' ñeñtñapa' cherrcha' all ama't ñeñt e'ñe Partsocpa anareteñ. Ñeñtpa' ñeñtachca'yeña e'ñe a'chencatuerrahuet.” Ñehua, ñeñtcha' lleyerre' añ ñoñetspa' ñetñapa' eñoteretepa'ch. Ñeñto'marña ñerra'm esempoch senter o' chap all ñeñt e'ñe Partsocpa anaretpa' ¹⁶ allempoña ñeñt allpon Judeo'tsa'yen ñetñapa' allorocmuepa'ch yetrra'terret, ahuan-erretepa'ña aspentareronet. ¹⁷ Atet ñerra'mrrate' pue'sheña'tets ñato' ñetña allempopa' eno'tsa'yenetcha' pa'pacllato, ñetñapa' sohuete'pa'chña tecma tarraña amachña be'tosatsetnomuetoña po'ponreto attoch yoratsre'tnomuet. ¹⁸ Ñaña pue'sheña'tets ñeñt pa'mro'tsenpa' allempoña ñetpa' amachña onatsterreto attoch erreta' pa'shtamuet. ¹⁹ Allempopa' atarrcha' llequëñets añecop ñeñt a'chomenare' coyanesha' ñaña ñeñt allohuen emare'tetollesha'chno. (Tarro'mar ñocpuetpa' atarr torrapo' attoch yetrra'tet ñamet.) ²⁰ Ñaña Yomporcha'ña sema'yocha allochñapa' amach cha huapoto allempoch seyetañpesya ñaña amachca'ye añe yetro seyetatsto allempocma samesen. ²¹ Allempopa' orrterrach muero'chteñets ñeñtcha' atarr muero'chtaterre' allohuen acheñenesha'. Ñeñt ama't ahua'tapa' ama pue'muero'chtareto atet atarr nanac huomenc. Ama't allempoteñ e'ñe errte' aye'chcatare'tta añ patser ama pue'muero'chtareto atet. Allempoña ellopa' amach atet alla muero'chterrete'te ama't errponaña. ²² Allempoch

atarr amuerochtataretterret. Tarraña allempoña Yomporpa' ñach oterrets te'pa' allohuach. Ñerra'm amach oto allohuachpa' allempoña ama't puesheñarrapa' amach esesha' queshperrtso. Tarraña ñeñña ame'ñenaya ña ñeññ acrenpa' ñocpuetña'p' oterrrcha' te'pa' allohuach.

²³ 'Ñehua, allempoch orameñ muerochteñetspa' ñerra'm esesha' sote': "Arro'tsenca'yeña Cristo", amapa' o'ch otaset: "Tarro'tsenca'ye Cristo", sañapa' amach same'ñatstaneto. ²⁴ Orretyerrachca'ye ñeñña' otyerrets ñapa' ño'ña Cristotets. Tarraña ñeñña'pa' attachca'ye shecare'tyerranña acheñenesha'. Orretyerrach ñaña ñeñña' otyerrets ñapa' ño'ña a'mtene'ña Yompor po'ñoñ, tarraña ñeñña'cho'ña e'ñech attecma shecare'tyerran acheñenesha', amachña Yomporeye'ña po'ñoñ a'mteno. Ñeñña' atet shecare'tyerrets, ñetña'pa' orrtatyerrretcha' ñeññ ama't ahuata acheñenesha'pa' ama puentare, attochña cohuanrrortateretña acheñenesha'. Ama't ñeññ Yompor pa'carnesharpa' mueneñetañcha' ñeññe'nachña shequërret. ²⁵ Señoche'pa'ch ama't ama chena' muerochteñetsopopa' napa' o' e'ñe notuas sa. ²⁶ Ñeñño'mar te'pa' notenes: Ñerra'm allempoch atet oterrsset: "Tarro'tsenca'yeña Cristo a'yo all amayo", sañapa' ñato'tña sesena'ña all o'ch senteña'. Amapa' ñerra'm atetcha' oterrsseterr: "Tarro'tsenca'ye Cristo o'pono pocollo", sañapa' ñato'tña sesena'ña all o'ch senteña'. ²⁷ Tarro'mar ñerra'm esempo cherr allempoch nohuerra na Ñeññen Acheñetosets e'ñe allohuen acheñenesha'pa' entapuerrnetcha' tarro'mar allempopa' atetcha' neñater ñerra'mrrate' meratste', o'ch meratsta huomencpa' e'ñech a'puetaresuan ora enet errañaren, ama't allot huena atsne' ama't e'ñe allohuanen emuena. ²⁸ Ñeñña'pa' e'ñechca'ye atet perraña ñeññ atet senten te' ñerra'm erro'tsen ñeññ rromuepa' allcha'ca'yeña shonterraña tse'm.

Atetcha' perra allempoch huerra Cristo Ñeññ Acheñetosets
(Mr. 13.24-37; Lc. 21.25-33; 17.26-30, 34-36)

²⁹ 'O'chña huañerr ñeññ muerochteñetspa' allempoñapa' e'ñech allorocma mayerr atsne'. Arrorrrpa'cho'ña o'huañcha' atsnom. Rantochnopa'cho'ña shorcha'terrcha' entoñ. Ñaña ñeññ huomenc orra'yetsa ento te' allempoña ama't ñeñña' pella'yerrach. ³⁰ Allempoñapa' orrtarrach ento ñeñña' señoataterre' naca'yeña o' nohuerra Ñeññen e'ñe Acheñetosets. Allempochña nanac llecanrrorterra allohuen pa'namen acheñenesha'chno ñeññ añe patsro'tsen. Entapuerrnetcha' na Ñeññen Acheñetosets o'ch nesuamñperra osoñ e'ñe entoñ. E'ñe nepartsoteñohuen e'ñech necohuenteñesha' nohuerra. ³¹ Nemñercha' nemñña'ñoñeññaneshar ñetcha'ña poctora'nerrtset atarr huomenc. Ñetcha'ña a'yapa'cha'huerret allenñateñ ñeññ acren Nompor nocop e'ñech pa'tatsshemto'marohuen allotecma orrnotena. E'ñech allenñateñ a'yapa'cha'huerretcha' e'ñe allohuanen añ patsroñ.

³² 'Ñaña te'pa' señoche'pa'ch ñeññ atet pena higoch. Ñehua, esempo'ch senteñ higoch o'ch emñachyen puetacretollesha' allotcha' o'ch alla tapna'tyerrerr pasopaner, sañapa' ñeñña'ña señoatatené' o' chenmoch allempoch huorateterrerr. ³³ Attecma'ch perra ñerra'm esempo'ch sentyerr ñaña ñeññ allpono' notuas, sapa' ñeñña'ña señoataterre' po'ñoñ o'ca'ye cherrmoch allempoch e'ñe etsotuerrea, o'ca'ye e'ñe allame'tsamerra. ³⁴ Napa' po'ñoñ o'ch notas, acheñenesha' ñeññ e'ñe corretsa te' ñetña amach e'ñe rromhueneta'pa' allempocmach e'ñech etsoterra allohuen añechno. ³⁵ Esemphuañen añ enet ñeññ senten te'pa' e'ñech chenca'huerra; patspa'cho'ña attecma'ch perra e'ñech chenca'huerra. Tarraña ñaña ñeñña'pa' amach chenquërro ama't e'ñe ahuata.

³⁶ 'Tarraña ñeññ yetroch nohuerrapa' ñeñña'pa' ama eseshaye' eñotenaye. Ama't erro'tsente' atsne' ama't erro'tsen tsapro ñeñña'pa' ama't mellañoñeñnesha' ñeññ pue'ntañ'o'tsa'yen ñetpa'cho'ña ama't puesheñarroñetapa' amaña eseshaye'ña eñotenaye

allemPOCH nohuerrerr po'pocheño. Ama't na ñeñten Yompor Puechemeren napa'cho'ña te'pa' ama neñoteñe, ñapña Nomporets eñotene'.

³⁷ 'Tarraña allemPOCH nohuerra po'pocheño na Ñeñten Acheñetosets, allemPOpa' e'ñech atet perret e'ñe atet petet' ahuañ allemPO corre't Noé. ³⁸ Ñehua, allemPOpa' ama es puecha'yeneto aña e'ñe cotape'chete't atto atarr pa'namen muenenet ñeñtcha' rra'yenet, orrare'tyesete't, sena'tanatyena yacmaneshachno, coyanesachnopa'cho'ña apanatyese'te't ñeñt yoranatyesehuetet'. Ñetña'pa' ñeñta e'ñe cohuen entete't. Atteñapa' chap allemPO be'tosos Noé po'huarcopahuo. ³⁹ Ama es puecha'yese'te'te machayotepa'tcha' cho'ña oñ erracmañen, attoña aña yanatuerranet oñ allohuenet. Attecmach perra ñerra'm esempoch nohuerra na Ñeñten Acheñetosets. Machayotachca'ye nohuerra. ⁴⁰ Ñaña allemPOpa' atetcha'ca'ye perra; puesheña'tetspa' anmare'tterrach; ama't ñeñt e'ñe pamo'ts pannenetañ ñeñtña'pa' allach asa'nmare'tterra. Ñato' allemPOpa' allo'tsencha' epsheña yacma pa'mro, puesheñarrña'pa' anmare'tterrach po'psheñeñña'pa' allach asa'nmare'tterra. ⁴¹ Amapa' ñato' allemPO allo'tsencha' epsheña coyanesha' ñeñt parro puetse'tets mapyo, ñeñt'pa'cho'ña puesheñarrpa' anmare'tterrach po'psheñeñña'pa' allach asa'nmare'tterra.

⁴² Ñeñto'marña te'pa' o'ch notas: Chocmuepa'ch seño'srtenna tarro'mar sapa'cho'ña ama seño'tenno esempoch nohuerra na ñeñten e'ñe Separtseshar sepen. ⁴³ Napa' e'ñech machayota nohuerra atet pena eñet allemPO atta es sepcha'yena machayotach huaponasa o'ch yoratsre'tensa'. Tarraña sa ñeñtes apaclates seño'che'pa'ch ñerra'm seño'teñeñ e'ñech esempo tsapro huaponasa eñet, sapa' cho'ña seño'srtenañ attoch amach semnacheña o'ch toram'psas sepa'cillo o'ch be'tosam'psasa o'ch yoruennasa' ñeñt allpon semorrenyena. ⁴⁴ Ñeñto'mar notenes sapa'cho'ña chocmuepa'chña seño'srtenna tarro'mar allemPOpa' atta es sepcha'yenapa' allemPOchña nohuerra na Ñeñten Acheñetosets.

Atetcha' apare'tterra ataruasañ ñeñt e'ñe cohuen etsotene' atet yecheña pamo'mte' ñaña atetcha' apare'tterra po'poñ ataruasañ ñeñt ama etsotaye ñeñt atet yecheña pamo'mte'

(Lc. 12.41-48)

⁴⁵ Jesúsña'pa' alla toma'ntaterraneterr po'poñone't, atet oterraneterr:

—Allohuenespa' atetcha' se'pa e'ñe cohuen atet ñerra'mrrate' puesheñarr yacma ñeñt atarr ame'ñañatetsa ñaña e'ñech eñotenan ñeñt atarr sherbets. Ñeñtña yacmarpa' añ yechenaya pamo'mte' e'ñe alla pa'pacillo. Añcha' po'taruas pen chocmach apa'yesan allohuen po'potantañ pamo'mte' pa'taruasañer puerraret allpon ñeñt poctetsa puesheña'ttso'cop. Ñapa' attecmach penanet, chocmach apuenanet ñerra'm esempoch cherrerr allemPO atet anaret ñocop o'ch alla apa'yerraneterr po'pocheño. Ñapa' chocmach atet pena amach que'chpuenaneto tarro'mar ñapa' e'ñe eñoteñ attoch e'ñe coshatenan pamo'mte'. ⁴⁶ Ñeñtña ataruasañpa' atarrcha' coshatapuerran pamo'mte'. Ñerra'm esempoch huerra o'ch alla entuenan pa'taruasañer ama cho que'chpuenano ñeñt po'taruas apa'neñ ahuañmo'choteñ. ⁴⁷ Po'ño'ch o'ch notas, ñeñtña yacmar atarrcha' coshatueñ pamo'mte'. Añcha' coshaterre' o'ch nohuer añcha'taret' ñeñtcha' cohuañsaprete' ñeñt allpon echyen pamo'mte'. ⁴⁸⁻⁴⁹ Tarraña ñeñtña ataruasañer allemPO ama huerra' pamo'mte' ñerra'm ñapa' atta oten pueyo'chro, namo'mte'pa' amach ahuen huerro, allemPOña ñapa' chach ashtapechyenan ataruasañe'chno ñeñtcha' rratañ. Ñaña'pa' ñerra'm attach allemeñ rrapretyen ñaña attach orrare'tapretyen allcha' atarr posa'tare'tyen, ñeñtña ataruasañ atetpa' ama't mameshapa' ama cohue'nayaye. ⁵⁰ Ñeñtña ataruasañer ñerra'm ñapa' attach ottatse'tyena amach es puecha'yeno amach eñoteñe ñeñte yetroch huerra pamo'mte' ama't erro'tsencha' yetro huena.

⁵¹ Machayotachña huerra pamo'mte'pa' atarrcha' coñchatuer, allach mueñuer all ñeñt' o'patenaya allohuen ñeñt' po'ñoçh ama ame'ñetso ñeñt' atta shecare'tyets. Allñapa' allcha' yahuanrrorterret panmueño'tet atserrpa' rraso'tyesosetcha' pa's.

25

All atma'ntatare'tta ñeñt' atet' pena çharrasheña shopshare'

¹ Jesúsñapa' alla yeçhaterraneterr, ñeñt'pa' atet' otanet:

—Allempoch ancha'tare'tterra Yompor ñeñt' pue'ntaño'tsen allempoch nohuerra na, ñeñt'ña allempopa' atetcha' perra e'ñech atet' ñerra'mrrate' çharrasheña shopshare' ñeñt'cha' tatsa allcha' cohuoset allempoch huerranet ñeñt' e'ñe errte' sena'tetsa. Ñetñapa' anomyeset po'lampareñ alloch poctapueñet ñerra'm esempoch huerra.

²⁻⁴ Ñeñt'ña amnarsheña ñetpa' atta es puecha'yenet ñeñto'marña ama anmuetoña po'poñ aceite' alloch a'huortaterret po'lampareñ allempoch huañ ñeñt' anmanpset po'lampareño. Po'potantañ amnarsheña ñetpa' atarr eñotenet attoch eñose'rteñet e'ñe cohuen, ñeñto'marña ñet e'ñe ellonetpa' anomyeset aceite' puetellmo alloch a'huortaterret po'lampareñ ñerra'm esempo huañapset ñeñt' po'lampareño'tsenet.

⁵ Allña ñetpa' cohueñet, ama ahuenaye' huerranetoña ñeñt' sena'tetsa. Ñetña all machayota moñe'tyesetpa' çhepa'tcha' manrra'tuatset. ⁶ O'ña ñarenen tsappa' allempoñapa' machayota e'muet rranarets, ñeñt'ñapa' atet' oten: “Tayaca'yeña huennasaña ñeñt' sena'tetsa ñeñt' atarr secuen. Secha'nomñaca'ye' o'ch sepocteñ.”

⁷ Allempoñapa' allenta tanrra'tuaña allohuen shopshare' ñetñapa' a'cohuenetyeset po'lampareñ. ⁸ Amnarsheñaña ñeñt' ama yerpa'pesnomaye aceite' ñetñapa' atet' otare'chet po'potantañ amnarsheña ñeñt' çhocma anmue' aceite': “Te'pa' o'ch socya'y yanña aceite' ñeñt'cha' ya'huortatnom. Yapa' o' maya'huaña yelampareñ.”

⁹ Ñeñt'ña e'ñe cohuen eñotene' eñose'rtatsapa' ñetñapa' atet' ochetña po'poñ amnarsheña ñeñt' enamuenahuet aceite': “Amachca'ye yocyaso te't yehuañapen yanña. Sapa' arrña seta all pomueñet o'ch serañteña' samña socop.” ¹⁰ Ñet ahuanmatset o'ch rañteñeta'pa' ñeñt'ña sena'tetsapa' e'ñe allorocma çhen. Ñeñt'ña po'poñ amnarsheña ñeñt' e'ñe po'ñoçh çhocma eñose'rtetsa, ñetñapa' be'toscha'tet parro epuet ñeñt' sena'tetsa. Allñapa' allcha' atarr coshame'tapreteret. Allñapa' e'ñe echarr yottamset.

¹¹ Allña e'ñe o'chtatsapa' o' huacherraña po'potantañ amnarsheña shopshare' ñeñt' ahuanmatsa ñorra'. Ñetñapa' atet' otuerret: “Petorampsaye'chapuerrey Nepapareshacha'.” ¹² Ñañapa' atet' otapuerret: “Te' napa' o'ch notapuerres, sa amaca'ye po'ñoçhaye' seyemtenno.”

¹³ Jesúsñapa' alla oterranerr ñeñt' e'mñotene':

—Ñeñto'marña na te'pa' o'ch notas: Sapa' çhocmuepa'chña e'ñe cohuen señose'rtena, tarro'mar sapa' amaca'ye señoteñe erra'tsencha' yetñatsro allempoch nohuerra na Ñeñten Acheñetosets, ñaña erro'tsencha' yetro ama't ñeñt'pa' ama señoteñe.

All atma'ntatare'tta ataruasañeçhno ñeñt' apare'ttatsa puesheña'tets quelle ñeñt' otenet talento

¹⁴ Jesúsñapa' alla yeçhaterraneterr po'poñ, ñeñt'pa' atet' oterraneterr:

—Allempoch ancha'tare'tterra Yompor ñeñt' pue'ntaño'tsen allempoch nohuerra na, ñeñt'ña allempopa' e'ñech atet' perra ñerra'mrrate' puesheñarr yacma o'ch ahuo'bachayo. Ñeñt'ña yacmarpa' o'ch agotnoman pa'taruasañrenesha'pa' o'ch apa'yeshomanet quelle ñeñt' allpon echen; ñetñapa' o'ch cohuanpsoñet tarrempohuach esempohuañencha' huerra.

¹⁵ 'Puesheñarrpa' apa'neñ amnarmeta talento, ñeñt'pa' atarr shonte' quelle allpon ñerra'm amnar mil. Ñapa' añecop apa'neñ attoch ellopa' o'ch atontatan po'patronar po'çllayor. Po'psheñeña'pa' apa'neñ epmeta talento, ñeñt'pa' allpon quelle allpon ñerra'm

epa mil. Po'psheñeñpa apa'nem̄ puemetarr talento. Ñeñt̄pa'cho'ña allpon quelle ñerra'mrrate' paterr mil. Ñehua, puesheña'ttsetpa' e'ñe allpona apa'yesnomanet ñeñt̄ e'ñe allpona eñotyenet attoch ellonetpa' atontatet quelle. Ñeñta apa'yesuanmanetpa' ñañaapa' allenta ahuo' bačhayo. ¹⁶ Ñeñt̄ agapue' amnar mil ñañaapa' allorocma ahuo' allcha' taruasatan quelle; attoña ellonetpa' o' alla ganerrerr po'poñ amnar mil quelle. ¹⁷ Atet̄ p̄a ñaña ñeñt̄ agapue' epa mil. Ñapa'cho'ña ellonetpa' ganerrerr po'poñ epa mil quelle. ¹⁸ Tarraña añña ñeñt̄ agapue' paterr mil ñañaapa' allenta anem̄ allcha' pampueña'; attoca'yeña ñapa' čha e'potanña quelle.

¹⁹ O'ña atomatpa' o' huerranetña po'patronaret, allenta agotatuerranet attoch entuer-ranet po'taruas erroťente' taruasa'yeset e'ñe puesheña'ttset. ²⁰ Ñeñt̄ña agapue' amnar mil ñañaapa' huapapa' apapuenan po'patronar po'poñ amnar mil quelle, ñeñt̄pa' atet̄ otapueñ: "Añña Nompocha' ñeñt̄ p̄apa'nmuēn amnar mil quelle ahuaña, napa' el-loca'ye neganerrerrña pečllayorot̄ po'poñ amnar mil quelle." ²¹ Po'patronarpa' atet̄ och: "E'ñe pocte' neyochrecha'; p̄apa' atarr cohuen pesherbēnēn. Papa' e'ñe cohuen petsoton ñeñt̄ atet̄ notnomuep̄. Ama't allponatolla napa'nmaṣ̄ ahuaña, p̄añaapa' atarro't̄ cohuen pesherb̄aton. Ñeñto'marña te'pa' o'ch nenuerreṣ̄ p̄ach necuam̄ṣapreterre' ñeñt̄ atarr aton. Te'ña p̄apa' pebe'tos allcha' atarr p̄ocshapreterrna." ²² Allempoñapa' ñeñt̄ agapue' ñaña epa mil, ñapa'cho' huapapa' apapuenan po'patronar po'poñ epa mil quelle. Ñapa'cho'ña atet̄ otapueñ: "Nompocha' ñeñt̄ p̄apa'nmuēn ñaña epa mil, napa'cho'ña elloca'ye neganerrerrña pečllayorot̄ po'poñ epa mil quelle." ²³ Ñapa'cho'ña po'patronarpa' atet̄ och: "E'ñe pocte'; p̄apa'cho'ña atarro't̄ cohuen pesherbēnēn. Papa'cho'ña e'ñe cohuen petsoton ñeñt̄ atet̄ notnomuep̄. Ama't allponatolla napa'nmaṣ̄ ahuaña, p̄añaapa' atarro't̄ cohuen pesherb̄aton. Ñeñto'marña te'pa' o'ch nenuerreṣ̄ p̄aña p̄ach necuam̄ṣapreterre' ñeñt̄ atarr aton. Papa'cho'ña te'pa' pebe'tos p̄aña allcha' atarr p̄ocshapreterrna." ²⁴ Allempoñapa' huapa ñaña ñeñt̄ agapue' paterr mil quelle. Ñañaapa' atet̄ otapueñ: "Napa' neñoteneṣ̄ Nompocha'. Papa' amaca'ye matsrre'm̄ñape; p̄apa' čhocmaca'ye peprratam̄pesyēn ama't ñeñt̄pa' ama p̄oyaye ñaña čhocmaca'ye p̄ocsechatyēnña ñeñt̄ ama p̄aye' nare'tatyēnaye; čhocma es p̄a'yapačha'yēn ama't ñeñt̄pa' amaca'ye p̄aye' na'yēnaye. ²⁵ Ñeñto'marña napa' čha nem̄cha'teneṣ̄. Ñeñto'marña ñeñt̄ p̄apa'nmuēn ahuaña paterr mil quellepa' ñañaapa' čha nepamponaṣ̄. Te'ñapa' o'ch alla napapuerreṣ̄ ñeñt̄ e'ñe p̄o." ²⁶ Allempoña po'patronarpa' atet̄ och: "Paña po'ñočpa' amaca'ye cohuenaye' pesherbēnno ama't mamesha; atarrca'ye quellañt̄soṣ̄. Ñerra'm e'ñe po'ñoč peñotennoñ čhocma es neprratam̄pesyēnēñ ñeñt̄ ama noyaye; ñerra'm po'ñoč čhocma nocsechatyēnēñ ñeñt̄ ama naye' nare'tatyēnaye; ñerra'm po'ñoč čhocma es na'yapačha'yēnēñ ñeñt̄ ama naye' na'yēnaye, ñerra'm e'ñe po'ñoč atet̄ pentennoñpa' ²⁷ eso'maruañaca'ye amaña bancoye' penennanoña nečllayor allochñapa' te'ña o' nehuerrapa' nagaphuerreñcha' ñaña allo atontatonet nečllayor." ²⁸ Allempoñapa' atet̄ otan ñeñt̄ tomčha'tyets all: "Te'pa' čhosa puerratam̄perre'ña ñeñt̄ paterr mil quelle o'ch sapuer ñeñt̄ echene' čharra' mil quelle." ²⁹ Ñeñto'marña te' napa' o'ch notas: Ñeñt̄ es echets shonte' e'ñe p̄usherb̄ateñoťet pamo'mte', ñetña ellonetpa' o'ch alla apareťterret po'poñ aton. Tarraña ñeñt̄ ama es echetsopa' ama't allponatolla ñeñt̄ echyēnetañ aprratam̄ṣareťterretcha'. ³⁰ Ñaña añ ataruasañer ñeñt̄ ama nesherbēnaye, te'ñapa' čhosaña huapore'te' a'yoť checmetoť. Allñaapa' allcha' yahuanrrortenet panmueñoťet atserrpa' rraso'tyesosetcha' pa's."

Allempoch ellopa'tetstataretterra ñeñt̄ toma'ntenaya carrneročhno ñaña ñeñt̄ toma'ntenaya cabračhno

³¹ Allempoch nohuerra na Ñeñten Acheñetosets, nohuerrach e'ñe nepartsoteñohuen epan allohuen nemillañoñeñaneshar. Allempopa' nanorruerrcha' neconañño allcha'ña e'ñe nepartsotuerr e'ñe necohuenteñesha'. ³² Allempoñapa' e'ñech nesho apcherra allohuen pa'namen acheñ ñeñt yecha'yetsa arr patsro. Allempochña nellopa'tetstaterranet e'ñe atet pena ñeñt pamo'mte' pen carrnero, ñañapa' o'ch ellopa'tetstatenan carrneročno ñaña cabračno. ³³ Acheñenesha'ña ñeñt e'ñe cohuenpa' ñetñapa' necohuenrotcha' nenuerranet ñeñt e'ñe atet ñerra'm carrneročno. Ñaña ñeñtña ama cohuenayayepa' ñetñapa' ne'chcoterotach nenuerranet ñeñt e'ñe atet ñerra'm cabračno. ³⁴ Naña allempoch atarr na'mcha'taretterra'pa', atetcha' noter ñeñt necohuenronte'tsa'yen: "Sapa' sonacha't allohuenes tarro'mar Nomp or'ca'ye atarr bensare'tamperres. Te'ña sapa' o'ch saguërr ñeñt o'patatensa ahuafoñeñ. Ama't allempoteñ Nomp or'pa' errte' ye'chcatene' pats sañapa' allempoteñ o'patatasa attoch sa'mcha'tarettapretera. ³⁵ Tarro'mar napa' allempo nachporre'tpa' saca'yeña nerratallme'chaye't. Allempo no'ñpa'te'tpa' saca'yeña nonayesaye't. Allempo ne'chapue't sesho all ama nentare sañapa' chocma e'ñe cohuen sagapne't. ³⁶ Allempo nemuelle'tpa' saca'yeña nepashtaye't. Allempo natsna'te'tpa' sañapa' chocma secuam'pesne't. Allempo yottam'pesnete'tpa' saca'yeña e'ñe cohuen nemo'taye't." ³⁷ Allempoña ñeñt e'ñe cohuen es ne'pa'yesaye'tpa' ñetñapa' atetcha' oterrnet: "Ta'm Partseshacha', ¿esempo'tña yentape't allempo p'achporre't allempo yerratallme'chape't? ¿Esempto'tña yentape't allempo po'ñpa'te't allempo yonape't? ³⁸ ¿Esempto'tña yentape't allempo pe'chapue't yesho all ama pentare allempo e'ñe cohuen yagapape't? Ta'm ¿esem'pote'ña yentape't allempo pemuelle't allempo yepashtape't? ³⁹ ¿Esempto't yentape'tña allempo p'atsna'te't ñaña allempo yottam'psapete't allempo yemo'tape't?" ⁴⁰ Allempoña na ñeñten Partseshanpa' atetcha' noterres: "Te' napa' o'ch notas: Po'ño'chpa' allempo e'ñe cohuen atet se'pa'yesnane't na nemo'nasheñnesha' na'naca'yeña e'ñe cohuen atet sepen. Ama't puesheñarra ñeñt ama esoshe'maye' entyese'te acheñenesha' allempo, tarraña saña allempopa' atto e'ñe cohuen es se'pa'yesanete't, na'naca'yeña e'ñe cohuen atet sepen allempo." ⁴¹ Allempoña ñeñt ne'chcoteronte'tsenpa' atetcha' noterranet: "Sapa' orrerres arro't, sapa' aña so'patenaya ñeñt atarr yoro'chen. Te'ñapa' orras all huorten tso' erra'paren ñeñt ama amayaño ama't errponaña. Ñeñtña tsorpa' añ o'patateñet oneñe't e'ñe pueyochreshohuen. ⁴² Tarro'mar na allempo nachporre'tpa' sapa' amaca'ye saye' nerratallme'chaye'te. Allempo no'ñpa'te'tpa' amaca' saye'ña nonaye'te. ⁴³ Allempo ne'chapue't sesho all ama nentare sapa' amaca'ye cohuenaye' sagapne'te. Allempo nemuelle'tpa' sapa' amaca'ye saye' nepashtaye'te. Allempo natsna'te't ama't ñaña allempo yottam'pesnete'tpa' sañapa' amaca'ye semo'tne'te." ⁴⁴ Allempoña ñetpa' atetcha' oterrnet: "¿Esem'pohuañaca'ye, Partseshacha', yentape't allempo p'achporre't ñaña allempo po'ñpa'te't ñaña allempo pe'chapue't yesho all ama pentare ñaña allempo pemuelle't ñaña allempo p'atsna'te't, ñaña allempo yottam'psapete't? ¿Esempto'tña yentape't atet allempo yapa' ama't coñe'tapa' ama es yapape'te?" ⁴⁵ Allempoña napa' atetcha' noterranet: "Te'pa' o'ch notas: Po'ño'ch sa allempo ama a'cua'psenaye' sentone'te allohuen na nemo'nasheñnesha', na'naca'yeña atet sente'tña allempo." ⁴⁶ Allempoña acheñenesha' ñeñt ne'chcoteronte'tsen, ñetñapa' ahuanerretcha' allcha' coñcherret e'ñe errponohuañen. Añña ñeñt e'ñe cohuen es pa'yestse't ñetñapa' ahuanerretcha' Yompore'sho allña ñetpa' corretsetach pocsheñeshocmañen errponañohuen.

26

*Atto atarr o'pateñet Jesús o'ch muetsatateret
(Mr. 14.1-2; Lc. 22.1-2; Jn. 11.45-53)*

¹ Jesúsña'p' allempo serrpare'tatuahuanet allohuen añ ñoñetspa' allempoña'p' atet otan pueyochresha':

² —Sapa' seño'teñ o'ca'ye epomtamapa' o'ch čhapa'muen pascuapo. Allempoña na Ñeñten Acheñetosetspa' allempochña pomuerrnet attotcha'ña corso'tamiperrnet.

³ Allempoña allohuen judionesha' pa'mcha'tareternesha' ñetña'p' apčhet. Añ apčhatsa allohuen ñeñt judionesha' po'cornaneshar pa'mcha'tareternesha' epuet ñaña ñeñt atarr etsotayenayeñ ñoñets ñeñt atet anaret epuet ñaña ñeñt pompornesha' pen allohuen judionesha'. Ñetña'p' arr apčhenet cornesha' pa'paclo, ñeñtña cornesha'pa' ñaca'yeña atarr nanac pa'mcha'tareter penet, ñeñt'pa' añ pa'so'cheñ Caifás. ⁴ Allña ñetpa' cotape'chatannenet, Jesús a atarr o'patenet. Ñetña'p' atet otanna'tyeset:

—Errotuachca'ye yepe'te' attoch yeshcach e'ñe a'nahua esheccha' yerrmach attotcha' yemtsatach.

⁵ Ñetña allempopa' alla otanna'tyerretter:

—Tarraña te' pascuapo allempo shontena acheñenesha' amachca'ye yerrmatsche allañaca'ye čha yatsrre'moçhtateñ acheñenesha'.

*Atto puesheñarr coyanesha'pa' shosan eñmosať Jesús poño
(Mr. 14.3-9; Jn. 12.1-8)*

⁶ Pamtarrña Jesús'pa' Betanio'tsen all Simón pa'paclo, ñeñtña Simón'pa' ñeñt ose't puet-sarñats. ⁷ Jesúsña'p' alla anen all rrallme'chen. Allña'p' huapoña puesheñarr coyanesha', huapatan eñmosať ñeñt ama matsa'to; huapatamipes puetellmō ñeñtña puetellem'pa' añ socheñet alabastro. Ñeñtña eñmosaťpa' alla she' Jesús poño. ⁸ Pueyochresha'çhnoña ñetña eñchetpa' čha atsrre'muet, atet otyeset:

—Eso'mare'tña atta a'pertatosanña eñmosať. Ñeñt eñmosaťerpa' amaca'ye matsa'to.

⁹ Chochña'cho' pomoseñpa' ganañcha' shonte' quelle allempoña'p' apa'yesaneñcha' ñaña allohuen huocchañeshachno.

¹⁰ Jesúsña e'manetpa' ñaña'p' atet otanet:

—Eso'mare'tcha' čha muene' satsrre'moçhtana'ta'pña coyanesha'. Ñapa' atarrca'ye cohuen pōsen. ¹¹ Tarraña ama'tcha' čho pomosaneñ eñmosať alloch es apa'yesaneñ huocchañeshachno, tarraña čhocmachca'ye eñallña huocchañeshachno arr patsro. Nañapa' po'ñoçhpa' amachca'ye allo'na sentenno arr patsro. ¹² Ñeñt atto shosnan te' eñmosať nechtso, ñeñt'pa' añe'pa'naca'ye sherben tarremphua allempoch a'yana'terrneterr ñeñt'cha' epuet pampa'pesnet. ¹³ Po'ñoçhca'ye notenes: Ora erracmañen añ patsro errach serrpare'tatyenet añ cohuen ñoñets allempopa' serrpare'çhetcha' ñaña atet penen te' añ coyanesha', attochña ña'nach yerpuenet.

*Atto Judaspa' pomuerran Jesús
(Mr. 14.10-11; Lc. 22.3-6)*

¹⁴ Allempoña pueyochresha' ñeñt čharra' puechetsa epsheña, puesheñarrña ñeñt pa'so'cheñ Judas Iscariote, ñaña'p' allenta ahuo' allo'tsa'yen ñeñt pa'mcha'tareternesha' pa'yen allohuen judionesha' po'cornaneshar.

¹⁵ Chap allpa' ñaña'p' atet otosanet:

—Ñerra'm o'ch negatas Jesús attoch serrmue'pa' ¿errpona'tcha'ña setsa'tna?

Ñetña'p' atet ochet:

—O'chca'ye yapap ma'poch čharratlla quelle.

¹⁶ Allempoña ñapa' aña e'ñe cotape'chyen errotenotcha' pomuerranña Jesús.

*Atto Jesús'pa' rrallme'chatnenan pueyochresha' attoch čhocmach yerpueret ñeñt yoten te' Santa Cena
(Mr. 14.12-25; Lc. 22.7-23; Jn. 13.21-30; 1Co. 11.23-26)*

17 Allempoña čhapa'muen ñeñt yetñatsro allempoch rrerreterr pan ñeñt ama anareteyaye chase'. Chapa'muen ñeñt yeterpa' Jesúsñapa' huača'toña pueyochresha' ñetñapa' atet otoset:

—Te'pa' ¿erra't pemneñ allcha' ya'potonañ ñeñtcha' perra' pascuapo?

18 Ñañapa' atet otanet:

—Te'pa' o'ch ahues anetso; o'ch sečhap allo'tsen puesheñarr acheñ. Ñeñtpa' atetcha' sotos: “Ñeñña Maestro Jesúsapa' atetca'ye oten: ‘Te'pa' o' chapmoch allempoch nerroma, te' pascuapopa' arrcha' nerra'nom pepacillo neyochreshohuen.’ ”

19 Atet otanet Jesúsapa' ñetñapa' atetcho' pet. Allca'yeña añño'tosñañetña rreñets allcha' rrallme'chet.

20 O'ña ellerrotenapa' Jesúsñapa' anorros allcha' rrallme'chatnenan pueyochresha' ñeñt čharrasheña puechena epsheña. 21 Allña rrallme'chetsetpa' Jesúsñapa' atet otanet: —Po'ñočca'ye notenes: Puesheñarrotes sa ñeñtescha'ca'ye nepomuerrre'.

22 Ñetñapa' čha atarr lleca'rrtet. A'p̄to'tyeset e'ñe puesheña'ttset:

—Partseshacha' ta'm ¿amafe' na nepomuerrmochape?

23 Ñañapa' atet oterraneterr:

—Ñeñt netsapechapretene' nerrarpa' ñeñtcha'ca'yeña nepomuerrre'. 24 Po'ñočca'ye te'pa' allo'na sen etsotnomtsa ñeñt atet anuaret Yompor po'ñoño nocop Ñeñten Acheñetosets; attotcha' muetsaterrnet. Tarraña nocoppa' e'ñe pocte'; añña po'ñoč acheñer ñeñtcha' nepomuerrre' ñocopñapa' atarr llequēñets. Añ acheñerpa' e'ñeca'ye poctetñ ñocop amachñačo' eñalletatstañe.

25 Judasña ñeñtcha' pomuerrre'pa' ñañapa' atet och:

—Maestrocha' ta'm ¿amafe' na nepomuerrmochape?

Jesúsñapa' atet och:

—Paťe'ca'ye atetca' p̄oten.

26 All rrallme'chenet, Jesúsñapa' chetan pan parasyoso'tan Pompor. Parasyoso'tuepa' shota'tan panpa' apa'yesan pueyochresha'. Ñeñtpa' atet otanet:

—Sagapyes o'ch serre' añmapa' ñeñtcha'ña nechets sepen.

27 Alloťñapa' chetan ñaña orramets parasyoso'tuerrerrpa' apa'yerraneterr. Ñeñtpa' atet oterraneterr:

—Sorr ñaña añ narmetsos allohuenes. 28 Añpa' nerrasca'ye sepeñ ñeñtcha' ashatarettatsa shonte' acheñeneshacop alloch a'pre'tnare'tterret po'chñaret. Añ nerraspa' alloch e'ñe etserra a'pocataerra acheñeneshá' Apuesho. 29 Napa' o'ch notas: Te'pa' amach alla norrerre'te añ narmetsos tayoteñ tarremphuach allempoch alla ello yorrerrerr parro allempoch añcha'taretetuerra Apa.

*Atto Jesúsapa' eñotatan Pedro ñapa' čhocmach a'nasocha
(Mr. 14.26-31; Lc. 22.31-34; Jn. 13.36-38)*

30 Allempoña o' morrechuanmuet Yomporecoppa' ahuaneneter Olivo'pno. 31 Allñapa' atet otosanet Jesús:

—Añ tsaprocmach sa allohuenespa' sa'ypo'ña'huanmuencha' tarro'mar Yompor po'ñoñopa' atetca'ye anuaret, ñeñtpa' atet ote't Yompor nocop: “O'ch nemtsater ñeñt cohuanpene' carrnero, po'carrnerorñapa' čhach matrra'tyesa allemeñ.”

32 Jesúsñapa' atet oterraneterr:

—Tarraña esempoch alla netanterra napa' nanomcha' oterrtsa Galileo.

33 Allempoña Pedropa' atet och:

—Ama't allohuenet ñerra'm a'ypo'ña'huerrpetcha'pa' naña ama't ahuaťapa' amach na'ypo'ñerrpe.

34 Jesúsñapa' atet otererr:

—Po'ñoçhca'ye o'ch notañ, añe tsaprocma amach eñena' atolloppa' ãaña'pa' o'ch ma'poch ãa' nasotenna.

³⁵ Pedroña'pa' alla otererr:

—Ama'tcha' yerromhuanen parropa' naña'pa' ama't parrocha amach na' nasotaño.
Allohuen pueyochresha'pa' ñetpa'çho'ña e'ñe attecma otyeñetañ ñamet.

Atto Jesús'pa' ma'yochuena all oteñet Getsemaní

(Mr. 14.32-42; Lc. 22.39-46)

³⁶ Allotña'pa' çhap Jesús pueyochreshohuen all narmetsmño, ñeñt'pa' añ pa'so'cheñ Getsemaní. Allña'pa' otosanet:

—Te' sapa' allach sanorrçha'tos arrma, napa' o'ch nema'yochena' tarronteye'.

³⁷ Allña'pa' añ anmos Pedro ñaña Zebedeo puechemerasha', epsheña. Jesúsña'pa' çha nanac llequëna, nanac allpatena. ³⁸ Allempoña'pa' atet otosanet:

—Napa' çha chepoçhenen nellquëña neyoçhro, çha muene' nerromuen nellquëñoç. Sapa' allasa'tach arr secuapretosno'tach.

³⁹ Ñaña'pa' ahua' a'yenteye' all rremosa patso atet ma'yochosa:

—Apa, ñerra'm erroteno'tpa' arepa'chña pemnatatsche o'ch çhapona ñeñt' atarr amue-roçhtatañ nenten.* Tarraña ñerra'm ãach muenats añepa'chña atet peãaton ñeñt' pemnen ãa, amachña añeyaye ñeñt' nemnen na.

⁴⁰ O'ña atet ma'yochuapa' o' ahuer all'o'tsa'yen pueyochresha' ma'psheña. O' çherr allpa' alla entuerranet ñetña'pa' çha atarr manrrenet. Allempoña'pa' otuerran Pedro:

—Ama't mamesha are'tcha'ña acuenaye' sentoso. Amahuachñaca' secuapretosnote' ama't mamesha. ⁴¹ E'ñe seño'se'rteño'tpa' çhoña sema'yochosa allochña'pa' attoch amach sañeña a'puerrataterro topateñets ñeñt'cha' sehuapoya atarr huomenc. Ñeñt'pa' ama't atarr semneñeñ tarraña sechetsña'pa' amaca'ye ahuamencateye' penso, ñeñto'marña notenes çhocmach sema'yochena.

⁴² Jesúsña'pa' alla ahuererr puepocheño o'ch ma'yocherrerr; ñeñt'ara atet otuerrerr:

—Ñerra'm Apacha' añ pemnaten o'ch çhapona ñeñt'cha' atarr na'mueroçhtate', ñerra'm ama erroteno't ãa'huañatañperrno, ñeñt'pa' e'ñe poçte'. Añepa'chña atet peãaton ñeñt' pemnen ãa.

⁴³ O'ña alla ma'yochuerrerrpa' allempoña'pa' huerrerr alla entuerranerr pueyochresha' ñetña'pa' o' alla manrretererr; çha nanac atserr moñe'tenet. ⁴⁴ Jesúsña'pa' alla sa'nerraneterrpa' ahuererr ma'yochatsa poma'pocheño'hua. E'ñe attecma ma'yochuerrerr atet otua ñorra'. ⁴⁵ O'ña ma'yochuerrapa' allempoña'pa' alla huerrerr pueyochreshesho, atet otuerraneterr:

—Ama't teme'ttsenpa' alla't semanrren; ama'tpa' alla sames. Te'pa' señoçhepa'ch o' çhap allempoch pomataterrnet na Ñeñten Acheñetosets attotcha' errotuanen perren ñeñt' atarr ochña'tenesha'. ⁴⁶ Te'ña'pa' setanterra o'ch ahuey o'ch yepoçte'. Secue'ca'ye ñeñt'cha' nepomue' ñeñt'pa' alla'tsena.

Allempo rromoset Jesús

(Mr. 14.43-50; Lc. 22.47-53; Jn. 18.2-11)

⁴⁷ All atet eñorena Jesús'pa' çha huapatsa puesheñarr ñeñt' pueyochresha' peneñ ñeñt' a'pchenahuet epsheña, ñeñt'ña'pa' añ Judas. Ñaña'pa' huaçha'tatan shonte' acheñenesha' occhelletareret ñaña etsachperetareret. Ñehua, añ ñeñt' huaçha'tsapa' añ mueñenahuet ñeñt' pa'mcha'tareternesha' pen allohuen judionesha' po'cornaneshar ñaña ñeñt' pom-pornesha' pen allohuen judionesha'. Ñetca'yeña mueñene'ña ñeñt'cha' rremuenaya'

* 26:39 Ñeñt' amueroçhtatañ ñeñt'pa' po'ñoçh arr atma'ntataret ñerra'mrrate' ñeñt' atarr pesherr yorren orrañtso.

Jesús. ⁴⁸ Ñehua, Judas ñeñt pomuerre' Jesús pa' ñaña pa' atet otnoman acheñenesha' ñeñt anom attoch cheme'toset Jesús. Ñeñt pa' atet otnomanet:

—Erra'tsencha' nehuomcha'tos e'ñe netso'tstsapa'teño'tpa' ñeñtca'yeña Jesús. Sañapa' ñeñtcha'ña serrmos.

⁴⁹ Allempoña huapapa' cha ponmosaya Jesús huomcha'tos e'ñe puetso'tstsapa'teñesha' atet otos:

—Tsapo, Maestrocha'.

⁵⁰ Jesúsña pa' atet otaḗ:

—Eso'maruañaca' masheñe, penña arr nesho.

Allempoña acheñenesha' pa' ponmosyet Jesús pa' rromoset e'ñe po'huamencocma.

⁵¹ Allempoña puesheñarr ñeñt epuet Jesús pa' ñaña pa' po'cchella cheta'pa' o'ch chonto'tapanen cornesha' pueñañra, puetepa'tcha' tsorroñ. Ñeñt pa' año pueñañra ñeñt pa'mcha'tareter pen allohuen judionesha' po'cornaneshar.

⁵² Allempoña Jesús pa' atet och:

—Penerr alla po'cchell allecma peneñ. Allohuen ñeñt orrotetsa po'cchellopa' cochlochca'ye colla'huerret. ⁵³ Papa' chate' potenapañ amate' errotenoñ es nenameña Nompör. Ama't peñoteñe ñerra'm cho nenañpa' ñapa' allorocmach mueñoneñ shonte' nanac po'millaño'teñneshar ñeñtcha' nemoñsayañ, ⁵⁴ tarraña ñerra'm atet neḗapa' amate' errotenoñ etsotoña ñeñt atet anuaret Yompor po'ñoño nocop. Allña oten ñeñt pa' atetcha'ca'ye perra.

⁵⁵ Allempoña Jesús pa' atet otan acheñenesha':

—Eso'mare't sehua'cha'tennanaña e'ñe occhelletareroches ñaña etsach-peretareroches attoch serrma'n. Napa' ¿e'ñe't atet sentenen ñerra'mrrate' eñeten? O' allponmatuanen nanorryen Parets pa'paclo'mar, all neychatyen, eso'mare'tña ama allempocmaña serrma'ne'te. ⁵⁶ Ama'tpa' atepa'ca'ye perra allochñapa' attoch e'ñe etsotueria ñeñt allpon quellca'yese't nocop ñeñt a'mta'yese't Yompor po'ñoñ.

Allempoña allohuen pueyochresha'pa' allorocma a'ypo'ña'huanmet, ñetñapa' yetrra'tuet.

Allempo chapata'mueñet Jesús all apcha'muena allohuen judionesha' pa'mcha'tareternesha' ñeñt a'pocatyene' ñoñets ñocpuet

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Acheñenesha' ñeñt rromose' Jesús pa' ñetñapa' anmet allo'tsen Caifás ñeñt pa'mcha'tareter pen allohuen judionesha' po'cornaneshar. Allña pa' all apchenet parro allohuen ñeñt atarr etsotayenayeñ ñoñets ñeñt atet anaret epuet ñaña ñeñt pompornesha' pen allohuen judionesha'. ⁵⁸ Pedroñapa' cota'nmanet tarraña ñapa' chenta'en a'yoñ. E'ñe cornesha' po'pampohua allña pa' anorros epuet ñeñt guardianesha' allochñapa' esheccha' entan Jesús attoch erro'tuanencha' pet.

⁵⁹ Cornaneshañña pa'mcha'tareternesha' ñaña ñeñt pompornesha' pen allohuen judionesha' ñaña allohuen ñeñt a'pocatyene' ñoñets ñocpuet ñetñapa' añña atarr e'nenet ñeñtcha' toma'tamḗse' Jesús allochñapa' attoch muetsatachet. ⁶⁰ Ama't shonte' huapatsañ ñeñtcha' toma'tamḗsosayeñpa' amcha'taretnesha'ña ama't puesheñarrofetapa' ama eseshaye' entayeña attoch muetsatachet. Atteñapa' huapa ñaña epsheña ñeñtcha' toma'tamḗse'. ⁶¹ Ñetñapa' atet otoset:

—Añ acheñer ahuañapa' atetca'ye oten: “Napa' atarr ahua'mencaten attoch na'materrñañ Parets pa'paquell. Allo'tña poma'pamtañopa' o'ch alla natomater.” Ñapa' atetca'ye otña allempo.

⁶² Allempoñapa' cornesha' ñeñt nanac amcha'taret allenta tompa' atet otan Jesús:

—Pañapa' ¿ama'tcha'ña panapaneto? ¿Erro'tenote'tña otteñe'chenpet?

⁶³ Jesúsña pa' ama eñoreno. Allempoña cornesha'pa' alla otererr:

—Te'pa' o'ch notap' o'ch potey e'ñe Yompor pa'so'chño ñeñ' ama arromña'eshayaye, p'apa' ¿pa'tña ñeñep' Parets Puechemerep', ñeñep'te' Cristotosets?

⁶⁴ Jesúsñapa' atet och:

—Napa' po'ño'chca'ye ñeñ'ten e'ñe atet poten. Elloña napa' o'chca'ye notas, o'ca'ye e'ñe chapmoch allempoch e'ñe senterren na Ñeñ'ten Acheñetosets o'chca'ye alla nanorruerr Parets po'cohuenrot allcha' nepartsotapretera. Ñaña po'pocheño o'ch sentapuerren o'ch nesuanperra oso Yompor pue'ntañot.

⁶⁵ Cornesha'ñapa' ñeña e'mpa' allenta rrarre'tan pa'shtam e'ñe patrrre'mueño't, ñeñ'tpa' atet ot:

—O'ca'ye cha achmare'tanña Yompor. Ñeñ'tepñapa' amach ye'natsche po'psheñ' ñeñ'tcha' a'metam'p'sose'. Te' ama't sapa' o'ca'ye se'm atet achmare'tenan Yompor. ¿Erroñena't senteñña sa?

⁶⁶ Ñetñapa' atet otyeset:

—Ña po'ño'chpa' atarrca'ye nanac achmare'tenan Yompor, pocte'ña'cho' te'pa' o'ch semtsatach.

⁶⁷ Allempoñapa' a'coshare'tyeset e'ñe pa'clloyot, cho'ña chota'tyeset; po'potantañe'chñoñapa' taclapechyeset. ⁶⁸ Pachmare'teño'tetpa' atet otyeset:

—Te'ña ñerra'm po'ño'chte' Cristo'ppa' eñoratenperrepa' Parets allochñapa' attoch potey esesha'te'ña pe'chota'tyene'.

Atto Pedropa' a'nasotana Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Pedropa' a'yote'tsen all anen pampo. Allñapa' huapoña coyanesha' ñeñ' cornesha' pueñañra, ñaña'apa' atet otosan Pedro:

—Paca'ye e'ñe cotaye'tña Jesús ñeñ' galileo'marnesha'.

⁷⁰ Pedroñapa' anapue'pa' cha a'nasocha. Allohuenetñapa' e'ñe e'mhueñet atet ot:

—Napa' amaca'ye neñoteñe ñeñ' atet potenen.

⁷¹ Allempoña Pedropa' ahuer, cherr allotecma be'tenet o'ch chapuet o'pono pampo. Allñapa' entuererr po'psheñ' coyanesha' ñeñ' cornesha' pueñañra. Ñaña'apa' atet otan ñeñ' parro allo'tsa'yenet:

—Añ acheñerpa' ñeñ'ca'ye cotene'ña Jesús ñeñ' nazareto'marnesha'.

⁷² Pedroñapa' alla a'nasotererrpa' atet otererr:

—Te' napa' o'ch notas e'ñe Yompor pa'so'chño, napa' amaca'ye nentareña añ yacmar ñeñ' potenen.

⁷³ O'ña o'chterrerrpa' huapoña ñaña ñeñ' tom'cha'tyets all, ñetpa'cho'ña atet otoset:

—Po'ño'chca'ye p'apa' Jesúsca'ye pueyochreshap'. E'ñe atet peñen ñerra'mrrate' galileo'marnesha', ñeñ'ot'marca'yeña o' yeñota'p.

⁷⁴ Allempoña Pedropa' e'ñe puehqu'ño'tanetpa' atta otatse'tyerraneterr, ñeñ'tpa' atet otanet:

—Napa' e'ñe Yompor pa'so'chño notenes, ñerra'm amate' po'ño'choye' notensopa' te'pa' nerromuepa'. Napa' po'ño'chca'ye ama nentareña añ yacmar.

Ñeña otuanetpa' e'ñepa'tcha' allempocma eñeña atollop. ⁷⁵ Allempoña Pedropa' alla yerpuerrana ñeñ' atet oteñ Jesús: “Amach eñena' atollop pañapa' o'ch ma'poch pa'nasotenna.” Allempoña Pedro cha'nom allotpa' ahuo' a'yene't allñapa' all atarr yahuosa huomenc.

27

Allempo chapata'mueñet Jesús allo'tsen añcha'taret Pilato

(Mr. 15.1; Lc. 23.1-2; Jn. 18.28-32)

1 Tsapatña puetarenpa' ñeñña pa'mcha'tareternesha' pen allohuen judionesha' po'cornaneshar ñetña' apcha'mueneterr parro epuet ñeñt pompornesha' pen judionesha'. Allña apchenetpa' ñetña allohuenetpa' cotape'chatanna'tet attotcha' muetsatateret Jesús. 2 Jesúsña' o' huancota'tuet allempoña' anma'mueñet allo'tsen amcha'taret Poncio Pilato (ñeñt nen gobierno Romot ñeñt amcha'tarettetsa allo'marneshacop). Allca'ye poma'mueñetña Jesús.

Atto tsonerra Judas e'ñe ñañeña

3 Judasña ñeñt pomue' Jesús'pa' allempoña ñapa' eñoch Jesús'pa' chochca'ye muetseret. Allempoña puellquëño'tpa' ello alla cotape'cherran cohuen. Allempo atet cotape'cherrpa' ñañapa' alla pomuerran quelle ma'poch charratlla. Alla apuerrana' cornaneshar pa'mcha'tareternesha' ñaña ñeñt pompornesha' pen allohuen judionesha'. 4 Allña' atet otuerranet:

—Napa' o' cha norrtaterr ñeñt ama cohuenayaye, o'ca'ye cha nepomuer acheñ attoch muetseret ama't ñapa' ama't coñe'ta amaca'ye eñalleña po'chñar.

Ñetña' atet anaprra'tet:

—Ñeñtpa' amaca'ye errotenoña yocop, ñeñtpa' p'ocpaca'ye.

5 Allempoña ñapa' atta huapore'terrana' quelle o'pono Parets pa'paclopa' o' alla ahuerr, e'ñe puellquëño'tpa' tsonña'huerra ñañeña.

6 Cornaneshar ñapa' o' alla cheterret quelle. Ñetña' atet otanna'tyeset.

—Añ quellepa' alloca'ye atsa'taretta attoch shataterrñañet acheñ po'rras. Ñeñto'marña te'pa' amate'ca'ye pocteyaye o'ch alla yenererr allecma apchenet quelle Parets pa'paclo.

7 Allempoña e'ñe ñagattsetapa' atet a'pochtachet o'ch rañtoñet allo añ po'patseñ ñeñt ye'chcatyene' patsrro' allochña'pa' allcha' pampa'yeret ama't erra'tsena acheñer ñeñt ahuapña ñerra'm esempo rromayenet allampaño.

8 Ñeñto'marña ñeñt patserpa' añ sochet Errasatsotnanen tarro'mar ñeñte quellayero rañtyet allo ashataretterra errasats. Ama't teme'ttsen ñeñt patser socheñet Errasatsotnanen. 9 Attoca'yeña etsotaña atet ote't Jeremías ñeñt a'mtaye't Yompor po'ñoñ ahuat, ñeñtpa' atetca'ye quellquë't Cristocop: “Cheterretcha' ñeñt ma'poch charratlla quelle ñeñt allpon po'tsa' nen israelena'tarnesha' atto muetsatateret. 10 Ñeñña quellepa' allochca'ye rañterrñañet po'patseñ ñeñt ye'chcatene' patsrro'. Atetca'ye otenenña Partesha' o'ch atet ne'pa.”

Atto Jesús'pa' a'p'to'tare'teñ amcha'taret Pilato

(Mr. 15.2-5; Lc. 23.3-5; Jn. 18.33-38)

11 Allempo chapachet Jesús amcha'taret Pilatesho, allña'pa' all amcha'taretña'pa' allenta a'p'to'tap:

—Papa' ¿pa'tña amcha'tarettetsaña judioneshacop?

Jesúsña'pa' atet och:

—Napa' ñeñtenca'ye atet p'toten.

12 Ñeñt pa'mcha'tareternesha' pen judionesha' po'cornaneshar ñaña ñeñt pompornesha' pen allohuen judionesha' ñetña allpa' atarr otteñe'chyesoset Jesús. Ñaña'pa' ama't mameshapa' ama eñoreno, ama't parrocha ama anapuenaneto ñeñt atto a'metare'teñet.

13 Allempo Pilatopa' atet och:

—¿Ama't pe'muenoña atet a'metare'tenpetpa' esocmañen otenpet?

14 Ñaña'pa' ama anapuenaneto ama't e'ñe parrocha. Ñeñto'marña amcha'taretpa' nanac cohuanateñ. Ama eñoteñeto eso'marte' ama eñoreno ñocop.

*Atto añcha'tareġ Pilatopa' otanet ama'tpa' ċhosa muetse'ña Jesús
(Mr. 15.6-20; Lc. 23.13-25; Jn. 18.38-19.16)*

15 Ñehua, ñetpa' atetca'ye yeċhenet. E'ñe paġet'tets char allempoch ċherrerr pascuapo, ñeñña añcha'tareġ ñeññ nen gobierno Romoġpa' ñaña'pa' ċhocmach a'rroyerran puesheñarr judioneshacop ñeññ ayottamġsarettetsa allempo, ñeññara ñeññ pamo'ts penet ñet. O'ch apanet erra'tsenċho' enamuenet ñeññ muenenet ñet. Ñeññpa' añecop a'rroyenanetña puesheñarr pamo'tset attoch e'ñe cohuen coshatenan allohuen judionesha'. 16 Ñaña e'ñe allempopa' allo'tsen puesheñarr judionesha' ñeññ ayottamġsarettetsa ñeññpa' añ pa'so'cheñ Barrabás. Allohuenetpa' e'ñe eñotueñet añecopña yottamġpeñet ñapa' ċhocma atpare'taneġ añcha'tareġ ñeññ nen gobierno Romoġ. 17 Ñeñño'marña allempo apċha'hua allohuen acheñenesha'pa' añcha'tareġña Pilatopa' a'pġto'tapanet:

—¿Erra'tsena't semnenña ñeññcha' na'rroyonas, ñato' añcha' Barrabás amapa' Jesús ñeññ otenet Cristo?

18 Ñehua, Pilatopa' eñotapan judionesha' pa'mġcha'tareġernesha' ñetpa' e'ñe pue'moñe'tateñme'chatsa o' pomueret Jesús. Ñeñño'marña Pilatopa' añ muenen o'ch a'pġto'tan allohuen acheñenesha' tarro'mar ñapa' añca'ye e'nen attoch a'rroyerran Jesús.

19 Ñaña tarro'mar allempo anorros po'conaño allcha' a'pocġtatan ñoñets, puetaporñapa' oñmach po'ñoñ all oteñ: “Amach erroġ peġatsche Jesús ñeññ e'ñe cohuen acheñer tarro'mar ama't añ tsapro napa' o' neċhopo'teñ; napa' ñeññña atarr neyore'te'.”

20 Tarraña ñeññ pa'mġcha'tareġernesha' pen judionesha' po'cornaneshar ñaña ñeññ pompornesha' pen allohuen judionesha' ñetña'pa' añña atarr coġape'chatenet acheñenesha' attoch ñetpa' allohuenetpa' o'ch ochet Pilato:

—Añcha' p'a'rroyerrnay Barrabás, Jesúsñapa' pemtsatachepa'ch.

21 Allempoña añcha'tareġ Pilatopa' o' alla a'pġto'terraneterr:

—¿Erra'tsena'tña po'ñoċh añ epsheño'mar semnen ñeññcha' na'rroyerrnas?

Ñetña anaprra'tetpa' atet ochet:

—Añcha'ca'ye p'a'rroyerrnay Barrabás.

22 Pilatoñapa' alla oterraneterr:

—Ñehua, añ Jesús ñeññ otenet Cristopa' ¿erroġe'tcha'ña nepe'?

Allohuenetña'pa' alla otereterr:

—¡Ñapa' pecorso'tamġsachñaca'ye!

23 Pilatoñapa' atet oterraneterr:

—Ñapa' ¿eso'tña pen ñeññ ama't mameshapa' ama poġteye' sentapreteñe?

Ñetña'pa' alla rrannarterreterr huomencpa' atet oterreterr:

—Ñapa' ¡ċhoġaña'ca'yeña corso'tamġsate'!

24 Pilatoñapa' e'ñe eñoteñ attoch ñapa' amach erroġ pe, elloña acheñenesha'pa' ċha atarr atsrre'moċhtana'teñet. Allempoñapa' chetan oñpa' e'pota'ta allochñapa' attoch eñotatanet ñapa' amaca'ye ñaye' otteñe'chenaye, ñeññpa' atet oterraneterr:

—Napa' amach seyohuatsetno attoch rroma añ acheñer ñeññ ama't coñe'ta ama ċho'ye' erroġ es peno. Ñeññpa' ama nocpa'nayaye, ñeññpa' e'ñeca'ye sapġecpa.

25 Allohuenña acheñenesha'pa' ñetña'pa' alla otereterr:

—Attoch rromapa' ama'tpa' yohua'yetepa'—ya ñaña ama't yemrenñohuen.

26 Allempoñapa' a'rroyerranet Barrabás, Jesúsñapa' ashtach allempoñapa' otan po'solltarneshar:

—Te'pa' o'ch secorso'tamġpeña'.

27 Ñehua, solltarnesha'ña ama aneñeta' allcha' corso'tamġpsoset ñetña'pa' arrña ñanom anmet Jesús añcha'tareġepahuo. Allña agotachet allohuen po'potantañ solltarnesha'

ñeñt̃ allo'tsa'yen o'ch e'ñe apçhet Jesúsesho. ²⁸ Allñapa' pa'llocchame'teñoŋet Jesúsapa' rrotam̃pes pa'shtam, chorrachet shetamuets tsamamuen ñeñt̃ pa'shtam pen ñeñt̃ po'ñoçh am̃cha'tarettetsa. ²⁹ Pellta'toñet ñaña choyo'mets agreçhpa' ñeñt̃ña choyo'mtachtet ñeñt̃ atet choyo'mtena ñeñt̃ po'ñoçh am̃cha'tarettetsa. Orrachet ñaña tsacheḡ potopotpa' cohuenrot ñeñt̃ atet orren ñeñt̃ po'ñoçh am̃cha'tarettetsa. Allempoñapa' con-corpa'yesyet. Pa'llocchame'teñoŋetpa' e'ñe atet ḡachet ñerra'mrrate' ñeñt̃ e'ñe po'ñoçh am̃cha'tarettetsa. Pachm̃are'teñoŋetpa' atet oteñet:

—Puetare' am̃cha'taretecha', atarruaca' cohuenḡte' ḡa ñeñt̃ḡ judionesha' pa'm̃cha'taretereḡ.

³⁰ Pueche'tatseteñoŋet a'coshare'teñetpa' o' chetam̃peretña ñaña tsacheḡ pototpa' alloña asto'tame'teñet poño. ³¹ O'ña achm̃are'tuahuetpa' allempoñapa' rrotam̃peret shetamuets tsamamuen chorrateret e'ñe ña pa'shtam. Allempoñapa' anmet a'yo allcha' corso'tam̃peñeta'.

Atto corso'tam̃psoset Jesús

(Mr. 15.21-32; Lc. 23.26-43; Jn. 19.17-27)

³² E'ñe ahuanmatsetpa' allña oñenetpa' o' poctet puesheñarr yacma ñeñt̃ cire-neo'marnesha' ñeñt̃pa' añ pa'so'cheñ Simón. Ñañaapa' allenta chechatnomet Jesús po'corsoch.

³³ Chapachet all socheñet Gólgota ñeñt̃ yoten yeñoño Poñetalleḡno. ³⁴ O' çhapachet all Jesúsapa' aposetañ vinos ñeñt̃pa' añ atsetaret pueretso ñeñt̃ atarr pesherr. Atta am̃lle'pa' ama mueno o'ch orr.

³⁵ Allempoña o' corso'tam̃pesuetpa' solltarnesha'ñapa' allenta yellsheñe'chatoñet pa'shtam po'suertot attoch orrtet e'ñe puesheña'ttsetpa' o'ch yorayesñañet pa'shtam puema'tets. Attoña etsoterra añ ñoñets ñeñt̃ a'm̃taye't̃ ahuañ Yompor po'ñoñ. Ñehua, allempopa' e'ñe atet ñerra'mrrate' Cristo otatset̃, ñeñt̃pa' atet oten: “Yellsheñe'chaterrnanetcha' neshtam po'suertot attoch orrtet e'ñe puesheña'ttsetpa' o'ch yorayesonet neshtam puema'tets.” ³⁶ Allempoña solltarnesha'pa' alla anorrçha'tet o'ch cohuanḡset. ³⁷ Ñehua, poñot̃ all corsocho all noñet tsachtall aquellcareñ attochña eñoteñet ñeñt̃ecop corso'tam̃peñet. Ñeñt̃ña quellecpa' atet oten: “Añ Jesúsapa' ñeñt̃ca'yeña judionesha' Pa'm̃cha'tareter.”

³⁸ Allñapa' corso'tam̃ḡset epuet ñaña epsheña eñet̃, puesheñarrpa' nosñañet po'cohuenrot, po'psheñeñña' nosñañet pue'chcoŋerot. ³⁹ Ñeñt̃ña oñmachets allpa' ñetpa'çho'ña çhocma achm̃are'tneñet. Pachm̃arñoŋetpa' coño'coñtana'tyesneñet, ⁴⁰ ñeñt̃pa' atet otyesneñet:

—Pa ñeñt̃ḡ ḡommo'cheñoŋpa' ḡotatset̃e't̃ ḡo'ch a'materrayeñ Parets pa'paquell, poma'pamtañocmo'ch alla ḡatomatereñ, te'ñapa' ḡa'queshḡaterrañaca'ye e'ñe ḡañeña. Ñerra'm po'ñoçhte' Parets Puechemereḡpa' pesuerrañaca'yena tayecma corsochoŋ.

⁴¹ E'ñe attecma achm̃are'teñ ñaña ñeñt̃ pa'm̃cha'tareternesha' pen judionesha' po'cornaneshar ñaña ñeñt̃ etsotayenayeñ ñoñets ñeñt̃ atet anaret̃ ñaña ñeñt̃ pom-pornesha' pen allohuen judionesha', ama't allohuenet fariseoneshohuen. Ñetñapa' pachm̃are'teñoŋpa' atet otatset̃yeñet:

⁴² —Te'ña ḡapa' o' ḡa'queshḡatyes po'potantañ, ḡañaapa' eso'mare'tcha'ña ama esh-caye' ḡa'queshḡaterroña e'ñe ḡañeña.

E'ñe pachm̃are'teñoŋetpa' atet otyereter:

—Papa' ñeñt̃ḡpo'ca'ye israelnesha' Pa'm̃cha'taretereḡpa' pesuerrañaca'ye corsochoŋ allochñapa' attoch yame'ñaḡa yaña. ⁴³ Papa' ḡa yemtenaya Yomporpa' te'ñapa' a'queshḡaterrpepa'ñaca'ye ñerra'm po'ñoçhte' e'ñe cohuen muerenḡa. Papa' ñeñt̃ḡ po'ñoçh atet otets Yomporo' Puechemereḡ.

⁴⁴ E'ñe attecma pe' ñaña eñeñ ñeñt epuet corso'tampeñet ñetpa'cho'ña atarr es otnare'chet allot po'corsochoť.

Atto rroma Jesús all po'corsocho

(Mr. 15.33-41; Lc. 23.44-49; Jn. 19.28-30; Heb. 9.11-14)

⁴⁵ O'ña chap poctopa' o'huañ atsnom o' e'ñe checmetua ora errañaren aña patsro, o'ña ellerrotenmochapa' o' alla puetarerr. ⁴⁶ Allempoña ellerrotnenmochapa' Jesúsñapa' rrana huomenc, ñeñtpa' atet ot e'ñe ña po'ñoño:

—Elí, Elí, lama sabactani. Ñeñña ñoñtsorpa' atet oten: Eso'maruachñaca'ye Neyompor-recha' pa'ypo'ñerren.

⁴⁷ Puesheña'tetsña ñeñt tomčhets all ñeñt e'mue' atet oten Jesús, ñetñapa' amaca'ye e'mueññañeto po'ñoñ ñeñt atet oten, ñeñto'marña ñetpa' cha otyeset:

—O' cha chore'tante' Elías ñeñt a'mtaye't ahuat Parets po'ñoñ.

⁴⁸ Allempoñapa' mata puesheñarr ñeñt allo'tsen, e'chomosan chella'so ñeñt atsotso'tpo' o' ne' tsachpopa' allotña tsotso'tatosanña Jesús. ⁴⁹ Po'potantañapa' atet ochet ñeñt tsotso'tatene':

—Amach es papatsche, te'pa' attachca'ye yecue' ñato'rraña huapa Elías ñach a'queshpátose'.

⁵⁰ Allempoña Jesúsapa' o' alla rranerrerr huomencpa' rroma. ⁵¹ Allempoña besom allo yottampeññañet Parets pa'paquell o'ponopa' ahuepa't rrrarra'nom e'ñe poctacma, ellopa'tetsta enoteñ e'ñe sotatsohua. Allempoñapa' o' pella pats atarr huomenc, rrrarna'tyes mapuetachno. ⁵² Torna'tampesyes apampaña. Shonte' ñeñt pueyochresha' pen Parets ñeñt o' colla'huañ, ñetñapa' ahuepa't e'ñe tantrra'tuerret. ⁵³ Allempoña tanterra Jesúsapa' ñetpa'cho'ña o' sohuanerretña all apamparettete't o' alla ahuanerret anetso Jerusaléño ñeñt anareť Partsocop, allñapa' shonte' achen ñeñt entapuerrahuet.

⁵⁴ E'ñe allempo rroma Jesús, solltarnesha'ña epuet po'captaner ñeñt allpon cohuanmpene' Jesús, ñetñapa' e'ñe enteñet ñeñt atet pa'yesa allempo, atto pella pats. Ñeñto'marña ñetpa' atarr yorenet. Allempoñapa' atet otet:

—Po'ñochuaca'ye añmapa' Partsepa'tca'ye Puechemer.

⁵⁵ Allo'tsa'yen ñaña shonte' coyaneshačhno, ñetñapa' a'yota cohuanrrorteñet. Ñetpa' ñetca'yeña co'ta'huanmue'ña Jesús Galileoteñ ñeñt sherba'yesaye't. ⁵⁶ Ñeñtpa' María Magdalena ñaña po'psheñeñ María ñeñt Jacobo pachor ñaña José. Allo'tsen ñaña ñeñt pachor pen Zebedeo puechemereshá', ñaña po'potantañečhno coyaneshačhno.

Atto pampuet Jesús

(Mr. 15.42-47; Lc. 23.50-56; Jn. 19.38-42)

⁵⁷⁻⁵⁸ Atteñapa' o' ellerren. Puesheñarr ñeñt ečllayoreť ñeñt pa'so'cheñ José ñeñt arimateo'marnesha' ñeñtara Jesús pueyochresha' ñañaapa' ahuos Pilateshopa' o'ch oteña' pocte'ch eñch ñach asuatose' Jesús ñeñt rromuets corsocho. Pilatopa' atet otan pa'cheñer:

—Te'pa' o'ch sa'rroyoñ arromñať anerepa'.

O'ña ellerren Joséñapa' o' cherr corsocho, ⁵⁹ a'suatuerran Jesús corsochoť all romuen. Allempoñapa' epatse'ch shetamtso ñeñt e'ñe cohuen emarr. Allempoñapa' anemñ allcha' pampueña'. ⁶⁰ All e'ñe errte' eñatene' mapuetpon ñeñtpa' e'ñe pamo'tsna'tarneshacpañ allca'yeña nenana'ña Jesús. Allempoñapa' attome'terrñañ mapue' añecmuen allo yottampesner ñeñt puepampuer pach. O'ña yottampesuanerpa' Joséñapa' ahuer. ⁶¹ Allñapa' allo'tsen María Magdalena ñaña po'psheñeñ María. Ñetñapa' alla anorrcha'toset allame'tets all pampueñet.

Atto guardianesha'pa' cohuanmpañet all pampuet Jesús

⁶² Met añ yeter allempo chocmach añño'terreter ñeñt tsapatecop allempocma amesen judionesha'. Tsapatñapa' ñeñt pa'mcha'tareternesha' pen judionesha'

po'cornaneshar ñaña fariseonesha' ñetñapa' e'ñe alla shontenet parro all Pilatesho.
⁶³ Ñeñtpa' atet otoset:

—Nomporcha' yapa' o'ca'ye yeyerpuera añ acheñer ñeñt atarr ashcañpa' allempo corre'tpa' atetca'ye otye't: “Napa' ama't puema'pamtañopa' netanerrachca'ye rromot.”
⁶⁴ Te'pa' pemñaye'chñaca'ye ñeñtcha' nanac cohuañpsose' puepampro e'ñe puema'pamtañohua, te't huapa pueyochresha'pa' chat'e'ca'ye e'ñe a'nahua ereta'. Allempoña ñetpa' chat'e' ochet acheñenesha' Jesús'pa' o'ca'ye tanterra rromot. Ellote'ña ñet allempopa' nanacte' shecare'teret acheñenesha'. Ellote' metanerret ñeñt atto shecare'tyesete't ahuaña acheñenesha'.

⁶⁵ Pilatoñapa' atet otapanet:

—Añca'yeña guardianesha', te'pa' orras parro, ñetpa' o'ch cohuañpsose', e'ñech echarr se'pamñpsoñañ puepampuer, errotencha' e'ñe pocte' sent sa.

⁶⁶ Ñetñapa' ahuanmuet puepampro. Mapue' allo yottamñetpa' e'ñe cohuen yomraramñpsose' attochña eñoteret ñerra'm esesha'ch toramñerre'. O'ña e'ñe cohuen pamñpesuetpa' allempoñapa' na'neret guardia all ñeñtcha' cohuañpse'.

28

Atto tanterra Jesús

(Mr. 16.1-8; Lc. 24.1-12; Jn. 20.1-10)

¹ O'ña huañ yetñats allempocma amesenet allempoña taya puetaren temenc allempo motta'muena yetñatspa' Maríaña Magdalena ñaña po'psheñeñ María ñetñapa' ahua'tecma ahuanma'muenet o'ch enta'mueñet Jesús puepampro. ² Allempoña machayotepa'tcha' pella pats huomenc; añ sohuatsa Yompor po'mllañoñeñer ento'. O' sohuapa' a'rrote'tosan mapue' a'yenet ñeñtña mapue'pa' allña anorros. ³ Ñaña'pa' atarr nanac poptosa e'ñe atet orrtosa ñerra'mrate' meratste'. Pa'shtamñapa' atarr nanac huallama't. ⁴ Guardianesha'ñapa' ñeñtña atarr yore'tose'. Puenchaño'tetpa' cha yonshema'tyeset cha o'ta'yese't e'ñe attet ñerra'm cho rromuenet. ⁵ Allempoña mellañoñeñpa' atet otapan coyanesha'chno:

—Amach cha seyorenatsto. Napa' neñotenes añca'ye semnen o'ch senta'mueñ Jesús ñeñt corso'tamñset. ⁶ Amaca' arro'tsenaro arr, ñapa' atet otase'tpa' te'ñapa' o'ca'ye tanterra. Sonca'ye secueña' all panet amaca' eñalle. ⁷ Secua'huepa' orrerres sema'yoreñ o'ch soterrñaña' pueyochresha': “O'ca'ye tanterraña Jesús rromot. Ñapa' ñanomcha' otatsa o'ch ahuen Galileo. Sapa' allcha'ña sentuer.”

⁸ Allempoñapa' puema'yoreñ ahuanerret puepampro't. Ama't yorenetañpa' pocsheñesha' matrra'terret o'ch oteññañeta' pueyochresha'. ⁹ Matachetsetpa' Jesúsñapa' ahuepa'tcha' poctanet, huomcha'tapanet. Ñetñapa' allenta ponemñyet, rromosetpa' rrpot concorposñañet. ¹⁰ Allempoña Jesús'pa' atet otanet:

—Amach semcha'tatsetno. Orrerres sotennana' nemo'nasheñnesha'chno ahuanmuetepa' Galileo, allcha'ña e'ñe enterrnet.

Atto solltarnesha'pa' serrpare'tatyesan allohuen cornaneshachno ñeñt atet entet ñet

¹¹ Ahuanmatsetpa' pueheña'tetsña guardiapa' ahuanmuet ñamet anetso. Allña'pa' serrpare'tatoset cornaneshapamñcha'tare'ternesha' allohuen atet o' entuet. ¹² Ñetña allempo apchenet epuet ñeñt pompornesha' pen judionesha' ñetñapa' cotape'chatanna'tet. O'ña cotape'chatanna'tuetpa' allempoñapa' apet solltarnesha' shonte' quelle. ¹³ Ñeñtpa' atet ochet solltarnesha':

—Te'pa' atetcha' sot: “Yaña tsapopa' muetsye'tpa' pueyochresha'ñapa' ahuo't huapuet a'nahua't ereta'ña arromñañ.”

¹⁴ Ellopa' alla oterranerr solltarnesha':

—Ñerra'm am̃cha'taret̃ čha e'mare'te' yapa' ya'pocatonascha' e'ñe cohuen ñesho attochña sapa' amach erroť p̃aseto.

¹⁵ Ñetña allempo agaphuet quellepa' atet̃ otaret̃tetpa' atet̃čo' pet. Ñeñto'marña ñet p̃ueserrparñetpa' e'ñe allempoteñ epa'hua judioneshesho'mar.

*Atto Jesús pa' otnerran pueyochresha'chno ñetpa' atet̃cha' p̃a'yerret
(Mr. 16.14-18; Lc. 24.36-49; Jn. 20.19-23)*

¹⁶ Ñeñť čharra' puechena paterr pueyochresha'pa' ñetñapa' ahuanerret Galileo. Arr ahuanmuet all aspenťo all otanet Jesús allcha' tet. ¹⁷ Allempo entosetpa' ñetñapa' čha concorpa'rretyesoset. Puesheña'tetsñapa' čha echarrtanet pueyočhro. ¹⁸ Allempoña Jesús pa' ponmanet atet̃ otapanet:

—Napa' apareten allohuen llesens aňe patsrecop ñaña Yompor pue'ntañecop. ¹⁹ Ñeñto'marña te'pa' orras o'ch seyčhatyes ora allohuen pa'namen acheñ attoch neyochresha' neperranet. O'ch sapatanet Yompor Parets pa'so'chño ñaña Yompor Puechemer pa'so'chño ñaña e'ñe Yompor Puecamquēñ pa'so'chño allochñapa' attochña e'ñe pueyochresha' perranet Yompor Parets. ²⁰ Ñaña čhocmach o'ch e'ñe seyčhatyesanet allochñapa' attoch e'ñe cohuen ame'ñerrnanet e'ñe ora ñeñť allpon o' notuas. Ñaña señoche pa'ch napa' e'ñe pate'tets yet čhocmach allo'tseney parro attoch čhocma nebensare'tam̃penes ama't tarremphuach esempohuañen allempoch mellapoterra. Ñeñťpa' attetepa'ch Nompore. Allohua.

COHUEN ÑOÑETS ÑEÑT̃ QUELLCA' SAN MARCOS

Allempo orrta Juan ñeñt̃ serrpare'tosets all amayo
(Mt. 3.1-12; Lc. 3.1-9, 15-17; Jn. 1.19-28)

1-2 Te' arr napa' o'ch nequellconas ñeñt̃ e'ñe cohuen ñoñets alloch yequeshperra e'ñe yame'ñeñoña Jesucristo ñeñt̃ Puechemer pen Yompor. Ñehua, ñeñt̃ ñanom orrtatsa ñeñt̃pa' e'ñe atet̃ o' perra e'ñe atet̃ quellquë't̃ Isaiás ñeñt̃ a'ñtaye't̃ ahuat̃ Yompor po'ñoñ. Isaiáspa' ñapa' añca'ye quellquë't̃ ñeñt̃ atet̃ Yomporpa' otan Puechemer ñeñt̃ara Cristo, ñeñt̃pa' atet̃ och:

Te'pa' peñohepa'ch napa' nemñernap̃cha' puesheñarr ñeñt̃cha' potañperraya. E'ñe ña pueserrpare'teñoŋpa' añño'terrnap̃cha' allcha' p̃oñmos p̃ama esempo.

3 Ñapa' e'morrterrach po'ñoñ all amayo allcha'ña serrpare'taterranña acheñenesha'. Puerranarot̃pa' añcha' toma'ntaterranet̃ toñ, ñeñt̃pa' atet̃cha' o'terranet̃: "Te'pa' o'ch sa'cohuenetyes toñ allcha' oñmos Partsesha', o'ch e'ñe sa'pačharretyesoñ pa'teŋ." Arrpa' allohua ñeñt̃ atet̃ quellquë't̃ Isaiás.

4 E'ñe atet̃ anuaret̃ ahuatoteñpa' ñeñt̃ña' e'ñečo' atet̃ perra allempo orrtosa Juan ñeñt̃ apatose' acheñenesha' Yomporecop. Ñapa' alla orrta amayo allña serrpare'tatosanña acheñenesha'. Ñeñt̃pa' atet̃ otosanet̃:

—Te'pa' o'ch soctape'cherr ello cohuen Yomporecop allochñapa' e'ñech cohuen sapataret̃terra e'ñe same'ñeñoñ Yompor. Attochña Yomporpa' o'ch peretna'huernas so'chñar.

5 Ñeñto'marña shonte' acheñenesha' čhocma huačha'tyenet̃ ñesho o'ch e'mñoteñeta'. Allohuen ñeñt̃ judeo'marnesha' ñama allohuen ñeñt̃ jerusaléño'marnesha' čhocma huačha'tyenet̃ ñesho. Allña ñetpa' a'meta'yesoset̃ po'chñaret̃, Juanñapa' apatyəsapanet̃ Yomporecop. Ñeñt̃ña oñ all apatyəsapanet̃ añ pa'so'cheñ Jordanas.

6 Ñeñt̃ña Juanpa' camello pue'ch apomotaret̃ ñeñt̃ pa'shtam pen. Allo chanena ñeñt̃pa' pa'rrom. Allñapa' rra'yesane't̃ ahuañchenclla* ñeñt̃ña puerrar pe't̃ epuet̃ pets po'moñ.

7 Juanñapa' atet̃ serrpare'tatanet̃:

—Cristoña ñeñt̃cha' huapatsa chenta'pa' ñapa' atarrca'ye ahuaamencatesha', nañapa' ama tama ahuaamencateyayno. Ñapa' ñeñt̃ña atarr sherbets, nañapa' ama es nesherbeno attoch nemo'ca pa'rrp̃ot̃ ama't̃ po'sapatrečhapa' o'ch nepyoñ.† 8 Ñama napa' ama't̃ napatensoñ Yomporecoppa' e'ñeca'ye oñochaya napatyenes. Tarraña Cristoñapa' añcha'ca'ye chorratossa Parets Puecamquëñ.

Allempo apataret̃ta Jesús Yomporecop
(Mt. 3.13-17; Lc. 3.21-22)

9 Allempoña huapa Jesús Nazaret̃ot̃ allara Galileo. Chap Juanesho allñapa' apataŋ Juan oño Jordanaso. 10 E'ñe apatue'pa' o' čha'nerrña Jesús oñoŋpa' allenta entan enet̃ atoraret̃. Alloñña e'ñe sohua'nmaña Parets Puecamquëñ e'ñe atet̃ entaŋ ñerra'mrrate' yeŋ o' sohua'nma entoŋ. E'ñe arr čhap Jesúsesho. 11 Allempoñapa' čha e'morratsa ñama ñoñets entoŋ atet̃ eñorena Yompor. Ñeñt̃ña ñoñetspa' atet̃ oten:

—Papa' ñeñteŋ Nechemereŋ ñeñteŋ atarr nemorrentena, p̃a atarr nocshatene'.

* 1:6 Ñeñt̃ ahuañchencllapa' arrapo' enteñ palestino'marnesha'. † 1:7 Ñeñt̃ atet̃ po'taruas pe't̃ esclavos o'ch pueyam̃psan pamo'mte' po'sapatrečh.

Allempo oneñeĩpa' topatenan Jesús, mueneñ o'ch atet p̄atan Jesús ñeñĩ ama pocteye' enteno Yompor

(Mt. 4.1-11; Lc. 4.1-13)

¹² Allempoña Parets Puecamquẽña' allenta anman Jesús all amayo. ¹³ Pa'tatsoch çharramat allo'tsena amayo; allña'pa' allo'tsa'yen pa'namen berroçhno. Attoña allpa' o' huapoña oneñeñ mueneñ o'ch atet p̄atyes ñeñĩ ama pocteye' enteno Pompor Parets. O'ña topatuahueña'pa' allempoña'pa' huaçha'toña ñaña Yompor po'millañoñeñaneshar; ñetña sherbošetña Jesús all.

Allempo e'ñe ñenmaĩ torrena Jesús Partsocop all Galileo

(Mt. 4.12-17; Lc. 4.14-15)

¹⁴⁻¹⁵ Allempoña yottam̄pset Juan allcha' mueroçhtachet, Jesúsña'pa' allenta ahuerr Galileo. O'ña çherr all ñaña'pa' serrpare'tatuerranet ñeñĩ e'ñe cohuen ñoñets ñeñĩ huetsa Yomporshot alloch yequeshperra. Ñeñĩña'pa' atet otuerranet:

—Te'ña'pa' o' etsoterra yetñats, o' çherrmoch allempoch atarr ayochreshaterra Yompor. Socoppa' añ poctetsa o'ch soctape'çherr ello cohuen Yomporcop ñaña o'ch same'ñerra ñeñĩ e'ñe cohuen ñoñets allochca'yeña sequeshperra.

Atto Jesús'pa' çhore'tosan pa'tatssheña ñeñĩ e'ñe caca torrenet rromuet

(Mt. 4.18-22; Lc. 5.1-11)

¹⁶ Allempo Jesús'pa' chopeñe'chyen all sa'patop̄ño'mar; ñeñĩña sa'ppa' añ pa'so'cheñ Galileas. Allña'pa' entnoman Simón epuet pa'mo'nasheñ Andrés. Ñetña'pa' all terrayenet e'ñe all sa'po tarro'mar ñetpa' ñeñĩ po'taruas penet. ¹⁷ Jesúsña'pa' atet otosanet:

—Te'ña'pa' o'ch notas: Soçta'n na attoch neyochresha' neperres. Ñeñĩ atet sepena ahuatoteñ e'ne' cac te'ña'pa' o'ch neyçhaterres attoch se'nerr ñaña acheñ ñeñĩcha' same'ñaterra.

¹⁸ Ñetña'pa' allorocma na'nmuert po'terrayapa' o' coçet Jesús.

¹⁹ O'ña meterrerr a'yenteye'pa' allña'pa' entuerranerr ñaña Jacobo† epuet pa'mo'nasheñ Juan; ñeñĩpa' Zebedeo puechemerasha'. Ñetña'pa' po'ñoñto'tsa'yenet all a'cohuenetyenet po'terraya. ²⁰ Jesúsña'pa' çhore'tuerraneterrpa' atet otuerraneterr ñamet:

—Te'pa' o'ch soçta'n saña.

Ñetña'pa' allenta sa'nmet pomporret Zebedeo all po'ñoñto epuet ñaña pa'taruasañret. Ñetpa'çho'ña coçet Jesús attoch pueyochresha' perranet ñamet.

Allempo Jesús'pa' entap̄ puesheñarr yacma ñeñĩ chorrena oneñeĩ

(Lc. 4.31-37)

²¹ Atteña'pa' ahuanmuert ñaña anetso Capernaumo. O'ña çhap añ yetñatsro allempocma amesen judionesha', allña Jesús'pa' be'tosos judionesha' po'prahuo, all yeçhatyesosanet. ²² Allempo serrpare'tatuanet Jesús, acheñenesha'ña'pa' epaye' cohuanrrorteñet ñeñĩ atet yeçhatenanet ña. Tarro'mar ñapa' atarr cohuen yeçhatenanet atet ñerra'mrrate' ñeñĩ allsensarettetsa Partseshot. Judionesha' pa'm̄cha'tareternesha' ñeñĩ atarr etsotayene' ñoñets ñeñĩ atet anaret, ñetña'pa' ama e'ñeye' atteye' yeçhateneto. ²³ Puesheñarrña yacma ñeñĩ allo'tsen puerahuo, ñeñĩña'pa' añ chorrenaya oneñeñ. Ñaña rranare'tapa' atet otapan Jesús:

²⁴ —Eso'mare'tcha'ña erroç peçosey Jesús'o, p̄a ñeñteç nazareto'marneshaç. ¿Añecop̄te' pehuena o'ch p̄a'çhencaterrey? Napa' o' neñotapaç. Papa' atarr Partsoç añ pellsensene' Pompor ñeñĩ atarr nanac Parets.

²⁵ Tarraña Jesús'pa' ama muenache o'ch eñorana'cha. Ñaña'pa' atet och:

—Pemma, te'pa' çhoña queçhpa'nerre'ña añ acheñer.

† **1:19** Jacobopa' ñeñĩfara ñeñĩ sochenet Santiago.

²⁶ Oneñeñña' cha atanman yacmapa' alla o'shshe'ma. Oneñeñña' cha rranare'tnoma allempo quechpa'nerran acheñ. ²⁷ Acheñenesha'ñapa' cha atarr torats ñanet pueyo'chret. Ñeñña' atet otanna'tyeset:

—Ta'mca'ye, erro'tente'ca'yeña Jesús po'ñoñ; po'poñon'fepa'tca'ye ye'chatyen. Ñeñña' erro'tente'ca'ye. E'ñe atet pena po'ñoñ atet ñerra'mrrate' ñeññ allsensarettetsa Yompore-shoñ. ¡Ama't oneñeñ erro't otenpa' atet'cho' ñateñ, e'ñech ame'ñateña!

²⁸ E'ñe mamecmapa' o' e'ñe serrpare'tuahuet allampaño'mar Galileo atet ña'yena Jesús.

Allempo a'crratosan Jesús Simón Pedro pa'so'mue

(Mt. 8.14-15; Lc. 4.38-39)

²⁹ Allempoña' cha'nma'cherret puerahuo'tpa' arr ahuanmuet all ye'chena Simón ñaña pa'mo'nasheñ Andrés. Allña' añ co'ta'nmue' Jacobo ñaña Juan. ³⁰ Allña Simón pa'so'muepa' cha atsna'ten, cha huoraten, alla ñanena po'mayo. Otapet Jesús:

—Simón pa'so'muepa' cha atsna'ten.

³¹ Allempoña Jesús'pa' ponmosana atsnañe'pa' rremota'tos pototpa' cha echantose' cha metuerretsña atto huoraten. Allempoña o' metua po'urateña'pa' allenta tanta o' agapapanet e'ñe cohuen o' yema'tapanet.

Allempo Jesús'pa' a'crraterran shonte' pa'namen atsnañe'chno

(Mt. 8.16-17; Lc. 4.40-41)

³² Ñeñte yetrocma allempo ellerren o' emuena atsrre'tpa' acheñenesha'ña huapatyesnenet Jesúsesho allohuen ñeññ atsna'tyets ñaña ñeññ chorra'yena oneñeñ. ³³ Hua'cha'tyesoña allohuen anetso'marnesha', ñeñña' alla shontoset allotecma be'tenet pocollo. ³⁴ Jesúsña allempopa' e'ñe a'crratyesuapanet, ama't shonte' pa'namen atsnañso'chno ñeññ osyenahuet. Ama't ñaña shonte' acheñenesha' ñeññ chorra'yena oneñeñ ñeñña'cho'ña e'ñe quechpatyesuapanet oneñeñ ñeññ chorra'yenahuet. Jesúsña'pa' ama muenatano oneñeñ attoch eñorana'tnomet, tarro'mar ñetpa' e'ñe eñoteñet ñapa' ñeññca'ye Cristotets.

Allempo Jesús'pa' serrpare'tatyesnoman acheñenesha' errañaren Galileo'mar

(Lc. 4.42-44)

³⁵ Tsapa'ña e'ñe ahua'tecma tanta'muena Jesús, ama e'ñe orretuena' cha'nma'muen ñeñte anetsro't ahua'muen all ama acheñempaño'yaye allcha' ma'yocha'muena. ³⁶ E'ñe o'chtatsapa' ahua'muen ñaña Simón ñaña po'psheñe'chno ñeññ epuet ta'muena. Ñetpa' o'ch e'nereta' Jesús. ³⁷ Allempoña entosetpa' atet otoset:

—Papa' allohuen acheñenesha' chocmaca'ye e'nenpet.

³⁸ Ñaña'pa' otapanet:

—Te'pa' o'ch ahuey po'poñ anetso ñeññara allampaño'mar allpa'cho'ña o'ch neserrpare'tatyesnomanet tarro'mar napa' ñeññecopca'yeña nohuapa.

³⁹ Allempoña'pa' chopeñe'chyes Jesús errañaren Galileo'mar, serrpare'tatyesanet e'ñe ñet po'prahuet. Ñaña ñeññ chorra'yena oneñeñ, ñaña'pa' e'ñe quechpatyesuerranet.

Atto Jesús a'crraterran puesheñarr yacma ñeññ aptsarñat

(Mt. 8.1-4; Lc. 5.12-16)

⁴⁰ Allempoña'pa' huapoña ñaña puesheñarr yacma ñeññ osen puetsarñats ñeññ otenet lepra. Chap Jesúseshopa' concorpana'tosana Jesús'pa' atet otos:

—Ñerra'm ña muenatspa' ña ñeññep atarr ahua'mencatesha' ña'crrataye'cherren allochña'pa' attoch e'ñe cohuen entuerren acheñenesha'.

⁴¹ Jesúsña'pa' e'ñe cohuen muerapya ñeñño'marña anretapa' allenta a'p'lle', atet och:

—Napa' nemneñca'ye, metuerrepa'ña peptsarña allochña'pa' attoch e'ñe cohuen entuerre' allohuen acheñenesha'.

⁴² Yacmañapa' allorocmuepa'tcha' metuerña pueptsarña cha cohuenterrtsa.
⁴³⁻⁴⁴ Jesúsña'pa' alla otererr:

—Te' atto o' na'crraterre'pa' po'ño'ch ama't e'ñe puesheñarrapa' amach p'otap'sa'tatsche ama't mamesha. Corneshachña pegatena' all peptsarse't. Atet nane't Moisés ñoñets añ acheñrecop ñeñtcha' a'crrataretterrtsapa' te'ña'pa' o'ch es ñanom ñeñtcha' p'apos all ñeñt Yomporecop. Allochña'pa' attoch e'ñe cohuen entuerre' allohuen acheñenesha'.

Attotca'yeña Jesús'pa' mueñe o'ch ahuo' corneshesho.

⁴⁵ Ñaña'pa' allempo ahuo'pa' e'ñe serrpare'tatyesuanman allohuen acheñenesha' ñeñto'marña e'ñe ña pa'metare'teño'tpa' o' erracmañen eñotuet ñeñt atet pa'yena Jesús. Ñeñto'marña Jesús'pa' ama eshcaye' seno anetso all shontena acheñenesha'. Ñapa' alla chopeñe'chyen a'yo'mar all ama acheñempaño'yaye. Tarraña ama't atet penañ acheñenesha'ña'pa' allemateñ huacha'teññañet ñeñt shontenoya ama't all.

2

Atto Jesús a'crraterran ñaña ñeñt echarraña (Mt. 9.1-8; Lc. 5.17-26)

¹ O'ña met allponmat Jesúsña'pa' o' alla cherrerr anetso Capernaumo. Acheñenesha'ña'pa' e'mare'chet o' alla cherrerr pocollo. ² Allempoña'pa' o' alla shonterrñañerr acheñenesha'. Atteña'pa' o'huañ epuet o'pono pocollo. Ama't allot be'tenet pocollo'pa' o'huañ epuet. Jesúsña' allpa' serrpare'tatapan acheñenesha' Yompor po'ñoñ. ³ Atteña'pa' huapatam'psoñet ñaña echarraña ñeñtña'pa' pa'tatssheña ñeñt anmam'pene' puechecna'pot. ⁴ Ñetpa' añ muenenetañ o'ch be'tososet o'ch e'ñe noset Jesúsesho, tarraña shonte' acheñenesha' ñeñto'marña ama eshcaye' abe'tosetoña atснаñeñ attoch chapachet e'ñe Jesúsesho. Atteña a'tapatoset enot pocollato, ñeñtña pocollpa' patsopo'. Ñetña'pa' rrorosetña ñeñt pocollatar enot e'ñe ñeñtecoptaro'tsen Jesús all patso'. Alotña a'suata'm'psosetña echarraña e'ñe puechecnape'na. Attoña chapachet e'ñe rrocho allot'sen Jesús. ⁵ Jesúsña'pa' eñotapanet ñetpa' atarr nanac yemteñet. Allempoña ñapa' otapan echarraña:

—Te'ña neyochre, pa' po'chña'pa' o' a'pretna'huare'tterra.

⁶ Ñehua, allña'pa' allot'sa'yen ñaña puesheña'tets ñeñt atarr etsotayenayeñ ñoñets ñeñt atet anaret judioneshacop. All anorrcha'tyenet ñetña'pa' atet otatse'tyeset pueyo'chreto: ⁷ “Eso'mare'tña atet eñeña añ acheñer. Ñeñt atet otenpa' ñapa' chaca'ye achñare'tenanña Yompor tarro'mar arr patsropa' ama't e'ñe puesheñarra ama eñalleña ñeñt peretnene' ochñarets ñapñaña Yompor peretnene' ochñarets.” ⁸ Jesúsña' pueyo'chropa' eñotanet ñeñt atet otyenet ñet pueyo'chreto ñocop. Allempoña Jesús'pa' atet otanet:

—Sapa' eso'mare'tcha'ña atet soctape'chatse'tyesña seyo'chro. ⁹ Sapa' chate' soten ñeñt atet o' notue echarraña po'chñar o' a'pretna'huare'tta, ñeñt'pa' ama torrapahuoyaye. Sapa' añña atarr torrapo' senten attoch na'crrater, choncha'ña ote': “Petantena, pechta'nen pemue'pa' o'ch pechope'chnen.” ¹⁰ Ñehua, napa' o'ch neñotatas na Ñeñten Acheñetosets, napa' ñeñten apareten llesens attoch nach peretnerre' ochñarets añ patsro.

Ñeñto'marña Jesús allempo'pa' atet otan echarraña:

¹¹ —Te'ña napa' o'ch nota'p: Petantena, pechta'nen pemue'pa' o'ch pechope'chnen, ahuenep' pepacillo.

¹² E'ñe otue' atet'pa' echarrañaña'pa' cha tantetsa e'ñe allorocma, o' cheta'nenan po'mue'pa' cha'nen allot. Allohuenña acheñenesha' e'ñe entueñet; ñetña'pa' cha atarr

cohuanrrortapueñet. Ñeñto'marña ñet allempopa' atarr cohuentatyehñañet Yompor. Ñetña'pa' atet otyenet:

—Yapa' ama't ahuatapa' ama yentareña atet ñeñt atarr cohuen.

Allempo Jesús'pa' hua'ña'nman Leví attoch pueyochresha' per
(Mt. 9.9-13; Lc. 5.27-32)

¹³ Jesúsña'pa' alla ahuererr sa'patopño. Allohuen acheñenesha'pa' alla huacherrñañeterr, ñaña'pa' yechatyesapanet. ¹⁴ O'ña yechatuanetpa' o' meterrerr Jesús allot, allña oñenpa' entnoman ñaña Leví* ñeñt Alfeo puechemer. Ñaña'pa' alla anen allecma cobra'yenan acheñenesha' quelle ñeñt gobiernocop. Jesúsña'pa' atet otosan Leví:

—Te'pa' o'ch pōcta'n attoch neyochresha' nepperreñ.

E'ñe otue' Jesús atetpa' Levíña'pa' cha tantnomtsapa' allenta cotan Jesús.

¹⁵ Allempoña chap ñaña allempo Jesús'pa' alla rrallme'chen Leví pa'paclo. All rrallme'chapreteñ shonte' acheñenesha' ñeñt po'taruas pa'yenet ñamet o'ch cobra'yenan acheñenesha' quelle ñeñt gobiernocop. Ñetpa' atarr ashcañnesha' entenamet acheñenesha'. Ñaña allo'tsa'yen shonte' po'potantañechno ñeñt atarr ochñañenesha' entyen acheñenesha'. Ñetña'pa' all anorrcha'tyenent all anen Jesús epuet pueyochresha'. Tarro'mar shonte' acheñenesha' ñeñt co'ta'huanene' Jesús. ¹⁶ Añña fariseonesha' ñeñt allo'tsa'yen ñaña ñeñt etsotayenayeñ ñoñets ñeñt atet anaret ñeñtaret judioneshet, ñetña allempo enteñet Jesús all rrallme'chapretenan ñeñt atarr ochñañenesha' ñetña'pa' allenta otoñet pueyochresha':

—Eso'mare'tña ñeñt semaestror sepenpa' rrallme'chapretenañña añ acheñeneshar ñeñt puehquẽño'te'na cobra'yene' acheñenesha' ñaña epuet acheñenesha' ñeñt atarr ochñañenesha'chno.

¹⁷ Atet e'manet Jesús, ñaña'pa' atet toma'ntatanet:

—Ñeñt e'ñe huomech entetsapa' ñetpa' ama e'neñetoña apartañ. Añña ñeñt at-sna'tetspa' ñetña'pa' chocma e'nenet ñeñtcha' a'crraterrahuet. Napa' ama añecpaye' nohuapo attoch ne'chore'tos ñeñt e'ñe atet entetsañ ñetpa' e'ño' cohuen es pa'yenet. Napa' añecopña nohuapa attoch ne'chore'tos ñeñt atarr ochñañ entyetsa. Allochña'pa' attoch o'ch cotape'cherret ello e'ñe cohuen Yomporecop.

Allempo Jesús'pa' eñotatanet atetcha' tore'tet Yomporecop ñeñt po'ño'ch sherbets
(Mt. 9.14-17; Lc. 5.33-39)

¹⁸ Parrochña allempo tore'tyena† Juan pueyochresha' Yomporecop ñaña fariseonesha' pueyochresha', puesheña'tetsña acheña'pa' huach'a'tet Jesúsesho, ñetña'pa' atet otoset Jesús:

—Juan pueyochresha'pa' tore'tetset Yomporecop; fariseonesha' pueyochresha'pa'cho'ña tore'tetset ñamet Yomporecop. Pa'ña peyochresha'pa' eso'mare'tña amaña tore'teneto.

¹⁹ Jesúsña'pa' atet toma'ntatanetpa' ñeñt'pa' atet otanet:

—Ñeñt ahua'ñaretechno all rrallme'chapreteñet ñeñt e'ñe errete' sena'tetsa, ama pocteyaye o'ch yotamet “amach es serra'yestatsto” tarro'mar ñeñt'pa' atet coshapreteñet ñeñt sena'tetsa. Amachña cha tore'teno allempo allo'tsenmeñ parro ñeñt errete' sena'tetsa. ²⁰ Tarraña ñerra'm esempo machayo'ta sa'nerranet ñeñt sena'tetsa, ñeñtña parro yemuetyenapa' allempoña ñetpa' e'ñe puellquẽño'tet quechpa'huerretcha' puer-rar, amach arrenaye' enterreto. Ñeñt'pa' attochña tore'terret allempo Yomporecop e'ñe po'ño'ch. Arrpa' allohua huañ ñeñt atet Jesús toma'ntata ña sena'tostsa.

* **2:14** Leví'pa' ñeñtara ñeñt sochenet Mateo. † **2:18** Añ tore'teñetspa' añecop o'ch yetorra Yomporecop. Amach añecpaye atomat, ñeñt'pa' añecpa mameshacop o'ch yequechpa' yerrar.

²¹ Elloñapa' o' alla toma'ntaterraneterr ñeñt' atet ye'chen judionesha' arr patsro ñeñto'marña atet otanet:

—Yapa' ñerra'm mellashañ yeshtampa' amach yelltatsche emarr lletamtso. Tarro'mar ama't atet ye'patsechpa' ñeñtpa' e'ñech orrena yelleñ tarro'mar ñeñt' emarr lletamuetspa' ñerra'm esempo yatsama'tam'pespa' 'chach chellama'ta 'chach martse'tatanña shetamtsoshe'm. Ñeñtña yelltenpa' allo'nach sen rrrartse'tats nanac.

Ñeñtpa' attoña Jesúsapa' eñotatanet ña poctapña e'ñe etserra.

²² Jesúsñaapa' alla toma'ntaterraneterr po'poñ ñeñt' atet ye'chen judionesha' o'ch ye'chcatenet pa'rrom orrot. Ñeñto'marña atet otanet:

—Ama't puesheñarro'feyapa' amach yeshatstoña vinos emasa mellasha'mañ orroto ñeñt' aye'chcataret pa'rrom. Tarro'mar ñerra'm atet ye'pe'pa' o'ch chasa'ña vinospa' 'chach a'ptsan orrot, vinosñaapa' 'chate' e'ñe shebhua, ñeñtña orrotpa' ama't mameshapa' amach es sherberro. Añña ñerra'm emasa vinos arrcha' yeshe' emerra orroto ñeñt' aye'chcataret pa'rrom.

Ñeñtpa' 'cho'ña attoña Jesúsapa' eñotatanet ña poctapña e'ñe etserra.

Allempo Jesús pueyochresha' taso'tam'pesyesnomuet trigo añe yetro allempocma amesen judionesha'

(Mt. 12.1-8; Lc. 6.1-5)

²³ Allempoña 'cherrerr pam'tarr allempo 'chocma amesen judionesha'. Allempoña Jesúsapa' arr oñem chetso'mar epuet pueyochresha'chno. Allempo oñenet chetso'mar pueyochresha'ñapa' taso'tam'pesyesnomuet puechmã'tets trigo. ²⁴ Fariseonesha'ñapa' ñeñt' entahuet ñetñapa' allenta otyeset Jesús:

—Pecue' eso'mare'tña peyochresha'ñapa' atet penet ñeñt' ama pocteyaye o'ch atet ye'pa tarro'mar te'pa' añe yetropa' ñeñt' atet anaret ahuatoteñ allempocmach yamesen.

²⁵ Jesúsñaapa' atet otanet:

—Sapa' ama'trra selleyareña ñeñt' atet pa' ahua't David allempo pallta'psa ñeñt'cha' rret allempo cheporra'nma epuet ñaña allohuen ñeñt' cotene'. ²⁶ Ña allempopa' be'tosos Yompor pa'paclo, allñapa' rrosan pan ñeñt' atma'ntataret atet ñerra'mrrate' ñeñt' nenet all Partsocop. Ñehua, ñeñt' panpa' ama pocteyayñe o'ch esesha' rre'. Ñeñtpa' añach ñapue't rrene' cornaneshachno, ñeñtpa' e'ñe atet anuaret judioneshacop. Ñeñtña panpa' o' rros David, rratosan ñaña allohuen ñeñt' epuet. Ñehua, ñeñtpa' tarrempo atet pe't David allempo judionesha' po'cornanesharpa' añ pa'm'cha'tareter pete't Abiatar.

²⁷ Jesúsña alla o'terraneterr:

—Añ yetro allempo yamesen ñeñtpa' añecop anaret acheñeneshacpay ñeñt'cha' yesherbene'. Amaña añecpaye' anareteña yetñats ñeñt'cha' yesherben ya. ²⁸ Ñeñto'mar na Ñeñten Acheñetosets, ñeñten allsensareten, naca'yeña atet otets este' poctetsaña ñeñt'cha' atet ye'pa añe yetro allempocma yamesen.

3

Allempo Jesúsapa' a'crraterran ñeñt' chelletsapot

(Mt. 12.9-14; Lc. 6.6-11)

¹ Po'pocheñoña Jesúsapa' alla be'tosuener judionesha' po'prahuo. Allñapa' allo'tsen puesheñarr yacma ñeñt' 'cha chellena pot. ² Fariseonesha'ña allpa' Jesúsapa' atarr cohuana'tyenet attoch eñchet ñato'rraña a'crratenanerrcha' acheñ añe yetro allempocma amesenet. Ñerra'm o'ch a'crratenanerr ama't puesheñarra añe yetro allempo amesenet, allempoñapa' esheccha' a'metam'peñeta' añcha'taretesho. ³ Allempoña Jesúsapa' otan ñeñt' chelletsapot:

—A'pon, pa'tomos arrma.

⁴ Jesúsñapa' atet otanet:

—¿Erroñena'tña ñeñt e'ñe pocte' senten ñeñtcha' atet yeḡa añ yeḡro allempo yamesen? Ñato' o'ch atet yepé' e'ñe cohuen po'psheñeñ, amapa' ñato' o'ch atet yeḡoñ ñeñt ama cohuenayaye. ¿Ñato' añte' pocte' senten o'ch ya'crrach acheñ amapa' añte' pocte' senten amach ya'crratatsche ḡhachña yemtsatach?

Ñetñapa' ama't puesheñarroñetapa' ama eseshaye' anapaye. ⁵ Allempoña Jesúsapa' cohua'yasanet, ama't mamesha ama pocteye' entenaneto, atarr llecateñet tarro'mar ñetpa' ama mueneneto o'ch ḡhapanet cohuen pueyoḡhreto. Allempoña Jesúsapa' otan yacma ñeñt chelletsa pot:

—Te'pa' o'ch notaḡ, petapuerr ḡot.

E'ñe otue'pa' ñaña'apa' allentepa'tcha' tapuerranña pot, o' e'ñe cohuenterra pot.

⁶ Fariseonesha'ña ḡha'nmaḡherretpa' coḡape'chatanna'tet epuet Herodes pueyoḡhresha', ñetñapa' Jesúsapa' atarr o'patenet attoch muetsatachet.

Shonte' acheñenesha' ñeñt huach'a'tatsa sa'patopño all enteñeta' Jesús

⁷⁻⁸ Allempoña Jesúsapa' ahuer sa'patopño'mar pueyoḡhresha'na. Shonte acheñ galileo'marnesha'pa' coḡa'huanmet ñamet. Ñaña shonte' po'potantañeḡhno acheñenesha' ñetña allempo e'mare'teñet Jesús ñapa' atarr cohuen orrtatyen ñetpa'ḡho'ña allenta huach'a'tyesoñet ñamet. Allemañeñ anetsoḡ huach'a'tyeset Judeoḡ, Jerusaléñoḡ, Idumeoḡ, Jordanas yonita'noḡ, ñaña allo'marnesha' ñeñt huetsa Tiroḡ ñaña Sidónoḡ. Ñetpa' añ atarr mueneneto o'ch enteñeta' Jesús. ⁹ Shonte' nanac acheñenesha'. Attoch ama atarr queḡhcare'teñe Jesús acheñenesha' ñeñt shontetsa, ñaña'apa' otan pueyoḡhresha':

—Chocmach sehupaton noñt.

¹⁰ Allempo Jesúsapa' a'crratyasan shonte' atснаñeḡeḡhno ñeñto'marña allohuen ñeñt atсна'tyets ñetña allempopa' atarr emchorreñet Jesús, añ atarr mueneneto o'ch a'ḡlloset Jesús. ¹¹ Añña oneñeḡeḡhno ñeñt chorra'yenaya acheñ ñeñt'pa'ḡho'ña allempo entoset Jesúsapa' allepa'tcha' rromañḡsosyeta pa'rrḡoḡ, rranare'tyesosetpa' atet otoset:

—¡Pepa'tña Parets Puechemereḡ!

¹² Jesúsñapa' ama muenatano oneñeḡeḡhno o'ch oteñet ñapa' po'ñoḡh Parets Puechemer.

Allempo Jesúsapa' acran ḡharrasheña ñeñt puechetsa epsheña ñeñtcha' llesensa'

(Mt. 10.1-4; Lc. 6.12-16)

¹³ Allempoña Jesúsapa' ahuo' aspeno. Alloñña agotatosan ñeñt e'ñe cohuen enten ña ñeñtcha' pueyoḡhresha' ḡa'. Ñeñt agotatenpa' ñetña allenta ahuanmuet ñesho. O'ña ḡhach'a'tuetpa' ¹⁴ ñaña'apa' napanet ñeñtet ḡharrasheñet ñeñt puechetsa epsheña, ñetñapa' ñeñtcha' e'ñe parro chopeñe'chyen ñaña ñeñtcha' llesensen attoch serrpare'tyerret Yompor po'cohuenña. ¹⁵ Ñaña o'ch apuerranet llesens attoch queḡhpatyeret oneñeḡeḡhno acheñenesha'. ¹⁶ Ñeñt llesensa' ñeñt'pa' añ pa'so'ḡhñeḡhno: Simón ñeñtara o' sochererr Pedro, ¹⁷ alloḡpa' ñaña Jacobo ñaña pa'mo'nasheñ Juan ñeñt Zebedeo puechemeresha'; ñetñapa' o' socherraneterr Boanerges ñeñt yoten yeñoño Tecorena'tar. ¹⁸ Alloḡpa' ñaña Andrés, ñaña Felipe, ñaña Bartolomé, ñaña Mateo, ñaña Tomás, ñaña Jacobo ñeñt Alfeo puechemer, ñaña Tadeo, ñaña ñeñt po'psheñeñ Simón ñeñt cananistanesha' ñeñt atarr torratse't pa'netsrecop. ¹⁹ Alloḡpa' ñaña Judas Iscariote ñeñtcha' pomuerre' tsapatonet Jesús.

Atto puesheña'tets oteñet Jesús ñapa' oneñeño' po'huamencot queḡhpatenanña po'potantañ oneñeḡeḡhno acheñenesha'

(Mt. 12.22-32; Lc. 11.14-23; 12.10)

Allempoña Jesúsapa' o' alla ḡherrerr pocollo pueyoḡhresha'na. ²⁰ Allña'apa' o' alla shonerrñañerr allohuen acheñenesha', ñeñto'marña allempopa' ama eshcaye' rreneto.

²¹ Allempo e'mare'ch Jesús pamo'tsesha' atet p̄a'yenapa' ñetñapa' hua'cha'tet o'ch ereta' Jesús tarro'mar ñetpa' otenapuetañ ñato' čhoťe' o' mospaña Jesús.

²² Puesheña'tetsña ñeñť atarr etsotayenayeñ ñoñets ñeñť atet anaret ñetpa' Jerusaléñoť hua'cha'tet. Ñetñapa' atet otyesoset Jesúsocop:

—Añ yacmarpa' añaca'ye chorrenaya Beelzebú ñeñť pompor pen allohuen oneñeťečhno; ñeñťca'yeña ahuamencat pene' attot quečhpatenanña oneñeťečhno acheñenesha'.

²³ Allempoña Jesúsapa' chore'tan acheñenesha', allempoñaapa' atet otapanet:

—O'ch notas, po'ñočh oneñeťpa' amaca'ye huapore'tanneno. ²⁴ Atet ñerra'm paterr am'cha'taret ñerra'm čho elloptannena pueyochresha' ñeñťña atto am'cha'tarettena čhach huañerrets amach allo'na huomencatneno. ²⁵ Attecmach p̄annerra ñaña ñeñť e'ñe pamo'tsna'tarecmuet p̄annenet ñerra'm čho elloptannenet e'ñe ñagattsetapa' ñeñťña atto huomencatenetpa' ñeñťpa'čo'ña čhachca'ye huañerrets. ²⁶ Attecmach p̄annerra ñaña oneñeť pueyochreshačhno, ñerra'm oneñeťečhno e'mone'tannenet, ñerra'm tantanna'ta oneñeťečhnopa' ñeñťña atto huomencatenetpa' ñetpa'čo'ña čhachca'ye huañerrets amach allo'na huomencatneneto. Ñeñťo'marña po'ñočh oneñeťpa' amate' errotenoť huapore'tanna'teto e'ñe ñagattseta.

²⁷ 'Ñehua, yapa' yeñoteñ ñeñť atarr ahuamencattetsa atto atarr ahuamencattena oneñeť, ñañaapa' e'ñe po'huamencoť cohuañpesyenan allohuen e'ñe cohuen ñeñť pa'paquell p̄a'yen. Tarraña ñerra'm esempo o'ch huapoña ñeñť atarr ahuamencatesha' ñeñťcha' metanose'ña po'huamenc atet ñerra'm na Nompör, ñeñťcha'ña rromose' o'ch huancos, allochñapa' o'ch be'čosos all ñeñť pa'paquell p̄a'yen o'ch e'ñe puerratañpsos ñeñť allpon o'patyena ña.

²⁸ Jesúsapa' alla otarraneterr:

—Napa' o'ch notas, po'ñočh allohuen pa'namen sosya'tsañečhno ñeñť ama poct-eye' enteno Yompor ama't ñaña achm̄are'tanna'teñets ñeñťpa' ap̄retna'po' nenteñ. ²⁹ Tarraña ñerra'm esesha' añ achm̄are'teññañet Parets Puecamquēñ ñeñťñapa' amaca'ye ap̄retna'pahuoye' nenteñe. Ñeñťña po'chñaretpa' amachca'ye ap̄retna'pahuoterro e'ñe tayoteñ errponohuañen.

³⁰ 'Ñehua, ñeñťpa' atet otanet Jesús tarro'mar ñetpa' atet otyeñet Jesús, ñapa' año' chorrenaya oneñeť ñeñťo'ña ahuamencat pene'.

Allempo huapoña Jesús pachor ñaña pa'mo'nasheñnesha'
(Mt. 12.46-50; Lc. 8.19-21)

³¹ Allempoñaapa' huapa Jesús pachor epuet ñaña pa'mo'nasheñnesha'. Chapuet allpa' ñetñapa' alla tom'cha'toset a'yot, alloťña agotatoset Jesús. ³² Ñeñť anorr'cha'tyets epuet Jesús ñeñť arrotam̄penaya, ñetñapa' atet ochet:

—O'ca'ye huapa p̄achor ñaña pemo'nasheñnesha'. Ñetpa' a'yote'tsa'yenet, p̄aca'ye e'nenet.

³³ Jesúsñapa' atet otanet:

—Ama't señoteñe ñeñť e'ñe po'ñočh nachor nepen ñaña ñeñť e'ñe po'ñočh nemo'nasheñ nepen.

³⁴ Allempoñaapa' cohua'yesan acheñenesha' ñeñť arrotam̄penaya all anorr'chenet. Allempoñaapa' atet otarraneterr:

—Napa' añca'yeña ñeñť po'ñočh nachor nepen ñaña ñeñť po'ñočh nemo'nasheñnesha' nepen. ³⁵ 'Ñehua, ama't erra'tsena ñeñť e'ñe atet p̄ohuene' ñeñť atet muenen Nompör ñeñť pue'ntaño'tsen ñeñťca'yeña e'ñe po'ñočh nemo'nasheñ nepen ñeñťña nočh nepen ñeñťña nachor nepen.

4

*All toma'ntatanet Jesús ñeñi a'parre'tene' puerets
(Mt. 13.1-9; Lc. 8.4-8)*

¹ Jesúsñapa' alla ye'chaterranerr acheñenesha' e'ñe alla sa'patopño. Allña emchorra'huererr shonte' acheñenesha'. Ñeñto'marña Jesúsapa' a'tap noñtopa' ahuañpes mame' allpononet allñapa' anorros noñto e'ñe all sa'po. Acheñenesha'ña allohuenetpa' e'ñe sa'patopño'tsa'yenet all masto. ² Allñapa' esocmañen serrpare'tatenan acheñenesha' pa'namen toma'nteñtso'chno. All ye'chatyenanetpa' atet otanet:

³ —Se'mñoton añ ñeñt atet notenes: Ñeñña a'parrene' puerets ñañaapa' ahua' allcha' a'parre'tyenana' puepuer. ⁴ All a'parre'tyeñ patanta'tetsñapa' alla çhapyes toño'mar. Allñapa' hua'cha'tyesa ot e'ñe añyallme'chuenana' puerets. ⁵ Po'poñe'chnoñapa' alla çhapyes mapuetro'meso'mar all ama tama eñalle pats. Ama nanac o'pono'tseno patso ñeñto'marña mame'tollapa' cheparesuañ. ⁶ O'ña enome'ta'muen atsrre'tpa' alla a'uyatuer. Ama er'cha'tena' ñeñto'marña alla hueya'huerra. ⁷ Po'potantañña pueretspa' alla çhapyes allcha' chepares aj. Allpa'cho' mameshapa' cheparesuañpa' ajñapa' mameshapa' atesha'tua alla ca'matuerranña narmets alla a'cllatuer, ñeñto'marña ama ellom're'to. ⁸ Po'potantañe'chno ñeñtñapa' arr çhapyes all e'ñe cohuen patso. Ñeñtñapa' e'ñe cohuen chepares. Allempoña atesha'tuapa' o' ellom're'tyes. Atarr atonapa'tets ellom're'tyes—puecha'tetspa' ma'poch çharra' pue'llomer, po'pchañe'chnoñapa' pechapoch çharra' pue'llomer, po'pchañe'chnoñapa' çharroch çharra' pue'llomer.

⁹ Allempoña Jesúsapa' alla oterraneterr:

—Ñeñtes po'ño'ch ne'mñotene', çhaponasepa'ch seyo'chro ñeñt atet netma'ntatensa añ ñoñets.

*Atet otanet Jesús ñeñtecop atet toma'ntatyenanet
(Mt. 13.10-17; Lc. 8.9-10)*

¹⁰ Allempoña patmuerra acheñpa' o' ñap'amañ Jesús epuet ñaña pueyochresha' ñaña puesheña'tets po'potantañ ñeñt allo'tsa'yen, ñetñapa' atet ochet Jesús:

—Ta'm ¿est'e'ña petma'ntatenyaña ñorra'?

¹¹ Jesúsñapa' atet oterraneterr:

—Sa te'pa' Yomporña semnatene' attoch se'noterr ñeñt ama eñotpahuoyaye ama't ahuatoteñ atet penaña Yompor po'cohuenña atto ayochreshattena ña. Tarraña po'potantañe'chno ñeñt atta es puecha'yetsa, ñocpuetpa' ama eñoteñeto ñeñt atet atma'ntatare't ñoñets. ¹² Attoña ama't enteñetañ ñetñapa' amach erro'teno't es çhapahueto pueyo'chreto. Ama't e'mueñetañ amach çhenanetoña pueyo'chreto ñeñt atet ye'chateney Yompor po'cohuenña. Attoña amach cotape'cherreto ello cohuen Yomporecop attoch ñach peretnerrahuet po'chñaret.

*Arrpa' all eñotatanet Jesús ñeñt toma'ntatenanet ñeñt a'parre'tene' puerets
(Mt. 13.18-23; Lc. 8.11-15)*

¹³ Jesúsñapa' alla oterraneterr:

—Sapa' ama't mameshapa' are't se'notenoña ñeñt o' netma'ntatuasa ñorra'. Ñerra'm ama çhennaso seyo'chro ñeñt o' netma'ntatuasa ñorra'pa' erro'tenotuachñaca'yeña çhaponasaña seyo'chro allohuen po'poñe'chno ñeñt'cha' netma'ntaterr'serr tsapa'one't.

¹⁴ Allempoña Jesúsapa' eñotatanet ñeñt atet o' toma'ntatuanet ñoñets ñocpuet, ñeñt'pa' atet otanet:

—Ñeñt a'parre'tyene' puerets, ñeñtña pueretspa' aña'ye notenes Yompor po'ñoñ allempo serrpare'teñet. ¹⁵ Añ puerets ñeñt çhapyets toño'mar ñeñt'pa' añ notenes acheñenesha' ñeñt e'mñotenayeñ Yompor po'ñoñ. Allempo e'mñotuetpa' allorocmach huapa one'ñe't o'ch alla puerratan'perranet Yompor po'ñoñ ama't allpon ñeñt eñotetañ

pueyočhreto. ¹⁶⁻¹⁷ Ñaña ñeñt čhapyesets mapuetro'meso'mar ñeñtpa' añ notenes acheñenesha' ñerra'm esempo e'mñoteññañet Yompor po'ñoñ e'ñech allorocma pocsheñesha' aguëññañetañ Yompor po'ñoñ. E'ñech cohuen ame'ñeretañ tarraña ñeñtpa' mamecpach atet penet. Tarro'mar ñetpa' e'ñe atet penet ñerra'mrrate' narmets ñeñt chepuets mapyo amach eñalle puerech. Tsapatonetña ñerra'm o'ch huapanet topateñets ñeñtcha' mueročhtatahuet tarro'mar ñetpa' o' ame'ñeretañ Yompor po'ñoñ, ñetñapa' allorocmach alla quečhpurrñañet Yompor po'ñoñ. ¹⁸ Ñaña po'poñečno puerets ñeñt čhapyets ajmo'mar ñeñtpa' añ netma'ntatena po'potantañ acheñenesha' ñeñt e'mñotenayeñ Yompor po'ñoñ. ¹⁹ Ama'tcha' čhapanetañ pueyočhreto tarraña ñetpa' allo'nach senet e'ñech aña atarr cotape'chenet ñeñt lleca'yenet arr patsro ñeñt e'ñe ñocueta. Añach muenenet o'ch esocmañen es echyenet tarraña ñeñtpa' čhaca'ye shequënanet. Attach pa'namen ye'chatse'tyenet. Attoña huenanet topateñets ñeñto'marña ñetpa' amach errotenot orrtatoñetoña ñeñt e'ñe cohuen enten Yompor. Ñetpa' e'ñe atteta ñerra'm narmets ñeñt čha ca'mateñ ajma' ñeñto'marña amach errotenot me'teneto o'ch ellomre'tyeset. ²⁰ Ñaña añ puerets ñeñt čhapyesets e'ñe cohuen patso ñeñt e'ñe cohuen cheparsatspa' ñeñña toma'ntenaya po'potantañ acheñenesha' ñeñt e'mñotene' Yompor po'ñoñ. Ñoñetsñapa' e'ñech cohuen čhenanet pueyočhreto. Ñetñapa' ñeñtet po'ñoč orrtatenet ñeñt atarr sherbets Yomporcop. Attoña ñetpa' e'ñe atet penet ñerra'm narmets ñeñt atarr me'tets—pate'tets ma'poch čharra' pue'llomer, po'poñpa' pechapoch čharra' pue'llomer, po'poñpa' čharroch čharra' pue'llomer.

*Arrpa' all toma'ntatanet lampareñ atto čhoyo'tampeney
(Lc. 8.16-18)*

²¹ Jesúsñapa' alla toma'ntaterraneterr, ñeñtpa' atet oterraneterr:

—Ñerra'm esempo ya'llchaten lampareñ, ñeñtpa' ama añecpaye' yehuapateñe o'ch alla ye'rramañpsos coymño. Ñaña ama añecpaye' ya'huortatenoña lampareñ o'ch yene' o'ponot yemayepnačo. Añecopña ya'huortatenña lampareñ o'ch yene' enonet attoch čhoyo'tampesuan allohuen ñeñt allo'tsa'yen. ²² Tarro'mar allohuen pa'namen ñeñt ama eñotpahuoyaye ama't ahuañoteñ, te'ñapa' o'ch e'ñe orrtataretterra attochña o'ch e'ñe eñotatarefetuerret e'ñe poctacma. ²³ Ñeñtes po'ñoč ne'mñotene' čhaponasepa'ch seyočhro ñeñt atet netma'ntatensa añ ñoñets.

²⁴ Jesúsapa' alla oterraneterr:

—Sapa' señotenañe' e'ñete' po'ñoč cohuen se'mñoteññañ Yompor po'ñoñ ñato'pa' amate'. Tarro'mar ñerra'm erroñ sepoñ po'psheñeñ ñeñt ama cohuenayaye Yomporñapa' attecnoch perres samña. Ñaña ñerra'm e'ñe cohuen sepenanet, Yomporñapa' e'ñech cohuen perres samña ama't ellonet o'ch apuerres ñeñt e'ñe cohuen. ²⁵ Tarro'mar esesha'te' čhena pueyočhro ama't e'ñe allpona Yompor po'ñoñ, elloña Yomporpa' allo'nach eñotatnenanet nanac shonte'. Tarraña esesha'ña ñerra'm ama čhenaneto pueyočhreto tarro'mar ñetpa' ama po'ñočhaye' aguëññañeto Yompor po'ñoñ, ama't allpon eñotyenetañ pueyočhro ñeñtñapa' čhach puerratamperranet Yompor.

All toma'ntatanet puerets ñeñt e'ñe cohuen chepyets

²⁶ Jesúsapa' alla toma'ntaterraneterr, ñeñtpa' atet oterraneterr:

—Yompor po'cohuenña ñeñt atto ayochreshattena ña, ñeñtpa' atet pena ñerra'mrrate' puesheñarr acheñ ñeñt nare'tene' puepuer. O'chña nare'tuepa' o'ch ahuerr pa'paclo. ²⁷ Allach allponmaterra' o'ch tsapuenpa' allach muenet, yeñoñapa' čhocmach tanta'muene't, puepuerñapa' atteñapa' o'ch chepua o'ch atesha'ta. Pamo'mte'ñapa' amach e'ñeye' eñoteñe errotenotte'ña chepyen. ²⁸ Ñehua, yeñoteñ patspa' ñeñtca'ye a'čpatene' yepuer e'ñe ñoña. Choch ñanom čho'pe'chyas allempoñapa' o'ch atarrchet

čhoch potsets attoch ellonre'tyes, attotachcho' e'ne po'nuen. ²⁹ E'ne errte' po'netspa' e'nech allorocma mueñan ñeñcha' tsorrenaya'. O'ca' čhen allempoch apchenetña ñeñ narmetser.

Atto Jesús'pa' toma'ntaterranet atet pena pue'llomer ñeñ otenet mostazllom
(Mt. 13.31-32; Lc. 13.18-19)

³⁰ Jesúsña ellonetpa' atet oterraneterr:

—Añ Yompor po'cohuenña ñeñ atto ayochreshatena ña—ñanompa' e'nech pueheña'ttsa ame'ña'yetsa, allempoteñña'pa' allo'nach sen atonetnomtsa ñeñcha' ame'ñerrtsa, attochña e'ne epa'huerra erracmañen Yompor po'cohuenña. Ñeñña te'pa' o'ch netma'ntatasa ñeñ atet pena ña. ³¹ Ñeñtpa' atet pena ñerra'mrrate' añ pue'llomer ñeñ atarr añe'folleshallmerr ñeñ otenet mostazllom. Ñeñña pue'llomretollpa' o'ch nare'chet patso. Ñehua, e'ne yeñoteñ mostazllom ñeñtpa' atarrca'ye nanac añe'folleshallmerr. ³² Tarraña ñerra'm o'ch nare'chetpa' allempoña choppa' allo'nach sen rrorranmats cohuen, atarrchetnomuets, elloch metana'tuan po'pchañ narmetsočno. Puetacre'nach ateshatacrerrtsa. Allña'pa' o'ch huačha'toña o'ččno o'ch rrema'rrartosa puetacro'mar po'mañtero.

Jesús'pa' ora allpon ñeñ atet yečhatyenan acheñenesha' ñeñtpa' atto pa'namen es toma'ntatyenanet
(Mt. 13.34-35)

³³ Shonte' po'poñečno ñeñ alla toma'ntaterraneterr atto serrpare'tatenanet Yompor po'ñoñ. Attoña e'ne allpona serrpare'tatanet ñeñña'pa' e'ne cohuen eñotatanet pueyochreto. ³⁴ Ama serrpare'tatenaneto atta, añña čhocma serrpare'tatenanet toma'nteñtso. Ellonetpa' čhocma e'ne eñotochen serrpare'tatenanet pueyochresha'.

Allempo a'mchecherran Jesús huomenquēsha' ñaña sa'p ñeñ emo'yarertetsa
(Mt. 8.23-27; Lc. 8.22-25)

³⁵ Ñeñte yetrocma e'ne ellerronet Jesúsña'pa' otan pueyochresha':

—Te'pa' o'ch ahuañpsey yomta'n.

³⁶ Pueyochresha'na sohuanmet acheñenesha'. Ñeñtara noñto allo'tsen Jesús'pa' alloña anmañpeñet Jesús o'ch ahuañpset yomta'n. Allña'pa' cota'huanmanet po'pnañečno noñečno. ³⁷ Allempo ahuañpset allña'pa' machayotepa'tcha' huomenquēshatañpesnomuet. Emo'yare'ña čha esha'tena noñto atteña oñña'pa' chorrachoch noñto. ³⁸ Jesúsña'pa' alla muen puepopato alla ñotena. Pueyochresha'ña opueretpa' atet ochet:

—¡Maestro, amahuaca'ye pellquēnyo'fe' o'rramche' yoclla'huamocha!

³⁹ Jesúsña tanterrapa' e'ne po'ñoño'a a'mtsoññeterran huomenquēsha'. Ñaña po'ñoño'a a'mtsoññeterran sa'p ñeñ emo'yartetsa, ñeñtpa' atet ot:

—¡Muecheherrepa', muetsoññeterra'!

E'ne otue'pa' čha muecheherrtsaña huomenquēsha'. Attoña ñetpa' o' alla mueche'ttañperret e'ne cohuen. ⁴⁰ Allempoña Jesús'pa' atet otanet:

—Sapa' eso'mare'tña čha atarr seyoren. Eso'mare'tña ama e'ñeye' seyemtenno.

⁴¹ Ñetña'pa' čha atarr nanac yoren, atet otanna'tyeset:

—Ta'mca'ye añ acheñerpa' esona'tarte'ca'ye. Atarrep'a't es a'mchechaten, ama't po'ñoño'apa' a'mchechaterran huomenquēsha' ama't ñaña emo'yare' oñ.

5

Atto gadaro'marnesha' ñeñ chorrena oneñtpa' huapa Jesúsesho
(Mt. 8.28-34; Lc. 8.26-39)

1 Allempoñapa' o' etsotose yomta'n all sechenet. Allñapa' añ pa'ney pene' gadaro'marnesha'. 2 Jesúsñapa' sehuosa all noñtoť, allñapa' huapoña puesheñarr yacma tarraña ñapa' añ chorrenaya oneñeť. Ñeñťpa' arroť huapa allecma pampa'yeñet arromñaťechno. 3-4 Ñehua, ñapa' alla yečhena all pampueñet arromñaťechno. Ama't puesheñarrapa' ama eseshaye' erroť penaye attoch a'mchecheret. Ama't čocma huanquēñetañ asrerečo pa'tcoť ñaña potot, ñañaapa' čhach tsepe'tuerranña asrerečh allo huanquēñet potot ñaña pa'tcoť čhach rrollapecheñ o'ch e'ñe tsepe'tatue. Ñeñto'marña ama't e'ñe eseshapa' ama eshcaye' a'mchecheñeto. 5 Allñapa' ellapene'tcha' ñaña arepene'tcha' chopeñe'chyesets apampaño'mar ñaña aspentarero'mar. Allñapa' allecma atarr ama'točhtena, tsotse'tyena mapyo e'ñe ñañaña. 6 Tarraña allempo entapan Jesús a'yoteñ allentepa'tcha' matosa concorpana'tosana Jesús. 7-8 Allempoña Jesúsapa' atet otosan oneñeť ñeñť chorrenaya ñeñť yacmar, atet otos:

—O'ch oneñeťe notosep' te'ñapa' ipequečhp'a'ner añ acheñer!

Ñeñto'marña ñeñť chorrena oneñeťpa' rranosa huomencpa' atet otapan Jesús:

—Eso'maruachca'ye Jesúsocha' p'atsrre'močhtana'tosna, p'apa' ñeñťep' Ñeñť nanac Parets Puechemerep'. Te'pa' o'ch notapap' e'ñe Parets pa'so'chño, amach čha pecoñchatatstosno.

9 Jesúsñapa' alla oterranerr ñeñť chorrena oneñeť:

—Papa' ¿eso'tña peso'cheñ?

Ñañaapa' atet oterranerr Jesús:

—Napa' añ neso'cheñ Legión tarro'mar yapa' nanac patonrey.

10 Allempoña ñeñť chorrena oneñeťpa' ñañaapa' atet otare'tapan Jesús:

—Amach pemño'tatsterrye allařar bačhayo.

11 Ñehua, allpa' a'yente'tsa'yen shonte' chañchočno ñeñť rratse'tyets aspentonet.

12 Ñeñto'marña oneñeťechnopa' atet otare'tapet Jesús:

—Ñerra'm čoch muene' erroťen peřoseypa' arrña pemñaye'chosey chañchesho allochñapa' o'ch yechorra'yerr ñaña chañchočno.

13 Jesúsñapa' allenta otanet:

—Ama'tca'yepa' orrasca'ye.

Allempoña oneñeťechnopa' quečhp'a'neret acheñ o' chorrereterr ñaña chañchočno. Chañchoña allempo chorrosya oneñeťechnopa' čhepa'tcha' matrra'tua ñegoneť, shorčha'tuos allotpa' e'ñe ño'shrra'tuosa oño. Ñeñťña chañchochnopa' allo'tsente' epoch mil.

14 Acheñenesha'ña ñeñť cohuañpene' chañcho, ñetñapa' allenta matrra'tet ñamet po'yorñoť ahuanmuet anetso. Allñapa' serrpare'tyesoset ñaña ora allohuen allampaño'mar. Acheñenesha'ñapa' allenta ahuanmuet ahuo'ch enteñeta'. 15 O' čačha'tet Jesúseshopa' allñapa' entoset yacma ñeñť chorre't oneñeťechno alla anen ashtamať, o' eñoterra, o' cohuenterra. Ñetñapa' čha atarr mecha'na'toset. 16 Añña ñeñť entene' Jesús atto quečhpaterran oneñeť acheñ, o' alla mueñererr chañchesho, ñetñapa' allenta serrpare'tatiesapet ñeñť huačha'ttsa anetsoť. 17 Allempoña acheñenesha' ñeñť yečhetsa allpa' atet ochet Jesús:

—Te'pa' ahuerreř arroť yenyot.

18 Allempoña Jesúsapa' a'terr noñto o'ch ahuerř, yacmaña ñeñť chorre't oneñeť ñañaapa' allenta otan Jesús:

—Napa' nemneñca'ye te'pa' o'ch nocterreř.

19 Tarraña Jesúsñapa' ama muenache atet och:

—Allařach, te'pa' o'ch ahuerreř pepacillo pamo'tsesho'mar o'ch peser-ppare'tatuerranet ora allohuen atto Yomporpa' atarr yenposeř ñaña atto atarr muerospa.

²⁰ Ñañaapa' atet otue Jesúsapa' atetcho' pa. Allenta ahuer serrpare'tyesnerrets ora anetso'mar ama't all oteñet Decapoliso atto Jesúsapa' atarr nanac yenpos. Allohuenña acheñenesha'pa' atta atarr cohuanrrorteñet.

Atto Jesúsapa' tantaterran Jairo po'señ ñaña all a'crratnoman puesheñarr coyanesha' ñeñt a'plla'nmue' pa'shtam

(Mt. 9.18-26; Lc. 8.40-56)

²¹ Allempoñapa' ahuanperrerr Jesús noñto, o' alla cherrerr añemta'n allot ta ahuaña. Allñapa' o' alla emchorra'huererr shonte' acheñenesha' e'ñe all sa'patoño. ²² Allñapa' huapoña puesheñarr añcha'taret ñeñtpa' añ pa'so'cheñ Jairo. Ñapa' ñeñt puesheñarr ñeñt añcha'tarettetsa judionesha' po'prahuo. Allempo entosan Jesúsapa' ñañaapa' alla rromosa Jesús pa'rrpōt. ²³ Allñapa' atet otos:

—Nesñetollañacho' o' cha a'po'ntsena. Ñeñto'marña napa' nohuennaña o'ch pōcterren nepaclo. Ama't pōtoñapa' o'ch pa'pñeña' attoch pa'crrater o'ch alla huomcherra.

²⁴ Jesúsñapa' allenta cota'ner, allenta cota'huanemñ ñaña shonte' acheñenesha' cha emchorratse'tnomet, cha to'mama'tneñet. ²⁵ Allñapa' cota'nmanet ñaña puesheñarr coyanesha' ñeñt atsna'tets. Charra' puechena epa char ñeñt atto chocma yella'yena. ²⁶ Epaye' muerochtateñ shonte' apartañechno ñeñt partenayen. Ama't o' a'gasta'huahuan ora allpon quelle echen atto partatena ñañaapa' attera ama't mameshapa' ama choye' pasateñe. Elloña allo'na sen a'po'ntsa'nmatsa. ²⁷ Ñeñt coyanesha'pa' o' e'mare'tan Jesús ñeñt atto chocma a'crratyenan atsnañetechno. Ñeñto'marña allempo cota'huanemñ Jesús acheñenesha'pa' ñapa'cho'ña allenta cota'nman Jesús chenta' pa'che'ñoñ. Attoña allpa' a'plla'nmoñ pa'shtam. ²⁸ Tarro'mar ñapa' atet cotape'chen pueyo'chro: "Ama't pa'shtama na'pñloñpa' ñeñtachca' na'crraterre'." ²⁹ E'ñe a'plla'hue' pa'shtampa' allorocmuepa'tcha' maserrña po'rras. Ñapa' e'ñe eñotena po'chtso o' metueña ñeñt muerochtatene'. ³⁰ Jesúsñapa' eñotnoñ e'ñe ña po'huamencōtpa' o' a'crratnoman puesheñarr atsnañet. Ñañaapa' allenta puerraperra alla acheñenesheshoneñ ñeñt cota'huanene', allñapa' atet otanet:

—¿Esesha'tña o' a'plla'nmuenña neshtamo't?

³¹ Pueyochresha'ñapa' atet ochet:

—Pentente' shonte' acheñenesha' ñeñt allotemeña peto'mama'tnene'. Eso'mare'tña pōtenña esesha'te' pa'pñlene' peshtamo't.

³² Jesúsñapa' alla cohua'yasanet o'ch entan ñeñt a'pñlene' pa'shtamo't. ³³ Ñeñtña coyanesha'pa' ñapa' o' eñotnoma Jesúsca'yeña o' a'crratnoñ. Ñañaapa' cha pa'shmuena po'yorñoñ allempoñapa' concorposa Jesús pa'rrpōt. Allñapa' e'ñe a'meta'nman ora allpon ñeñt po'ño'ch atet cotape'chen. ³⁴ Jesúsñapa' atet otapan coyanesha':

—Papa' nesñeshacha' atto atarr peyemtenna na, attoña te'pa' o' e'ñe na'crratnomuep. Te'ñapa' o'ch ahuerrep peñmañesha', tarro'mar amach alla muerochtaterrperro at-snañets.

³⁵ Allempo eñorena atetpa' allñapa' hua'cha'ta ñeñt huetsa añcha'taret Jairo pa'paclo't. Ñeñtña huapuetpa' atet otoset Jairo:

—Peseñpa' o'ca'ye rroma. Te'ñapa' amach allo'na patsrre'mo'chtana'tatsche Maestro o'ch coterrep pepaclo.

³⁶ Jesúsña ama't e'man atet otoset Jairo pa' ñañaapa' atet otan Jairo ñeñt añcha'tarettetsa judionesha' po'prahuo:

—Papa' amach cha pe'charrtatatsto peyo'cher, nachña e'ñe peyemta.

³⁷ Jesúsñapa' aña muenat Pedro ñaña Jacobo ñaña pa'mo'nasheñ Juan. Ñeñtach cota'nmue'. ³⁸ Allempoñapa' ahuanmuet añcha'taret Jairo pa'paclo. O'ña cha'cha'tet

allpa', allña'pa' entoset shonte' acheñenesha' ñeñt' ano'tatse'tets, all yahuanrrortenet, atarr ya'na'teñet arromñañ. ³⁹ Jesúsña'pa' be'tosos pocollo, ñaña'pa' atet otosanet:

—Sapa' eso'mare'tña atarr sano'tatsen, čha atarr seyahuanrrortena. Añ shopshe-sha'pa' amaca'ye čhoye' rromueno, čhaca'ye muen.

⁴⁰ Ñetña pachmare'teño'tetpa' atta che'tatsetyesapet tarro'mar ñetpa' e'ñeca'ye eñotenet čhoca'ye rromuen. Allempoña Jesús'pa' čha'nmačha'tatosan allohuen acheñenesha' pocolot. Ñaña'pa' be'tosos o'pono allo'tsen shopshesha' ñeñt' rromuets. Ñapa' aña muenatos arromñañ puepapar ñaña pachor ñaña ñeñt' co'ta'huanene', ñeñña epuet be'tosčha'toset allo'tsen arromñañ. ⁴¹ Allempoña Jesús'pa' rromota'tosan shopsheshañ pototpa' atet otos e'ñe ña po'ñoño:

—Talita cumi—ñeñt' yoten ya yeñoño: O'ch nesñeñolle notosep te'pa' čho'pa tantertsa.

⁴² E'ñe otue' atetpa' allentepa'tcha' tanterra, čha chope'cherrets. Ñehua, ñeñt' shopshe-sharpa' čharrá' puechena epa po'charña. Allohuenetña'pa' čha atarr cohuanrrortet.

⁴³ Allempoña Jesús'pa' atet otanet:

—Po'ñočh te'pa' amach esesha' seño'tatatsto ama't e'ñe puesheñarra.

Alla oterraneterr:

—Te'pa' serratallme'cherñaca'ye.

6

Allempo serrpare'tatan Jesús acheñenesha' all Nazareto (Mt. 13.53-58; Lc. 4.16-30)

¹ Jesúsña ahuererrr allo'tpa' o' alla čherrer pa'nyo all Nazareto. Pueyochresha'ña'pa' alla co'ta'huanererr. ² Allña'pa' allempo čherr ye't allempocma amesenet, ñaña'pa' arr yečhatuerraneterr judionesha' po'prahuo. Shonte' acheñenesha' ñeñt' e'mñotapuerre' atet serrpare'tatuerranet all, ñetña'pa' nanac cohuanrrortapueret, allempoña'pa' atet otyeset ñocop:

—Ñapa' errahuañaca'yeña eñotanña ora allohuen ñeñt' atet pa'yena. Eshesha'huañaca'yeña eñotatene'ña atto' orrtatenan partsoteñets. Erro'tuaca'yeña huenaña ñeñt' eñoteñtsor ñeñt' orrtatyen ña. ³ Ñapa' aña'ca'ye ñeñt' po'taruas pene' o'ch torrenana tsach attoch es yečhcatyen pa'namen. Ñapa' aña'ca'ye María puechoyor. Pa'mo'nasheña'čho'ña aña'ca'ye Jacobo, José, Judas, ñaña Simón. Ñaña po'čhanesha'pa' e'ñeca'ye yechme'tenanet, parro'marneshayarramche'.

Ñeñto'marña all e'ñe ña pa'nyopa' ama eseshaye' acua'penaye entenaye. ⁴ Allempoña Jesús'pa' atet otanet:

—Ñeñt' a'mtene' Yomp'or po'ño'pa' čhocmaca'ye añcha'na'tpo' entyeñña allohuen acheñenesha'; arrña pa'nyo allo'tsen e'ñe ña pamo'tsna'tarnesha' ñeñt' e'ñe pamo'tsna'tar penpa' ñetña'pa' ama acua'penaye' enteñeto. Ama't ñaña ñeñt' parro yečhenet pa'pacleto, ñetpa'čho'ña ama acua'penaye' enteñeto.

⁵ Ama ame'ñeñeto ñeñto'marña allpa' ama atonocheye' orrtataneto po'partsoña. Allpa' aña orrtatyen attoch a'plla'yenan puesheña'tets atsnañet allpa' attoca'yeña a'crratenanet. ⁶ Ñeñto'marña Jesús atarr co'tape'chateñ pamo'tsesha' atto ñetpa' ama acua'penaye' enteñeto, ñapa' čha muene' llecateñet. Allempoña Jesús'pa' alla chopeñe'chyerrerr yečhatyerrtserr allemeñ anetso'mar.

Allempo Jesús'pa' llesensan pueyochresha' o'ch ahuanemyeset allcha' serrpare'tyeneta' (Mt. 10.5-15; Lc. 9.1-6)

⁷ Allempo čhapa'muen allempo Jesús agota'muenan pueyochresha' čharrasheña ñeñt' puechetsa epsheña. E'ñe apčha'huet ñeshopa' ñaña'pa' apanet llesens attoch

quechpatyeset oneñeñechno atto chorra'yenana acheñeneshačno. Attoña llesensanet ñetpa' o'ch ahuanemyeset e'ñe epsheña'ttsocmuet. ⁸⁻⁹ Ñaña atet otapanet:

—Ñerra'm o'ch sahanmapa' amach es sanmatsto ama't coñe'ta allcha' sechopeñe'chyes—ama't sebolsa, ama't ñeñtcha' serra'yenom, ama't seçllayora. Ama't e'ñe epma seshtampa' amach sanmatsche. Añach sanem secarr, sena'nomcha' ñaña sesapát.

¹⁰ Alla oterraneterr:

—Ama't errach pocollro sechhap allach sommosa allponmat esempohuach ahuerreserr po'poñ anetso. ¹¹ Ñerra'm erra anetsro ñeñt allo'marnesha'ña ama cohuenaye' agapaseto ñerra'm amach mueneto o'ch e'mñotapasetpa' o'ch semterrerr ñaña allot. Ñerra'm allempo semterrerr ñaña allot, ñeñtña setco'tsa'yen pañe'te' patspa' choch sepa'shetca'tyesnomña setac. Attochña allo'marnesha'pa' o'ch señotatnomanet ñetpa' amaca'ye pocteye' entenanetoña Yompor. Po'ño'ch o'ch notas: Esemphuañen allem-poch acrare'tetuerra allohuen acheñenesha', añña anetso'marnesha' ñeñt ama sagapaye ñetña'pa' atarrcha' a'coñchatare'tterret. Elloch metana'tueret ñeñt atto a'coñchatare'tterra sodomo'marnesha' ñaña gomorro'marnesha'.

¹² E'ñe ñeñtña otare'tetuetpa' ñetña'pa' allenta ahuanmuet o'ch chopeñe'chyeset erracmañen anetso'mar. Allña'pa' serrpare'tyesnomuet ñeñt poctetsa allohuenacop o'ch cotape'cherret ello cohuen Yomporecop. ¹³ Ñaña all chopeñe'chyeset erracmañenpa' ñetpa' allña quechpatyeset shonte' oneñeñechno atto chorra'yenana acheñeneshačno. Ñaña shonte' po'potantañechno acheñenesha' ñeñt atsna'tyets all, ñetña'pa' a'yana'tyesoset atsnañeñechno olivoso'yo* e'ñe a'crratyesoset.

Allempo e'ñe cohuen es orrtatyes Jesús, Herodesña'pa' cha otapañ Juanañe' o' tanterra ñeñt apataye't acheñ Yomporecop

(Mt. 14.1-12; Lc. 9.7-9)

¹⁴ Allempoña añcha'tare't Herodes ñaña'pa' atet e'mare'tenan Jesús ñeñt atet pa'yena, tarro'mar Jesús allohuen acheñenesha'pa' e'ñe e'mare'tueñet ñeñt atet pa'yena. Ñaña'pa' atet ot:

—Añepa'tca'yeña Juanañ ñeñt apataye't acheñ Partsocop. Ta'mca'ye chate' tanterraña rromot. Ñeñto'marepa'tca'yeña te'pa' orrtaterranña partsoteñets.

¹⁵ Po'potantañña'pa' atet otyenet:

—Añepa'tca'yeña Elías ñeñt a'mtaye't Yompor po'ñoñ ahuat.

Po'potantañña'pa' ñetpa'cho'ña atet otyenet:

—Añepa'tca'yeña ñeñt a'mtene' Yompor po'ñoñ, e'ñeca'ye atet ñerra'm ñeñt a'mtaye't Yompor po'ñoñ ahuat.

¹⁶ Herodesña allempo e'mare'ch ñaña'pa' atet ot:

—Añepa'tca'yeña Juanañ ñeñt nepechat ahuañmo'cha, chepa'ttramche' tanterraña rromot.

¹⁷ Nehua, allempo Herodespa' ahuañmo'chacma rromatenana' Juanañ o' huancachpa' allña yottamñsach attoch coshatan Herodías ñeñt pa'mo'nasheñ Felipe puetapor. Tarro'mar allempo Herodespa' o'ca'ye puerraterran pa'mo'nasheñ puetapor.

¹⁸ Juanañpa' ñaca'ye o'taye't Herodes:

—Amaca'ye pocteyaye o'ch peyoramñpes pemo'nasheñ puetapor.

¹⁹ Ñeñto'marña allempo Herodíaspa' atarr e'moñe'tane't Juan, atarr mueneñe't o'ch muetsatacheñ tarraña ama errot pe. ²⁰ Tarro'mar Herodespa' mecha'na'tane't Juan, eñoche't ñapa' e'ñe pocte' es pa'yese't. Eñoche't ñapa' añepa'na atarr torrena Partsocop. Ñeñto'mare'naña e'ñe cohuen cohuanñsache't allochña'pa' amach muetseto. Allempo e'mñotenan Juan atto serrpare'te't atarr cohuen enteñeñ, tarraña ama e'ñeye'

* **6:13** Olivo ñeñt tsach allot yoreñet puerets pue'merot.

eñotenanoña ñeñt atet cotape'chateñ Juan e'ñe cohuen. ²¹ Atteñapa' čhapa'muen pamtarr allempoch Herodías eñoteñ attotcha' muetsaterran Juan. Ñeñtpa' tarrempo atet pa allempo čhapa'muen Herodes pue'ñalletño ñeñt puerrollar pen Herodías. Allempoña Herodespa' hua'ñatyesan acheñenesha' ñeñtcha' rrallme'chapretenaya'. Añ hua'ñatyes ñeñt añcha'taretečno ñaña ñeñt solltar po'captanrenesha' ñaña ñeñt atarr ečllayoretenesha' ñeñt galileo'marnesha'. ²² Allempo rrallme'chetpa' allña be'tososña ñaña shopshesha' ñeñt Herodías puechoyor. Ñaña' allña tancsare'tosa. Herodesña' ñeñta atarr cohuen ent ama't ñaña ñeñt ahua'ñaretečno. Ñeñto'marña añcha'tareť Herodespa' atet otan shopshesha':

—Ama't erra'tsena penamuenenpa' napa' napařcha'.

²³ Elloñapa' e'ñe Yompor pa'so'chño nan po'ñoñ, allempoñapa' alla otererr:

—Po'ñočha'ye napa' ama't es penamuen napa' napařcha' ama't pueshmet nepatseñ all na'mcha'tareťtena.

²⁴ Allempoña shopshesha'pa' čha'nerr ahuer pachoresho, atet otosan pachor:

—Ta'm ¿escha' nenamña añcha'tareť?

Pachorñapa' atet och:

—Añcha' penamñ Juan poñ ñeñt apatayeť ahuaña acheñ.

²⁵ Allempoña shopshesha'pa' materra alla añcha'tareť Herodesesho atet otuerran añcha'tareť:

—Napa' añ nemnen o'ch pepechennana' Juan poñ ñeñt apatayeť acheñenesha' o'ch penon platopa' o'ch paphuerren e'ñe arrma.

²⁶ Allempo enamhue shopshesha' Juan poñpa' añcha'tareťña'pa' čha lleca. Tarraña ama't llecaña' o' nohuanña po'ñoñ huomenc e'ñe Yompor pa'so'chño ñaña allo'tsa'yen ñeñt hua'ñen ñeñt e'muene' atet oten ñeñto'marña čhocmach a'pocatan po'ñoñ atet otuan ñorra' shopshesha'. ²⁷ Allempoñapa' allenta otan po'solltarer:

—Te'pa' o'ch pepecheññaña' Juan poñ all neyottamřsateñ; poñña' pehuapater arrma.

²⁸ Solltarña' allenta ahuo' pechenana' Juan poñ, o' huapater plato, aphuerran shopshesha'. Shopshesha'ña'pa' apuenana' ñaña pachor.

²⁹ Allempoña Juan pueyochresha'pa' o' e'mare'chet o' pecheret pa'yochresha'teret Juanañ, allempoña ñet ahuanmuet all pecheret Juanañ allempoña ñetpa' ereta' apechareť o'ch pampueñeta'.

Allempo Jesús'pa' rratenan shonte' acheñenesha'; ñeñtña' acheñenesha'pa' allo'tsen amnaroch mil

(Mt. 14.13-21; Lc. 9.10-17; Jn. 6.1-14)

³⁰ Attotañapa' o' čhačherr ñeñt llesensen Jesús. Ñetña'pa' serrpare'tatueret Jesús allo'huen ñeñt atet pa'yeset. Serrpare'tatueret ñaña atet yečhatyeset acheñenesha' Yompor po'ñoñ. ³¹ Jesúsña'pa' atet otarranerr pueyochresha':

—Te'pa' o'ch ahuey e'ñe yaptoche' all ama' acheñempaño'yaye; sapa' allcha'ña same-suerr allponmat.

Ñeñt allempopa' atet otan Jesús pueyochresha' tarro'mar allempo shonte' acheñenesha' ñeñt huačha'tyetsa ñaña ñeñt čhocma ahuanemyetsa ñeñto'mar ama't mameshapa' ama' eshcaye' rreneto. ³² Allempoñapa' e'ñe ñaptochayet ahuanmamřset noñto, o'ch ahuanmuet all ama' acheñempaño'yaye all otenanet Jesús.

³³ Allempoña shonte' acheñenesha'pa' alla enterraneterr all oñmamřpenet. Allempoña achme'tareťtapuetpa' acheñenesha'ña'pa' o' alla matrra'terrerr allohuen ñeñte anetsoť. Ñetña'pa' patso'mara oñmačha'tet ñanmacmueta čhačha'tet all sechena Jesús pueyochreshohuen.

³⁴ Allempoña sehuosa Jesús allpa' alla entuerraneterr o' alla shonta'huerrerr acheñenesha'. Atarr nanac muera'huerraneterr Jesús, tarro'mar ñetpa' e'ñe atet entuerraneterr ñerra'mrrate' carrnero ñeñt ama' acuamřsareťeyaye.

Allempoña Jesúsapa' alla yechatuerraneterr pa'namen esocmañen ñeñt̃ Yompor po'cohuenña. ³⁵ Atteñapa' ellerren pueyochresha'ñapa' oteñeta' Jesús:

—Te'pa' arro'tseney all ama acheñempañooyaye ñaña o'ca'ye ellerren. ³⁶ Te'pa' o'ch p̃och acheñenesha' ahuanemyerretapa' anetso'mar allcha' rañta'yesuerret puerraret ñeñt̃cha' rra'yesuerret tarro'mar arrpa' ama es eñalle.

³⁷ Tarraña Jesúsñapa' otan pueyochresha':

—Sachca'ye apa'yesahuet ñeñt̃cha' rret.

Ñetñapa' atet̃ ochet:

—¿Añe't pemnen o'ch ahuey o'ch yepomuena' shonte' quelle ñeñt̃ doscientos denario† alloch yerañt̃ena' pan ñeñt̃cha' yerratuerranet allohuenet?

³⁸ Jesúsñapa' atet̃ oterraneterr:

—Ñehua, secua' pan, ¿errpoñte' sechen?

Ñetña cohuet panpa' atet̃ otereterr:

—E'ñeca'ye amnara pan eñall ñaña epatoll cac.

³⁹ Allempoña Jesúsapa' atet̃ otan acheñenesha':

—Te'pa' o'ch sanorr̃cha'tyes e'ñe sopa'ttsocma e'ñe all cohuen emmo'ratyem pasetma'.

⁴⁰ Ñetñapa' atet̃cho' pet. Anorr̃cha'tyeset e'ñe ñopa'ttsocmuet—čharrasheña'ttsocma čharrapa'tets ñaña amnarsheña'ttsocma čharrapa'tets ñeñt̃ anorr̃cha'tyesets.

⁴¹ Allempoña Jesúsapa' agapan ñeñt̃ amnar pan ñaña epatoll cac, cohua' enonet̃ parasyoso'tam̃psan pan. Allempoñapa' shota'tan panpa' apanatyesan pueyochresha', ñetñapa' epatyaset allohuen acheñenesha' ñeñt̃ anorr̃cha'tyets all, e'ñe epa'huet. Ñaña shetse'tan cac attoch epatyesanet allohuenet. ⁴² Allempoñapa' o' rrallme'chet allohuenet e'ñepa'tcha' yetrra'tuahuet. ⁴³ E'ñe yetuahuetpa' elloña čha a'pchatyaset cac ñaña pan ñeñt̃ ashota'tyesarẽt. Ñeñt̃ña a'yapačherretapa' čhepa'tcha' chorrerrets čharra' puechena epa cañter. ⁴⁴ Ñeñt̃ña rrallme'chats atarr shonte' acheñenesha' allo'tsen amnaroch mil ñeñt̃ e'ñe yacmaneshoche'.

*Allempo Jesúsapa' e'ñe cohuen chope'chnen enot̃ oño
(Mt. 14.22-27; Jn. 6.16-21)*

⁴⁵ Allempoña Jesúsapa' otan pueyochresha':

—Te'pa' o'ch sa'tačha't noñto o'ch sota sanom o'ch sẽpchaterra yot̃ o'ch sẽcherr anetso ñeñt̃ pa'so'cheñ Betsaida.

Allempoña Jesúsapa' o' so'tnoman acheñenesha'. ⁴⁶ So'tuanmanetpa' ñaña' ahua' as-pento, allcha' ma'yochosa. ⁴⁷ Atteñapa' o' tsapuen, ñapa' allo'tsenara e'ñe ñapuẽt aspeñto. Noñt̃pa'cho'ña ñeñt̃a rročhaso'tsenara sa'po. ⁴⁸ Allost̃ña entenan pueyochresha' ñeñt̃ noñto'tsa'yen. Ñetñapa' e'ñe po'muerocheñnõfeta echotnenet oñ tarro'mar orrnoñapa' čha a'puerrame'tam̃penanet. Atteña allempoña puetarenmochpa' huenanet Jesús čha chope'chnen enot̃ oño. Ahua'ch metanenanetañ, ⁴⁹ allempoña pueyochresha'pa' entapueñet čha chope'chnen enot̃ oño. Ñetñapa' čha otenapuetañ choyeshe'matst̃e' hua-panet. Cha rrannartet pueñchañõt. ⁵⁰ Allohuenetpa' e'ñe entuapet nanac yore'tosanet. Jesúsñapa' eñorana'tuenanet, atet̃ otuenanet:

—Choñaca'ye socshapuenna, naca'ye o' nohuapa, amach at̃ta sem̃cha'tatstapno.

⁵¹ Allempoña Jesúsapa' a'tapos noñto allo'tsa'yen pueyochresha'. Huomenqũesha'ñapa' čhepa'tcha' muetsoñeñterrtsa. Ñetñapa' čha atarr cohuanrrortapueñet. ⁵² Ama čhenaneto pueyočhreto ama't at̃to Jesúsapa' atontatan pan, amaca'ye es čhenahueto pueyočhreto.

† 6:37 Denariopa' quelle ñeñt̃ allpon tsa'tenet pamtarr ñeñt̃ taruasets all pa'nyo.

*Allempo Jesúspa' a'crratyesosan pa'namen atsnañe'ẽchno all Genesareto
(Mt. 14.34-36)*

⁵³ Allempoña pechatañpsetpa' arr etsotaset all oteñet Genesareto. ⁵⁴ Allempo sohua'cha'toset noñfo't, añña acheñenesha' ñeñ' allo'tsa'yen, ñetñapa' cheme'tapet Jesúspa' ⁵⁵ allenta matrra'tyeset ora erracmañen all ye'cha'yena acheñenesha'. Atto'tca'yeña huapatañpesyesoñetña atsnañe'ẽchno allenñateñ. Ama't erra e'mare'teñet o' chap all, allcha'cho' anmoñetña patsnañe'ẽter puechecnape'na. ⁵⁶ Ama't erra chapyen all shontena acheñenesha' ñaña ñerra'm arr chen all ama tama eñalle acheñ, ama't allecma oñen acheñenesha' ñetñapa' allcha'cho' na'yeneta' patsnañe'ẽteret allcha' enamapet ama't poso'mota o'ch a'p'lapoñet pa'shtam. Allpon ñeñ' a'p'lla'yesapue' Jesús pa'shtampa' allponcho' e'ñe corra'yesuerrtsa.

7

*Atto Jesúspa' eñotatenanet ama añeye' ya'sosyatenaye Partsocop ñeñ' yerra'yen yenamot
(Mt. 15.1-20)*

¹ Allempoña allpa' huacha'toña fariseonesha' epuet ñaña puesheña'tets ñeñ' huachetsa Jerusaléno' ñeñ' atarr etsotayenayeñ' ñoñets ñeñ' atet anare't judioneshacop. ² Ñetña allpa' entosñañet Jesús pueyochresha' atta rra'yenet ama e'pota'tyeneto pot Partsocop allempoch rrallme'chet. ³ (Ñehua, allohuen fariseonesha' ama't ñaña allohuen judionesha' ñetpa' atet ye'chenet amach rreneta'pa' o'ch e'pota'tyeset Partsocop. Tarraña ñeñ'tpa' pa'tañneshaña ye'chatnomahuet. ⁴ Ñaña po'poñ ellonetpa' atet ye'chatanete't pa'tañneshañ ñerra'm esempo huerret allotecma pomatsre'tyenet, amach rreneta'pa' choch ñanom a'cohuentatenetañ Partsocop. Ñaña shonte' po'poñe'chno ñeñ' e'ñe ye'chatyesanete't pa'tañneshañ. Ama't ñeñ' porre't pa'yenet ñaña po'pajo'chnetpa' chochña e'ñe e'pame'tyeñetañ Partsocop, e'parro'tyenetañ ama't ñaña pa'srerrogachno Partsocop. Ama't ñaña all panrame'tyenet e'ñech e'pata'tueñetañ Partsocop.) ⁵ Añña fariseonesha' ñaña ñeñ' atarr etsotayenayeñ' ñoñets ñeñ' atet anare't judioneshacop ñetña allempo entosñañet Jesús pueyochresha' atta rra'yenet ama e'pota'teneto Partsocop ñeñ'to'marña ñetpa' atet otoset Jesús:

—Peyochresha'chnoñapa' eso'mare'tña ama esesha' ye'chenayeña ñeñ' atet ye'che't yatañneshañ. Ñetpa' atta rra'yenet ama e'pota'teneto Partsocop allempo rrenet.

⁶ Jesúspa' atet otanet:

—Sapa' atarruaca'ye ommoñañeshaste' tarro'mar atarr seshcare'ten, amaña Yomporeye' sesherbena. Isaíaspa' e'ñe cohuen a'mítane't Yompor po'ñoñ, saña te'ñapa' e'ñe atet sepena atet ote't allempo atet ot Yompor:

Ñeñ' acheñenesharpa' e'ñe puenamota cohuentatennanetañ; pueyo'chretoñapa' ama chenaneo ñeñ' cohuen nenten na.

⁷ E'ñe orrena ma'yochennet, ñeñ' atet ye'chatanneneta'pa' ñeñ'tpa' e'ñe acheña naye't ahuat po'capña.

⁸ Jesúspa' alla oterraneterr:

—Sapa' chaca'ye seque'chpuenña ñeñ' atet oteney Yompor ñeñ'tcha' atet ye'pa'yen cohuen; sapa' añaca'yeña atarr setsotayen ñeñ' atet ye'chatyesnomues sa'tañneshañ; ñeñ'ta atet se'pa'yen orrote'chno e'pame'tyese' ñaña sepajo'chno. Ñaña po'poñe'chno pa'namen se'patse'tyeneñ' ñeñ' soten Partsocopaño'.

⁹ Jesúspa' alla oterraneterr:

—Sapa' añaca'ye atarr señoten atto'ch sehuapore'toñ Yompor po'ñoñ ñeñ' atet oteney ña ñeñ'tcha' atet ye'pa cohuen; ñeñ'to'marña sapa' e'ñe añña setsotayen ñeñ' ye'chatyesnomues satañneshañ. ¹⁰ Ñehua, Moiséspa' atetca'ye ote't: “Semorrenteño'tpa' señcha'na'chcha' sompor ñaña sachor.” Elloña ñaña po'poñonetpa' atet ote't Moisés:

“Ñerra’m esesha’ sasare’tene’ pompor ñaña pachor ñeñt’pa’ muetsetepa’.” ¹¹ Tarraña sañapa’ atet sotyen ñerra’m esesha’ atet otene’ pompor ñaña pachor: “Ñeñt’ nechen o’ch napapeña’ tarraña amach napape te’pa’ o’ch nene’ Yomporecop ñeñt’ otenet Corbán”, ¹² ñeñt’ña acheñerpa’ sañapa’ atet’cha’ soteñ: “Pocoppa’ ama pallteno o’ch es p’ap’ p’amo’mte’.” Attoña sapa’ ama semnateñe ñeñt’ acheñer e’ñe ña puemorrenteño’tpa’ o’ch es apuenan pompor ñaña pachor. ¹³ Attoca’yeña sehuapore’teññaña Yompore po’ñoñ allochñapa’ e’ñech añña setsoten ñeñt’ e’ñe sa seycheña. Ama’t ellonet’pa’cho’ña shonte’ po’poñechno ñeñt’ atet se’patse’tyena pa’namena’ttsoema.

¹⁴ Allempoña Jesús’pa’ chore’tan acheñenesha’ ñeñt’ shontetsa, ñetñapa’ atet otanet:

—Sañapa’ po’ño’ch allohuenes e’ñepa’chña cohuen se’mñoten allochñapa’ attoch e’ñe cohuen chaponasa seyo’chro. ¹⁵ Ama añeye’ ya’sosyatene’ Partsocop ñeñt’ yerra’yen. Añca’yeña ya’sosyatene’ e’ñe ya yoc’ape’chatse’teño’ ñeñt’pa’ yeyo’chrotca’ye huena. ¹⁶ Ñeñtes po’ño’ch ne’mñotene’ chaponasepa’ch seyo’chro ñeñt’ atet netma’ntatensa añ ñoñets.

¹⁷ Allempoña Jesús’pa’ sa’nerran acheñenesha’pa’ ñaña’pa’ be’tosuerrerr pocollo allña pueyochresha’pa’ atet otoset:

—¿Eso’tña petma’ntatyeneña ñorra’?

¹⁸ Jesús’ña’pa’ atet otanet:

—Sapa’cho’ña e’ñe’tña attecma samña, ama es se’chenoyo seyo’chro. Sapa’ ama’t se’notenoña ñeñt’ yerra’yen yenamot’ ñeñt’pa’ amate’ errotenot’ a’sosyateneña Partsocop. ¹⁹ Tarro’mar ñeñt’ yerra’yenpa’ amaca’ye yeyo’chroye’ cheno, ya’aca’ye chen. Ñeñt’pa’ chocmachca’ye yener a’yo.

Ñehua, ñeñt’pa’ atet e’notateney Jesús allohuen rreñtso’chnopa’ e’ñeca’ye cohuenacma e’ñe arrapahuocma. ²⁰ Jesús’ña’pa’ alla oterraneterr:

—Añña ñeñt’ cha’nets yenamot’ ñeñt’ atto ye’nosatse’tyen ñeñt’pa’ e’ñe yeyo’chrot huena ñeñt’ña chocma ya’sosyatene’ña Partsocop. ²¹ E’ñe yeyo’chrot huena cotapñats ñeñt’ ama’t mameshapa’ ama cohuenayaye, ñeñt’pa’ añ: chetapretanna’tēñets taporets, cañoresha’tēñets, muetsanna’tēñets, ²² etatsre’tēñets, ye’chapretanna’tēñets, atsrre’mueñets, shecare’tanna’tēñets, ottatse’tēñets, moparrñats, sasare’tēñets, ommo’cheñets, otatse’tēñets. ²³ Ñeñt’ allohuen sosya’tsañechno ñeñt’pa’ yeyo’chrotca’yeña huena, ñeñt’ca’yeña ya’sosyatene’ña Partsocop.

Atto puesheñarr coyanesha’ ñeñt’ ama judioneshayaye ñapa’ atarr yemtapana Jesús (Mt. 15.21-28)

²⁴ Allempoña’pu’ ahuerrerr Jesús allo’tpa’ alla chap allampaño anets Tiro ñaña Sidón. Allempo chap all pocolopa’ ñapa’ mueneñeñ e’ño’ch a’nahua chapañ. Tarraña ama errotenot’ chapo a’nahua, ²⁵ tarro’mar e’ñe allempo chap cha e’mare’tē’ puesheñarr coyanesha’ ñeñt’ achoyore’t. Puechoyorñapa’ penochor ñeñt’ña’pa’ cha chorreña oneñe’t. Ñeñt’ña coyanesha’ huapapa’ rromosa Jesús pa’rrp’ot. ²⁶ Ñeñt’ña coyanesha’pa’ ama judioneshayaye, ñapa’ po’poñ acheñ ñeñt’ sirofenicio’marnesha’. All rromosa Jesús pa’rrp’ot’pa’ atet otos:

—Nepapare, peque’chpatataye’chapon nechoyor oneñe’t.

²⁷ Jesús’ña’pa’ atet toma’ntatana acheñenesha’ ñeñt’ ama judioneshayaye ñeñt’o’marña atet och:

—Ñanomcha’ ya yacñe’ñar ya’yeta’ tarro’mar ama pocteyaye o’ch yeprratam’pes yacñe’ñar puerrar o’ch yehuapore’tam’pes allo’tsen ochec o’ch rre’ ñaña ochec.

²⁸ Coyanesha’ña’pa’ atet otererr:

—Ama’t atteñ nepapareshacha’ tarraña ama’t ochecpa’cho’ña rra’yenan cheshanesha’ puerrar ñeñt’ a’shore’tatyenet po’mesa’pna’cho.

²⁹ Allempoña Jesús’pa’ atet otererr:

—E'ñe pocte' atet pe'ñorena; e'ñepa't pame'ñenna. Ñeñto'mar te'pa' o'ch ahuerreḡ e'ñe peñmañesha', te'ña oneñeḡpa' o' queḡhpa'nerrnaḡ pechoyor.

³⁰ Allempoña coyanesha'pa' ahuer pa'paclo, o' ḡherrpa' alla entuerran puechoyor alla ḡanena e'ñe cohuen po'mayo, oneñeḡñapa' o' queḡhpa'ner.

Allempo Jesúsapa' a'crraterran paquet ñeñḡ opanatets

³¹ Allempo puerrerra allot ñeñḡ allampañot Tiroḡ, arr oñemhuanom anetso Sidón allot ñaña po'poñ anetso Decapoliso'mar. Attoña o' alla ahuer sa'ponet all Galileyaso. ³² O' ḡherr allpa' huapaterrñañeterr pueheñarr yacma ñeñḡñapa' paquet ñaña ama e'ñeye' cohuenaye' eñeno. Ñeñḡña huapate'pa' atet otosan Jesús:

—Añecopca' nehuapateñ o'ch ḡa'ḡlle' ḡotot attoch correrra.

³³ Jesúsñapa' allenta aneñḡ ñapueḡ a'yenet, allñapa' esho'tosan potaḡ paquet pueto; ñaña o' senmare'pa' o' alla a'ḡllerrñañer ñaña pueñeñ. ³⁴ Allempoña Jesús cohua' enonetpa' enara. Allempoñapa' atet ot e'ñe ña po'ñoño:

—Efata —ñeñḡ yoten yeñoño: Pota'nerrepa' pet alloḡñapa' o'ch pe'muerra e'ñe cohuen.

³⁵ E'ñe otue'pa' ḡha pota'nerrets puetpa' e'ñe cohuen e'muerra. Ama't ñeñḡ echarrtatene' pueñeñpa' o' a'rroyer ḡha eñorerrtsa e'ñe cohuen. ³⁶ Jesúsñapa' atet otanet:

—Te'pa' amach esesha' sotaḡsa'tatsto ama't e'ñe pueheñarra.

Ama't atet otanetañ elloña ñetpa' a'metare'teñet. ³⁷ Allñapa' atarr nanac cohuanr-orteñet, atet otyenet:

—Jesúsapa' atarro'trra cohuenña ñeñḡ allohuen atet es ḡa'yen. Ama't paquetnesha'pa' ḡhocma e'ñe cohuen e'matuenanet. Ama't ñaña opananeshaḡhno'pa' ḡhocma e'ñe cohuen eñoratyenanet.

8

Allempo Jesúsapa' rratenan shonte' acheñenesha' ñeñḡña acheñenesha'pa' allo'tsen pa'tatsoch mil

(Mt. 15.32-39)

¹ Allempoña po'pocheño shonterrer acheñenesha' Jesúsesho. Allempopa'ḡho'ña ama eñalle ñeñḡcha' rret. Ñeñto'mar Jesúsapa' agotan pueyochresha'pa' atet otapanet:

² —Napa' ḡha atarr nemuereña allohuen acheñenesha' ñeñḡ shontetsa arr. O' ma'pamtoset nesho ama eñallmeñeto ñeñḡcha' rret. ³ Ama pocteye' nenteñe o'ch ahuanerret e'ñe pa'ḡhporrñesha' te't ama a'ñshe'mterreto toño tarro'mar patanta'tetspa' atarr baḡhayot huapyenet.

⁴ Pueyochresha'ñapa' atet ochet:

—Errahuachca'ye yentña rreñetsḡe' ñeñḡcha' yerrach shonte' acheñ arrpa' amaya'ca'ye.

⁵ Jesúsñapa' atet otarraneterr:

—Sapa' ḡerrpona't sechenña pan?

Ñetñapa' atet otereterr:

—E'ñeca'ye canḡhrra yechen.

⁶ Allempoñapa' otan acheñenesha':

—Te'pa' sanorrḡha'tyes patso.

Allñapa' agapan ñeñḡ canḡherr pan. Agaphuepa' o' parasyoso'tenanerr Pompor allotñapa' o' shota'tan pan, apanatyesan pueyochresha'. Ñetñapa' o' epatyaset ñamet allohuen acheñenesha' e'ñe epa'huet. ⁷ Apuanet panpa' eñall ñaña pate'tets cacatollesha'. Jesúsñapa' alla parasyoso'tamḡperranerr ñaña cacatollesha' allempoñapa' otarranerr pueyochresha':

—Sepatyerraneterr ñaña cacatollesha'.

⁸ Allempoñapa' o' rrallme'chet allohuenet, e'ñe yetrra'tuahuet. O' e'ñe yetuahuetpa' čha a'pchatyeset ñeñtña'pa' a'yapačheret. Ñeñtña a'yapačheretpa' čhepa'tcha' chorrats cančherr cañter e'ñe tamo'yare'. ⁹ Ñeñt rrallme'chats atarr aton acheñenesha' ñato' allo'tsente' pa'tatsoch mil acheñenesha'. Allempoña Jesús'pa' so'tnerran acheñenesha'pa' ahuerr, ¹⁰ a'tapos noñto pueyochreshohuen ahuañpset o'ch ahuanmuet anetso ñeñt pa'so'cheñ Dalmanuta.

*Atto fariseonesha' enamaset Jesús gatapanetepa'to' po'partsoña
(Mt. 16.1-4; Lc. 12.54-56)*

¹¹ Allempoña Jesús'pa' huačherrñañerr ñaña fariseonesha' ahua'ch otnare'chet Jesús. Ñetña'pa' čha mueneñet o'ch topachet Jesús. Ñeñto'marña atet otoset:

—Yapa' aña'ye yemnen o'ch pegatapuey pepartsoña entoť allochñapa' attoch yeñotosep po'ñoč p'apa' Parets Puechemerep.

¹² Jesús'ña'pa' allenta enara čha muene' po'poñ entanet pueyočhro ñeñto'marña atet otanet:

—Eso'marte'ca'ye acheñenesha' ñeñt corra'yetsa te' ñetña'pa' aña atarr e'nenet o'ch norrtatanet nepartsoña entoť. Po'ñočca'ye na te'pa' o'ch notas, ama't coñe'ta amach es negataneto.

¹³ Allempoña Jesús sohuanerranetpa' a'taphuerr noñtopa' ahuañpes, pechaterra yon'ta'n.

*Atto Jesús toma'ntaterraneterr ñeñt po'chaser pen fariseonesha'
(Mt. 16.5-12)*

¹⁴ Pueyochresha'ñapa' čha puesnomuet o'ch anmuet pocrrañ, noñtopa' ama es eñalle ñeñt'cha' rret, e'ñe patrpa pan eñall. ¹⁵ Jesús'ña'pa' alla toma'ntaterraneterr, ñeñtña'pa' atet otanet:

—E'ñech señota ñato't semeñe'teña'ña fariseonesha' ama't ñaña Herodes po'chaser allo tsetenet pan.

¹⁶ Ñetña cotape'chyesetpa' atet otanna'tyeset:

—Amaca'ye yechenoña pan ñeñto'marte'ca'yeña oteney año'ch yemeñe'tatscheña fariseonesha' po'chaser.

¹⁷ Jesús'ña'pa' allempo eñotanet atet cotape'chyenet ñaña'pa' atet oterraneterr:

—Eso'mare't sellquëñesha' sotanna'tyena año' eñalle ñeñt'cha' serra'. ¿Ama't señoñe? ¿Ama't čhennasoña seyočhro? Teme'ttsena't se'charrtatenña seyočher. ¹⁸ Sapa' ama't aclo'yeteñe'pa' čhaca'ye sottena ñerra'mrrate' ama senteno. Ama't etateñe'pa' čhaca'ye sottena ñerra'mrrate' ama se'mueno. Ama't mameshapa' are'tña es seyerpueno.

¹⁹ Ñehua, ahuaña allempo neshota't amnar pan e'ñeca'ye epa'hua amnaroch mil yacmanesha'. Ellopa' ¿errpona'tña sapčha'huerrña ñeñt ashota'tyesaret allempo e'ñe seyetua? ¿Errpona'tña cañter se'chorrerr?

Ñetña'pa' atet ochet:

—Charra'ca'ye puechena epa cañter.

²⁰ —Ñaña allempo neshota't cančherr pan pa'tatsoch mil acheñ ñeñt rre' ¿errpona'tña sapčherrerrña ñeñt ashota'tyesaret allempo e'ñe seyetuerrerr? ¿Errpona'tña cañter se'chorrerrerr?

Ñetña atet ochet:

—Cančherrca'ye cañter ye'chorrerrerrña allempo.

²¹ Jesús'ña'pa' alla oterraneterr:

—Te'ña'pa' ¿ama'tña o' čhaponasoña seyočhro? Ñeñt neñotatenes ñeñt'pa' ama serrarec-paye' notenso.

Allempo Jesús'pa' a'crraterran aporo'yet all Betsaido

22 Allempoña čhačha'tet anetso Betsaido, allñapa' huapaterrñañeterr aporo'yet, ñeñtpa' atet otoset Jesús:

—Añecopca'ye yehuapateñña o'ch pa'płlacle'čař attoch pecuater.

23 Allempoña Jesúsapa' echa'nman aporo'yet pototpa' aneñ a'yenet all ama eñalle pocoll. Allñapa' a'yacлле'chos pa'snemo, attoña a'płlacle'chos, allñapa' atet och:

—¿Ama't coñe'tapa' ama't o' pento?

24 Aporo'yetña cohua'yestsapa' allenta otan Jesús:

—O'ca'ye nent acheñ alla chopeñen țarraña e'ñe atet nentyenanet ñerra'mrrate' tsach tomčha'tyets.

25 Jesúsñapa' alla a'płlacle'chererr, aporo'yetñapa' cohua'yerrtserrpa' čhepa'tcha' e'ñe cohuenterrtsaña pa'cłle'. E'ñe cohuen es entyesuahuer allohuen. 26 Allempoña Jesúsapa' atet och:

—Te'ña ñerra'm o'ch ahuerreř pepacłlopa' țarraña amach poñmatsterroña anetso'mar, allochñapa' amach esesha' potařsa'tatsetnerro ama't e'ñe puesheñarra.

Atto Pedropa' otan Jesús, řapa' řaña Yompor Puechemereř ñeñteř Cristotosets (Mt. 16.13-20; Lc. 9.18-21)

27 Allempoña ahuererr Jesús pueyochreshohuen. Arr sechenet all oteñet Cesarea ñeñțara Filipo allcha' chopeñe'chyeneta' all anetso'mar. Allña toñopa' a'řto'tnoman pueyochresha' ñeñtpa' atet otnomanet:

—¿Erroțena't otyenenña allohuen acheñenesha', napa' eseshante'?

28 Ñetñapa' atet otyeset:

—Patantarr acheñenesha'pa' atetca'ye otyenpet řapa' Juanañpo'te' ñeñteřo' apatañtatset Yomporecop. Po'potantaññapa' atet otyenpet řapa' Elíasopo'te'; po'potantaññapa' atet otyenpet řapa' aņeřo'te' po'psheñeñ ñeñt a'mıtaye't Yompor po'ñoñ ahuat.

29 Allempoñapa' alla a'řto'terraneterr:

—Sañapa' ¿erroțena'tña sotenenna sa?

Pedroña eñoratsapa' atet och:

—Papa' ñeñteřca'ye Cristotosets.

30 Allempoñapa' otan pueyochresha':

—Amach esesha' sotařsa'tatsto ama't puesheñarra napa' na ñeñten Cristotets.

Atto Jesúsapa' eñotatan pueyochresha' ñapa' amsarețterrach (Mt. 16.21-28; Lc. 9.22-27)

31 Jesúsña e'ñe allempoteñpa' moțetnomñ eñotatyenomue' pueyochresha' ñeñt atet anareț ñocop, ñeñtpa' atet otanet:

—Na Ñeñten Acheñetosetspa' atet anareț nocop, nanaccha' na'mueročhtatarețterra. Amach esesha' pocteye' nenterraye—ama't ñeñt pompornesha' pen judionesha', ama't ñeñt pa'mčha'tarețer pen judionesha' po'cornaneshar, ama't ñaña ñeñt etsotayenayeñ ñoñets ñeñt atet anareț judioneshacop—ama't ñetpa' amach eseshaye' neyemterraye. Attochña napa' muetsataterretcha'. Țarraña poma'pamtañoch o'ch alla netanterra.

32 Ñeñtpa' e'ñe eñotočhen otnomanet ñapa' atetcha' ařarețterra. Pedroñapa' allenta aneñ a'yenetpa' allñapa' atet otos:

—Arepa'ch Partseshacha' atteye' perrpeto ama't errponaña.

33 Jesúsñapa' alla puerraperra cohuos pueyochresheshonet allñapa' atet otan Pedro:

—Orrař a'yo neshoț oneñețe; řapa' amaca'ye Yomporeye' atet poctape'chatenaye; ñeñtpa' acheñarramche' poctarřña.

34 Allempoña Jesúsapa' agotan acheñenesha' ñaña pueyochresha' ñeñtpa' atet otanet:

—Ñerra'm esesha' muenene' o'ch coterrnet na e'ñe po'ñoçh attoch neyochresha' neperranet añ pochtetsa sohuanmuetepa'ña ñeñt atet muenenet e'ñe ñocpueta ama't e'ñe pocreñohuenet. Attochña ñetpa' o'ch e'ñe toma'nteret ñeñt chechnene' po'corsoch allcha' mueroçhtet ñamet. Attochña coterrnet e'ñe po'ñoçh. ³⁵ Tarro'mar ñerra'm esesha' e'ñe aña muenenet o'ch correnet atomat attoch e'ñe coshenet arr patsro, ñetñapa' çhach a'chencatet ñañeñeta. Tarraña ñerra'm esesha' e'ñe pocte' entene' o'ch es sohuanerret e'ñe pocreñohuenet nocop attoch epatuerret cohuen ñoñets ñeñt'pa' alloch sequeshperra, ñeñtña acheñerpa' ñañapa' corretsach e'ñe cohuen tayoteñ errponañohuen. ³⁶ Ama't errponenaparen esocmañen es yeyoratsetyes ora allpon ñeñt yentyen añe patsro, tarraña ñerra'm ñeñt'ach e'ñe ya'chencaterre' yecamquëñohuen, ñeñtña' ama't coñe'tapa' amach es sherberrye. Tarro'mar ama eñalle po'poñ ñeñt atarr sherbets, añña atarr nanac sherbets ñeñt'cha' a'queshpaterre' yecamquëñ. ³⁷ Tarro'mar yocoppa' ama es eñalle ñeñt'cha' yepomuerr alloch alla yerañterra yecamquëñ. ³⁸ Tarraña ñerra'm erra'tsencha' nepenquënaya na te', neñoñpa'çho'ña çha apencoçhen entenanet, napa'çho'ña nepenca'huerranetcha' esempoch nohuerra. Shonte' acheñenesha' ñeñt corra'yetsa te' arr patsro ñetñapa' atarr ochñañeneshet tarro'mar ñetpa' po'poña po'yomporer pa'yenet. Tarraña ñerra'm esesha'ch puepenquëñotetan na amach a'metenneto all, ñeñtña acheñerpa' napa'çho'ña çhach nepenca'huera ñerra'm esempoch nohuerra. Po'ñoçh napa' Ñeñten Acheñetosetspa' nohuerrach e'ñe Nompore po'cohuenñoç epan ñaña po'mllañoñeñnaneshar ñeñt e'ñe torra'yetsa Partsocop.

9

¹ Allempoña Jesús'pa' alla oterraneterr:

—Po'ñoçhca'ye te'pa' o'ch notas, patanta'ttsos ñeñtes arro'tsa'yenes te'ña ama't ama serromhuena'pa' o'ch senterrñañ Yompor po'cohuenña atto atarrcha' ayochresha'tterra ña e'ñe po'huamencot.

Allempo Jesús'pa' po'poñetañpsana pueyochresha'
(Mt. 17.1-13; Lc. 9.28-36)

² Allempo pechapmaterrerr, Jesúsñapa' ahuanerranerr pueyochresha'; añ anem Pedro ñaña Jacobo ñaña Juan. Ñetpa' arr anmanet atarr aspeno e'ñe ñaptoçhayet all aspeno. Allña Jesús'pa' machayotepa'tcha' e'ñe po'poñetañpsosanet. ³ Pa'shtampa' çha popta atarr nanac huallama't. Arr patsropa' ama eñalle alloch ya'huallama'ttat yeshtam atet ñerra'm ña pa'shtam atarr huallama'to poptena. ⁴ Allñapa' machayotepa'tcha' orrtanet Elías ñaña Moisés. Ñetñapa' alla serrpare'toset epuet Jesús. ⁵ Pedroña eñoratsapa' atet otan Jesús:

—Atarruaca'ye Maestrocha' cohueno'tseneyte' arr. Ama't pocte' penteñe yapa' o'ch ya'tomatonas ma'ppahua quërpachet, puepahuarra' pocopcha' po'ppahueña' Moisésocopcha', po'ppahueña' Elíasocopcha'.

⁶ Ñehua, Pedroña pueyorñoç atta muene' otatset, ama eñoche errotencha' ot. ⁷ Allempo eñorena Pedropa' çha orrtosahuet os ñeñt atarr cohuen poptetsa çhepa'tcha' a'pomañpsosanet. Cha e'morrtostsa ñoñets osot; ñeñtña ñoñetspa' Yompor otosahuet; ñeñt'pa' atet ot:

—Añmapa' ñeñt no Nechemer ñeñt atarr nemuerena, ñeñt'cha'ña e'ñe cohuen se'mñoterr.

⁸ Allempoña o' cohua'yerretpa' arepa'tcha' eseshaye' enterreto, ñapta enteret Jesús.

⁹ Allempo onaçherret aspenot Jesúsñapa' atet otnerranet:

—Te'pa' amach esesha' sota'psa'tatsto ama't e'ñe puesheñarra ñeñt atet o' sentua. Tarremphuach allempoch netanterra na rromot na Ñeñten Acheñetosets, allempochña

seserrpare'taterña allohuen acheñenesha'. ¹⁰Ñetña atet otanet Jesús'pa' atetcho' pet, ama a'meteññañeto po'ñoñ. Tarraña ñetñapa' atta a'p'to'tanna'tyesnerret:

—Ta'm ¿es'te'ña oteneña Jesús o'ch tanterra rromot'?

¹¹Allempoña pueyochresha' atet otnerret:

—¿Eso'mare'tña oteneña ñeñt' atarr etsotene' ñoñets ñeñt' atet anaret, Elías'o'ch ñanom huerrtsa?

¹²Ñañapa' atet otnerraneterr:

—Elías po'ño'chpa' ñachca'yeña huerrtsa ñanom, ñapa' e'ñechca'ye a'cohuentatuer ora allohuen. Tarraña sapa' ama't seño'tenoña ñaña ñeñt' atet anaret quellco e'ñe nocop. Ñeñt' allpa' atetca' oten na Ñeñten Acheñetosets atarrcha' na'muero'chtataretterra, atarrcha' tsena'terrnet. ¹³Tarraña napa' o'ch notas, Elías'pa' o'ca'ye huaphuerrañ arr; ñeñtapa' čhaña errotuanen p'apueret ñeñt' atet muena'yenet ñet. Atfoca'yeña etsoterraña ñaña ñeñt' atet anaret quellco ñocop.

Atto Jesús'pa' a'crraterran cheshachor ñeñt' otaten oneñt'
(Mt. 17.14-21; Lc. 9.37-43)

¹⁴Allempoña čhačherret allo'tsa'yen pueyochresha' allñapa' alla entuereterr shonte' acheñenesha' ñeñt' emchorrenaya po'potantañ pueyochresha'. Ñeñt'ña etsotayenayeñ ñoñets ñeñt' atet anaret'pa' alla entuerraneterr all es otnare'teññañet pueyochresha'.

¹⁵Allempoña entapuer allohuen acheñenesha'pa' čha atarr cohuanrrortapueret, mattrra'tet ñeshopa' huom'cha'tapueret. ¹⁶Jesús'ñapa' allenta otuerranet:

—Sapa' ¿erro'tena'tña sotanna'tyena?

¹⁷Puesheñarrña ñeñt' allo'tsenpa' ñañapa' atet ota'p:

—Maestrocha' napa' o'ca'ye nohuapatonapeñña nechemer, čhaca'ye chorreña oneñt' čha opanatateñ. ¹⁸Ñerra'm erro'teno rremueñpa' čhachca'ye ata'tateñ patso, čhach amtan pa'po'pa' o'ch rraso'tan pa's, o'ch e'ñe ečharra. O' notuosna'ña peyochresha' o'ch quečhpateret oneñt' ñesho'pa' tarraña ñetpa' amaca'ye eshcaye' quečhpateñeto.

¹⁹Jesús'ñapa' atet otanet:

—Sa ñeñtes acheñres ama't mameshapa' ama ayemtenaye' sentpenno. O' allponmatuanen allo'tsenen arr patsro, napa' atta atarr na'huantennas, atta necuenes ñato' atfo'tpa' o'ch same'ñerrna.

Allempoñapa' atet otanet:

—Ama'tpa' sanmonca'ye chesha' arr.

²⁰Allempoña anmoñet chesha'pa' oneñt'ñapa' entosan Jesús'pa' čhepa'tcha' otatosanña chesha'pa' alla ata patso, čha pomero'ta, amtan ñaña pa'po'. ²¹Jesús'ñapa' allenta otoñ pompor:

—¿Esempo'feñe'tña atet perra?

Ñañapa' atet och:

—Cheshoteñca'ye atet perra. ²²O'te' epaye' ata'tater ama't tso ama't ñaña oño atfo'ch muetsereñ. Paña te'pa' ñerra'm erro'teno'tpa' e'ñe pemuereño't pebensam'psaye'cherrnan nechemer alločhñapa' atfo'ch metuer atfo' muero'chtana.

²³Jesús'ñapa' atet och:

—Ñerra'm na peyemtena amaca'ye eñalleña ñeñt' torrapo' añecop ñeñt' e'ñe neyemtenaya na.

²⁴Allempoña ñeñt' pompor pen chesha'pa' rranapa' atet otererr:

—Napa' neyemten'pañca'ye, te'ñapa' peyenpa'n Ayochreshate atfo'ch neyemterrpa e'ñe poctacma.

²⁵Allempoña Jesús'pa' entapan shonte' acheñenesha' ñeñt' matačhetsa ñeshone't, ñañapa' allenta otan oneñt':

—Pa oneñete, opanatatañeḗ, a'paquetatañeḗ, te'ñapa' o'ch notapḗ: Pequechpa'ner cheshachor e'ñe tayecma, ama't errponaña amach alla pechorrere'te.

²⁶ E'ñe otue' atet oneñetñapa' chepa'tcha' rrana'nmata, alla otatnerranerr cheshachorpa' cho quechpa'nmue' o' ahuerr.

Cheshachorpa' ama pelleno cha otta ñerra'mrrate' o' rroma. Acheñenesha'ñapa' atet otyes:

—Po'ñoçh te'pa' o'ca'ye rroma.

²⁷ Jesúsñapa' allenta chete' pototpa' o' tantach, chesha'ñapa' cha terrets e'ñe cohuen.

²⁸ Allempoña Jesúsapa' ahuerr pueyochreshohuen, o' be'toscha'tuerret pocollo, allpa' e'ñe ñaptochayet, pueyochresha'ñapa' allenta otueret Jesús:

—Yapa' ¿eso'mare'tña ama eshcaye' yequechpatatereña oneñet'?

²⁹ Ñaña'apa' atet otanet:

—Ñeñt atet oneñetpa' amach errotenot yequechpatatereña e'ñe atta. Chochña yema'yochena ñaña yema'yochreñot ama't yerrarpa' o'ch yequechpue' mame'. Attotcha'ña yequechpatatereña oneñet ñeñt atet.

Jesúsapa' eñotaterraneterr puepocheño ñapa' chocmach muetseret
(Mt. 17.22-23; Lc. 9.43-45)

³⁰ Ahuanerretterr allotpa' arr oñemhuanerret Galileo'mar. Jesúsñapa' mueneñeñ a'nahuoto'ch metañ ³¹ tarro'mar ñapa' mueneñ o'ch yechatnoman pueyochresha'. Ñeñtapa' atet otnomanet:

—Na Ñeñten Acheñetosetspa' pomataterrnetcha' attochña errotuancha' perrnet. Atteñapa' o'ch muetsaterrnet tarraña poma'pamtañoñapa' o'ch alla netanterra.

³² Ñeñña ñoñets ñetñapa' ama't puesheñarrotetapa' ama eseshaye' eñotenaye' enteñeto ñeñto'marña ama a'p'to'tenaye' enteñeto.

All eñotateney ñeñt acheñer e'ñe po'ñoçh atarr asherben enteñ Yompor
(Mt. 18.1-5; Lc. 9.46-48)

³³ Allempoña cha'cha'tet ñaña Capernaumo. Allempoña chapuet pocollo Jesúsñapa' otanet:

—Sapa', ¿eso't sotanna'tyesnenaña ñorra' toño?

³⁴ Ñetñapa' ama eseshaye' anapuenaye' entaye tarro'mar ñetpa' añca'ye otanna'tyesnenetña toño:

—Yapa' erra'tsenoteyte'ñaca'yeña ñeñtey atarr sherbets, ñeñtey atarr añcha'taretuyen enteney acheñenesha'.

³⁵ Jesúsñapa' all anorrospa' allenta chore'tan allohuen pueyochresha'chnopa' atet otanet:

—Ñerra'm erra'tsenotes ñeñtes atarr añcha'taretuyen entetsañ, ñeñtes acheñres socoppa' añ poctetsa o'ch atet senterra ñerra'm ama esoshe'mayayso ñeñt atet pena ñeñt atta atarr taruaset po'potantañecop, ama't ñaña allohuenacop.

³⁶ Jesúsñapa' cheshatolla chore'tpa' tomach e'ñe alla, allenta enachpa' atet otanet:

³⁷ —Erra'tsenotes sa ñerra'm e'ñe cohuen saguëñ ama't ñeñt ama asherbenaye' entyeneto atet ñerra'm añ cheshatoll tarro'mar sapa' na same'ñena, na'ña e'ñe cohuen saguën. Elloña ñaña erra'tsenotes sa ñeñtes naguëne' na, ama e'ñe naptocheyey saguëno, añe'ña saguënnan Nompör ñeñt nellsensene'.

Atto eñotateney ñeñt ama choye' yepatare'tenaye ñeñña po'ñoçhpa' e'ñe parrocmayeyenpanna
(Lc. 9.49-50; Mt. 10.42)

³⁸ Allempoña pueyochresha' ñeñt Juanpa' atet otan Jesús:

—Maestro, ya ahuañapa' atet yeñch puesheñarr yacma ñeñt quechpatene' oneñeñ. E'ñe puechore'teñoñep ña peso'chñopa' quechpatan oneñeñ. Yañapa' ama pocteye' yeñche tarro'mar ñapa' ama parroye' yeyemteno. Ñeñto'marña yapa' atet yoch:

—Amach atet pepatsto.

³⁹ Jesúsñapa' atet ot:

—Sapa' amachca'ye sepatare'tatsche tarro'mar ñerra'm erra'tsencha' orrtate' part-soteñets e'ñe na neso'chño, ñeñtña acheñer tsapatonetpa' amachca'ye muenere alla o'ch achmāre'terren. ⁴⁰ Ñaña ñerra'm ama cho epatare'tenye yama, ñeñtña po'ñoçhpa' e'ñeca'ye parroçma yeyenpanna. ⁴¹ Po'ñoçhca'ye notenes: Ama't erra'tsena acheñer ñeñtcha' sapue' ama't coñe'ta oñ tarro'mar sapa' e'ñe na neyochresha' nepenes, ñeñtña acheñerpa' çhocmach atsa'tare'terra ñeñtcha' atarr coshaterre' ña.

Atto çhocmach huaponaya ñeñtcha' yetpatyene' o'ch atet patyeseñ ñeñt ama pocteye' enteno Yompor

(Mt. 18.6-9; Lc. 17.1-2)

⁴² 'Ama't erra'tsena ñeñt ama pommo'cheñoñeye' ame'ñenno atet ñerra'm cheshatoll ñeñt ama eñotenana' o'ch ommo'chena, tarraña ñerra'm esesha'ña po'psheñeñ o'ch atet patach ñeñt ama pocteye' enteno Yompor, ñeñtña acheñerpa' atarrcha' yoroçheno'tsen tarro'mar ñapa' aña o'patenaya coñcheñets ñeñt atarr huomenc. Ama't ñocoppa' ama tama yoroçhenayayñe ñerra'm ama atet patenana' po'psheñeñ, e'ñech allorocma çharachetañ mapue' añecmuen pa'çhnoño allpon ñerra'm puetse'tamets o'ch huapore'chet oño epo allcha' ño'shach mapue'. ⁴³⁻⁴⁸ Ñaña o'ch noterrser: Ñerra'm sechets patyenes ñeñt ama pocteye' enteno Yompor atet ñerra'm sot, setac, seclle', añ poctetsa o'ch sequechpuerr ñeñt çhocma atet patse'tatyenes sechets. Ñeñtpa' e'ñe atet ñerra'mrrate' e'ñe allorocma o' sepecherr sot, setac, o' serroterr seclle', o'ch sehuapore'ter. Añ cohuen socop ama't e'ñe sepo'yotateñoñ corretsasach tayoteñ erponohuañen. Añña ama cohuenayaye socop esempohuañenpa' e'ñech ora epo'mar sotpa' o'ch secherr coñcha'puetso all parraren tso' ñeñt ama emaya'pahuoyaye. Allpa' ama't pueñmochapa' ama rromueno; tso'pa'cho'ña ñeñt allo'tsenpa' ama amayaño ama't errponaña. Ñaña añ cohuen socop ama't e'ñe setco'tpa' sepsheñtatquëñoñ corretsasach tayoteñ erponohuañen. Añña ama cohuenayaye socop esempohuañenpa' e'ñech ora epo'mar setacpa' o'ch huapore'terrset coñcha'puetso all parraren tso' ñeñt ama emaya'pahuoyaye. Allpa' ama't pueñmochapa' ama rromueno; tso'pa'cho'ña ñeñt allo'tsenpa' ama amayaño ama't errponaña. Ñaña añ cohuen socop ama't seclloyot sepsheñtaclo'yeñoñ o'ch secherr all añcha'tare'tena Yompor. Añña ama cohuenayaye socop esempohuañenpa' e'ñech ora epo'mar seclle'pa' o'ch huapore'terrset coñcha'puetso all parraren tso'. Allpa' ama't pueñmochapa' ama rromueno; tso'pa'cho'ña ñeñt allo'tsenpa' ama amayaño ama't errponaña.

⁴⁹ Ñeñtña Jesúsapa' atet toma'ntaterraneterr:

—Allohuen ñeñtcha' cohuenterrtsapa' añcha'ca'ye a'cohuentatene' tso'; ñaña allohuen ayarraçhno ñeñt amsare'ttetsa Yomporecoppa' añca'yeña a'cohuentatene' pos. ⁵⁰ Ñehua, yapa' yeñoteñ pospa' atarr cohuen sherbeney. Tarraña ñerra'm posña po'poserrteña huañerretspa' yapa' amate' erro't yepe o'ch alla ya'poserrtater attoch alla sherberrey. Sapa' e'ñepa'chña cohuen sesherbannena e'ñech ates ñerra'm pospa' atarrcha' sherbeney. Attochña e'ñe cohuen sentannena e'ñech muechet seyçha'yena.

10

Atto Jesúsapa' yeçhatosanet ama asanna'tpahuoyaye
(Mt. 19.1-12; Lc. 16.18)

¹ Allempoña Jesús pa' err Capernaumotpa' ahuerri anetso Judeo ñaña arre'na sen Jordanas yom'ta'n. Allñapa' alla shonterrñañerr acheñenesha', ñaña pa' ye chaterraneterr Yompor po'ñoñ ñeñt' chocma attecma penanet. ² Allñapa' o' alla huacherrñañerr ñaña fariseonesha'. Ñetñapa' aña atarr e'nenet e'ñe puehquëño'tet po'ñoño'tetpa' o'ch eñorachet ñeñt' ama cohuenayaye. Ñeñto'marña ñetpa' atet otoset:

—Ta'm ¿pocte'te' o'ch yeser yetapor?

³ Ñaña pa' atet otapanet:

—Sapa' ¿ama't seño'tenoña Moisés po'ñoñ ñeñt' atet nonase't?

⁴ Ñetñapa' atet ochet:

—Moisés po'ñoñ pa' atetca'ye oten, chocch yequellcoñ yetapor papell ñeñt'cha' yañ allempochña yeser.

⁵ Jesúsña pa' atet otanet:

—Tarraña sa seyo'chropa' chocmaca'ye po'poñ sentuena ñeñto'marca'yeña Moisés pa' atet quellconase't attoch sese' setapor. ⁶ Ama't atet muenataseña pa' tarraña Yomporpa' e'ñe ahuatoteñ allempoteñ es ye'chcatyes “allempo ye'chcatan ñaña asheñorr, ye'chcatan ñaña peno.” ⁷ Allempo Yomporpa' atet ot: “Ñeñto'marña yacmapa' ñerra'm esempoch sena'ta, coyanesha'pa' o'ch echan puerrollar, añ pocte' o'huañcha' tama yemteñet pamo'mte' allochñapa' yacmapa' attochña e'ñe parrocmat epuet puetapor. ⁸ Attoña epsheño'maretpa' e'ñech patrpa' po'chets penet.” Atto'tcha'ña o'huañcha' pueheña'tetstet, allochñapa' o'ch e'ñe pueheñarratet. ⁹ Ñeñt'atto Parets e'ñe patrpatan yacma epuet puetapor amach cha'ello pa' alla sannerreto.

¹⁰ Allempo cha'cherret pocollo, allña pueyochresha'pa' atet otueret:

—¿Erro'tente'ña ñeñt' atet poten ñorra' año' asanna'tpahuo?

¹¹ Ñaña pa' oterraneterr:

—Ñerra'm esesha' serre' puetapor o'ch alla yorerran po'psheñeñ ñeñt'cha' puetapor perr, ñeñt'ña yacmarpa' chachca'ye ochña'tam'perrana puetaporeshe'mañ. Ñeñt'pa' ama pocteye' enteñe Yompor. ¹² Ñaña coyanesha' ñerra'm serran puerrollar o'ch yorer po'psheñeñ yacma ñeñt'cha' puerrollar perr, ñeñt'ña coyanesarpa' chachca'ye ochña'tam'perrana ñaña puerrollareshe'mañ. Ñeñt'pa'cho'ña ama't mameshapa' ama pocteye' enteñe Yompor.

*Atto Jesús pa' bensare'tam'psapan cheshanesha' ñeñt' huapatoñet
(Mt. 19.13-15; Lc. 18.15-17)*

¹³ Allempoña pa' huacha'tachet ñaña shonte' cheshatollesha' Jesúsesho. Ñetpa' añecopña huacha'tachet o'ch a'p'lla'yesapanet Jesús. Jesúsña pueyochresha' allempo entapan ñeñt' huacha'tate' cheshanesha'chno ñetñapa' ama pocteye' eñcheto o'ch anmoset cheshatollesha' Jesúsesho ñeñto'marña ama amnataret'apueto. ¹⁴ Tarraña Jesúsña allempo entan pueyochresha' cha'epatare'tapan cheshatollesha', ñaña pa' ama't mameshapa' ama pocteye' entaneto. Ñaña pa' atet otanet:

—Pocte'ña'cho' semnachñaca'yeña cheshanesha' onosetepa' e'ñe nesho. Amachca'ye cha' sepatare'tatstapaneto tarro'mar allohuen ñeñt' atarr neyemtenaya na atet ñerra'mrrate' cheshatoll, ñetcha' o'patenetña Yompor po'cohuenña ñeñt'atto ayochreshattena ña. ¹⁵ Po'ño'chpa' o'ch notas, ñerra'm esesha' ama e'ñeye' pueyemteño'teye' aguëññañeto Yompor po'cohuenña amach atet perreto ñerra'm cheshatoll e'ñech yemtenana ñeñt'cohuan'pene', ñetñapa' amach o'patenetña Yompor po'cohuenña atto atarr ayochreshattena ña.

¹⁶ Allempoña Jesús pa' a'chono'tyesapan cheshanesha'pa' allña a'p'lla'yesapanetña e'ñe ña potot'attoña bensare'tam'psapanet.

Atto puesheñarr ñeñt huepueshameñ ñeñt atarr eçllayoret ñañaapa' eñorana'tosana Jesús (Mt. 19.16-30; Lc. 18.18-30)

¹⁷ Allempoña Jesúsapa' o'ch ahuenñerr allenet sechena. Allentepa'tcha' huapa'muena puesheñarr yacma e'ñe matenacma huapa. Alla concorpana'tosana Jesúsapa' atet otos:

—Maestro, p'apa' atarr cohuen acheñreñ, te'pa' o'ch p'otapuen ¿errotena'tcha' nepaña na ñeñt e'ñe cohuen attochña napa' corretsanach e'ñe tayoteñ ama't errponañohuen?

¹⁸ Jesúsñaapa' atet otañ:

Eso'mare't p'otenenña napa' atarro' cohuen acheñren. Arr arromñatenesha' ama't e'ñe puesheñarrapa' ama eñalleña ñeñt e'ñe cohuen acheñer. Ñaptaña Yompor ñeñt e'ñe po'ñoçh cohuen. ¹⁹ Papa' e'ñe peñotuen Yompor po'ñoñ all oteneñ ñeñtcha' atet yepena e'ñe cohuen, ñeñt atet oteneñ: “Amach yechtapretyesatsto taporets, amach yemtsanna'tatsto, amach yetyesatsto, amach yetoma'tam'psatsche yamo'ts e'ñe atta, yeshquëño'tpa' amach es yeprratam'psatsche po'psheñeñ, ñaña yemorrenteño'tpa' yemcha'na'chcha' yompor ñaña yachor.”

²⁰ Ñeñtña a'p'to'tene'pa' atet otererr:

—Maestrocha' napa' e'ñeca'ye cheshoteñ ora añechnopa' e'ñeca'ye netsotueñ.

²¹ Jesúsña e'ñe puemorrenteño' cohue'pa' atet otererr:

—Eñallmeñca'ye paterr ñeñt pepalltena ñeñt ama atteye' pepeno. Te'pa' añcha'ña atet peña o'ch ahuerreñ o'ch pepomhuerr ora allpon ñeñt pechyen o'ch p'apa'yera' huocchañeshachno ñeñt atarr es pallta'yetsa, attochña p'apa' pecherrcha' ñeñt atarr nanac sherbets Yompor pue'ntaño. Allempochña pehuerrapa' o'ch p'octerren attoch e'ñe neyochresha' neperreñ e'ñe poctacma.

²² O'ña e'mhuan ñeñt atet och Jesúsapa' ñañaapa' cha atarr nanac lleca tarro'mar ñapa' shonte' esocmañen echyen. Ñeñto'marña e'ñe puellquëñesha' ahuer.

²³ Allempoña Jesúsapa' cohua'yesanetpa' atet otan pueyochresha':

—Ñeñt atarr eçllayoretpa' atarrca'ye nanac echarr attoch agapoñet Yompor po'cohuenña ñeñt atto ayochreshattena ña.

²⁴ Pueyochresha'ñaapa' cha muene' yore'tanet ñeñt atet otenanet. Jesúsñaapa' alla oterraneterr:

—Nechemerneshacha' o'ch notas: Añ acheñer ñeñt añach e'ñe yemtana ñeñt allpon echyen arr patsro ñeñtña acheñerpa' atarrca'ye nanac echarr o'ch agapoñet Yompor po'cohuenña ñeñt atto ayochreshattena ña. ²⁵ Ñehua, ñeñt'pa' atet'cha' netma'ntacha. Po'ñoçh yapa' yeñoteñ berr añecmuen allpon ñerra'm huaquësh* atarrca'ye torrapo' o'ch esho'tosa añeñollponatollo atet ñerra'mrrate' acosh puetatollo. Ñeñt'pa' atet'ca'ye penaña acheñ ñeñt eçllayoret, ello atarr torrapo' o'ch agapan ñaña Yompor po'cohuenña ñeñt atto ayochreshattena ña (tarro'mar ñetpa' ama mueneñeto o'ch sehuanmuet ñeñt atarr morrentenet ñet attoch pueyochresha' perranetañ Yompor).

²⁶ Pueyochresha'ña allempo e'met Jesús atet oten, ñetñaapa' cha muene' lleca'rrtetpa' atet otanna'tyeset:

—Tarraña ñerra'm atette'pa' amate' esesha' a'queshpataretterrtso ama't puesheñarra tarro'mar yapa' yeñoteñca'ye huaquëshpa' amaca' esho'tenoña acshequeto.

²⁷ Allempoña Jesúsapa' atta cohua'yesanetpa' atet oterraneterr:

—Sa arromñateneshaspa' amach es errotenaye' apen senteno. Tarraña Yomporpa' ama eñalleña ñocop ñeñt atarr torrapo' enten.

²⁸ Allempoña Pedropa' atet och:

—Partseshacha' po'ñoçh yapa' o' e'ñe yesuanom ora allohuen attoch e'ñe yocterreñ.

²⁹ Jesúsñaapa' alla oterraneterr:

* **10:25** Ñehua, Jesús añ toma'ntatanet camello ñeñt payara penet all pa'nyo, ñeñt e'ñe allpon ñerra'mrrate' huaquësh.

—Allohuen erra'tsencha' acheñer ñeñtcha' e'ñe sehuanmue' allohuen ama't pa'paclohuen, ama't pa'mo'nasheñnesha' ñato' po'chanesha' ñato' pompor, pachor ñato' puetapor, ñato' pacñeñar ñato' po'patseñ attochña napa' e'ñech cohuen sherberrnet pueserrpare'teñoñet cohuen ñoñets alloch a'queshpataretterra acheñenesha', ³⁰ elloña ñetpa' o'ch alla aguërret shonte' esocmañen ñeñt atarr cohuen. Ama't allponapa'tets sehuanomyesnomuet, elloña çharroch çharra'ch alla agapyerret, ama't e'ñe tayoteñ allempo correnet arr patsro—ama't ñeñtcha' pa'pacllaçhno perret ñaña ñeñtcha' pa'mo'nasheñneshaçhno perret, ñaña ñeñtcha' po'chaneshaçhno perret, ñaña ñeñtcha' pachorneshaçhno perret ñaña ñeñtcha' pacñeñareçhno perret, ñaña ñeñtcha' po'patseñ perret. Tarraña ama'tcha' atet aparetterretaña' çhocmach amueroçhtataretterret pame'ñeñoñetan na. Elloña tsapañoneña ñetña' aguërretcha' ñeñt alloch corretsetach beñecpuen pocsheñeshocmañen. ³¹ Te'pa' señoche'pa'ch eñall shonte' acheñ ñeñt ama asherbenaye' senteno sa te' tarraña ñetña allempopa' atarrcha' asherben enterranet Yompor. Ñaña eñall shonte' acheñ ñeñt atarr asherben sentyen sa te', tarraña ñetña allempopa' amach asherbenaye' enterraneto Yompor.

*Allempo Jesús'pa' alla eñotaterraneterr ñapa' çhocmach amtsaretterra
(Mt. 20.17-19; Lc. 18.31-34)*

³² Allempo ahuaneneter ñaña Jerusaléñoneñ, all oñenet toño'mar Jesúsña' ña otetsa. Pueyochresha'ña' çha toratsetyesnenet pueyoçhret, e'ñe pueñcha'ñañoña coteñ. Pueyochresha' ñeñt çharra' puechena epsheña ñeñtña' ahuanem Jesús ellonet, allña' eñotaterraneterr ñeñtcha' huapoya ñocop. ³³ Ñeñt'pa' atet otanet:

—Te'ña po'ñoçpa' o'ca'ye ahueney Jerusaléño. Allcha' pomataterret na Ñeñten Acheñetosets. Añcha' nerrmuerre' ñeñt pa'm'cha'tareternesha' pen allohuen judionesha' po'cornaneshar ñaña ñeñt atarr etsotayenayeñ ñoñets ñeñt atet anaret. Ñetña' atetcha' otyesnet na'mtsaretterrepa'to' o'ch pomuerrnet po'poñ acheñesho ñeñt ama judioneshayaye. ³⁴ Ñetña pueche'tatseteñoñetanpa' allcha'ña achm'are'terrnet, ashterrnetcha', a'coshare'terrnetcha' attotcha'ña o'ch corso'tam'perrnet, tarraña poma'pamtañoçh alla netanterra.

*Atto Jacobo ñaña Juan ñetpa' enamueñet Jesús attoch anorrçha'tyesuerret ñesho
(Mt. 20.20-28)*

³⁵ Allempoña' atet oteña' Jacobo ñaña Juan ñeñt Zebedeo puechemeresha' ñeñt'pa' atet otoset:

—Maestrocha' yapa' añca'ye yemnen o'ch atet pe'pa'y ñeñtcha' yota'p.

³⁶ Ñaña'pa' atet otanet:

—Sapa' çerroñena'tña semnen atetcha' ne'pas?

³⁷ Ñetña'pa' atet otereterr:

—Yapa' añca'ye yemnen te'pa' o'ch pemnatey o'ch yanorruerr pesho pecohuenño, puesheñarroñey'pa' pecohuenrotcha' yanorryesuer, po'psheñeña' pe'çhcoterotcha' anorruerr allcha' yecohuentapretterpa.

³⁸ Jesúsña'pa' atet otanet:

—Sapa' amaca'ye señoñe ñeñt po'ñoçh senamuenen. Añca'yeña senamuenen attoch semueroçhtapretterra saña. Ta'm çe'ñe' po'ñoçh pocte' senteñ o'ch semueroçhterra saña tarro'mar napa' çhocmach na'mueroçhtataretterra?

Ñeñt mueroçhteñetspa' Jesús'pa' atet toma'ntatanet ñerra'mrrate' atarr pesherr es yorren orram'itso ñaña atto yapatarettena e'ñe atet ñerra'mrrate' çho' ya'mtsaretterra Yomporcop.

³⁹ Ñetña'pa' atet ochet:

—Yapa'çho'ña atetcha'ca'ye ye'pa.

Ñaña' alla oterraneterr:

—Ñehua, po'ño'chpa' sa'muero'chtataretterrach saña attescha' ñerra'm na, sa'mtsaretterrach saña. ⁴⁰ Tarraña añña attoch sanorryesuerr nesho necohuenro' ñaña ne'chcoterot allcha' secohuentapreterrna ñeñ'pa' amaca'ye naye' semnatenaye. Añcha'ña anorryesuerrets all ñeñ' e'ñe o'patatenna Nompor.

⁴¹ Añña po'potantañ pueyochresha' ñeñ' charrasheña allempo e'met ñeñ' atet ena-muen Jacobo epuet pa'mo'nasheñ Juan, ñetña'pa' ama pocteye' eñcheto cha muene' e'moñe'chet. ⁴² Allempoña Jesús'pa' alla chore'terranet allohuenet ñesho ñeñ'pa' atet otanet:

—Sapa' seño'teñte' ñeñ' atet pena po'poñ acheñenesha' ñeñ' ama judioneshayaye. Ñet ñeñ' pa'm'cha'tareter penet e'ñech pa'm'cha'no'chteñocmañen pomnaren pa'yanan allo-huen pueyochresha'chno. ⁴³ Sapa' arepa'chña atteye' sepanna'tatsto e'ñe sommo'cheño'. Socoppa' añña poctetsa. Ñerra'm erra'tsenotes atarr añcha'taretoyen entetsañ ñeñ'es acheñres socoppa' añ poctetsa o'ch atet senterra ñerra'm ama esoshe'mayayso ñeñ' atet pena ñeñ' atta atarr taruaset po'potantañecop. ⁴⁴ Ñaña ñerra'm erra'tsenotes ñeñ'es muenene' o'ch atarr asherben entenset ñeñ'esña acheñrespa' añ poctetsa o'ch atet senterra ñerra'm ama esoyayso allochña'pa' attochña e'ñech cohuen setorrena po'potantañecop ama't ñaña allohuenacop atet ñerra'mrate' acheñ ñeñ' atarr taru-aset e'ñe atta. ⁴⁵ Atet ñerra'm na Ñeñ'ten Acheñetosets, napa' ama añecpaye' nehuapo añe patsro allochña'pa' sapa' o'ch atta atarr sesherbapuen na atet ñerra'mrate' napa' atarr añcha'tare't sentenen. Napa' añecopña nehuapa allochña'pa' nachña se-sherbose'ña sa, ñeñ'fo'marña napa' naña pomostsa nañeña o'ch nerromos socop attochña netsa'tuerrnasa so'chñar ñeñ'es shontes pa'namen acheñres. Attochña sapa' amach sañeña rromatso so'chñarecop.

Allempo Jesús'pa' a'crraterran puesheñarr aporo'yet ñeñ'pa' añ pa'so'cheñ Bartimeo (Mt. 20.29-34; Lc. 18.35-43)

⁴⁶ Allempoñapa' o' cha'cha'tet Jericó. Allempo meterrerr Jericó' epuet pueyochresha' ñaña shonte' acheñenesha' e'ñe allpona serreterrpa' allña e'ñe toñeto'pñopa' ahuepa't anorros puesheñarr aporo'yet ñeñ' chocma enamare'tets quelle. Ñeñ'pa' añ pa'so'cheñ Bartimeo ñeñ'pa' Timeo puechemer. ⁴⁷ Ñaña'pa' eñotatoset añ huetsa Jesús ñeñ' nazareto'marnesha'. Ñeñ'ña aporo'yetpa' allenta rranare'ch atet otapan Jesús:

—¡Pemueraye'chnomna Jesúsocha' naña! Papa' ñeñ'ep Davidna'tarep.

⁴⁸ Acheñenesha'ñapa' cha muene' che'ptare'tnometña aporo'yetpa' atet otoset:

—O'hua pemma.

Aporo'yetñapa' ello alla rranare'terrerr atet otererr:

—¡Pemueraye'chnomnañaca'ye Ayochreshate! Papa' ñeñ'ep Davidna'tarep.

⁴⁹ Jesús'ña'pa' alla tomos atet otosan acheñenesha':

—Sechore'chñaca'ye onepa' arr.

Ñetña chore'chet aporo'yetpa' atet ochet:

—Te'pa' cho'pa cosherrtsa, ñapa' o'ca'ye agotosep. Petantnoma e'ñe tayecma.

⁵⁰ E'ñe atet otuetpa' cha tantatsa cha a'meyanmue' allo ca'mañna'tenapa' allenta ahuo' Jesúsesho. ⁵¹ Jesús'ña'pa' atet otap:

—Papa' ¿eso'tña pemnen ñeñ'cha' atet ne'posep?

Aporo'yetñapa' atet och:

—Añca'ye Maestro nemnen o'ch pecuatnomuen attoch o'ch cohuen nenterrapa.

⁵² Jesús'ña'pa' alla otererr:

—Te'pa' ahuerrep e'ñe peñmañesha' tarro'mar atto atarr peyemtapna na ñeñ'ca'yeña o' e'ñe a'crraterrep.

E'ñepa'tcha' allorocma e'ñe cohuen enterra. E'ñe cohuerrtsapa' cha co'ta'nmue' ñaña Jesús allenet sen.

11

Allempo chap Jesús Jerusaléño

(Mt. 21.1-11; Lc. 19.28-40; Jn. 12.12-19)

¹ Atteñapa' o' cha'cha'tet allame'tets Jerusaléño. Chapuet aspeno ñeñt pa'so'cheñ Olivopen. Allñapa' allo'tsen anets ñeñtpa' añ pa'so'cheñ Betfagé, po'poñpa'cho' allo'tsen anets ñeñtpa' añ pa'so'cheñ Betania. O'ña chapmochet all anetso, ² Jesúsñapa' atet otnoman epsheña pueyochresha':

—Sapa' o'ch sota o'ch se'chap a'yenteye' e'ñe allara anetso. Allñapa' allcha' sentos ashen rre'ptor all huanqueñet; ñeñtpa' ama't puesheñarra acheñ amaca'ye monteña'. Ñeñña ashenpa' o'ch sepyam'psospa' o'ch sanerrnan. ³ Ñerra'm esesha' sotapue': “¿Eso'mare't sepyam'penña ashen?” sañapa' atet'cha' sotosanet: “Yepartsesharca'ye muenene'ña añ ashen. Mameshapa' o'ch alla apuerra'.”

⁴ Allempoña ñetpa' allenta ahuanmuet. O'ña chapuet anetsopa' all entoset ashen ehucare't e'ñe opellrron'ta'note'tsen all ten e'ñe toño. Ñetñapa' pueyam'psoset.

⁵ Allempoña puesheña'tets ñeñt tom'cha'tyets allpa' atet otapanet:

—¿Eso't sottenña arr? ¿Eso'mare'tcha' sepyam'psosña ashen?

⁶ Ñetña atet otapanet Jesúsapa' atet'cho' otoset. Allempoñapa' atet otare'ttet:

—Ñeñtepñapa' sanerca'ye.

⁷ Allempoñapa' allenta anerretña ashen Jesúsesho. Nohuerret pa'shtam ashnache'ñopa' Jesúsñapa' allenta monta'nmana ashen. ⁸ Shonte' acheñenesha' ñetñapa' to'tma'tyesoñet pa'shtam toño allcha' oñem Jesús. Po'potantañe'chnoñapa' tsormo're'tyeset tsach pue'mo'rer allo topanetyeset toñ.

⁹ Allohuen acheñenesha' ñeñt otachetsa ñaña ñeñt co'ta'huanene' chenta' ñetñapa' puerrannarteño'fetpa' atet atarr cohuentatyeneññañetpa' atet otenet:

—¡Acsherrapo'ch allohueney! ¡Aye'cho'chtaterrapo'ch Jesús ñeñt llesensen Yompor!

¹⁰ ¡Aye'cho'chtaterrapo'ch Jesús ñeñt'cha' añcha'tare'ttertsa! Te'pa' o'ca' huerraña yatañ David pa'm'cha'tare'tteña. ¡Aye'cho'chtaterrapo'ch ñaña Yompor Parets ñeñt pue'ntaño'tsen!

¹¹ Atteñapa' chap Jesús Jerusaléño'apa' allenta ahuos Parets pa'paclo, all be'tosos, cohua'yesosan ora allohuen ñeñt allo'tsa'yen. Cohua'yesueña'pa' o' cha'nerrpa' ahuo' anetso Betanio allohuen pueyochreshohuen ñeñt charra' puechena epsheña tarro'mar allempopa' o'ca'ye ellerren.

Allempo Jesúsapa' eñora higohecop amach eñalletatsto pue'mer

(Mt. 21.18-19)

¹² Tsapat allempo ona'cha'ta'muenet Betanio't, Jesúsñapa' cheporra'nma. ¹³ All oñenet Jesúsñapa' a'yoteñ entosan higoch ñeñt taya o' asopanre'terr. Ñaña'apa' allenta ponem'ya o'ch enteña' ñato' e'mere'tte'. O'ña chap allame'tetspa' pasopanrepa'tcha' entosñañ tarro'mar ama' chena' allempo me'ten. ¹⁴ Jesúsña chepa'tcha' eñorostsa higohecop, ñeñtpa' atet otos:

—Ama't errponañapa' amuepa'ch esesha' tsumuerraye añ higoch pue'mer.

Pueyochresha'ñapa' e'ñe e'mueñet atet eños higohecop.

Atto Jesúsapa' a'cohuentatosan Parets pa'paquell

(Mt. 21.12-17; Lc. 19.45-48; Jn. 2.13-22)

¹⁵ Allempo entuanman Jesús higoch allempoñapa' o' alla cha'cheneterr Jerusaléño. Jesúsñapa' be'tosuenerr Parets pa'paclo, allñapa' allentepa'tcha' mueño'tuosan allohuen

ñeñt pomatsre'tetsa all ñaña allohuen ñeñt rañta'yetsa. E'ñe čha'nmačha'tatosanet allot, a'coye'tamšsosanet po'mesachno allecma camyatyenet po'čllayoret, a'coye'tuosan ñaña allecma anorryen ñeñt pomuene' yepečno. ¹⁶ Allempo Jesús'pa' ama't puesheñarrofa ama muenaterraneto o'ch es oñmatet all Parets pa'paclo'mar. ¹⁷ Allempoña yečhatosanetpa' ñapa' atet otosanet:

—Yompor po'ñoñ ñeñt atet anuaret ahuaťoteñ allñapa' atetca'ye oten Yompor: “Añ ñeñt nepaquell nepenpa' añecpaca'yeña sherben allecmach ma'yochennet ama't allohuen pa'namen acheñenesha'.” Tarraña sañapa' e'ñe atet sepeññaña Yompor pa'paquell ñerra'mrrate' eñe ñeñt e'potyetsa mapueto.

¹⁸ Añña ñeñt pa'mčha'tareťernesha' pen allohuen judionesha' po'cornaneshar ñaña añ ñeñt atarr etsotayenayeñ ñoñets ñeñt atet anaret, ñetñapa' allempo atet e'mare'tetpa' Jesús'epa'tcha' atarr o'patet o'ch muetsatachet. Tarraña allempopa' ama erroť peto čha mecha'na'chet tarro'mar allohuen acheñenesha'pa' atarrca'ye cosheññañet ñeñt atet yečhatenanet, nanac cohuen enteñet. ¹⁹ Allempoña o' ellerrenpa' onačheneterr Jerusaléño'pa' ahuaneneterr Betanio.

Arrpa' atto entuerret higoch o' e'ñe hueya'hua
(Mt. 21.20-22)

²⁰ Tsapaťña ahuaťecma alla oñma'mueneterr allo'tsen higoch. Entueneterrpa' o' e'ñe hueya'huenaña higoch e'ñe puerčohuen. ²¹ Allempoña Pedro allenta yerpana atet eños ellerro Jesús higočecop, ñaña'pa' allenta otosan Jesús:

—Maestro, pecua' añ higoch ñeñt potnom ellerro ama't esesha'pa' amach tso-muerrñañeto pue'mer, te'ñapa' o' hueya'hua.

²² Jesús'ñapa' atet otnomanet:

—Sapa'čho'ña e'ñeñaca'yeña seyemteraña Yompor. ²³ Po'ñočca' na te'pa' o'ch no-tas: Ñerra'm ama čoye' se'charrtateno seyočer, ñerra'm po'ñoč e'ñe seyemteña Yompor, ñachca'yeña atet pene'ña ñerra'm erroten es soten. Añe'nachña e'ñe setsoten ñeñt ello atarr torrapo' senten. O'ch netma'ntacha atet ñerra'mrrate' añ aspenet. Ñerra'm eseshascha' otets aspentecop “Añ aspenetpa' rrote'tepa'ch arroť, arrepachña esha'toso sa'po allcha' chencosa”, aspenetñapa' atetča'cho' pónasa. ²⁴ Ama't allohuen erra'tsencha' es senam sema'yocheñoť, ñerra'm čho senam e'ñe seyemteñočmañen, ñeñtñapa' saga'pcha'. ²⁵ Ñaña te'pa' o'ch notnomues: Ñerra'm sema'yocheñoť čho saten ñerra'm čho se'moñe'teñ po'psheñeñ čhosach peretnerre' seyočhro allorocma, allochñapa' Sompör ñeñt ento'tsen peretnerrnascha' samña ñeñt atet seťatse'tyen ñeñt ama pocteye' enteno ña. ²⁶ Tarro'mar ñerra'm ama seťretnannenopa' Sompörpa'čho'ña ñeñt ento'tsen amach peretnerrnaso samña ñeñt atet seťatse'tyen ñeñt ama pocteye' enteno ña.

Atto allsensarettena Jesús
(Mt. 21.23-27; Lc. 20.1-8)

²⁷ Allempoñapa' alla čhačha'ta'mueneterr Jerusaléño. Jesús'ñapa' all chopeñe'chen Parets pa'paclo. Allñapa' huačha'toña ñaña shonte' añcha'tareťnesha' ñeñt pa'mčha'tareťernesha' pen allohuen judionesha' po'cornaneshar ñaña ñeñt atarr etsotayenayeñ ñoñets ñeñt atet anaret ñaña po'potantañ ñeñt pompornesha' pa'yen allohuen judionesha'. ²⁸ Ñetñapa' atet otoset Jesús:

—Ñehua, yapa' añecop yehuena yemneñ o'ch potey ¿erroťe't apuenpetña llesens? ¿Esesha'tña pa'puene'ña llesens attot porrtatyenña ñeñt čhocma attecma pepa'yena?

²⁹ Jesús'ñapa' atet otapanet:

—Ñehua, napa'čho'ña nemneñ o'ch na'pťo'tapas samña ama't patrra ñoñets. Ñerra'm sanaposencha'pa' napa'čho'ña attochña notapas namña allot apuennetña llesens

ñeñto'marña atet nepena. ³⁰ Sapa'cho'ña o'ch sotosen ñeñt atet soctape'chen sa, ahuañmo'cha allempo apate't Juanañ Yomporecop, ñapa' ¿esesha'tña llesense' ñato' Yompor amapa' acheña'fe' apue'ña llesens? Nemnen o'ch sotosen ñeñt atet soctape'chen sa.

³¹ Ñetñapa' e'ñe a'nahua otanna'tyeset:

—Ta'm erro'tcha'ca'ye yochte'. Ñerra'm cha yoch Yomporeshotca'ye apetña llesens, ñapa' cha'te'ca'ye otey: “Ñehua, sañapa' eso'mare'tña ama se'mñocheña ahuaña allempo serrpare'tatosan acheñenesha'.” ³² Elloña amach yotatsche acheñesho'fa' apet llesens.

Ñehua, acheñenesha'ñapa' cha'te' e'moñe'chet amcha'taretnesha' tarro'mar acheñenesha'pa' e'ñe cohuen eñchete't Juanañ ñeñto'marña chocma otyeñet ñapa' ñeñtca'yeña po'ño'ch a'mtose' Yompor po'ñoñ. ³³ Ñeñto'marña amcha'taretnesha'pa' atet ochet Jesús:

—Ta'm yapa' amaca'yeña yeñoteñe; erro'tte' huapaña Juanañ, erro'tte' apetña ñaña llesens.

Allempoña Jesúsapa' atet oterraneterr:

—Napa'cho'ña te'pa' amach notaso samña allot apareten namña attot atet ne'pa'yena.

12

*Atet atma'ntatare'tena ñeñt ataruasañe'chnopa' ama cohuenayaye
(Mt. 21.33-46; Lc. 20.9-19)*

¹ Allempoña Jesúsapa' alla serrpare'taterranerr acheñenesha' toma'nteñtso, ñeñt'pa' atet otanet:

—Eñall puesheñarr acheñ ñeñt nare'tanatatnomue' shonte' uvach; pa'muerñapa' e'ñe ora uvachmatatue. E'ñe concha'tam'pesue allotñapa' eñan ñaña allcha' a'pecho'toñet uva po'ñer. Allñapa' tomatatnoman torrepo' allotcha' cohuan'psoñet pa'muer. Tomatuepa' na'nman ñeñtcha' taruasatats ñeñtcha' coyerrahuet allpon ñerra'm esempoch toteñet.

'O'ña nare'tanatatuepa' o' ahuo' po'poñ anetso ba'chayo. ² Chap allempo yen uvachllom'pa' ñaña'pa' mueñerran po'psheñeñ pa'taruasañer o'ch enamuerra' uvachllom' po'psheñeñ pa'taruasañreneshesho ñeñt cohuan'pene' uvachma'. ³ Allempoña chen allpa' enamosan ñeñt allpon o'patena ña, arepa'tcha'ña es apapuenayeña uvachllom', elloña ñeñtapa' cha rremapueññañet pa'taruasañerpa' o' nalle'tapueñet, o' alla mueño'teret e'ñe atta. ⁴ Allempoña ñeñt pamo'mte' pen uvachma'pa' o' alla mueñerranerr po'psheñeñ pa'taruasañer. Allempo chenerr ñaña allpa' ñapa'cho'ña cha rrolle'tapetpa' o' atserr'papueñet poñopa' cha es otnatapueñet. ⁵ Allempo o' alla mueñerranerr po'psheñeñ pa'taruasañer. Ñeñt'pa'cho'ña allempo chenerr ñaña allpa' ñaña'pa' chepa'tcha' muetsapueñet. E'ñe attecma pa'yeset po'potantañe'chno—patanta'tetspa' nalle'tapueñet, po'potantañe'chnoñapa' cha amtsanatare'ttapuenet.

⁶ 'Ñeñt pamo'mte' penetpa' eñallmeñ ñaña puesheñarr ñeñt e'ñe ño puechemer ñeñt atarr morrentena. Allempoñapa' atet ot: “Te'pa' o'ch nemñe all ñeñt e'ñe na nechemer. Ñato'rraña ñeñt'pa' mecha'na'tapetcha'.” ⁷ Ñeñt'pa'cho'ña ama't mameshapa' arepa'tcha'ña mecha'na'tapeto. Allempo entapoñet puechemer ñetñapa' atet otanna'tyeset: “Añmapa' ñeñtca'yeña puechemer ñeñtcha' o'paterraya pompor puenarem' esempo. Ñapa'cho'ña te'pa' o'chca'ye yemtsa'p allochñapa' yachca'yeña e'ñe o'paterrayaña pompor puenarem'. Te'pa' o'ch ahuey o'ch yemtsa'p ñaña.” ⁸ Allempoña o' rremapoñet ñaña puechemerpa' o'cho' muetsapet, huapore'teret allot uvachmo't. Arrpa' allohua atet toma'ntata Jesús e'ñe ñañeña.

⁹ Jesúsñapa' atet oterranerr acheñenesha':

—Ñehua, te'pa' o'ch notas, ñeñt' pamo'mte' pen ataruasañechnopa' ama't señoteñeña sa atetcha' p'ohuerranet. Ñerra'm esempoch huerranet, pamo'mtayetpa' a'cllatuerranetcha', narmetsma'ñapa' o'ch apuerran po'potantañ.

¹⁰ Allempoña Jesúsapa' atet oterraneterr:

—Sapa' ama't ahuatapa' ama'tña selleyareña ñeñt' atet anuaret' Yompor po'ñoñ ahuatoteñ. Tarro'mar ñeñt'pa' atet oten nocop, all atma'ntatareten mapue'. Ñeñt'pa' atet oten:

Añ mapue' ñeñt' ama pocteye' entyeno ñeñt' tomatyene' pocoll, ñeñt'ña te'pa' o' anaretterra ñeñt'cha' ello atarr cohuen sherberrets e'ñe atet ñerra'm quellpach allo e'ñe cohuen echarr orratenet pocoll.

¹¹ Ñeñt'pa' Yomporca'yeña atet patene' ñeñto'marña yapa' e'ñe cohuen yenteñ.

¹² Ñeñt' e'moñe'tene' Jesús ñetñapa' eñoteñet ñeñt'pa' ñetca'ye atma'ntatarettenet, ñeñt'pa' ñocpuetca'ye atet eñoreña Jesús. Allempoña ñetpa' atarr mueneñetañ o'ch rromuet Jesús e'ñe allorocma tarraña ama esesha' rromaye tarro'mar ñetpa' cha mecha'teñet acheñenesha'. Ñehua, acheñenesha' e'ñeca'ye cohuen enteñet Jesús. Ñeñto'marña ñetñapa' quechpa'huaneret Jesúsapa' ahuanerret.

Atto a'pto'chet Jesús, pocte'te' o'ch tsa'tet impuesto
(Mt. 22.15-22; Lc. 20.20-26)

¹³ Atteñapa' chap allempo po'pocheño e'ñe a'nahua mueñeññañet puesheña'tets fariseonesha' ñesho ñaña puesheña'tets Herodes pueyochresha', tarraña ñetpa' añecpa amñarettenet attoch e'ñe puehquëñoñet po'ñoñoñetpa' o'ch eñoratoset ñeñt' ama cohue-nayaye. Allochñapa' attotcha'ña otteñe'chet. ¹⁴ Ñeñto'marña ñetpa' allempo chapuet ñeshopa' atet otoset:

—Maestrocha' yapa' yeñoteneþ papa' ama peshquëno ama't mamesha ñaña ñeñt' atto peychaten Yompor poctaþña ñeñt'pa'cho'ña e'ñe cohuenacma, ama shequëñtsoyaye ama't mamesha. Papa' allohuen acheñpa' e'ñe cohuen pentueñ; ama aña ñapueñ pemorrenteno ñeñt' atarr añcha'na'tpo' entyen allohuen acheñenesha'. Ñeñto'marña te'pa' yapa' yemneñ o'ch peñotatapuey erra'tsente'ña e'ñe po'ñoñch cohuentetsa. ¿Pocte'te' penteñña þa o'ch yetsa'ta impuestos añecop ñeñt' añcha'taretetsa all anetso Romo ñeñt' ama judioneshayaye? Ñato' amate' pocteyayeña yocop ñeñtey judioneshay o'ch yetsa'cha añcha'taret' romo'marnesha' ñeñt' ama judioneshayaye.

¹⁵ Jesúsñapa' eñotapanet ñetpa' chaca'ye shecare'teñet, ñañaapa' atet otapanet:

—Sapa' eso'mare'tña semneñña o'ch seshcare'tosen. Ñehua, ama't atet setpatennoñpa' sorrtatca'yeña puetallarr quelle o'ch necue'.

¹⁶ Ñetña apetpa' ñañaapa' atet oterraneterr:

—Ñehua, sapa' o'ch soten, ¿esesha't sentenña ñeñt' atma'ntatarettetsaña all? ¿Eseshat pa'so'cheñ aquellcaredtetsa all?

Ñetñapa' atet ochet:

—Añcha'taretca'ye atma'ntaretetsaña all, ñoca'yeña pa'so'cheñ ñeñt' aquellcaredtetsa all.

¹⁷ Jesúsñapa' alla oterraneterr:

—Ñeñtepñapa' añ poctetsa o'ch yaþ añcha'taret' ñeñt' ño ñeñt' atet poctetsa gobier-nocop, tarraña ellonetña ñeñt' Yomporo o'ch yaþ ñaña ñeñt' atet poctetsa ñocop.

Ñeñt'ña shequënyañ atta cohuanrrorteñet tarro'mar Jesúsapa' atarrca'ye cohuen ana-puenanet.

Atto a'pto'chet Jesús, ñerra'm po'ñoñchte' atanterrapo' rromot, ta'm, allempopa' er-rotentcha'ña yeperra
(Mt. 22.23-33; Lc. 20.27-40)

18 Allempoñapa' huacha'toña ñaña patantarr ñeñt saduceoneshatets. Ñehua, ñeñt saduceoneshatets ñetñapa' ellonet echenet poctapña ñeñto'mar atet otenet amate' er-rotenot yetanterroña rromot ama't errponaña. Ñetñapa' atet otoset Jesús:

19 —Maestrocha' ahuať Moiséspa' atet quellconay ñoñets ñeñt poctetsa ñeñtcha' atet yepa. Ñeñtpa' atet otenña Moisés po'ñoñ: Ñerra'm esempo rroma yacma o'ch sa'nman puetapor tarraña ama chemere'tnomopa', añ poctetsa pa'mo'nasheñcha' alla yorerre'ña po'norrar allochñapa' attoch eñalletteraña ñeñtcha' puechemer perr pa'mo'nasheñ. Ñeñtpa' atetca'ye quellca'nmonayña Moisés ahuať. 20 Ñehua, te'pa' eñall cancherrsheña ñeñt e'ñe poctacma pa'mo'nasheñecmuet. Ñeñt puesheñarr popo'naretpa' o' yoran coyanesha' ñeñt puetapor pa'. E'ñe allponmatatsapa' o' rromaña, yacma ama chemere'tnomo. 21 Allempoña ñeñt po'rrocho'merpa' o' yorerran pa'mo'nasheñ puetapor. E'ñe allponmatatsapa' ñapa'cho'ña o' rromuerrerr ñaña, ñeñtpa'cho'ña ama chemere'tnomo. Allempoña po'psheñ pa'mo'nasheñpa' o' alla yorerranerr ñaña po'norrar. E'ñe allponmaterrtsapa' ñapa'cho'ña o' rromuerrerr ñaña ñeñtpa'cho'ña ama chemere'tnerrero o' atta rromuerrerr. 22 E'ñe attecma pohuet cancherrsheño'maretpa' e'ñe pueyoruarochet ñeñtara puesheñarr coyanesha'. E'ñe allohuenetpa' e'ñe attecma pet rromayestset ama't puesheñarrofetapa' ama chemere'tnomueto. O' rromape-suaña cancherrsheño'mar puerrollaresha'pa' cho rromatsña ñaña coyanesha'. 23 Te'ña ñerra'm po'ñochte' yetantena rromotpa' añña coyanesha' allempoñapa' ¿eseshat'cha'ña puetapor perre' tarro'mar allohuenet cancherrsheño'maretpa' e'ñe pueyoruarochet?

24 Allempoña Jesúsapa' atet oterraneterr:

—Sapa' ñeñto'marca'yeña cha atarr sepanteñ tarro'mar amaca'ye chennasoña seyocho ñeñt e'ñe po'ñoch atet yechateney Yompor po'ñoñ ñeñt atet anuaret ahuaťoteñ. Ñaña aña sepantatene' tarro'mar sapa' ama sepoteññañe Yompor po'huamenc. 25 Tarro'mar esempohuañen allempoch tanterret po'pocheño, allem-popa' ama't puesheñarrofeta amach sena'terreto, ama't coyanesha'pa'cho' amach ese-shaye' apuerraye ñeñtcha' yorerrahuet. Tarro'mar allempopa' e'ñech attet ñerra'm Yompor po'mllañoñeñaneshar ñeñt pue'ntaño'tsa'yen. 26 Sapa' ama'tña selleyareña ñeñt atet quellqu'et ahuať Moisés attoch señoach ama't ñeñt o' colla'huapa' ñetñapa' corretseta. Ñehua, all aquellcareť tsachmo'r ñeñt e'ñe ñoña huortets. Alloñaca'yeña Yomporpa' eñorana'tanaña Moisés; ñeñtpa' atetca' otña Yompor allempo: “Napa' ñeñten Po'yomporer pen Abraham ñaña Isaac, ñaña Jacob.”

27 Jesúsñapa' alla oterraneterr:

—Ñehua, yapa' yeñoteñ Yomporpa' ama añeye' Po'yomporer penaye ñeñt rromuets e'ñe poctacma, ñapa' aña'yeña Po'yomporer pene' acheñ ñeñt corretsach. Attoña Yomporpa' e'ñe allame'tsa entenanet allohuenet ñetñapa' bettetseta. Ñeñto'marca'yeña sapa' atarr sepanteñ.

Añmapa' ñeñt ñoñets ñeñt atarr sherbets, e'ñe metana'tuenan allohuen po'poñechno ñoñets

(Mt. 22.34-40)

28 Allempoña huapoña ñaña puesheñarr ñeñt etsotene' ñoñets ñeñt atet anaret, ñañaapa' e'mosan ñeñt atet a'p'to'tare'teñet Jesús. Ñañaapa' e'mosan Jesús e'ñe cohuen anapuenanet. Ñeñto'marña ñapa'cho'ña allenta a'p'to'tos, ñeñtpa' atet otos:

—¿Erra'tsena't ñoñtsor ñeñt atet anaret ñeñt atarr sherbets, ñeñt ello metana'tuene' ora allohuen po'poñechno ñoñets ñeñt e'ñe parro attecma anuaret ahuaťoteñ?

29 Jesúsñapa' atet otať:

—Ñeñt ñoñtsor ñeñt atarr sherbets ñeñt ello metana'tuene' po'poñechno ñoñetspa' ñeñtpa' atet oten: “Se'mñot israelneshacha' attoch señoach: Ñeñt Yeyomporer yepenpa'

ñapa' e'ñeca'ye patrra ñeñt' Yepartseshar yepen. ³⁰ Ñeñto'marña atarropa'chña yemor-renteña Yeyomporer ñeñt' Yepartseshar yepen e'ñe ora yeyochrocmañen. Ñaña e'ñe yecamquëno't yemorreñchach, ñaña yoc'apñohuen, ama't ñaña e'ñe ora yehuamenco-huen." ³¹ Allo'tpa' po'poñ ñoñets ñeñt' atarr sherbets ñeñt'pa' atet oten: "Atarrcha' yemorrenteña yamo'ts e'ñe atet atarr yemorrentena yañeña." Añ epo'mar ñoñetspa' ñeñt'ca'yeña atarr sherbets, ñeñt'ña ello metana'tuene'ña po'poñechno ñoñets ñeñt' atet anaret.

³² Allempoña ñeñt' etsotene' ñoñets ñeñt' atet anaret, ñañapa' atet oterraner Jesús:

—Maestrocha' papa' e'ñeca'ye po'ño'ch atet p'oten. Po'ño'ch Yomporpa' e'ñeca'ye patrra ama eñalleña po'poñ Yeyomporer patrraca'ye. ³³ Ñerra'm choch yemorrenteña Yompor e'ñe yeyochrocmañen e'ñe yeñoteñohuen, ñaña e'ñe yecamquëno't yemorreñchach e'ñe yehuamencohuen ñaña ñerra'm atarr yemorrenteña ñaña yamo'ts e'ñe atet atarr yemorrentena yañeña, ñeñt'ca'yeña atarr nanac sherbets. Elloca'yeña metana'tuenan allohuen po'poñechno ama't ayarra'chno ñeñt' yemtsayen Yomporecop, ama't ñaña allohuen ñeñt' yachamuen allo yesherbeñ Yompor.

³⁴ Jesúsñapa' atet eñch ñapa' atarr eñotenan ñeñt' atarr sherbets Yomporecop, ñeñto'marña atet otererr:

—Papa' amaca'ye atarr atonaye' pepallteno attoch e'ñe pagaphuerrñañ Yompor po'cohuenña atto ayochreshattena ña.

Allempoñapa' ama't puesheñarro'tetapa' ama eseshaye' a'p'to'tenaye' enterrayeña Jesús.

Atto Cristo ñeñt' Po'partseshar pe't David, elloñapa' o' alla po'm'reneñ per (Mt. 22.41-46; Lc. 20.41-44)

³⁵ Allempoña Jesúsapa' alla ye'chaterraneterr all Parets pa'paclo. Ñeñt'pa' atet oterraneterr:

—Ñeñt' atarr etsotayenayeñ ñoñets ñeñt' atet anaret, ñetpa' eso'marte'ña otyenet ñeñt'cha' Cristotosets ñapa' aña po'm'reneñ pene' David tarro'mar ñeñt'cha' Cristoterrets ama aña po'm'reneñ pene' David tarro'mar ñapa' Po'partseshare'ñaña pe't David.

³⁶ Tarro'mar ama't Davidpa' allempo eñorache't Parets Puecamquëñ, allempopa' atetca'ye eñose'tña añecop ñeñt'cha' Cristoterrets:

Yompor Parets atet otennan ñeñt' Nepartseshar nepen na (ñeñt'ara ñeñt'cha' Cristoterrets): "Te'pa' o'ch panorruerr arr necohuenro't allcha' pecohuentapreterrna.

Attochña ama't ñeñt' pe'moñe'tene' napa' o'ch name'ñatuerranet allochñapa' o'ch atet perret ñeñt' pemnen pa."

³⁷ Ñeñt'pa' atetca'ye ote'tña David, ñeñt'cha' Cristoterretsapa' ñeñt'ca'yeña Po'partseshar pe'tña ama't allempoteñ. Ñehua, ama't seño'teñeña Cristo ñeñt' Po'partseshar pe't Davidpa' ñeñt'ña te'pa' o' alla po'm'renñ per ñaña.

Ñeñto'marña Jesús allempo ye'chatenan shonte' acheñenesha' ñetpa' e'ñe pocsheñesha' e'mñoteñet.

Atto Jesúsapa' a'metare'tenan ñeñt' etsotayenayeñ ñoñets ñeñt' atet anaret, ñeñt' atet ye'chenet ñetpa' ñeñt'pa' ama cohuenaye' entapretenaneto Yompor (Mt. 23.1-36; Lc. 11.37-54; 20.45-47)

³⁸ All ye'chaterraneterr ñeñt'pa' atet oterraneterr:

—Amach semeñe'tapretatsche ommoñañenesha' poc'apña ñeñt'areta ñeñt'et atarr etsotayenayeñ ñoñets ñeñt' atet anaret. Tarro'mar ñetpa' añe'ñaña atarr cohuen entenet o'ch chorrenet atarrom shetamuets o'ch atfa yorma'tatse'tenet pa'shtam. Ñaña pommo'cheño'tetpa' atarrcha' mueneñet o'ch e'ñe pueñcha'na'teño't e'ñech cohuen huom'cha'tenanet acheñenesha' all chopeñe'chyenet. ³⁹ Ñaña ñetpa' añe'nach atarr muenenet o'ch anorr'cha'tyenent judionesha' po'prahuo allecma anorryen ñeñt'

atarr añcha'na'tpo' entyen allohuen acheñenesha' ñaña e'ñe attecma penet ñaña all rrallme'chapretenet. ⁴⁰ Tarraña ñetñapa' rretorrnanesha'naña puerratañpesyenetña pa'paquëll. Elloña e'ñe pommo'cheño'etpa' aña atarr muenenet o'ch atet penet ñerra'mrrate' ñetpa' atarr cohuen acheñret ñeñto'marña arr ma'yochyenet all shontena acheñenesha'pa' amach tematenayaya ma'yocheneto. Ñeñto'marña te' napa' o'ch notas ñeñt atet petsa pommo'cheño' elloña atarrcha' a'coñcha'taretterret.

Atto rretorrnanesha' ñeñt atarr huocchañetets ñapa'cho'ña nosan quelle ñeñt Yomporecop

(Lc. 21.1-4)

⁴¹ Allempo Jesús'pa' alla anen a'yente' allecma na'yenet quelle Parets pa'paclo. Allñapa' shonte' entenan acheñenesha' ñeñt na'yene' quelle Partsocop, shonte' eçllayoretenesha' ñeñt na'yene' shonte' po'çllayor Partsocop. ⁴² Jesúsña allpa' atta cohuenanet, huapa ñaña puesheñarr rretorrnanesha' ñeñt atarr huocchañetets. Ñapa'cho'ña nosan eptallatoll quellayetoll ñeñt cobretall, ñeñt quellayerpa' ama tsa'teno, ama es sherbeno. ⁴³ Allempoña Jesús'pa' agotan pueyochresha'pa' atet otanet:

—Te'pa' o'ch notas, añ rretorrnaneshar ama't atarr huocchañpa' ñapa' po'ño'chca'ye atarr aton nosan quelle, ello metana'tuosan allohuen po'potantañe'chno allpon quelle ñeñt na'yenet ñet. ⁴⁴ Tarro'mar allohuenet ñeñt na'yenet quellepa' añaca'ye na'yenet ñeñt a'pcha'tyenet, ñañaapa' ama't atarr huocchañpa' e'ñe pomhuahuospan allohuen ñeñt echyen ñeñt muenatenaneñ attoch yoran alloch correna arr patsro.

13

Atto Jesús'pa' eñotatanet e'ñech a'mata'taretetuerra Partsopo'

(Mt. 24.1-2; Lc. 21.5-6)

¹ Allempo cha'nerrerr Jesús Parets pa'paclo't puesheñarrña pueyochresha'pa' atet och:

—Maestro, pecuaye'ch, atarruaca' co'chnesha'te' mapyet ñeñt allo orratyenet Part-sopo', atarr co'chnesha'chnote' Parets pa'pacle'chno.

² Jesúsña'pa' atet och:

—Ama't sentyeñ te' ñeñt atarr co'chneshare' pocolle'chno tarraña esempopa' çherrcha' allempoch e'ñe a'mata'taretetuerra. Ama't e'ñe pueñarra mapyetpa' amach a'puerroña all allo orratenet Partsopo'.

Atto Jesús'pa' eñotatanet shonte'ch entyerret pa'namen ñeñtcha' eñotaterrahuet o' çherrmoch allempoch mellapoterra

(Mt. 24.3-28; Lc. 21.7-24; 17.22-24)

³ Allempoña ahuenerr Olivopñopa' anorruenerr all, e'ñe alla yo't Parets pa'paclo't. Allempo anen all e'ñe ñap'ochayet allpa' aña epuet Pedro ñaña Jacobo ñaña Juan ñaña Andrés. Ñetñapa' atet oteñet:

⁴ —Te'pa' yemneñ o'ch p'otey, ¿esempo'tcha'ña atet perra? Ñaña allempopa' ¿eso'tcha'ña yentyerr ñeñtcha' yeñotaterre' po'ño'chpa' o'ch çherrmoch allempoch e'ñe etsotuerra ñeñt atet p'otene'ye te'?

⁵ Jesúsña'pa' atet otanet:

—E'ñech señoterra allochñapa' amach esesha' seshquërraye. ⁶ Tarro'mar shonte'ch orrtertsa ñeñtcha' ay'cha'nataterre' neso'cheñ, ñeñtcha' otyerrets: “Napa' ñeñtencia'yeña Cristotets.” Ñetñapa' shonte'ch shequëret acheñenesha'.

⁷ Ñaña allempoña sapa' se'mare'tyerrcha' o' quellareñtsotyerr allampaño'mar, ñaña se'mare'tyerrcha' o' quellareñtsotyerra ora errañaren anetso'mar. Saña allempopa' amach cha seyorenatsto ama't e'ñe mamesha. Ñeñt'pa' atetcha'ca'ye e'ñe po'ño'ch

perra. Tarraña allempopa' amach čhena' allempoch e'ñe mellapoterra. ⁸ Pa'namen acheñ ñeñt e'ñe po'poñe'ttsochma mereñtsoretpa' ñetpa' quellaranna'terretcha'. Ñaña pa'namen anetsoñ amicha'taretechnopa' quellaraterrancha' pueyochreneshachno. Pella'yerrach pats ora errañaren. Orrterrach allemeñ muecheñets o'ch e'ñe chaporrñatsotyerr errañaren. Orrterrach ñaña atpare'teñtsochno attochña atarrcha' ama'toçhtatanna'terret. Ñeñt atet o' notuas te'pa' ñeñtña allempopa' ñeñtcha'ña ñanom mueroçhtaterrahuetña allempo.

⁹ 'Sapa' seño'tach allempoch atet perrset. Sanmare'tterrach amicha'taretesho allcha' otteñe'cherrset. Sashtar'e'tterrach all judionesha' po'prahuo'mar. E'ñe same'ñeño'ten na sapa' chapaterrsetcha' amicha'taretneshesho'mar ñaña allo'tsa'yen ñeñt nanac amicha'taretnesha'; sapa' allcha' sa'metosnanña neñoñ. ¹⁰ Ñaña allempoch ama mellapoterra'pa' añ cohuen ñoñets alloch sequeshperra ñeñtcha' ñanom serrpare'tatyeretña allohuen pa'namen acheñenesha' ora errañaren allohuanen aña patsro. ¹¹ Ñaña allempoch sanmare'tetyesa allcha' otteñe'cherrset ama't mameshapa' amach čha selca'psatsto, amach sota'psa'tatsto erro'tuachca'ye notoste' amicha'taretesho allempoch a'p'to'tare'tapuen. Allempopa' añcha'ña se'ñoratosé' Parets Puecamquëñ. Attochña amach e'ñe so'taye' se'ñoroso, añcha'ña se'ñoratosé' Parets Puecamquëñ. ¹² Allempoch atet perrsetpa' ñeñt e'ñe semo'nasheñ sepen ñato' ñeñt'achca'ye sepomuere' attoch muetsaterres tarro'mar ñapa' amaca'ye ame'ñenno. Amapa' ñato' pomporpa' o'ch pomuerran ñaña puechemer. Ama't ñaña puechemerpa' ñato' patparñotpa' o'paterranach pamo'mte' attoch muetsatater. ¹³ Shonte'ch acheñenesha' ñeñtcha' se'moñe'terre' tarro'mar sapa' naca'ye e'ñe same'ñena. Ama'tcha' atarr mueroçhtaterrsetpa' tarraña esesha'ch e'ñe ahuanta'huanmue' e'ñe pueyemteño'ten na, ñeñtcha'ña a'queshpatare'tterrtsa.

¹⁴ 'Ñehua, ahuat Daniel ñeñt a'm'taye't Yompor po'ñoñ, ña po'quellcopa' atet ote't: "Cherrcha' allempo ama't ñeñt ama masosyaye' enteno Yomporpa' ñeñtña'pa' çherrcha' all ama't ñeñt e'ñe Partsocpa anareteñ. Ñeñt'pa' ñeñt'achca'yeña e'ñe a'chencatuerrahuet." Ñehua, ñeñtcha' lleyerre' añ ñoñetspa' ñetña'pa' eñoteretepa'ch. Ñeño'marña ñerra'm esempoch senter o' çherr all ñeñt ama pocteyaye allempoña ñeñt allpon Judeo'tsa'yen ñetña'pa' allorocmuepa'ch yetrra'terret, ahuanerretepa'ña aspentarerone't. ¹⁵ Ate't ñerra'mrate' puesheña'tets ñato' ñetña' allempopa' eno'tsa'yenetcha' pa'pacllato, ñetña'pa' sohuete'pa'chña tecma tarraña amachña be'tosatsetnomuetoña po'ponreto attoch yoratsre'tnomuet. ¹⁶ Ñaña puesheña'tets ñeñt pa'mro'tsenpa' allempoña ñetpa' amachña onatsterreto attoch erreta'pa'shtamuet. ¹⁷ Allempopa' atarrcha' llequëñets añecop ñeñt a'chomenare' coyanesha' ñaña ñeñt allohuen emaretetollesha'chno. (Tarro'mar ñocpuetpa' atarr torrapo' attoch yetrra'tet ñamet.) ¹⁸ Ñaña Yomporcha'ña sema'yocha allochña'pa' amach čha huapoto allempoch seyeta. ¹⁹ Allempopa' orrterrach mueroçhteñets ñeñtcha' atarr mueroçhtaterre' allohuen acheñenesha'. Ñeñt ama't ahuatapa' ama puemueroçhtareto atet atarr nanac huomenc, ama't allempoteñ e'ñe erre't ye'chcatyene' Yompor allohuen pa'namen ñeñt yentyen arr patsro. Allempoña ellopa' amach atet alla mueroçhterrete'te ama't errponaña. ²⁰ Allempoch atarr amueroçhtatare'tterret. Tarraña allempoña Yomporpa' ñach oterrets "te'pa' allohuach." Ñerra'm amach oto allohuachpa' allempoña ama't puesheñarrapa' amach esesha' qeshperrtso. Tarraña ñeñtña ame'ñenaya ña ñeñt acrenpa' ñocpuetña'pa' oterrrcha' "te'pa' allohuach."

²¹ 'Ñehua, allempoch orameñ mueroçhteñetspa' ñerra'm esesha' sote': "Secueña', arro'tsenca'yeña Cristo", amapa' o'ch otaset: "Secueña' tarro'tsenca'ye Cristo", sañapa' amach same'ñatstaneto. ²² Orretyerrachca'ye ñeñtcha' otyerrets ñapa' ño'ña Cristotets.

Tarraña ñeñtpa' attachca'ye shecare'tyerranña acheñenesha'. Orreyerrach ñaña ñeñtcha' otyerrets ñapa' ñoña a'mteneña Yompor po'ñoñ, tarraña ñeñtpa'choña e'ñech attecma shecare'tyerran acheñenesha', amachña Yomporeyeña po'ñoñ a'mteno. Ñeñtcha' atet shecare'tyerrets, ñetñapa' orrtatyerretcha' ñeñt ama't ahuata acheñenesha'pa' ama puentare, attochña cohuanrrortateretña acheñenesha'. Ama't ñeñt Yompor pa'crarnesharpa' mueneñetañcha' ñeñte'nachña shequëret. ²³ Señoche'pa'ch ama't ama chena' muerochteñsopapa' na allohuenpa' o' e'ñe notuas.

Atetcha' perra allempoch huerra Cristo ñeñt Acheñetsosets
(Mt. 24.29-35, 42-44; Lc. 21.25-36)

²⁴ 'O'chña huañerr ñeñt muerochteñetspa' allempoñapa' choch mayerrets ñaña atsne'. Arrorrrpa'choña o'huañcha' atsnom. ²⁵ Rantochnopa'choña shorcha'terrcha' entoñ. Ñaña ñeñt huomenc orra'yetsa ento te' allempoña ama't ñeñtpa' pella'yerrach. ²⁶ Allempoñapa' entapuerrnetcha' na Ñeñten Acheñetsosets o'ch nesuanperra osoñ e'ñe nepartsoteñohuen e'ñe necohuenteñesha'. ²⁷ Nemñercha' nemllañoteñnashar, ñetñapa' a'yapa'cha'hueretcha' allenñateñ ñeñt acren Nompor nocop e'ñech pa'tatsshemto'marohuen allotecma orrnotena. E'ñech allenñateñpa' a'yapa'cha'hueretcha' e'ñe allohuanen añ patsroñ.

²⁸ Ñaña te'pa' señoche'pa'ch ñeñt atet pena higoch. Ñehua, esempoch senteñ higoch o'ch emchayen puetacretollesha' allotcha' o'ch alla tapna'tyerrerr pasopaner, sañapa' ñeññaña señotateneña o' chenmoch allempoch huorateterrerr. ²⁹ Attecmach perra ñerra'm esempoch sentyerr ñaña ñeñt allpono' notuas, sapa' ñeñtcha'ña señotaterre' po'ñoñ o'ca'ye cherrmoch allempoch e'ñe etsotuerria, o'ca'ye e'ñe allame'ttsamerra. ³⁰ Napa' po'ñoñ o'ch notas, acheñenesha' ñeñt e'ñe corretsa te' ñetña amach e'ñe rromhueneta'pa' allempocmach e'ñech etsoterra allohuen añechno. ³¹ Esemphuañen añ enet ñeñt senten te'pa' e'ñech chenca'huerra; patspa'choña attecmach perra e'ñech chenca'huerra. Tarraña ñaña neñoñpa' amach chenquërro ama't e'ñe ahuata.

³² 'Tarraña ñeñt yetroch nohuerrapa' ñeñtñapa' ama eseshaye' eñotenaye. Ama't erro'tsente' atsne' ama't erro'tsen tsapro ñeñtpa' ama't mellañoteñnesha' ñeñt pue'ntañotsa'yen ñetpa'choña ama't puesheñarroñetapa' amaña eseshaye'ña eñotenaye allempoch nohuerrerr po'pocheño. Ama't na ñeñten Yompor Puechemeren napa'choña te'pa' ama neñoteñe, ñapñaña Nompor Parets eñotene'.

³³ 'Sapa' seño'tach ñaña chocmach seño'srtenna ñaña chocmach sema'yochena tarro'mar sapa' amaña seño'teñe esempoch cherr ñeñteñpo allempoch nohuerra.

³⁴ Ñeñtpa' e'ñe atet ñerra'mrrate' puesheñarr yacma ñerra'm esempo ta bachayopa' o'ch na'nman pa'taruasañechno pa'paclo ñeñtcha' apa'yeshnom taruas e'ñe puesheña'ttsocmuet. Ñaña po'poñ pa'taruasañer ñeñtcha' cohuet yetarroñ ñapa' atetcha' otnom pamo'mte': "Papa' chocmach peño'sretna." ³⁵ Ñeño'marña te'pa' o'ch notas: Chocmuepa'ch seño'srtenna na ñeñten Samo'mte' sepen ñeñten sena'nmue' na nepaclo tarro'mar sapa'choña ama seño'tenno esempoch nohuerra. Ñato' ellerronetcha' nohuena, ñato' rroch tsapo, ñato' puetarenmoch allempo eñen atollop, amapa' ñato' aromtañach nohuena. ³⁶ O'ch alla noterrser: Chocmuepa'ch seño'srterra, ñerra'm machayota nohuerrapa' ñato'rraña alla nentuerres sapa' cha atarr semanrren. ³⁷ Ñeñt atet notenes sa ñeñtpa' allohuenacpasca'ye, ñeño'marña o'ch alla noterrser: Chocmuepa'ch seño'srterra allohuenes.

14

Atto atarr o'pateñet Jesús o'ch muetsatateret
(Mt. 26.1-5; Lc. 22.1-2; Jn. 11.45-53)

¹ Epomtameñ palltena o'ch alla çherrerr pascuapo allempoch rrerranerr judionesha' pan ñeñt ama anareteyaye chase'. Ñeñña pa'mcha'tareternesha' pen allohuen judionesha' po'cornaneshar epuet ñaña ñeñt etsotayenayeñ ñoñets ñeñt atet anaret, ñetña' aña atarr e'nenet attoch shequët Jesús e'ne a'nahua esheccha' rremuetpa' o'ch muetsatachet. ² Ñetña' otanna'tyenet:

—Tarraña te' pascuapo allempo shontena acheñesha'pa' amachca'ye yerrmatsche allañaca'yeña cha ya'tsrre'moçhtateñ acheñenesha'.

Atto puesheñarr coyanesha'pa' shosan eñmosa Jesús poño
(Mt. 26.6-13; Jn. 12.1-8)

³ Pamtarrña Jesús'pa' Betanio'tsen all Simón pa'paclo, ñeñña Simónpa' ñeñt ose't puetsarñats. Jesús'ña'pa' all anen all rrallme'chen. Allña'pa' huapoña puesheñarr coyanesha', huapatán eñmosa ñeñtpa' e'ne ñeñtoche' ñeñt otenet nardo puese' ñeñt ama matsa'to. Huapatampes puetellmo ñeñña puetellem'pa' añ socheñet alabastro. Allem'poña ñeñt coyanesarpa' potam'psosan eñmosa; ñeñña eñmosa'pa' alla she' Jesús poño all rrallme'chen. ⁴ Puesheña'tetsña'pa' ñeñña cha atsrre'matanet, atet otanna'tyeset:

—Eso'mare'tña atta a'pertatosanña eñmosa. ⁵ Ñeñt eñmosa'terpa' amaca'ye matsa'to. Chochña'cho' pomoseña' ganañcha' shonte' quelle çhachca'ye metananeñña ñeñt trescientos denario. Allem'poña'pa' apa'yesaneñcha' ñaña allohuen huocchañneshachno.

Ñeñtpa' atet sasare'chet coyanesha'.

⁶ Allem'poña Jesús'pa' atet otanet:

—Semnachñaca'yeña coyanesha' ñeñt atet penen. Eso'mare'tcha' cha muene' satsrre'moçhtana'tapa. Ñapa' atarrca'ye cohuen pösen. ⁷ Tarraña ama'tcha' cho pomosaneñ eñmosa alloch es apa'yesaneñ huocchañneshachno, tarraña çhocmachca'ye eñallña huocchañneshachno arr patsro. Ñerra'm esempo semneñ o'ch e'ne cohuen sorrtatyesanet ñocpuet çhocmach atet sepanet. Tarraña nañapa' po'ñoçhpa' amachca'ye allo'na sentenno arr patsro. ⁸ Añ coyanesarpa' aña'ye apuenen ñeñt allpon echyen. Ñeñt atto shosnan te' eñmosa nechtso, ñeñtpa' añe'cpa'naca'ye sherben tarrem'pohua allem'poch a'yana'terrnaneterr ñeñtcha' epuet pampa'pesnet. ⁹ Po'ñoçhca'ye notenes: Ora erracmañen añ patsro errach serrpare'tatyenet añ cohuen ñoñets allem'poch serrpare'chetcha' ñaña atet penen te' añ coyanesha', attochña' ña'nach yerpuenet.

Atto Judaspa' pomuerran Jesús
(Mt. 26.14-16; Lc. 22.3-6)

¹⁰ Allem'poña pueyochresha' ñeñt çharra' puechetsa epsheña, puesheñarrña ñeñt pa'so'cheñ Judas Iscariote, ñaña'pa' allenta ahuo' allo'tsa'yen ñeñt pa'mcha'tareternesha' pa'yen allohuen judionesha' po'cornaneshar. Ñaña'pa' añe'cpa sen attoch pomataterran Jesús. ¹¹ Ñeñña atarr coshatenahuet. Ñetña'pa' allem'pochma a'pochtchet çhocca'ye tsa'chetña Judas allpon quelle. Allem'poña ñapa' aña e'ne cotape'chyen errotenotcha' pomuerranña Jesús.

Atto Jesús'pa' rrallme'chatnenan pueyochresha' attoch çhocmach yerpueret ñeñt yoten te' Santa Cena
(Mt. 26.17-29; Lc. 22.7-23; Jn. 13.21-30; 1Co. 11.23-26)

¹² Allem'poña çhapa'muen ñeñt yetñatsro allem'poch rrerreterrr pan ñeñt ama anareteyaye chase' allem'poch muetserreterrr ñaña carrnero; ñeñtpa' pascuapo. Çhapa'muen ñeñt yeterpa' pueyochresha'ña'pa' atet ota'mueñet Jesús:

—Te'pa' ¿erra't pemneñ allcha' yeta'muena allcha' ya'potona' ñeñtcha' perra' pascuapo?

¹³ Allem'poña ñeñt epsheña pueyochresha' ñeñtcha' mueña, Jesús'ña'pa' atet otapanet:

—Te'pa' o'ch ahua'muenes anetso allcha' sepoc'te' puesheñarr yacma ñeñt' an-mam'pene' oñ porrt'o. Ñeñtña' acheñerpa' o'ch soc'ta'ner. ¹⁴ Allcha' be'tosuerr allcha'ña sebe'tosos samña. Allñapa' atet'cha' sotos ñeñt' apacllatesha': "Yemaestrorpa' atet' otene'y atet'cha' yotosep': '¿Erro'tsena'tña pecuarto allcha' nerrallme'chos pascuapo epan ney-ochresha'?" " ¹⁵ Ñeñt' apacllatesha'pa' gatapascha' eno po'cuarto ñeñt' atarr a'yohuen e'ñe cohuen a'paret'. Allcha'ña sañño'tosña ñeñt'cha' yerra' pascuapo.

¹⁶ Allempo atet' otuanet Jesús'pa' pueyochresha'ñapa' atet'cho' pet, cha ahuanmatset. O'ña cha'cha'tet anetso, e'ñe atet' otapanetpa' ñetñapa' e'ñe'cho' atet' entoset. Allña añño'tosñañetña rreñets allcha' rrallme'chet ñeñte pascuapo.

¹⁷ Allempoña o' puenaso'tenpa' o' chap ñaña Jesús all epuet pueyochresha' ñeñt' charrasheña puechena epsheña. ¹⁸ All anorr'chenet all rrallme'choset, Jesúsñapa' atet' otanet:

—Po'ño'chca' notenes: Puesheñarrotes sa ñeñtescha'ca'ye nepomuerre'. E'ñe puesheñarr ñeñt' e'ñe parro nerren ñeñt'cha'ca'yeña nepomuerre'.

¹⁹ Ñetñapa' cha atarr lleca'rrtet. A'p'to'tyeset e'ñe puesheña'ttset:

—Ta'm amate' na nepomuerrmochape.

²⁰ Ñaña'pa' atet' oterraneterr:

—E'ñe puesheñarrotes ñeñtes charrasheñas sepchena epsheña ñeñtña netsapechapre-tene' nerrar, ñeñt'cha'ca'ye nepomataterre'. ²¹ Po'ño'chca'ye te'pa' allo'na sen etsot-nomtsa ñeñt' atet' anuaret' Yompor po'ñoñ nocop na Ñeñten Acheñetosets; attot'cha' muetsaterrnet. Tarraña nocoppa' e'ñe poc'te'; añña po'ño'ch acheñer ñeñt'cha' nepo-muerre' ñocopñapa' atarr llequēñets. Añ acheñrecoppa' e'ñeca'ye poc'teñ amachña'cho' eñalletatstañe.

²² All rrallme'chenet, Jesúsñapa' chetan pan parasyoso'tan Yompor. Parasyoso'tuepa' shota'tan panpa' apa'yesan pueyochresha'. Ñeñt'pa' atet' otanet:

—Sagapyes, añmapa' ñeñt'cha'ña nechets sepen.

²³ Allost'ña'pa' chetan ñaña orramets parasyoso'tuerrerrpa' apa'yerraneterr. Ñetña allohuenetpa' e'ñe orryesuahuet. ²⁴ Jesúsñapa' atet' oterraneterr:

—Añpa' nerrasca'ye sepeñ ñeñt'cha' ashatarettatsa shonte' acheñeneshap. Añ nerraspa' alloch e'ñe etserra a'poc'taterra acheñenesha' Apuesho. ²⁵ Na te'pa' o'ch notas: Amach alla norrerre'te añ narmetsos tayoteñ tarremphuach allempoch alla ello yorrerrerr parro allempoch añcha'taretetuerra Yompor.

*Atto Jesús'pa' eñotatan Pedro ñapa' chocmach a'nasocha
(Mt. 26.30-35; Lc. 22.31-34; Jn. 13.36-38)*

²⁶ Allempoña o' morrechuanmuet Yomporecoppa' ahuaneneter Olivop'no. ²⁷ Allñapa' atet' otosanet Jesús:

—Añ tsaprocmach sa allohuenespa' sa'ypo'ña'huanmuencha' tarro'mar Yompor po'ño'ñopa' atet'ca'ye anuaret', ñeñt'pa' atet' ote't Yompor nocop: "O'ch nemtsater ñeñt' cohuan'pene' carrnero, po'carrnerorñapa' chach matrra'tyesa allemeñ."

²⁸ Jesúsñapa' atet' oterraneterr:

—Tarraña esempoch alla netanterra napa' nanomcha' oterrtsa Galileo.

²⁹ Allempoña Pedropa' atet' och:

—Ama't allohuenet ñerra'm a'ypo'ña'huerrpetcha'pa' naña ama't ahua'tapa' amach na'ypo'ñerrpe.

³⁰ Jesúsñapa' atet' otererr:

—Po'ño'chca'ye o'ch notap, añe tsaprocmach ama't e'ñe epocha amach eñena' atollop pañapa' o'ch ma'poch pa'nasotenna.

³¹ Pedroña'pa' alla otererr:

—Ama'tcha' yerromhuanen parropa' naña po'ñoçhpa' ama't parrocha amach na'nasotaþo.

Allohuen pueyochresha'pa' ñetpa'çho'ña e'ñe attecma otyenetañ ñamet.

Atto Jesúsapa' ma'yochuena all oteñet Getsemaní

(Mt. 26.36-46; Lc. 22.39-46)

³² Allotñapa' çhap Jesús pueyochreshohuen all narmetsmño, ñeñtpa' añ pa'so'cheñ Getsemaní. Allñapa' otosanet:

—Te' sapa' allach sanorrçha'tos arrma, napa' o'ch nema'yochena'.

³³ Allñapa' aña anmos Pedro ñaña Jacobo ñaña Juan. Jesúsñapa' ama't mameshapa' ama eñmateno pueyoçhro, çha nanac allpatena. ³⁴ Allempoñapa' atet otosanet:

—Napa' çha chepoçhenen nellquëña neyoçhro, çha muene' nerromuen nellquëñoç. Sapa' allasa'tach arr secuapretosno'tach.

³⁵⁻³⁶ Ñañaapa' ahuo' a'yente' all rremosa patso atet ma'yochosa:

—Apa, þocoppa' ama eñalle ñeñt ama erroten apen penteno; ñeñto'mar te'pa' noteneþ amach pemnatatsche o'ch çhapona ñeñt atarr amueroçhtatañ* nenten na. Tarraña ñerra'm þach muenatspa' añepa'chña atet peþaton ñeñt pemnen þa, amachña aneyaye ñeñt nemnen na.

³⁷ O'ña atet ma'yochuapa' o' ahuer allo'tsa'yen pueyochresha' ma'psheña. O' çherr allpa' alla entuerranet ñetñapa' çha atarr manrrenet. Allempoñapa' otuerran Pedro:

—Cha't Simóna atarr pemos. Ama't mamesha are'tña acuenaye' penteno. ³⁸ E'ñe señose'rteñoþpa' çhoña sema'yochosa allochñapa' attoch amach sañeña a'puerrataterro topateñets ñeñtcha' sehuapoya atarr huomenc. Ñeñtpa' ama't atarr semneñeñ tarraña sechetsñapa' amaca'ye ahuamencateye' penso, ñeñto'marña notenes çhocmach sema'yochena.

³⁹ Jesúsñapa' alla ahuererr puepocheño o'ch ma'yocherrerr, ñeñfara atet otuererr. ⁴⁰ O'ña alla ma'yochuerra'pa' allempoñapa' huerrerr, alla entuerranerr pueyochresha' ñetñapa' o' alla manrretererr, çha nanac atserr moñe'tenet. Ama eñoteñeto errotencha'ña otapuerete't. ⁴¹ Jesúsñapa' alla ahuererr ma'yochatsa. O'ña ma'yochuerra'pa' allempoñapa' alla huerrerr poma'pocheñoþhua, atet otuerranerr pueyochresha':

—Ama't teme'ttsenpa' alla't semanrren; ama'tpa' alla sames. Te'pa' ñeñtepa'ta, señocheþa'ch o' çhap allempoch pomataterrenet na Ñeñten Acheñetosets attotcha' errotuaneþ perren ñeñt atarr ochña'tenesha'. ⁴² Te'ñapa' setanterra o'ch ahuey o'ch yepocte'. Secue'ca'ye ñeñtcha' nepomue' ñeñtpa' alla'tsena.

Allempo rromoset Jesús

(Mt. 26.47-56; Lc. 22.47-53; Jn. 18.2-11)

⁴³ All atet eñorena Jesúsapa' çha huapatsa puesheñarr ñeñt pueyochresha' peneñ ñeñt a'pchenahuet epsheña, ñeñtñapa' añ Judas. Ñañaapa' huach'a'tatan shonte' acheñenesha' occhelletareret ñaña etsachperetareret. Ñehua, añ ñeñt huach'a'ttsapa' añ mueñenahuet ñeñt pa'm'cha'tare'ternesha' pen allohuen judionesha' po'cornaneshar ñaña ñeñt etsotayenayeñ ñoñets ñeñt atet anare't ñaña ñeñt pompornesha' pen allohuen judionesha'. Ñetca'yeña mueñene'ña ñeñtcha' rromuenaya' Jesús. ⁴⁴ Ñehua, Judas ñeñtcha' pomuerre' Jesúsapa' ñañaapa' atet otnoman acheñenesha' ñeñt anom attoch cheme'toset Jesús. Ñeñtpa' atet otnomanet:

—Erra'tsencha' nehuom'cha'tos e'ñe netso'ttsapa'teñoþpa' ñeñtca'yeña Jesús. Sañapa' ñeñtcha'ña serrmospa' o'ch sanem' e'ñe sehuamencocma.

* **14:35-36** Ñeñt amueroçhtatañ ñeñtpa' po'ñoçh ñeñtpa' añ atma'ntatare't ñerra'mrrate' ñeñt atarr pesherr yorren orranitso't.

⁴⁵ Allempoña huapapa' čha ponmosaya Jesús huom'cha'tos e'ñe puetso'tstsapa'teñesha', atet otos:

—Tsapo, Maestrocha'.

⁴⁶ Allempoña acheñenesha'pa' ponmosyet Jesús'pa' rromoset e'ñe po'huamencocma.

⁴⁷ Allempoña puešeñarr ñeñt Jesús pueyochresha' ñaña'pa' po'cchella cheta'pa' o'ch čhonto'tapanen cornesha' pueñañra puetepa'tcha' tsorroñ. Ñeñtpa' año pueñañra ñeñt pa'm'cha'tareter pen allohuen judionesha' po'cornaneshar. ⁴⁸ Allempoña Jesús'pa' atet otan acheñenesha':

—Eso'mare't sehuača'tennanaña e'ñe occhelletareroches ñaña etsach-peretareroches attoch serrma'n. Napa' ¿e'ñe't atet sentenen ñerra'mrrate' eñeten?

⁴⁹ O' allponmatuanen allo'tsenen Parets pa'paclo e'ñe parro sesho, eso'mare'tña amaña allempocmaña serrma'ne'te. Ama'tpa' atepa'ca'ye perra allochñapa' attoch e'ñe etsotueria ñeñt allpon quellca'yese't nocop ñeñt a'm'ta'yesaye't Yompor po'ñoñ.

⁵⁰ Allempoña allohuen pueyochresha'pa' allorocma a'ypo'ña'huanmet, ñetñapa' yetrra'tuet.

Atto a'yetachet puešeñarr huepuesha' allempo muene' rromuetañ ñaña

⁵¹ Ñehua, allempopa' allo'tsen ñaña puešeñarr huepueshachor ñeñt epuet ta Jesús. Ñaña'pa' čha muelle'mquën atta eřamco'tnoma. Ñapa'čho'ña ahuo'ch rremuetaña'pa' ⁵² aña a'meyampereta' allo eřamco'tena, huepueshachorñapa' muelle'mco'ta a'yetachet.

Allempo chapata'mueñet Jesús all apča'muena allohuen judionesha' pa'm'cha'tareternesha' ñeñt a'pocatyene' ñoñets

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Acheñenesha'ña ñeñt rromose' Jesús'pa' ñetñapa' arr anmet allo'tsen ñeñt pa'm'cha'tareter pen allohuen judionesha' po'cornaneshar. Allñapa' all apča'ñaña ama't allohuen cornaneshachno ñeñt pa'm'cha'tareternesha' pen judionesha' po'cornaneshar ñaña ñeñt pompornesha' pen allohuen judionesha' ñaña allohuen ñeñt atarr etsotayenayeñ ñoñets ñeñt atet anaret judioneshacop. Ñetña allohuenet e'ñe all apchenet. ⁵⁴ Pedropa' ñapa'čho'ña cote' tarraña ñapa' chenta' en a'yoť. Cornesha' po'pampopa' allñapa' anorros epuet ñeñt guardianesha' all a'torenet tso' all shotoset parro.

⁵⁵⁻⁵⁶ Cornaneshana' pa'm'cha'tareternesha' ñaña allohuen ñeñt chocma a'pocatyene' allohuen ñoñets ñeñt judioneshacop, ñetñapa' aña atarr e'nenet ñeñt'cha' a'metare'tam'psose' Jesús allochñapa' attoch muetsatachet. Ama't shonte' huapatsañ ñeñt'cha' toma'tam'psosayeñpa' am'cha'taretnesha'ña ama't puešeñarroťetapa' ama eseshaye' entayeña attoch muetsatateret tarro'mar allohuenet ñeñt toma'tam'psosayeñpa' ama e'ñe attecma'ye' otosetoña Jesúsocop. ⁵⁷ Allempoña tom'cha'tos ñaña po'potantañ; ñetpa'čho'ña toma'tam'psoset Jesús; ñetñapa' atet otoset:

⁵⁸ —Ya ahuañapa' ye'me'tca'yeña Jesús atetca'ye ote't: “Napa' o'chca'ye na'materrñañ añ Parets pa'paquëll ñeñt'pa' acheñaca'ye pueyečcatar; tarraña poma'pamtañoñapa' napa' o'chca'ye alla natomater po'poñ ñeñt'pa' amachca'ye añeyaye ñeñt yečcaten acheñ.”

⁵⁹ Tarraña ama't atet toma'tam'pesyesosetaña'pa' ama e'ñe attecma'ye' otoseto.

⁶⁰ Allempoña cornesha' ñeñt nanac am'cha'taret allenta tompa' atet otan Jesús:

—Pañapa' ¿ama'tcha'ña panapaneto? ¿Erroťenote'tña otteñe'chenpet?

⁶¹ Jesúsñapa' ama eñoreno, ama anapuenaneto. Allempoña cornesha'pa' alla otererr:

—Te'pa' o'ch notapř, nemneñ o'ch pōten pāpa' ¿pā'tña ñeñteřte' Cristotosets? ¿Ñeñteřte' Parets Puechemereř, ñeñt Parets chocma ya'ye'chočhtateññañ?

⁶² Jesúsñapa' atet och:

—Napa' ñeñtenca'ye. Elloña napa' o'chca'ye notas, senterrencha' na Ñeñten Acheñetosets o'chca'ye alla nanorruerr Parets po'cohuenrot. Ñaña po'pocheño o'ch sentapuerren o'ch nesuam̄perra osot Yompor pue'ntañot.

⁶³ Cornesha'ñapa' ñeñta e'mpa' allenta rrarre'tan pa'shtam e'ñe patsrre'mueñoť, ñeñtpa' atet ot:

—Te'pa' amachca'ye ye'natsche po'psheñeñ ñeñtcha' a'metam̄psose'. ⁶⁴ Te' ama't sapa' o'ca'ye se'm̄ atet achm̄are'tenan Yompor. ¿Erroñena't senteñña sa?

Ñetña allohuenetpa' atet otyeset:

—Ña po'ñočhpa' atarrca'ye nanac achm̄are'tenan Yompor, pocte'ñacho' te'pa' o'ch semtsatach.

⁶⁵ Allempoñapa' a'coshare'tyeset, huancacle'chet pa'clloyotpa' čhota'tyeset. Pachm̄are'teñoťet atet otyeñet:

—Te'ña eñoratenperrepa' Parets allochñapa' attoch p̄otey esesha'te'ña pečhota'tyene'. Ama't guardianesha' ñetpa'čho'ña o' čhota'chet.

Atto Pedropa' a'nasotana Jesús

(Mt. 26.69-75; Lc. 22.56-62; Jn. 18.15-18, 25-29)

⁶⁶ Pedroña allempopa' patsote'tsen pampatollo. Allempoña allpa' huapa puesheñarr coyanesha' ñeñť sherbene' cornesha'. ⁶⁷ Ñaña' entosan Pedro all shotenana tso'. Cohuana'tospa' atet och:

—Paca'ye e'ñe coťaye'tña Jesús ñeñť nazareto'marnesha'.

⁶⁸ Pedroña anapue'pa' čha a'nasochapa' atet och:

—Napa' amaca'ye nentareña, ama't napa' amaca'ye neñoteñeña ñeñť atet p̄otenen.

Allempoña Pedropa' ahuer, čherr allotecma be'tenet o'ch čhapuet o'pono pampo. Allempoña allenta eñen atollop. ⁶⁹ Allñapa' entuererr coyanesha' ñeñť cornesha' pueñañra. Ñaña' atet oterranerr ñeñť parro allo'tsa'yenet:

—Añ acheñerpa' ñeñťca'ye e'ñe parro yemtenet ahuaña.

⁷⁰ Pedroñapa' alla a'nasotererr. O'ña o'chterrerrpa' ñeñť tomčha'tyets all, ñetpa'čho'ña atet otereterr:

—Po'ñočhca'ye p̄apa'čho'ña e'ñeca'ye parro seyemtena tarro'mar p̄apa'čho'ña galileo'marnesha'p̄ca'ye ñeñťo'mar e'ñe atet peñen ñerra'm ña.

⁷¹ Allempoña Pedropa' e'ñe puehquẽñoťanetpa' atta otatse'tyerraneterr, ñeñťpa' atet otanet:

—Napa' e'ñe Yompor pa'so'chño notenes, ñerra'm amate' po'ñočhoye' notensopa'te'pa' nerromuepa'. Napa' po'ñočhca'ye ama nentareña añ yacmar.

⁷² O'ña atet otuanetpa' e'ñepa'tcha' allempocma puepocheño eñeña atollop. Allempoña Pedropa' alla yerpuerrana ñeñť atet oteñ Jesús: “Ama't e'ñe epocha amach eñena' atollop p̄aña'pa' o'ch ma'poch p̄a'nasotenna.” Allempoña Pedropa' allenta atarr yahuena huomenc.

15

Allempo čhapata'mueñet Jesús allo'tsen am̄cha'taret Pilato

(Mt. 27.1-2, 11-14; Lc. 23.1-5; Jn. 18.28-38)

¹ Tsapať o' taya puetarenpa' ñeñťña pa'm̄cha'tareternesha' pen allohuen judionesha' po'cornaneshar ñetñapa' apčha'mueneterr parro epuet ñeñť pompornesha' pen allohuen judionesha' ñaña añ ñeñť atarr etsotayenayeñ ñoñets ñeñť atet anaret epuet ñaña po'potantañ ñeñť po'taruas pene' o'ch a'pocatan ñoñets judionesha-cop. Ñetñapa' coťape'chatannetset, attoña o' e'ñe a'pocata'mueñet atetcha' p̄a'mueñet Jesús. Jesúsñapa' o' huancota'tuet allempoñapa' anma'mueñet allo'tsen am̄cha'taret

Pilato (ñeññ nen gobierno' Romoñ ñeññ am̄cha'tarettetsa allo'marneshacop). ² Pilatoña a'p̄to'tapan Jesús'pa' atet och:

—Papa' ¿pa'tña am̄cha'tarettetsaña judioneshacop?

Jesús'ña'pa' atet och:

—Napa' ñeññenca'ye atet p̄oten.

³ Ñeññ pa'm̄cha'tareternesha' pen allohuen judionesha' po'cornaneshar, ñetña allpa' shonte' pa'namenot otteñe'cha'mueñet Jesús. ⁴ Pilatoña'pa' atet otererr:

—Papa' ¿are'tcha'ña p̄anapaneto? ¿Ama't pe'muenanetoña ñetpa' pa'namenot a'metare'tam̄penpet?

⁵ Jesús'ña'pa' ama't e'ñe parrocha ama anapuenaneto. Ñeñño'marña Pilatopa' cha atarr cohuana'tapan Jesús.

*Atto am̄cha'taret Pilatopa' otanet, ama'tpa' chosa muetse'ña Jesús
(Mt. 27.15-31; Lc. 23.13-25; Jn. 18.38–19.16)*

⁶ Ñehua, ñetpa' atetca'ye yechenet. E'ñe pate'tets char allempoch cherrerr pascuapo, ñeññña am̄cha'taret ñeññ nen gobierno' Romo'tpa' ñaña'pa' chocmach a'rroyerran puesheñarr judioneshacop ñeññ ayottam̄psarettetsa allempo, ñeññtara ñeññ pamo'ts penet ñet. O'ch aparet erra'tsencho' enamuenet ñeññ muenenet ñet. Ñeññpa' añecop a'rroyenanetña puesheñarr pamo'tset attoch e'ñe cohuen coshatenan allohuen judionesha'. ⁷ Ñaña e'ñe allempopa' allo'tsen puesheñarr judionesha' ñeññ ayotam̄psarettetsa ñeññpa' añ pa'so'cheñ Barrabás. Ñehua, ñeññ Barrabás ahuañmo'choteñ yottam̄peñet epuet po'potantañ tarro'mar ñetpa' ñetca'ye yechatenetña acheñenesha' atpare'chetepa'to' am̄cha'taret ñeññ nen gobierno' Romo't. E'ñe patpare'teñotet o' muetset ñaña acheñ. ⁸ Allempoña acheñenesha'pa' cha'cha'tet Pilateshopa' ñetña'pa' atet otoset:

—Te'pa' o'ch p̄a'rroyerrnay puesheñarr ñeññ atet chocma peperrnaye't.

⁹ Pilatoña'pa' atet otapanet:

—Sapa' ¿añe'tña semnen o'ch na'rroyerrnas ñeññ am̄cha'tarettetsa judioneshacop?

¹⁰ Ñehua, Pilatopa' atet otapan acheñenesha' tarro'mar ñapa' eñnoten cornaneshachno pa'm̄cha'tareternesha'pa' ñetpa' e'ñeca'ye pue'moñe'tateñme'chatsa pomueñetña Jesús.

¹¹ Tarraña ñeññ pa'm̄cha'tareternesha' pen judionesha' po'cornaneshar ñetña'pa' añ atarr cotape'chatenet acheñenesha' attoch ñetpa' allohuenetpa' o'ch ochet Pilato: "Añcha' p̄a'rroyerrnay Barrabás." ¹² Allempoña Pilatopa' alla otarraneterr:

—Ñehua, añ ñeññ soten judionesha' pa'm̄cha'tareter, ñapa' ¿errofe'tcha'ña nepe'?

¹³ Ñetña puerranare'teñotetpa' atet otyeset:

—Ñapa' ¡pecorso'tam̄psachñaca'ye!

¹⁴ Pilatoña'pa' atet otarraneterr:

—Ñapa' ¿eso'tña pen ñeññ ama't mameshapa' ama pocteye' sentapreteñe?

Ñetña'pa' alla rrannarterreterr huomencpa' atet otarreterr:

—Ñapa' ¡cho'pañaca'yeña corso'tam̄psate'!

¹⁵ Pilatoña'pa' añ atarr muenen o'ch coshatan acheñenesha' ñeñño'marña a'rroyerranet Barrabás ñeññ enamueñet. Allempoña ashtatan ñaña Jesús allotña'pa' otan po'solltarneshar:

—Te'pa' o'ch secorso'tam̄peña'.

¹⁶ Ñehua, solltarnesha'ña ama aneñeta' allcha' corso'tam̄psoset arrña ñanom anmetña Jesús am̄cha'taretepahuo. Allña agotachet allohuen po'potantañ solltarnesha' ñeññ allo'tsa'yen o'ch e'ñe apchet Jesúsesho. ¹⁷ Allña'pa' pa'llocchame'teñotet Jesús chor-rachet shetamuets tsamamueno' quelluemamtena ñeññ pa'shtam pen ñeññ po'ño'ch

am̄cha'tarettetsa. Pellta'toñet ñaña choyo'mets agrechpa' ñeñña choyo'mtachtet ñeññ atet choyo'mtena ñeññ po'ñoč am̄cha'tarettetsa. ¹⁸ Pachm̄are'teñoŕetpa' atet oteñet:

—¡Puetare' am̄cha'taretecha' atarruaca' cohuenep̄te! pa' ñeññep̄ judionesha' pa'm̄cha'taretereŕ.

¹⁹ Pueche'tatseteñoŕet asto'tame'teñet tsachpo poño, a'coshare'teñet, allempoña concorpana'teñet, ottenetañ ñerra'mrrate' cho' muechatse'teñet. ²⁰ O'ña achm̄are'tuahuetpa' allempoñapa' rrotam̄peret shetamuets tsamamuen chorrateret e'ñe ña pa'shtam. Allempoñapa' anmet a'yo allcha' corso'tam̄peñeta'.

Atto corso'tam̄psoset Jesús

(Mt. 27.32-44; Lc. 23.26-43; Jn. 19.17-27)

²¹ E'ñe ahuanmatsetpa' allña oñenetpa' o' poctet puesheñarr yacma ñeññ cireneo'marnesha' ñeññpa' añ pa'so'cheñ Simón ñeññ errte' huerrtsa a'yoŕ. Ñaña' allenta chechatnomet po'corsoch. Ñeñña Simónpa' ñeññpa' añ pompor pen Alejandro ñaña Rufo.

²² Chapachet all socheñet Gólgota ñeññ yoten yeñoño Poñetalleŕno. ²³ O' chapachet allpa' Jesús'pa' aposetañ vinos ñeññpa' añ atsetareŕ pueretso ñeññ atarr pesherr ñeññ otenet mirra tarraña Jesús'pa' ama mueno o'ch orr. ²⁴ Allempoña o' corso'tam̄pesuetpa' solltarnesha'ñapa' allenta yellsheñe'chatoñet pa'shtam po'suertot attoch orrtet e'ñe puesheña'ttsetpa' o'ch yorayesñañet pa'shtam puema'tets.

²⁵ O'ña enome'ta'muen atsne' allempoca'ye corso'tam̄psa'mueñetña Jesús. ²⁶ Ñehua, poñoŕpa' all corsocho all noñet tsachtall aquellcareŕ attochña eñoteñet ñeññecop corso'tam̄peñet. Ñeñña quellecpa' atet oten: “Añpa' ñeññca'yeña judionesha' pa'm̄cha'tareter.” ²⁷ Allña corso'tam̄psset epuet ñaña epsheña eñet, puesheñarrpa' nosñañet po'cohuenrot, po'psheñeñña' nosñañet pue'chcoŕerot. ²⁸ Attoca'yeña etsoterraña Yompor po'ñoñ ñeññ atet anuareŕ ahuatoteñ Cristocop; ñeññpa' atetca'ye oten: “Ñapa'cho'ña e'ñech attecma enteret ñerra'mrrate' ñeññ atet p̄atse'tyene' ñeññ ama pocteyaye.”

²⁹ Ñeñña oñmachets allpa' ñetpa'cho'ña chocma achm̄are'tneñet. Pachm̄arñoŕetpa' coño'coñtana'tyesneñet, ñeññpa' atet otyesneñet:

—Pa' ñeññep̄ p̄ommo'cheñoŕpa' p̄otatse'teŕ p̄o'ch a'materrayeñ Parets pa'paquell, poma'pamtañocmo'ch alla p̄atomatereñ, ³⁰ te'ñapa' p̄a'queshp̄aterrañaca'ye e'ñe p̄añeña, pesuerrañaca'yeña tayecma corsochoŕ.

³¹ E'ñe attecma achm̄are'teñ ñaña ñeññ pa'm̄cha'tareternesha' pen judionesha' po'cornaneshar ñaña ñeññ etsotayenayeñ ñoñets ñeññ atet anareŕ. Ñetña'pa' e'ñe parrocma pachm̄are'teñoŕpa' atet otatse'tyeñet:

—Te'ña p̄apa' o' p̄a'queshp̄atyets po'potantañ, p̄aña'pa' eso'mare'tcha'ña te'pa' ama errotenot p̄a'queshp̄aterroña e'ñe p̄añeña.

³² E'ñe pachm̄are'teñoŕetpa' atet otyereter:

—Papa' ñeññep̄o'ca'ye Cristotostañ, ñeññep̄o'ca'ye israelnesha' pa'm̄cha'tareterpeñ, pesuerrañaca'ye corsochoŕ allochña'pa' attoch yame'ña'pa' yam̄a.

E'ñe attecma pe' ñaña eñet ñeññ epuet corso'tam̄peñet, ñetpa'cho'ña atarr es otnare'chet allot po'corsochoŕ.

Atto rroma Jesús all po'corsocho

(Mt. 27.45-56; Lc. 23.44-49; Jn. 19.28-30; Heb. 9.11-14)

³³ O'ña chap poctopa' o'huañ atsnom o' e'ñe checmetua ora erraparen añe patsro, o'ña ellerrotenmochapa' o' alla puetarerr. ³⁴ Allempoña ellerrotnenmochapa' Jesús'ñapa' rrana huomenc, ñeññpa' atet ot e'ñe ña po'ñoño:

—Eloi, Eloi, lama sabactani. Ñeñña ñoñtsorpa' atet oten: Eso'maruachña'ye Neyompor-recha' pa'ypo'ñerren.

³⁵ Puesheña'tetsña ñeññ tomchets all ñeññ e'mue' atet oten Jesús, ñetña' amaca'ye e'mueññañeto po'ñoñ ñeññ atet oten, ñeñto'marña ñetpa' cha otyeset:

—Se'mueñe't o' cha chore'tante' Elías ñeññ a'mtaye't ahuat Parets po'ñoñ.

³⁶ Allempoñapa' mata puesheñarr ñeññ allo'tsen, e'chomosan chella'so ñeññ atsotso'tpo' o' ne' tsachpopa' alloña tso'tatosanña Jesús. Ñaña' atet otanet:

—Te'pa' o'ch yecue' Elías ñato'rraña o'ch huapapa' ñach a'suatose'.

³⁷ Allempoña Jesús'pa' o' alla rranerrerr huomencpa' rroma. ³⁸ Allempoña besom allo yottampeññañet Parets pa'paquell o'ponopa' ahuepa't rrrarra'nom e'ñe poctacma, ellopa'tetsta enoteñ e'ñe sotatsohua. ³⁹ Capitánña ñeññ romo'marnesha'pa' ñeññ tets allame'tets ñaña'pa' e'ñe entenan Jesús atto rroma, allempoña ñapa' atet ot:

—Po'ñochuaca'ye añ acheñerpa' Partsepa'tca'ye Puechemer.

⁴⁰⁻⁴¹ Allo'tsa'yen ñaña shonte' coyanesha'chno, ñetña' a'yo'a cohuanrrortenet. Ñetpa' ñetca'yeña co'a'huanmue'ña Jesús Galileoteñ ñeññ sherba'yesaye't. Ñeñtpa' María Magdalena ñaña po'psheñeñ María ñeññ Jacobo pachor ñaña José. Ñehua, ñeññ Jacobopa' puechoyomer peñ José. Allo'tsa'yen ñaña shonte' po'potantañ coyanesha'chno ñeññ co'a'yesaye't Jesús Jerusaléño.

Atto pampuet Jesús

(Mt. 27.57-61; Lc. 23.50-56; Jn. 19.38-42)

⁴² Atteñapa' o' ellerren. Ñehua, ñeññ yetñatsropa' allempoca'ye chocma añño'tena judionesha' ñeññ tsapatcop allempoch ameserreterr. ⁴³ Ñeñto'marña allempopa' Joséña ñeññ arimateo'marnesha'pa' ñaña'pa' ama pueñcha'ñoñeye' ahuoso Pilatesho o'ch oteña' pocte'ch eñch ñach a'suatose' Jesús ñeññ rromuets corsocho. Ñehua, ñeññ Josépa' atarr cohuen acheñ, atarr amcha'na'tpo' enteñ allohuen ñeññ parro a'poctatenet ñeññ llequena allohuen judionesha'. Ñapa'cho'ña ñeññ atarr cohueñe' Yompor esempohuañencha' o'ch atarr ayochreshatterra. ⁴⁴ Allempo atet enamosan Pilato, Pilatoñapa' atet ot:

—Ta'm ¿po'ñochte' o' rromaña e'ñe mamecma?

Allempoñapa' agotan solltar po'cañtanerpa' a'p'to'ch:

—¿Po'ñocha't o' rromaña Jesús?

⁴⁵ Capitánña'pa' atet otos:

—Po'ñoñca'ye o'ca'ye rroma.

Pilatoñapa' atet otan José:

—Ñeñteñña'pa' pa'suater corsocho'tpa' pañerca'ye.

⁴⁶ Joséña'pa' allenta rañtosana emarr shetamuets, cherr corsochopa' a'suaterranña Jesús corsocho't all rromuen. Epatse'ch shetamtso ñeññ e'ñe cohuen. Allempoñapa' aneññ allcha' pampueña'. All eñatenan mapuetpon allca'yeña nenana'ña Jesús. Allempoñapa' attome'tuerrñañ mapue' allo yottam'pesner ñeññ puepampuer pa'ch. ⁴⁷ All cohueñ María Magdalena ñaña po'psheñeñ María, José pachor. Ñetña'pa' e'ñe enteñet all na'neret Jesús.

16

Atto tanterra Jesús

(Mt. 28.1-10; Lc. 24.1-12; Jn. 20.1-10)

¹ O'ña huañ yet allempo amesenet, María Magdalena ñaña Salomé ñaña po'psheñeñ María ñeññ Jacobo pachor, ñetña'pa' rañta'yesnenet eñmosa't ñeññcha' anma'muenet tsapa't Jesús puepampuro alloch a'yana'tereta' ama't rromota. ² Tsapa't allempo mo'tta'muena yetñats temenc ñetña'pa' e'ñe ahuatecma ahuanma'muenet Jesús

puepampro. O' taya huapa'muena atsne'pa' allempo ahuanma'muenet. ³ Ñetñapa' otanna'tyesnomuet:

—Ta', esesha'ch a'rrote'te'ña mapue' añecmuen ñeñt' allo yottam'peñet attoch yebe'tos all puepampro esheccha' ya'yana'tera' eñmosafo.

⁴ Ñetña čhapatseta all, cohuostseta entoset mapue' o' a'rrote'tare'ttena a'yenet, ama't ñeñt' mapue'pa' añecmuen. ⁵ Ñetña allempo be'toset puepampro allñapa' all entoset puesheñarr huepuesha' all anen po'cohuenrot. Pa'shtamñapa' atarr huallama't, čha torats panet pueyočhret. ⁶ Ñeñtña mellañoñeñerpa' atet otapanet:

—Amach čha seyorenatsto. Napa' neñotenes añca'ye semnen o'ch senta'mueñ Jesús ñeñt' otenet nazareto'marnesha' ñeñt' o' corso'tam'perret. Tarraña ña'te' o'ca'ye tanterra, ama arro'tsenaro. Secueña'ca'ye all neretañ, amaca'ye eñalle.

⁷ Allempoña mellañoñeññapa' alla oterraneterr:

—Te'pa' o'ch ahuerres o'ch sotuer Pedro ñaña po'potantañ pueyočhresha', Jesús oten o'ch ota o'ch ahuer Galileo. Choscha'ña ahuanmatsa saña allochñapa' allcha' senter ñeñt' atet otase't ahuaña.

⁸ Allempoña coyaneshačhno atet otarettet all Jesús puepampro, ñetña čha'nmačherretpa' matenacma ahuanerret po'yorñoťetpa' čha yonshema'tyesnerret. Poñčañoťet ama't e'ñe esesha'pa' ama erroťenaye' otenaye' entnerreto.

*Allempo tanterra Jesús'pa' añ ñanom orrterra María Magdalena
(Jn. 20.11-18)*

⁹ Ñehua, ahuačecma tanterra Jesús añe yetro allempo motta'muenerr yetñats temenc. Allempo tanterrapa' añ ñanom orrterra María Magdalena. Ñeñtña Mariapa' cančherrsheña oneñe't ñeñt' chorraye't Jesúsñapa' e'ñe quečhpatañpsatuer. ¹⁰ Maríañapa' allenta ahuo' o'ch otenana' ñeñt' epuet yemte't Jesús all puellquēñoťet atarr yahuanr-rortenet. ¹¹ Ñetña allempo e'mare'chet o' tanterra Jesús, Mariapa' o'ca'ye enter, ñetñapa' arepa'tcha' ame'ñyeto.

*Allempo Jesús'pa' orrterrana ñaña epsheña pueyočhresha'
(Lc. 24.13-35)*

¹² Po'pocheño Jesús'pa' e'ñe po'poñoť orrterrana epsheña pueyočhresha' allempo chopeñe'chnenet allampaño'mar. ¹³ Ñetñapa' allenta puerrerret o'ch otueret po'potantañ, arepa'tcha'ña ame'ñareťtapuerreto ñeñt' atet enteret ñamet Jesús.

*Atto Jesús'pa' otnerran pueyočhreshačhno ñetpa' atet'cha' pa'yerret
(Mt. 28.16-20; Lc. 24.36-49; Jn. 20.19-23)*

¹⁴ Po'pocheño Jesús'pa' alla orrterrannerr pueyočhresha' čharrasheña ñeñt' puechetsa paterr all rrallme'chenet. Ñaña'pa' atet cotape'chatuenanetpa' atet otuenanet:

—Sapa' eso'mare'tña ama same'ñeñoña po'potantañ ñeñt' sotene' napa' o'ca'ye ne-tanterra tarro'mar ñetpa' čhoca'ye enternnet. Tarraña sapa' amaca'ye es sečhenoyo seyočhro.

¹⁵ Allempoña Jesús'pa' atet oterraneterr:

—Te'pa' o'ch auyeses ora errařaren allohuanen añ patser, seserrpare'tach allo-huen aचेñenesha' añ cohuen ñoñets alloch a'queshpatare'tterret. ¹⁶ Allohuen ama't erra'tsena ñeñt'cha' ame'ñerraya añ cohuen ñoñets ñaña ñeñt' pame'ñeñoťetpa' ap-atare'tterret'cha' ñetñapa' a'queshpatare'tterret'cha'. Tarraña ñeñt'cha' ama ame'ñerrtso, ñetñapa' amñare'tterrach coñcheñtso. ¹⁷ Ñeñt'cha' name'ñerraya ñocpuetpa' norrtater-ranet'cha' nepartsoña. E'ñe na neso'chñoch quečhpateset'cha' oneñe'tečhno, ñaña eñosyeset'cha' po'poñe'ttsočma ñoñtso. ¹⁸ Ñaña ñerra'm e'ñe pototet chetet'cha' shecheř, tarraña amach erroť paneto; ñaña ama'tcha' añ orret ñeñt' amtsañtetsa tarraña

amach erroť p̄aneto. Ñaña ñerra'm esempoch a'p̄lla'yeñet atsnañeť, atsnañeťñapa' accrerroche'ch.

Allempo a'terr Jesús pue'ntaño

(Lc. 24.50-53)

¹⁹ O'ña atet otuanerranet Partsesha' Jesúsapa' allenta a'tapater Pompor pue'ntaño, allñapa' anorrueñ e'ñe Pompor po'cohuenroť, all partsotapretuera.
²⁰ Pueyochresha'ñapa' ahuanomyeset, serrpare'tyesnomuet errařaren. Partsesha' Jesúsapa' chocma torrapretenanet, orrtatenanet po'partsoña attoch acheñenesha' e'ñech eñotenanet ñeñť atet serrpare'tyenet, ñeñťpa' e'ñe po'ñočh Parets po'ñoñ. Ñeñťpa' attetepa'ch Nompore. Allohua.

COHUEN ÑOÑETS ÑEÑT̃ QUELLCA' SAN LUCAS

Ñehua, añpa' ñeñtca'yeña e'ñe pa'moter penña serrparñats

1-4 Masheñe Teófilo, ðapa' peñoteñ ahuañmo'chapa' pa'namen esocmañen ñeñt̃ atet̃ etsotayese't̃ Jesús acheñenesesho ñeñt̃ e'ñe ñanom ame'ñaya ña, ama't̃ teme'ttsen yocpa'naña ñeñtey o' yame'ñera yaña. Ñaña allempoteñ Jesús pa' orrtana pa'namen acheñenesha' ñeñt̃ entyesaye't̃ e'ñe allame'tets. Ñetñapa' e'ñe entuoñete't̃ allohuen ñeñt̃ atet̃ ða'yese't̃. Ñetñapa' serrpare'tyesete't̃ atet̃ oten Yompor po'ñoñ. Attoña eñotaterryetña yaña. Ñeñt̃ atet̃ eñotatyenet ñetpa' shonte' acheñenesha' quellca'yesetañ ñeñt̃ atet̃ ðosa Cristo allempo huapa. Ñeñto'marña napa'cho'ña e'ñe pocte' nenteñ o'ch nequellconap̃ e'ñe ora allpon ñeñt̃ atet̃ orrtatos Jesús, tarro'mar napa' ahuañmo'choteñ atarr noctape'cheñ o'ch e'ñe neñoch erro'tente'ña ñeñt̃ e'ñe po'ño'ch atet̃ ða'yesos Jesús. Ñeñto'marña te' arrpa' o'ch e'ñe neñotap̃ ora allpon ñeñt̃ o' etsotua allochñapa' attoch e'ñe peñotuer ðaña ñeñt̃ allpon ye'chatenpetpa' ñeñt̃pa' e'ñe po'ño'ch atet̃. Ñehua, arrpa' atet̃ o' etsotua.

Ñehua, te'pa' o'ch neserrpare'tatað atto mellaño'teña' eñotatanet o'ch eñalleta Juan ñeñtcha' apatañtatsa Yomporecop

5 Ahuat̃ allempo añ añcha'tarettatse't̃ Herodes all anetso Judeo, eñall ñaña puesheñarr ñeñt̃ judionesha' po'corneshar. Ñeñt̃pa' añ pa'so'cheñ Zacarías ñeñt̃ chocma yemtenana po'potantañ cornaneshachno ñeñt̃ otenet Abíasona'tar ñeñt̃ torratse't̃ Yompor pa'paclo. Zacarías puetapor añ pa'so'cheñ Elisabet; ñapa'cho'ña corneshap̃nor ñeñt̃ po'mreneñ pen Aarón ñeñt̃ corneshatatse't̃ ahuat̃. 6 Ñetña epsheño'maretpa' Yomporñapa' e'ñe pocte' entenanet ñeñt̃ atet̃ penet ñet, e'ñe cohuen etsotueññañet ora po'ñoñ ñeñt̃ atet̃ anaret̃ ahuat̃oteñ acheñeneshacop ñeñtcha' atet̃ ðohuenet. Ñeñto'marña ama't̃ puesheñarrapa' amach erro'tenot̃ otaretteto, "ama pocteyaye ñeñt̃ atet̃ sepena." 7 Ñetpa' ama eñalleto ama't̃ puesheñarra pacñe'ter tarro'mar Elisabetpa' ama achoyore'tañeyaye. Ama't̃ ñaña puerrollar epsheño'maret o' at̃ta po'nme'tuenet.

8-9 Atteñapa' chap̃ allempo torrena allohuen cornaneshachno ñeñt̃ epuet parro yemtena Zacarías atto corneshatenet Yomporecop. Ñehua, allempopa' allohuen ñeñt̃ corneshatatse't̃ Yomporecop, ñetñapa' añ ye'chete't̃ ahuo'ch yellsheñe'chenet allohuenet attoch eñochet po'suertot̃ erra'tsencha' puesheñarrer ñeñtcha' be'tosets Yompor pa'paclo allcha' a'crratan ñeñtcha' eñmosa'ttatsa Yomporecop. Allempoña pam'tarrpa' añ orrtatsa Zacarías ñeñtcha' be'tosets Yompor pa'paclo allcha' a'crratan ñeñtcha' eñmosa'ttatsa Yomporecop. 10 Ñehua, allempo chap̃ allempoch be'tosos puesheñarr Yompor pa'paclo shonte' acheñenesha' ñetñapa' allach tom'cha'tet a'yo't̃ allcha' ma'yochrra'toset. Ama't̃ allempo be'tosos Zacaríaspa' atterach ma'yochrra'tet a'yo't̃. 11 Ñehua, Zacarías allempo sherbenan Yompor o'pono, allñapa' machayotepa'tcha' orrtoña Yompor po'mllaño'teñer. Arr tomos altar po'cohuenrot̃, ñeñt̃ altarpa' allecma a'crratenet ñeñt̃ eñmosa'ttetsa Yomporecop, ñeñt̃pa' atto sherbete't̃ Yompor. 12 Allempo orrtoña mellaño'teñ, Zacaríasñapa' atarr yoren, atarr nanac mecha'ch. 13 Mellaño'teñña' atet̃ otosan Zacarías:

—Zacarías, amach peyorenatsto tarro'mar Yomporpa' e'muennað ñeñt̃ atet̃ pena-mueñ pema'yocheñot̃. Ñeñto'marña te' petapor Elisabetpa' eñalletaterrancha' paterr asheñorr ñeñt̃ e'ñe ðo pechemer, ñeñt̃ña' pesoschcha' Juan. 14 Papa' atarrcha' ðocshena

nanac. Shonte'ch acheñenesha' ñeñtcha' nanac p̄ocshapretaya atto o' eñalleta pechemer. ¹⁵ Ñapa' atarrcha' asherben enteñ Yompor. Ñapa' amach orrarñaŕeyaye, ama't vinosapa' amach orreñe. Ama't ñaña pa'namen ñeñt aposa'tpotetsapa' amach orreñe ama't mamesha. Ñapa' e'ñech aña chorraya Parets Puecamquẽ. Ama't allempoteñ pachor pa'to'tsen ñapa' e'ñech chorreña Parets Puecamquẽ.

¹⁶ Allempoña mellañoŕeña' alla otererr:

—Ñapa' cohuencha' cotape'chaterran shonte' israelena'tarnesha' allochñapa' attoch cotape'cherret e'ñe cohuen Yomporecop ñeñtcha' Po'partseshar perret. ¹⁷ Ñeñña Juanpa' ñeñtcha'ña ñanom orrtatsa Yomporecop. Ñapa' aña' ahuamencat pene' Yompor Puecamquẽ atet pe't ahuat Elías ñeñt a'mtaye't Yompor po'ñoñ. Allochñapa' attoch e'ñe cohuen amo'tstaterana achemeretechno puechemerasha'. Allochñapa' ama't ñeñt atpare'tetsapa' o'ch ame'ñaterranet ñeñt e'ñe pocte' es pets. Attochña cotape'chaterranet cohuen, allochñapa' attoch agapueret Partsesha' ñerra'm esempoch orrta.

¹⁸ Zacaríasña' ahuo' a'p̄to'tan mellañoŕeñ, ahuo' och:

—Ta', ¿errotenochña neñoŕ e'ñete' po'ñoŕ o'ch eñalleta cheshatoll? Tarro'mar napa' o' nepo'nme'ten; neŕaporpa'cho'ña e'ñe attecmay o' atarr yepo'nme'tuen.

¹⁹ Mellañoŕeñña' alla otererr:

—Napa' ñeñten Gabrieleŕets ñeñten sherbene' Yompor. Napa' ña nellsensene' attoch ne'ñorana'taŕa o'ch neñotataŕ añ cohuen ñoñets. ²⁰ Tarraña p̄apa' ama p̄ame'ñeno ñeñt atet noteneŕ, ñeñto'marña te' p̄apa' o'ch p̄o'panat, amach eshec pe'ñorerro tayoteñ tarrempohuach allempoch eñalleta pechemer, allempochña pe'ñorerra. Tarro'mar po'ñoŕ etsoterrach ñeñt atet o' notuaŕ o'ch chap allempo onañchare't. Arrpa' allohua ñeñt atet ot mellañoŕeñ.

²¹ Atto' ellapes Zacarías o'ponopa' acheñenesha'ña' cohueñet a'yoŕ ama cha'nerro. Atto' cohueñetpa' otanna'tet:

—¿Eso'marte' amo' cha'nerroña Yompor pa'pacloŕ?

²² Allempoña cha'nerrpa' ama eshcaye' eñorana'tuerraneto. Ñetña' otyenet pueyoŕhreto, ñato' choŕe' es orrtoya Yomporecop ñeñto'marte'ña atarr ellapes o'pono Yompor pa'paclo. Ñaña' ama eshcaye' eñorana'tuerraneto, potota eñotatuerranet ñeñt atet ent Yompor pa'paclo.

²³ Allempoña o' chap allponmat ñeñt atto sherbenet Yompor pa'paclo, Zacaríasña' o' ahuer pa'paclo. ²⁴ E'ñe allponmatatsapa' o' aŕhomenta puetapor. Allempoteñña Elisabetpa' ama mueno o'ch orrterra acheñenesesho. Ama't o' amnarmña arrorrpa' ñaña' ama orrteno. Ñaña' atet oten:

²⁵ —Te'ña' atarr cohuen muera'na Yepapar, allochñapa' o'huañcha' allo'na pencna'ntatnennet tarro'mar napa' otyennet mueŕhopeno'.

Atto mellañoŕeña' eñotatanet o'ch eñalleta Jesús

²⁶ Allempoña o' pechapña arrorr aŕhomenta Elisabet, Yomporña' o' alla mueñerranerr po'mllañoŕeñer ñeñtara Gabriel. Arr mueñe anetso Nazareto ñeñtara Galilea. ²⁷ Allempoña chap Nazareto, allña' orrtosana puesheñarr shopshesha' ñeñt ama a'p̄llareŕeyaye. Ñehua, ñeñt shopshesha'pa' añ o'patenaya yacma ñeñtpa' añ pa'so'cheñ José, ño'ch yore'. Ñeñña shopshesha' arroŕ eñalletña David po'mrenñoŕ; ñeñtpa' añ pa'so'cheñ María. ²⁸ Mellañoŕeñña allempo chap e'ñe ñeshopa' atet otos:

—O'ch noŕha nehuom̄cha'toseŕ. Yompor e'ñe puemuereñoŕeŕ p̄apa' atarrcha' coshaterreŕ, ñapa' e'ñe pesho'tsen. Yomporpa' atarr bensare'tam̄peneŕ. Ello pen̄tana'tueñ allohuen p̄acmanesha' atto bensare'tam̄penanet ñet.

²⁹ Allempo e'man atet och mellañoŕeñ, ñaña' cha moñne'tacha, cha cotape'ch pueyoŕhro:

—Ta, ¿este' otenenña ñeñt atet huomcha'tenen?

³⁰ Mellañoteñña'p' alla otererr:

—María, amach peñcha'tatsto, Yomporpa' atarr o' morrenterrpa. ³¹ Te'pa' p'achomentach, pechyore'tcha' ñeñtpa' asheñorrcha'. Ñeñtña'p' pesochocha' JESÚS. ³² Ñeñtcha' nanac amcha'tarettatsa. Otyesetcha' ñapa' ña Ñeñt Nanac Parets Puechemer. Pomporña ñeñtara Paretspa' ñachña ne' amcha'taref atet amcha'tarette't pa'tañ David. ³³ Atteña ñapa' amcha'tarettach Jacob po'mrenñecop ñeñtara israelnesha'. Ama't errponañapa' amach huañerro ñeñt atto amcha'tarettena ña.

³⁴ Maríañapa' atet otapan mellañoteñ:

—Ta'm ¿errofenotcha'ña nechyore'tña? Napa' ama't puesheñarra encanesha' amarramtso yoreña'.

³⁵ Mellañoteñña'p' alla otererr:

—Paretscha'ca'ye Puecamquëñ pechapoya. Ñeñt Nanac Parets po'huamencpa' a'pomam'psose'pcha' atet ñerra'mrrate' os pa'pomam'pene'. Ñeñto'marña cheshatoll ñeñtcha' pe'ñalletatpa' ñapa' añach e'ñe ma'yochrosa ñeñt atet muenen Parets. Otyesetcha' ñapa' ña e'ñe Yompor Puechemer. ³⁶ Ñaña Elisabetña ñeñt pamo'ts pepen, ñapa'cho'ña o'totana asheñorro'toll, ama't o' po'nme'ten. Ñaña ama't oteñet muecho'ppa' te'ñapa' o' pechapña arrorr o' a'chomenta. ³⁷ Tarro'mar Yomporpa' ama eñalle ñocop ñeñt atarr torrapo' enten.

³⁸ Allempoña María'p' alla oterranerr mellañoteñ:

—Ñehua, napa' e'ñe pocte' nenteñ o'ch nesherber Yepapar ñeñt Nepartseshar nepen. Ñeñtpa' attetepa'ch nocop ñeñt atet p'otenen.

Allempoña mellañoteñpa' o' ahuerr.

Atto María'p' emo'tenana' Elisabet ñeñt e'ñe pamo'ts pen

³⁹⁻⁴⁰ Maríañapa' allenta ahua' poma'yorñecma o'ch emo'tenana' Elisabet. All ye'chenapa' all shonte' aspentarer allara Judeo. Allempoña chap anetso all sechenapa' be'tosos Zacarías pa'paclo, huomcha'tosan Elisabet. ⁴¹ Ñaña'p' allempo e'mapan María ñeñt atet huomcha'tospa' pue'maretollña ñeñt pa'to'tsenpa' allente'pa'tcha' pella. Pachorñapa' e'ñe chorreña Parets Puecamquëñ. ⁴² Ñeñtña eñoratene', pocsheñeshocmañen eñorena huomencpa' atet otapan María:

—Papa' o' atarr coshaterre'p' Yepapar. Papa' o' e'ñe peñtana'tue ora allohuen yacmaneshachno atto coshatenanet ñet Yepapar. Ñaña Yepaparpa' atarrcha' bensare'tam'pennap' pechoyoretoll. ⁴³ Ama't na Yepaparpa' atarr coshatenen atto pemo'tenen ama't ñeñte'p' pachor pen ñeñtcha' Yepartseshar yeperr. ⁴⁴ Tarro'mar e'ñe allempocma ne'maponap' peñoñ atet pehuomcha'tosen, ne'maretollpa' e'ñe pocsheñesho'pa' allente'pa'tcha' pella nato. ⁴⁵ Paña te'pa' atarr cosheñtso'tsene'p' tarro'mar p'apa' e'ñe pame'ña'huoña ñeñt atet otuen'pa' Yepapar. Ñeñto'marña ñeñtpa' e'ñech atet etsoterra p'ocop.

⁴⁶ Maríañapa' alla otererr:

—Te'ñapa' e'ñech neyo'chrocmañen na'ye'cho'chtatoñ Yepapar.

⁴⁷ Necamquëñohuen atarr no'csheña Yepapar ñeñt Ya'queshpatañer yepen.

⁴⁸ Yepapar e'ñe puemuereño'ten ñapa' entenen ama esoyayno, añana ñeñten torretsa ñocop. Tarraña te'pa' allohuen acheñenesha' ñeñtcha' mererrtsa arr patsro ñetñapa' atarrcha' coshapreterrnet atto Yepaparpa' o' atarr coshaterren na.

⁴⁹ Tarro'mar ñapa' ñeñt atarr ahuamencattetsa attoña o' orrtaton ñeñt nanac sherbets, ñeñtara Yepapar ñeñt otenet Ñeñt atarr nanac Parets.

- 50 Allohuen ñeñt amicha'na'tpo' entene' Yepapar, ñaña'pa' chocmach atarr muererranet ama't tayoteñ errponañohuen ama't allpon allohuen acheñenesha' ñeñtcha' mererrtsa arr patsro.
- 51 Ñaña ñapa' e'ñe etsotuenan ama't ñeñt atarr nanac echarr entyenet, ñaña allpon allohuen acheñ ñeñt atarr asherben entyetsa, ñaña'pa' e'ñech pomnaren pohuerranet.
- 52 Ñaña ñeñt atarr ahua'mencat entyetsa ñaña'pa' e'ñech a'suatanrrortatuerranet allot amicha'tarettenet. Tarraña ñeñt ama esoshe'maye' entyetsopa' ñetñapa' Yepaparcha' nohuerrahuet attotcha' amicha'na'tpo' enter allohuen acheñenesha'.
- 53 Ñaña ñeñt nanac es pallta'yetsa, ñetñapa' Yepaparcha' esocmañen aphuerahuet. Tarraña ñeñt atarr esocmaneñ es echyets, ñetñapa' Yepaparcha' puerratañpesuerrahuet, amach es anerreto ama't coñe'ta. 54-55 Yepaparpa' añach chocma yenpuen israelena'tar ñeñt pueyochresha' pen ña. Amach pueserrano ñeñt atet otane't ahua't yamo'mtayñeneshañ ñeñtcha' atet perranet ñaña allohuen ñeñtcha' po'mñreneñ perret. E'ñe atet otane't ahua't Abraham po'mñrenñecop. Attoch chocma muerenanet ama't errponohuañen. Arrpa' allohua ñeñt atet a'chotan María Yompor.
- 56 Allempoñapa' ñato' ma'pmate' arrorr alla a'pa Elisabetesho. Allotña Mariapa' ahuer pa'paclo.

Arrpa' atto eñalleta Juan ñeñt apatañtatse't Yomporecop

- 57 Allempoña chap allempoch emare'ten Elisabet. Ñeñtña pue'marpa' asheñorroñoll.
- 58 Allohuen acheñenesha' ñeñt yeçheta all ñesho ñaña allohuen pamo'tsesha' ñetñapa' e'ñe coshaprechet. Tarro'mar eñoteñet Yomporpa' o' orrtatoñ atto ñapa' atarr muereña.
- 59 Allempoña o' posocmata'muen ñeñtña asheñorroñollpa' o' tsorratolle'ta'mueñet tarro'mar ñetpa' atetca'ye yeçhenet ñeñt judioneshet.* Allempopa' añ sochetañ Zacarías o'ch anmatoñetañ pompor pa'so'cheñ. 60 Tarraña pachorpa' otanet:
—Napa' ama nemno o'ch sesochon ne'mar Zacarías. Napa' añcha' nesoch Juan.
- 61 Allempoña acheñenesha'pa' atet ochet:
—¿Eso'mare't pemneñña o'ch pesoch Juan tarro'mar ama't puesheñarra pamo'tspa' ama eñalle ñeñt sochetsa Juan?
- 62 Allempoña acheñenesha'pa' e'ñe pototeta a'p'to'toñet ematoll pompor escha' sochanña puechemeretoll. 63 Ñapa'cho'ña potota eñotatan acheñenesha' o'ch apet quellcatets allcha' quellcan ñeñtcha' sochan puechemeretoll. Allempoñapa' apet quellcatets, allñapa' atet quellca': “Añcha' yesoch Juan.” Acheñenesha'ñapa' atta cohuanrrorochet.
- 64 E'ñe allempocma Zacaríasñapa' allenta eñorerre. Allorocma aye'choçhtaterran Yompor. 65 Acheñenesha'ña ñeñt yeçheta allpa' allohuenet atarr mecha'na'teñet Yompor. Ñetñapa' serrpare'tatanna'tyeset all aspentarero Judeo. 66 Ñaña ama't allohuen ñeñt e'mare'tyese' ñetñapa' cotape'chyaset pueyoçhreto, atet otyenet:
—Añ cheshatollpa' po'ñoçhcha' atarr sherberran Yompor tsapañonet.
Tarro'mar Yomporpa' atarr muereña.

Atto Zacarías atarr a'chotenan Yompor Parets

- 67 Cheshatollña pompor ñeñt Zacaríaspa' añ chorrenaya Parets Puecamquëñ ñeñtña eñoraterre' Yomporecop ñeñtcha' atet perra ama't esempo. Ñeñtpa' atet ot Zacarías:

* 1:59 Añ ñoñets “atsorret”, añ ñeñt otets atet yeche't judionesha'. Ñeñtpa' atet: Ñerra'm allempo eñalletena asheñorroñollesha' ñeñt e'ñe judionesha'pa' añña pomporpa' o'ch tsorrateñet po'chtso. Ñehua, ñeñt tsorratenetpa' ematollach o'ch çhapa'muen po'psocmatño. Ñehua, po'chtso allcha' tsorret asheñorroñollpa' all e'ñech poteretollo e'ñe po'ñoç parrmatollo.

- 68 —Aye'chochtaterrapo'ch Yompor, ñeñtara ñeñt Po'partseshar pen allohuen israelneshá', tarro'mar te'ñapa' o' orrtaterrnay puemuereña ñeñtcha' ya'qeshpaterre' ñeñtey puechemer pen.
- 69 Ñapa' o' orrtatonay ñeñtcha' a'qeshpatañterrtsa ñeñt atarr ahua-menca'tesha' ñeñtara ñeñtcha' eñalletatsa David po'mrenñoñ, ñeñtara David ñeñt atarr sherbaye't ahua't Yompor.
- 70 Ñeñtpa' ahua'toteñ atet eñoratyesane't ñeñt a'mta'yesaye't po'ñoñ, ama't allohuen ñeñt e'ñe ma'yoçhra'yestse't Partsocop.
- 71 Ama't ñaña allohuen allpon ñeñt ye'moñe'tene' ñeñt añcha'noçhetyetsa yocop, ñachña ya'rroyataterre'.
- 72 Attochña etsotaterrnay ñeñt atet otane't ahua't yatañneshañ ñeñtcha' atto çhocma muererrya. Atteña ñapa' amach pueserrano ñeñt atet a'poc'tat ahua'toteñ yocop tarro'mar ñeñtpa' e'ñe Partsesho't a'poc'tataretta.
- 73 Ñehua, aña' atet pa' allempo Yomporpa' ahua't otan yatañ Abraham ñeñtcha' atet per'nay e'ñe po'ñoçh.
- 74 Ñeñtpa' atet ote't Yompor yocop ama't ñeñt allpon ñeñt ye'moñe'tene' ñeñt añcha'noçhen yentyen ya, ñaña' ñach ya'rroyataterre'. Allochña yapa' o'huañcha' yem'cha'naño't yesherber Yompor.
- 75 Attoch yetsotoñ ñeñt e'ñe pocte' enten Parets allochña'pa' attochña pocte' enteney ñaña achenesha' atto e'ñe cohuen es ye'pa'yen e'ñech tarremphua esempohuach yocrrena arr patsro.
- 76 Te'pa' o'ch nechemeretolle nota'p: Papa' otterpetcha' ñeñte'po' ñeñtcha' eñorana'tena ñeñt nanac Parets. Tarro'mar pa'pa' panomcha' orrtatsa attoch pa'cohuentatyesoñ allcha' oñmos Partsesha'.
- 77 Ñeñtpa' attoch poctape'chater achenesha' e'ñe cohuen allochña ñetpa' esheccha' ap'retnare'tterret po'chñaret attoch a'qeshpatare'tterret.
- 78 Te'pa' çhapcha' allempoch Yompor e'ñe puemuereño'tey çapaterrnaycha' ñeñt huetsa ento't ñeñtcha' yoc'tape'chaterre' e'ñe cohuen, ñeñtña co'ta'pñatserpa' ñeñtcha' ya'puetarsam'perre'.
- 79 Attochña a'puetarsam'psare'tterra allohuen achenesha' ñeñt checmeto'tsa'yeneta, ñeñt ama eñotenaye Yompor, ñetña'pa' aña o'patenahuet rromueñets ñeñtara coñcheñets. Ñeñt atto a'puetarsam'psare'tey ñeñtcha'ña yeñotatene' attoch e'ñe cohuen yocsheñeshocmañen yeyçhena arr patsro. Arrpa' allohua huañ atto Zacaríaspa' açhotenan Yompor e'ñe pocsheñeshocmañen.
- 80 Aña chesato'll Juanpa' allo'na sen atarretnom'tsa. Puecamquëño'tpa' atarr ahua-menca'tetnena. Ñaña'pa' alla yeçhena alla'par amayo tarremphua allempo orrta israelena'tarneshesho.

2

Atto eñalleta Jesús (Mt. 1.18-25)

1 Allempopa' añ añcha'tarettatse't romo'marnesha' ñeñtpa' añ pa'so'cheñ Augusto. Ñaña'pa' nenan po'ñoñ ñeñtpa' atet oten: Allohuen achenesha' erraparen aña patsropa' quellcatyesetepa' pa'so'cheñ. 2 Ñehua, allempo ñanom quellcatyeset pa'so'cheñpa', arrña anets Siriapa' añ añcha'tarettetsa ñeñtpa' añ pa'so'cheñ Cirenio ñeñt pa'm'cha'tare'ter pen allohuen judionesha'. 3 Ñehua, allohuenet ahuanerret pa'tañnesha' pa'netsro allochña'pa' allcha' quellcatyerreta' pa'so'cheñ. 4 Ñeñto'marña Josépa' on Nazaretot allara anets Galileo, o'ch ahua' all pa'netser pe't pa'tañneshañ, ñeñtña anetserpa' añ pa'so'cheñ

Beléñ, allara Judeo, tarro'mar Beléño eñalleta ahuať pa'tañ David. Tarro'mar Josépa' Davidna'tarca'ye. ⁵ Allempoña Josépa' ahua' epuet María o'ch quellcateneta' pa'so'cheñ. Mariápa' José o'patenaya ño'ch yore'. Allempoña Mariápa' a'chomenepa'to'. ⁶ Allempoña allo'tsa'yenet Beléño, Mariáñapa' ahuepa't' chen allempoch emare'ten. ⁷ Alla emare't, ñeñña pue'mare'tollpa' asheñorroťoll ñeñ e'ñe po'moter pa'. Epe' po'ño'mopa' alla panaťolle'ch huacshepahuo allotećma apueñet huaquesh puerrar. Nehua, tarro'mar alla emare'tos huacshepahuoña' muetsopahuopa' ama esesha' epatso e'ñe poctacma eshepena acheñ ñeñ manrra'tosets all.

Atto Yompor po'millañoťeñerpa' orrtana ñeñ cohuañpene' po'carrneror

⁸ Allempo emare'ten María all Beléño ñeñte tsaprocma allampaño'tsen ñaña ñeñ cohuañpene' po'carrneror pastemo. ⁹ Allñapa' machayotepa'tcha' orrtanet Yompor po'millañoťeñer, cha poptana'tosanet. Ñeñtpa' Yompor po'cohueña ñeñ cha a'puetarsañsahuet. Ñeñapa' atarr nanac mecha'trra'tapet. ¹⁰ Mellañoťeñña' oťosanet:

—Amach señcha'tatsetno' choña se'mñoten na, o'ch neñotatoses ñeñtcha' atarr socshaterre' sa ama't ñaña allohuen erraparen acheñeneshap. ¹¹ Te'pa' socop o' eñalleta ñeñtcha' Sa'queshpatañer seperr ñeñtpa' ñeñtcha' Cristotats ñeñt Yepartseshar yepen. Ñeñña cheshatollpa' arr eñalleta David pa'netsro allara Beléño. ¹² Te'pa' o'ch noterrser attoch seño'ch ñeñ cheshatoller. Ñeñtcha' sentos cheshatoll epareť po'ño'mo all panaťolle'teñet huacshepahuo, ñeñca'yeña Yompor Puechemer.

¹³ Allempoñapa' machayotepa'tcha' orrterrerr po'potantañ shonte' mellañoťeñnesha' ñeñt o' sohuacherrerr entot. Ñeñña mellañoťeñnesha'pa' atarr aye'choťtatosñañet Yompor. ¹⁴ Ateť otoset:

¡Aye'choťtaterrapo'ch Yeyomporer ñeñt pue'ntañ'tsen! Ama't ñaña acheñenesha' ñeñt añe patsro'tsen cosha'rrtetepa' ñamet ñeñt coshaten Yompor.

¹⁵ Allempoña mellañoťeñnesha'pa' sohuaneret ñeñt cohuañpene' po'carrneror, ñetñapa' o' ahuanerret pue'ntañ. Allempoña ñeñt cohue' po'carrnerorpa' allenta otanna'tyeset:

—Errotenuaca'yeña ñeñt otenya' Yompor. O'ch ahuey Beléño o'ch yenteña' ñeñt atet otenyeta'.

¹⁶ Allempoñapa' poma'yorñecma ahuanmuet, o'ña chapuet Beléño'pa' all entoset María ñaña José ñaña cheshatoll all panaťolle'tena huacshepahuo. ¹⁷⁻¹⁸ Allempo entoset ñetñapa' serrpare'toset ñeñt atet o' otuananeta' mellañoťeñ cheshatollecop. Allohuen ñeñt e'muene'pa' nanac cohuanrroretyeset, otanna'tyeset:

—Ta'm errotenoťte'ñaca' o' serrpare'tosña atet.

¹⁹ Mariáñapa' e'ñe ñeñta nen pueyo'chro e'ñe ñeñta coťape'chen ñeñt allpon o' entua ahuañoťeñ. ²⁰ Allempoña ñeñt cohue' po'carrnerorpa' o' ahuanerret. Ateť otenaneta' mellañoťeñnesha'pa' ñetñapa' e'ñe po'ño'ch entoset. Allpon ñeñt atet e'muet, ama't ñaña ñeñt atet entet, ñeñto'marña ñetpa' e'ñe pa'ye'choťtateñeshet ahuanerret, attoña ñetpa' atarr cohuentatnerrñañet Yompor.

Atto anmet cheshatoll Jesús Parets pa'paclo attoch a'poctateñeta' ñeñt Partsocop

²¹ Nehua, allempoña o' posocmata'muen, ñeñt asheñorroťollpa' o' tsorrataťolle'chet, ñeñtpa' atet ye'chenaña allohuen judionesha'. Allempo ñeñña cheshatollpa' o' sochet JESÚS. Nehua, ñeñt so'chñets ñeñtpa' atet otenana' mellañoťeñ María ama't ahuañmo'choťeñ allempo ama a'chomentena'.

22-24 Allempoña chap allempoch a'pochtachet ñeñt atet nane't Moisés po'ñoñ ñeñtcha' atet ye'cha' judionesha'. Ñehua, ñeñtña ñoñetspa' atet oten: "Ñerra'm esempoch chey-ore'ten coyanesha', ñerra'm asheñorr pue'maretoll ñeñt e'ñe po'moterpa' neñetepa' Part-socop." Ñaña po'poñ Moisés po'ñoñ ñeñt atet ne't, ñeñtpa' atet oten: "Muetsatenetepa' epña arot amapa' epña yepecho'ye' ñeñtcha' net Yomporecop." Ñeñto'marña allempo chap allempoch a'pochtachet Yomporecop ñeñt atet anaret po'ñoñ, ñeñtña cheshatollpa' allenta anmet Jerusaléño, allcha' a'pochtachet Yomporecop.

25-27 Allempoña chapuet Jerusaléño'pa' o' be'tososet Parets pa'paclo attoch a'pochtateneta' ñeñt atet ye'chenet ñeñt atet oten ñoñets ñeñt anaret ahuatoteñ. Allñapa' huapa pue'sheñarr yacma añ pa'so'cheñ Simeón ñeñtpa' jerusaléño'marnesha'. Tarro'marña ñapa' allempocma huapaña' ñapa' añ eñotate' Parets Puecamquëñ. Tarro'mar ñeñt acheñerpa' atarr cohuen ñeñt atarr ma'yochrenaya ñeñt cohuentetsa Yomporecop. Ñapa' ñeñt atarr cohue' esempoch huapa ñeñtcha' a'rroyataterre' israelena'tarnesha' allochñapa' o'ch alla atarr cosherret. Atto chapoña Parets Puecamquëñ ñeñtña eñotate' ñapa' amach rromuena'pa' enterrancha' Yompor Puechemer ñeñt Cristo ñeñtcha' llesenserr esempo. 28 Huaptsapa' allenta enata'tolle'tosan cheshatoll, atarr aye'chochtatosan Yompor. Ñeñtpa' atet otos: 29-30 Te'ña po'ño'ch Nompore ama'tcha' nerromapa' e'ñech nocsheñeshocmañen nerroma tarro'mar te'pa' po'ño'ch o' nenterrna' ñeñt o' pemñernay ñeñtcha' ya'queshpaterre' e'ñe atet potne't ahuañmo'choteñ na ñeñten atarr pesherbene'.

31 Ñeñtña o' porrtaterrnay allohuenacpay ñeñtey pa'nameney acheñenesacpay añe patsro.

32 Ñapa' ñach sherberrets atet ñerra'mrrate' puetare' ñeñtcha' a'puetarsamperre' allohuen acheñenesha' ama't ñeñt ama israelena'tareyaye attoch ñetpa'cho'ña o'ch eñoteret ñeñtcha' a'queshpatañterrtsa e'ñe po'ño'ch. Allochñapa' attotcha' e'ñe cohuen aye'chochtaterrna' ñaña peyochreshachno ñeñtara israelena'tarnesha'.

33 Ñeñtña pamo'mte' pen cheshatollpa' ñetñapa' atta cohua'nteñet Simeón atet eñorana'tenanet pue'maretollet. 34 O' eñorana'tuanet pue'maretolletpa' allempoñapa' enamatanet ñamet ñocpuet Yompor pa'nateña. Allempoñapa' otoñ pachor María, ñeñtpa' atet och:

—Peñoche'ch añ cheshatoll ñeñtpa' ñeñtña onañche't ahua't Yompor. Ñocoppa' shonte'ch israelena'tarnesha' ñeñtcha' ama'ame'ñerrayo ñeñtcha' chenquërrtsa. Tarraña eñall ñaña shonte' po'potantañ ñeñtcha' ame'ñerraya ñeñtcha' cohueno'tsenterrtsa. Tarro'mar Pomporpa' añecopña mueñer allochñapa' ñach eñotaterrahuet ñapa' Pomporsho' huapa. Tarraña shonte'ch acheñ ñeñtcha' achm'are'terre'. 35 Papa' ñeñtcha'ña atarr pellcaterre'ña pa. Atarrcha' atserr pe'muerr pellquëña e'ñech atet pe'muerr puellquëña atet ñerra'mrrate' cochllo patenpet peyochro. Elloña pue'sheña'tetspa' eñotaterranetcha' errotente' ñeñt atet cotape'chyenet pueyochreto.

36 Allñapa' allo'tsen ñaña pue'sheñarr coyanesha' ñeñtpa' añ pa'so'cheñ Ana ñeñtecma a'mtene' Yompor po'ñoñ. Ñapa' año' po'señ ñeñt sochetsa Fanuel, ñeñtpa' Aserna'tar.* Ñeñtña Anapa' o' atarr nanac po'nme'ten. Ñehua, allempo shopshena'pa' some'ta, e'ñe cancherr charohua ye'chañ epuet puerrollarpa' o' rromapes. 37 Ñeñtña rretorrnanesha'pa' atta correna ñapue't. O' poscoch charra' puechena pa'tats char allponmat correna atta. Ñapa' e'ñe ellapene't sherbe' Yompor ama't ñaña tsapome'tets. All Yompor pa'paclo'tpa' amach cha'nenno. All atarr ma'yochenana Yompor. Erroteno e'ñe puema'yocheno' Yomporpa' amach rreno ama't coñe'ta. 38 Ñapa'cho'ña allempocma huapa all o' chapachet cheshatoll Jesús. Ñaña' ma'yochosa, atarr parasyoso'tenan

* 2:36 Ñeñtña Aserpa' Jacob puechemer.

Yompor cheshatollecop. Ñeñto'marña ñapa' atarr serrpare'tatosan acheñenesha' ñeñt cheshatollecop tarro'mar o' huapa ñeñt atarr cohuen allohuen acheñenesha' ñeñtcha' a'qeshpatose' israelnesha' ñeñt pa'netser pene' Jerusalén.

Allempo alla puererret anetso Nazareto

³⁹ Allempoña o' a'pocstatuet ora allpon ñeñt atet anaret Yompor po'ñoño ñeñtcha' e'ñe ye'cha' judionesha' ñetña' ahuanerret pa'nyeto Nazareto allara Galileo. ⁴⁰ Cheshatollña' allo'na sen rrorranmats, allo'na sen huomencatnomuets, nanac eñotnenan ñeñt atarr cohuen enten Pompor Parets, ñeñto'marña Yomporpa' atarr muereña.

Allempo alla a'pa cheshachor Jesús Parets pa'paclo

⁴¹ Ñehua, ñeñt cheshachor pamo'mte' ñetpa' atet ye'chenet pate'tets char pascuapopa' chocmach senet Jerusaléño o'ch coshapreteneta' pascua ñeñt atet ye'chena judionesha'. ⁴² Allempo chap Jesús po'charña charra' puechena epa ahuanerretter Jerusaléño, ñetpa' atetca'ye ye'chenet. ⁴³ O'ña huañ pascuapa' ñetña' o' ahuanerret. Ñeñña cheshachor Jesús'pa' alla't a'pa Jerusaléño. Pomporña ñaña pachorpa' ama eñoteñeto o'te' alla a'pa. ⁴⁴ Cha otapuetañ añte' co'ta'nen po'potantañ ñeñt parro ona'chenet. O'ña chope'cherret pamtarrpa' allempoñapa' o' yerpueret, e'name'tyereta' pamo'tsesho'mar. E'name'tyereta' allo'tsen ñeñt e'ñe cheme'tyen pompor ñaña pachor. ⁴⁵ O'ña e'name'tuet ama es enterrayepa' o' alla ahuerret Jerusaléño. Allpa'cho' e'name'tuereterr.

⁴⁶ Poma'pamtañoña'papa' alla entereta' Parets pa'paclo. All anen e'ñe parro maestrone'sha' ñeñt atarr eñotyene' Yompor po'ñoñ ñeñt atet anaret. Jesúsña'pa' all e'mñotyenanet ñeñt atet serrpare'tyenetpa' o'ch'cho' a'p'to'tyerranet. ⁴⁷ Ñeñto'marña allohuen ñeñt e'muene'pa' cha atarr cohuanrrorteñet, otyenet:

—Erro'teno'tuañaca'yeña atarr es eñoten ñeñto'mar atarr cohuen es anapyen.

⁴⁸ Allempo enter pompor ñaña pachorpa' atta cohua'noset. Pachorña'pa' atet otos:

—¿Eso'marte'ña ne'mare o' atarr pellcatya? ¿Ama't peñoteñe atarr yellquëñesha' ye'namene'p?

⁴⁹ Ñaña'pa' otapanet:

—Eso'mare'tña se'name'tenen. Ama't se'notennoña napa' ñeñt pocetsa nocop o'ch netorreññaña ñeñt pocetsa Nomporecop.

⁵⁰ Ñetña'pa' ama es eñotaye ñeñt atet otanet.

⁵¹ Allempoñapa' o' coterran pamo'mte' o' cha'cherret Nazareto, ñapa' e'ñe cohuen ame'ñenana pompor ñaña pachor. Pachorña'pa' allohuen ñoñetspa' e'ñe eñotueñ pueyo'chro. ⁵² Jesúsña'pa' allo'na sen rrorranmats atarretnomtsa. Allo'na nanac eñotañetnena. Pomporña Parets'pa' atarr cohuen enteñ, ñaña acheñenesha'pa' atarr cohuen enteñet.

3

Allempo orrta Juan ñeñt serrpare'tosets all amayo
(Mt. 3.1-12; Mr. 1.1-8; Jn. 1.19-28)

¹ Ñehua, allempo chap allempoch añcha'tare'tta ñaña ñeñt pa'so'cheñ Tiberio all Romo. Allempo chap o' añcha'tare'tta charra' puechena amnar char allempoña Judeopa' añ añcha'tare'ttatsa ñaña Poncio Pilato. Galileoña'pa' añ añcha'tare'ttatsa Herodes. Pa'mo'nasheñña Felipe'pa' ñapa' epa anetsocop añcha'tare'tta, ñeñt'pa' arr añcha'tare'tta Iturea ñaña Traconite. Lisianasña'pa' arr añcha'tare'tta Abilino. ² Ñehua, allempo'pa' judionesha' añ po'corneshar penet Anás ñaña Caifás, ñeñt po'corneshar

pen ora allohuen cornaneshachno. Eñe ñeñte chararocma añcha'taretetyenet allemeñ anetso'mar eñe allempocma Yomporpa' eñorana'tana ñaña Juan ñeñ Zacarías puechemer ñeñ amayo'tsen. ³ Ñeño'marña Juan allempopa' o' chopeñe'chyes erracmañen Jordanaso'mar, all serrpare'tyesnom. Ñeñtpa' atet otyesnomanet:

—Te'pa' o'ch soctape'cherr eñe ello cohuen Yomporecop attoch Yomporpa' o'ch peretnerrnas allohuen so'chñar, allochñapa' o'ch sapataretterra Yomporecop.

⁴ Ñeñtpa' añ serrpare'tatosanet attoch etsoterra ñoñets ñeñ anaret ñeñ atet eñose't ahuat Isaiás ñeñ a'mñtaye't Yompor po'ñoñ. Ñeñ Isaiás po'ñoñ ñeñtpa' atet oten:

E'morrterrach puesheñarr po'ñoñ all amayo allcha'ña serrpare'taterranña acheñenesha'.

Puerranarotpa' añcha' toma'ntaterranet toñ, ñeñtpa' atetcha' oterranet: “Te'pa' o'ch sa'cohuenetyes toñ allcha' oñmos Partsesha', o'ch eñe sa'pañcharretyesoñ pa'teñ.

⁵ All rrapatse'tyen patspa' o'ch eñe sa'muepñetyes, all pocmo'yaretyenapa' o'ch eñe sa'muepñetuahue, all terepe'pañaretyenapa' o'ch eñe sa'pañcharretyes, all arrorotetyena toñpa' o'ch eñe sepampa'huahue.

⁶ Allempoña allohuen acheñenesha'pa' enteretcha' ñeñ o' mueñerrmay Yompor ñeñtcha' ya'queshpaterre'.” Arrpa' allohua ñeñ atet aquellcare't ahuatoteñ Cristocop.

⁷ Allempoñapa' shonte' acheñenesha' hua'cha'tet Juanesho. Ñetpa' tarro'mar hua'chenet añ muenenet o'ch apatapanet Juan Yomporecop. Juanña serrpare'tatapanetpa' otapanet:

—Sapa' ama cohuenayayso atarr ashcarñañes, cha sottena ñerra'mrrate' shechpa sompor sepen. Po'ño'chca' ama eseshaye' sotenaye eñech sapatareteñoña o'ch sequeshperra allochñapa' amach coñchatuerrso Yompor allempoch yoro'chtatuer tsapatonet. ⁸ Napa' añcha'ña notapas o'ch sorratyes ñeñ eñe cohuen enten Yompor ñeñ atet pena ñeñ po'ño'ch o' cotape'cherran ello cohuen Yomporecop. Sapa' cha soteneñ seyo'chro año' es sepallteno sapa' año' eñe seyemtena satañ Abraham. Tarraña napa' o'ch notas amach atet soctape'chatsto tarro'mar ñeñtpa' ama esoye' enteñe Yompor. Tarro'mar o'ch notas ñerra'm Yompor muenetseñ ama't añ mapue' ñeñ senten arr o'ch a'pnasereñ Abraham po'm'reneñ. ⁹ Ñeño'marña napa' o'ch notas ñerra'm amach soctape'cherro cohuen Yomporecop o' mamesha'ña o'ch chaponasa attoch coñchaterres Yompor. O'ch netma'ntatasa atet ñerra'mrrate' allempo o'ch a'matamochet tsach. O' eñe onañchachet gach allcha' tet eñe allohua huañen puepallactar. Ñeñ allohuen tsache'chno ñeñ ama cohuenaye' me'tetsopa' a'mata'tueretcha' saprochetcha' all huorten tso' allcha' eñe a'poyatatueret.

¹⁰ Allempoña acheñenesha'pa' a'p'to'tyeset Juan, ochet:

—Ñehua, ¿eso'tña poctetsaña yocop attoch eñe yorrtatyes ñeñ cohuentetsa Yomporecop?

¹¹ Ñañapa' anapanetpa' otanet:

—Ñerra'm eseshas echene' epma seshtam o'ch sañ ñeñ ama echenaye ñeñtcha' chorrena. Ñaña ñerra'm eseshas echene' serrar o'ch sañ ñeñ ama echenaye ñeñtcha' rrenet.

¹² Allempoña hua'cha'ta ñaña acheñenesha' ñeñ po'taruas pene' atto cobrenan acheñenesha' quelle ñeñ gobiernocop. Ñetpa'cho'ña añecop huenet Juanesho o'ch apatarettet Yomporecop. Ñetpa'cho'ña o' a'p'to'toset Juan, atet otoset:

—Yocop Nomporka' ¿eso'tña poctetsa attoch yorrtatyes yamña ñeñ cohuentetsa Yomporecop?

¹³ Ñañapa' anapanetpa' atet otanet:

—Ñeñt allpon quelle ñeñt e'ñe allpona enamuen gobiernopa' e'ñech allpona seco-breña acheñenesha', amachña allo'na atarr aton secobra'neñe acheñenesha' quelle ñeñt e'ñech socpa'na.

¹⁴ Allempoña patantarr guardianesha' ñeñt allo'tsa'yenpa' a'p̄to'toset ñamet, ñetpa' atet otet:

—Yocoppa'cho'ña ¿eso'tña poctetsa ñeñtcha' attoch yorrtatyes yaña ñeñt cohuentetsa Yomporecop?

Ñaña anapanetpa' atet otanet:

—Sapa' amach es seprratam̄psatsche acheñenesha' e'ñe se'mueñocma ñaña sa'metam̄peño' e'ñe seshquëño'pa'cho'ña amach es seprratam̄psatsto e'ñe attota. Ñaña ñeñt allpon tsa'tenset gobierneshotpa' e'ñepa'chña ñeñta cohuen socshena.

¹⁵ Acheñenesha'ñapa' atta cohueñet, pueyoçhretoñapa' atta cotape'chyenet cha ote-napuetañ Juanpa' ñeñt'e'ña Cristotets ñeñt cohuenet ahuatoteñ ñeñtcha' mueñerranet Yompor. ¹⁶ Juanñapa' atet otanet:

—Napa' ama añeyayno ñeñt Cristotets, tarro'mar napa' ama't napatensoñ Yomporecop e'ñe oñochaya napatenes. Tarraña Cristo ñeñtcha' huapatsa chenta'pa' ñapa' añcha'ña chorratossa Parets Puecamquëñ ñeñt atet ñerra'm tso'. Ñapa' ñeñt atarr ahuamencatesha', nañapa' ama tama ahuamencateyayno. Ñapa' ñeñtña atarr sherbets, nañapa' ama es nesherbeno attoch ama't po'sapatrechapa' o'ch nepyoñ.* ¹⁷ Ñapa' atarr ahuamencat, ñapa' ñach acrerre' allohuen acheñenesha'. Ñapa' añ toma'tena ñeñt orrene' puehoshnat alloch shoshnan po'trigo o'ch e'ñe pue'llom̄rochayaña. Ñeñtña pue'llomerpa' o'ch a'yapache' o'ch añño'ch allecma añño'teñ e'ñe cohuen. Pue'she'marñapa' o'ch huapore'ch tso allcha' e'ñe poyhua. Ñeñtña tso'pa' ama emaya'pahuo ama't errponaña.

¹⁸ Juanña allpa' atet serrpare'tatyenonet cohuen ñoñets ñeñt huetsa Yomporeshot alloch yequeshperra. Ellonetñapa' shonte' pa'namen serrpare'tatan acheñenesha' ñeñt ama pocteye' enteno Yompor.

Allempo apatare'tta Jesús Yomporecop

(Mt. 3.13-17; Mr. 1.9-11)

¹⁹⁻²² Allempoña o' atarr apatare'tta shonte' acheñenesha' Yomporecoppa' cho apatare'ttatsa ñaña Jesús. E'ñe apatare'tetuatsapa' o' ma'yocha. Allempoña ma'yochenapa' enetñapa' ahuepa't atorare'tta. Allo'tña e'ñe sohua'nma Parets Puecamquëñ e'ñe atet entapet ñerra'mrate' yeḡ o' sohua'nma ento'. E'ñe arr chap Jesúsesho. Cha e'morrtatsa ñoñets ento' atet eñorena Yompor. Ñeñtña ñoñetspa' atet oten:

—Papa' ñeñteḡ Nechemereḡ ñeñteḡ atarr nemorrentena, pa atarr nanac nocshatene'.

Allempoña añcha'tare't Herodespa' o' yottam̄psatan Juan tarro'mar Juanpa' eñotach ama pocteye' enteñe ñeñt atet patse'tyena. Ama't pa'mo'nasheñ Felipe puetaporpa' o' yoram̄per. Ama't shonte' pa'namen ñeñt atet patse'tyena Herodespa' elloñapa' o'cho' yottam̄psaterranerr ñaña Juan.

Arrpa' all aquellcare't allohuen pa'so'chñe'chno ñeñt pa'tañneshañ pen Jesús

(Mt. 1.1-17)

²³ Ñehua, Jesúsapa' allempo orrta o' torra'mochana ñeñt po'taruas pen Pomporecop, allempoña po'charñapa' ñato' o'te' chap ma'poch charra' char. Acheñenesha'ñapa' añña pompor pateñet ñeñt José. Ñehua, Josépa' Elí puechemer, ²⁴ Elípa' Matat puechemer, Matatpa' Leví puechemer, Levípa' Melqui puechemer, Melquipa' Jana puechemer, Janapa' José puechemer, ²⁵ Josépa' Matatías puechemer, Matatíaspa' Amós puechemer, Amósapa' Nahum puechemer, Nahumpa' Esli puechemer, Esliapa' Nagai

* **3:16** Ñeñt atet po'taruas pe't ahuat esclavos o'ch pueyan pamo'mte' po'sapatrech.

puechemer, ²⁶ Nagaipa' Maat puechemer, Maatpa' Matatías puechemer, Matatíaspa' Semei puechemer, Semeipa' José puechemer, Josépa' Judá puechemer. ²⁷ Judápa' Joana puechemer, Joanapa' Resa puechemer, Resapa' Zorobabel puechemer, Zorobabelpa' Salatiel puechemer, Salatielpa' Neri puechemer, ²⁸ Neripa' Melqui puechemer, Melquipa' Adi puechemer, Adipa' Cosam puechemer, Cosampa' Elmodam puechemer, Elmodampa' Er puechemer, ²⁹ Erpa' Josué puechemer, Josuépa' Eliezer puechemer, Eliezerpa' Jorim puechemer, Jorimpa' Matat puechemer, ³⁰ Matatpa' Leví puechemer, Levípa' Simeón puechemer, Simeónpa' Judá puechemer, Judápa' José puechemer, Josépa' Jonán puechemer, Jonánpa' Eliaquim puechemer, ³¹ Eliaquimpa' Melea puechemer, Meleapa' Mainán puechemer, Mainánpa' Matata puechemer, Matatapa' Natán puechemer, ³² Natánpa' David puechemer, Davidpa' Isaí puechemer, Isaípa' Obed puechemer, Obedpa' Booz puechemer, Boozpa' Salmón puechemer, Salmónpa' Naasón puechemer, ³³ Naasónpa' Aminadab puechemer, Aminadabpa' Aram puechemer, Arampa' Esrom puechemer, Esrompa' Fares puechemer, Farespa' Judá puechemer, ³⁴ Judápa' Jacob puechemer, Jacobpa' Isaac puechemer, Isaacpa' Abraham puechemer, Abrahampa' Taré puechemer, Tarépa' Nacor puechemer, ³⁵ Nacorpora' Serug puechemer, Serugpa' Ragau puechemer, Ragaupa' Peleg puechemer, Pelegpa' Heber puechemer, Heberpa' Sala puechemer, ³⁶ Salapa' Cainán puechemer, Cainánpa' Arfaxad puechemer, Arfaxadpa' Sem puechemer, Sempa' Noé puechemer, Noépa' Lamec puechemer, ³⁷ Lamecpa' Matusalén puechemer, Matusalénpa' Enoc puechemer, Enocpa' Jared puechemer, Jaredpa' Mahalaleel puechemer, Mahalaleelpa' Cainán puechemer, ³⁸ Cainánpa' Enós puechemer, Enóspa' Set puechemer, Setpa' Adán puechemer, Adánpa' Yompor puechemer.

4

Allempo oneñétpa' topatenan Jesús, mueneñ o'ch atet p̄atan Jesús ñeñt̄ ama pocteye' enteno Yompor

(Mt. 4.1-11; Mr. 1.12-13)

¹ Allempoña Jesúsapa' o' err Jordanasot̄. Ñañaapa' añ e'ñe chorrenaya Parets Puecamquēñ ñeñt̄ña anmue'ña all amayo. ² Attoña allpa' o' huapoña oneñet̄, mueneñ o'ch atet p̄atyēs ñeñt̄ ama pocteye' enteno Pompor. Allñapa' ama rreno e'ñe añña torrena attoch etsotuan ora allohuen ñeñt̄ cohuentetsa Pomporcop. Ñeñto'marña ama't o' pa'tatsoch çharramatpa' ama't coñe'tapa' ama es rreno. O'ña pa'tatsoch çharramatuapa' çho cheporratsa.

³ Allempoña oneñet̄ atto topatosan Jesúsapa' atet otos:

—Pa ñerra'm po'ñoçhte' Parets Puechemerep̄pa' o'ch p̄ot: Añ mapue' puenasepa' pan.

⁴ Jesúsñapa' atet otaḗ:

—Napa' ama nemno o'ch atet neḗa tarro'mar Yompor po'ñoñ ñeñt̄ anuaret̄ ahuatoteñ ñeñt̄pa' atet oteneý: “Allohueney acheñeneseshohueneypa' ama e'ñe rreñtsa ñapueḗ yocran̄ yepeno. Añe'ñaña yocran̄ yepen yecamquēñecop ñeñt̄ allohuen allpon oteneý Yompor.”

⁵ Allempoña oneñet̄pa' o' anem̄ all atarr aspen̄to e'ñe a'noso. Alloñña gatyēsuererr allohuen ñeñt̄ allpon all am̄cha'taretetyena pa'namen acheñenesha' ñeñt̄ yeçha'yetsa errap̄aren añe patsro. Alloñña ama't mamesha cohuospa' e'ñe orre'tuena erracmañen.

⁶⁻⁷ Oneñet̄ñapa' alla oterranerr Jesús:

—Ora allohuen ñeñt̄ o' pentyesua ñeñt̄pa' e'ñe nocma tarro'mar ñeñt̄pa' na aparet̄. Ñerra'm esesha' nemnen o'ch naḗpa' napa' naḗcha'ca'ye. Ñeñto'mar te'pa' o'ch no-taḗ, ñerra'm na pema'yocheñoḗten o'ch peconcorpana'tna, napa' napaḗcha' ora all am̄cha'taretetyenet all atarr cohuentatyēnet, e'ñe ora allohuen ñeñt̄pa' e'ñech p̄ocma.

⁸ Jesúsñapa' alla otererr:

—Te'pa' o'ch orrerreḡ oneñeḡe. Napa' ama nemno o'ch atet neḡa tarro'mar Yompor po'ñoñ ñeñḡ anuaret ñeñḡpa' atet oteney: “Añach ñapueḡ yema'yochena Yeyomporer ñeñḡ Yepartseshar yepen, e'ñech ñapḡa yesherbe'.”

⁹ Allempoña oneñeḡpa' o' anerranerr Jesús Jerusaléño. Allñapa' a'tapatos nanac eno allohuanen Parets pa'paquell. Allñapa' otuererr:

—Papa' ñerra'm po'ñoḡhte' Parets Puechemereḡ te'pa' ḡomacha arrot tarro'mar amach ḡa'tserrḡo ¹⁰ tarro'mar Parets po'ñoñ ñeñḡ anuaret ñeñḡpa' ama'tña atet oten: Yomporpa' o'ch mueñonaḡ po'millañoḡeñrenesha' ñeñḡcha' pecuañḡsapue'.

¹¹ Ñetcha' ḡagapapuet o'ch enatapapet attoch amach ḡa'tserrḡatca'toso mapyo.

¹² Allempoña Jesúsapa' alla otererr:

—Añpa'cho'ña anuaret Yompor po'ñoño, ñeñḡpa' atet oten: “Amach ya'llocchame'tatsche Yeyomporer ñeñḡ Yepartseshar yepen.”

¹³ Allempoña oneñeḡ topatuahuan Jesús pa'namenotpa' o' ahuerr o' caḡhpa'ner allponmat tarro'mar oneñeḡ ḡhocma topach.

*Allempo e'ñe ñenmaḡ torrena Jesús Partsocop all Galileo
(Mt. 4.12-17; Mr. 1.14-15)*

¹⁴ Allempoña Jesúsapa' o' alla ahuerr Galileo. Ñapa' añ atarr ahuamencat pene' Parets Puecamquēñ. Erraḡaren Galileo'mar o' e'ñe e'mare'tuet ñeñḡ atet ḡa'yena Jesús. ¹⁵ All apḡha'yena judionesha' po'prahuetopa' ñañapa' all yeḡhatyenamet. Attoña allohuen acheñenesha'pa' atarr cohuen enteñet.

*Allempo serrpare'tatan Jesús acheñenesha' all Nazareto
(Mt. 13.53-58; Mr. 6.1-6)*

¹⁶ Atteñapa' o' alla ḡherr Nazareto all yeḡchache't pompor allempo cheshena'. Pamḡarrña allempo ḡhap yeḡ allempo ḡhocma amesen judionesha', Jesúsñapa' o' ahuo' judionesha' po'prahuo, ñapa'cho' atet yeḡhena. O' ḡhap puerahuopa' allñapa' tomos allcha' lleyatan acheñenesha' Yompor po'ñoñ. ¹⁷ Allñapa' añ apēt libro ñeñḡ allo'tsen Isaías po'ñoñ ñeñḡ a'mḡtaye't Yompor po'ñoñ ahuat. Ñañapa' toran libropa' all entan ñoñets ñeñḡ atet aquellcareḡ ñocop, ñeñḡñapa' atet oten:

¹⁸ Napa' añ nechorrenaya Nompor Puecamquēñ tarro'mar ña nellsense' nach serrpare'taterre' ora allohuen acheñenesha' ñeñḡ atarr es palltetsa. Napa' añcha' neñotaterranet cohuen ñoñets ñeñḡpa' alloch queshperret. Ñaña añecopña llesenserren attoch nach a'crratyerre' allohuen ñeñḡ mueroḡhetyetsa puellquēñoḡ pueyoḡhreto. Nach eñotaterre' ñaña ñeñḡ ayottamḡsaretetyetsa allochñapa' o'ch atoramḡsaretterret. Nach eñotaterre' ñaña ñeñḡ ama entetso allochñapa' o'ch enterret. Ñaña ñeñḡ amueroḡhtataretetyetsa nachña a'rroyataterrahuet.

¹⁹ Ñaña napa' añecopña llesenserren nach eñotaterrahuet te'pa' o' ḡhap allempo pocte' enteñ Yompor o'ch atarr orrtaterranet puemuereña. Ñehua, arrpa' allohua ñeñḡ allpon lleyatanet Isaías po'ñoñ.

²⁰ O' lleyatuanetpa' o' alla e'tamḡperran libro apuerran ñeñḡ sherbets all puerahuo. Allempoñapa' o' alla anorruerr. Allohuenña acheñenesha' ñeñḡ puerahuo'tsa'yen ñetñapa' atarr cohuanrrorteñet Jesús. ²¹ Ñañapa' atet otanet:

—Atto' o' se'mhua añ ñoñetspa' te'ñapa' o' e'ñe ḡherr attoch e'ñe etsoterra ñeñḡ atet aquellcareḡ ahuatoteñ.

²² Allohuenña acheñenesha'pa' e'ñe cohuen eñora'yenet Jesúsocop. Atarr coḡhnesha' enteññañet po'ñoñ ñeñḡ atet serrpare'tatyenanet. Ñetñapa' atet otanna'tyenet:

—Errotenotuañaca'yeña atarr cochneshare' serrpare'tatyeney. Ñapa' añaca'ye José puechemer.

²³ Jesúsñapa' atet oterraneterr:

—Sapa' ñeñt atet o' se'mare'ton ñeñt atet norrtatyena' ahuaña Capernaumo te'ña sapa' cha semneñ o'ch soten añ ñoñets ñeñtecma muene' yotannena ama't ahuañoteñ: “Pa ñeñteḡ a'crratañtetsa te'pa' o'ch ḡa'crrata e'ñe ḡañeña”, tarro'mar sapa' añte' semnen o'ch atet norrtat ñaña arr cohuen e'ñe ya ya'netsro atet norrtatena' ahuaña Capernaumo.

²⁴ Tarraña napa' po'ñoçh o'ch notas:

—Ñeñt a'mtene' Yompor po'ñoñ ama't puesheñarra ama eñalleña ñeñt e'ñe cohuen enten allohuen pamo'tsesha' ñeñt parro yeçhenet all e'ñe ñet pa'netsreto. ²⁵⁻²⁶ Napa' po'ñoçh te'pa' añcha' neyerpatasa ñeñt atet pe't Elías ñeñt a'mtaye't Yompor po'ñoñ ahuañ. Ñehua, allempopa' o' ma'pa char ñaña po'poñ pueshmet charpa' nanac chares ama't mameshapa' ama huatenno ñeñto'marña orrta muecheñets erracmañen all anetso ñeñt Israel all yeche't Elías. Ñaña ama't shonteñ israelena'tar ñeñt rretorraneshatyets allempo, tarraña Yomporñapa' ama alleye' mueñanoña Elías attoch yenposan ama't puesheñarra rretorranesha' ñeñt e'ñe pamo'ts pen ña. Arra mueñe po'poñ anetso ñeñt pa'so'cheñ Sarepta ñeñt allara Sidón allo'tsen puesheñarr rretorranesha', ñañaapa' ñeñta yenpos. ²⁷ Elloña o'ch alla neyerpaterrser po'poñ ñeñt atet pe't ñaña Eliseo, ñapa'cho'ña ñeñt a'mtaye't Yompor po'ñoñ ahuañ. Ñehua, allempopa' shonte' israelena'tarnesha' ñeñt osyen puetsarñats ñeñt otenet lepra all anetso Israel all yeche't Eliseo. Tarraña ama't atteñ ama't puesheñarroḡapa' ama a'crratereña Eliseo e'ñe all Israelo. Ñapa' añ a'crraterr ñeñt po'poñena'tar acheñ ñeñtpa' añ pa'so'cheñ Naamán ñeñtpa' po'poñ anetso'marnesha'; ñeñt pa'netser penpa' añ pa'so'cheñ Siria.

²⁸ Acheñenesha'ña allempo e'met ñeñt atet yerpatanet Jesúsapa' ñeñtña atarr atsrre'matahuet allohuenet ñeñt puerahuo'tsa'yen. ²⁹ Ñetña tantrra'tetpa' o' mueño'teret allot pa'netsretoḡ. Cheta'neret, allotpa' arr anmet allohua huañen pocoll allot e'ñe atseretena allcha' huapore'chet attoch muetsatachet. ³⁰ Tarraña ama't huapore'chetañ, Jesúsñapa' o' chope'chnerr ama't all shontena acheñenesha'. Ñañaapa' all cheta'tnerra rroçhopa' o' ahuerr.

Allempo Jesúsapa' entaḡ puesheñarr yacma ñeñt chorrena oneñt
(Mr. 1.21-28)

³¹ Allempoñapa' o' alla ahuerrerr anetso Capernaumo allara Galilea. Pamḡarrña allempo çhap yeḡñats allempo amesen judionesha' ñañaapa' o' ahua' po'prahuetto. Allñaapa' yeçhatyenosan acheñenesha'. ³² Ñeñt atet yeçhatenanet, acheñenesha'ñapa' atta cohuanrrorteñet. Tarro'mar ñapa' atet yeçhatenanet ñerra'mrrate' ñeñt allsensaretetsa Partseshoḡ.

³³ Puesheñarrña yacma ñeñt allo'tsen puerahuo, ñeñtñaapa' añ chorrenaya oneñt. Ñaña rranare'tapa' atet otapan Jesús:

³⁴ —¿Eso'mare'tcha'ña erroḡ peḡosey Jesúsno, ḡa ñeñteḡ nazareto'marneshapḡ? Añecopḡe' pehuapa o'ch ḡa'chencaterrey. Napa' o' neñotapaḡ. Papa' atarr Partsoḡ añ pellsensene' Pompor ñeñt atarr nanac Parets.

³⁵ Tarraña Jesúsapa' ama muenache o'ch eñorana'cha. Ñañaapa' atet och:

—Pemma, te'pa' çhoḡaña caçhpa'nerre'ña añ acheñer.

Oneñeññaapa' cha atanman yacmapa' alla o'shshe'ma e'ñe all shontena allohuen acheñenesha'. Allempoñapa' o' caçhpa'ner e'ñe atta, ama erroḡ ḡa'nme.

³⁶ Acheñenesha'ñapa' cha atarr toratsḡpanet pueyoçhret. Ñetñaapa' atet otanna'tyeset:

—Ta'mca'ye, erro'tente'ca'yeña Jesús po'ñoñ, atarrepa't huomenc po'ñoñ pen. E'ñe atet ñerra'mrrate' ñeñt allsensarettetsa ñeñt atarr ahuamencatesha'. Ama't oneñe erro't otenpa' atet'cho' p'ateñ. Po'ñoñca'ye te'pa' o' cha'nerr oneñe't.

³⁷ Allempoña'p' erracmañen allampaño'mar serrpare'tyeset ñeñt atet pena Jesús.

Allempo a'crratosan Jesús Simón Pedro pa'so'mue

(Mt. 8.14-15; Mr. 1.29-31)

³⁸ Allempoña Jesús'pa' cha'nerr puerahuot o' ahuo' ñaña Simón pa'paclo. Allña Simón pa'so'muepa' cha'atsna'ten, cha'atarr nanac hueraten. Otapet Jesús:

—Te'yapa'yemneñ o'ch pa'crratos'atsnañe't.

³⁹ Allempoña Jesús'pa' o' ponmosana'atsnañe'tpa' cha'a'huaña'mp'sose'ña po'urateña. Allempoña o' metua po'urateña'pa' allenta tanta o' agapapanet e'ñe cohuen o'yema'tapanet.

Allempo Jesús'pa' a'crraterran shonte'pa'namen'atsnañe'te'chno

(Mt. 8.16-17; Mr. 1.32-34)

⁴⁰ Ñeñte yetrocma allempo o' emuena'atsne'pa' acheñenesha'ña allohuenet ñeñt'atsna'tyets pamo'tsesha' ñetña'pa' o' huapatyenesnet'atsnañe't e'ñe Jesúsesho. Ñaña'pa' na'yepapanet pot ñesheto puesheña'ttset, attoña a'crratyepapanet allohuenet. ⁴¹ Ñaña shonte'acheñenesha' ca'chpatatyepapanet oneñe't ñeñt puerranaro't otnomue' Jesús:

—Papa' ñeñte'p' e'ñe po'ñoñ Parets Puechemere'p'.

Tarraña Jesús'pa' a'mtsoñeñtanet, ama muenataneto o'ch eñorana'tnomet, tarro'mar ñetpa' e'ñe eñotnomet ñapa' ñeñt Cristotets.

Allempo Jesús'pa' serrpare'tatyeshoman'acheñenesha' erraparen Galileo'mar

(Mr. 1.35-39)

⁴² Tsapaña o' puetarenpa' Jesús'ña'pa' ahua'muen a'yo all ama'acheñempaño'yaye. Acheñenesha'ña'pa' e'name'ta'mueñet. Atteña'pa' o' chapa'muenet allo'tsen Jesús. Ñetña'pa' ama mueneñeto o'ch erra sa'nmanet. ⁴³ Ñaña'pa' atet otapanet:

—Napa' añ poctetsa nocop o'ch ahuen po'poñ anetso'mar, allpa'cho'ña o'ch neserrpare'tatyeshomanet ñeñt cohuen ñoñets, o'ch neñotatyeshomanet Yompor po'cohuenña ñeñt attoch ayochreshattena ña, tarro'mar napa' ñeñte'copña llesenserren Nompor.

⁴⁴ Atteña'pa' o' serrpare'tatyeshoman'acheñenesha' erraparen Galileo'mar all ap'cha'yenet po'prahueto.

5

Atto Jesús rromatosanet shonte'cac

(Mt. 4.18-22; Mr. 1.16-20)

¹ Allempoña po'pocheño Jesús'ña'pa' e'ñe sa'patopño ten, ñeñtña sa'ppa' añ pa'so'cheñ Genesaretas. Allña'pa' hua'cha'toña shonte'acheñenesha' o' cha'echta'tatse'tanna'toset. Attoña ama't Jesús'pa' o'cha'echta'toset. Ñetpa' añ muenenet o'ch e'mñotosñañet Yompor po'ñoñ. ² Jesús'ña'pa' all entosan epna noñt e'ñe all sohua'puetso. Ñeñtña po'taruas pene' ñeñt rremuene' cacpa' ñetña'pa' ama po'noñto'tsa'yeneto. Ñetpa' o' ahuanmuet a'yene't allcha' tsama'teneta' po'terraya. ³ Jesús'ña' allpa' a'tapos puenarr noñto, ñeñt Simón po'noñt. A'tapospa' otan Simón:

—Pechtam'psen mame' rro'cha'sone't.

Jesús'ña' anorros noñtopa' allotña ye'chatosan allohuen'acheñenesha'. ⁴ Allempoña serrpare'tatuanet, o' alla oterranerr Simón:

—Te'pa' o'ch ahue'p' rro'cha'sone't epopa' o'ch alla peterrayerrerr, te'pa' perrma'ch shonte'cac.

⁵ Simón'ña'pa' atet och:

—Yapa' o' Maestrocha' e'ñe yarepen torratta terrayats e'ñe orrena ama't parra cac ama yerrmueñe. Te'ña p'aca' notene' o'ch alla neterrayererr ama'tpa' atetcha' nepa o'ch alla neterrayererr.

⁶ Allempoñapa' atetcho' pet, o' alla terrayerreterr. Terrayañapa' shonte' rroman cac nanac aton, cha muene' rrarre'tatan terraya. ⁷ Atteñapa' agochet po'potantañ pamo'tset ñeñt' po'noñto'tsa'yen o'ch huapuet ñeñt'cha' rromapretahuet cac. O'ña chapuet o' esha'tanatet cac noñto e'ñe epno'mar chorreres cac noñto, cha muene' esha'tatan noñt'. ⁸ Allempoña atet eñch Simón Pedro ñaña' poma'yorñecma ponmana Jesús, concorposa pa'rrpoñ, all otos:

—Amach Partseshacha' allo'na peyematsetnenno tarro'mar napa' ñeñten atarr ochñañen.

⁹ Atet otan Jesús pueyorñoñ tarro'mar eñoteñ ñeñt' atto rreman shonte' cacpa' Parets atet patene'. Ama't allohuen ñaña ñeñt' epuet taruasenetpa' atarr nanac yorenet.

¹⁰ Ama't ñaña Jacobo ñaña Juan ñeñt' Zebedeo puechemerasha' ñeñt' parro taruasen Simón, atarr nanac yorenet. Allempoña Jesús'pa' atet oterranerr Simón:

—Amach cha peyorenatsto. Ñeñt' atet pepena ahuañoteñ e'ne' cac te'ñapa' atetcha' peperra e'nerre' ñaña acheñ ñeñt'cha' pame'ñaterra.

¹¹ Allempoñapa' ahuañperret o'ch etsotuerret allecma etsotenet. Ñetñapa' allem-pocma sohuanmuet allohuen ñeñt' allpon echyenet. Allempoñapa' coteret Jesús attoch pueyochresha' perranet.

Atto Jesús a'crraterran puesheñarr yacma ñeñt' aptsarñat
(Mt. 8.1-4; Mr. 1.40-45)

¹² Allempo po'pocheño Jesúsñapa' alla cherrerr po'poñ anetso. Allñapa' huapoña puesheñarr yacma ñeñt' osen puetsarñats ñeñt' otenet lepra, atarr apoçhtateñ. Entosan Jesús'pa' alla rromañpsosya. Allña rromuenapa' allotña enamosan Jesús, atet otos:

—Ayochreshate ñerra'm pa muenatspa' pa ñeñtep' atarr ahuañencateshap' pa'crrataye'cherren allochñapa' attoch e'ñe cohuen entuerren acheñenesha'.

¹³ Jesúsña anretapa' allenta a'p'le', atet och:

—Napa' nemneñca'ye, metuerrepa'ña peptsarña attoch e'ñe cohuen enterrep' allohuen acheñenesha'.

Yacmañapa' allorocma metuer pueptsarña. ¹⁴ Jesúsñapa' alla otererr:

—Te' atto o' na'crraterreppa' ama't e'ñe puesheñarrapa' amach potap'sa'tatsche. Corneshachña pegatena' all peptsarse't. Atet nane't Moisés ñoñets añ acheñrecop ñeñt'cha' a'crratare'tterrtsapa' te'ñapa' o'ch es panom ñeñt'cha' p'apos all ñeñt' Yomporecop. Allochñapa' attoch e'ñe cohuen enterrep' allohuen acheñenesha'.

¹⁵ Elloña atarr nanac serrpare'tyeñet, o' erracmañen epa'hua atto' pena Jesús. Ñeñto'marña shonte' acheñenesha' huacha'toñet attoch e'mñotoñet po'ñoñ ñaña attoch a'crratyesapanet allohuen pa'tsanañeteret. ¹⁶ Tarraña ñapa' errotenopa' o'ch ahuer a'yo all ama acheñempaño'oyaye allcha' ma'yochena.

Atto Jesús a'crraterran ñaña ñeñt' echarraña
(Mt. 9.1-8; Mr. 2.1-12)

¹⁷ Po'pocheño allempo Jesús'pa' all yeçhaterranerr shonte' acheñenesha', allña allpononetpa' all anorrcha'tyen ñaña patantarr fariseonesha' ñaña ñeñt' atarr etsotayenayeñ ñoñets ñeñt' atet anaret judioneshacop. Ñetpa' pa'namen anetsoñ huacha'tyenet—Galileoñ ñaña Judeoñ ñaña Jerusaléñoñ. Jesúsñapa' atarr ahuañencat'peñ Pompor, attoña a'crratyesan shonte' ñeñt' atsna'tyets. ¹⁸ Atteña o' huapatoñet ñaña echarraña, huapatam'pset puechecna'poñ. Ñetpa' añ muenenetañ o'ch be'toset o'ch e'ñe noset Jesúsesho. ¹⁹ Tarraña shonte' acheñenesha' ñeñto'marña ama eshcaye'

abeʔosetoña atsnañeñ attoch çhapachet e'ñe Jesúsesho. Atteñapa' a'tapatoset enoʔ pocollato. Allñapa' o' a'rrote'toset pateprarr echet allotña a'suatam̄pset echarraña puechecnape'na. Attoña çhapachet e'ñe rrocho allo'tsen Jesús. ²⁰ Jesúsñapa' eñotapanet ñetpa' atarr nanac yemteñet, ñeñto'marña atet otapan echarraña:

—Masheñcha' te'ña pa' p̄o'chñarpa' o' a'pretna'huareta.

²¹ Otue' atetpa' añña fariseonesha' ñaña ñeñt atarr etsotayenayeñ ñoñets ñeñt atet anaret judioneshacop, ñetñapa' otatse'tet ñañeñeta:

—Esesha'huañaca'ye o' achñare'tanña Yompor. Arr patsropa' ama't puesheñarra ama eñalleña ñeñt peretnene' ochñarets, ñaptaña Yompor peretnene' ochñarets.

²² Jesúsñapa' eñotanet ñeñt atet otenet ñocop, ñañaapa' atet otanet:

—Sapa' eso'mare'tcha'ña atet soctape'chatse'tyesña seyoçhro. ²³ Ñehua, sapa' cha soten ñeñt atet o' notue echarraña po'chñarpa' o' a'pretna'huareta, ñeñtpa' ama torrapahuoyaye. Sapa' añña atarr torrapo' senten attoch na'crrater çhoncha'ña ote': "Petantena, pechope'chñen." ²⁴ Ñehua, napa' o'ch neñotatas na Ñeñten Acheñetosets, napa' aparetan llesens attoch nach peretnerre' ochñarets añ patsro.

Ñeñto'marña Jesús allempopa' atet otan echarraña:

—Te'ña napa' o'ch notap̄: Petantena, peçhta'nen pemue' o'ch pechope'chñen, ahuenep̄ pepaclo.

²⁵ E'ñe otue' atetpa' echarrañañapa' cha tantetsa e'ñe allorocma. Allohuenña acheñenesha' e'ñe entueñet. O' cheta'nenan po'mue' pa'ye'choçhtateñesha' Yompor o' ahuen pa'paclo. ²⁶ Allohuenña acheñenesha'pa' cha atarr cohuanrrortapueñet. Attoña ñetpa'çho'ña atarr cohuentatyeññañet Yompor. Allohuenetñapa' atarr nanac yorennet, atet otyenet:

—Te'pa' o' yenterr ñeñt ama't ahua'tapa' ama yentareña ya ñeñt atarr cohuen.

*Allempo Jesúsapa' hua'ña'nman Leví attoch pueyochresha' per
(Mt. 9.9-13; Mr. 2.13-17)*

²⁷ Allempoñapa' o' ahuererrr Jesús. All oñempa' all entnoman puesheñarr ñeñt po'taruas pene' o'ch cobrenan acheñenesha' quelle ñeñt gobiernocop. Ñeñtñapa' añ pa'so'cheñ Leví*. Alla anen allecma apçhenet quelle ñeñt gobiernocop. Jesúsñapa' otosan Leví:

—Te'pa' p̄oçta'n attoch neyochresha' nepperrē.

²⁸ E'ñe otue' atet Levíñapa' cha tantnomtsa o' coñan Jesús. Attoña ñapa' e'ñe sohuanman ñeñt allohuen pa'namen.

²⁹ Allempoñapa' çhapa'muen ñaña pamtarr allempo Leví pa'paclopa' yeçcatatan shonte' rreñets attoch coshame'tam̄pesyet Jesús. All rrallme'chapreteñ shonte' acheñenesha'. Allo'tsa'yen ñaña ñeñt parro yemtena Leví. Ñetpa'çho'ña ñeñtareta ñeñt po'taruas penet o'ch cobra'yeñet acheñenesha' quelle ñeñt gobiernocop, tarraña ñetpa' puehquẽño'te'na cobreñet acheñenesha' aton. Ñeñt rrallme'chapretene' Jesús. ³⁰ Fariseonesha' ñaña ñeñt atarr etsotayenayeñ ñoñets ñeñt atet anaret, ñetñapa' sasare'teññañet Jesús pueyochresha'. Atteñapa' otaretet:

—Ta'm, eso'marte'ña serrallme'chapreteñña añ acheñeneshar ñeñt puehquẽño'te'na cobra'yene' acheñenesha' aton quelle ñaña epas acheñenesha' ñeñt atarr ochñañenesha'çhno.

³¹ Atet e'manet Jesús, ñañaapa' atet toma'ntatanet:

—Ñeñt e'ñe huomech entetsapa' ñetpa' ama e'neñetoña apartañ. Añña ñeñt at-sna'tetspa' ñetñapa' çhocma añ e'nenet ñeñtcha' a'crraterrahuet. ³² Napa' ama añeçpaye' nohuapo attoch neçhore'tos ñeñt e'ñe atet entetsañ ñetpa' e'ño' cohuen es pa'yenet.

* **5:27** Levípa' ñeñfara ñeñt sochenet Mateo.

Napa' añecopña nohuapa attoch neçhore'tos ñeñt atarr ochñañ entyetsa. Allochñapa' attoch o'ch cotape'cherret ello e'ñe cohuen Yomporecop.

Allempo Jesúsapa' eñotatanet atetcha' tore'tet Yomporecop ñeñt e'ñe po'ñoçh sherbets
(Mt. 9.14-17; Mr. 2.18-22)

³³ Ñetñapa' alla otereterr Jesús:

—Ñeñt Juan pueyochresha'pa' çhocma tore'tenet Yomporecop,† çhocma ma'yochenet. Ñaña fariseonesha' pueyochresha'pa'çho'ña attecma penet. Tarraña ãaña peyochresha'pa' eso'mare'tña ama atteye'peneto. Ñetpa' atta es rratse'tyenet, atta es orryenet.

³⁴ Jesúsñapa' alla toma'ntaterraneterrpa' atet otanet:

—Ñeñt ahua'ñarefeçhno all rrallme'chapreteñet ñeñt e'ñe errte' sena'tetsa, ama pocteyaye o'ch yotanut "amach es serra'yesatsto", tarro'mar ñeñtpa' atet coshapreteñet ñeñt sena'tetsa. ³⁵ Tarraña ñerra'm esempo machayoça sa'nerranet ñeñt sena'tetsa, ñeñtña parro yemuetyena allempoña ñetpa' e'ñe puellquëñoçet caçhpa'huerretcha' puerrar, amach arrenaye' enterreto. Ñeñtpa' attochña tore'terret allempo Yomporecop e'ñe po'ñoçh. Arrpa' allohua huañ ñeñt atet Jesús toma'ntata ña sena'tostsa.

³⁶ Elloñapa' o' alla toma'ntaterraneterr ñeñt atet yeçhen judionesha' arr patsro ñeñto'marña atet otanet:

—Ñehua, ñerra'm yeçhen epma yeshtam, pa'terr emarr ñaña po'poñ mellashañpa' amach yerrarratstoña emarr yeshtam alloch yellta' yeshtam mellashañ all rrrarra'nen. Tarro'mar ama't atet yeçatsechpa' ñeñtpa' e'ñech orrena. Ama't yeshtam emarrpa' o'huañcha' cohuenta all yerrarreñ. Ñaña yeshtam mellashañ ama't o' yelltereñ emarropa' amach alla cohunterro tarro'mar ñeñt allo o' yellterpa' ama mellashañecmayaye, ñeñto'marña amach ñeñttatere.

Ñeñtpa' attoña Jesúsapa' eñotatanet ña poçtaçña e'ñe etserra. ³⁷ Jesúsñapa' alla toma'ntaterraneterr po'poñ ñeñt atet yeçhena judionesha' o'ch yeçcatenet pa'rrom orroç. Ñeñto'marña atet otanet:

—Ama't puesheñaroteyapa' amach yeshatstoña vinos emasa mellasha'mañ orroço ñeñt ayeçcataret pa'rrom. Tarro'mar ñerra'm atet yepe'pa' o'ch chasa'ña vinospa' çhach a'ptsan orroç, vinosñapa' e'ñech shebhua, ñeñtña orroçpa' ama't mamesha'pa' amach es sherberro. ³⁸ Añña ñerra'm emasa vinos, arrcha'ña yeshe' emerra orroço ñeñt ayeçcataret pa'rrom. Allochñapa' ama'tcha' chasa' vinospa' amach cha potsa'psoña vinos ñeñtpa' allach yeçhen epo'mar.

Ñeñtpa'çho'ña attoña Jesúsapa' eñotatanet ña poçtaçña e'ñe etserra. ³⁹ Po'poñoneçpa' alla toma'ntaterraneterr Jesús, ñeñtpa' atet otaterraneterr:

—Ñeñt e'ñe yeçhenaya o'ch orran co'nes ñeñt atarr chase'pa' ñapa' ama mueno o'ch orran co'nes emasa, tarro'mar ñapa' atet oten ñeñt atet yeçhena ahuatoteñpa' ñeñta e'ñe cohuen enten.

6

Allempo Jesús pueyochresha' taso'tamçesyenomet trigo añe yetro allempoçma amesen judionesha'

(Mt. 12.1-8; Mr. 2.23-28)

¹ Allempoña çherrerr allempo çhocma amesen judionesha'. Allempoña Jesúsapa' arr oñem çhetso'mar epuet pueyochresha'çhno. Allempo oñenet çhetso'mar pueyochresha'ñapa' taso'tamçesyenomet pueçhña'tets trigo a'she'çhallme'çhyesnomet

† 5:33 Añ tore'teñetspa' añecop o'ch yetorra Yomporecop. Amach añecpayaye atomat, ñeñtpa' añecpa mameshacop o'ch yequeçhpa' yerrar.

atōt rrocllome'chachet o' rra'yesnomet. ² Ñeñña patanta'tets fariseonesha'pa' che'ptare'tanet, atet otarettet:

—Eso'mare'tña atet sepena ñeññ ama pocteyaye o'ch atet yeḡa tarro'mar te'pa' añe yetro ñeññ atet anaret ahuatoteñ allempocmach yamesen.

³ Jesúsñapa' otanet:

—Sapa' ama'trra selleyareña añ ñoñets all oten ñeññ atet ḡa ahuat David allempo cheporra'nma epuet ñaña allohuen ñeññ co'tene'. ⁴ Ña allempopa' be'tosos Yompor pa'paclo, allñapa' chetosan pan ñeññ atma'ntataret atet ñerra'mrrate' ñeññ nenet all Partsocop. Ñehua, ñeññ panpa' ama pocteyayñe o'ch esesha' rre'. Ñeññpa' añach ñapueñ rrene' cornaneshachno; ñeññpa' e'ñe atet anuaret judioneshacop. Ñeñña panpa' o' chetos David, rros, rratosan ñaña allohuen ñeññ epuet.

⁵ Allempoña alla otterraneterr Jesús, ñeññpa' atet otanet:

—Ñeñño'marña te'pa' o'ch notas, na Ñeññen Acheñetosets ñeññen allsensareten, naca'ye atet otets este' poctetsaña ñeññcha' atet yeḡa añe yetro allempocma yamesen.

Allempo Jesúsapa' a'crraterran ñeññ chelletsapōt
(Mt. 12.9-14; Mr. 3.1-6)

⁶ Allempoñapa' cherrerr po'pocheño ñeññ yetñatsro allempocma amesenet. Jesúsñapa' be'tosuenerr judionesha' po'prahuo. Allñapa' ye'chatyesuenanerr acheñenesha'. Allñapa' allo'tsen ñaña puesheñarr yacma ñeññ cha chellena pot po'cohuenrot. ⁷ Acheñenesha'ña ñeññ atarr etsotayenayēñ ñoñets ñeññ atet anaret epuet ñaña fariseonesha' ñetña allpa' Jesúsapa' atarr cohua'nyenet attoch enteñeterr ñato'rraña o'ch a'crratenanerr acheñ añe yetro allempocma amesenet. Ñerra'm o'ch a'crratenanerr ama't puesheñarra acheñ añe yetro allempo amesenet, allempoñapa' esheccha' a'metanpeñeta' añcha'taretesho.

⁸ Jesúsñapa' eñotanet ñeññ atet cotape'chatse'tyenet pueyo'chreto. Ñaña'pa' atet otan yacma ñeññ chelletsapōt:

—Aḡon ḡatomos arrma.

Yacmaña huapapa' o' tomos all rro'cho. ⁹ Jesúsñapa' atet otanet:

—Ñehua, napa' o'ch na'ḡto'tas: ¿Erra'tsena'tña ñeññ e'ñe pocte' senten ñeññcha' atet yeḡa añ yetro allempo yamesen? Ñato' o'ch atet yepē' e'ñe cohuen po'psheñēñ, amapa' ñato' o'ch atet yepoñ ñeññ ama pocteyaye. Ñato' aññe' pocte' senten o'ch ya'crrach acheñ amapa' aññe' pocte' senten amach ya'crratatsche chachña yemtsatach.

Ñetñapa' ama't puesheñarro'tetapa' ama eseshaye' anapuenaye entaye.

¹⁰ Ñaña'pa' cohua'yasan allohuen ñeññ anorr'chets all, allempoñapa' otan ñeññ chelletsapōt:

—Te'pa' o'ch notaḡ: Petapuerr ḡot.

E'ñe otue'pa' ñaña'pa' allente'pa'tcha' tapuerran pot, o' e'ñe cohuenterra pot.

¹¹ Fariseonesha'ñapa' ñeñña atarr atrre'matahuet. Allempoñapa' cotape'chatanna'tet, atarr o'pachet Jesús.

Allempo Jesúsapa' acran charrasheña ñeññ puechetsa epsheña ñeññcha' llesensa'
(Mt. 10.1-4; Mr. 3.13-19)

¹² Allempoña Jesúsapa' o' alla ahuerrerr a'yo aspen'to allcha' ma'yochena'. Allñapa' arepen ma'yochaya Pompor. ¹³ Tsapa'tña puetarenpa' agota'muenan allohuen ñeññ pueyochreshachno pen. Allempo cha'cha'tet ñeshopa' ñaña'pa' o' acrapan ñeññ charrasheña ñeññ puechetsa epsheña ñeññcha' llesensa' ñeññcha' serrpare'tyetsa' allemeñ anetso'mar. ¹⁴ Ñeññ llesensa' ñeññpa' añe'chno: Simón ñeññ socherr Pedro, allotpa' ñaña pa'mo'nasheñ Andrés, allotpa' Jacobo* ñaña pa'mo'nasheñ Juan, allotpa' Felipe,

* 6:14 Jacobopa' ñeññara ñeññ sochenet Santiago.

ñaña Bartolomé, ¹⁵ ñaña Mateo ñaña Tomás ñaña Jacobo ñeñt Alfeo puechemer, ñaña ñeñt po'psheñeñ Simón ñeñt cananistanesha' ñeñt atarr ttorratset pa'netsrecop, ¹⁶ allotpa' ñaña Judas† ñeñt Jacobo pa'mo'nasheñ, allotpa' ñaña po'psheñeñ Judas Iscariote ñeñtcha' pomuerre' tsapañonet Jesús.

Allempo Jesús pa' yeçhatenan shonte' acheñenesha'
(Mt. 4.23-25)

¹⁷ Allempoña huerra Jesús aspenñot epuet pueyochresha', tomcha'tuerret all aspenet pacñe'tpener poño po'mopñero. Allñapa' o' chaçha't shonte' po'potantañ acheñenesha' ñeñt pueyochresha' pen. Ñaña allo'tsa'yen shonte' acheñenesha' ñeñt huachetsa allemeñ anetsot—Judeot ñaña Jerusalénoñ, ñaña sa'patopño'marnesha' ñeñt huetsa Tiroñ ñaña Sidonoñ. Ñetpa' añecopña huachenet o'ch e'mñoteret ñamet Jesús ñeñt atet serpare'ten ñaña añecpa'ñaña huachenet attoch a'crratyapanet Jesús patsñañeteret. ¹⁸ Ama't ñaña allohuen ñeñt mueroçhtatyen oneñeñ ñaña'pa' e'ñe a'crratyapanet. ¹⁹ Allohuenña acheñenesha'pa' atarr mueneñet o'ch a'p'lloset Jesús tarro'mar ñapa' ña atarr ahuamencatesha', e'ñe ña po'huamencoñ a'crratyenan allohuen acheñenesha'.

Atto atarr cosheñtso'tsa'yen patantarr ñaña atarr llequëñtso'tsa'yen po'potantañ
(Mt. 5.1-12)

²⁰ Allempoña Jesús pa' cohua'yasan ñeñt pueyochresha' pen, ñaña'pa' atet otanet: —Ñeñtes atarr huocchañnesha' entetsa ñeñtescha'ña atarrcha' cosheñtso'tsa'yenes tarro'mar sapa' o'pataterrach Yompor po'cohuenña atto atarr ayochreshatena ña.

²¹ Ñaña sapa' ñeñtes cheporrare'tyetsa te' ñeñtescha'ña atarrcha' cosheñtso'tsa'yenes tarro'mar Yomporcha'ña e'ñe señmataterre'.

'Ñaña sapa' ñeñtes yahuetsa te' e'ñe sellquëñoñ ñeñtescha'ña atarrcha' cosheñtso'tsa'yenes tarro'mar Yomporcha'ña e'ñe seche'taterre' socsheñoñ.

²² Ñaña sapa' atarr cosheñtso'tsa'yenes ñerra'm esempo e'moñe'tenset no'mar ñerra'm esempo mueño'tenset, ñerra'm esempo puesasare'teñoñetas sochatsetenset tarro'mar sapa' na same'ñena Ñeñten Acheñetosets. ²³ Allempo atet penset ñeñt ama cohue-nayaye, sañapa' socshepa'ch nanac ñaña señochepa'ch shonte' ñeñt o'patatensa Yompor pue'ntaño ñeñtcha'ña atarr socshaterre'. Ñehua, ñetpa' pa'tañnesha'ña' attecma mueroçhtatyese'te' ñaña ñeñt a'mta'yese'te' Yompor po'ñoñ ahuat.

²⁴ 'Tarraña te'pa' o'ch notas sa ñeñtes atarr eçllayoretas ñeñtes echene' ora allpon ñeñt e'ñe socpa. Sapa' ñeñtescha'ña atarr llequëñtso'tsa'yenes tarro'mar esempopa' huañerrcha' ñeñt socshatene'.

²⁵ Ñaña atarr llequëñtso'tsa'yenes ñeñtes atarr esocmañen es echyets allo e'ñe señmatena seyeteñoñ. Cherrcha' allempoch atarr sepallterra ñeñtcha' serrar seperr.

'Ñaña atarr llequëñtso'tsa'yenes sa ñeñtes te'pa' e'ñe socsheñesha' seche'tatsetyena. Cherrcha'ña allempoch seyahuerra sellquëñoñ.

²⁶ Ñaña atarr llequëñtso'tsa'yenes ñerra'm esempo allohuen acheñenesha' e'ñech cohuen entapretenset, e'ñe cohuen eñosyenet socop. Tarro'mar ñetpa' atet pete't pa'tañnesha'ña ahuat, e'ñe cohuen eñosyese'te' añ acheñreneshacop ñeñt ama't ama Yompor eye' po'ñoñ a'mta'yese'te'.

Atto Jesús pa' yeçhatosanet amorrentpo'ch yeñch ñeñt ye'moñe'tyene'
(Mt. 5.38-48; 7.12)

²⁷ 'Sa ñeñtes ne'mñotene' o'ch notas ñeñtcha' atet sepa e'ñe cohuen, semueryach ama't ñeñt se'moñe'tene'. O'ch atet sepe' e'ñe cohuen. ²⁸ Ñaña ama't erra'tsen ñeñt sarrnomare'tenaya sañapa' o'ch senamaterrñañ Yompor pa'nateña. Ñaña ñeñt

† 6:16 Judaspa' ñeñtara sochenet Tadeo.

sesasare'tene' sañapa' o'ch sema'yochañpenanet. ²⁹ Nehua, atet ñerra'm esempo esesha' pue'moñe'teño'tetas o'ch taclaset setsa'po, sañapa' poctepa'chña señch taclerrserrepa' ñaña po'psheñtañot. Ñaña ñerra'm esempo esesha' seprratamñpse' seshtam, sañapa' poctepa'chña señch puerratanñpsasetepa' seshtam ñeññ muenenet ama't ñaña po'pmañ seshtam allo sepmatena. ³⁰ Ñerra'm esesha' es senamuene' sañapa' sapepa'ch ama't esesha. Ñaña ñerra'm esesha' seyoratsre'tamñpse' sañapa' amach alla senamatstere apuerrsetepa' alla. ³¹ Nehua, ñerra'm erra'tsente' e'ñe cohuen senten ñeññ semnen sa ñeññcha' atet ñonas po'psheñeñ, sapa'cho'ña e'ñech attecma sepanet saña.

³² Ñaña sa ñerra'm aña semorrentena ñeññ atarr semorrentenaya saña, ñeññtpa' amach e'ñeye' sorrtatenoña ñeññ e'ñe po'ño'ch cohuentetsa, tarro'mar ñeññ ama ame'ñenayo Yompor ñetpa aña morrentenet ñeññ e'ñe morrentenahuet ñamet. Añña atarr cohuentetsa ama't ñeññ ama yemorrentenayepa' o'ch yemorrenña e'ñe cohuen. ³³ Ñaña ñerra'm aña e'ñe cohuen seyenpa'yen ñeññ seyenpa'yene' saña, ñeññtpa' ama e'ñeye' sorrtatenoña ñeññ e'ñe po'ño'ch cohuentetsa, tarro'mar ñeññ ama ame'ñenayo Yompor ñetpa' aña yenpa'yenet ñeññ yenpa'yenahuet ñamet. ³⁴ Ñaña ñerra'm añecpa es sartanna'tyena attoch ellopa' o'ch alla apuerrset saña, ñeññ atet sepenapa' ama e'ñeye' sorrtatenoña ñeññ e'ñe po'ño'ch cohuentetsa; añcha'ña es saretyena po'psheñeñ ama't ñetpa' ama'tcha' ama apuerrseto ama't coñe'ta, tarro'mar atet pena ñeññ ama ame'ñenayo Yompor ñerra'm eñoteñet o'ch alla aparetterret ñamet esheccha'ña archet po'psheñeñ. ³⁵ Tarraña napa' o'ch notas, sapa' añe'nachña semorrentena ama't ñeññ se'moñe'tene'. Ñaña sapa' añe'nachña seyenpuen ama't ñeññ ama seyenpuenaye. Ñaña sapa' añe'nachña es saretyena ama't ñeññcha' ama sapuerraye. Ñerra'm atetcha' sepa Yomporñapa' apuerrescha' ello ñeññcha' atarr socshatuerre'. Ñapa' allempoch e'ñe puechemer perres, ñeññara Yompor Ñeññ Nanac Parets. Tarro'mar ñapa' añe'ñaña muerena ama't ñeññcha' ama coshaterraye ña, ñeññara ñeññ ama cohuenaye' es petso. ³⁶ Sapa'cho'ña atarrepa'chña semueranna'ta e'ñe atet pena ñeññ Yeyomporer yepen atarr muerenya yaña.

E'ñe attotapa' amach yotteñe'channa'tatsto
(Mt. 7.1-5)

³⁷ 'Sapa' amach sotatsche po'psheñeñ "ama pocteyaye ñeññ atet sepa'yena", allochñapa' amach otuerrso saña Yompor ama pocteyaye ñeññ atet sepa'yena saña. Ñaña e'ñe attotapa' amach sottene'chatsche po'psheñeñ allochñapa' Yomporpa'cho'ña amach otteñe'chuerrso saña, chochña e'ñe cohuen sepretnannena allochñapa' Yomporpa'cho'ña e'ñech cohuen peretna'huerres saña. ³⁸ Ñaña sapa' e'ñech cohuen es sapanna'tyena allochñapa' Yomporpa'cho'ña e'ñech cohuen es apuerres saña. Shonte'ch nanac es apuerres, atet ñerra'mrrate' cho es e'chorratenset soshaco atet ñerra'm chop e'charef. O'ch chorrapa' o'ch a'rrapuet esheccha' esha'tereterr po'poñ, ñerra'm o'ch chorrerrerrpa' o'ch pa'shmuet attoch e'ñe a'tamo'yonaset. Ñeññtpa' añ toma'ntena atto es apueney Yompor nanac aton. Ñaña errponcha' sañ po'psheñeñ, sapa'cho'ña e'ñech allpon apuerres saña Yompor.

³⁹ Allempoña Jesúsapa' atet toma'ntaterraneterr, ñeññtpa' atet otanet:

—Ñeññ aporo'yetpa' ñapa' amach errotenot echa'nmano po'psheñeñ ñeññ parro aporo'yefecmuet. Tarro'mar ñerra'm atet penet, ñerra'm arroroñta echa'nmana'tnomuetpa' epsheño'maret chach shora'nmuet arrorofo. Arrpa' allohua ñeññ atet toma'ntatanet atet ñerra'm ya allempo ama yoctape'cherra' ñeññ cohuentetsa Yomporecop amach errotenot yoctape'chache po'psheñeñ ñeññ ama eñotenaye ñeññ cohuen enten Yompor.

40 'Ñeñt ayčhatarettetsapa' ama't puesheñarra amach errotenot metanetoña ñeñt allpon eñoten ñeñt yečhatene'. Ama't allempo e'ñe ayčhatarettapa' e'ñech allpona yeča' ñeñt allpon eñoten ñaña ñeñt yečhate'. 41-42 Amach atet sentatsche po'potantañ ñerra'm ñetpa' ama cohuenaye' es peneto ama't sapa' ama sentenoña ñeñt atet sepa'yena sa; ñeñtpa' ello semtaneña po'potantañ ñeñt atet es pa'yenet ñet. Ñerra'm ama cohuenaye' es sepeno samapa' amach sotatscheña po'potantañ: "Masheñcha' napa' o'ch noctape'chaterrep e'ñe cohuen." Tarro'mar ñerra'm atet sepenapa' čha sommo'chena. Ñanomcha'ña añ sehuapore'terr ñeñt ama cohuenaye' sepeno sa, allochñapa' attoch señoč cotape'chate' samo'ts e'ñe cohuen. Ñeñtpa' añ toma'ntena o'ch senten po'psheñeñ pa'clloyo'tsen puepachña ama't sa seclloyopa' allo'tsen tsach; ñeññapa' ama senteñe. Ñerra'm atetpa' amach errotenot socheña po'psheñeñ: "Masheñcha' napa' o'ch nechterrnañ pecloyot pepachña." Tarro'mar añ tsach ñeñt seclloyo'tsenpa' čha a'npuennasña attoch e'ñe cohuen es sentyen. Ñanomcha'ña añ sehuapore'terr tsach seclloyot allochñapa' attoch e'ñe cohuen es sentyen. Attochña e'ñe cohuen sechterrñañ po'psheñeñ puepachña pa'clloyot.

Allohuen acheñ ñeñt e'ñe po'ñoč cohuen acheñer, ñetñapa' añcha' orrtatyenet ñeñt e'ñe cohuenare'

(Mt. 7.17-20; 12.34-35)

43 'Tarro'mar allohuen acheñ ñeñt e'ñe po'ñoč cohuen acheñer, ñetñapa' añcha' orrtatyenet ñeñt e'ñe cohuenare'. Tarraña po'potantañ acheñenesha' ñeñt po'ñoč ama cohuenayaye ñetñapa' añach orrtatyenet ñeñt ama cohuenayaye. Ñeñtpa' atetcha' netma'ntaterra: Ora allohuen ñeñt e'ñe cohuen narmetsoch, pue'merpa'čo'ña e'ñech cohuenare'. Añña po'pchañečno narmetsoch ñeñt ama cohuenayayepa' pue'merpa'čo'ña amach e'ñe cohuenayaye. 44 Ñeñto'marña attoña yeñoten erra'tsente' ñeñt e'ñe cohuenare' narmetsoch ñaña ñeñt ama cohuenayaye, pue'meroña e'ñe yechme'teñ. Ñaña yapa' e'ñe yeñoteñ ama arroteye' yetoquenoña llo'm ajchoť. Ñaña ama arroteye' yetoquenoña ap rrenagachot.† 45 Ama't erra'tsena acheñer ñeñt e'ñe po'ñoč cohuen, ñapa' añcha'ña orrtaten ñeñt e'ñe cohuenare' cotape'chen pueyočhro tarro'mar pueyočhro allña shonte' cotape'chenan ñeñt cohuentetsa. Tarraña po'poñ acheñer ñeñt po'ñoč ama cohuenayaye, ñapa'čo'ña añach orrtaten ñeñt atet cotape'chen pueyočhro ñeñt ama cohuenayaye tarro'mar pueyočhro allña shonte' pa'namen cotape'chenan sosya'tsañ. Tarro'mar ñerra'm shonte' yocape'chen yeyočhro ñeñt cohuentetsa, ñeñtpa' e'ñech ñeñta cohuen yeserrpare'ten. Tarraña ñerra'm shonte' yocape'chen ñaña yeyočhro ñeñt ama cohuenayayepa' ñeñtpa'čo'ña e'ñech ñeñta yemnen o'ch yeserrpare'teñ.

Atto Jesús toma'ntatana acheñ ñeñt e'ñe eñotene' ñeñt po'ñoč sherbets ñaña ñeñt ama eñotenyaye ñeñt sherbets

(Mt. 7.24-27)

46 'Sapa' eso'maruañaca'yeña soten en napa' Sa'yochresha'tero' sepenen, sapa' amaca' čhoye' same'ñenno ñeñt atet o' notuas. 47 Allohuen erra'tsencha' huapatsa nesho ñeñtča' name'ñenaya na ñaña ñerra'm e'mñotennanet neñoñ ñeñt atet cohuen neyčhatenanet ñerra'm atet e'ñe penet, ñetñapa' atarrcha' eñotenet ñeñt e'ñe po'ñoč sherbets. 48 Ñeñt acheñer ñeñt atet petsa o'ch netma'ntacha atet ñerra'mrrate' puesheñarr yacma ñeñt atarr es eñotets ñeñt tomatene' pocoll ñeñt e'ñech echarr penan pa'paquell. Ñañaapa' atarrcha' o'pono eñan pats attoch e'ñe echarr pan po'quellpach. Atteñapa' o' čhap allempo apellchena oñ, pocollñapa' ama a'mato apellche' tarro'mar

† 6:44 Ñehua, Jesús añ toma'ntatanet uva ñaña higo ñeñt puenarenñ penet all pa'nyo.

quellpachpa' atarr huomenc atomatareŧ. ⁴⁹ Tarraña po'potantañ ñeñŧ e'muene' neñoñ ñetña ñerra'm ama atŧeye' peneto ñeñŧ atŧ notenanet, ñetña'pa' e'ñech atŧet ñerra'mrrate' puesheñarr yacma ñeñŧ ama es eñoto. Ñapa'cho'ña o' tomataneñ pa'paquell tarraña ñaña'pa' ama atarr o'ponoye' eñanoña pats atŧoch e'ñe echarr pan po'quellpach. Allempoña'pa' apellcha oñ apellche'ña'pa' chepa'tcha' a'matanpsos pa'paquell. Pocollña'pa' e'ñe poctacma muello'tstosa.

7

Atto Jesús'pa' a'crraterran capitán pa'taruasañer; ñeñŧ capitán'pa' romo'marnesha'
(Mt. 8.5-13)

¹ Allempoña Jesús'pa' serrpare'tatuerranerr allohuen acheñenesha' ñeñŧ e'mñotene', ñaña'pa' ahuerrerr, o' cherrerr Capernaumo. ² Allña'pa' allo'tsen puesheñarr yacma ñeñŧ solltar po'caŧtaner, ñeñŧpa' romo'marnesha', ama judioneshayaye. Ñeñŧña capitán'pa' echenan puesheñarr pa'taruasañer cha atsna'ten atarr pa'naŧtena, ñaña'pa' atarr morrentenana pa'taruasañer. ³ Ñeñŧña capitán'pa' allempo e'mare'tan Jesús o' alla cherr Capernaumo, ñaña'pa' o' mueñan patantarr acheñ ñeñŧ pompornesha' pen judionesha', o'ch oteñeta' Jesús atŧo agotateñ capitán o'ch a'crraterrñaña'pa' taruasañer. ⁴⁻⁵ Allempoña chapuet Jesúseshopa' ñetña'pa' atŧ otoset:

—Ñeñŧ capitán'pa' ñapa' atarr cohuen acheñ, ñapa' atarr morrentenya ya ñeñŧey israelena'tarey, ama't yeprahuapa' o' tomatatuosnay. Ñeñŧo'marña ama't yapa' e'ñe pocte' yenteñ o'ch peyenpueña' ñaña, ñapa' ama't ama judioneshayaye. Atŧoña atarr enamueñet Jesús atŧoch yenpuenana' capitán.

⁶ Allempoña'pa' coŧa'nerranet Jesús. Chapmochet capitán pa'paclo, capitánña'pa' mueñerranerr po'potantañ acheñ ñeñŧ parro yemtana ñeñŧcha' otapue' Jesús atŧ oten capitán:

—Yapa' atŧ otapuey capitán atŧo'ch yotapaŧ: “Amach Ayochreshate atsrre'moçhen nentatatstapape tarro'mar napa' ama cohuenayayno atŧoch pebe'tosapo'tamŧpesna nepaclo. ⁷ Napa' ama cohuenayayno ñeñŧo'marña aña nemñen po'psheñeñ ñeñŧcha' nepoctatapaŧ, ñeñŧcha' potap correrrepa' na'taruasañer, ñaña'pa' acrrerroche'ch. ⁸ Tarro'mar napa' ñeñŧen ñeñŧ atŧ petsa ñeñŧ atŧ otenen ñeñŧ neyechenaya. Ñaña napa'cho'ña eñall ñeñŧ neyechena namña ñeñŧ nesolltarer nepen. Ñerra'm puesheñarr solltar noteñ: Papa' o'ch ahueŧ a'yo, ñaña'pa' o'chcho' ahuo'. Ñaña po'psheñeñ solltar ñerra'm o'ch noch: Papa' apon arr, ñaña'pa' o'chcho' huapa. Ñaña po'psheñeñ na'taruasañer ñerra'm o'ch noch: Papa' arrcha' petaruasa'muen, ñaña'pa' allcha'cho' taruasa'muen. Ñeñŧo'marña napa' neñoteneŧ ñerra'm erroten potenpa' e'ñechca'ye atŧ pena.”

⁹ Allempo e'man Jesús ñeñŧ atŧ oten capitán, ñaña'pa' alla cohua'yesan allohuen acheñenesha' ñeñŧ coŧa'nene'. Ñaña'pa' atŧ otanet:

—Errotenoŧuañaca'yeña atarr yemtenna, ñapa' amaca'ye judioneshayaye. Napa' o'ch notas, ama't ahuaŧapa' ama nentareña acheñ ñeñŧ e'ñe atŧ neyemtenaya, ama't allohuen israelena'tarnesha'pa' ama't puesheñarra ama nentareña ñeñŧ atŧ atarr neyemtenaya. Ama'tpa' correrrepa' pa'taruasañer.

¹⁰ Allempoña ñeñŧ pocte' Jesús o' ahuanerret capitán pa'paclo. Ñetña'pa' entuerrñañet capitán pa'taruasañer o' e'ñe correrra.

Atto Jesús'pa' tantaterran arromñañ ñeñŧ rretornanesha' puechoyor

¹¹ Allempo allponmaterrerr, Jesúsña'pa' ahuerrerr po'poñ anetso, ñeñŧ añets añ pa'so'cheñ Naín. Alla coŧa'huanererr pueyochresha' ñaña shonte' po'potantañ acheñenesha'. ¹² O' chapmochet all allotecma be'tenet atŧoch chapuet anetso. Allotña'pa'

cha'nmacha'tos ñeñt anene' arromñañ, o'ch pampueñeta'. Arromñañña' asheñorr ñeñt e'ñe po'patrro' pen pachor. Pachorña' rretorrnanasha'. Shonte' acheñ ñeñt allo'marnasha' ñeñt llecapretenaya rretorrnanasha' all co'a'neñet. ¹³ Partsasha'ña Jesús allempo entapan rretorrnanasha' puellcapreteño'tpa' atarr muerosya. Ñaña'pa' atet otapan rretorrnanasha':

—Amach no'cha peyahuatsto.

¹⁴ Allempoña ponmapana arromñañ, a'plata'tosñañ po'cajon. Ñeñtña anene'pa' alla tom'cha'toset. Jesúsña'pa' otan huepuesha' ñeñt rromuets:

—Napa' o'ch nota'p: ¡Te'pa' o'ch petanterra!

¹⁵ E'ñe otue'pa' ñeñtña arromña'tpa' allenta tanterra cha eñorerrtsa. Jesúsña'pa' o' alla apuerrñañ pachor. ¹⁶ Acheñenesha'ña'pa' atarr nanac yorenat. Po'yorño'tetpa' atarr aye'chochtateññañet Yompor. Ñeñtña'pa' atet otyenet:

—Te'pa' o' orrtonaya puesheñarr ñeñt atarr sherbets ñeñt a'mtene' Yompor po'ñoñ. Yomporpa' o' yerpuerrya ñeñt e'ñe pueyochreshay peney.

¹⁷ Attoña acheñenesha'ña'pa' epaye' serrpare'tyesuerret ñeñt atet pa'yena Jesús. O' e'ñe epa'hua ora Judeo'mar ñaña ora erracmañen allampaño'mar.

Juan ñeñt apatañtase'tpa' mueñan pueyochresha' Jesúsesho (Mt. 11.2-19)

¹⁸ Añña Juan ñeñt ayottañpsaret, ñaña'pa' chocma serrpare'tateñ pueyochresha' ñeñt atet pa'yena Jesús. ¹⁹ Atteña Juanña'pa' agotatan epsheña ñeñt pueyochresha' pen ñeñtcha' mueña Jesúsesho ñeñtcha' a'p'to'tenaya' Jesús po'ñochte' ñapa' ñeñt Cristotets ñeñt atarr cohuenet ahua'toteñ, ñato' amate' ñeñt e'yayepa' añcha' cohuet po'psheñeñ ñeñtcha' huapatsa. ²⁰⁻²¹ Allempoña ñetpa' ahuanmuet. Allempo chapuet allo'tsen Jesús, Jesúsña'pa' añ torra'yena a'crratanatyese' shonte' acheñenesha' ñeñt atsna'tyets ñeñt pa'namen muerochtatyenahuet. Ñaña ñeñt chorra'yena oneñe't ñapa' o' e'ñe ca'chpatatuerranet oneñe't. Ñaña shonte' aporo'yete'chno ñaña'pa' o' alla e'ñe cohuatye-suerranet. Ñeñtña Juan pueyochresha'pa' a'p'to'toset Jesús, atet otoset:

—Juan ñeñt apatañtase't Yomporecop yapa' ñeñtña yemñene' o'ch yotenpa', ñato' p'ate'ña ñeñt e'p'te' e'ñe po'ño'ch Cristotets ñeñt atarr yecuen ahua'toteñ o'ch huapa; ñerra'm amate' ñeñt e'yayepa' o'ch e'ñe p'tey allochña'pa' añcha' yecua' po'psheñeñ ñeñtcha' huapatsa ñeñt e'ñe Cristo.

²² Jesúsña'pa' otapanet:

—Te'pa' o'ch ahuerres seserrpare'tatuercha' Juan ora allpon ñeñt atet sentye-suennana' arr ñaña ora allpon ñeñt atet se'myesuennana' arr. O'ch e'ñe seserrpare'tatuer ora ama't atto aporo'yete'chnopa' te'ña'pa' o' e'ñe necuatyesuerranet, ñaña ñeñt checa'repayetspa' te'pa' o' e'ñe chope'chyesuerret, ñaña ñeñt osyen puet-sarñats, te'pa' o' e'ñe a'cohuentataretuerret ñamet, ñaña paquetneshachnopa' ama't ñetpa' te'ña'pa' o' e'ñe e'myesuerret cohuen, ama't ñaña ñeñt rromayets te'ña'pa' o' alla atantataretuerret, ñaña ama't ñeñt huocchañneshachno te'ña'pa' o' e'ñe neserrpare'tatuerranet añ cohuen ñoñets alloch qeshperret ñamet.

²³ Jesúsña'pa' alla otarranerr Juan pueyochresha':

—Ñaña ellonetpa' o'ch sotuer Juan ñeñt atet notenes: Atarr cosheñtso'tsen ama't allohuen ñeñt atarr neyemtenaya na, ñeñt ama e'nenaye po'psheñeñ ñeñtcha' coshater-rahuet.

²⁴ Allempoña Juan pueyochresha'pa' o' ahuanerret. Jesúsña'pa' alla serrpare'taterranerr acheñenesha' ñeñt atet pe't ahuaña Juan, ñeñtña'pa' atet otanet:

—Ahuaña allempo sete't amayo all serrpare'ten Juan, sapa' amaca' añecpaye' sete'teña all o'ch sentena' amuesma' atet a'yma'tateñ m'orr. ²⁵ Ñaña amaca' añecpaye' sete'teña

all o'ch sentena' ñeñt atarr coçhnesha'tetsa pa'shtam all, tarro'mar yeñoteñ amayopa' amaca'ye eñalleña all ñeñt atarr coçhnesha'tetsa pa'shtam. Yapa' yeñoteñ arrña yentenna ñeñt atarr coçhnesha' chorra'yenaya shetamuets añcha'taretepahuo. ²⁶ Sapa' añecopca'yeña sete'ña amayo o'ch sentena' all ñeñt po'ñoçh a'mtene' Yompor po'ñoñ. Napa' o'ch notas, Juanpa' atto atarr sherbenan Yomporpa' ello metana'tuenan allohuen ñeñt atto a'mtenet Yompor po'ñoñ. ²⁷ Tarro'mar Juanpa' ñocop eñose't Yompor ahuať. Ñehua, allempopa' atet otne't na ñeñt atetcha' p'osa Juan nocop esempoch huapa, ñeñtpa' atet anaret' ñoñets ahuatoteñ:

Papa' peñoche'pa'ch napa' o'ch nemñona'p p'uesheñarr ñeñtcha' ñanom otatsa ñeñtcha' p'a'cohuentatyese' p'ocop allcha' p'oñmos.

²⁸ Ñeñto'marña na te'pa' atet notenes: Allohuen allpon acheñenesha' ñeñt eñalletetsa arr patsro ama't p'uesheñarra ama eñalleña ñeñt atarr sherbets atet ñerra'mrrate' Juan ñeñt apatyese' ahuaña acheñenesha' Yomporecop. Tarraña ñeñt ama esoshe'maye' enteneto ama't mamesha, tarraña ñerra'm pueyochresha' peñ Yompor atto te'pa' o' ayochreshatena, ñeñña acheñerpa' atarrca'ye sherben, ello metanenan atto atarr sherben Juan.

²⁹ Allohuen acheñenesha' ama't ñaña ñeñt ashcañetyestse't atto atarr cobra'yese'te' quelle ñeñt gobiernocop ñeñt apatyese' Juan, ñetña'pa' atto e'mñotenetpa' otyeset: "E'ñe pocte' atet oteney Yompor." ³⁰ Tarraña fariseonesha' epuet ñaña ñeñt atarr etso-tayenayeñ ñoñets ñeñt atet anaret' judioneshacop, ñetña'pa' ama't e'ñe mamesha ama pocteye' enteñeto ñeñt atet muenen Yompor ñocpuet, ñeñto'marña ñetpa' ama apataneto Juan Yomporecop allempo.

Partsesha'ñapa' atet oterraneterr:

³¹⁻³⁵ —Ñehua, napa' o'ch neñotatas ñeñt atet pena patantarr acheñenesha' ñeñt yentyen te' ñeñt ama't errotena ama acshatpoteneto. Ñeñtpa' fariseonesha' atet petsa. Tarro'mar ama't allempo orrta Juan ñeñt apatañtase't ñapa' ama rrane'te ñeñt yocrrañ yepen allohueney, ama orrane'te ñeñtecma yorren allohueney. Ñeñto'marña ñapa' cha sotyese't cho'te' chorreña oneñe't, ama't e'ñe mameshapa' ama pocteye' señche'te. Te'ñapa' o' norrterra ñaña Ñeñten Acheñetosets. Napa' pa'namen nerra'yen ñaña norryen. Saña te'pa' atta sesochatse'tyenen ñaña atarro' arratsñaten ñaña atarro' orrarñaten napa' año'chña e'ñe neyemuetyena ñeñt atarr ochñatenesha' ñaña ashcarña'feçhno ñeñt atarr cobra'yene' acheñenesha' quelle. Tarraña ama't atet sepenno'pa' Nomporna e'ñe eñotene' ñeñt po'ñoçh atarr sherbets ñocop. Ñaña allohueney ñeñtey e'ñe puechemeresha' p'ohueney ñeñtey cotene' ña pocta'pña yapa'cho'ña e'ñe yeñotuenña ñeñt po'ñoçh atarr sherbets. Ñeñto'marña yorrtatyeññañ ñeñt cohuen enten ña. Sañapa' ama't e'ñe mamesha ama acshatpahuoyayso, e'ñe ates ñerra'mrrate' cheshanesha' ñeñt chocmach po'poñ entanna'tuenet amach mueno o'ch yemtana all yellsheñen po'potantañ pacmachoresha' all plazo all shontena acheñenesha'. Ñetña'pa' amach mueneñeto o'ch coshaprechet pacmachoresha'. Ñeñto'marña ñetpa' atto yellsheñenetpa' atet oteñet po'potantañ pacmachoresha': "Yapa' ama't o' yerequerca'hua allo yocshame'tenapa' sañapa' amaña seshe'rarampenye; allotpa' ama't o' yepoctorare'tua ñeñt ya'chpeñtsorecho allo yellcanrrortenapa' sañapa' amaña sellcapretenyo."

Allempo Jesús'pa' rrallme'chos fariseo pa'paclo ñeñt sochetsa Simón

³⁶ Allempoña Jesús'pa' o' huapoña ñaña p'uesheñarr fariseo o'ch otenana' Jesús rrallme'chapreteñepa' pa'paclo. Jesús'ña'pa' allenta coterran fariseo. Allempoña chapach pa'paclo anorrcha'toset parro allcha' rrallme'chapretos. ³⁷ P'uesheñarrña coyanesha' ñeñt allo'marnesha' ñeñt atarr ecañoresha't, ñaña'pa' o' e'mare'ch o' chap Jesús fariseo pa'paclo all rrallme'chen. Ñaña'pa' huapa, huapatan ñeñt atarr eñmosa't

ñeñt̃ nanac tsa'te'; huapatam̃pes puetellm̃o ñeñt̃ otenet alabastro. ³⁸ Allñapa' pueya'chpeñsha' huapa, ponmosana Jesús pa'tco. All atarr yahuosa, puese'ñapa' cha tsopsa'tos Jesús pa'tco. Allempoña chetosanña pue'chpa' alloña alla a'porrarra'tquër, tso'tsteca'tosan pa'tac, she'tatca'tos eñmosafo. ³⁹ Añña fariseo ñeñt̃ hua'ñene' Jesús, ñaña' eñchpa' atet̃ ot pueyo'chro: Tarraña añ yacma ñerra'm po'ño'ch ñeñt̃ a'mtenayeñ Yompor po'ño'ña' eñotapaneñcha'ña añ coyanesha' ñeñt̃ a'p̃llene'pa' atarr ecañoresha't, amach muenacheñe o'ch a'p̃llosñañ ama't pa'tca. ⁴⁰ Jesúsñapa' atet̃ otan fariseo:

—Napa' nemneñ o'ch masheñe Simóna notap̃ allpon ñoñets.

Fariseoñapa' atet̃ och:

—E'ñe pocte' nenteñ Maestrocha' o'ch p̃oten.

⁴¹ Jesúsñapa' alla toma'ntacha, atet̃ och:

—Napa' o'ch not, allo'tsen puesheñarr acheñ ñeñt̃ artetsa quelle. Ñaña' artana puesheñarr acheñ nanac shonte' quelle ñeñt̃ otenet quinientos denario*; po'psheñeñña' archa po'poñ quelle ñeñt̃ ama tama atonayaye ñeñt̃ otenet cincuenta denario. ⁴² Attoña epsheño'maretpa' ama eshcaye' tsa'tuerreto ñeñt̃ allpon teba'yenet tarro'mar ama echeneto alloch tsa'terret. Ñaña' e'ñe at̃ta peretna'huerranet epsheño'maret, e'ñe attecma ama eseshaye' tsa'terrtso. Te'ña masheñe Simóna o'ch na'p̃to'tap̃, añ epsheño'mar ñeñt̃ amorrentaret̃ attoch peretnerranet allpon tebenet ¿erra'tsena't pentenña p̃a ñeñt̃ atarr morrentenaya ñeñt̃ peretnene', ñato' añte' acheñer ñeñt̃ tebene' quinientos denario amapa' añte' ñeñt̃ e'ñe cincuenta denario tebene'?

⁴³ Simónñapa' alla anapueranerr Jesús, atet̃ otererr:

—Ñehua, añte'ca'ye atarr morrentenaya ñeñt̃ ap shonte' quelle, tarro'mar ñapa' shonte' o' at̃ta a'p̃retnare'tterra ñeñt̃ allpon shonte' teben.

Jesúsñapa' alla otererr:

—Atet̃ca'ye masheñe.

⁴⁴ Allempoña Jesús'pa' cohua' allente'tsen coyanesha' allotña'pa' alla oterranerr Simón:

—Pecue' añ coyanesha' ñeñt̃ atet̃ p̃osen. Allempo ne'chap pepaclopa' p̃aña'pa' ama es p̃apapno ama't oñapa' ama p̃apapno alloch ne'patca'tosa. Tarraña añña coyanesha'pa' ñaña ne'patca'tose' e'ñe ña p̃ueso'yo allempoñapa' alla a'porrarra'tquërren e'ñe ña pue'cho. ⁴⁵ Ñaña allempo ne'chap pepaclopa' p̃aña'pa' ama't pehuom̃cha'teño'tapa' ama petso'ttsa'pa'tapno. Tarraña añ coyanesha' e'ñe allempo ne'chap pepaclo ama at̃ta cächposno allorocma tso'tsteca'tosen attoña orrtatosan puemorrenteña nocop.

⁴⁶ Papa' ama't coñe'tapa' ama es peshapono noño ama't olivoso'ya ñeñt̃ ama tsa'teyaye. Tarraña ñaña'pa' eñmosafo she'tatca'tosen ñeñt̃ atarr tsa'te'. ⁴⁷ Attoña te'pa' atarr orrtatosnan ñeñt̃ atto morrentosna. Napa' neñoteññañ ama't shonte' po'chñar te'ñapa' o' e'ñe a'p̃retna'huare'tta. Tarraña po'psheñeñ ama't ama tama ochñateyaye attoña a'p̃retna'huare'tta po'chñarpa' ñaña'pa' ama e'ñeye' morrentapanoña ñeñt̃ o' peretnerrñañ po'chñar.

⁴⁸ Allempoña Jesús'pa' otan coyanesha':

—Te'ña po'ño'chpa' o' e'ñe a'p̃retna'huare'tterra p̃o'chñar.

⁴⁹ Allempoñapa' ñeñt̃ parro rrallme'chenet, ñetñapa' otanna'tyeset:

—Esha'huañaca'yeña añ yacmar atto peretnerranña ochñarets.

⁵⁰ Jesúsñapa' alla oterranerr coyanesha':

—Papa' atto atarr peyemtena ñeñt̃ña o' a'queshp̃aterre'p̃. Te'ñapa' o'ch ahuerre'p̃ e'ñe peñmañesha'.

* **7:41** Denariopa' quelle ñeñt̃ allpon tsa'tenet pamtarr ñeñt̃ taruaset̃s all pa'nyo.

8

Atto coyaneshačhnopa' es apa'yese't Jesús ñeñt allpon echyenet

¹ Allempoñapa' chopeñe'cherrerr Jesús errañaren serrpare'tyesnomue' cohuen ñoñets attoch chap allempo ayochreshattena Yompor. Erracmañen chopeñe'chyen, ora allemeñ anetso'mar all shonta'yena acheñenesha' ñaña all ama tama shonteyaye acheñ. Allñapa' co'ta'huanererr pueyochresha' çharrasheña ñeñt puechetsa epsheña. ² Allñapa' co'ta'huanemñ ñaña patantarr coyaneshačhno ñeñt a'crratyesua Jesús ahuañmo'cha, puesheña'tetspa' ñeñt caçhpatatyerr oneñe't ñeñt chorrahuete't, po'psheñnečhnopa' ñeñt a'crratyes ñeñt pa'namen atsnañtsor mueroçhtatyesahuete't. Puesheñarr coyanesha' ñeñtpa' añ pa'so'cheñ María Magdalena. Ñeñt Mariárapa' Jesúsñapa' puecaçhpatataroñ cançherr oneñe't. ³ Ñehua, po'psheñeñ coyanesha' añ pa'so'cheñ Juana. Puerrollarñapa' añ pa'so'cheñ Chuza añ po'taruas pen atto sherbenan añcha'taret Herodes. Alloña po'psheñeñ coyanesha' ñeñt co'ta'nene' Jesús ñeñtpa' añ pa'so'cheñ Susana. Ellopa' shonte' po'potantañ coyaneshačhno ñeñt es apa'yese't Jesús ñeñt allpon echyenet ñet.

*All toma'ntatanet Jesús ñeñt a'parre'tene' puerets
(Mt. 13.1-9; Mr. 4.1-9)*

⁴ Allemeñeñ anetso't huaçha'tyena acheñenesha' ñeñt çhaçhets Jesúsesho. Allempoñapa' o' çha shontoset nanac, Jesúsñapa' serrpare'tatapanet, atet toma'ntatapanet:

⁵ —Ñeñtña a'parrene' puerets ñaña' ahua' allcha' a'parre'tyenana' puepuer. All a'parre'tyeñ patanta'tetsñapa' alla çhapyes toño'mar, ñeñtña' atta a'mama'tyes acheñenesha'. Allñapa' huaçha'tyesa ñaña o't e'ñe añyallme'chuenana' puerets.

⁶ Po'poñeçhnoñapa' alla çhapyes mapuetro'meso'mar. Ñeñtña' mameshapa' cheparesuañ, tarraña mameshapa' alla hueya'huerra tarro'mar all mapuetro'mesopa' ama eñalle ama't coñe'ta oñ ñeñtcha' a'yamosañpse' narmets ñeñt o' cheparesua all.

⁷ Po'potantañña pueretspa' alla çhapyes allcha' chepares aj. Allpa'çho' mameshapa' cheparesuañpa' ajñapa' mameshapa' atesha'tua alla ca'matuerranña narmets alla a'cclatuer. ⁸ Po'potantañeçhno ñeñtña' arr çhapyes all e'ñe cohuen patso. Ñeñtña' e'ñe cohuen chepares. Allempoña atesha'tuapa' atarr aton ellomre'tyes. Puecha'tetspa' çharroch çharra' pue'llomer.

Allempoña serrpare'tatuanet atetpa' o' alla o'terraneterr. E'ñe huomencocma eñorana'tanet, atet otanet:

—Ñeñtes po'ñoçh ne'mñotene', çhaponasepa'ch seyoçhro ñeñt atet netma'ntatensa añ ñoñets.

*Atet otanet Jesús ñeñtecop atet toma'ntatyenanet
(Mt. 13.10-17; Mr. 4.10-12)*

⁹ Allempoña pueyochresha'pa' ochet Jesús:

—Ta'm ¿este'ña petma'ntatenya? Yañapa' ama yeñoteñe.

¹⁰ Jesúsñapa' alla o'terraneterr:

—Sa te'pa' Yomporña o' muenaterres attoch seño'terr ñeñt ama eñotpahuoyaye ama't ahua'toteñ atet penaña Yompor po'cohuenña atto atarr ayochreshattena ña. Tarraña po'potantañeçhnoña ñeñt atta es puecha'yetsa, ñocpuetpa' ama eñoteñeto ñeñt atet atma'ntataret ñoñets. Attoña ama't enteñetañ ñeñtña' amach es çhenahueto pueyoçhreto. Ama't e'mueñetañ amaña çhenanetoña pueyoçhreto ñeñt atet yeçhateney Yompor po'cohuenña.

*Arrpa' all eñotatanet Jesús ñeñt toma'ntatenanet ñeñt a'parre'tene' puerets
(Mt. 13.18-23; Mr. 4.13-20)*

11 Ñehua, ñeñt atet netma'ntatasa ñorra'pa' ñeñtpa' atet notenes: Ñeñt a'parre'tyene' puerets, ñeñt pueretspa' añ notenes Yompor po'ñoñ allempo serrpare'teñet. 12 Añ puerets ñeñt çhapyesets toño'mar ñeñtpa' añ notenes acheñenesha' ñeñt e'mñnotenayen Yompor po'ñoñ. Allempo e'mñnotuetpa' allorocmach huapa oneñet o'ch alla puerratañperranet Yompor po'ñoñ pueyoçhretof. Attoña amach mueneñeto o'ch ame'ñenet, attochña ñetpa' amach a'queshpataretterreto. 13 Ñaña ñeñt çhapyesets mapuetro'meso'marpa' ñeñtpa' añ notenes acheñenesha' ñerra'm esempo e'mñnoteññañet Yompor po'ñoñ e'ñech pocsheñesha' aguërrñañetañ Yompor po'ñoñ. E'ñech cohuen ame'ñeretañ tarraña ñetpa' mamecpach atet pet. Tarro'mar ñetpa' atet penet ñerra'mrrate' narmets ñeñt chepuets mapyo amach eñalle puerech. Tsapatoneña ñerra'm o'ch huapanet topateñets, ñetñapa' o'ch alla caçhpuerrñañet Yompor po'ñoñ. 14 Ñaña puerets ñeñt çhapyesets ajmo'mar, ñeñtpa' añ netma'ntatena po'potantañ acheñenesha' ñeñt e'mñnotenayen Yompor po'ñoñ. Ama'tcha' çhapanetañ mame' pueyoçhreto, tarraña ñetpa' allo'nach senet aña atarr co'tape'chenet ñeñt lleca'yenet arr patsro ñeñt e'ñe ñocpueta. Añach muenenet o'ch esocmañen es echyenet attoch allo e'ñe cosha'yenet. Attoña ñetpa' amach erroteno't orrtatoñeto ñeñt atarr sherbets Yomporecop. Ñetpa' e'ñe atteta ñerra'm narmets ñeñt çha ca'matuerr ajma' amach erroteno't ellom're'tyeseto. 15 Ñaña añ puerets ñeñt çhapyesets e'ñe cohuen patso ñeñt e'ñe cohuen cheparsatspa' ñeñtña toma'ntenaya po'potantañ acheñenesha' ñeñt e'mñnotene' Yompor po'ñoñ. Ñetñapa' atto ame'ñeññañet Yompor po'ñoñ amach pusereto çhoch eñochet pueyoçhreto attoch e'ñe cohuen ma'yoçhroñet Yompor po'ñoñ. Chocmach orrtatyenet ñeñt atarr sherbets Yomporecop amachña çha caçhpueñeto. Attoña ñetpa' e'ñe atet penet ñerra'm narmets ñeñt atarr aton ellom're'tyets.

*Arrpa' all toma'ntatanet lampareñ atto çhojo'tampeney
(Mr. 4.21-25)*

16 Jesús'pa' alla toma'ntaterraneterr po'poñoneñ; ñeñtpa' atet otanet:

—Ñerra'm esempo ya'llchaten lampareñ ñeñtpa' ama añecpaye' ya'huortateñe o'ch alla ye'rramañper coyño. Ñaña ama añecpayaye o'ch alla yener o'pono't yemaye'pnaçho. Añecopña ya'huortatenña lampareñ o'ch yene' enonet attoch çhojo'tam'pesuan allohuen acheñ ñeñt be'tosçhets o'pono pocollo. 17 Tarro'mar allohuen ñeñt ama eñotpahuoyaye ama't ahuatoteñ, te'ñapa' o'ch e'ñe orrtataretterra attoch e'ñech eñotataretterret e'ñe poctacma.

18 Ñeñto'marña sapa' señotena'te' e'ñete' po'ñoçh cohuen se'mñnoteññañ Yompor po'ñoñ ñato'pa' amate'. Esha'te' çhena pueyoçhro ama't e'ñe allpona Yompor po'ñoñ, elloña Yomporpa' allo'nach eñotatnenanet nanac shonte'. Tarraña esha'ña ñerra'm ama çhenaneto pueyoçhro tarro'mar ñetpa' ama po'ñoçhaye' aguëññañeto Yompor po'ñoñ ama't allpon eñotenetañ pueyoçhro ñeñtñapa' çhach puerratañperranet Yompor.

*Allempo huapoña Jesús pachor ñaña pa'mo'nasheñnesha'
(Mt. 12.46-50; Mr. 3.31-35)*

19 Allempoñapa' huapa Jesús pachor epuet ñaña pa'mo'nasheñnesha'. Chapuet allpa' shonte' acheñenesha' ñeñt emchorrenaya Jesús. Ñeñto'marña ñetpa' ama eshcaye' entosetoña Jesús allame'tets. 20 Allempoña acheñenesha' ochet Jesús:

—O'ca'ye huapaña pachor ñaña pemo'nasheñnesha'. Ñetpa' a'yote'tsa'yenet, mueneñet o'ch entenpeta'.

21 Ñaña'pa' atet otanet:

—Allohuen ñeñt e'mñnotene' Nompor po'ñoñ ñetña ñerra'm atet pohuenet ñeñt atet oteney, ñeñtña e'ñe po'ñoçh nachor nepen ñaña ñeñtña e'ñe nemo'nasheñ nepen.

Allempo a'mchecherran Jesús huomenquëshá' ñaña sa'p ñeñt emo'yarertetsa
(Mt. 8.23-27; Mr. 4.35-41)

²² Allempo çherrerr pamtarr Jesúsñapa' a'tapos noñto epuet ñaña pueyochresha'. Ñaña'p' atet otanet:

—Te'pa' o'ch ahuañpsey yomta'n.

Allempoñapa' ahuañpset noñto. ²³ Allempo ahuañpset Jesúsñapa' alla ma' noñto. All muenpa' machayota huomenquëshatañpesnomuet. Emo'yare'ñapa' cha esha'tena noñto, atteñapa' chorramoch oñ noñto cha muene' esha'tatan noñt. ²⁴ Atteña pueyochresha'ñapa' ponemyet Jesús all muenpa' opueret, atet ochet:

—Maestro, po'ñoçhuachca'ye yoclla'huerrate'.

Jesúsña tanterrapa' e'ñe po'ñoñoña a'mtsoññetueran huomenquëshá' ama't ñaña emo'yare'pa' o' e'ñe a'mtsoññetuer. Attoña ñetpa' o' alla e'ñe cohuen muechetamperret. ²⁵ Allempoña Jesús'p' otanet:

—Eso'mare'tña sapa' ama e'ñeye' seyemtenno.

Ñetñapa' cha atarr nanac yorennet. Atta cohuanrrorteñet ñetñapa' atet otanna'tyeset:

—Ta'mca'ye añ acheñerpa' esona'tarte'ca'ye. Atarrepa't es a'mchechaten, ama't po'ñoñoñapa' a'mchechaterran huomenquëshá' ama't ñaña emo'yare' oñ.

Atto gadaro'marnesha' ñeñt chorrena oneñetpa' huapa Jesúsesho
(Mt. 8.28-34; Mr. 5.1-20)

²⁶ Allempoñapa' o' etsotoset yomta'n all senet. Allpa' añ pa'ney pene' gadaro'marnesha' alla yot Galileot. ²⁷⁻²⁹ Allña sohuosa Jesús noñto'p' allñapa' huapoña puesheñarr yacma ñeñt allo'marnesha', tarraña ñapa' añ chorrenaya oneñet patoner. Ñeñtñapa' ahua'otetñeñ atta chopeñe'chyen muelle'mcot, ama shetamteno. Ñapa' alla yeçhena all pampueñet arromña'etchno ama pocolloye' yeçheno. Ñehua, oneñetpa' allempo rromuenan yacmapa' epaye' ottatse'tache't allempoteñ. Pamo'tsesha'ñapa' ahua'ch rromuetpa' o'ch huanquëtañ attoch cohuañpeñet. Ñaña'p' çhach tsepe'tuanman allo huanquëññañet pot ñaña pa'tac oneñetñapa' ahua'chcho' matach a'yo amayo. Allempoña entapan Jesús'p' rrana'nma huomenc, mata Jesúsesho, rromosñaña allame'tets. Allempoña Jesús'p' otosan oneñet ñeñt chorrenaya yacma:

—Te'pa' o'ch pecaçhpa'ner añ acheñer.

Ñeñtña chorrena oneñetpa' ñaña'p' atet otapan Jesús:

—Eso'maruachca'ye Jesús o'pa'tsre'moçhtana'tosen, papa' ñeñte'p' Ñeñt Nanac Parets Puechemere'p'. Te'pa' notapa'p'cha' amach pecoñchatatstosno.

³⁰ Jesúsñapa' alla oterranerr ñeñt chorrena oneñet:

—Papa' ¿eso'tña pesoçhena?

Ñaña'p' atet oterranerr Jesús:

—Napa' añ neso'cheñ Legión.

Ñehua, añ so'chñets ñeñt otenet shonte' nanac, tarro'mar ñeñt nanac patoner oneñet ñeñt chorrenaya. ³¹ Ñehua, oneñet'etchnoñapa' atet otare'tapet Jesús:

—Amach arra pemñatstosye o'pono coñcha'puetso.

³² Ñehua, allpa' a'yente'tsa'yen shonte' chañchoçhno ñeñt rratse'tyets aspentonet. Ñeñto'marña oneñet'etchnopa' atet otare'tapet Jesús:

—Ñerra'm çhoch muene' erroten pe'poseypa' arrña pemñaye'chosey chañchesho allochñapa' o'ch yechorra'yerrerr ñaña chañchoçhno.

Jesúsñapa' allenta otanet:

—Ama'tca'ye orrasca'ye.

³³ Allempoña oneñeñechnopa' cachpa'huaneret yacmapa', alla chorrereterri ñaña chañchochno. Chañchoñapa' allempo chorrosya oneñeñechnopa' chepa'tcha' matrra'tua allohuen ñegoneñ shorcha'tuos allotpa' e'ñe ño'shrra'tuosa oño.

³⁴ Acheñenesha'ña ñeññ cohuanpene' chañcho allempo eñchet atet pa chañcho o' shorcha'tua oño, ñetñapa' allenta matrra'tet ñamet pueyorñoñ ahuanmuet anetso. Allñapa' serrpare'tyesoset ñaña ora allohuen allampaño'mar. ³⁵ Acheñenesha'ñapa' allenta ahuanmuet ahuo'ch enteñeta'. O' cha'cha'tet Jesúseshopa' allñapa' entoset yacma ñeññ chorre't oneñeñ. Alla anen allame'tets Jesús pa'tcoñ ashtamañ. O' eñoterra o' cohuenterra. Ñetñapa' cha atarr mecha'na'toset. ³⁶ Añña ñeññ entene' Jesús atto cachpatatenan oneñeñ acheñ, ñetñapa' allenta serrpare'tatapet ñeññ huacha'ttsa anetsoñ. ³⁷ Allempoña allohuen acheñenesha' ñeññ ye'cha'yetsa all ñeññ gadaro'marnesha' ñetñapa' pueyorñoñet atet otoset Jesús:

—Te'pa' o'ch ahuerreñ arroñ.

Allempoña Jesúsapa' a'terr noñto o'ch ahuerri. ³⁸ Yacmaña ñeññ chorre't oneñeñ ñañañapa' allenta otan Jesús:

—Napa' nemneñca'ye te'pa' o'ch nocterreñ.

Tarraña Jesúsñapa' ama muenache, atet och:

³⁹ —Allapach, te'pa' o'ch ahuerreñ pepaclo pamo'tsesho'mar o'ch peserpare'tatuerranet ora allohuen atto Yompor atarr yenposeñ.

Ñañañapa' atet otue Jesúsapa' atetcho' pa. Allenta ahuerri serrpare'tyesnerrets ora anetso'mar atto Jesúsapa' atarr nanac yenpos.

Atto Jesúsapa' tantaterran Jairo po'señ ñaña all a'crratnoman puesheñarr coyanesha' ñeññ a'plla'nmue' pa'shtam

(Mt. 9.18-26; Mr. 5.21-43)

⁴⁰ Allempoña alla cherr Jesús añeñta'n allot ta ahuaña. Acheñenesha'ña allpa' e'ñe pocsheñesha' agapapueñet tarro'mar o' atarr cohueret o'ch huerra. ⁴¹ Allempoña allpa' huapoña puesheñarr añcha'tareñ añ pa'so'cheñ Jairo. Ñapa' ñeññ puesheñarr ñeññ añcha'tarettetsa judionesha' po'prahuo. Ñañañapa' alla rromosa Jesús pa'tcoñpa' atet otosan Jesús:

—Napa' nemneñ o'ch pöcterren nepaclo, ⁴² tarro'mar neseñ ñeññ nepatrrorpa' cha atsna'ten o' a'po'ntsa'mocha.

Ñehua, ñeññ po'señpa' allponte' echenan po'charña charra' puechena epa char.

⁴³ Allempo coñner Jesús coñhuaner ñaña shonte' acheñenesha' cha emchorratse'tnomet, cha to'mama'tneñet. Allñapa' coñnmanet ñaña puesheñarr coyanesha' ñeññ atsna'tets. Charra' puechena epa char ñeññ atto chocma yella'yena. Ama't epaye' partata o' a'gasta'huahuan po'çllayor atto parteñet amaña eseshaye' a'crraterraye.

⁴⁴ Ñañañapa' all coñnenan Jesús pa'che'ñoñ, allñapa' a'pñlerrñaña' pa'shtam pa'rrpe'moñ. E'ñe a'pñlla'hue' pa'shtampa' allorocma maserrña po'rras, o' metuer ñeññ atto mue-roçhtena.

⁴⁵ Jesúsñapa' atet otanet:

—¿Esesha'tña o' a'pñlla'nmuenña neshtamoñ?

Ama eseshaye' eñoratsa. Pedroña ñaña ñeññ epuet yemtena, ñetñapa' atet ochet Jesús:

—Maestrocha' papa' penteñte' shonte' acheñenesha' ñeññ allotemeña peto'mama'tnene'. ¿Eso'mare'tña pötenña esesha'te' pa'pñllene' peshtamoñ?

⁴⁶ Tarraña Jesúsapa' atet oterraneterr:

—Napa' neñoteñ po'ño'ch puesheñarr acheñ e'ñe puenneñoñ a'pñllenen neshtamoñ tarro'mar napa' neñotena napa' o' na'crrach e'ñe na'nehuamencoñ atto a'pñllenen.

47 Coyanesha'ña allempo ñapa' eñotena amach errotenot a'nasoto. Ñapa' cha pa'shmuena pueyorñoñ concorposa Jesús pa'rrpōt. Allñapa' e'ñe a'meña'huosan ñapa' añecopña a'pñenan Jesús pa'shtam attoch correrra e'ñe cohuen. Allñapa' atet otan allohuen acheñenesha':

—Na allempo na'pñloñ Ayochreshat pa'shtampa' ñeñña na'crraterre' allorocma.

48 Jesúsñaapa' atet otan coyanesha':

—Papa' nesñeshacha' atto atarr peyemtena na attoña te'pa' o' e'ñe na'crratnomuep. Te'ñapa' o'ch ahuerreñ e'ñe peñmañesha'.

49 Allempo eñorena atetpa' allñapa' huacha'ta ñeññ huetsa añcha'taret Jairo pa'pacloñ. Ñetña huapuetpa' atet otoset Jairo:

—Peseñpa' o'ca'ye rroma. Te'ñapa' amach allo'na pa'tsrre'moçhtana'tatsche Maestro o'ch coterreñ pepaclo.

50 Jesúsña ama't e'man atet otoset Jairopa' ñañapa' atet otan Jairo:

—Papa' amach cha pe'charrtatsto peyoçher, nachña e'ñe peyemta attoch correrraña peseñ.

51-53 Allempoñapa' ahuanmuet Jairopahuo. Chapuet pocollo allñapa' allo'tsa'yen shonte' acheñenesha' all yahuanrrortenet, ya'na'teñet arromñañ. Jesúsñaapa' otosanet:

—Amach atarr seyahuatsto. Añ shopshesha'pa' amaca'ye çhoye' rromueno çhaca'ye muen.

Ñetña pachmare'teñoçetpa' atta che'tatsetyesapet tarro'mar ñetpa' e'ñeca'ye eñoteñet çhoca'ye rromuen. Allempoña Jesúsñaapa' ama muenatano allohuen acheñenesha' o'ch be'toset allo'tsen arromñañ. Ñapa' aña muenat Pedro ñaña Juan, ñaña Jacobo ñaña arromñañ puepapar ñaña pachor ñeñña epuet be'tosçha'toset allo'tsen arromñañ.

54 Allempoña Jesúsapa' rremota'tosan shopsheshañ pototpa' po'huamencocma otos:

—O'ch nesñe notosep, te'pa' çhoça tanterrtsa.

55 E'ñe otue' atetpa' allente'pa'tcha' o'rrerrerra cha tanterrtsa. Jesúsñaapa' otanet:

—Te'pa' o'ch serratallme'cher.

56 Puepaparña ñaña pachorpa' ñetñaapa' atta cohuanrrorteñet. Jesúsñaapa' atet otanet:

—Amach esesha' sota'psa'tatsto ama't puesheñarra ñeññ atet o' norrtatennasa' sepaclo.

9

Allempo Jesúsapa' llesensan pueyochresha' çharrasheña ñeññ puechetsa epsheña (Mt. 10.5-15; Mr. 6.7-13)

1 Allempo çhapa'muen allempo Jesús agota'muenan pueyochresha' çharrasheña ñeññ puechetsa epsheña. E'ñe apçha'huet ñeshopa' ñañapa' atarr ahuanmencat pa'yesanet, attoña apanet ñaña llesens attoch caçhpatatyeret oneññ acheñenesha' ama't erra'tsena ñeññ atarr mueroçhtatyenahuet. Ñaña ahuanmencat panet attoch a'crratyaset acheñenesha' ama't erra'tsena ñeññ osyenahuet. 2 Attoña llesensanet attoch ahuanemyeset pa'namen anetso'mar serrpare'tyesnomuet Yompōr po'cohuenña atto atarr ayochreshattena ña. Ñaña añecpa'ñaña llesensenanet attoch a'crratyaset acheñenesha'. 3 Ñaña atet otapanet:

—Amach es sanmatsto ama't coñe'ta allcha' sechopeñe'chyes—ama't secarra, ama't sebolsa, ama't ñeññcha' serra'yesnom ama't seçllayora ama't e'ñe epma seshtampa' amach sanmatsche sechope'chpayo. 4 Alla otterraneterr:

—Ama't errach pocollo seçhap allach sommosa allponmat esempohuach ahuerrenserr po'poñ anetso. 5 Ñerra'm erra anetsro ñeññ allo'marnesha'ña ama cohuenaye' agapasetopa' o'ch senñterrrer ñaña allot. Ñerra'm allempo senñterrrerña ñaña allot

ñeñña setco'tsa'yen pañe'te' patspa' čhoch sepa'shetca'tyesnomña setac. Attochña allo'marnesha'pa' o'ch señotatnomanet ñetpa' amaca'ye pocteye' entenanetoña Yompor.

⁶ E'ñe ñeñña otaretetuetpa' ñetña'pa' allenta ahuanmuet o'ch chopeñe'chyeset erracmañen anetso'mar. Allña'pa' añ serrpare'tyesnomuet cohuen ñoñets alloch yequeshperra. Ñaña all chopeñe'chyeset erracmañenpa' allña a'crratyeshmet ñeññ atsna'tyets.

Allempo e'ñe cohuen es orrtatyesh Jesús, Herodesña'pa' čha otapañ Juanañe' o' tanterra ñeññ apataye't acheñ Yomporecop

(Mt. 14.1-12; Mr. 6.14-29)

⁷ Añcha'taretña Herodespa' ñaña'pa' atet e'mare'tenan Jesús ora ñeññ allpon atet pa'yena. Ñaña'pa' čha atarr llequena tarro'mar patanta'tets acheñenesha'pa' atet otyenet te'pa' o' orrterra Juanañ, o' tanterra rromot. (Herodespa' añña atarr llecatene' tarro'mar ñapa' ña pechate' Juan ahuaña.) Ñeñño'marña ñapa' ñeñña nen pueyočhro atto acheñenesha' otenet ahuo' tanterra Juan rromot. ⁸ Po'potantañña'pa' atet otyenet:

—Elíasoñca'ye o' orrterra.

Po'potantañña'pa' ñetpa'cho'ña atet otyenet:

—Añpa' ñeññca'ye a'mtaye't Yompor po'ñoñ ahuañ, te'ña'pa' o' tanterra rromot.

⁹ Añcha'taretña Herodespa' atet ot:

—Napa' neñotena naca'ye pechate'ña Juan ahuaña. Esesha'huañaca'yeña ñeññ orrtatene' ñeññ ama't ahuañapa' ama yentare ñeññ atet atarr ne'mare'ten.

Ñeñño'marña ñapa' atarr mueneñ o'ch entan ñeññ Jesúsotets ñeññ orrtatyene' ñeññ ama puentare acheñenesha'.

Allempo Jesús'pa' rratenan shonte' acheñenesha'; ñeñña acheñenesha'pa' allo'tsen amnarocho mil

(Mt. 14.13-21; Mr. 6.30-44; Jn. 6.1-14)

¹⁰ Allempo huacherra Jesús pueyočhresha' ñeññ llesensa'yes ahuaña. Ñetña'pa' o' čhacherret Jesúsesho, serrpare'tatyeshuere Jesús allohuen allpon atet pa'yeshet allemeñ anetso'mar. Allempoña Jesús'pa' ahuanman pueyočhresha' e'ñe ñaptochayet, chapuet all ama acheñempaño'yaye all allame'tets anetso, ñeññ anetspa' añ pa'so'cheñ Betsaida.

¹¹ Tarraña acheñenesha'ña'pa' allempo e'mare'chet o' ahuanmuet all, ñetpa'cho'ña allenta ahuanmuet ñamet. Čačha'tet Jesúsesho ñaña'pa' e'ñe cohuen agapanet. Allña'pa' serrpare'tatyeshuerraneterr atet penaña Yompor po'cohuenña atto atarr ayochreshattena ña. Ñaña allpa' a'crratyeshuerranerr ñeññ atsna'tyets.

¹² Atteñapa' o' ellerren. Añña pueyočhresha' čharrasheña ñeññ puechetsa epsheña ñetña'pa' oteñeta' Jesús:

—Te'pa' o'ch pemueñhuer acheñenesha' ahuanemyerretepa' anetso'mar allampaño allcha' mayeshuerrret allcha' entyeshuerrret puerrar ñeññcha' rra'yeshuerrret. Tarro'mar te'pa' arro'tseney all ama acheñempaño'yaye.

¹³ Tarraña Jesús'ña'pa' otan pueyočhresha':

—Sachca'ye apa'yeshahuet ñeññcha' rret.

Ñetña'pa' atet ochet:

—Ya arrpa' amaca'ye es yecheno ama't coñe'ta. Yapa' e'ñe amnara pan yechen ñaña epa'toll cac. Ñato' yapa' o'ch ahuey anetso allcha' yerañña' rreñets ñeññcha' yerrach allohuen shonte' acheñenesha'.

¹⁴ Ñehua, allo'tsen shonte' acheñenesha' amnarocho'te' mil yacmanesha'. Allempoña Jesús'pa' atet otan pueyočhresha':

—Te'pa' o'ch soch acheñenesha' anorrcha'tyeshete'pa' e'ñe ñopa'ttsocmuet, e'ñech amnarocho'ttsocma čharrapa'tets anorrcha'tyeshet.

¹⁵ Pueyochresha'ñapa' atet'cho' pet, anorr'cha'tatyaset acheñenesha' allohuenet.
¹⁶ Allempoña Jesús'pa' agapan ñeñt' amnar pan ñaña epa'toll cac, cohua' enone't parasyoso'tam'psan pan. Allempoñapa' shota'tan pan, shetse'tan ñaña cac. Apanatyesan pueyochresha', ñet'ñapa' epatyaset allohuen acheñenesha' ñeñt' anorr'cha'tyets all. ¹⁷ O'ña epa'huet allempoña o' rrallme'chet allohuenet, e'ñe yetrra'tuahuet. O'ña yetuahuetpa' čha a'pchatyaset ñeñt'ñapa' a'yapačheret. Ñeñt'ña a'yapačherretpa' čhepa'tcha' chorrats čharra' puechena epa cañter e'ñe tamo'yare'.

Atto Pedropa' otan Jesús' papa' paña Yompor Puechemerep' ñeñtep' Cristotosets
 (Mt. 16.13-19; Mr. 8.27-29)

¹⁸ Allempoña pam'tarrpa' allo'tsen Jesús all ma'yochena e'ñe ñap'tochayet pueyochresha' epuet allo'tsen. All'ñapa' atet' otan pueyochresha':

—¿Erro'fena't otyenenña allohuen acheñenesha' napa' eseshante'?

¹⁹ Ñet'ñapa' atet' otyeset:

—Patantarr acheñenesha'pa' atet'ca'ye otyenpet papa' Juanañpo'te' ñeñtepo' apatañtatset' Yomporecop. Po'potantaññapa' atet' otyenpet, papa' Elíasopo'te'. Po'potantaññapa' atet' otyenpet papa' ñeñtepo' ñeñt' a'm'taye't Yompor po'ñoñ ahuat. Te'ñapa' ahuo' alla petanterra perromño't.

²⁰ Allempoñapa' alla a'p'to'terraneterr:

—Sañapa' ¿erro'fena't sotenenna sa?

Pedroñapa' eñoratsapa' atet' och:

—Papa' ñeñtep'ca'ye Parets Puechemerep' ñeñtep' Cristotosets.

Atto Jesús'pa' eñotatan pueyochresha' ñapa' amtsare'terrach
 (Mt. 16.20-28; Mr. 8.30-9.1)

²¹ Jesús'ñapa' alla o'terraneterr:

—Ama't puesheñarro'ta amach esesha' sota'psa'tatsto napa' ñeñten Yompor Puechemeren ñeñten Cristotets. E'ñe po'ñočh notenes amach esesha' sota'psa'tatsto.

²² Elloñapa' alla o'terraneterr:

—Napa' Ñeñten Acheñetosets, atet' anaret' nocop, nanaccha' na'mueročhtatare'terra. Amach esesha' pocteye' nenterraye—ama't ñeñt' pompornesha' pen allohuen judionesha', ama't ñeñt' pa'm'cha'tare'ternesha' pen allohuen judionesha' po'cornaneshar, ama't ñaña ñeñt' etsotayenayeñ ñoñets ñeñt' atet' anaret' judioneshacop. Ama't ñetpa' amach eseshaye' neyemterraye. Attachña napa' muetsataterretcha'. Tarraña poma'pamtañopa' o'ch alla tantaterren Nompor.

²³ Elloñapa' alla o'terraneterr allohuenet:

—Ñerra'm esesha' muenene' o'ch co'terrnet na e'ñe po'ñočh attoch neyochresha' neperranet, añ poctetsa sehuanmuete'pa'ña ñeñt' atet' muenenet e'ñe ñocueta. Attochña ñetpa' o'ch e'ñe toma'nteret ñeñt' chechnene' po'corsoch ama't pate'tets yet' allcha' mueročhtet ñamet. Attochña co'terrnet e'ñe poctacma. ²⁴ Tarro'mar ñerra'm esesha' e'ñe añ muenenet o'ch correna atomat attoch e'ñe coshenet arr patsro, ñet'ñapa' čhach a'chencatet' ñañeñeta. Tarraña ñerra'm esesha' e'ñe pocte' entene' o'ch sohuanmuet ñeñt' atet' muenenet ñeñt' e'ñe ñocueta arr patsro attochña ñetpa' añach ma'yochret ñeñt' cohuentetsa nocop, ñeñt'ña acheñerpa' corretsach pocsheñeshocmañen tayoteñ e'ñe errponañohuen. ²⁵ Ama't errponena'paren esocmañen es yeyoratsetyes ora allpon ñeñt' yentyen añe patsro, tarraña ñerra'm ñeñtach e'ñe ya'chencaterre' yecamquëñohuen ñeñt'ñapa' ama't coñe'tapa' amach es sherberrye.

²⁶ Tarraña ñerra'm erra'tsencha' nepenquë'naya na te' neñoñpa'čo'ña čha apencočhen entennanet, napa'čo'ña nepenca'huerranetcha' esempoch nohuerra. Po'ñočh napa' Ñeñten Acheñetosets nohuerrach e'ñe na necohuenño't, ñeñtara Nompor po'cohuenña

epan ñaña po' mllaño ñeñaneshar ñeñ e' ñe torra'yetsa Partsocop. ²⁷ Po'ño chca' te'pa' o'ch notas: Patanta'tsos ñeñes arro'tsa'yenes te'ña ama't ama serromhuena'pa' o'ch senterrñañ Yompor po'cohuenña atto atarr ayochreshatterra ña.

Allempo Jesús'pa' po'poñetañpana pueyochresha'
(Mt. 17.1-8; Mr. 9.2-8)

²⁸ Allempo met allponmat ñato' po'psocmatño Jesús'pa' ahuanman pueyochresha'; añ anem Pedro ñaña Juan ñaña Jacobo. Arr anmanet aspeno allcha' ma'yochena' Jesús. ²⁹ Allña ma'yochosapa' machayotepa'tcha' po'poñetañpsosanet. Pa'clloyotpa' cha po'poñ orrtosanet. Pa'shtamohuen atarr huallama'to poptosa. ³⁰⁻³¹ Allñapa' machayotepa'tcha' orrtanet Moisés ñaña Elías. Ñetpa'cho'ña atarr cohuen orreyenet. Allñapa' serrpare'toset epuet Jesús. Ñetpa' añ serrpare'tenet atto o' chapmoch attoch rroma Jesús o'ch ahuer pue'ntaño. Ñetpa' atet otyenet, arrcha' atet peret Jerusaléño. ³² Ñehua, Pedro ñaña ñeñ epuet allo'tsen, ñetñapa' ama't atarr moñe'tenetañpa' alla e'ñe achñesuerret, attoña entoñet Jesús po'cohuenña ama't ñeñ parro tomchen. ³³ O' ma'naterrmocha Moisés ñaña Elías attoch sa'neret Jesús. Pedroñapa' allenta eñora, atet otan Jesús:

—¡Atarruaca'ye Maestrocha' cohueno'tseneyte' arr! Ama't pocte' penteñe o'ch yatatomonas ma'ppahua querpachet, puepahuarra' p'ocopcha', po'ppahueñpa' Moisésocopcha', po'ppahueñpa' Elíasocopcha'.

Pedropa' pueyorñoñ atta muene' otatset, ama eñoch errotencha' ot. ³⁴ Allempo eñorena Pedropa' cha orrtosahuet os chepa'tcha' a'pomañpsosanet. Atto a'pomañpsosanet ospa' ñetñapa' atarr nanac yorenet. ³⁵ Cha e'morrtostsa ñoñets osoñ; ñeñña ñoñetspa' Yompor otosahuet; ñeñtpa' atet ot:

—Añmapa' ñeñ no Nechemer ñeñ atarr nemuerena ñeñtcha' e'ñe cohuen se'mñoterr.

³⁶ Allempo o'huañ e'morrra ñoñetspa' o' e'ñe ñapñamerra Jesús. Pueyochresha'ña allempopa' atta a'nasoteñet. Ama't pueheñarroñetapa' ama otuerreto ñeñ atet o' entuahuet.

Atto Jesús'pa' a'crraterran cheshachor ñeñ otaten oneñeñ
(Mt. 17.14-21; Mr. 9.14-29)

³⁷ Tsapaña allempo huaçhenet aspeno'tpa' allñapa' shonte' acheñenesha' ñeñ huaçha'ttsa ñeñ pocterrahuet. ³⁸ Allo'tsen pueheñarr yacma ñaña'pa' atet otosan Jesús:

—Maestro, napa' atarr nemneñ o'ch pentennana' nacñeter. Napa' e'ñe ñeñtetollapa nepatror. ³⁹ Ñapa' ñerra'm esempo rromueñ oneñe'tpa' chach rranare'ta o'ch otachpa' o'ch ata'tach patso chach amtan pa'po'. Attoña atarr atserrpatsetateñ. Ama mueno o'ch a'rroyer. ⁴⁰ Napa' o' notuosnañña peyochresha' o'ch caçhpatateret oneñeñ tarraña ñetñapa' ama erroñ peto attoch caçhpatateret oneñeñ ñeñ atarr mueroçhtatene'.

⁴¹ Jesúsña'pa' atet ot:

—Sapa' ñeñes acheñes ama't mameshapa' ama ayemtenaye' sentpenno, chach po'poñ sentuena seyoçhro nocop. O' allponmatuanen allo'tsenen arr patsro napa' atta atarr na'huantennas, atta necuenes ñato' atto'tpa' o'ch same'ñerna.

Allempoñapa' atet otan yacma ñeñ otene' o'ch a'crratoñ puechemer:

—Te'pa' o'ch panmon pechemer arr.

⁴² Allempo anem Jesúseshopa' oneñeñña'pa' alla rromuerranerr cheshachor o' alla otatererr alla ata'tatererr patso. Jesúsña'pa' atet otapan oneñeñ:

—Te'pa' po'ño ch o'ch notañ, pecaçhpa'nerñaca'yena añ cheshachor.

Allempo a'crrater Jesús o' alla apuerrñañ pompor. ⁴³ Allohuen acheñenesha'pa' atta cohuanrrorteñet. Ñetpa' e'ñe eñoteñet Yompor po'partsoña orrtetsa.

Arrpa' atto Jesúspa' eñotaterraneterr puepocheño ñapa' chocmach muetseret
(Mt. 17.22-23; Mr. 9.30-32)

Atta epaye' cohuanrrorteñet atarr cohuen enteññañet po'partsoña, tarraña Jesúsñapa' alla yerpaterranerr pueyochresha', ñeñtpa' atet otanet:

⁴⁴—Te'pa' se'mñnoten e'ñe cohuen, amach sepsatsterrnana neñoñ ñeñt atet notenes te'. Na Ñeñfen Acheñetosetspa' pomataterrnetcha' attochña erroñuanencha' perrnet.

⁴⁵ Ñeñña ñoñetspa' ñetñapa' ama't puesheñarroñetapa' ama eshcaye' eñotenaye' enteñeto tarro'mar ama chena' allempoch chapamet pueyoçhreto. Ñetña pueyorñotetpa' ama eseshaye' a'p'to'tenaye este' otenanetña atto eñorana'tenanet.

All eñotateney ñeñt acheñer e'ñe po'ñoçh atarr asherben enten Yompor
(Mt. 18.1-5; Mr. 9.33-37)

⁴⁶ Po'pocheñoña pueyochresha'pa' e'ñe ñagattseta otanna'tyeset:

—Ta'mca'ye erra'tsenoteyte'ñaca'ye ñeñtey atarr sherbets ñeñtey atarr añcha'taretoyen enteney acheñenesha'.

⁴⁷ Jesúsñapa' e'ñe eñotenanet ñeñt atet cotape'chatse'tyenet ñet pueyoçhreto atto e'ñe cohuen entyenet e'ñe ñañeñeta. Ñañapa' cheshatolla chore'tpa' tomach e'ñe ñesho,

⁴⁸ allempoñapa' atet otanet:

—Erra'tsenotes sa ñerra'm e'ñe cohuen saguëñ ama't ñeñt ama asherbenaye' enteneto atet ñerra'm añ cheshatoll tarro'mar sapa' na same'ñena, na'ñaña e'ñe cohuen saguën. El-loña ñaña erra'tsenotes sa ñeñtes naguëne' na, ama e'ñe naptocheye' saguëno, añe'ñaña saguënnan Nompor ñeñt nellsensene'. Tarro'mar ñerra'm erra'tsencha' pocte' entene' o'ch yenpuenan ama't ñeñt ama esoye' enteneto, ñetñapa' atarrcha' po'ñoçh asherben entenanet Yompor.

Atto eñotateney ñeñt ama choye' yepatare'tenaye ñeñña po'ñoçhpa' e'ñe parrocmayeyenpannena

(Mr. 9.38-40)

⁴⁹ Allempoña pueyochresha' ñeñt Juanpa' atet otan Jesús:

—Maestro, ya ahuañapa' atet yeñch puesheñarr yacma ñeñt caçhpatatene' oneñeñt acheñ. E'ñe puechore'teñoñep pa peso'chñopa' oneñetpa' caçhpa'nerran acheñ. Yañapa' ama pocteye' yeñche tarro'mar ñapa' ama parroye' yeyemteno. Ñeñto'marña yapa' yoch:

—Amach atet pepatsto.

⁵⁰ Jesúsñapa' atet otanet:

—Amachca'ye sepatare'tatsche tarro'mar ñerra'm ama cho epatare'tenye yaña ñeñña po'ñoçhpa' e'ñeca'ye parrocmayeyenpannena.

Allempo Jesúspa' cotape'chaterran cohuen pueyochresha' epsheña, ñeñtpa' Jacobo ñaña Juan

⁵¹ Chapmoch allempoch o'ch alla ahuer Jesús pue'ntañopa' ñañapa' atarr sechena o'ch ahuer Jerusaléño. Ñeñto'marña mueñan pueyochresha' ñeñtcha' otrra'tatsa ⁵² o'ch ahuet samario'marnesha' pa'netsro o'ch e'noset muets allcha' chap ñaña Jesús allcha' amesnom epuet pueyochresha'. ⁵³ Tarraña samario'marnesha'ñapa' ama mueneto o'ch agapare'ttet all pa'netsreto, tarro'mar ñetpa' eñoteñet arr sechenet o'ch ahuet Jerusaléño.* ⁵⁴ Ñeñto'marña Jacobo ñaña Juan ñetñapa' atet ochet Jesús:

—Partseshacha' ¿ama't pocte' penteñe yapa' o'ch yenam huapuepa' tso' entoñ? allochñapa' ñeñtcha' a'poyatatuerrahuet ñeñtcha' e'ñe a'chencatuerrahuet ñeñt atet pe't Elías ñeñt a'mtaye't Yompor po'ñoñ ahuat.

⁵⁵ Jesúsñapa' atta cohuanetpa' atet otanet:

* **9:53** Ñehua, yapa' yeñoteñ samario'marnesha'pa' ama mueno o'ch amo'tstana jerusaléño'marnesha' ñeñfara judionesha'.

—Ñeñt atet soctape'chatse'tyenpa' ama't mameshapa' ama pocteyaye. Ama't señoñeña Yomporpa' ama atteye' cotape'chatenyeña Puecamqueñoñ. Ñeñt semnen sapa' po'poña cotapñats. ⁵⁶ Na Ñeñten e'ñe Acheñetosetspa' amaca'yeña añecop nohuapo o'ch na'chencatos acheñenesha'. Napa' añecopca'yeña nohuapa o'ch na'queshpatos allohuen acheñenesha'.

Allempoñapa' o' metach'a'tet allotpa' ahuanmuet po'poñ anetso.

Allempo Jesús'pa' yeçhatan ñeñt muenene' o'ch coter

(Mt. 8.19-22)

⁵⁷ Po'pocheñoñapa' allempo oñemyenet toño'mar allñapa' poctanet puesheñarr yacmapa' ñañapa' atet otapan Jesús:

—Na te'pa' nemneñ o'ch noctare'tyeseþ ama't errohuanencha' pechopeñe'chyes.

⁵⁸ Jesúsñapa' atet och:

—Te'pa' napa' peñotencha' ama't nepacllapa' ama necheñe all neyçhenañ. Ro'quëþpa' çhocma eñall pa'pon allecma yeçhena.† Oteçhnopa'çho'ña çhocma eñall pa'ma' allecma yeçha'yenet. Tarraña naña Ñeñten Acheñetosetspa' ama eñalle ñeñt e'ñe nepaquëll nepen allcha' neþanena.

⁵⁹ Po'pocheñoña Jesús'pa' atet oterranerr po'psheñeñ acheñ:

—Te'pa' o'ch þocta'n attoch po'ñoçh neyochresha' neperreþ.

Tarraña ñeñtña acheñerpa' atet otan Jesús:

—Te'pa' arrcha'ña ñanom pemnaterren o'ch ahuerren apuesho, o'chña nepampa'huera' apañpa' allempochña nohuerrapa' o'ch noctapþ.

⁶⁰ Tarraña Jesús'pa' atet och:

—Acheñenesha' ñeñt ama yerpa'penaye Yompor, ñetñapa' pampanna'tetepa' parro arromñaatecmuet. Tarraña þocoppa' ñeñteþ o' peyerpuera Yompor añ poctetsa o'ch auyeseþ serrpare'tyese' Yompor po'cohuenña ñeñt atto atarr ayochreshattena ña.

⁶¹ Po'pocheño allempo serrpare'ten Jesús epuet ñeñt ame'ñenaya, ñeñtña acheñerpa' atet otan Jesús:

—Napa' Ayochreshate po'ñoçhcha'ca'ye noctapþ. Te'pa' ato't nasuerra' nepacillo attoch neso'tera' namo'tsesha'; allempochña alla nohuerrerrpa' o'ch noctapþ.

⁶² Jesúsñapa' atet och:

—Ñeñt ama e'ñeye' ma'yoçhrenaye attoch torrenet e'ñe cohuen Yomporecop, ñeñtña acheñerpa' amach e'ñe cohuenaye' sherbeno attoch e'ñe epatuan Yompor po'cohuenña ñeñt atto atarr ayochreshattena ña. Ñeñt acheñerpa' atetcha' netma'ntacha: Ñerra'm esesha' orrene' etamapets attoch etaman pats e'ñe cohuen paçharr pa'mro, ñerra'm pa'che'ñoñta cohua'nom ama't mameshapa' amach etsotanoña etamapets attoch e'ñe paçharr etaman pats allcha' nare'tatse't pa'mro.

10

Atto Jesús'pa' mueñan pueyochresha' ñeñt cançhroch çharrasheña ñeñtcha' otatsa

¹ Allempoña Partseshapa' alla llesenserranerr po'potantañ pueyochresha' cançhroch çharrasheña ñeñtcha' otrra'tatsa o'ch serrpare'tyesnomuet. Ñetpa' atetcha' pa'nmuet e'ñech epsheña'ttsocma tet. Arrcha' ta'yeset ora allohuen anetso'mar ñaña ama't allampaño'mar; allochñapa' allcha' oñem ñaña tsapañonet Jesús. ² Ama ahuaneneta' Jesúsñapa' atet otanet:

—Shonte' narmets ñeñt nanac ellom're'tets ñeñtcha' a'yapaçhetañ. Tarraña ataruasañña ñeñtcha' a'yapaçhe'pa' ama atarr atonayaye. Te'pa' añcha'ña sanamoñ pamo'mte' mueñanepañña ñeñtcha' a'yapaçherrets pa'mro. Ñeñtapa' atet toma'ntatanet

† 9:58 Ñehua, Jesús añ toma'ntacha zorra ñeñt berrotets all pa'nyo.

Jesús atto atarr shonte' acheñenesha' ñeñtcha' ame'ñerrtsañ tarraña ñeñtcha' ame'ñaterrahuetpa' ama atarr atonayaye. Añcha'ña yenam Yompor ñeñt Yamo'mte' yepen mueñanepa'ña pa'taruasañer ñeñtcha' torra'yerrtsa ñocop allemeñ anetso'mar. ³ Ñaña sapa' ñerra'm o'ch ahues te'pa' señoachcha' po'ñoach chocmach eñall ñeñtcha' se'moñe'te' ama't sapa' amach cho erroñ sepenanetañe ñet. Ñeñto'marña notenes te'pa' o'ch nemñas e'ñech attes ñerra'm carrnero o'ch ahuo' allo'tsen ma'yarrochno. ⁴ Ñaña amach sanmatsto quelle, ama't sebolsa, ama't po'ptaña sesapatpa' amach sanmatsche. O'ch ahues sema'yorñecma. Ama't esesha'ch sehuomcha'tyesnom toño'marpa' amach alla so'chtatsto. ⁵ Allempoch sechap ama't erra'tsena anetsro all sesen, ama't erra'tsena pocoll allcha' sechappa' ñanomcha' atet seposa. E'ñe sehuomcha'teñoñ ñeñt apaclatesha'pa' o'ch senamatosñañ Yompor pa'nateña. Ñerra'm ñetña po'ñoach e'neññañet Yompor pa'nateña, Yomporña'pa' a'natenanetcha'. ⁶ Tarraña ñerra'm ñetña ama e'neññañeto Yompor pa'nateña'pa' Yomporña'pa' o'ch alla apuerres sa pa'nateña. ⁷ Ñeñte pocollo allcha' e'ñe cohuen agapaset allach sa'posa. Ñeñt rrenet ñet ñeñtcha' rratapaset, ñeñtach serros saña. Tarro'mar ñeñtes torretsa e'ñe pocte' atetcha' tsa'tenset. Amach sommare'tyesatsto allemeñ pocollo'mar, allach e'ñe sommosa puepahuarro. ⁸ Ama't erra'tsena anetsro allcha' secherrerr allcha' e'ñe cohuen aguërrseterr, ama't erroñena rreñets apasetpa' ñeñtach serros. ⁹ Allña'pa' sa'crratyesoscha' ñaña ñeñt atsna'tyets. Allcha' seserrpare'tatyesosanet, atetcha' sotos: "Te'pa' o' yechapatonas Yompor po'cohuenña ñeñt atto ayochreshatena ña. Aña palltetsa o'ch same'ñera attoch e'ñe chaponasa seyochno." ¹⁰ Tarraña ñerra'm erra anetsro allcha' sechap ñeñt allo'marnesha'ña ama cohuenaye' agapaseto, allña toño allecma chopeñe'chyenet ñet o'ch señoatnomanet. Ñeñtpa' atetcha' sotnomanet: ¹¹ "Ama't pats ñeñt o' cheta yetco arr sa'netsro, te'ñapa' o'ch yepa'shetca'tyesnoma attoch señoach sapa' ama't mameshapa' ama pocteye' entenso Yompor. Tarraña ama't atteña'pa' te'pa' o'ch neñoatnomues Yompor po'cohuenña autsa chaponasañ ñeñt atto ayochreshatena ña."

¹² Allempoña Jesús'pa' alla oterranerr pueyochresha' allempo ama seneta':

—Po'ñoach te'pa' o'ch notas, esempohuañen allempoch a'craretetuerra allohuen acheñenesha'pa' añ anetso'marnesha' ñeñt ama cohuenaye' sagapaye te', nanaccha' yorochno'tsenterret allempo. Ama't sodomo'marnesha'pa' amach tama yorochno'tsenterreto atet ñerra'm ñeñt anetso'marnesha' ñeñt ama cohuenaye' sagapaye te'.

*Atto Jesús'pa' eños epo'mar anetsocop all ama ame'ñyeto
(Mt. 11.20-24)*

¹³ Allempoña Jesús'pa' alla oterrrer:

—Nanaccha' llequëntso'tsa'yenes coraziño'marneshacha'; nanaccha' llequëntso'tsa'yenes saña betsaido'marneshacha'. Tarro'mar ama't atarr norrtatyennaseñ nepartsoña sesho, sañapa' amaña soctape'chuerroña ello cohuen Yomporecop. Ñerra'm arrcha'ña norrtatañ nepartsoña tiro'marneshesho ñaña sidóno'marneshesho, ñetña'pa' ahuatoteñe' cotape'cherretañ e'ñe cohuen Yomporecop. Ñetpa' attochña e'ñe orrtetañ cha llecatenanet po'chñar, cotnashe'mach chorra'yetañ, tsapñach epachshema'tyenetañ all anorrcha'tyenet puellquënotet. ¹⁴ Ñeñto'marña te'pa' notenes, esempohuañen allempoch a'craretetuerra allohuen acheñenesha'pa' tiro'marnesha' ñaña sidóno'marnesha' ñetña'pa' amach tama a'coñchatareñterreto allempo. Coraziño'marneshacha' ñaña betsaido'marneshacha' saña allempo'pa' atarrcha' coñchaterret. ¹⁵ Ñaña sa capernaumo'marneshacha' chate' sotenapañ atto

e'ñe cohuen sentyena sañeña, Yomporña'pa' allentach a'tapaterres pue'ntaño. Ñeñtpa' amachca'ye atteye' perrsoña Yompor, allachca'ye huapore'terres o'pono coñcha'puetso.

¹⁶ Jesúsña allempo ama sena' pueyochresha' o'ch serrpare'tyeneta' anetso'mar ñaña'pa' alla oterraneterr:

—Ñerra'm esesha'ch se'mñotapue' sa, na'naña e'mñotenet. Tarraña ñerra'm esesha'ch ama sagapaye sa, na'naña ama aguëneto. Ñaña ñerra'm esesha' ama mueno o'ch agapnet na, Nompore'naña ama mueneñeto o'ch agapet tarro'mar ñapa' ña nellsensene'.

Arrpa' allohua ñeñt atet otan pueyochreshachno ñeñt cançhroch çharrasheña. Allempoña'p' mueñanet allcha' serrpare'tatyesnomuet.

Atto huaçherra Jesús pueyochresha' ñeñt cançhroch çharrasheña

¹⁷ E'ñe allponmatatsapa' o' alla huaçherra pueyochresha' ñeñt cançhroch çharrasheña. Ñetña'pa' e'ñe pocsheñeshocmañen huaçhenet Jesúsesho. Ate't serrpare'tatueñet:

—Partseshacha' ama't oneñeñechnopa' e'ñe yeçha'nmaçha'tatue e'ñe yeçhore'teño' ña peso'chño.

¹⁸ Ñaña'pa' otapuenanet:

—Napa' neñchca'ye oneñeñ allempo aprratamñsare'tta po'huamenc. E'ñe attema't ñerra'm ñapa' o' çha'nmachet ento't atet pena meratste' huetsa ento't o'ch çhap aña patsro. ¹⁹ Po'ñoçhca'ye napa' atarr ahuamencat neña'yesapas. Ama't allohuen ñeñt se'moñe'tyene' sañapa' ñeñtecopña nellsensa'yesas allochña'pa' attoch e'ñe sa'mchechatyesuena' allohuen pa'namen, ama't shechpeçhno ñaña yellasochno, e'ñe satmama'teño'pa' e'ñe sa'peptse'tatse'tueña'. Allochña'pa' amach eñallettere'te ñeñtcha' semueroçhtate' ama't patrra. ²⁰ Ama't atarr ahuamencateseñ atto o' sa'mchechatyesuahue oneñeñechno, amachña ñeñta atarr socshatsto. Añcha'ña e'ñe socshena atto aquellca'yesare'tes seso'cheñ Yomporesho ñeñt pue'ntaño'tsen.

*Atto Jesús'pa' atarr pocsheñesha' ma'yochena
(Mt. 11.25-27; 13.16-17)*

²¹ E'ñe allempoña Jesús'pa' atarr coshateñ Parets Puecamquëñ. Ñeñto'marña ñapa' e'ñe pocsheñesho' ma'yochenana Pompor, ñeñtpa' atet oten:

—Na Apacha' o'ch na'ye'choçhtatona'p, p'apa' p'a ñeñte'p atarr ayochreshattetsa pe'ntaño ama't ñaña arr patsro. Na'ye'choçhtatona'p tarro'mar ora añeçhno ñeñt pecohuenña pepen, ñeñtpa' ama arreye' peçhapateñe pueyoçhro ñeñt atarr eñotañ entyetsa. Papa' aña peçhapaten pueyoçhreto ñeñt ama eñotañeye' entetso. Tarro'mar Apa e'ñe pemuereño't ñeñtpa' atetña e'ñe pocte' penten p'a. Arrpa' allohua ñeñt atet ma'yochenana Pompor.

²² 'Nomp' allohuen po'cohuenña e'ñe eñotatuenen. Na ñeñten Puechemerenpa' ama po'ñoçh eseshaye' neñotenaye, ñapñaña Nomp' eñotenen. Nomp'pa'çho'ña ama po'noçh eseshaye' eñotenaye, napñaña na ñeñten Puechemeren e'ñe neñoteñ Nomp', ñaña erra'tsencha' ñeñt e'ñe pocte' nenten na ñeñten Puechemeren ñeñtña'pa' o'ch neñotater Nomp'.

²³ Allempoña'pa' alla cohueranerr pueyochresha'pa' atet otanet e'ñe ñocpueta:

—Atarr cosheñtso'tsa'yenes sa tarro'mar e'ñe sa seclloyotpa' o' senterrñañ Yompor po'cohuenña. ²⁴ Po'ñoçhca'ye notenes e'ñe ahuatoteña'pa' shonte' ñeñt a'mta'yesaye't Yompor po'ñoñ ama't ñaña ñeñt añcha'tarettatse't allempo, ñetña'pa' atarr muenetañe't o'ch enterrñañetañ Yompor po'cohuenña ñeñt o' senterr sa te'. Tarraña allempo ñetpa' amaña eseshaye'ña enterrapaye Yompor po'cohuenña. Ama't atarr muenetañe't o'ch e'mñoterrñañet Yompor po'ñoñ ñeñt o' se'muerr sa te' tarraña allempo ñetpa' amaña eseshaye'ña e'muerrapayeña Yompor po'ñoñ.

Atto atarr cohuen orrtatos puesheñarr samario'marnesha'

²⁵ Allempoña puesheñarr ñeñt atarr etsotene' ñoñets ñeñt atet anaret judioneshacop, ñaña tantapa' atet otan Jesús attoch eñoch errotente' yeçhaten ña, ñeñtpa' atet och:

—Maestrocha' ta', ¿errofena'tcha' nepaña na e'ñe cohuen attoch napa' corretsanach e'ñe tayoteñ ama't errponañohuen?

²⁶ Jesúsña anappa' atet och:

—¿Errofena't otenña ñoñets ñeñt atet anaret ahuaototeñ? ¿Eso'tña ñoñtsor pelleyenña pa ñeñt anaret all?

²⁷ Ñaña' atet och:

—Ñeñt ñoñetspa' atet oten: “Atarrcha' yemorrenteña Yeyomporer ñeñt Yepartseshar yepen e'ñe yeyochrocmañen. Ñaña e'ñe yecamquẽñoñ yemorreñchach e'ñe yehua-mencohuen, ama't ñaña ora yocapñohuen.” Ellonet po'poñpa' atet oten: “Atarrcha' yemorrenteña yamo'ts e'ñe atet atarr yemorrentena yañeña.”

²⁸ Jesúsña' atet och:

—Atetca'ye e'ñe atet p̄oten. Ñerra'm atetcha' e'ñe pepohuapa' pañapa' corretsaḡach e'ñe tayoteñ ama't errponañohuen.

²⁹ Ñeñtña acheñerpa' aña atarr muenen o'ch e'ñe cohuen enteñ Jesús ñaña allohuen acheñenesha'. Ñeñto'marña alla a'p̄to'terranerr Jesús:

—Ñehua, te'pa' o'ch p̄oten ¿eseshatña ñeñt e'ñe po'ñoçh namo'ts nepen?

³⁰ Attoch eñotach ñeñt e'ñe po'ñoçh amotsof entetsa ñeñt e'ñe pamo'ts p̄annena, Jesúsña' atet toma'ntacha, ñeñtpa' atet serrpare'tach:

—Eñall puesheñarr judionesha' ñeñt huetsa Jerusaléñoñ, ñapa' arr sen Jericó. Toñoñapa' alla rromap̄ eñeñ e'ñe puerratam̄psatsre'tuet ama't pa'shtam. Atarr atserrpet. Autsa muetsapuetañ allempoña ñeñt atserrp̄apue'pa' ahuanerret. ³¹ Allempoña tematenpa' puesheñarr judionesha' ñeñt cornesha' ñapa'çho'ña all oñem. Ñaña' ama't entospa' atta oñmatse'tam̄pesya a'yo'marpa' o' metane. ³² Allempoña tematenpa' huapa ñaña po'psheñeñ judionesha' ñeñt levitaneshatets. Ñapa'çho'ña ama't entospa' atta oñmatse'tam̄pesya a'yo'mar o' metane ñaña. ³³ Allempoña tematerrerr o' huapa ñaña puesheñarr ñeñt ama judioneshayaye ñeñtpa' samario'marnesha'. Ñapa' ñeñt pamo'tsesha' pen ama amo'tstenano judionesha'. Tarraña ñapa' allempo entosan puesheñarr judionesha' ñeñt atserrpenetpa' atarr muerosya. ³⁴ Allenta ponmosya, shosñañ olivose* ñaña vino allo partosñañ all atserrpeñet.

Allempoñapa' huanquerrñañ all atserrpeñet. Tantaterpa' montacha pashanoropa' anem̄ allcha' mos. Allña' all cohuañpsos. ³⁵ Tsapañña' cheta'muenan epa denario apa'muenan apaçllesha' atet ota'mueñ: “Te'pa' pecuañpescha', errponcha' pa'gasta' ello peçllayor, napa' netsa'tuerrp̄ach esempoch nehuerra.”

³⁶ Jesúsña' alla oterranerr ñeñt acheñer:

—Ma'psheño'maretpa' p̄apa' ¿erra'tsena'tña pentenña ñeñt atarr amo'tsof entetsa ñeñt e'ñe pamo'ts pene' ñeñt rroma' eñeñ?

³⁷ Ñeñtña acheñerpa' atet oterranerr Jesús:

—Añca'ye e'ñe pamo'ts pene' ñeñt e'ñe puemuereñoñ partatse'terre'.

Jesúsña' atet och:

—Te'pa' atetcha' peperra p̄aña. O'ch ahuerreḡpa' atarrcha' pemorrentera ora allohuen acheñenesha'.

Allempo Jesús'pa' çhap pocollo all yeçhena Marta epuet pa'mo'nerr María

³⁸ All oñen Jesús'pa' o' çhap paterr anetso. Allña puesheñarr coyanesha' añ pa'so'cheñ Marta, ñaña' e'ñe cohuen agapapan Jesús pa'paclo. ³⁹ Ñeñtña Martapa' eñall ñaña

* **10:34** Olivo ñeñt tsach allot yoreñet puerets pue'merot.

pa'mo'nerr ñeñt'pa' añ pa'so'cheñ María. Maríañapa' all anen Partsessa' Jesús pa'rr'p'ot all'ot e'mñoteññañ ñeñt' atet serrpare'tatenanet. ⁴⁰ Pa'mo'nerrña Martapa' añ e'ñe ma'yochrena a'toram'p'se' all puetare'tallme'chen. Ñaña' ponmana Jesús'pa' atet otos:

—Ayochreshate, amate' pocte' penteñe napta neptare'tallme'chen; nemo'nerrña' ama yenpuenno. Te'pa' o'ch p'och a'toram'p'sapretnepa' na'ar.

⁴¹ Jesús'ña'pa' atet och:

—No'cha Marta, shonte' pa'namen ñeñt' petorra'yena, p'apa' ñeñt'aña atarr pellcatene'.

⁴² Tarraña e'ñe patrraña ñeñt' atarr sherbets; ñeñt'pa' atto e'ñe cohuen socshennana neñoñ. Pemo'nerr Mariapa' ñapa' ñeñt'ña atarr e'nen. Ñeñt'pa' ama't e'ñe esesha amach erroteno' puerratañpereto.

11

Atto Jesús'pa' ye'chatan pueyochresha' atet'cha' ma'yochet

(Mt. 6.9-15; 7.7-11)

¹ Po'pocheño Jesús'pa' alla ma'yocherrerr. O' ma'yochuapa' puesheñarrña pueyochresha'pa' atet och:

—Partsesshacha' te'pa' o'ch pey'chatey ma'yochatsa atet pe't Juanañ, ñapa' chocma ye'chatane't ña pueyochresha' atet'cha' ma'yochet.

² Jesús'ña'pa' atet otanet:

—Ñehua, ñerra'm esempoch sema'yochena atet'cha' sot:

Yompore Partso ñeñt'ep' pe'ntañ'o'tsen, yentapepa'ch p'a atarr Partso'p. Chapuepa'ch Nompore allempoch atarr p'a'yochresha'terra arr patsro. Yetsotonapepa'ch arr patsro ñeñt' atet pemnen p'a Nompore atet penet ñaña pe'ntañ'o.

³ Chocmuepa'ch Nompore p'apueney ñaña yocrrañ ñeñt' allpon yepallta'yena pate'tets yet.

⁴ Pe'pretna'huonayepa'ch Nompore allohuen yo'chñar ñeñt' ama pocteye' pentapretenye, atto Nompore yapa'cho'ña ye'pretnannena ñerra'm esempo erro't ye'pannena. Ñaña amach Nompore pemnatatsche sosya'tañ o'ch atarr topateney. Añcha'ña choch Nompore p'a'ypo'ñataterrey allohuen sosya'tsañe'chno.

⁵ Elloñapa' alla ye'chaterraneterr ñeñt' atto e'ñe yenamueño't Yompor apueycha'. Ñeñt'pa' atet serrpare'taterraneterr toma'nteñtso.

—Ñerra'm eñall puesheñarr ñeñt' e'ñe cohuen yeyemtenaya, ama't rro'ch tsapo o'ch ahuey pa'paclo ye'chore'teño'tpa' atet'cha' yotos: “Napa' masheñcha' añecop nohuena o'ch p'apuen ama't coñe'ta rreñets, ⁶ tarro'mar o' chap puesheñarr namo'ts ñeñt' huetsa ba'chayot, napa' ama es necheno ama't coñe'ta alloch neyema'cha.” ⁷ Tarraña ñapa' po'ponro'tpa' ñato' chach otapuey: “Amach p'a'tsrre'mo'chtana'tatstosno tarro'mar o' e'ñe echarr neyottam'pesuena, allohuen nacñe'taretolleshohuenpa' o' yemanrra'tuen. Ñeñto'marña ama eshcaye' atantenno o'ch ne'cha'nmona'pa' attoch es napa'p.” ⁸ Tarraña napa' o'ch notas, ama't ñeñt' atarr yeyemtenaña' ñerra'm ama cha'nmaponayopa' yañapa' ñerra'm alla yenamuere'tpa' cha'nmaponayach attoch apapuey ama't erra'tsena ñeñt' atarr yenamueñ attoch amach alla ya'tsrre'mo'chtana'tneñe es enamare'te'. ⁹ Ñeñto'marña napa' o'ch notas: E'ñe senamueño't, Yomporña'pa' apascha'. Se'name'teño'tpa' señchcha', se'chore'teño't, Yomporña'pa' e'ñe pue'mñoteño'tespa' e'ñech cohuen toram'p'sapas. ¹⁰ Tarro'mar ñeñt' es enamare'tetspa' ñetña es agu'etset; ñaña erra'tsen ñeñt' es e'nyetspa' ñetña'pa' enteret'cha', ñaña erra'tsen ñeñt' chore'tyene' ñetña'pa' e'ñech e'mñotenanet Yompor.

¹¹⁻¹³ 'Yompor ñeñt' pue'ntañ'o'tsen chocmach e'ñe cohuenare' es apa'yeney ñerra'm esempo es yenamueñ. Ñapa' amach añ apuenye ñeñt' ama cohuenaye' yenteno ya.

Ama't sa ñeñtes arromñates atet sepeñ samña sechemer, e'ñech cohuen es sapueñ ñerra'm esempo es enamuenes. Atet ñerra'm allempo pa'chporrñoñ es enamuenes, o'ch enamas mam* ñeñtcha' rra', sapa' ama't puesheñarrotesapa' amach aña sapueñeña sechemer mapue' ñeñt ama arrapahuoyaye. Amapa' ñerra'm cac enamuenes sañapa' ama't puesheñarrotesapa' ama aña sapueñeña sechemer shecheñ ñeñt atarr amue-rochtatañ. Amapa' ñerra'm pa'me' enamuenes sañapa' ama't puesheñarrotesapa' ama aña sapueñeña sechemer yellas. Ñeñto'marña sa ama't arromñates ama't ñaña at-srre'mñates sapa' e'ñe señoteñ apa'yese' sechemerasha' e'ñe cohuenare'. Aña ñeñt Sey-omporer sepen samña ñeñt pue'ntañ'tsen elloña ñapa' e'ñe eñoteñ atto e'ñe cohuenare' es apa'yenes samña. Ama't Puecamqueñ ñeñt e'ñe cohuen Parets attoña e'ñe cohuen chorratensa allohuenes ñeñtes enamyene' ña.

Atto puesheña'tets oteñet Jesús ñapa' oneñeto' po'huamencot caçhpatenanña po'potantañ oneñeteçhno acheñenesha'

(Mt. 12.22-30; Mr. 3.19-27)

¹⁴ Po'pocheño allo'tsen puesheñarr acheñ ñeñt chorrena oneñeñ, cha opanatateñ. Allempoña Jesúsapa' caçhpatosan oneñeñ atto chorrenana acheñ. Atto caçhpa'ner oneñeñ ñeñtña opanpa' o' alla eñorerra. Acheñenesha'ña allpa' atta cohuanrrorteñet, atarr cohuen enteñet. ¹⁵ Tarraña po'potantañeçhnoña acheñenesha'pa' ama't mameshapa' ama pocteye' eñcheto. Ñetñapa' atet otyeñet:

—Atto caçhpatatenan oneñeñ acheñpa' añaca'ye ahuamencat pene' Beelzebú ñeñt pompor pen allohuen oneñeteçhno.

¹⁶ Po'potantañ acheñenesha' ñetñapa' cha mueneñet o'ch topachet Jesús. Ñetpa' atet ochet:

—Yapa' añ yemnen o'ch pegatey pepartsoña entot allochñapa' attoch yeñotañ po'ñoçh pa'pa' Parets Puechemereñ.

¹⁷ Jesúsña' eñotanet ñeñt atet cotape'chatse'tyenet pueyoçhreto ñocop ñeñt atto otyeñet ñapa' oneñeña pompor po'huamencot caçhpatenanetña oneñeteçhno. Ñeñto'marña ñapa' atet otanet:

—Ñerra'm puesheñarr añcha'tareñ elloptannena pa'cheñer e'ñe ñagattsetapa' e'ñech poctacma a'cclatanna'tuerret. Attecmach pañnera ama't ñeñt e'ñe pamo'tsna'tarecmuet ñerra'm elloptannerret e'ñe ñagattsetpa' e'ñech a'cclatanna'tuerret.

¹⁸ Attecmach pañnera ñaña oneñeñ pueyoçhresha'çhno ñerra'm oneñeteçhno e'moñe'tannenet e'ñe ñagattseta, ñetña atto huomencatenetpa' çhach huañerrets amach allo'na huomencatneneto. Ñeñtpa' atet o' notuas tarro'mar sapa' cha sotenan napa' Beelzebo' po'huamencot necaçhpatateññañ e'ñe ña pueyoçhresha' ñeñt pompor pen allohuen oneñeteçhno. Po'ñoçh oneñetpa' amaca'ye huapore'tanneno. ¹⁹ Sapa' atet sotenan napa' Beelzebo' po'huamencot necaçhpatateññañ e'ñe ña pueyoçhresha', ñehua, te'pa' o'ch notas: Ñeñt seyochresha' sepen sa ñeñt eñotene' ñamet o'ch caçhpatachet oneñeñ acheñenesha' ñetpa'cho'ña amaña Beezebú po'huamencoteye' caçhpatateñetoña oneñeñ acheñenesha'. Ñetpa'cho'ña Yomporoña po'huamencot caçhpatatenetña oneñeñ. Ñeñtña o' eñotatas ñeñt atet sotenoñ ñeñtpa' amaca'ye po'ñoçh atteyaye. ²⁰ Po'ñoçhca'ye Yompor po'huamencot necaçhpatateñña oneñeteçhno acheñenesha' ñeñtcha'ña señotate' te'pa' o' neçhpatonas Yompor po'cohuenña ñeñt atto po'ñoçh atarr ayochreshatena ña.

²¹ Ñeñtpa' o' e'ñe notuas atet tarro'mar yeñoteñ ñeñt atarr ahuamencattetsa atto atarr ahuamencattena oneñeñ, ñaña' e'ñe po'huamencot cohuanmpesyenan allohuen

* **11:11-13** Ñehua, Jesús añ toma'ntatanet pan ñeñt puerrar penet all pa'nyo.

e'ñe cohuen ñeñt pa'paquell pa'yen. Ñapa' po'huamencocmañen na'yenan ñeñtcha' e'ñe cohuanpene' all añcha'tarettena ña. ²² Tarraña ñerra'm esempo o'ch huapoña ñeñt atarr ahumencatesha' ñeñtcha' ello metanose'ña po'huamenc atet ñerra'm na Nompör, ñeñtcha'ña e'ñe a'mchechatose'. Attoña e'ñe puerratañpsosñañ ñeñt allpon moñenaya ñeñt atarr yemuetyena ña. Allochñapa' o'ch be'tosos all ñeñt pa'paquell pa'yen o'ch e'ñe puerratañpeshuos ñeñt allpon o'patyena ña.

²³ 'Ñeñto'marña te'pa' o'ch notas allohuenes: Ñerra'm eseshas ñeñtes ama ne'torrapretenaye ñeñtña acheñerpa' chaca'ye epatare'tennan ñeñt atet ne'torra'yena na. Ñeñt'pa' o'ch netma'ntatasa atet: Ñerra'm esesha' ama na'yapa'chapretenaye ñeñt na'yapa'chen na, ñeñtñapa' cha a'parratse'tañpenen a'yenet.

Atto Jesús'pa' e'ñotatanet ñato' oneñt'pa' o'ch alla chorreranerr acheñ allot cha'nom ahuaña

(Mt. 12.43-45)

²⁴ 'Ellonetpa' o'ch alla ne'ñotatereserr po'poñonef: Oneñt' ñerra'm esempo cha'nom acheñeshot, ñeñtña oneñt'pa' o'ch auyes errañaren ama't amayo'mar e'nyese' po'psheñeñ allcha' ye'cherrerr allcha' e'ñe amesuererr cohuen. Tarraña ñerra'm amach erra eñchepa' atteñapa' o'ch ot: "Napa' o'ch alla ahuerren nepacillo allot ne'cha'nom ahuaña." ²⁵ Atet'cha'cho' pa. O'ch alla ahuer allot cha'nom ahuaña. Allña o'ch cherrpa' e'ñech cohuen entuerran pa'paquell, e'ñech cohuen atarrapo'tuaret, e'ñech cohuen añño'tyesaret. ²⁶ Allempoñapa' o'ch alla ahuer allot'sa'yen pamo'tsesha'pa' o'ch enana' po'poñ can'cherrsheña oneñte'ch'no ñeñt nanac sosyare', ñeñt ello metana'tuene' ñeñt atet sosyaten ñeñt hua'ñene' o'ch ye'chaprecha. Allohuenetñapa' o'ch chorreñet ñeñt acheñer. Allempoña tsapatonetpa' allo'nach sen ñeñt acheñer sosyatnomuets huomenc. Elloch metanerran ñeñt atet p'atse'tyese't ñenma't.

²⁷ Jesús allempo atet serrpare'tatenan acheñenesha'pa' puesheñarrña coyanesha'pa' machayotepa'tcha' rrana, ñeñt'pa' atet ot:

—Ama't ñeñt p'achor pepen p'apa' atarr cosheñtso'tsen tarro'mar ñapa' ñeñt pe'ñalletate' pa' ñeñte'p atarr cohuen es peye'chcaten ñaña ñapa' e'ñe cohuen cohuan'psap allempo cheshatollenpa'.

²⁸ Jesúsñapa' atet och:

—Elloña allohuenetpa' atarr cosheñtso'tsa'yenet ñeñt pue'mñoteñotet Yompör po'ñoñ e'ñe atet p'ohuenet.

Atto Jesús'pa' otan acheñenesha' ñeñt ama cohuenaye' cotape'chetso ñetñapa' chocma e'nenet partsoteñets

(Mt. 12.38-42; Mr. 8.12)

²⁹ Allempoña acheñenesha' emchorreñet Jesús, ñaña'pa' atet otanet:

—Acheñenesha' ñeñt corra'yetsa te' ñetñapa' ama cohuenaye' cotape'chyeneto. Tarro'mar ñetpa' añña e'nenet ahuo'ch norrtatanet nepartsoteña atto'chña e'ñotnet napa' po'ño'cho'te' Parets Puechemeren ñeñteno'te' Cristotosets. Tarraña amach es norrtataneto. Napa' añach p'aterr ne'ñotatanet atet e'ñotatane't Jonás ahua't nínivo'marnesha' allempo a'mítane't Yompör po'ñoñ. ³⁰ Tarro'mar atto e'ñotatane't Jonás nínivo'marnesha' ahua't ñapa' Yomporeshot huena, napa'cho'ña te'pa' atet'cha' ne'ñotach naña acheñenesha' ñeñt corretsa te' napa'cho'ña Yomporeshot nohuena.

³¹⁻³² Tarro'mar ahua't allempo serrpare'tatane't Jonás nínivo'marnesha' ñetñapa' allempocma cotape'cherret ello e'ñe cohuen Yomporecop. Te'ña arr seshopa' allo'tsenen na ñeñten ello metanene' ñeñt atet serrpare'tate't Jonás. Tarraña sañapa' amaña soctape'chenoña ello cohuen Yomporecop. Ñeñto'marña esempohuañen allempoch a'crare'tetuerra allohuen acheñenesha', ñeñtña nínivo'marnesha' ñeñt e'ñe

cohuen cotape'cherrets Yomporecop ahuat, ñetpa'cho'ña orrterretcha', ñeñtcha'ña señotaterre'ña sapa' ama't mamesha ama pocteyayeña ñeñt atet sepa'yese't tarro'mar sapa' ama soctape'cherro ello cohuen Yomporecop. Ñaña te'pa' o'ch neyerpatasa ñeñt atet pa ahuat puesheñarr coyanesha' ñeñt añcha'tarettatse't atarr bachayo allohuanen pats sa'ponet. Ñeñtña coyanesha'pa' allotēn on o'ch e'mñnotenana' Salomón pueserrpareñ ñeñt atet atarr eñotañte't. Te'ña arr e'ñe seshopa' allo'tsenen ñeñten puesheñarrana ñeñten atarr es neñoten ñaña, ello nemtaneñ atto eñotañte't Salomón. Tarraña sañapa' amaña es sotapoteno. Ñeñto'marña esempohuañen allempoch a'crare'tetuerra allohuen acheñenesha', ñeñtña coyanesha' ñeñt e'ñe cohuen e'mñnotatse't ñapa'cho'ña orrterrach, ñeñtcha'ña señotaterre' sapa' ama pocteyayeña ñeñt atet sepa'yese't tarro'mar sapa' ama es sotapote'te ama't e'ñe mamesha.

Atto yeclle'pa' añ toma'ntena ñeñt po'lampareñ pen allohuen yechets

(Mt. 5.15; 6.22-23)

³³ Jesús pa' alla serrpare'taterraneterr, ñeñt pa' atet oterraneterr:

—Ñerra'm esempo ya'llchaten lampareñ, ñeñt pa' ama tarrecpaye' ya'huortateñe o'ch yene' o'pono e'ñe a'na'reto. Ñaña ama añecpaye' ya'llchateñe o'ch ye'rramañpes coymño. Ñeñt pa' añecopña ya'huortatenña lampareñ o'ch yene' enonet attochña e'ñech choyo'tamñpesuan allohuen acheñenesha' ñeñt be'toschets all pocollo. ³⁴⁻³⁵ Yeclle'pa' añ toma'ntena atet ñerra'm ñeñt po'lampareñ pen allohuen yechets. Ñerra'm e'ñe cohuen huomech yeclle'pa' e'ñech cohuen entateney puetare' allochñapa' attoch e'ñe cohuen torratyenana allemeñ yechets tarro'mar e'ñe cohuen a'puetarsañpsare'ttenet. Tarraña yeclle'ña ñerra'm ama e'ñe cohuen huomñcheyayepa' amach e'ñe cohuenaye' entateney puetare' attochña amach eshcaye' torratyenano allemeñ yechets tarro'mar cha ottena ñerra'mrrate' checmeto'tsa'yeneta. Attecma pena ñaña yeyo'cher. Ñerra'm e'ñe cohuen yocape'chyen yeyo'chropa' attoña chennayaña yeyo'chro e'ñe ora allohuen Yompor poctapña ñeñt po'cohuenña pen. Attoña ora yocapña' e'ñech a'puetarsañpsare'ttena Yomporshot. Tarraña o'ch yeñota e'ñe yañeña tarro'mar ñerra'm ama cohuenaye' yocape'cheno yeyo'chro, ñeñt pa' amach erro'teno't a'puetarsañpenyeña ñeñt yocapña yepen. Ñeñtña yocapña yepenpa' chach a'checmetamñpennay yeyo'cher. ³⁶ Tarraña ñerra'm po'ño'ch e'ñe cohuen yocape'chen yeyo'chro, attoña chennayaña yeyo'chro e'ñe ora allohuen Yompor poctapña attochña yeñoteñ orrtatyese' ñeñt e'ñe cohuen enten ña. Attoña e'ñech cohuen es ye'pa'yen atet ñerra'mrrate' lampareñ e'ñe cohuen choyo'tamñpeney attoch e'ñe cohuen es yentyen. Allempopa' o'huañcha' allo'na yeche'cmamñpesnen.

Atto Jesús pa' a'metare'tenan fariseonesha' ñeñt atet ye'chenet ñetpa' ñeñt pa' ama cohue-naye' entapretenaneto Yompor

(Mt. 23.1-36; Mr. 12.38-40; Lc. 20.45-47)

³⁷ O' serrpare'tatuanet Jesús pa' puesheñarrña fariseonesha'pa' hua'ña'nerran Jesús o'ch rrallme'chapreteña' pa'pacillo. Allempo chap Jesús allpa' be'tosos anorros allcha' rrallme'chapretosan ñeñt hua'ñene'. ³⁸ Ñeñtña fariseopa' entenan Jesús atto ñapa' ama e'pota'to ñeñt atet ye'chena judionesha'. Ñehua, ñetpa' atet ye'chenet, amach rrallme'cheneta'pa' o'ch e'pota'tyeset Partsocop. Ñeñto'marña fariseopa' atet cotape'ch Jesúsocop:

—Ta'm, eso'marte'ca'ye amaña e'pota'tenoña ñeñt atet poctetsa Partsocop.

³⁹ Partsesha'ña Jesús pa' atet toma'ntatana ñeñt atet pena allohuen fariseonesha', ñeñt pa' atet otan ñeñt hua'ñene':

—Ñeñtes fariseoneshas sapa' e'ñe se'pame'teneñña setaza eno'tpa' o'pono'tña'pa' ama se'parro'teñe. Seplatopa'cho'ña eno'ta e'ñe se'pata'teñ o'pono'tña'pa' ama se'pata'teñe.

E'ñe atet sepena samña. E'ñe sa'cohuentatena ñeñt eno'mar ñeñt atet seyçhena sa allochñapa' attoch entenes allohuen acheñenesha' sapa' e'ño' cohuenes, tarraña o'ponot seyoçhropa' ama sa'cohuentateñe, allñapa' e'ñe chorren shonte' sosya'tsañeçhno ñeñt atto e'ñe seshquëñoñt çhocma es seprratam pesyen, seshonten pa'namen ñeñt ama pocteye' entapretenso Yompor. ⁴⁰ Cha sottena ñerra'm erra'tsen puesheñarr acheñ ñeñt ama es eñoteno. Ama't señoñeña Yomporña ñeñt yeçhcatyene' allohuen ñeñt allpon yentyen arr patsro, ñeñt a'yote'tsa'yen yeshot ñeñtara Yompor ñeñt yeçhcate' ñaña yeyoçher alloch e'ñe cohuen yoctape'chen o'pono yeyoçhro. ⁴¹ Ñerra'm o'ch po'ñoçh soctape'cherr cohuen seyoçhro Yomporecop attochña e'ñe cohuen seyoçhrocmañen es sapa'yen attoch seyepa'yeyñ po'potantañ. Ñerra'm atetcha' seperrapa' Yomporñapa' e'ñech cohuenare' enterres.

⁴² 'Atarr llequëñtso'tsenes sa ñeñtes fariseoneshas tarro'mar ama atteye' sepeno ñeñt atet o'notuas. Ora allohuen ñeñt senaremñ sepen ama't çhocma sapueñeñ Yompor allpon ñeñt poctetsa ñocop—mentapan ñaña rudapan. Tarraña añña ñeñt nanac sherbets Yomporecop e'ñech pocte' es yepeññañ po'psheñeñ ñaña e'ñech cohuen yemorrenteña Yompor. Ñeñt atetpa' sañapa' ama soctape'cheñe ama't mamesha. Sapa' ñeñtña sepalltena o'ch e'ñe atet sepoñhua. Tarraña ñeñt atto çhocma es sapa'yen Yomporecop ñeñtpa'cho'ña amach secaçhpatsche.

⁴³ 'Atarr llequëñtso'tsa'yenes sa ñeñtes fariseoneshas tarro'mar sapa' e'ñe sommo'cheñoñt atarr semneñ allohuen acheñenesha'pa' o'ch e'ñe cohuen entenset. Ñeñto'marña sapa' añña atarr semnen o'ch sanorrçha'tyen judionesha' po'prahuo allecma anorryen ñeñt atarr amçha'na'tpo' enten allohuen acheñenesha'. Ñaña sapa' añña atarr semnen allohuen acheñenesha'pa' o'ch huomçha'tenset puençha'nañoñ ñerra'm esempo sechopeñe'chen toño'mar allecma chopeñe'chyen allohuen acheñenesha'.

⁴⁴ 'Atarr llequëñets socop, tarro'mar sapa' e'ñe attes ñerra'mrrate' apampaña ñeñt amach orrteno enot all apamparettena arromñañ o'pono patso. Ñeñto'marña acheñenesha'pa' allach chopeñe'chyenet all ama esesha' eñotenaye o'ponopa' allo'tsa'yen arromñañap all e'ñe chorren sosya'tsañ.

⁴⁵ Allempoña puesheñarr ñeñt atarr etsotenayeñ ñoñets ñeñt atet anaret judioneshacop, ñañapa' atet otan Jesús:

—Maestro, ñeñt atet poñten ya'naña çha muene' pepencaten.

⁴⁶ Jesúsñapa' atet och:

—Sapa' ñeñtes atarr etsotenayeñ ñoñets ñeñt atet anaret judioneshacop, sapa'cho'ña atarr llequëñets socop, tarro'mar sapa' atarr es sena'yeyññañ acheñenesha' ñeñt atarr echarrare' entyenet ñet, po'ñoçhpa' amach errotentot e'ñe atet poñueto. Sapa' ama't mameshapa' ama ayenpuenaye' sentpenaneto.

⁴⁷ 'Llequëñtsa ñaña socop tarro'mar sa te'pa' satomaten enot ñeñt atarr cohuen senten sa all pampa'yese't ñeñt a'mta'yese't Yompor po'ñoñ ahuat ñeñt muetsanatyese't ñeñt satañneshañ sepe't. ⁴⁸ Sapa' e'ñe señoñeñañ sa'tañneshañ atto ñetpa' muetsanachete't ñeñt a'mta'yese't Yompor po'ñoñ tarraña sapa'cho'ña ñeññaña e'ñe pocte' senten samña ñeñto'mar te'pa' e'ñe sa'cohuentam penanet all apamparettenet.

⁴⁹ 'Ama't Yompor ahuat, e'ñe pueñoñeño'pa' atet ote't: “Napa' o'ch nemñe acheñeneshesho ñeñtcha' a'mtene' neñoñ ñaña ñeñt nellsensarnesha' nepa'yen. Tarraña patantarrña acheñenesha'ñapa' çha muetsanatanet, po'potantañña' çha cotare'tyese't.” ⁵⁰ Attoña e'ñe allempoteñ ayeçhcataretta añ pats, ora allohuen ñeñt a'mta'yese't Yompor po'ñoñ allpon ñeñt amtsanatyese'ttase't ashatarettyese't po'rras, sañapa' allempoteñ e'ñe sa'yohuarettena teme'ttsen sa ñeñtes corretsa te'.

⁵¹ E'ñe allempoteñ muetseret Abel tarremphua allempo muetseret ñaña Zacarías

ñeñt'pa' alla semtser Parets po'ponro puecha'petarot allo'tsen altar allotecma sherbete't Yompor. Po'ñochca'ye notenes añenesha' ñeñt' corretsa te' atarr ayohuare'ttenet.

⁵² 'Llequëñtsa socop ñeñfescha' e'ñe etsotenayeñ ñoñets ñeñt' atet anaret judione-shacop tarro'mar sapa' cha seprratam'peñ acheñenesha' ñeñt' alloch enteret ñeñt' e'ñe po'ñoch alloch qeshperret. Tarro'mar ama't sapa' amaca'ye senteññañeña Yompor po'cohuenña, ellonetpa'cho'ña chocma sepatare'teñña po'potantañ ñeñt' e'nene' Yompor po'cohuenña.

⁵³ Allempoña ñetpa' e'ñe pa'tsrre'mueñoñ atarr es a'p'to'tare'tyeset Jesús. ⁵⁴ Ñetpa' añ atarr e'nenet attoch otatse'tachet allochñapa' ñato' po'tatse'tateño'tetpa' attoch ot-teñe'cheñet.

12

Atto Jesús'pa' ye'chatan pueyochresha' amach eñotatstoñeto fariseonesha' pommo'cheña

¹ Shonte' acheñenesha' ñeñt' huachenoya Jesús, shonte' nanac patoner. Cha che'muechoset Jesúsesho atta atmatca'tanna'tyesoset. Jesúsña ñanompa' alla ser-ppare'taterranerr pueyochresha', ñeñt'pa' atet otanet:

—E'ñech señota ñato't semeñe'teña' fariseonesha' poctap'ña, tarraña ñeñt' poctap'ña penet ñetpa' ñeñt'pa' ommo'cheñtsa. Ñeñt'pa' mame'tollapa' o'ch epa'hua errap'aren e'ñe atet pena ñerra'mrrate' chase' mame'tollapa' o'ch e'ñe es a'chasa'hua. ² Tarro'mar yapa' yeñoteñ allohuen ñeñt' allo e'ñe a'nahua shecare'tyenet te' esempohuañeñña'pa' a'metam'psare'tterretcha'. Ama't allohuen ñeñt' e'ñe a'nasotyenet te'pa' esempohuañeñña'pa' e'ñech eñotatare'tetuerret. ³ Ñeñto'marña ama't erra'tsena seserrparen e'ñe a'nahua te' esempopa' señotaturcha' ora allohuen acheñenesha'. Ama't erra'tsena ñeñt' atet seserrpare'tyen te' e'ñe a'nahua o'pono pocollo, esempopa' seserrpare'tatcha' allcha' e'ñe cohuen e'mhuerres allohuen acheñenesha' atet ñerra'mrrate' enot seserrpare'ten shelletot.

Atto amach yem'cha'tatsto ñeñt'cha' muetse'yechets, añcha'ña yem'cha'na't Yompor (Mt. 10.28-31)

⁴ Te'pa' o'ch notas masheñeshacha', amach añña sem'cha'tatsto ñeñt'cha' semtse'. Tarro'mar añach muetsonaset sechets, secamquëñña'pa' amach erro'tenoñ muetsonaseto. ⁵ Añcha'ña sem'cha'na't Yompor tarro'mar ñerra'm ñña muenats e'ñe ñña po'huamenco'tpa' o'ch a'chencatonay ye'chets, yecamquëñpa'cho'ña o'ch mueñonay coñcheñtso all par-raren tso'. E'ñe po'ñoch notenes, Yomporcha'ña sem'cha'na'ten.

⁶⁻⁷ Elloña te'pa' napa' o'ch notas, chocmach seyem'cha Yompor, po'ñoch ñapa' ñach secuam'pene'. Ama't otetollesha'pa'cho'ña chocma cohuan'peñ. Ñehua, ama't yapa' yeñoteñ otetollpa' ama tama sherbeno. Ama't yepomatset, amnar otetollesha'pa' ñeñt'pa' ama tsa'teyaye, e'ñe eptalla'tolla centavo tsa'tena. Tarraña ama't atteñ Yomporña ama't patr'a otetollpa' ama pueseñe. Ñeñto'marña notenes, ama't mame-shapa' amach sem'cha'tatsto, Yomporcha'ña e'ñe seyem'ta. Atto atarr morrentenana otetollesha' elloña sapa' atarr nanac morrentensa. Ñehua, ama't allpon sechetollesha' allpon soño'tsen ñapa' e'ñe eñotennas.

Atto ama a'nasot'pahuo Jesucristo acheñesho'mar (Mt. 10.32-33; 12.32; 10.19-20)

⁸ Elloña napa' o'ch noterr'serr, allohuen ama't erra'tsencha' ñeñt'cha' ama na'nasotenaye acheñeneshesho, napa'cho'ña Ñeñten Acheñetosetspa' amach na'nasotuerraneto naña Nompore'sho allo'tsa'yen epuet po'millaño'teñnaneshar. ⁹ Tarraña ñerra'm esesha' na'nasotenaya na arr patsro acheñeneshesho, napa'cho'ña na'nasoterranetcha' Nompore'sho allo'tsa'yen epuet po'millaño'teñnaneshar.

¹⁰ 'Ñerra'm esesha' nesasene' na Ñeñten Acheñetsosets ñeñt'pa' a'pretna'po' nenteñ. Tarraña ñerra'm esesha' añ achm'are'tenet Parets Puecamquëñ ñeñt'ñapa' ama a'pretna'pahuoye' nenteñe.

¹¹ Ñaña o'ch noterrser, ñerra'm esempoch anmaset judionesha' po'prahuo allcha' a'metare'tam'psaset am'cha'taretsho, sañapa' amach 'cha sellca'psatsto, amach 'cha sotapsa'tatsto: Errotuachca'ye notoste' attoch cohuen nanapos, esuachca'ye notte'.

¹² Sapa' añcha'ña se'ñoratosé' Parets Puecamquëñ e'ñe allempo a'p'to'tare'tenset all.

Ñeñt' e'ñe añña muenen o'ch esocmañen echyes, ñeñt'pa' atarr yoro'cheno'tsen

¹³ All che'muechen shonte' acheñenesha' Jesúsesho, puesheñarrñapa' atet otan Jesús:

—Maestro, te'pa' o'ch p'oton nemo'nasheñ nepo'nar apuerrnepa'ñaca'yeña ñaña ñeñt' allpon o'patatnomna nomporeñ.

¹⁴ Tarraña Jesúsñapa' atet och:

—Masheñcha' napa' ama eseshaye' nenaye ñeñtencha' a'p'octatene' ñoñets attoch soten o'ch napa'yesas allpon o'patatyenset.

¹⁵ Alla oterraneterr Jesús:

—E'ñech se'ñota sañeña, ama't seyo'chrapa' amach es seye'chapretanna'tatsto ama't e'ñe coñe'ta tarro'mar atto yocrrena arr cohuen añe patsropa' ñeñt'pa' ama añecpayaye alloch esocmañen es yechyerr ñeñt'cha' atarr yocshaterre' tsapa'onet.

¹⁶ Ñeñt'pa' atet otanet toma'nteñtso:

—Eñall puesheñarr acheñ atarr nanac e'cllayoret. Allña po'patsñopa' shonte' nanac aton a'yechcaten. ¹⁷ Ñeñt'ña e'cllayoret'pa' atet cotape'chen pueyo'chropa' atet oten: “Errotuachca'ye ne'pa'ña, ñeñt' atarr nanac aton ne'totaten amaca'ye eñalleña allcha' e'ñe ñañño'tue.” ¹⁸ Allempo atet cotape'chenpa' alla oterrer: “Te'pa' o'ca' neñoch atet'cha'ca'ye ne'pa. O'chca'ye na'materrña pocollashe'm allecma ñañño'te't coñe'ta'tets te'ñapa' o'ch alla na'tomaterr atarrpo' allcha' e'ñe ñañño'tua allohuen ñeñt' allpon ne'totaten ama't ñaña allohuen ñeñt' allpon pa'namen esocmañen nechyen.

¹⁹ Allempoñapa' atet'cha' not neyo'chro: Napa' ama es nepallteno ama't e'ñe mamesha. Ñeñt' allpon shonte' o' ñañño'tuapa' atarrcha' atomat char amach es nepallterre'te. Te'pa' o'ch names e'ñe p'octacma. Nellapene'tcha' rrats, nellapene'tcha' orrare'tats; ñeñt'cha'ña e'ñe nocshatene'ña na.” ²⁰ Tarraña ñeñt' acheñerpa' Yomporpa' atet och: “Papa' atarr otatsñate'p, ama es peñoteno ama't mamesha. Te'pa' añe tsaproc'mach o'ch perromuen. Ñeñt'ña shonte' o' p'añño'tuapa' te'ñapa' esesha'huachñaca'ye o'paterraya.”

²¹ Ñeñt'o'mar yeñoteñ, ñeñt' añño'tene' shonte' esocmañen ñeñt' e'ñe ñocpa, ñeñt'ña acheñer atet'pa' ama echenanoña ñeñt' sherbets Yomporecop.

Atto Yomporpa' ñach e'ñe cohuen cohuan'pene' ñeñt' puechemerasha' pen (Mt. 6.25-34)

²² Allempoña Jesúsapa' alla oterranerr pueyochresha':

—Ñeñt'o'marña te'pa' o'ch noterrser, amach añña sellcatsto ñeñt' atto yey'chena arr patsro. Ama't seyo'chra amach sotatsto, esuachca'ye yerrerrerrte' tsapa'onet. Ñaña amach añña sellcatsto ñeñt' e'ñe sechtso'ca, amach sotatsto, esuachca'ye yechorrate'.

²³ Tarro'mar Yomporpa' ña yapuene' yo'r'rerrña allo yocrrena ñeñt'ña atarr nanac sherbets. Ñeñt'o'marña yeñoteñ ña yapuene' ñaña yerrar, ñeñt'ña ñocoppa' ama esoye' enteñe. Ñaña ña yechcatene' yechets ñeñt' atarr sherbets. Ñeñt'o'marña yeñoteñ ña yapuene' ñaña ama't ñeñt' yechorra'yena, ñeñt'ña ñocop ama esoye' enteñe. ²⁴ Sentente' atto correna pa'namen o'tnesha'chno. Ñetpa' ama 'choye' nare'tatse'teneto ñaña ama 'choye' ap'cha'yeneto puerrar ñeñt'cha' rra'yenet. Ñetpa' ama es echenaye allcha' es añño'tyenet. Ama't atto correnetpa' Yomporña e'ñe yechcatyesuanet ñeñt'cha' puerrar p'a'yenet.

Elloña sa Yomporpa' atarr morrentensa sa; ello semítaneñ ñeñt atto atarr morrente-nana otneshačno. ²⁵ Ñaña amach sellcatsto attoch amach serromo, tarro'mar ama't sellquënañ attoch atarr atomat socrra arr patsro tarraña ama't e'ñe puešheñarrotesapa' amate' errotenoť so'chtatoña socreña ama't e'ñe pamtarra. ²⁶ Ñehua, atto ama't e'ñe sellquëñoña sa ama erroť es sepeno, ñeñtepnapa' amach pa'namena es sellca'yestatsto tarro'mar ñeñtpa' e'ñech orrena es sellca'yena.

²⁷ Ñaña sentente' atet yečquëna rorečno. Ñetpa' ama čoye' taruasa'yeneto ama't mamesha, ama čoye' taneneto ñeñt chorra'yenet atto e'ñe cohuen orreyenet. Tarraña napa' o'ch notas, ama't amča'tareť Salomón atto e'ñe a'cohuentateť ahuat, ama't ñapa' ama chorrane'teña ñeñt atarr cohuen ñeñt atet atarr cohuentena ror. ²⁸ Ñeñt ror pue'chorpa' ñeñtara ta'te' ñeñt chepyets allemeñ ñeñt sentyen te' tarraña ñeñtpa' mamecpa. Ama't cohuen chepyeneñ te'pa' tsapaťoneťñapa' o'ch etomamperetpa' e'ñech colla'huerra o'huañcha' cohuenta. Ñehua, Yompor atto cohuentatyenan ama't ñeñt e'ñe mamecpa, elloña sapa' atarr chorratyensañ saña; sañapa' eso'marte'ña amaña e'ñeye' seyemteño. ²⁹ Amach e'ñe patrra se'нено ñeñt atto serren ñaña ñeñt atto es sorryen. Amach ñeñtaña e'ñe paterr sellca'yestatsto. ³⁰ Tarro'mar allohuen acheñenesha' arr patsro ñeñt ama ame'ña'yetso, ñetpa' ñeñtaña e'ñe paterr e'nenet. Ñehua, Somporña ñeñt pue'ntaño'tsen ñapa' e'ñe entuenes ñeñt allpon pa'namen sepallta'yena arr patsro. ³¹ Sapa' añcha'ña e'ñe ñanom sema'yočhrena Yomporecop attoch atarr ayochreshatterra ña allochñapa' ñachña sapa'yene' ñeñt allpon sepallta'yena saña.

Atto ñeñtcha' seshonterr ñeñt atarr sherbets arrcha'ca'ye seshonten all Yompor pue'ntaño

(Mt. 6.19-21)

³² Amach neyochreneshačnocha' es sellcatsto ama't ama atarr shonteyayso, Yomporña atarr cohuen secuam̄pene' atet ñerra'mrrate' e'ñe po'carrneror penes. E'ñe pocsheñeshoťpa' apascha' attoch e'ñe cohuen socshapreterrñaña po'cohuenña attoch atarr ayochreshatterra. ³³ Te'pa' o'ch sepomyen ñeñt allpon sechyen allochñapa' o'ch sapa'yes ñaña ñeñt atarr es pallta'yetsa. Ñerra'm atet sepena allo'nach atarr aton seshonta'nen ñeñt e'ñe po'ñočh atarr sherbets Yomporecop. Ñeñtpa' ama ateyaye ñerra'mrrate' ñeñt sečllayepo'rer sepen arr patsro, ñeñtpa' atarr amllasha'tña. Tarraña ñeñt seshonta'nen ñeñt atarr sherbets ñeñt ama ahuañaño, ñeñtpa' arr seshonten Yompor pue'ntaño. Allña ama't eñetapa' amach čheno o'ch etatsre'tas ñaña ama't pomĵapa' amach eñalle ñeñtcha' rrrere' ñeñt seshonten all. ³⁴ Tarro'mar ñerra'm all pue'ntaño seshonta'nen ñeñt atarr cohuen senten, yeñoteñ e'ñe ñeñta paterr senen seyočhro ñeñtña atarr sherbets Yomporecop. Tarraña arr patsro ñerra'm aña seshonta'nen ñeñt atarr semorrentena, yeñoteñ e'ñe ñeñta paterr senen seyočhro ñeñtña' ama es sherbenoña Yomporecop.

Atto čhocmach yeñose'rteña Yepartseshar Cristo esempoch huerra

³⁵⁻³⁶ Te'pa' o'ch notas po'poñ: Chocmuepa'ch señosere'tna esempohuañenpa' o'ch alla nohuerra. Ñato' o'ch netma'ntatasa atet ñerra'mrrate' puešheñarr yacma ñeñt atarr ayochreshať. Ñapa' ahuo' allcha' rrallme'chapretenana' pacma ñeñt sena'tetsa. Pueyochresha'ñapa' alla cohuet pa'paclo esempoch huerra. Allempoña ñetpa' a'huortatyaset po'lampareñ allochñapa' attoch ñerra'm esempoch huerra ñeñt pamo'mte' penet ñerra'm o'ch chore'tuenanetpa' ñetñapa' allorocmach toram̄psapueñet attoch sherĵapueñet. ³⁷ Atarr cosheñtso'tsa'yen pueyochresha' ñerra'm esempoch huerret pamo'mte' allñapa' entuenanet čho atarr eñose'rteñet. Po'ñočhpa' napa' o'ch notas, ñachca'yena sherĵa'huene'ña ñeñt pueyochresha' pen ña. O'ch chana'huena

ñañapa' o'ch anorrcha'tatuenanet allcha' rrallme'chatuenanet. ³⁸ Ñeñtpa' atetcha' perranet ama't rroch tsapopa' o'ch huenanet amapa' o'ch puetarenmochpa' o'ch huenanet. Ñeñto'marña notenes, ñerra'm alla entuenanet cho atarr eñose'rteñet, ñeñtña atarr eñose'retyenayapa' atarrcha' cosheñtso'tsa'yenet. ³⁹ E'ñech machayoña nohuerra atet pena eñet allempo atta es sepcha'yena machayoñach huaponasa o'ch yoratsre'tensa'. Tarraña sa ñeñtes apacllates ñerra'm señotheñ e'ñech esempo huaponasa eñet amach cha semanrra'teno attoch amach semnacheña o'ch torañpsas sepaclo o'ch be'tosañpsasa o'ch yoruennasa' ñeñt allpon semorrenyena. ⁴⁰ Ñeñto'mar notenes, sapa'cho'ña chocmuepa'chña seño'stenna tarro'mar ñerra'm allempo atta es sepcha'yenapa' allempochña nohuerra na Ñeñten Acheñetosets.

Atetcha' aparetterra ataruasañ ñeñt e'ñe cohuen etsotene' atet yecheña pamo'mte' ñaña atetcha' aparetterra po'poñ ataruasañ ñeñt ama etsotaye ñeñt atet yecheña pamo'mte' (Mt. 24.45-51)

⁴¹ Allempoña Pedropa' atet a'p'to'ch:

—Partseshacha' ñeñt atet petma'ntatena te' ñeñtpa' ¿eseshacpa'tña, ñato' yocpate' ñeñtey peyochreshay pepeney amapa' ñato' allohuenacpa'nate'?

⁴² Partsesha'ñapa' alla toma'ntaterraneterr po'poñoné, atet oterraneterr:

—Allohuenespa' atetcha' sepa e'ñe cohuen atet ñerra'mrrate' puesheñarr yacma ñeñt yechena ñeñt pamo'mte' pen all pa'paclo. Ñeñtcha' po'taruas pene' chocmach apa'yesan allohuen po'potantañ pamo'mte' pa'taruasañer puerraret allpon ñeñt poctetsa puesheña'ttsoch. Ñapa' attecnoch pena chocmach apuenanet ñerra'm esempoch cherrerr allempo atet anaret ñocop o'ch alla apa'yerraneterr po'pocheño. Ñapa' chocmach atet pena amach ca'hpue' tarro'mar ñapa' eñoteñ attoch e'ñe coshatenan pamo'mte'. ⁴³ Ñeñtña ataruasañpa' atarrcha' coshatueñ pamo'mte'; ñerra'm esempoch huerrapa' alla entuenan pa'taruasañer ama cho ca'hpuenano ñeñt po'taruas apa'neñ ahuañmo'choteñ. ⁴⁴ Po'ño'ch o'ch notas, atarrcha' coshatueñ. Añcha' coshaterre' o'ch nohuer pamo'mte' añcha'taret ñeñtcha' cohuañpsaprete' ñeñt allpon echyen pamo'mte'. ⁴⁵ Tarraña ñeñt ataruasañer allempo ama huerra' pamo'mte' ñerra'm ñapa' atta oten pueyo'chro, namo'mte'pa' amach ahuen huerro, allempoña ñapa' chach ashtapechyenan ataruasañe'chno ñeñtcha' rratañ ama't ñaña coyanesohuen. Ñaña'pa' attach allemeñ rrapretyen ñaña attach orrare'tapretyen allcha' atarr posa'tare'tyen. ⁴⁶ Ñeñtña ataruasañer ñerra'm ñapa' attach ottatse'tyena amach es puecha'yeno amach eñoteñe ñeñte yetaroch huerra pamo'mte' ama't erro'tsencha' yetro huena. Machayoñachña huerra pamo'mte'pa' atarrcha' coñchatuer, allach mueñuer all ñeñt o'patenaya allohuen ñeñt ama es otapotetso ama't mamesha.

⁴⁷ 'Elloña napa' o'ch notas, ama't erra'tsena ataruasañer ñerra'm eñotenan ñeñt atet muenen pamo'mte' tarraña ñerra'm ama cohuen ame'ñenano pamo'mte' ñerra'm ama e'ñe cohuenaye' es pa'yeno attoch e'ñe cohuen aguërran pamo'mte' esempoch huerra, ama't erra'tsena ataruasañerpa' ñeñt atet petsapa' atarrcha' ashtaretterret. ⁴⁸ Tarraña erra'tsencha' ataruasañer ñeñt ama eñotano ñeñt atet muenen pamo'mte' ama't ñetpa'cho'ña añña atet pa'yenet ñeñt ama cohuenayaye ama't e'ñe poctet attecnoch ashtaretterretañ ñamet, tarraña ñetpa' mamesha'ttsach ashtapecharetetyerret tarro'mar ñetpa' ama eñoteneto ñeñt atet muenen pamo'mte'. Allohueney erra'tsenotey ñeñtey atarr aparettey attoch atarr yeñoterrñañ ñeñt atarr sherbets Yomporecop, ñeñteycha'ña atarrcha' cohueney Yompor o'ch e'ñe yesherbatuoñ shonte' allohuen ñeñt atarr eñotateney. Ñaña allohueney erra'tsenotey ñeñtey atarr yemtenya Yompor elloña allempopa' atarrcha' cohueney o'ch allo'na e'ñe cohuen yesherba'neñ.

Atto Jesúsapa' orrtatosan e'ñe ño'mar elloptanna'teñets
(Mt. 10.34-36)

⁴⁹ 'Te'pa' o'ch neñotaterrser po'poñ. Napa' atto nohuena arr patsro o'ch norrtatos elloptanna'teñets ñeñt atarr huomenc atet ñerra'm tso' atarr atserrtetsa. Pocte' nenteñ o'ch orrtet e'ñe tayecma. ⁵⁰ Ñaña nocoppa' e'ñe atet anaret na'muerochtataretterrach e'ñe atarr huomenc atet ñerra'mrrate' cho chorratenet ñeñtcha' atarr nemue-rochtaterre'. Ñeño'mar napa' ñeñtña atarr nellcatene' te' atta atarr na'huanteñ esempoch e'ñech etsotuerra. ⁵¹ Sapa' chate' sotenapañ añecopte' nohuapa o'ch e'ñe cohuen namo'tstanna'tatera acheñenesha' arr patsro. Ñeñtpa' ama atteyaye. Añecpa'ñaña nohuapa allochñapa' e'ñe no'marpa' acheñenesha'ñapa' o'ch atta elloptanna'tyeset. ⁵² Ñehua, ñeñt noten te' e'ñe tayoteñ ñato' all yeçhena amnarsheña puepahuarro pocollopa' ñato' ñetpa' o'ch ellopa'tetstatet poçtañña. Ñato' allo'tsen ma'psheña ñeñtcha' name'ñerraya, ñato' epsheñañapa' amach mueno o'ch ame'ñerrnet. Amapa' ñato' epsheñach allo'tsen ñeñtcha' name'ñerraya, ma'psheñañapa' amach mueno o'ch ame'ñerrnet. ⁵³ Ñato' e'ñe no'marpa' o'ch ellopa'tetstatenet poçtañña. Ñato' pompor o'ch epatare'tenan puechemer, amapa' ñato' puechemerñapa' o'ch epatare'tenan ñaña pompor, ñaña ñato' pachorpa' o'ch epatare'tenan puechoyor amapa' puechoyor o'ch epatare'tenan pachor, ñaña ñato' pa'so'mue o'ch epatare'tenan pa'to'ñen amapa' ñato' pa'to'ñenñapa' o'ch epatare'tenan pa'so'mue.

Atto Jesúsapa' orrtatosan ñeñtcha' eñotatahuet o' chapamet Yompor po'cohuenña
(Mt. 16.1-4; Mr. 8.11-13)

⁵⁴ Allempoña Jesúsapa' atet yerpatana acheñenesha' ñeñt atet otyenet ñet pa'nyeto: —Sapa' ñerra'm esempo senten arr chorren os all emuena atsne', sañapa' chocmach atet sotyen: “Te'pa' chach huatena.” Atetcha'cho' pa, o'chcho' huatena. ⁵⁵ Ñaña ñerra'm esempo senten huena mōrr topofof, ñeñtpa'cho'ña atetcha' sotyen: “Te'pa' o' charenmoch.” Atetcha'cho' pa, o'chcho' huorater huomenc. ⁵⁶ Sapa' atarr seño'teneñña ñeñt sentyen ento ñeñtña seño'tatene'; ama't ñaña ñeñt atet sentyen ñaña arr patsro ñeñtpa' e'ñe seño'tueñeñ. Tarraña ñeñt atet norrtatyennas nepartsoteña, eso'marte'ña ñeñtñapa' amaña eñotatensoña ñeñt atet pennas Yompor te' o'ch orrtatonas po'cohuenña. Ñeñtpa' attate' seshquēñ.

Atto eñotatanet choyach amo'tsterraya e'ñe mamecma ñeñt ye'moñe'tene'
(Mt. 5.25-26)

⁵⁷ 'Elloña e'ñe so'a seño'tepa'chña ñeñt pocte' enten Yompor socop ñeñtcha' atet sepannena. ⁵⁸ Ñato' o'ch netma'ntatasa atet ñerra'mrrate' esesha' setmantene' ñeñtcha' sanmue' añcha'taretesho allcha' sa'pocstaterr señoñ. Añ poctetsa allempo ama seçhena' añcha'taretesho o'ch poch ñeñt petmantene': “O'ch ya'pocstaterr yeñoñ e'ñe cohuen tayecma tayepa'tña ama yeçhena' añcha'taretesho.” Tarro'mar ñeñt petmantene' ñerra'm o'ch chapatañ añcha'taretesho, añcha'tareñapa' chate' pomap policeyaneshesho, ñetñapa' chate' abe'tapet cárcelo allcha' muerochtaterrpet. ⁵⁹ O'ch notas, ñerra'm choch yottam̄psasetpa' allasach o'pono, alloñapa' amach ahuen cha'nmaterrseto. Esemphuañencha' choch seçha'nmaterret ñerra'm allempoch e'ñe setsa'tuerra ora allohuen ñeñt allpon quelle muenenet. Ama't e'ñe eptalla centavotollña ñerra'm ama setsa'tueña' amachca'ye cha'nmaterrseto allot. Ñeño'marña notenes o'ch e'ñe cohuen samo'tstera ñeñt se'moñe'tene' tayepa'tñapa' ama chennasa' ñeñt atarr yoroçhen senten socop.

13

Añ poctetsa yocop o'ch yoctape'cherr ello cohuen Yomporcop

¹ Allempo huapa puesheña'tets acheñenesha' Jesúsesho, ñetñapa' serrpare'tatoset Jesús atet entenet ñet; ñeñtpa' atet otoset:

—Allpónsheña ñeñt galileo'marnesha' allo'tsa'yenet allecma muetsatenet berr ñeñt Yomporecop. Allempoñapa' huapanet ñeñt mueñen amcha'taret Pilato ñetñapa' cha muetsanatosanet e'ñe all allempo muetsatenet berr ñeñt Yomporecop. Attoña ñetpa' allña atsetatse'tatareñtet ñet po'rras epuet pueberrret po'rras.

² Jesúsñapa' atet otanet:

—Sapa' chate' sotenapañ ñeñt galileo'marnesha' allempo atet aþareñtet ñato' ñetpa' atarrte' nanac ochñañtet ellote' metana'tueñet allohuen po'potantañ galileo'marnesha' po'chñaret. Chate' sotenapañ ñeñto'marte'ña atet aþareñtet ñeñt atarr sosey apencoñen. ³ Tarraña napa' o'ch notas: Ama't allohuenes samña ñerra'm amach e'ñe cohuen soctape'cherro ello Yomporecop, sapa'cho'ña attemach seperra sechenca'huerrach e'ñe poctacma. ⁴ Ñaña ñeñt charra' ñeñt puechetsa posocsheña ñeñt colla'huatsa ahuaña ñeñt a'tpetse't pocoll torrepo' allempo mata'nerr Jerusaléño e'ñe all oteñet Siloé. Ñehua, sapa' chate' sotenapañ ñeñt a'cllatter torrepa' ñetpa' atarrte' atparñañtet ellote' metana'tueñet allohuen po'potantañ ñeñt atto atpare'tena jerusaléño'marnesha'. ⁵ Tarraña napa' o'ch notas: Ama't allohuenes samña ñerra'm amach e'ñe cohuen soctape'cherro ello Yomporecop, sapa'cho'ña attemach seperra sechenca'huerrach e'ñe poctacma.

Arrpa' all toma'ntatanet Jesús atet pena partech ñeñt ama me'tetso

⁶ Allempoña Jesúsapa' alla toma'ntaterraneterr po'pocheño, ñeñtpa' atet oterraneterr:

—Puesheñarr acheñ all puenarenimopa' allñapa' ahuañmo'choñen nare'tatenan ñaña puecharr partech.* Atteñapa' chap allempo huapa e'nosñañ pue'mer. Tarraña ama't pueñarrapa' ama entosñañe pue'mer. Partayechpa' ama me'teno. ⁷ Allempoñapa' atet otan ñeñt cohuanipene' puenarenima': "Te'pa' o' met ma'pa char chocma nohuena e'nene' partech pue'mer. Teme'ttsen ama't pueñarra pue'merpa' ama nenteññañe. Te'pa' o'ch pa'mater tarro'mar e'ñe orrena quechcare'tennay yepatseñ atto ama yenare'teno po'poñ narmets all." ⁸ Tarraña ñeñt cohuanipene' narmetspa' atet otan pamo'mte': "Allach nompokha' añ char ñeñt o' huerrerrpa' napa' o'ch na'mueñtsetampes pats o'ch nenoñ amar. ⁹ Ñato'rraña atet nepe'pa' o'ch cohuen me't tsapañ charo. Tarraña ñerra'm ama me'topa' pocte'ña'cho' allempopa' o'ch pa'matater."

Atto Jesúsapa' a'crraterran coyanesha' ñeñt atta mo'quëtsa ama't añe yetro allempocma amesenet

¹⁰ Allempo chapa'muenerr allempo amesenet, Jesúsñapa' yeçhatenanet judionesha' po'prahueto. ¹¹ Allñapa' allo'tsen puesheñarr coyanesha' ñeñt cha mo'quëna, ama eshcaye' paçharrteno. Ñeñtpa' oneñet atet patene'. Ahuatoteñ atta pena o' charren char puechena posoc atta mo'quëna. ¹² Jesúsñapa' all eñchpa' o' chore'tospa' atet och:

—Nocha te'pa' pasaterreþcha' ñeñt atto atarr pemueroçhtena.

¹³ Allempoñapa' a'þllamco'ch. A'þllamco'tue'pa' allorocma e'ñe cohuen paçharrterra. Ñañaapa' atarr aye'choçhtaterran Yompor. ¹⁴ Allempoña ñeñt amcha'tareñtetsa all judionesha' po'prahuo, ñapa' allempo entan atet o' a'crratan Jesús atsñañet, ñañaapa' ñeñta atarr atsrre'mate'. Ama't mameshapa' ama pocteye' eñche o'ch a'crratan acheñ ñeñte yetro allempo amesenet. Ñeñto'marña ñapa' atet otan acheñenesha':

—Eñall pechapmat yet allempo pocte' o'ch yetaruasen. Ñeñtpa' pocte' o'ch sehuapa allempo attoch sa'crrater atsñañet. Tarraña añ yetro allempo yamesen amach sehuapatsto a'crrate' atsñañet.

¹⁵ Partsesha'ñapa' atet och:

* **13:6** Ñehua, Jesús añ toma'ntatanet higo ñeñt puenarenim penet all pa'nyo.

—Sapa' ñeñtes e'ñe sommo'cheñoŧpa' atarr seshcare'ten. Sapa'cho'ña ama't añe yetro allempocma yamesen chocma setaruasen samã. Sepyampeñ sehuacsher, sashanor allecma serrateñ o'ch sanemñ ñaña oño allcha' sonayen oñ. ¹⁶ Añ coyanesha' ama't ñeñŧ po'mñreneñ pen yatañ Abraham ama't çharra' puechena posoc char ñeñŧ allponmat o' huanquër oneñet, pocte'ca'ye o'ch ya'rroyatater ama't añe yetro allempo yamesen.

¹⁷ Acheñenesha' allohuen ñeñŧ e'moñe'tene' ñetpa' ñeñña atarr pencatahuet. Po'potantañña acheñeneshaçhnopa' ñetñapa' atarr nanac coshenet. Atarr nanac cohuen entenet ñeñŧ atet pa Jesús.

Atto Jesús pa' toma'ntaterranet atet pena pue'llomer ñeñŧ otenet mostazllomñ
(Mt. 13.31-32; Mr. 4.30-32)

¹⁸ Ñeñto'marña allempopa' alla oterraneterr:

—Añ Yompor po'cohuenña ñeñŧ atto ayochreshattena ña, ñanompa' e'ñech pueheña'ttsa ame'ña'yetsa, allempoteñña' allo'nach sen atonetnomtsa ñeñŧcha' ame'ñerrtsa attochña e'ñe epa'huerra erracmañen Yompor po'cohuenña. Ñeñña te'pa' o'ch netma'ntatasa ñeñŧ atet pena ña. ¹⁹ Ñehua, ñeñŧpa' atet pena ñerra'mrrate' pue'llomer ñeñŧ atarr añetolleshallmerr ñeñŧ otenet mostazllomñ. Ñeñŧ pue'llomñretollpa' pueheñarrña' o' anemñ pa'mro allcha' nare'teña'. E'ñe allponmatatsapa' o' chop, ñeñŧña' allo'na sen rrorranmats e'ñe cohuen atarrchetnom. Ñeñña narmetsocherpa' o'ch huaçha'toña o'çhno ñeñŧcha' ama'tanatyesosets puetacro'mar.

Atto Jesús pa' toma'ntaterranet ñeñŧ atet pena chase'
(Mt. 13.33)

²⁰ Elloña alla oterraneterr:

—Po'poñoneŧ o'ch netma'ntatasa ñeñŧ atet pena Yompor po'cohuenña ñeñŧ atto atarr ayochreshattena ña. Ñeñŧpa' ama'tcha' añetolla ñeñŧcha' ñanom orrtatsa tarraña e'ñe ña po'huamencotpa' mametollapa' o'ch e'ñe epa'hua ora erraparen.

²¹ Ñeñŧpa' añ toma'ntaterraneterr atet pena chase':

—Ñeñŧ chase'pa' allo tsetenan coyanesha' harina' ñeñŧ oñetsetstaten attoch a'chasatan harina' esheccha' e'ñe a'muesatue. Ñeñña chase'pa' ama'tcha' añetolla net, ama'tcha' aton harina' ñeñŧ ma'pa arroga, mametollapa' o'ch e'ñe a'muesatuanña ama't atarr aton harina'.

Atto Jesús pa' toma'ntaterraneterr ñerra'mrrate' yetarro'ollo yebe'ten esheccha' yeçhap Yomporesho

(Mt. 7.13-14, 21-23)

²² All oñemyen Jesús e'ñe ora asuahuanom allohuen anetso'mar all shonta'yena acheñenesha' ama't ñaña all ama tama eñalleyaye acheñenesha'. Allña e'ñe ser- rpare'tatyesnomanet. Allempo oñemyen allemeñ anetso'mar ñapa' arr sen Jerusaléno all sechena. ²³ All oñen toñopa' allempoña pueheñarrpa' a'p'to'tnomñ, atet och:

—Ayochreshate, ñeñŧcha' allpon a'queshpataretterrtsapa' ta'm ñetpa' ¿pueheña'ttsetate' ñato' amapa' atarrcha' shonte'?

Jesúsña'pa' atet och:

²⁴ —Sapa' añcha'ña e'ñe cohuen sema'yoçhrena ñeñŧ cohuen enten Yompor attochña sesuanom ñeñŧ ama cohuenaye' enteno ña. Ñeñŧpa' o'ch netma'ntacha atet ñerra'mrrate' allcha' yebe'tos esheccha' yeçhap ñesho ñeñŧpa' atarr añetoll, atarr torrapo' o'ch yebe'tos all. Ñaña o'ch notas esempohuañen ama'tcha' shonte' acheñenesha' ñeñŧcha' atarr muenatseñ o'ch be'terretañ all attoch çherretañ Yomporesho tarraña allempopa' amach eshec be'terreto attoch çherret all tarro'mar allempopa' o'ch huañerr atto atarr cohueney Yompor. ²⁵ Ñeñŧpa' o'ch netma'ntacha atet ñerra'mrrate' esempo o'ch çhen ñeñŧ apacllatesha' ñaña'pa' o'ch tantuena o'ch e'ñe echarr yottañpesuena.

Allempopa' ama't e'ñe eseshapa' amach eshec be'tosoña all. Allempoña ama'tcha' shonteseñ o'ch sehua'cha'ta all petotach sechorros allotcha' sechore'tos apaclatesha'. Allña sapa' atetcha' sotos: "Ayochreshate petoram'psapuey." Ñapa' atetcha' otapas: "Napa' ama nentarso, erro'te' sehuenaña sa." ²⁶ Sañapa' atetcha' sotererr: "Ama't parrocmá yerrallme'chyese'teña ahuañmo'cha ñaña ama't ya ya'netsro'mar allecma chopeñe'chyenet allca'yeña peychatyese't." ²⁷ Tarraña ñapa' atetcha' oterrserr: "Te'pa' o'ch notas, napa' amaca'ye po'ño'ch nentarso, erro'te' sehuenaña sa. Te'pa' orrerres arro't nesho't allohuenes ñeñtes ma'yo'chrenaya ñeñt ama pocte' enteno Yompor." ²⁸ O'ch ahues all ñeñt o'patatenset sa. Allña'pa' allcha' seyahuanrrortosa, sanmueño't atserppa' serraso'tyesoscha' sas. Allotcha'ña sentosña satañneshachno—Abraham ñaña Isaac ñaña Jacob ñaña allohuen ñeñt a'mta'yesaye't Yompor po'ñoñ. Ñetña'pa' e'ñe Yompore-sho'tsa'yenet all am'cha'tare'ttena ña. Sañapa' cha'petotaña huapore'tenset. ²⁹ Allña'pa' allem'ateñcha' hua'cha'ta shonte' ñeñt ama judioneshayaye ñeñt'cha' anorr'cha'tyesosets all e'ñe Yompore-sho all am'cha'tare'ttena ña allcha' rrallme'choset all e'ñe cohuentena Yompor. ³⁰ Te'pa' seño'chcha' eñall acheñenesha' ñeñt ama asherbenaye' senteno sa te' tarraña allempoña ñetpa' atarrcha' asherben enterranet Yompor. Ñaña eñall acheñenesha' ñeñt atarr asherben sentyen sa te', tarraña allempoña ñetpa' amach asherbenaye' enterraneto Yompor.

Atto Jesús'pa' puellquëño'tan jerusaléño'marnesha' atarr ya'na'tenanet (Mt. 23.37-39)

³¹ E'ñe ñeñte yetrocma allempo hua'cha'toña patantarr fariseonesha'. Ñetña'pa' atet otoset Jesús:

—Te'pa' o'ch peyeta arro't tarro'mar am'cha'tare't Herodespa' o'paten'pa' ahuo'ch muetsata'p.

³² Jesús'ña'pa' atet otapanet:

—O'ch ahuerrespa' atetcha' sotuer Herodes ñeñt atarr eñotene' shequëñets: "Te'pa' o'ch peño'ch, napa' atterach necachpatateññañ acheñenesha' po'neñe'ter ñaña atterach shonte' na'crratyes ñeñt atsna'tyets. Atet nepena te', tsapa'tonetpa'cho'ña attec'mach nepena, o'chña tsapa'tonterrerrpa' o'ch e'ñe netsotatue allohuen." ³³ Nocoppa' añ poctetsa chocmach nesen ama't te', ama't tsapa'tonetpa'cho'ña, ama't ñaña o'ch tsapa'tonterrerrpa' chocmach nesen. Attotach necherr Jerusaléño, tarro'mar allpa' allecma chocma muetsayesete't ñeñt a'mta'yesaye't Yompor po'ñoñ.

³⁴ Allempoña Jesús e'ñe puellquëño't judionesha'pa' atet eñorena ñocpuet, ñeñto'marña atet otanet:

—Sa jerusaléño'marneshacha' ñeñtes muetsanatyesaye't ñeñt a'mta'yesaye't Yompor po'ñoñ, sa ñeñtes rrollapechyesaye't ñeñt amñare't sesho. Atarr atonoche'tats nemneñeñ o'ch na'yapa'cha'huerrsoñ allohuenes nesho attoch e'ñe cohuen necuam'pensoñ. Nemneñeñ o'ch na'yapa'cha'huerrres atet ñerra'mrrate' atollop a'yapa'chene' puechoyoresha' o'ch e'ñe seto'tuanet. Tarraña sañapa' ama't e'ñe mameshapa' amaña semno. ³⁵ Te'ña'pa' all sey'chena sa, Yomporña'pa' o'ch a'ypo'ñerres. Tarro'mar te'pa' o'ch alla noterrserr: Na po'poche'ño'pa' amach alla senterrno te'. Esemphuañenña'pa' senterrencha' allempoña'pa' atetcha' soterren: "Aye'cho'chtatpahuempa'ch Jesucristo ñeñt huapatsa ñeñt llesensen Yeyomporer."

14

Atto Jesús'pa' a'crraterran puesheñarr yacma ñeñt cha ananen

¹ Allempoña cherrerr pam'tarr allempo amesenet. Jesús'ña'pa' ahuo' allcha' rrallme'chapretenana' puesheñarr fariseo ñeñt atarr am'cha'tare'ttetsa. Chap all pa'paclopa' po'potantaña fariseonesha' ñetña'pa' atarr cohua'na'tyesapet Jesús.

² Allña'pa' allo'tsen puesheñarr yacma ñeñt' cha ananen. ³ Jesúsña'pa' all serrpare'tos epuet fariseonesha' ñaña ñeñt' allo'tsa'yen ñeñt' atarr etsotene' ñoñets ñeñt' atet anaret' judioneshacop. Ñaña'pa' atta a'p'to'tosanet e'ñe po'tomña, allochña'pa' o'ch eñoch ñato' errotencha' anapet. Ñeñt'pa' atet otosanet:

—¿Erroñena'tña sotenña sa, ta'm pocte'te' o'ch na'crratos atsnañet' aña yetro allempo yamesen? ¿Atte't otenña ñoñets ñeñt' atet anaret', ñato' amate'?

⁴ Fariseonesha'ña'pa' ama eseshaye' anapuetso ama't puesheñarroña. Allempoña Jesús'pa' a'p'llamco'tosan atsnañet'. E'ñe a'p'llamco'tue'pa' cha correrrtsa allenta mueñer pa'paclo. ⁵ Allempoña Jesús'pa' alla oterranerr fariseonesha':

—Sapa' ñerra'm sashanor amapa' sehuacs her shora'nets arroro to all chorren oñ, ama'tcha'ña sechtereña allot e'ñe allorocma ama't aña yetro allempocma yamesen.

⁶ Ñetña'pa' ama errotenaye' otenaye' enteñeto ama't e'ñe puesheñarroña.

Atto ahua'ñareñtet o'ch rrallme'chapreteña' ñeñt' sena'tetsa

⁷ Allempoña ñeñt' ahua'ñareñtesha' ñetña'pa' aña atarr muenenet o'ch anorryesoset allecma anen ñeñt' atarr añcha'na'tpo' entyenet. Jesúsña'pa' entapanet ñeñt' atet muenenet ñet o'ch cha ommo'chyesoset. Allempoña'pa' atet otapanet:

⁸ —Ñerra'm esempo ahua'ñareñtes o'ch serrallme'chapreteña' ñeñt' sena'tetsa, sommo'cheño'tpa' amach arra sanorratsetyesoso allecma anen ñeñt' atarr añcha'na'tpo' entyenet. Ñetña chenta'pa' o'ch huapuet ñamet. ⁹ Ane'tañ ñeñt' sehua'ñene' allohuenes ñaña'pa' o'ch huapa pesho o'ch ota'p: “Te'pa' o'ch petanterra arroñ, all panen te'pa' o' huapaña ñeñt' panorrrpue' pene' all panen ñeñt' atarr añcha'na'tpo' entyenet.” Paña allempopa' atarrcha' pepenquëño't petanterra o'ch ahue'p allcha' panorros allecma anorryen ñeñt' ama esoshe'maye' entyenet. ¹⁰ Sapa' atetcha'ña se'pa ñerra'm esempo hua'ñenset. Allempo se'chap all hua'ñenset sapa' allach sanorros allecma anorrcha'tyen ñeñt' ama esoshe'maye' entyenet. Allña'pa' o'ch huapa ane'tañ, ñapa' atetcha' otose'p: “Masheñcha' p'apa' arrcha' panorros allecma anen ñeñt' atarr añcha'na'tpo' entyenet.” Attochña allohuen ahua'ñareñtesha'pa' o'ch entapet p'apa' atarr añcha'na'tpo' entyenet. ¹¹ Tarro'mar allohuen ñeñt' e'ñe cohuen entetsa e'ñe pommo'cheño't ñetña tsapa'one'tpa' amach esoshe'maye' entereto. Tarraña allohuen ñeñt' ama esoshe'maye' entetso te', ñeñt'ña tsapa'one'tpa' atarrcha' cohuen enteret.

¹² Allempoña'pa' atet otan ane'tañ ñeñt' hua'ñene':

—Ñerra'm esempoch porrtaten rreñets ñeñt'cha' serra'muen aromtaña amapa' elleronet amach e'ñe aña pehua'ñatsto ñeñt' e'ñe parro peyemtena ñaña ñeñt' pemo'nasheñ pepen ñaña po'potantañ ñeñt' e'ñe p'amo'tsesha' pepen ama't ñaña allo'marnesha' ñeñt' atarr e'çllayoretet. Tarro'mar ñerra'm ñeñt'ña pehua'ñenpa' ñetpa'cho'ña tsapa'one't o'ch alla hua'ñerrpet p'ama. Attoch tsa'terrpet. ¹³ Tarraña ñerra'm esempoch porrtat rreñets aña'nachña pehua'ña'yets ñeñt' atarr huocchañetyets ñaña achocrañachno ñaña ñeñt' checa're'pachno ñaña aporo'yete'chno. ¹⁴ Attochña p'apa' atarrcha' cosheñtso'tsene'p tarro'mar ñetpa' amach erroteno't alla tsa'terrpeto. P'apa' esempohuañencha'ña atsa'tare'te'p allempoch atantatare'tterra allohuen ñeñt' e'ñe pocte' es p'a'yestse't.

Arrpa' all atma'ntatare'ttena ane'tañ ñeñt' atarr aton ye'chcatatene' rreñets

¹⁵ Allempo e'mueñet Jesús atet serrpare'tatuanet, puesheñarrña ñeñt' parro anorrchenet ñeñt' parro rrallme'chenet, ñaña'pa' atet otan Jesús:

—Atarrcha' cosheñtso'tseney allohuene'ñe ñeñt'eycha' rrallme'chapreterre' Yompor all añcha'tare'ttena pue'ntaño.

¹⁶ Jesúsña'pa' toma'ntaterraneterr, ñeñt'pa' atet oterraneterr:

—Eñall puesheñarr ane'tañ ñañapa' o'ch yečcatatan atarr shonte' aton rreñets. Allempoñapa' otyesan shonte' acheñenesha' ñeñtcha' rrallme'chapretenaya' esempoch e'ñe a'potatuan rreñets. ¹⁷ O'ña čhap allempo e'ñe a'potatuan rreñetspa' ñañapa' mueñan pa'taruasañer ñeñtcha' hua'ña'yenaya' allohuen acheñenesha' ñeñt otarettatsa ahuaña. Ñeñña pa'taruasañerpa' atet otosan acheñenesha':

—Te'pa' o'ca'ye e'ñe a'potaretetuaña rreñets sonačha't o'ch serrallme'chapretena'. ¹⁸ Tarraña ñeñt ahua'ñaretečhnopa' ñetñapa' ama esesha' tatso. Ñehua, ñeñt ñanom puesheñarrpa' atet ot: “Napa' te'pa' o'ca'ye nerañta pats, o'chca'ye ahuen o'ch necua'yeña'. Potuercha' pamo'mte' peretnerrnepa', napa' amachca'ye neto.”

¹⁹ Po'psheñeñpa'čho'ña atet ot: “Napa'čho'ña o'ca'ye nerañta čharrana toro po'yuntohuen e'ñe epna'ttsocma; o'chca'ye ahuen o'ch netpach taruasate'. Potuercha' pamo'mte' peretnerrnepa', napa' amachca'ye neto.” ²⁰ Po'psheñeñpa'čho'ña atet ot: “Napa' errtenca'ye sena'tetsa ñeñto'marña napa' amachca'ye eshec neto.”

²¹ Ñeñña ataruasañer atet otyes acheñenesha'pa' ñañapa' ahuer pamo'mtayesho, serrpare'tatuerran pamo'mte' atet otyeset ñeñt hua'ña'yeseñ. Ane'tañapa' ñeñña atarr atsrre'mate'. Patsrre'mueño'pa' atet otterranerr pa'taruasañer: “Te'pa' o'ch ahuerperr e'ñe tayecma ñaña all anetso allecma atarr chopeñe'chyen shonte' acheñenesha'. Alločha'ña pehuapaterr huocchañneshačhno ñaña achocrañačhno ñaña aporo'yetečhno ñaña checa'repačhno.” ²² Pa'taruasañerñapa' atetcho' perrerr.

Allempo huerra atet otuerranerr pamo'mte': “Nomporcha' ñeñt atet pōtenpa' te'pa' o' e'ñe atet ne'pohua. Tarraña allcha' anorrča'tyes ñeñtcha' rrallme'chosetspa' orameñ.” ²³ Pamo'mte'ñapa' atet otererr: “Te'pa' o'ch alla ahuerperr allampaño'mar all shonte' toñečhno allecma chopeñe'chyen acheñenesha'. Allñapa' atarrcha' pōtare'tyes acheñenesha' onetepa' arr nepacillo attoch e'ñe chorra acheñenesha' arr nepacillo. ²⁴ Po'ñočh te' napa' o'ch notas, ñeñt ñanom nehua'ñatyeseñpa' ñetña te'ñapa' ama't e'ñe puesheñarroteta'pa' amach rrallme'chapreterrneto attoch cosherret nesho.”

Añ poctetsa o'ch e'ñe yesuanem ñeñt e'ñe yocpa attoch yocter Cristo e'ñe poctacma

²⁵ All oñemyen Jesús'pa' shonte' acheñenesha' co'ta'huanene'. Ñañapa' cohua'nmanet allenet shontenetpa' atet otnomanet:

²⁶ —Ñerra'm esesha' muene' o'ch coterren e'ñe po'ñočh, añ nemnen o'ch atarr nanac morrentennet. Elloch metaneñet atto atarr morrenteñet pompōr, ama't ñaña pa'chor, ama't ñaña pue'tapor ñaña puechemeresha', pa'mo'nasheñnesha', po'čhanesha'. Atto atarr morrentennet ello metaneñet atto atarr morrentenet ñañeñeta ñeñt atto correnet arr patsro. Ñerra'm erra'tsen ama atteye' nemorrentenayepa' nañapa' amach erro'tenot neyochresha' neperraneto. ²⁷ Tarro'mar ñerra'm erra'tsen ama e'ñeye' sehuanmaye ñeñt atet muenenet e'ñe ñocpueta attoch coterrnet e'ñe poctacma, nañapa' amach erro'tenot neyochresha' neperraneto. Ñeñtpa' añ toma'ntena atet ñerra'mrrate' cho sechechnen secorsoch allcha' semueročhta samā. ²⁸ Ñeñto'marña ñerra'm erra'tsenotes muenene' o'ch neyochresha' neperres, añ poctetsa čhoch ñanom soctape'ch, e'ñe'e' pocte' senteñ o'ch sesuanom ora allohuen ñeñt atet notenes. Ñeñtpa' atetcha' netma'ntacha atet ñerra'mrrate' eseshas muenene' o'ch satomat sep-aquëll atarrpo'pa' añ sepalltena čhoch ñanom sanorr allcha' soctape'ch errpōnte' tsa'tena. Ñato' eñallte' allpon quelle attoch mameshapa' o'ch sa'pue'. ²⁹ Ñerra'm ama atet ñanom soctape'chenopa' ñato' o'ch satomatañ ñanom alloch echarr sorrat sepaquëll, ñerra'm čha sehuañapes quelle attoch sa'pañ sepaquëllpa' attach secačhpue'. Acheñenesha'ña ñeñt sentene'pa' čhach che'tatsetaset; ³⁰ ñetñapa' atetcha' otyeset: “Añ aheñerpa' o' tomataneñña atarrpo' pa'paquëll, alla huañapes quellepa' ama esoye' a'patano pa'paquëll.” ³¹ Ñeñtara co'tapñatser o'ch alla netma'ntacha po'pōñone't.

Atet ñerra'mrrate' puesheñarr am̄cha'taret ñerra'm añ cotape'chen o'ch quellaratan po'solltarer epuet po'psheñeñ am̄cha'taret po'solltarer čhoch ñanom anorr allcha' e'ñe cohuen cotape'ch. Allempopa' atetcha' ot: "Napa' e'ñeca' čcharra' mila nechen nesolltarer; po'psheñeñña am̄cha'taretpa' echenan po'solltarer epoch čcharra' mil. Ta'm, pocte'te' o'ch nemñe čcharra' mil nesolltarer ñeñtcha' poctapue' epoch čcharra' mil solltarnesha' ñeñtcha' yehuapoya. Ta'mca'ye a'mchechatuette'ca'ye —shonte'." ³² Allempoña o'ch atet cotape'chuapa' ñerra'm ama erroť apenaye' eñchepa' allempo ama aponmaretteta' ñaña'pa' o'ch mueñan allponsheña ñeñtcha' atet otosahuet: "Yapa' añecop yen o'ch ya'pocataerr ñoñets e'ñe cohuen e'ñe atta, amach yečllaranna'tatsto." ³³ Ñeñto'mar notenes, ñerra'm eseshas ama e'ñe pocteye' senteñe o'ch sesuanom ora ñeñt allpon sechen, nañapa' amach erroťenoť neyochresha' neperrso.

Arrpa' all atma'ntatarettet atet ñerra'm pos o'ch huañ po'poserrteña'pa' o'huañcha' sherba'
(Mt. 5.13; Mr. 9.50)

³⁴ 'Ñehua, yapa' yeñoteñ pospa' atarr cohuen sherbenan allohuen acheñenesha' arr patsro. (Allohuen ñeñt po'ñočh neyochresha' nepen ñetña'pa' atarr sherbenet atet ñerra'mrrate' pos atarr cohuen sherbeney.) Tarraña pospa' ñerra'm o'ch huañerr po'poserrteña amach erroťenoť ellopa' ya'poserrtatere. ³⁵ Attoña amach es sherberro ama't e'ñe coñe'ta. Ama't attoch yetnarratater allo patspa' ama't ñeñtecpapa' amach sherberro; ñeñto'marña ama't ñeñtecpapa' amach yañño'tatsche. Ñeñto'marña o'ch yehuapore'ter a'yo. Ñerra'm eseshaste' ne'mñotene'pa' čchaponasepa'ch seyochro ñeñt atet neyčhatenes.

15

Acheñ ñeñt ama ame'ñetsopa' arrpa' all atma'ntatarettet atet ñerra'm carrnero ñeñt chenquëtsa
(Mt. 18.10-14)

¹ Shonte' ñeñt cobrets quelle gobiernocop ñeñtara ñeñt atarr shecare'tyets ñaña shonte' ochñañenesha', ñetña'pa' huacha'tet Jesúsesho o'ch e'mñoteññañeta' ñeñt atet serrpare'tatenan allohuen acheñenesha'. ² Añña fariseonesha' ñaña ñeñt atarr etso-tayenayeñ ñoñets ñeñt atet anaret judioneshacop, ñetña'pa' ama't mameshapa' ama pocteye' enteñeto. Ñetña'pa' atta sasare'teñet Jesúsapa' ñeñtapa' atet otanna'tyenet:

—Añ acheñer ama't ñeñt atarr ochñañenesha'pa' eso'marte'ña e'ñe cohuen agapyenanet, ñaña alla rrallme'chapreteñet.

³ Ñeñto'mar Jesúsapa' alla toma'ntaterraneterr; ñeñtapa' atet oterraneterr:

⁴ —Sapa' ñerra'm eseshas echene' shonte' secarrneror, čcharroch čcharra' sechen tarraña ñerra'm pomocarrña machayoťa sa'chencachpa' ama't atet sepeno. O'ch sesa'nom allohuen po'potantañ ñeñt o' noventa nuebarña all amayo ama't atarr a'yopa' o'ch ahues e'nerraya' pomocarr ñeñt chenquëtsa. Allcha' se'name'tyera'pa' attotach senter. ⁵ Allña senterpa' o'ch senatner, e'ñech socsheñeshocmañen saner. ⁶ O'chña sečhapater sepaclopa' allña'pa' o'ch sečhore'tuer samo'tsesha' o'ch onača'tet. Allña'pa' o'ch sotuerr: "Te'pa' o'ch socshapreterrna necarrneror, te'pa' o' nenterrña ñeñt na'chencaten." ⁷ Ñeñto'marña te'pa' notenes: Yamo'mte' ñeñt pue'taño'tsen attecmach atarr nanac cosherrana ama't puesheñarra acheñ ñeñt atarr ochñañ ñerra'm esepoch o'ch cotape'cherret ello e'ñe cohuen ñocop. Elloch metana'tuerran ñeñt atto coshenana po'potantañ ñeñt shonte' ñeñt e'ñe pocte' es pa'yenet ñocop ama't ñetpa' shontet atet ñerra'm noventa nueve carrnero ñaña ñetpa' ama't ama pallteneto o'ch cotape'cherret ello cohuen.

Arrpa' all atma'ntatare'ttena puetallarr quelle ñeñt a'chencaten pamo'mte'

⁸ Ñeñtara cotapñats, te'pa' ñato' atetcha' netma'ntacha po'poñoneñ atet ñerra'm puesheñarr coyanesha' ñerra'm echenan çharratlla po'çllayor ñeñt atarr morrentena. Ñerra'm çho a'chencach puetallarrpa' ama'tcha' a'llchatanoña po'lampareñ attoch tarapo'tenan pa'paquell allcha' e'name'tyerran puetallarr po'çllayor. Atto'tcha'ña enter. ⁹ O'chña enterpa' allempoñapa' o'ch agotan pamo'tsesha' e'ñe pacmaneshoche', atetcha' otanet: "Te'pa' o'ch socshapreterrna ñeñt puetallarr neçllayor ñeñt na'chencat, te'pa' o' nenter." ¹⁰ Te'pa' o'ch noterrser, elloña atarrcha' nanac coshateret Yompor po'mllañoñeñreneshohuen ñerra'm esempo ama't puesheñarra acheñ ñeñt atarr ochña'tpa' o'ch cotape'cherret ello e'ñe cohuen Yomporecop.

Arrpa' all atma'ntatare'ttena puesheñarr yacma puechemer ñeñt atarr ottatsñaĩ

¹¹ Elloña Jesúsapa' alla toma'ntaterraneterr, ñeñt'pa' atet oterraneterr:

—Eñall puesheñarr acheñ echenan epsheña puechemer. ¹² Ñeñtña puechoyomer penpa' atet otan pompor: "Apacha' ñeñt ora allpon pechen te' napa' nemneñ o'ch ãapuen e'ñe tayecma ñeñt allpon ão'patatenna." Allempoña pompor ora ñeñt allpon echyenpa' o' apa'yesan epsheño'mar puechemerasha' ñeñt allpon o'patatyenanet e'ñe puesheña'ttset. ¹³ E'ñe allponmatatsa ñeñtña puechoyomer penpa' o' e'ñe pomhuahuanman ora allohuen ñeñt allpon aã pompor allo agapan shonte' quelle attoch ta ãachayo po'poñ anetso. Allempoña çhap ãachayopa' allña'pa' sosya'tsañeçhna atet ãa'yesos. Attoña ama't shonte' po'çllayor ñeñt anem o' e'ñe a'gasta'huahue e'ñe pottatse'teñoñ. ¹⁴ O' e'ñe a'gasta'huan ora po'çllayorpa' allempoña allpa' o' orrta muecheñets all ñeñte anetsro. Ñaña'pa' o'huañ erraye' entan puerrar ñeñtcha' rren. ¹⁵ Allempoña ñapa' o' ahuo' allo'tsen ane'tañ all e'nyenan taruas. Ane'tañña'pa' aña aã po'taruas o'ch auyesos a'yenet allcha' cohuanpesyesoñ po'chañchor. ¹⁶ Ña pa'chporrño'tpa' atarr mueneñ o'ch rrapretosan chañcho puerrar attoch yetosa. Ama't chañchopa' pa'talle'tsa puerrar pen ñapa'çho'ña ñeñtña atarr muenen o'ch rros tarraña ama't chañcho ama eseshaye' apuenaye puerrar ñeñtcha' rra'. ¹⁷ Atteña'pa' machayota çhapoña pueyoçhro, atet ot: "Apa pa'taruasañer ama't shontetpa' echyenet puerrar, ello puechare'tyena. Naña arrpa' o' nerromuerrmoch nachporrñoñ. ¹⁸ Te'pa' o'ch ahuerren apuesho; te' napa' atetcha' notuer: Apacha' napa' o' neñohua ñeñt ama cohuenayaye Yomporecop ama't ñaña ãocop. ¹⁹ Napa' ama cohuenayayno attoch pechemer peãapuerren. Te' napa' aña poctetsa nocop ãapa' ãa'taruasañrach peãapuerren." ²⁰ O'ña atet cotape'chua ello e'ñe cohuen Yomporecoppa' allempoñapa' ahuen pomporecho.

'Ama't atarr ellaãarmeñ allempo entapueñ pompor e'ñe puemuereñoñ mata poctapueña'pa' a'çhono'tapueñ, tso'tstsapa'tapueñ. Ñeñt'pa' atet huomñcha'tapuenan puechemer atto e'ñe cohuen agapapueñ. ²¹ Puechemerña'pa' atet otueñ: "Apacha' napa' o' neñohua ñeñt ama cohuenayaye Yomporecop ama't ñaña ãocop. Na te'pa' ama cohuenayayno attoch pechemer peãapuerren." ²² Tarraña pomporña'pa' e'ñe allorocma otan pueñañresha'çhno: "O'ch sena' e'ñe tayecma shetamuets ñeñt atarr cohuen coçhnesha', o'ch sechorratapuennana nechemer. O'ch senatapueñ ñaña anillo potaão, o'ch senatapueñ ñaña sapatets pa'tco. ²³ O'ch sennana' ñaña nehuacsher ñeñt atarr ne'soya'taten o'ch semtse o'ch yerrallme'ch o'ch yocshame'tamãpsapueña. ²⁴ Tarro'mar añ nechemer ama't o' rromhuañ, te'ña'pa' o' alla tanterra. Ama't o' chenca'huañpa' te'ña'pa' o' alla nenter." Allempoñapa' atarr nanac coshame'tamãpsapueñet.

²⁵ Ñehua, po'psheñeñ puechemer ñeñt popo'nar ñaña'pa' pa'mro'tsen allempo çhen puechoyomer. Allempoña err pa'mroñ e'ñe ya'rrotterrtsa pocollopa' o' e'mhuerran coshamñats all requerquenet ñaña ashe'rarañ. ²⁶ Allempoñapa' çhore'tuerran cheshaçhorpa' a'ãto'tuer: "¿Eso'mare'tña coshame'tenet? ¿Eso'tña atarr coshame'tamãpenet?"

27 Cheshachorñapa' atet otapuer: "O' huena pemo'nasheñ, p̄ompörpa' o' muetsatan becer ñeñt se'soya'taten tarro'mar atarr coshapuenana puechemer. Ama choye' rromueno, e'ñe huomech agapapueñ." 28 Ñaña' ñeñta atarr atsrre'matuerre' ama mueno o'ch be'tosuerr all o' chen pa'mo'nasheñ. Atteña' cha'nom p̄ompörpa' allach otere't: "Pebe'tosuerr." Ñaña' ama mueno o'ch be'tosuerr. 29 Ñaña' atet otuerran p̄ompör: "Napa' peñotenen o' shonte' char e'ñe cohuen name'ñenpa; napa' ama't par-rochapa' ama esempo natpare'tenpe. Tarraña ama't atet nepenpeñpa' ñaña' ama't esempapa' ama p̄apuennoña ama't patra cabra attoch nocshame'ta ñaña epan ñeñt parro neyemuetyena na. 30 Te'ña o' huena ñeñt pechemerma't pepen ama't ora o' a'gasta'huona' peçllayor e'ñe puecañoresha'teño't, te'ña p̄apa' o' pemsatapueñ becer ñeñt ye'soya'taten." 31 Pomporñapa' atet otererr: "Po'ño'ch nechemercha' p̄apa' chocma arro'tseney parro. Amahuaca'ye nechemercha' peñoteñete' ñeñt allpon nechenpa' e'ñerramche' p̄ocma. 32 Ñeñto'marña te'pa' añ poctetsa o'ch yocshame'tam̄psapueña pemo'nasheñ, o'ch atarr nanac yocshena tarro'mar ama't o' rromhuañ te'ñapa' o' alla tanterra; ama't o' chenca'huañ te'ñapa' o' alla yenter."

16

Atet atma'ntatarettena atet pena ñeñt cohuañpsatsre'tene' pamo'mte'

1 Elloña Jesús'pa' alla toma'ntaterranerr pueyochresha', ñeñtpa' atet ser-pare'taterraneterr:

—Eñall yacma pueheñarr ñeñt atarr eçllayore't. Ñapa' echenan pa'cheñer ñeñt po'taruas pene' o'ch cohuañpsan ora allpon ñeñt echen pamo'mte'. Ñaña ñach quellquene' po'potantañ ñeñt allpon teba'yeññañet pamo'mte'. Atteña allempoña pueheña'tets acheñenesha'pa' a'metam̄peñeta' pamo'mtayesho, atet otoñet pamo'mte': "O'ca'ye atta a'chencatatsre'ta'ña ñeñt penen ñeñtcha' pecuañpsatsre'tene'."

2 Allempoña pamo'mte' atet e'mare'chpa' allenta agotach. Allempoña huapapa' atet otap̄: "Eso'maruañaca'yeña atet p̄a'chencatatsre'tenen. Te'pa' o'ch peñotatnomuen e'ñe ora allohuen ñeñt allpon petaruasen tarro'mar te'pa' ama nemno o'ch allo'na pecuañpsatsre'tenen." O' atet otue pamo'mte', ñaña'pa' allenta ahuer. 3 Allempoña pa'taruasañer ñap̄opa' atet cotape'chen: "Te'pa' amach allo'na netaruasa'nenonamo'mtayesho; o'ca'ye mopa'tam̄perrenña allo neganena. Te'pa' errotenuachñaca'ye ne'pate'. Napa' ama necheno nehuamenc attoch namre't ñeñtcha' netaruas neperreñ, ñaña ama nemno o'ch netaruas ne'pa' o'ch atta nenamare'tyen quelle atet p̄a'yena po'psheñne'chno ñeñt po'taruas pene' o'ch enamare'tyeset quelle, tarro'mar na ñeñtpa' atarr apenco'chen nenteñ."

4 Allempoña o' e'ñe cotape'chuepa' atet ot: "Te'ña po'ño'chpa' o'ca'ye neño'ch atetcha'ca'ye ne'pa' attoch acheñenesha'pa' e'ñech cohuen agapnet pa'pacillo tsapa'onet allempoch huañ neçllayor ñeñt allpon naguën te' netaruasot."

5 Allempoña atet cotape'chenpa' atetcho' p̄a. Ñeñto'marña agotatan allohuen allponsheña ñeñt teba'yets pamo'mtayesho. E'ñe pueheña'ttsa ñanom a'p̄to'tyesap, atet otapanet: "Papa' çerrpona't petebeñña namo'mte'?" 6 Ñaña'pa' atet otos: "Napa' netebeñca'ye çarroch çarra' cilindro aceite'." Ñeñt patron pa'cheñerñapa' ap̄ allo quellquëññañ ñeñt allpon teben ahuatoteñ. Allempoña'pa' atet otererr: "Te'pa' o'ch p̄anorr tecmapa' o'ch pe'sherrña ñeñt çarroch çarra' cilindro o'ch pequellquërr amnaroch çarra' o'ca'ye allponamaña ñeñt peteben."

7 Allempoña'pa' oterranerr ñaña po'psheñeñ: "Papa'cho'ña çerrpona't petebeñña namo'mte'?" Ñaña'pa' atet otos: "Napa' netebeñ çarroch çarra' arroga trigo." Ñeñt patron pa'cheñerñapa' ap̄ ñaña allo quellquëññañ ñeñt allpon teben ahuatoteñ allempoña ñapa'cho'ña atet otererr: "Papa'cho'ña p̄anorr tecma o'ch pe'sherrña ñeñt çarroch çarra' arroga

o'ch pequellquërr poscoch çharra'; te'pa' o'ca'ye allponamaña ñeñt allpon petebeñ namo'mte'." ⁸ Allempo pamo'mte' eñotan ñeñt pa'taruasañer atfa shecare'teñ, ñaña'pa' atet oten: "Añ acheñer ama't puehquëño'pa' e'ñe eñoteñ o'ch entan ñeñt'cha' atarr sherberre' ñocop tsapatonet." Po'ño'ch acheñenesha' arr patsro ñeñt ama ame'ñetso ñetña'pa' atarr eñoteñet attoch e'ñech aña e'nenet ñeñt'cha' atarr sherberrets ñocpuet tsapatonet. Tarraña ñeñtña ame'ñetsapa' ama tama eñoteñeto, ama es cotape'cheneto o'ch e'nenet ñeñt'cha' atarr sherberrahuet ñamet tsapatonet.

⁹ Ñeñto'marña te'pa' o'ch notenes:

—Ñeñt allpon pa'namen sechyen seçllayorohuen ñeñt'pa' añecpuepa'chña sherbenes alloch seyempueñ po'potantañ allochña'pa' attochña e'ñech cohuen muererrset. Sapa' añecpuepa'chña setaruasatña sa seçllayor ñeñt atarr sherbets Yomporecop ama't yeñoteñ quellepa' atarr a'gasta'po' ama't ñaña añecop ñeñt ama pocteye' enteno Yompor. Allochña'pa' eñallcha' socop ñeñt'cha' e'ñe cohuen sagüerre' e'ñe all Yomporepahuo esempoch seçhacherr all, allempopa' o'huañcha' allo'na sherbenes quelle ñeñt patso'marecpa. Attoch allohuenes e'ñech cohuen socra'huerra Yomporepahuo ñeñt'pa' ama ahuañaño.

¹⁰ Elloña o'ch notas:

—Ama't e'ñe coñe'ta yechen ñerra'm añecop yesherbateñ ñeñt cohuen enten Yompor, ñaña'pa' eñoteny atet ñerra'm ama't atarr aton yechen atterach yesherbateñ ñocop. Tarraña ama't e'ñe coñe'ta yechen ñerra'm ama añecpaye' yesherbateñ ñocop, ñaña'pa' e'ñech eñoteny attoña ama't'cha' atarr aton yecheneña'pa' atterach amach es yesherbateñ ñocop. ¹¹ Ñaña ama't e'ñe allpona quelle yechen arr patsro ama't e'ñe patso'marecpa tarraña ñerra'm ama añecop yesherbateñ ñeñt cohuen enten Yompor allempopa' amach errotent alla apuerryerroña ñeñt po'ño'ch atarr sherbets ñeñt apueney ña. ¹² Ñaña ñerra'm ama es yesherbateññañe ñeñt po'psheñño atet ñerra'm ñeñt Yomporo, allempopa' amach errotent apyeña ñaña ñeñt e'ñe yocop ñeñt'cha' e'ñe cohuen yocshatene'.

¹³ Ñeñt'pa' atet'cha' netma'ntacha:

—Ama't pueheñarrofeyapa' amach errotent e'ñe cohuen yetaruasoña epsheño'mar yamo'mtayecop. Tarro'mar ñerra'm atet ye'papa' pueheñarr e'ñech cohuen yemorrenteño' yocsheñeshocmañen yesherbeñ, po'psheñeñña'pa' amach e'ñeye' yemorrenteño; çhach yottena ñerra'm çha yetsena'teñ. Ñeñto'mar atet'pa' amach cohuenaye' yesherbeñe. Ñerra'm aña e'ñe sema'yochrena ñeñt e'ñe socpa attoch segana aton quelle, ñeñt atet'pa' amach errotent sema'yochroña ñaña añecop ñeñt atarr sherbets Yomporecop.

¹⁴ Añña fariseonesha' ñeñt e'muene' Jesús ñeñt atet serrpare'tatenan acheñenesha', ñetña'pa' aña atarr ye'chapretenet quelle. Ñeñto'marña ñet allempopa' pueasare'teñotet Jesús'pa' çha atarr che'tatseteñet.

¹⁵ Jesús'ña'pa' atet otanet:

—Sapa' çha sottenañ ñerra'mrate' atarr cohuensoñ attoña acheñenesha'pa' e'ñe cohuen entyensetañ. Tarraña Yomporña'pa' e'ñe eñotennas seyoçher ñeñt atto sapa' atarr seshcare'tyeñ acheñenesha'. Tarraña ñeñt e'ñe ñañeñeta atarr cohuen entyetsat arr patsro, ñetña'pa' atarr tsena'tenanet Yompor.

Moisés po'ño'ña'pa' ñeñt atet anaret ñeñt'pa' ñeñtña'ña e'ñe yemtete't tarrempohua allempo orrterra Yompor po'cohuenña ñeñt atto ayochreshattena ña

¹⁶ Allempoña Jesús'pa' atet serrpare'taterranerr acheñenesha' po'poñonet:

—Añña ñoñets Moisés po'ñoñ ñeñt atet anaret ñaña añ ñoñets ñeñt quellca'yese't ñeñt a'mta'yese't Yompor po'ñoñ, ñet'pa' ñeñt e'ñe serrpare'tete't tarrempohua allempo orrtosa Juan. Allempoteñ serrpare'tatosanet Juan'pa' ñaña'pa' añ serrpare'tatosanet atet

penaña Yompor po'cohuenña atto atarr ayochreshattena ña, ñeñtara cohuen ñoñets alloch sequeshperra. Ñaña allohuen acheñenesha' e'ñe pueyoçhrocmañenet ñeñta atarr muenenet.

¹⁷ 'Tarraña ama't atteñpa' ñeñt atet anaret Yompor po'ñoñ ama't patrra quelledc puehempotollohuenpa' amach chenquërro. Tarro'mar Yompor po'ñoñpa' amach er-roteno ya'huañatere ñeñt atto sherbeney. Patsña epuet enet ñeñtpa' huañerrcha'.

Atto Jesúsapa' yeçhatosanet ama asanna'tpahuoyaye

(Mt. 19.1-12; Mr. 10.1-12)

¹⁸ 'Ama a'huañatpahuoyaye Yompor po'ñoñ ñeñt atet yotene' ama asa'pahuo yetapor tarro'mar ñerra'm esesha' serre' puetapor o'ch yorerran po'psheñeñ coyanesha' ñeñtcha' puetapor perretpa' ñeñtñapa' çhach ochña'tam'perrana puetaporeshe'mañ; ñeñtpa' ama cohuenaye' enteñe Yompor. Ñaña ñeñtcha' yorerre' coyanesha' asaret, ñeñt yacmarpa' çhach chetapreten taporets; ñeñtpa'çho'ña ama cohuenaye' enteñe Yompor.

Atet aþaretta puesheñarr yacma ñeñt atarr eçllayoret; atet aþaretta ñaña po'psheñeñ yacma ñeñt atarr huocchañetets, ñeñtpa' añ pa'so'cheñ Lázaro

¹⁹ Elloña Jesúsapa' atet serrpare'tatanet:

—Eñall puesheñarr ñeñt atarr eçllayoret ñeñt chorrenaya shetamuets atarr coçhneshare' ñeñt atarr cohuen apomotyesaret. Epaye' coshatse'tatyey ñeñt allpon echyen. E'ñe pocsheño'tpa' e'ñe ellapene't rrallme'chats. ²⁰ Eñall ñaña puesheñarr ñeñt atarr huocchañetets ñeñtñapa' çha ora puetsaren, ñeñtpa' añ pa'so'cheñ Lázaro. Ñaña'apa' allach ellapene't a'yot yetarro't allotecma be'ten eçllayoret pa'pacillo. ²¹ Ñapa' añach atarr ye'chena o'ch rra'yesan ama't coñe'ttsa rreñets ñeñt a'shore'tatyey eçllayoret po'mesaþnaçho. Allña ochecpa' o'ch huapoña o'ch tso'na'teññaña' pueptsarña. ²² Atteña o' çhap pamtarr allempo rroma ñeñt huocchañeshar. O' rroma mellaño'teñnesha'ña huaçha'tapa' o' aneret e'ñe Abrahamuesho, allña'apa' o' çhapachet atarr cosheñto. Atteña'apa' çhap allempo rroma ñaña ñeñt atarr eçllayoret, ñeñtñapa' pampueñeta'. ²³ Ñaña'apa' alla çhap coñcha'puetso ñeñt o'patenaya ñeñt rromuets ñeñt ama ame'ñetso. Allña'apa' atarr mueroçhtosa all coñchosa. Atteña'apa' cohua' enonetpa' allotña entosan Abraham allaparo'tsen ento. Allña'apa' allo'tsen epuet Lázaro. ²⁴ Ñeñtña eçllayoret allenta çhore'tan Abraham, ñeñtpa' atet och: "Nompore Abrahamama pemueraye'chna, pemñaye'chon Lázaro o'ch huapa arr attoch esha'tosan potaþ oño, ama't potaþotapa' o'ch onenapna' oñ attoch a'yamoserrapona' neñeñ o' e'ñe neporrarra'nmahuap. Atarr nanac o' nemueroçhtosa arr tso." ²⁵ Abrahamña'apa' atet och: "Nechemerñecha' te'pa' o'ch peyerposa ora allpon pa'namen ñeñt pechyese't ñeñt atarr coçhneshare' pentyese't allempo þocorre't patso. Lázaroña'apa' ama es eche'te ama't coñe'ta ñeñt atarr cohuen enten ñaña. Te'ña ñapa' o' atarr acshataretterra, þaña'apa' o' atarr þa'coñchataretterra. ²⁶ Elloña te'pa' ama't e'ñe eseshapa' amach erroteno't çhapanþsapeto allo'tseneþ tarro'mar þapa' atsereto'tsenþa yom'ta'n. Sapa'çho'ña te'pa' ama't e'ñe puesheñarro'tesapa' amach erroteno't seçhapanþesyoy yaña. Amate' erro't yepere'te ñeñtpa' atet anaret attoch yello'tsentataretterra." ²⁷ Allempoña eçllayoretpa' atet o'terranerr Abraham: "Tarraña ama't atteñ nomporepa' te'pa' o'ch notaþ o'ch pemñer Lázaro all patsro nompore pa'pacillo. ²⁸ Tarro'mar all napa' nechen amnarsheña nemo'nasheñ. Ñeñto'marña nemneñ o'ch ahuerre' o'ch co'tape'chaterraneta' e'ñe cohuen te't ñetpa'çho'ña esempopa' alla çhapuet arr coñcha'puetso." ²⁹ Abrahamña'apa' alla o'terrerr: "Ñetpa' echenet Yompor po'ñoñ ñeñt quellquë't Moisés ñaña allohuen ñeñt a'mtaye't Yompor po'ñoñ ahua't. Te'pa' e'mñoterrñañetepa' Yompor po'ñoñ ñeñt echenet." ³⁰ Ñaña'apa' atet o'terranerr Abraham: "Ñato' amach e'mñoterrñañeto Yompor po'ñoñ, tarraña nompore Abrahamama

ñerra'm esesha' tanterrtsa rromot ñeñtcha' orrterrahuet allempoñapa' po'ñoçh ñeñtcha'ña cotape'chaterrahuet ello e'ñe cohuen Yomporecop." ³¹ Abrahamñapa' alla otererr: "Ñerra'm amach e'mñoterrñañeto Yomporecop po'ñoñ ñeñt atet quellquë't Moisés ñaña allohuen ñeñt a'mtaye't Yomporecop po'ñoñ ahuat, te'ña ama't esesha'ch tanterrtsa rromotpa' amach eshec çhapanetoña pueyoçhreto attoch cotape'cherret ello e'ñe cohuen Yomporecop."

17

Atto çhocmach huaponaya ñeñtcha' yetpatyene' o'ch atet p̄atyese' ñeñt ama pocteye' enteno Yomporecop

(Mt. 18.6-7, 21-22; Mr. 9.42)

¹ Allempoña Jesúsapa' alla serrpare'taterranerr pueyoçhresha', ñeñtapa' atet otanet:

—Chocmach huaponaya ñeñtcha' yetpatyene' o'ch atet p̄atey ñeñt ama pocteye' enteno Yomporecop. Tarraña napa' o'ch notas, atarrcha' yoroçheno'tsen ama't erra'tsena acheñer ñeñt orrtatene' ñeñtcha' topatyene' po'psheñeñ ñeñt name'ñenaya o'ch atet p̄atyenanet ñamet ñeñt ama't mamesha ama pocteye' enteno Yomporecop. ² Ama't ñeñt e'ñe errte' name'ñenaya ñerra'm esesha' o'ch orrtatanet attoch o'ch atet p̄atachet ñeñt ama pocteye' enteno Yomporecop, ñeñtña acheñerpa' atarrcha' yoroçheno'tsen tarro'mar ñapa' aña o'patenaya coñcheñets ñeñt atarr huomenc. Ama't ñocoppa' ama tama yoroçhenayayñe ñerra'm ama atet p̄atenana' po'psheñeñ, e'ñech allorocma çharachetañ mapue' añecmuen pa'çhnoço allpon ñerra'm puetse'tamets o'ch huapore'chet oño epo allcha' ño'shach mapue'. ³ Ñeñto'marña sapa' e'ñech señoa, amach sorrtatatsto attoch sa'shoratach po'psheñeñ ama't erra'tsena.

'Elloña napa' o'ch alla noterrser, ñerra'm esempo samo'ts erro't p̄onas sa ñeñt ama pocteye' enteno Yomporecop, socoppa' añ poctetsa o'ch soçtape'chater e'ñe cohuen o'ch p̄oter ñeñt atet o' p̄ohuona'ppa' ama't mameshapa' ama pocteye' enteñe Yomporecop. Allochñapa' ñerra'm o'ch alla cotape'cherran cohuen Yomporecop, sañapa' añ poctetsa o'ch alla e'ñe cohuen se'p̄retner. ⁴ Ama'tcha' atonoche'tats atet penset, ama'tcha' pamtarrpa' cançhroche'tatscha' atet penset ñerra'm o'ch alla llequërrana ñeñt atet penset, ñerra'm ama't pamtarr cançhroche'tats o'ch alla otterret: "Napa' o' atet nepona'p̄ ñeñt ama pocteyaye tarraña te'ña ellopa' amach alla atet neperre'te", socoppa'çho'ña aña e'ñe poctetsa o'ch alla e'ñe cohuen se'p̄retner ñeñt atet se'pene'.

E'ñe yeyemteño't Jesús ñeñt ahuamencat yepene' attoch es yorrtatyen ñocop

⁵ Allempo atet otarettenet aña puellsensarnesha'ñapa' atet ochet Po'partsesharet Jesús:

—Elloña yapa' ahuamencatcha' pe'pa'y allochñapa' e'ñech cohuen yeyemterrpa.

⁶ Partseshañapa' alla otterraneterr:

—Ñerra'm po'ñoçh e'ñe na seyemtenañ napa' e'ñeca'ye na'poctatenña neñoñ ñeñt atet notenes, ama'tcha' allponatollota seyemtena ñerra'mrate' mostazlometoll, sañapa' ama't erra'tsena senamuennonñ ama't ñeñt atarr echarr sentenpa' nañapa' atetcha' nepennaseñ. O'ch netma'ntatasa atet ñerra'm o'ch sot añ tsachecop sicómo'rech: "Bera'nmuepa'ch arrot all ten, arrepa'chña tomhuerrerr a'yo sa'po", tsachñapa' atetcha'çho'ña pañ e'ñe atet soteñ.

Atto atma'ntaterraneterr ataruasañapa' añ poctetsa ñocop e'ñech etsotenan ñeñt atet muenateñ pamo'mte'

⁷ Ellopa' alla toma'ntaterraneterr, ñeñtapa' atet otterraneterr:

—Ñerra'm eseshas echene' sa'taruasañer, ñato' ñapa' ellapene'tcha' llampue' sechamuellen amapa' ñato' ellapene'tcha' cohuanpene' sayaraçhno ellerronetña

allemPOCH huerra po'taruaso'tpa' sañapa' ama't puesheñarro'tesapa' amach sotapuereña señaña: "Te'pa' o'ch pebe'tosuerr o'ch yerrallme'chnen parro." ⁸ Elloña ñeñtapa' o'ch'cho' alla sotapuererr: "Te'ñapa' o'ch peptare'tuerren ñeñtcha' nerra'nen, allotñapa' o'ch pã'cohuenetuerr peshtam attoch e'ñe cohuen pesherba'huerren cho'pcha'ña naphuerre' nerrar ñeñtcha' nerra'nen. O'chña nerruanen napa' allempoñapa' cho'pcha'ña rrallme'chnets pãña." ⁹ Ama'tña sapa' atetca'ye sepene. Ñaña sa'taruasañer ñerra'm esempoch e'nuan ora po'taruas ñeñt seyecheña, sañapa' ama't puesheñarro'tesapa' amach sotereña: "Parasyos o' pe'nuon netaruas." Ama't ama atarr socshateñe ñeñtapa' e'ñe pocte' ñocop tarro'mar ñapa' allpona o' e'nua ñeñt allpon seyecheña. ¹⁰ Sapa'cho'ña Yompor pa'taruasañer sepene'. Ñaña ama't allemPOCH setsotuen ora allohuen ñeñt atet otenes Yompor atterepa'chña sentena ama atarr atonaye' sesherbena. Aña setsoten ñeñt e'ñe poctetsa allohuen añecop ñeñt pa'taruasañer pen Yompor.

Atto Jesús pa' e'ñe po'ñoñoña a'crratyesapan aptsarñate'chno ñeñt charrasheña

¹¹ Allempo sechena Jesús Jerusaléño arr oñem allohua temuena Samaria epuet Galilea. ¹² Allempoñapa' chap pa'terr anetso. Allñapa' huacha'toña charrasheña ñeñt osyen puet-sarñats ñeñt otenet lepra. Ñeñtña aptsarñate'chno a'yota tom'cha'tyesoset. ¹³ Ñetñapa' allotña rranare'tyesosetpa' atet ochet Jesús:

—Maestro Jesúsocha' pemueraye'chosya yaña.

¹⁴ Jesúsñapa' allenta cohuosanetpa' atet otosanet:

—Te'pa' o'ch ahues o'ch segatyena' sañeña judionesha' po'cornanesharesho attoch ñetpa' o'ch eñotaset te'pa' o' socrrerra.

Atet otanet Jesús, ñetña ahuanmatsetpa' e'ñe allorocma acra'yesuerrochet. ¹⁵ Puesheñarrña allemPO eñota o' correrrapa' alla puetallerrapa' o' alla ahuer Jesúseshone't atarr nanac pocsheñesha' aye'cho'chtatnerran Yompor. ¹⁶ E'ñe pueparasyoso'teñesha' rromosa Jesús pa'rrpõt. Ñehua, ñeñt atet patsapa' ñeñtapa' ñeñtña samario'marnesha'. ¹⁷ Allempoña Jesús pa' atet otan acheñenesha' ñeñt allo'tsa'yen:

—Ama't charrasheña ñeñt o' na'crratyesua te'. ¿Po'potantañña esconsheñapa'? Ñetñapa' ama es yerpa'pesnomayeña attoch aye'cho'chtatoñet Yompor. ¹⁸ E'ñe puesheñarraña ñeñt puerrerrtsa attoch atarr aye'cho'chtatan Yompor ama't ñapa' ama judioneshayaye.

¹⁹ Allempoña Jesús pa' atet otan ñeñt a'crraterr:

—Te'ñapa' o'ch petanterra, e'ñech cohuen peserr tarro'mar pãpa' e'ñe peyemteñoñen na o' pocrerra.

Atto fariseonesha'pa' a'p'to'chet Jesús: ¿Esempto'tcha' orrtierraña Yompor po'cohuenña allemPOCH atarr añcha'taretterra ña?

(Mt. 24.23-28, 36-41)

²⁰ Parrochña fariseonesha'pa' a'p'to'chet Jesús:

—¿Esempto'tcha' orrtierraña Yompor po'cohuenña allemPOCH atarr añcha'taretterra ña?

Jesúsñapa' atet otanet:

—Yompor po'cohuenña atto ayochreshattena ñapa' ñeñtapa' ama atteyaye ñerra'mrrate' ñeñt es yentyen yecloyot. ²¹ Ñeñto'marña amach errotenot oteto: "Arrca'yeña añcha'tarettenaña Yompor", amapa' "Tarroca'yeña añcha'tarettenaña Yompor." Tarro'mar Yompor po'cohuenña ñeñt atto ayochreshattena ñapa' ñeñtapa' o'ca'ye motetnoma orrtatsa e'ñe sesho ama't seyo'chro.

²² Elloña ñapa' atet oterranerr pueyochresha':

—Cherrcha' esempohuañen allempoch atarr se'nerren atarrcha' semnerren Ñeñten Acheñetostse't o'ch norrterrnsa ama't e'ñe pamtarra. Tarraña ama't e'ñe allempa amach senterrno. ²³ Saña allempopa' atetcha' otasetañ: “Te'pa' o' orrterraña Cristo allo'tsenca'ye”, amapa' “Tarro'tsenca'yeña Cristo.” Sañapa' amach setatstoña all, amach soctatscheña ñeñt sets all. ²⁴ Tarro'mar ñerra'm esempo cherr allempoch nohuerra na Ñeñten Acheñetosets e'ñe allohuen acheñenesha'pa' e'ñech entuapuerrnet tarro'mar allempopa' atetcha' perra ñerra'mrrate' meratste', o'ch meratsta huomencpa' e'ñech a'puetaresuan ora enet errañaren. ²⁵ Nehua, na te' ñeñt atet anaret nocop ñanompa' atarrcha' na'muerochtataretta, ama't namo'tsesha' ñeñt corretsa te'pa' amach eseshaye' naguënaye. ²⁶ Tarraña allempoch nohuerra po'pocheño na Ñeñten Acheñetosets, allempopa' e'ñech atet perret e'ñe atet pete't ahuat allempo corre't Noé. ²⁷ Allempopa' ama es puecha'yeneto aña e'ñe cotape'chete't atto atarr pa'namen muenenet ñeñtcha' rra'yenet, orrare'tyesete't, sena'tanatyena yacmaneshachno, coyaneshachnopa'cho'ña apanatyese'te't ñeñt yoranatyeshahue'te't. Ñetñapa' ñeñta e'ñe cohuen entete't. Atteñapa' chap allempo be'tosos Noé po'huarcopahuo. Allempoñapa' huata, choña oñ erracmañen, e'ñe a'cllatuan allohuen acheñenesha' errañaren. ²⁸ Attecma perreterr allempo corre't Lot, aña e'ñe cotape'chyerrretter shonte' rrallme'chyesete't ñaña shonte' orrare'tyesete't, atarr es rañta'yese'te't, ñaña pomatsre'tyesete't. Shonte' esocmañen ñeñt pa'namen nare'tyesete't, tomatyese'te't ñaña shonte' pocolla'chno. Ñetñapa' e'ñe ñeñta cohuen entete't. ²⁹ Atteñapa' chap allempo cha'nom Lot ñeñt anetsrot. E'ñe ñeñte yetrocma allempo cha'nom Lot allot, Yomporña pue'ntañot a'shoranet tso' ñeñt shemashrepñeño' huorten, ñeñtña e'ñe a'cllatuerrahueterr allempo. ³⁰ Attecmach perreterr allempoch norretuerra na Ñeñten Acheñetosets.

³¹ 'Tarraña allempoch norrterra na sapa' arepa'chña aña soctape'cheno ñeñt patso'marecpa, atet ñerra'mrrate' pueheñarr ñato' a'yote'tsenach pa'paclo't arepa'chña be'tosatsterro ama't e'ñe mamesha pa'paclo' attoch yoratsre'tnoma. Amapa' ñerra'm pueheñarr pa'mro'tsenpa' arepa'chña onatsterro. ³² Seyerpuepa'chña atet pa' ahuat Lot puetapor ñeñt atarr morrentnomaya ñeñt patso'marecpa. ³³ Ñaña ñerra'm esesha' e'ñe aña e'nenet o'ch correna atomat attoch e'ñe coshenet arr patsro, ñetñapa' a'chencaterretcha' ñañeñeta. Tarraña ñerra'm esesha' e'ñe pocte' entene' o'ch es sehuanmuet ñeñt atet muenenet ñeñt e'ñe ñocpueta arr patsro ñeñtña acheñerpa' corretsach pocsheñeshocmañen e'ñe tayoteñ errponañohuen.

³⁴ 'Po'ño'chca'ye o'ch notas atetcha'ca'ye perra allempoch nohuerra, pueheña'tetspa' anmare'tterretcha'; ama't ñeñt e'ñe pamo'ts pene', ñeñtñapa' allach asa'nmare'tterra. Atet ñerra'm tsapo all manrrenet epsheño'maret, pueheñarrpa' anmare'tterrach, po'psheñeñña'pa' allach asa'nmare'tterra. ³⁵ Amapa' ñato' allempopa' allo'tsencha' epsheña coyanesha' ñeñt parro puetse'tets mapyo ñeñt'pa'cho'ña pueheñarrpa' anmare'tterrach ñaña po'psheñeñña'pa' allach asa'nmare'tterra. ³⁶ Amapa' ñato' allempopa' allo'tsencha' ñaña epsheña ñeñt e'ñe parro taruasenet pa'mro. Pueheñarrña'pa' anmare'tterrach, po'psheñeñña'pa' allach asa'nmare'tterra.

³⁷ Allempoña pueyochresha'pa' a'p'to'chet, atet ochet:

—Partseshacha' ñeñt'pa' ¿erra'tcha'ña atet perra?

Jesúsñapa' atet otanet toma'nteñtso:

—Ñerra'm erro'tsencha' ñeñt rromue'pa' allcha'ña shontaña tse'm.

18

Atto atma'ntatarettana rretorrnanesha' ñeñt chocma enamare'tene' juez attoch yenpue'

¹ Allempoña Jesús pa' alla serrpare'taterraneterr toma'nteñtso attoch eñochet ñeñt poctetsa yocop chocmach yema'yochena amach yemuenme'chatsche ma'yochatsa.
² Ñeñto'marña allempopa' atet otanet:

—Pa'terr anetso allo'tsen puesheñarr juez ñeñt po'taruas pene' o'ch e'ñe cohuen a'pocatan ñoñets acheñenesha'cop ñerra'm esempo e'moñe'tannenet. Tarraña ñeñña juezpa' atarr atsrre'mñañ. Ama't Yomporpa' ama añcha'na'tpahuoye' enteñe ama't e'ñe mamesha. Acheñenesha'pa'cho'ña ama't puesheñarrapa' ama acua'penaye' enteneto. ³ Ñeñña anetsropa' all ye'chena ñaña puesheñarr rretorranesha'. Ñaña'pa' eñall po'psheñeñ ñeñt e'moñe'tene', chocmach errot peññañ ñeñt ama pocteyaye. Rretorranesha'ña'pa' chocmach sene't juezesho. Allcha' chocma atet otare'tenan juez: “Te'pa' nemneñ o'ch e'ñe cohuen peyenpa'n attoch pa'pocaton cohuen ñoñets añecop ñeñt ne'moñe'tene'.” ⁴ Juezña'pa' ama't allponmat ama mueno o'ch yenpue'. Tarraña rretorranesha' ñapa' chocmach sen juezesho enamare'tene' attoch a'pocatoñ ñoñets añecop ñeñt e'moñe'tene'. Atteña'pa' chap allempo cotape'ch juezpa' atet ot: “Napa' po'ño'ch ama't Parets ama nem'cha'teñe; acheñenesha'pa'cho'ña ama't mameshapa' ama acua'penaye' nentenaneto. ⁵ Tarraña añ rretorranesharpa' atarr atsrre'mo'chtana'tenen, epaye' huapame'tennana, o'ca'ye atarr a'mñe'chatna. Ñeñto'marña te'pa' o'ch neyenpue' allochña'pa' amach alla huerrnane'te.”

⁶ Allempoña Jesús pa' atet oterrerr:

—Ama't se'mueñeña ñeñt atet oten juez ñeñt atarr atsrre'mñañ. Te'pa' oten ahuo'ch a'pocatan rretorraneshacop ama't ñapa' ñeñt acheñer ñeñt atarr atsrre'mñañ.
⁷⁻⁸ Ñeñto'marña te'pa' o'ch noterrser: Yomporpa' elloña nanaccha' cohuen a'pocatonay ñeñtey o' acrerrey ya ñeñtey'cha' e'ñe puechemer pen ñerra'm yapa' chocmach ye'chore'teñ ama't ye'to ama't ñaña tsapo. Napa' po'ño'ch o'ch notas, Yomporña'pa' amach atomato, choch ye'mñote'; ñapa' e'ñe'chca'ye allorocma e'mñotey o'ch e'ñe cohuen a'pocatonay ñeñt yocop. Tarraña te'pa' o'ch notas, ñerra'm esempoch nehuerra Ñeñten Acheñetosets, errponsheña'te'ña nentuerrña arr patsro ñeñt e'ñe cohuen name'ñenaya.

Atet ma'yochena fariseonesha' ñeñt e'ñe cohuen entetsa, all ma'yocha ñaña po'psheñeñ e'ñe puellquëñsha' ñeñt atarr ochña't entetsa

⁹ Po'pocheñoña Jesús pa' atet serrpare'tatan allpon acheñenesha' ñeñt e'ñe ñeta yemtetset tarro'mar ñetpa' e'ñe cohuen entyenet e'ñe ñañeñeta. Ñetña'pa' ama't mameshapa' ama cohuenaye' enteñetoña po'potantañ acheñenesha'. Ñeñto'marña Jesús pa' alla toma'ntatanet, ñeñtpa' atet otanet:

¹⁰ —Eñall epsheña acheñ ñeñt sets Parets pa'paclo allcha' ma'yochoset. Puesheñarr ñeñtpa' fariseo ñeñt e'ñe ñañeña cohuen entetsa; po'psheñeñña'pa' ñeñt puehquëño'te'na cobra'yenan acheñenesha' quelle ñeñt gobiernocop. ¹¹ Ñeñña fariseopa' tomos all ma'yochosañ, ñeñtpa' atet otos: “Nompore, napa' o'ch neparasyoso'tosep tarro'mar napa' atarr cohuen acheñren, napa' ama atteyayno Nompore ñerra'm po'potantañ acheñenesha'. Ñetpa' atarr es puerratam'psanna'tyenet, ama pocteye' es panna'tyenet, atarrcha' cheta'yeñet coyanesha'chno ñeñt ama pue'taporeyaye. Napa' ama atteye' Nompore nepeno. Napa' ama neshcare'teno atet pena añ acheñer ñeñt puehquëño'te'na cobra'yene' acheñenesha' quelle gobiernocop. ¹² Napa' pate'tets semanapa' epochcha' netore'tena Nompore pocop, ñaña ama't ora ñeñt allpon naguën chocma napuene'p allpon poctetsa pocop ama't nediezmo Nompore.” Allohua huañ atet ma'yochena fariseo. ¹³ Po'psheñeñña ñeñt cobrets quelle ñaña'pa' alla tomos a'yo't. Ñapa' eñotena atarr ochña't ñeñto'marña ñapa' ama cohuoso enonet Yomporeshonet. Ña puellquëño'tpa'

nosan pot puesomapo. Ña puema'yocheñoñ atet otos: "Nompore, te'pa' o'ch pemor-renterrna attoch e'ñe pepretna'huerrnan allohuen no'chñar tarro'mar napa' atarrca'ye ochñañen."

¹⁴ Jesúsñapa' atet oterraneterr:

—Napa' o'ch notas, ñeñña atet a'metene' po'chñar ñeñña acheñerpa' e'ñe pocte' enteñ Yompor. Ñeño'marña allempo ma'yochuapa' o' ahuerr pa'paclo e'ñe cohuen apretna'huareterra po'chñar. Po'psheñeña fariseo ñeñt ama a'metosaye po'chñar, Yomporñapa' arepa'tcha' pocteye' eñche. Tarro'mar allohuen ñeñt e'ñe cohuen entetsa e'ñe pommo'cheñoñ ñeñña tsapatonetpa' amach esoshe'maye' entereto. Tarraña allohuen ñeñt ama esoshe'maye' entetso te', ñeñña tsapatonetpa' atarrcha' cohuen enteret.

Atto Jesúsapa' bensare'tam̄psapan cheshaneshá' ñeñt huapatoñet
(Mt. 19.13-15; Mr. 10.13-16)

¹⁵ Ñaña allempopa' shonte' hua'cha'tachet cheshatollesha' Jesúsesho. Ñetpa' añecopña hua'cha'tachet o'ch a'p̄lla'yesapanet Jesús attoch bensare'tam̄psapanet. Jesúsña puey-ochresha' allempo entapan ñeñt hua'cha'tate' cheshaneshachno, ñetñapa' ama pocteye' eñcheto o'ch anmoset cheshatollesha' Jesúsesho ñeño'marña ama amnataretapueto.

¹⁶ Tarraña Jesúsñapa' allenta chore'tapanet, atet otapanet:

—Pocte'ña'cho' semnachñaca'yeña cheshaneshá' onosetepa' e'ñe nesho. Amachca'ye cha sepatare'tatstapaneto tarro'mar allohuen ñeñt atarr neyemtenaya na e'ñe atfet ñerra'mrrate' cheshatoll, ñetcha' o'patenetña Yompor po'cohuenña ñeñt atto ayochreshattena ña pue'ntañoñ. ¹⁷ Po'ño'chpa' o'ch notas, ñerra'm esesha' ama e'ñeye' pueyemteño'teye' aguëññañeto Yompor po'cohuenña amach atet perreto ñerra'm cheshatoll e'ñech yemtenana ñeñt cohuañpene', ñetñapa' amach pueyochreshaye' per-raneto Yompor atto atarr ayochreshattena ña.

Atto puesheñarr ñeñt huepueshameñ ñeñt atarr ec̄llayoret' ñañaapa' eñorana'tosana Jesús
(Mt. 19.16-30; Mr. 10.17-31)

¹⁸ Po'pocheñoña puesheñarr ñeñt atarr añcha'tarettetsa a'p̄to'tosan Jesús, atet otos:

—Maestro, p̄papa' atarr cohuen acheñreḡ, te'pa' o'ch p̄otapuen ¿errofena'tcha' neḡaña na e'ñe cohuen attochña napa' corretsanach e'ñe tayoteñ ama't errponañohuen?

¹⁹ Jesúsñapa' atet otaḡ:

—Eso'mare't p̄otenenña napa' atarro' cohuen acheñren. Arr arromñañenesha' ama't e'ñe puesheñarrapa' ama eñalleña ñeñt e'ñe cohuen acheñer. Ñap̄ñaña Yompor ñeñt e'ñe po'ño'ch cohuen. ²⁰ P̄papa' e'ñe peñotuen Yompor po'ñoñ all oteneñ ñeñtcha' atet yepena e'ñe cohuen; ñeñtapa' atet oteneñ: "Amach yechtapretyesatsto taporets; amach yemtsanna'tatsto; amach yetyesatsto; amach yetoma'tam̄psatsche yamo'ts e'ñe atfa; ñaña yemorrenteño'pa' yemcha'na'chcha' yompor ñaña yachor."

²¹ Ñeñña a'p̄to'tene'pa' atet otererr:

—Napa' e'ñeca'ye cheshoteñ ora añechnopa' e'ñeca'ye netsotueñ.

²² O'ña atet otua Jesúsñapa' alla otererr:

—Eñallmeñca'ye paterr ñeñt pepalltena ñeñt ama atteye' pepena'. Te'pa' añcha'ña atet peḡa o'ch e'ñe pepomhuerr ora allpon ñeñt pechyen o'ch p̄papa'yera' huocchañnesha'chno ñeñt atarr es pallta'yetsa attochña p̄papa' pecherrcha' ñeñt atarr nanac sherbets Yompor pue'ntaño. Allempochña pehuerrapa' o'ch p̄octerren attoch e'ñe neyochresha' neperreḡ e'ñe poctacma.

²³ O'ña e'mhuan ñeñt atet och Jesúsapa' ñañaapa' cha atarr lleca tarro'mar ñapa' atarr ec̄llayoret', shonte' pa'namen echyen. ²⁴ Jesúsña eñch ñeñt atet atarr llecapa' ñañaapa' puellcapreteño'pa' atet ot:

—Ñeñt atarr eçllayoretpa' atarr nanac echarr attoch agapoñet Yompor po'cohuenña ñeñt atto ayochreshattena ña. ²⁵ Ñehua, ñeñtpa' atetcha' netma'ntacha. Po'ñoçh yapa' yeñoteñ berr añecmuen allpon ñerra'm huaquësh* atarrca'ye torrapo' o'ch esho'tosa añeñollponatollo atet ñerra'mrrate' acosh puetatollo. Ñeñtpa' atetca'ye penaña acheñ ñeñt eçllayoret ello atarr torrapo' o'ch agapan ñaña Yompor po'cohuenña ñeñt atto ayochreshattena ña (tarro'mar ñetpa' ama mueneñeto o'ch sehuanmuet ñeñt atarr morrentenet ñet attoch pueyochresha' perranetañ Yompor).

²⁶ Ñeñña e'muene' atet oten Jesús ñetñapa' atet ochet:

—Tarraña ñerra'm atette'pa' amate' esesha' a'queshpataretterrtso ama't puesheñarra tarro'mar yapa' yeñoteña'ye huaquëshpa' amaca'ye esho'tenoña acshequeto.

²⁷ Jesúsñapa' atet oterraneterr:

—Sa arromñaateneshaspa' amach es errotenaye' apen senteno. Tarraña Yomporpa' ama eñalle ñocop ñeñt atarr torrapo' enten.

²⁸ Pedroñapa' atet och:

—Partseshacha' po'ñoçh yapa' o' e'ñe yesuanom ora allohuen ama't yepaclohuen attoch e'ñe yocterreñ.

²⁹ Jesúsñapa' alla oterraneterr:

—Po'ñoçhpa' o'ch notas, allohuen erra'tsencha' acheñer ñeñtcha' e'ñe sehuanmue' allohuen ama't pa'paclohuen, ñato' puetapor, pa'mo'nasheñnesha' ñato' pompor, pachor, ñato' ama't ñaña puechemeresha' attoch e'ñe cohuen sherbaterrñañet Yompor po'cohuenña atto ayochreshattena ña, ³⁰ ama't erra'tsencha' ñeñtcha' sohuanmue' allohuen, elloña ñetpa' o'ch alla aguërret shonte' esocmañen ñeñt atarr cohuen ama't te' allempo e'ñe correnet, elloña tsapatonetñapa' o'ch aguërret ñeñt alloch ñetpa' corretsetach beñecpuen.

Allempo Jesúsapa' alla eñotaterraneterr ñapa' çhocmach amtsaretterra
(Mt. 20.17-19; Mr. 10.32-34)

³¹ Ñeñt pueyochresha' ñeñt çcharra' puechena epsheña, Jesúsñapa' ahuanmanet el-lonet, allñapa' atet otosanet:

—Te' po'ñoçhpa' o'ch ahueney Jerusaléno. All ora allpon quellca'yesone't ñeñt a'mta'yesaye't Yompor po'ñoñ ahuañ ñeñtcha' atet na'paretterra na Ñeñtencha' Acheñetosets, te'ñapa' o'ch e'ñe etsotuerra ñeñt atet anaret nocop. ³² Tarro'mar te'pa' pomuerrnetcha' po'poñ acheñesho ñeñt ama judioneshayaye. Allohuen acheñenesha'pa' o'ch achmãre'terrnet, o'ch atserrpãtse'terrnet, pue'moñe'teñoñetanpa' o'ch a'coshare'terrnet. ³³ O'ch nashtaretterra, attotcha'ña muetserrnet. Tarraña poma'pamtañoñapa' o'ch alla netanterra.

³⁴ Ama't atet otuanet, ñetñapa' ama eseshaye' eñotaye ñeñt atet serrpare'tatanet. Ama't puesheñarroñetapa' ama't mameshapa' ama çchapanetoña pueyoçhreto ñeñt atet otenanet.

Atto Jesúsapa' cohuaterran puesheñarr aporo'yet ñeñt jericomarnesha'
(Mt. 20.29-34; Mr. 10.46-52)

³⁵ All oñenet o'ña çchapmochet anetso Jericópa' allña e'ñe toñetopñopa' all anen puesheñarr aporo'yet ñeñt çhocma enamuets quelle. ³⁶ Ñeñña aporo'yetpa' o' e'mapan shonte' acheñenesha' ñeñt metaçhets all toño, ñaña'ña' allenta a'p'to'tanet:

—¿Eso'mare't shonte' metaçhenña acheñenesha'?

³⁷ Ñetñapa' atet ochet:

—Añca'ye huetsa Jesús ñeñt nazareto'marnesha'.

* **18:25** Ñehua, Jesús añ toma'ntatanet camello ñeñt payara penet all pa'nyo, ñeñt e'ñe allpon ñerra'mrrate' huaquësh.

³⁸ Ñaña'papa' allenta rrana huomen'cpa' atet otapan Jesús:

—Pemuera'ye'chnomna Jesús'ocha' ñaña. Papa' ñeñte'p Davidna'tare'p.

³⁹ Acheñenesha' ñeñt' otachetsa ñet'ñapa' 'cha muene' che'ptare'tnomet, atet otoset:

—O'hua pemma.

Aporo'ye'ñapa' elloña alla rranerrerr atet oterranerr Jesús:

—Ñeñte'p Davidna'tare'p, pemuera'ye'chnomna'ñaca'ye.

⁴⁰ Allempoña Jesús alla tomos otosan acheñenesha':

—Sanmon arr nesho.

O' huapapa' Jesús'ñapa' atet ota'p:

⁴¹ —¿Eso'tña penmen ñeñt'cha' atet ne'pose'p?

Ñaña'papa' atet och:

—Añca'ye Ayochreshate nemnen o'ch pecuatnomuen attoch o'ch cohuen nenterrapa.

⁴² Jesús'ñapa' alla otererr:

—Pecuerrepa'ch, tarro'mar atto atarr peyemtapna na ñeñt'ca'yeña o' e'ñe a'crraterre'p.

⁴³ E'ñepa'tcha' allorocma e'ñe cohuen enterra. E'ñe cohuerntsapa' 'cha cota'nmue' ñaña Jesús, allenta atarr aye'chochtatnoman Yompor all cota'nenan Jesús. Atto' enteñ allohuen acheñenesha' ñetpa'cho'ña e'ñe cohuen aye'chochtatneññañet Yompor.

19

Atto Jesús epuet ñaña Zaqueo eñorana'tannenet

¹ Allempoña Jesús'pa' 'chap all anetso Jericó, all oñmos anetso'mar. ² All'ñapa' allo'tsen puesheñarr yacma ñeñt' sochetsa Zaqueo ñeñt' pa'm'cha'tare'ter peñ allohuen ñeñt' cobra'yene' acheñenesha' quelle gobiernocop. Ñaña'papa' atarr ec'llayore't. ³ Zaqueo'ñapa' atarr mueneñ o'ch entapan ñeñt' otenet Jesús. Ñehua, ñapa' amach erro'tenot' entapano Jesús tarro'mar shonte' acheñ' ñeñt' emchorra'nenaya all oñen ñaña Zaqueopa' allponmetolla. ⁴ Ñeñto'marña ñapa' mata allenet'cha' oñem, a'tapos tsacho ñeñt' pa'so'cheñ sicómo'rech allo'tcha' entapan Jesús tarro'mar allcha' oñem.

⁵ Allempoña 'chap Jesús e'ñe ñesho, cohuo'sta enonet'pa' alla entos, ñaña'papa' atet otos:

—Zaqueo, pesuerra tecma. Te' napa' e'ñe poctennana o'ch ne'chap pepaclo.

⁶ Ñaña'papa' allenta sohuerra tecma e'ñe pocsheñesha' agapa'p. ⁷ Allempoña acheñenesha' atet eñchet, ñet'ñapa' ama't mameshapa' ama pocteye' es entaye. Ñetpa' atet otanna'tyeset:

—Eso'marcha'ca'yeña be'tososña Jesús allcha' mos añ acheñer pa'paclo ñeñt' atarr nanac ochña'f.

⁸ Zaqueo'ñapa' allenta tomhuerrpa' atet otapan Partsesh'a':

—Te'pa' o'ch pe'm'ñotosen Ayochreshate. Ñeñt' ora allpon nechyen, te'ñapa' o'ch napa'yer pueshmet huocchañeshachno. Po'ño'ch allempo es neprrata'm'pesyese't puesheña'tetspa' te'ñapa' pa'tatsoche'tatscha' napuerranet.

⁹ Jesús'ñapa' atet otos:

—Te'ñapa' o' 'chapanet allohuenacop ñeñt' ye'chetsa añ pocollro alloch a'quesh'patare'tterret. Ama't ñapa'cho'ña Abrahamca'ye po'm'reneñ. ¹⁰ Na Ñeñten Acheñetosets ñeñto'marña nohuapa añe patsro o'ch ne'nyesos acheñenesha' ñeñt' chenqu'etsa ñeñt'cha'ña na'quesh'patayesos.

Arrpa' all atma'ntatare'ttena 'charrasheña ñeñt' apare'ttatsa quelle e'ñe allpone-shapa'tsocma

¹¹ Acheñenesha' o' e'm'ñotenet shonte' ñeñt' atet serrpare'tatanet Jesús ñeñt' atet pena Yompor po'cohuenña, ñaña Jesús'pa' o' 'chapmoch Jerusaléno. Ñeñto'marña ñet'ñapa' 'cha

otenapuetañ allempocmach etsota allempopa' ñach añcha'tarettatsa Yomporeshot arr patsro. Ñeñto'marña elloña ñapa' toma'ntatanet po'poñ. ¹² Ñeñtpa' atet otanet:

—Eñall puesheñarr acheñ ñeñt e'ñe cohuen añcha'na'tpo' entyen allohuen acheñenesha' ama't e'ñe pamo'tseshohuen. Ñeñña acheñerpa' arr sechena bachayo po'poñ anetso allotcha' apet llesens attoch esempoch huerrapa' o'ch añcha'taretetuerra all pa'nyo. ¹³ Allempo ama sena'pa' agotatnoman çharrasheña pa'taruasañer ñeñtcha' apa'yesnom allponeshapa'tets quelle e'ñe puesheña'ttsocmuet. Allempo apa'yesnomanetpa' atet otyesnomanet: “Añ quellepa' o'ch setaruasach nocop. Esemppoch nehuerrapa' allemppochña e'ñe neñotuerrnas e'ñe puesheña'ttsos errponte' quelle segana'yesa ñeñt nocop.” ¹⁴ Tarraña patantarr acheñenesha' ñeñt pa'nyo'marnesha', ñetñaapa' atarr e'moñe'teñet. Ñeñto'mar allemppoch ta ñeñt anetsro, ñetñaapa' mueñet allponsheña ñeñtcha' eñososets all sen o'ch oteñeta' allo'marnesha': “Yapa' ama yemno o'ch sene' añ acheñer o'ch añcha'tarettatsa yocop.” ¹⁵ Tarraña ama't atet petañ ñocopñaapa' çhocmach apet llesens attoch huerra o'ch añcha'taretetuerra all pa'nyo pamo'tseshacop. Allempoña çherrpa' agotatuerran pa'taruasañrenesha' ñeñt apa'yesnom quelle ahuaña. Ñapa' añecopña agotatyerranet o'ch eñotuerranet errponte' quelle ganatyensñañet po'çllayor e'ñe puesheña'ttset. ¹⁶ Attoña apçha'huerranet ñeshopa' ñeñt ñanom huapatsapa' atet otos: “Ayochreshate, ñeñt allpon ñapa'nmuen ahuaña quelle, ña'ñaapa' ello neganaterrnaperr peçllayor çharroch.” ¹⁷ Pamo'mte'ñapa' atet otuer: “E'ñe pocte', ñapa' atarr cohuen pesherbene. Ama't allponatolla napa'nmaj ahuaña, ña'ñaapa' atarr cohuen pesherbato. Ñeñto'marña te'pa' o'ch nenuerrep çharracop anets allcha' pa'mçha'tarettatsa pa.” ¹⁸ Allempoñaapa' o' huapa ñaña po'psheñeñ pa'taruasañerpa' ñapa'çho'ña atet otos: “Ayochreshate, na ñeñt allpon ñapa'nmuen ahuaña quelle, ña'ñaapa' ello neganaterrnaperr peçllayor anmaroch.” ¹⁹ Pamo'mte'ñapa' atet otuer: “E'ñe pocte', te'pa' o'ch nenuerrep ñaña amnarecop anets allcha' ña'mçha'tarettatsa ñaña.” ²⁰ Allempoñaapa' huapa po'psheñeñ pa'taruasañer, ñapa'çho'ña atet otos: “Ayochreshate, arrpa' ñeñta allponara ñeñt e'ñe allpona ñapa'nmuen ahuaña quelle. Napa' alla ña'ño'tenna' e'ñe cohuen nepenna' ña'ñello. ²¹ Napa' çha nemçha'tene' tarro'mar neñotene' ñapa' amaca'ye matsrre'mña'pe. Papa' çhocmaca'ye peprratam'pesyen ama't ñeñtpa' ama ñoyaye, ñaña çhocmaca'ye petotatyenne ñeñt ama ñaye' nare'tatyenaye.” ²² Pamo'mte'ñapa' atet otuer: “Paña po'ñoçhpapa' amaca'ye cohuenaye' pesherbene ama't e'ñe mamesha. E'ñe atet ñotenen napa' atarro' atsrre'mña'ten te'ñapa' po'ñoç atetçha'ca'ye natsrre'moçhtana'tuerrepçha'. Ñerra'm po'ñoç peñotennoñ napa' atarr atsrre'mña'teneñ, ñerra'm po'ñoç çhocma neprratam'pesyeneñ ñeñt ama noyaye, ñaña napa' ñerra'm po'ñoç çhocma netotatyeneñ ñeñt ama naye' nare'tatyenaye, ²³ ñerra'm po'ñoç atet pentennoñpa', eso'maruaña'ca'yeña ama bancoye' penennanoña neçllayor allochñaapa' te'ña o' nehuerrapa' nagapuerreñcha' neçllayor allo atontateñet.” ²⁴ Allempoña pamo'mte'pa' atet otan ñeñt tomçha'tyets all: “Te'pa' o'ch seprratam'pesuer quelle, o'ch sapuer ñeñt ganatene' çharroch neçllayor.” ²⁵ Ñetñaapa' atet ochet: “Ayochreshate, ñapa' echenanca'yeña shonte' quelle ñeñt ganena çharroch.” ²⁶ Pamo'mte'ñapa' atet oterraneterr: “Tarraña ama't atetpa' te'pa' o'ch notas, ñeñt es echets shonte' e'ñe pesherbateño'tet pamo'mte' ñetña ellonetpa' o'ch alla aparetterret po'poñ aton. Tarraña ñeñt ama es echetsopa' ama't allponatolla ñeñt eçhyenetañ aprratam'psaretterretçha'. ²⁷ Ñaña te'pa' añña ñeñt ne'moñe'tene' ñeñt ama muenenaye o'ch na'mçha'tarettatsa ñocpuet, te'ña sapa' o'ch sehuapatamet attoch semtsanatosanet e'ñe arr nesho.”

Allempo chap Jesús Jerusaléño
(Mt. 21.1-11; Mr. 11.1-11; Jn. 12.12-19)

²⁸ Allempoñapa' ahuererr Jesús Jerusaléñoneñ. ²⁹ Chapmochet aspeno ñeñ pa'so'cheñ Olivopen allo'tsen anets ñeñ Betfagé ñaña Betania. O' chapmochet all Jesúsñapa' ³⁰ atet otosan epsheña pueyochresha':

—Sapa' o'ch sota o'ch sechap a'yenteye' e'ñe allara anetso. O'ch sechap allpa' allcha' sentos ashen rre'ptor all huanquëñet; ñeñtpa' ama't puesheñarra acheñ ama monteña'. Ñeñña ashenpa' o'ch sepyam̄psospa' o'ch sanerrnan arr. ³¹ Ñerra'm esesha'ch sotapue': "¿Eso'mare't sepyam̄peñña ashen?" sañapa' atetcha' sotosanet: "Yepartsesharca'ye muenene'ña añ ashen."

³² Allempoña ñeñ mueñapa' ñetñapa' ahuanmuet all anetso. Allñapa' atetcho' entoset e'ñe atet otanet Jesús, allo'tsenca'ye ashen rre'ptor all huanquëñet. ³³ Allempo pueyam̄psosetpa' pamo'mte'ñapa' atet otapanet:

—¿Eso'mare'tcha'ña sepyam̄psosayña yashanor?

³⁴ Ñetñapa' atet otosñañetña ashen pamo'mte':

—Yepartsesharca'ye muenene'ña añ ashen.

³⁵ Allempoñapa' anerretña ashen Jesúsesho. Nohuerret pa'shtam ashnache'ñopa' montatueret Jesús. ³⁶ Allempo monta'nma Jesús alleneñ sen, acheñenesha'ñapa' to'tma'tyesoñet pa'shtam toño allcha' oñem. ³⁷ Atteñapa' o' chapmochet Jerusaléño. Allempo a'nososet Olivopnot shonte' acheñenesha' ñeñ ame'ñenaya Jesúsapa' ñetñapa' allo'teñ e'ñe cosha'rrtoset. E'ñe pocsheñesha' ahuanenet, pano'tatse'teñesha' aye'chochtatneññañet Yompor, tarro'mar atarr cohuen entnenet atto Jesúsapa' atarr orrtatenanet Pompor po'partsoña. ³⁸ Ñetñapa' atet otyesnenet:

—¡Aye'chochtaterrapo'ch Ancha'taret Jesús ñeñ llesensen Yompor! ¡Cosherrre'tepa'ch ama't ñeñ pue'ntaño'tsen! ¡Aye'chochtaterrapo'ch ñaña Yompor Parets ñeñ pue'ntaño'tsen!

³⁹ Fariseonesha'ña puesheña'tets ñeñ allo'tsa'yen ñeñ ama ame'ñenaye Jesús, ñetñapa' atet otapet Jesús:

—Maestro, peche'ptare'taye'chyesnomñaca'yeña peyochreshachno attoch amach allo'na atta a'hotatsetnenpeto.

⁴⁰ Tarraña Jesúsñapa' atet otosanet:

—Napa' o'ch notas, ama'tcha' atet notatstanetaña' muema'rrtetañcha', mapye'chñoñapa' puerranare'teño'etpa' nachotenayach.

⁴¹ Allempo o' e'ñe chapmochet atto entosan anets Jerusaléñ, Jesúsñapa' atarr ya'na'tosan jerusaléño'marnesha'. ⁴² Allpa' atet eñorosa ñocpuet:

—Atarr nemneñ ama't e'ñe tayecma po'ño'ch sapa'cho'ña o'te' señotereñ erro'tencha' seperra attoch Yomporpa' o'ch a'queshpaterroñ e'ñech socsheñesha' socrrerrañ. Tarraña saña teme'ttsen ñeñña' ama't mameshapa' ama chennaso seyo'chro.

⁴³ Tarro'mar napa' o'ch notas, po'ño'ch o'ch chap allempoch ñeñ se'moñe'tene'pa' concha'tam̄perrnasetcha' sa'netser attoch e'ñe rro'chtam̄perrset allemateñ sate'pōtpa' hua'cha'tonasetcha', attoch amach erreneñ seyeterro ama't e'ñe puesheñarro'tesa.

⁴⁴ A'mata'tuerrnasetcha' ora allohuen sa'netser attoch sepacle'nachña e'ñe sa'tpetse'tuerre' allohuenes ama't sacñe'taretolleshohuen. Allo sorraten sepaquell ama't patra mapue'pa' amach a'puerro, tarro'mar sapa' ama semno o'ch saguerrñañ Yompor pue'muereña allempo mueneñ o'ch yenpuerrsoñ saña.

Atto Jesúsapa' a'cohuentatosan Parets pa'paquell
(Mt. 21.12-17; Mr. 11.15-19; Jn. 2.13-22)

⁴⁵ Allempo chap Jerusaléño Jesúsñapa' ahuos Parets pa'paclo. Be'tosospa' allotñapa' cha'nma'cha'tatuosan ñeñt pomatsre'tyetsa all. ⁴⁶ Allñapa' atet otosan ñeñt pomatsre'tyetsa:

—Yompör po'ñoñ ñeñt atet anuaret ahuatoteñ, allñapa' atet oten Yompör: “Añ ñeñt nepaquell nepenpa' añecpaca'yeña sherben allecmach ma'yochennet”; tarraña sañapa' atet sepeññaña Yompör pa'paquell atet ñerra'mrrate' eñeñ ñeñt e'potyetsa mapuetpono'mar.

⁴⁷ Pate'tets yet Jesúsapa' chocmach sene't Parets pa'paclo all ye'chatenanete't Yompör po'ñoñ. Añña ñeñt pa'm'cha'tare'ternesha' pen allohuen judionesha' po'cornaneshar ñaña añ ñeñt atarr etsotayenayeñ ñoñets ñeñt atet anaret ñaña po'potantañ ñeñt am'cha'tare'tetyetsa all anetso, ñetñapa' Jesúsapa' atarr o'patyenet attoch muetsatachet. ⁴⁸ Tarraña ñetpa' ama erro't peto tarro'mar allohuen acheñenesha'pa' atarr yemeteññañet Jesús atto atarr cohuen serrpare'tatenanet Yompör po'ñoñ. Ñetpa' ñeñña atarr cohuen entyenet.

20

Atto allsensarettena Jesús

(Mt. 21.23-27; Mr. 11.27-33)

¹ Po'pocheño pam'tarr Jesúsñapa' alla ye'chaterranerr acheñenesha' Parets pa'paclo. Allpa' añ serrpare'tatenanet cohuen ñoñets alloch yequeshperra. Atteñapa' hua'cha'toña shonte' am'cha'tare'ternesha'—ñeñt pa'm'cha'tare'ternesha' pen allohuen judionesha' po'cornaneshar ñaña allponsheña ñeñt atarr etsotayenayeñ ñoñets ñeñt atet anaret ñaña po'potantañ ñeñt pompornesha' pa'yen allohuen judionesha'. ² Ñetñapa' atet otoset Jesús:

—Ñehua, yapa' añecop yehuena yemneñ o'ch potey ¿erro'te't apuenpetña llesens? ¿Esesha'tña pa'puene'ña llesens attot porrtatyenña ñeñt chocma attecma pe'pa'yena?

³ Jesúsñapa' atet otapanet:

—Ñehua, napa'cho'ña nemneñ o'ch na'p'to'tapas sam'a ama't pa'rra ñoñets. Sapa'cho'ña o'ch sotosen, ⁴ ahuañmo'cha allempo apate't Juanañ Yomporecop ñeñtpa' ¿sesha'tña llesense' ñato' Yompör amapa' acheña'ate' apue'ña llesens? Nemnen o'ch sotosen ñeñt atet soctape'chen sa.

⁵ Ñetñapa' e'ñe a'nahua otanna'tyeset:

—Ta'm erro'tcha'ca'ye yochte'. Ñerra'm cha yoch Yomporeshotca'ye apetña llesens, ñaña'pa' cha'te'ca'ye otey: “Ñehua, sañapa' eso'mare'tña ama se'mñocheña ahuaña allempo serrpare'tatosan acheñenesha'.” ⁶ Elloña ñerra'm cha yoch acheñesho'fa apet llesenspa' acheñenesha'ñapa' cha'te' e'moñe'tyet. Pue'moñe'teño'tetaypa' cha'te' rrollapechyet tarro'mar ñetpa' e'ñe cohuen eñchete't Juanañ, chocma otyenet ñapa' ñeñtca'yeña a'm'tose' Yompör po'ñoñ.

⁷ Ñeñto'marña ñetpa' atet ochet Jesús:

—Ta'm yapa' amaca'yeña yeñoteñe; erro'tte' huapaña Juan, erro'tte' apetña ñaña llesens.

⁸ Allempoña Jesúsapa' atet oterraneterr:

—Napa'cho'ña te'pa' amach notaso sam'a allot apare'tenña nam'a llesens attot atet ne'pa'yena.

Atet atma'ntatarettena ñeñt ataruasañe'chno ñeñt ama cohuenayaye

(Mt. 21.33-44; Mr. 12.1-11)

⁹ Allempoña Jesúsapa' alla serrpare'taterranerr acheñenesha' toma'nteñtso, Ñeñtpa' atet otanet:

—Eñall puesheñarr acheñ ñeñña nare'tanatatnomue' shonte' uvach, pa'muerñapa' e'ñe ora uvachmatatue. E'ñe allponmatatsapa' o' na'nman po'potantañ ñeñtcha' taru-asatats uvachmo ñeñtcha' coyerrahuet allpon ñerra'm esempoch toteñet. Allempoña ñapa' ahuo' ñachayo po'poñ anetso alla atomat. ¹⁰ Chap allempo yen uvachllompa' ñaña'p' mueñerran po'psheñeñ pa'taruasañer o'ch enamuerra' uvachllom' po'psheñeñ pa'taruasañresho ñeñt cohuanmpene' uvachma'. Allempoña chen allpa' enamhuenan ñeñt allpon o'patena pamo'mtayet arepa'tcha'ña es apapuenayeña uvachllom', elloña ñeñtapa' cha nalle'tapueñet, o' alla mueño'teret e'ñe atta. ¹¹ Allempoña ñeñt pamo'mte' pen uvachma'pa' o' alla mueñerranerr po'psheñeñ pa'taruasañer. Allempo chenerr allpa' ñapa'cho'ña cha es otnare'tapetpa' o'cho' nalle'tapet o' matateret e'ñe atta. ¹² Allempo poma'pocheño o' alla mueñerranerr po'psheñeñ pa'taruasañer. Ñeñtapa'cho'ña allempo chenerr ñaña allpa' ñaña'p' cha atarr atserrpatse'tapetpa' o'cho' alla matateret.

¹³ 'Allempoña ñeñt pamo'mte' penetpa' atet ot: "Te'pa' errotuachñaca'yeña nepe'te'. Te'pa' o'ch nemñe ñeñt e'ñe na nechemer ñeñt atarr nemorrentena. Ñato'rraña ñeñtapa' mecha'na'tapetcha'." ¹⁴ Arepa'tcha'ña ama't mameshapa' mecha'na'tapeto. Allempo entapoñet puechemerpa' atet otanna'tyeset: "Añmapa' ñeñtca'yeña puechemer ñeñtcha' o'paterraya pompor puenarem' esempo. Ñapa'cho'ña te'pa' o'chca'ye yemtsap' allochñapa' yachca'yeña e'ñe o'paterrayaña pompor puenarem'." ¹⁵ Allempoñapa' o' rromapet o' chetare'tnomet narmetsmo a'yoñ, allña muetsapoñetña ñaña puechemer. Arrpa' allohua atet toma'ntata Jesús e'ñe ñañaña.

Jesúsñapa' atet oterranerr acheñenesha':

—Ñehua, te'pa' o'ch notas, ñeñt pamo'mte' pen ataruasañe'chnopa' atetcha' pohuerranet. ¹⁶ Ñerra'm esempoch huerranet, pamo'mtayetpa' a'cllatuerranetcha', narmetsma'ña o'ch apuerran po'potantañ.

Acheñenesha'ñapa' allempo e'mueñet Jesús atet oten, ñetñapa' atet ochet:

—¡Ñeñtapa' arepa'chña atteye' patsterro, Neyompor-re!

¹⁷ Jesúsña atta cohuanetpa' atet otanet:

—Ñerra'm ama atet pueperra'chepa' eso'mare'tña otenña Yompor po'ñoñ ñeñt anuaret ahuatoteñ, ñeñtapa' e'ñechca'ye po'ñoñ atet perra. Tarro'mar ñeñtapa' atet oten nocop, all atma'ntatareten mapue'. Ñeñtapa' e'ñe atet anuaret Yompor po'ñoñ ahuatoteñ: Añ mapue' ñeñt ama pocteye' entyeno ñeñt tomatyene' pocoll, ñeñtña te'pa' o' anaretterra ñeñtcha' ello atarr cohuen sherberrets e'ñe atet ñerra'm quellpach allo e'ñe cohuen echarr orratenet pocoll.

¹⁸ Elloñapa' atet otanet:

—Allohuen ñeñt epoto'tetsa añ mapyopa' atarrcha' atserrpenanet, ñaña añ mapue'pa' ñerra'm eseshesho mata'nompá e'ñech a'tpetse'tuosanet.

Atto a'pto'chet Jesús, pocte'te' o'ch tsa'tet impuesto
(Mt. 21.45-46; 22.15-22; Mr. 12.12-17)

¹⁹ Añña ñeñt atarr etsotayenayeñ ñoñets ñeñt atet anaret ñaña ñeñt pa'mcha'tareternesha' pen allohuen judionesha' po'cornaneshar, ñetña allempopa' o' eñochet ñetca'ye atma'ntatarettenet, ñeñtapa' ñocpuetca'ye atet eñoreñaña Jesús. Allempoña ñetpa' atarr mueneñetañ o'ch rremuet Jesús e'ñe allorocma tarraña ama eseshaye' rromaye tarro'mar ñetpa' mecha'teñet acheñenesha'. Ñehua, acheñenesha' e'ñeca'ye cohuen enteñet Jesús. ²⁰ Tarraña ñetpa' aña atarr e'nenet attoch ama't parrochapa' o'ch eñorachet ñeñt ama pocteyaye ama't ñaña gobiernocop, allochñapa' attoch rremuet o'ch pomueñeta' añcha'taretesho ñeñt nen gobierno' Romot ñeñt añcha'tarettetsa allo'marecop. Atteña ñetñapa' e'ñe a'nahua mueñet allponsheña acheñ Jesúsesho ñeñt ottetsañ ñerra'mrrate' atarr cohuen acheñ, tarraña ñetpa' añe'ca

amñarettet attoch e'ñe puehquëñoť po'ñoňotetpa' o'ch eñorachet ñeñť ama cohuenayaye.
²¹ Allempoña ċhapuet ñeshopa' atet otoset:

—Maestrocha' yapa' yeñoteneþ ñeñť atet peñen ñaña atto peyċhatyen Yompor poċtaþña ñeñťpa' e'ñe cohuenacma. Papa' allohuen acheñ e'ñe cohuen pentueñ; ama aña ñapuēt pemorrenteno ñeñť atarr amċha'na'tpo' entyen allohuen acheñenesha'.

²² Ñeñťo'marña te'pa' yemneñ o'ch peñotatapuey erra'tsente'ña e'ñe po'ñoċh cohuentetsa. ĴPoċte'te' o'ch yetsa'ta impuestos añecop ñeñť amċha'tarettsa Romo, ñeñť ama judioneshayaye? Ñato' amate' poċteyaye yocop ñeñťey judioneshay o'ch yetsa'ta amċha'taret romo'marnesha' ñeñť ama judioneshayaye.

²³ Jesúsña'pa' eñotanet ñeñť atet shecare'teñetañ, ñaña'pa' atet otanet:

²⁴ —Ñehua, segaten puetallarr quelle.

Gatuetpa' atet otanet:

—Ñehua, sapa' o'ch soten, Ĵessha't sentenña ñeñť atma'ntatarettetsa all? ĴEssha't pa'so'cheñ ñeñť aquellcarettetsaña all?

Ñetña'pa' atet ochet:

—Amċha'taretca'ye atma'ntatarettetsaña all ñaña ñoca'yeña pa'so'cheñ ñeñť aquellcarettetsa all.

²⁵ Jesúsña'pa' alla oterraneterr:

—Ñeñťepña'pa' añ poċtetsa o'ch yaþ amċha'taret ñeñť ño ñeñť atet poċtetsa gobiernocop; tarraña ellonet ñeñť Yomporo o'ch yaþ ñaña ñeñť atet poċtetsa ñocop.

²⁶ Attoña ama't puehquëñoťet atet otyenetpa' ama errotenoť eñoracheto ñeñť ama poċteyaye ama't ñaña gobiernocop tarro'mar allohuen acheñenesha' ñeñť allo'tsa'yen e'ñe cohuen enteñet atet anapuenanet Jesús. Ñeñťña ashcañnesha'pa' atta cohuanrrorteñet tarro'mar atarr cohuen anapuenanet Jesús. Ñeñťo'marña ñetpa' ama errotenaye' otenaye' entereterro.

Atto a'pťo'chet Jesús, ñerra'm po'ñoċhte' atanterrapo' rromoť, ta'm, allempopa' errotencha'ña yeperra

(Mt. 22.23-33; Mr. 12.18-27)

²⁷ Allempoña'pa' huaċha'toña ñaña patantarr ñeñť saduceoneshatets. Ñehua, ñeñť saduceoneshatets ñetña'pa' ellonet echenet poċtaþña ñeñťo'mar atet otenet amate' errotenoť yetanterroña rromoť ama't errponaña.

²⁸ Ñetña'pa' atet otoset Jesús:

—Maestrocha' ahuať Moisés'pa' atet quellconay ñoñets ñeñť poċtetsa ñeñťcha' atet yepa. Ñeñťpa' atet otenña Moisés po'ñoñ: Ñerra'm esempo rroma yacma o'ch sa'nman puetapor tarraña ama chemere'tnomopa' añ poċtetsa pa'mo'nasheñcha' alla yorerre'ña po'norrar allochña'pa' attoch eñalletteraña ñeñťcha' puechemer perr pa'mo'nasheñ. Ñeñťpa' atetca'ye quellca'nmonayña Moisés ahuať. ²⁹ Ñehua, te'pa' eñall canċherrsheña ñeñť e'ñe poċtacma pa'mo'nasheñecmuet. Ñeñť pueheñarr popo'naretpa' o' yoran coyanesha' ñeñť puetapor þa'. E'ñe allponmatatsapa' o' rromaña, yacma ama chemere'tnomo. ³⁰ Allempoña ñeñť po'rroċho'merpa' o' yorerran pa'mo'nasheñ puetapor. E'ñe allponmatatsapa' ñapa'ċho'ña o' rromuerrerr ñaña, ñeñťpa'ċho'ña ama chemere'tnomo. ³¹ Allempoña po'psheñeñ pa'mo'nasheñpa' o' alla yorerranerr ñaña po'norrar. E'ñe allponmaterrtsapa' ñapa'ċho'ña o' rromuerrerr ñaña, ñeñťpa'ċho'ña ama chemere'tnerrero o' atta rromuerrerr. E'ñe attecma þohuet canċherrsheño'maretpa' e'ñe pueyoruaroċet ñeñťara pueheñarr coyanesha'. E'ñe allohuenetpa' e'ñe attecma pet colla'huet ama't pueheñarroťetapa' ama chemere'tnomueto. ³² Allempoña o' rromaña ñaña coyanesha'. ³³ Te'ña ñerra'm po'ñoċhte' yetantena yerromñoťpa'

añña coyanesha' allempopa' ¿eseshat'cha'ña puetapor perre' tarro'mar allohuenet cancherrsheño'maretpa' e'ñe pueyoruarochet?

³⁴ Allempoña Jesús otanet:

—Ñehua, atet yechen acheñenesha' arr patsro, chocmach sena'tenet, coyanesha'pa'cho'ña apueñet ñeñtcha' puerrollar pa'. ³⁵ Tarraña esempohuañen allempoch tanterret po'pocheño allohuen ñeñtcha' e'ñe pocte' entuerr Yompor allochñapa' attoch o'ch alla correrret po'pocheño, ñetña allempopa' ama't puesheñarrofeta amach sena'terreto, ama't coyanesha'pa'cho' amach eseshaye' apuerraye ñeñtcha' yorerrahuet. ³⁶ Tarro'mar allempopa' amach arromñat'terreto ama't ahuaña attoch e'ñech atet perret ñerra'm mellañoteñnanesha'. Yomporñapa' o'ch e'ñe puechemer perranet e'ñe poctacma tarro'mar allempopa' o' tanterret rromotpa' o'huañcha' arromñat'terret ama't errponaña. ³⁷ Elloña ama't Moisés atet eñotatane't acheñenesha' po'ño'ch ñeñt colla'huatsa allempo, ñetñapa' corretseta. Ñehua, all aquellcare't tsachmo'r ñeñt e'ñe ñoña huortets. Alloñaca'yeña Yomporpa' eñorana'tanaña Moisés; ñeñt'pa' atetca' otña Yompor allempo: “Napa' ñeñten Po'yomporer pen Abraham ñaña Isaac, ñaña Jacob.”

³⁸ Jesúsñapa' alla oterraneterr:

—Ñehua, yapa' yeñoteñ Yomporpa' ama ayeñe' Po'yomporer penaye ñeñt rromuets e'ñe poctacma ñapa' añca'yeña Po'yomporer pene' acheñ ñeñt corretsach. Yomporñapa' e'ñe entenanet allohuenetpa' e'ñe corretseta.

³⁹ Añña puesheña'tets ñeñt atarr etsotene' ñoñets ñeñt atet anare't, ñetñapa' atet ochet:

—E'ñe Maestrocha' e'ñe po'ño'ch atet poten.

⁴⁰ Ñeñto'mar allempoteña' ama't puesheñarrofetapa' ama eseshaye' a'p'to'tenaye' enterraye.

Atto Cristo ñeñt Po'partseshar pe't David, elloñapa' o' alla po'm'reneñ per (Mt. 22.41-46; Mr. 12.35-37)

⁴¹ Allempoña Jesús'pa' atet otan ñeñt atarr etsotayenayeñ ñoñets ñeñt atet anare't:

—Eso'mare'tña otyenet ñeñtcha' Cristotets ñapa' aña po'm'reneñ pene' David tarro'mar ñeñtcha' Cristoterrets ama aña po'm'reneñ peñe David tarro'mar ñapa' Po'partseshare'ñaña pe't David. ⁴² Tarro'mar ama't Davidpa' allempo quellquë't all libro Salmo allempopa' atetca'ye eñose'tña añecop ñeñtcha' Cristoterrets:

Yompor Parets'pa' atet otennan ñeñt Nepartseshar nepen na (ñeñtara ñeñtcha' Cristoterrets): “Te'pa' o'ch panorruerr arr necohuenro't allcha' pecohuentapreterra.

⁴³ Attochña ama't ñeñt pe'moñe'tene' napa' o'ch name'ñatuerranet allochñapa' o'ch atet perret ñeñt pemnen pa.”

⁴⁴ Ñeñt'pa' atetca'ye ote'tña David ñeñtcha' Cristoterrets'pa' ñeñtca'yeña Po'partseshar pe'tña ama't allempoteñ. Ñehua, ama't seño'teñeña Cristo ñeñt Po'partseshar pe't David ñeñtña te'pa' o' alla po'm'reneñ per ñaña.

Atto Jesús'pa' a'metare'tenan ñeñt etsotayenayeñ ñoñets ñeñt atet anare't, ñeñt atet yechenet ñetpa' ñeñt'pa' ama cohuenaye' entapretenaneto Yompor (Mt. 23.1-36; Mr. 12.38-40; Lc. 11.37-54)

⁴⁵ Elloña shonte' acheñenesha' ñeñt e'mño'tene' allempo atet otanan Jesús pueyochresha':

⁴⁶ —Amach semeñe'tapretatsche ommoñafenesha' poctapña ñeñtareta ñeñtet atarr etsotayenayeñ ñoñets ñeñt atet anare't. Tarro'mar ñetpa' añe'ñaña atarr cohuen entenet o'ch chorrenet atarrom shetamuets o'ch atta yorma'tatsetenet pa'shtam. Ñaña pommo'cheño'tetpa' atarrcha' mueneñet o'ch e'ñe pueñcha'na'teño't e'ñech cohuen huom'cha'tenanet acheñenesha' all chopeñe'chyenet. Ñaña ñetpa' añe'nach

atarr muenenet o'ch anorrcha'tyenet judionesha' po'prahuo allecma anorryen ñeñt atarr añcha'na'tpo' entyen allohuen acheñenesha' ñaña e'ñe attecma penet ñaña all rrallme'chapretenet. ⁴⁷ Tarraña ñetñapa' rretornanesha'ñaña puerratañpesyenetña pa'paquell. Elloña e'ñe pommo'cheño'tetpa' aña atarr muenenet o'ch atet penet ñerra'mrrate' ñetpa' atarro' cohuen acheñret ñeñto'marña arrcha' ma'yochenet all shontena acheñenesha', amach tematenayaya ma'yocheneto. Ñeñto'marña te' napa' o'ch notas, ñeñt atet petsa pommo'cheño'tpa' elloña atarrcha' a'coñcha'taretterret.

21

Atto rretornanesha' ñeñt atarr huocchañetets ñapa'cho'ña nosan quelle ñeñt Yomporecop

(Mr. 12.41-44)

¹ Allempo allo'tsen Jesús Parets pa'paclo, ñañaapa' arrenet cohuen allecma nenet quelle Partsocop. Allñaapa' entenan eçllayoreñenesha' ñeñt na'yene' shonte' po'çllayor Partsocop. ² Jesúsña allpa' atta cohuenanet, huapa ñaña puesheñarr rretornanesha' ñeñt atarr huocchañetets. Ñapa'cho'ña nosan eptallatoll quellayetoll ñeñt cobretall. ³ Jesúsñaapa' atet ot:

—Te'pa' o'ch notas, añ rretornanesha' ama't atarr huocchañ ñapa' po'ñoçhca'ye atarr aton nosan quelle, ello metana'tuosan allohuen po'potantañeçhno allpon quelle ñeñt na'yenet ñet. ⁴ Tarro'mar allohuenet ñeñt na'yenet quelle, añaca'ye na'yenet ñeñt a'pchatyenet, ñañaapa' ama't atarr huocchañpa' e'ñe pomhuahuospan allohuen ñeñt echyen ñeñt muenatenaneñ allo'ch yoran attoch correna arr patsro.

Atto Jesúsapa' eñotatanet e'ñech a'mata'taretetuerra Partsopo'

(Mt. 24.1-2; Mr. 13.1-2)

⁵ Allempoña puesheña'ttets ñetñapa' aña atarr serrpare'tyenet atto Parets pa'paquellpa' atarr a'cohuentateñ. Mapyet ñeñt allo orratenet Partsopo' ñeñtpa' atarr coçhneshare' a'pa'yese'ret. Shonte' coçhneshare' ñaña allo'tsa'yen ñeñt pomyen acheñenesha' all Partsocop. Jesúsñaapa' atet otanet:

⁶ —Ora ñeñt allpon e'ñe coçhneshare' sentyent te' çherra' allempoch e'ñe a'mata'taretetuerra. Ama't puenarra mapyetpa' amach a'puerroña all allo orratenet Partsopo'.

Atto Jesúsapa' eñotatanet shonte'ch entyerret pa'namen ñeñtcha' eñotaterrahuet o' çherrmoch allempoch mellapoterra

(Mt. 24.3-28; Mr. 13.3-23)

⁷ Pueyochresha'ñapa' a'p'to'chet:

—Maestro, ñeñtpa' ¿esempo'tcha'ña atet perra? Ñaña allempopa' ¿eso'tcha'ña yentyerr ñeñtcha' yeñotaterre' po'ñoçhpa' o'ch çherrmoch allempoch e'ñe etsotuerra ñeñt atet p'teney te'?

⁸ Jesúsñaapa' otanet:

—E'ñech señoterra, allochñapa' amach esesha' seshquërraye. Tarro'mar shonte'ch orrterrsa ñeñtcha' ayçha'nata'terre' neso'cheñ, ñeñtcha' otyerrets: “Napa' ñeñtenca'yena Cristotets; te'pa' o'ca'ye çherr allempoch norrtterra na ñeñten Cristotets.” Tarraña sañaapa' ñato'tña se'mñnotenana'te'. ⁹ Ñaña allempopa' o'ch se'mare'tyerr o' quellareñtso'tyerr allemeñ anetso'mar ñaña o'ch se'mare'tyerr o' orrtterra ñaña atparñats erraparen, saña allempopa' amach çha seyorenatsto ama't e'ñe mamesha. Ñeñtpa' atetcha'ca'ye e'ñe po'ñoçh perra. Tarraña allempopa' amach çhena' allempoch e'ñe mellapoterra.

¹⁰ Jesúsñaapa' alla otarraneterr:

—Pa'namen acheñ ñeñt e'ñe po'poñe'ttsoema mereñtsoret ñetpa' quellaranna'terretcha'. Ñaña pa'namen anetsoť añcha'taretechnopa' quellaraterrancha' pueyochreneshachno. ¹¹ Pella'yerrach pats huomenc ora errañaren, ñaña orrterrach allemeñ muecheñets o'ch e'ñe chaporrñatsotyerr errañaren. Orrterrach ñaña pa'namen atsnañtsochno ñeñt atarr apatanna'tpo'. Allempopa' atarrcha' añcha'noçhterra entoť. Orrterrach ento ñeñt ama't ahuatapa' ama puentareto ñeñtcha'ña eñotaterrahuet o' e'ñe çherrmoch allempoch mellapoterra.

¹² 'Ñehua, allempoch ama orrtena' atetpa' saña allempopa' rremanaterrsetcha' attoch mueroçhtaterrset, sanmare'tterrach judionesha' po'prahuo allcha'ña e'ñe otteñe'cherrset, attochña abe'terrset cárcelo allcha' coñchaterrset. E'ñe same'ñeñoften na sapa' sanmare'tterrach añcha'taretneshesho'mar ñaña allo'tsa'yen ñeñt nanac añcha'taretnesha'. ¹³ Tarraña allempopa' atarrcha' cohuen attoch sa'metosnanña neñoñ. ¹⁴ Ñeñto'marña allempo sanmare'tetyesa allcha' otteñe'cherrset ama't mameshapa' amach sellca'psatsto, amach sota'psa'tatsto, erro'tuachca'ye notoste' añcha'taretesho allempoch a'pto'tare'tapuen. ¹⁵ Tarro'mar allempopa' nachca'yeña se'ñoratos'eña all attoch e'ñe cohuen seño'tyesña atetcha' sanapyesosanet. Allochñapa' ñeñt se'moñe'tene'pa' amach erro'tenaye' otenaye' entenseto. Ñaña amach erro'tenoť otaseto ñeñt atet soten sapa' ñeñt'pa' amaca' po'ñoçhaye' atet soteno. ¹⁶ Elloña allempoch atet perrsetpa' ñeñt e'ñe sompor sepen ñaña sachor ñato' ñeñt'achca'ye sepomuerre' tarro'mar ñapa' amaca'ye ame'ñenno, amapa' ñato' semo'nasheñ, amapa' ñato' po'potantañ samo'tsesha', amapa' ñato' ñeñt e'ñe parro seyemtena ñeñt'achca'ye sepomuerre' tarro'mar ñetpa' ama parrocmaye' attecma soctape'cheno. Ñaña patanta'ttsospa' muetsatyerrsetcha'. ¹⁷ Shonte'ch acheñenesha' ñeñt'cha' se'moñe'terre' tarro'mar sapa' naca'ye e'ñe same'ñena. ¹⁸ Napa' atarrcha' necuarñpenes attoch amach erro'tenoť sechenquerro ama't e'ñe ahuata. Attoña ama't e'ñe pue'parra sechpa' ñeñt'pa'cho'ña amach na'chencaterrnaso. ¹⁹ Tarraña ama'tcha' atarr mueroçhtaterrset çhocmachña e'ñe seyemteñoften napa' e'ñech sa'huinta'huanomña allohuen mueroçhteñets. Attochña sapa' corretsasach e'ñe po'ñoçh.

²⁰ 'Ñerra'm esempoch senterr añ anetser Jerusalé'ña' o'ch e'ñe rroçhtañpera solltar-nesha' allempoña sapa' seño'chepa'ch o' çherrmoch attoch e'ñe a'mata'tare'tetuerra ñeñt anetser Jerusalé'ñ. ²¹ Allempoña ñeñt allpon Judeo'tsa'yenpa' ñetñapa' allorocmuepa'ch yetrra'tuerret ahuanerretepa'ña aspentareronet. Ñaña ñeñt allpon anetso'tsa'yen Jerusalé'ño, ñetpa'cho'ña ahuanemyesetepa'ch ñamet allot. Ñaña ñeñt allpon allampaño'tsa'yen all arepa'chña tatsterretoña all Jerusalé'ño. ²² Tarro'mar allempopa' Yomporcha'ña tsa'taterrayaña allohuen israelena'tarnesha', tarro'mar allempopa' o'ch e'ñe etsoterra ora allpon ñeñt atet anuarettatset' atetcha' perra allempo. ²³ Allempopa' atarrcha' llequëñets añecop ñeñt a'chomenare' coyanesha' ñaña ñeñt allohuen emaretetolleshachno. (Tarro'mar ñocpuetpa' atarr torrapo' attoch yetrra'tet ñamet.) Tarro'mar allempopa' o'ch orrterra ñeñt'cha' atarr mueroçhtaterrahuet arr patsro. Atarrcha' a'coñchatare'tterra allohuen acheñenesha' allempo. ²⁴ Ñaña allempo shonte'acheñpa' e'ñech muetsanatuerranet ñeñt'cha' quellarerrahuet. Po'potantañña' rremanatuerranetcha' ñeñt quellarenahuet o'ch anmare'tterret po'poñ anetso baçhayo all ye'cha'yena pa'namen acheñ. Acheñenesha' ñeñt ama judioneshayayepa' ñeñt'cha'ña e'ñe a'mtsoññetuerre'ña jerusalé'ño'marnesha', attoch e'ñe atmama'tueretña ñeñt anetser Jerusalé'ñ. Atetcha'ca'ye perra ñeñt allponmat onañchare't ñeñt ama judioneshayaye o'ch añcha'noçhterret all Jerusalé'ño.

*Atetcha' perra allempoch huerra Cristo Ñeñt Acheñetosets
(Mt. 24.29-35, 42-44; Mr. 13.24-37)*

²⁵ 'Allempopa' orrterrach ento ñeñt̃ ama't ahuatapa' ama sentare ñeñt̃cha'ña señotaterre', ñeñt̃pa' e'ñech atsnesho, orrterra ñaña arorresho ñaña rantochnesho. Ñaña arr patsro ora allpon pa'namen acheñenesha' pueyorñotetpa' atarrcha' nanac lleca'rrterret. Añcha' atarr yore'tame'terrahuet atto ñeñt̃ añecmuen sa'ppa' o'ch emo'yarterra, atarrcha' huomenc ma'moreterr allempo. ²⁶ Acheñenesha' e'ñe ponchañotetpa' chach muene' otanatyerret tarro'mar allempopa' o'ch eñoterret atarrcha' muerochterret allohuenet arr patsro. Ñaña ñeñt̃ huomenc orra'yetsa ento te', allempoña ama't ñeñt̃pa' pella'yerrach. ²⁷ Allempoñapa' entapuerrnetcha' na Ñeñten Acheñetosets o'ch nesuanperra oso e'ñe nepartsoteñohuen e'ñe necohuenteñesha'.

²⁸ Ñerra'm esempoch senterr o' motetnerra orretyests a ñeñt̃ allpon o' notuas, allempoña sapa' e'ñech socsheñesha' secuanrrorterr enonet tarro'mar allempo o'ch cherrmoch allempoch sa'queshpataretterra e'ñe poctacma.

²⁹ Allempoña Jesúsapa' alla serrpare'taterraneterr toma'nteñtso, ñeñt̃pa' atet oterraneterr:

—Señotenē' atet pena tsach, higoch. ³⁰ O'ch senteñ allempo tapna'tyen pasopanerpa' sañapa' ñeñt̃aña señotatene'ña o' chenmoch allempoch huorateterrerr.

³¹ Attecmach perra ñerra'm esempoch sentyerr ñaña allpon ñeñt̃ o' notuas sapa' ñeñt̃cha'ña señotaterre' po'ñoch o'ca'ye cherrmoch allempoch e'ñe etsoterra allempoch añcha'taretterra Yompor.

³² 'Napa' po'ñoch o'ch notas, acheñenesha' ñeñt̃ corretsa te' ñetpa' amach e'ñe rromhueneta'pa' allempocmach e'ñech etsoterra allohuen añechno. ³³ Eempopa' añ enet ñeñt̃ sentenpa' e'ñech chenca'huerra; patspa'cho'ña attecmach perra e'ñech chenca'huerra. Tarraña ñaña neñoñpa' amach chenuerro ama't e'ñe errponaña.

³⁴ 'Tarraña te'pa' o'ch notas, sapa' chocmachña e'ñe señoñtoma attoch sapa' amach añ soctape'chatsto ñeñt̃ sosya'tsañechno, posa'tare'teñets, ñaña atto e'ñe cohuen socrrena añ patsro. Tarro'mar ñerra'm ñeñt̃ e'ñe soctape'chenpa' machayotach huaponasa añ yeter ³⁵ atet ñerra'mrate' tamell e'ñech machayota rreman ñeñt̃ecop amencaret. Ñeñte yetarocmach cherrana ora allohuen ñeñt̃ ye'cha'yetsa añe patsro erraparen.

³⁶ Añcha'ña sapa' chocmachña señoñrtena ñaña añcha'ña senamuen Yompor attoch sa'huanta'hanom allohuen ñeñt̃cha' sehuapoya pa'namen muerochteñtsochno allochñapa' sañapa' e'ñech señañesha' satomhuerr nesho na Ñeñten Acheñetosets.

³⁷ Chocma atet pe't Jesús, ellapene'tcha' ye'chatats Parets pa'paclo, ellerronetñapa' o'ch ahuer Olivoño ñapa' allca'ye e'ñe a'pue't. ³⁸ Tsapa't puetaren ahuatecmach huapa'muene't ñaña shonte' acheñenesha' ñeñt̃ e'ñeñotyesaye't all serrpare'tatanete't Yompor po'ñoñ all Parets pa'paclo.

22

Atto atarr o'pateñet Jesús o'ch muetsatateret (Mt. 26.1-5, 14-16; Mr. 14.1-2, 10-11; Jn. 11.45-53)

¹ Allempoña chapmoch allempoch cherrerr pascuapo, allempoch rrerranerr judionesha' pan ñeñt̃ ama anaretayaye chase'. ² Tarraña allohuen ñeñt̃ pa'mcha'tareternesha' pen allohuen judionesha' po'cornaneshar ñaña allohuen ñeñt̃ atarr etsotayenayeñ ñoñets ñeñt̃ atet anaretet ñocpuet, ñetñapa' Jesúsapa' atarr o'patenet o'ch muetsatachet tarraña ñetpa' añ mecha'na'tenet acheñenesha'.

³ Allempoña oneñetpa' chorrenana Judas ñeñt̃ara ñeñt̃ sochetsa Iscariote. Ñehua, añ ñeñt̃ Judaspa' Jesús pueyochresha' ñeñt̃ parro yemtena po'potantañ ñeñt̃ llesensen Jesús ñeñt̃ allohuenet charrasheñet puechenet epsheña. ⁴ Ñeñt̃ña Judaspa' ahuo' allo'tsa'yen ñeñt̃ pa'mcha'tareternesha' pen allohuen judionesha' po'cornaneshar ñaña allo'tsa'yen

judionesha' po'guardiarnesha' ñeñt' cohuanpene' Parets pa'paquëll. Allempo chap allpa' Judasñapa' serrpare'tos epuet ñeñt' amicha'taretnesha'. Attoña eñotatosanet ñapa' mueneña'ye o'ch poman Jesús attoch rromuet. Allempo ñetñapa' otanna'tyeset:

—Te'pa' errotuachñaca'ye yepe'te' attoch yerrmue'.

⁵ Allempoña ñeñt' atarr amicha'taretnesha'pa' atarr coshenet, ñetñapa' a'pochtachet chochca'ye tsa'chetña Judas allpon quelle. ⁶ Ñapa' e'ñe pocte' eñch. Allempoña ñapa' aña atarr e'nen errotenotcha' pomanña Jesús e'ñe a'nahua attoch amach eñche allohuen acheñenesha'.

Atto Jesúsapa' rrallme'chatnenan pueyochresha' attoch chochmach yerpueret ñeñt' yoten te' Santa Cena

(Mt. 26.17-29; Mr. 14.12-25; Jn. 13.21-30; 1Co. 11.23-26)

⁷ Allempoña chapa'muen ñeñt' yetñatsro allempoch rrrerreterr pan ñeñt' ama anareteyaye chase' allempoch muetserreterr ñaña carrnero; ñeñt'pa' pascuapo. ⁸ Chapa'muen ñeñt' yeterpa' Jesúsñapa' atet ota'muenan pueyochresha' epsheña Pedro ñaña Juan:

—Sa te'pa' o'ch ahues allcha' sa'potos rreñets ñeñt'cha' yerra' pascuapo.

⁹ Ñetñapa' atet ochet:

—¿Erra'tña pocollro pemneñña allcha' ya'pota'ña rreñets?

¹⁰ Ñaña'pa' atet oterraneterr:

—Te'pa' o'ch ahua'muenes anetso allcha' sepocte' puesheñarr yacma ñeñt' anmam'pene' oñ porrto. Ñeñt'ña acheñerpa' o'ch socta'ner; allcha' be'tosuerr pocollopa' allcha'ña sebe'tosos samña. ¹¹ Allñapa' atet'cha' sotos ñeñt' apacllatesha': "Yemaestrorpa' atet' otene' atet'cha' yotosep: '¿Erro'tsena'tña pecuarto allcha' nerrallme'chos pascuapo epan neyochresha'?" " ¹² Ñeñt' apacllatesha'pa' gatapascha' eno po'cuarto ñeñt' atarr a'yohuen e'ñe cohuen a'paret. Allcha'ña sañño'tosña ñeñt'cha' yerra' pascuapo.

¹³ Allempo atet' otuanet Jesúsapa' pueyochresha'ñapa' atet'cho' pet, cha ahuanmatset. E'ñe atet' otapanet, ñetñapa' e'ñe'cho' atet' entoset. Allcha' aña'ñosñañetña rreñets allcha' rrallme'chenet ñeñte pascuapo.

¹⁴ O'ña chap allempoch rrallme'chet. Jesúsñapa' allña anorros epuet allohuen pueyochresha'. ¹⁵ Allñapa' atet' otosan pueyochresha':

—Napa' atarr cohuen nenteñ o'ch yerrallme'chen parro añ pascuapo tayepa'tñapa' ama chena' allempoch muetsataterret. ¹⁶ Tarro'mar napa' o'ch notas, napa' po'pocheño amach alla nerrallme'cherre'te pascuapo. Esemphuañencha' etsoterra ñeñt' po'ño'ch toma'ntenaya pascuapo e'ñech allempocma amicha'taretetuerra Yompor. Allempoñapa' e'ñech parro'cma o'ch alla yocsherrerr.

¹⁷ Jesúsña allempopa' chetan orramets, parasyoso'tan pompor, allempoñapa' atet' otanet:

—Añ orrapo'pa' o'ch saga'p'pa' o'ch sepatanna'ta sa allohuenes. ¹⁸ Te'pa' o'ch notas, tayoteñ napa' amach alla norrerre'te añ orrapo' ñeñt' narmetsos tarremphuach allempoch ello norrererr esempohuañencha' amicha'taretetuerra Yompor.

¹⁹ Allempoñapa' cheterranerr ñaña pan, parasyoso'terranerr pompor. Chetan panpa' shota'ch. Shotatuepa' apa'yesan pueyochresha' ñeñt'pa' atet' otanet:

—Añpa' ñeñt'cha' nechets sepen ñeñt'cha' e'ñe nepom attoch e'ñe nerroma socop. Ñerra'm esempoch serren añ pan e'ñech seyerpueño'fen na o'ch serreñ.

²⁰ Allempoña rrohuet o' chetan ñaña orramets, ñeñt'pa'cho'ña atet' oterraneterr Jesús:

—Añpa'cho'ña ñeñt'cha' nerras sepen ñeñt'cha' ashatarettatsa socop. Ñeñt'pa' alloch na'pochtatonas e'ñe cohuen etserra Nomporecho.

²¹ Te'pa' o'ch seño'ch ñaña ñeñt'cha' nepomuerre'pa' e'ñeca'ye parro yerrallme'chen.

²² Po'ño'chca'ye te'pa' allo'na sen etsotnomtsa ñeñt' atet' onañchare't nocop, na Ñeñten

Acheñetosets, attotcha' muetsaterrnet. Tarraña nocoppa' e'ñe pocte'; añña po'ñoch acheñer ñeñtcha' nepomuerre' ñocoppa' atarr llequëñets.

²³ Allempoña atet otua Jesús, pueyochresha'ñapa' allenta otanna'tyeset e'ñe ñañeñeta: —Ta'm, eseshaycha'ca'ye pomuerre'ña Ya'yochreshater.

Atto pommo'cheñoñtetpa' otanna'tyenet erra'tsenoteyte'ña ñeñtey atarr asherben enten allohuen acheñenesha'

²⁴ Allempoña pueyochresha' e'ñe pommo'cheñoñtetpa' atet otanna'tyenet e'ñe ñagattseta:

—Erra'tsenoteyte'ña ñeñtey atarr asherben enten allohuen acheñenesha' ñato' na, ñato' pa.

²⁵ Allempoña Jesús pa' atet otanet:

—Sapa' señoñte' ñeñt atet pena po'poñ acheñenesha' ñeñt ama judioneshayaye. Ñet ñeñt pa'mcha'tareter penet e'ñech pa'mcha'nochteñocmañen pomnaren pa'yenan allohuen pueyochreshachno. Tarraña ama't atet penetañ pommo'cheñoñtetpa' añach atarr muenen allohuen acheñenesha'pa' e'ñech mecha'na'tuenanet ñaña ñetpa' mueneñet acheñenesha'pa' o'ch entenanet, atarro' sherba'yenanet. ²⁶ Sapa' arepa'chña atteye' sepanna'tatsto e'ñe sommo'cheñoñ. Ñerra'm erra'tsenotes ñeñtes atarr añcha'taretoyen entetsa, ñeñtes acheñespa' socoppa' añ poctetsa o'ch atet senterra ñerra'm ama es-oshe'mayayso atet ñerra'm ñeñt atarr hupuesha'. Ñaña ñerra'm erra'tsenotes ñeñtes muenene' o'ch atarr asherben entenset, ñeñtesña acheñespa' añ poctetsa o'ch atet senterra ñerra'm ama esoyayso, allochñapa' attoch e'ñe cohuen setorrena po'potantañecop. ²⁷ Ñehua, yeñoñteñ acheñenesha' arr patsro añca'ye atarr añcha'na'tpo' entenet ñeñt e'ñe cohueno anorrcha'tyets all rrallme'chenet, amaña añeye'ña añcha'na'tpoye' enteneto ñeñt puesherbeñoñ epatyene' rreñets ñeñt anorrchets ñeñt rrallme'chets. Tarraña napa' o'ch notas: Ñeñtecopca'yeña nohuapaña sesho attoch nema'yochrena torraya ñeñtcha' po'ñoch atarr sherberrets socop.

²⁸ 'Tarraña sañapa' ñeñtes atarr nellcapretenaya ñeñt atarr llequëñets nenten na. ²⁹ Ñeño'mañña te'pa' o'ch nena'nerres sa ñeñtescha'ña napuerr attoch sa'mcha'tarettapreterrna e'ñe atet pena Nompur o' na'n naña ñeñtencha' añcha'tarettapreterraya. ³⁰ Allcha' sanorrcha'tyesuerr e'ñe sa seconaño allcha' e'ñe sa'mcha'taretetyesuerra. E'ñe puesheña'ttsos añecopcha'ña sa'mcha'taretetyesuerra ñeñt mereñtsorecop israelena'tar ñeñt charra' mereñtsor ñeñt puechetsa epsheña. Attoña allpa' o'ch na'mcha'taretterra e'ñe necohuenño e'ñech cohuen yeparrocmatuerr; allñapa' e'ñech yocsheñeshocmañen yerrallme'chuerr e'ñe parro.

Atto Jesús pa' eñotatan Pedro ñapa' chocmach a'nasocha (Mt. 26.31-35; Mr. 14.27-31; Jn. 13.36-38)

³¹ 'Simón, po'ñoch te'pa' o'ch notañ, oneñtetpa' atarrca'ye enamuenen na socop, añ muenen o'ch topatenes o'ch atet patenes ñeñt atet cotape'chen ña ñeñt ama pocteye' enteno Yompor. O'ch atarr huomenc topatenes atet ñerra'm ñeñt shoshnene' po'trigo e'ñech huomenc pa'shmuenan puehoshnat. ³² Tarraña Simón o'ch notañ, te'pa' napa' o' nema'yochua pocop attoch amach e'ñe poctacma a'huañañpñsonapeña pa atto atarr peyemtenna. Tarraña ama'tcha' huaponapañ topateñets ñeñt atarr huomenc, paña allempopa' o'ch alla poctape'cherr cohuen Yomporecop. Allempoñapa' o'ch alla e'ñe cohuen peyenpuer pemo'nasheñnesha' attoch ñetpa'cho'ña o'ch alla huomenc perret pueyocher Yomporecop.

³³ Pedroña pa' atet och:

—Partseshacha' napa' amach na'ypo'ñape, čhocmach noctapř ama't errach anmapet; ñerra'm cárceloch anmapet allcha' mueročhtatapet, napa'čo'ña nemnen allcha' yemue-ročhta parro. Ama'tcha' čho muetsapetpa' yerromuepa' parro.

³⁴ Jesúsñapa' atet otererr:

—Pedro, o'ch notapř, e'ñech añe tsaprocma amach eñena' atollop, pãñapa' o'ch ma'poch pã'nasotenna. Ñeñtpa' atetcha' p̄oten, napa' año' pentarno.

Atto čhappmoch allempoch atarr atserrp̄aretterra Jesús ñeñt̄ atarr topateñets enten

³⁵ Elloña Jesúsapa' yerpaterrana pueyochresha'; ñeñtpa' atet otterranelerr:

—Ñehua, ahuaña allempo nemñas atet notapas amach es sanmatsto ama't coñe'ta, ama't sebolsa, ama't sečllayor ama't ñaña sesapat. Ñehua allempopa' ¿eñalle'tña ñeñt̄ sepalltena?

Ñetñapa' atet ochet:

—Allempopa' amaca'ye čho es yepallto ama't e'ñe mamesha.

³⁶ Jesúsñapa' alla otterranelerr:

—Tarraña te'pa' o'ch notas po'poñ, ñerra'm eseshaste' ñeñtes echene' sečllayor te'pa' o'chca'ye sanem all sechopeñe'chyen ama't ñaña sebolsa. Ñaña ñerra'm ama secheno socchellpa' pocte'ca'ye o'ch sepom seshtam alloch seyora socchell. ³⁷ Tarro'mar te'pa' o'ch alla noterranelerr: Te'pa' o'chca'ye e'ñe etsoterra ñeñt̄ atet anuaret Yompor po'ñoñ nocop. Allca'yeña oten napa' erroťuanencha' perrnet atet ñerra'mrrate' napa' ñeñten amtsañen. Te'pa' ñeñt̄ca'ye o' etsotmocha ñeñt̄ e'ñe atet anaret nocop.

³⁸ Allempoña ñetñapa' atet otereterr:

—Partseshacha' yapa' yechenca'yeña epmeta cochell.

Jesúsñapa' atet otanet:

—Ñeñtachca'ye.

Atto Jesúsapa' ma'yochuena all oteñet Getsemaní

(Mt. 26.36-46; Mr. 14.32-42)

³⁹ Allempoñapa' o' rrallme'chuanenet ñeñte pascuapo, Jesúsñapa' čha'nerrpa' ahuenerr Olivořno; ñapa' attecma pena čhocmach sen all. Pueyochresha'ñapa' coťa'huaneñet.

⁴⁰ Allempoña čhenet allpa' Jesúsñapa' atet otuenan pueyochresha':

—Te'pa' arrcha' sema'yochuena attoch e'ñe sa'huanta' ñeñt̄cha' sehuapoya te' ñeñt̄cha' atarr huomenc setpate'.

⁴¹ Allempoña ñapa' ahuo' mame' a'yenteye'. Ñañaapa' all concorpa'huena o' ma'yochuena.

⁴² Puema'yochenoť atet otuen:

—Apa, ñerra'm p̄ach pocte' ente' arepa'chña pemnatatsche o'ch čhapona ñeñt̄ atarr amuročhtatañ nenten.* Tarraña ñerra'm p̄ach muenats añcha'ña atet peřaton ñeñt̄ pemnen pã, amachña añeyaye ñeñt̄ nemnen na.

⁴³ Allempoñapa' huapoña mellañoťeñ Yompor pue'ntañoť ñeñt̄ña ahuamencat p̄ose' attoch ahuantan puellquëña. ⁴⁴ Ñapa' atarr nanac puellquëñesha' ma'yochena; puema'yochenoťpa' atarr nanac ñorra'ten. Po'ñorra'ñaapa' čha huatena atet ñerra'mrrate' errasats tsopsa'tets patso.

⁴⁵ Allempoña ma'yochuapa' tanterra, ahuer pueyochreshesho. All entuerranet ñetñapa' čha atarr manrrenet ama't e'ñe puellquëñeshet. ⁴⁶ Ñañaapa' atet otuerranet:

—Sapa' eso'mare'tña čha atarr semanrra'ten. Te'pa' o'ch setanterra'pa' čhoña sema'yochrra'ta attoch sa'huanta' ñeñt̄cha' sehuapoya topateñets atarr huomenc.

* **22:42** Ñeñt̄ amuročhtatañ ñeñt̄pa' po'ñoč arr atma'ntatařet ñerra'mrrate' ñeñt̄ atarr pesherr yorren orranťso.

*Allempo rromoset Jesús**(Mt. 26.47-56; Mr. 14.43-50; Jn. 18.2-11)*

⁴⁷ All atet otyenan pueyochresha'pa' allempoñapa' hua'cha'toña shonte' acheñenesha'. Ñeñt' hua'cha'tatahuet ñeñt'pa' ñeñt' sochetsa Judas ñeñt'ara ñeñt' pueyochresha' peneñ ñeñt' çharrasheña ñeñt' a'pchenahuet epsheña. Ñaña'pa' çha ponmosaya Jesús, puetso'tstsapa'teño'f huom'cha'tos. ⁴⁸ Jesúsña'pa' atet ota'p:

—E'ñe't'cha' petso'tstsapa'teño'fen pepomuerrren na Ñeñt'fen Acheñetosets.

⁴⁹ Añña ñeñt' yemtenaya Jesús allempo atet eñchet o'ch rromoset Jesús, ñet'ña'pa' atet ochet:

—Ayochreshate ¿ama'te' pocto o'ch yemoñsa'pa yocchello?

⁵⁰ Puesheñarrña pueyochresha' allenta chetan po'cchell ahuo'ch çhonto'tapan cornesha' pa'cheñer puetepa'tcha' tsorroñ po'cohuenrot. Ñeñt'pa' año pa'cheñer ñeñt' pa'm'cha'tareter pen allohuen judionesha' po'cornaneshar. ⁵¹ Jesúsña' allempo entan pueyochresha' atet ðapa' ñaña'pa' otanet:

—Ñeñt'epa'ta, amach atet se'patsto.

Allempoña ñeñt' tsorrqueta'tetpa' alla a'plerrñañ puet o' alla orrater o' e'ñe correrra. ⁵² Ñeñt' hua'cha'toya ñeñt'cha' rremose' Jesús'pa' ñeñt'pa' añca'ye ñeñt' pa'm'cha'tareternesha' ða'yen allohuen judionesha' po'cornaneshar, ñaña' ñeñt' judionesha' po'guardianeshar ñeñt' cohuan'pene' Parets pa'paqu'ell ñaña' ñeñt' pompornesha' pen allohuen judionesha'. Allempo hua'cha'toñetpa' Jesúsña'pa' atet otapanet:

—Eso'mare't sehua'cha'tennanaña e'ñe occhelletareroches ñaña' etsach-peretareroches attoch serrma'n. Napa' ¿e'ñe't atet sentenen ñerra'm'rate' eñeten?

⁵³ Napa' allponmatuanen allo'tsenen Parets pa'paclo e'ñe parro sesho, eso'mare'tña amaña allempocmaye'ña serrma'ne'te. Tarro'mar te' o' çhap allempo ñeñt' poctetsa socop ñeñto'mar te' o' çhap allempoch oneñt'pa' o'ch orrtatennas po'huamenc, ñeñt'pa' e'ñe atet ñerra'm' checmete'.

*Atto Pedropa' a'nasotana Jesús**(Mt. 26.57-58, 69-75; Mr. 14.53-54, 66-72; Jn. 18.12-18, 25-27)*

⁵⁴ Allempoñapa' rremoset Jesús'pa' arr aneret añcha'taret pa'paclo ñeñt' pa'm'cha'tareter pen allohuen judionesha' po'cornaneshar. Pedroñapa' ñapa'cho'ña cote' tarraña ñapa' chenta' en a'yo't. ⁵⁵ Petotña rroçh pampopa' all a'torenet tso' all anorrçha'tyen acheñenesha' ñeñt' shotetsa. Pedroñapa' all anorros ñaña' all shotosa. ⁵⁶ Allempoña huapa coyanesha' ñeñt' añcha'taret pueñañra. Entosan Pedro all shotenapa' alla cohuos, atet otos:

—Añpa'cho'ña encanesharpa' ñeñt'ramtso yemtaye'tña Jesús.

⁵⁷ Tarraña Pedroña çha a'nasochapa' atet otanña coyanesha':

—Napa' amaca'ye nentare.

⁵⁸ E'ñe o'chtapa' huapa ñaña' po'psheñeñ entuererrpa' ñapa'cho'ña atet otuererr:

—Papa'cho'ña parroca'ye e'ñe peyemtena.

Pedroñapa' atet otan ñeñt' yacmar:

—Napa' amarramche' erra neyemtenoña na epan ña.

⁵⁹ O' tama o'çtterrerrpa' o' alla huerrerr po'psheñeñ, ñapa'cho'ña atet otuererr:

—Po'ñoçhca'ye añmapa' ñeñt'ca'ye e'ñe yemtenaya tarro'mar ñapa'cho'ña galileo'marnesha'ca'ye atet ñerra'm' Jesús.

⁶⁰ Pedroñapa' alla otterrannerr ñeñt' yacmar:

—Amarramche' neñoteñeña este'ña atarr ðotenen.

E'ñe allempo atet eñorena Pedro, e'ñepa'tcha' allempocma eñeña atollop.

⁶¹ Allempoña Partsessa' Jesús'pa' cohua' allente'tsen Pedro. Pedroñapa' allenta yerpuerrana atet otneñ Partsessa': “Amach eñena' atollop ñeñte tsaprocma ðaña'pa'

o'ch ma'poch pa' nasotenna." ⁶² Allempoña Pedropa' ahuo' a'yo all e'ñe puellquëñsha' yahuosa huomenc.

Atto atarr achmare'teñet Jesús

(Mt. 26.67-68; Mr. 14.65)

⁶³ All yottam̄psateñet Jesús am̄cha'tareṭ pa'paclo añña solltarnesha' ñeñṭ cohuam̄psachet ñetñapa' atarr achmare'teñet Jesús all cohuam̄peñet. Atarr čhota'teñet.

⁶⁴ Huancacalle'cheñet, pachmare'teñoṭetpa' atet oteñet:

—Ñehua, te'ña eñoratenperrepa' Parets allochñapa' attoch p̄otey esesha'te'ña pečhota'tyene'.

⁶⁵ Elloña pachmare'teñoṭetpa' pa'namen esocmañen otyeñet, sochatse'tyeñet.

Allempo čhapata'mueñet Jesús all apčha'muena allohuen judionesha' pa'm̄cha'tareṭernesha' ñeñṭ a'pocatyene' ñoñets

(Mt. 26.59-66; Mr. 14.55-64; Jn. 18.19-24)

⁶⁶ Tsapañña allempo puetarenpa' apčha'muena allohuen ñeñṭ pompornesha' pen judionesha' epuet ñaña ñeñṭ pa'm̄cha'tareṭernesha' pen allohuen judionesha' po'cornaneshar epuet ñaña ñeñṭ atarr etsotayenayeñ ñoñets ñeñṭ atet anareṭ. All apčha'muena allohuen judionesha' pa'm̄cha'tareṭernesha' ñeñṭ a'pocatyene' ñoñets, all anma'mueñetña Jesús. Allñapa' a'p̄to'tare'tapet, atet otapet:

⁶⁷ —Yapa' te'pa' yemneñ o'ch p̄otosey ñerra'm po'ñočhte' pa' ñeñṭep̄ Cristotets.

Jesúsñapa' atet otosanet:

—Ama't notatstas na po'ñočh ñeñṭen Cristotets sañapa' amachca'ye p̄octeye' sentno attoch same'ña'na. ⁶⁸ Ñaña napa'čo'ña ama't o'ch es na'p̄to'tas saña sañapa' amachca'ye sanapnoña ñaña. Tarro'mar sapa' amachca'ye semno sa'rroyerren.

⁶⁹ Tarraña te'pa' ama'tcha' atet sepa'noñ te'ñapa' o' e'ñe čhap allempoch o'ch alla nanorruerr Nomp̄or po'cohuenroṭ ñeñṭ atarr ahua mencattetsa, ama't na Ñeñṭen Acheñetosets.

⁷⁰ Allempoña allohuenet atet oteñet:

—Ñeñṭep̄ñapa' ¿pa'trraña Puechemer penña Yompor?

Jesúsñapa' atet oterraneterr:

—E'ñeca'ye po'ñočh ñeñṭ atet sotenen sa.

⁷¹ Allempoña ñetpa' atet otanna'tyeset:

—Te' yapa' ama yemneñe po'potantañ ñeñṭcha' a'metare'tam̄p̄sose' tarro'mar te' yapa' allohueney e'ñe ye'mhuen ñeñṭ atet otena añ acheñer, ñapa' Yomporo' Puechemer. Ñapa' čhaca'ye atarr achmare'tenan Yompor.

23

Allempo čhapata'mueñet Jesús allo'tsen am̄cha'tareṭ Pilato

(Mt. 27.1-2, 11-14; Mr. 15.1-5; Jn. 18.28-38)

¹ Allempoña allohuenet tantrra'tuet, e'ñe parrocm̄a anmet Jesús allo'tsen am̄cha'tareṭ Pilato (ñeñṭ nen gobierno Romoṭ ñeñṭ am̄cha'tareṭtetsa allo'marneshacop). ² Allñapa' atarr otteñe'choset, toma'tam̄pesyesoset, ñeñṭpa' atet otyesoset:

—Ya añ acheñer čhocma yenteñ yečhatyenan yamo'tseshačhno judionesha' ñeñṭ ama't mameshapa' ama cohuenayaye, ñaña atet oteney año'ch yetsa'tatsto impuesto ñeñṭ romo'marneshacop ñeñṭ nen am̄cha'tareṭ Romoṭ. Ama't ñapa' atet otena ñapa' ño' Cristotets ño' atarr am̄cha'tareṭtetsa arr.

³ Allempoña am̄cha'tareṭ Pilatopa' a'p̄to'tapan Jesús:

—Papa' ¿pa'tña judionesha' pa'm̄cha'tareṭereṭ?

Jesúsñapa' atet och:

—Atetca'ye atet p̄otenen.

⁴ Añña ñeñt pa'mcha'tareternesha' pen allohuen judionesha' po'cornaneshar ñaña acheñenesha'chno, ñetña'pa' atet otanet Pilato:

—Ñehua, napa' amaca'yeña nentoñeña ñeñt atto ama pocteye' es penoña añ acheñer.

⁵ Judionesha'ña pa'mcha'tareternesha'pa' alla otereterr Pilato:

—Tarraña yañapa' chocmaña yenteñ ñeñt atet yechatyenan acheñenesha' attoch atpare'tatenanet gobierno. E'ñe Galileoteñ atet pena, ama't te'pa' o' chap ñaña arr Judeo e'ñe attecma o' yechatuerrerr ñeñt ama cohuenaye' yenteno ya.

Allempo chapata'mueñet Jesús allo'tsen ñaña añcha'taret Herodes

⁶ Atto' e'mñotenan judionesha' atet otyenet e'ñe Galileoteñ yechaten, allempoña Pilatopa' atet a'pto'tanet:

—Jesúspa' ñapa' ¿galileo'marnesha'tña?

⁷ Allempoña eñotachet ñapa' po'ño'chca'ye galileo'marnesha' allempoña Pilatopa' atet cotape'ch ñeñtpa' Herodesocpaca'ye tarro'mar ñapa' ñeñt añcha'tarettetsa galileo'marneshacop. Ñeñto'marña ñapa' mueñan Jesús Herodesesho tarro'mar Herodespa' allempo chap Jerusaléño all emo'ten. ⁸ Herodesñapa' e'ñe pocsheñesha' agapanen Jesús tarro'mar ahuatoteñ atarr mueneñ o'ch eñch tarro'mar ñapa' atet e'mare'tenan Jesús ñeñt atet pa'yena. Ñapa' añecopña atarr mueneñ o'ch orrtatoñ ñaña ñeñt atet pa'yena orrtatyese' ñeñt ama puentareto. ⁹ Atarr es a'pto'tare'tapaneñña Jesús tarraña ñapa' ama anapanoña Herodes ama't e'ñe parrocha. ¹⁰ All tomcha'toset ñaña allohuen añcha'taretnesha' ñeñt pa'mcha'tareternesha' pen allohuen judionesha' po'cornaneshar ñaña allo'tsen ñeñt atarr etsotayenayeñ ñoñets, ñetña allpa' otteñe'chuereterr Jesús all Herodesesho, pa'namen otyesuerreterr. ¹¹ Allempo Herodes ñaña allohuen po'solltarneshar ñetpa'cho'ña puerrapsoñet ñamet. Achmāre'chet all che'tatseteñet. Pueche'tatseteño'tet chorrachet añcha'taret pa'shtam ñeñt atarr cohuen. Allempoña Herodespa' o' alla mueño'ter Pilatesho. ¹² Ñeñto'marña Herodes epuet Pilatopa' e'ñe allempocma amo'tstannerret tarro'mar ahuañmo'chapa' cha e'moñe'tannenet.

Atto añcha'taret Pilatopa' otanet ama'tpa' chosa muetse' Jesús

(Mt. 27.15-26; Mr. 15.6-15; Jn. 18.39-19.16)

¹³ Allempoña Pilatopa' alla ap'chaterran ora allohuen judionesha' pa'mcha'tareternesha' ñeñt po'cornaneshar pa'mcha'tareternesha' ñaña po'potantañ judionesha' pa'mcha'tareternesha' ama't ñaña allohuen acheñenesha'. ¹⁴ Pilatoñapa' alla otapuerreterr:

—Añ acheñer ñeñt sehuapatennan ñeñt soten sa ahuo' yechatyesan acheñenesha' ñeñt ama cohuenaye' senteno sa, te'ña napa' o' na'pto'tare'tue ama't allempo allo'tsa'yenes tarraña nañapa' ama't parrochapa' ama nentoñeña ñeñt atet sotyen atto' pena ñeñt ama cohuenayaye. ¹⁵ Ama't ñaña Herodespa' ama entoñeña ñeñt ama pocteye' ye'chcateno, ñeñto'marña o' alla mueñer nesho. Po'ño'chpa' amaca'ye eñalleña ñeñt atet pen ñeñt ama cohuenaye' yenteno allohueney atto'tcha' yemtsatach. ¹⁶ Ñeñto'marña na te'pa' attachca'ye necoñchach mame'pa' o'ch alla na'rroyer.

¹⁷⁻¹⁹ Tarraña allohuen judionesha' puerrannarteño'tet atet ochet Pilato:

—Pemtsatachñaca'ye, añcha'ña pa'rroyerrnay Barrabás.

Ñehua, ñeñt Barrabás ahuañmo'cho'teñ yottampeñet tarro'mar ña ye'chatene' acheñenesha' atpare'chetepa' añcha'taret ñeñt nen gobierno' Romo't. E'ñe patpare'teño't o' muetsan acheñ. Ñehua, ñetpa' atet ye'chenet. Pate'tets pascuapo ñeñt añcha'taret ñeñt nen gobierno' Romo'tpa' o'ch a'rroyerrñañet judionesha' puesheñarr pamo'ts ñeñt ayottam'psarettetsa ñerra'm erra'tsen muenenet ñet, ñeñtpa' añecop a'rroyenanet attoch coshatenan judionesha'. ²⁰ Ñeñto'marña Pilatopa' atarr mueneñeñ o'ch a'rroyerranet

Jesús, ñeñto'marña alla a'p̄to'terranerr allohuen acheñenesha'. ²¹ Tarraña ñetñapa' ama't mameshapa' amaña pocteye' enteñeto. Elloña ñeñtapa' rrannartet allohuenet, atet oterete't:

—¡Pecorso'tam̄psach! ¡Pecorso'tam̄psachñaca'ye!

²² Poma'pocheño Pilatopa' alla oterraneterr:

—¿Eso'mare'tña semneña o'ch necorso'tam̄psach? Napa' amaca'ye nenteññañeña ñeñt atto ama pocteye' es peno attoch yemtsatach. Ñeñto'marña napa' attachca'ye, necoñchach mame' allempopa' o'ch alla na'rroyer.

²³ Tarraña ñetpa' ama cachpueñeto otare'tet. Elloña ñetpa' e'ñe puerrannarteño'tet atarr enamueñet attoch corso'tam̄psach. ²⁴ Ñeñto'marña Pilatopa' ame'ñachet. Attoña ñapa' atet eñora:

—Te'pa' o'ch atet neponas ñeñt atet atarr semnen sa. ²⁵ Ñeñto'mar allempo a'rroyanet Barrabás ñeñt enamueñet ama't ñeñt patparño't yottam̄peñet ñaña puentseño't acheñ. Tarraña Jesúsñapa' o' apanet attoch muetset ñeñt atarr muenenet ñet.

Atto corso'tam̄psoset Jesús

(Mt. 27.32-44; Mr. 15.21-32; Jn. 19.17-27)

²⁶ Allempo anmet Jesús a'yo allcha' corso'tam̄psoset. Allña oñenetpa' allñapa' poctet puesheñarr yacma ñeñt cireneo'marnesha' ñeñtapa' añ pa'so'cheñ Simón ñeñt errte' huerrtsa a'yot. Ñeñña rremapetpa' o' chechatnomet Jesús po'corsoch ñeñña anmue'ña chenta'.

²⁷ Allñapa' cota'huanem̄ shonte' acheñenesha', shonte' coyanesha'chno ñeñt atarr ya'na'tnene' Jesús chenta', atarr gogaretyesnenet puellquëño'tet. ²⁸ Tarraña Jesúsapa' allenta cohua'nmanet, atet otnomanet:

—Nochanesha ñeñtes jerusaléno'marneshas, amach atarr seya'na'tatsteno na. E'ñe socpa atarr seyahuenta sacñetare'tolleshohuen. ²⁹ Tarro'mar esempopa' chocmach huaponasa ñeñtcha' atarr sellcaterre'. Allempoña coyanesha' ñeñt ama achoyore'tñepa' ñocpuetñapa' e'ñech cohuen entare'tterret allempo tarro'mar ñetpa' ama eñallete puechoyoreshet ñeñtcha' atarr muero'chtterrtsa. Ñeñto'marña allempopa' otyerrcha' allohuen acheñenesha': "O' atarr cosheñtso'tsenterra mue'cho'pnanesha', ama't allohuen ñeñt ama achoyore'tñe, ama't allohuen ñeñt ama es moma'yeneto."

³⁰ Tarro'mar allempo puemuero'chteño'tet e'ñe puellquëño'tetpa' atarrcha' ya'ñameterret. Pueya'ñameteño'tetpa' e'ñech pocte' entyerret ñegata'mperretepa'to' attoch pampueranet e'ñe poctacma. Allochñapa' o'huañcha' allo'na atarr nanac muero'chtenet.

³¹ Tarro'mar te'pa' atto muero'chtatennet na ama't napa' e'ñe cohuen es norrtatyeneñ, e'ñe atteneñ ñerra'm tsach e'ñe cohuen emmo'rate'. Ñeñto'mar te' napa' neñoteñ elloña atarrcha' amuero'chtatare'tterra ñeñt ama cohuenaye' es orrtateno; ñeñtñapa' e'ñe atet pena ñerra'm tsach rromuech. Arrpa' allohua atet otnomanet Jesús allempo aneñet allcha' corso'tam̄psoset.

³² All aneñet ñaña epsheña ñeñt amtsañ ñeñtcha' epuet corso'tam̄psoset.

³³ Allempoña chapachet all oteñet Poñetalle'pno, allña corso'tam̄psosetña epuet ñaña epsheña ñeñt amtsañ, puesheñarr nosñañet po'cohuenro't, po'psheñeñña' nosñañet pue'chco'tero't. ³⁴ E'ñe allempo corso'tam̄psosetpa' Jesúsñapa' atet ma'yocham̄psosana ñeñt e'moñe'tene', ñeñtapa' atet ot:

—Nomporcha' te'pa' pe'pretnanetepa'ch tarro'mar ñetpa' po'ño'chpa' ama eñoteneto ñeñt atet ye'chcatenet, ñeñt ama pocteyaye.

Allempoña solltarnesha'pa' yellsheñe'chatoñet pa'shtam po'suertot attoch orrta puesheña'tets ñeñtcha' yorayese' puema'tets. ³⁵ Acheñenesha'ñapa' atta cohuanrrorteñet all tom'chenet a'yenet. Pa'm'cha'tare'terneshet ñetñapa' atarr es otnare'teñet, atet otatse'tyeñet.

—Te'ña p̄apa' o' p̄a'queshp̄atyeyes po'potantañ, te'ñapa' p̄a'queshp̄aterra e'ñe p̄añeña ñerra'm po'ñoçhte' ñeñteḡ acren Yompor ñeñtcha' Cristotosets.

³⁶ Solltarnesha'pa'çho'ña atarr achm̄are'teñet, che'tatseteñet. Pueche'tatseteñoḡetpa' ponem̄yetpa' aposet vinos ñeñt atarr chella'se'. ³⁷ Pachm̄are'teñoḡetpa' atet otyeñet:

—Ñerra'm p̄a po'ñoçhte' ñeñteḡ pa'm̄cha'tareter pen judionesha', te'ñapa' p̄a'queshp̄aterra p̄añeña.

³⁸ Ñehua, poñot̄ all corsocho all noñet tsachtall aquellcareḡ ñeñtña quellecpa' atet oten: “Añpa' ñeñtca'ye judionesha' Pa'm̄cha'tareter.” Ñeñtña quellecpa' ñeñt anaret̄ ma'po'mar ñoñets—griegach, latinaçh ñaña hebreyach, e'ñe attecma oten.

³⁹ Puesheñarrña amtsañ ñeñt parro corso'tam̄peñet, ñapa'çho'ña achm̄are'ch. Potnare'teñoḡpa' atet oten:

—Ñerra'm po'ñoçhte' Cristoḡpa' p̄a'queshp̄aterra p̄añeña, yapa'çho'ña o'ch p̄a'queshp̄aterrey.

⁴⁰ Po'psheñeñ amtsañpa' che'ptare'ch. Pueche'ptare'teñoḡpa' atet och:

Papa' eso'mare'tña ama pencha'na'teñeña Yompor, ama't parro amueroçhtatareḡey.

⁴¹ Tarraña yocoppa' e'ñeca'ye pocte' yemueroçhtena tarro'mar ñeñt̄pa' añ tsa'tatenyet ñeñt allpon yeyeçhcatyen ñeñt ama cohuenayaye ama't e'ñe mamesha. Tarraña añ acheñer ñeñt parro mueroçhtatenyet ñapa' ama es yeçhcateno ama't mamesha ñeñt ama pocteyaye.

⁴² Allempoña ñapa' atet otan Jesús:

—Napa' peyerpa'huerrno'tach allcha' p̄a'm̄cha'taretetuerra.

⁴³ Jesúsñapa' atet och:

—Napa' po'ñoçca'ye notaḡ, e'ñe tayecma parro'tseneycha' cosheñtso.

Atto rroma Jesús all po'corsocho

(Mt. 27.45-56; Mr. 15.33-41; Jn. 19.28-30; Heb. 9.11-14)

⁴⁴⁻⁴⁵ Allempoña çhap pocto atsne'pa' o'huañ atsnom, o' e'ñe checmetua erraḡaren añe patsro. O'ña ellerrotnenmochapa' o' alla puetarerr. Allempoña ñeñt besom allo yottam̄peññañet Parets pa'paquell po'ponro ahuepa't rrrarra'nom e'ñe poctacma, o' e'ñe ellopa'tetsta. ⁴⁶ Allempoña Jesús̄pa' rrana. Puerranaroḡpa' atet ot:

—Nomporcha' te'pa' o' nepomuerra e'ñe ḡocop e'ñe necamquëñohuen.

E'ñe ñeñta otuapa' o' rroma.

⁴⁷ Solltar po'captaner ñeñt romo'marnesha' ñeñt corso'tam̄pse', allempo atet ent atet o' p̄a, ñaña'pa' allenta aye'choçhtatan Yomporpa' ñapa' atet ot:

—Añ yacmarpa' po'ñoçhuaca'ye e'ñe at̄ota o' yemtsatater, amaca'yeña eñalleña at̄och yemtsataterëñ.

⁴⁸ Ñaña allohuen acheñenesha' ñeñt allo'tsa'yen ñeñt ente' ñeñt atet o' p̄ach o' yoroçhtach, ñetñapa' puellquëñesha' na'yesnerret pot puesomapo ahuanerret.

⁴⁹ Allohuen ñeñt atarr yemtaye't Jesús ahuañoḡeñ ñaña allohuen coyaneshaçhno ñeñt co'ta'huanmue' Galileoḡ ahuañoḡeñ, ñetñapa' alla tom̄cha'tyenet a'yenet allot̄ at̄ta cohuanrrorteñet ñamet.

Atto pampuet Jesús

(Mt. 27.57-61; Mr. 15.42-47; Jn. 19.38-42)

⁵⁰ Eñall puesheñarr yacma ñeñtara judionesha' ñeñt e'ñe cohuen acheñ e'ñe pocte' es p̄a'yen, ñeñt̄pa' añ pa'so'cheñ José ñeñt arimateo'marnesha'. Ñapa'çho'ña puesheñarr ñeñt pa'm̄cha'tareter pen allohuen judionesha' ñeñt parrocm̄a çhocmach apçhenet epuet po'potantañ am̄cha'taretnesha' at̄och a'poctatenet ñeñt llequëna allohuen judionesha'. ⁵¹ Ñehua, ña ahuaña allempo apçhenet parro po'potantañ am̄cha'taretnesha' at̄to o'pateñet Jesús o'ch muetsatachet, ñaña'pa' ama't mameshapa' ama pocteye' eñche.

Tarro'mar ñapa' ñeñt atarr cohue' Yompor esempohuañencha' o'ch atarr ayochreshatterra. ⁵² Ñeñña Josépa' o' ahua' Pilatesho o'ch oteña' pocte'ch eñch ñach a'suatose' Jesús ñeñt rromuets corsocho. ⁵³ Pilatoñapa' e'ñe pocte' eñch, ñeñto'marña ñapa' a'suater corsocho' allempoñapa' e'patse'ch shetamtso ñeñt e'ñe cohuen, allempoñapa' anemñ allcha' pampueña'. All eñare' mapuetpon all ama apampare'ttena' po'poñ arromña'ñ, allca'yeña nenana'ña Jesús. ⁵⁴ Ñehua, allempo pampuet Jesús'pa' ñeñt'pa' añe yetro allempo chocma añño'tena judionesha' ñeñt tsapat'ecop allempoch ameserretter. Ñehua, allempo pampa'huet Jesús'pa' o' ellerren, ñeñto'mar judionesha'pa' o' mo'ttan ñeñt tsapat'ecop allempoch amesa'muenet e'ñe poctacma.

⁵⁵ Ñeñña coyaneshachno ñeñt atarr yemtenaya Jesús ñeñt co'ta'huanmue' ahuaño'teñ Galileo't, ñetñapa' co'ta'huanmet all pampueñeta' attoch eñchet allcha' neret Jesús. ⁵⁶ Allempoña ñet onacherret allo'tpa' o' cha'cherret pocollo, ñetñapa' allohuenetpa' yorayesuerret ñeñt atarr eñmosa'te'chno alloch a'yana'tereta' Jesús ora po'chtsohuen attoch e'ñe cohuen eñmosa'tatereta'. Ñeñt'pa' e'ñeca'ye atet ye'chenaña judionesha'. Ñetpa' alla añño'tuaneñetña eñmosa'te'chno tarro'mar tsapa'tpa' amach serreto puepampro tarro'mar tsapa'tcha' cha'pa'muen ñeñte yetro allempo chocma amesen judionesha' ñeñt atet anare'ttenet ñocpuet.

24

Atto tanterra Jesús

(Mt. 28.1-10; Mr. 16.1-8; Jn. 20.1-10)

¹ Allempo o' huañ yetñats allempo amesenet, allempo mo'tta'muena yetñats temenc coyaneshachnoñapa' e'ñe ahua'tecma ahuanma'muenet all pampueñet Jesús. Anma'mueññañet eñmosa'te'chno ñeñt o'patateñet alloch a'yana'toset. Allñapa' co'ta'nma'muenanet po'potantañ coyaneshachno. ² O'ña cha'cha'ta'muenet allpa' mapue'ña ñeñt allo mopam'pset Jesús ñeñt puepampuer p'achet ama atteraye' entoseto ñeñt atet p'am'pset po'poñ ellerro. Entoset mapue' o' a'rrote'tare'ttena a'yenet. ³ Allempoña ñetpa' esho'ttra'toset mapuetpono ñeñt puepampuer p'achet amaña esesha' entosayeña arromña'ñ all net. ⁴ Ñetñapa' cha' muene' yoruoset ama eñote'ñeto erro'tcha'ña p'oset. E'ñe allempo atet cotape'chyenet ahuepa'tcha' orrtapanet epsheña yacma alla tom'cha'toset e'ñe allo'tsa'yenet, atarr cohuen popuetyenet pa'shtamuet. ⁵ Ñetña pueyor'ño'tetpa' atta mo'crra'tyeset patso. Pom'cha'ño'tet ama eshcaye' cohua'pseto allenet ten. Ñeñña yacma epsheñapa' atet otosanet:

—Ñeñt ama arromña'feshayaye, eso'mare'tña se'name'teñña arr allecma nannena arromña'fenesha'. ⁶ Te' ñapa' amaca'ye allo'tsenarayaye arr, o'ca'ye tanterra. Ama't seyerpueñoña ñeñt atet otase't ama't ahuañmo'cho'teñ allempo Galileo'tsenmeñ. ⁷ Ñeñt'pa' atetca'ye otase't ñapa' ña Ñeñt Acheñetosets chocmach pomueret attoch erro'tuanen per po'poñ acheñ ñeñt atarr ochña'fenesha' attoch corso'tam'peret, tarraña poma'pamtañoñapa' chocmach tanterra.

⁸ Allempoña ñetpa'cho'ña allenta yerpueret atet otanete't ahuañmo'cho'teñ Jesús. ⁹ Allempoña coyaneshachnopa' onacherret puepampro't, cha'cherret pocollopa' serrpare'tatueret Jesús puellsensarnesha' ñeñt charrasheña ñeñt puesheñarraña o' puecherra ñaña po'potantañe'chno ñeñt pueyochresha' pen. Coyaneshachnoñapa' serrpare'tueret allohuen ñeñt atet enta'muenet Jesús puepampro. ¹⁰ Ñeñt serrpare'tatenaya' Jesús puellsensarnesha' ñeñt'pa' añ María Magdalena ñaña Juana ñaña po'psheñeñ María ñeñt Jacobo pachor ñaña po'poñe'chno coyaneshachno. ¹¹ Tarraña Jesús puellsensarnesha' allempo serrpare'tatosanet coyaneshachno ñeñt

atet entua'muenet, ñetñapa' ama't mameshapa' ama ame'ñyetoña coyaneshachno, cha otenapuetañ attate' otatse'tyen coyaneshachno.

¹² Tarraña Pedroñapa' allenta ta e'ñe matenacma. O'ña chap ñaña puepampropa' mo'cosa, cohuos o'pononet all net. Ñapa'cho'ña ama entose, shetamtsa entos allo epatse'chet alla o'shshe'ma'yena a'yenet. Ñapa'cho'ña ahuer pocollo ama eñoteñe ñato' erro'tsente'.

*Atto Jesúsapa' rremuerrana' epsheña pueyochresha' toño allempo senet Emaúso
(Mr. 16.12-13)*

¹³ Ñeñte yetrocma epsheña pueyochresha' ñetñapa' arr senet anetso ñeñt pa'so'cheñ Emaús. Ñehua, ñeñt pa'so'cheñ anets Emaúspa' Jerusaléñoñeña' allo'tsente' charra' puechena paterr kilómetro choycha' chapats anets Emaúso. ¹⁴ Ñetñapa' e'ñe pueserrparñesha' senet, añ serrpare'tyesnenet ñeñt allpon atet o' pohua. ¹⁵ All senet e'ñe pueserrpare'teñeshetpa' anapanna'tyesnenet Jesúsñapa' alla rremuerraneta'. Allempoñapa' chope'chnomuet e'ñe parro o' ahuanmuet anetsonet. ¹⁶ Tarraña ama't entapetañña Jesúsapa' ñetñapa' cha ottenet ñerra'mrrate' ama amnataretteneto attoch cheme'tapet, ama esesha' cheme'taye. ¹⁷ Jesúsñapa' atet otosan pueyochresha':

—¿Eso'tña seserrpare'tyesnen? ¿Eso'mare'tña cha atarr sellca'нена?

¹⁸ Puesheñarrña ñeñt sochetsa Cleofas, ñaña' och:

—¿Ama't peñoteñeña allohuen ñeñt Jerusaléño'tsen ahuañoñeñ o' e'ñe e'mare'tuet ñeñt atet o' metua all? Papa' ¿paptate'ña ñeñtep taya chapats all Jerusaléño ñeñtep ama eñotosaye ñeñt atet o' pohuerret Jerusaléño?

¹⁹ Ñaña' atet otnomanet:

—¿Eso'tña ñeñt atet o' pohuerretña all?

Ñetñapa' alla otnereterr:

—Añca'ye yeserrpare'tnen Jesús ñeñt nazareto'marnesha' ñeñt a'mtene' Yompor po'ñoñ ahuaña. Po'huamencoñ orrtatennay po'partsoña ñeñt ama't ahuaña yapa' ama yentare. Ñaña atet yechatyese't ñeñtpa' atarr cohuen. Ñeñtpa' e'ñe pocte' entapreteñ Yompor; acheñenesha'pa'cho'ña e'ñe pocte' enteñet. ²⁰ Tarraña ya'mcha'tareternesha' ñaña ñeñt pa'mcha'tareternesha' pen allohuen judionesha' po'cornaneshar, ñetñapa' o' pomueret Jesús atotca'yeña o' muetsatateret, ñeñto'marña o' corso'tamperet. ²¹ Tarraña yapa' ñeñtca'yeña atarr yemneneñ ñato' ñach ya'rroyatatosayeña allohueney ñeñtey israelena'tarey (atto añcha'nochtana'tenya romo'marnesha' ya ya'netsro). Tarraña te'ñapa' chaña o' muetseret. Te'pa' o'ca'ye ma'pamta'muen. ²²⁻²³ Ñaña te'ña coyaneshachnoña ñeñt parro yeyemtena, ñetñapa' ahuañecma ahuanma'muenet o'ch enta'mueñet puepampro ñetñapa' año' eseshaye' entosayeña puepampro all neretañ. Allempoña huacherret puepamproñ atet serrpare'tatuerryet, allña' año' orrtahuet mellañoñeñ ñeñto'ña otahuet Jesúsapa' o'ca'ye tanterra o' alla betterra. Ñeñto'marña yapa' ñeñtña atarr yeyore'tene'. ²⁴ Allempoña ñaña allponsheña ñeñt parro yeyemtena, ñetpa'cho'ña allenta ahuanmuet ñamet puepampro. E'ñe atet otuerrey coyaneshachno, ñetpa'cho'ña ama eseshaye' entosaye.

²⁵ Jesúsñapa' alla otnerraneterr:

—Sapa' ama es sechenoyoña seyoçhro, atarr se'charrtaten seyoçher attoch e'ñe same'ña'huaña ora ñeñt atet eñosyese't Cristocop allohuen ñeñt a'mta'yese't Yompor po'ñoñ ahuañoñeñ. ²⁶ Ama't señoteñeña ñeñtcha' Cristotatspa' atetca'ye anareña ñocop ñapa' atarrcha'ca'ye amueroçhtataretetanena choch rromats. Elloñapa' o'ch alla çherr esempo allempoçña e'ñe cohuen a'cohuentataretterra.

²⁷ Allempoña Jesúsapa' o' yerpatnerraneterr ora allohuen ñeñt atet anaret añecop ñeñtcha' Cristotats. E'ñe Moisés po'ñoñoñeñ yerpatnomanet ñaña po'potantañechno po'ñoñ ñeñt eñosyestse't Cristocop, ñeñtara ñeñt a'mta'yesaye't Yompopor po'ñoñ ahuat.

²⁸ Allempoñapa' chapmochet anetso all sechenet. Jesúsñapa' cha otetnena ñerra'm ñapa' amtoche'ch. ²⁹ Ñetña alla puepateñoñtetpa' atet ochet:

—Allachca'ye yechap arr parro o'ca'ye tsapuenmoch.

Allempoña Jesúsapa' be'tosos allcha' chapuet. ³⁰ Allempoña anorrcha'toset allcha' rrallme'choset. Jesúsñapa' chetosan pan, parasyoso'tamñpsosan pan, shota'tospa' apa'yesosanet. ³¹ Allempo atet p'osa, pueyochresha'ña epsheñapa' cha e'ñe cheme'toset añpa' ñeñtapa'tca'yeña Jesús. E'ñe allorocma ñetpa' o' amnataretterret attoch e'ñe cheme'teret. E'ñe cheme'terretpa' allepa'tcha' ma'natanñperranet. ³² Allempoña ñetpa' atet otanna'tyeset:

—Ñeñto'marepa'tca'yeña atarr nanac coshatosey ñorra' ama't cha yellquëna yeyochro allempo serrpare'tatnomuey toño all yerpatnomya Yompopor po'ñoñ ñeñt atet ana'yesaret e'ñe ñocop.

³³ Ñetña e'ñe allorocma tantrra'terretpa' o' alla ahuanerret Jerusaléño. Allñapa' o' cherret allo'tsa'yen po'potantañ puellsensarnesha' ñeñt o' charrasheña puechena puesheñarr. Allo'tsen ñaña po'potantañechno. ³⁴ Allña ñetpa' atet otueret po'potantañ:

—Po'ñoñchca'ye o' tanterraña Yepartseshar. Elloneñapa' orrterrana ñaña Simón.

³⁵ Allempoña ñetpa' serrpare'tueret ñeñt atet enteret toño ñaña all shota'tosan pan, attoña ñetpa' allña e'ñe cheme'tosetña Jesús.

*Atto Jesúsapa' orrterrana allohuen pueyochresha'
(Mt. 28.16-20; Mr. 16.14-18; Jn. 20.19-23)*

³⁶ Ñeñta atarr otatsetyenetpa' Jesúsñapa' chepa'tcha' tomhuets e'ñe all chorren allohuen pueyochresha'chno. Alla huomñcha'tuenanet, puehuomñcha'tueñoñtanetpa' atet otuenanet:

—Te'pa' chosaña e'ñe cosherrtsa seyochro.

³⁷ Tarraña ñetñapa' cha atarr yore'tuenanet, cha atarr mecha'trra'tet, cha otenapuetañ choyeshe'matste' orrterrannet. ³⁸ Jesúsñapa' atet otuenanet:

—Eso'mare'tña sañapa' chaña seyoren. Eso'mare'tña sañapa' chaña atarr se'charrtatenña seyocher. ³⁹ Te'pa' o'ch secuapuennan not ama't ñaña netac attoch e'ñe seño'tapuerren naca'ye. Sa'pñlapuennan nechets, secua'yesapuennan nechets allochñapa' o'ch e'ñe seño'tapuenen. Napa' ñeñten echtso'ten, choyeshe'matspa' amaca'yeña echtso'teyayeto ñaña amaca'ye anpateyaye atet o' sentapuenen napa' echtso'tenca'ye ñaña anpateñca'ye.

⁴⁰ Allempoñapa' gatuenanet pot ñaña pa'tac. ⁴¹ Ñetñapa' atta cohuanrrortapueñet. Ama't atarr coshapueñetañpa' amaña e'ñeye' ame'ñapueñeto ñato' po'ñoñhte' Jesús. Atta echarrtatenet pueyo'cher tarraña Jesúsñapa' atet oterraneterr:

—¿Arrpa' ama't secheno ama't coñe'ta rreñets?

⁴² Ñetñapa' aña apapueñet pasheparr cac achmare't ñaña pets pocoyemñ all nenan po'moñ. ⁴³ Ñeñta agaphuenpa' o' rrohueñ all chorrenet attoña ñetpa' entapueñet.

⁴⁴ Allempoñapa' atet oterraneterr:

—Ñeñt atet notase't allempo orameñ allo'tseney e'ñe parro, ora allohuen ñeñt atet anaret ahuatoteñ Yompopor po'ñoño nocop, ñeñtña te'pa' o' e'ñe etsotuerra—e'ñe Moisésoteñ po'ñoñ ñeñt atet anaret ama't ñaña ora allohuen ñeñt quellca'yesone't ñeñt a'mta'yesaye't Yompopor po'ñoñ, ama't ñaña ñeñt aquellcarettatse't libro Salmos, te'pa' ñeñtña o' e'ñe etsotuerra ñeñt atet ana'yesaret nocop ahuatoteñ.

⁴⁵ Allempoñapa' o' chapatanet pueyo'chreto allohuen ñoñtso'chno ñeñt aquellca'yesaret ñocop. ⁴⁶ Jesúsñapa' alla oterraneterr:

—Po'ñočhpa' allohuen ñoñets ñeñt' aquellca'yesareť atetca'ye oten ñeñt'cha' Cristo-tosetspa' čhocmach po'ñočh rromos, țarraña poma'pamtañoña'pa' o'ch alla tanterra. ⁴⁷ Attochña serrpare'teret Cristo e'ñe Jerusaléñoťeñ errařaren ora allemeñ allohuanen acheñenesesho'mar. Attotcha'ña acheñenesha'pa' o'ch cotape'cherret ello e'ñe cohuen Yomporecop allochña'pa' attochña o'ch e'ñe ařretna'huaretterret allohuenet po'chñaret.

⁴⁸ Jesúsña'pa' atet otterranneterr:

—Te'ña sapa' o'ch sa'poterrnan ora ñeñt' allpon atet sentyesneť ama't teme'ttsen. ⁴⁹ Ñaña sa te'pa' ellonet o'ch atet notnerres, po'ñočhca'ye napa' nemñohuerrnascha' Yompor Puecamquēñ entot' ñeñt'cha' e'ñe sechorra'yesaya e'ñe puesheña'ttsos ñeñt' atet oten Yompor ñeñt'cha' e'ñe apa'yerres. Tarraña saña'pa' allasach anetso Jerusaléño, esempohuach chorratasa Parets Puecamquēñ ñeñt'cha'ña ahuanencat seřa'yesose' ñeñt'cha' apuerres Yompor pue'ntañoť.

Allempo a'terr Jesús pue'ntaño

(Mr. 16.19-20)

⁵⁰ Allempoña Jesús err Jerusaléñoť, ahuanerran pueyochreshačhno a'yo anetso Betanio. Allña'pa' echantosan potpa' bensare'tamřpesyesosanet. ⁵¹ E'ñe puebensare'tamřpeñoťanetpa' allña'pa' a'tenoche' pue'ntaño o' sohuanenanña pueyochreshačhno. ⁵² Ñetña allempo atet entapueret Jesús ahuerri pue'ntaño'pa' pa'ye'chočhtateñesha' ma'yochnerretpa' ahuanerret Jerusaléño e'ñe pocsheñeshocmañenet. ⁵³ Ñetña allempo'pa' ellapeneteť Parets pa'paclo all atarr aye'chočhtateññañet Yompor. Ñeñt'pa' atetepa'ch Nompore. Allohua.

COHUEN ÑOÑETS ÑEÑT QUELLCA' SAN JUAN

Ñeñt Po'ñoñ pen Parets ñeñña acheñetosets ñeñtara ñeñt Cristoterrets

¹ Ahuatoteñ e'ñe ñanom pa'motroteñ Cristoñapa' eñalla epuet Pompore Parets. Ñaña' ñeñtara ñeñtcha' Po'ñoñ ña' Parets tarro'mar ñach eñotaterre' acheñenesha' atet oteñ Yompor Parets. Tarraña ñapa'cho'ña e'ñe atecma partsoten atet partsoten Pompore ñeñt atarr nanac Parets. ² Allempo errte' ayeçhcataretta pats, ñaña' e'ñe parro allo'tsen epuet Pompore Parets. ³ Ñeñto'marña allohuen esocmañen ñeñt eñall, ñapa' ña e'ñe yeçhcatue' ñeñt atet muenet epuet Pompore. Ñeñt allpon eñallpa' ama eñalle ñeñt ama yeçhcato ña, ama't esotolla, ñocma pueyeçhcatar. ⁴ Ñaña' añepa't ñeñt alloch e'ñe yocrrena. Ñeñña alloch e'ñe yocrrenapa' ñeñtcha' yeñotaterre' allohuen ñeñt cohuen enten Pompore Parets. Ñeñto'mar ñapa' atet pena ñerra'mrrate' puetare' tarro'mar ñapa' ñach a'puetarsañperre' allohuen yocpaña. ⁵ Ama't atet pena sosya'tsañeçhno añe patsro ñerra'mrrate' checmete', ñaña' e'ñe a'puetaresuos. Checmete'ña' ama't ahuatapa' amach erroteno't a'checmetsañperrano ñeñt puetarñatser ñeñt Yompor po'cohuenña.

⁶ Ama't allempo ama orrtena' Cristo ñeñtcha' puetarñatsotosets arr patsro, ñanempa' añ orrtatsa puešeñarr yacma ñeñtpa' añ pa'so'cheñ Juan; ñapa' Yompor llesense'. ⁷ Ñapa' añecop huapa ñach a'potose' attoch huapa Cristo arr patsro ñeñtcha' a'puetarsañperre' allohuen yocpaña. Attoña ña po'ñoñotpa' ame'ñatosana acheñenesha'. ⁸ Tarraña Juanpa' ama añeyaye ñeñtcha' puetarñatsotosets arr patsro; ñapa' añecpa huapa attoch a'potosan ñeñtcha' a'puetarsañpsañtosta. ⁹ Allempoña çhap añe patsro ñeñt puetarñatsotosets tarro'mar añ puetarñatser ñeñt e'ñe po'ñoçh ñeñtcha' a'puetarsañpsose' allohuen acheñenesha' pocpaña, ñeñtpa' alletsa, o'ch orrtosa añe patsro.

¹⁰ Ama't añ patspa' ño pueyeçhcatareñ, acheñenesha'ña arr patsropa' arepa'tcha' cohuenaye' agapapeto tarro'mar ama eseshaye' eñotapaye. ¹¹ Ama't arr çhapañ e'ñe ña pamo'tseshesho, pamo'tsesha'ña' arepa'tcha' cohuenaye' agapapeto. ¹² Tarraña puešeña'tets ñeñt e'ñe cohuen agapyesapue', ama't allohuen ñeñtcha' ame'ñerraya ña, ñetña' apuerranet llesens attoch e'ñe puechemer perranet Yompor Parets. ¹³ Ñeñt atto puechemer perrey Yompor ñeñtpa' ama atteyaye atet ye'ñalletena ya ñeñtey arromñatey. Tarro'mar ñeñt atto ye'ñalletena arr patsropa' ñeñtpa' atet anaretey ya ñeñtey arromñatey. Ñaña atto puechemer o' perrey Yompor, ñeñtpa' ama añoteyaye ñeñt atet cotape'chateney po'psheñeñ acheñ pocpaña. Yapa' añotña o' puechemer perrey Yompor atto o' muenaterrey e'ñe ña pocpaña.

¹⁴ Cristoña ñeñt Po'ñoñ pen Yompor o' acheñetos arr patsro, o' yeyçhañ e'ñe parro mame' añe patsro. Ñapa' atarr amuerañtosa. Ñaña atto yeçhatosey Yompor po'ñoñ ñeñña ñoñetspa' e'ñe po'ñoçh atet, ama shequēñtsoyaye ama't mamesha. Ñaña yapa' çhocma yentoñe't po'cohuenña. Ñeñña po'cohuenña' atet ñerra'm Pompore ñeñt po'parror pene' ña. ¹⁵ Allempoña Juan puerranarotpa' a'potan Cristo, ñeñtpa' atet eñora ñocop:

—Añmapa' ñeñtca'yeña notase't ahuaña, ñeñtcha' huapatsa chenta' ñapa' atarr ahua-mencatesha', ñaña' ama tama ahua-mencateyayno, tarro'mar ñapa' ahuatoteñ eñalla. Ama't allempo ne'ñalleta na, ñaña' eñalla. Ñeñtpa' allohua atet ot Juan ñenmañ Cristocop.

16 Ñapa' atarr amuerañtosa ñeñto'marña allohueneypa' atarr bensare'tam̄peneý. Allo'na sen yebensare'tam̄pesnene'. 17 Ñoñets ñeñt atet anaret ahuañtoñpa' ñeñt quellconay Moisés ahuañt. Tarraña Jesucristopa' ñaña orrtatose'ña muereñets ñaña ñapa' añ orrtatonay ñoñets ñeñt e'ñe po'ñoñ Yompor po'ñoñ alloch yequeshperra. 18 Yompor Paretspa' ama't ahuañapa' ama eseshaye' puentare. Po'patrroña ñeñt Cristotosets ñeñtpa'cho'ña Parets ñeñt e'ñe parro attecmet; ñapa' ña yeñotaterre'ña atet penaña Pompor Parets.

*Juan ñeñt apatañtetsa Yomporecop, ñapa' atarr cohuentatosan Jesucristo
(Mt. 3.11-12; Mr. 1.7-8; Lc. 3.15-17)*

19 Allempo judionesha' pa'mcha'tareñesha' ñetñapa' mueñet acheñ Jerusaléñoñ ñeñtcha' ahuanmatsa Juanesho. Añ mueñet judionesha' po'cornaneshar ñaña levitane-sha' ñeñt po'taruas pene' o'ch torrenet Parets pa'paclo. Ñetpa' añecop amñareñtet ñetcha' a'p̄to'toset Juan ñapa' eseshate'ña. O'ña chapuet ñeshopa' atet otoset:

—Papa' ¿eseshape'tña, ama't añeyaype ñeñtep̄cha' Cristoterrets?

20 Juanñapa' ama a'nasoto; atto a'metapa' ñapa' atet otapanet:

—Napa' amaca'ye añeyayno ñeñtcha' Cristoterrets.

21 Ñetñapa' alla otereterr:

—Ñeñtepn̄apa' ¿eseshape'tña, ama't añeyaype Elías ñeñt a'mtaye't ahuañ Yompor po'ñoñ?

Ñañapa' atet oterraneterr:

—Amaca'ye ñeñteyayno.

Ñetñapa' alla a'p̄to'tereterr:

—Amapa' ñato' ¿añepte' ñeñtep̄cha' a'mterre' Yompor po'ñoñ ñeñt yecuen?

Ñañapa' alla oterraneterr:

—Amaca'ye ñeñteyayno.

22 Ñetñapa' alla otereterr:

—Ñeñtepn̄apa' ¿eseshape'tña pa? Yapa' yemneñca'ye o'ch p̄otey allochñapa' o'ch yotera' ñeñt yemñene'. ¿Erroñena'tcha'ña p̄oteyña p̄ocop?

23 Ñañapa' atet oterraneterr:

—Napa' nocopca'ye eñose'tña Isaías ñeñt a'mtaye't Yompor po'ñoñ ahuañ. Allempopa' atetca' ote't:

E'morrterrach puesheñarr po'ñoñ all amayo allcha' serrpare'taterranña acheñenesha'.

Puerranarotpa' añcha' toma'ntaterranet toñ ñapa' atetcha'ca'ye oterranet:

“Sa'cohuenetyes toñ allcha' oñmos Partsessa' o'ch e'ñe sa'paçharretyesoñ pa'teñ.”

24 Ñehua, ñeñt amñareñtatsa Juanesho, ñetpa' añca'ye mueñenahuet ñeñt fariseonesha' ñeñtara judionesha' pa'mcha'tareñesha'. 25 Ñetñapa' alla otereterr Juan:

—Arepa't Cristoyaypepa' eso'maruañaca'yeña p̄apatenña Yomporecop, arepa't Elíasoyaype, arepa't añeyaype ñeñtcha' a'mterre' Yompor po'ñoñ.

26 Juanñapa' atet oterraneterr:

—Napa' ama't napatyen Yomporecoppa' e'ñeca'ye oñochaya napatyenanet. Tarraña o' chap sesho po'psheñeñ ñeñt ello atarr sherbets, tarraña sapa' amaca'ye señoñeña sa.

27 Ñapa' ama'tcha' chenta huapapa' ñapa' ñeñtca'yeña ello atarr sherbets; nañapa' ama es nesherbena attoch ama't po'sapatrechapa' o'ch nepyam̄pes.

28 Ñehua, allpa' atetca'ye penet all oteñet Betábara allara Jordanaso yon̄ta'n tarro'mar Juanpa' allca'ye apatyenanña acheñenesha' Yomporecop.

Jesusp̄a' ñeñt atma'ntatareñ carrnero ñeñt amtsareñtatse't ochñartsocop

29 Tsapañña Juan allempo entapan Jesús ñeshoneñ en, ñañapa' atet otan acheñenesha':

—Añca'yeña ñeñt' o' llesenserr Yompor ñeñt'cha' Po'carrneror pen, ñach yahuanmamperre' yo'chñar allohueney ñeñtey añe patsro'tsa'yeney, tarro'mar ñach rromuerrets yo'chñarecop atetcha' perra atet amtsarettena carrnero ochñartsocop. ³⁰ Añmapa' ñeñt'ca'yeña notase't ahuaña: “Ñeñt'cha' huapatsa chenta'pa' ñapa' atarr ahuamencatesha', nañapa' ama tama ahuamencateyayno, tarro'mar ñapa' ahuatoteñ eñalla. Ama't allempo ne'ñalleta na, ñañapa' eñalla.” ³¹ Ama't na ahuañmo'chapa' ama neñoteñe esesha'te'ña ñeñt'cha' huapatsa chenta' ñeñt'cha' Cristoterrets. Tarraña napa' añecpaña nohuena nach apatyenomue' acheñenesha' oño, attochña norrtaterrñañ israelena'tarneshacop ñeñt' po'ño'ch Puechemer pen Yompor.

³² Allempoña Juanpa' eñotatan acheñenesha' ñapa' atet otanet:

—Na ahuaña allempo napata' Jesúspa' Yomporña Puecamquëñ e'ñe atet nenta' ñerra'mrrate' ye'p' o' sohua'nma entot, chap e'ñe Jesúsesho. ³³ Ama't allempo napa' ama neñoteñe ñeñte'ña Yompor Puechemer tarraña Yompor ñeñt' o' llesenserren attoch napatyese acheñenesha' oño, ñapa' atetca'ye otenen: “Esempoch pent o' sohua'nma Necamquëñ o'ch chap e'ñe ñesho ñeñt'cha' chorrosaya, ñapa' ñeñt'cha'ca'yeña chorraterrahuetña Parets Puecamquëñ.” ³⁴ Na po'ño'chpa' o'ca'ye neñch ñeñto'mar te'pa' neñotatenes ñeñt'ca'yeña Yompor Puechemer.

Ñeñt' ñanom pueyochresha' pa' Jesús

³⁵ Tsapa'ña' po'pocheño all ten Juan epuet epsheña pueyochresha'. ³⁶ Cohuanan Jesús all chopeñe'chen a'yenet, alla oterraneterr:

—Añca'yeña ñeñt' Po'carrneror pen Yompor.

³⁷ Ñeñt'ña epsheña pueyochresha' allempo e'met atet oteñ Juan, ñetña'p' allenta co'ta'nmet Jesús. ³⁸ Puetallesnomtsaña Jesúspa' entapanet co'ta'neñet chenta' ñañapa' atet otapanet:

—¿Eso'tña semnen?

Ñetña'p' atet ochet:

—Maestro, ¿erra'tña pe'chap?

³⁹ Ñañapa' atet otanet:

—Socterrenca'ye o'ch senteña'.

Ñetña'p' allenta co'ta'neret Jesús o'ch enteñeta' all a'posa. Alla a'poset ñamet ñeñte yetro tarro'mar allempopa' o' mañamena o'ch ellerren.

⁴⁰ Ñehua, ñeñt'ña epsheño'maret ñeñt' e'mue' atet oten Juan ñeñt' cote' Jesús, puesheñarr ñeñt'pa' Andrés ñeñt' Simón Pedro pa'mo'nasheñ. ⁴¹ Andrésña' allorocma ahuer e'nerraya' Simón; o'ña entera'pa' atet otuerr:

—Yapa' o'ca'ye yenter Mesías. (Ñehua, ñeñt'ña ñoñets Mesías añca'ye otenet ñeñt'cha' Cristoterrets.)

⁴² Andrésña'p' allenta anerran pa'mo'nasheñ Simón Jesúsesho. Jesúsña'p' cohua'pue'pa' atet otap:

—Pa'tña Simón, ñeñte'p' puechemer pen Jonás. Te'pa' nesocherrep'cha' Cefas (ñeñt'ara so'chñets ñeñt' otenet griega'cho Pedro).

Atto Jesúspa' chore'tan Felipe ñaña Natanael attoch pueyochresha' perranet

⁴³ Tsapa'ña Jesúspa' sechena o'ch ahuer Galileo. Allña entuenan Felipe ñañapa' atet otueñ:

—Ama't pemno o'ch poctenen.

⁴⁴ Ñehua, Felipepa'cho'ña galileo'marnesha', ña pa'netserpa' añ pa'so'cheñ Betsaida ñeñt'ara ñaña Andrés pa'netser ñaña Pedro. ⁴⁵ Felipeña'p' entuenan Natanaelpa' atet otueñ:

—Yapa' o'ca'ye yenter ñeñt ñocop quellquë't Moisés all orrtatan ñoñets ñeñt atet anaret, ñaña ñocop quellquë't ñeñt a'mta'yesaye't Yompor po'ñoñ. Añepa'tca'ye Jesús ñeñt huetsa Nazaretot ñeñt José puechemer.

⁴⁶ Natanaelñapa' atet otapan Felipe:

—Nazaretotpa' ama't ahua'tapa' amaca'ye huenoña ñeñt e'ñe cohuen acheñ.

Felipeñapa' atet otererr:

—Po'ñoçh orraca'ye o'ch penteña'.

⁴⁷ Natanaelpa' allenta ahuo' o'ch entenana' Jesús. Jesúsñapa' entapan Natanaelpa' ñaña' atet eñora ñocop:

—Añca'yeña po'ñoçh puesheñarr israelnesha' ñapa' amaca'ye shequëno ama't mame-sha.

⁴⁸ Natanaelñapa' atet otosan Jesús:

—Napa' ¿errotenote'tña peñotenen? Amaca'ye pentarno.

Jesúsñapa' atet otererr:

—Allempo ama a'sechenpa' Felipe nesho, allempo pa'pa' alla pa'nen mañto higocho nañapa' nentene'pa'ye.

⁴⁹ Natanaelñapa' atet otererr:

—Maestrocha' pepa'tña Yompor Puechemerep. Pepa'tña Añcha'taret ñeñt atarr cohuen allohuen israelnesha'.

⁵⁰ Jesúsñapa' otererr:

—Napa' o' nota'pa' nentene'p allempo pa'nen mañto higocho, ñeñto'marte'ña o' pame'ña'na. Te'ñapa' o'ch notas, elloña te'pa' nanaccha' senterrnan nepartsoña ñeñt ama tama sentennana'.

⁵¹ Jesúsñapa' alla otererr:

—Po'ñoçhca' notenes, senterrcha' enet atoraret ñaña Yompor po'millaño'teñrenesha' a'tachenet ñaña sohua'chenet e'ñe nesho, na Ñeñten Acheñetosets.

2

Allempo sena'ta puesheñarr yacma all anetso añ pa'so'cheñ Caná allara Galileo

¹ O'ña ma'pamuetuerr allempo çherr Jesús Galileo, allña anetso Caná atarr coshaprechet puesheñarr yacma ñeñt sena'tetsa. Jesúsña pachorpa' allo'tsen. ² Jesúsña epuet pueyochresha'pa' ñetpa'çho'ña ahua'ñare'ttet allcha' rrallme'chapreteneta'.

³ Allña'pa' cha huaña'pset vinos. Jesúsñapa' atet och pachor:

—Te'pa' ama eñalle vinos, o'cha huaña'pset.

⁴ Jesúsñapa' atet otan pachor:

—Achocha' eso'mare'tña atet potenenña na. Nocoppa' amaca'ye çhena' allempoch es norrtatyes.

⁵ Tarraña ama't atet otaña'pa' pachorña'pa' atet otan ñeñt sherbets all:

—Ñerra'm errotencha' otas nechoyorpa' sañapa' e'ñech atet sepa.

⁶ Ñehua, allpa' allo'tsen pechapña orrot mapyemñ. Ñeñtña orroteçhnopa' tama ate-shamerr, puenña'ttso orrotpa' ñato' sente' oñ epa galon amapa' ma'pate' galon sets oñ attoch chorreresua. Ñeñt orroteçhnopa' allecma nenet oñ alloña a'cohuentatena judionesha' Partsocop ñeñt atet anarettenet ñocpuet. ⁷ Allña'pa' atet otan Jesús ñeñt sherbets all:

—Te'pa' o'ch se'chorrayes oñ orroto.

Ñetña'pa' atetcho' pet e'ñe e'chorraresuahuet oñ. ⁸ Allempoña o' e'chorraresuetpa' Jesúsñapa' atet otarraneterr:

—Te'ñapa' o'ch seshe' coñe'tpa' o'ch sanemñ allo'tsen ane'tañ.

Ñetña'pa' atetcho' pet. ⁹ Allempoña ane'taña'pa' allenta amllan oñ ñeñt a'pnasaret vinos ñaña'pa' ama eñocher erro'tte' o' huapatetña vinos. Aña eñotene' ñeñt sherbenahuet all

ñeñt' etasote' oñ. Allempoña amlla'huan vinospa' ñaña'pa' allenta agotan ñeñt' sena'tetsa.
 10 Ñeñt'pa' atet och:

—Ñerra'm cho yorrpa' añcha'ña ñanom yorrtat ñeñt' e'ñe cohuen vinos. O'chña yonuhue ahua'ñareñ e'ñe cohuen vinospa' allempochña yapanet ñaña ñeñt' ama e'ñe cohue-nayaye. Tarraña ñaña'pa' amaña atteye' pepeno. Ñeñt'apa' cha'tña ñaña'tuaña vinos ñeñt' e'ñe cohuen tayaño' porrtach. (Ane'tañña'pa' atet otan ñeñt' sena'tetsa tarro'mar ñaña'pa' ama eñoteñe.)

11 All ñanom entatanet Jesús po'partsoña'pa' ñeñt'pa' arr Cano allara Galileo. Atto'yaña orrtatanetña Jesús po'partsoteña. Allempoña pueyochresha'pa' o' eñochet po'ñoche'pa't ñaña'pa' Parets attoña e'ñe ame'ñyet.

12 Allempoña Jesús'pa' ahua' Capernaumo pachore'na ñaña'pa' mo'nasheñe'chno, ñaña'pa' allohuen pueyochresha'. Allña'pa' alla allponmateneta'.

Atto Jesús'pa' a'cohuentatosan Parets pa'paquëll

(Mt. 21.12-13; Mr. 11.15-18; Lc. 19.45-46)

13 Allempoña chapmoch pascuapo allempoch alla cosherrerr judionesha'. Jesús'ña'pa' ahuer Jerusalem. 14 Allña Parets pa'paclopa' entuenan ñeñt' pomuene' po'huacsher, ñaña' carrnero, ñaña' yeñ; ñaña' ñeñt' canya'yenuhuet po'çllayoretpa' ñetpa'cho'ña alla anorrchenet. 15 Allña'pa' pellta'tosan apech pashtarech. E'ñe matatuosan allohuen ñeñt' pomatsre'tyetsa Parets pa'paclo, e'ñe ahuanerret po'huacsher ñaña' po'carrneroret. Ñaña' ñeñt' canya'yenuhuet po'çllayoretpa' e'ñe yo'patsetam'pesuosanet po'çllayoret patso. E'ñe a'coye'tam'pesuosanet all na'yenet po'çllayoret. 16 Allpa' atet otosan ñeñt' pomuene' yeñ:

—Te'pa' sahanerr añ arroñ. Amach atet sepatstono Nomp'or pa'paquëll atet ñerra'mrrate' ñeñt' e'ñe pocollenochaya allecma pomatsre'tyenet.

17 Allempoña pueyochresha'pa' allenta yerpuet ñoñets ñeñt' anaret ahuatoteñ ñocop, ñeñt'pa' atet oten: “Napa' atarrcha' nempa'tonañ pepaquëll ama'tcha' ñeñto'mare'na muetserrnetañ.”

18 Allempoña judionesha' pa'm'cha'tareternesha'pa' atet ochet:

—Añña porrtatosnay pe'partsoña allochña'pa' attochña yeñotañ po'ñoche'pa' papa' allsensarete'pe', te'ña'pa' atto'peposnayte' añe'chno.

19 Jesús'ña'pa' atet oterraneterr:

—Sapa' ama'tcha' sa'matoñ añ Parets pa'paquëllpa' poma'pamtañoña napa' o'ch alla natomater.

20 Judionesha'ña'pa' alla otereterr:

—Añ atto e'nuoñet Parets pa'paquëllpa' atarr atomat atorrare'tta e'ñe pa'tatsoch charrohua char puechena pechap. Ta', ñaña'pa' ¿po'ñoche'cha' e'ñech poma'pamtaño'cma yetpa' o'ch alla patomatuer?

21 Ñehua, Jesús'pa' añepa't otanet ña po'chets ñeñt'epa't pa'paquëll pen Parets. 22 Ñehua, chap allempo muetseret Jesús allempoña tanterrapa' pueyochresha'chnoña'pa' allenta yerpuerret ñeñt' atet ote't Jesús allempo. Ñeñto'marña allempo Jesús pueyochresha'chnopa' atarr yemterrñañet Yomp'or po'ñoñ ñeñt' anuaret ahuatoteñ, ama't ñaña Jesús po'ñoñ atarr ame'ñeret.

Jesús'pa' e'ñe eñotueney allohueney ñeñt' atet yoctape'chyen yeyochro

23 Allempoña allo'tsen Jesús Jerusalem, all coshapretenet pascuapo shonte' acheñenesha' enteññañet ñeñt' atto orrtatenanet po'partsoña all, ñeñto'marña allpa' shonte' ame'ñaya. 24 Tarraña Jesús'pa' ama yemtanete'te ñet, tarro'mar ñaña'pa' eñotanete't atet allohueney acheñey chocma yoctape'chyen ñeñt' yemnen ya. 25 Ñaña'pa' ama e'nenano ama't puesheñarra ñeñt'cha' ote' ñeñt' atet yoctape'chyen allohueney acheñey. Tarro'mar ñaña'pa' chocma eñoteney atet yoctape'chyen allohueney acheñey.

3

Allempo Nicodemopa' huapa Jesúsesho

¹ Allempopa' eñall puesheñarr yacma ñeñt fariseo ñeñt sochetsa Nicodemo. Ñeñtñapa' puesheñarr ñeñt añcha'tarettetsa judioneshacop. ² Ñaña' huapa Jesúsesho tsapopa' atet otos:

—Maestrocha' yeñoteneþ þapa' añ pellsensene' Yompor attoch peychatosey cohuen tarro'mar yapa' yeñoteñ añach orrtatyene' partsoteñets ñeñt ahuamencat pen Yompor.

³ Jesúsñapa' atet otapþ:

—E'ñe po'ñoçh notapþ, esesha'ch ama eñalleterrtso ello ñetñapa' amach errotenot pueyochresha' perraneto Yompor.

⁴ Nicodemoñapa' atet otererr:

—Amate' errotenot ye'ñalletterroña po'pocheñoña' o'ca'ye yepo'nme'ten. Errotenotuata'eñaca' yeçherrerrña yachor pa'to attotcha' ye'ñalletterrerr po'pocheño.

⁵ Jesúsñapa' atet otererr:

—E'ñe po'ñoçh noteneþ, erra'tsencha' ama eñalleterrtso oñoñ ñaña Yompor Puecamquëñoñ, amate' errotenot pueyochresha' perraneto Yompor ñeñto'marña amach eshec o'patapreteretoña Yompor po'cohuenña ñeñt atto ayochreshattena ña. ⁶ Ñeñt atto eñalletena arromñañenesha'pa' ñeñtpa' arromñaña. Tarraña ñeñtcha' eñalletterrtsa Parets Puecamquëñoñ, ñeñtpa' ñeñtña camuecñetsotets ñeñtñapa' ama arromñañeshayaye. ⁷ Ñeñt atet noteneþ, “allohuenespa' añ sepalltena o'ch se'ñalletterrerr ello”, þapa' amach cha pe'charrtatsto peyoçhro, amach cha þotatsto año'te' errotenot pe'ñalletterroña ello po'pocheño. ⁸ Ñeñtpa' e'ñe atet pena ñerra'mrrate' mör. Morrpa' erra muene'pa' allcha' mörren. Pe'muente' atet ma'moreten, ama peñoteñe errofte'ña huena ñaña errate'ña sen. Atetcha' perra ñaña allohuen erra'tsencha' eñalletterrtsa Yompor Puecamquëñoñ.

⁹ Nicodemoñapa' alla a'þto'tererr:

—Ñeñtpa' ¿errotena'tña añ?

¹⁰ Jesúsñapa' atet otererr:

—Papa' ama't añepeñ israelnesha' po'maestror, ama't peñotenoña añ. ¹¹ E'ñe po'ñoçh noteneþ: Allohueney ya ñeñt yeñotenpa' ñeñtcha'ña yeserrpare'ten ñaña ñeñt yentyenpa' ñeñtcha'ña ya'poten tarraña sapa' ama çhennasoña seyoçhro añ ñeñt ya'poten. ¹² Ñerra'm añ notenes ñeñt atet yeyçhena añe patsro, saña ñerra'm ama same'ñennopa' errotenotuata'eñaca'ye notasña ñaña ento'mar ñeñt Yomporecop.

¹³ 'Ama eñalle ama't puesheñarra ñeñtcha' a'tapuets ento ñaña ñeñtcha' sohuerrtsa ñeñtara ento. Naptaña na Ñeñten Acheñetosets ñeñten sohuatsa ento, napta nentar Nompör pue'ntañ tarro'mar napa' ñeñt na'netser nepen. ¹⁴ Ñehua, ahuaþ Moiséspa' yeçhcatan ñeñt atma'ntatareþ shecheþ all amayo, ñeñtñapa' huanquë' tsachopa' o' echantañpes enoneþ. Atto Moisés echantañpsan shecheþ all amayopa', napa'cho'ña ñeñt poctetsa nocop atetcha' perrnet naña, corsochoþcha' echantañpsareten. ¹⁵ Allochñapa' allohuen ama't erra'tsena ñeñtcha' name'ñerraya na, ñetñapa' amach chenquërreto, e'ñech corretseta pocsheñeshocmañen e'ñe tayoteñ erponañohuen.

Atto atarr morrentenya Yompor allohueney acheñenesay

¹⁶ 'Atto atarr morrentenya Yompor allohueney acheñenesay arr patsro ñeñto'marña apuey Puechemer ñeñt po'patror pen, allochñapa' allohuen ñerra'm esesha' ame'ñerraya ña amach chenquërreto, ñetñapa' corretsetach pocsheñeshocmañen e'ñe tayoteñ erponañohuen. ¹⁷ Yomporpa' amaca'ye añecpaye' mueñanoña Puechemer arr patsro attoch mueñosan acheñenesha' coñcheñtso. Ñapa' añecopña mueñe attoch ñach a'qeshþatose'ña acheñenesha' arr patsro.

18 'Erra'tsencha' ame'ñerraya ña ñetñapa' amach amñare'tterreto coñcheñtso. Tarraña ñeñtcha' ama ame'ñerrayo ñocpuetñapa' anare'ttet attoch amñare'tterret coñcheñtso tarro'mar ñetpa' ama ame'ñoñeto Yompor Puechemer ñeñt po'patrro pen. 19 Ñaña'pa' o' huapa arr patsro attoch ye'chatosey ñeñt e'ñe cohuen enten Yompor; attoña a'puetarsam'psosnay yocpa'ña. Tarraña shonte' acheñenesha' ñetñapa' ama mueneto o'ch a'puetarsam'psare'ttet po'cap'ñet. Ñetpa' aña muenenet checmete' tarro'mar amaca'ye masosyaye' co'tape'chyeneto. Ñeñto'marña ñetpa' atto'tcha'ña amñare'tterret coñcheñtso. 20 Allohuen ñeñt ama masosyaye' co'tape'chyeneto ñetpa' ama cohuenaye' enteñetoña Cristo ñeñt a'puetarsam'pene' allohueney yocpa'ña. Ñeñto'marña ama eneto allo'tsen ñeñt a'puetarsam'psañtetsa taye'to'te' orrtatare'ttet po'cap'ñet ñeñt ama masosyo. 21 Añaña ñeñt e'ñe atet pene' ñeñt po'ño'ch cohuen enten Yompor; ñetpa' e'ñe pocte' enteñet o'ch onet allo'tsen ñeñt a'puetarsam'psañtetsa tarro'mar ñetpa' añ muenenet o'ch eñotateret po'potantañ ñetpa' Yompor ahua'mencat penahuet ñeñto'marña ñetpa' añ orrtatyenet ñeñt cohuen enten Yompor.

Allempo Juan ñeñt apatañtetsa Yomporecop, ñapa' alla cohuentaterranerr Jesús

22 Allempoña Jesús'pa' ahuererr Judeo epuet pueyochresha'. Allña'pa' alla allponmat epuet pueyochresha'. Allña Jesús'pa' apatyesan acheñenesha' Yomporecop. 23 Ñaña allempo Juan'pa'cho'ña arr apatyenan acheñenesha' all oteñet Enón e'ñe alla allame'tets Salimo, tarro'mar allpa' shonte' oñe'chno. Acheñenesha'pa'cho'ña shonte' hua'cha'tyeset attoch apatare'tetyeset Yomporecop. 24 Ñehua, allempopa' ama yottam'peñeta' Juan.

25 Allempoña Juan pueyochresha'pa' serrpare'tet epuet judionesha'. Allpa' añ serrpare'tatanna'tet este' poctetsaña attoch ya'cohuentatare'tta Partsocop, aña' ñeñt atto apatyen Juan amapa' ñato' aña' atto apatyen Jesús. 26 Ñeñto'marña ahuanmuet Juaneshopa' ñetñapa' atet otoset:

—Maestrocha' ñeñt epa'ñ ahuaña yom'ta'n Jordanaso, ñeñt peserrpare'tatosey, ñapa'cho'ña ñepa'tca'yeña apatyets ñaña. Ñeñto'marña allohuenetpa' o'ca'ye ahuanmuet ñesho.

27 Juan'ña'pa' atet otapanet:

—Ama't puešeñarro'teyapa' ama ahua'mencateyaye ñerra'm ama Yompor ahua'mencat ye'paye. 28 Sapa' ama't seño'teñe ñeñt atet notuanmas ahuaña, napa' ama aña'yayno ñeñt'ench'a' Cristoterrets. Napa' atta mueñan nanom attoch nota. 29 Jesús'pa' e'ñech atet netma'ntacha atet ñerra'mrate' yacma ñeñt sena'tetsa. Ñehua, ñeñt sena'tetsa ñeñtñaca'yeña agu'ene'ña coyanesha' ñeñt'cha' puetapor pa'. Tarraña ñeñtña pueyempa' ñeñt parro epuet ten ñerra'm añ e'm pueyem po'ñoñ ñeñt sena'tetsapa' ñaña'pa' atarrcha' coshapretana pueyem. Ñeñto'marña na te'pa' atarr nocshapreteña Jesús. 30 Jesús'pa' e'ñe pocte' allo'nepa'ñaca'yeña enteñet po'ño'chpa' ñaca'yeña atarr sherbets. Ñaña'pa' e'ñe pocte' allo'nepa'ña entennet napa' ama e'ñeye' nesherbena. Arrpa' allohua atet ot Juan Cristocop.

Atto yeñoteñ ñeñt huetsa entot Yomporeshot ñeñtca'yeña atarr sherbets

31 Ñehua, yeñoteñ ñeñt huetsa entot Yomporeshot eñchetepa' ñapa' atarrca'ye añcha'tare't. Tarraña ñeñt patso'marnesha' ñeñt'pa' alla eñorena patso'mar. Ñeñt huetsa entot Yomporeshot eñchetepa' ñapa' atarrca'ye añcha'tare't. 32 Tarro'mar allohuen ñeñt entyen Pomporesho ñaña ñeñt allpon e'myen all, ñapa' ñeñtca'yeña serrpare'tatene'y, tarraña ama't puešeñarro'tapa' ama eseshaye' chapahuetoña pueyochreto ñeñt atet otenanet. 33 Ñeñt chapa pueyochro ñeñt atet serrpare'tatenanet ñeñt huapatsa Yomporeshot ñetñapa' atet otet: Yomporpa' e'ñete' po'ño'ch atet oten Puechemerecop. 34 Tarro'mar ñeñt llesensa' Yomporpa' Yomporo po'ñoño eñorena

tarro'mar Yomporpa' ama atparetayaya chorratenanetoña Puecamquëñ. ³⁵ Yomporpa' atarrca'ye nanac muerenanaña Puechemer. Ñeñto'marña aphuahueñ allohuen allpon eñall allochñapa' ñach pomnaren penahuet. ³⁶ Esha'ch ame'ñenaya Yompor Puechemer ñetpa' corretsetach pocsheñeshocmañen tayoteñ ama't errponañohuen. Añña ñeñt atpare'tene' Yompor Puechemer ñetpa' amach enterreto ñeñt correñtsor. Ñetñapa' chachca'ye coñchaterranet Yompor.

4

Allempo Jesúsapa' serrpare't epuet coyanesha' samario'marnesha'

¹⁻³ Allempoña Jesúsapa' atarr ayochreshatta nanac, ello metanenan atto yochresha'ten Juan. Ñaña atarr apatyenan acheñenesha' Yomporcop. Ñehua, ama ñaye' apatenahueto, aña apatenahueto pueyochresha'. Ñeñto'marña allempo e'mare'ch fariseonesha' ñeñtara judionesha' pa'mcha'tareternesha'. Jesúsña allempo eñoch atto fariseonesha' o' eñochet ña atarr nanac ayochreshatta, ñañaapa' allenta quechpa'nerran Judea, o' alla ahuer Galileo.

⁴ Toññaapa' e'ñe arr oñen Samario'mar, ñeñto'marña all oñerrña Jesús. ⁵ O'ña chap Samariopa' alloññaapa' o' ahuen paterr anetso ñeñtapa' añ pa'so'cheñ Sicar. Añña anets Sicarpa' allame'ttso'tsena Jacob po'patseñ ñeñt apa'nman puechemer José ahuañ. ⁶ Allñaapa' all poten oñ ñeñt po'ñeñ pe't Jacob. Jesúsñaapa' nanac tsanom puechope'cheñoñ ñeñto'marña anorros e'ñe allame'tets apco'sato. Allempopa' e'ñe pocto'tsen atsne'. ⁷⁻⁸ Allñaapa' machayota huapa puesheñarr coyanesha' ñeñt samario'marnesha' ñeñtcha' etenaya' oñ. Jesúsñaapa' atet otañ:

—Napa' nemneñ o'ch paposen oñ.

Ñehua, allempopa' pueyochrenesha'ñapa' o' ahuanmuet anetso o'ch raññeneta' ñeñtcha' rret.

⁹ Coyanesha'ña samario'marnesha'pa' atet otos:

—Papa' judionesha'ppa' eso'mare'tcha'ña penamapuenña oñ o'ch napañ. Papa' peñotenen napa' ñeñten samario'marneshan.

(Ñeñto'marña atet otos tarro'mar judionesha'pa' ama amo'tstanneneto epuet samario'marnesha'.) ¹⁰ Jesúsñaapa' atet otererr:

—Ñerra'm peñoteñeñ ñeñt e'ñe atta apueney Yompor, ñaña ñerra'm peñotenoñ na ñeñten potene' p apuen oñ, p papa' o'ch penamuennoñ na ñañaapa' o'ch napospeñ oñ cohuen alloch e'ñe pocrañ.

Ñeñt oteñ o'ch añ cohuen oñ, añ oteñ Yompor po'cohuenña, tarraña coyanesha'ñapa' ama eñoch, ¹¹ ñeñto'marña atet otererr:

—Ama Ayochreshate pecheno alloch pet oñ. Oñpa' nanacramtso o'pono'tsen. Errotuamtsoch peyoraña oñ ñeñt e'ñe cohuen alloch e'ñe yocra. ¹² Ahuañ yatañ Jacoboñ ñeñt yapa'nmue' añ oñ ñapa' ñeñt orre't ñaña puechemerneshañ ñaña po'huacsherneshañ. Papa' añeñhuate'ca'ye ñeñteñ ello metanene' yatañ Jacoboñ atto añcha'tarette't ña.

¹³ Jesúsñaapa' atet otererr:

—Allohuen ñeñt orrene' añ oñpa' elloch alla oñpa'terreter. ¹⁴ Tarraña ñerra'm esesha' orre' oñ ñeñtcha' napanet na ama't ahua'tapa' amach oñpa'terreto. Ñeñtcha' napanet na oñ, e'ñe pueyochretopa' puenasanetcha' atet ñerra'mrrate' allot poten oñ, amach huañerro ama't ahua'ta. Attochña ñetpa' corretsetach tayoteñ ama't errponañohuen.

¹⁵ Coyanesha'ñapa' alla otererr:

—Ñeñteññaapa' Ayochreshate p apuen ñeñt oñer allochñapa' amach alla no'ñpa'terro allochñapa' amach alla nohuerre'te eterrayerr arr oñ.

¹⁶ Jesúsñaapa' atet otererr:

—Te'pa' orrerreḡ, o'ch peçhore'tera' perrollar, allempochña alla pehuerra arr.

¹⁷ Coyanasha'ñapa' atet otererr:

—Napa' amarramtso arrollareteno.

Jesúsñapa' atet otererr:

—E'ne po'ñoçh atet ḡoten año' arrollareteyaype. ¹⁸ Tarro'mar amnarsheña perrollareshe'mañ ñeñḡ pueyoruareḡ. Ñaña ñeñḡ peyorene' te'pa'çho'ña ama perrollareyaye. Ñeñḡpa' e'ne po'ñoçh atet ḡoten.

¹⁹ Allempoña e'man atet oteñpa' coyanasha'ñapa' atet otererr:

—Ayochreshate, te'ña po'ñoçhpa' o' neñotaḡ ḡapa' añepeta't ñeñḡeḡ a'mtene' Yepapar po'ñoñ. ²⁰ Yatañneshañ samario'marnesha'pa' ñetpa' concorpuete't ma'yochatset arr añ aspenḡero. Tarraña sa ñeñḡes judioneshaspa' sapa' çha soten aña pa'terr poctetsa Jerusaléno'chña yeconcorpuena' allohueney.

²¹ Jesúsñapa' alla otererr:

—Noçheshacha' ḡame'ñona ñeñḡ atet noteneḡ tarro'mar te'pa' o' çhap ñerra'm esempoch sema'yocheña Yompor, ama sepallteno o'ch seconcorpuena Apa añ aspenḡero ama't ñaña Jerusaléno. ²² Saña ñeñḡes samario'marneshas aña semchatse'tyen ñeñḡ ama señoḡeno. Yaña ñeñḡey judioneshay añ yeconcorpana'tena ñeñḡ e'ne po'ñoçh yeñoten, tarro'mar judionesha'pa' ñetpa' o' orrtateret ñeñḡcha' a'qeshḡatañterrtsa. ²³ Tarro'mar te'pa' o' çhap ñeñḡcha' e'ne po'ñoçh aye'choçhtaterre' Yompor, arrcha'ca'ye aye'choçhtatoñet e'ne ñet pueyoçhreto. Ñeñḡcha' atet aye'choçhtaterrñañet ñeñḡña e'ne po'ñoçh atet muenen Yompor. ²⁴ Yompor Paretspa' ñapa' ña camuecñetsotets amaca'ye entpahuoyaye. Ñeñḡo'marña ñeñḡcha' e'ne po'ñoçh aye'choçhtaterre' ña, arrcha'ca'ye aye'choçhtatoñet e'ne ñet pueyoçhreto, ñeñḡpa'çho'ña amaca'ye entpahuoyaye. Tarro'mar ñeñḡcha' atet aye'choçhtaterrñañet ñeñḡña po'ñoçh atet muenen Yompor.

²⁵ Coyanasha'ñapa' alla otererr:

—Napa' neñoteñ añ Mesíaspa' huapach ñeñḡara ñeñḡ yoten Cristo. Ñerra'm ña huapat-sapa' e'nech serrpare'tatuerrey ora allohuen ñeñḡ esocmañen eñall.

²⁶ Jesúsñapa' alla otererr:

—Napa' naca'ye ñeñḡen peserrpare'tatene'.

²⁷ E'ne allempo atet otenpa' pueyochresha'ñapa' huacherret. Ñetñapa' atta cohuanrroretueret all serrpare'tatenan coyanesha'. Tarraña ñetpa' ama't puesheñarroḡapa' ama eseshaye' otuerraye ¿eso'tña pemnen? Ama't puesheñarroḡetapa' ama otuereto ¿eso'mare't peserrparenña epaḡ coyanesha'? ²⁸ Coyanasha'ñapa' alla na'nerran porreḡpa' o' ahuer all pa'netsro. Allñapa' otuerran pamo'tsesha':

²⁹ —Te'pa' socterren o'ch senteña' puesheñarr encaneshas' ñeñḡ o' serrpare'tatuosen ora allpon ñeñḡ atet neḡa'yesara. Ñato' ñeñḡte'ña Cristotets ñeñḡ atarr yecuen o'ch huapa.

³⁰ Ñetñapa' allenta onaçha'tet anetsotpa' o' ahuanmuet Jesúsesho. ³¹ Allempo ama çhaçheneta' ñesho pueyochresha'ñapa' atet otyeñet:

—Maestro ma'mate'tach rreñets.

³² Tarraña ñapa' atet otanet:

—Napa' nechencia'ye ñeñḡ nerran nepen ñeñḡña sapa' amaca'ye señoḡeñe.

³³ Pueyochresha'ñapa' atet otanna'tyeset:

—Amate' esesha' huapatoyeña puerrar.

³⁴ Jesúsñapa' alla oterraneterr:

—Añca'yeña nerran nepen o'ch neḡa atet muenen Nompor ñeñḡ nellensene', tarro'mar ñeñḡpa' attoçhña e'ne netsotuoñ po'taruas. ³⁵ Ama't sotenoña sa: “Palltenmeñ pa'tatsña arrorr o'ch e'ne ya'yapaçha'hua yenareñ.” Te'ñapa' o'ch notas: Te'pa' secue'ca'ye a'yo o'ch sentap shonte' acheñ ñeñḡ onaçhets, o'ca'ye çhap allempoch

ameñernnet. Te' ñetpa' eñeca'ye atet nentenanet ñerra'm yenarem̃pa' o' pomella'huen o'ca'ye chap allempoch yapcha'hue. ³⁶ Ñeñt apchets nocop ñeñt̃pa' atsa'tarettetcha' ñeñt̃cha'ña atarr coshaterrahuet. Ñaña allohuen ñeñt̃ ame'ñatenet ñetñapa' napanetcha' alloch eñe correrret tayoteñ ama't errponañohuen. Ñeñto'marña añ ñeñt̃ nare'tets ñaña ñeñt̃ apchets nocoppa' eñech parrocmā coshapretannenet, ama't ñeñt̃ ñanom epatue' neñoñ ñaña ñeñt̃cha' torratta chenta' ñeñt̃ nocop. ³⁷ Tarro'mar ñeñt̃pa' eñe po'ñoçh atet yepena ñeñt̃ atet oten añ ñoñets ñeñt̃ çhocma yotanna'tyena ya: "Puesheñarrpa' o'ch nare'tatse'tyes, po'psheñeñña' ñeñt̃cha' apcha'yesets." ³⁸ Ñaña sapa'çho'ña o'ch nemñas samā o'ch same'ñatera acheñenesha' ama't ama sanmaye' ñanom torratto all nocop, po'psheñeñña ñeñt̃ ñanom torrattse't all. Tarraña te'pa' sach ame'ñaterrahuet attoch setorrapretera ñeñt̃ ñanom torrattse't all nocop. Te'pa' sach apcherrets all ama't ama saye' nare'tatse'ttse'te all. Ama't po'psheñeñ nare'tatse'ttse't, te'ñapa' sach taruasapreterrāhuet all.

³⁹ Coyanesha'pa' eñe po'ñoñoña ame'ñatana pamo'tsesha' samario'marnesha' allempo serrpare'tatuerranet atto Jesús'pa' o' serrpare'tatos ora allpon ñeñt̃ atet puepa'yesara. ⁴⁰ Ñeñto'marña samario'marnesha' allempo huaçha'tet ñeshopa' atarr nanac a'patare'tapet Jesús a'posanetepa'to' all pa'netsreto. Ñaña'pa' eñe epomta a'posa all. ⁴¹ Po'potantañeçhnopa' shonte' ñeñt̃ ame'ñapaya atto serrpare'tatosanet Jesús all pa'netsreto. ⁴² Ñetñapa' atet oteñet coyanesha':

—Te'ñapa' ama eñe pa peñoñoñeye' yame'ñeno. Te'pa' eñe ya e'muene' yanña allohueny. Ñeñto'marña te' yapa' o' yeñoçh po'ñoçh ñapa' ñach ya'qeshpaterre' allohueny ñeñtey añe patsro'tseney.

Puesheñarr yacma ñeñt̃ sherbene' añcha'taret ñeñt̃ña puechemer a'crraterrña Jesús

⁴³ Allempoña epomta'muen Samario Jesús'ñapa' o' alla ahuen Galileo all pa'ney peñ ña. ⁴⁴ Tarro'mar eñe po'ñoçh atet eñorena Jesús ñocop, ñeñt̃pa' atet ot: Ñeñt̃ña a'mtene' Yompor po'ñoñ pa'nyo'marnesha'ñapa' ama't mameshapa' ama mecha'na'teñeto. ⁴⁵ Allempoña çherrerr Jesús Galileo allohuenña galileo'marnesha'pa' eñe cohuen agapapueñet tarro'mar ñetpa' eñe entuoñet allohuen ñeñt̃ atet pa'yesos Jerusaléno allempo entapreteneta' pascua all. Ñetpa'çho'ña allempopa' all ahuanmuet ñamet o'ch entapreteneta' pascua.

⁴⁶ Jesús'ñapa' alla ahuerterr po'pocheño Cano eñe allara Galileo all eñe ñanem a'pnasenana' oñ vinos. Allña'pa' allo'tsen puesheñarr ñeñt̃ sherbene' añcha'taret. Ñaña puechemerpa' çha atsa'ten all anetso Capernaumo. ⁴⁷ Allempoña e'mare'tan Jesús o' huapa Judeot o' çhenerr Galileo, ñaña'pa' allenta ahuo' o'ch enteña' attoch oteña' coterepa' pa'paclo attoch a'crraterrñaña' puechemer, o' rromamoch. ⁴⁸ Jesús'ñapa' atet och:

—Ñerra'm ama nentatasñe nepartsoña ñaña ñeñt̃ ama sentarepa' amate' same'ñennañe.

⁴⁹ Ñeñt̃ña sherbene' añcha'taretpa' o' alla otererr:

—O'ch Ayochreshate poçterren tayepa'tñapa' ama rromuena' nacñe'ter.

⁵⁰ Jesús'ñapa' atet otererr:

—Te'pa' ahuerreç, pechemerpa' o'ca'ye alla correrra.

Yacmañapa' eñe ame'ñana Jesús po'ñoñ ñeñt̃ atet och, ñaña'pa' allenta ahuer.

⁵¹ Allempoña ahuen toñoñapa' poçtenan pueñañresha'. Ñetñapa' atet otapueñet:

—Pacñe'terpa' o'ca'ye correna.

⁵² Ñaña'pa' allenta otapanet:

—¿Esempto'tña pasateñ?

Ñetñapa' atet otereterr:

—Ellerro allempo coyatse'ten atsne' mame'pa' allempoca'yeña metueñña po'urateña.

⁵³ Allempoña pomporpa' o' yerepya ñaña'pa' atet ot:

—Ellerropa' allponca'yeña atsne' otenña Jesús nechemerpa' o'ca'ye correrra.

Ñapa' ñeñña ame'ñate' ama't ñaña allohuen pamo'tsesha' ñeñ parro pa'paclo'tsa'yenet e'ñe ame'ña'huet ñamet.

⁵⁴ Arrpa' atto puepocheño Jesús'pa' entatanet po'partsoña allempo huapa Judeot o' alla çherrerr Galileo.

5

Atto Jesús'pa' a'crraterran puesheñarr atsnañeñ all Betesdaso

¹ Allempoña o' alla çherrerr allempoch alla cosherrerr allohuen judionesha' ñeñ atet anaretet ñocpuet. Jesús'ña'pa' alla ahuererr ñaña Jerusaléño. ² All Jerusaléño e'ñe allame'tets allotecma a'be'teñet carrnero allña'pa' allo'tsen oñ apco'sattataret ñeñ sochen hebreonesha' po'ñoño Betesda. Ñeñña'pa' eñall amnar puecha'petar. ³ Allña puecha'petarotpa' shonte' atsnañeñsha' ñeñ pena'rrartetsa all —ñeñ aporo'yetechno ñaña ñeñ che'ca'repachno ñaña ñeñ echarretyetsa. Ñetña'pa' añ cohuenet ñerra'm esempoch pelle'llchena oñ. ⁴ Tarro'mar ñerra'm esempoch pelle'llchena ñeñ oñerpa' mellaño'eño'ch sohuetsa all o'ch pelle'llchatosan oñ. Ñerra'm esesha' ñanom esha'tostsa all oño allempo pelle'llchena ñeñña atsnañeterpa' acrrerroyo'ch, ama't erra'tsena atsnañtsor rromuenahuet. ⁵ Allña'pa' allo'tsen puesheñarr yacma ñeñ ma'poch çarra' puechena posoc char atsna'ten. ⁶ Allempoña entos Jesús alla ñanena ñaña'pa' eñotos shonte' char atsna'ten ñeñto'marña atet otos:

—¿Ama't pemno o'ch pocrerra?

⁷ Atsnañeñña'pa' atet otan Jesús:

—Amaca'ye Ayochreshate eñalle ñeñcha' neshate' oño allempo pelle'llchena. Napa' o'ch taya ahuen po'psheñeñña'pa' ahuo'tcha' esha'tosa ñanom.

⁸ Jesús'ña'pa' atet otererr:

—Te'pa' o'ch notosep: Petantena, pechta'nen allo pemuen, pechope'chen tayecma.

⁹ Yacmañapa' allorocmuepa'tcha' correna, ñaña'pa' allenta chetenan allo muenpa' alenta chope'chnen. Ñehua, ñeñña yetropa' allempo amesen judionesha'. ¹⁰ Ñeñto'marña judionesha'pa' atet ochet ñeñ o' correrra:

—Te' añe yetro allempocma yamesen. Amaca'ye pocteyaye o'ch ñanen pemue'.

¹¹ Tarraña ñapa' atet otanet:

—Ñeñ o' a'crratosenpa' atetca' otosen: “Pechta'nen pemue'pa' pechope'chnen.”

¹² Ñetña'pa' allenta a'pto'chet:

—¿Esesha'tña pto'seña, “O'ch pechta'nen pemue'pa' o'ch pechope'chen”?

¹³ Tarraña ñeñ a'crrataretterrtsapa' ama eñoteñe esesha'teña a'crraterre' tarro'mar Jesús'pa' ama allo'tsenaro, ñapa' o' ahuer a'nahua, tarro'mar all shontosa acheñenesha' ñeñcha' entenaya'. ¹⁴ O'ña atarr o'chetpa' Jesús'ña'pa' alla enterran ñeñ a'crraterr ñorra' e'ñe alla Parets pa'paclo. Allña'pa' atet oter:

—Te'pa' o' pocrerra. Te'ña'pa' amach alla p'cho'ña'tatsterrerro ñato'rraña alla nanac pemueroçhterrerr.

¹⁵ Yacmañapa' o' ahuer, atet otuerran judionesha':

—Jesúsepa'tca'yeña ñeñ na'crraterre'.

¹⁶ Atet pena Jesús añe yetro allempo amesen judionesha' ñeñto'marña ñetpa' o'pateñet Jesús. ¹⁷ Jesús'ña'pa' atet otanet:

—Nompore'ñe teme'ttsen atarr torrena ñeñto'marña napa'cho'ña atarr nemneñ o'ch neorra ñaña.

¹⁸ Ñeñto'marña judionesha' pa'mcha'tareternesha'pa' ello atarr nanac o'pateñet o'ch muetset, tarro'mar ñetpa' atet otyeset:

—Ñapa' ama ñapñaye' aña yeter o' puesuerro allempocma yamesen, ñapa' aña'naña oten e'ño' Pomporenan Parets, ñapa' atfaca'ye mueneñ o'ch Partsocoptartena.

Atto atarr ahuamencattena Jesús ñeñt Yompor Puechemer

¹⁹ Jesúsñapa' atet oterraneterr:

—E'ñe po'ñoçh notenes, na ñeñten Puechemer pen Yompor amate' errotenot es neñoña e'ñe noña. Napa' aña atet neña'yen atet nenteñañ Apa, tarro'mar ñeñt atet pen Apapa' napa'cho'ña ñeñten Puechemerenpa' atetcha' es neña'yen naña. ²⁰ Apapa' atarr muerenna tarro'mar napa' e'ñeca'ye po'ñoçh Puechemeren, ñeñto'marña gatyenen ora allohuen ñeñt atet pa'yen ña. Elloña ñapa' añ gatyenen ñeñt nanac torrapotyets ñeñt atet etsotayen ña; ñeñtpa' añecop atet pennan atfoña sapa' atarrcha' secuanrrortenen. ²¹ Ñehua, yeñoteñ Apapa' tantaterran arromñañenesha'pa' apuerranet allochña ñetpa' corretsetach. Napa'cho'ña e'ñeca'ye atet nepenaña naña ñeñten Puechemeren. Ñerra'm erra'tsencha' nemna' na o'ch napanet allochña ñetpa' corretsetach atetcha'ca'ye napuerranet. ²² Apapa' ama't puesheñarrapa' amach a'metanperraneto errotencha' entyesuerranet. Naña apuen llesens ñeñten Puechemeren nachña a'metanperrahuet errotencha' nentyesuerranet e'ñe puesheña'ttset. ²³ Allochñaapa' atfochña allohuenet mecha'na'tennetcha' naña ñeñten Puechemeren e'ñe atet mecha'na'tennanet Nomporenan Parets. Ñerra'm esesha' ama nemcha'na'tenaye na ñeñten Puechemeren, Nompore'naca'yeña ama mecha'na'teneto ñeñt nellsensene'.

²⁴ 'Napa' e'ñe po'ñoçh atet notenes: Ñerra'm esesha' e'mñote' neñoñ ñaña ñerra'm yemterrnanet Nomporenan ñeñt nellsensene' ñetñaapa' corretsetach pocsheñeshocmañen tayoteñ errponañohuen. Amach a'coñchatareterreto ama't errponaña. Tarro'marña ñetpa' o' metanerretña ñeñt e'ñe po'ñoçh rromueñets, o' çherret allña ñetpa' corretsetach tayoten errponañohuen. ²⁵ E'ñe po'ñoçh o'ch noterrser: O' çherrmoch allempoch atet perra, ñeñt arromñañenesha'pa' ñetñaapa' e'muerrnanetcha' neñoñ ñeñten Yompor Puechemeren. Ñeñtcha' e'mñoterre' na neñoñ ñetñaapa' corretsetach. ²⁶ Ñehua, Apapa' e'ñe noña correna, ña napueneña atfoch napa'cho'ña corretsanach naña ñeñten Puechemeren. ²⁷ Naña ña napueneña llesens atfoch nemñe patanta'tets acheñenesha' coñcheñtso, po'potantaññaapa' amach nemñerraneto coñcheñtso. Atetca'ye allsensaretenña na Ñeñten e'ñe Acheñetosets. ²⁸ Ñeñt atet o' notuaspa' amach cha semoññe'tatsche tarro'mar esempopa' çherrcha' ama't ñeñt puepampro'tsa'yenpa' e'muerrnanetcha' neñoñ. ²⁹ Cha'nmaçherretcha' allot apamparettete't. Ñeñt atet pa'yesaye't e'ñe cohuen ñeñt poctetsa ñetñaapa' añecopcha' tanterret atfoch ello alla correrret. Ñeñtña pa'yesaye't ñeñt ama pocteyaye ñetñaapa' añecpach tanterret atfoch ello alla amñareterret coñcheñtso.

Atto Jesús eñotatanet ñapa' Yomporeshot aparetta llesens

³⁰ 'Amate' errotenot es neña'yesoña e'ñe noña. Atet eñotatenen Nomporena atfochña nemñe patanta'tets acheñenesha' coñcheñtso, po'potantaññaapa' amach. Naña errotencha' nentyesuerranetpa' ñeñtpa' e'ñe pocte' tarro'mar ama e'ñe na nemnenñoteye' es neña'yeno. Nomporeña puemnenñot es neña'yen tarro'mar ña nellsensene'. ³¹ Ñerra'm e'ñe nañeña a'poctetsa, ñeñt atto na'potenapa' amate' es sherbeno. ³² Eñallña po'psheñeñ ñeñt e'ñe no Nomporenan ñeñtña na'poteneña na. Naña neñoteñ ñerra'm ña na'pote'pa' ñeñt atto a'potenen ñeñtña e'ñe po'ñoçh sherbets. ³³ Naña sa ahuañmo'chapa' semñe acheñ Juanesho ñeñt a'pto'tose' nocop. Juanña atto a'potanpa' ñeñtña e'ñe po'ñoçh atet. ³⁴ Napa' ama e'ñe nocpa ne'nen ñeñt na'pote'; añecpa'naña notenes

sa ñato' sapa' same'ñoña' Juan po'ñoñ atto a'potan na, allochña' attoch sequeshperra same'ñoñoten. ³⁵ Juanpa' e'ñe atet pe't ñerra'mrrate' lampareñ corretsa, attoña choyo'te't. Sañapa' sa muenatse't o'ch socshame'ta mame' all a'puetarsam'psas. ³⁶ Tarraña atet na'poten napa' ñeñña nanac sherbets. Ello metanenan ñeñt atet a'potan na Juan. Allohuen es nepa'yen ñeñt atet yechenna Apa o'ch e'ñe netsotoñ, añ netsotateña' ñeñña o' eñotatanet napa' Apa nellsensene'. ³⁷ Ñaña Apa ñeñt nellsensene' ñapa'cho'ña ñaca'yeña na'potene'. Sapa' ama't ahuatapa' ama se'maroneña po'ñoñ atet e'morrtena, ñaña ama sentareña atet orrtena ña. ³⁸ Sapa' ama't po'ñoñapa' ama chennasoña seyo'chro tarro'mar na ñeñten llesensen Apa, sañapa' ama same'ñenno. ³⁹ Sapa' añcha' setorra'yesa Yompor po'ñoñ ñeñt atet anuaret ahuatoteñ tarro'mar sapa' chate' sotenapañ e'ñe ñoñsochayo'apa' sapa' corretsasate' errponohuañen. Tarraña Yompor po'ñoñ ñeñt anuaret ahuatoteñ ñeñtpa' naca'yeña a'pote't. ⁴⁰ Sañapa' amaña semnoña o'ch same'ñerrna attochña e'ñe socrrerañ.

⁴¹ 'Tarraña napa' ama aye'e' ne'nenno attoch aye'cho'chtatennan acheñenesha'. ⁴² Tarro'mar napa' neñotenes sapa' ama't mameshapa' ama semorrenteño Yompor ama't seyo'chra. ⁴³ Napa' atto nohuapa Nomporna nellsensene' tarraña sapa' amaña same'ñenno. Ñerra'm esesha'chña huapatsañ ñeñt e'ñe ñoña huena saña ñeñtpa' atarrte' same'ñyañ. ⁴⁴ Sapa' tarro'marña ama same'ñenno sapa' añaca'ye se'nen o'ch e'ñe sañeña aye'cho'chtatannetsa, amaca'yeña aye'e'ña se'nenno attoch e'ñe cohuen entas ñapue't Yompor. ⁴⁵ Amach soctape'chatsche ñato' nach sottene'cherre' esempohuañen Apuesho. Tarraña eñallca'yeña po'psheñeñ ñeñtcha' sottene'cherre' ñeñtpa' añca'ye Moisés, sañapa' ñeññaña atarr nanac seyemtena. ⁴⁶ Ñerra'm po'ño'ch same'ñeñañ Moiséspa' napa'cho'ña same'ñennañcha' tarro'mar ñapa' nocopca'ye quellconas. ⁴⁷ Tarraña ñerra'm ama same'ñeñaño ñeñt atet quellconase't ña, ñeñto'marña napa'cho'ña amach erroteno't same'ñoñoña ñaña neñoñ.

6

Allempo Jesús'pa' rratenan shonte' acheñenesha'; ñeñña acheñenesha'pa' allo'tsen amnaroch mil

(Mt. 14.13-21; Mr. 6.30-44; Lc. 9.10-17)

¹ Allempoña Jesús'pa' ahuo' yom'ta'n sa'p Galileaso, ñeñtara sa'p otenet Tiberias. ² Allña'pa' co'ta'neñ shonte' acheñenesha' tarro'mar ñetpa' o' entuoñet po'partsoña atto a'crratyerran allohuen ñeñt atsna'tyets. ³ O'ña chap yom'ta'n Jesús'ña'pa' ahuos aspeno, allña anorros epuet pueyochresha'. ⁴ Allempopa' o' chapmoch pascuapo allempoch alla cosherrerr judionesha'. ⁵ Jesús'ña' cohua'tsa a'yopa' entapan shonte' acheñenesha' ñeñt onachets ñeshone't. Allempoña'pa' atet otan Felipe:

—Errahuachca' yerañña' pante' ñeñtcha' rros acheñenesha' ñeñt o' huach'a'ta.

⁶ Ñehua, Jesús'pa' e'ñe po'tomña atet ot tarro'mar ñapa' eñoteñ atetcha' pa'. ⁷ Felipeña'pa' atet och:

—Ama't epoch charroch charra' denario* alloch yerañña panpa' ama't pueshmetatollapa' amate' rra'yese'to.

⁸ Pueyochresha'ña Andrés ñeñt pa'mo'nasheñ Simóm Pedropa' ñaña'pa' atet och:

⁹ —Arr puesheñarr huepueshachorpa' echenanca'ye amnar pan ñeñt cebada ñaña epa cac. Atapa' amate' yepataneto, acheña' shonte'ca'ye.

¹⁰ Jesús'ña'pa' atet otanet:

—Te'pa' sotanet anorrcha'tetepa'.

Ñehua, allpa' e'ñe cohuen emmo'raten pasetma'. Ñetña'pa' anorrcha'tet. Yacmanesha'pa' ñato' amnarochte' mil eñall. ¹¹ Jesús'ña'pa' chetan panpa'

* 6:7 Denariopa' quelle ñeñt allpon tsa'tenet pam'tarr ñeñt taruaset's all pa'nyo.

parasyoso'tam̄pes, allempoñapa' apan pueyochresha'. Pueyochresha'ñapa' epanyeset allohuen acheñenesha' ñeñt̄ anorr̄chets all. Attecma p̄a allempo apa'yesanet ñaña cac. Allohuenetpa' e'ñe agaphuahuet ñeñt̄ allpon muena'yeset. ¹² Allempoña o' rrallme'chuetpa' allohuenetpa' e'ñepa'tcha' yetrra'tuahuet. E'ñe yetuahuetpa' Jesúsñapa' atet oterranerr pueyochresha':

—Te'pa' o'ch sa'yapacherr ñeñt̄ shotna'tyets ñeñt̄ sa'pchatyes allochñapa' amach es pertats̄o.

¹³ Allempoña a'yapacherret ñeñt̄ shota'tatyestet chepa'tcha' chorrats charra' puechena epa cañter ñeñt̄ a'pchatet all rratanet amnar pan cebada. ¹⁴ Atto orrtatanet po'partsoña acheñenesha'ñapa' atet otyeset:

—Añña po'ñoçhpa' ñeñt̄ca'ye a'mtene' Yompor po'ñoñ ñeñt̄ atarr yecuen o'ch huapa añe patsro.

¹⁵ Jesúsñapa' eñotanet ñetpa' añ muenenet o'ch huapoñetpa' o'ch rromoset o'ch noset ñeñt̄cha' pa'm̄cha'tareter pet. Ñeñto'marña Jesúsapa' a'nahua ahuer all aspento e'ñe ñapueñ.

*Atto Jesúsapa' e'ñe cohuen chope'chnen enot̄ oño
(Mt. 14.22-27; Mr. 6.45-52)*

¹⁶ Allempoña ellerren pueyochrenesha'ñapa' ahuanerret sa'patop̄ño.
¹⁷ A'tacha'tuerret po'noñtopa' o'ch ahuan̄perret yom̄ta'n, Capernaumonet. Allñapa' alla checmetam̄pset. Jesúsñapa' ama huerra' all allo'tsa'yenet. ¹⁸ Allñapa' orrnotam̄pesnomuet, sa'pñapa' cha emo'yarerta. ¹⁹ Ñetñapa' echotnomuet sa'p amnar amapa' pechapte' kilómetro allñapa' machayotepa'tcha' entapet Jesús chope'chnen enot̄ oño. O' allame'ttsam̄a p̄an noñt̄. Ñetñapa' chepa'tcha' mecha'tapet. ²⁰ Tarraña ñapa' atet otosanet:

—Naca'ye o' nohuapa, amach at̄ta sem̄cha'tatstapno.

²¹ Ñetñapa' mueneñetañ o'ch agapapet noñtoñ, eñotostsetpa' o' chapña noñt̄ yom̄ta'n all sechenet.

Allempo acheñenesha'pa' e'nereta' Jesús

²² Tsapatña acheñenesha' ñeñt̄ alla a'patsa yom̄ta'n ñetpa' eñoteñet e'ñe pat̄rra noñt̄ allo a'tacha't Jesús pueyochresha' ñaña Jesúsapa' enteñet amaca' a'tapo noñto epuet pueyochresha' e'ñe ñap̄tochayeta ahuanmuet. ²³ Tarraña noñteçhnoñapa' chocma huaçhena Tiberiasot, o' chapuet allame'tets all rret ellerro pan ñeñt̄ parasyoso'tam̄pes Partsessa' Jesús. ²⁴ Allempoña acheñenesha' ñeñt̄ allo'tsen ñetñapa' o'huañ eñchet Jesús pueyochreshohuen. Ñetpa'cho'ña allenta a'tacha'tet ñamet noñto, ahuan̄pset Capernaumonet, o'ch e'nereta' Jesús.

Jesúsapa' ña yocrram̄ yepen yecamquēñecop alloch e'ñe yocrrena

²⁵ Allempoña entoset yom̄ta'npa' atet otoset:

—Maestro, ¿esempo'tña peçherrña p̄a arrma?

²⁶ Jesúsñapa' atet otapanet:

—Na po'ñoçhpa' o'ch notapas, sapa' amaca'ye añecpaye' se'nenno atto o' norrtatonas nepartsoña. Sapa' añecpaca'yeña se'nenen atto o' nerratuas pan o' e'ñe seyeta.
²⁷ Te'pa' o'ch notas, sapa' amach añña sema'yochratsto yocrram̄ ñeñt̄ e'nuapo'. Añcha'ña sema'yochra socrram̄ ñeñt̄ ama e'nuapahuoyaye; ñeñt̄ña alloch sapa' corretsasach socsheñeshocmañen e'ñe tayoteñ ama't errponañohuen. Ñeñt̄ña socrram̄pa' nach sapuerre' Ñeñten Acheñetosets tarro'mar Apapa' o'llesenserren na Ñeñten Acheñetosets arr patsro.

²⁸ Acheñenesha'ñapa' atet otereterr:

—Errotenuachca' yepaña ñeñt̄ cohuen enten Yompor.

²⁹ Jesúsñapa' atet oterraneterr:

—Ñeñt cohuen enten Yomporpa' o'ch same'ña'na na ñeñten llesensen.

³⁰ Ñetña'pa' atet otereterr:

—Erroteno'wachca' pegateyña pepartsoña ñeñtcha' yentpa' attotcha' yame'ña'pa. Papa' esuañaca' petsoten. ³¹ Ya yatañneshaña' rra'yese'te' ñeñt maná all amayo atetca'ye anuaret' Yompor po'ñoñ ahuatoteñ: "Rratyesanete't pan ñeñt apanete't Yompor pue'ntañot."

³² Jesúsña'pa' alla oterraneterr:

—E'ñe po'ño'ch o'ch notas: Ama Moisésoye' apahuete'teña pan ñeñt huetsa ento't. Naca'ye Nompor sapuene'ña ñeñt e'ñe po'ño'ch socrram' sepen. Añ socrram'pa' ento'ña huena. ³³ Naña socrram' sepen ñeñten o' apuerres Nompor, napa'cho'ña ento't nohuapa Yomporeshot allochña'pa' acheñenesha'ña arr patsropa' ñetña'pa' corretsetach.

³⁴ Ñetña'pa' atet otereterr:

—Ayochreshate yapa'cho'ña chocmach p'apuey ñeñt corramets.

³⁵ Jesúsña'pa' alla oterraneterr:

—Napa' na corram'tsotets alloch e'ñe socrra. Esha'ch huapatsa nesho ñetña ama't ahuatapa' amach alla cheporrerrete'te. Esha'ch name'ñerraya na ñetña ama't ahuatapa' amach alla oñpa'terre'te. Ñehua, ñeñt'pa' añ notenes, esha'ch name'ñerraya na ñetña'pa' chocmach e'ñe cosherret pueyo'chreto, ama't ahuatapa' amach alla es e'nerrete'te. ³⁶ Tarraña napa' o' notuas: Sapa' o' sentnoñ amaña same'ñenno. ³⁷ Allohuen acheñenesha' ñeñt o'patatenna Apapa' ñetña'pa' ame'ñerrnetcha'. Esha'ch name'ñerraya ñetña'pa' amach alla nehuapore'terraneto. ³⁸ Tarro'mar napa' ama añecpaye' nohuapoña ento't attoch o'ch añ atet ne'pos ñeñt nemnen na. Napa' añecopña nohuapa o'ch atet neperr ñeñt atet muenen Nompor ñeñt nellsenserre'. ³⁹ Ñeñt'pa' atet muenen Nompor ñeñt nellsenserre': Amachña cha na'chencatereña acheñenesha' ñeñt ora allpon o'patatenna na, chochña ello netantaterrñañ esempohuañen. ⁴⁰ Añmapa' ñeñtña muenen Nompor: Erra'tsencha' neñoterre' ñerra'm ame'ñerrnetcha' na ñeñten Yompor Puechemeren, ñetña'pa' corretsetach pocsheñeshocmañen tayoteñ ama't errponañohuen. Ñetña'pa' chocmach netantaterranet esempohuañen.

⁴¹ Atto Jesús'pa' otenanet, "Napa' na corram'tsotets ñeñten huapatsa ento't", judione-sha'ña'pa' pocuana'teño'tet otatse'tyeñet. ⁴² Ñeñt'pa' atet otyeset:

—Añmapa' añaca'ye Jesús, José puechemer, ñeñt pompor ñaña pachor e'ñeca'ye yechme'teñ. Te'ña'pa' eso'mare'tña oten ñapa' entoto' huapa.

⁴³ Jesúsña'pa' atet otanet:

—Sapa' amach atta sotatse'tanna'tyesatsto. ⁴⁴ Ama't eseshapa' amach erroteno't ame'ñerrneto ñerra'm Nompor ñeñt nellsensene' ñerra'm ña ama cotape'chaterrahuet cohuen. Ñetña'pa' netantaterranetcha' esempohuañen. ⁴⁵ Atet quellquë't ñeñt a'm'taye't Yompor po'ñoñ ahuat, po'quellcopa' atet anuaret': "Allohuenetpa' Yomporcha'ña eñotaterrahuet." Allohuen ñeñtcha' e'mñoterre' Nompor attoch cohuen cotape'chaterranet, ñetña'pa' nachña ame'ñerret.

⁴⁶ 'Ama't eseshapa' ama puentareto Apa. Naptaña na ñeñten huapatsa Yomporeshot nentarca'yeña Apa. ⁴⁷ E'ñe po'ño'ch notenes: Esha'ch name'ñerraya ñetña'pa' corretsetach pocsheñeshocmañen tayoteñ e'ñe errponañohuen. ⁴⁸ Napa' na corram'tsotets alloch e'ñe socrra. ⁴⁹ Satañneshaña' ama't rra'yese'te' ñeñt maná all amayo, ñetña'pa' o' colla'huenet. ⁵⁰ Tarraña ñeñten sotene'te' ñeñtña e'ñe po'ño'ch socrram' ñeñten huapatsa ento't allochña'pa' esha'ch rre'pa' ñetña'pa' corretsetach tayoteñ e'ñe errponañohuen. ⁵¹ E'ñe po'ño'ch napa' na ñeñten corram'tsotets alloch e'ñe socrra ñeñten huapatsa ento't. Ñerra'm esha' rre' añ corrametspa' ñetña'pa' corretsetach tayoteñ e'ñe errponañohuen.

Añ corramets ñeñtcha' nepomuerr na acheñenesnacop arr patsro alloch e'ñe correnet, ñeñtpa' añca'ye nechets.

⁵² Judionesha' ñapa' ñeñto' mara'cho' es otanna'tyeset. Ñetñapa' atet otyeset:

—Errotenotuachñaca' apueyña e'ñe ña po'chets ñeñtcha' yerra'.

⁵³ Jesúsña'papa' alla oterraneterr:

—Po'ño'ch o'ch notas, ñerra'm ama serrerrnano nechets Ñeñten Acheñetosets, ñerra'm ama sorrerrnano ñaña nerras, sapa' amate' errotenot socroña sa. ⁵⁴ Ñerra'm esesha' rrene' nechets ñaña ñerra'm orrennanet nerras, ñetñapa' corretsetach tayoten e'ñe errponañohuen, tarro'mar ñaña' netantaterranetcha' esempohuañen. ⁵⁵ Tarro'mar nechets ñeñt e'ñe po'ño'ch corramtsotets; ñerraspa'cho'ña ñeñt e'ñe po'ño'ch orrapo'. ⁵⁶ Ñeñtcha' rrene' nechets ñaña ñerra'm orrennanet nerras ñetñapa' e'ñech parrocmatenet na, napa'cho'ña e'ñech neparrocmatenanet ñet. ⁵⁷ Apa ñeñt nellsensene' ñapa' ama arromñateshayaye, ñaca'yeña napuene'ña atto napa'cho'ña corretsanach. Atet nepena ñaña, allohuen ñeñt pocrramñ nepene' napa'cho'ña añ napuenanet attoch ñetpa'cho'ña corretsetach ñamet. ⁵⁸ Na ñeñten socrramñ sepen ñeñten huapatsa entot. Ama atteyayno ñerra'mrrate' pan ñeñt rre't satañneshañ ahuat. Ñetpa' o' colla'huenet. Esesha'ch e'ñe pocrramñ nepene' ñetñapa' corretsetach tayoteñ e'ñe errponañohuen.

⁵⁹ Arrpa' allohua ñeñt atet ye'chatenan acheñenesha' judionesha' po'prahuo all Capernaumo.

Jesús po'ñoñ ñeñtpa' alloch yocrrena tayoteñ errponañohuen

⁶⁰ Allempoña atet e'mueñet atet oten, shonte' pueyochresha'chnopa' atet otyeset:

—Añ ñoñetspa' amaca'ye e'ñeye' pocteyaye, amate' esesha' ame'ñayo.

⁶¹ Jesúsapa' e'ñe pueyochro eñotanet cha otatse'tyen pueyochresha'chno, ñeñto'marña atet oterraneterr:

—Ñeñt atet notenespa' are't pocteye' senteñe. ⁶² Ta'm, ¿errofena'tcha' sotña ñerra'm po'ño'ch sentennoñ na Ñeñten Acheñetosets o'ch alla na'terreñ ento allot nohuapa ahuat? ⁶³ Yecamquëñ alloña e'ñe po'ño'ch yocrrena. Yechetspa' ama't coñe'tapa' ama sherbeno. Neñoñ ñeñt neserrpare'tatenespa' e'ñe po'ño'ch secamquëñecop ñeñtña po'ño'ch alloch e'ñe socrra. ⁶⁴ Tarraña pantanta'ttsospa' amaña same'ñenno.

Ñehua, Jesúsapa' e'ñe allempoteñ eñotenan ñeñtcha' ama ame'ñerrtso. E'ñe eñotenan ñaña ñeñtcha' pomuerre'. ⁶⁵ Jesúsapa' alla oterraneterr:

—Ñeñto'marña napa' notase't, amach esesha' name'ñerrayo ñerra'm ama Apa cotape'chaterrahueto attoch coterrnet.

⁶⁶ Allempoteñña shonte' Jesús pueyochresha'chno puerra'cherret ñesho'pa' o'huañ chopeñe'chenet parro. ⁶⁷ Allempoña Jesúsapa' atet otan pueyochresha' ñeñt çharrasheña puechena epa:

—Sapa'cho' ¿semneñe't o'ch sepurrerra samña?

⁶⁸ Simón Pedroña'papa' atet och:

—Partseshacha', esesha'huate'ñaca'ye yoc'ta'. Paptaca'ye pechenña ñoñets attochña yapa' corretsayach tayoteñ errponañohuen. ⁶⁹ Yapa' o'ca'ye yame'ña'pa. Yapa' yeñotene'p papa' pepa'tca'ye Cristotets, ñeñte'p Yompor Puechemere'p.

⁷⁰ Jesúsña'papa' atet otanet:

—Napa' naca'yeña sa'crerre'ña sa, çharrasheñas sepchena epa. Ñeñtña puesheñarrpa' ñeñtpa' oneñetena'tar.

⁷¹ Ñehua, Judasocop atet eñora. Ñeñt Judaspa' ñeñt Simón Iscariote puechemer. Ama't ñeñt a'pchenahuetañ epa pueyochresha', puesheñarrpa' ñeñtcha' pomuerre'.

7

Ama't ñeñt pa'mo'nasheñnesha' pen Jesús pa' ñetpa' ama eseshaye' ame'ñenayo

¹ Allempoña Jesús pa' alla chopeñe'chyen e'ñe alla Galileo'mar. Ama mueno o'ch chopeñe'chen ñaña all Judeo'mar tarro'mar judionesha'pa' cha o'pateñet o'ch muetset. ² Allempopa' o' cherrmocherr allempoch cosherrerr judionesha'; ñeñtcha' cosherreterr añ pa'so'cheñ Manatpuetsopo', ñeñt atet ye'chenet ñet. ³ Allempoña Jesús pa' atet och pa'mo'nasheñnesha':

—Te'pa' orrerreḡ arroḡ, ahuerreḡ alla Judeo allochñapa' peyochreneshachno ñeñt allo'tsa'yen o'ch ḡorrtatuerranet ñamet pepartsoña ñeñt atet peḡa'yena te' arrma.

⁴ Ñehua, ñerra'm yemneñ o'ch yorrta allohuenacoppa' ama't puesheñarroḡeyapa' amachña a'nahua es yeḡa'yeno. Ñerra'm po'ño'ch ḡorrtatyen pepartsoña arrpa' ḡorrtachñaca'ye ñaña allohuen acheñenesha'cop añ patsro.

⁵ Ama't pa'mo'nasheñnesha'pa'cho'ña tarro'mar atet ochet ñetpa'cho'ña amaca'ye ame'ñeñeto. ⁶ Jesúsñapa' atet otanet:

—Allempo ñeñt poctetsa nocop o'ch norrta allohuenacoppa' amaca'ye e'ñeye' chena'. Tarraña socoppa' e'ñeca'ye pocte' chocmaca'ye eñall. ⁷ Tarro'mar acheñenesha'ña añ pat-sropa' amachca'ye erroḡenoḡ e'moñe'tasoña sa, tarraña napa' chocma e'moñe'tyennet tarro'mar napa' añca'ye neñotatyenanet ñeñt atet ḡatse'tyenet ñeñt ama pocteyaye. ⁸ Sapa' orras socshapretena'. Napa' e'ñe tayecmapa' amachca'ye neto coshapretatsa. Tarro'mar nocoppa' ama e'ñeye' chena' allempoch e'ñe pocta'huona.

⁹ Atet otuanetpa' ñapa' alla a'pa mame' Galileo.

Allempo Jesús coshapretena' ñeñt otenet Manatpuetsopo'

¹⁰ Allempoña pa'mo'nasheñechnopa' ñetñapa' ahuanmuet coshapretatset. O'ña tama o'chetpa' ahuo' ñaña, tarraña ñapa' ama orrtenaneto, a'nahua coḡa'nenanet chenta'.

¹¹ Judionesha'ña all coshenetpa' ñetñapa' e'neñet atet otyenet:

—Ta'mca'ye ¿erro'tsente'ña Jesús?

¹² Allña acheñenesha'pa' shonte' eñosyenet ñocop. Patanta'tetspa' atet otyenet: “Ñapa' e'ñe cohuen acheñer”; po'potantañechnopa' atet otyenet: “Amaca'ye cohuenayaye, atḡaca'ye shecare'tyenan acheñenesha'.”

¹³ Ñetpa' atarr mecha'teñet judionesha' ñeñto'marña a'nahua atet otanna'tyenet.

¹⁴ O'ña patma'nma atto coshenet Jesúsñapa' be'tosos Parets pa'paclo, ye'chatosanet all.

¹⁵ Allñapa' epaye' cohuanrrorch judionesha'. Ñetñapa' atet otyeset:

—Ta', erroḡente'ca'yeña añ, ama't ama ay'chatarete quellecpa' atarrepa't es eñotyen.

¹⁶ Jesúsñapa' otanet:

—Ñeñt atto ney'chatyenes ñeñtpa' amaca'ye noyaye noctapña, ñeñtpa' Yomporoña poctapña ñeñt nellensene'. ¹⁷ Ñerra'm esesha'ña muene' o'ch atet pet ñeñt muenen Yompor ñetñapa' eñochetcha' ney'chateñpa' Yomporo amaca'ye noḡaye' neñeno. ¹⁸ Ñerra'm esesha' e'ñe ñoḡoḡa eñenpa' ñetñapa' añach e'nenet o'ch cohuentateññañ acheñenesha' e'ñe ñocop. Añña ñerra'm esesha' e'nene' o'ch cohuentatenan ñeñt llesensene' ñapa' ñeñtña eñetsña ñoñtso e'ñe po'ño'ch ama shequēñtsoyaye.

¹⁹ 'Ama't apasoña Moisés ñoñets ñeñt atet anareḡ. Tarraña ama't apaseñ, sañapa' ama't e'ñe puesheñarroḡesapa' ama seḡohuenoña ñeñt atet oten añ ñoñets, ñeñtēpñapa' eso'mare'tña te'pa' semneñña o'ch semtsan.

²⁰ Acheñenesha'ñapa' atet otereterr:

—Papa' chate' chorrenḡa oneñeḡ. Amarramche' esesha' ḡo'patenayeña o'ch muet-sapet.

²¹ Jesúsñapa' alla oterraneterr:

—Napa' ama't parrocha norrtatonas nepartsoña añ yetro allempo yamesen saña allempopa' atarr secuanrroretnoñ tarraña sañapa' ama pocteye' senteñe. ²² Moisés'apa' apa'nmas ñeñtcha' seycha' attoch setsorrannena. Ñehua, po'ñoçh ñeñtpa' ama ñanom Moisésoye' sapaye, ñeñtpa' satañneshañe'naña seychatnomue' ahuaototeñ. Ñeñto'marña sapa' chocmach setsorraten asheñorrotoñ ñerra'm o'ch posocmata'muen ama't añ yetro allempocma yamesen chocmaña setsorratenña asheñorrotoñ. ²³ Atto sapa' setsorraten asheñorrotoñ ama't añ yetro allempocma yamesen attoch amach satpueno ñoñets ñeñt atet anaret Moisésot, ñeñtepñapa' eso'maruñaca'yeña se'moñe'tenenña na allempo e'ñe na'crraten puesheñarr acheñ añ yetro allempocma yamesen. ²⁴ Ñerra'm esempo senteñ po'psheñeñ ñeñt atet penpa' amachña ñeñtoña sotteñe'chatsche año' cohuenaye' es yeçcateno. Chochña ñanom señoçh errotenente'ña ñeñt po'ñoçh atet pena.

Atto Jesús'apa' eñotatanet ñapa' Yomporeshot huapa

²⁵ Patanta'tets jerusaléño'marnesha'pa' atet otyenet:

—Ta'm amate' añeyayeña ñeñt o'patenet o'ch muetset. ²⁶ Ñapa'cho'ña allo'tsenepa't arr, atta ama es pueçheno eñosets, amaña erroteye'ña oteñeto. Ñato' tarro'marte'ña ama't añcha'taretnesha'pa' o'ca'ye eñotuet po'ñoçh ñapa' ñeñtca'ye Cristotets. ²⁷ Tarraña añpa' yeñoteñca'ye allot huena. Tarraña esempoch huapa ñeñtcha' e'ñe po'ñoçh Cristotats ñapa' amach eseshaye' eñotapaye errothca' huapa.

²⁸ Jesúsña allempo yeçhaten Parets pa'paclo, ñapa' puerranarot atet otanet:

—Sapa' sechme'tennoñte', señothennoñte'ña na errotte' nohuapa. Tarraña napa' ama notaye' nohuapo, eñallña ñeñt nellsense'; ñapa' e'ñe po'ñoçh ñerra'm erroth ot, ama puenesho po'ñoñ. Ñeñtña sapa' ama señotheña sa. ²⁹ Nañapa' e'ñe neñoteñ, ñesho'tca'ye nohuapa. Ñapa' ñeñtca'yeña nellsenserre'.

³⁰ Allempocma atarr mueneñet o'ch rromuetañ tarraña ama esesha' rromaye. Tarro'mar ama çhena' allempo ñeñt poctetsa ñocop attoch rromuet. ³¹ Shonte' acheñenesha' ñeñt ame'ñaya. Ñetñapa' atet otyenet:

—Añte'ca'yeña po'ñoçh Cristo ñeñt yecuen o'ch huapa. Yapa' o'ca'ye orrtatosnay po'partsoña, amate' errotenot huapo po'psheñeñ ñeñtcha' ello metanose' po'partsoteña ñeñt atet entatyeny añ yacmar.

Allempo fariseonesha'pa' mueñet guardianesha' ñeñtcha' rromuenayañ Jesús

³² Fariseonesha'ñapa' e'mare'teñet shonte' acheñenesha'pa' e'ñe cohuen eñosyenet Jesúsocop. Ñeñto'mar ñet ñaña ñeñt pa'mcha'taretnesha' pen allohuen judionesha' po'cornaneshar, ñetñapa' mueñet guardianesha' ñeñtcha' rromuenayañ Jesús.

³³ Jesúsña'p alla oterraneterr:

—O' mameshaña e'ñe parro'tseney. O'chña mamerrerrpa' o'ch alla ahuerren allo'tsen ñeñt nellsensene'. ³⁴ Allempoña ama'tcha' se'name'terrenpa' amach senterrno. Allcha' neserr napa' sañapa' amate' errotenot seçhapa.

³⁵ Judionesha'ñapa' atet otanna'tyeset:

—Ta', çerrach taña añma ñeñto'mar amach yentere? Ñato' arrcha' ta griegoneshesho all parratse'tyen yamo'tsesha' o'ch yeçhatenana' griegonesha' all. ³⁶ Ta', çeste'ña añma ñeñto'mar atet oten: “Ama'tcha' se'nerrna'pa' amach senterrno; allcha' neserr napa' sañapa' amach errotenot seçhapa”?

Allohuen ñeñt ame'ñenaya Jesús, Parets Puecamquëño'pa' e'ñe pueñmateño'tet pueyoçhreto atet penet ñerra'mrrate' allot poten oñ ñeñt atarr cohuen

³⁷ O' e'ñe huañmoch all coshena judionesha'. Añe yetro allempo nanac coshenet, Jesúsña'p tomos all, puerranarot atet otosanet:

—Erra'tsente' acheñer oñpa'tets e'ñe pueyočhreto, onetepa' nesho orretepa'. ³⁸ Ñeñt name'ñenaya na e'ñe pueñmateño'tet pueyočhretopa' atet pena ñerra'mrrate' allo't poten oñ aton ñeñt atarr cohuen, tarro'mar ñeñtpa' atet oten Yompor po'ñoñ ñeñt anuaret ahuatoteñ.

³⁹ Nehua, añ ñoñetspa' añecop serrpare'ten Yompor Puecamquëñecop ñeñtcha' chor-rerraya allohuen ñeñtcha' ame'ñerraya ña. Tarraña allempopa' ama apare'tteneta' Yompor Puecamquëñ, tarro'mar Jesús'pa' ama čhena' allempoch alla ahuer Yompor pue'ntaño allcha' e'ñe cohuentaterrñañet.

Allempo acheñenesha'pa' ellopa'tetstatenet počtapña Jesúsocop

⁴⁰ Allempo e'mhuet ñeñt atet oten Jesús, patantarrña acheñenesha'pa' atet otyeset:

—Po'ñočh añmapa' ñeñtca'ye a'mtene'ña Yompor po'ñoñ ñeñt čhocma yecuen.

⁴¹ Po'potantañpa' atet otyeset:

—Añmapa' ñeñtca'yeña Cristotets ñeñt čhocma yecuen.

Po'potantañpa' atet otyenet:

—Ñeñtcha' Cristoterrets'pa' amate' arro'ta huapo Galileo't. ⁴² Ama't otenoña Yompor po'ñoñ ñeñt anuaret, Davidcha' po'mrenño't huapaña ñeñtcha' Cristoterrets; arro'tcha' huapa anetsot ñeñt Beléñ ñeñt pa'netser pe't David.

⁴³ Ñeñto'marña allohuen acheñenesha'pa' ellopa'tetstatenet počtapña Jesúsocop.

⁴⁴ Patanta'tetsñapa' atarr mueneñet o'ch rromuet, tarraña ama esesha' rromaye.

Atto judionesha' pa'mcha'tareternesha' ama ame'ñeñeto Jesús

⁴⁵ Guardianesha'ñapa' puerračherret allo'tsen ñeñt pa'mcha'tareternesha' pen allohuen judionesha' po'cornaneshar epuet ñaña fariseonesha'. Ñetñapa' atet otare'ttapuerret:

—Eso'maruañaca'yeña amaña sehuapatere.

⁴⁶ Guardianesha'ñapa' atet otuerret:

—Ama't eseshapa' ama pueñosaroña atarr cohuen atet eñen ña.

⁴⁷ Fariseonesha'ñapa' atet oterraneterr:

—Tarro'marte' ama sehuapatere sapa'čo'ña čhote'ca'ye shecapas samña. ⁴⁸ Ama't ñaña patantarr añcha'taretnesha'pa' ama't o' čha ame'nyeto ñamet. Ama't ñaña patantarr fariseonesha'pa'čo'ña o'te'ca'ye čha ame'nyet. ⁴⁹ Tarraña ñeñt acheñeneshar ñeñt ama eñotenaye ñoñets ñeñt atet anaret ñetñapa' a'cmaretet.

⁵⁰ Ñeñtña puesheñarr fariseo ñeñt Nicodemo ñeñt tatsa ahuaña Jesúsesho, ñaña'pa' atet otan pamo'tsesha' fariseonesha':

⁵¹ —Ñoñets ñeñt atet anaret yocoppa' atet otene'y, amach erro'tenot yecoñchache ama't puesheñarra acheñ e'ñe attota. Chochña ñanom ye'mñoch attoch yeñoch este' otatse'tyen ñeñt atarr sosey yenten esheccha'ña yecoñchach.

⁵² Ñetñapa' atet ochet:

—Eso'maruachca' pemoñesyaña galileo'marnesha', ñato' papa' galileo'marnesha'pte'. Papa' amarramche' galileo'marneshayaype. Te'pa' pelleya'yes Yompor po'ñoñ allochñapa' o'ch peñočh Galileo'tpa' ama't puesheñarrapa' amach huapoña ñeñtcha' a'mtene' Yompor po'ñoñ.

Allempo puesheñarr coyanesha' huapachet Jesúsesho ñeñt chetapretene' pacma puerrol-lar

⁵³ Allempoña allohuenet ahuanemyerret pa'pacleto.

8

¹ Jesúsñapa' ahuer Olivopno. ² Tsapa'tña po'pocheño e'ñe ahuatecma alla čhenerr Parets pa'paclo. Shonte' acheñenesha' alla huacheneterr ñesho. Ñaña'pa' anorros

allña yečhatenaneterr. ³ Ñeñtña etsotayenayeñ ñoñets ñeñt atet anaret judioneshacop ñaña fariseonesha' ñetñapa' huapatoñet puesheñarr coyanesha' ñeñt rromuet all eñchet chetapretenan po'psheñeñ pacma puerrollar. Nosñañet e'ñe rrocho. ⁴ Allñapa' atet otoset:

—Maestro, añ coyanesha'pa' o' yentaprech e'ñe all chetapretenan pacma puerrollar.

⁵ Moisés po'ñoñ ñeñt atet anaret ñeñt'pa' atet oteney, añpa' čoch yarro'le'ch. Te'ña papa' ¿erro'te'tcha'ña poteyña pa'?

⁶ Ñeñt'pa' tarro'mara atet otoset ñato'rraña eñorachet ñeñt ama pocteyaye allochñapa' attoch a'metam'peñeta'. Jesúsñapa' allenta mo'capa' o' quellcan pats pota'po. ⁷ Ñetñapa' alla a'p'to'tereter. Jesúsña echanterrtsapa' atet otanet:

—Ñerra'm erra'tsenoteste' ama eñalle so'chñarpa' sarrolle'chca'ye sanom.

⁸ Alla mo'quèrrerr o' alla quellquèrranerr pats pota'po. ⁹ Ñetñapa' o' e'met atet otanet Jesúsapa' e'ñe aco'poteñ ahuanemhuerret e'ñe puesheña'ttset. Añ ñanom ahuanerrtsa po'nmenesha'čno, atto'apa' o' ñap'taña Jesús epuet coyanesha'. ¹⁰ Jesúsña echanter-rerrpa' atet otan coyanesha':

—No'cheshacha' ¿erro'tsa'yeneta'tña? Ama't puesheñarroteta ñetpa' are'tcha'ña coñchatape.

¹¹ Ñaña'apa' atet otan Jesús:

—Ama Ayochreshate eseshaye' necoñchataye.

Jesúsñapa' alla otererr:

—Napa'cho'ña amach necoñchatape. Te'ña ñerra'm ahuerre'ppa' amach allo'na atet pe'pa'nen o' ñeñt ama't mamesha ama pocteyaye.

Jesúsapa' ña a'puetarsam'pene' acheñenesha' poctap'ña a'ne patsro

¹² Jesúsña po'pocheñopa' serrpare'taterranerr acheñenesha', ñeñt'pa' atet oterraneterr:

—Napa' na ñeñten a'puetarsam'pene' acheñenesha' poctap'ña a'ne patsro. Esesha'ch nocterre' o'huañcha' allo'na cotape'chatnenanet poctap'ña ñeñt atarr sosya'tsañ; ñeñt'pa' checmeta chopeñe'chyenet. Ñetñapa' Yomporcha' po'cohuenño correrret ñeñtara ñeñt puetarets.

¹³ Fariseonesha'ñapa' atet ochet:

—Papa' pa'neña a'potetsa ñeñto'marña atto pa'potenapa' ama sherbeno.

¹⁴ Jesúsñapa' oterraneterr:

—Tarraña ama't nañeña a'potetsapa' atto na'potenapa' e'ñe sherben. Tarro'mar napa' neñoteñ allot nohuapa ñaña neñoteñ allcha' neserr. Sañapa' ama seño'tenno allot nohuapa ñeñto'marña ama seño'teñe allcha' neserr. ¹⁵ Sa sotatseñpa' e'ñe orrena atet sepena, arromña'feneshasa atet petsa. Napa' ama't puesheñarrapa' ama notatse'tenaneto e'ñe atta. ¹⁶ Tarraña ñerra'm esempo na'metenanet ñeñt atet nentapretyenanet ñeñt'pa' e'ñe po'ño'ch atet tarro'mar napa' ama nap'teye' es ne'pa'yeno, napa' chocmaña epan Apa ñeñt nellensene'. ¹⁷ Ñoñets ñeñt atet anaret ñeñt sechen sa, ñeñt'pa' atet oten: Ñerra'm epsheña a'potene' e'ñe attecma ñeñt'pa' e'ñeca'ye po'ño'ch otenet. ¹⁸ Napa' ñeñt atet na'potena na, Apaña ñeñt nellensene' ñaca'yeña na'potene'ña nocop.

¹⁹ Ñetñapa' atet otereter:

—¿Erro'tsena'tña pa' Pompor?

Jesúsñapa' atet oterraneterr:

—Ama't napa' ama seño'tenno, Apapa'cho' ama seño'teñe. Ñerra'm seño'tennoñ na Nompore'nate' seño'teneñ.

²⁰ Allempopa' atet otanet Jesús all allecma añño'tenet quelle ñeñt Yomporecop allempo yečhatanet allara Parets pa'paclo. Tarraña ama't puesheñarra ama eseshaye' rromaye tarro'mar ama čhena' allempoch ñeñt poctetsa ñocop o'ch rromuet.

Allempo Jesús otanet allcha' serr ñapa' acheñenesha' ñapa' amach errotentot çhapueto e'ñe allempocma

²¹ Allempoña Jesúsapa' atet oterraneterr:

—Napa' o'ch ahuerren, sapa' se'nerrencha'. Sapa' orach ochñaretes serromhua. Allcha' neserrpa' sañapa' amach seçhapo.

²² Judionesha' ñapa' atet otanna'tyeset:

—Ta'm ñapa' o'ch muetsa ñañeña, ¿ñeñto'marte' atet oten allcha' serrpa' yañapa' año'ch yeçhapo?

²³ Ñañapa' alla oterraneterr:

—Sapa' alla ayeçcañas arr patsro. Nañapa' ento'marneshan. Sapa' patso'marnesha, nañapa' ama patso'marneshayayno. ²⁴ Napa' o' notas sapa' orach ochñaretes serromhua tarro'mar ñerra'm amach same'ñerrno na ñeñten peretnene' ochñarets, po'ñoçh sapa' orach ochñaretes serromhua.

²⁵ Ñetñapa' atet otereterr:

—Papa' po'ñoçh ¿eseshape'tña?

Jesúsñapa' alla oterraneterr:

—Napa' ñeñtenca'ye po'ñoçh çhocma sotene'. ²⁶ Atarr nanac palltena çhocmach notenes atet sepena sa, shonte'ch neños añecop atet nentyen. Tarraña ñeñt nellensene' ñapa' e'ñe po'ñoçh atet oten ña. Napa' añca'yeña ne'ñoreññaña acheñenesha' arr patsro ñeñt atet ne'mueññañ Apa.

²⁷ Ñetñapa' ama esesha' çchapahueto pueyoçhreto ñeñt atet otenanet Pomporecop ñeñt atarr Parets. ²⁸ Jesúsñapa' alla oterraneterr:

—Ñerra'm esempoch sapa' sechantam̄psen eno corsocho na Ñeñten Acheñetosetspa' allempochña çchaponasa seyoçhro napa' ñeñten e'ñe po'ñoçh çhocma sotene'. Chaponasach ñaña napa' ama es nepeno e'ñe nota, añña ne'ñorena atet yeçhatenen Apa. ²⁹ Ñeñt nellensene' ñapa' e'ñe parro'tsenen. Ama a'montsenno, tarro'mar napa' e'ñe çhocma atet nepena ñeñt muenen ña.

³⁰ Allempo atet serrpare'tatenanet allempopa' shonte' ame'ñaya all.

Atto ñeñt puechemer pen Yompor ñetñapa' atarr cohueno'tsa'yenet; ñeñtña ama puechemer peno Yompor; ñetñapa' po'chñara taruasatenahuet e'ñe atta

³¹ Allempoña Jesúsapa' atet otan judionesha' ñeñt ame'ñenaya ña:

—Ñerra'm çhocma soçtape'chon neñoñ po'ñoçhpa' neyoçhresha'ch nepenes.

³² Allempopa' señoterrcha' ñoñets ñeñt e'ñe po'ñoçh Yompor po'ñoñ. Ñeñtña ñoñets po'ñoçhpa' toram̄perrescha' e'ñech cohueno'tsenes.

³³ Ñetñapa' atet otereterr:

—Yapa' Abrahamca'ye po'mrenñey. Ama't ahuata yapa' ama't puesheñarroçeyapa' ama ehuancaçeyeye attoch esesha' yetaruasate' e'ñe atta. Eso'marte' pañapa' p̄otenyña atoram̄psareçeyo'ch.

³⁴ Jesúsñapa' alla oterraneterr:

—Po'ñoçhca'ye notenes: Allohuen ñeñt ochña'tare'tetspa' po'chñara huanquënahuet, ñetñapa' po'chñara taruasatenahuet e'ñe atta. ³⁵ Ñeñt ataruasatareç e'ñe atta amach çhocmaye' yeçherro e'ñe parro' epuet pamo'mte'. Tarraña na ñeñten Puechemeren çhocma e'ñe neyçhena epan Namomte' errponañohuen. ³⁶ Ñeñto'marña na ñeñten Puechemeren ñerra'm na setoram̄perre' sapa' atoram̄psaretescha' e'ñe po'ñoçh, amach alla taruasaterrse'te so'chñar. ³⁷ Na po'ñoçhpa' neñotenes sapa' po'mrenñeseñ Abrahampa' tarraña sapa' añña semnen o'ch semtsan. Tarro'mar neñoñpa' ama't mameshapa' ama çhennaso sa seyoçhro. ³⁸ Napa' añ ñeñt ñeñt atet nentapreteñ Apa. Sapa'çho'ña añña atet sepen ñeñt atet se'mapreteñ ñeñt sompor sepen.

³⁹ Alla otereterr:

—Ya yatañpa' Abrahamca'ye.

Jesúsñapa' atet oterraneterr:

—Sapa' ñerra'm po'ñoç Abraham po'mrenñeseñ soctape'cheneñte' atet e'ñe cohuen cotape'che't Abraham. ⁴⁰ Tarraña sa te'pa' cha so'patenna o'ch semtsan na ñeñten seserrpare'tatene' ñoñets ñeñt e'ñe po'ñoç ñeñt atet ne'mueññañ Yompor. Abrahampa' amaca' atteye' pe'te. ⁴¹ Sapa' e'ñe aña soctape'chen atet pena sompor.

Ñetñapa' alla otereterr:

—Yapa' amaca'ye ellapnaneshoteye' ye'ñallete. E'ñe ñapña Yompor yepeñ ñeñtara Parets.

⁴² Jesúsñapa' alla oterraneterr:

—Ñerra'm po'ñoç Sompor sepeñeñ Parets atarrte' semorrentennañ na tarro'mar napa' Partseshotca'ye nohuapa o' nechap arr. Napa' amaca'ye noñaye' nohuapo, napa' Yomporña nellense'. ⁴³ Eso'mare'tña sapa' ama çhennasoña seyoçhro ñeñt notenes. Ñato' tarro'marte'ña ama semno o'ch se'mñnoten ñeñt atet notenes. ⁴⁴ Sapa' oneñeñaca'ye ñeñt sompor sepen. Ñeñto'marña sapa' aña semnen o'ch sepa ñeñt muenen sompor. Ñapa' ahuatoteñ e'ñe pa'motroteñ amtsañta. Ñapa' ama't mameshapa' ama eñora'penoña Yompor po'ñoñ ñeñt e'ñe po'ñoç tarro'mar ñoñets ñeñt e'ñe po'ñoçpa' amaca'ye atanenoña ña pueyoçhro. Ñerra'm çho eñorenapa', shequëñtsach eñorena tarro'mar ñapa' e'ñe shequëñtsa eñoten. Po'ñoç sequëñetspa' pomporca' penanña oneñeñ. ⁴⁵ Tarro'mar napa' añ notenes ñeñt e'ñe po'ñoç sañapa' amaña same'ñenno. ⁴⁶ Ama't puesheñarroteña sa, napa' amach errotenot sotno napa' eñallo' no'chñar. Atto napa' añ notenes ñeñt e'ñe po'ñoç eso'mare'tña sañapa' ama same'ñenno. ⁴⁷ Erra'tsente' Yomporena'tarpa' ñetñapa' çhochca'ye e'mñoteññañet Yompor po'ñoñ. Ñeñto'marña sapa' ama se'mñoteññañe po'ñoñ, amaca'ye Yomporena'tareyayso.

Allempo Cristopa' atet otanet: Allempo ama eñalleteña' Abraham, nañapa' eñallana

⁴⁸ Judionesha'ñapa' atet otereterr:

—E'ñe po'ñoç atet yoteneþ, þapa' samario'marneshaþ, oneñeña pechorrenaya.

⁴⁹ Jesúsñapa' oterraneterr:

—Napa' ama çhoje' chorrenno oneñeñ. Napa' atarr nanac nemcha'na'teñ Nomporets. Sañapa' ama semcha'na'tenno na. ⁵⁰ Napa' ama añeye' ne'nenno attoch necohuentata nañeña. Eñallña ñeñt necohuentatene' na. Ña eñoretsa atet es entyen arr patsro. ⁵¹ Po'ñoçca' notenes: Ñerra'm esesha' e'ñe cotape'cherre' neñoñpa' ñetña ama't ahuatapa' amach e'ñe poctacma rromuerreto.

⁵² Judionesha'ñapa' alla otereterr:

—Te'ña po'ñoç yapa' o' yeñotaþ þapa' cha chorrenþa oneñeñ. Ama't Abrahampa' o' rromuen ñaña ñeñt a'mta'yesaye't Yompor po'ñoñ ñeñtpa'çho'ña o' colla'huenet. Te'ña þapa' atet þoteneý esesho'ch cotape'cherre' peñoñpa' ama't ahuatapa' año'ch rromuerreto. ⁵³ Papa' çhate' þotenapañ ellote' peñtaneñ atto amcha'tarette't Abraham ama't ñapa' o'ca'ye rromuen. Ñeñt a'mta'yesaye't Yompor po'ñoñpa' ñetpa'çho'ña o' colla'huenet. Papa' çhate' þotenapañ amate' arromña'teshayape.

⁵⁴ Jesúsapa' atet oterraneterr:

—Ñerra'm na cohuentatetsa nañeña, necohuentateña e'ñe napa' amate' es sherbeno. Nomporepa' ña necohuentatene' ñeñtara ñeñt soteneñ Seyompor-ro' sepeñ samña. ⁵⁵ Sapa' amaca'ye señoñe tarraña napa' neñoteñca'ye. Ñerra'm na otetseñ ama neñoteñ napa'çho'ña atteneñte' ñerra'm sa, çhate' neshcare'tensoñ. Napa' e'ñe po'ñoç neñoteñ ñeñto'mar çhocma noctape'cheññañ po'ñoñ. ⁵⁶ Abraham ñeñt sa satañpa' atarr nanac

cosha allempo eñoch o' chap allempo ñeñt̃ poctetsa nocop o'ch nohuapa arr patsro. Allempoña eñoch napa' o' nechap arr patsro atarr nanac cosha.

⁵⁷ Judionesha'ñapa' alla otereterr:

—Papa' ama pechena' amnaroch çarra' pecharña pañapa' eso'mare'tña p̃oteneña pa' papa' pentero' Abraham, ñeñt̃pa' ahuatrramche' corre't̃.

⁵⁸ Jesúsña' alla oterraneterr:

—Po'ñoçca' napa' o'ch notas: Ama eñalletena'ña Abraham, nañapa' eñallana.

⁵⁹ Ñetña' allenta chetet mapue'pa' o'ch rrolle'chetañ tarraña Jesúsña a'nahua cha'nerr Parets pa'paclo'tpa' o' ahuerr o' sohuanerranet.

9

Allempo Jesúsapa' a'crraterran puesheñarr aporo'yet ñeñt̃ att̃a eñalletña

¹ All oñen Jesúsapa' allña entnoman puesheñarr yacma aporo'yet. Ñeñt̃ña aporo'yetpa' att̃a eñalletña. ² Pueyochresha'ñapa' allenta a'p̃to'chet:

—Maestro, ¿eseshat̃ña ochña'tats ñato' ña amapa' pamo'mte'te' ñeñto'mar eñalletaña atet aporo'yet?

³ Jesúsña' atet otanet:

—Amaca'ye po'chñarofeyaye ama't ñaña pamo'mte'; ñeñt̃pa' añecopña allochñapa' o'ch norrtatoñ Yompor po'partsoña ñesho. ⁴ Ñeñt̃ poctetsa o'ch norrtatoñ po'partsoña ñeñt̃ nellense' tayepa'tña' puetarmeñ. Ñerra'm o'ch checmetenpa' amach eshcaye' yetaruaso. ⁵ Tayepa'tña añe patsro'tsenmeñenpa' na ñeñten a'puetarsañpene' acheñenesha' pocta'p̃ña añe patsro.

⁶ Allempoña atet otuapa' allenta a'chonon pa'snom patso o' a'cha'cha'tach. Ñeñt̃ña cha'cha'te'pa' alloña a'yac'le'chanña aporo'yet. ⁷ O'ña a'yac'le'chuepa' atet och:

—Te'pa' orra'p̃ oño all apco'sattatareto ñeñt̃pa' añ pa'so'cheñ Siloés. Allcha' pe'pac'le'cha. (Ñehua, añca'ye otenetña Siloés ñeñt̃ oñ ahua'ñare't̃.)

Ñaña'pa' allenta ahuo' oño allcha' e'pac'le'chena'. E'pac'le'chuatsapa' e'ñe errtsapa' allentepa'tcha' cohuenterraña pa'c'le' e'ñe cohuen enterra. ⁸ Pamo'tsesha'ña ñaña po'poñe'chno acheñ ñeñt̃ e'ñe cheme'tene' all allempo enamaren quelle, ñetña'pa' atet otyeset:

—Añpa' ¿ama't añeyayeña ñeñt̃ anorrtse't̃ ñeñt̃ enamare'tatse't̃ quelle?

⁹ Patantarr acheñenesha'pa' atet otyenet:

—Ñeñt̃ca'ye.

Po'potantañe'chnopa' atet otyenet:

—Amaca'ye ñeñt̃eyaye, att̃aca' ñeñt̃ema'ttena.

Aporo'yetñapa' atet otanet:

—Napa' ñeñt̃enca'ye.

¹⁰ Ñetña'pa' atet otyeset:

—¿Erro'tenote'tña o' pecuerr?

¹¹ Ñaña'pa' atet oterraneterr:

—Añ yacmar ñeñt̃ otenet Jesús ñaca'ye a'cha'cha'te'ña pa'snomo patspa' alloca'yeña a'yac'le'chen. Allempoña'pa' oten nepac'le'chenepa'to' oño Siloéso. Ñaña'pa' allña ne'pac'le'chena'. E'ñe e'pac'le'chuatsanpa' allentepa'tcha' necuerr.

¹² Ñetña'pa' alla otereterr:

—¿Erro'tsena'tña ñeñt̃ yacmar?

Ñaña'pa' ot:

—Ta'm, amaca'ye neñoteñe.

Atto fariseonesha'pa' a'p̃to'tare'tenan aporo'yet ñeñt̃ a'crraterr Jesús

¹³ Allempoña ñeñt poro'ye'chatse'tpa' anmet allo'tsen fariseonesha'. ¹⁴ Ñehua, allempo a'chacha'tan Jesús pa'snomo pats allo a'yacлле'chan aporo'yef ñeñt cohuaterre' allempopa' añ yetro allempo amesenet. ¹⁵ Fariseonesha'ñapa' ello alla otereterr:

—¿Erroñenote'tña o' cohuaterrepet?

Ñañapa' atef otosanet:

—Añoca'ye a'yacлле'cherrnet senmatso ñeñt a'chacha'taref epuet pats o'ña ne'pacle'cherrapa' allenta necuerr.

¹⁶ Patantarrña fariseonesha'pa' atef otyeset:

—Ñeñt yacmarpa' amate'ca'ye Partseshoteye' huapo ñeñto'mar ama esoye' entenanoña ñeñt anaref paterr yet allempocma yamesen.

Po'potantaññapa' atef otyeset:

—Ta', elloña ñerra'm ochñañ acheñ amate' errotenot orrtatonayeña partsoteñets.

Attoña e'ñe all ellopa'tetstatet poctařña ñocop. ¹⁷ Ellopa' alla otereterr ñeñt poro'ye'chatse't:

—¿Erroñena't pōtenña pa añecop ñeñt o' cohuaterrep?

Ñañapa' atef ot:

—Ñapa' ñeñtca'ye a'mtene' Yompor po'ñoñ.

¹⁸ Judionesha'ñapa' atef otyeset:

—Ñapa' amaca'ye po'ñoñch aporo'yefeyaye, e'ñeca'ye cohuen entena.

Allempoñapa' chore'toñet pamo'mte' ñeñt o' cohuer. ¹⁹ Ñetñapa' atef otapoñet pamo'mte':

—Añpa' ¿añe'tña sacñe'ter ñeñt sotyese't ahuo' eñalletaña sacñe'ter aporo'yef? Te'ñapa' ¿erroñenote'tña o' cohuer?

²⁰ Pamo'mte'ñapa' atef otosanet:

—Po'ñoñch añca'yeña yacñe'ter ñeñt atta eñalletatsa aporo'yef. ²¹ Atto o' cohuerpa' yapa' amaca'yeña yeñoteñe. Ta', esesha'te' o' cohuer, yapa' ama yeñoteñe. Sa'p'to'ch e'ñe ña, ñapa' o'ca'ye atta po'napien, ñoñachca'ye eñora.

Judionesha'ña allempopa' atef otyeset:

—Po'ñoñchepa'tca'ye aporo'yef o' cohuer.

²² Ñehua, pamo'mte' atef otanet tarro'mar ñetpa' mecha'teñet judionesha'. Ñehua, judionesha' ñetpa' atef a'pocatenet ñerra'm esesha' otets: Jesús pa' ñeñtca'ye Cristotets, ñeñtña atef otetspa' o'ch mueño'chet ñet po'prahuot. ²³ Ñeñto'marña pamo'mte'pa' atef otanet:

—Ñapa' o'ca'ye atta po'napien, ñoñachca'ye eñora.

²⁴ Puepocheñopa' alla chore'tereterr ñeñt poro'ye'chatse't atef otapet:

—Te' p'apa' o'ch pecohuentaterrñañ Yompor. Yapa' yeñoteñ añ yacmapa' atarrca'ye ochñañ.

²⁵ Ñañapa' atef oterraneterr:

—Ta', ñato' ochñañeñte' napa' ama neñoteñe. Napa' añaca'ye neñoten napa' aporo'yeten te'ñapa' o' cohuen necuerr.

²⁶ Ñetñapa' alla otereterr:

—¿Erroñe'tña perrep? ¿Erroñenote'tña o' cohuaterrep?

²⁷ Ñañapa' oterraneterr:

—Ama'tña napa' o'ca'ye notuas sañapa' are'tña señoñe. ¿Eso'mare'tña semneñ o'ch alla noterrser? Ñato' ¿añecopfe' semneñ o'ch yochresha'tasa saña?

²⁸ Ñetña allenta otnare'chetpa' atef otereterr:

—Papa' pueyochresha' peneþ ñeñt' yacmar, yañapa' Moisésca'ye pueyochreshay.
 29 Yapa' yeñoteñ Paretspa' eñorana'tana Moisés, tarraña ñeñt' yacmarpa' ama yeñoteñe errofte'ña huapa.

30 Ñeñt' poro'ye'chatse'tpa' atet oterraneterr:

—Erroteno'tuaca'ye ama señoñeñe'ña errofte' huapaña ama't napa' o'ca'ye e'ñe cohuen cohua'terren. 31 Yapa' yeñoteñ ñeñt' ochñañ' acheñpa' amaca'ye e'mñoteñe Yompor, tarraña ñerra'm ya yemcha'na'teño't Yompor atet yepena ñeñt' muenen ñapa' çhocmach e'mñoteney. 32 Ya ama't ahua'tapa' ama ye'mareña esesha'pa' o' cohua'terranña ñeñt' atta eñalletña aporo'yet. 33 Ñerra'm ñapa' ama Yomporeshot huapañe amate' erroteno't cohua'terrnoñe.

34 Ñetña'pa' alla otereterr:

—Papa' pe'ñalleta e'ñe ochña'rtsot'. Te'ñapa' çha pemneñ o'ch peyçhatey ya. Allenta mueño'chet e'ñe ñet po'prahuot'.

Ñeñt' ama ame'ñetso Jesúsña'pa' atet entenamet ñerra'm aporo'yet

35 Jesúsña'pa' o' e'mare'ch ñeñt' aporo'yettatse'tpa' o' mueño'chet. Allempoña enter Jesús'pa' atet oter:

—¿Pame'ñeña't ñeñt' Yompor Puechemer?

36 Ñaña'pa' atet och:

—Ayochreshate, ¿esesha'tña ñeñt' Yompor Puechemer ñeñt'cha' name'ña?

37 Jesúsña'pa' atet otererr:

—Ñeñt' pecuen, ñeñten atet þotene', naca'ye.

38 Ñaña'pa' allenta concorpa ñeshopa' atet otererr:

—Name'ñerrþach Partseshacha'.

39 Jesúsña'pa' alla otererr:

—Napa' añecopña nohuapa arr patsro allochña'pa' attoch acrare'tterra acheñenesha' errotencha' nentyesamet, allochña'pa' ñeñt' ama entetsopa' o'ch e'ñe cohuen enterra. Ñeñt'ña entetsaña'pa' o'ch alla aporo'yettterra.

Ñeñt'pa' añ toma'ntata, ñeñt' atarr ochñañ' entetsa ñerra'm ame'ñerrana Jesús, ñetpa' çherranetcha' Yompor po'cohuenña pueyoçhreto. Ñeñt'ña ama ochña'teye' entetsañe ñeñto'marña ñetpa' amach ame'ñereto Jesús, ñetña'pa' amach çherraneto Yompor po'cohuenña pueyoçhreto.

40 Patanta'tetsña fariseonesha' ñeñt' allame'ttso'tsa'yenet ñesho, ñetña'pa' e'mueñet ñeñt' atet oten Jesús. Ñetpa' atet ochet:

—Ta'm yapa' ¿amate' aporo'yete'ye' pentenye?

41 Jesúsña'pa' atet otanet:

—Ñerra'm po'ñoçh sa aporo'yet sentenañ amate' eñallmeñeña so'chñar. Tarraña sapa' atet soten, sapa' año' aporo'yete'yayso, e'ño' cohuen secuen, ñeñto'marña te'pa' o'ch notas, so'chñarpa' çhocma eñall.

10

Atto Jesús'pa' añ toma'ntatanet all yotta'mpeñet carrnero

1 Allempoña Jesús'pa' alla yeçhaterraneterr, ñeñt'pa' atet toma'ntaterraneterr:

—Po'ñoçhca' notenes: All yotta'mpeñet carrnero ñerra'm esesha' ama be'tetso allotecma be'tenet ñerra'm po'pshemñaño'a a'tenet, ñeñt'ña po'ñoçhpa' eñetca'ye ñeñt' aprratamþsañtetsa. 2 Tarraña ñerra'm esesha' be'tets e'ñe allotecma be'tenet ñeñt'ña po'ñoçhpa' ñeñt' cohuanþpene' carrnero. 3 Ñeñt' cohuanþpene' yetarrpa' ñerra'm esempo

huaçherra ñeñt̄ cohuañpene' carrnero ñapa' çhocmach torañpsapuerranet. Carrneropa' e'ñe eñoteññañet pamo'mte' po'ñoñ. Ñaña'pa' o'ch çhore'tyesan po'carrneror pa'so'chñopa' o'ch çha'nmaçha'tatan po'carrneror. ⁴ Allempoña çha'nmatue allohuen a'yotpa' ñaña'pa' o'ch ota. Po'carrnerorñapa' allentach co'ta'huanem̄ chenta'. Ñetñapa' e'ñe cheme'teññañet pamo'mte' po'ñoñ. ⁵ Tarraña ahuapñapa' ama co'teñe, çhach matañpesya tarro'mar ama eñotenano ahuapña po'ñoñ.

⁶ Ñeñtpa' atet o'terranerr fariseonesha' toma'nteñtso tarraña ñetñapa' ama eñotoñeto ñeñt̄ otenanet.

Atto Jesús'pa' añ toma'ntena ñeñt̄ e'ñe cohuen cohuañpene' po'carrneror

⁷ Alloñapa' alla o'terraneterr Jesús:

—Po'ñoçhca' notenes: Napa' na yetarrotets allotcha' be'ten carrnero. ⁸ Allohuen ashcañnesha' ñeñt̄ huapyestse't allempo ama nohuena' na, ñetpa' eñe'tareret ñeñtet aprratam̄psañtetsa, tarraña ñetpa' ama e'mñnotenanoña carrnero. ⁹ Napa' na yetarrotets. Ñerra'm esesha'ch be'tets nesho ñeñtpa' queshperrach, be'terretcha' ñaña çha'nerretcha' enterretcha' e'ñe cohuen puerrar.

Ñehua, ñeñtpa' añ otenanet: Ñerra'm esesha'ch ame'ñaya ña ñetñapa' queshperretcha'. Ñachña cohuañperrahuet e'ñe cohuen amach es pallterreto.

¹⁰ Jesús'ña'pa' alla o'terraneterr:

—Eñe'tpa' amaca'ye huenoña e'ñe at̄ta, añecopña huena o'ch etyes, o'ch es muetsa, o'ch es a'chencatua. Tarraña napa' añecopña nohuapa at̄tochña sapa' corretsasach socsheñeshocmañen e'ñe tayoteñ errponañohuen. ¹¹ Napa' na ñeñten cohuen cohuañpene' carrnero. Ñeñt̄ e'ñe cohuen cohuañpene' carrnero ñapa' e'ñe ñañaña a'rroyer̄tsa o'ch rroma po'carrnerorecop. ¹² Tarraña po'psheñeñ ñeñt̄ at̄sa'tarettatsa at̄toch cohuañpenan carrnero ñeñtpa' ama pamo'mtayeyaye; ñaña'pa' ñerra'm entapan ma'yarrpa' çhach mata o'ch sa'nmanña carrnero. Ma'yarrñapa' o'ch rroma'yesosan carrnero, patantarrña carrneropa' o'ch at̄ta a'parratse'tach. ¹³ Ñeñt̄ at̄ta at̄sa'tarettetsapa' po'ñoçhpa' ama lleca'penanoña carrnero ama't mamesha. Ñeñto'marña çhach sa'nmanña carrnero.

¹⁴ 'Napa' na ñeñten cohuen cohuañpene' carrnero. Napa' e'ñe nechme'teñ ñeñt̄ necarrneror. Ñeñt̄ña nopa' e'ñe cheme'tenen naña. ¹⁵ Atet pena Apa e'ñe eñotenen, nañapa' e'ñe neñoteñ naña Apa. Napa' e'ñe ñañaña o'ch na'rroyerra at̄toch nerroma necarrnerorecop. ¹⁶ Eñall po'poñeçhño ñeñt̄cha' necarrneror neperr, ñetpa' ama parrocmateneto arr allo'tsen ñeñt̄ necarrneror nepen te'. Añ poctetsa o'ch nerraneta' at̄toch e'mñnoterrnanet neñoñ, allochñapa' o'ch e'ñe parrocmaterret. Puesheñarrana ñeñtencha' cohuañperrahuet.

¹⁷ 'Apapa' ello atarr morrentenna tarro'mar napa' na'rroyena ñañaña o'ch nerroma acheñeneshapoc, elloñapa' o'ch alla netanterra. ¹⁸ Ama't eseshapa' amach puer-ratam̄pesnoña nocreña, napa' na ñeñten a'rroyetsa e'ñe ñañaña. Napa' anareten at̄toch na'rroya o'ch nerroma; anareten ñaña at̄toch ellopa' o'ch alla netanterra. Ñeñtpa' Apaña notene' at̄etcha' neña. Arrpa' allohua atet toma'ntatenanet allohuen ñeñt̄cha' ame'ñerraya ñeñt̄ña po'carrneror pen ñeñt̄cha' atarr cohuen cohuañpen.

¹⁹ Ñeñt̄ atto serrpare'tatenanet Jesús, allña judionesha'pa' ellopa'tetstatenet poçta'pña Jesúsocop. ²⁰ Shonte' acheñenesha' ñeñt̄ atet otyesets:

—Añmapa' çhaca'ye chorreña oneñe't, çhaca'ye mospuena. Eso'mare'tña se'mñnoteñ.

²¹ Po'potantañeçhnoñapa' ñetpa' atet otyenet:

Ñerra'm çho chorreña oneñe'tpa' amate' erro'tenot eñosoña atet e'ñe cohuen. Oneñe'tpa' amate' erro'tenot cohuaterranoña aporo'yet.

Allempo judionesha'pa' achmare'teñet Jesús

²² Allempoñapa' cherrerr allempo alla cosherrerr judionesha' Jerusaléño allempoch yerpuerret ñeñt atto nete't ahuat Parets pa'paquëll ñocop. Allempo alla cosherreterra' allempopa' huapo. ²³ Jesúsñapa' alla chopenen Parets pa'paclo all oteñet Salomón puecha'petaro. ²⁴ Allñapa' arrotam̄pesya judionesha'pa' atet ochet:

—Esempohuachñaca'ye pe'nuaña ñeñt atto pemoñne'tatenya. Ñerra'm po'ñochte' p̄a Cristotetspa' p̄oteyñaca'ye e'ñe po'ñoçh.

²⁵ Jesúsñapa' atet otanet:

—Ama't notatstas sapa' amachca' same'ña'no. Napa' e'ñe neyemteño't Apa atet es nepa'yen. Ñeñt norrtatyenpa' ñeñtcha'ña seño'tate' napa' ñeñten Cristotets. ²⁶ Tarraña sapa' ama same'ñenno tarro'mar sapa' ama necarrneroreyayso ñeñt atet o' no-tuas. ²⁷ Ñeñt po'ñoçh necarrnerorpa' e'mñotennanet neñoñ, nañapa' neñotenanet. Ñetñapa' cotennet. ²⁸ Nañapa' napuerranetcha' attochña ñetpa' corretsetach tayoteñ errponañohuen, ñetñapa' ama't ahuatapa' amach chenquërreto. Ama't eseshapa' amach puerraterrnetoña e'ñe na notot. ²⁹ Nomporpora' ña napuene'ña ñeñt name'ñenaya. Ñapa' atarr ahuamencatesha'. Ña po'huamencpa' ama eseshaye' metanenaye. Ama't eseshapa' amate' errotenot puerratañp̄setoña Nompore'ñe ña potot. ³⁰ Napa' e'ñe parro attecman epan ña.

³¹ Ñeñto'marña allempo judionesha' ñetpa' chetet mapue' allo'ch rrolle'chet.

³² Jesúsñapa' atet oterraneterr:

—Shonte' coçhnesha' norrtatyesonas Nompore' po'huamencot. ¿Erra'tsenote'tña añ ñeñt e'ñe coçhnesharot sapa' semneñ o'ch sarrolla'n?

³³ Judionesha'ñapa' atet otereterr:

—Ama p̄orrtateño'teye' coçhnesha' yemneñe o'ch yarrolle'tap̄. Yapa' añecopña yemneñ o'ch yarrolle'tap̄ atto p̄apa' atarr p̄achmare'teñ Parets. P̄apa' acheño'taca'ye pemneñ o'ch pepartsocoptarta.

³⁴ Jesúsñapa' alla oterraneterr:

—Ñoñets ñeñt atet anaret ahuatoteñ socop allpa' atetca'ye anuaret añecop ñeñt e'ñe ñenma't a'pote' Yompore' po'ñoñ, ñeñtpa' atet otanete't Yompore': “Sapa' atetcha' entenes acheñenesha' ñerra'mrrate' yompores.” ³⁵ Yompore' po'ñoñ ñeñt anuaret ahuatoteñ ama puenesho. Atet otanete't ñetpa' yomporo'ch entenanet acheñenesha', ³⁶ naña ñeñten o' nerren Yompore' ñeñten o' mueñerren arr patsro, sapa' achmarña'ach sepenen tarro'marotña napa' noten Yompore' Puechemeren. ³⁷ Ñerra'm amate' añeye' norrtateno Yompore' po'partsoña ñeñtepñapa' amach same'ñatsetno. ³⁸ Tarraña atto po'ñoçh norrtateññañ po'partsoña ama't ñeñtpa' same'ñya, ama't napa' ama ame'ñoyen sentenno. Attochña po'ñoçh çhaponasa seyoçhro atto Apapa' e'ñe parrocmatenna, napa'cho'ña neparrocmaten epan Apa.

³⁹ Ellopa' mueneñetañ o'ch rromuet tarraña ñet allempopa' çha a'queshp̄achet.

⁴⁰ Allempoña Jesúsapa' ahuerr yom̄ta'n Jordanaso all e'ñe ñenma't apatyese't Juan Yomporecop. Allñapa' alla a'pa. ⁴¹ Shonte' huacha'tyestsas ñeshopa' ñetñapa' atet otyese't:

—Juanpa' ama't coñe'ta ama orrtatano partsoteñets, tarraña allohuen allpon otyesyet Juan añecop ñeñtcha' Cristoterrets ñeñtña te'pa' e'ñe po'ñoçh atet pena.

⁴² Allñapa' shonte' acheñenesha' ñeñt ame'ñaya Jesús.

11

Allempo rroma Lázaro

¹ Allempo atsna'ten puesheñarr yacma ñeñtpa' añ pa'so'cheñ Lázaro ñeñt yeçheta anetso Betania epuet epsheño'mar po'ch, puesheñarrpa' María, po'psheñeñpa' Marta.

² Ñehua, ñeñña Mariapa' ña a'yatcate'ña Partsesha' eñmosaño pa'tco allempoña e'ñe ña pue'chopa' alloña a'porrarra'tquër, ña po'se Lázaropa' cha atsna'ten. ³ Po'chanesha'ñapa' allenta mueñet acheñ Jesúsesho, ñetñapa' atet otoset Jesús:

—Partseshacha', ñeññ atarr pemorrentenapa' cha atsna'ten.

⁴ Jesúsña e'mare'chpa' ñapa' atet otapanet:

—Ña amaca'ye añecpaye' atsna'teno o'ch rroma, tarrecpa atet pena allcha' nor-rtatoñ Yompor po'partsoña, allochñapa' o'ch cohuentatennanet na ñeññen Yompor Puechemeren.

⁵ Jesúsapa' ama't atarr morrentenanañ Marta ñaña pa'mo'nerr ñaña Lázaro, ⁶ tarraña allempoña e'mare'tan Lázaropa' cha atsna'ten, ñapa' amaña allorocmaye' to, ñapa' alla epomterr e'ñe all allo'tsen. ⁷ Allempoña epomta'muenpa' atet ota'mueñan pueyochresha':

—Te'pa' o'ch ahuerrey alla Judeo allo'tsen Lázaro.

⁸ Pueyochresha'ñapa' atet ochet:

—Maestrocha' allpa' chaca'ye o'patenpa judionesha' o'ch rrolle'tapet attoch muetsapet. Ta'm, ¿paña te'pa' o'ch alla pesechenerr o'ch alla ahuerriperr?

⁹ Jesúsñaapa' atet otan pueyochresha':

—Ama'tña yetpa' o'ca'ye ellapen puetarsats. Ñerra'm yechope'ch yeto amach yepoto'teno tarro'mar e'ñe yenten puetare' añe patsro. ¹⁰ Añña ñerra'm yechope'ch tsapo yepoto'tena tarro'mar ama a'puetarsamñsareteye. (Atto Jesúsapa' e'ñe eñotatenanet allponmatmeñ ñocop attoch e'ñe etsotuan Yompor po'taruas tarro'mar ama chena' allempo ñeññ poctetsa ñocop attoch muetsat.)

¹¹ Allempo otua atetpa' o' alla oterranerr pueyochresha':

—Lázaro ñeññey e'ñe parrocmata' atarr yemorrentannena ña te'pa' chaca'ye muen, ñeñño'marña te' napa' o'ch ahuen o'ch alla nopuera'.

¹² Allempoña pueyochresha' ñetñapa' atet otereterr:

—Ñerra'm Partseshacha' cha'te' e'ñe cohuen muenpa' ñeññepñapa' correrrach.

¹³ Ñehua, Jesúsapa' añ otenanet atto Lázaroñpa' choca'ye rromuen; ñetñapa' cha otena-puetañ añte' otenanet ñeññ atto chocma e'ñe yemuen beñna'totey. ¹⁴ Allempoña Jesúsapa' alla oterraneterr attoch e'ñe eñochet:

—Te'pa' po'ño'chca'ye o' rroma Lázaroñ. ¹⁵ Napa' te'pa' atarr nocshena tarro'mar ama allo'tsenno all. Atarr cohuen nenteñ socop allochñapa' attoch e'ñe cohuen same'ñerna. Ama'tpa' te'pa' o'ch ahuey Lázaroñesho, o'ch yenteña'.

¹⁶ Tomásña ñeññ otenet Epanesha' ñapa' atet otan po'potantañ ñeññ parro yochreshat-socmuet:

—Ama'tpa' ahuanmapo'ch yerromuepa' yanña epay Jesús.

Allempo Jesús eñotatanet ñapa' ña atantatañtetsa alloch e'ñe yocrrena

¹⁷ Allempoña chap Jesús all, ñapa' eñotos o'ca'ye pa'tatsmat pampa'huet. ¹⁸ Ñehua, Betania allame'ttsama Jerusalén —o' ma'pama kilómetro attoch ye'chap Jerusaléño.

¹⁹ Allñapa' shonte' judionesha' ñeññ hua'chetsa allo'tsen Marta epuet pa'mo'nerr María ñeññcha' emya'tenahuet atto ya'na'teñet po'sayañet Lázaroñ ñeññ o' rromuerr.

²⁰ Allempoña Martapa' e'mare'tan Jesús o' huena ñaña'ña' allenta ahua' o'ch poctenan Jesús. Maríaña' allo'tsena pocollo all anen. ²¹ Martaña allempo poctenan Jesús atet otapueñ:

—Ñerra'm Partseshacha' arro'tsenpeñcha' amate' rromuerrñeña nesayañ. ²² Ama't te'pa' napa' neñoteneñ ñerra'm erra'tsencha' penamñ Yepapar, ñapa' chocmach atet ponañ.

²³ Jesúsñaapa' atet och:

—Po'ño'chpa' tanerrach pesayañ.

²⁴ Martañaapa' atet otererr:

—Po'ñoçh napa' neñoteñ tanterrach esempohuañen allempoch atantatareŧey allohueny.

²⁵ Jesúsñapa' atet otererr:

—Napa' na ñeñten e'ñe po'ñoçh atantatañen, napa' ñeñten alloch e'ñe socrena. Erra'tsencha' name'ñenaya na ama'tcha' rromuenetañpa' ñetpa' ellochña alla correrret.

²⁶ Ama't ñaña allohuen ñeñt corra'yetsa te' erra'tsencha' name'ñerraya na ñetñapa' corretsetach ŧayoteñ e'ñe errponañohuen. Papa' ¿pame'ñenna't ñeñt atet noteneŧ?

²⁷ Martañapa' atet otererr:

—Partseshacha' napa' neñoteneŧ e'ñe po'ñoçh p'apa' ñeñteŧ Cristotosets, p'apa' Yepar Puechemereŧ, p'a atarr yecuen ahuatoteñ o'ch pehuapa arr patsro.

Allempo Jesús yahuosa Lázarõ puepampro

²⁸ Allempo atet otuepa' ñapa' allenta ahuer pocollo, atet otuerran pa'mo'nerr María, ñeñtpa' atet och a'nahua:

—Te'pa' o' huena Maestro, o' agotatueneŧ.

²⁹ Maríaña e'mare'te'pa' atantoche' allenta ahuo' ñaña o'ch poctenan Jesús. ³⁰ Ñehua, Jesúsapa' ama çhena' anetso, allo'tsenara all pocten Marta. ³¹ Judionesha'ña ñeñt allo'tsa'yen pocollo ñeñt emya'tene' ñetñapa' enteñet atantoche' María puema'yoreñ çha'nem ñetñapa' allenta co'a'huanmet. Ñetpa' çha otenapuetañ arrcha' ta po'sayañ puepampro o'ch ya'na'teña'.

³² Allempoña çhap María allo'tsen Jesús, all entospa' concorposa pa'rrpõt. Ñapa'çho'ña atet otos:

—Ñerra'm Partseshacha' arro'tsenpeñcha'pa' amate' rromuerrñeña nesayañ.

³³ Allempo entosan Jesús all atarr yahuena María ñaña judionesha' ñeñt co'tose' ñetpa'çho'ña e'ñe parro attecma yahuanrrortenet, ñañaapa' pueyoçhropa' atarr llecapretosanet ñeñto'marña çha enarosa. ³⁴ Ñañaapa' atet otapanet:

—¿Erra'tña sepampuer?

Ñetñapa' atet ochet:

—Ñehua, Ayochreshate o'ch ahuey o'ch penteña'.

³⁵ Allempoña Jesúsapa' yahuosa ñaña. ³⁶ Judionesha'ñapa' otyeset:

—Ñapa'çho' atarrepa'tca'ye morrenteña.

³⁷ Puesheña'tetsñapa' atet otyeset:

—Añmapa' ñeñtca'ye cohuaterre'ña aporo'yet. Ñerra'm arro'tseneñcha'pa' amachca'ye muenacheñe o'ch rromuerreñña Lázarõ.

Allempo Jesús tantaterran Lázarõ

³⁸ Jesúsña e'ñe puellquëño'tpa' enarerrerr. Allempoñapa' çhap puepampro all mapuetpono e'ñe all yottampeñet mapyo. ³⁹ Allñaapa' atet otosanet Jesús:

—Te'pa' sa'rrote't mapue' a'yeneŧ.

Martaña ñeñt arromñañ po'çhpa' atet otterrannerr Jesús:

—Partseshacha' o'te' çha pomaña' o' pa'tatsmat pampa'huet.

⁴⁰ Jesúsñapa' otererr:

—Ama'tña napa' o'ca'ye notuoseŧ ñerra'm p'ame'ña'nachpa' pentoñcha' Yompor po'partsoña.

⁴¹ Allempoñapa' a'rrote'tet mapue' a'yeneŧ, Jesúsñapa' cohua' enoneŧ atet ot:

—Apa, neparasyoso'taŧ ŧarro'mar te' p'apa' pe'mñotenen ñeñt atet nenamueneŧ.

⁴² Ñehua, napa' neñoteñ çhocma pe'mñotenen. Añña acheñenesha' ñeñt tomçha'tets arr ñocpuet neparasyoso'teneŧ allochñapa' attoch eñotenpet p'a ñeñteŧ nellsensene'.

⁴³ Ñeña otuapa' allempoñapa' rrana huomencpa' atet ot:

—¡Lázarõne, te'pa' o'ch notaŧ petantena, peçha'nen!

⁴⁴ Allempoñapa' čhepa'tcha' čha'netsña Lázaro ñeñt' o' rromhua, eřota'tareř poto ñaña pa'rrpōt, ñaña pa'clloyōtpa' e'tacлле'chareř pañello. Jesúsñapa' atē oterraneterr:
—Te'pa' čhosañaca'ye toramperre' esheccha' chope'chnerr o'ch ahuerr.

Atto atarr o'pateñet Jesús o'ch muetsatateret

(Mt. 26.1-5; Mr. 14.1-2; Lc. 22.1-2)

⁴⁵ Allempoña shonte' judionesha' ñeñt' cotose' María ñeñt' ente' Jesús atto orrtatosanet po'partsoña ñetpa'cho'ña e'ñe allempocma ame'ñeret ñamet Jesús. ⁴⁶ Tarraña po'potantañečnoña' ahuanmuet fariseoneshesho ñetñapa' serrpare'tatoset fariseonesha' ñeñt' atē o' pōhua Jesús. ⁴⁷ Allempoña fariseonesha' ñaña ñeñt' pa'm'cha'tareřnesha' pen allohuen judionesha' po'cornaneshar, ñetñapa' apčhachet allohuen ñeñt' a'pocstatene' ñoñets judioneshacop. Ñetña allempopa' atē otyeset:

—Errořuachñaca' yepe'ña, ñeñt' yacmarpa' čhocmaca'ye orrtatyenanet partsoteñets.

⁴⁸ Ñerra'm atta yequečhpue' allohuenña acheñenesha'pa' čhate' ame'ñyet ña, allempoña po'ñočpa' čhate' huapa am'cha'tareřnesha' romo'marnesha' čhate' puerratañpsosyet Parets pa'paquell ama't ñeñt' anareř Partsocop, ama't e'ñe ya ya'netserpa' čhate' puer-ratañpsosyet.

⁴⁹ Puesheñarrñapa' ñeñt' sochetsa Caifás allempopa' ñeñt' pa'm'cha'tareřer pen allohuen judionesha' po'cornaneshar ñañaapa' atē otanet:

—Sapa' ama es señořeno, ama't coñe'ta. ⁵⁰ Ama't pocte' senteñeña ñerra'm puesheñarr yacmapa' o'ch rroma allohuen acheñeneshacop, allochñapa' allohuen yamo'tsna'tarpa' amach chenca'huerreto.

⁵¹ Ñapa' ama ñořaye' eñořoña atē. Ña allempopa' ñeñt' pa'm'cha'tareřer pen allohuen judionesha' po'cornaneshar ñeñto'marña ñapa' Parets eñořate'. Ñapa' añ a'potanet atto Jesúspa' ñach rromuerrets allohuen pamo'tsna'tarneshacop. ⁵² Amach e'ñe ñapña pamo'tsna'tarecpayaya rromoña Jesús, añecpa'nachña rroma allohuenacop ama't erra'tsencha' puechemer perr Yompor arr patsro, ñachña parrocmataterrahuet.

⁵³ E'ñe allempoteñña atarr o'pateñet Jesús o'ch muetsatachet.

⁵⁴ Ñeñto'marña Jesúspa' o'huañ chopeñe'ch allo'tsa'yen judionesha' all Judeo. O' ahuo' amayarero'mar, čhap paterr anetso ñeñt' pa'so'cheñ Efraín. Allñapa' alla a'posa epuet pueyochresha'.

⁵⁵ Allempoña o' čherrmocherr pascuapo allempoch alla cosherrerr judionesha'. Al-lampaño'marnesha' ñeñt' allo'tsa'yenet shontet ahuanmuet Jerusaléño. Ama čhena' pascuapo ñetpa' añecopña ahuanmuet attoch a'cohuentatoset e'ñe ñetañeña Partsocop.

⁵⁶ Ñetñapa' Jesús a e'nořet, a'řto'tanna'tyesoset allempo tom'cha'toset Parets pa'paclo; allñapa' otanna'tyenet:

—¿Errořena't sotenña sa, ta'm huapachña Jesús, ñato' amach huapoña arr?

⁵⁷ Ñehua, ñeñt' pa'm'cha'tareřnesha' pen allohuen judionesha' po'cornaneshar ñaña fariseonesha' ñetpa' atē otyeset acheñenesha':

—Ñerra'm eseshascha' eñote' erro'tsente'ña Jesúspa' o'ch sotey ya allochñapa' o'ch yerrmach.

12

Atto puesheñarr coyanesha'pa' a'yatca'tosan Jesús eñmosaño

(Mt. 26.6-13; Mr. 14.3-9)

¹ O' pechapmatama' o'ch čhapa'muen pascuapo, Jesúsapa' alla čherr Betanio. Allñapa' allo'tsen Lázaro ñeñt' rromats ahuaña ñeñt' alla tantaterr Jesús. ² Allñapa' all rrallme'chatneñet. Martañapa' ña nenahuet rreñets. Lázaroñapa' ña rrets epuet Jesús ñaña po'potantañečno. ³ Allña Mariapa' chetan puenñarr eñmosaň ñeñt' otenet nardo puese' e'ñe ñeñtoche' ñeñtñapa' atarr tsa'te'. Ñañaapa' alloña a'yatca'tan Jesús. E'ñe ña

pue'chopa' alloña a'porrarra'tquër. Ñeññapa' ora eñmosařtatan pocollohuen. ⁴ Judas Iscariote ñeññ Simón puechemer ñeññara pueyochreshar ñeññcha' pomuerre' ñaña'pa' atet ot:

⁵ —Eso'marte'ña añ eñmosařpa' ama čhoye'ña yepome, čhochñačo' yepomeña' yeganañcha' shonte' quelle ñeññ trescientos denario allempopa' yapa'yeseñcha' huocchañneshačhno ñeññ atarr es pallta'yetsa.

⁶ Ñapa' ama puellquëñořeye' huocchañneshačhnocop atet oto. Ñapa' țarro'mara atet ot, ñapa' atarrca'ye eñeñ. Ñapa' e'ñe ñacma anmamřpene' quellayepo'r ñeññ allohuenacop, ñapa' allotña etenña quelle ñeññ esha'tenet all. ⁷ Tarraña Jesúsñapa' atet otanet:

—Semnachñaca'yeña coyanesha' ñeññ atet penen. Ñapa' añecop añño'tennan ahuařoteñ eñmosař țarremphua allempoch a'yana'terrneterr ñeññcha' epuet pampa'pesnet. ⁸ Tarraña ama'tcha' čho pomosaneñ eñmosař alloch es apa'yeseñeñ huocchañneshačhno, țarraña čhocmachca'ye eñallña huocchañneshačhno arr patsro. Tarraña nañapa' po'ñočpa' amachca'ye allo'na sentenno arr patsro.

Allempo o'pateñet Lázaro o'ch alla muetseret

⁹ Shonte' judionesha' allempo e'mare'chet o' alla čherr Jesús all Betanio, ñetñapa' huačha'tet. Ama e'ñe ñapřecpa Jesúsocop huačha'teto o'ch enteñeta', añecpa'ñaña huačha'tet o'ch enteñeta' ñaña Lázaro ñeññ rromats ahuaña ñeññ tantaterr Jesús.

¹⁰ Ñeññña pa'mřcha'tareřnesha' pen allohuen judionesha' po'cornaneshar ñetñapa' añe'na o'patenet Lázaro ña'nach muetset. ¹¹ Tarro'mar allempo tanterra Lázaro shonte' judionesha' ñeññ ame'ñaya Jesús ñeñño'marña ñetpa' o' quečpa'hueretña ñet po'cornaneshar.

Allempo čhap Jesús Jerusaléño

(Mt. 21.1-11; Mr. 11.1-11; Lc. 19.28-40)

¹² Tsapaña shonte' acheñenesha' ñeññ shontetsa pascuacop Jerusaléño, ñetñapa' e'mare'teñet Jesús o' čhappmoch ñaña Jerusaléño. ¹³ Ñetñapa' tsorro'tyesnomuet shequëpan ñeññ anemyeset allo topanetyesnomuet toñ allcha' oñmos Jesús. Ñetñapa' puer-ranarshet ahuanmuet o'ch poctet Jesús ñeññpa' atet otyesnomuet:

—¡Acsherrapo'ch allohueney! ¡Aye'chočtaterrapo'ch Jesús ñeññ llesensen Yompor! ¡Aye'chočtaterrapo'ch Jesús ñeññcha' Pa'mřcha'tareřer perr israelnesha'!

¹⁴ Ñehua, Jesúsñapa' all entnoman paterr ashnařollpa' allenta monta'nma allo. Ñeññpa' añecop atet řa ñeññ atet anuareř ahuařoteñ e'ñe ñocop, ñeññapa' atet oten:

¹⁵ Amach čha semřcha'tatsto síono'marneshacha' ñeññarasa jerusaléño'marneshas. Secue'řach ře'čca'yeña huaponasaña ñeññcha' Sa'mřcha'tareřer seperr. Ñapa' añaca'ye monta'nena ashen rre'ptorechor.

¹⁶ Ñehua, ñeññ ñoñets allempoña pueyochresha'pa' ama čhapaneto pueyočhreto. Tarraña tsapařonetña allempo rroma Jesús, o' alla tanterra alla ahuer pue'ntaño all atarr cohuentatapuer Pompor, ñetñapa' allempaña čherranetña pueyočhreto ře'ña po'ñočpa' o'ca'ye etsoterra e'ñe atet anuareř ñocop ama't ahuařoteñ.

¹⁷ Acheñenesha' ñeññ allo'tsa'yen allempo čhore'tenan Lázaroñ puepamproř atto tantater, ñetñapa' ñeñña a'pořayeset. ¹⁸ Ñeñño'mare'ñaña ahuanmaña shonte' acheñenesha' o'ch poctet țarro'mar ñetpa' o' e'mare'chet ñamet ñapa' orrtatenanet po'partsoña.

¹⁹ Allempoña fariseonesha'pa' atet otanna'tyeset:

—Señčře'ca'ye'm yapa' amate' erroř es yeřo ama't coñe'řa. Secue' shonte'ca'ye ñaña acheñenesha' errařarenot o' e'ñe cořa'huanmet.

Allempo griegonesha'pa' mueneñet o'ch eñchet Jesús

²⁰ Patanta'tets griegonesha'pa' ahuanmuet ñamet o'ch coshapreteneta' pascua; ñetpa' añecop ahuanmuet o'ch concorposet all. ²¹ Ñetña'pa' ponmosyet Felipe ñeñt bet-saido'marnesha' ñeñtara galileo'marnesha'. Ñeñtña'pa' atet otoset:

—Nomporcha' yapa' aña'ye yemnen o'ch yeserrpare'tos epay Jesús.

²² Felipeña'pa' allenta otenana' Andrés. Ñetña e'ñe epsheño'maretpa' ahuanmuet o'ch oteñeta' Jesús. ²³ Jesúsña'pa' atet otapanet:

—Te'ña po'ñoçhpa' o' etsoterra allempoch na Ñeñten Acheñetosetspa' o'ch alla cohuentaterrren Nompör. ²⁴ Ñeñt'pa' e'ñech po'ñoçh atet netma'ntatasa atet pena puerets. Ama't erra'tsena puertsör ama çho pampallme'cho patso allcha' puetsohua pa'tall ñeñt'ach patrrara pue'llomer. Tarraña ñerra'm çho pampallme'cha patso allcha' puetsa' pa'tall attochña chop. Ama't puellmarra pampallme'chatsa atarrcha' aton ellomre'terr. Ñeñt'pa' añ notenes e'ñe pocte' o'ch nerroma na ñeñten puesheñarrana attochña shonterra ñeñt'cha' name'ñerraya. ²⁵ Ñeñto'marña notenes: Ñeñt atarr morrentenaya atto coshena arr patsro, ama pocteye' entenano o'ch es sohuanom Yomporecop, ñeñt'ña pocreña atarr morrentena, ñeñt atet petsapa' çhach a'chencatena e'ñe ñañeña. Tarraña ñeñt ama morrentenaye atto coshena arr patsro, e'ñe pocte' enteñ o'ch es sohuanom Yomporecop ama't pocreño'huen, ñeñt atet petsa ñetña'pa' corretsetach pocsheñeshocmañen tayoteñ e'ñe errponañohuen. ²⁶ Ñerra'm esesha' muenats o'ch torrenet nocop, co'a'netepa' attochña e'ñe neyochresha' neperranet. Tarro'mar ñerra'm erro'tsenencha' na ñeñt torretsa nocop ñetpa'çho'ña allo'tsenetcha' ñamet. E'ñe allohuen erra'tsencha' torrerrtsa nocop, Nompörña'pa' atarrcha' cohuentaterranet.

Allempo Jesús eñotatanet ñapa' çhoch muetseret

²⁷ 'Te' na neyoçhropa' çha atarr nellquëna. Tarraña ama't atteña'pa' Nompörña napa' amach çha notatsche amach muenatano o'ch huapona ñeñt atarr amueroçhtatañ nenten. Ñeñt atetpa' amach notatsche tarro'marña napa' ñeñt'ecopca'yeña nohuapa nach amueroçhtatarettertsa. Añcha'ña noch Nompör:

²⁸ —Te'pa' pepa'chña Apa aye'choçhtatarettertsa.

Allempoña'pa' çha e'morrtatsa ñoñets entot, Yompörña'pa' atet ot:

—Napa' o' necohuentatua, elloña o'ch alla necohuentaterrerr ñañeña.

²⁹ Shonte' acheñenesha' ñeñt tomçhets all, ñetña atet e'mueñetpa' atet otyeset:

—Chote'ca'ye terecorena.

Po'potantañña'pa' atet otyeset:

—Aña'ye eñorana'tenaya Yompör po'millaño'teñer.

³⁰ Jesúsña'pa' atet oterraneterr:

—Ama nocpaye' huenoña añ ñoñets. Ñeñt'pa' e'ñe socop huena. ³¹ Te'pa' o' anare'tta allohuen acheñenesha' arr patsro ñeñt ama name'ñenaye ñetpa' amñare'tterretcha' coñcheñtso. Ñaña oneñeñ ñeñt pa'mcha'tareter pen acheñenesha' arr patsro, te' ñocoppa' o' anare'tta ahupore'tare'terrach esempohuañen. ³² Na ñerra'm esempoch echantañperrnet corsocho allempoña napa' neçhore'tercha' allohuen pa'namen acheñ attoch ame'ñerrnet.

³³ Ñapa' añecopña eñorana'tenanet attoch eñotatanet ñapa' corsochoch rromuerr.

³⁴ Acheñenesha'ña'pa' atet otyeset:

—Yapa' yeñoteñ añ ñoñets ñeñt atet anare't ahuatoteñ, ñeñt'pa' atet oten ñeñt'cha' Cristoterrets ñapa' ama arromña'teshayaye ama't errponaña. Ta', ¿eso'marte' pañapa' poten ñeñte'p o' Acheñetosetspa' echantañpsare'te'po'ch corsocho allcha' perromuerr? Ta', ¿esesha' te'ña ñeñt po'ñoçh Acheñetosets? amapa' ¿ñeñt'arate' ñeñt'cha' Cristoterrets?

³⁵ Jesúsña'pa' atet oterraneterr:

—Mameshaña palltena arro'tsenmeñen na ñeñten a'puetarsam̄psañtetsa. Soctape'cherrnan e'ñe tayecma neñoñ tayepa'tña arro'tsenmeñen ñeñtencha' a'puetarsam̄perre' soctapña allochñapa' attoch amach cha sechencia'huerro. Po'ñoñ ñeñt ama ame'ñetso ñetpa' ama eñoteñeto attoch chenca'huerret. Ñeñto'marña ñetpa' e'ñe atet penet ñerra'mrrate' checmeta chope'chenet ama eñoteñeto errenetcha' tet. ³⁶ Na ñeñten sa'puetarsam̄pene' soctapña' te'pa' arro'tsenmeñen. Soctape'cherrnan neñoñ tayepa'tña' arro'tsenmeñen. Allochñapa' o'ch seyeçquerra sa acheñres ñeñtescha' atarr cohuen orrtatyerre' ñeñt cohuen enten Yompor tarro'mar sapa' e'ñech puetro socrena.

Otua Jesús atetpa' ahuer a'nahua; acheñenesha'ñapa' ama eñocheto errate' ahuer.

Atto judionesha'pa' ama ame'nyeto Jesús ñeñtpa' añ etsoterrtsa ñoñets ñeñt anaretet ñocpuet

³⁷ Jesúsapa' ama't shonte' orrtatyenanet po'partsoña tarraña amaña eseshaye' ame'ñenayoña ña. ³⁸ Ñeñtpa' attocayeña etsotaña Isaías po'ñoñ ñeñt a'mtaye't ahuat Yompor po'ñoñ. Ñeñtpa' atet ote't ñocop:

Amach Nomporcha' eseshaye' yame'ñayo ñeñtcha' atet yeserrpare't. Ama Nomporcha' eseshaye' poctenaye pa'pehuamenc.

³⁹ Ñeñto'marña amate' errotenot ame'ñeto. Tarro'mar ellonet Isaíasapa' atet ote't:

⁴⁰ E'ñe patpare'teñoñet Yomporñapa' muenatanet o'ch echarrtet pueyoçhret. Attochña ñetpa' çhach ottenet ñerra'm aporo'yetet ñeñt ama es enteno. Ñeñto'marña ama muenatenaneto o'ch es entet taye'to'te' çhapanet pueyoçhreto. Ñeñto'marña ama't mameshapa' amach es cotape'cheneto nocop attoch na'queshp̄aterranetañ.

⁴¹ Isaíasapa' tarro'mar atet ote't ñapa' e'ñe entane't Cristo po'cohuenña ñeñto'marña eñose'tña ñocop.

⁴² Tarraña shonte' acheñenesha' ñeñt ame'ñaya Jesús ama't ñaña añcha'tareteçhno. Tarraña ñetpa' mecha'çete't fariseonesha' ñeñto'marña ama a'metete'te. Añ mecha'tenet taye'to'te' mueño'tanet judionesha' po'prahuot. ⁴³ Tarro'mar ñeñt ame'ñetsañ ñetpa' añe'na muenenet o'ch e'ñe cohuen entenanet acheñenesha'. Ama añeye'ña mueneneto o'ch e'ñe cohuen entanet Parets.

Atto Jesús po'ñoñ ñeñtcha'ña otteñe'cherre' acheñenesha' esempohuañen

⁴⁴ Jesúsña rranapa' atet oterrerr:

—Ñerra'm esesha' name'ñenaya na, ama naptaye' ame'ñenneto. Añe'naña ame'ñenet Nompor ñeñt nellensene'. ⁴⁵ Esesha' nentene' napa' añe'naña entenet ñaña Nompor ñeñt nellensene'. ⁴⁶ Napa' añecopña nohuapa arr patsro nach a'puetarsam̄pene' acheñenesha' poctapña, allochñapa' ñerra'm esesha'ch name'ñaya na amach allo'tsenareto checmeto. Ñeñt checmeto'tsena ñetpa' ama eñoteñeto ñeñt cohuen enten Yompor. ⁴⁷ Ñerra'm esesha' e'mue' neñoñ tarraña ama't ama ame'ñerrnaneto neñoñ, napa' amach naye' mueñenahueto coñcheñtso. Tarro'mar napa' ama añecpaye' nohuapo arr patsro attoch nemños acheñenesha' coñcheñtso. Napa' añecopña nohuapa o'ch na'queshp̄atos acheñenesha' arr patsro. ⁴⁸ Esesha'chña nachmene' ñeñtcha' ama ame'ñerraye neñoñ, ñocpuetñapa' eñall attoch amñare'tterret coñcheñtso. Ñeñtara añ ñoñets ñeñt neñen na te'pa' ñeñtcha'ña mueñaterrahuetña coñcheñtso esempohuañen. ⁴⁹ Tarro'mar napa' ama e'ñe notaye' neñeno. Apaña ñeñt nellensene' ñapa' ñaña notene' atetcha' notas ñaña atetcha' ne'ñorana'tasa. ⁵⁰ Napa' neñoteñ ñeñt atet otenen ña ñeñtpa' ñeñtcha'ña allochña sapa' corretsasach socsheñeshocmañen tayoteñ e'ñe errponañohuen. Ñeñt atet neñen napa' añca'ye neñen ñeñt atet otenen Apa.

13

Allempo Jesúsapa' e'patca'tyesan pueyochresha'

¹ Ama't ama čhena' pascuapo allempoch cosherrerr judionesha', Jesúsñapa' eñoteñ e'ñech ñeñteshaña allo'tsen arr patsro o'ch ahuerr Pomporesho. Ñapa' chocma atarr morrentenana allohuen ñeñt pueyochresha' pen arr patsro. Ñeñto'marña allempopa' e'ñe poctacma morrentuenanet.

²⁻⁴ Ñehua, Judas Iscariote ñeñt Simón puechemer, oneñeñña' ahuepa't cotape'chach pueyočhro o'ch pomuerran Jesús. Jesúsñapa' e'ñe eñoteñ ñapa' tarro'mar llesenserña Pompor allohuenacop. Tarro'mar ñapa' e'ñe eñoteñ Yomporeshotca'ye huapa, elloñapa' o'ch alla ahuerr ñesho. Ñeñto'marña allempo rrallme'chnenet Jesúsña o' tompa' rrotana pa'terr pa'shtam ñeñt nen enot o' chetan pa'terr e'shmoco'tametspa' o' chana allo. ⁵ Alotñapa' o' shan oñ huantejo alloña e'patca'tyesanña pueyochresha'. E'shmoco'tamitsoñapa' alloña a'porrarra'tcayerranet ñeñt allo chanena.

⁶ Atteñapa' ponmana Simón Pedro, ñaña' atet och:

—Partseshacha' amaca'ye pocteyaye o'ch pe'patca'tonña netac. Tarro'mar p̄apa' p̄a atarr sherbets, napa' amaca'ye esoyayno.

⁷ Jesúsñapa' atet och:

—Ñeñt atet nepenes te' sapa' amach señoche. Esempopa' čhaponasach seyočhro.

⁸ Pedroñapa' atet otererr:

—Ama't ahuaña napa' amach nemnatape o'ch pe'patca'tenña na tarro'mar napa' amaca'ye nemno o'ch nepencna'ntataḡ.

Jesúsñapa' atet otererr:

—Ñerra'm amach ne'patca'tapepa' amach errotenot e'ñeye' peyemtenno.

⁹ Simónña Pedropa' atet otererr:

—Ñerra'm po'ñočhte' atet Partseshacha' amachña ñap̄ta netac pe'patca'tono nota'nachña e'ñe ora noñohuen.

¹⁰ Jesúsñapa' atet otererr:

—Ñeñt o' apuapa' amaca'ye es pallteneto, añaca'yeña palltenet o'ch e'patca'chet. Atet sepena sa a'cohuentatuaretes sa soctap̄ñoť. Sapa' e'ñe cohuen a'cohuentatuaretesañ tarraña ama allohuenacmaye' a'cohuentatuareteso.

¹¹ Ñehua, Jesúsapa' e'ñe eñotenan ñeñtcha' pomuerre' ñeñto'marña atet otanet: “Ama allohuenacmaye' a'cohuentatuareteso.”

¹² Allempoña e'patca'tuanet pa'tacpa' cheterran pa'shtampa' o' alla anerr. Allempoñapa' atet oterraneterr:

—Te'pa' o'ch neñotatas ñeñt neyčhatenes ñeñt atto ne'patca'tenes. ¹³ Ñehua, sapa' sotenen Maestro, ñaña sotenen Partsasha'. E'ñe pocte' po'ñočh sotenen tarro'mar po'ñočhpa' ñeñtenca'ye. ¹⁴ Atto na ne'patca'tas sa, ama't na ñeñten Separtseshar sepen ñaña Semaestror sepenen, sapa'čo'ña ñeñt e'ñe poctetsa socop se'patca'tanna'tepa'ch samña. Ñehua, ñeñt po'ñočh notenes, ñeñtpa' atet: Amach sañeña atarr cohuen entetso, attochña e'ñe cohuen sesherbannena. ¹⁵ O' neñotatas atetcha' sepa samña. Sapa'čo'ña attepa'ch sepa atet o' nepohuas sa. ¹⁶ Po'ñočhca'ye o'ch notas: Ñeñt ayochreshat ñerra'm ama esoye' enteno ñañeña ama't e'ñe mamesha, ñeñtña pueyochreshačhno pen e'ñepa'ch attecmet amach esoye' enteneto e'ñe ñañeñeta. Ama't na ñeñten allsensareten ama esoye' nenteno ama't mamesha, ñeñtcha' nellsensa'yes namñapa' amuepa'chña esoye' enteneto e'ñe ñañeñeta. ¹⁷ Ñerra'm ñeñtña sečhapoya seyočhropa' ñeñt atet neyčhatenes, sañapa' atarrcha' cosheñtso'tsenes ñerra'm e'ñe po'ñočh atet seḡohua.

¹⁸ Ama allohuenacpayaysoye' neñeno. Napa' neñotenes e'ñe puesheña'ttsospa' atet soctape'chyen seyočhro. Ama't neñotensoñ atteseñpa' tarraña e'ñe atfa na'crreres

allochñapa' attoch etsoterra Yompor po'ñoñ ñeñt atet anuaret nocop ahuatoteñ, ñeñtpa' atet oten: "Ñeñt parro yerrallme'chenpa' ñepa'tcha'ña tanterrtsa nocop." ¹⁹ E'ñe tayoteñpa' atet notenes ama't ama etsotena' allochñapa' esempoch etsoterra, sapa' same'ñach napa' ñeñten po'ñoch Cristotets. ²⁰ Po'ñochca'ye o'ch notas: Ñerra'm esesha' e'ñe cohuen aguëne' ñeñt nellsensen na ñetpa' na'naca'yeña aguënet e'ñe cohuen. Ñaña ñeñt e'ñe cohuen naguëne' na, ñetpa' Nompore'naca'yeña aguënet ñeñt nellsensene' na.

Allempo Jesúsapa' eñotatanet Judaspa' ñach pomuerre'
(Mt. 26.20-25; Mr. 14.17-21; Lc. 22.21-23)

²¹ Jesúsña allempo atet otuapa' pueyochroñapa' cha lleca'huen. Allempoñapa' atet otanet:

—Po'ñoch te'pa' o'ch notas, puesheñarrotes sapa' ñeñtescha' nepomuerre'.

²² Pueyochresha'ñapa' allenta cohuanña'tyeset. Amaña esesha' eñotaye erra'tsenacopte'ña eñen. ²³ Puesheñarña pueyochresha' ñeñt atarr muerena Jesús, ñaña' e'ñe epuet Jesús anen all rrallme'chenet parro. ²⁴ Ñeñto'marña Simón Pedropa' agotan ñeñt anets epuet Jesús, ñeñtpa' atet och:

—Ñehua, pa' pto'ch yemaestror erra'tsenacopte'ña eñorena ñeñtcha' pomuerre'.

²⁵ Ñaña' e'ñe allame'ttsa atet otan Jesús:

—Partseshacha' ¿erra'tsenacpa'tña pe'ñorena ñeñtcha' pepomuerre'?

²⁶ Jesúsña' atet och:

—Ñeñtcha' nap añ pan ñeñtcha' ne'choma' ñeñtcha'ca'yeña nepomuerre'.

Allempoña e'choman panpa' apan Judas Iscariote ñeñt Simón puechemer. ²⁷ Allempoña aphue panpa' allempocmuepa't chorrya oneñeñ. Jesúsña' atet och:

—Errotente' pepa'chpa' e'ñeñaca'yeña tayecma atet pepe'.

²⁸ Pueyochresha'ñapa' ama't puesheñarra ñeñtet allo'tsa'yenet, ñetña' ama eseshaye' eñotaye esocopte' atet otenan Judas. ²⁹ Puesheña'ttsetpa' cha otapuetañ Jesúsapa' ñato' añte' oteñ o'ch rañtenana' ñeñt muenenet allcha' coshapretet, tarro'mar Judaspa' ñaca'ye anmape'chanpene'ña quellayepo'r. Amapa' ñato' añte' oteñ o'ch es apa'yesan huocchañeshachno. ³⁰ Allempoña Judaspa' agapuan panpa' allenta cha'nerr. Allempo' o' tsapuen.

Atetcha' yeña ñeñt e'ñe etserra, yemueranna'tepa'ch

³¹ Allempoña Jesús cha'nompa' atet oterraneterr:

—Te'ña po'ñochpa' e'ñe chapmoch allempoch cohuentaterrnan Parets na Ñeñten Acheñetosets. Attochña napa'cho'ña necohuentaterrñañcha' Nompore Parets. ³² Atto napa' necohuentaterrñañ Nompore Parets, ñapa'cho'ña cohuentaterrnancha' na, ñeñtpa' e'ñech mametolla o'ch e'ñe cohuentaterrnan.

³³ Jesúsña' alla oterraneterr:

—Na'cñeñarneshacha' o' e'ñe coñe'taña pallta allo'tsenmeñencha' na e'ñe arr parro. Napa' o'ch ahuerren. Allempoña sapa' se'nerrna'ch. Atet noteñ ahuaña judionesha', allcha' neserr napa' sañapa' amach errotenoñ sechapo, te'pa'cho' sapa' e'ñe atet notenes.

³⁴ Ñaña o'ch notas atetcha' sepannena ñeñt e'ñe etserra: Semueranna'tepa'ch. Atet nepenes sa atarr nemuerensa, sapa'cho'ña atarrepa'chña semuerannena. ³⁵ Allochñapa' e'ñe semorrentanna'teño'tpa' eñotasetcha' sapa' sa e'ñe po'ñoch neyochreshas.

Atto Jesúsapa' eñotatan Pedro ñapa' chocmach a'nasocha
(Mt. 26.31-35; Mr. 14.27-31; Lc. 22.31-34)

³⁶ Simónña Pedropa' atet och:

—Partseshacha' papa' ¿erra'tcha'ña peserr?

Jesúsña' atet och:

—Allcha' neserr napa' p̄apa' amach errotentot̄ p̄octa' noña na te'. Esempona po'ñoçhpa' ama't chenta seserrcha' saña.

³⁷ Pedroña' atet̄ otererr:

—Partseshacha' ¿eso'mare'tcha'ña ama tayecma nocterrpe? Napa' e'ñe pocte' nenteñ yerrmuepa' e'ñe parro.

³⁸ Jesúsña' atet̄ otererr:

—¿Po'ñoçha't e'ñe pocte' penteñ o'ch yerrroma parro? Po'ñoçhca'ye te' napa' o'ch notaḡ: Amach eñena' atollop̄ pañapa' o'ch ma'poch̄ p̄a' nasotenna.

14

Jesús'pa' ña toñetets alloch yeçherr Yomporesho

¹ Jesús'pa' alla oterraneterr:

—Seyoçhropa' amach cha sellcatsto. Atto seyemteña Yompor napa'cho'ña choña seyemterrna. ² Nompor pa'netsro all pue'ntaño allpa' shonte' pocoll allcha' seyçha'huerra. Ñerra'm ama atteñepa' napa' amate' notasñe. Ñeñto'marña napa' o'ch ahuerren attoch nañño'tuerrnas allcha' seyçha'huerra. ³ Ñerra'm o'ch ahuerren napa' nañño'tuerrnascha' allcha' seyçha'huerra. Ellochña nohuerrerrpa' allempochña e'ñe nahuerrsa' nesho allochña'pa' allo'tseneycha' e'ñe parro. ⁴ Sapa' e'ñe señoñeñ allcha' neserr ñaña e'ñe señoñeñ attoch seçherr saña all.

⁵ Tomásña' atet̄ och:

—Ayochreshate yapa' amaca'ye yeñotenpe errachña peserr. Errotentotuachca'ye yeñoçhte' attoch yeçherr yaña.

⁶ Jesúsña' atet̄ och:

—Napa' na toñetets ñeñten alloch seçherr Yomporesho, napa' na ñeñten sotene' ñeñt̄ e'ñe po'ñoçh Yompor po'ñoñ, napa' na ñeñten alloch e'ñe socrrena. Amach esesha' çhertso Yomporesho ñerra'm ama nanom ame'ñerreto. ⁷ Ñerra'm o' señoñerñoñ na, Nompore'nate'ña señoñerñeñ. Tayoteñña e'ñe po'ñoçhpa' o'ch señoñer tarro'mar te'pa' o' senter.

⁸ Felipeña' atet̄ och:

—Partseshacha' pegatey ñeñt̄ Apa, yapa' o' ñeñtam̄a yepallta o'ch yeñoçh.

⁹ Jesúsña' atet̄ och:

—Felipe, ahuatoteñ napa' allo'tseney parro. Pañapa' ¿ama't peñotenno? Ñeñt̄ puentaren napa' Apa'naca'yeña o' enterret. Eso'mare'tña p̄otenen o'ch negataḡ Apa. ¹⁰ Papa' ama'tña p̄ame'ñenno napa' e'ñe neparrocmaten epan Apa, Apapa'cho'ña e'ñe parrocmatenna. Ñeñt̄ atet̄ notenespa' ama notaye' atet̄ notenso. Apaña ñeñt̄ neparrocmaten, ñapa' e'ñe etsotatenan ñeñt̄ atet̄ neḡa'yen. ¹¹ Same'ña'na ñeñt̄ notenes, napa' e'ñe neparrocmaten epan Apa, Apapa'cho'ña e'ñe parrocmatenna. Ama't napa' ama ame'ña'poye' sentenno tarraña atto po'ñoçh norrtatyeññañ Nompor po'partsoña ama't ñeñtapa' same'ñyañaca'ye. ¹² Po'ñoçhca'ye o'ch notas, ñerra'm esesha' name'ñerraya ñetpa'cho'ña elloch atarr cohuen orrtatyerret ñeñt̄ atet̄ norrtatyen te'. Tarro'mar na te'pa' o'ch ahuerren Apuesho. ¹³ Ñerra'm escha' senamuen e'ñe na neso'chño e'ñe seyemteñoñen na, napa' e'ñech atet̄ nepennas. Attochña na ñeñten Yompor Puechemerenpa' necohuentateññañcha' Apa. ¹⁴ Ñerra'm es senamuen e'ñe neso'chño e'ñe seyemteñoñen na, napa' e'ñech atet̄ nepennas.

Atto Jesús'pa' otnerranet o'ch mueñuerranet Parets Puecamquẽñ

¹⁵ Ñerra'm sa po'ñoçh semorrentennate'pa' o'ch same'ñerrnana neñoñ ñeñt̄ atet̄ notenes. ¹⁶ Napa' nenamonascha' Apa ñapa' apascha' po'psheñeñ ñeñt̄cha' soctape'chatterre' ñeñt̄cha'ña sechorrerraya errponañohuen. ¹⁷ Ñeñt̄ña Yompor Puecamquẽñ ñeñt̄cha'ña señoñaterre' ñeñt̄ e'ñe po'ñoçh Yompor poçtaḡña. Ñeñt̄ña

ama ame'ñetso arr patsropa' ñetpa' amach errotentot chorrerranetoña Yompor Puecamquëñ tarro'mar ñetpa' ama enteñeto ñaña amach eñoteñeto. Tarraña sapa' o' señoter tarro'mar ñapa' allo'tsenes parro epas allcha' chorrerrsa. ¹⁸ Napa' amach cha nehuocchapotatnerrso. Ellochña alla nohuerrerr sesho. ¹⁹ O' mameshamerra palltenmeñ ñeñña ama ame'ñetso arr patsro ñetña' amach eseshaye' nenterraye, tarraña sapa' chocmach senterren. Tarro'mar napa' corretsana, ñeñto'marña sapa'cho'ña corretsasach. ²⁰ Allempoch chorrerrsa Yompor Puecamquëñ allempochña señoter napa' e'ñe po'ñoçh neparrocmaten epan Apa, sañapa' separrocmaterrnach, nañapa' neparrocmatennasach. ²¹ Ñerra'm esesha' e'ñeñoterre' neñoñ ñaña e'ñech atet perret ñeñt atet notenanet ñetña' ñeñtet e'ñe po'ñoçh nemorrentenaya. Ñeñña nemorrentenaya napa' ñetña' Apach atarr morrentenahuet. Napa'cho'ña atarr nemorrentenanet, nañapa' neñotaterranetcha' e'ñe po'ñoçh ñeñt atet nepena na.

²² Allempoña po'psheñeñ Judas ñeñt ama añeyaye Iscariote, ñaña' atet och:

—Partseshacha' yapa' ¿eso'mare'tcha'ña te'pa' o'ch peñotatey ya ñeñt atet pepena amachña añeye'ña peñotato ñeñt ama ame'ñetso arr patsro?

²³ Jesúsña' atet oterraneterr:

—Ñerra'm esesha'ch nemorrentaya na e'ñechña atet perret ñeñt atet notenanet. Apañapa' atarrcha' morrentenanet. Ñeshetoña' yeçhapcha' attoch yeyçherra ñet pueyoçhreto. ²⁴ Ñeñto'marña ñerra'm esesha' ama nemorrentayo amach atet perreto ñeñt notenanet. Añ ñoñets ñeñt atet se'muennan ñeñtpa' ama noyaye neñoñ, ñeñtpa' Apoña po'ñoñ ñeñt nellsensene'.

²⁵ 'Añmapa' tarro'mar atet notenes tayepa'tña' allo'tsenmeñen na arr e'ñe sesho.

²⁶ Tarraña Parets Puecamquëñ ñeñtcha' soçtape'chatterre', Apapa' mueñerrnascha' e'ñe na neso'chño e'ñe seyemteñoñen na. Ñapa' ñeñtcha' señotaterre'ña seyoçhro ora allohuen ñeñt chocma neyçhatenes te'. Ñaña ñeñtcha' seyerpaterraya allohuen ñeñt atet notyese'.

²⁷ 'Nocshateña nena'nerrnascha' alloch e'ñe socsherra seyoçhro, napa' choçhña atarr nocshatterres seyoçhro. Ñeñt atet nocshatenes na seyoçhro ñeñtpa' ama atteyaye ñerra'mrrate' añ patso'mar cosheñets. Ñeñto'marña seyoçhropa' amach cha sellca'peno ama't mamesha, amach cha es semcha'teno. ²⁸ Te'pa' o' se'mhue atet o' notuas, na o'ch ahuerren, ellochña alla nohuerrerr sesho. Ñerra'm po'ñoçh semorrentennañ o'te' socshañ tarro'mar napa' o'ch ahuerren Apuesho. Tarro'mar ñapa' nanac ahuaamencatesha', ello metanenen na. ²⁹ Te'pa' ama't ama etsotena', napa' o' notuas, allochña' ñerra'm esempoch etsoterra, sañapa' same'ñerach.

³⁰ 'Te' e'ñe parro'tseneypa' o'huañcha' allo'na neñosnen shonte' tarro'mar o' huapmocha oneñet ñeñt pa'mcha'tareter pen acheñenesha' arr patsro. Tarraña ama't o' huapaña' e'ñe ñoñapa' amach errot posno. ³¹ Napa' añcha'ña atet nepa ñeñt atet otenen Apa. Attochña acheñenesha' arr patsropa' eñochetcha' na po'ñoçhpa' e'ñe nemorrenteña Apa. Te'pa' satomcha't o'ch ahuey arroç.

15

Jesúspa' toma'ntata ñapa' ña uvachreçhmo'retets

¹ Jesúsña' alla yeçhaterraneterr ñapa' añ toma'ntata ña uvachreçhmo'retets. Ñeñto'marña atet otanet:

—Napa' na atten ñerra'mrrate' ñeñten uvachreçhmo'retets ñeñt e'ñe po'ñoçh cohuen sherbets. Nomporna'ña ña amre'tene' ñeñt uvachreçhmo'r. ² Sa ñeñtes neyemtenaya na sapa' attes ñerra'mrrate' uvachmo'r puetaquër. Allohuen puetaquër erra'tsen ñeñt ama me'tetso, Nomporna'ña choçhña pechamñpoñ puetaquër. Ñaña allohuen ñeñt

me'tetspa' chochña pechtacre'tyeset mamesha'tets attoch e'ñe cohuen e'shtacre'chet allochñapa' attoch atarrcha' nanac me'ten. ³ Ñeñt atet neserrpare'tatenes ñeñt neñoñpa' alloña o' sa'cohuentataretetua atet ñerra'mrrate' uvach o' e'ñe e'shtacre'tuet e'ñe cohuen.

⁴ Te'pa' attoña separrocmatenna attoña napa'cho'ña neparrocmatennasa. Atet pena tsachtaquër ñerra'm ama parrocmateno pue'choro' amach me'to e'ñe ñoña, sapa'cho'ña ñerra'm ama separrocmatenno amach erroteno' seme'toña samña e'ñe soña.

⁵ 'Napa' na atten ñerra'mrrate' uvachrechmo'r pue'chor, sapa' sa puetacres. Esesha' neparrocmaterre' ñaña napa' e'ñech neparrocmatenanet, ñeñtcha'ña nanac me'tats. Ñerra'm a'yo'tsensa nesho' amate' erroteno' sorrattyesoña ñeñt cohuen enten Yompor.

⁶ Esesha'ch ama neparrocmaterraye ahupore'tare'tcha' atet ñerra'mrrate' tsachtaquër ñeñt ama me'tetso chochña pecha'tañpsetña puetaquër o'ch e'ñe porrarrque'chua allempochña a'yapachetpa' o'ch chamuet tso allcha' poyua.

⁷ 'Ñerra'm separrocmaterrna ñerra'm chocma soctape'chennan neñoñ escha' senamuen napa' napascha'. ⁸ Atto nanac cohuen seme'tenpa' ñeñt'pa' allochña secohuentateññañ Nompor tarro'mar sapa' añcha' sorrattyen ñeñt cohuen enten ña. Ñaña sapa' attochña eñoterres acheñenesha' po'ño'ch ñeñtes neyochreshas. ⁹ Atto Apapa' atarr nanac muerenna na, napa'cho'ña atarr nanac nemuerensa samña. Chocmuepa'ch seyemtennana ñeñt atto napa' chocma nemorrentensa. ¹⁰ Ñerra'm same'ñennana neñoñ ñeñt atet notenes e'ñech seño'tenen napa' atarr nemorrentensa. Atet nepena na e'ñe name'ñeññaña Nompor po'ñoñ ñeñt atet o'tenen, ñeñto'marña napa' e'ñe neñoteñ ñapa' atarr morrentenna namña.

¹¹ 'Añmapa' tarro'mar atet notenes allochñapa' ñeñt nocsheña napa' coshaterrescha' samña. Allochñapa' sapa' o'ch e'ñe socsherra e'ñe poctacma. ¹² Añña ñeñt notenes: Atarrepa'ch semorrentannena allohuenes atet nepena namña atarr nemorrentensa samña. ¹³ Añmapa' ñeñña e'ñe po'ño'ch morrenteñets, o'ch ya'rroya yañeña o'ch yerroma añecop ñeñt atarr yemorrentyena. ¹⁴ Ñerra'm e'ñe atet sephohen ñeñt atet notenes sañapa' ñeñtes e'ñe neyemtena. ¹⁵ Te'pa' o'huañ atteye' nentenes ñerra'mrrate' ñeñt ya'taruasañer yepen, tarro'mar ñeñt ya'taruasañer yepen ñapa' ama eñotenanoña ñeñt atet co'tape'chen pamo'mte'. Tarraña na te'pa' e'ñe neyem nepenes tarro'mar ñeñt atet ne'mueññañ Apapa' sapa'cho'ña o' neñotaterres. ¹⁶ Sapa' ama saye' na'crraye, napa' naña sa'crrer'eña sa. Attoña o' napuerresña llesens attoch seta me'tarsats attoch e'ñe cohuen es sorrattyen ñeñt cohuen enten Yompor. Ñeñt'pa' ñeñt'cha' se'mer seperr ñeñtña se'merpa' amach ahuañaña'terro ama't ahuaña. Allochñapa' ama't erra'tsena senamueñ Apa e'ñe na neso'chño e'ñe seyemteño'ten na, ñapa' apascha'. ¹⁷ Añca'yeña notenes: Chocmuepa'ch atarr cohuen semorrentannena.

Allempo Jesús'pa' eñotatan pueyochresha' chocmach e'moñe'tenanet acheñenesha' arr patsro

¹⁸ Jesús'ña'pa' alla o'terraneterr:

—Ñerra'm acheñenesha' añ patsro e'moñe'tenset sapa' seño'chepa'ch na e'ñe nanom e'moñe'tenet. ¹⁹ Ñerra'm sa e'ñe parro attecmañ ñeñt ama ame'ñetso arr patsro, ñetñapa' e'ñete' cohuen muerensetañ tarro'mar e'ñeca'ye ñeñt'ena'tarecma. Tarraña sapa' ama e'ñe attecma'ye' separro'marneshacmateno atet pena allohuen acheñenesha' ñeñt ama ame'ñetso arr patsro. Sañapa' o' na'crreres ellonet nocop. Neño'marña acheñenesha' añ patsropa' o' e'moñe'taset samña. ²⁰ Seyerpach añ ñoñsor ñeñt o' notuas: "Allohuen ñeñt yochreshats errotencha' perrñañet ñeñt yochresha'tenahuet, ñetpa'cho'ña e'ñech attecma a'pare'tterret ñamet." Atto napa' co'tare'tennet pue'moñe'teño'tetan, sapa'cho'ña pue'moñe'teño'tetasp'a' co'tare'tasetcha' samña. Atto napa' ama ame'ñerrnaneto neñoñ, sapa'cho'ña amach ame'ñerrnaseto samña señoñ.

21 Ñeñtpa' atetcha' perrset tarro'mar sapa' naca'ye same'ñena tarro'mar ama eseshaye' eñotenaye Yompor ñeñt nellsensene'.

22 'Ñerra'm ama nohuapañe amach neserrpare'tatosanetañe, amate' eñallñeña attoch neyohua'yesanet po'chñarotet. Ñeñto'mar te'pa' ama eñalle attoch a'nasotet po'chñaret.

23 Ñeñto'marña ñerra'm esesha' ne'moñe'tene' na, Nompore'naña e'moñe'tennanet.

24 Ñerra'm amach norrtatanetañe cohuenñats ñeñt ama't ahuaña po'psheññechnopa' ama orrtatanete'te e'ñe attotapa' amate' eñallñeña attoch neyohua'yesanet po'chñarotet. Tarraña te'ña ñetpa' ama't e'ñe entennetañpa' chaña e'moñe'tennet ñaña Nompore'na e'moñe'tennanet. 25 Tarraña ñeñtpa' tarro'mara atet penet allochñapa' attoch etsoterra ñoñets ñeñt e'ñe atet anuaret ahuatoteñ, ñeñtpa' atet oten nocop: "E'ñech attota e'moñe'terrnet."

26 'Ñeñtcha' soctape'chaterre' e'ñe cohuen seyoçhro ñeñtcha' nemñohuerrnas Apueshot. Ñeñtpa' ñeñtña Apa Puecamquëñ ñeñtcha'ña señotaterre'ña ñeñt e'ñe po'ñoçh Yompor poctañña tarro'mar ñeñtpa' Apueshot huena. Ñerra'm esempoch çhaponasa ñachña na'poçose'. 27 Sapa'cho'ña sa'potancha' tarro'mar e'ñe allempoteñ netorrosa, sapa' e'ñe allempoteñ parro'tseney.

16

1 'Ñeñtpa' tarro'marña o' atet notuas allochñapa' amach alla ello sepurrerro.

2 Tarro'mar esempopa' çhapcha' allempoch huapore'tas judionesha' po'prahuot. Po'ñoçh çhapcha' allempo esesha'pa' ñato' o'ch muetsaset çhach otenapuetañ ñetpa' allote' sherbeñetña Yompor.

3 Ñeñtpa' tarro'marcha' atet paset ñetpa' ama eseshaye' eñotenaye Apa ama't napa' ama eñotenneto.

4 Añechnopa' o' notuas allochñapa' ñerra'm esempoch çhap, sapa' seyerpuerrnanach ñeñt atet notase't.

Atto Paret's Puecamquëñ ñach yoctape'chatyese' e'ñe cohuen

'Ahuañmo'cha añechnopa' ama notase'te tarro'mar allempoteñpa' e'ñe parrocmá allo'tseney. 5 Na te'pa' o'ch ahuerren allo'tsen ñeñt nellsense'. Saña ama't puesheñarrotésapa' amaña sa'p'to'tenno, errachña neserr.

6 Te'ña ñeñt atet notenes saña seyoçhropa' chaña atarr sellquëna.

7 Te'pa' añ notenes ñeñt e'ñe po'ñoçh. Socoppa' añ nanac poctetsa napa' o'ch ahuerren.

Tarro'mar ñerra'm amach neserro amate' errotenot huaponasoña Yompor Puecamquëñ ñeñtcha' soctape'chaterre' cohuen.

Tarraña ñerra'm neserrcha' napa' añcha' nemñahuerrnas Yompor Puecamquëñ ñeñtcha' soctape'chaterre' cohuen seyoçhro.

8 Ñerra'm esempoch huapa Yompor Puecamquëñ acheñenesha'ña arr patsropa' ñachña çhapatahuetña pueyoçhreto attoch eñoçhet ñet po'ñoçhepa't eñallet po'chñaret.

Ñaña añcha'ña çapatamet pueyoçhreto ñeñt e'ñe pocte' entyen Yompor.

Ñaña añcha'ña çapatamet pueyoçhreto attoch ñetpa' eñoteretcha' po'ñoçhpa' coñcheñtsach amñare'tterret ñeñt ama name'ñenayo na ñeñten Yompor Puechemeren.

9 Yompor Puecamquëñpa' eñotaterrancha' acheñenesha' po'ñoçh ñetpa' ama pocteye' entenaneto Yompor tarro'mar ama ame'ñenneto na ñeñten Yompor Puechemeren.

10 Ñaña ñach eñotaterrahuet ñeñt e'ñe pocte' entyen Yompor tarro'mar napa' amach allo'tsenarano sesho. Napa' o'ch ahuerren Apuesho amach alla senterrne'te.

11 Paret'sña Puecamquëñpa' ñachña eñotaterrahuet po'ñoçhpa' coñcheñtsach amñare'tterret ñeñt ama ame'ñetso tarro'mar oneñeñ ñeñt pa'm'cha'tareter pen shonte' acheñenesha' arr patsro, ñocoppa' e'ñe po'ñoçh anuaret amñare'tterrach coñcheñtso.

12 'Shontemeñ ñeñtcha' notaseñ tarraña te' sapa' amate' errotenot çhaponaso seyoçhro.

13 Tarraña ñerra'm esempoch huaponasa Paret's Puecamquëñ, ñeñtcha'ña señotaterre' ñeñt e'ñe po'ñoçh Yompor po'ñoñ tarro'mar ñapa' ñachca'ye señotatene' ñeñt e'ñe po'ñoçh Yompor po'ñoñ ñeñt ama shequëñtsoyaye. Ñapa' amaca'ye e'ñe ñoña eñeno.

Añca'yeña eñen ñeñt' atet e'muen Partsesho. Ñapa' añcha' serrpare'tatas ñeñt'cha' atet perra tsapatonef. ¹⁴Ñapa' nachca'ye cohuentaterre'; e'ñe eñotennan ñeñt' atet nepena na, ñapa' ñeñt'cha'ña eñotatyerres. ¹⁵Ora allohuen ñeñt' atet pena Apapa' napa'cho'ña e'ñe atet nepena namã. Ñeñto'marña napa' notenes eñotennan ñeñt' atet nepena na, ñapa' ñeñt'cha' señotatyerre'ña samã.

Ñeñt'ña sellquëñapa' puenaserrach socsheña

¹⁶Jesúsñaapa' atet oterraneterr:

—Te'pa' mameshamã o'huañcha' allo'na sentnemen tarro'mar napa' o'ch ahuerren Apuesho. Tarraña sapa' e'ñe mameshapa' o'ch alla yentannerra.

¹⁷Pueyochresha'ñapa' atet otanna'tyeset:

—¿Errofente'ña añ ñeñto'mar atet oteneý, mameshamãapa' o'huaño'ch allo'na yentneñ tarraña mameshapa' ahuo'ch alla yentannerra? ¿Errofente'ña añ ñeñto'mar ñapa' atet oteneý, ñapa' ahuo'ch ahuerren Pomposho?

¹⁸Alla otanna'tyenet:

—¿Eso'marte'ña atet oteneý, mameshamãapa' o'huañcha' allo'na yentneñ? Amaca'yeña yeñoteñe este'ña oteneý.

¹⁹Jesúsña eñotanet ñetpa' cho mueneñetañ o'ch a'p'to'chet. Ñañaapa' otanet:

—¿Ñeñte'tña sotannena ñeñt' atet notenes, o' mameshamã o'huañcha' allo'na sentnemen, tarraña mameshapa' o'ch alla yentannerra? ²⁰Po'ño'chca'ye o'ch notas: Sapa' sellquëño'p'a seyahuerrach. Acheñenesha'ña arr patsro ñeñt' ama ame'ñetso ñetñapa' chach atarr coshet. Sapa' sellquërrach tarraña sellquëña sapa' puenaserrnasach socsheña. ²¹Ñeñt'pa' o'ch netma'ntatasa ñerra'mrrate' coyanesha' allempo cheññaña allempoch emare'ten, chach lleca tarro'mar o' chapoña allempoch atso tenana puechoyore'toll. Tarraña allempochña eñalletatuepa' o'ch alla atarr cosherra o'ch pueserranña atto atarr llecach pue'maretoll, elloñapa' atarrcha' cosherra tarro'mar o' eñalletatuan pue'maretoll arr patsro.

²²Jesúsña alla oterranerr pueyochresha':

—Te'ña sapa' nanac llequëñtso'tsenes, tarraña elloñapa' o'ch alla yentannerra. Allempoña sapa' o'ch alla atarr socsherra seyochro. Ñeñt'ña socsheñapa' ama't e'ñe puesheñarra amach errofenot puerratañperrseto.

²³'Allempopa' amach sepallteno o'ch alla es sa'p'to'terrnerr. E'ñe po'ño'ch te'pa' o'ch notas: Ñerra'm es senamueñ Apa e'ñe na neso'chño e'ñe seyemteño'ten na ñañaapa' apascha' ñeñt' senamueñ. ²⁴Sa teme'ttsenpa' ama es senamueno e'ñe seyemteño'ten na e'ñe neso'chño. Te'ña ñerra'm senampa' saga'p'cha' allochñapa' o'ch socsha e'ñe poctacma.

Atto Jesucristo a'mchechatuerran allohuen ñeñt' e'moñe'tene' Yompor arr patsro

²⁵'Ñeñt' allpon neserrpare'tatyese't ñeñt'pa' e'ñe toma'nteñtso'chno notyese't. Tarraña chapcha' esempo allempopa' amach alla neserrpare'taterrserro toma'nteñtso. Allempopa' añcha' neserrpare'tatas Apacop ñeñt'pa' amach toma'nteñtsoyaye, allochñapa' e'ñech seño'tue. ²⁶Allempopa' senamueñcha' Apa e'ñe seyemteño'ten na e'ñe neso'chño. Allempopa' amach pallteno o'ch nema'yochañpensa Apuesho. ²⁷Apañapa' atarrcha' morrentensa atto sapa' semorrentenna, e'ñe seyemtenna atto napa' Apuesho't nohuapa. ²⁸Po'ño'ch napa' Apuesho't nohuapa, o' nechap añe patsro. Elloñapa' o'ch alla nesa'nerr añ pats, o'ch alla ahuerren Apuesho.

²⁹Pueyochresha'ñapa' atet ochet:

—Te'ñapa' ama toma'nteñtsoye' peñeno ñeñto'marña yapa' e'ñech yeño'tue. ³⁰Te'pa' yeñotene'p'papa' ñeñte'p' eñotuene' ora allohuen esocmañen. Ñeñto'marña yapa' amaca'ye pallteno o'ch alla ya'p'to'terrperr po'po'ñonef. Tarro'mar te'pa' yeñotene'p'papa' Partse-sho't pehuapa.

³¹ Jesúsñapa' atet oterraneterr:

—Sapa' taya'tña o' same'ña'na. ³² Te'pa' o' e'ñe chapmoch sa ama't puesheña'ttsospa' o' chaponasañ chach sematrra'tyesa allemeñ. Chach sahuanyesa allcha' semna'yes sa. Nañapa' sa'ypo'ña'huanmuencha'. Tarraña napa' ama e'ñe napteyaye, epanña Apa. ³³ Ora allohuen añechnopa' o' e'ñe notuas allochñapa' e'ñe seyemteñoten napa' chocmach socshena seyoçhro. Po'ñoçh añ patsropa' chocmach semueroçhtena. Tarraña e'ñe seyoçhro sapa' chocmuepa'chña socshena tarro'mar napa' o' na'mchechatue allohuen ñeñt e'moñe'tene' Yompor añe patsrot.

17

Allempo Jesúsapa' ma'yochamñpenana pueyochreshaçhno

¹ Allempoña atet otuanet añeçhno Jesúsapa' allenta cohua' enonetpa', ñeñtpa' atet otan Pompor puema'yocheño:

—Apacha' te'pa' o' chapona allempoch etsota ñeñt nocop. Te'pa' pecohuenta-tonepa'ch na tarro'mar Pechemer pepenen allochña napa'cho'ña necohuentatonapcha' pama. ² Atto papuen llesenspa' alloña pomnaren nepeñña allohuen acheñenesha'. Allochñapa' allohuen acheñ ñeñt po'patatenna, naña ñetpa' napuenanetcha' alloch ñetpa' corretsetach pocsheñeshocmañen tayoteñ e'ñe errponañohuen. ³ Añmapa' ñeñña alloch ñetpa' corretsetach tayoteñ e'ñe errponañohuen ñerra'm esempo eñoterrpet pa ñeñtep papuet e'ñe po'ñoçh Yomporretets ñaña ñerra'm eñoterrnet na ñeñten Jesucristo pa pellsensaren.

⁴ Napa' o' e'ñe necohuentatuonap arr patsro. O' e'ñe netsotuonap ñaña petaruas ñeñt atet poten. ⁵ Te'ña Apacha', pecohuentaterrnanepa'ch e'ñe alla pesho e'ñe atet allempo atarr a'cohuentatareñen pesho ahuat allempo ama eñalletena' añ pats.

⁶ Allohuen acheñ ñeñt neyochresha' pepatenen nañapa' añ neñotatenanet ñeñt atet pepena pa tarro'mar ñetpa' ñeñtet e'ñe allpona po'patatna arr patsro. Ñetña'pepa'tña o'patenahuet ñeñtcha' neyochresha' pepaten naña. Te'ña ñetpa' e'ñe ame'ñernapet peñoñ. ⁷ Naña ñetpa' e'ñe eñotueñet allohuen ñeñt atet ne'ñorenanet ñaña ñeñt es norrtatyenanetpa' ñeñtpa' e'ñe ora peshotecma huena. ⁸ Napa' añña ne'ñorenanet ñeñt atet potenen pa. Te'ña ñetpa' e'ñe cohuen ame'ñennet. Naña e'ñe po'ñoçh eñoteñet napa' e'ñe peshot nohuapa, pa ñeñtep nellsenserre'.

⁹ Te'ña napa' o'ch nema'yochamñpesnomanet ñet. Ama allohuenacpaye' acheñenesha' arr patsro nema'yochenpo, e'ñe añeçpa nema'yochenpa ñeñt neyochresha' pepatenen tarro'mar ñetpa' ñeñtareta peyochresha' pepen pama. ¹⁰ Tarro'mar allohuen ñeñt e'ñe nocmapa' papa'cho'ña e'ñe pocma. Ñeñña e'ñe pocmapa' napa'cho'ña e'ñe nocma. Ñetña te'pa' e'ñe cohuentatapretennet.

¹¹ Te'ña nocoppa' o' çherrmoch e'ñech ñeñteshaña añe patsro'tsenen tarro'mar napa' o'ch alla ahuerren pesho. Tarraña ñetpa' allo'tsenaretach arr patsro. Pa Apa Partso, pecuamñsepa'ch allohuen ñeñt neyochresha' pepatenen. Pehuamencotcha'ña pecuamñsanet. Allochña ñetpa' o'ch e'ñe parrocmatet e'ñe atet yepena yaña. ¹² Allempoteñ e'ñe parro'tseney poña pehuamencot necuamñsanete't. Napa' chocma nemoñenanet. Neñto'marña ama't puesheñarroteta ñetpa' ama na'chencataneto, ñaptaña chenca añ ñeñt o'patena chenquëñets. Ñeñtpa' attochña Apa etsoterra peñoñ ñeñt anuaret ahuatoteñ.

¹³ Tarraña te' napa' o'ch ahuerren pesho. Napa' añecopña neñen añeçhno añ patsro attoch ñetpa' atarrcha' cosherret pueyoçhreto e'ñe atet nocshena na. ¹⁴ Napa' añ ne'ñorana'tenanet ñeñt e'ñe po' peñoñ. Acheñenesha'ña ñeñt ama ame'ñetso añ patsro, ñetña' cha e'moñe'tenanet tarro'mar ñetpa' ama allo'na parro'marneshateneto ñeñt

ama ame'ñetso, atet nepena namã ama neparro'marneshatenaneto. ¹⁵ Ama añeye' nenamuenpe attoch pahuenaneta' añ patsroġ, añña nenamueneġ o'ch pecuamġsanet. Amach pemnatatsche oneñeġ o'ch alla a'puerrataterranet. ¹⁶ Ñetpa' ama allo'na parro'marneshateñeto ñeñġ ama ame'ñetso arr patsro atet nepena namã ama neparro'marneshatenaneto. ¹⁷ Pame'ñeñoġet ġa peñoñ ġa'cohuentamġsanetepa'ch e'ñe ġocop. Pa peñoñpa' ñeñġña e'ñe po'ñoġh ama shequēñtsoyaye. ¹⁸ Atto ġa pemñan na arr patsro, te'ña napa' o'ch nemñanet ñamet attoch serrpare'tatyaset acheñenesha' arr patsro. ¹⁹ Ñeñġo'marña ñocpuet nañapa' o' na'rroyerra ġocop, attochña ñetpa'ġho'ña a'cohuentatareġterretcha' Partsocop. Ñeñġpa' e'ñe po'ñoġh atet ġoteney ġa peñoñoġ ama shequēñtsoyaye.

²⁰ 'Tarraña amach e'ñe añecpa nema'yocho ñeñġ e'ñe neyochresha' nepen te', añecpa'nachña nema'yoġhamġpesnoma allohuen ñeñġcha' name'ñerraya tsapaġoneġ e'ñe neyochresha' po'ñoñoġ. ²¹ Allochña allohuenetpa' parrocmatetcha' atet pepena ġa Apa e'ñe peparrocmatennana ñaña napa' e'ñe neparrocmatennaġa. Allochña ñetpa' o'ch e'ñe parrocmaterryet e'ñe parro epay. Attochña acheñenesha'ña arr patsropa' ñetñapa' eñoteretcha' ġa ñeñġeġ nellsenserre'. ²² Atet pepena ġa pecohuentapretenna napa'ġho'ña e'ñe necohuentapretenanet ñet, attoġcha'ña ñetpa' e'ñech parrocmatet atet yepena yaña e'ñe yeparrocmaten. ²³ Napa' neparrocmatenanet, ġañapa' peparrocmatenna. Allochña allohuenetpa' e'ñech parrocmatuenet e'ñe poctacma. Attoch acheñenesha' arr patsro ñetpa' eñoteretcha' ġapa' ġa nellsenserre'. Ñaña eñoteretepa'ch ġapa' atarr pemorrentenanet e'ñe atet atarr pemorrentenna na.

²⁴ 'Apacha' allohuen ñeñġ peyochresha'tatenna na, napa' añ nemnen erro'tsenencha' ñetpa'ġho'ña allo'tsenacmayepa'chña e'ñe parro. Allochñapa' attoch enterrnanet necohuenña allo o' alla pecohuentaterren na, tarro'mar ġapa' pemorrentenna allempoteñ ama ayeġhcatareġtena' añ patser. ²⁵ Apa, ġa ñeñġeġ e'ñe pocte' es pets, acheñenesha' ñeñġ ama ame'ñetso arr patsro ñetpa' ama eñotenpeto. Nañapa' e'ñe po'ñoġh neñoteneġ. Añña ñeñġ e'ñe neyemtenaya ñetñapa' eñotenpet ġapa' ġa nellsensene'. ²⁶ Napa' naña e'ñe eñotatenahuet ñet ñeñġ atet pepena ġa. Ellopa' allach neñotaterraneterr. Allochñapa' ñetpa'ġho'ña e'ñech morrentanna'terret e'ñe atet pepena ġa atarr pemorrentenna na. Attochña napa' e'ñech neparrocmatenanet ñet. Ñeñġpa' allohuach nema'yoġhaġa Nom-pore.

18

Allempo rromoset Jesús

(Mt. 26.47-56; Mr. 14.43-50; Lc. 22.47-53)

¹ Jesúsña allempo ma'yoġhuanmapa' allenta ahuanman pueyochresha' o'ch ahuanmuet yomġta'n amañesre'to. Ñeñġ amañesre'te'pa' añ pa'so'cheñ Cedrón. Allña yomġta'npa' allo'tsen narmetsma', all ġhapña Jesús epuet pueyochresha'. ² Ñehua, Judas ñeñġcha' pomuerre' Jesús ñapa' e'ñe puentarña all, tarro'mar ahuañmo'ġhoteñ Jesúsġa' allecma apġchatenan pueyochresha'. ³ Judasñaġa' allenta anman solltarnesha' ñaña guardiane-sha' ñeñġ mueñen fariseonesha' ñaña ñeñġ pa'mġcha'tareġternesha' pen allohuen judione-sha' po'cornaneshar. Ñetñapa' ġhaġha'tet all elamparñeġareret. Orra'yesnenet ñaña po'urare. Orra'yesnenet ñaña alloch quellaret. ⁴ Jesúsñaġa' e'ñe eñoteñ ora ñeñġcha' ġhapoya allempo. Ñaña poctanetpa' atet otapanet:

—Sapa' ġeseshatña se'nen?

⁵ Ñetñapa' atet otoset:

—Añca'ye ye'nen Jesús ñeñġ nazareto'marnesha'.

Ñañaġa' alla oterraneterr:

—Napa' añenca'ye.

Judas ñeñt pomue'pa' ñapa'cho'ña allo'tsen. ⁶ Allempo otenanet Jesús: “Napa' añenca'ye”, ñetñapa' o' cheterret pa'che'ñone'pa' allepa'tcha' a'trra'tet. ⁷ Elloñapa' alla oterraneterr:

—¿Esha'tña se'nen?

Ñetñapa' alla otereterr:

—Yapa' añ ye'nen Jesús ñeñt nazareto'marnesha'.

⁸ Jesúsñapa' alla oterraneterr:

—Napa' o'ca'ye notuapas napa' añen. Ñerra'm nate' se'nenpa' neyochresha'ñapa' semnatanet ñetpa' o'ch ahuanerret.

⁹ Ñeñt'pa' tarro'mar atet ot allochñapa' attoch etsota Jesús po'ñoñ atet o' otu-anom: “Ñeñt allpon neyochresha' pe'patenen napa' ama't puesheñarrapa' amach na'chencache.” ¹⁰ Allempoña Simón Pedro ñeñt occhelletpa' ñaña'pa' po'cchella cheta'pa' o'ch chonto'tapanen cornesha' pueñañra puetepa'tcha' tsorroñ. Ñeñt'pa' añ pa'so'cheñ Malco, ñeñt'pa' año pueñañra ñeñt pa'm'cha'tareter pen allohuen judionesha' po'cornaneshar. ¹¹ Tarraña Jesús'pa' atet otan Pedro:

—Peshaterr p'occhell allecma peneñ. Pocte'ca'ye o'ch chapona ñeñt amuerochtatañ* tarro'mar ñeñt'pa' atet muenatenen Nomp.

Allempo anmet Jesús allo'tsen ñeñt pa'm'cha'tareter pen allohuen judionesha' po'cornaneshar

(Mt. 26.57-58; Mr. 14.53-54; Lc. 22.54)

¹² Allempoña solltarnesha' epuet po'ca'ptáner ñaña judionesha' po'guardianeshar ñetñapa' rromoset Jesús'pa' o' huanquët. ¹³ Ñanompa' arr anmet allo'tsen Anás, tarro'mar ñapa' ñeñt Caifás pa'go'. Ñeñtña Caifás'pa' ña pa'm'cha'tareter pen allohuen judionesha' po'cornaneshar allempo ñeñte chararo. ¹⁴ Caifás'pa' ñapa' ñeñtña cotape'chataye't judionesha' allempoteñ o'pateñet Jesús, ñeñt'pa' atet otanete't: Añ poctetsa puesheñarr ñeñt acheñerpa' o'ch rroma allohuen acheñeneshacop.

Atto Pedropa' a'nasotana Jesús

(Mt. 26.69-70; Mr. 14.66-68; Lc. 22.55-57)

¹⁵ Simón Pedro ñaña po'psheñeñ pueyochresha' ñetñapa' co'ta'nmet ñamet Jesús chenta'. Ñeñtña puesheñarrpa' e'ñe cheme'teñ cornesha' ñeñt nanac añcha'tarettetsa allempo. Ñapa'cho'ña o' be'toset epuet Jesús all aconcha'tam'psare'ttena cornesha' po'pamp. ¹⁶ Pedroñapa' alla tomos a'yot allot be'tenet. Po'psheñeñña pueyochresha' ñeñt e'ñe cheme'ten cornesha' ñeñt nanac añcha'tare't, ñaña'pa' cha'nerr a'yot, allñapa' eñosuerr epuet coyanesha' ñeñt cohuene' yetarr. Allempoñapa' errana' ñaña Pedro. ¹⁷ Coyanesha'ña ñeñt cohuene' yetarrpa' atet otapan Pedro:

—¿Ama't p'apa'cho'ña pueyochresha'te'ca' pene'ña añ encaneshar?

Ñaña'pa' atet otos:

—Napa' amaca'ye pueyochreshayayno.

¹⁸ Ñeñtña taruasets all epuet guardianesha' ñetñapa' all tsoma'tenet quellmesha, a'huortatenet tarro'mar allpa' nanac senteten. Allña tom'chenet all shotenet. Pedropa'cho'ña allo'tsen all shotena ñaña.

Allempo Jesús'pa' a'p'to'tare'teñ cornesha' ñeñt nanac añcha'tarettetsa

(Mt. 26.59-66; Mr. 14.55-64; Lc. 22.66-71)

¹⁹ Cornesha'ña ñeñt nanac añcha'tarettetsa, ñapa' allenta a'p'to'tapan Jesús pueyochreshacop ñaña añecop ñeñt atet ye'chatyen. ²⁰ Jesúsñapa' atet otos:

* **18:11** Ñeñt amuerochtatañ ñeñt'pa' po'ño'ch ñeñt'pa' añ atma'ntataret ñerra'mrrate' ñeñt atarr pesherr yorren orran'tso.

—Napa' ama a'nahuayaya neserrpare'tateñe acheñenesha' arr patsro. Chocma neychatyen judionesha' po'prahuo'mar ñaña Parets pa'paclo allecma shontena judionesha'. Ama't parrochapa' ama esempo neñosoña a'nahua. ²¹ Eso'mare'tña nañeña pa'p'to'ten. Añcha'ña pa'p'to'tyes ñeñt' ne'maye't erro'tente' neserrpare'tatyesanete't. Ñetpa' eñoteñette'ña ñeñt' atet notyesanete't.

²² Allempoña atet otuanet Jesús pa' puesheñarrña guardia ñeñt' allame'ttso'tsenapa' ñaña pa' allenta tacle', atet och:

—Amarramch' atteye' yanapueñeña cornesha' ñeñt' nanac añcha'taret.

²³ Jesúsña pa' atet och:

—Ñerra'm añte' neñen ñeñt' ama cohuenayayepa' p'toten all ama cohuenaye' neñeno. Ñerra'm cohuenta' neñenpa' eso'marte'ña petacllenen.

²⁴ Allempoña Anás pa' allenta mueñe e'ñe ehucare't pa'ñachoresho Caifásesho. Ñeñt'ña Caifás pa' ñeñt' e'ñe pa'm'cha'tare'ter pen allohuen judionesha' po'cornaneshar.

Allempo Pedropa' alla a' nasoterranerr Jesús

(Mt. 26.71-75; Mr. 14.69-72; Lc. 22.58-62)

²⁵ Simón Pedroña pa' alla ten all shotena. Ñetña pa' atet ochet:

—Papa' cho'ña ¿ama't pueyochresha' penpe?

Ñaña pa' cha a'nasochapa' atet ot:

—Napa' amaca'ye.

²⁶ Cornesha'ña ñeñt' nanac añcha'taret puesheñarrña ñeñt' pa'taruasañer ñeñt' pamo'ts tsorrqueta't Simón Pedro, ñaña pa' atet och:

—Napa' ¿ama't pa nentoña narmetsmo? Papa' allo'tsene'pca'ye.

²⁷ Pedroña pa' alla a'nasotererr. E'ñe allempocmaña eñen atollop.

Allempo chapata' mueñet Jesús allo'tsen añcha'taret Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Allempoña Jesús pa' anereterr Caifásesho. E'ñe ahuatecma anma'mueñet añcha'taret po'palaciopahuo. Ñeñt'ña añcha'tare'tpa' ñeñt' nen gobierno' Romo't ñeñt' añcha'tare'ttetsa allo'marneshacop. Allohuen judionesha' ñetña pa' ama be'tososeto añcha'taret pa'paclo tarro'mar ñeñt' añcha'tare'tpa' romo'marnesha' ama judioneshayaye allochña ñetpa' año'ch cha a'sosyateto ñañeñeta Partsocop esheccha' e'ñe cohuen rrallme'chet pascuapo. ²⁹ Ñeño'marña Pilato pa' cha'nmanet a'yo't allo'tsa'yenet, atet otapanet:

—¿Erro'tenote'tña sottene'cheñña añ acheñer?

³⁰ Ñetña pa' atet otyesoset:

—Ñerra'm ama añ pa'yeno ñeñt' ama pocteyayepa' amate' erro'tenot o' yehua-pacheñeña pesho.

³¹ Pilatoña pa' atet oterraneterr:

—Chosa sañeña anmue' sachña ente' erro'tente' ñeñt' atet pena ñeñt' atet anaret ñoñets socop attotcha' sottene'ch.

Judionesha'ña pa' atet otyeset:

—Yocop ñeñfey judioneshayapa' ama pocteyaye o'ch yemtsach acheñ ama't puesheñarra.

³² Ñeño'marña ñetpa' atet otyeset allochña pa' attoch etsota Jesús po'ñoñ atet otuanet ahuaña allempo ñanom eñotatanet ñapa' corsochoch rroma. ³³ Allempoña Pilato pa' alla be'terrerr pocollo. Ñaña pa' agotatan Jesús pa' atet och:

—Papa' ¿pa't añcha'tare'ttetsaña judioneshacop?

³⁴ Jesúsña pa' atet och:

—Añ pa' ¿e'ñe't p'ota p'tenña atet, ñato' esesha'te' p'totene'ña añ nocop?

³⁵ Pilatoñapa' atet otererr:

—Napa' amaca'ye judioneshayayno, ama es neñotenoña socop. Paña pamo'tsna'tar ñaña ñeñt pa'mcha'tareternesha' pen judionesha' po'cornaneshar ñetña te'pa' o' po-muerrpet nesho. ¿Eso'tña pepen ñeñt ama't mameshapa' ama pocteye' entapretenpeto?

³⁶ Jesúsñapa' atet otererr:

—Atto na'mcha'tarettena napa' ama aña patsroyaye. Ñerra'm aña patsrach na'mcha'tarettenaña' allempoña neyochreshačhnopa' moñsa'netañcha', allempopa' amach pomnoñeña judionesha'. Tarraña atto na'mcha'tarettena napa' ama arro'marecpayaye.

³⁷ Pilatoñapa' atet otererr:

—Ñeñtepnapa' pepa'tca'yeña amcha'taret.

Jesúsñapa' atet otererr:

—Na po'ñočpa' amcha'taretenca'ye e'ñe atet pōtenen p̄a. Napa' ñeñto'marña ne'ñalletosa aña patsro attoch nach a'potose' ñeñt e'ñe po'ñoč Yompor poctapña. Allo-huen ñeñt muenene' ñeñt e'ñe po'ñoč Yompor poctapña, ñetñapa' e'mñotennet.

³⁸ Pilatoñapa' alla otererr:

—¿Erra'tsena'tña ñoñets ñeñt e'ñe po'ñoč?

*Atto amcha'taret Pilatopa' otanet ama'tpa' čhosa muetse'ña Jesús
(Mt. 27.15-31; Mr. 15.6-20; Lc. 23.13-25)*

Ñeñta otuapa' o' alla čha'nerrerr allo'tsa'yen judionesha'. Allñapa' atet otuerranerr judionesha':

—Napa' amaca'ye nenteññañeña ñeñt atto ama pocteye' es peno attoch yemtsatach.

³⁹ Tarraña atet seyčhenpa' e'ñe pate'tets char allempoch čherrerr pascuapo nañapa' čhocmach na'rroyernas puesheñarr socop ñeñt ayottam̄psarettetsa allempo, ñeñtara ñeñt samo'ts sepen. Te'pa' ¿añe't semnen o'ch na'rroyernas ñeñt Sa'mcha'tareter sepen sa ñeñtes judioneshas?

⁴⁰ Allempoña ñetpa' puerrannarteñoťetpa' atet otyeset:

—Tarraña Jesúsapa' amach p̄a'rroyatsche, aña'ña p̄a'rroyernay Barrabás.

Ñeñña Barrabásapa' ñeñt atarr aprratam̄psañtetsa.

19

¹ Allempoña Pilatopa' atet otan po'solltar-renesha':

—Te'pa' o'ch sanem̄ Jesús allcha' sashte'.

² Solltarnesha'ña pa'llocchame'teñoťet Jesúsapa' pellta'toñet choyo'mets agrečh ñeñtña choyo'mtachtet ñeñt atet choyo'mtena ñeñt po'ñoč amcha'tarettetsa. Chorrachet ñaña shetamuets ñeñt quelluemamueno tsamamtena ñeñt pa'shtam pen ñeñt po'ñoč amcha'tarettetsa. ³ Pa'llocchame'teñoťetpa' e'ñe atet p̄achet ñerra'mrrate' ñeñt po'ñoč amcha'tarettetsa. Allña ponem̄yetpa' pachm̄are'teñoťetpa' atet oteñet:

—Puetare' amcha'taretecha', atarruaca' cohuenep̄te' p̄a ñeñtep̄ judionesha' pa'mcha'taretereḡ.

Allñapa' taclapecheñet.

⁴ Pilatoñapa' alla čha'nerrerr allo'tsa'yen judionesha'. Allñapa' atet oterraneterr:

—Secue', te'pa' o'ca'ye alla nehuapaterrnaserr Jesús allochñapa' o'ch señoč napa' amaca'ye nenteññañeña ñeñt atto ama pocteye' es peno attoch yemtsatach.

⁵ Allempoña čha'nom ñaña Jesús achoyo'mtataret agrečh ñeñt apellta'taret, achor-ratareťa ñaña shetamuets ñeñt quelluemamueno tsamamtena. Pilatoñapa' atet oter-raneterr:

—Secue' aña'yeña ñeñt yacmar.

⁶ Ñeñña pa'mcha'tareternesha' pen allohuen judionesha' po'cornaneshar ñaña guardianesha' allempoña ñetña eñchetpa' puerranarotetpa' atet otyeset:

—Ñapa' ¡pecorso'tam̄psachñaca'ye!

Alla oterete't:

¡Pecorso'tam̄psachñaca'ye!

Pilatoñapa' oterraneterr:

—Añca'ye seña', sañña corso'tam̄pse' tarro'mar napa' amaca'ye nenteññañña ñeññ atto ama pocteye' es peno attoch yemtsatach.

⁷ Judionesha'ñapa' atet otereterr:

—Yapa' yechenca'ye paterr ñoñets ñeññ atet anaret. Ñeñña ñoñetspa' atet oteney añ poctetsa ñapa' chocmach rroma tarro'mar ñapa' pachmare'teñoñ oten ñapa' ño' Parets Puechemer.

⁸ Allempoña Pilato e'man atet ñoñetspa' cha yoruen. ⁹ Alla be'terrerr pocollo atet otuerranerr Jesús:

—Papa' ¿erro'marneshape'tña pa?

Jesúsñapa' ama anape.

¹⁰ Pilatoñapa' alla otererr:

—Amahuachñaca'yeña panapnote'. ¿Ama't peñoteñña napa' allsensareten attoch na'rroyerrep, allsensareten ñaña attoch necorso'tam̄perrep?

¹¹ Jesúsñapa' atet otererr:

—Amach errotenoñ pepa'noñña ñerra'm ama Yompor papayñe llesens atet. Ñeño'marña ñeññ nepomue' peshopa' ñetpa' ello metanennapet po'chñar.

¹² Elloña Pilato atarr mueneññ o'ch a'rroyerran Jesús tarraña judionesha'ñapa' puerranarotetpa' atet otyerreterr:

—Ñerra'm añ pa'rroyerrpa' papa' ama pemno o'ch pa'mcha'tareter pepe' ñeññ atarr añcha'tarettetsa Romo. Tarro'mar allohuen ñeññ ñañaña netsa añcha'taretpa' chocma mueneñ o'ch atpare'teñet ñeññ atarr añcha'tarettetsa Romo.

¹³ Pilatoña allempo e'man ñeññ atet otenet allenta cha'nmaterran Jesús a'yot ñaña'pa' anorruerr all po'conaño allecma a'poctatenan ñoñets, ñeññ otenet Mapyeten. Hebreya'chopa' oteñet Gabata. ¹⁴ Allempopa' aña yetro allempo añño'tena judionesha' ñeññ attecma penet pascuapo. O'ña chap poctopa', Pilatoñapa' atet oterranerr judionesha':

—Secue'ñaca'yeña añ ñeññ sa'mcha'tareter sepen.

¹⁵ Ñetñapa' alla rrannarterreterrpa' atet otyerreterr:

—¡Ñapa' chepa' rromats! ¡Pecorso'tam̄psachñaca'ye allcha' rroma!

Pilatoñapa' atet oterraneterr:

—Sapa' ¿atfe't semnen o'ch necorso'tam̄psonas sa'mcha'tareter?

Ñeñña pa'mcha'tareternesha' pen allohuen judionesha' po'cornaneshar ñetñapa' atet otyeset:

—Yapa' amaca'ye eñalleña po'poñ ya'mcha'tareter, ñapña ya'mcha'tarete yepen ñeññ atarr añcha'tarettetsa Romo.

¹⁶ Allempoña Pilatopa' apanet Jesús attoch corso'tam̄pset. Ñetñapa' anmet allcha' corso'tam̄peñeta'.

Atto corso'tam̄psoset Jesús

(Mt. 27.32-44; Mr. 15.21-32; Lc. 23.26-43)

¹⁷ Atto sen Jesús allpa' anenan po'corsoch. Chapachet all oteñet Poñetallepno, ñeññ otenet hebreyacho Gólgota. ¹⁸ Allña corso'tam̄psoset epuet ñaña epsheña acheñ. All corso'tam̄psetpa' rrochtam̄psatoset epsheña. ¹⁹ Pilatoñapa' quellcatan ñoñets ñeññpa' atet ot: "Añmapa' Jesús ñeññ nazareto'marnesha' ñeññ Pa'mcha'tareter pen judionesha'." Ñeñña ñoñetspa' e'ñe corsocho ne'. ²⁰ Shonte' judionesha' ñeññ lleya'yese' ñeññ quellec

tarro'mar all corso'tam̄psetpa' e'ñe allame'ttsa anetso. Ñeñña quellecpa' e'ñe mapo'mar ñoñets aquellcayetia —hebreyačh, griegačh ñaña latinačh, e'ñe attecma oten. ²¹ Ñeñña pa'm̄cha'tareternesha' pen allohuen judionesha' po'cornaneshar ñetñapa' atet ochet Pilato:

—Amachca' pequellcatstoña atet. Añcha'ña pequellca' ñocop, “ñapa' ñañeñaca'ye otetsa judionesho' Pa'm̄cha'tareter.”

²² Pilatoñapa' atet otanet:

—Ñeñ o' nequellcatuapa' o'ca'ye aquellca'huareta.

²³ Allempoña corso'tam̄pesuet Jesús'pa' solltarnesha'ñapa' yoroñet ñeñ chorrena. Apanna'tyeset puema'tets pa'tatssheño'maret. Ñeñña pa'shtampa' ama eñalle all seḗchena, ora apomotaret e'ñe patrira shetamuets e'ñe poñe'moteñ. ²⁴ Atet otanna'tyeset:

—Amachca'ye yerrarratsche, čhochña yeyellsheñe'chatoñ pa'shtam yesuertot attoch orrta erra'tsenoteycha' yore'.

Ñeñtpa' tarro'mar atet pohuet allochñapa' attoch etsoterra Yompor po'ñoñ ñeñ atet anuaret ahuatoteñ, ñeñtpa' atet oten: “Netpa' apanna'tyerretcha' ñeñ nechorrena. Neshtamñapa' yellsheñe'chatonetcha' po'suertot attoch orrta ñeñcha' yore'.” Ñeñtpa' atet o' e'ñe perra solltarnesha'.

²⁵ Allña e'ñe allame'tets Jesús po'corsochopa' all tom̄chen coyanesha'. Allo'tsen pachor, ñaña pachor pa'mo'nerr, ñaña po'psheñeñ María ñeñ Cleofas puetapor, ñaña María Magdalena. ²⁶ Jesúsña entan pachor ñaña pueyochresha' ñeñ nanac morrentena all tom̄chenet allame'tets. Allñapa' atet otan pachor:

—Achocha' añca'yeña pechoyor.

²⁷ Allempoñapa' atet otan ñeñ pueyochresha':

—Añca'ye ñeñcha' p̄pachor peḗpa'.

Allempoña ñapa' anerran Jesús pachor e'ñe ña pa'paclo allcha' cohuaḗpes.

Atto rroma Jesús all po'corsocho

(Mt. 27.45-56; Mr. 15.33-41; Lc. 23.44-49)

²⁸ Allempoña Jesús'pa' o' eñoch o' etsotua ora allohuen ñeñ ñocop, ñañaapa' atet ot:

—Cha no'ñpa'ten.

Ñeñtpa' tarro'mar atet ot allochñapa' attoch etsoterra Yompor po'ñoñ ñeñ atet anuaret ahuatoteñ.

²⁹ Allñapa' allo'tsen pajo' all chorre' chase'. Allña e'čhomuetña ñeñ atsotso'tpo'. O'ña tsotso'tatuet ñeññapa' net tsachḗo ñeñ otenet hisopocheḗ alloña čhapachet Jesús puenamo. ³⁰ Allempoña Jesús'pa' agapan chase' ñañaapa' atet oterrerr:

—Te'ñapa' o' e'ñe etsotuerra allohuen ñeñ atet anaret nocop.

Allempoña o' epapa' čha rromats.

Allempo puešeñarr solltarpa' enos po'panmeto pueḗpotot

³¹ Allempopa' o' čhap allempoch añño'terrerr judionesha' tsapatecop allempocma amesenet. Ñeño'marña ñetpa' ama pocteye' eñcheto o'ch alla ellapen ñeñcha' rromanatats corsocho añ yetro allempo amesenet. Ñeñña yetro allempo amesenet o'ch alla atarr cosherreterr ñaña pascua. Ñeño'marña Pilatopa' enamueñeta' attoch cheno'tatoñet pa'tap o'ch rromuet e'ñe mamecma allochñapa' o'ch anmaretterret corsochoḗ. ³² Allempoña ponem̄ya solltarpa' cheno'tosan pa'tap ñeñ parro corso'tam̄peñet e'ñe epsheño'mar. ³³ Allempoña ponem̄yet ñaña Jesús'pa' ñañaapa' entoset o' rroma. Ñeño'marña ñapa' ama chenam̄pseto pa'tap.

³⁴ Tarraña puešeñarrña solltarpa' čhocma enos po'panmeto pueḗpotot. Alloña atarr čha'nom po'rras ama't ñaña oñsasen. ³⁵ Ñeñña ente'pa' ñapa' serrpare'tatanet atet

ent. Ñapa' e'ñe eñoteñ e'ñe po'ñoçh ñeñt atet oten. Ñeñto'marña yapa' yeñoteñ ñeñt atet serrpare'tenpa' e'ñe po'ñoçh. Attochña sapa'çho'ña same'ñerach ñeñt atet oten ña. ³⁶ Ñeñtpa' atet pa' attoch etsoterra Yompor po'ñoñ ñeñt anuaret ahuatoteñ, ñeñtpa' atet oten: "Ña ama't patrra pueneppa' amach chenampereto." ³⁷ Ama't ñaña Yompor po'ñoñ ellonetpa' atet ote't ahuat: "Ñetpa' enteretcha' ñeñtcha' enerret."

Atto pampuet Jesús

(Mt. 27.57-61; Mr. 15.42-47; Lc. 23.50-56)

³⁸ Allempoña José ñeñt arimateo'marnesha'pa' ñaña'pa' ahuos Pilatesho o'ch oteña' pocte'ch eñch ñach a'suatose' Jesús ñeñt rromuets corsocho. Ñehua, ñeñt Josépa' cotenan ñaña Jesús tarraña e'ñe a'nahua, tarro'mar ñapa' mecha'tenan judionesha'. Allempo atet enamosan Pilato, Pilatoña'pa' e'ñe pocte' eñch, ñeñto'marña alla ahuerr corsocho, çherr allpa' a'suatosan Jesús corsocho't all rromuen. ³⁹ Allña'pa' huapa ñaña Nicodemo ñapa' añ huapatoñ eñmosa't, atsetaret ñeñt otenet mirra epuet ñaña áloe. Allo'tsente' ma'poch çharra' kilo. Ñehua, ñeñt Nicodemopa' ñeñtara ñeñt huapatsa ñanom Jesúsesho tsapo. ⁴⁰ Ñetña anerretña Jesús rromue'. Allña'pa' e'patse'tueret shetamtsotomo epuet ñaña eñmosa't. Ñeñtpa' atet yeçhena judionesha' ñerra'm çho pampueñet arromña't. ⁴¹ E'ñe allame'tets all corso'tam'pset allña'pa' allo'tsen narmetsma'. Allña narmetsmopa' allo'tsen mapuetpon allña pampa'neretña Jesús allempo rroma. Ñeñt mapuetponpa' e'ñe etserra eñare't, tarraña allpa' ama pampueñeta' ama't patrra arromña't. ⁴² Allempopa' tarro'mara alla na'neret allame'tets tarro'mar allempopa' añ yetro allempoch añño'tena judionesha' tsapatcop allempocma amesenet.

20

Atto tanterra Jesús

(Mt. 28.1-10; Mr. 16.1-8; Lc. 24.1-12)

¹ Allempo motta'muenerr yetsñats temenc, Maríaña Magdalenapa' ahuatocma ahua'muen puepampro, allempopa' ama e'ñe puetaresuena'. Allña'pa' amuepa'tcha' atteraye' entosanoña mapue' allo yottam'pset. Ama allo'tsenarayaye, atta apmesaret a'yenet mame'. ² Ñeñta pa'che'ñera alla materra o' ahuerr allo'tsen Simón Pedro ñaña po'psheñeñ pueyochresha' ñeñt atarr morrentena Jesús. Maríaña'pa' atet otuerranet:

—O' anerrnayette' Yepartseshareñ puepampro't. Ama yeñoteñe, errate'ña neret.

³ Allempoña Pedro epuet po'psheñeñ pueyochresha' ñetña'pa' allenta ahuanmuet ñamet puepampro o'ch enteñeta'. ⁴ Epsheño'maretpa' matrra'tet all. Po'psheñeñña pueyochresha'pa' ñaña'pa' ota, metanan Pedro. Ñaña'pa' ñanmacma çhap puepampro. ⁵ Epostsaña o'pononet o'ch cohuos all net Jesús ama entose, ñaña entosñañ allo epet alla o'yerrmuena. Tarraña ama be'toso. ⁶ Allempoña çhap ñaña Simón Pedro ñeñt onets chenta'. Ñaña'pa' allenta be'tosos puepampro ñapa'çho' ñaña entosñañ allo epet Jesús alla o'yerrmuena. ⁷ Añña allo huancoñet poñpa' ama parrocmaye' allo'tseno epuet allo epet. Ñeñtña'pa' ñapuet a'tpuetena a'yenet. ⁸ Allempoña'pa' be'tosos ñaña po'poñ pueyochresha' ñeñt ñanom çhapats puepampro. Ñapa'çho'ña entos ama eñalle Jesús. Allempaña ame'ñya po'ñoçhepa't o' tanterraña Jesús rromot. ⁹ Tarro'mar ñet allempopa' ama çhenanetoña ñeñt atet anuaret ahuatoteñ Jesúsocop all oten Jesús'pa' çhocmach tanterra po'rromño't. ¹⁰ Allempoña pueyochresha'pa' ahuanerret pa'paclo.

Allempo tanterra Jesús'pa' añ ñanom orrterra María Magdalena

(Mr. 16.9-11)

¹¹ Maríaña'pa' allo'tsenara a'yot allame'tets puepampro all nanac yahuenta. Allña yahuenapa' o' epa, o' cohua' o'pononet puepampro all net Jesús. ¹² Allña'pa' ñaña ent

epsheña mellañoñeñ, pa'shtamuet atarr huallama'tareret. E'ñe ñopa'tets anorryenet puesheñarrpa' poñoñ anen, po'psheñeñña' pa'rrpoñ anen all ñanet ahuaña Jesús.

¹³ Ñetña' atet ochet María:

—¿Eso'mare't nochesha nanac peyahuena?

Ñaña' atet otanet:

—Ahuo't anerrnanette' Nepartseshareñ ama neñoteñe errate'ña o' net.

¹⁴ Ñeña otuapa' puetallerra pa'che'ñoneñ allentepa'tcha' enterran ñaña Jesús e'ñe all. Tarraña ñapa' ama cheme'che. ¹⁵ Jesúsña' atet och:

—¿Eso'mare't nochesha atarr peyahuena? ¿Esesha'tña pe'nen?

Ñaña' cha otenapañ añte' ñeññ cohuañpene' narmetsma' all. Ñeño'marña ñapa' atet och:

—Ayochreshate ñerra'm ñate' anmue'pa' pegaterren errate' peneña', ñachña erraya'.

¹⁶ Jesús'pa' atet otererr:

—¡María!

Ñaña puetallerrtserrpa' cha e'ñe cheme'terre' ñeño'marña atet ot po'ñoño he-breya'cho:

—¡Raboni! —ñeññ atet otenet ñet Maestro.

¹⁷ Jesús'pa' atet otererr:

—Amach cha perrmatsetno, napa' ama na'tena' Apuesho. Arrña orrañ masheñeshesho o'ch ñotenaneta' napa' o'ch na'terr Nomporeho ñeññ Neyomporer nepen ñeññara ñeññ Seyomporer sepen saña.

¹⁸ Maríaña Magdalenapa' ahuer serrpare'tatuerrñañ pueyochresha' ñeññpa' atet otuerranet:

—Napa' o'rramtso nenta'mueña Yepartseshar.

Serrpare'tatuerranet ñeññ atet och Jesús.

*Atto Jesús'pa' orrterrana allohuen pueyochresha'
(Mt. 28.16-20; Mr. 16.14-18; Lc. 24.36-49)*

¹⁹ Ñeñte yetrocma allempo motta'muena yetñats temenc, ellerronetña pueyochresha'chnopa' apcha'nenet. Ñetpa' cha yore'tenanet judionesha' ñeño'marña ñetpa' e'ñe echarr yottañpenet. Ama't atet yottañpenetaña' Jesúsña' chepa'tcha' be'tosuets. E'ñe rro'cho tomhuen allempoña'pa' atet otuenanet:

—Te'ña po'ño'chpa' chosa cosherrtsa seyo'chro.

²⁰ Allempoña atet otuenanetpa' gatyesusenanet pot ñaña all enareñ pue'poto. Pueyochresha'ña atarr nanac coshapueñet allempo entapueñet Po'partsesharet.

²¹ Allempoña Jesús'pa' otuerraneterr alla:

—Te'ña po'ño'chpa' chosa e'ñe cosherrtsa seyo'chro. Atto na mueñan Apa, napa'cho'ña te'pa' o'ch nemñas saña.

²² Allempoña otuenanet atetpa' allenta a'torahuananet atet otuerraneterr:

—Te'ñapa' chorrasepa'ch Parets Puecamquëñ. ²³ Ñerra'm esesha' se'pretnataten po'chñarpa' Yomporpa'cho'ña o' peretner. Ñerra'm esesha'ña ama se'pretnataten po'chñarpa' Yomporpa'cho'ña ama peretneñe.

Allempo Tomás'pa' entapueñan ñaña Jesús o' tanterra

²⁴ Pueyochresha'ña Tomás ñeññ otenet Epanesha' ñaña'pa' ama allo'tsenayaye all apchenet allempo huena Jesús. ²⁵ Ñapa' atña serrpare'tater po'potantañ ñeññ parro yochreshatsocmuet, ñeññpa' atet ochet:

—Yapa' o'ca'ye yenterña Yepartseshar.

Ñaña' cha otanet:

—Napa' ñerra'm amach nentoñe pot all patet clavo, ñerra'm amach cho na' p̄lloñe e'ñe na notot all patet, amach cho neno not puepotot all enetpa' amate' errotenot name'ñaso.

²⁶ Allempoña posocmaterrpa' pueyochresha'ñapa' alla apcherretterr o'pono. Allempopa' allo'tsen ñaña Tomás. Ama't yetarrpa' e'ñe echarr ayotetuaret Jesúsñapa' all be'tosuenerr tomhuenerr e'ñe allpa' alla otuenaneterr:

—Te'ña po'ñoçhpa' çhosa cosherrtsa seyoçhro.

²⁷ Allempoñapa' atet otuenan Tomás:

—Pecuon not all pata'net, p̄a'p̄lle'ca'ye. Pa'p̄lla'n ñaña nepotot all enanet. Amachña çha pe'charrtatstto peyoçher çhoña p̄ame'ña.

²⁸ Allempoña Tomás'pa' atet och:

—¡Nepartseshare, te'ña po'ñoçhpa' Neyomporer nepeneþ!

²⁹ Jesúsñapa' alla otererr:

—Papa' çho e'ñe penterren ñeñto'maraña te'pa' p̄ame'ñenna. Tarraña elloña añ atarr cosheñtso'tsen ñeñt' ama't ama çho entennopa' ame'ñennet.

Añ libropa' añecop anaret ñeñtcha' yame'ñatene'

³⁰ Po'ñoçh shonte' po'poñeçhno ñeñt' atet gatyesan Jesús pueyochresha' po'partsoña. Ñeñt'pa' ama aquellcareteyaye añ libro. ³¹ Allpon ñeñt' aquellcarettatsa arr libro ñeñt'pa' añecop anaret ñeñt'cha' same'ñate' po'ñoçh Jesús'pa' ñeñt' Cristotets, ña po'ñoçh Yompor Puechemer. Tarro'mar e'ñe same'ñeñoña Cristo sañapa' corretsasach tayoteñ e'ñe errponañohuen.

21

Allempo Jesús'pa' orrterrana cançherrsheña pueyochresha'

¹ Allempoña Jesús'pa' orrterrannerr pueyochresha' e'ñe sa'patoþño Tiberiaso. Allpa' atet orrterrannet: ² Ñehua, allempo shontenet allpa' allo'tsen Simón Pedro ñaña Tomás ñeñt' otenet Epanesha' ñaña Natanael ñeñt' cano'marnesha' e'ñe allara Galileo. Ñaña allo'tsen Zebedeo puechemeresha' ñaña allo'tsen po'poñ epsheña pueyochresha'.

³ Simónña Pedropa' atet otanet:

—Napa' o'ch neterrayena'.

Po'potantañeçhnopa'çho'ña atet ochet:

—Yapa'çho'ña o'ch yocþaþ.

Allempoñapa' ahuanmuet a'taça'toset noñto. Tarraña ama't arepenetañ terray-atsetpa' amaña es rromueneto. ⁴ Allempoña o' puetarenmoch Jesúsñapa' tomhuen pueme'taro. Tarraña pueyochreshaçhnoñapa' ama esesha' cheme'tapaye. ⁵ Jesúsñapa' atet otosanet:

—Neyochreneshacha' ¿ama't eñalleña secacar ñeñt'cha' serra'muen?

—Ñetñapa' atet ochet:

—Amaca'ye eñalle.

⁶ Ñaña'pa' atet oterranneterr:

—Sehuapore't seterraya noñt' po'cohuenrot allpa' serrmue'chca'ye.

Atet otanetpa' atetçho' pet. Arepa'tcha' eshcaye' chetterreto po'terraya o' rromuet nanac aton cac — shonte'. ⁷ Allempoña pueyochresha' ñeñt' atarr morrentena Jesús'pa' ñaña'pa' atet otan Pedro:

—¡Yepartsesharepa'tca'ye!

Simónña Pedropa' allempo eñotan Partseshapa't huetsa ñaña'pa' puema'yoreñ chor-rerrana pa'shtam tarro'mar ñapa' muelle'mcoña terrayen. Ñaña'pa' puema'yorñecma omacha oñopa' ahuo' Jesúsesho. ⁸ Po'potantañeçhnoña pueyochresha'pa' chenta' onaçherret noñto. Nato' cien metrote' allo'tsen attoch çherret toþña'so. Chetare'tnerret

po'terraya e'ñe chorre' cac. ⁹ Allempo sohua'rretuerret patsopa' all entuerret quellmesh all huorten all achmare'ttena cac; allo'tsen ñaña pan. ¹⁰ Jesúsñapa' atet oterraneterr:

—Sacra' patantarr cac ñeñt serrmuen e'ñe errte'.

¹¹ Allempoña Simón Pedropa' alla a'terr noñto, chetan terraya noñtot o' ne' masto, e'ñe chorre' atesha' caca'chno — allo'tsen ciento cincuenta tres ñeñt allpon rromuet cac. Tarraña ama't shonte' rromuet cacpa' ama rrarratano terraya. ¹² Jesúsñapa' alla oterraneterr:

—Te'pa' sona'cherr o'ch serra'muen.

Puencha'na'teño'fet ama't pueשה'arro'feta ama esesha' otenaye: ¿Eshape'tña pa? tarro'mar eñote'ñet po'ño'chpa' Partsesha'ca'ye. ¹³ Allempoña huapanet Jesús allame'tets, chetosan pan apa'yesosanet. Apa'yesosanet ñaña cac.

¹⁴ Ñeñtpa' allempo poma'pocheño'hua orrterrana pueyochresha' allempo tanterra rromot.

Allempo Jesúsapa' otenan Simón Pedro atarrte' morrenteña

¹⁵ Allempoña rrohua'muenet Jesúsñapa' atet otan Simón Pedro:

—Simón, Jonás puechemere, pa'pa' ¿atarrte' pemorrentenna, ellote' pen'tana'tueñ añenesha'?

Ñaña'pa' atet otan Jesús:

—Po'ño'chca'ye Partseshacha' peñotenen napa' nemorrentenpa.

Jesúsñapa' atet otererr:

—Ñeñtepñapa' e'ñech cohuen peserrpare'tatyes allohuen ñeñt name'ñenaya; ñetpa' e'ñe atet nentenanet ñerra'mrrate' necarrneroretollesha'.

¹⁶ Puepocheño'ñapa' alla otererr:

—Simón, Jonás puechemere, ¿po'ño'cha't atarr pemorrentenna?

Ñaña'pa' alla otererr:

—Po'ño'ch Partseshacha' e'ñe peñotenen napa' nemorrentenpa.

Ñaña'pa' alla otererr:

—Ñeñtepñapa' e'ñech cohuen pecua'ñpson allohuen ñeñt name'ñenaya; ñet po'ño'chpa' e'ñe atet nentenanet ñerra'mrrate' necarrnerore'chno.

¹⁷ Poma'pocheño'ñapa' alla otererr:

—Simón, Jonás puechemere, ¿ama't e'ñe mamecpa pemorrentenno?

Pedroñapa' llequénana atto alla poma'pocheño otererr e'ñe ñeñtara, ¿pemorrentenna't?, ñeñto'marña ñapa' otererr:

—Partseshacha' allohuenpa' e'ñepa't peñotueñ. E'ñe peñotenen napa' nemorrentenpa.

Jesúsñapa' alla otererr:

—Ñeñtepñapa' e'ñech cohuen pecua'ñpson necarrnerore'chno. ¹⁸ Po'ño'chca'ye te'pa' o'ch nota'p, pa' allempo huepueshenpa' pechorre't e'ñe po'ta, all peseche'tpa' all pechophe'chyses't. Tarraña esepoch pepo'nme'tenpa' pa'ñapa' o'ch attaña peyopen peque' atto'chna o'ch po'psheññaña pechorratenaya allempopa' anerrpetcha' all ama pesecheno.

¹⁹ Ñeñtpa' tarrecop atet eñorana'tenanet allochñapa' attoch eñochet erro'tenotcha' rromuerr Pedro atto'tcha' cohuentaterran Yompor. Ñeñta otuepa' alla oterran Pedro:

—Papa' chocmuepa'ch e'ñe poctenen.

Atto Jesús eños Juanacop ñeñt pueyochreshar atarr muerena

²⁰ Pedroñapa' puetallerrtsa entapan o' co'ta'neni po'psheñeñ pueyochresha' ñeñt atarr morrentena Jesús, ñeñt e'ñe anorrtses't epuet ahuañmo'cha allempo rrallme'chete't ñeñtara pueyochresha' ñeñt otaye't ahuaña: “Partseshacha' ¿erra'tsenacpa'tña pe'ñorena ñeñtcha' pepomuere'?” ²¹ Allempoña enta'p Pedro, ñaña'pa' allenta otan Jesús:

—Partseshacha' ñocoppa' ¿ama't eñalleña ñeñtcha' huapoya ña?

²² Jesúsñapa' atet otererr:

—Ñerra'm na muenate' ñapa' allach a'pa esempohuañenña nohuerrapa' ñeñtpa' e'ñe pocte' ñocop, ñeñtpa' ama p̄ocpayaye. Pocoppa' añ poctetsa chocmuepa'ch p̄octenen.

²³ Ñeñto'marña epa'hua añ ñoñets errañaren allo'tsa'yen masheñnesha', ñeñto'marña ñetpa' atet otanna'tyenet, ñeñt̄ pueyochresha'pa' año'ch rromuerro ama't errponaña. Tarraña Jesúsapa' ama atteye' oteno amach rromuerro. Ñapa' añ oteñ: “Ñerra'm na muenate' ñapa' allach a'pa esempohuañenña nohuerrapa' ñeñtpa' e'ñe pocte' ñocop, amaña po'psheññecpayaye.”

²⁴ Napa' ñeñten pueyochreshan ñeñten atet eñotatets atet ñeñtarana quellquë' añ. Te'ña ya allohueney yeñoteñ ñeñt̄ atet na'potapa' ñeñtpa' e'ñe po'ñoçh atet.

²⁵ Shonteñ po'ñoñeçhno ñeñt̄ atet pa'yesa Jesús. Ñerra'm e'ñech yequellca'hueñ ora allohuen ñeñt̄ atet pa'yese't̄ Jesús eñalleñte' shonte' nanac libros. Napa' noten shonteñte' nanac librospa' e'ñech epa'huañ ora errañaren añe patsro ñerra'm allponcha' yequellcañ libros. Ñeñtpa' attetepa'ch Nompore. Allohua.

ATET PA'YESA JESÚS PUEYCHRESHA' LOS HECHOS

Atet otnerranet Jesús huapanetcha' Parets Puecamquëñ

¹ Te'pa' masheñe Teófilo, nequellcotpa' o'ch neserrpare'taterrperr po'pocheño. Ahuaña ñeñt nequellconañ all neñotatañ ora allpon atet pe't Jesús allempo añe pat-sro'tsenmeñ. Ñaña ora allpon yeçhate't Jesús, ñeñtpa'cho' o' notuañ nequellcot.

² Tarraña allempoteñ a'terr pue'ntañopa' palltena o'ch notañ ñaña. Te' añ nequellcotpa' o'ch notañ. Tarraña ama't allempo ama a'terra' Jesúspa' añña ñeñt pueyochresha'pa' o' otuanet atetcha' pet. E'ñe Parets Puecamquëñotpa' o' llesensa'huanerran pueyochresha' ñeñt acra' ña. ³ Ama't pomueroçhteño o' rromua ahuaña, allempoñapa' o' orrtterrana pueyochresha' e'ñe betnatot. Ñeñto'marña ñetpa' eñochet e'ñe po'ñoçh añpa' ñeñtara Jesús ñeñt rromats ahuaña. Tarro'mar pa'tatsoch çharramatnerr atto orrttame'tnerranet mamesha'tets. Ñaña çhocma eñchete't allame'tets. Allempoña ñapa' a'potanet atet penaña Parets po'cohuenña atto ayochreshattena ña.

⁴ Allempo allo'tsenet e'ñe parro epuet pueyochresha'pa' atet otanet:

—Amach erra setatsto arrot, allasach arrma Jerusaléño. O'ch secueñ esempoch çhaponasa ñeñt Parets Puecamquëñ. Tarro'mar Paretspa' o' otuas o'ch mueñonas Puecamquëñ. Ñeñto'mar napa' o' na'potuonas Parets po'ñoñ ahuaña. ⁵ Allempopa' añña ñeñt notuas: Juanañpa' añoñña apate't oño, tarraña na tsapañonetpa' añcha'ña nechorratasa Parets Puecamquëñ. Añpa' allohua atet ot Jesús.

⁶ Po'pocheño all apçhenet aspeno pa'so'cheñ Olivopen. Pueyochresha'ñapa' atet a'pto'chet Jesús:

—Te'pa' Partseshacha' ñato' pocte' penteñ o'ch ðapaterrey ñeñtey israelneshay yepat-señ. Allochñapa' amach esesha' poñeña yeyore'tame'tenaye.

⁷ Jesúsñapa' atet otanet:

—Ñeñt socoppa' ama pocteyaye o'ch señoçh. Añña Yompor po'partsoteño o' e'ñe eñotueñ. Ñapa' o' ne' allempoch etsotuerra ora allohuen añeçhno.

⁸ Jesúsapa' alla otterranneterr:

—Añña pocte' o'ch señoçh, ñerra'm esempoch huaponasa Parets Puecamquëñ sesho, ñach ahuañenat sepose'. Allempopa' sa'potoncha' neñoñ errañaren—Jerusaléño, ñaña ora Judeo, ñaña Samario, ñaña ora allohuanen pats.

Arrpa' atet perra Jesús allempo a'terr pue'ntaño

⁹ Ñeñta otuanenanetpa' allempoñapa' a'tenochayo' enonet. Añña pueyochresha' pocuanrrorteñoñetpa' o' ma'natena oso. O'huañ orrta, ama't mamesha. ¹⁰ Ama't allempo o'huañ orrta Jesús, ñetpa' allo' cohuanrrortenet enonet allenet o' chenca'huanena Jesús. Allempoñapa' cohuerretset patsonetpa' alla entet epsheña yacma o' tomçha'toset e'ñe parro. Pa'shtamuetpa' nanaco' huallama'tareret. ¹¹ Ñetñapa' atet otosanet:

—Esuañaca' galileo'marneshacha' secuanrrortenna enonet. Añ Jesús ñeñt o' a'terr entopa' huerrerrcha' po'pocheño atet senteñ o' ahuerrento.

¹² Allempoña o' a'ten Jesúsapa' añña pueyochresha'pa' o' ahuanerret alla Jerusaléño. O' onacherret Olivopnot allot a'terr Jesús. Tarro'mar ñeñt aspenet Olivopenpa' allame'ttso'tsena Jerusaléño, Olivopnotpa' ñato' allo'tsente' paterr kilómetro attoch yeçhap Jerusaléño. ¹³ O'ña çhacherret anetso Jerusaléño all pocollo allecma a'puenetpa' o' be'tosçha'tuerret, a'tapuet eno all tama a'yohuen ßat. Allñapa' apçhet allohuenet.

Ñeñt apčatsa ñeñtpa' añechno: Pedro, ñaña Jacobo*, ñaña Juan, ñaña Andrés, ñaña Felipe, ñaña Tomás, ñaña Bartolomé, ñaña Mateo, ñaña Jacobo ñeñt Alfeo puechemer, ñaña Simón ñeñt cananistanesha' ñeñt atarr ttorratset pa'netsrecop, ñaña allo'tsen Judas ñeñt Jacobo pa'mo'nasheñ. ¹⁴Allña apchenetpa' e'ñe ñeñta nete't pueyočhro cohuen ñoñets. Allo'tpa' e'ñe poma'yochreñotet cohuenpa' chocma ma'yochete't. Allo'tsen ñaña coyaneshačno, ama't Jesús pachor María, ñaña pa'mo'nasheñnesha' allo'tsenet ñamet.

Atet pa Jesús puellsensarnesha' allempo net Matías ñeñtcha' epuet a'potoñet Yompor po'ñoñ

¹⁵ Parrochña Pedropa' o' tomos o'ch serrpare'tatanet. Allempopa' ñato' allo'tsente' ciento veinte acheñenesha'. Allempoñapa' otanet:

¹⁶ —O'ch masheñnesha' notas: Po'ñočh o' etsotua Yompor po'ñoñ ñeñt anaret ahuatoteñ. Tarro'mar Parets Puecamquëñ eñose't David. Ama't ahuatpa' ote't David atetcha' pa Judasoñ ñeñt anmue' ñeñt rromue' Jesús. Ñehua, pocte'ñacho' o'ch etsota Yompor po'ñoñ. ¹⁷Judasoñpa' ahuaña allempo allo'tseney e'ñe parro ñapa'cho'ña acreñña Jesús o'ch pueyochresha' pe'. ¹⁸⁻¹⁹Ñehua, Judasoñpa' tsa'chet allpon quelle atto poman Jesús. Tarraña ñeñt quellepa' allo rañtet pats. Tarraña allempo shora'nom Judasoñ chap patsopa' potsa'nmos pa't, o' yo'pahua ora. Allempoña e'mare'ch allohuen jerusaléño'marnesha' atto Judasoñpa' o' rroma. Añña pats ñeñt rañtet Judasoñ po'čllayoro'tpa' o' sochet Acéldama. Añ ñoñets ñeñt otenet Acéldama ya yeñoño yoteñ Errasatsotnanen. ²⁰Añña ñeñt quellquë't ahuat David ñeñtcha' anuaretta añ libro Salmos. Añña ñeñt atet oteney:

All yečhena, puenasepa'ch amara't, all amach eseshaye' yečhatstatso. Ñeñt po'taruas pa' attoch sherbaneñ Yomporpa' tarraña ñeñtcha' apanepa'ch po'psheñeñ. Atet oten añ libro Salmos.

²¹⁻²² Alla otterraneterr Pedro:

—Ñeñto'mar te'pa' añ poctetsa o'ch ye'ñ po'psheñeñ ñeñtcha' parro ya'pota atto Jesúsapa' o' tanerra. O'ch ye'ner puesheñarr ñeñt chocma parro yechopeñe'che't ahuaña allempo arro'tsenmeñ Yepartseshar Jesús. O'ch ye'ner puesheñarr ñeñt chocma yoc'taye't ama't allempoteñ Juanañpa' apatapan Jesús tarremphua allempo a'terr Jesús.

²³ Allempoñapa' o' neñet epsheña, puesheñarr añ pa'so'cheñ José Justo, ñeñtara José oteñet ñaña Barsabás. Po'psheñeñpa' añ pa'so'cheñ Matías. ²⁴ Allempoñapa' o' ma'yochet. Puema'yochetepa' atet otet:

—Yompore, ñeñte'p entene' allohueney yeyo'cher. Te'pa' o'ch peñotatey erra'tsente' pemnen pa ñeñtcha' ello alla sherberrets pocop atet ñerra'm pellsensar. ²⁵Judasoñpa' o' sa'nmuey o' ahua' all ñeñt o'patatare'ttena ña e'ñe ña po'chñaro't.

²⁶ Allempoñapa' yellsheñe'chet e'ñe ñet po'suertot attoch eñochet erra'tsente' muenña Yompor ñeñtcha' alla sherberrayer. Allempoña yellsheñe'chenet aña orrtatsa Matías ñeñtcha' t muenenña Yompor. Allempoteñ Matíasapa' ahua' aguëñ po'poñečno ñeñt charrasheña puechetsa paterr ñeñt puellsensar Jesús.

2

Allempo chapanet Parets Puecamquëñ

¹ Allempoñapa' o' meterrerr allponmat amnaroch charramat, o' chap allempo coshena judionesha' ñeñt otenet Pentecostepo. Allempoña ñetpa' alla apcherreterr e'ñe parro ñeñtet ame'ñetset. ² Allempoñapa' machayota e'mapuet atet ñerra'm huomenquësha' ma'more'tos entot. Allohuenet ñeñt allo'tsa'yen pocollo e'ñe e'mhuet. ³ Añña ñeñtet apchetsetpa' o' huapanet atet ñerra'm tso'. Huapapa' cha chapa'rrtosa po'huorter

* **1:13** Jacobopa' ñeñtara ñeñt sochenet Santiago.

ñesheto. Chapyesanet e'ñe puesheña'ttsocmuet atet ñerra'm huorte'. Añña huorte'pa' alla a'prra'ta ñesheto. ⁴ Añña ñeñt' chapyesahuet e'ñe puesheña'ttsocmuetpa' añepa't Parets Puecamquëñ ñeñt'cha' chorrahuet. Allempoñapa' allorocma eñosyeset po'poñ ñoñtso ñeñt' ama eñosete'te ahuaña. Añña Parets Puecamquëñpa' ahuo' eñoratyesanet po'poñe'ttsocma attoch serrpare'tachet pa'namen acheñ e'ñe ñet po'ñoñeto.

⁵ Allempo Jerusaléñopa' allo'tsa'yen shonte' judionesha' ñeñt' huächetsa pa'namen anetsof. Ñetpa' cohuen cotape'chete't Partsocop. ⁶ Allempoña e'marettet cha ano'tenetpa' o' matrra'tosa shonte' pa'namen acheñenesha' o'ch enteñeta' ñeñt' ano'tatsets. Chapuet all ano'tatsenetpa' o' entoset ñeñt' ame'ñetsapa' año eñosyenet e'ñe ñet po'ñoñeto. Allempoñapa' atta cohuanrrortoset. ⁷ Puemoññe'teñoñetpa' atet otyeset:

—Ta', errotenote'ca' e'myennayetña yeñoñ. Yapa' yeñotenanet ñetpa' galileo'marnesheta. ⁸ Ama't po'poñ ñeñt' yenyoma' ñoñetspa' e'mueñet. Allohueneypa' o' e'ñe ye'myes atet eñosyenet e'ñe cohuen yeñoñ.

⁹ Allempopa' alla otanna'tyerretterr:

—Yapa' yeñen po'poñe'ttsocma ñoñets tarro'mar yapa' pa'namen anetsot yehuena. Allot anetsrot yehuapyena ñeñt'pa' pa'namen pa'so'chñechno —ama't Partiof ñaña Mediof ñaña Elamof ñaña Mesopotamiof, Judeof, Capadociof, Pontof, Asiof, ¹⁰ Frigiof, Panfiliof, Egiptof ñaña Africo'marof, alla allame'tets Cireneo. Ñaña ñeñt' huetsa Romof ñeñt' chocma a'puetsa arr. ¹¹ Ama't ñaña judionesha' shonte', ñaña ama't ñeñt' ame'ñaten judionesha'. Ñaña ñeñt' huetsa Cretof ñaña Arabiof. Ya te'pa' o' e'ñe ye'myes e'ñe yocma yeñoñ atet aye'chochtateññañet Parets po'cohuenña e'ñe yeñoñ.

¹² Otanna'tyerretterr alla:

—Ta'm, ñetpa' errotenette'ca'yete'. Yapa' ama't ahuañapa' ama yentareña galileo'marnesha'pa' o'ch eñosyesña e'ñe cohuen yeñoñ. Ta', esocopte'.

¹³ Añña po'potantañ acheñenesha'pa' o' achmñare'tanet atet otarettet:

—Tarro'mar ottenetña' choca'ye posa'tyenet.

Atto Pedropa' serrpare'tatan acheñenesha'

¹⁴ Añña Pedropa' tanta o' tom e'ñe alla epuet po'poñechno yochreshats. Eñora huomenc, otanet:

—Masheñe judioneshacha' ñaña allohuenes ñeñtes arro'tsenes Jerusaléno, te' o'ch notas: Se'mñnoten o'ch neñotatas attof atet yepena ya. ¹⁵ Yapa' ama yeposañoñeye' o' yo'notap'sa'mueno atet sotene'y sa, tarro'mar ama choye' o' yarepeno orrats. ¹⁶ Añña ñeñt' sentyen te' ñeñt'pa' añ o' etsota ñeñt' atet ote't Joel ñeñt' a'mñtaye't Yompor po'ñoñ ahuañ. Añña ñeñt' quellquë't ahuañ Joel:

¹⁷ Añ atet otene'y Yompor: Allempoch mellapoterrmocha, atet'cha' perra, o'ch nenanet Necamquëñ pueyo'chreto, allohuen arromñañenesha' o'ch nechorratanet Necamquëñ. Añña pemñreneñpa' ñet'cha' a'poterret neñoñ ñeñt'cha' neñotatuanet, ama't ñaña coyanesha'chno a'poterrnancha' neñoñ. Añña ñeñt' huepueshare' chocmach es norrtatyesanet ñeñt'cha' entyesonet neshof. Añña ñeñt' po'nmeneshare'pa' es norrtatyesanet'cha' pue'chopoñeto.

¹⁸ Ama't allohuen ñeñt' nesherbene', ñaña ama't coyanesha'chno nenuanet'cha' Necamquëñ pueyo'chreto attoch a'potonet neñoñ.

¹⁹ Allempoña enopa' o'ch nentatyesanet ñeñt' ama't ahuañapa' ama puentareto. Pat-sopa'cho'ña o'ch norrtatyesanet ñeñt'cha' eñotaterrahuet. Quellareñtsofpa' norrtat'cha' errasats. Puetomamñpsanna'teñoñet pa'netserpa' orrterrach tso' erracmañen, chepoterrcha' amos ñaña erraparen.

20 Ama't ñeñt yeçhoyo'tam̄pene' te' allempopa' puenaserrach checmete'. Arror-rpa'çho'ña allempopa' tsama'tterrach atet ñerra'mrrate' errasats. Atetcha' yoroçhterra allempoch huerrmocha Yompor.

21 Allempopa' ama't erra'tsena çhore'te' Yompor pueyoçhrocmañen attoch a'queshpachpa', Yomporña' a'queshpatanetcha'. Arrpa' allohua atet quellquë't ahuat Joel.

22 Añpa' ñeñtara alla oterraneterr Pedro:

—O'ch masheñe judioneshacha' noterrser: Sapa' seño'teñ ahuañapa' orrte't Jesús ñeñt nazareto'marnesha'. Ñapa' çhocma orrtatonase't po'partsoteña, ñaña çhocma orrtatyesonase't ñeñt ama sentare ñeñtcha' seño'tate' ñapa'çho'ña nanac Parets. Pompor apuene'ña po'partsoña attoch seño'toñ Puechemer ña nanac Parets. 23 Añña ñeñtara Jesús sañapa' o' sepomhuer attoch corso'tam̄pset. Sañapa' o' saḗ po'poñ acheñenesha' ñeñt atpare'tene' Yompor attoch ñetpa' o'ch muetset. Atet o' seḗohua, Yomporpa' ahuatoteñ eñotuase't atetcha' seḗa, tarro'mar atet muene't ña. 24 Tarraña ama't rromuapa' Pomporpa' o' alla tantater. Tarro'mar amate' erro'teno te'pa' alla a'po rromue'. 25 Ama't atet ote't David ahuat, atet ñerra'm Jesús eñoratse't. Atet ote't:

Napa' neño'teñ Nompor çhocma allo'tsenen parro epan. Ñach nanac ahuamenca't nepe' attoch amach nem̄cha'to.

26 Ñeño'marña nanac nocshena neyoçhro, nocsheñeshocma neñen. Ama't nerromapa' neño'teñ amach alla na'po rromue'.

27 Napa' neño'teñ amach a'ypo'ñono necamquëñ alla o'pono. Nomporpa' amach mueno o'ch puetsohua alla nechets tarro'mar ñapa' entenen e'ñe cohuenare' es nepen ñocop.

28 Añcha'ña o'ch entaterren attoch yocrrerra e'ñe cohuen. Poparrocmateño't epan ñapa' ñach nocshatterre' nanac. Allohua atet ote't David ahuat atet ñerra'm Jesús eñostse't.

29 Allempopa' alla oterraneterr Pedro:

—O'ch masheñeshacha' noterrser, añ poctetsa e'ñe eñotoçhen o'ch notas: Yatañ David ahuatpa' rroma. Rromapa' pampuet. All pampuetpa' yenteñ ama't teme'ttsen. Ñeño'mar yeño'teñ ahuat allempo ote't añ ñoñetspa' ama añecpaye' serrpare'te'te e'ñe ñocop, añecopña serrpare'te't Jesúsocop. 30-31 Tarro'mar David ñapa' ña a'ñtaye't ahuat Yompor po'ñoñ. Ñapa' e'ñe eñotue't atetcha' ḗa ñeñtcha' Cristotats allempoch çhap añe patsro. Ñeño'mar ama't ahuatoteñpa' eñose't atetcha' tanterra ñeñtcha' Cristotats. Pomporpa' amach a'ypo'ñano Puechemer o'pono. Amach muenatoñe o'ch puetsohua po'çhets. Yomporpa' ama't ahuatpa' atet otan David o'ch noñ puesheñarr po'mrenño't ñeñtcha' añcha'tarettatsa esempo. Davidpa' eñotane't Yompor ñapa' ama pueno po'ñoñ.

32 Te'ña yapa' o' yeñch Yomporpa' o' tantaterran Puechemer Jesús. 33 Te'ña ñapa' e'ñe allo'tsen epuet Pompor Parets all partsoten ento. Pomporpa' o' e'ñe aphue Puecamquëñ.

Te'ñapa' añ ñeñtara Puecamquëñ o' chorratya yaña atet o'tnerrey ahuaña. Ñeño'marña o' orrtonaya atet sentyes ñorra', ñaña atet se'myes cohuen ñoñets e'ñe sa señoño.

34 Ñeño'marña yeño'teñ ama añecpaye' serrpare'te'te David e'ñe ñocop, tarro'mar ñapa' rromapa' ama tanterro allo'tpa' ama a'terro ento atet ñerra'm Jesús. Ñaña po'pocheño ahuatpa' eñose't David, atto' ote't:

Yompor Paretspa' atet otennan ñeñt e'ñe Nepartseshar nepen na (ñeñtara ñeñtcha' Cristoterrets): “Te'pa' o'ch ḗanorruerr arr necohuenro't allcha' pecohuentapreterna.

35 Attochña ama't ñeñt pe'moñe'tene' napa' o'ch e'ñe name'ñatuerranet allochñapa' o'ch atet perret ñeñt pemnen ḗa.” Añpa' allohua atet ote't David ahuat.

36 Allempoñapa' alla oterraneterr Pedro:

—Sapa' israelena'tares. Ñeñto'marña señoche'pa'ch e'ñe eñotochen atto Yompor Parets o' nan Puechemer Jesús. Ñapa' ña Partseshatets, ñeñtara Cristotats. Añ ñeñt Jesús sañapa' o' secorso'tam̄psach. Añpa' ñeñta allohua serrpare'tatanet Pedro.

³⁷ Allempoñapa' ñeñt matrra'tatsa allpa' o' çhapanet pueyoçhro añ ñoñets. Nanac llecanrortet. Atef ochet Pedro ñaña po'potantañeçhno Jesús puellsensar. E'ñe puel-lquëñoñet atef otet:

—Masheñeshacha', errotenuachca'ye yeperraña te'.

³⁸ Pedroñapa' atef otanet:

—Te'pa' aña poctetsa ñeñtcha' seperra allohuenes. Te' sellquëñoñ o'ch soctape'cherr ello cohuen Yomporecop. Allochñapa' Yomporpa' peretna'huernascha' so'chñar. E'ñe same'ñeñoñ Jesucristo añ pocte' te' o'ch sapatare'tterra Partsocop. Allochñapa' Paretspa' chorraterr'sach Puecamquëñ. ³⁹ Ñeñt'pa' pocte' atet'cha' sepa, tarro'mar atef otnerrey Jesús o'ch chorratuerrya e'ñe puesheña'ttsoy Puecamquëñ, allohueney ñeñtey o' hua'ñerrey Yeyomporer Parets o'ch yame'ñera. Ñaña o'ch chorratuonasa ama't sa sechemerasha' Puecamquëñ, ñaña allohuen ama't ñeñt ella'paro'tsa'yenet.

⁴⁰ Allempoñapa' o' alla serrpare'taterraneterr attoch otanet pa'namen ñoñets. Attoch co'tape'chatanetpa' atef otanet:

—Amach soctape'chatsto atef co'tape'chen po'poñ acheñenesha' ñeñt ama ame'ñetso. Atto'tcha' sequeshperrach.

⁴¹ Allempoña allohuen ñeñt ame'ñaya Pedro atef otanetpa' o' apatare'ttet. Allempopa' ñato' allpon ame'ñatsa ma'pa mil acheñenesha'. Cha shontena ñeñt ame'ñatsa.

⁴² Allempoteñ ñeñt ame'ñatsapa' e'ñe ma'yochrenet atef ye'chatanete't Jesús puellsensar. Nanac cohuen entanna'tete't allecma apçhete't parro. Pueyerpueñoñet Jesús o' toma'ntatet pan atef ñerra'm Jesús po'chets. Nanac ma'yochete't e'ñe parro.

Atef corre't ahuat ñeñt ame'ñatse't

⁴³ Ñeñt Jesús puellsensarpa' orrtatanete't shonte' pa'namen ñeñt ama puentareto, orrtatanete't partsoteñets attoch eñochet añmapa' Partsepa't. Ñeñto'marña allohuen acheñenesha'pa' nanac mecha'na'tete't. ⁴⁴ Ñeñt ame'ñatsapa' çhocma apçhete't parro, pocsheñoñ apanna'tyesete't ñeñt es palltatse't. ⁴⁵ O'ch venda'yesete't ñeñt echenet ñaña allpon ñeñt o'patyesete't ñeñt'pa'cho'ña venda'yesete't. Allpon gana'yesete'tpa' o'ch apanna'tyesete't ñerra'm esesha' es palltatse't. ⁴⁶ Pate'tets yetpa' o'ch ahuanenet e'ñe parro Parets pa'paclo. Errotenopa' pueyerpueñoñet Jesús o'ch toma'ntachete't pan atef ñerra'm Jesús po'chets. Ñaña çhocmach rrallme'chapretanna'tete't pa'pacleto. E'ñe pocsheñeshet pueyoçhretopa' çhocmach rrallme'chete't. Allempopa' nanac amuerañterret. ⁴⁷ Ñaña çhocmach aye'choçhtatoñete't Yompor. Allohuen acheñenesha'pa' e'ñe cohuen entapretanete't ñeñt atef pete't. Pate'tets yet Yomporo'tpa' çhocmach ame'ñachete't po'poñeçhno acheñenesha'. Atteñapa' o' cha shonta ñeñt'cha' a'queshpatare'ttatsa.

3

Atto Pedropa' a'crraterran ñeñt echarrtetsa

¹ Pam'tarrpa' çhap allempocma ma'yochenet Parets pa'paclo, atef ñerra'm allempopa' ñato' o' ellerrenmoch. Pedroñapa' ahua' Parets pa'paclo epuet Juan, o'ch ma'yochoset all. ² O'ña çhapuet allpa' a'taposet Parets pa'paclo. Allempoña a'tapmochet allpa', allempocma huapachet ñaña puesheñarr ñeñt echarrtetsa pa'tco't, ama eshcaye' chope'cheno. Allempoteñ eñalleta ama chope'cheno. Chocmach pamo'tsesha'pa' o'ch aneñet allecma be'tenet Parets pa'paclo. O'ch na'nmet allotecma be'tosete't ñeñt otete't Ama Maco-hueno. Allñapa' allcha' enamare'tyenana quelle ñeñt be'tostse't Parets pa'paclo. ³ Ñeñtña

echarrtetsapa' entapan Pedro epuet Juan. Ñetpa'cho'ña be'tosmochet Parets pa'paclo. Ñaña' enamapanet quelle. ⁴ Pedroña'papa' alla o'chet cohue' epuet Juan. Allempoña Pedropa' atet otan ñeñt ama chope'chetso:

—Ñehua, pecua'y alla.

⁵ Ñeñña echarrtetsapa' alla e'ñe cohuanet, ñapa' otapañte' o'ch apet quelle. ⁶ Tarraña Pedroña'papa' atet och:

—Napa' ama necheno quelle, tarraña ñeñt nechenpa' ñeñtcha'ña napañ. O'ch notañ, e'ñe po'partsoteñoñ Jesucristo ñeñt nazareto'marnesha' o'ch notañ, pechope'cherrepa'.

⁷ Pedroña'papa' chete' potot po'cohuenrotpa' o' echañch. Allempocma corra'huena pa'tcot, ama't all meya'nen yetacpa' o' corra'huena poctacma. ⁸ Corra'huetsa pa'tcotpa' pocsheño'tpa' omacha enonet, o' ten e'ñe cohuen. Allempoña'papa' chope'ne'chen. Ama't all chope'ne'chen omachme'tetsa all aye'chochtatenan Yompor. Atteña'papa' be'tos Parets pa'paclo epuet Pedro ñaña Juan. ⁹ Allohuen acheñenesha' ñeñt allo'tsa'yen, ñetpa'cho' enteñet atto pa'ye'chochtateñesha' Yompor all chope'ne'chen. ¹⁰ Ñetpa' cheme'teñet añmapa' ñeñtara ñeñt anorrtese't allotecma be'tosete't Parets pa'paclo, ñeñt otenet Ama Macohueno, allecma enamare'te't quelle. Ñetña'papa' atta cohuanrrorteñet.

Atto Pedropa' serrpare'tatan acheñenesha' Parets pa'paclo

¹¹ Añña ñeñt corrrertsapa' ama a'rroyen enterrano Pedro ñaña Juan. Allempoña all tomchenet all oteñet Salomón Popellrraro. Acheñenesha' po'yorño'tetpa' matrra'tet allo'tsen Pedro ñaña Juan ñaña ñeñt a'crraterr Pedro. ¹² Allempoña cha'cha'tet all tomchenetpa', añña Pedropa' otapanet, atet ot:

O'ch masheñe israelneshacha' notas, eso'marte' secuanrrortene'y. Chate' sotenapañ e'ñe'te' ya yehuamenco't yechope'chater, amapa' cha'te' sotenapañ e'ñe'te' ya, ya'cohuentateñoñ yechope'chater. Añmapa' ama atteyaye. ¹³ Añcha'ña o'ch notas: Añmapa' Yompor orrtatene' ñeñt o' sentua. Añña Yomporpa' ñeñtara Po'yomporer pe't ama't Abraham ñaña Isaac ñaña Jacob, ñaña allohuen yatañneshañ. Yomporpa' e'ñe pocte' eñch o'ch cohuentatan Puechemer Jesús. Ñeñto'marña o' orrtatonas ñeñt o' sentua. Tarraña sa ñeñtara Jesús'pa' o' sepomhue. Ama't allempo Pilatopa' pocte' enteñeñ o'ch a'rroyereñ, tarraña sañapa' cha sa'nasotam'pesya allohuenes. ¹⁴ Ama't ñeñt nanac Parets, ñaña ama't ñeñt e'ñe pocte' es pets, sañapa' cha sa'nasotam'pesya. Allempo Pilatopa' ama't mueneñ o'ch a'rroyer, sañapa' aña sanamñ ñeñt amtsañ ñeñtcha' a'rroyonaset. ¹⁵ Ñaña'papa' chaña semtsach ñeñt alloch e'ñe yocrra. Tarraña ama't muetseta'ña' añña Pomporpa' o' alla tantater. Tarro'mar yapa' yeñoteñ yapa' yenter ama't allempo tantuerra. ¹⁶ Ya yeyemteñoñ e'ñe Jesús o' correrra ñeñt ama chope'chetso ñorra'. Ama't sapa' señoteñ atto ahuaña'papa' ama chope'che'te. Tarraña te'pa' o' senter o' chope'ne'cherr. Yapa' o' yame'ñera Jesús ñeñt o' a'crrataterran ñeñt echarrtate't ahuaña. Te'ña ama't sapa' o' sentuer allohuenes.

¹⁷ Te'ña masheñneshacha' napa' neñotenes ahuaña sapa' ama es se'chapoyo seyo'chro allempo semtsach Jesús. Ama't ñeñt sa'm'cha'tarefernesha' ama es chapahueto pueyo'chreto ñamet. ¹⁸ Tarraña ñeñt atet se'pohua te'pa' o' etsoterra Yompor po'ñoñ. Tarro'mar allohuen ñeñt a'm'taye't Yompor po'ñoña'papa' attecma otete't, ñeñtcha' Cristotats Partsocoppa' muero'chtachetcha' esempo. Ñeñto'marña te'pa' o' etsota Yompor po'ñoñ ñeñt aquellcare't. ¹⁹ Ñeñto'marña te'pa' añ poctetsa e'ñe sa sellqueño'tpa' o'ch soctape'cherr ello cohuen Yomporecop. O'ch sesuanom ñeñt ahuatoteñ soctapña. Attotcha' Yomporpa' e'shohuerrnascha' so'chñar. ²⁰ Attochña separrocmateñoñ epas Yomporpa' socsherrach seyo'chro. Ñaña Yomporpa' o'ch alla mueñernaserr Cristo Jesús ñeñt anarettatsa ñaña socop. ²¹ Tarraña te'pa' e'ñe pocte' allach pue'ntaño tarremphua esempohuañencha' a'poctataretetua ora allohuen ñeñt atet eñose't Yompor ahua't. Ama't

ahuat Yomporpa' eñorana'tane't acheñ ñeñt e'ñe pocte' ente't Parets ñeñtcha' a'mte' po'ñoñ, ñeñtcha' etsoterrtsa esempohuañen. ²² Añmapa' ñeñt atet ote't ahuat Moisés: "Yompor Paretspa' orrtatonascha' ñeñtcha' a'pote' po'ñoñ, ñeñtara sa samo'tsna'tarotpa' orrtatonascha', atet ñerra'm na, Yomporpa' o' orrtaterren na namo'tsna'tarneshacop. Tarraña socoppa' añ poctetsa chocmach se'mñoter errotencha' oterres. ²³ Tarraña ñerra'm esesha' amach e'mñoterraye ñeñtcha' orrterrtsa, ñeñtña acheñerpa' ahuo'ch a'chencatare'terrach. Pamo'tsesha'ña israelnesha'pa' amach allo'na entneñeto." Añpa' allohua atet ote't Moisés ahuat.

²⁴ Alla oterrerr Pedro:

—Ama't allohuen ñeñt a'mtaye't Yompor po'ñoñ ahuatpa', eñosete't ñeñt o' etsotuerra te'. Ama't Samuel ñeñt a'mtaye't Yompor po'ñoñ ahuat, ñaña allohuen ñeñt allempoteñ a'mtaye't Yompor po'ñoñ, añña eñosete't ñeñt o' etsotuerra te'. ²⁵ Añña ñeñt a'mtaye't Yompor po'ñoñ ahuatpa' ñeñtara samo'tsna'tar sepe't ama't sa. Atet Yompor a'pocatan ñoñets ahuat satañneshacoppa' añ ñeñtara ñoñets attecma a'pocatare'tta ñaña socop. Atet ñerra'm ahuat atet otan Yompor sato' Abraham: "Ñeñt puesheñarro't pemrenño'tpa' norrtatanetcha' ñeñtcha' ama't allohuen pa'namen acheñenesha'pa' coshaprechetcha'." ²⁶ Yomporpa' o' orrtatonay Puechemer o' mueñonay ñeñtey judioneshay yanom. Allochñapa' ña o'ch coshaterrey nanac atet ñerra'm allempo o' cotape'chaterrey e'ñe cohuen, ñaña allempoteñ o' yequechpa'huerr ñeñt ama pocteyaye Yomporecop.

4

Allempo anmet Pedro ñaña Juan allo'tsa'yen a'mcha'taretnesha'

¹ Allempoña serrpare'tatenanet Pedro epuet Juanpa' machayo'ta hua'cha'toña a'mcha'taretnesha'. O' huapa cornanesha', huapa ñaña guardia pa'mcha'tareter ñeñt cohuanpene' Parets pa'paquell. O' huapoña ñaña saduceonesha' ñeñt otets e'ñe ñet poctapño'tpa' amach erroteno't yetanterro. ² O' hua'cha'tetpa' cha e'moñe'toset, tarro'mar Pedro ñaña Juanpa' añ serrpare'tatenan acheñenesha' atto ñerra'm e'ñe yame'ñera Cristo ama't yerro'ma, yame'ñeño'tpa' yetanerrach. ³ Pa'tsrre'mueño'tetpa' o' arrmare'ttet epsheño'maret, abe'tare'ttet cárcelo. Allempopa' o' ellerren ñeñto'marña tsapa'tach a'p'to'tyesare'ttet erroteno'tte' serrpare'tenet atet. ⁴ Tarraña ama't atet a'pare'ttetpa' añña ñeñt e'mue' atet serrpare'tatanetpa' shonte' ame'ñyet. Allempoña ñeñt ame'ñetsa ahuaño'huenpa' o' chap allempo amnaroch mil ñeñt ame'ñatsa.

⁵ Tsapatñapa' o' ap'cha añcha'taretnesha' ama't ñaña ñeñt pompornesha' penet ama't ñaña ñeñt etsotene' ñoñets ñeñt atet anare't. Ñeñtpa' arr ap'chet e'ñe alla Jerusaléño. ⁶ Allempopa' allo'tsen ñaña cornesha' ñeñt nanac añcha'tare't ñeñt pa'so'cheñ Anás. Allo'tsen ñaña Caifás, ñaña Juan, ñaña Alejandro ñaña po'poñe'chno añcha'taretnesha' ñeñt e'ñe pamo'tsna'tarecma cornesha' ñeñt nanac añcha'tare't. ⁷ Allempoña e'ñe ap'cha'huetpa' huapachet Pedro ñaña Juan e'ñe all ap'chena añcha'taretnesha'. Allempoñapa' a'p'to'tare'ttet epsheño'maret. Atet otanet añcha'tare't:

—Sapa' ¿esesho'tña po'huamencot o' sa'crraterña acheñ? ¿Esesha'tña sapuene'ña llesens atfo't atet sepena?

⁸ Allempoña Pedro e'ñe ahuamencat puepeño't Parets Puecamquëñpa' atet otanet:

—Añcha'taretneshacha' ñaña ñeñtes pompornesha' penet, te'pa' o'ch notas: ⁹ Sapa' atto sa'p'to'teney errotene'tte' o' ye'pa ya cohuen añecop ñeñt muero'chtetsa, ñaña atto sa'p'to'teney erroteno'tte' o' ya'crrater, ¹⁰ ñehua, te'pa' o'ch se'mñoten attoch neñotatas sa ama't ñaña allohuen israelnesha'. E'ñe añ Jesucristo ñeñt nazareto'marnesha', ñeñtña ña po'huamencot te'pa' arr ten e'ñe huomech, ñeñt ahuaña cha echarrtena. Añ ñeñtara Jesús sañapa' chaña secorso'tañpes attoch rroma. Tarraña Pomporpa' o' tantater ama't rroma. ¹¹ Sapa' cha sottena atet ñerra'm acheñ ñeñt tomatene' pocoll.

Ñeñña acheñ ñeñt tomatene' pocollpa' čha huapore'tan mapue' ñeñt nanac sherbets, tarro'mar ama es čapahueto pueyočhro. Tarraña Jesús'pa' ama't atteñ ñerra'm mapue' ñeñt ahupore'tareť ñeñtara Jesús ñeñña nanac sherbets atet ñerra'm mapue' alloch orratet pocoll nanac echarr. ¹² Po'psheñeñpa' ama eñalle alloch yequeshperra, tarro'mar ama eñalle po'psheñeñ ñeñt anaret ñeñtcha' yečhore't attoch o'ch a'queshpatey. Ama't ora erracmañen añe patsro ama eñalle attoch yequeshperra, ñapñaña Jesús. Ñeñtpa' allohua atet otanet Pedro.

¹³ Añña Pedro ñaña Juanpa' ama puenča'nañoteye' eñseto. Ama't mameshapa' ama mecha'teneto. Allempoña añcha'tareťečhnopa' o' eñochet ama puenča'nañoteye' eñenetopa' ñetpa' atet otet:

—Errotenoťuaca'ye eñenetña atet. Yapa' yeñotenanet ñetpa' ama ayčhataretto attoch eñotet quellec huomenc. Ñetpa' atteta ñerra'm po'potantañ acheñenesha' ñeñt ama tama es eñotetso. Errotenoťuañaca'ye eñenetña atet ñerra'm ayčhataretet.

Allempoñapa' o' čapanet pueyočhro atto Pedro ñaña Juanpa' ahuaña čocma chopeñe'che't epuet Jesús. ¹⁴ Añña ñeñt correrrtsapa' ñapa'čo' e'ñe alla ten allame'tets. Ñeñto'marña añcha'tareťnesha'pa' ama errotenoť che'ptare'taneto. ¹⁵ Allempoñapa' mueñerranet a'yenet. Allempoña añcha'tareťnesha'pa' serrpare'tatanna'tet e'ñe ñañeñeta. ¹⁶ Atet otanna'tyeset:

—Errotenuachñaca' yeñanetña te'te'. Ama't arr ora Jerusaléñopa' o' e'ñe eñotuaréttet atto ñetpa' orrtatet ñeñt ama't yapa' ama yentare. Ñeñto'marña te' yapa' amach erroteno ya'nasochoña', e'ñe po'ñočh atet. ¹⁷ Tarraña ama'tcha' ama erroť yeñanetopa' te'pa' añ poctetsa o'ch yeche'ptare'tyesanet o'ch yotanet amach allo'na serrpare'tnenetña ñeñt atet pena Jesús. Tarro'mar yapa' ama yemno allohuen acheñenesha' o'ch e'mare'tareťetuet ñeñt atet penet te' ñet arr. O'ch yotanet ama't puesheñarra acheñ amach serrpare'tatatscheto.

¹⁸ Allempoñapa' alla agotaretterret. Atet otarettapuerret e'ñe eche'čharro, atet otet:

—Te'pa' amach seserrpare'tatatsto ñeñt atet pena Jesús, ama't e'ñe mamesha. Ñaña amach seyčhatatsto ama't mamesha atet yečhate't Jesús ahuaña.

¹⁹ Allempoña Pedro ñaña Juanpa' atet otanet:

—Ñehua, te'pa' o'ch soctape'ch sa, allotpa' o'ch sotey, erra'tsente' pocte' enten Yompor, ñato' o'ch yame'ñasa sa amapa' o'ch yame'ñya Yompor. ²⁰ Yapa' amach errotenoť yemmo. Añña pocte' čocmach ya'poťa ñeñt o' yentua ñaña ñeñt o' ye'mua.

²¹ Allempoñapa' atta che'ptare'tuapuenanet po'pocheño, allotña'pa' a'rroyarettenet. Añcha'tareťnesha'pa' ama't mueneñetañ o'ch castiganetañpa' tarraña ama erroteno, tarro'mar allohuen acheñenesha'pa' e'ñe pocte' enteñet. Acheñenesha'pa' nanac aye'chočhtatoñet Yompor añecop ñeñt o' entuet atto Yompor orrtatanet po'partsoña.

²² Tarro'mar añ yacma ñeñt o' correrrapa' ñapa' o' pa'tatsoch čharra' po'charña.

Ñeñt ame'ñetsapa' atet pet allempo enamet Yompor po'huamenc

²³ Allempoña a'rroyeret Pedro ñaña Juanpa' ahuanmuet allo'tsen ñeñt parro ame'ñenet. Allempoña čapuet allpa' serrpare'tatosanet atet otanet ñeñt pa'mča'tareťernesha' pen allohuen judionesha' po'cornaneshar ñaña ñeñt pompornesha' penet. ²⁴ Allempoña serrpare'tatuosetpa' ñetña allohuenet parropa' o' ma'yocheret Yompor. Puema'yochenoťpa' atet otet:

—Yompore, ñeñteř nanac Partsoř, řa ñeñteř yečhcatue' enet ñaña ama't añ pats, ñaña ora erracmañen sa'p řa yečhcatue', ñaña ama't ora esocmañen ñeñt yentyen e'ñe alla e'ñe řocma peyečhcatuar. ²⁵ Ahuať yatañ Davidpa' nanac sherbape't. E'ñe Pecamquenoť pe'ñorache't, ñeñto'mar atet ote't ña ahuať:

Errotenote' atsrre'muenaña po'poñ acheñenesha' ñeñt ama ame'ñetso. Errotenote' o'pateñetña ama't Parets, ñeñtpa' e'ñe orrena atet penet.

²⁶ Ñeñt amcha'tarettetsa arr patsro ñetpa' apchet attoch o'pachet Yompor, o'pachet ñaña ñeñt llesensa' ñeñtara Cristo. Añpa' allohua atet ote't David ahuat.

²⁷⁻²⁸ Alla ma'yochereterr Yompor, atet oterretterr:

—Ñeñto'marña te'pa' po'ñoçh o' etsota atto arr Jerusaléño o' apchet attoch o'patonapet Pechemer Jesús ama't ñeñt e'ñe cohuen Parets penten ña, ñeñtña Jesús ñeñt e'ñe cohuen pesherbaye't ñeñt e'ñe ño pellsensar. Ate't ahuatoteñ e'ñe peñotuanete't ñetpa' o'ch etsotaterrnapet peñoñ atet ñerra'm Herodes, ñaña Poncio Pilato, ñaña po'poñeçhno acheñ ñeñt ama ame'ñetso, ama't ñaña israelnesha'. Tarraña ñeñt atet o'pachetpa' te'pa' o' etsotuerra peñoñ. ²⁹ Ama't te'pa' Yompore peñoteny ñetpa' nanac mueneñet o'ch yore'tame'tyet yaña. Te'pa' o'ch yenamap ahuamencat peña'yepa'ch ñeñtey torretsas pöcop attoch amach yencha'tatsto. E'ñepa'ch huomencocma yeser- rpare'tonañ peñoñ. ³⁰ Porrtatonayepa'ch pehuamenc attoch corra'huerra ñeñt at- sna'tyets. E'ñe yeçhore'teño Jesús porrtatonayepa'ch pepartsoña, ñaña ñeñt ama yentare porrtatanetcha' attoch eñoçhet ñapa' ñeñteñ nanac Partsoñ—e'ñe yeçhore'teño Pechemer Jesús, ñeñt e'ñe cohuen Parets penten ña, ñeñt e'ñe cohuen pesherbene'. Añpa' allohua atet ma'yochet.

³¹ Allempoña ma'yochuetpa' allña apchenetpa' o' pella ora all anorrçhenet. Allempocma allohuenetpa' o' chorraret Parets Puecamquëñ, attoch e'ñe huomencocma o'ch serrpare'toñet Yompor po'ñoñ.

Atto es apanna'tyesete't pame'ñeñoçet Yompor

³² Allempoteñña ñet ñeñtet ame'ñatsete'tpa' o' parrocmatuet e'ñe cohuen. E'ñe parra coñapñats anmuete't pueyoçhreto ñeñt amuerañtetsa. Ama eseshaye' otatsete ñeñtpa' ñapñetach es o'patet, añña çhocma apanna'tyesete't ñerra'm esesha' es pall- tatsete't. ³³ Jesús puellsensarnesha'pa' e'ñe po'huamencocmañen a'poñoçete't atto tanterra Yepartseshar Jesús. Yomporpa' nanac mueranete't, ñaña nanac ahuamencat panete't. ³⁴ E'ñe ñeshetopa' ama esesha' es palltatsete'te. Añña ñeñt allpon echyesete't po'patseñ, amapa' pa'paquëllpa' o'ch venda'yese'te. Ñeñtña allpon gana'yese'te'tpa' o'ch huapachet ³⁵ allo'tsen allsensare't. Alloñapa' o'ch aposet ñeñt allsensare't. Allsensare'tña'pa' o'ch apa'yesan ñeñt es palltatsete't. ³⁶ Añpa' ñeñt atet pe't puesheñarr añ pa'so'cheñ José, ñeñt chipro'marnesha' ñaña ñeñtara levitana'tar. Añña ñeñt allsensare'tnesha'pa' o' socheret José Bernabé. Añña so'chñets Bernabépa' ñeñt otets yeñoño amuerañana'tar. ³⁷ Ñaña'pa' echane't allpon pats. Allempoñapa' venda'huepa' o' huapatan allpon quelle ñeñt ganapa' o' aposan ñeñt allsensare'tnesha'.

5

Ate't ña Ananías epuet puetapor Safira

¹ Tarraña eñall po'psheñeñ ñeñt atet ñatsete't po'poñ, ñeñtpa' añ pa'so'cheñ Ananías epuet puetapor ñeñt pa'so'cheñ Safira. Añña Ananíaspa' o' vendan allpon po'patseñpa' ² o' huapatan quelle, aposan ñeñt allsensare't. Tarraña ama oraye' huapatuano quelle çhach shequënet. Tarro'mar ñet epuet puetaporpa' atet a'pöçhachet o'ch yoret allpon quelle e'ñe ñoçpuet. ³ Allempoña aposan allsensare't ñeñt o' allponañña quellepa', Pedroñapa' atet och:

—Eso'mare't pemnateñ oneñet o'ch coñape'chatañ po'poñ peyoçhro. Papa' pemneñeñ o'ch peshquëñ ama't Parets Puecamquëñ atto ñapa' ahuo't peyorañ allpon quelle. ⁴ Ñeñt pepatseñpa' e'ñe po'ñoçh ñeñtpa' ño. Tarraña ñerra'm ama ña muenatsñe o'ch peven- deñpa' ñeñtpa' e'ñe poçteñ. Ñaña ama'tcha' pevendeñpa' ñerra'm ama ña muenatsñe

o'ch papyeñ ora allpon quelle ñeñt pagappa', ñeñt e'ñe pocteñ ñaña. ¿Erroñote'ña poctape'chña atet peyoçhro? Ama yapteye' pemnenñe o'ch peshca'yeñ, Yompore'naña pemneñeñ o'ch peshquëñ ñaña.

⁵ Allempoña Ananíaspa' ñeñta e'muapa' ataco'roche' e'ñe allpa' o' rroma. Añña po'potantañ acheñenesha' allempo e'mare'chetpa' nanac yorenet huomenc. ⁶ Añña yacmanesha' ñeñt po'nare'pa' o' huapuetpa' ñetñapa' e'patse'chet ñeñt rromats o' anmet a'yo all pampueñeta'.

⁷ Tematenpa' o' huapa ñaña puetapor ñeñt rromats. Ñapa' ama eñoteñe o'te' rroma puerrollar. ⁸ Allempo huapa Pedroñapa' o' a'p'to'ta'p:

—Ñehua, p'ten, ¿po'ñoçhte' allpona quelle sagap allempo sevenda'hua sepatsen?

Puetaporñapa' atet och:

—Allponaca'ye quelle ñeñt yagap.

⁹ Pedroñapa' atet otererr:

—Tarraña sapa' ahuo't sa'poctach epa'p perrollareñ atet'cha' se'pa. Cha't sotapañ ñato' o'ch seshquëñ ñaña ama't Parets Puecamquëñ. Pecue' o' be'tosçha'tuerrmoch ñeñt o' pampa'huenna'pa' errte' perrollareñ. Papa'çho' attecmapa' anmapetcha' a'yo.

¹⁰ E'ñe allempocma puetaporpa'çho'ña o' t'aco'ra ñaña e'ñe alla Pedresho, o' rroma ñaña. Allempo be'tosçha'tuerr ñeñt anmue' puerrollareñ, allña'pa' entuerrñañet puetaporpa'çho'ña o' rroma. Ñapa'çho'ña anmetpa' o' pampueñeta' a'yo epuet puerrollareñ. ¹¹ Atarr mecha'na'tet allohuenet ñeñt pame'ñeño't apçhetsa, ama't allohuen ñeñt e'mare'te'pa' çha yorenet nanac. Añpa' ñeñta allohua atet pa Ananíasoñ.

Atto Jesús puellsensarnesha'pa' orrtatete't Yompor po'partsoña

¹² Añña ñeñt Jesús puellsensarpa' nanac orrtatete't Yompor po'partsoña, ama't ñeñt acheñenesha'pa' ama puentare attoch eñoçhet añmapa' Partsepa't. Añña ñeñt parro ame'ñenetpa' arr apçchenet all ochete't Salomón Popellrraro. ¹³ Po'potantañ acheñenesha' ama't e'ñe pocte' eñçete't ñeñt ame'ñetsapa', allempoña ñet puen'chaño'tetpa' ama apçherreto parro. ¹⁴ Allempoñapa' allo'na atonetnena po'poñeçhno acheñenesha' ñeñt o' ame'ña. Shonte' o' ame'ñana Yompor, ama't coyanesha'çhno ñaña yacmanesha'çhno. ¹⁵ Añña ñeñt atsna'tyetspa' o' anmet a'yenet allecma chopeñe'chenet. Allña'pa' o' pañra'tyesoset topantso, ñaña puesheña'tetspa' ñato' ora po'maye'na. Tarro'mar anmare'teyeset allecma chopeñe'chenet allochña'pa' ñerra'm mache' huena Pedropa' esheccha' ama't pa'çoyeshe'ma po'poma'mteñapa' çhapcha' ñesheto, ñato' attotpa' o'ch correrret. ¹⁶ Ñaña ama't allampaño't Jerusaléño'tpa' huapatoñ acheñenesha' atsnañe'çhno ñaña ama't ñeñt chorrena oneñe't. Allochña'pa' allohuenetpa' o'ch corra'huerret.

Allempo Pedro ñaña Juanpa' abe'tarettet cárcelo

¹⁷ Allempoñapa' ñeñt cornesha' ñeñt nanac añcha'tare'tpa' e'moñe'tan allohuen ñeñt ame'ñetsa. Ñaña allohuen ñeñt parro e'ñe attecmet cotape'chenet ñeñt otenet saduceonesha'pa' o' e'moñe'chet ñeñt ame'ñetsa. Tarro'mar sope'chapretenetña', acheñenesha'pa' e'ñe cohuen enteñet ñeñt ame'ñetsa. ¹⁸ Allempoña allsensareñnesha'pa' rromueñetpa' o' abe'tarettet cárcelo e'ñe allecma abe'teñet acheñenesha'. ¹⁹ Tarraña ama't abe'tarettetpa' tsapoñapa' o' huapanet Yompor po'mllaño'teñer ñeñt huetsa pue'ntaño't o' torañperranet, o' çapaterranet a'yenetpa' atet otanet:

²⁰ —Añ poctetsa o'ch ahues Parets pa'paclopa' o'ch sa'tomos all o'ch seserrpare'tach allohuen acheñenesha' ora atet yocrrena etserra cohuen Partsocop.

²¹ Allempoña ñeñta e'mhuetpa' e'ñe ahua'tecma ahua'muenet Parets pa'paclo, o' be'tosçha'toset, allña yeçhata'muenet.

Añña ñeññ cornesha' ñeññ nanac am̃cha'taretpa' o' čhapa'muen ñaña ellonet allotcha' agotatan am̃cha'taretnesha'. O'ch čhapa'muen ñaña allohuen ñeññ cofene'. Allotcha' agotatan allohuen am̃cha'taretnesha' ñeññ čhocma a'pocatyene' ñoñets ñeññ pompornesha' penet israelena'tarnesha'. O'ña čhačha'tuetpa' o' serrpare'tatanna'tet attoch a'pochtachet atetcha' pet. Allempoñapa' o' agotachet ñeññ abe'tatenet cárcel. ²² Tarraña allempoña čhap cárcelo ñeññ mueñenetpa' ama es entosetoña cárcelo. O' puerrerretpa' atet otueret am̃cha'taretnesha':

²³ —Yapa' allempo yečhap cárcelopa' o' yentos cárcel e'ñe pocacma echarr ayotam̃psaret, ñaña ñeññ cohuañpene'pa' alla tomčhenet allot be'tenet. Tarraña allempoña toretpa', o'ponoñapa' ama esesha' eñalle ama't puesheñarra.

²⁴ Allempoña ñeñña e'mua am̃cha'taretnesha' ñeññ po'captáner penet ñeññ cohuañpene' Parets pa'paquëll ñaña ñeññ pa'm̃cha'tareternesha' pen allohuen judionesha' po'cornanesharpa' ñetñapa' atet otet:

—Esocopte'ca'ye o' čha'nmačhenette'. Te'pa' errotuanencha' pette' tsapa-tonet.

²⁵ Allempoñapa' huapa puesheñarr atet otosanet:

—Añña ñeññ sabe'tat ellerro cárcelopa' te'ñapa' alla tomčhenet Parets pa'paclo yečhatetset all.

²⁶ Allempoña añña capitán ñaña ñeññcha' yempue'pa' o' ahuanmuet allo'tsen allsensaretnesha'. O'ña čhapuetpa' o' ahuenaneta' e'ñe cohuenacma. Tarraña ama erroť paneto tarro'mar capitánpa' čha mecha'tenan acheñenesha'. Ñato' čho'te' rrolle'chet.

²⁷ O'ña čhaterranetpa' nosanet e'ñe allo'tsa'yen ñeññ čhocma a'pocatyene' ñoñets. Añña cornesha' ñeññ nanac am̃cha'taretpa' atet otanet:

²⁸ —Ahuañapa' ama't e'ñe eche'čharro yotuas amach seserrpare'tatsterrero ñeññ pocapña Jesús. Tarraña sapa' ahuo't alla seserrpare'tatuerrerr ñeññ so socapña. Ama't allohuen ñeññ yečheta arr Jerusaléno o' alla seserrpare'tatuerrerr. Te'ñapa' allo seyohuerryerr ahuo' yemtsach añ Jesús.

²⁹ Allempoñapa' otanet Pedro ñaña ñeññ epuet, ñetñapa' atet ochet:

—Añña e'ñe pocte' amach acheña yame'ño, añña Yomporcha'ña yame'ña. ³⁰ Sapa' o' sepata'pes Jesús tsacho attoña o' semtsatach. Tarraña Pomporpa' ña tantaterre'. Añpa' ñeññara Yompor ñeññ Po'yomporer pete't ñaña ahuat yatañeshañ. ³¹ Te'ña Pomporpa' o' nanac ahuamencat pe', e'ñe po'cohuenrotpa' all partsoten. Allochñapa' attoch cotape'chaterran israelena'tarnesha' ñaña attoch cotape'cherret cohuen e'ñe etserra attoch peretnerranet po'chñar. Ñeñño'marña Yomporpa' nan Jesús ñeññcha' Ya'queshpatañer yepen. ³² Ñeñño'marña te'ña yapa' ya'poteññañ atet pena Yompor. Yompor Puecamquëñpa'čho'ña ñeññ eñotatets. Ñeññara Puecamquëñ ñeññ nennay yeyočhro, allohueney ñeññey ame'ñenaya ña. Añpa' allohua atet otanet Pedro.

³³ Allempoña ñeñña e'mhuet ñeññ atet ot Pedropa' añña am̃cha'taretnesha' nanac atsrre'matanet, atarr mueneñetañ ahuo'ch muetsuet ñeññ allsensaretnesha'.

³⁴ Allempoñapa' añña puesheñarr fariseo ñeññ e'ñe parro a'pocatyene' ñoñetspa' o' tomos attoch eños. Ñeññ tomosetspa' añ pa'so'cheñ Gamaliel, ñapa' ña ñeññ yečhatets ñoñets ñeññ atet anaret, tarro'mar ñeññ po'taruas pen. Ña allohuen acheñenesha'pa' e'ñe cohuen enteñet. Gamalielñapa' o' mueñatuerran allsensaretnesha' mame' a'yenet.

³⁵ Ñeññ epuet cotape'chatannenetpa' atet otanet:

—Masheñe israelneshacha' o'ch notas: E'ñech cohuenacma ya'pochtach ñeññ atetcha' yeapanet. ³⁶ Sapa' ama't seyerpueñoña atto ahuaña o' orrta puesheñarr ñeññ pa'so'cheñ Teudas. Ñapa' atarr muene't o'ch ayochreshatta. Shonto' acheñenesha' ñato' allo'tseno'te' cuatrocientos ñeññ ame'ñata. Allempoñapa' allponmaterrerrpa' o' muetset. Ñeññña pueyochresha'pa' o' ahuanomyerret ñopa'ttsocmuet. Allempoñapa'

o'huañ es cotape'chet. ³⁷ Allempoña allponmaterrerrpa' orrta ñaña po'psheñeñ ñeñt pa'so'cheñ Judas ñeñt galileo'marnesha'. Ñapa' tarrempo orrta allempo quellcatyenet pa'so'chñechno añcha'taretesho. Ñapa'cho'ña tama yochresha'tana allpon acheñenesha'. Allponmaterrerrpa' ñapa'cho'ña o' chenca. Añña ñeñt pueyochresha'pa' o' parratse'tuerret. ³⁸ Ñeñto'marña te'pa' o'ch notas, o'ch sa'rroyer ñeñt serrpare'tene' ñeñt atet pena Jesús. Amach erroť sepatstaneto, tarro'mar ñerra'm e'ñe ñoťoteta poctapñoť atet penetpa' ñeñtpa' mameshapa' o'ch huañerr. ³⁹ Tarraña ñerra'm poctapñetpa' Yomporeshoť huenapa' amach erroťenot sehuapore'tache. Nato' sapa' cha se'moñe'teññañ ama't Yompor poctapña. Añpa' ñeñt atet otan Gamaliel añcha'taretnesha'.

⁴⁰ Atet cotape'chatanet Gamalielpa' e'ñe pocte' eñchet. Allempoñapa' alla agotaterran allsensaretnesha'. Allempoña huaçherretpa' o' nalle'tatanet añcha'taretnesha'. O' nalle'tatuanet añcha'taretnesha'pa' allotña'pa' otarettet ñaña e'ñe eche'charro:

—Te'pa' amach seserrpare'tatsterrero ñeñt atet pena Jesús. Allempoñapa' a'rroyarettenet. ⁴¹ Allempoñapa' o' ahuanenet, o' sa'neñet ñeñt chocma a'poctatyene' ñoñets. E'ñe pocsheñeshocmañen ahuanenet tarro'mar Yompor e'ñe pocte' entanet ñeñto'mar muenatanet o'ch muerochtet ñocop. ⁴² Allempoteñ pate'tets yetpa' chocmach yechatete't Parets pa'paclo ama't ñaña e'ñe alla pa'pacleto. Nanac serrpare'tete't atto Jesús'pa' ña Cristotats.

6

Arrpa' allempo net cançherrsheña ñeñtcha' epatyehuet rreñets

¹ Allempoteñña'pa' allo'na sen atonetnomtsa ñeñt ame'ñetsa. Tarraña e'ñe allem-popa' o' sope'channa'tet. Ñehua, tarro'mar allempopa' atet pete't. Pate'tets yet Jesús pueyochresha'pa' o'ch apa'yesan allohuen rretorrnanesha' rreñets ñeñt pallta'yesatse't rreñets. Ñeñt e'muene' griegaçhpa' ñetpa' atet otyeset:

—Ñeñt yamo'ts rretorrnanesha'pa' ñetpa' ama allponeshacmaye' rreñets agapueto allpon agapyes ñeñt e'muene' hebreyach. Yamo'ts rretorrnanesha'pa' coñe'ta agapyeset. Ñeñtña rretorrnanesha' ñeñt e'muene' hebreyachpa' shonte' rreñets agapyeset. Attoña sope'channa'tet. ² Allempoñapa' ñeñt çharrasheña puechena epa ñeñtara Jesús puellsensarpa' ñetña'pa' agotatuť allohuen ñeñt ame'ñetsa. O'ña apcha'huetpa' atet otarettapuet:

—Yapa' ama tama pocteye' yenteñe ama't mameshapa' o'ch ya'rroya serrpare'te' Yompor po'ñoñ. Shonte' yet ya'pertaten attoch yapa'yes allohuen rretorrnanesha' rreñets. ³ Añña pocte' masheñeshacha', o'ch se'ñ cançherrsheña ñeñtara ñeñtey ame'ñetsa arr parro—erra'tsente' cohuen acheñ senten ñaña ñeñt chorrena Parets Puecamquëñ ñaña ñeñt atarr eñotene' ñeñt cohuentetsa Yomporecop. Añ ñeñtara cançherrsheña ñeñtcha' po'taruas pet attoch epatyeseť ñeñt pallta'yetsa rreñets. ⁴ Allochña'pa' yapa' añach yema'yochra ma'yochatsa ñaña o'ch ya'potoñ Yompor po'ñoñ. Ñeñtch paterr yetorrena. Atet otanet Jesús pueyochresha'.

⁵ Allempoña acheñenesha'pa' e'ñe pocte' eñchet allohuenet. Allempoñapa' o' neñet Esteban ñeñt nanac ame'ñetsa ñeñt e'ñe chorrena Parets Puecamquëñ. Allotpa' neñet ñaña Felipe, ñaña Prócoro ñaña Nicanor ñaña Timón ñaña Parmenas ñaña Nicolás ñeñt antioquio'marnesha' ñeñt ahuatoteñ ame'ñate't judionesha'. ⁶ Añña ñeñt cançherrsheña acheñpa' o' ahupatarettet allo'tsen Jesús puellsensarnesha'. Añña allsensaretnesha'pa' allenta ma'yochampesyet, o' net pot ñesheto, atet otarettet ñeñtcha' po'taruas pet.

⁷ Allempoñapa' o' eñe epa'hua Yompor po'ñoñ ora. Allempoñapa' allo'na sen shonta'nmata ñeñt ame'ñetsa all Jerusaléño. Allempopa' shonte' judionesha' po'cornaneshar ame'ñatsa.

Allempo rromuet Esteban

⁸ Añña Estebanpa' Yompor pomuereñoŕpa' nanac amuerañta. Eñe Parets po'huamencoŕpa' orrtatanet ñeñt ama puentareto atto eñochet añmapa' po'ñoçh Parets po'huamencoŕ orrtena. ⁹ Allempoñapa' puesheña'tets judionesha' o' achmeñet Esteban po'ñoñ. Añña judionesha' ñeñtara oteñet libertinanesha'. Ñetñapa' alla apçhenet po'prahuo. Ñaña po'potantañ judionesha' ñeñt huetsa Cireneoŕ ñaña Alejandríoŕ ñaña Cilicioŕ ñaña Asioŕpa'—ora allohuenetpa' eñe parrocmachmãare'toñet Esteban po'ñoñ. ¹⁰ Tarraña Estebanpa' nanac es eñot atto serrpare'ten. Ñetpa' ama errotenoŕ anapeto. Estebanpa' añ chorraye't Parets Puecamquëñ, ñeñto'marña ama errotenoŕ anapete'te. ¹¹ Allempoñapa' tsa'chet po'potantañ acheñ añecop attoch toma'tatoñet Esteban po'ñoñ. Ñeñt atsa'tareŕpa' atet otet:

—Yapa' o' ye'mñ Esteban añ achmãare'ten Moisés po'ñoñ ama't ñaña Yomporpa' achmeñ. Atet toma'tatoñet Esteban po'ñoñ.

¹² Allempoña acheñenesha' atet e'muetpa' o' e'moñe'chet Esteban. O' huapa ñeñt pompornesha' pen judionesha', huapa ñaña ñeñt etsotene' Moisés po'ñoñ. Huapapa' o' rromueñeta' Esteban o' anmet añcha'tareŕneshesho allecma a'pocatenet ñoñets.

¹³ Chapuet allpa' alla toma'tatuerrñañeterr Esteban po'ñoñ, atet otoset:

—Añ Estebanpa' çhocma achmãare'tenan Parets pa'paquëll ñaña çhocma achmãare'tenan Moisés po'ñoñ.

¹⁴ Alla oterreterr ñeñt atsa'taret:

—Yapa' o' ye'mñ Esteban atet oten añ Jesús ñeñt nazareto'marnesha'pa' o'ch a'matamŕsey Parets pa'paquëllpa' o'ch huapore'tatonay atet yeçhatye't Moisés.

¹⁵ Allempoñapa' allohuenet ñeñt allo'tsa'yen o' cohuanrrorchet Esteban. Tarraña o' eñchet eñe cohuen orrtena pa'clloyoŕ atet orrtena ñerra'mrrate' Yompor po'millañoŕeñer ñeñt huetsa entot.

7

Atto Estebanpa' serrpare'tatan añcha'tareŕnesha'

¹ Allempoñapa' añña cornesha' ñeñt nanac añcha'tareŕpa' a'pŕo'tan Esteban, atet och:

—¿Po'ñoçha't atet?

² Estebanñapa' atet och:

—Ñehua, masheñneshacha' allohuenes nomporneshacha' o'ch se'mñnoten, o'ch notas ñeñt atet pã'yese't ahuat yatañneshañ. Ahuatpa' Yompor ñeñt nanac Paretspa' orrtane't yatañ Abraham all anetso Mesopotamia. Allempopa' ama çhena' Haráno allcha' yeçherra. ³ Allempo orrtana Abrahampa' atet och ñeñtcha' atet pã: “Te'pa' o'ch ahueŕ arroŕ o'ch pesa'nom añ peney, o'ch pesa'neñ ñaña pãmo'tsesha', o'ch ahueŕ allcha' notaŕ.” Atet och Yompor, atetçho' pã yatañ Abraham. ⁴ Allempoñapa' a'ypo'ña'nman all yeche't all yeçhanate't ñaña caldeo'marnesha' atto çhap allo'tsen anets Harán all yeçherra. Allempo o' rroma pomporeña' Yomporpa' o' alla anererr arrma Canaáno all yeyçhena ya te'. ⁵ Tarraña allempo çhap arr ahuatpa' Yomporpa' ama apueña' añ pats, ama't coñe'ta. Tarraña Yomporpa' ahuo't och esempohuañen o'ch aŕ añ pats, eñe ñocop, ama't puechemerecop, ñaña po'mñrenñecop. Tarraña allempopa' yatañ Abrahampa' ama chemere'tena'. ⁶ Allempocma Yomporpa' o' eñotatan Abraham attoch esempo po'mñreneña' ahuanmuetcha' arroŕ, çhapuetcha' po'poñ anetso Egipto all ama pa'nyempañoŕyaye, allcha' yeçha'huerret, allñapa' mueroçhtatapanetcha' allo'marnesha' acheñ. Ñaña añ eñotatan Abraham attoch ataruasatarettach eñe atã po'mñreneñ, eñe

cuatrocientos char amuerochtatarettet. ⁷Tarraña Yomporpa' o' eñotatan Abraham ñaña po'poñ. Ahuo't och Yompor: "Tarraña napa' netsa'taterach ñeñtcha' muerochtate' penreñeñ. Allempoñapa' huaçherretcha' alla arr Canaáno allcha' ma'yocherrnet."

⁸Ñaña allempo Yomporpa' ahuo't otan Abraham po'poñ ñeñtcha' atet yeçha' judionesha' allempoteñ errponohuañen, attoch eñochet Yomporpa' ama pueno po'ñoñ. Añmapa' ñeñt atet otan Abraham: "Añ pocte' o'ch setsorre allohuen asheñorroñollesha'." Ñeñto'mar allempo chemere't Abrahampa' puechemeretoll ñeñt soch Isaacpa' ahuo't tsorreñ. Po'psocmatño'pa' o' tsorre. Isaacña'pa' allempo o' po'n'pa' o' chemere'tana Jacob. Jacobña'pa' chemere'tana çharrasheña puechena epa ñeñtara yatañneshañ yepen ya ñeñtey israelena'tarey.

⁹'Tarraña allempopa' añña ñeñt yatañneshañ yepenpa' o' sope'cheñet pa'mo'nasheñ José. Ñeñto'marña o' pomet pa'mo'nasheñ. Ñeñña agapue'pa' o' aneñ baçhayo all anets Egipto. ¹⁰Tarraña Yompor ña a'nataya. Yomporpa' o' a'pocatuoñ ora allohuen atto muerochtachete't. Añña ñeñt añcha'tarettatset Egiptopa' e'ñe cohuen entane't José. Añ ñeñt añcha'tarettatset Egipto ñeñt'pa' oteñet Faraón. Faraónpa' eñotan José ñapa' nanac es eñoten. Ñeñto'mar añcha'tare't Faraónpa' o' nan José ñeñtcha' añcha'tarettapretaya all Egipto. Ñaña ora allpon ñeñt taruaset Faraón pa'paclo'marpa' o' nan José ñeñtcha' yechenahuet.

¹¹'Allempoñapa' orrta muecheñets. Ora allohuen egipto'marnesha' nanac cheporrare'tet. Ñaña ora allohuen canaáno'marnesha'pa'çho'ña nanac cheporrare'tet. Pa'chporrño'tetpa' nanac muerochtete't. Yatañneshañpa' ama echete'te pocrramet ama't coñe'ta. ¹²Allempoñapa' yatañ Jacobpa' o' e'mare'tan orameñ rreñets Egipto. Ñeñto'marña mueñan puechemerasha' ñeñtara yatañneshañ yepen ya. Ñetpa' o' ahuanmuet Egipto o'ch rañteneta' rreñets. ¹³Rañta'hueneta' rreñetspa' o' puer-raçherret. Atomatpa' o' huañaperret pocrrañpa' o' alla ahuanerreterr Egipto. Allempoña çhaçherreterr Egipto pa'mo'nasheñet Josépa' atet otanet ñapa' ñaña pa'mo'nasheñ penet. Allempoñapa' o' cheme'chet pa'mo'nasheñ José. Pa'mo'nasheñña'pa' o' anmanet añcha'taretesho attoch cheme'tatanet. ¹⁴Cheme'tatuanetpa' allempoña Josépa' o' mueñerranet pa'nyeto añecop attoch ereta' pompor Jacob ñaña allohuen pamo'tsesha', atet ot José: "Onetepa' allohuenet Egipto." Ñeñto'marña allohuen cançhroch çharra' puechena amnarshena pamo'tsesha' ñetña'pa' ahuanmuet Egipto allo'tsen José. ¹⁵Allempoñapa' çhaçha'tet Egipto. O' met allpon charpa' o' rroma yatañ Jacoboñ all Egipto. Meterrerr allpon charpa' o' colla'hua ñaña puechemereshañ ñeñtara yatañneshañ yepen. Colla'huetpa' alla apamparettet all Egipto. ¹⁶Ñehua, meterrerr allpon charpa' o' ahuanmare'tterret puenpa'ts anetso Sicño allcha' apampare'tterret ello puenpa'ts. All apampare'tterretpa' ñeñt'pa' ñeñtara pats ñeñt o' rañta'hua Abrahamañ ahua't. Añña patspa' ñeñto' vendoñ Hamor puechemereshañ ahua't all Sicño.

¹⁷Alla o'terraneterr Esteban, atet ot:

—Allponerrerr charpa' çhappmoch allempo o'ch etsota atet Yomporpa' otane't ahua't Abraham allempo huomenc nane't po'ñoñ. Ñetpa' allempo nanac merete't all Egipto. ¹⁸Atteña'pa' o' met shonte' charpa' o' orrta po'poñ añcha'tare't Egipto ñeñt ama puentarano José, tarro'mar Josépa' ahua'toteñ o' rroma. ¹⁹Añña añcha'tare'tpa' nanac muerochtatyesonay yatañneshañ. O' nanet ñoñets attoch pamo'mtayetpa' o'ch a'ypo'ñet puechemeretoll a'yo. Añecpo'ch atet peñet attoch muetsatachet puechemeretoll. Allochña'pa' amach nanac mereto. ²⁰E'ñe allempopa' o' eñalleta Moisés tarraña Yomporpa' e'ñe cohuen entane't Moisés. Pamo'mte'pa' e'ñe a'nahua cohue' ma'pmña arorr all pa'paclo. ²¹Allempoñapa' o' çhap allempo amach erro'teno cohueñeto pa'paclo a'nahua. Allempopa' a'ypo'ñet a'yene't. Añña añcha'tare't Faraón po'seña'pa' ahuo'

huapa all neñet ahuo' entos, nanac amuerochen eñch, allenta aner attoch ñañrecha. Atteñapa' o' atarrtach pa'paclo atet ñerra'm puechoyor e'ñe ño. ²² Ñeñto'mañña Moiséspa' ayçhatareña ora allpon ñeñt atet eñotyese't egipto'marnesha'. Nanac eñotañte't ñerra'm allempo eñose't, nanac eñotañte't ñerra'm allempo es pa'yese't.

²³ Allempo çhap pa'tatsoch çharra' po'charña Moiséspa' nanac yerpane't pamo'tsesha' ñeñtara israelena'tarnesha'. Atarr seche't o'ch a'chenaneta'. Allempoña parrochpa' o' ahuo' allo'tsa'yen pamo'tsesha'. ²⁴ O'ña çhap allpa' all entosan puesheñarr egipto'marnesha' nanac coñchatenan puesheñarr israelena'tar. Ñañapa' o' moñsana pamo'ts. O' çhote huomencpa' çha rroma. Atto chemnatanaña pamo'ts. ²⁵ Añña Moiséspa' otapañ pamo'tsesha'pa' e'ñech cohuen entapet. Otapañ o'te' eñochet Yompor mueñe' attoch a'qeshpatan pamo'tsesha'. Tarraña ñetpa' ama eseshaye' pocte' entaye. ²⁶ Tarro'mar tsapañapa' alla ahuenerr, allempopa' o' entuenanerr epsheña pamo'tsesha' cho' orrotenet e'ñe ñañeñeta. Ñañapa' mueneñ o'ch amo'tstateranet, atet otanet: "Esuañaca' masheñneshacha' sottenña arr. Añña pocte' e'ñech semo'nasheñ sepanna." ²⁷ Ñeñt chetene' pamo'tspa' o' a'mchech Moiséspa' ñañapa' atet ot: "Esesha'huañaca' penene'ña pa' añcha'taret arr yocop. Esesha'huañaca' potene' o'ch pa'tsrre'moçhta arr. ²⁸ Ñato' añte' pemnen o'ch pemtsan namã atet pepe' muetse' egipto'marnesha' ellerro." ²⁹ Allempoña o' e'man añ ñoñets Moisésña' o' yeta puenchañoñ. O' ahuo' a'yo allo'tsen pats pa'so'cheñ Madián. O' yeçha'huerra allaçar. Allñapa' all sena'tapa' o' chemere't epsheña.

³⁰ O' alla oterraneterr Esteban, atet ot:

—Allempoñapa' o' meterrerr pa'tatsoch çharra' char. Parrochpa' amarato'tsen Moisés allame'tets aspeno Sinaíño. Allñapa' entosan tsachmatoll all ñoña huorten. E'ñe huortot tso'pa' allot orrtoña Parets po'millañoñeñer. ³¹ Ñeñt entos Moiséspa' atet ot: "¿Esté' huortetsña tarro?" E'ñe çhapatsa allame'tets o'ch enteña'pa' o' e'man ñoñets. Partsepa't eñets, atet och: ³² "Napa' ñeñten Po'yomporer pen ama't patañneshañ ñeñtara Abraham ñaña Isaac ñaña Jacob." Moiséspa' çha yoren. Puenchañoñpa' ama cohuan huorte'. ³³ Yomporña' atet otererr: "Puencha'na'teñoñpa' perrote't pesapat tarro'mar all patenpa' ñeñtapa'cho' nanac Parets tarro'mar allotsenen na." ³⁴ O' alla otererr Yompor: "Napa' nenteñ atto mueroçhtatennanet ñeñt nechemeresha' nepen ñeñtara israelena'tar. Napa' ne'muenanet atet yahuanrrortenet. Ñeñto'mañña te'pa' o' nohuapa o'ch na'qeshpatanet. Te'ñapa' o'ch nemñañ pa' Egipto." Añpa' ñeñta atet otan Yompor Moisés.

³⁵ Añña Yompor po'millañoñeñer ñeñt orrtetsa all huorten tsachmopa' ñeñtña eñotate' Moisés atet muenen Yompor. Ñeñto'mar yeñoteñ Yomporpa' ahuo't llesensan Moisés o' alla mueñer pamo'tseshesho ñeñtcha' añcha'tarettatsa ñocpuet ñaña ñeñtcha' a'qeshpatahuet allot amueroçhtatarettete't. Añ ñeñtara Moisés ñeñt ama pocteye' ento ahuaña pamo'ts ñeñt otet ahuaña: "Esesha'huañaca' penene' pa' añcha'taret arr yocop. Esesha'huañaca' potene' o'ch pa'tsrre'moçhta arr." ³⁶ Añ ñeñtara Moisés ñeñt anerrahuet Egiptot. Ñeñtara Moiséspa' orrtatanet ñeñt ama puentareto all Egipto. Ñaña sa'pot ñeñt Tsasasen all orrtatanet ñeñt ama puentareto, atto eñotatanet añmapa' ñeñt atet pena Parets. Ñaña all chopeñe'chen amarato'mar pa'tatsoch çharra' char Moiséspa' all orrtatyesanet ñeñt ama puentareto. Añpa' ñeñt eñotatanet atet penaña Parets. ³⁷ Añ ñeñtara Moisés ahuañpa' o' otan israelnesha' atet: "Yomporpa' orrtaterrnascha' puesheñarr ñeñtcha' a'mterre' Parets po'ñoñ, ñeñtara ñeñt e'ñe samo'ts sepen e'ñech attecma orrtaterr e'ñe atet orrtatenen namã. Ñeñtcha'ña çhocma se'mñoterrña sa." ³⁸ Ama't allempo yatañneshañ chopeñe'çhete't amaratareropa' añña Moisés allotseneta parro ama't allpa' çhocmach apçhete't Yomporcop. Ñapa' allotsenaspeno Sinaíño

allempto orrtoña Yompor po'millañoñeñer ñeññ eñorana'taya ñaña o' yeçhach ñoñets alloch e'ñe yocrra Partsocop. Ñeññña ñoñets allempto puerrerra Moisés aspentotpa' o' yeçhatuerran ñaña pamo'tsesha'.

³⁹ 'Tarraña ama't atet pe't Moiséspa' yatañneshañpa' ama muenete'te o'ch ame'ñyet Moisés. Ama eseshaye' pocteye' entaye'te. E'ñe pueyoçhretopa' atarro' muenete't o'ch alla puerreret Egipto. ⁴⁰ Ama't allempto aspeno'tsen Moiséspa' yatañneshañpa' atet otoñet pa'mo'nasheñ Aarón: "Te'pa' o'ch peyeçhcatonay ñeññcha' yeyoser yeperr ñeññcha' yanerre' alla Egipto. Añ Moisés ñeññ yanmue' Egiptotpa' yapa' ama yeñoteñe, ta', ¿errate' o' ahua'?" ⁴¹ Allempoñapa' o' yeçhcatanet ñeññ atet ñerra'mrrate' añ ayeçhcataret oro. O' muetset carrnero o' neññañeta' e'ñe ñesho. Nanac cohuen entet ñeññ yeçhcatet e'ñe potot. ⁴² Allempoña Yomporpa' o' a'ypo'ña'nmanet, o' muenatanet attoch muechatsetet ñeññ yeçhoyo'tamñene' ama't arorr ñaña ranto. O' pet atet quellquë't ñeññ a'mtaye't Yompor po'ñoñ ahua't. Añmapa' ñeññ quellquë't ahua't, atet ñerra'm Yompor otets:

Napa' o'ch notas israelena'tarneshacha', ama't o' semtsa carrnero, amapa' huaquësh, tarraña ama nocpaye' semtso, ñeññpa' ama neshoye' sehuapache. Ama't ora añ pa'tatsoch çharra' char all sechopeñe'chen amaratarero atet es sepa'yen.

⁴³ Añ seyomporer sepen po'poñ, ñeññ ayeçhcataret ñeññ soten allo' yeçhena seyoser ñeññ sesochen Moloc. Amapa' atet ñerra'm ayeçhcataret rantoma't ñeññ soten añmapa' seyosro' ñeññ sesochen ñaña Refán. Shonte' ayeçhcatareteçhno ñeññ seconcorpana'tena. Ñeñño'marña te'pa' o'ch nemñas nanac allapa', all Babilonio. Añpa' allohua ñeññ atet quellquë't ahua't ñeññ a'mtaye't Yompor po'ñoñ.

⁴⁴ O' alla oterraneterr Esteban, atet ot:

—Ahua't yatañneshañpa' allempto chopeñe'chete't amaratareropa' anmuete't pocoll shetamtsopo' allecma apçhete't Yomporecop. O'ponopa' all nete't mapuettall allo' aquellcare't ñoñets ñeññ poctetsa Yomporecop. Añ pocoll shetamtsopo' Moiséspa' ña yeçhcataye't e'ñe atet oche't Yompor po'millañoñeñer e'ñe atet gache't Yompor.

⁴⁵ Allempo rromanom Moisés puechope'chpayopa' o' na'nmet Josué ñeññcha' anmue' yatañneshañ. Apa'nmet ñaña shetamtsopo' ñeññña' çhapachet allo'tseno' pats ñeññ otanete't Yompor ahua'toteñ o'ch apanet. Po'poñ acheñenesha' ñeññ yeçheta allpa' Yomporpa' o' mueño'tuerranet attoch yatañneshañpa' o'ch yeçha'huerret all. Allempopa' o' çapatet all shetamtsopo' allecma apçhenet Yomporecop. Shetamtsopahuopa' allecma apçhete't tarremphua allempto orrta David. ⁴⁶ Allempo orrta Davidpa' ñapa' e'ñe cohuen enteñ Yompor. Ñaña'pa' o' enaman Yompor pocte'te' enteñ o'ch yeçhcaton pa'paquëll ñeññ e'ñe cohuen echarr. Mueneñ o'ch yeçhcatan Yompor pa'paquëll, ñeññara Po'yomporer pe't ñaña pa'tañ Jacoboñ. ⁴⁷ Tarraña ama't mueneñeñ ñapa' Yomporpa' ama mueno. Añña muenatoñ puechemer Salomón, ñach tomate' pa'paquëll.

⁴⁸ Tarraña Ñeññ nanac Paretspa' ama yeçheno pocollo ñeññ yeyeçhcaten ya, arromñatey. Ama't atet ote't ñeññ a'mtaye't Yompor po'ñoñ, atet ñerra'm Yompor eñets, atet oten:

⁴⁹ Napa' nanac Partson. Napa' nenten enet atet ñerra'm neconañ, patsña'pa' nenteñ atet ñerra'm allcha' nenen netac. Errotenohuachñaca' seyeçhcatonña pocoll allcha' neyçha. Ama nepallteno allcha' neyçha, atet oten Yompor.

⁵⁰ Napa' nehuamenco't neyeçhcatua ora allohuen ñeññ sentyen. Añpa' allohua atet ot Yompor.

⁵¹ Alla oterraneterr Esteban:

—Sapa' nanac se'charrtena, seyoçhropa' ama soçtape'cheno atet ñerra'm Yomporena'tares. Ama semno o'ch se'mñotoñ Yompor po'ñoñ. Chocma satpare'teññañ Parets Puecamquëñ. Atet pe't satañneshañ ahua't te'pa' atetçho' sepene samña.

⁵² Ama't allohuen ñeññ a'mtaye't Yompor po'ñoñ ahua't satañneshañña'pa' çha

mueröchtatyesanete't. Ama't ahuat allempo ama orrtena' Jesús'pa' ñeñt a'po'taye't atto esempohuañen o'ch huapa Cristo ñeñt e'ñe pocte' es pets, ñeñtpa'cho'ña satañneshañpa' cha muetse. Te'pa'cho'ña añ Cristo ñeñt e'ñe pocte' es petspa' ahuo' sepom samña attoch semtsach.

⁵³ Alla oterraneterr Esteban:

—Ama't Parets po'millañoñeñer ñeñt seño'tate' ñeñt poctetsa Yomporecop sañapa' satpare'toñ Yompor po'ñoñ. Añmapa' allohua ñeñt atet serrpare'tatanet Esteban.

Allempo muetset Esteban

⁵⁴ Allempoña ñeñta e'mhuet atet ot Estebanpa' nanac atsrre'matanet. Pa'tsrre'mueño'tetpa' cha rraso'tyeset pa's. ⁵⁵ Allempo Estebanpa' e'ñe chorreña Parets Puecamquëñ. Ñaña'pa' o' cohua' enonet, allña'pa' all entan Yompor po'cohuenña. Entan Jesús e'ñe po'partsoteño't all ten Pompor po'cohuenrot. ⁵⁶ Allempoñapa' oterrer Esteban:

—Napa' o' nent enet atoraret. O' nent ñaña allo'tsen Ñeñt Acheñetosets, po'partsoteño'tpa' all ten Parets po'cohuenrot.

⁵⁷ Acheñenesha'ña pa'tsrre'mueño'tetpa' rranare'tet. Puerranare'teño'tetpa' mopaqueta'tyeset, o' matrra'tet ñesho attoch o'ch rromuet. ⁵⁸ O' rromuetpa' o' anmet a'yenet all ama eñalle pocoll allcha' rrolle'chet. Ñeñtcha' rrolle'te'pa' o' rrorra'tyeset pa'shtam, o' na'yaset e'ñe allo'tsen puesheñarr yacma ñeñt hupueshameñ ñeñt pa'so'cheñ Saulo.

⁵⁹ Allempoñapa' rrolle'chet. Rrolle'chetpa' Estebanña'pa' o' ma'yochapa', atet ot:

—Nepartseshare Jesús, pagaponcha' necamquëñ.

⁶⁰ Allempoñapa' concorpa. Concorpapa' eñora huomenc, atet ot:

—Amach Nepartseshare petsa'tatatstaneto.

Allempoñapa' ñeñta otuapa' o' muechecha, o' rroma.

8

Allempo Saulopa' nanac mueneñ ahuo'ch a'cllatuan ñeñt ame'ñetsa

¹⁻² Allempopa' añña Saulopa'* e'ñe pocte' eñch muetsetepa' Esteban.

Añña puesheña'tets ñeñt nanac ame'ñenaya Yomporpa' puellquëñeshetpa' o' huapuet, o'ch eñeta' arromña't attoch pampueñeta'. Nanac ya'na'teñet Estebañañ. Allempoteñ nanac mueröchtachete't ñeñt pame'ñeño'tet Cristopa' ap'chete't Jerusaléño. Ñeñto'marña shonte' acheñenesha' ñeñt yetrra'tatsa po'poñ añetso'mar. O' par-ratse'tuet allemeña—Judeo'mar ñaña Samario'mar. Tarraña añña Jesús puellsen-sarnesha'pa' ama esesha' yetatso ama't puesheñarra. ³ Sauloñapa' nanac mueneñ o'ch a'cllatuan allohuen ñeñt ame'ñetsa. O'ch be'tosamñpsanet pa'pacletopa' o'ch rromanet, o'chcho' chetare'tnerranet. O'chcho' be'tosuerrerr ñaña po'ppauño'pa' o'chcho' rroma'huerraneterr, o'chcho' chetare'tnerraneterr, o'ch anmanet cárcelo allcha' abe'tatuanet. Ama't coyanesha'chno e'ñe abe'tatuanete't cárcelo.

Atto Felipepa' serrpare'tatanete't Samario

⁴ Añña ñeñt yetrra'tatsa Jerusaléño'tpa' all chapyeset, erra ta'yenetpa' allcha' serrpare'teññañet Yompor po'ñoñ. ⁵ Atet ñerra'm Felipe. Ñapa' o' ahuo', o' chap anetso ñeñt pa'so'cheñ Samaria. Allña'pa' all serrpare'tatosanet añepa't Cristotats ñeñtara Jesús. ⁶ Felipepa' orrtatanet ñeñt ama puentareto. Atet eñchetpa' o' eñochet añpa' po'ño'ch Parets po'huamenc orrtaten. Ñeñto'marña allohuen acheñenesha'pa' e'mñoteñet e'ñe cohuen atet otanet. ⁷ Shonte' acheñ ñeñt chorra'yese't oneñet allempopa' e'ñe quechpatyesueretña oneñet atto chorrenana acheñ. Allempo quechpatyesueret oneñetñapa' o'ch rranare'tnoma. Ñaña shonte' acheñ ñeñt echarreyestse'tpa' o'

* **8:1-2** Saulopa' ñeñtara Pablo.

corra'huerret. Ama't ñeñt̃ checare'payestse'tpa' o' a'crratyesuahuerranet Felipe.
⁸ Ñeñto'marña nanac coshyete't Samario.

⁹ Allempopa' allo'tsen puesheñarr ñeñt̃ achyo'tañ ahuaña ñeñt̃pa' añ pa'so'cheñ Simón. Allohuenet samario'marnesha' ama't ahuatoteñpa' cohuanrrortoñete't atet orrtate't ñeñt̃ ama puentareto. Ñapa' o'ch shequēnanet. Ñetñapa' čha otenapuetañ ñapa' nanacte' po'ñoč ahuañenat, atet oten ña. ¹⁰ Allohuen acheñpa' e'mñochete't atet ote't ahuaña—ama't ñeñt̃ añcha'tarettetsa ñaña ñeñt̃ ama esoshe'mayaye acheñ. Ochete't:

—Po'ñoč añ acheñpa' ñeñt̃ Partsocoptartetsa.

¹¹ Ñeñto'marña acheñenesha'pa' nanac ame'ñyete't. Ama't ahuatoteñ cohuanrrortoñete't atet orrtate't ñeñt̃ ama puentareto. ¹² Tarraña allempo serrpare'tatanet Felipe cohuen ñoñets o' ame'ñatanet allohuen—yacmaneshačhno ñaña allohuenet coy- aneshohuen. Serrpare'tatanet atet penaña Yompor po'cohuenña ñeñt̃ atto atarr ay- ochreshattena ña, ñaña atet pena Jesús ñeñt̃ Cristotats. O' ame'ñatuanet allempoñapa' apatarettet Yomporecop. ¹³ Ama't achyo'tañ ñeñt̃ sochetsa Simónpa' o' ame'ñerra ñaña. Ñapa'čo'ña apataretta Yomporecop. Apatarettetuapa' allempoteñña' yemterrana Felipe errohuanen čhopeñe'chen. All orrtatanet Felipe ñeñt̃ ama puentareto attoch eñochet añmapa' ñeñt̃ po'ñoč huetsa Partseshot. Simónña'pa' o'ch entan atetpa' atetcha' ot:

—Errotenotuañaca' atet penate'.

¹⁴ Allempoña Jesús puellsensarnesha'pa' e'mare'chet Jerusaléno't shonte' samario'marnesha' ame'ñeññañet Yompor po'ñoñpa' o' mueñet Pedro ñaña Juan all Samario. ¹⁵ Allempo čhap Pedro ñaña Juan Samariopa' ma'yocham'psosyet samario'marnesha' ñeñt̃ ame'ñetsa. Enamet Yompor chorratanetepa' Parets Puecamquēñ. ¹⁶ Tarro'mar allempopa' ama chorrenaneta' Parets Puecamquēñ. O'ña apatarettetuet pame'ñeñotet Yepartseshar Jesús. ¹⁷ Allempoña Pedro ñaña Juanpa' o' net pot ñesheto ñeñt̃ ame'ñetsa. Nohuet pot ñeshetopa' Yomporña Puecamquēñpa' ahuepa't chorraret.

¹⁸⁻¹⁹ Añña Simón ñeñt̃ achyo'tañtetsa ahuaña o' čhapaña pueyočhropa' atet ot:

—Añecpuepa't nenet pot attoch chorraret Parets Puecamquēñ.

Allempoñapa' atet otanet Simón:

—Llesenscha' nomporneshacha' o'ch nenanet naña not attoch chorraret Parets Puecamquēñ. O'ch napas quelle attoch sapuen llesens.

²⁰ Pedroñapa' atet och:

—Pečllayorpa' chenquēpa' alla, allotpa' pechenquēpa' p̃aña tarro'mar p̃apa' p̃otenapañ o'ch perañoña Parets Puecamquēñ. Ñeñt̃pa' amach errotenot petsa'cho. Añña Yomporpa' o'ch apuey e'ñe at̃a. ²¹ Ama pocteyaye o'ch p̃agap p̃a llesens tarro'mar Yomporpa' ama pocteye' entennape peyočher. ²² Te'pa' aña poctetsa o'ch p̃octape'cherr ello cohuen, o'ch pequečhpurr añ sosya'tsañ o'ch penamuer Yompor peretneñets. Ñato' Yomporpa' o'ch peretnerrnañ atto p̃octape'chen sosya'tsañ.

²³ Pedropa' alla otererr:

—Napa' neñoteneñ nanac sosey p̃octape'chen peyočhro, čha p̃ottena atet ñerra'm po'chñarpa' huanquēneñ.

²⁴ Simónña'pa' alla otererr:

—O'ch sanamon Yompor nocop attoch amach es netantoyo atet sotenen. Añpa' allohua atet pena Simón.

²⁵ Pedro ñaña Juanpa' nanac a'poñoñet Yompor po'ñoñ all Samario. Ser- rpare'tueneta'pa' alla ahuanerret Jerusaléno. All oñenet samario'marpa' ñeñt̃ yečhetsa toño'marpa' e'ñe acopoteñ serrpare'tatyesuaneret.

Allempo Felipepa' ame'ñatana etiopo'marnesha'

²⁶ Allempoña añ Felipepa' orrtoña Yompor po'millañoñeñer atet otos:

—O'ch chapmoch poctopa' o'ch ahuep a'yo, o'ch pechap amaraño allo'tsen toñ ñeñt sets Jerusaléno' attoch yechap anetso añ pa'so'cheñ Gaza.

²⁷ Ñaña'pa' atet och Yompor po'millañoñeñerpa' atetcho' pa. Allempoñapa' o' ahuo'. O' chap all toño ñeñt sets Gazopa' o' entosan puesheñarr etiopo'marnesha'. Añ etiopo'marnesha' ñeñtpa' ñeñt añcha'taret añ po'taruas pen o'ch cohuanmpenan ora allpon quelle ñeñt gobiernocop alla pa'nyo. Pa'neypa' añ pa'so'cheñ Etiopía. Ñeñt nanac añcha'tarettetsa all pa'nyopa' añ pa'so'cheñ Candace ñeñtpa' coyanesha'. Añ yacma ñeñt entos Felipepa' ñeñtpa' acaparet acheñ. Añña etiopo'marnesha'pa' errte' asuena' Jerusaléno' allempo entos Felipe. Tarro'mar ta all o'ch ma'yochenana' Yompor.

²⁸ Allempoña o' alla puerrerra pa'nyo. Ñapa' alla anen po'carro. Ñeñtña carropa' cahualla matatene'. All anenpa' all lleyen an Yompor po'ñoñ ñeñtara ñoñets lleyen ñeñt quellquë't ahua't Isaías ñeñt a'mtaye't Yompor po'ñoñ. ²⁹ Añña Parets Puecamquëñpa' eñotatan Felipe, ñeñtña ote':

—O'ch penteña' ñeñt anets tarro e'ñe all carro.

³⁰ Felipeñapa' o' mata. Matapa' chap allame'tetspa' o' e'mosan cho' lleyen an Yompor po'ñoñ ñeñtara ñoñets ñeñt quellquë't Isaías ñeñt a'mtaye't Yompor po'ñoñ ahua't. E'mos Felipepa' atet otos:

—¿Eñotochena't penteñ ñeñt atet oten ñeñt pelleyen?

³¹ Ñaña'pa' atet och:

—Errotenohuate'ca'ye neñochña' amaca'ye eñalle ñeñtcha' neñotate'. Ñato' o'ch pa'tap pa' o'ch yanorr parro.

³² O' a'tap Felipepa' o' cohuos all lleyen. Añ lleyen Yompor po'ñoño ñeñtpa' añ ñoñets ñeñt quellquë't Isaías:

Atetcha' pa'ña atet ñerra'm carrnero. Ñehua, carrneropa' o'ch yanem' allcha' yemtsepa' amach ama'toçhto. Amapa' ñerra'm yetsorroñ pue'chpa' amach ama'toçhto. Atetcha' pa'ña, amach es oto.

³³ Nanac mueroçhtachet, ama pocteye' ñeñt atet poñet. Ama erroteno o'ch yotua ora allohuen ñeñt atet sosey pa'yes pamo'tsna'tarnesha'. O' muetsetpa', o'huañ corra añe patsro. Añpa' allohua atet quellquë't Isaías.

³⁴ Allempoña ñeñt etiopo'marnesha'pa' o' a'p'to'ch Felipe:

—Ñehua, p'toten, ¿eseshocpa'tña eñen arr Isaías, ñato' ñocpa'te' amapa' po'psheññecopte'?

³⁵ Allempoña Felipepa' o' serrpare'tach cohuen ñoñets atet pena Jesús. Eñotach añ ñeñtara Isaías po'ñoñpa' eñen Jesúsocop. Allempoñapa' o' eñotach ñaña po'poñ Yompor po'ñoñ ñeñtara ñeñt atet pena Jesús. ³⁶ Allña allenet matampenetpa' o' entoset oñ, atet ot etiopo'marnesha':

—Ta'm, ¿pocte'te' te' o'ch napataretta Partsocop?

³⁷ Felipeñapa' atet och:

—Ñehua, ñerra'm po'ñoçh pame'ñena peyoçhrocmañenpa' e'ñe pocte' o'ch papataretta Partsocop.

Etiopo'marnesha'ñapa' atet ot:

—Napa' po'ñoçh name'ñena. Te'pa' neñoteñ Jesucristo ñeñtpa' ñeñt Yompor Puechemer.

³⁸ Allempoñapa' o' tomatoset po'carro sohua'rrtosetpa' o' ahuanmuet oño. Allña apatos Felipe. ³⁹ O' cha'nerret oño'tpa' Yompor Puecamquëñña'pa' o' anman Felipe a'yo. Allña'pa' machayota ma'nata alla. Ñeñt etiopo'marnesha'pa' ama enterrano Felipe. Allempopa' o' ahuer etiopo'marnesha' e'ñe pocsheñesha'. Añpa' allohua ñeñt atet pa' etiopo'marnesha'. ⁴⁰ All anetso Azotopa' all orrterraña Felipe. Allña'pa'

serrpare'tatosanet cohuen ñoñets alloch yequeshpa. Allempoñapa' o' ahuo' ñaña anetso Cesareo, nanac serrpare'tyesnom ora anetso'mar all oñomyes.

9

*Allempo Saulopa' cotape'cherr ello cohuen Yomporecop
(Hch. 22.6-16; 26.12-18)*

¹ Allempoña Saulopa' nanac e'moñe'tenan ñeñt ame'ñenaya Yepartseshar Jesús. Pa'tsrre'mueño'pa' atet ot:

—Napa' o'ch na'cclatueña' ñeñt ame'ñenaya Jesús.

Ñeñto'marña o' ahuo' allo'tsen ñeñt nanac añcha'taret cornesha' e'ñe all Jerusaléño.

² Chap allo'tsenpa' o' enamos orden attoch a'cclatuan ñeñt ame'ñetsa. O' enam orden ñeñt'cha' anom a'yo anetso Damasco allecma ap'chenet judionesha' po'prahuo. O'ch chap allpa' o'ch aposan ñeñt añcha'tarettetsa puerahuo. Attoch apet all llesens attoch rromanatan acheñ ñeñt cotene' Jesús pocta'ña. Ama't coyanesha'chno ñaña yacmanesha'chno o'ch rromanatanet o'ch huancatanet o'ch anmare'tterret Jerusaléño. Ate't cotape'chña Saulo. ³ Allempoña agapuan orden allempoñapa' o' ahuo'. O' chap allame'tets Damascopa' machayo'ta ñeñt nanac poptetsa entotpa' o' choyo'tam'pes e'ñe ñesho. ⁴ O' choyo'tam'pespa' ñaña'pa' alla rromopra patso. Chap patsopa' e'man ñoñets ñeñt atet oten:

—Esomare't Saule pemuero'chtatennanña ñeñt name'ñenaya.

⁵ Sauloñapa' atet ot:

—¿Eshape't Ayochreshate eñets?

Ñeñt eñetspa' alla otererr:

—Napa' ñeñten Jesús, ñeñtara ñeñten pemuero'chtaten. Añpa' pa'ñeña muero'chtatetsa. Tarro'mar cha pottena ñerra'mrrate' ashen ñeñt e'ñe patpare'teño' ñaña'ñachña atserrpatetsa.

⁶ Sauloñapa' po'yorño'pa' cha pa'shmuena allempoñapa' atet ot:

—Partseshacha' te'pa' ¿erro'tena't penmen ñeñt'cha' atet nepena?

Partsesha'ña Jesús'pa' atet otererr:

—Te'ñapa' o'ch petanta, ahuep Damasco. Allcha'ña otapet ñeñt'cha' atet pepa.

⁷ Ñeñt parro epuet sen Saulo ñetñapa' atta cohuanrrortenet. Pocuanrrorteño'otetpa' ama erro't oteto. Ñetpa'cho'ña e'muet ñeñt e'morrtatsa tarraña ama es enteto.

⁸ Allempoña Saulopa' o' tanta. Tantapa' o'ch cohua'yepa' ama ento. Ñeñto'marña atta echa'nmet pototpa' o' anmet Damasco. ⁹ O' chap Damascopa' ma'pamuet Sauloñapa' ama enteno, ñaña ama es rreno, ñaña ama es orreno, ama't coñe'ta.

¹⁰ Damascoñapa' allo'tsen puesheñarr ñeñt nanac ame'ñenaya Yepartseshar Jesús. Ñaña'pa' añ pa'so'cheñ Ananías. Añña Ananías'pa' Yepartseshar Jesús orro'tña atet ñerra'm pue'chopoñot o' chore'chpa' atet och:

—¡Ananías!

Ananíasña ana'ppa', atet ot:

—Napa' Nepartseshare añen.

¹¹ Yepartsesharñapa' alla otererr:

—O'ch notap' atet'cha' pepa. O'ch ahuep allo'tsen toñ ñeñt nanac pacharr allcha' pentos Judas pa'paquell. Pechap all pa'pac'llopa' o'ch pa'p'to'tos erro'tsente'ña ñeñt Saulo ñeñt tarso'marnesha'.

Alla otererr Yepartseshar:

—O'ch notap' ñaña, añ ñeñtara Saulo e'ñe te'pa' allo'tsen ma'yochetsa. ¹² Napa' o' norrtatuon ñeñt o' entua neshot. O' entuan atet ñerra'mrrate' acheñ añ pa'so'cheñ Ananías huapatsa. O' huapa ñeshopa' o' nosan pot ñesho o'ch alla cohuer.

¹³ Ananíasñapa' alla anapuererr:

—Partseshacha' napa' o' ne'mare'ch atet o' p̄a añ ñeñtara Saulo. Shonte' acheñ o' e'mare'tatnet atto ñapa' nanac mueroçhtatenan ñeñt̄ p̄ame'ñenaya Jerusaléno. ¹⁴ Te'pa' ñapa' echenan orden o'ch huancatyese y allohueney ñeñt̄ey p̄ame'ñenaya, o'ch anmatey cárcelo. Ñeñt̄ pa'm̄cha'tareternesha' pen allohuen judionesha' po'cornanesharpa' o' ap̄et Saulo añ orden.

¹⁵ Yepartsesharñapa' alla otererr:

—Tarraña ama't atet te'pa' o'ch ahuep̄ all, ñeñt̄ atet o' notuaḡ. Te'pa' o' nene' Saulo ñeñt̄cha' na'potene' neñoñ am̄cha'taretneshesho. Ama't po'poñeçhno acheñeneshopa' ñapa' a'potoncha' neñoñ. Ñaña ama't israelena'tarneshopa' o'ch a'poton neñoñ. ¹⁶ Ñaña o'ch neñotach Saulo ñapa' o'ch mueroçhta nanac nocop, tarro'mar te'pa' o'ch ame'ña'na na. Añpa' allohua ñeñt̄ atet serrpare't Yepartseshar epuet Ananías.

¹⁷ Allempoñapa' o' ahuo' Ananías o'ch entenana' Saulo. Chap allpa' o' be'tosos pocollo allo'tsen Saulo. O' ponmosyapa' o' nosan pot e'ñe ñesho. Nohuan pot e'ñe ñeshopa' otosan Saulo, atet och:

—Masheñe Saule, Yepartseshar Jesús ñeñt̄ca'ye p̄orrtoya allempo p̄oñen toño. Te'pa' añ ñeñt̄ara Yepartseshar Jesús o' mueñan na o'ch non attoch alla pecuerr, ñaña attoch chorraḡa Parets Puecamquēñ.

¹⁸ Ñeñt̄a otuapa' allorocma rrata'nom pa'clloyot ñeñt̄ atet ñerra'mrrate' es pa'tall, o' alla cohuerr e'ñe cohuen. Alla cohuerr e'ñe cohuenpa' allempoñapa' apatare'tta Yomporecop. ¹⁹ O' apatare'tetuapa' o' rrallme'cherr. O' alla çherr po'huamenc. Allempoñapa' allponmaterrerr alla Damascopa' o' serrpare't epuet ñeñt̄ ame'ñetsa.

Allempo Saulopa' e'ñe ñenm̄at serrpare'terr all Damasco

²⁰ Ñaña Saulopa' çhocma sen judionesha' po'prahuo allcha' serrpare'tatenanet atet pena Jesús. Otanet añ Jesús̄pa' po'ñoch ñeñt̄pa' ñeñt̄ña Parets Puechemer. ²¹ Allohuenet ñeñt̄ e'muene'pa' otyeset:

—Ta', erro'tenuañaca'yeña te' ñeñt̄ yacmar. Añmapa' ñeñt̄ca'ye mueroçhtataye't̄ ahuaña ñeñt̄ ame'ñenaya Jesús all Jerusaléno. Ñeñto'marña te'pa' huena arr, mueneñ o'ch rromanatenana' ñeñt̄ ame'ñetsa o'ch anmare'ttet cornaneshesho ñeñt̄ pa'm̄cha'tareternesha' pen allohuen judionesha' po'cornaneshar.

²² Saulopa' allo'na sen huomenc p̄a'nmue' pueyoçher attoch serrpare'tan Yompor po'ñoñ. Nanac serrpare'tatanet atto po'ñoch Jesús̄pa' ñeñt̄ara Cristotats. Ama't judionesha' ñeñt̄ yeçhetsa Damascopa' ama erro'teno anapeto.

Allempo Saulopa' a'yetater judionesha'

²³ Atteña o' allponmatpa' añña judionesha'pa' o'pachet o'ch muetset. ²⁴ Saulopa' e'mare'ch o' o'pachet, o'ch cohuet attoch o'ch muetset. Arr cohuet allotecma be'tenet all aconçha'tam̄psare't ora anets. Ellapenete't̄ cohuname'tet ñaña arepenete't̄. ²⁵ Tarraña ñeñt̄ pueyoçresha' Saulopa' o' anmet tsapo allo'tsen pocoll e'ñe all aconçha'tam̄psare't anets, allñapa' eñall ventana allot a'suatañperet atarret cañtroḡ.

Allempo Saulopa' puerrerra alla Jerusaléno

²⁶ Allempoñapa' ahuer Jerusalem. Cherr Jerusaléno'pa' atarr mueneñ o'ch entenana' ñeñt̄ ame'ñetsa. Ñeñt̄ña ame'ñetsapa' ama mueneto o'ch entenaneta' tarro'mar nanac mecha'teñet, otenapuetañ atto'te' shequēnanet o' ame'ña.

²⁷ Añña puesheñarr ñeñt̄ pa'so'cheñ Bernabépa' ñaña'pa' o' anem̄ allo'tsen Jesús puellsensarnesha', o' otosanet:

—Añ Saulopa' o' entan Yepartseshar Jesús allempo sen Damasconet. Yepartse-sharepa't epuet serrpare't. Ñaña'pa' ama mecha'to ñeñto'mar atarr serrpare't Damasco atet pena Jesús.

²⁸ Allempoteñña' e'ñe pocte' eñchet, allempoñapa' o' e'ñe parrocmatuet. Ñapa' ama mecha'teno ama't mamesha. Atarr nanac serrpare'tan Jesús po'ñoñ. ²⁹ Chocmach serrpare'ten epuet judionesha' ñeñt e'muene' griegačpa' tarraña amach pocteye' enteñeto. Allempoñapa' o'pachet ñaña all o'ch muetset. ³⁰ Allempoña ñeñt parro ame'ñenetpa' anmet Saulo po'poñ anetso Cesareo. Alločpa' o' mueñet ñaña anetso Tarso.

Atto Pedropa' orrtatan Yompor po'partsoña all oteñet Lido

³¹ Atteñapa' o' muetsoñeñtuerra ñeñt amueročhtatañ. All Judeo ñaña Galileo ñaña Samariopa' o'huañ amueročhtatareñtet atet pete't ahuaña. Allohuen ñeñt ame'ñetsa allo'na senet huomenc pa'nmuet pueyočhret. Atteñapa' o' shonta'nma ñeñt ame'ñetsa. Pame'ñeñočetpa' allo'na senet mecha'na'tnomuet Yompor. Ñaña allo'na Parets Puecamquēñpa' nanac coshatenanet. ³² Atteña Pedropa' chocmach ta'yena emo'tyese' ñeñt ame'ñetsa. Parrochpa' o' čhap allo'tsen ñeñt ame'ñetsa all anetso pa'so'cheñ Lida. ³³ Allña' entosan puesheñarr yacma añ pa'so'cheñ Eneas. Ñapa' ahuačoteñ echartena alla pa'na o' posoc char. ³⁴ O' entos Pedropa' atet otos:

—O'ch Eneas notañ, Jesucristopa' o'ch a'crraterreñ. Te'ñapa' o'ch petanta o'ch pañño'ten pemue'.

Allorocma correna, o' tantena. ³⁵ Allohuen ñeñt yečheta Lido ñaña Sarónopa' allempoña eñchetpa' čha puesuerret ñeñt ahuač počtaññet o' ame'ñerrñañet Yompor po'ñoñ.

Allempo Pedropa' tantaterran Tabita allempo rroma

³⁶ Eñall puesheñarr coyanesha' ñeñt ame'ñetsa añ pa'so'cheñ Tabita, añ ñeñtara so'chñets Tabita ñeñt otenet griegačo Dorcas. Ñapa' arr yečhena anetso ñeñt pa'so'cheñ Jope e'ñe alla allame'tets Lido. Ñaña' nanac amueraña, chocmach yenpuenan ñeñt huocchañetyets. ³⁷ Allempopa' o' atsna't. Atsna'tpa' atteñapa' o' rroma. Rromapa' pamo'tsesha'ñapa' o' apach atet yečhenet ñet. Apatuetpa' o' pañet enonet all tama a'yohuen bač. ³⁸ Allempoña ñeñt ame'ñetsa allpa' o' e'mare'chet Pedro allame'ttso'tsena all anets Lido. O' e'mare'chetpa' o' mueñet epsheña yacma attoch oteñeta' onepa' all allorocma.

Allempoña čhapuet Pedreshopa' ³⁹ Pedroñapa' o' co'terranet. Chap allpa' o' anmet all cuarto eno allo'tsen arromñañ. All tomčhen shonte' rretorrnanesha' ñeñt llecanrrortetsa. Allña' all gatanna'tyenet ñeñt chorra'yenet ñeñt sepechyesanet ahuaña Tabitañ. ⁴⁰ Pedroñapa' mueñuanet allohuenet a'yenet. O' mueñuanet a'yenetpa' o' concorposa, o' ma'yocha. Ma'yochuapa' o' puetallsa arromñačeshonetpa' atet och:

—O'ch Tabita notañ, petanterra.

Allempoñapa' acuerroche'. O' enterran Pedropa' čha anerrets. ⁴¹ Pedroñapa' cheter pototpa' echanter attoch terr. Allempoñapa' o' chore'terran ñeñt ame'ñetsa ñaña rretorrnaneshačhno. O' be'tosča'terretpa' o' gaterranet o' tanterra ñeñt rromats. ⁴² Allohuenet ñeñt yečheta all Jopopa' o' e'mare'chet atet pena Pedro. Ñeñto'marña shonte' ačeñ o' ame'ñeret Yepartseshar Jesús. ⁴³ Pedroñapa' alla a'pa atomat alla Jopo. O' a'pa all Simón pa'paclo. Ñeñt Simónpa' añ po'taruas pen o'ch a'cohuenetyesan pa'rrom.

10

Atet pa' capitán Cornelio epuet Pedro

¹ Eñall puesheñarr capitán, añ soche't Cornelio. Ñaña' allo'tsen anetso añ pa'so'cheñ Cesarea. Allña' ña mueñanatene' charroch čarra' guardianesha' ñeñt oteñet Guardia Italiana. ² Añña Cornelioñapa' nanac cohuen co'tape'che't Partsocop, ñaña nanac

mecha'na'teñ. Ama't ñeñt yeçhetsy e'ñe parro ñetpa'çho'ña cotape'chete't cohuen Partso-cop. Ñapa' nanac amueraña, shonte' es apa'yesane't ñeñt es palltats'e't. Ñaña çhocmach ma'yochenana Parets. ³ Atta yeçhena ama't ahua'otoeñ. Parrochpa' o' coya'nen atsne'pa' orrtoña ñeñt Yompor po'mllaño'eñer. Orrtoña atet ñerra'm pueçhopoño't, tarraña ama çho'e' çhopo'teñe. Tarraña o' orrtoña'pa' e'ñe cohuen eñch. O' huapapa' atet otos:

—¡Cornelio!

⁴ Ñaña'pa' puen'cha'naño'tpa' atta cohue', allotña'pa' atet ota'p:

—¿Eso'tña Partseshacha' pemnen?

Mellaño'eñeña'pa' alla otererr:

—Pema'yocheño't te'pa' o' yerpa'pa Yompor. E'ñe pocte' entenna'p atto es p'apa'yeñ ñeñt es palltats'e't. ⁵ Te'ña'pa' añ pocte' o'ch pemñe acheñ Jopo o'ch pagotach puecheñarr añ pa'so'cheñ Simón, ñeñtara oteñet Pedro. ⁶ Ñapa' all a'puena po'psheñeñ Simón pa'paclo. Te'pa' ñachña p'oterre' ñeñt'cha' atet peperra. Ñehua, ñeñt Simón all a'puena Pedro ñeñt'ca'ye a'cohuenetyene'ña pa'rrom. Pa'paquellpa' ontapo'tsen. Añpa' allohua atet ot Yompor po'mllaño'eñer.

⁷ Ñeñta otuapa' o' ahuer. Ahuerpa' Cornelioña'pa' çhore'tan epsheña ñeñt taru-asete e'ñe alla pocollo, çhore'tan ñaña puecheñarr po'solltarer ñeñt'pa' añ po'taruas penet attoch cohuan'peñet po'ca'ptánret. Añpa' ñeñt cohuen cotape'chets Partsocop ñaña. ⁸ Allo'tpa' o' serrpare'tatanet ora atto orrtoña Yompor po'mllaño'eñer. Ñeñta serrpare'tatuanetpa' o' mueñanet Jopo. Allempoña'pa' ahuanmuet. ⁹ Tsapa'tña'pa' o' çhampochet Jopo. O' çhampochetpa' Pedroña e'ñe alla pocolopa' o' a'tap eno allcha' ma'yochosa. Allempopa' çhampoch pocto. ¹⁰ O' çhampoch poctopa' cheporra Pedro. Atarro' mueneñeñ o'ch rra'pa' tarraña ama potena'ña rreñets. Alla cohuenpa' o' huapoña ñeñt atet ñerra'm çho' es çhopo'ten. ¹¹ Entoña'pa' o' entan ñeñt atet ñerra'm atarr shetamuets. Eno'tpa' çha sohuan'pesnena, a'çharam'psare't pa'tats po'top'ne'marot. Añña ñeñt a'çharam'psare'tpa' sohua'netse patsonet e'ñe ñeshone't. ¹² Allña shetamtso e'ñe o'ponopa' allo'tsa'yen shonte' pa'namen berroçhno, ama't po'poñ berroçhno ñeñt ama arrapoye' eñche'te judionesha'. Ñaña allo'tsa'yen pa'namen shechpeçhno ñaña pa'namen oteçhno. ¹³ O' çhap allame'tets ñesho, Pedroña'pa' e'man ñoñets, atet oten:

—Pedro o'ch pemtsa añ berr o'ch perre'.

¹⁴ Pedroña'pa' atet ot:

—Ama Nompocha', nerreñe. Napa' ama't ahua'tapa' ama nerrare ñeñt ama arrapahuoyaye atet yeyçhena ya ñeñt'ey judioneshay.

¹⁵ Allempoña'pa' o' alla otererr ñeñt eñets, atet ot:

—Ñeñt o' a'cohuentatua Yomporpa' p'apa' amach p'otatsto añmapa' ama cohuenayaye.

¹⁶ Añpa' e'ñe ma'pocha e'm'pa' allempoña'pa' o' alla a'terr enonet, o' alla chenquerra.

¹⁷ Allempoña'pa' Pedro'pa' nanac moñne'tacha, o' cotape'çhpa' atet ot:

—Esuañaca' otenenña ñeñt o' nentua.

Ñeñt nanac moñne'tenapa' allempocma çhap ñaña ñeñt mueñen Cornelio. Ñetpa' o' a'p'to'tnomuet errate' yeçhenaña Simón. Allempoña entoñet Simón pa'paquellpa', o' çhapuet allot be'tenetpa' ¹⁸ o' çhore'toset atet otoset:

—¿Arre't a'puenaña ñeñt soçhetsy Simón ñeñtara ñeñt otenet Pedro?

¹⁹ Pedroña'pa' e'ñe alla enopa' ama't orameñ moñne'tenana ñeñt o' entuapa' añña Parets Puecamquëña'pa' atet och:

—O' çhap ma'psheña acheñ ñeñt pe'nene'. ²⁰ Te'pa' o'ch pesuerra tayecma o'ch p'octerranet. Amach pem'cha'tatsto. Napa' na mueñenahuet atto huapuet arr. Añpa' atet ot Parets Puecamquëñ.

²¹ Ñeñta otuepa' Pedroña'pa' asuerroche' patso. O' çhap allo'tsen añ ma'psheña atet otapanet:

—Napa' naña ñeñten se'nen. ¿Esocpa'tña sehuena?

²² Ñetñapa' atet ochet:

—Yapa' añ yemñene' capitán Cornelio. Capitánpa' oten ñonepa'to'. Ñapa' orrtoña Parets po'mllañoñeñer atet och: “Pagotach Pedro onepa'. Ñaña pocte' o'ch pe'mñoch ñeñtcha' atet otap̄.” Atet och Parets po'mllañoñeñer. Ñeñto'marña yapa' o' yehuapa. Tarro'mar capitán Corneliopa' ñapa' e'ñe cohuen cotape'chen Partsocop ñaña nanac mecha'na'teñ. E'ñe cohuen enteñ allohuen judionesha'.

²³ Allempoña Pedropa' atet otapanet:

—Ñehua, sebe'tos allach sa'pa, tsapa'tachña ahuey parro.

Allñapa' alla moset, tsapa'tñapa' ahuanenet. Po'potantaña'cho'ña ñeñt ame'ñetsa e'ñe alla Jopopa' o' co'ta' huanmuet ñamet.

²⁴ Tsapa'tñapa' o' chapuet Cesareo. Cornelioñapa' alla cohueñan Pedro o'ch huapa. Ñapa' o' hua'ña'huan pamo'tsesha' ñaña po'potantañ ñeñt epuet yemtena. Ñetñapa' all cohueñet e'ñe parro. ²⁵ O' huapa Pedro. O' huapapa' Cornelioñapa' o' tantnoma attoch o'ch poctaḡ. O' concorposñaña o'ch ma'yochaḡya. ²⁶ Tarraña Pedroñapa' o' cheterpa' atet och:

—Petanterra, amach pema'yochatsetno. Napa'cho'ña arromña'fena.

²⁷ O' tanterrapa' serrpare'tatanna'tet mame'pa' allo'tñapa' o' be'tos'cha'tet pocollo. Allñapa' o' entosan shonte' acheñ ñeñt o' cha'cha't. ²⁸ Allempoña' otanet Pedro:

—Sapa' seño'teñ ya judioneshaypa' ama pocteye' yenteñe o'ch yeyemcha po'poñ acheñ ñeñt ama judioneshayaye. Tarro'mar yapa' atet yey'chena amach yeya'rrotatsche acheñ ñeñt ama judioneshayaye. Tarraña te' Yomporpa' o' ye'chatuan amach yentatsche po'psheñeñ atet ñerra'mrrate' ñeñt ama cohuenayaye. ²⁹ Ñeñto'marña te'pa' o' nohuapa arr tayecma allempo agotatenet. Te'ñapa' o'ch na'ḡto'taḡ ¿esocp'te' ḡpagotatenen?

³⁰ Allempoña' Cornelioñapa' atet ot:

—Ahuaña o' taya pa'tatsmat met, napa' alla nema'yochena, ñaña nema'yocheño't o' neque'chpa' nerrar mame'. Ñeñt attecma nepena allempocma nema'yochena nepacillo atet ñerra'm te' coya'nen atsne'. Allempopa' machayota orrtona puesheñarr yacma e'ñe allame'tets. Pa'shtampa' añ chorrena ñeñt nanac cohuen poptetsa. ³¹ Ñaña'pa' otosen: “Cornelio, pema'yocheño't te'pa' e'mueneḡ Yompor. E'ñe pocte' entennaḡ atto es ḡpapa'yeyñ ñeñt es palltetsa. Ñeñto'marña te'pa' o' yerpaḡa. ³² Te'ñapa' o'ch pemñe acheñ Jopo o'ch ḡpagotach puesheñarr ñeñt pa'so'cheñ Simón ñeñtara ñeñt otenet Pedro. Ñapa' alla a'puena po'psheñeñ Simón pa'pacillo. Ñach huapatsapa' ñapa' serrpare'tatoseḡcha'. Ñehua, ñeñt Simón all a'puena Pedro ñeñtca'ye a'cohuenetyene'ña pa'rrom. Pa'paquellpa' ontapo'tsen.” Añpa' allohua atet oten ñeñt norrtoya. ³³ Ñeñto'marña nagotatenep̄. Te'pa' e'ñe pocte' o' pehuapa. Te'pa' Yompor eñoteney ñeñtey arro'tsa'yeney yemneñ o'ch ye'mñotaḡ o'ch peserrpare'tatey errponte' Yompor ye'chateneḡ.

Allempo Pedropa' serrpare'tatosanet Cornelio pa'pacillo

³⁴ Pedroñapa' alla oterrerr:

—Po'ño'ch te'pa' o' neño'ch tarro'mar o' chapona neyo'chro, ama ñap'ta judionesha' morrentenoña Yompor. ³⁵ Añña ama't erra'tsen pa'namen acheñ, eñallcha'ña puesheña'tets ñeñtcha' mecha'na'tene' Yompor ñaña ñeñtcha' e'ñe cohuen es pets Yomporcop. Ñeñtpa' e'ñech pocte' enteñ Yompor, ama't erra'tsena acheñer.

³⁶⁻³⁷ Alla oterrerr Pedro:

—Sapa' seño'teñe'tña Yomporpa' o' mueñonay Puechemer Jesucristo, ñeñtey judioneshacpay. Añ ñeñtara Jesús'pa' o' a'pocatuonay e'ñe cohuen Partsocop attoch cosheñso'tseneycha'. Te'ñapa' ñach Yepartseshar yeperr allohueny. Añ cohuen

ñoñetspa' o' serrpare'tuet erracmañen Judeo'mar. Ñanompa' serrpare'chete't Galileo allempo apate't Juanañ.

³⁸ Alla oterraneterr Pedro:

—Señoteñte' Yomporpa' o' nan Puechemer Jesús ñeñt nazareto'marnesha'. O' chor-racha Parets Puecamquëñ ñaña nanac ahuamencat pe'. Allotpa' all chopeñe'chyese'tpa' nanac amuerañte't. A'crratyese't allohuen ñeñt muerochtatyese't oneñe't, tarro'mar Pomporpa' nanac yenpue't.

³⁹ Alla oterraneterr Pedro:

—Yapa' o' yentuoñ ora allpon atet pa'yese't all yeçhena judionesha' ñaña all Jerusaléno. Yapa' o' yentue ñeñto'marña te'pa' o' ya'potoñ ñeñt atet pa'yese't. Alloñapa' o' corso'tam̄pset tsacho, atto muetset. ⁴⁰ Tarraña poma'pamtañopa' tantater Pompor. Allempoña Pomporpa' orrtaterrnay e'ñe ya yocop. ⁴¹ Tarraña ama allohuenacpaye' orrterro, e'ñe yañeñacpa ñeñtey na' Yompor o'ch ya'potoñ ñeñt atet pe't Jesús. Allempoña tanterrapa' yapa' yerrallme'chapretuer ñaña yorruerr coñe'ta'tets parro.

⁴² Alla oterrerr Pedro:

—Ñapa' o' otey o'ch yeserrpare'tach acheñenesha', o'ch ya'potoñ atto yeñoçh Yomporpa' o' nan Puechemer Jesús ñach acre' allohuen acheñenesha'—errotëncha' corret puesheña'ttset. Acrancha' allohuen acheñenesha' ama't ñeñt corretsa ñaña ama't ñeñt o' colla'huena.

⁴³ Alla oterrerr Pedro:

—Ñeñt ama't ahuat ñeñt a'ñtaye't Yompor po'ñoñpa' ñeñtara Jesús a'potete't. Ama't ahuat ñetpa' otete't ñerra'm yame'ñera ña Pomporpa' e'ñech peretna'huerrnay yo'chñar.

Allempo ñanom chorraret Parets Puecamquëñ ñeñt ama judioneshayaye

⁴⁴ Ama't allempo serrpare'ten Pedropa' añña Parets Puecamquëñpa' ahuepa't chorraret allohuenet ñeñtet e'ñnote'. ⁴⁵ Añña judionesha' ñeñt ame'ñetsa ñeñt parro huapa Pedro, ñetñapa' atta cohuanrrortenet, o' otet:

—Erroteno'tuate'ca'ye chorraret ñamet Parets Puecamquëñ e'ñe attota, ñetpa' amaca'ye judioneshayayeto. Atet otet ñet.

⁴⁶ Tarraña po'ñoçhpa' ahuepa't chorraret ñamet Parets Puecamquëñ tarro'mar ñetpa'cho'ña ahuepa't eñosyese't po'poñ ñoñtso. E'ñe po'poñ ñoñtso aye'choçhtachet Yompor. Atto e'manet judionesha'. Allempoñapa' atet ot Pedro:

⁴⁷ —Ama't pocte' senteñe o'ch apatarettet Partsocop. Tarro'mar o' chorraret Parets Puecamquëñ e'ñe atet ñerra'm ya.

⁴⁸ Allempoñapa' otanet Pedro:

—Te'pa' e'ñe pocte' same'ñeñoçh Jesucristo o'ch sapatare'tta.

Allempoña apatarettetuetpa' atet ochet Pedro a'puepa'to' alla allponmat.

11

Allempo Pedropa' serrpare'tatuerranet Jerusaléno

¹ O' allponmat Jesúsña puellsensarnesha' o' e'mare'chet atto po'poñ acheñ ñeñt ama judioneshayaye o' ame'ñerrñañet ñamet Yompor po'ñoñ. Atto e'mare'ch Jesús puellsensarnesha' ñaña po'poñeçhno acheñ ñeñt ame'ñetsa all Judeo. ² Allempoña ahuer Pedro. Allempo çherr Jerusaléno'pa' judionesha' ñeñt ame'ñetsa allpa' o' che'ptare'tapueret Pedro. ³ O' che'ptare'chet Pedro, atet ochet:

—Eso'mare'tña petaña allo'tsen ñeñt ama judioneshayaye, ama't allpa' o'te' cha perrallme'chapretos—anet.

⁴ Allempoña Pedropa' o' serrpare'tatuerranet ñeñt e'ñe atet pa'; ⁵ atet otanet:

—Napa' allo'tsenen Jopo. Allempo nema'yochena huapona ñeñt atet ñerra'm cho' es yeçhopo'ten. Entoñapa' o' nent ñeñt atet ñerra'mrrate' shetamuets. Eno'tpa' cha sohua'nena açharam̄psare't e'ñe pa'tats po'toñne'marot. Añña ñeñt açharam̄psare'tpa'

sohua'netsa patsonet e'ñe neshonet. ⁶ Napa' o' necue'pa' allña o'ponopa' nent pa'namen berrochno ñaña ñeñt puetsafo'mar, ama't po'poñ berrochno ñeñt ama arrapahuoye'yenteno ya ñeñtey judioneshay. Nent ñaña pa'namen shechpechno, ama't ñaña pa'namen otechno. ⁷ Allempoñapa' ne'm ñoñets, atet oten: "Pedro o'ch pemtsa añ berr o'ch perre'." ⁸ Tarraña napa' not: "Ama Nompocha' nerreñe. Napa' ama't ahua'tapa' ama nerrare ñeñt ama arrapahuoyaye atet yeychena ya judioneshay." ⁹ Allempoñapa' alla oterrerr ñeñt eñets entot, atet ot: "Ñeñt o' a'cohuentatua Yomporpa' p'apa' amach potatsto añmapa' ama cohuenayaye." ¹⁰ Añpa' e'ñe ma'pocha ne'm'pa' allempoñapa' o' alla a'terr enonet o' alla chenquerra—ora. ¹¹ Allempocma o' chap ñaña ma'psheña acheñ. Chapuet all pocollo all nommuena. Añ ma'psheña acheña' arro'f mueñonet Cesareot. ¹² Añña Yompor Puecamquëñña' oten o'ch nocterranet. Oten amach nemcha'tatsto. Añ pechapsheña ñeñt arro'tsen te' o' yahuanma parro. Allempoñapa' yechap pa'paclo ñeñt nagotatene'. ¹³ Allempoña o' yechap pa'paclopa' ñaña'pa' o' serrpare'tatapuey atto' orrtoña Yompor po'mllañoñeñer. Orrtoña'pa' atet otos: "Añ pocte' o'ch pemñe acheñ Jopo o'ch pagotach puesheñarr añ pa'so'cheñ Simón ñeñtara ñeñt otenet Pedro. ¹⁴ Añña Pedropa' ñeñtcha' peñotate' attoch pequeshperra ñaña allohuen p'amo'tsesha'." Atet oten Yompor po'mllañoñeñer. ¹⁵ Nañapa' o' neserrpare'tosñañ Yompor po'ñoñ. Allempo neserrpare'tenpa' añña Parets Puecamquëñña' ahuepa't chorraret. O' chorraret ñet e'ñe attecma chorra'ya ahuaña yaña. ¹⁶ Allempoñapa' o' neyerepya atet otey ahuaña Yepartseshar Jesús: "Juanañpa' e'ñe oñochaya apate't tarraña na añcha'ña nechorratasa Parets Puecamquëñ." ¹⁷ Ñehua, Yomporpa' e'ñe pocte' enteñ o'ch chorraret ñet e'ñe attecma atet chorra'ya ya allempo yame'ñya Yepartseshar Jesucristo. Ñehua, ñerra'm e'ñe pocte' enteñ Yomporpa' nañapa' errotenotuate'ca'ye neche'ptare'chña Yompor.

¹⁸ Ñeñña otuapa' allempoñapa' alla moma'huet allohuenet. Allempoñapa' o' aye'chochtatoñet Yompor, atet otet:

—Ama't po'poñ acheñ ñeñt ama judioneshayaye Yomporpa' mueneñ o'ch cotape'cherret ello cohuen alloch ñetpa'cho'ña corretsetach pocsheñeshocmañen e'ñe tayoteñ errponañohuen. Allohua ñeñt atet pa Pedro ñaña Cornelio.

Atto epa'hua Yompor po'ñoñ errañaren

¹⁹ Allempo muetset Estebanpa' allempoteñña orrta muerochteñets. Nanac muerochtachete't ñeñt ame'ñetsa. Ñeñto'marña yetra'tyeset allemeña, parratse'tyeset po'poñ anetso'mar. Puesheña'tetspa' ahuanmuet Fenicio'mar, po'potantañña' ahuanmuet Chipro, po'potantañpa' ahuanomyeset Antioquío. All chopeñe'chyesnomuetpa' all serrpare'tyesnomuet Yompor po'ñoñ, tarraña añ serrpare'tatnomuet ñapue't judionesha'. ²⁰ Tarraña puesheña'tets chipro'marnesha' ñaña cireneo'marnesha' ñeñt ame'ñetsapa' o' chapuet Antioquío. Allña'pa' añ serrpare'tatoset ñeñt griegonesha'. Añ serrpare'tet ñeñt atet pena Yepartseshar Jesús. ²¹ Yomporpa' nanac ahuamencat panet. Ñeñto'marña shonte' acheñ ame'ñachet Yepartseshar Jesús, o' a'ypo'ña'huerret ñeñt ahua't pocta'ñet. ²² Añña ñeñt ame'ñetsa Jerusaléño'pa' o' e'mare'chet atto shonte' ame'ñetsa Antioquío. Ñeñto'marña mueñet Bernabé Antioquío, o'ch yenpuenaneta'. ²³ Allempo chap Bernabé allpa' entosan po'ño'ch o' orrta Yompor puemuereña all. Ñeñto'marña nanac coshosa. O' cotape'chatosanet, atet otanet:

—Amach sequechpatstere Yompor po'ñoñ. Huomenccha' sepa' seyo'cher.

²⁴ Añña Bernabé'pa' ñapa' nanac amueraña, nanac chorreña Parets Puecamquëñ. Atarr ame'ñena. Ñeñto'marña shonte' ame'ñatana acheñenesha' attoch coteret Yepartseshar.

²⁵ Allempoña ahua' Bernabé. O' chap Tarso allcha' e'nerrana' Saulo. Allña entospa' a'secher o'ch aner Antioquío. ²⁶ Epsheño'maret alla a'puet paterr char Antioquío.

Allña'pa' nanac yechachete't ñeñt a'pchatse't all pame'ñeñotet Yompor. Shonte' acheñ ame'ñatsa all. All Antioquíopa' añ asochare'ttet ñeñt ame'ñetsa "Cristona'tarnesha'." Ñanom arr Antioquíopa' asochare'ttet atet.

²⁷ Allempoña Jerusaléñopa' allo'tsen puesheña'tets ñeñt a'mtene' Yompor po'ñoñ. Par-rochpa' ona'cha'tet. Chapuet Antioquíopa' ²⁸ añña ñeñt pa'so'cheñ Agabopa' o' tomospa' serrpare'tatosanet, atet otanet:

—Orrtach muecheñets esempo errañaren patso. Añpa' allohua ñeñt atet ot Agabo.

Añ eñotate' Yompor Puecamquëñ, ama't allempopa' ama orrtena' muecheñets. Allempo añcha'taretta Claudiopa' allempoña orrta muecheñets. ²⁹ Ñeñto'marña allohuen ñeñt ame'ñetsa Antioquíopa' o' a'pochet o'ch mueñet ñeñtcha' yempue' pa'mo'nasheñesha' ñeñt yechetsa Judeo. ³⁰ Allpon echenetpa' allpon apa'yeset. Atet a'pochetpa' atetcho' pet. O' apueñet Bernabé ñaña Saulo, ñetñapa' anmet Jerusaléño, allña'pa' aposet ñeñt pompornesha' pen ñeñt ame'ñetsa Jerusaléño.

12

Allempo añcha'taret Herodes muetsaterran Jacobo, yottañpsatan ñaña Pedro

¹ Allempopa' añña añcha'taret Herodespa' rromatan puesheña'tets ñeñt ame'ñetsa attoch muerochtachet. ² Rromuet Jacobo o' muetsset. Añ Jacoboña' ñeñtara ñeñt Juan pa'mo'nasheñ. Atto muetssetpa' cho pechoñet poñ. ³ Ñeñtña muetse'pa' nanac coshatan judionesha' ñeñt ama ame'ñetso. Allempoña añcha'taretpa' nanac mueneñ o'ch alla coshaterranerr judionesha'. Ñeñto'marña pascuapopa' allempoch rrrerterrr pan ñeñt ama a'chasare'teyayepa' o' alla rromaterranerr ñaña Pedro. ⁴ Rromuet Pedropa' o' abe'tet cárcelo. Net çharra' puechena pechap solltarnesha' ñeñtcha' cohuanpse'. Ñanompa' o'ch neñet pa'tatssheña solltarnesha' ñeñtcha' cohuanpene'. Allotpa' o'chña muenme'cheñetpa' o'ch huena po'potantañ pa'tatssheña ñeñtcha' cohuanpene' ñaña. Ñeñtña çharra' puechena pechap solltarpa' attach penet, çhach canyannenet. Añ cotape'chña Herodes o'ch metua pascuapopa' o'ch orrtatan Pedro allo'tsa'yen acheñenesha'. ⁵ Atteñapa' nanac huomenc cohueñet Pedro cárcelo. Tarraña ñeñt ame'ñetsapa' atarr ma'yochanpeñet Pedro.

Atto Yompor po'mllañoñerpa' çha'nmaterran Pedro cárcelot

⁶ Atteñapa' allponmat o' çhap allempoch tsapa'çha' Herodespa' o'ch orrtata'mueñan Pedro allo'tsa'yen acheñenesha'. Tsapoña Pedropa' all muenpa' all rrochtampeñ epsheña guardia all rromampeñet allo ehucare't cadeno epo'mar pueçot. Ñaña a'yotpa' all cohuanpeñ po'potantañ solltar e'ñe allot be'tenet. ⁷ Atteñapa' machayota puetaresua e'ñe alla o'pono. Orrtoña Yompor po'mllañoñer. Añña mellañoñepa' o' a'pñan Pedro puepototpa' o' opuepa' atet och:

—Petanta tecma.

Añña cadena allo' huanquëñetpa' çha pueya'nets e'ñe ñoña. ⁸ Añña mellañoñepa' atet och:

—Pechana'pena peshtam, o'ch penen ñaña pesapat.

Atet och mellañoñepa' atto'cho' pa. Allempoñapa' alla otererr:

—Te'pa' pechorrena ñaña peshtam ñeñt penen enot. Allempoñapa' o'ch pöctenen.

⁹ Allempoñapa' o' çha'nen co'tanenan mellañoñeñ. Pedroña' çha otenapañ attate' çhopo'teñ, tarraña ama çhoye' çhopo'teñe. Allempoñapa' o' ahuanenet. ¹⁰ Ahuanenetpa' o' metenet all cohuen puesheñarr guardia. Ahuerreterr allponpa' o' meterreterr all cohuen po'psheñeñ guardia. Allempoñapa' o' çhenet allot e'ñe çha'nenet allecma chopeñe'chen acheñenesha'. Chenet yetarropa' ñeñtña yetarrpa' asret nanac echarr. O' çhenet e'ñe allpa' añña yetarrpa' o' tora'nom e'ñe ñoña. Tora'nenpa' ñetñapa' o' çha'nenet.

Chenet a'yotpa' allña'pa' all chope'chnomuet e'ñe parro mame'pa' allotña'pa' o' ahuerrña Yompor po'millañoñeñer allotña'pa' o' ñapñamena Pedro. ¹¹ Allempoñapa' çhapaña Pedro pueyoçhro, atet ot:

—Po'ñoçhepa't ama çhoye' neçhopo'teñe. Yomporepa't mueñene' po'millañoñeñer attoch a'queshpaten. Te'pa' Herodespa' amach erroť pa'no. Judionesha'pa'çho'ña e'ñe orrena o'patenna.

¹² O' çhapaña pueyoçhro tematenña'pa' o' çhap allo'tsen María pa'paquëll. Añña Mariapa' ñeñt pachor Juan Marcos. Chap all pa'paclopa' allña'pa' allo'tsa'yen shonte' acheñ all ma'yochenet o'pono. ¹³ O' çhap allot be'tenetpa' çhore'tosanet. O'ponotña'pa' çha'nom puesheñarr shopshesha' añ pa'so'cheñ Rode. ¹⁴ Huapapa' o' cheme'tan Pedro po'ñoñ. Pocsheñesha' materra o'pono o'ch oterrana' acheñenesha' ñeñt o'pono'tsa'yen. Tarraña ama toramñpsano Pedro. Cherr o'ponopa' atet otanet:

—Pedrepa't o' huena, allo'tsena a'yot.

¹⁵ Ñetña'pa' çha otet:

—Amate'ca'ye ñeñteyaye, atta ptyen çhate' pemospuena.

Ñaña'pa' alla oterrerr:

—Po'ñoçhca'ye Pedro.

Ñetña'pa' oterreterr:

—Amate' Pedroyaye. Ñato' añte' Yompor po'millañoñeñer ñeñtcha' cohuanñpse' Pedro.

¹⁶ Atteña'pa' Pedroña'pa' alla çhore'terraneterr yetarroť. Allempoñapa' toramñpset. Toramñpsetpa' añepa't Pedro. Allempoñapa' atta cohuanrrortet. ¹⁷ Pedroña'pa' o' echantan pot attoch o'ch muetsoñeñtet allochña'pa' o'ch serrpare'tatuenanet. Allempoña o' muetsoñeñtuetpa' atet otanet atto Yomporpa' o' çha'nmater cárcelot. Otanet ñaña:

—O'ch soteña' Jacobo ñaña po'potantañ masheñesha' atto çha'nmaterren Yompor po'millañoñeñer.

Allempoñapa' alla ahuerr Pedro.

¹⁸ Atteña'pa' o' puetaren. Arrña cárcelo solltarnesha'ña'pa' puenñchañoťetpa' otanna'tyeset:

—Erroťenoťuañaca'ye çha'nenña Pedro. Errahuañaca'ye o' ahuen.

¹⁹ Atteña'pa' o' e'nater Herodespa' ama esesha' entaye. O' alla a'pťo'tare'teretererr solltarnesha' ñeñt cohue'ne' cárcel ama esesha' entaye erroťenote' o' ahuen. Allempoña Herodesña'pa' o' mueño'tuan solltarnesha' a'yo allcha' muetsanatatuanet. O' allponmat Herodesña'pa' o'çho' ahuo' Judeot o'ch ahuo' Cesareo allña'pa' allach allponmatena'.

²⁰ Allempoña Herodesña'pa' nanac e'moñe'tenan tiro'marnesha' ñaña sidóno'marnesha'. Ñeñto'marña o'huañ apamet rreñets ñeñt nanac palltenet pa'nyeto. Ñeñto'marña ñetpa' mueneñet o'ch alla amo'tsteret Herodes attoch o'ch alla apuerranet ñeñt palltenet. Ñeñto'marña huacha'ta shonte' tiro'marnesha' ñaña sidóno'marnesha' o'ch enteñeta' Herodes. Añña Herodes pa'taruasañer añ pa'so'cheñ Blastopa' e'ñe cohuen entapanet. Ñaña'pa' o' a'pocatanet attoch ñetpa' serrpare'tet epuet añcha'taret. ²¹ Chap allempo'ch serrpare'tet epuet añcha'taretpa' Herodesña'pa' o' chorrana nanac coçhnesha' pa'shtampa' anorros po'conaño'pa' eñosos. O' eños atet ñerra'm ñeñt añcha'taret nanac. ²² O'ña eñosua acheñenesha'ña'pa' o' rrannartetpa' atet otyeset:

—Ama acheñenocheye' eñetso, Partsepa't eñets.

²³ E'ñepa'tcha' allempocma huapona Yompor po'millañoñeñer o' atsna'tatosan Herodes. O' atsna'tpa' e'ñe rrohue pueña'pa' o' rroma. Tarro'mar Herodespa' mueneñ o'ch Part-socoptarta. Acheñenesha'ña'pa' o' aye'choçhtatoñet atet ñerra'm Parets. Amaña çhoye' otaneto eñallña paterr Yompor. Añpa' allohua atet pe't Herodesoñ.

²⁴ Allempoñapa' o' epa'hua Yompor po'ñoñ erracmañen. Allo'na ame'ña'huanena shonte' acheñenesha'.

²⁵ Añña Bernabé epuet Saulopa' o' asueneta' Jerusaléño, pomhueneta' quelle. Pomhueneta' quellepa' o' puerracherret Jerusaléño. Añña Juan Marcospa' o' coterranet.

13

Allempo Pablo ñaña Bernabépa' ahuo't serrpare'tatoset anetso Chipro

¹ Ñeñt pame'ñeñotet apchatset Antioquíopa' allo'tsen pueheña'tets acheñ ñeñt a'mtene' Parets po'ñoñ, ñaña allo'tsen ñeñt nanac cohuen yechatatset Yompor po'ñoñ ñeñt atet ñerra'm añ: Bernabé, ñaña Simón, ñeñt Simónpa' oteñet ñaña Negro, ñaña allo'tsen Lucio ñeñt cireneo'marnesha' ñaña allo'tsen Manaén ñeñt parro cheshat Herodes ñeñt amcha'tarettetsa all Galileo, ñaña allo'tsen Saulo. ² Allempo chocma cohuentatoñete't Yompor, ñaña errotenopa' choch tore'tete't.* Atteña añña Parets Puecamquëñpa' eñotatanet, atet otanet:

—Añ pocte' o'ch sene' Bernabé ñaña Saulo ñetpa' o'ch senanet nocop. Napa' o'ch napanet ñeñtcha' po'taruas pet nocop.

³ E'ñe allempopa' tore'tetset. Allempoñapa' ma'yochet. Ma'yochuetpa' o' net pot ñeshetopa' allsensarettet allcha' torroñet Yompor po'taruas.

⁴ Allsensarettet e'ñe Parets Puecamquëño'tpa' ahuanmuet Seleucio. Seleucioñapa' ahuanpset boto, o' chapuet Chipro. ⁵ Allña pueblo all chapuetpa' añ pa'so'cheñ Salamina. Chapuet Salaminopa' o' ahuanmuet judionesha' po'prahuo allcha' serrpare'tosñañet Yompor po'ñoñ. Ñaña cotenanet Juan Marcos ñeñtcha' yenhuet. ⁶ Atteñapa' o' ahuanmuet serrpare'tats erracmañen all oteñet Chipre. Chapuet po'poñ anetso añ pa'so'cheñ Pafos. Allña' entoset pueheñarr judionesha' ñeñt'pa' achyo'tañ añ pa'so'cheñ Barjesús. Ñaña' nanac serrpare'taten, tarraña ama Yomporeye' po'ñoñ a'mteno. ⁷ Ñaña' chocma yemtenana ñeñt amcha'tarettetsa atet ñerra'm gobierno' ñeñt allo'tsen. Añña amcha'taretpa' añ pa'so'cheñ Sergio Paulo, ñeñt'pa' nanac es eñot. Añña amcha'taretpa' o' agotatan Bernabé ñaña Saulo. Ñapa' mueneñ o'ch e'man Yompor po'ñoñ atet serrpare'tenet. ⁸ Tarraña ñeñt achyo'tañpa' ama muenatano amcha'taret o'ch ame'ña. Ñaña' mueneñ o'ch a'mchettanet attoch amach ame'ñacheto amcha'taret. Añ ñeñt achyo'tañpa' ñeñtara oteñet ñaña Elimas. ⁹ Allempoña Saulopa' o' huomenc cohuenan ñeñt achyo'tañ. Ñehua, Saulopa' ñeñtara oteñet ñaña Pablo. Ñaña' e'ñe chorreña Parets Puecamquëñ. ¹⁰ O' cohuan achyo'tañpa' atet och:

—Papa' nanac peshquëñ acheñ, nanac peyechcaten ñeñt ama cohuenayaye. Aña pōmpor pepen oneñet. Nanac pe'moñe'teñ ñeñt poctetsa Yomporecop. Esemposhuachñaca' peuna'ña atto pōten ama cohuenaye Yompor po'ñoñ. Añpa' ñeñtña po'ñoñ ñeñt cohuentetsa. ¹¹ Te'ña Yomporpa' o'ch tsa'tataña. Te'pa' amach pecuerro. Allponmatcha' amach penterro puetare'.

Allempocma o' checmetmara enta. All chopeñe'chenpa' attach otyenanet:

—Sanmuen, o'ch secha'nmuen.

¹² O' entan amcha'taret atetpa' o' ame'ña. Atarr huomenc entan Yompor po'ñoñ. Allohua atet pete't all Pafoso.

Allempo ñanom asena' Pablo Asio

¹³ Allempoña Pablo ñaña ñeñt cotene'pa' o' ahuanpset boto o' chapuet Pergo ñeñt allara Panfilio. Chapuet Pergopa' Juanña Marcospa' o' sa'nerranet. O' alla ahuer Jerusalem. ¹⁴ Allempoña Pablo ñaña Bernabépa' ahuanerretter, o' chapuet anetso ñeñt pa'so'cheñ ñaña Antioquía ñeñt allara Pisidio. Allempopa' o' chapa'muen allempo

* **13:2** Añ tore'teñetspa' añecop o'ch yetorra Yomporecop. Amach añecpayaye atomat, ñeñt'pa' añecpa mameshacop o'ch yequechpa' yerrar.

amesen judionesha' Pabloña ñaña Bernabépa' o' ahuanmuet judionesha' po'prahuo. Allñapa' anorrcha'toset ñamet. ¹⁵ Allña judionesha' po'prahuopa' o' lleyoñet Moisés po'ñoñ ñaña po'poñ ñeñt a'mítaye't ahua't Yompor po'ñoñ. Allempoña o' lleya'huetpa' añña ñeñt amcha'tarettetsa puerahuopa' atet otanet:

—Eshaste' masheñneshare echene' ñoñets attoch soctape'chateypa' ñato' o'ch seser-
rpare'tatey.

¹⁶ Allempoña Pablopa' o' tomospa' echantan pot attoch muetsoñeñtuet atet otanet:

—Masheñnesha judioneshacha' ñaña allohuenes ñeñtes mecha'na'tene' Yompor, se'mñoten, o'ch notas: ¹⁷ Yapa' israelena'tarey ahua't Yomporpa' e'ñe pocte' entane't yatañneshañ. Nanac a'míratanet allempo a'puete't Egipto. E'ñe Yompor po'huamencotpa' o' ahuanerranet Egipto. ¹⁸ Ama't atomat char allempo chopeñe'chete't amaratareropa' chocma cohuanñsanet e'ñe cohuen, ñato' pa'tatsoch charra' char'te' cohuanñsanet. ¹⁹ Allempoña chaçherret alla Canaáno Yomporpa' o' huapore'tatuerran cançherr po'poñe'ttsochma acheñ ñeñt yeçha'yestse't all attoch apa'yerran yatañneshañ po'patseñ, e'ñe ñocpuet ama't ñaña puechemereshacpuet. ²⁰ Allempoteñ ñato' cuatrocientos cincuenta char'te' o' nanet ñeñtcha' amcha'tarettatsa ñocpuet. Atteñapa' o' çhap allempo orrta ñeñt a'mítaye't Yompor po'ñoñ ahua't, añ pa'so'cheñ Samuel. ²¹ Allempoña acheñenesha'pa' enamet Yompor o'ch apanet puesheñarr rey ñeñtcha' nanac amcha'tarettatsa. O' nanet añ pa'so'cheñ Saúl ñeñt Cis puechemer ñeñtara pamo'tsna'tar Benjamín. Añña Saúlpa' o' amcha'tarettata pa'tatsoch charra' char. ²² Allempoña Yomporpa' o' puerratanñper attoch o'huañ amcha'tarettata Saúlpa' o' alla nerran po'psheñeñ ñeñt pa'so'cheñ David ñeñtara Isaí† puechemer. Añ Davidpa' e'ñe pocte' eñch Yompor ñeñto'marña atet ot ñocop: “Davidpa' e'ñe attecma cotape'chen atet noctape'chen na neyoçhro. Ñeñto'mar neñoteñ ñapa' o'ch ame'ña'na na e'ñe poctacma.”

²³ Alla oterraneterr Pablo:

—Ñeñt puesheñarr David po'mírenño't Yomporpa' o' orrtatonay yocop ñeñtey israelena'tarey ñeñtcha' ya'queshpaterre'. Añ pa'so'cheñ Jesús. Te'pa' o' etsota atet otye't Yompor ahua't. ²⁴ Tarraña ama çhena' allempoch serrpare'tos Jesúsapa' añ ñanom orrtatsa Juanañ. Ñapa' serrpare'te't atet oche't, añ pocte' o'ch yoctape'cherr ello cohuen etserra allempoñapa' o'ch yapatare'tta Partsocop. Atet serrpare'tatey allohueney ñeñtey israelena'tarey. ²⁵ O' e'nuamochan ñeñt po'taruas pa'pa' Juanaññaapa' atet otanet: “Napa' ama aneyayno ñeñt soten ñeñtcha' Cristotats. Ñapa' te'pa' ñeñtña nocta'nene' chenta'. Napa' ama esoshe'mano attoch ama't po'sapatreçhapa' o'ch nepyoñ.”

²⁶ Alla oterraneterr Pablo:

—Sapa'çho'ña masheñneshacha' pamo'tsna'tarecmas penes Abraham. Ñaña arro'tsa'yen puesheña'tets acheñ ñeñt mecha'na'tene' Yompor. O'ch notas allohuenes, Yompor o' mueñonay cohuen ñoñets alloch yequeshperra allohueney. ²⁷ Ama't o' çhap ñeñt Cristotatspa' añña ñeñt jerusaléño'marnesha', ñaña ñeñt pa'mcha'tareternesha' penet, ñetñapa' ama esesha' eñotaye. Ama çhapaneto pueyoçhreto atet ote't ahua't ñeñt a'mítaye't Yompor po'ñoñ ñeñt chocma lleyenet añ yetro allempocma amesenet. Ñeñto'mar te'ñapa' o' etsotatoñet Yompor po'ñoñ. Te'ñapa' o' pomet Jesús attoch muetsset. ²⁸ Ñapa' ama't ama eñalle po'chñar atta otteñe'chet attoch muetsachet. E'ñe attota enamet Pilato muetsachepa'to'. ²⁹ Allempoña o' etsotatuoñet ora allpon atet aquellcare't ahua'toteñ ñocoppa' o' a'suachet corsocho'tpa' o' net mapuetpono. ³⁰ Tarraña Yomporpa' o' tantater ama't o' rromua. ³¹ Allempoña tantaterpa' allponmat orrtame'tnerrana ñeñt ñanom co'ta'nmue' Galileot allempo on Jerusaléño. Te'pa' ñetpa' o' a'potoñet atto tanterra Jesús, o' a'potoñet allohuen acheñeneshesho.

† 13:22 Isaípa' ñeñtara ñeñt sochenet Jesé.

³² 'Yapa'cho'ña te'pa' o'ch yeserrpare'tatas samña añ ñeñtara cohuen ñoñets. Ama't ahuat Yomporpa' otane't yatañneshañ atet'cha' pa esempo ³³ te'ñapa' o'cho' etsota yocop ñeñtey yatañneshañ po'mrenñey. O' etsota po'ñoñ allempo tantaterran Puechemer Jesús, tarro'mar atet' oteneý ñeñt Salmos 2, atet' Yompor otan Puechemer: "Papa' Nechemerep, te'ñapa' o'ch neñotach acheñenesha' po'ñoñ pa' Papa' Nechemer nepenep."

³⁴ Ama't ahuat Yomporpa' ote't o'ch tantaterpa' amach alla rromuerre'te. Ñeñtpa' atet' oteneý añ ñoñets ñeñt ahuatoteñ aquellcayet: "Po'ñoñ o'ch na'natapa' pa'ña atet' na'nacha David." ³⁵ Ñaña po'poñ capítulo Salmos all oten atet': "Yomporpa' amach muenatano Puechemer ñeñt nanac Parets o'ch puetsohua po'chets." ³⁶ Añ ñoñetspa' yeñoteñ ama añecpayaye David tarro'mar yeñoteñ David allempo e'nuan allpon atet' muenach Yompor pamotsna'tarecoppa' allempoñapa' o' rroma. Allempo rromapa' o' pampuet allo'tsen pa'tañneshañ, po'chetspa' o' puetsohua epuet. ³⁷ Tarraña Jesús po'chetspa' ama puetsa ama't coñe'ta tarro'mar Pomporpa' o' tantater. ³⁸ Ñeñto'marña añ poctetsa o'ch masheñeshacha' señoñ añ Jesús ñeñt atet' pena. Ñach ye'pretnerre' yo'chñar. Ñeñto'mar te'pa' o' neserrpare'tatas. ³⁹ Añ Moisés po'ñoñ ñeñt anaret' ahuatoteñpa' amach errotenot ye'pretnaterro allo yo'chñar. Tarraña te'pa' añña yame'ñeñot Jesús pa' añepa't alloch e'ñe a'pretna'huaretterra yo'chñar.

⁴⁰ Alla oterrerr Pablo:

—Te'pa' secuach, o'ch soctape'ch cohuen te't huaponasa ñeñt atet' ote't ñeñt a'mtaye't ahuat Yompor po'ñoñ. Atet' otete't ahuat:

⁴¹ Se'mñot ñeñtes achmāre'tets, te't secuanrrorteñoña sechenca'huerra. Te'pa' allempo ora socrenmeñpa' napa' o'ch norrtatonas ñeñt ama sentare. Tarraña ñato' sapa' amach same'ñyo ama'tcha' serrpare'tataset. Añpa' allohua huañ atet' serrpare'tatanet Pablo.

⁴² Allempoña cha'nmaçherret acheñenesha'ñapa' atet' ochet Pablo huapuepa'to' po'poñ semana o'ch serrpare'taterraneterr po'pocheño añ yetro allempocma amesenet.

⁴³ Allempo ahuanerretpa' shonte' judionesha' o' co'ta'huaneret Pablo ñaña Bernabé. Ñaña o' co'ta'huaner shonte' ñeñt ama judioneshayaye tarraña ñetpa' o' ame'ñatanet judionesha' ahuañacma. Añña Pablo ñaña Bernabé serrpare'tatanet o' co'tape'chatanet attoch çhocma o'ch co'tape'choñet Yompor pomuereña.

⁴⁴ Po'poñ semana o' çherrerr allempo amesenet. Huaçhenerr shonte' acheñenesha' o'ch e'mñoteneterr Yompor po'ñoñ. Autsa ora allohuen acheñenesha' ñeñt yeçhetsa all e'ñe huaçha'tuet. ⁴⁵ Allempoña judionesha' ñeñt ama ame'ñetsopa' o' eñchet shonte' acheñ huaçha'tatsapa', puesope'cheñofetpa' o' cohuanachet Pablo. Ñeñt atet' oten Pablopā' ñetñapa' o'ch otenet ama atteyaye. Nanac achmāre'chet. ⁴⁶ Tarraña ama mecha'to Pablo ñaña Bernabé. O' serrpare'tet huomenc, atet' otet:

—Añ poctetsa o'ch yeserrpare'tatas sanom Yompor po'ñoñ, tarro'mar sapa' judioneshas. Tarraña ñerra'm sapa' ama semno, ñerra'm ama pocteye' señche attoch sapa' corretsasach e'ñe tayoteñ errponañohuen, amach erro't ye'paso. Te'pa' añach yeserrpare'tat ñeñt ama judioneshayaye. ⁴⁷ Tarro'mar atet' oteneý Yompor po'ñoñot, arr oteneý atet':

Napa' o'ch nenas sa atet' ñerra'm pueta're', sach a'puetarsañpsats. O'ch sa'puetarsañpsoñ po'poñ acheñ poctapña ñeñt ama judioneshayaye. Ama't allohuen acheñenesha' ora allohuanen patspa' o'ch peñotatuanet attoch queshperret.

⁴⁸ Allempoña ñeñta e'mhuet añ ñoñetspa' añña ñeñt ama judioneshayaye atarr coshet, nanac cohuen eñchet Yompor po'ñoñ. Allempoñapa' o' ame'ñenet allohuen ñeñt o' anaretta attoch ñetpa' corretsetach tayoteñ e'ñe errponañohuen. ⁴⁹ Atteñapa' o' epa'hua Yompor po'ñoñ erracmañen. ⁵⁰ Tarraña puesheña'tets judionesha' o' co'tape'chachet acheñenesha' attoch o'ch huapore'tateret Pablo ñaña Bernabé. Añña

ñeñt atet cotape'ch coyaneshachno ñeñt cohuen entaprete' acheñenesha' tarro'mar añ coyanesha' e'ñe cohuen cotape'che't Partsocop. Ñaña ñeñt amcha'tarettetsa all, judionesha'pa' o' e'moñe'tachet Pablo ñaña Bernabé. Ñeñto'marña orrtatet atsrre'mueñets o' huapore'tateret Pablo ñaña Bernabé. ⁵¹ Ahuanenetpa' o' pa'shetca'tnenet po'patser pa'tcof attoch eñoch judionesha' ama pocteye' entaretteto ñeñt atet o' pohuet, te'ñapa' amach alla huaçherrete'te. Allempoñapa' ahuanmuet ñaña Iconio. ⁵² Tarraña ñeñt o' ame'ña'hua all Antioquíopa', ñetñapa' nanac coshenet, ñaña o' chorraret Parets Puecamquëñ.

14

Allempo chapuet ñaña anetso pa'so'cheñ Iconio

¹ Allempoña chapuet Iconiopa' o' be'toscha'tet parro judionesha' po'prahuopa' o' serrpare'tatoset all. Nanac cohuen serrpare'tatet ñeñto'marña ame'ñachet shonte' acheñenesha'—ama't judionesha' ñaña ama't ñeñt griegonesha'. ² Añña judionesha' ñeñt atpare'tene' Yompor po'ñoñ ñetñapa' toma'tam̄pset Pablo ñaña Bernabé. Nanac sasare'teñet taye'to' acheñenesha' ñeñt ama judioneshayayepa' cohuen enteññañet atto serrpare'ten. ³ Tarraña ama't e'moñe'tanet patantarr acheñenesha'pa' ñetñapa' ama mecha'teto. Alla atomatet serrpare'tet Yompor po'ñoñ. Orrtatet ñeñt acheñenesha' ama puentareto ñeñtña eñotatahuet po'ñoñ atto serrpare'tenetpa' añmapa' Yompor pomuereñoñ huapanet añ ñoñets. Yomporpa' nanac ahuanmuet panet. ⁴ Atteñapa' añña patantarr acheñenesha'pa' e'ñe cohuen enteñet atet serrpare'tatanet Pablo ñaña Bernabé. Tarraña po'potantañña' ama. Ñetñapa' añña ame'ñatahuet judionesha'. Ñeñto'marña ama patrraye' cotape'chenoña acheñenesha' all. ⁵ Atteñapa' o'pacha shonte' judionesha' ama't ñaña ñeñt ama judioneshayaye ñaña ñeñt amcha'taretechnopa' o'pacha o'ch rromuet huomencpa' o'ch rrolle'chet. ⁶ O' e'mare'chet cha o'patarettenetpa' añña Pablo ñaña Bernabépa' o' yeterretpa' ahuanmuet ñaña Listro. Chapuet Listropa' cha asuanmuetpa' o' metet ñaña Derbo. Añpa' ñeñtara anets all otenet Licaonia. Erracmañen chopeñe'chet allo'mar. ⁷ All chopeñe'chneñetpa' all serrpare'tnenet Yompor po'ñoñ.

Allempo chapuet ñaña anetso pa'so'cheñ Listra

⁸ Allempo Listro'tsenetpa' allñapa' allo'tsen puesheñarr acheñ, cha echarrtena pa'tac, ama eshcaye' chope'cheno, ama't ahuatoteñ ñapa' atta eñalletña. Ñaña'papa' alla anen. ⁹ Allña anenpa' alla e'mñotenan atet serrpare'ten Pablo. Pabloñapa' cohue' allapa' o' eñoch añ acheñpa' o' yemtana Yompor ñapa' o'ch a'crrater. ¹⁰ Ñeñto'marña Pablo'pa' atet och huomenc:

—O'ch notap̄, o'ch p̄aten.

Ahuepa'tcha' tanta allempocma allorocma cha chope'chnets. ¹¹ Allempo eñch allohuen acheñenesha'pa' cha rrannartet. Pocsheñoñetpa' atet otet:

—¡Partsepa't! Ñeñt Parets yepen ñeñtepa't puenasetsa acheñ. Te'pa' o' chap e'ñe yesho. Añpa' atet otet po'ñoñeto ñeñt Licaonach.

¹² Añña Bernabépa' o' sochet, atet otet:

—Añepa't ñeñt yeyomporer Júpiter.

Pabloñapa' sochet ñapa' añ ñeñt po'yompor-ret Mercurio. Tarro'mar sochet atet ñapa' nanac serrpare'ten cohuen atet ñerra'm po'yompor-ret Mercurio. ¹³ Ñehua, acheñenesha' allpa' echenet po'prahua' allecmach ma'yochyete't po'yompor-ret ñeñt otenet Júpiter. Ñeñtpa' e'ñe ñehuapoñ anaret allempopa' o'ch taya yerrota'nmos pa'netsreto. Ñeñt corneshatets puerahuopa' o' huapa. Huapatan huaquësh, huapatan ñaña shonte' ror.

Mueneñ o'ch muetset huaquësh Pablocop ñaña Bernabécop tarro'mar chocma muetsete't huaquësh po'yompor-recop. Ñaña tarro'mar atet muenen acheñenesha'. Ñetpa' cha otenapuetañ Pablo ñaña Bernabépa' añte' ñeñt po'yomporer penet. ¹⁴ Allempoña eñoch Pablo ñaña Bernabé ñeñt atet pena acheñenesha'pa' nanac lleca'rrtet. Puellquëño'tetpa' o' rrarre'tet pa'shtampa' o' matrra'tet allo'tsa'yen acheñenesha'. O' rrannaretnomuet, puerranarotetpa' ¹⁵ atet otet:

—Eso'marte'ca'ye masheñneshacha' atet sepena. Yapa'cho' arromña'teya attey ñerra'm sa. Ñeñto'marña o' yeserrpare'tatas cohuen ñoñets attotcha' sequechpuerr ñeñt atet sepena ñeñt e'ñe orrena. Te'pa' añña poctetsa o'ch same'ñera Yompor ñeñt ama arromña'teshayaye, ñeñtara Yompor ñeñt yeçcate' enet ñaña pats ñaña ñeñt añecmuen sa'p. Ñaña ora allohuen ñeñt yentyen ento ñaña ñeñt yentyen patsopa' ña yeçcatue' ñaña ñeñt sapo'tsen ña yeçcatue'.

¹⁶ Alla oterraneterr Pablo:

—Ahuat Yomporpa' muenatan acheñenesha' o'ch pa'yeset ñeñt atet muena'yenet e'ñe ñañeñeta. ¹⁷ Tarraña ama a'ypo'ñano acheñenesha'. Chocma apanete't attoch eñochet po'ñoçh eñall Yompor. Chocma mueranete't ñeñto'marña chocma huatache't ñocpuet attot yeçcanete't puenarmet, atto eñalletete't puerraret atto coshete't. Añpa' ñeñta ñeñt atet otan Pablo allohuen acheñenesha'.

¹⁸ Tarraña ama't atet otan acheñenesha'pa' o' alla muenereterr o'ch muetset huaquësh ñocpuet atet pete't po'yompor-recop. Tarraña Pablo ñaña Bernabépa' ama muenataneto.

¹⁹ O' atomatpa' hua'cha'ta puesheña'tets judionesha' ñeñt huetsa Antioquíot ñaña Iconio't. Co'tape'chatoset acheñenesha'po'poñ. E'moñe'tachet Pablo. Atteñapa'rrolle'chet Pablo. Rrolle'tuetpa' cha otapuetañ o'te' rroma. Chetare'tnomet pueblot a'yenet.

²⁰ Ñeñña ame'ñatsapa' alla arrotampeñet alla cohueñetpa' ñaña'pa' ahuepa'tcha' alla tanterra, o' alla ahuerre'r pueblo. Tsapa'tña' Pablo ñaña Bernabépa' ahuanerret alla Derbo.

²¹ Chapuet Derbopa' serrpare'tuerre'terr Yompor po'ñoñ ñaña all. Shonte' acheñ ñeñt allo'tsen ame'ñenet ñamet. Allempoñapa' ahuanerreterr Listro, ñaña asuerreta' Iconio ñaña Antioquí. ²² Ora allohuanen ta'yeset yenpuet ñeñt ame'ñetsa attotcha' huomenc pet pueyo'cher. O' co'tape'chatanet ñaña attoch chocma yemchet Yompor ama't esempo huapanet muerochteñets. Tarro'mar e'ñe yemuerochteño't yeçapcha' all am'cha'tarettena Yompor. ²³ O' na'yeset puesheña'tets acheñ ñeñt'cha' pompor pa'yes ñeñt pame'ñeño't ap'cha'yetsa. Puetore'teño'tetpa' o' ma'yocham'pesyet ñeñt'cha' pompornesha' pa'yeset, atet ochet:

—Yomporepa'ch seyempue', ñeñtara Yompor ñeñt o' same'ña'huerra.

Atet pa'yeset ora allohuen anetso all ame'ña'yesa acheñenesha'.

Allempo cha'cherret alla Antioquí allot ahuanmuet ahuaña

²⁴ Allempoñapa' asuanerret Pisidio'mar allotpa' ahuanerret Panfilio. Cherret anetso ñeñt pa'so'cheñ Perge. ²⁵ Serrpare'tuerre'terr Yompor po'ñoñ all Pergo, allempoñapa' ahuanmuet ñaña Atalio. ²⁶ Chapuet Ataliopa' allotña'pa' ahuan'pset boto, o' alla cha'cherret Antioquí ñeñtara anets allot ahuaña ñeñt ame'ñetsa all ma'yocham'psapanet attoch yenpanet Yompor esheccha' etsotoñet po'taruas. Te'ñapa' o' e'nuet. ²⁷ O' cha'cherret allpa' ap'chachet allohuen ñeñt ame'ñetsapa' serrpare'tatueret ora allohuen atto Yomporpa' yenpanet. O' serrpare'tatanet atto Yompor a'poctatanet, añe'na serrpare'tatet ñeñt ama judioneshayaye, añecop attoch ame'ñerret ñamet. ²⁸ Alla atomatet parro epuet ñeñt ame'ñetsa.

15

Allempo a'poctachet Jerusaléño ñeñt'cha' atet pet

¹ Atteñapa' chap ñaña acheñ ñeñt huetsa Judeot. Chapuetpa' o' yechatoset ñeñt ame'ñetsa all, atet otosanet:

—Te'pa' aña sepalltena attoch sequeshperra o'ch setsorranna'ta ñeñtes asheñorres atet yeychena ya allempoteñ atet yeçhaterrey Moisés.

² Añña Pablo ñaña Bernabépa' ama pocteye' eñcheto atet. Ñetpa' atet otet:

—Ama po'ñoçhaye' añ paltetso o'ch yetsorranna'ta ñeñtey asheñorrey.

Ñetñapa' alla nanac es otanna'tet. Ama a'poctacheto. Ñeñto'marña allempopa' o' net Pablo ñaña Bernabé ñaña po'poñechno acheñ attoch ñetpa' o'ch ahuanmuet Jerusaléño o'ch enteñeta' Jesús puellsensarnesha' ñaña ñeñt pompornesha' pen ñeñt ame'ñetsa all. Añecop tet attoch o'ch a'p'to'teneta' erra'tsente' pocte' ñeñtcha' atet pet.

³ O' so'tuanma ñeñt ame'ñetsapa' ahuanmuet. Arr oñmuet Fenicio'mar allotñapa' ahuanmuet Samario'mar. Allña oñemuanmuetpa' all serrpare'tyesnomuet. Añ serrpare'tyesnomuet atto o' ame'ña ñeñt ama judioneshayaye. Pame'ñeño'tetpa' o' a'ypo'ña'huerret ñeñt ahua't poctapñet. Ñeñtña nanac coshate'ña allohuen ñeñt ame'ñetsa.

⁴ O' chapuet Jerusaléñopa' e'ñe cohuen agapanet Jesús puellsensarnesha' ñaña ñeñt pompornesha' pen ñeñt ame'ñetsa all. Ñaña allohuen ñeñt ame'ñetsa allpa' o' agapanet e'ñe cohuen. Allempoñapa' serrpare'tatoset ora allohuen atet yenpanet Yompor.

⁵ Tarraña patantarr fariseonesha' ñeñt ame'ñetsapa' o' tantapa' atet ot:

—Acheñ ñeñt ama't ama judioneshayaye, añ paltetso o'ch atsorrare'tta allohuen asheñornesha', ñaña allohuenetpa' otarettetepa' añ paltetso o'ch ame'ñeññañet ñaña Moisés po'ñoñ ñeñt atet anaret ahuatoteñ.

⁶ Ñeñto'marña Jesús puellsensarnesha', ñaña ñeñt pompornesha' pen ñeñt ame'ñetsa allpa' o' apçhet attoch a'poctachet este' poctetsa ñeñtcha' atet pet. ⁷ Ñeñto'marña alla nanac es otanna'tyeset. Allempoñapa' o' tanta Pedro. Tantapa' atet otanet:

—Sapa' seño'te'ña masheñneshacha' ahuaña Yomporpa' o' na'n na. Añecop na'n o'ch neserrpare'tach ama't ñeñt ama judioneshayaye. O'ch neserrpare'tatanet Yompor po'ñoñ attoch ame'ñerret ñamet. ⁸ Ñehua, Yomporpa' entennay yeyoçher. Ñapa' eñoteñ ama't añ ñeñt ama judioneshayaye o' ame'nyet pueyoçhreto. Ñeñto'marña o' chor-ratanet Puecamquëñ attecma atet chorrenya yaña. Attoña eñotatey e'ñe pocte' entenatet ñamet. ⁹ Ñeñto'mar yeñoteñ ama yaptayaya morrentenyo Yompor. Añña ama't ñetpa' morrentenanet ama't ñeñt ama judioneshayaye. Pame'ñeño'tetpa' ahuo't e'shohuerranet po'chñar ñeñt pueyoçhro'tsa'yenet. ¹⁰ Te'ñapa' eso'mare'tña ama pocteye' senteñe ñeñt atet o' p'ohua Yompor. Añecop ñeñt ame'ñetsapa' eso'mare'tña semneñ o'ch senanet ñeñt nanac torrapo' entenatet. Ama't ya judioneshayapa' amach erroteno o'ch yetsotua allohuen ñeñt atet anaret. Ama't yatañneshañpa'cho'ña ama etsotete'te.

¹¹ Añcha'ña yeñot e'ñe Yepartseshar Jesús pomuereño'tpa' o'ch yequeshp'a, attecmaçh queshpet ñamet.

¹² Ñeñta e'm allohuen ñeñt apçhatsa allpa' alla moma'rrtet. Atto e'mñochet. Bernabé ñaña Pablopa' ña nanac serrpare'tatahuet. Añ serrpare'tatanet atto Yomporpa' nanac ahuamencat panet ahuaña allempo serrpare'teneta' allo'tsa'yen ñeñt ama judioneshayaye. Ñeñto'marña orrtatanet ñeñt ama puentareto ñeñtcha' eñotatahuet añmapa' po'ñoçh Yomporeshot huena. ¹³ O' serrpare'tuetpa' allempoñapa' atet ot ñaña Jacobo.

—O'ch masheñneshacha' se'mñnoten naña. ¹⁴ Simón Pedropa' o' serrpare'tatuas atet Yompor te'pa' o' orrtatan pomuereña añecop ñeñt ama't ama judioneshayaye. Ñaña ahuo't orrtatan pomuereña añecop ñeñtcha' ame'ñatahuet attoch aye'choçhtatoñet Yompor pa'so'cheñ ñamet. ¹⁵ Po'ñoçh te'pa' o' etsota ñeñt atet oteneñ ñeñt a'mtaye't Yompor po'ñoñ ahua't. Añpa' ñeñt atet quellquë't ahua't atet ñerra'm Yompor otatse't:

16 Allempo o'ch meten shonte' charpa' napa' o'ch alla norrtaterr puesheñarr ñeññ David po'mrenñoñ ñeññcha' ahuaencattatsa atet ahuaencatte't ahuať pa'tañ David. Tarro'mar shonte' char ama't puesheñarrapa' ama orrteno David po'mrenñoñ ñeññ nanac ahuaencat.

17 Añecopcha' norrtater allochñapa' ama't po'poñechno acheñenesha' ama't ñeññ ama judioneshayaye o'ch ame'ña'hueret ñamet Yompor, ñaña allohuen erra'tsencha' muenats.

18 Atet ot Yompor ñeññara ñeññ eñotatey ahuaťoteñ ñeññcha' atet pa. Añpa' allohua ot ñeññ a'mtaye't Yompor po'ñoñ ahuať.

19 Alla oterrerr Jacobo:

—Te'pa' añña e'ñe pocte' nenten na amach ya'mñechatatsche ñeññ ama judioneshayaye ñeññ o' puesuerran ñeññ ahuať poctapña attoch ame'ñeret Yompor. ²⁰ Te'pa' añña pocte' o'ch yequellcanet ñeññcha' ama patsteto ñeññpa' añ: Amach rratsteto po'chets ñeññ muetsenet ayečcataretecop ñeññ po'yomporer pen ñeññ ama judioneshayaye ñeññara ñeññ ama ame'ñetso. Ñaña o'ch yotamet amach chetapretatsteto taporets. Ñaña o'ch yotamet amach rratsteto ñeññ muetsenet ñeññ atta a'pañareť, ñaña amach rratsteto ñeññ ño'shetsa oño. Ñaña amach es rratsteto es po'rras.

21 Alla oterrerr Jacobo:

—Añpa' ñeññach atet yequellcanet. Tarro'mar ahuaťoteñ o' serrpare'tuoñet Moisés po'ñoñ ora allohuen anetso'mar. Ñaña pate'tets semana añ judionesha'pa' chocma lleyeññañet Moisés po'ñoñ all po'prahuet. Añpa' allohua atet otanet Jacobo.

²² Allempoñapa' o' a'poctachet o'ch net puesheña'tets ñeññ e'ñe allo'marnesha' ñeññcha' mueñet Antioquí, o'ch coťeret Pablo ñaña Bernabé. Atetpa' e'ñe pocte' eñch allohuen —Jesús puellsensarnesha' ñaña ñeññ pompornesha' penet, ama't ñaña allohuen ñeññ ame'ñetsa all. Añ net Judas Barsabás ñaña Silas. Añña epsheña acheñpa' e'ñe cohuen eñch allohuen ñeññ ame'ñetsa. ²³ Ñetpa' o' anmuet, ñeññ atet oten carta:

“Masheñeshacha' ñeññes yečhetsa anetso Antioquí ñaña Sirio ñaña Cilicio: Allohueneý ñeññey ame'ñetsa o'ch yehuomcha'tas sa añ yecartot—ñeññey Jesús puellsensarneshay ñaña ñeññey pompornesha' pen ñeññ ame'ñetsa arr. O'ch yehuomcha'tas sa ñeññes ame'ñetsa samña ñaña ama't ñeññes ama judioneshayayso. ²⁴ O'ch yotas, yapa' o' ye'mare'ch o' čhap sesho puesheña'tets acheñ arrot ñeññ muenets o'ch a'mñechatasa. Ñetñapa' o' nanac moññe'tatasa soctapña. Tarraña te'ñapa' o'ch yotas, añ acheñpa' ama yaye' mueñenaye. ²⁵ Ñeñto'mar pocte' yenteñ allohueneý o'ch yene' epsheña acheñ ñeññcha' yemñonas epuet Bernabé ñaña Pablo ñeññ nanac yemuerena. ²⁶ Tarro'mar nanac yemorrentenanet ahuañapa' all serrpare'teneta' autsañ muene' amtsanataretetuet all. Tarro'mar e'ñe puemorrenteñoťet Yepartseshar Jesucristo atet aťaretet. ²⁷ Añ yemñonas Judas ñaña Silas. Ñetpa' o'ch serrpare'tatenseta' ora atet yoten ya arr. ²⁸ Parets Puecamquēñpa' o' eñotatey ñeññ e'ñe pocte' yenten ñeññcha' yenonas. Amach añ yenonaso ñeññ nanac torrapo'. Te'pa' añ palltetsa ñeññcha' atet sepa. ²⁹ Amach serratsto po'chets ñeññ muetsenet ayečcataretecop ñeññ po'yomporer penet. Ñaña amach serratsto ñeññ muetsenet ñeññ atta a'pañareť. Ñaña amach serratsto es po'rras. Ñaña amach sehtapretatsto taporets. Ñerra'm amach atet sepo ñeññpa' e'ñech pocte'. Añpa' ñeññach yotas. Yomporēpa'ch sa'nataya.” Añpa' allohua huañ ñeññ atet oten carta.

³⁰ Allempoñapa' o' mueñet Judas ñaña Silas epuet Pablo ñaña Bernabé. O' ahuanerret Antioquí. Čačherret Antioquíopa' o' apčhatuet allohuen acheñenesha'pa' o' aposanet añ carta. ³¹ Ñeññ apčhatsapa' o' lleyet añ carta. Lleya'huetpa' nanac coshatanet ñeññ atet actape'chataretet cartot. ³² Añña Judas ñaña Silas, ñetpa'čo'ña nanac a'poťoñet Yompor po'ñoñ ñamet. Ñetpa'čo'ña a'mñetenet Yompor po'ñoñ. Nanac serrpare'tatet.

O' cotape'chachet e'ñe cohuen ñeññ ame'ñetsa allochñapa' huomenccha' pet pueyoçher. ³³ O' allponmatet allpa' allempoñapa' secherret allot amñareñtet ahuaña. Ñeññ ame'ñatsa Antioquíopa' o' so'tneret e'ñe cohuen, otanet:

—Yomporepa'chña ya'nataya parro allohueney.

³⁴ Tarraña Silaspa' mueneñ o'ch a'pa all, Judaspa' o'ch ahuerr. ³⁵ Añña Pablo ñaña Bernabé allponmaterret Antioquí. Yeçhatapretereta' epuet po'poñeçhno ñeññ yeçhatets all. Serrpare'tapretereta' Yompor poñoñ epuet po'poñeçhno.

Allempo puepocheño ahuerrerr Pablo serrpare'tats allemeñ anetso'mar

³⁶ Atteñapa' o' atomat Pabloñapa' otan Bernabé:

—O'ch ahuerrey, o'ch yaßchera' ñeññ ame'ñetsa ora allohuen anetso all yeserrpare'toñ Yompor po'ñoñ ahuaña attoch yeñoçherrotenette'ña te'.

³⁷ Bernabéñapa' aña e'ñe pocte' ent o'ch co'ta'ner Juan Marcos. ³⁸ Tarraña Pablopa' ama pocteye' eñche tarro'mar ahuaña allempo çhapuet Panfilio, Juan Marcospa' çha sa'nerranet, o' puerterra. Ama allo'na yenpuenaneto all serrpare'tyeset. ³⁹ Ama erroteno a'pochtacheto, çha sa'nannerret. Bernabépa' aña aner Marcos. O' ahuañpset boto, çhaçherret Chipro. ⁴⁰ Pabloñapa' aña e'ñe pocte' ent o'ch anerran Silas. Ñeññ ame'ñetsa allpa' o' so'tneret, e'ñe cohuen otneret:

—Yompor e'ñe pomuereño'pa' a'natyepa'ch.

Allempoñapa' ahuanenet. ⁴¹ Asueneta' Sirio'mar ñaña Cilicio'mar. Allotñapa' yenpuet allohuen ñeññ pame'ñeño' apçhetsa parro. O' yenpuet añecop attoch huomenccha' pet pueyoçher.

16

Allempo Timoteopa' cota'nerran Pablo ñaña Silas

¹ Pablo ñaña Silaspa' asuerreta' anetso añ pa'so'cheñ Derbe. Allotñapa' ahuanerret alla Listro. Allñapa' allotsen puesheñarr acheñ ñeññ ame'ñetsa añ pa'so'cheñ Timoteo. Ñeññ Timoteopa' añ pachor pen judionesha' ñeññ ame'ñetsa. Pomporñapa' ama judioneshayaye aña griegonesha'. ² Ñeññ ame'ñetsa Listro ñaña Iconiopa' nanac cohuen enteñet Timoteo. ³ Ñeñño'marña e'ñe pocte' eñch Pablo o'ch co'ta'nerranet Timoteo. Tarraña ato'tña anemhueta' allcha' tsorreñet atet yeçhena joreyonesha', tarro'mar allcha' tetpa' shonte' judionesha'. (Ñehua, Pablopa' ama mueno o'ch atsrre'mach judionesha'.) Allohuenetpa' o' eñotuet ñeññ Timoteo pomporpa' ñeññ ama judioneshayaye aña griegonesha'. ⁴ All oñomyeset allemeñ añetsopa' otuosanet añ ñoñets atet a'pocstat Jesús puellsensarnesha' ñaña ñeññ pompornesha' penet Jerusaléño. Añ eñotatuosanet ñeññcha' atet pet. ⁵ Atteñapa' allohuen ñeññ ame'ñetsapa' e'ñe pame'ñeño'tet allo'na senet huomenc pa'nmuert pueyoçher. Pate'tets yetpa' allo'na sen atonetnomtsa ñeññ ame'ñetsa.

Allempo Pablopa' entan macedonio'marnesha' atet ñerra'm çho çhopo'teñ

⁶ Allempoñapa' arr asuerreta' ñaña Frigio'mar ñaña Galacio'mar tarro'mar Parets Puecamquëñpa' ama muenataneto o'ch serrpare'toñet Yompor po'ñoñ all Asio'mar. ⁷ Allempoñapa' ahuanmuert ñaña tenonet, çhappochet Misio ñaña arr sechet Bitinio'mar, tarraña Jesús Puecamquëñpa' ama muenataneto. ⁸ Atteñapa' metuet Misio'mar o' çhaçha'tet Troaso. ⁹ Çhaçha'tet Troaso tsapoñapa' aña Pablopa' orrtoña atet ñerra'm çho es yeçhopo'ten. Atet ñerra'm pueçhopoño'pa' o' entan puesheñarr acheñ macedonio'marnesha' alla ten, atet otare'ch: "O'ch sonaçha't arr Macedonio, o'ch seyenpuenya'." ¹⁰ Allempoña errte' orretuoña macedonio'marnesha'pa' yañapa'*

* **16:10** Ñehua, e'ñe allempocmapa' o' cota'nmanet ñaña Lucas, ñeññara ñeññ quellquë' añ ñoñets.

o' yesecha o'ch ahuey Macedonio, tarro'mar yoten po'ñochte' chore'teney Yompor allochñapa' o'ch yeserrpare'teññaña' po'ñoñ all Macedonio.

Allempo chap Pablo ñaña Silas Filiposo

¹¹ Allempoña Troasotpa' año ahuañpsey boto. E'ñe pa'charra yepe' o'ch ye'chap anetso añ pa'so'cheñ Samotracia. Allñapa' all yetso'tnoma. Yahuanerrerr allo'tpa' tsapatñapa' o' ye'chap ñaña anetso Neápoliso. Allñapa' all yetso'tuerrerr. ¹² Yahuanerrerr allo'tpa' o' ye'chap ñaña anetso añ pa'so'cheñ Filipos allpa'cho' all yetso'tosa. Añ anets Filipospa' nanac atarr anets. Po'po'ne'chno anets alla Macedonio'marpa' ama atarroyaye. Allñapa' allo'tsa'yen shonte' solltarnesha' ñeñt' romo'marnesha'. Yapa' alla ya'llponmatoes all. ¹³ Allempoña chap allempo amesen judionesha'pa' yañapa' yahuanma anetso't a'yo. O' ye'chap ontapo all ye'nen ñato' allcha' ma'yochet. Yaña allpa' yentos puesheña'tets coyanesha'chno all anorrchenet. Yañapa' o'cho' yanorrcha'tos yaña. Allempoña yapa' yeserrpare'tatanet Yompor po'ñoñ. ¹⁴ Puesheñarr coyanesha' ñeñt' allo'tsen añ pa'so'cheñ Lidia ñeñt' huetsa anetso't añ pa'so'cheñ Tiatira. Ñaña'p' añ po'taruas pen atto vendenan shetamuets yetso'tromamuen. Ñaña'p' ame'ñenana Parets. Allempoña e'mñotan Pablo ñeñt' atet serrpare'ten añña Yomporpa' o' chapatoñ pueyo'chro ñeñt' atet serrpare'ten Pablo. ¹⁵ Lidiaña pame'ño'otpa' allenta apataretta, ñaña o' apataretta ñeñt' parro ye'chenet pocollo. Ñaña'p' o'cho' hua'ña'nerrey pa'paclo, atet ot:

—Ñerra'm e'ñe pocte' sentenen atto name'ñera Yepapar, o'ch sehuapa nepaclo ñato' allcha' sommosa.

Ñaña'p' otare'tey yonepa'to' ñeñto'marña yapa' o' ahuey.

¹⁶ Parrochñapa' allempo yeta ontapo allecma ma'yochenet toñoñapa' yentnoñ puesheñarr shopshesha' ñeñt' chorrena oneñet. Añña oneñetpa' ñach eñoratene' shopshesha' ñeñto'marña ñerra'm erro'ten otanetpa' atto'chcho' p'a. Amach pueno po'ñoñ ama't mamesha. Añña shopshesha'pa' eñall ñeñt' pamo'mte' pen po'po'ne'chno acheñ. Ñetñapa' nanaccha' ganatenanet quelle atto eñotañtena. ¹⁷ Ñaña'p' chocmach co'ta'nomye't epay Pablo. O'ch co'ta'nmueypa' o'ch rranare'tnoma chenta'pa' atetcha' ot:

—Añ encaneshachnopa' añ sherbenet Yepapar Ñeñt' Nanac Parets. Arrpa' añecop huenet attoch o'ch serrpare'tataset attoch sequeshperra.

¹⁸ Atteñapa' ama't atomatpa' attecma' pena. Atteñapa' o' a'mñechatana Pablo. Pabloñapa' allenta puetallsapa' o' otan oneñet:

—Te'pa' e'ñe po'huamencot Jesucristopa' o'ch notap, peque'chpa'ner shopshesha'.

Allempocmuepa'tcha' que'chpa'nerran shopshesha'.

¹⁹ Añña pamo'mtaynesha'pa' co'tape'chetpa' otet:

—Te'pa' llequeñtsa, o' huañerr allo yeganena quelle.

Allempoña pa'tsrre'mueño'tetpa' o' rromuet Pablo ñaña Silaspa' anmarettet e'ñe po'huamencocma, o' achapatarettet allo'tsa'yen añcha'tareñnesha' allecma a'poc'tatenet ñoñets. ²⁰ Allempoña achapatarettet allo'tsa'yen guardia pa'm'cha'tareñnesha'pa' o' otoset:

—Añmapa' ñeñt' judionesha'. Nanac atsrre'mo'chtenet arr ya'netsro. ²¹ Ñetpa' ye'chatenyet atet ye'chenet ñet ñeñt'pa' ama pocteye' yenteñe ya. Yapa' romo'marneshaypa' ama cohuen yenteñe o'ch atet ye'pa.

²² Allohuen acheñenesha'pa' nanac atsrre'mateñet. Ñeñt'ña guardia pa'm'cha'tareñnesha'pa' atet otan pueyo'chresha':

—Te'pa' o'ch serrotanetpa' o'ch senallanet.

²³ Allempoñapa' o' nallet Pablo ñaña Silas nanac huomenc. Allempoña o' analaretuetpa' o' abe'taretet ñaña cárcel; atet ochet ñeñt' cohuañpene' cárcel:

—O'ch secuañpsanet e'ñe huomenc.

²⁴ Allempoña atet otaretuetpa' añña ñeññ cohuanmpene' cárcelpa' o' abe'tanet nanac o'pono. Allñapa' nanac echarr pãmĩpsanet ñaña o' arrmatamĩpsaretet pa'tcof tablat e'ñe echarr.

²⁵⁻²⁶ Atteñapa' o' ma'yocha Pablo ñaña Silas. Ñaña o' morrechet, puemorrecheño'tetpa' nanac aye'chochtateññañet Yompor. Añña po'poñechno acheñ ñeññ abe'taret ñaña allpa' ñetñapa' o' e'mñotanet. Allempoña chap rroch tsappa' machayotepa'tcha' pella pats nanac huomenc, ama't allo' tomatenet echarr cárcelepopa' cha pa'shma huomenc. Puepelleño' pats huomencpa' o' torna'tua ora allpon all ayottamĩpsarettenet. Ñaña ora allpon allo huanquēñet acheñpa' o' pueyna'tuen. ²⁷ Allempoña ahuo't e'mansa ñeññ cohuanmpene' cárcelepopa' ahuo't entan o' torna'tuen allo ayottamĩpsarettenetpa' o' chetan po'cchell o'ch muetsa ñañaña. Ñapa' cho' otapañ ñeññ ayottamĩpsaretpa' o'te' yetuena. ²⁸ Añña Pablopá' o' chore'ch huomencpa' atet och:

—Amach errof pepatsto ama't mamesha. Yapa' allo'tsa'yenya allohueney.

²⁹ Allempoñapa' aña enamnom lampareñpa' mata allo'tsen Pablo ñaña Silas. Puenchaño'tpa' cha pa'shmuena ñaña e'ñe puencha'na'teño'tpa' o' concorposa e'ñe ñesheto. ³⁰ O' cha'nmacha'tatanetpa' atet otanet:

—Nomporneshacha' ¿estē'ña pocte'te' ñeññcha' atet neña attoch nequeshperra ñaña?

³¹ Ñetñapa' atet ochet:

—Añ pocte' o'ch pame'ñera Yepartseshar Jesucristo, allochñapa' attoch pequeshperra. Ñaña attoch queshperra ñeññ parro peyçhena pepaclo.

³² Allempoña ñeññ cohuanmpene' cárcelepopa' o' a'secherranet pa'paclo, allñapa' ser- rpare'tachet Yompor po'ñon, ñaña allohuen ñeññ pa'paclo'tsen o' e'mñotet ñamet.

³³ Allempocma ñeññe tsaprocma o' e'pana'tyerranet all atserrparettet. Allempoñapa' o' apataretta ña, ñaña allohuen ñeññ pa'paclo'tsa'yenpa'cho'ña o' apatarettet ñamet.

³⁴ A'tapatanet pa'paclopa' rratanet. Pame'ñeño' Yompor atarr nanac cosha. Ñaña allohuen ñeññ pa'paclo'tsenpa' atarr coshet ñamet.

³⁵ Tsapat puetarenpa' añña guardia pa'mcha'tareternesha' o' mueñet puesheñarr guardia, ñeññcha' otosets:

—O'ch sa'rroyer Pablo ñaña Silas.

³⁶ Ñeññ cohuanmpene' cárcelpa' atet otan Pablo:

—Oten añcha'taret secha'nerrepa'to'. Te'ñapa' orrerres, Yompor'e'pach sa'nataya.

³⁷ Tarraña Pabloñapa' atet otanet:

—Yapa' romanona'tarey yaña. Ñeññ ñoñets anaret Romo'tpa' oten ama pocteyaye o'ch yecoñchach acheñ ñerra'm ama yeñoteña' po'ñochte' eñall atto otteñe'cheñet acheñ. Tarraña añña añcha'taretnesha' ama e'nano ñeññ e'ñe po'ñoch atet yepena. Atta nal- latyete allo'tsa'yen shonte' acheñenesha' allo'tñapa' o'cho' atta yottamĩpsatyete arr cárcelo. Te'ña ñetpa' mueneñet o'ch cha'nmaterryete e'ñe a'nahua. Ñeññpa' ama pocteyaye atet. Te'pa' o'ch sotuer añcha'taret huapuetepa' arr cha'nmaterryete' e'ñe ñet.

³⁸ Añña guardiapa' otuerran pa'mcha'tareternesha' atet oten Pablo. Ñetñapa' cha yorenet allempo e'mare'chet ñetpa'cho'ña romanona'taret ñamet. ³⁹ Allempoña huacha'tetpa' enamaretterret peretneñets. Allempoña cha'nmatenanetpa' atet otanet:

—Te'pa' orrerres, sahanerra baçhayo.

⁴⁰ Allempoña cha'nenet cárcelo'tpa' ahuanerret o'ch alla abchereta' Lidia. Allempoñapa' serrpare'tuerret parro ñeññ ame'ñetsa, cotape'chatuanerret cohuen, allempoñapa' ahuanerret allot.

17

Allempo chap Pablo ñaña Silas Tesalónico

¹ Allempoña ahuanerret allotpa' ahuanmuet anetso Anfípoliso, allotña' ahuanmuet ñaña anetso Apolonio. Allotña' o' chapuet ñaña anetso ñeñt pa'so'cheñ Tesalónica. Allña' allo'tsen judionesha' po'prahua'. ² Pabloña' o' be'tosos ñeñt attecma pena. Allña' serrpare'tatosanet Yompor po'ñoñ. Allña' ma'panerr semana. Allempoña chen yet allempo amesenetpa' o'ch'cho' serrpare'tatanet Yompor po'ñoñ ñeñt atet aquellcaret. ³ Allpa' añ ye'chatanet atet anarettta ñeñt'cha' Cristotats ñerra'm esempoch huapa añ patsropa' nanaccha' muero'chtachet. Tarraña o'ch muero'chtatuetpa' elloch alla tanterra ama'tcha' rroma. Atet otanet:

—Te'ñapa' o'ch notas, añ Jesús ñeñtara ñeñt o' neserrpare'tatuaspa' ñeñtña Cristotets.

⁴ Puesheña'tetspa' pocte' eñchet o' ame'nyet Jesús ñeñto'mar ñetpa' yemteñet Pablo ñaña Silas. Ñaña shonte' griegonesha' ñeñt ahuatoteñ cohuen cotape'chets Partsocoppa' o' ame'ñeñet Jesús. Ñaña shonte' coyaneshachno ñeñt e'ñe cohuen entyen acheñenesha' ñetpa'cho'ña o' ame'ñerret ñañet. ⁵ Judionesha'ña ñeñt ama ame'ñetsopa' ama pocteye' enteñeto attoch acheñenesha'pa' o'ch yemchet Pablo, ñeñto'marña puesope'cheño'etpa' o' e'moñe'chet. Ñeñto'marña a'sechet puesheña'tets acheñ ñeñt ama tama es sherbetso ñeñt atta ellapetset anorrets all shontena acheñenesha'. A'sechet o'ch ap'chachet shonte' acheñ attoch e'moñe'tachet Pablo. Ñetña pa'tsrre'mueño'etpa' ahuanmuet Jasón pa'paclo all a'posa Pablo ñaña Silas. O'pachet erro'teno'tpa' o'te' cha'nma'cha'tet a'yot attoch acheñenesha'pa' o'ch rromuet. ⁶ Allempoña cha'cha'tet Jasón pa'paclopa' tarraña ama entaretteto. Ñapña rromuet Jasón ñaña po'poñe'chno acheñenesha' ñeñt ame'ñetsa. Ñetaña anmarettatset añcha'tare'tesho. Pa'tsrre'mueño'etpa' nanac ama'to'chetnomuet attota'cho' chapuet allo'tsen añcha'tare'tnesha'. Allña' atet otoset:

—O' chap acheñ ñeñt muenene' o'ch a'po'poñeterrnay yoc'tapña. Atto' pohuanmuet ama't po'poñ anetso'mar, te'pa' o' chapuet ñaña arr.

O' alla oterre'terr:

—Añ Jasónpa' o' agapanet e'ñe cohuen te'pa' ñaña pa'paclo a'puenet. ⁷ Ñetpa' ama pocteye' enteñeto atto añcha'taret o'ch nan ñoñets all anetso Romo. Ñetpa' aña otenet eñallo' po'poñ añcha'taret ñeñt nanac ahua'mencañ ñeñt'pa' año' pa'so'cheñ Jesús.

⁸ Acheñenesha'ñapa' ñeñt e'muetpa' nanac atsrre'muet ñaña ama't añcha'tare'tnesha'. ⁹ Allempoña Jasón ñaña po'poñe'chno acheñpa' o' ayorañ'psaretet allpon po'çllayoret. Allotpa' otarettet:

—Añ quellepa' allach yapuerres ato't ahuerra' Pablo ñaña Silas.

Allempoñapa' a'rroyeret Jasón ñaña po'poñe'chno acheñ.

Allempo chap Pablo ñaña Silas anetso Bereo

¹⁰ Allempoña acheñenesha' ñeñt ame'ñetsapa' o' mueñeret Pablo ñaña Silas Bereo. Tsapocma amñare'ttenet a'nahua. O' chapuet Bereopa' be'tos'cha'toset judionesha' po'prahuo.

¹¹ Añña judionesha' ñeñt Bereo'tsa'yenpa' ñetña'pa' e'ñe cohuen cotape'chenet ama atteyayeto atet ñerra'm judionesha' ñeñt Tesalónico'tsa'yen. E'ñe pocsheñesha' e'mñotoñet Yompor po'ñoñ, allotña ñetpa' o' e'nyeset Yompor po'ñoño all aquellcaret ahuatoteñ. Tarro'mar ñetpa' mueneñet o'ch eño'chet ñato' po'ño'chte' atet serrpare'ten Pablo ñaña Silas. Pa'te'tets yetpa' attecma pete't. ¹² Ñeñto'marña shonte' acheñenesha' ñeñt ame'ñatsa. Shonte' ñaña coyaneshachno ñeñt griegonesha' ñeñt nanac sherbetspa' o' ame'ñenet ñañet. Ñaña po'potantañ shonte' yacmanesha' o' ame'ñenet. ¹³ Añña judionesha' ñeñt ye'chetsa Tesalónicopa' o' e'mare'chet Pablo o' alla serrpare'tuerranerr Yompor po'ñoñ ñaña Bereo. Ñeñto'marña hua'cha'tet ñañet all attoch atsrre'matachet acheñenesha' o'ch e'moñe'tachet Pablo. ¹⁴ Añña acheñenesha' ñeñt o' ame'ñapa' o' mueñet

Pablo tepa'to' ontapo allo'tsen sa'p atarr. Añña Silas ñaña Timoteopa' alla a'pa Bereo. ¹⁵ Puesheña'tets acheñpa' o' co'ta'nmet Pablo. Ñetpa' alla neñeta' Pablo anetso ñeñt pa'so'cheñ Atenas. Allña so'tanna'tuet Pabloñapa' atet otanet:

—O'ch sotuer Silas ñaña Timoteo onetepa' ñamet e'ñe tayecma.

Allempo chap Pablo ñaña Silas Atenso

¹⁶ Pabloñapa' alla cohuanet Atenso. Allña cohuanetpa' shonte' entosan ayečcataretečno all Atenso, ñeñt po'yomporer pa'yen acheñenesha'. Ñaña'pa' nanac llecachet. ¹⁷ Pabloñapa' mueneñ o'ch be'tos judionesha' po'prahuo attoch serrpare't epuet parro judionesha' ñaña po'poñečno acheñ ñeñt cohuen co'tape'chets Partsocop. Pate'tets yetpa' o'chcho' ahuo' all shontena acheñenesha' pueblo allña'pa' o'chcho' serrpare'tet parro ñeñt allo'tsa'yen. ¹⁸ Parrochpa' aña huapatsa ñeñt ame'ñenaya Epicuro poctapña, allotpa' o' huapa ñaña ñeñt ame'ñenaya po'poñ co'tapñats ñeñt otenet estoico. Ñetñapa' atet otet:

—¿Este'ca'ye co'tape'chenña añ acheñ ñeñt atta nanac eñets?

Po'potantañña'pa' atet otet:

—Ñato' aña'ye muenen o'ch yečatey po'poñ po'yomporer ñeñt ama yentare ya.

Tarro'mar Pablo'pa' añ serrpare'tatenanet atet pena Jesús ñaña ama't atto tanterra Jesús. ¹⁹ Ñetñapa' o' anmet Pablo all oteñet Areópago allecma apčhena eñotañnesha'. Allña'pa' otoset:

—Ñehua, te'pa' o'ch pōtey este'ña pōctape'chen pa. Yapa' te'pa' yemneñ o'ch yeñoč. ²⁰ Tarro'mar ñeñt peserrpare'tenpa' ama ye'mare. Yapa' yemneñ o'ch yeñoč este' nanac pōten.

²¹ Ñehua, allohuen atenso'marnesha' ñerra'm añ serrpare'tats ñeñt ama puentaretopa' ellapenetcha' e'mñotet. Ñeñtach paterr ma'yōchret. Ñaña ñeñt yeča'huerra Atensopa' ñeñt huapyetsa po'poñ anetso'tpa' te'pa' atta penet ñamet.

²² Allempoña Pablo'pa' tomos rrocho all oteñet Areópago'pa' atet otanet:

—Atenso'marneshacha' napa' neñotenes sapa' aña atarr sema'yōchrena ñeñt seyomporer sepa'yen. ²³ All nasuanempa' shonte' nentyesnom ñeñt sema'yōchyena ñeñt seyomporer sepen. Paterr allecma sema'yōchenapa' napa' nent all oten añ ñoñets: “Añpa' añecop Yompor ñeñt ama yeñotena'.” Ñeñt sema'yōchena ñeñt ama señotena'pa' ñeñtara Yompor te'pa' ñeñtcha'ña neserrpare'tatas.

²⁴ Añ ñeñtara Yompor ñeñt yečcate' añ pats. Ñaña yečcatan allohuen ñeñt yentyen añe patsro. Ña Pamo'mte' pen enet ñaña pats. Ñeñto'marña ya ñeñtey arromña'teypa' ama pallteno o'ch yeyečcatoñ allcha' yeča. ²⁵ Ñaña ama pallteno o'ch es yaḥ. Ñocop ama es palltetso. Elloña ñaña yapuene' allohueney atto yocrrena, apuene' ñaña atto yo'rrerrena. Ñapa' apuene' ora esocmañen.

²⁶ Ora allpon pa'namen acheñ ñeñt yeča'yetsa añe patsro Yomporpa' ña yečcatue' e'ñe puesheñarroča acheñ. Ñapa' o' nohuanet e'ñech allempohua corra'yeset. Ñaña o' na'yesuanet e'ñech erra yeča'yeset añe patsro. ²⁷ Tarro'mar Yomporpa' yečcatan pa'namen acheñ tarro'mar añ co'tape'ch allochñapa' allohuen acheñpa' ñerra'm e'ñe acoḥa e'neretpa' po'ñočpa' enteretcha'. Ñapa' allame'ttso'tsenate' yeshoḥ. ²⁸ Tarro'mar e'ñe ñeshoḥ te'pa' yocrrena ñaña e'ñe ñeshoḥpa' yechope'chen, ñaña e'ñe ñeshoḥpa' yeñalleta. Ama't atet quellquē't ahuat puesheñarr samo'ts sa ñeñt etsotaye't ñoñets. Añmapa' ñeñt quellquē't samo'ts ahuat: “Te'ña po'ñoč Yomporpa' puechemerasha' peney.”

²⁹ Alla oterrerr Pablo:

—Ñehua, ñerra'm po'ñoč Yompor puechemerasha' peney ya, ama pocteyaye o'ch yoch Yomporpa' arroḥ ayečcatareḥ oroḥ, amapa' arroḥ ayečcatareḥ asretoḥ,

amapa' arrot ayečcataret mapyoť. Añmapa' ñeñť ayečcataretpa' e'ñe ya yocťapñoťa ayečcataret, atet es yetma'ntatena ya. ³⁰ Ahuat'acheñpa' ama't ama eñotenano ñeñť cohuentetsa Yomporecop, Yomporpa' amach erroť ñaneto. Tarraña te'ñapa' otene yocťape'cherrepa' ello cohuen Yomporecop, allohuene yacheñey ñeñťey corra'yetsa añe patsro. ³¹ Yomporpa' tarro'mar mueneñ o'ch yocťape'cherr etserra tarro'mar ñapa' o' ne' esempoch allohueneypa' yorrterrach ñesho. Te'pa' o' nan Jesús ñach acrerre' allohuen acheñ ñeñť e'ñe po'ñočh atet pete'ť. Acrancha' ñeñť cohuen acheñ ñaña ama't ñeñť ama cohueno acheñ. Ñeñťo'marña te'pa' o' eñotatuay Jesús pa' ñach acrerrets tarro'mar Pomporpa' o' tantater ama't o' rromua ñaña Jesús pa' e'ñe pocte' es pen. Te'pa' o' eñotatuay allohuene yacheñey.

³² Allempoña serrpare'tan Pablo attoch yetanterra ellopa' añña puesheña'tets acheñpa' o' achmāre'chet. Tarraña po'potantañña' atet otet:

—Ñehua, ñato' esempochña ye'mñoterrperr po'pocheño.

³³ Allempoñapa' ahuer Pablo. ³⁴ Tarraña puesheña'tetspa' yemchet Pablo ñaña o' ame'ñet. Añña puesheñarr ñeñť ame'ñatsa añ pa'so'cheñ Dionisio ñeñťara ñeñť añcha'tarettetsa ñeñť a'pocťatene' ñoñets all oteñet Areópago. Ñapa' o' ame'ña, ñaña po'psheñeñ coyanesha' ñeñť pa'so'cheñ Dámaris. Ñaña po'poñečno acheñ o' ame'ñet ñamet.

18

Allempo chap Pablo Corinto

¹ Allempo ahuo' ñaña anetso all oteñet Corinto. ² Chap Corintopa' entosan puesheñarr judionesha' añ pa'so'cheñ Aquila. Ñapa' errte' huetsa Italiot epuet puetapor ñeñť pa'so'cheñ Priscila. Año'mar huenet Italiot tarro'mar añcha'taret Claudiopa' o' nan paterr ñoñets all Italio. Ñeñťpa' atet ot: Allohuen judionesha'pa' ahuanerretepa'to' Romoť. Aquilapa' arr eñalletña Ponto. Pabloñapa' ahuo' o'ch entenana' Aquila epuet puetapor. ³ Ñetpa' ñeñťa po'taruas penet atto yečcatenet shetamtso'. Pabloñapa' alla a'pa epuet attoch taruaset parro. ⁴ Paťe'tets semana allempo čhen yet allempo amesenet Pabloñapa' o'chčo' ahuo' judionesha' po'prahuo. Allña' allcha' serrpare't epuet judionesha' ñaña ñeñť ama judioneshayaye. Ñapa' atarr mueneñ o'ch ame'ñatanet.

⁵ Allempoñapa' huapa ñaña Silas epuet Timoteo. Taya huapuet Macedoniot. Allempopa' añ nanac torrena Pablo serrpare'te'. Ñapa' añ eñotatenan judionesha' Jesús pa' ñeñťaraca'ye Cristoterrets ñeñť atarr cohuenet ahuatoteñ. ⁶ Judionesha'ñapa' nanac e'moñe'chet Pablo, o' achmāre'chet. Allempoña Pablopa' o' pa'shman pa'shtam attoch eñochet nanac atpare'tenet. Allempoñapa' atet otanet:

—Sapa' sañeñach a'chencatuerrtsa. Tarraña napa' amach es seyohua'no. Te'pa' tayoteñ añach neserrpare'tat ñeñť ama judioneshayaye.

⁷ Allempoñapa' ahuer. Chap añ ñeñť pa'so'cheñ Justo pa'pacillo ñeñť ame'ñenaya Yompor. Pa'paquellpa' allame'ttso'tsen allo'tsen judionesha' po'prahua'. ⁸ Ñeñť añcha'tarettetsa judionesha' po'prahuo ñeñťpa' añ pa'so'cheñ Crispo. Crispopa' o' ame'ñerrana Yepartseshar Cristo ñaña allohuen ñeñť pa'pacillo'tsen. Shonte' corinto'marnesha' e'mñotoñet Yompor po'ñoñ, o' ame'ñerret ñaña o' apatarettet Yomporecop. ⁹ Atteñapa' orrtoña Pablo atet ñerra'm čo es yečhopo'ten. Yomporpa' ahuo't otan Pablo:

—Amach pemicha'tatsto, čhocmach peserrpare't, amach atfa pemamtetatsto. ¹⁰ Napa' o'ch necuanpeneť attoch amach esesha' erroť es pepaye. Tarro'mar napa' nechen shonte' acheñ añ anetsroť ñeñťcha' name'ñaya.

¹¹ Allña' allena alla paterr char ñaña meterrerr pechapña arorr. Allpa' nanac yečhatanet Yompor po'ñoñ.

¹² Allempoña am̄cha'taretta Galión e'ñe alla Acayopa' judionesha'ña o' ap̄chetpa', o'pachet Pablo. Allempoña o' rromuetpa' anmet am̄cha'taretsho allecma a'poc̄tatenet ñoñets. ¹³ Chapuet allpa' atet otoset:

—Añ acheñpa' aña yeçhatenan acheñenesha' atto'ch ame'ñyet Yompor, tarraña ñeñtpa' ama atteyaye atet oteneý Moisés po'ñoñ ñeñt atet anaret.

¹⁴ Ahuo'ch eñoseñ Pablopa' Galiónñapa' atet otanet:

—O'ch notas ñeñtes judioneshas, ñerra'm añ acheñ añte' o' p̄ohua ñeñt ama co-huenopa' amapa' atet ñerra'm çho muetsenan acheñ, ñehua, pocte' napa' o'ch ne'mñotas atto sottene'cheñ. ¹⁵ Tarraña ñerra'm amate' atteyaye, aña' e'ñe socpa—atet seyçhaten sa ñeñtes judioneshas, amapa' esesha'te' same'ñena, amapa' ñeñt atet oten ñoñets ñeñt atet anaret socop. Ñeñto'marña napa' notenes ñeñtpa' socpa. Ñeñto'marña napa' amach neñoso añecop ñeñt e'ñe socpa.

¹⁶ Allempoñapa' o' çha'nmaçha'taterranet. ¹⁷ Allempoña acheñenesha' aña rromuet Sóstenes. Sóstenespa' ñeñt am̄cha'tarettetsa judionesha' po'prahuo. O' rromuetpa' o' nalle'chet e'ñe alla allame'tets am̄cha'taretsho. Am̄cha'taret Galiónpa' ama co-hua'psaneto.

Allempo çherrerr Pablo Antioquío

¹⁸ O' atomaterrerr Pablo alla Corinto allempoñapa' o' so'tnerran ñeñt ame'ñetsa. Aña coterre' Priscila ñaña Aquila. Allotpa' año ahuañp̄set boto, arrcha' tet Sirio'mar. Arr asuanmuet anets Cencrea. Allñapa' o' shopena'tatosa Pablo. Añecop shopena'tata attoch eñochet o' etsotuan po'ñoñ ña ñeñt atet otan ahuaña Yompor ñeñtcha' atet p̄a Yomporecop. ¹⁹ Allempoña çhapuet Efesopa' allñapa' o' sa'nerran Aquila ñaña Priscila. Ñaña' o' ahuo' judionesha' po'prahuo allcha' serrpare'tet parro judionesha'. ²⁰ Allñapa' otare'chet Pablo a'puepa'to' alla atomat, tarraña Pablopa' amo' mueno. ²¹ Allempoña so'tnerranetpa' atet otanet:

—Napa' o'ch alla ahuerren Jerusaléño allcha' nocshapretuerra añ yeter ñeñt anaret Partsocop allempoch alla cosherrerr judionesha'. Ñerra'm Yomporcha' muenatspa' ñato' o'ch nohuerrerr esempo.

Allempoñapa' ahuañperrerr boto. ²² Allempoñapa' arr etsotañp̄sosa Cesareo. Cesareoñapa' asuanom Jerusaléño allcha' abechnoman ñeñt ame'ñetsa all. Allempoñapa' o' alla ahuer Antioquío.

Allempo poma'pocheño ahuererr Pablo serrpare'tats allemeñ anetso'mar

²³ Antioquíopa' alla allponmatnerr, alloñapa' o' ahuererr. Arr asuanerr Galacio'mar allotpa' ahuer Frigio'mar. Ñeñt ame'ña'yetsa allpa' o' yenpanet attoch huomenc perret pueyoçher.

Allempo Apolos atarr cohuen serrpare'tatosanet all anetso Efeso

²⁴ Ñehua, allempopa' eñall puešeñarr judionesha' añ pa'so'cheñ Apolos ñeñt huetsa Alejandriot. Ñaña' o' çhap Efeso. Atarr cohuen serrpare'tenan Yompor po'ñoñ, atarr etsotenan Yompor po'ñoñ ñeñt atet aquellcaret ahuañtoteñ. ²⁵ Ñapa' ayçhataret ñeñt atetcha' perra Yepartseshar ñeñtara ñeñt Cristotats. Ñapa' e'ñe po'ñoçh serrpare't huomenc, yeçhatanet ñeñtcha' atet perra Jesús. Añaña ama e'ñe eñotueno ora atet pena Jesús. Aña eñoten atet yeçhate't Juanañ ñaña atet apate't Juanañ. ²⁶ Ñapa' serrpare'te't huomenc judionesha' po'prahuo. Allempoña e'm̄ Priscila ñaña Aquila, ñetñapa' anmet ellonet allcha' eñotachet e'ñe ora ñeñt atet p̄a Yompor ñeñtaña palltena o'ch eñoch e'ñe poc̄tacma. ²⁷ Allempoñapa' secha Apolos Acayo. Añaña ñeñt ame'ñetsapa' o' yenpuet. Ñetpa' o' quellquët carta añecop ñeñt ame'ñetsa all Acayo attoch ñetpa' o'ch agapet Apolos e'ñe cohuen. Allempoña o' çhap all Acayopa' nanac yenpan ñeñt ame'ñenaya

cohuen ñoñets all. ²⁸ O' eñotatanet po'ñoçh Jesús pa' ñeñtca'yeña Cristoterrets ñeñt atarr cohuenet ahuatoteñ. Yompor po'ñoñoñ ñeñt aquellcareñ ahuatoteñ o' gatyesanet atto Jesús o' etsotatuan ñeñt aquellcareñ ahuatoteñ. Ñeñt allo'tsa'yen allohuen acheñpa' e'ñe po'huamencocma yeçhatanet. Allempoña ama't puesheñarra judionesha'pa' ama erroñ otenaye' enteto.

19

Allempo çherrerr Pablo Efeso

¹ Allempo Corinto'tsenmeñ Apolos, Pabloñapa' alla chopeñe'chen aspentarero. Atteñapa' o' alla çherr Efeso. Allñapa' all entosan allponsheña ñeñt ame'ñetsa. Tarraña ñetpa' allpon eñotenet allpon serrpare'tate't Juanañ. ² Pabloñapa' a'p'to'tan ñeñt ame'ñetsa, atet otanet:

—Sapa' allempoteñ same'ña, ¿ahuo't chorrasaña Parets Puecamquëñ?

Ñetñapa' o' anapuet:

—Yapa' ama ye'mareña ñato' eñallfe' Parets Puecamquëñ.

³ Pabloñapa' alla oterrerr:

—¿Erroñenote'tña sapatare'tta?

Ñetñapa' atet otet:

—Yapa' yame'ñeñoñ atet otye't Juanañ attoña yapatare'tta.

⁴ Pabloñapa' alla oterrerr:

—Añoñña apaten Juanañ atto o' cotape'cherret ello cohuen Yomporecop alloñña' o'ch apatare'ttet attoch ame'ñeret ñeñtcha' huapatsa chenta'. Añoña ñeñt huapatsa chenta'pa' añepa't Jesús.

⁵ E'muet atetpa' apatare'tterret pame'ñeñoñet Yepartseshar Jesús. ⁶ Allempoña Pablopá' o' a'p'llanet potot. Allempoñapa' ahuepa't chorraret Parets Puecamquëñ. Allempoñapa' o' eñosyeset po'poñ ñoñtso, o' a'potoñet atto eñorana'tanet Yompor. ⁷ Ñeñt eñosyesets po'poñ ñoñtsopa' allo'tsen ñato' çharrasheña puechena epsheña.

⁸ Pablopá' nanac serrpare'tate't all Efeso. Pate'tets semana o'chçho' be'tosos judionesha' po'prahuo o'chçho' serrpare'tatanet atet pena Yompor po'cohuenña ñeñt atto atarr ayochreshattena ña. Ama mecha'te'te ama't mamesha. O'chçho' yeçhatanet allochñapa' o'ch ame'ñatanet. Atteñapa' o' ma'pña arrorr. ⁹ Tarraña puesheña'tets acheñpa' nanac a'tpare'chete't ama ame'nyeto atet serrpare'tatanet Pablo. Pa'tpare'teñoñetpa' ama't all shontena acheñenesha'pa' o' sasare'toñet Jesús pocta'ña. Allempoñapa' ahuer Pablo. Ñeñtña ame'ñetsapa' o' coteret. O' ahuanmuet allo'tsen Tiranno pue'scuela. Allñapa' pate'tets yetpa' añoña Pablopá' o'chçho' serrpare'tatanet pue'scuelapahuo. ¹⁰ Atteñapa' o' met epa char. Allohuen asio'marnesha' o' e'mare'toñet Yompor po'ñoñ—allohuen judionesha' ama't ñaña allohuen ñeñt ama judioneshayaye. ¹¹ Yomporpa' nanac ahuanencat pan Pablo. Ñeñto'marña nanac orrtatanet Yompor po'partsoña ñeñt ama puentareto. ¹² Atteñapa' añoña acheñenesha'pa' o'chçho' anerret ñeñt es a'p'lla'yen Pablo, atet ñerra'm es pañell amapa' pañoshe'm. O'chçho' anmet allo'tsen ñeñt atсна'tets. O'ch çhapachet allpa' o'chçho' correrraña atсна'ñeñt. Ama't po'neñeñetpa' o'chçho' queçhpa'nerranet.

¹³⁻¹⁴ E'ñe allempopa' allo'tsen puesheña'tets judionesha' ñeñt achyo'tañnesha' ñeñt çhocma chopeñe'chets erracmañen. Ñehua, ñetpa' añ puechemereshanet ñeñt puesheñarr judionesha' ñeñtara ñeñt cornesha' nanac añcha'taret añ pa'so'cheñ Esceva. Allo'tsen cançherrsheña puechemereshá'. Ñetpa'çho'ña o' topachet ahuo'ch queçhpatachet ñamet acheñenesha' po'neñeñer e'ñe pa'so'chño Yepartseshar Jesús. Ahuo'ch pet atet pena Pablo. Puesheñarrña ñeñt chorrena oneñetpa' otoñet po'neñeñer:

—Napa' o'ch notaḡ, e'ñe pa'so'chño Jesús ñeñt̄ serrpare'ten Pablo o'ch pequeḡpa'ner añ acheñer.

¹⁵ Allempoña atet ochet oneñt̄pa' ahuepa'tcha' eñoraña, oneñt̄pa' atet ot:

—Jesúspa' neñoteññañ po'huamenc, Pablopa'cho'ña neñoteññañ atet po'huamenc echen. Tarraña sapa' eseshasuañaca'ye. Ama neñotennaso sehuamenc.

¹⁶ Allempoña acheñ ñeñt̄ chorrena oneñt̄pa' omachana'tanet, orrotet parro epuet achyo'tañnesha'. Oneñt̄pa' nanac atserrḡatse'tanet allohuenet. Muelle'mcoḡ at-serrḡatse'tuanet o' matrra'tuet pocolloḡ. ¹⁷ Añña allohuen efeso'marnesha'pa' o' e'mare'chet atet o' pet—allohuen judionesha' ñaña ñeñt̄ ama judioneshayaye. Atarr yore'tanet. Allempoñapa' am̄cha'na'tpo' enteñet Yepartseshar Jesús.

¹⁸ Shonte' acheñ ñeñt̄ ame'ñtset allempoñapa' huapyeset, o' a'meta'yesoset atto achyo'tyesete't̄. ¹⁹ Patantarrpa' o' huapatyeset po'libro ñeñt̄ allo eñotet achyo'tatset. E'ñe all shontena acheñenesha' o' chama'tuet po'libro. Allempoñapa' o' somuerret errponte'tsa'tena allpon libropa' o' sala amnaroch ḡarra' mil poḡllayoret. Ñeñt̄ allpon tsa'tena allohuen libro. ²⁰ Ñeñto'marña atarr am̄cha'na'tpo' entoñet Yomp̄or po'ñoñ. Atarr ame'ñet.

²¹ Allempoña e'ñe Yomp̄or Puecamquẽñoḡpa' o' secherrerr Pablo o'ch ahurrerr Macedonio ñaña Acayo, alloḡña o'ch asuanerrpa' o'ch ahurr ñaña Jerusaléño. Alloḡñapa' atet ot Pablo:

—Te'pa' aña palltetsa o'ch ahuen ñaña Romo.

²² O' mueñan epsheña acheñ ñeñt̄ yenpuene' ñeñt̄cha' ñanom tatsa Macedonio. Añña ñeñt̄ epsheñapa' añ pa'so'cheñ Timoteo ñaña Erasto. Pabloñapa' o' a'pohuerra allponmat Asio.

Allempo nanac ama'toḡhtena acheñenesha' all Efeso

²³ Allempopa' o' atsrre'ma puesheña'tets acheñ. Añ atsrre'matahuet atto' pena ñeñt̄ ame'ñetsa. ²⁴ Allo'tsen puesheñarr añ pa'so'cheñ Demetrio ñeñt̄ ñanom e'moñe'te' ñeñt̄ ame'ñetsa. Ñapa' añ po'taruas pen o'ch yeḡcatyesan pocollatollesha' añ toma'ntatena pocoll ñeñt̄ allecma muechatse'tenet ñeñt̄ po'yachorer penet ñeñt̄ otenet yachor Diana. Añ pocollatollesha'pa' arroḡo' ayeḡcataretta asertalloḡ. Shonte' acheñ ñeñt̄ara po'taruas penet, Demetrio ña apahuete't̄ po'taruas atet. Shonte' quelle ganete't̄ po'taruasot̄. ²⁵ Atteñapa' Demetriopa' o' apḡchatuan allohuen pa'taruasañer ñaña po'psheñneḡno, ñetpa'cho'ña ñeñt̄ara po'taruas penet. Apḡchatuanetpa' atet otanet:

—Masheñeshacha' sapa' señoḡeñ añ yetaruas ñeñt̄pa' alloch yegana shonte' quelle.

²⁶ Te'pa' señoḡeñ ñaña añ ñeñt̄ otenet Pablopa' ahuo't otuan acheñenesha' añ ñeñt̄ yeyoser ñeñt̄ yeyeḡcaten yapa' ñapa' oten amo' Partsoyaye. Ñapa' o' coḡape'chatuan shonte' acheñenesha', te'pa' shonte' o' ame'ñatua. Ñetpa' o' huapore'tuerret shonte' ñeñt̄ yapuenanet ñeñt̄cha' ma'yochet. Sapa' o' sentue atet penet arr Efeso ñaña o' se'mare'ch atet ḡa'yenet ora erraḡaren Asio'mar.

²⁷ Alla otterraneterr Demetrio:

—Ñeñto'mar te'pa' o'ch notas, ñato' o'ch huañerr yetaruas alloch yeganerra quelle. Tarraña ñeñt̄pa' ama pocteyaye. Ñato' ellopa' o'ch a'ypo'ña'hueret ñaña yachor Diana ñeñt̄ puerahuo'tsen. Ñato' allempopa' ama't yachor Dianapa' o'huañcha' am̄cha'na'tpo' eñchet, ama't ñaña ora allohuen asio'marnesha' ñeñt̄ po'yachorer pene'.

²⁸ Ñeñña e'm allohuen acheñenesha'pa' nanac atsrre'matanet. Pa'tsrre'mueñoḡetpa' o' rranare'tyeset, alla oterrete't̄:

—¡Paretsñaḡcho' yachor Diana!

²⁹ Shonte' acheñ nanac ama'toḡhtenet allohuenet. O' rromuet Gayo ñaña Aristarco ñeñt̄ macedonio'marnesha' ñeñt̄ parro chopeñe'chen Pablo. O' matrra'tet allo'tsen pocoll atarrpo' allecma apḡchena acheñenesha'. ³⁰ Pabloñapa' mueneñeñ o'ch be'tos

ñaña all ama'toçhtenetpa' tarraña añña ñeñt ame'ñetsapa' ama muenacheto. ³¹ Ñaña puesheña'tets ñeñt amcha'tarettetsa all Asio ñeñt muerenaya Pablopa' o' muevoñet ñoñets attoch amach tatsto all apçhenet te't muetseñet. ³² Allña apçhenetpa' atta rranare'tyenet. Puesheña'tetspa' atet otyeset atet cotape'chyenet ñet, po'potantañña' atet otyeset po'poñ ñeñt atet cotape'chyenet ñamet. Allohuenet ama't ama eñotueñeto esocopte'ña apçhenet, tarraña atña nanac ama'toçhtenet. ³³ Puesheña'tets judionesha' o' cheta'nmet Alejandro o' huapachet attoch eñosachet. Ñaña' o' echantosán pot attoch o'ch muetsoñet añecop attoch o'ch a'pocatan ñoñets judioneshacop. ³⁴ Tarraña allempo acheñenesha' ñeñt ama judioneshayaye o' eñchet Alejandro ñapa' judionesha' ñetña'p' alla rranare'terreterr. Atarr tematen rrannartenet. O'chcho' alla oterret allohuenet parro:

—¡Paretsña'cho' yachor Diana! ¡Paretsña'cho' yachor Diana!

³⁵ Allempoñapa' puesheñarr amcha'tareñt ñeñt taruaset gobiernocoppa' o' emma'huanet, atet otanet:

—Masheñeshacha', o'ch notas ñeñtes yeçhetsa arr Efeso. Ama't allohuen acheñenesha' erraparen e'ñe eñotueñet efeso'marneshaypa' yapa' ñeñtey cohuanpene' yachor Diana ñeñt puerahuo'tsen, ñeñtara yachor Diana ñeñt nanac Parets, ñeñt sohuatsa entot. ³⁶ Ñeñtpa' yeñotueñ allohueney acheñey. Amate' errotenot yoto ama atteyaye. Ñeñto'marña e'ñe pocte' o'ch semtsoñeña. Amachña cha sama'toçhtatsto.

³⁷ O' alla oterraneterr amcha'tareñt, atet otanet:

—Secua' ahuo't sehuapach arr añ epsheña acheñ. Tarraña ñetpa' ama es yoreneto yachor po'prahuot ñaña ama achmare'teñeto yachor. ³⁸ Ñeñto'marña te'pa' o'ch notas, ñerra'm mueneñ Demetrio ñaña pa'taruasañreçhno o'ch otteñe'chatanetpa' te'pa' e'ñe pocte' temantanetepa'. Tarro'mar te'pa' atorareñt allcha' a'pocatatet ñoñets. Ñeñtcha' a'pocotate' ñoñetspa' allo'tsena. ³⁹ Tarraña ñerra'm este' semnen o'ch sa'pocatat po'poñpa' ñeñtpa' añ pocte' o'ch sa'pocatach allecma apçhena ñeñt nanac amcha'tareteçhno. ⁴⁰ Ñato' temanta'yey ya tarro'mar yapa' e'ñe attota yama'toçhtena.

⁴¹ Ñeñta otuanetpa' o' mueñhuerranet. Allempoñapa' ahuanomhuerret.

20

Allempo çherrerr Pablo alla Macedonio

¹ Allempoña o' muetsoñeñtuerret Pabloña' agotatuan ñeñt ame'ñetsa. O' cotape'chatnenanet e'ñe cohuen. Allempoña e'ñe puemorrenteñoñanet e'ñe cohuen so'tuanenanetpa' o' ahuen, o'ch ahuer Macedonio. ²⁻³ All oñerr Macedonio'marpa' nanac serrpare'tatnerranet Yompor po'ñoñ. Atteñapa' o' çherr Grecio ñeñtara all oteñet Acayo. Allpa' alla a'pohuerra ma'pña arorr. Autsaño' tampsatsañ ñaña Sirio botopa' tarraña o' e'mare'ch allpa' cha o'pateña judionesha' o'ch rromapet. Ñeñto'marña alla secherra Macedonio (tarro'mar allpa' patso'marach chope'chnerr). ⁴ Allempoña ahuer Macedoniopa' allpon acheñ o' coferet. Ñeñtpa' ñeñtara añeçhno: Sópater ñeñt bereo'marnesha', allotpa' ñaña Aristarco ñaña Segundo ñeñt tesalónico'marnesha', allotpa' ñaña Gayo ñeñt derbo'marnesha', allotpa' ñaña Timoteo, ñaña allo'tsen Tíquico ñaña Trófimo ñeñt asio'marnesha'. Allpon acheñ coferre'. ⁵⁻⁶ Arr cha'cha'tet Filiposo. Allempoña ñetpa' ahuanmuet o'ch otet, arrcha' cohuosyet Troaso. Yapa' alla ya'pa Filiposo epan Pablo allponmat.* Allempoña o' huañ allempo coshenet allempo rrenet pan ñeñt ama achasareteyaye allempoñapa' o' yahuanma yaña. Allempo ahuanpsey botopa' pa'mnarmatñoñapa' o' yeçhap yaña Troaso. Allña'p' allo'tsa'yen ñeñt otatsa ahuaña. Allña'p' alla ya'posa cançherrmat.

* **20:5-6** Lucas ñeñt quellquë' añ ñoñets ñapa' co'ta'nman ñaña Pablo.

Allempo Pablopa' emo'tnom anetso Troaso

⁷ Allempoña chap allempo mo'tta' muena yetñats temencpa' yapcha allohueney ñeñey ame'ñetsa. Yeyerpueñoť Yepartseshar Jesúsapa' o' yerra' pan ñeñť ashota'tareť ñeñť atet anaret Yomporecop. Allempoña Pablopa' nanac serrpare'tatanet. Ñapa' otanet:

—O'ch ahuenen tsapať.

Ñeñto'marña ama't o' rroch tsapuenpa' alla serrpare'tatenanet. ⁸ Allña yapchena pocollo enopa' nanac a'yohuen ßať. Allpa' shonte' lampareñ ñeñť corra'yetsa. ⁹ Allñapa' allo'tsen puesheñarr huepuesha' añ pa'so'cheñ Eutico. Ñañapa' alla anen ventanoť. Atto nanac serrpare'ten Pablopa' Euticoñapa' ahuo't alla ma' anaťoť. Ahuo't alla ma'pa' machayota shora'nom patso. Ma'pa' piso allot shora'nom. Allempoña echantasetpa' o' rroma. ¹⁰ Allempoña sohuerra ñaña Pablo. O' huapa o' mo'capa' a'chono'tos allempoñapa' otanet:

—Amach sellcatsto, Yomporpa' o'ch alla tantater.

¹¹⁻¹² Añña huepuesha'ña ñeñť o' shora'nemuapa' o' alla aneret e'ñe huomech. Allempoña allohuenetpa' atarrepa'tcha' coshet. Allempoñapa' o' alla a'terr Pablo. Allñapa' o' rrallme'chet. O'ña rrallme'chuetpa' o' huañ tematen all serrpare'tatannenet. Atteñapa' o' puetarespenet. O'ña puetaresuenpa' o' ahuen Pablo.

Allempo ahuanerret Troasoť arr cha'cha'tet anetso Mileto

¹³ Allempoña yapa' o' yahuanma o'ch yota o'ch yerrma' añecmuen noñť ñeñť otenet bote o'ch ahuanpsey Asóno allcha' yecuos Pablo. Tarro'mar otey Pablopa' ñapa' arro'ch oñom patso'mar o'ch chap Asóno. Allotñapa' o'ch a'tap ñaña boto, tarro'mar atet o' ya'pocstat epay Pablo ahuañacma. ¹⁴ Atteñapa' o' ye'chap Asóno. Allñapa' all yentanna'ta epay Pablo. Allotñapa' a'tap ñaña boto, allotñapa' ahuanpsey parro. Atteñapa' o' ye'chap Mitileneo. ¹⁵ Mitileneoťñapa' o' alla ahuanperryerr boto. Tsapaťñapa' a'yo'mara yoñem Quío. Allotña tsapatenerpa' alla yetsotosa Samsó. Yem'terrerr Samsotpa' alla yamesuerrerr Trogilio. Allotña tsapatenerpa' alla yetsotuerrerr Mileto. ¹⁶ Allñapa' ot Pablo amach yetatsto Efeso tarro'mar ñapa' ama mueno o'ch alla yatoma'tare'tnom Asio'mar. Ñapa' aña mueneñ o'ch ye'chap tecma Jerusaléño añecop o'ch yentapreterra' Pentecostepo.

Allempo e'ñe ñeñteshaña serrpare'tatnerranet Pablo Efeso

¹⁷ Ñeñto'marña allempo Mileto'tseneypa' Pabloñapa' agotatan ñeñť pompornesha' pen ñeñť ame'ñetsa Efeso, onetepa' Mileto all o' ye'chap ya. ¹⁸ Allempoña o' huacha'tet Pabloñapa' o' serrpare'tatanet, atet otanet:

—Sapa' señotenen atet o' ne'pohuanma sesho, ama't ahuaťoteñ allempo ñanóm ne'chap Asio all sey'chena. ¹⁹ Sapa' señotenen añecop netorrena Yomporecop ama añecpaye' netorreno attoch acheñenesha'pa' o'ch entenen e'ñe cohuen ñeñť e'ñe orrena. Napa' ama't neya'chpeñesha' netorrena Yomporecop tarraña judionesha'pa' nanac o'patennet. Ama't pa'namen nehuapoya e'ñe nemuero'chteñoťpa' chocma netorrena Yomporecop. ²⁰ Señotenen ñaña napa' o' neserrpare'tatuas ora allohuen ñeñť pocťetsa socop. Ama es na'nasotañpsaso ama't coñe'ta. Napa' o' ney'chatuas allohuenes parro allempo sap'chena ñaña o' ney'chatyesnomues e'ñe sepa'clo'mar. ²¹ O' neserrpare'tatuas añ pocťe' o'ch so'ctape'cherr ello cohuen Yomporecop ñaña añ pocťe' o'ch same'ñera Yepartseshar Jesucristo. Ñeñťpa' atet o' notuas allohuenes ñeñťes judioneshas ñaña ama't ñeñťes griegoneshas. ²² Te'pa' o'ch ahuerren Jerusaléño, tarro'mar o' sechaterren Yompor Puecamquēñ. Tarraña o'ch necherr Jerusaléño'pa' ama neñoteña' ñeñťcha' allohuen nehuapoya all. ²³ Aña neñoten o' eñotaten Parets Puecamquēñ ñeñťcha' atet pa'net o'ch yottañpesnetpa' o'ch muero'chtatnet. Ora allpon anetso attec'mach pa'net. ²⁴ Tarraña ama't atetpa' napa' ama neñ'cha'teno. Ama'tcha' nerromapa' pocťe'

nenteñ o'ch nerroma. Te'pa' añ palltetsa o'ch ne'nua netaruas. O'ch netsotatuon ora allohuen ñeñ atet llesensa'n Yepartseshar Jesús. Ñeñ atet llesensa'n Yepartseshar Jesús pa' ñeñtpa' attoch neserrpare'tach acheñenesha' ñeñ cohuen ñoñets atto Yompor pomuereño'tpa' a'queshpaterreycha'.

²⁵ O' alla oterraneterr Pablo:

—Te'pa' neñoteñ sapa' amach senterrno po'pocheño, ama't allohuenes allo' nechopeñe'chuanom serrpare'tnomue' Yompor po'cohuenña. Aña neñoten amach senterrno. ²⁶ Ñeñto'marña te'pa' o'ch neñotatas ñerra'm eseshas chenguërrtsapa' tarraña napa' ama es na'chencatamñpsase'te tarro'mar napa' chocma neserrpare'tatase't attoch amach sechenquërro. ²⁷ O' neserrpare'tatuas ora allohuen atet cotape'chateney Yompor. Ama es na'nasotamñpsaso ama't coñe'ta.

²⁸ Allempoñapa' alla oterraneterr ñeñt pompornesha' penet:

—Te'pa' seño'ta'tach. Te'pa' añ pocte' o'ch secuamñpeñ cohuen allohuen ñeñt ame'ñenaya Yompor. Atet'cha' sepa' atet ñerra'm ñeñt cohuanñpene' po'carrneror. Sapa'cho'ña atet'cha' sepa' samña o'ch secuamñpeñ ñeñt ame'ñetsa. Ñeñt'cha' setaruas sepa' atet llesenses Parets Puecamquëño't. Tarro'mar Yepartseshar Jesús pa' o' rroma ñocpuet ñamet. ²⁹ Napa' neñoteñ allempoch ama allo'tsenno'pa' o'ch huaponasa ñeñt'cha' seshquë', ñapa' mueneñcha' o'ch a'psatas Yompor po'ñoñ. Atet'cha' huapuet atet ñerra'm ma'yarrpa' ñerra'm huapapa' o'ch a'chencatuan allohuen carrnero. ³⁰ Ama't e'ñe sagattsapa' orrtet'cha' ñeñt'cha' seshquë', ñeñt ama Yomporeyaye po'ñoñpa' ñeñtpa' serrpare'tatase'tcha'. Tarro'mar ñetpa' mueneñet'cha' o'ch ame'ñatuaset e'ñe ñet poctapña.

³¹ O' alla oterraneterr Pablo:

—Te'pa' seño'ta'tach. Chocmach seyerpa'na tarro'mar sapa' seño'teñ o' ma'pa char chocma noctape'chatas cohuen—ama't ye'to, ama't ñaña tsapo. Ama't neya'chpeñesha' chocma noctape'chatase't.

³² 'Te' Yomporpa' cohuanñpsasepa'ch. Yomporepa'chña po'ñoñ seño'tate' pemuereña. Yomporepa'chña po'ñoñ sey'chate' attoch huomenc sepa' seyo'cher. Yomporepa'chña po'ñoñ sa'queshpaterre' atet ñerra'm ñeñt allohuen ñeñt pame'ñeñotet o' a'cohuentatuare'tterret. ³³ Ñaña napa' ama neye'chapreto po'psheñeñ po'çllayor, amapa' pa'shtam ama neye'chapreto. ³⁴ Sapa' seño'tenen ñeñt allpon nepalltenapa' e'ñe notot netaruasa' atto nechen ñeñt nepallta'yena. Ñaña e'ñe na netaruaso'tpa' es napa'yeñ ñaña ñeñt noctene'. ³⁵ E'ñe na netaruaso'tpa' chocma neñotatenes ñeñt poctetsa o'ch yetaruasa' attoch es yechyes alloch yeyenpue' ñaña po'psheñeñ ñeñt es palltetsa. Añ pocte' o'ch yeyerpueña atet otye't Yepartseshar Jesús. Ñapa' atet ote't: “Nanac yocshena ñerra'm esempo es yapa'yeñ po'psheñeñcho, añña ama tama yocsheno ñerra'm esempo po'psheñeñpa' o'ch es apueney ya.”

³⁶ Ñeñta otuapa' o' concorpa o' ma'yochatnenanet. ³⁷ Añña acheñenesha'pa' pomor-renteño'tet Pablo pa' o' yahuanrrortet. A'chono'chetpa' o' tso'ttsapa'chet. ³⁸ Atarr llequët nanac. Atet o' otanet Pablo ñeñtña nanac llecatahuet tarro'mar ñapa' otanet “amach senterrno arr patsro.” Allempoñapa' o' co'ta'neñet Pablo arrohua allo'tsen bote.

21

Allempo o'ch alla cherrerr Pablo Jerusaléño

¹ Allempoña o' yesa'nenanetpa' o' ahuanñperryerr boto. Allotñapa' pa'charra yep'e'pa' o' ye'chap Coso. Tsapatñapa' arr ye'chap Rodaso. Allotñapa' arr yetsotosa Pátaro.

² Pátaroñapa' o' yentos po'poñ bote ñeñt'cha' tatsa Fenicio. Yañapa' o'cho' ya'tapos allotñapa' ahuanñperryerr boto. ³ Allempoña yetamñpena sa'popa' yentnom coñe't pats ñeñt pa'so'cheñ Chipre, e'ñe arro't yentnom ye'chcoterot. Atteñapa' o'cho' yemñtamñpes boto, arr yesechena Sirio. Allempoñapa' arr yetsotosa all oteñet Tiro, tarro'mar allpa'

o'ch a'suatatsre'tet botoŋ. ⁴ Yañapa' o' yesua attoch yentnoñ ñeñt ame'ñetsa all. Allñapa' alla ya'posa cancherrmat. Ñeñña ame'ñetsa allpa', ñetñapa' ochet Pablo:

—Amach petatsto Jerusaléño.

Tarro'mar Parets Puecamquëña' ahuo't eñotatanet atetcha' pet Pablo all Jerusaléño. ⁵ Tarraña allempoña o' met cancherrmatpa' o' alla yahuanerrerr. Allempoña allohuen yacmanesha'pa' coŋa'nemyet pueblot a'yenet, ñaña puetaporeshohuenet ñaña puechemerneshet. Allñapa' all yeconcorposa ontapopa' o' yema'yochosa all. ⁶ Allempoña o' yema'yochuapa' o' yeso'tenanet. Allempoña yapa' o' ya'tenerr boto, ñetñapa' o' ahuanerret pa'paclo.

⁷ Allempoña o' yenerr Tirotpa' arr yetsotuenerr Tolemaido. Allñapa' all yehuomcha'tnoñ ñeñt ame'ñetsa. Allñapa' all yepatrranom yet. ⁸ Tsapañapa' o' yahuanenerr, allempoñapa' arr yetchap Cesareo. Allñapa' o' yebe'tosos Felipe pa'paclo, allpa' allcha' yommosa. Añ Felipepa' ñeñt serrpare'tene' cohuen ñoñets. Ñaña ñeñtara Felipe ñeñt net ahuaña ñach epatyehahuet rreñets epuet po'psheñnečno pechapshëña. ⁹ Añ ñeñtara Felipepa' echenan pa'tatssheña po'sñesha'. Ñetpa' ama arrollareteto. Ñetñapa' nanac a'poteññañet ñamet Yompor po'ñoñ. ¹⁰ Allempoña ya'llponmotos allpa' o' huapa ñeñt a'mtene' Yompor po'ñoñ añ pa'so'cheñ Agabo. Ñapa' Judeot huapa. ¹¹ Allempo huapapa' o' pueyosan Pablo po'chanar. Añña chanaretspa' Agabo ñañaña huancatatsa e'ñe potot ñaña pa'tcoŋ. O' huanca'huapa' atet otan Pablo:

—Ñeñtpa' atet oten Parets Puecamquëñ, ñeñteŋ echene' añ chanaretspa' judionesha' ñeñt Jerusaléño'tsa'yenpa' atetcha' huancapet atet nehuanca te' ñañaña. Ehuanca'retcha' o'ch pomapet allo'tsen acheñenesha' ñeñt ama judioneshayayeto.

¹² Ñeñña atet ye'mpa' yotare'ch Pablo:

—Amach petatsterro Jerusaléño.

Ñaña ñeñt acheñenesha' ñeñt allo'tsa'yenpa' atet otare'chet Pablo ñamet. ¹³ Allempoña Pablopa' otanet:

—Eso'mare'tña nanac seyahuena, te'pa' o'ch sellcaten. Napa' e'ñe pocte' nenteñ huanca'netepa'. Ñaña e'ñe pocte' nenteñ nerromuepa' Jerusaléño, attoch nerroma e'ñe neserrpare'teñoŋ Yepartseshar Jesús po'ñoñ.

¹⁴ Pabloñapa' ama e'mñotyë. Allempoña ama erroŋ yepapa' o'huañ erroŋ yoch, añña yoter:

—Ñehua, ñerra'm atette' muenen Yomporpa' ama'tpa' attepa'ch.

¹⁵ Allempoñapa' o' yañño'tatsre'tena. Allempoña o' yañño'tatsre'tuapa' yahuanenerr Jerusaléño. ¹⁶ Añña puesheña'tets cesareo'marnesha' ñeñt ame'ñetsapa' allenta coŋa'nenyet, arr nehuerryeta' all yetchena Mnasón ñeñtara ñeñt chipro'marnesha'. Ñaña' ahuaŋtoŋ ame'ña'hua. Pa'pacloñapa' all ya'posa.

Allempo Pablopa' emo'tuerr Jacobo ñeñt Jesús pa'mo'nasheñ

¹⁷ Allempoña o' yetherr Jerusaléño'pa' añña ñeñt ame'ñetsa allpa' e'ñe pocsheñesha' agapyet. ¹⁸ Tsapañña puetarenpa' yahuanma parrocmá Pablo o'ch yenteña' Jacobo. Añña allohuen ñeñt pompornesha' pen acheñenesha' ñetpa'cho'ña alla yentosanet, allo'tsa'yenet ñamet. ¹⁹ Pabloñapa' o' huomcha'tosanet allohuenet. Huomcha'tuanetpa' allempoñapa' serrpare'tatuerranet e'ñe ora allpon Yompor po'huamencoŋ o' etsotuoñ e'ñe ñocop. Serrpare'tatuerranet atto acheñenesha' ama't ñeñt ama judioneshayayetopa' o' ame'ñatuanet ñamet.

²⁰ Ñeñta e'mhuetpa' nanac aye'chochtatoñet Yompor. Tarraña allempoñapa' atet ochet:

—Tarraña masheñe, ahuo't peñoŋ te'pa' shonte' mil judionesha' o' ame'ñenet ñamet. Ñetpa' e'ñe huomenco otenet añ palltetsa allohueney ñeñtey judioneshay o'ch yetpoŋhua

atef otye't Moisés. ²¹ Ñetpa' o' e'mare'tonapet peñoñ añe'no' peychaten judionesha' ñeñt ye'cha'yetsa po'poñ anetso all ye'cha'yena ñeñt ama judioneshayaye atfo año' pocte' o'ch puesuerret Moisés po'ñoñ. Ñaña o' e'mare'tapet ahuo' potuanet amach tsorratsteto puechemeretollesha', ñaña amo'ch patsteto atef yey'chena ahua'toteñ.

²² Allempoñapa' alla otereterr Pablo:

—Ñehua, te'pa' ¿errote'tcha'ña yepaña te' tarro'mar po'ño'chpa' o'ch e'mare'tapet o' pecherr arr? ²³ Ñehua, te'pa' o'ch pe'mñotey o'ch yota'p ñeñt'cha' atef pe'pa. Ñehua, arrpa' arro'tsen pa'tatssheña ñeñt netset ñetañeña ñeñt'cha' atef pet Yomporecop, ñeñt atef yey'chena ya ñeñt'ey judioneshay. ²⁴ Te'pa' añe pocte' ñeñt'cha' atef pe'pa. O'ch panemñ añ pa'tatssheña e'ñe epaspa' o'ch sa'cohuentatena' ñeñt atef anaret Yomporecop ñeñt atef yey'chena ya ñeñt'ey judioneshay. Ñaña añ pa'tatssheñapa' o'ch petsa'tanet atfoch shopena'tatet, ñaña ora ñeñt pallatsapa' o'ch petsa'tanet. Allochñapa' allohuen judionesha' o'ch eñochet po'ño'chpa' ama atfeyaye ñeñt atef e'mare'tet pocop, tarro'mar allempopa' o'ch eñotapet papa'cho'ña o' pe'pohua ñeñt atef oteney Moisés po'ño'ño'. ²⁵ Tarraña añecop ñeñt ama judioneshayaye ñeñt o' ame'ñapa' yapa' o' yemñanet carta, o' yotuanet cartot ñeñt pocte' yenten ñocpuet ñeñt'cha' atef pet. Ñeñt'pa' añe'chno: Amach rratsteto po'chets ñeñt muetsenet aye'chcataret'ecop ñeñt po'yomporer penet. Ñaña o' yotuanet amach rratsteto es po'rras, ñaña amach rratsteto ñeñt muetsenet ñeñt atfa a'panare't. Ñaña o' yotuanet amach chetapretatsteto taporets. Ñeñt'ña yotanut yecartot.

Allempo rromapueret Pablo all Parets pa'paclo

²⁶ Allempoña Pablopa' o' anman añ pa'tatssheña. Tsapañapa' o' a'cohuentatet e'ñe parro, ñeñt atef ye'chena judionesha'. Allempoñapa' ahuanmuet Parets pa'paclo o'ch eñotatenaneta' esempoch o'ch met allponmat e'ñe allempoch o'ch a'cohuentatuet. Allempochña Pablopa' o'ch muetsatanet Partsocop carrnero puesheña'tt'ocmuet, ñeñt'pa' atef pena judionesha' Yomporecop.

²⁷ Tarraña o' taya chapmoch cancherrmat allempoch o'ch a'cohuentatuetpa' añña judionesha' ñeñt huetsa Asi'otpa' o' eñchet Pablo all Parets pa'paclo. Ñeñt'apa' o' atsrre'matachet acheñenesha' atfoch o'ch e'moñe'chet Pablo. Allempoñapa' o'ch rromuet Pablo. ²⁸ Pa'tsrre'mueño'tetpa' o' rranare'tyeset, otyeset:

—Masheñnesha judioneshacha' o'ch seyepa'y. Te'pa' o' yenter añ acheñ ñeñt ye'moñe'tene' ñeñt'ey judioneshay ñeñt'ara ñeñt o' puesuerran Moisés po'ñoñ ñaña ñeñt o' a'sosyatuan Parets pa'paquell. Te'pa' o' erracmañen atef o' ye'chatyesuan acheñenesha'. Elloña te'pa' o' abe'tatan ñaña acheñ ñeñt ama judioneshayaye arr Parets pa'paclo. Allochñapa' ahuo'ch a'sosyatuan Parets pa'paquell.

²⁹ Tarro'mar atef otet o' eñchet Pablo epuet Tróximo all chopeñe'chen epuet Jerusaléño. Tróximo ñeñt'pa' efeso'marnesha', ama judioneshayaye. Ñetpa' cho' otenapuetañ ñato' Pablopa' o'te' abe'tatan Tróximo all Parets pa'paclo ñeñt ama pocteye' enteno judionesha'.

³⁰ Allempoñapa' allohuen acheñenesha'pa' o' atsrre'muetpa' matrra'tet allo'tsen Pablo o' rromuetpa' o' cheta'nmet a'yenet Parets pa'paclo't. Allorocma yotetuet Parets pa'paclo. ³¹ O' muetsamochet Pablopa' añña ñeñt solltarnesha' pa'm'cha'tare'terpa' o' e'manet atef nanac ama'toch'tena allohuen acheñenesha' all Jerusaléño.

³² Ñaña'pa' o' anman allpon solltarnesha' ñaña allpon capitánnesha'pa' o' matrra'tet allo'tsa'yen acheñenesha'. Allempoña acheñenesha'pa' o' entapan solltarnesha' epuet pa'm'cha'tare'terpa' o'huañ chota'chet Pablo. ³³ Allempoña chap am'cha'tare'terpa' o' rromatan Pablopa' o' huanquét epa cadeno. Allempoñapa' a'p'to'tanet:

—¿Eso'tña pa'so'cheñ añ acheñer?

Ñaña o' a'p'to'tanet:

—¿Esté'ña o' pohua ña?

³⁴ O' anapyeset po'poñe'ttSOCMA. PUESHEÑA'tETS acheñpa' otyeset atet cotape'chet ñet, po'potantaññapa' atet otet po'poñ ñeñt atet cotape'chenet ñamet. Nanac ama'tochtenet ñeñto'marña ama eñocheto e'ñe po'ñoçh ñeñt atet o' pohua Pablo. Ñeñto'marña amcha'taretpa' anmatan Pablo pocollo all shontena solltarnesha'. ³⁵ Allempoña o' çhapuet allof a'tenet pocollopa' añña solltarnesha'pa' o' enatnomet Pablo eno, tarro'mar taye'to' acheñenesha' pa'tsrre'mueño'pa' muetseñet. ³⁶ Tarro'mar acheñenesha'pa' o' cofa'huanmet. Puerranare'teño' otyesnomuet:

—¡Semtseñaca'ye!

Allempo Pablopa' e'ñe cohuen eños ñocop allo'tsa'yen ñeñt e'moñe'tene'

³⁷ A'tapachet pocollopa' Pabloñapa' otosan solltarnesha' pa'mcha'tareter, eños griegaçho, ot:

—Te' napa' nemneñ o'ch notap' paterr ñoñets.

Amcha'tareñapa' och:

—¿Po'ñoçha't pe'muen griegaçh?

³⁸ Alla otererr amcha'taret:

—Papa' ¿ama't añeyaype egipto'marnesha' ñeñt atsrre'mate' ahuaña acheñenesha' atto ñetpa' atpare'chet gobierno', ñeñtara ñeñt ahuanmue' pa'tatsoch mil amtsañnesha' a'yo amarato?

³⁹ Pabloñapa' alla otererr:

—Napa' amaca'ye ñeñteyayno, napa' judioneshan ñeñten tarso'marneshan, ñeñtara anets nanac atarr ñeñt allara Cilicia. Napa' o'ch notare'tap' attoch pemnaten o'ch neños acheñenesha'cop.

⁴⁰ Allempoñapa' o' muenatan Pablo o'ch eños. Pabloñapa' alla tomos allotecma a'tenetpa' echantosan pot attoch muetsoñeñtua acheñenesha'. Allempoña o' muetsoñeñtuetpa' Pabloñapa' o' eños hebreaçho, atet otanet:

22

¹ —Masheñeshacha' ñaña nomporneshacha', o'ch se'mñnoten ñeñtcha' atet neños e'ñe nocop.

² Allempoña e'mhuet atto o' serrpare'tatanet e'ñe ñet po'ñoñetopa', allempoñapa' o' e'ñe muetsoñeñtuet poctacma. Pabloñapa' alla oterraneterr:

³ —Napa' judioneshan, arr ne'ñalleta Tarso e'ñe alla Cilicia. Tarraña arrña e'ñe eñotñan Jerusaléno. Ñeñt neyçhate' napa' ñeñtpa' Gamaliel. E'ñe ña pueyçhateño'tenpa' netso-tuoñ e'ñe poctacma ñeñt Moisés po'ñoñ ñeñt atet anaret ñeñtcha' atet pa' yatañneshañ. Nanac nema'yoçhra ñeñt Yomporecop ñeñt atet sepena te' sa. ⁴ Napa'çho'ña ahuañmo'chapa' nanac nemueroçhtache't ñeñt cotene' Jesús pocta'pña. Napa' o'ch nerrmanatanet, allotñapa' o'chçho' nehuancatanet, ñaña o'chçho' nabe'tatanet ñaña cárcelo. Ñaña nemtsatatie't—yacmanesha' ama't ñaña coyaneshaçhno. ⁵ Ama't corne-sha' ñeñt nanac amcha'taretpa' eñotuane't ñeñt atet nepe't. Ñaña allohuen ñeñt pom-pornesha' penetpa' e'ñe eñotuennet ñamet ñeñt atet nepe't. Ñet allempopa' ahuo't apnet orden ñeñtcha' napueña' yamo'ts judionesha' ñeñt Damasco'tsa'yen. Añ orden ñeñtpa' alloch mueñanet attoch o'ch nerrmanatie't ñeñt ame'ñaye't Jesús. Ehuancaretetpa' o'ch nahuanmanet Jerusaléno allcha' yecoñchatuanet.

Allempo Pablopa' serrpare'tatanet atto ello cotape'cherran cohuen Yomporecop (Hch. 9.1-19; 26.12-18)

⁶ 'Atteñapa' o'çho' ahuen Damasco. Allempoña neçhapmoch Damascopa' allempo o' çhapmoch pocto. Ñeñtña nanac poptetsa entotpa' machayotepa'tcha' çhoyo'tamñsapuen. ⁷ Allempoña çhoyo'tamñpsen e'ñe neshopa' nañapa' alla nerrmopra

patso. Allempoña nečhap patsopa' ne'm ñoñets ñeñt atet oten: “¿Eso'mare't Saule, pemueročhtatennanña ñeñt name'ñenaya?” ⁸ Nañapa' o' not: “¿Eshape't Ayochreshate eñets?” Ñeñt eñetspa' alla oterrerr. “Napa' ñeñten Jesús en ñeñten nazareto'marneshan, narramche'ña atarr pemueročhtaten.” ⁹ Ñeñtña allo'tsenen e'ñe parropa' ñetpa'cho'ña entetca'yeña ñeñt nečhoyo'te' ñeñtñaapa' cha yore'tanet tarraña ñetñaapa' ama eñochetoña ñeñt atet notaretta. ¹⁰ Nañapa' o' alla noterrerr: “¿Esté' Partseshacha' poctetsa ñeñtcha' atet nepa?” Partseshach'ña Jesúsapa' alla oterrerr: “Te'ñapa' o'ch petanta o'ch ahuep Damasco. Allcha'ña otapet allohuen ñeñt anaret ñeñtcha' atet pepa.” ¹¹ Allempoñapa' o'huañ nenta tarro'mar o' rrechaten ñeñt po'ptetsa ñeñt nečhoyo'tam'pse'. Ñeñtña noctene' ñetñaapa' echa'nomnet notot. Attoña chapatnet Damasco.

¹²⁻¹³ 'Yečhap Damascopa' allempoñapa' huapa puesheñarr añ pa'so'cheñ Ananías. Añña Ananíasapa' nanac ame'ñenana ora allohuen ñoñets ñeñt atet anaret yocop ñeñtey judioneshapay ñeñtcha' atet ye'pa. Añña judionesha' ñeñt ye'cha'yetsa Damascopa' nanac cohuen enteñet Ananías. Ñañaapa' huapa neshopa' allenta ponmosnapa' otosen: “Te'pa' masheñe Saule pecuerrepa'ch.” Nañapa' allorocmuepa'tcha' necuerr, allempoñapa' neñch Ananías. ¹⁴ O' alla oterrerr Ananías: “Añ Yompor ñeñt Po'yomporer pe't yatañeshañ, ñaca'yeña pa'crerre'ña pa' ama't ahuatoteñ añecop o'ch peñotuerrñañ atet muenen ña. O' muenata'p ñaña o'ch penterrñañ pa'ña Puechemer ñeñt e'ñe pocte' es pets. Ñaña o' muenata'p o'ch pe'mñotoñ e'ñe ña po'ñoñ ñeñt atet o' otua'p. ¹⁵ Te'pa' ñeñt'pa' atet'cha' pe'pa, o'ch pa'po'ñoñ Jesús po'ñoñ erracmañen ñeñt atet o' pentua ñaña ñeñt atet o' pe'mua. ¹⁶ Te'pa' añ palltetsa o'ch petanta, e'ñe pa'me'ñeñoñ Yepartseshar Jesúsapa' o'ch pa'pataretterra, attochña e'shohuaretterra po'chñar.” Neñt'pa' allohua atet oten Ananías.

Atto Pablopa' eñotatanet ñapa' ña serrpare'tatene' ñeñt ama judioneshayaye

¹⁷ O' alla oterranneterr Pablo:

—Allempoña o' met allponmatpa' o' nohuerrerr arr Jerusaléño. Parrochña allempo nema'yochena Parets pa'paclopa' allñaapa' orrtona atet ñerra'm cho es ye'chopo'ten. ¹⁸ Allempoña o' orrtona Yepartsesharpa' atet oten: “Tayecma o'ch ahuerrep' arro't Jerusaléño't, tarro'mar arrpa' amach esesha' pe'mñotaye allempoch pa'po'ton neñoñ.” ¹⁹ Nañapa' alla notererr: “Partseshacha' ama't atet'pa' allohuen acheñenesha'pa' e'ñe eñotuennet atet o' ne'pohua. Eñotuennet atto napa' nebe'tose't judionesha' po'prahuo atto nenalle'tache't ñeñt pa'me'ñenaya, ñaña atto nabe'tatanete't cárcelo. ²⁰ Ama't allempo muetset Estebañañ ñeñt pa'po'taye't peñoñpa' napa'cho'ña allempopa' e'ñe pocte' neñch muetsetepa'. Napa' allña necuam'psanet pa'shtam ñeñt rrolle'te'. All necuapretpa' napa'cho'ña e'ñe pocte' neñch atet'pa'ña pet.” ²¹ O' alla oterrerr Yepartseshar: “Ama't atet'pa' te'pa' o'ch ahuep o'ch nemña'p allapa' allo'tsa'yen acheñenesha' ñeñt ama judioneshayayeto.”

Allempo solltarnesha' pa'm'cha'tare'terpa' abe'tatan Pablo o'pono

²² Ñeñt'ña otua Pablopa' añña acheñenesha' ñeñt'ña e'muetpa' o'huañ e'mñochet. O' alla rrannarterre'terr, atet otet:

—¡Semtseñaca'ye! Ama pocteyaye o'ch corra ñeñt atet acheñ arr patsro.

²³ Pa'tsrre'mueño'tetpa' alla rrannarterre'terrpa', o' gogo'tyeset pa'shtam enonet, allo'tpa' a'rrotsetyeset ñaña patspa' o' huapore'tyeset enonet. ²⁴ Allempoñapa' añña ñeñt solltarnesha' pa'm'cha'tare'terpa' o' abe'tatan Pablo o'pono. O'ch ashtet attot'cha' a'meta'huan ñeñt atet o' pohua. Ñapa' mueneñ o'ch eñoch esocopte' nanac ama'to'chtenet ñocop. ²⁵ Allempoñapa' o' huanqu'et Pablo attoch ashtet. Huanca'huet Pabloñaapa' otan capitán ñeñt tets allame'tets:

—Ta, ¿pocte't senteñ o'ch sashte' acheñ ñeññ romanona'tar, ñaña ama señoña' ñeññ atet pena? Ñoñets ñeññ atet anaret Romotpa' ta, ¿pocte'te'?

²⁶ Ñeñña e'm capitánpa' o' ahuo' allo'tsen pa'mcha'tareterpa' atet otos:

—¿Erroña't pōctape'cheññañ añ acheñer? Añpa' romanona'tarca'ye.

²⁷ Añña ñeññ solltarnesha' pa'mcha'tareterpa' o' huapapa' atet otosan Pablo:

—¿Po'ñocha't romanona'tarep'?

Pabloñapa' o' anap:

—Napa' ñeññenca'ye.

²⁸ Ñeñña añcha'taretpa' alla oterranerr Pablo:

—Napa' o' netsa'ta shonte' quelle attoch a'punta'net attoch napa' romanona'tar pennet.

Pabloñapa' alla otererr:

—Napa' atot ne'ñalleta, tarro'mar na nomporpa' romanona'tar.

²⁹ Añña solltarnesha' ñeññ autsa ashtayen Pablopa', allorocmo' alla cheta'yerret a'yenet. Ñeññ pa'mcha'tareterpa' ñapa'cho'ña cha yoren, tarro'mar o' chapoña pueyocho o' huanca'huet acheñ ñeññ romanona'tar.

Allempo eños Pablo allo'tsa'yen ñeññ chocma a'pocatyene' ñoñets

³⁰ Tsapaña puetarenpa' añña añcha'taretpa' o' agotatan cornanesha' ñeññ pa'mcha'tareternesha' pen allohuen judionesha' po'cornaneshar, ñaña o' agotatan ñeññ chocma a'pocatyene' ñoñets judioneshap. Allempoña apchetpa' o' pueyanperet Pablo allo huanquetpa' o' anmet allo'tsa'yen añcha'taretnesha'. O' chapachetpa' o' tomatoset e'ñe allame'tets. Añña añcha'taret romanonesha'pa' mueneñ o'ch eñoche'ñe po'ñoche' esocopte' otteñe'cheñ judionesha'.

23

¹ Pabloñapa' o' cohua'yesan allohuen ñeññ chocma a'pocatyene' ñoñets. Allempoñapa' atet otanet:

—Masheñneshacha', napa' chocma nocrena cohuen Yomporecop, ama't ahuaoteñ ama't ñaña teme'ttsen. Yomporpa' entennante' e'ñe cohuen neyoche'.

² Añña cornesha' Ananías ñeññara ñeññ nanac añcha'taretpa' atet otan ñeññ tets e'ñe allame'tets Pableshe, atet otanet:

—Chosañaca'ye asnama'te'.

³ Allempoña Pablopa' otan añcha'taret, atet och:

—Yomporpa' tsa'tatuerrpepa'ch, tarro'mar ama't porrtenañ e'ñe cohuenpa' peyocho'ropa' ama masosyape. Ñaña ñeñño'marña anaretep pa' arr attoch papa' peñotaten ñato'chate' nepena ñeññ ama pocteyaye ñeññ atet otaney ñoñets ñeññ atet anaret. Tarraña pañapa' o' atta pasnama'taten. Tarraña ñeññpa' ama pocteyaye ñeññ atet otaney ñoñets ñeññ atet anaret.

⁴ Añña ñeññ tomcha'tets allame'tetspa' o' che'ptare'chet Pablopa' atet ochet:

—Papa' atarro't cohuen penteña o'ch pesochatse'ch cornesha' ñeññ nanac añcha'taret ñeññ nen Yompor.

⁵ Pabloñapa' anapanetpa' atet otanet:

—Napa' ama masheñneshacha' neñoteñe añmapa' ñeññte' cornesha' ñeññ nanac añcha'taret. Ñerra'm neñoteñeña' amach nochñe atet, tarro'mar anaret Yompor po'ñoño atet: “Ama asochatse'pahuo acheñ ñeññ añcha'tarettetsa socop.”

⁶ Allempoñapa' o' cotape'ch Pablo. Añña ñeññ chocma a'pocatyene' ñoñets patantarña' saduceonesha', po'potañña' fariseonesha'. Allempoña Pablopa' o' eñoche' atetpa' allempoñapa' o' eños huomencpa', atet otanet:

—Masheñeshacha', napa'cho'ña fariseoneshan. Natañneshañpa'cho'ña fariseoneshet. Ñeñto'marña te'pa' otteñe'chennet tarro'mar napa' name'ñena atto ñerra'm yerroma, Yomporpa' tantaterreycha' esempohuañen.

⁷ Ñeñña otua Pablopa' allempoñapa' ama patrraye' cotape'cheto ñeññ actape'chatañnesha'. Añña ñeññ fariseonesha' ñetpa'cho'ña cotape'chet paterr; po'potantañña ñeññ saduceonesha'pa', ñetpa'cho'ña o' cotape'chet po'poñ. Amaña patrraye' cotape'cheto. ⁸ Ama patrraye' cotape'cheto tarro'mar saduceonesha' ñetpa' cotape'chenet ñerra'm yerromapa' amach yetanterro. Ñaña ñetpa' otenet ama eñalle Yompor po'millañoñeñer ñeññ huetsa entoñ, ñaña ñetpa' otenet ama eñalle yecamquëñ. Tarraña fariseonesha' ñetpa' cotape'cheñet po'ñoñ ñerra'm yerromapa' yetanterrach. Ñaña ñetpa' otenet po'ñoñ eñall Yompor po'millañoñeñer ñeññ huetsa entoñ, ñaña po'ñoñ eñall yecamquëñ. ⁹ Allempoñapa' ñetañeño' nanac ama'tochtet. Atteñapa' puesheña'tets fariseonesha' ñeññ nanac etsotene' ñoñets ñeññ atet anaret o' tomosetpa' eñosotet Pablocop, atet otet:

—Añ acheñer yapa' ama yenteññañe erra'tsente'ña po'chñar. Po'ñoñpa' ñato' orrtoña Yompor po'millañoñeñer ñeññ huetsa entoñ amapa' ñato' es ñeññ camquëñets ñato' ñeññ orrtenoya. Ñeñto'marña yapa' amachña cha yepatare'tatsche Yompor ñerra'm ñate' atet muenatene'.

¹⁰ Allempo nanac ama'tochtenetpa' añña solltarnesha' pa'mcha'tareterpa' o' cotape'ch, atet ot:

—Ñato' o'ch rraquët Pablo.

Ñeñto'mar o' chore'tan po'poñ solltarnesha' o'ch huapuet o'ch chetereta' Pablo alotpa' o'ch aneret pocollo all shontena solltarnesha'.

¹¹ Tsapañña tsapopa' o' alla orrteññañerr Pablo Yepartseshar, atet otos:

—Amach pellcatsto, tarro'mar Romopa'cho'ña all palltena o'ch pa'poton neñoñ atet o' pa'potuon arr Jerusaléño.

Allempo judionesha'pa' atarr o'pachet Pablo o'ch muetset

¹² Tsapañña puetarenpa' añña judionesha'pa' atarr o'pachet Pablo ahuo'ch muetset. Ñetpa' o' a'pochtachet, atet otet:

—Yapa' amach yerrerroña' ñerra'm amach o' yemtso Pablo ñaña amach es yorrerro. Atteña ñerra'm amach attetopa' ama'tpa' esepa' yetantoya.

¹³ Ñeññña o'patenayapa' ñato' metente' pa'tatsot charrasheña. ¹⁴ Allempoña o' a'pochtatuetpa' ahuanmuet ñaña allo'tsa'yen cornanesha' ñeññ pa'mcha'tareternesha' pen allohuen judionesha' po'cornaneshar ñaña allo'tsa'yen ñeññ pompornesha' penet. O' chapuet allpa' atet otoset:

—Yapa' o' ya'pochtatie atet: Yapa' yoten ñerra'm amach o' yemtso Pablopa' amach yerrerro. O' ya'pochtatie ñaña atet: Atteña ñerra'm amach attetopa' ama'tpa' esepa' yetantoya.

¹⁵ Alla oterreterr:

—Ñehua, te'pa' o'ch yotas ñeññcha' atet sepa. O'ch soteña' ñaña ñeññ chocma a'pochtatyene' ñoñets allo'tpa' e'ñe parrocmapa' o'ch semña ñoñets allo'tsen solltarnesha' pa'mcha'tareter, o'ch soch huapachetepa' Pablo sesho attoch o'ch señoñ este' o' pohua. Tarraña ama'tcha' atet seshcanetpa' yañapa' allo'tsa'yeneycha' toño attoch yapa' o'ch yerrmañ.

¹⁶ Añña Pablo pa'ñachorpa' o' e'mare'ch cha o'pateññañet pa'go'pa' o' ahuo' solltarnesha' pa'paclopa' o' otenana' pa'go' Pablo. ¹⁷ Alotña Pablopa' o' chore'tan puesheñarr capitán, atet och:

—Añ huepuesha'pa' o'ch panemñ allo'tsen pa'mcha'tareter tarro'mar ñapa' atarr mueneñ o'ch es a'meñena'.

¹⁸ Capitánñapa' o'cho'ña anman huepuesha' allo'tsen pa'mícha'tareter. Allempoña chappa' atet otosan pa'mícha'tareter:

—Añ Pablo ñeñt ehucaretpa' ahuo't chore'ten allo'tpa' oten ahuo'ch nanemñ añ huepuesha' pesho tarro'mar ñapa' nanac mueneñ o'ch es a'metena' pesho.

¹⁹ Añña amícha'taretpa' o' echa'nman huepuesha' pototpa' o' anemñ a'yenetpa' atet otos:

—Ñehua, o'ch pōten este' pemnen o'ch pōten.

²⁰ Huepuesha' ñapa' atet och:

—Añña judionesha'pa' o' a'pōtchet attoch o'ch enamapet o'ch pemñe Pablo tsapa't allo'tsa'yen ñeñt chocma a'pōtatyene' ñoñets. Ñaña o'ch otapet añecpo'ch pemñe atto'ch eñochet e'ñe po'ño'ch este' o' pōhua. ²¹ Tarraña amach pame'ñatstaneto erro'tencha' otospet tarro'mar metente' pa'tatso't charrasheña judionesha' ñeñtcha' camroya toño ñeñtcha' rromapue' go'. Ñetpa' o' a'pōtchet amach rrerreto ñaña amach es orreto ñerra'm amo'ch muetseto go'. Ñaña o' a'pōtchet ñerra'm amo'ch attetopa' ama'tpa' esepa'to' tantahuet. Te'pa' añña palltetsa ñeñtcha' atet pōtanet.

²² Amícha'tareñapa' atet otan huepuesha':

—Tarraña amach esesha' pōtatsto pāpa' o' pōtuenna'.

Ñeñta otuepa' allempoñapa' o' mueñer.

Allempo chapachet Pablo allo'tsen gobernador Félix

²³⁻²⁴ Allempoña amícha'taretpa' agotatan epsheña po'captāner. Allempoña o' chapueta' atet otapanet:

—Cherra'ch a las nueve tsappa' o'ch secamrat doscientos solltarnesha' ñaña setenta ñeñt montenaya cahuall, allo'tpa' ñaña doscientos ñeñt orrene' muetsamets alloch quellaret. Allo'tpa' o'ch sanem paterr cahuall amapa' epa alloch monta'nma Pablo. Allo'tñapa' o'ch sahanma Cesareo attoch se'chapach cohuen Pablo allo'tsen gobernador Félix.

²⁵ Allo'tpa' quellcan ñaña carta ñeñt'pa' atet ot: ²⁶ “Gobernador Félix ñeñt'p' nanac cohuenep' amícha'taret, na Claudio Lisiaspa' o'ch nehuomícha'tap' añ necarto't. ²⁷ Añ yacmapa' ahuo't rromue' judionesha' o'ch muetsetañpa' nañapa' o' neñoch ñapa' romanona'tar. Nañapa' nehuapa epan nesolltarnesharpa' o' na'rroyatatos. ²⁸ Napa' nemneñ o'ch neñoch esocopte' nanac otteñe'cheñet, ñeñto'marña napa' o' nanemñ allo'tsa'yen ñeñt chocma a'pōtatyene' ñoñets ñeñt atet ye'chenet ñet. ²⁹ Tarraña napa' neñotoñ ñeñt'cop otteñe'cheñet, tarro'mar ñetpa' otenet ama atteye' peno atet anaretet ñocpuet. Ñeñt'epaña otteñe'cheñet tarraña ama añecpayaye attoch o'ch yemtsach amapa' o'ch yey-ottam'psach. ³⁰ Allempoña napa' o' ne'mare'ch judionesha'pa' cha o'pateña o'ch muetset. Ñeñto'mar te'pa' o'ch nemñe pesho tayecma. Ñaña o' notueña ñeñt otteñe'chene' arrpa', te'pa' a'meteñetepa' pesho esocopte' otteñe'cheñet. Te'pa' ñeñtach notap'.” Allohua huañ po'carta.

³¹ Allempo atet otanet pa'mícha'tareterpa' añña solltarnesha'pa' e'ñe a'nahua anmet Pablo tsapocma. Allo'tñapa' o' chapuet all anetso pa'so'cheñ Antípatris. ³² Tsapa'tña añña solltarnesha' ñeñt chope'chets pa'tcōpa' allo'ta puerra'cherret Antípatriso't. Allo'tpa' añña anmue'ña Pablo Cesareohua ñeñt montetsa cahuallo. ³³ Allempoña chapuet Cesareopa' o' aposet gobernador carta. Ñaña o' chapachet Pablo e'ñe ñesho. ³⁴ Allempoña gobernadorpa' o' lleya'huan cartapa' a'pō'tan Pablo:

—¿Erra'tsena'tña anetsro't pehuapa?

Ñañapa' atet och:

—Arro't nehuapa Cilicio't.

Allempoña gobernadorpa' o' eñoch allo't huapa ³⁵ allempoñapa' otan Pablo:

—Te'pa' allach ya'pōtachña' ato't hua'cha'ta' ñeñt pōtteñe'chene'.

Allempoñapa' o' mueñan po'solltarneshar cohuanmpsetepa' Pablo allara añcha'tareť Herodes po'palaciopahuo.

24

Allempo judionesha'pa' otteñe'choset Pablo allo'tsen añcha'tareť Félix

¹ Pa'mnarmatñoñapa' huapa ñeñť pa'mñcha'tareťer pen allohuen judionesha' po'cornaneshar, ñeñťpa' añ pa'so'cheñ Ananías. O' huapa ñaña allponsheña ñeñť pompornesha' penet. Alloťpa' huapa ñaña puesheñarr ñeñť pa'so'cheñ Tértulo ñeñťpa' ñeñťcha' eñosapretahuet. Allempoña huapuetpa' o' ahuanmuet allo'tsen gobernador attoch otteñe'choset Pablo. ² Allempoñapa' huapachet ñaña Pablopa' o' chore'chet ñanom Tértulo attoch eños ñanom. Ñañaapa' añecpa eños attoch otteñe'chet Pablo. Ñanompa' o' eños e'ñe cohuen gobernadorocop ñeñť Félix, atet ot:

³ —Pa gobernadoro, nanac cohuen yenteneř tarro'mar e'ñe potoť yocrrena e'ne cohuen ama eñalle attoch yečllaranna'ta. Ñaña řapa' o' řa'pocatonay e'ñe cohuen ñeñť yepalltena arr yenyo. Ñeñťo'mar ya te'pa' yemneñ o'ch yeparasyoso't pōcop attoch čhocma peyenpueney cohuen. ⁴ Te'pa' attoch amach alla nellapso eñosetspa' napa' nemneñ e'ñe pemorrenteñoťpa' o'ch pe'mñoten mame' ñeñťcha' notař. ⁵ Yapa' yeñoteñ añ yacmapa' nanac atsrre'močhtena, nanac moññe'tatyenana ora allohuen judionesha' atto te'pa' ama patrraye' cotape'cheneto. Ñaña añmapa' ñeñť pompor pen allohuen ñeñť cotene' pōcťpa'ña ñeñť huapatsa Nazaretōť. ⁶ Elloña te'pa' mueneñeñ o'ch a'sosyatuanen ñaña Parets pa'paquell, tarraña yañapa' o' yerrmue'. Ñaña yapa' yemneñeñ o'ch ya'pōcťacheñ atet anaret yocoppa' ⁷ tarraña o' huapa añcha'tareť Lisias epuet po'solltarnesharpa' e'ñe po'huamencocma o' puerratañpenyeta'. ⁸ Alloťñapa' atet otey ñeñťey otteñe'chene' yehuapuepa'to' pesho. Te'pa' řachña a'řto'tare'te' attoch peñoch řaña ora allohuen attōť yotteñe'cheñ. Añpa' allohua atet eños Tértulo ñeñť eñosapretahuet.

⁹ Judionesha'pa'čo'ña atet otet:

—Po'ñočca'ye atet.

¹⁰ Allempoña gobernadorpa' o' yochan Pablo attoch eños ñaña. Allempoña Pablopa' atet ot:

—Napa' e'ñe nocsheñesha' o'ch neños pesho e'ñe nocop, tarro'mar napa' neñoteneř o' shonte' char atto řa'mñcha'tareťtena arr yenyo. ¹¹ E'ñe taya o' met čharramat puechena epomuet atto o' nema'yochuena' Parets pa'paclo all Jerusaléño. Ama't esesha' řa'řto'tpa' atetcha' otapet. ¹² Tarraña allempo ñetpa' ama entneto o' esesha' notnare't, ñaña ama na'tsrre'močhtana'che acheñenesha'. Ñaña ama na'tsrre'močhto ama't Parets pa'paclo, ama't ñaña judionesha' po'prahuo, ñaña ama't all chopeñe'chyen acheñenesha'. ¹³ Ñeñťo'marña te'pa' amate' erroten eñotatapeto añmapa' ñeñť e'ñe po'ñoč attōťa otteñe'chennet. ¹⁴ Napa' te'pa' añach na'meťa' pesho, napa' name'ñena ñeñť e'ñe alloch yequeshperra. Po'ñoč napa' añ name'ñena ñeñťara Yompor ñeñť Po'yomporer pe't yatañeshañ. Ñaña añ name'ñena ora allohuen ñoñets ñeñť atet anaret judioneshacop. Ñaña añ name'ñena ñeñť atet quellquē't ahuat ñeñť a'mťaye't Yompor po'ñoñ. ¹⁵ Ñaña napa' añ name'ñena ñeñť attoch esempohuañen Yomporpa' tantaterrancha' allohuen acheñ—ñeñť e'ñe cohuen acheñ ñaña ama't ñeñť ama cohuenayaye acheñ. Ñetpa'čo'ña ñeñťara ame'ñenet. ¹⁶ Ñeñťo'marña napa' čhocma nema'yōchrena attoch Yomporpa' enten e'ñe cohuen, ñaña attoch acheñenesha'pa'čo'ña o'ch entennet e'ñe cohuen ñamet.

¹⁷ 'Napa' shonte' char čhocma nechopeñen errařaren anetso'mar. Te'pa' o' taya nohuerra arr attoch napa'yesuer namo'tsesha' quelle ñeñť huocchañnesha'čno. Añ quella'pa' ñeñťara apa'yesen ñeñť ame'ñenaya Yompor. Napa'čo'ña eñalleñ ñeñťcha'

nepomañ Yomporecop. ¹⁸ O' taya chapmochañ allempoch o'ch na'cohuentatuañ Yomporecoppa' judionesha'ñapa' o' entnet all Parets pa'paclo. Tarraña allempopa' ama tama shonteyaye acheñ ñeñfo'mar ama tama esesha' ama'toçhtetso. ¹⁹ Tarraña e'ñe allempopa' o' cha'cha't ñaña judionesha' ñeñt' huaçhetsa Asioť. Ta', te'ñapa' eso'marte'ña ama ñetaye'ña huapatseto arr attoch ñerra'm po'ñoçh mueneñet o'ch otteñe'chnet na. ²⁰ Tarraña te'pa' ama huapuesto ñetpa' ñehua, te'pa' otetepa' ñeñt' hua'cha'tatsa te'. A'metetepa' ñerra'm po'ñoçhte' este' nepanta' allempo natomos allo'tsa'yen ñeñt' çhocma a'pocatyene' ñoñets. ²¹ Allempopa' aña neños paterr huomenc atto notanet. Añecop napa' otteñe'chennet tarro'mar napa' name'ñena atto ñerra'm yerromapa' yetanterrach esempo. Ñehua, ñato' ñeñteçpate' otteñe'chennetña te'.

²² Ñeñta otua Pablopa' aña Félixpa' ama mueno o'ch alla serrpare'terreterr, tarro'mar ñapa' o' eñotmoch atet ame'ñena ñeñt' cotene' Cristo. Ñeñfo'marña atet otanet:

—Ñehua, te'pa' ñeñfach yot. Esemepochña huapa ñaña añcha'tareť Lisiaspa' allempochña ya'pocatat ñoñets.

²³ Allempoña atet oterran po'cařtáner:

—Te'pa' allach secuañpererr Pablo. Amach tama sa'montsatsche. Ñaña çhocmach semnach ñeñt' yemtenaya o'ch es ař ñeñt' palltena.

²⁴ Allponmaterrerrpa' o' huerra Félix Cesareo epuet pueťapor ñeñt' pa'so'cheñ Drusila, ñeñt'pa' judionesha'. O'ña çherr Félix o' agotatuenan Pablo tarro'mar ñetpa' mueneñet o'ch serrpare'tatanet ñamet Pablo errotente' ame'ñenana Jesucristo.

²⁵ Allempoña chap Pablopa' o' serrpare'tatanet cohuen ñeñt' atet yepena ya ñeñtey ame'ñetsa. Ñaña atet otanet aña' yema'yoçhra attoch e'ñe pocte' es ye'pa'yen, ñaña amach ye'patsto ñeñt' ama cohuenayaye tarro'mar Yomporpa' tsa'tatuerryach allempoch acerrran allohuen acheñenesha'. Ñeñta otua Pablopa' aña Félixpa' çha yoren. Allempopa' alla oter:

—Te'pa' orrerreř, esepochña e'ñe pocta'huerrnanerrpa' o'ch alla neçhore'taterrperr.

²⁶ Félixñapa' atta cohuenan Pablo ñato' o'ch ař quelle añecop attoch a'rroyer. Ñeñfo'mar errotenopa' o'chçho'ña agotach attoch serrpare'tet epuet. ²⁷ Atteñapa' o' met epa charpa' o' cañyerra gobernador, huapa po'psheñeñ añcha'tareť añ pa'so'cheñ Porcio Festo. Ñaña' nanac mueneñ o'ch coshatan judionesha' ñeñfo'marña ama a'rroyerrano Pablo, atet ot:

—Allepa' preso.

25

Allempo çhapachet Pablo allo'tsen añcha'tareť Festo

¹ Allempoña añcha'tareťta Festo all Cesareopa' poma'pamtañoñapa' o' ahuo' Jerusaléño. ² O' çhap Jerusaléño'pa' aña cornanesha' ñeñt' nanac añcha'tareťnesha' ñaña epuet ñeñt' nanac sherbets judioneshacoppa', o' serrpare'tatapatet Festo atto otteñe'cheñet Pablo. ³ Ñetpa' atet ochet Festo agotatanepa'to' Pablo attoch huapa Jerusaléño, tarro'mar ñetpa' ahuañacma a'pocatauet o'ch cohuet Pablo toño attoch muetsapueret all. ⁴ Festoñapa' atet otanet:

—Pablopa' allo'tsena all yottañpeñet Cesareo. Napa' o' nesecherra o'ch ahuerren Cesareo. Ñato' e'ñech na'llponmatena o'ch ahuerren. ⁵ Te'pa' ñeñt' nanac añcha'tareťtetsa socoppa' coťa'nerrnetepa' allochñapa' otteñe'cheñetepa' Pablo all, ñerra'm po'ñoçhte' eñall alloch otteñe'chet.

⁶ Festoñapa' alla a'pa Jerusaléño allponmat. Ñato' po'psocmatño amapa' po'çharramatño'pa' o' ahuerren Cesareo. Cherr Cesareopa' tsapaťña e'ñe ahuaťecmapa' o'

anorros allecma a'pocstatenet ñoñets. Alloitña agotatan Pablo. ⁷ Allempoña huapachet Pablopa', añña judionesha' ñeññ huacha'tatsa allpa' cha arrotam'pesyet. Allempoñapa' otteñe'choset. Shonte' esocmañen nanac sosey toma'tam'pesyesoset Pablo, tarraña ama errotenoñ eñotacheto añcha'tareñ Festo attoch otoset e'ñe po'ñoñch. ⁸ Pabloñapa' o' eños ñaña ñocop atet ot:

—Napa' ama cho nachm'are'teno ñoñets ñeññ atet anaret judioneshacop. Ñaña napa' ama cho na'sosyateññañe Parets pa'paquell. Ñaña napa' ama cho natpare'teno ñoñets ñeññ nen añcha'tareñ Romoñ.

⁹ Tarraña Festopa' nanac mueneñ o'ch coshatan judionesha', ñeñño'marña otan Pablo:

—¿Pocte't penteñ o'ch ahuep Jerusalem allña' allcha' nentonap' atto po'ñoñchte' alloch otteñe'chapet?

¹⁰⁻¹¹ Pabloñapa' alla anapuerrerr, atet ot:

—Napa' añña pocte' nenten o'ch a'pocstaton añcha'tareñ ñoñets ñeññ romo'marnesha', tarro'mar amate' errotenoñ neto Jerusalem, tarro'mar ama erroñ nepeñeña judionesha', ama't papa' peñotueñ. Ñeñño'mar añña pocte' nenten o'ch a'pocstaton añcha'tareñ ñoñets ñeññ romo'marnesha'. Te'pa' arro'tsenen pesho ñeññep' eñets epap' añcha'tareñ romo'marnesha' ñeññ pocte' nenten na, ñach a'pocstate'ña ñoñets nocop. Tarraña ñerra'm po'ñoñchte' añ o' nepohua ñeññ ama pocteyaye amapa' atet ñerra'm alloch muetsanet ñeññpa' e'ñe pocte' muetsanetepa'. Tarro'mar ama nemno o'ch na'queshpata nañeña. Tarraña ñerra'm e'ñe atto'tapa' ama pocteyaye o'ch pepomuen judioneshesho. Ñeñño'mar napa' nemneñ o'ch a'pocstaton añcha'tareñ ñoñets ñeññ romo'marnesha' e'ñe ñapueñ.

¹² Allempoña Festopa' o' serrpare'tet epuet ñeññ parro cotape'chatannenet. Allempoñapa' atet otan Pablo:

—Te'pa' nanac añcha'taretesho pesechenapa' ama'tpa' allcha'ca'ye peta.

Atto eños Pablo allempo huapa añcha'tareñ Agripa

¹³ O' allponmaterrerrpa' huapa añcha'tareñ Agripa epuet po'ch Berenice. O' chapuet Cesareo all emo'teñeta' añcha'tareñ Festo. ¹⁴ O' allponmatosetpa' allempoña Festopa' serrpare'tatanet atto otteñe'cheñet Pablo, atet otanet: Arrpa' allo'tsen puesheñarr yacma ñeññ na'nom Félix ahuaña all yottam'peñet. ¹⁵ Allempoña napa' Jerusalem'tsenenpa', añña cornanesha' ñeññ pa'm'cha'tareternesha' pen allohuen judionesha' po'cornaneshar, ñaña po'potantañ ñeññ pompornesha' penet, ñetñapa' o' serrpare'tatnet atto otteñe'cheñet Pablo, ñaña otnet napa' nemtsachepa'to' Pablo. ¹⁶ Nañapa' atet notanet: “Ñeññ ñoñets anaret Romo'tpa' ama pocteyaye o'ch yemtsach acheñ ñerra'm ama eñorena' e'ñe ñocop attoch eñotatanet atto otteñe'cheñet.”

¹⁷ Ñeñño'marña allempo huacha'ta judionesha' nesho, allempoña na tsapañapa' o' nanorros allecma ya'pocstaten ñoñets. Allempoña napa' o' nagotach Pablo. ¹⁸ Añña ñeññ huacha'tatsapa' allenta tom'cha'toset attoch o'ch alla otteñe'chueñeterr Pablo, tarraña amaña a'ñeye' a'meta'yaseto atto ñeññ poctetsa o'ch yemtsach acheñ. ¹⁹ Aña a'meta'yaset ñeññ e'ñe ñocpueta atet yechenet ñet judioneshet. Ñaña aña a'meta'yaset ñeññ pocta'ña puesheñarr ñeññ pa'so'cheñ Jesús, tarraña ñeññpa' o' rroma, tarraña Pablopa' cha oten ñeññpa' o' tanterra. ²⁰ Ñeñño'marña napa' ama tama neñoche attoch na'pocstat ñoñets ñocpuet. Ñeñño'marña atet noch Pablo po'tomña: “¿Pocte'te' penteñ o'ch ahuep Jerusalem allcha' ya'pocstatena' ñoñets?” ²¹ Tarraña Pablopa' ama mueno. Ñapa' aña muena' allach arr, allot'cha'ña esempopa' entateñetepa'to' añcha'tareñ Augusto all Romo. Ñeñño'marña napa' not: “Te'pa' allepa' arrma, esempochña napa' o'ch nemñe añcha'taretesho Romo.”

²² Allempoña añcha'tareñ Agripapa' atet otan Festo:

—Napa' atarr nemneñ o'ch ne'mñ namña errotenente' serrpare'ten Pablo.

Allempoña Festopa' atet och:

—Tsapat'cha'ña pe'mñota'mueñ.

²³ Tsapat'ña'pa' huapa'muena am'cha'tare't Agripa epuet ñaña po'ch Berenice. Ñet'ña'pa' cha cohuenetyesoset. Allempoña'pa' be'tos'cha'toset allecma serrpare'tatannena am'cha'tare'tnesha'. O' be'tos'cha'tet epuet ñaña solltarnesha' pa'm'cha'tare'ternesha' ñaña po'poñe'chno acheñenesha' ñeññ nanac sherbets all anetso. Allempoña Festopa' o' agotatenanerr Pablo. ²⁴ Allempoña huapa Pablop'a' Festoña'pa' eñoratsapa' atet ot:

—Am'cha'tare'te Agripa, ñaña allohuenes ñeññes arro'tsa'yenes: Te'pa' o' sentue añ yacma ñeññ nanac e'moñe'ten allohuen judionesha'. Ñet'pa' o' otteñe'chuet e'ñe nesho allempo Jerusaléno'tsenen ñaña arrpa' o' otteñe'chueñeta' allempo ne'cherr ñaña arr. Ama't arrpa' o' che'chame'tueñeta', atet otyeset: “Chosa muetse', tarro'mar añ acheñerpa' ama pocteyaye o'ch alla corra.” ²⁵ Tarraña allempoña napa' na'p'to'tare'chpa' ama nentoñeña ñeññ atto pocte' o'ch nemtsach. Ñaña e'ñe ña muenats o'ch entateñeta' am'cha'tare't Augusto all Romo ñeñño'marña napa' pocte' nenteñ o'ch nemñe all. ²⁶ Tarraña napa' ama neñoteñe ñeññcha' atet nequellcoñ ya'm'cha'tare'ter ñocop tarro'mar ama eñalle errotenot'cha' yotteñe'cheñ. Ñeñño'marña te'pa' o' ne'chore'tach arr all seshontena te'.

Allot'ña Festopa' atet otan am'cha'tare't Agripa:

—Te'pa' p'ach ñanom a'p'to'tare'te' attoch napa' o'ch neñoch errotencha' nequellca' carta am'cha'tare'tecop. ²⁷ Napa' noctape'cheñ ama pocteyaye o'ch yemñe acheñ ehuan-care't ñerra'm ama eñalle errotenot' o'ch yotteñe'cheñ.

26

¹ Allempoña am'cha'tare't Agripapa' atet otan Pablo:

—Ñehua, te'pa' pocte' nenteñ o'ch peños p'ama p'ocop.

Allempoña Pablo e'ñe puehuom'cha'teño'tpa' o' echantan pot, allempoña'pa' eños ñocop, atet ot:

² —Te'pa' nocshena am'cha'tare'te Agripa tarro'mar eñall attot'cha' neños pesho nocop, añecop tarro'mar cha otteñe'chenen judionesha'. ³ Napa' nocshena tarro'mar te'pa' o' peñoch p'ama atet yey'chena ya ñeññey judioneshay. Ñaña o' peñoch attot' ama patrraye' yoctape'chyeno. Ñeñño'marña te'pa' o'ch nenama'p' attoch pe'mñnoten cohuen.

Atet atarr cotape'che't Pablo allempo ama ame'ñerra'

⁴ 'Allohuen judionesha'pa' eñotuennet atet nocre't ahua't, ama't allempoteñ ne'ñalleta nenyoy, ñaña ama't allempo cheshenna' allempo yey'che't Jerusaléno epan namo'tsna'tarnesha'. ⁵ Ama't ahua'toteñpa' eñotuanete't napa' fariseoneshan ñeññara ñeññ nanac etsotene' cotap'ñats nanac echarr allo yoctape'chen Partsocop. Ñeññ atet entnete't atet nocre'tpa', atet'cha'ñacho' a'meta'netañ. ⁶ Ñeñño'mar te'pa' arro'tsenen attoch sa'p'to'tare'ten, atto napa' name'ñena ñerra'm yerromapa' Yomporpa' tantaterreycha' esempohuañen. Añmapa' ñeññara atet otane't ahua't Yompor yatañneshañ. ⁷ Ama't charrasheña puechena epa ñeññara ñeññ yatañneshañ yepen ñeññ chemere'tyesahuetpa', ñeññña po'm'reññetpa' e'ñe ame'ña'huenet ñeññ atet o' notuas. Ñeñño'marña ñet te'pa' nanac ma'yo'chrenet Yomporcop—yeto ama't ñaña tsapo. Tarraña ama't atet penetañ allohuen judionesha'pa' te'ñapa' e'moñe'tennet ama't napa' ñeññara name'ñena atet ame'ñenet ñamet. Attot'ña am'cha'tare'te Agripa otteñe'chennetña te'. ⁸ ¿Eso'marte' sapa' soten amach errotenot' tantaterrano Yompor arromñañnesha'?

Atto Pablop'a' atarr muero'chtatane't ñeññ ame'ñenaya Cristo

⁹ Napa'cho'ña ahuañmo'chapa' notenapañ ñato' ñeññte' poctetsa o'ch yemuerochtach ñeññ cotene' Jesús poctapña ñeññara Jesús ñeññ nazareto'marnesha'. ¹⁰ Ñeñño'marña napa' nanac nemuerochtatyese't acheñ Jerusaléno ñeññ ame'ñaye't Jesús poctapña. Shonte' acheñ ñeññ nabe'tate't cárcelo, tarro'mar cornanesha' ñeññ pa'micha'taretnesha' pen allohuen judionesha' po'cornaneshar, ñetñapa' o' apnet orden ñeññecop. Ñaña allempo otyese't añcha'taretnesha' ahuo'ch muetsachet ñeññ ame'ñenaya Jesús poctapña' napa'cho'ña o'chcho' not, pocte'ña'cho' muetsetepa'. ¹¹ Chocma nemuerochtatanete't ama't judionesha' po'prahuo'mar, ñaña nanaccha' nemne't o'ch nachm'are'tach ñeññ ame'ñatse't. Nanac natsrre'mueño'tpa' noctare'tanete't erracmañen anetso'mar.

Allempo Pablopá' ello serrpare'taterraneterr atto ello cotape'cherran cohuen Yomporecop

(Hch. 9.1-19; 22.6-16)

¹² Alla oterraneterr Pablo:

—Atteñapa' o'cho' ahuen ñaña Damasco. Allempopa' napa' nechen orden ñeññ apuen ñeññ pa'micha'taretnesha' pen allohuen judionesha' po'cornaneshar. ¹³ Ñaña añcha'tarete te'pa' o'ch notap ñeññ atet norrtoya allempo. Allempoña o' ye'chapmoch Damasco allempopa' o' chap pocto. Ñeññña nanac poptetsa ento'tpa' machayotepa'tcha' choyo'tam'psapuen ama't ñeññ epan nesen. Ate't poptenapa' metanenan atsne'. ¹⁴ Allempoña yapa' alla yermopra'yesa patso. Allempoña alla yermopra'yena pat-sopa', nañapa' o' ne'm ñoñets hebreyacho ñeññpa' atet oten: “Eso'mare't Saule pemuerochtatennañña ñeññ name'ñenaya. Añpa' pañeña muerochtatetsa. Tarro'mar cha pottena ñerra'mrrate' ashen ñeññ e'ñe patpare'teño' ñañeñachña atserrpatetsa.” Añpa' atet oten ñeññ norrtoya. ¹⁵ Nañapa' not: “¿Eshape'tña Ayochreshate eñets?” Nañapa' alla otnererr: “Napa' ñeññten Jesús en ñeññara pemuerochtaten. ¹⁶ Te'pa' petanterra alla, ñeñño'mar te'pa' o' norrta pesho attoch o'ch nena'p pa, pach torrata nocop, ñaña pach a'pote' ñeññ o' pentua te' ñaña ñeññcha' neñotata'p allempoch norrterrerr pesho. ¹⁷ Te'pa' o'ch nemña'p allo'tsa'yen ñeññ ama judioneshayayeto, tarraña napa' chocmach necuam'psap ñerra'm esempo o'pata'pa judionesha' ñaña ama't ñeññ ama judioneshayaye. ¹⁸ Tarro'marcha' nemña'p allo'tsa'yen ñeññ ama judioneshayayeña' allochñapa' attoch peserrpare'tatuanet attoch chapamet pueyo'chro, attoch o'huañcha' chope'chet checmeto. Añcha'ña o'ch alla chope'cherret puetaro. Ñaña attoch o'huañcha' ahua'ncat panet oneñeñ, añcha'ña ahua'ncat penahuet Yompore. Allochñapa' o'ch ame'ña'huerrnet na, allempoñapa' ne'pretna'huerranetcha' po'chñar, attoch o'ch parrocmatuerret e'ñe attecma atet ñerra'm ñeññ o' na'cohuentatua.”

Atto Pablopá' ama atpare'tenano ñeññ atet gateñ Partsesha' Jesús

¹⁹ Alla oterraneterr Pablo:

—Ñeñño'marña añcha'tarete Agripa te' napa' ama natpare'teñe Jesús ñeññara ñeññ norrtoya ento't. ²⁰ Ñanompa' o' neserrpare'tatanet Damasco attoch cotape'cherret ello cohuen Yomporecop. Allochñapa' o'ch pa'yenet ñeññ cohuentetsa Yomporecop, attoch ye'noch po'ño'ch o' cotape'cherret etserra. Attecma neserrpare'tatanet ama't Jerusaléno, ñaña ora erracmañen Judeo'mar, ama't ñaña allo'tsa'yen ñeññ ama judioneshayaye. ²¹ Atto'ña judionesha'pa' o' rroma'net Parets pa'paclo o'ch muetsanetañ. ²² Tarraña Yomporepa' ahuo't a'natna nanac atto teme'ttsen nocrrena, attoch neserrpare'tach allohuen acheñenesha'—ama't ñeññ ama esoshe'mayaye, ñaña ama't ñeññ añcha'taretnesha'. Tarraña ama a'neye' ney'chatenaneto ñeññ ama cohuenayaye. Añña attecma ney'chatenanet atet serrpare'te't ama't ñeññ a'm'taye't Yompore po'ño'ñ ahua't. Ñeññpa' ama't Moisés'pa' atet ote't ñeññcha' atet perra esempo. ²³ Ñeññara

serrpare'tatanete't ahuo'ch huapa Cristo añ patsropa' nanaco'ch muerochtachet, al-
lotpa' ahuo'ch rroma, tarraña ñapa' tanerrach. Atto'chña tanerra ñanompa' o'ch
a'puetarsañpsanet pueyo'cher allohuen judionesha', ñaña ama't po'poñechno acheñ.

Allempo Pablopá' atarr mueneñ o'ch ame'ñatana añcha'taret Agripa

²⁴ Allempoña atet eñen Pablo ñocoppa', Festoñaapa' atet och e'ñe huomenco:

—Chate' Pablo pemospuena tarro'mar nanac es p'octape'chenpa' ñato' ñeññte' o'
mospaterre'p.

²⁵ Pabloñaapa' atet och:

—Ama Ayochreshate Festo çhoye' nemospueno. Añña neserrpare'tatenes ñeññ e'ñe
po'ño'ch. ²⁶ Ama't añcha'taret Agripapa' e'ñe eñotueñ atet noten. Ñeñto'marña te'pa' o'
neyemcha ña tarro'mar napa' neñoteñ, ñapa' o' entuon ñeññ atet nepena, ñaña tarro'mar
ama a'nahua es ne'pa'yeno. ²⁷ Añcha'tarete Agripa, p'apa' ¿pame'ñeña't ñeññ a'mtaye't
ahuat Yompor po'ñoñ? Napa' neñotene'p p'apa' p'ame'ñeña.

²⁸ Allempoña Agripapa' atet otan Pablo:

—Cha't p'otenapañ tayecmapa' o'ch p'ame'ñatna Cristo.

²⁹ Pabloñaapa' alla otererr: Ama't tayecma amapa' tsapa'tonetpa' napa' atarr nemneñ
Yomporpa' o'ch ame'ñaterrpa, ñaña ama't allohuenes ñeññes ne'mñotene' te'. Atarr
nemneñ o'ch same'ñerra allohuenes atet ñerra'm na, tarraña ama'tcha' atteseñ ñerra'm
na, sapa' amuepa'chña ehuanca'reteyayso.

³⁰ Allempoñaapa' o' tom'cha'terret allohuenet—añcha'taret Agripa, ñaña gobernador
Festo, ñaña Berenice ñaña allohuen ñeññ allo'tsa'yen. ³¹ Allempoña ahuanerretpa' atet
otanna'tyeset:

—Añ yacmapa' ama es peno attoch o'ch yemtsach amapa' attoch yemñe cárcelo.

³² Allempoña añcha'taret Agripa otan Festo:

—Amach ña muenetsñe o'ch a'p'octatenana' ñoñets añcha'taretesho Romopa' yapa'
o'te' ya'rroyereñ e'ñe tayecma.

27

Allempo anmet Pablo Romo

¹ Allempoña o' a'p'octatuet o'ch mueñet Pablo anetso Romo allara Italiapa' o' anmet
allo'tsen capitán ñeññ pa'so'cheñ Julio, ñeññ po'cap'taner penet ñeññ emchorrenaya
añcha'taret Augusto. Ñaña o' anmet po'poñechno ñeññ ayottañpsaretechno o'
apueñeta' Julio, allñaapa' ñach cohuan'pesnomahuet. ² Allempopa' allo'tsen ñaña
Aristarco ñeññ macedonio'marnesha' ñeññ huetsa Tesalónico't. Ñeññcha' parro
yocta'neñ Pablo.* Allempoñaapa' o'cho' yebe'tos'cha't boto ñeññ huetsa anetso't
Adramitiot, ñeññña botepa' o'ch etsotyenosma allemeña sohua'puetso'mar ora Asio'mar.
Allempoñaapa' o'cho' ahuan'psey boto. ³ Tsapa'tñaapa' arr yetsotosa all oteñet Sidóno.
Allña capitán Juliopa' morrentnomana Pablo ñeñto'mar o' muenach o'ch emo'tnoman
pamo'tsesha', ñeññ ye'cha'yetsa all Sidóno, attoch ñetpa' o'ch apapet Pablo ñeññ palltena.
⁴ Allempoña ahuan'perryerrpa' nanac yorrnotañpesnoma. Morrrpa' ama muenaty
o'ch yemet attoch o'ch ahuey e'ñe pa'charr all oñenet, ñeñto'marña yepotesam'pesuanma
coñe't pats ñeññ pa'so'cheñ Chipre. Tarro'mar yepotesuanma attoch ñeññ patspa'
o'ch a'npan'psey m'orr. ⁵ Allempoñaapa' arr yoñemuanom allame'tets Cilicio'mar, ñaña
allame'tets Panfilio'mar. Allempoñaapa' ye'chap ñaña Miro all yetsotosa, allara ñeññ
pa'netser Licia.

⁶ Allña capitán Juliopa' entosan po'poñ bote ñeññ huetsa Alejandriot ñeññcha' tatsa
Italio. Ñaña allempopa' otey ahuo'ch ya'ta'cha't all. ⁷ Allempoña o' allponmat ahuan'psey

* **27:2** Lucas ñeññ quellqu'e' añ ñoñets ñapa' cota'nman ñaña Pablo.

e'ñe acořapa' e'ñe yemuerochenñota yemet ñaña Gnidot. Allořpa'cho'ña ama muenaterryerro mōrr o'ch ahuerryerr e'ñe pa'charr, ñeñto'marña yepotesam̄pesuanerrerr coñe't pats ñeñt pa'so'cheñ Creta attoch ñeñt patspa' o'ch a'npam̄psey mōrr. Allñapa' allpono'mar yoñom allecma etsotenet ñeñt pa'so'cheñ Salmón. ⁸ Yemuerochenñota yemetua ñaña allot e'ñe acořa. Atteñapa' ye'chap ñaña all oteñet Cohuen Sohua'puetso. Allořpa' e'ñe allame'ttsa anetso Lasea.

⁹ Yemuerochtame'teñořpa' o' ya'llponmatnom ñeñto'mar allempopa' o' chen allemponanac añcha'no'chtena o'ch ahuañpsey sapo'mar. Ñaña o' met allemponanare't judione-shacop allem pocma ahuantenet pa'chporrña Yomporecop, ñeñto'marña yapa' o' yeñoch o' chen allemponanac orrnotena sapo'mar. Ñeñto'marña Pablopa' o' yerpatanet, ¹⁰ atet otanet:

—Masheñeshacha', napa' noctape'chen arepoña es yehuapoya toño allempoch ahuañperryerr. Napa' noctape'cheñ ñato' o'ch yechencatsre'tnoma, ama't ñaña yebotepa' chach chenca; ama't yapa'cho'ña arepoña cha yechenca.

¹¹ Tarraña capitánñapa' o' ame'ñenana atet otanet ñeñt maneja'nene' bote ñaña ñeñt atet otanet ñeñt pamo'mte' pen bote. Ama ame'ñyeto atet otanet Pablo. ¹² Ñaña all Sohua'puetso Cohuenpa', ama tama cohuenayaye o'ch allaya allemponanac chen orrnoteñtsopo. Ñaña allohuenetpa' o' e'ñe pocte' entuet o'ch ahuañperryerr allot. Arro'chña ye'chap sohua'puetso all oteñet Fenice, tarraña allara anetso Creta. O' sechet Sohua'puetso Feniceo tarro'mar allpa' ama tama orrnoteno. Allñapa' allach ya'posa tarrempohua o'ch metuen orrnoteñtsopo.

Allemponanac huomenqueshatañpesnomuet sapo'mar

¹³ Allemponanapa' o' huapa mōrr po'pshem̄tañoř, tarraña ñeñtapa' mamesha mōrraren. Allemponanapa' otyeset:

—Te'pa' pocte' o'ch ahuerryerr.

Allemponanapa' o'cho' cheterret ñeñt rremuene' botepa' o'cho' ahuañperryerr. Allořñapa' e'ñe to'pña'so'mara yoñmañpes allara anetso Creta. ¹⁴ Tarraña e'ñe o'chtapa' ahuepa'tcha' huapa ñaña mōrr onnatot allente'tsen anets Creta. Allemponanapa' o'cho' yorrnotam̄pesnoma nanac huomenc. ¹⁵ Botepa' ama eshcaye' to allenet anmañpenyet allempona ama erroř yepepa' o' anmañpsey orrno a'yenet. ¹⁶ Orrnoñapa' o' chapatey po'pshem̄tañoř allo'tsen coñe't rro'chpe'chañ añ pa'so'cheñ Claudia. O' chapatey allo'tem̄ta'n ama tama hueno mōrr. Allña e'ñe yemuerochenñota yechant noñt ñeñt cheta'nen atarr bote. Allořpa' yesha'ch atarr boto. ¹⁷ Allempona o' yesha'tua noñtapa' ñetñapa' huancatse'tet atarr bote attoch amach tare'che orrno. Ñaña ñetpa' añ mecha'tet ñato' botepa' o'ch chap muelle'sato allo'tsen mueñ ñeñt ama echarroyaye ñeñt otenet Sirte. Ñeñto'marña o' pueyhuet enoř shetamuets ñeñt chope'chatene' bote attoch botepa' amach errene't to. ¹⁸ Allemponanapa' ahuepa'tcha' yorrnotam̄pes nanac huomenc. Tsapaññapa' chetanatet cargapa' saprochet sa'po. ¹⁹ Poma'pamtañoñapa' o' saprochet ñaña ñeñt allpon echyen bote. ²⁰ Allempopa' allponmat ama orrterro atsne' ama't ñaña ranto'chno, ama't mamesha. Nanac yorrnotam̄psa. Atteñapa' yot:

—Te'pa' amach errořteno yequeshperro.

²¹ Ñaña allponmat ama es yerro. Allempona Pablopa' tompa' ot:

—Ñerra'm amach masheñeshacha' sa'pa'noñe atet notaseñ, amach yonñe Cretoř, te'pa' amate' es yeyore'tenayñe ñaña allempopa' amate' yechencatsre'tañe. ²² Tarraña te'pa' o'ch notas, amach sellcatsto tarro'mar yapa' yequeshpach allohueney. Añachña chencatsre'tatsa bote. ²³ Napa' neñoteñ tarro'mar tsapopa' orrtona mellañořteñ ñeñt huetsa Yomporeshot ñeñtara Yompor ñeñt puechemer nepene', ñaña ñeñtara ñocop neřorrena. ²⁴ Ñeñt norrtoyapa' atet oten: “Amach Pablo pellcatsto tarro'mar pe'chapcha'

allo'tsen am'cha'tare't all Romo. E'ñe p'otpa' Yomporpa' o'ch a'natana allohuen ñeñ' epa'p sechope'cham'pen boto." ²⁵ Ñeñ'to'mar'ña notenes amach sellcatsto. Tarro'mar napa' neyemteña Yompor, ñerra'm erro'ten otenpa' atet'cha' p'a. ²⁶ Tarraña ama't atet'pa' ch'ocmach yepotam'psa allempo o'ch ye'chapmoch patso. Añpa' allohua atet' otanet Pablo.

²⁷ Allempoña o' met ch'arramat puechena pa'tatsmat, at'a yetam'pena sa'po ñeñ' otenet Adria. Allempopa'cho'ña yorrnotam'pesnoma. Allempo chap' rro'ch tsapopa' añña ñeñ' taruaset's botopa' atet' otet:

—Ñato' o' ye'chapmoch allo'tsen pats.

²⁸ Allempoñapa' o' topaso'tet sa'p. Allempoñapa' ahuo't eñochet allo'tsen ma'poch ch'arra' puechena pechap metro. Allempoñapa' o'cho' ahuaryerr allpononet'pa' allpa'cho'ña o'cho' topaso'tuereterr. Allñapa' otet allo'tsen epoch ch'arra' puechena can'cherr metro. Allempoñapa' añ mecha'tet taye'to' yeto'mam'psa mapyo. ²⁹ Allempoñapa' o'cho' a'shore'tet puequ'e'nare'tot pa'tatsm'aga ñeñ'cha' rremue' bote. Allempoña a'shore'tuet'pa' o' cohuet ato't puetarena'. ³⁰ Añña ñeñ' taruaset's botopa' a'suaterret e'ñe a'nahua noñ' tarro'mar ñet'pa' añ muenenet o'ch ca'chpa'nmuet alla bote. Ama't ahuepa't a'suaterret noñ'pa' ñet'pa' cha' ottenet ñerra'mrrate' po'poñ a'shore'tenet ñeñ'cha' rromue' bote poñe'm'ago't. ³¹ Allempoña Pablopa' eñotanet atet' co'tape'chen ñeñ' taruaset's botopa' atet' otan capitán ñaña po'poñe'chno solltarnesha' atet' otanet:

—Ñerra'm ama' alla a'pueto botopa' sapa' amate' erro'tenot sequesherro ama't puesheñarro'fesa.

³² Allempoña solltarnesha'pa' o' tsorram'pset noñ' po'char attoch ahuo' a'yenet. ³³ E'ñe puetaresuanetsapa' añña Pablopa' atet' otanet allohuenet:

—Te'pa' o'ch serra'muen tarro'mar o' ch'arramat puechena pa'tatsmat sema'yo'chreñot po'poñpa' ama semueno, ama es serreno. ³⁴ Ñeñ'to'mar'ña o' nota'muenes serra'muen attoch ch'err sehuamenc, tarro'mar amach eseshas chencatso, ama't puesheñarro'fesa.

³⁵ Ñeñ'ta otuanet o' chetan panpa' o' ma'yocha e'ñe alla all shontena acheñenesha'. Allot'pa' shotan panpa' o' rre'. ³⁶ Allempoñapa' o' ye'chatanet'pa' o' rret ñamet. ³⁷ Ñeñ'tey boto'tseney allohueney'pa' allo'tsen doscientos setenta seis acheñenesha'. ³⁸ Allempoña ocha'huanet puerrarpa' alla saprroteneterr trigopo'r oño attoch o'huañ'cha' tama eñerrta bote.

Allempo taram'psanet sa'p po'bote

³⁹ Allempoña e'ñe puetaresuenpa' o' entet pats, tarraña ama puentareto ñeñ' pats, tarraña allempo o' entet ñaña a'yohuen mueyapo's allñapa' a'yohuen ñaña pueme'tar. Allempoñapa' co'tape'chet'pa' otet:

—Ñato' ye'chapcha' all allochñapa' allcha' yetsotosa cohuen.

⁴⁰ Allot'ñapa' tsorro'tet ñaña ñeñ' rromuene' botepa' o' a'ypo'ña'nmet alla sa'po. Allempoñapa' o' pueyam'peret allo huanqu'e't ahuaña bote puepopa'p. Allempoñapa' echantet ñaña poñe'm'ago't shetamuets attoch m'orrpa' o'ch matatan bote. Allempoñapa' o'cho' ahuañ'psey pueme'taronet. ⁴¹ Allempoñapa' o' chap' bote all epchacra'stena sa'p all nanac epopa' rro'choñapa' cha' muelle'sattena. Chap' all botepa' cha' a'chtsa poñe'm'ago't, ama erro't yepere. Arro'tña puequ'e'nare'tot nanac emo'yarertena sa'p. Po'huamencpa' o' taram'psey yebote. ⁴² Allempoña solltarnesha'pa' mueneñ o'ch muetsanatuan ñeñ' ayottam'psare't taye'to' ñerra'm patet'pa' ahuo'te' yetet. ⁴³ Tarraña capitánpa' nanac mueneñ o'ch a'queshp'atan Pablo ñeñ'to'mar'ña ama muenataneto o'ch muetsanachet. Ate't otanet:

—Ñerra'm esesha'te' eñotene' paťatsapa' o'ch sepaťa sanom attoch seřchata yomťa'n.
 44 Allostña'pa' samña ñeñtes ama eñotenaye paťatsapa' ñato' o'ch sanemyes tabla amapa' po'poñechno ñeñť echyen bote, allochña'pa' attoch seřchata samña.
 Allempoña'pa' o'cho' pechatuet allohuenet.

28

Allempo chapuet coñe't pats pa'so'cheñ Malta

1 Allempoña o' yequeshp̄a'hua allohueneypa' allempoña'pa' otyet añ coñe't patspa' año' pa'so'cheñ Malta. 2 Añña acheñenesha' ñeñť yečheta allpa' nanac muerapyet ñeñťo'marña a'toronayet tso' allcha' yeshotosa, tarro'mar allempopa' cha huatena o' yesnate't. Tarraña e'ñe cohuen agapapuey allohuen acheñenesha'. 3 Pabloña'pa' allenta tsella'tpechospa' o' a'tamo'ye' tso. Allempoña'pa' machayota cha'nom shecheř e'ñe tsoť. Ahuo't atserr e'man tso'pa' o' cha'nompa', cha a'chan Pablo pototpa' alla a'sope'ch. 4 Acheñenesha' ñeñť yečheta allpa' eñchet Pablo cha a'sope'cheñ shecheř pototpa' atet otanna'tyeset:

—Añ acheñpa' amtsañte'ca'ye ñeñťo'mar te'pa' ama't o' queshp̄a'hua sa'potpa' te'ña Yomporpa' o'ch tsa'tacha.

5 Tarraña Pablopa' pa'shque'cherra shecheřña'pa' o' shora'nerr tso, amaña erroťeye' pe ama't mamesha. 6 Allempoña acheñenesha'pa' atťa cohueñet Pablo ñato' machayotach añecmuenta potpa' o'ch t'aco'ra rromue'. Allempoña'pa' o' cohua'huet o'chet ama es atsoto, allempoña'pa' o' cotape'cherret po'poñ, atet otet:

—Añpa' po'ño'ch Paretste'.

7 Ñeñťña ane'tañtetsa allpa' añ pa'so'cheñ Publio. All yečhap yapa' allotpa' allame'ttsa all yečhena Publio, allpa' allo'tsen po'patseñ. Ñapa' o' agapapuey e'ñe cohuen ñeñťo'mar allpa' yema'pamuetnom pa'paclo. 8 E'ñe allempopa' añña Publio pomporpa' cha atsna'ten, nanac huoraten ñaña cha chemotse'ten, ama achñeno. Allempoña Pablopa' o' ahuo' o'ch enteña'. Allempoña chap Pablopa' ñaña'pa' ma'yochamřpsosya. Allempoña Pablopa' o' a'plana'chpa' añña ñeñť atsna'tetspa' allenta correna. 9 Allempoña e'mare'ch allohuen acheñenesha' atet o' p'osa Pablopa' huapyesa acheñenesha' ñeñť atsna'tyets. Ñetpa'cho'ña e'ñe a'crratyeanet Pablo. 10 Ñeñťo'marña acheñenesha'pa' shonte' regala'yesyet pa'namen. Ñaña allempo ahuanřperryerr botopa' nonayet allpon ñeñť yepalltena.

11 Allempoña o' met ma'pña arrorrrpa' o' alla ahuanřperryerr po'pnañ boto. Ñeñťña botepa' ñeñť cohuen e' o'ch metuen allempo orrnoteñtsopoten. Añ botepa' ñeñť huapatsa ahuaña Alejandriot. Ñaña añ botepa' echenan poñe'm'agoť acheñma't ñeñť epuesha' ñeñť toma'ntatenet po'yosret; ñeñťpa' añ pa'so'cheñ Cástor; po'psheñeñpa' añ pa'so'cheñ Pólux. 12 Allempopa' arr yetsoťnoma all oteñet Siracusa. Allña'pa' alla yema'pamuetnom. 13 Allotpa' allampaño'mara yocťato'pñe'ch pats, atteñapa' yečhap all oteñet Regio. Allpa'cho' all yetsoťnoma. Tsapaťña'pa' o' m'orrarener mamesha'tets. Morrrpa' ar-roť huena yecha'ñe'mta'noť. Allempoña'pa' o'cho' alla ahuanřpenyerr. Allostña'pa' e'ñe puepomtañocma yečhap all oteñet Puteoli. Allpa' all yetsoťosa. 14 Allña'pa' yentos ñeñť ame'ñetsa. Ñetpa' a'patapyet all yečhenet, ñeñťo'marña yapa' alla yecan'cherrmatnom ñesheto. Attoťapa' o'cho' yeya'rrota ñaña Romo. 15 Añña ñeñť ame'ñetsa all Romopa' ahuo't e'mare'tyets o' yečhap allampaño'pa' allenta't ona'cha'tet o'ch poctapyet. Puesheña'tetspa' o' chapuet all oteñet Foro ñeñťara Apio. Po'potantañña'pa' alla't chapyeset rrocho all oteñet Ma'ppahua Pocoll. Allña'pa' all pocta'yets. Allña'pa' all entosanet Pablopa' nanac parasyoso'tan Yompor tarro'mar allempopa' nanac coshatapet Pablo. 16 Allempoña o' yečhap Romopa' atet otapet Pablo ye'chosepa'to' ellonet, tarraña čhocma net solltar ñeñťcha' cohuanřpse'.

Allempo Pablopa' serrpare'tatosanet allempo chap anetso Romo

¹⁷ Poma'pamtañoñapa' añña ñeñt amcha'tarettetsa judioneshacop allpa' Pabloñapa' agotatanet allohuenet. Allempoña o' e'ñe apcha'huetpa' Pabloñapa' atet otanet:

—Masheñneshacha', ama't napa' ama erroť nepeñeña judionesha' ñaña ama cho nehuapore'tateno ñeñt atet yeche't yatañneshañpa' te'ña judionesha'pa' o' atta rroma'net all Jerusaléño, o' pomnet allo'tsen romanonesha'. ¹⁸ Ñetpa' a'pťo'tare'tnet, țarraña amaña entoneto atto alloch muetsatnet, ñeñto'mar ñetpa' mueneñetañ o'ch a'royerrnetañ. ¹⁹ Țarraña judionesha'pa' ama pocteye' eñcheto o'ch a'royerrnet. Ñeñto'marña napa' nesecha o'ch entatenneta' amcha'tareť arr Romo. Țarraña napa' ama cho notteñe'cheñe namo'tsna'tar. ²⁰ Ñeñto'marña te'pa' o' nagotatuas allochñapa' o'ch neserrpare'tatuas ñeñt atet pennet. Ñaña napa' name'ñena atto ñerra'm yerromapa' Yomporpa' o'ch tantaterrey esempohuañen. Ñeñto'marña te'pa' o' sentuan napa' ehuncareten, țarraña ama't allohuen judionesha'pa' attecma ame'ñenetañ.

²¹ Ñetñapa' atet ochet Pablo:

—Țarraña yapa' ama yaguëna' carta Judeot ñeñt atet otenet pocop. Ñaña ñeñt ame'ñetsa ama't huapyenet arrpa' ama esesha' erroť otetso pocop ñeñt ama cohue-nayaye. ²² Yapa' aña yeñoten po'ñočh chocma e'moñe'teñet erracmañen ñeñt coțene' Jesús poctapña. Ñeñto'marña yapa'cho'ña yemneñ te'pa' o'ch ye'mñoțap yamã erroťente' poctape'chen pa.

²³ Allempoñapa' a'poctachet allempoch huačha'tet allo'tsen Pablo allempo'ch serrpare'tatanet. Allempoña o' chap allempoch huačha'tetpa' allempopa' shonte' acheñ huačha'tatsa Pablescho. Allempoña Pablopa' e'ñe ellapen serrpare'tatahuet; a'poțanet atet pena Yompor po'cohuenña ñeñt atto ayochreshattena ña. Ñaña lleyatyesanet Moisés po'ñoñ all oten atetcha' pa ñeñtcha' Cristotats. Ñaña lleyatyesanet po'ñoñ ñeñt a'mtaye't ahuat Yompor po'ñoñ all oten ñaña atetcha' pa ñeñtcha' Cristotats. Ñapa' nanac mueneñ o'ch ame'ñatanet atto Jesúspa' po'ñočh ñeñt Cristotats. ²⁴ E'ñe allempopa' ame'ña'yesyet puesheña'tets, țarraña po'potantañpa' ama es ame'ñatso. ²⁵ Atteñapa' ñañeñeta achmãre'tanna'tyeset. Allempo ahuanerrmochetpa' allempoña Pablopa' otanet:

—E'ñe po'ñočh atet ote't Isaías ahuat allempo Parets Puecamquëñoťpa' otan sa-tañneshañ:

²⁶ O'ch soteña' judionesha' añ ñoñets: Ama'tcha' chocma e'mñnotenetpa' ama't ahuatapa' amach chapaneto pueyočhreto. Ñaña ama'tcha' cho es entuetpa' amach chapaneto pueyočhreto.

²⁷ Alloťpa' o'ch sotenaneta', te'pa' pueyočhretopa' nanac echarrtenet attoch amach es chapahueto pueyočhreto. Te'pa' amach mueneto o'ch es e'mñotet țaye'to' chapanet pueyočhreto. Te'pa' amach mueneto o'ch es entet țaye'to' chapanet pueyočhreto. Attetach amach es cotape'cherreto nocop ama't mamesha attoch na'qeshpaterranet. Añpa' allohua atet ote't Isaías ñeñt a'mtaye't Yompor po'ñoñ ahuat.

²⁸ Allempopa' alla oțerraneterr Pablo:

—Te'pa' o'ch neñotatas añ, țayoteñ Yompor po'ñoñpa' o'ch yeserrpare'tach po'poñ acheñ ñeñt ama judioneshayaye. Tarro'mar ñetpa' ñerra'm e'moñet Yompor po'ñoñpa' o'ch ame'ñet. E'ñe pame'ñeñoťetpa' qeshperretcha'.

²⁹ Ñeñta otuanet Pablopa' añña judionesha'pa' e'ñe pachmãre'tanna'teñoťetpa' o' ahuanerret.

³⁰ E'ñe epa char all yečha Pablo Romo. Allpon pallta'yese'tpa' e'ñe tsa'tuauye't. Ñaña e'ñe cohuen agapyesane't ñeñt huapyestse't. ³¹ Ñaña e'ñe cohuen serrpare'tatanete't

atet pena Yompor po'cohuenña atto ayochreshattena ña, ñaña yečhataneteť atet pena Yepartseshar Jesucristo. Tarro'mar allpa' ama esesha' epatare'taye'te. Allohua.

AÑ SAN PABLO PO' CARTA ÑEÑT̃ QUELLCAN ROMO' MARNESHA' ROMANOS

Atto Pablopa' quellcanet carta añecop ñeñt̃ ame'ñetsa netso Romo

¹ Masheñneshacha' ñaña nochaneshacha' ñeñtes allohuenes yeçhetsa anetso ñeñt̃ añ pa'so'cheñ Roma ñeñtes Yomporpa' ahuo't nanac muererrsa, attoña o' hua'ñerres attoch sapa'cho'ña o'ch e'ñe poctacma pueyochresha' perres. Na Pablon sequellquene'ña añ carta, ñeñten nanac torretsa Jesucristocop tarro'mar ñeñtecopña llesenserrenña Yompor, nach ma'yoçherraya serrpare'tyene' añ cohuen ñoñets ñeñt̃ huetsa Yompore-sho' alloch po'ñoçh yequeshperra.

² Añ cohuen ñoñetspa' ñeñt̃ara ñoñtsor ñeñt̃ ama't ahua't Yomporpa' e'ñe eñotatuane't̃ ñeñt̃ a'mta'yese't̃ po'ñoñ ñeñt̃cha' atet perrnay te' añeñpo. Ñeñto'marña ñetpa' quellca'yese't̃ ñeñt̃ atet otanete't̃ Parets. ³ Ñaña añ cohuen ñoñets alloch yequeshperra, ñeñt̃pa' añ serrpare'ten Jesucristo ñeñt̃ Puechemer pen Yompor. Tarraña allempo acheñetos arr patsropa' ñapa' e'ñe David po'mrenño't̃ eñalleta, ñeñt̃ara David ñeñt̃ añcha'tarettatse't̃ ahua't. ⁴ Tarraña Parets Puecamquẽño't̃pa' nanac ahua'men-cattache't̃ añecop ñeñt̃ cohuenetyetsa Partsocop. Ñaña chemerrña allempo Pomporpa' ahuo't tantater po'rromño't̃pa' allempoña e'ñe eñotuare't̃ta ñapa' po'ñoçh Yompor Puechemer ñeñt̃ara Jesucristo ñeñt̃ Yepartseshar yepen. ⁵ Ñaña yame'ñeño't̃ ñeñt̃ara Jesucristo, Pomporña e'ñe puemuerẽño't̃eypa' ahuo't apuey llesens, allochñapa' yach ame'ñatyenahuet ama't erraparen allohuen anetso'mar. Attochña e'ñe cosha'yeññañet Yompor Puechemer. ⁶ Atet ñerra'm sa ñeñtes yeçhetsa Romo, sapa'cho'ña ahuo't sa'hua'ñare't̃terra attoch socter Jesucristo.

⁷ Te'pa' e'ñe nehuom̃cha'teño'tes sa, napa' o'ch notas: Yomporepa'chña seben-sare'tam̃pene' ñeñt̃ nanac Parets epuet Puechemer Jesucristo ñeñt̃ Yepartseshar yepen. Ñetepa'chña socshatene' e'ñe sa seyoçhro allohuenes.

Atto Pablopa' mueneñ o'ch emo'tenana' romo'marnesha'

⁸ Ñehua, e'ñe ñanompa' añcha' notas, e'ñe neyemteño't̃ Jesucristopa' çhocma neparasyoso'teñ Yompor allohuenacpas, tarro'mar ora allemeñ anetso'marpa' çhocma serrpare'tyenet atto sapa' ahuo' e'ñe cohuen same'ñena. ⁹ Yomporpa' e'ñe eñotenen, napa' çhocma nema'yoçhena socop. Ñaña añ Yomporpa' ñeñt̃ña nanac neshherben, e'ñe neyoçhrocmañen neserrpare'tateño't̃ po'ñoñ, ñeñt̃ atet perrnay Jesucristo ñeñt̃ara ñeñt̃ Puechemer pen ña. ¹⁰ Napa' çhocma nenamueñ Yompor attoch ama't esempopa' o'ch nabchensa' ñerra'm ñach muenats. ¹¹ Napa' atarr nemneñ o'ch nabchensa', o'ch neyçhatensa' attoch Parets Puecamquẽño't̃pa' allote' sesen huomenctatsa ñocop. ¹² Ñehua, añ noten, e'ñe yame'ñeño't̃ parropa' e'ñe pocte' o'ch yeyçhatanna'ta ñeñt̃ cohuentetsa Yomporecop attoch yeyenpanna e'ñe yame'ñeño't̃ Yompor.

¹³ Ñaña te'pa' o'ch masheñneshacha' ñaña nochaneshacha' notas, ama't ahuañmo'cho'teñ nesechenañ o'ch nabchensa' tarraña teme'ttsenpa' ama erro't̃ nepeñe. Napa' añecop nesechena ñaña attoch seshopa'cho'ña o'te' name'ñateña' acheñenesha' atet ne'pa'yena po'poñ anetso'mar. ¹⁴ Tarro'mar ñeñt̃ poctetsa nocoppa' o'ch neñotach allohuen acheñenesha' añ cohuen ñoñets attoch yequeshperra, ama't griegonesha' ñeñt̃ nanac ayçhatarettetsa amapa' ñaña acheñenesha' ñeñt̃ ama ayçhatare't̃eyaye, ama't ñaña acheñenesha' ñeñt̃ nanac es eñotenet amapa' ñaña ñeñt̃ ama es eñotetso.

15 Ñeñto'marña e'ñe nocsheñeshocmañen nemneñ o'ch neserrpare'tatas samña añ cohuen ñoñets alloch yequeshperra ñeñtes yeçhetsa anetso Romo.

E'ñe añ yame'ñeñoñ ñeññ cohuen ñoñets, ñeññpa' allochña Yomporpa' a'queshpaterrey

16 Tarro'mar napa' ama apenca'pahuoye' nenteno añ cohuen ñoñets atto Jesucristo rroma yocop alloch yequeshperra, tarro'mar ñerra'm esesha' ame'ñenaya añ cohuen ñoñets, ñeññpa' ñeññña Yompor po'huamenc alloch a'queshpaterrey allohueney ñeññey ame'ñenaya ña, ñeññey judioneshay e'ñe yanom allotpa' ñaña ñeññ ama judioneshayaye. 17 Ñaña añ ñeññara cohuen ñoñetspa' eñotateney, e'ñe yeyemteñoña Jesucristopa' Pomporñapa' e'ñech pocte' enteney, allochñapa' allo'nach yesen e'ñe yemtenaya ña. Tarro'mar añpa' ñeññara anuaret ahuatoteñ e'ñe Yompor po'ñoño allohuenacpay, ñeññ otets atet: Ñeññey ame'ñenaya Yomporpa' e'ñech pocte' entueney ñaña e'ñe yeyemteñoñ ñapa' yañapa' corretsayach, ama't tayoteñ errponohuañen.

Atto allohuen acheñenesha' atpare'chete't Yompor

18 Tarro'mar yapa' yeñoteñ Yompor ñeññ pue'ntañ'o'tsen e'ñe po'yoroçhenño'tsa'yena allohuen acheñenesha' ñeññ ama pocteye' es peneto ñocop, ñeññ sosya'tsañach eñotyenet. Ñaña e'ñe atet puep'atse'teñoñetpa' ñeñññaña ama muenatenahueto o'ch orrtanet Yompor po'cohuenña ñeññ e'ñe po'ñoçh. 19 Ñehua, ama't sosya'tsañach eñotyenetpa' tarraña ñetpa' e'ñe eñotueñet ñaña atet penaña Yompor, tarro'mar ñapa' ñaña eñotatenahuet e'ñe pueyoçhreto ñeññ atet penaña ña. 20 Ama't yeñoteñ Yomporpa' ama entpahuoyaye tarraña yenteññañ pueyeçhcatarot po'partsoña ñaña allotña yenteññañña po'huomenc atarr. Ama't ahuatoteñ allempo e'ñe errte' yeçhcatene' pats, allotña yenteññañña po'ñoçh po'partsoteña ñeññña' errponohuañen. Ñeñto'marña acheñenesha' ñeññ yeçhene' sosya'tsaña' amate' errotenoñ oteto amo' eñoteñetoña ñeññ atet penaña Yompor po'partsoteña. 21 Ñaña ama't eñoteñetañ ñeññ atet penaña Yomporpa' tarraña ama mecha'na'teñetoña Parets, ñaña ama coshateñeto ñeññ ora añecop. Attoña o'huañcha' cotape'chenet ñeññ sherbets Partsocop. Ñeñto'marña pueyoçhretopa' o'huañcha' eñoteñet ñeññ cohuentetsa Yomporcop; atet ñerra'm pueyoçhretpa' nanac a'checmetam'psaret. 22 Ama't otenetañ atarro' es eñotenet, tarraña po'ñoçh ñetpa' ahuo't atta allo'na otatsña'etnenet. 23 O'huañcha' cosheñet ñeññ po'ñoçh Parets ñeññ ama arromña'eshayaye. Añachña e'ñe coshenet ñeññ yeçhcatyenet ñet. Tarraña ñetpa' e'ñe arromña'ota atet es yeçhcatyenet atet ñerra'm acheñma't ñaña otma't, ñaña po'yallop'ma't ñaña es berrma't. Ñetña'pa' ñeññach e'ñe ma'yochyenet ñeñto'ña e'ñe po'yomporer penet.

Atto acheñenesha' allo'na senet muenatse'tyese' ñeññ nanac sosey enten Yompor

24-25 Attoña o'huañcha' ame'ñeñet ñeññ po'ñoçh Parets, añachña ame'ñenet ñeññ ama po'ñoçhoyaye. O'huañcha' ma'yocheñet ñeññ e'ñe Yompora', añachña ma'yocheññañet ñeññ e'ñe ña pueyeçhcatuar. Ñaña o'huañcha' sherbeñet ñeññ e'ñe Yompora', añachña sherbeññañet ñeññ e'ñe ña pueyeçhcatar. Tarraña Yomporpa'chña ñapuet aye'choçhtatarettatsa tayoteñ ama't errponohuañen. Ñeññpa' attetepa'ch. Tarraña atto a'ypo'ñeñet Yomporpa' ñapa'cho'ña e'ñe pa'ypo'ñeñoñanet ñaña'pa' ahuo't muenatyesanet o'ch allo'na senet muenatse'tyaset ñeññ nanac sosey enten Yompor. Ñeññ atto muenatse'tyenet atto o'ch agapannenet, ñeññotpa' nanaccha' apencoçhen yeçhenet.

26 Ñeñto'marña Yompor e'ñe pa'ypo'ñeñoñanetpa' ahuo't muenatanet o'ch allo'na senet muenatse'tyestset ñeññ nanac apencoçhen enten ña. Attoña ama't coyanesha'pa' o'huañcha' aguënan puerrollar atto ñeññ e'ñe pocte' atet anareteyey. Ñagattsetach muenannetset o'ch agapanna'tyenet ñeññ e'ñe parro pacmacmuet. Ama't ñeññpa'

ama atteye' anareteye. ²⁷ Ñaña ama't yacmapa' attecma ch penet. O'huañcha' aguënan puetapor atto ñeñ e'ne pocte' atet anareteyeñ. Añachña atarr muenen o'ch aguënan pacma e'ne ñagattsacpacma, ama't ñeñtpa' ama atteye' anareteye. Ñeñ atet ñannenet yacma parro yacmacmapa' ñeñtpa' nanac apencochen enteñ Yompor. Ñañeñetach coñchatetset ñeñ atet ñatse'tyenet.

²⁸ Attoña ama't mamesha o'huañcha' mueneñet o'ch yerpa'pesyet Yompor. Ñeñto'marña Yomporña' pa'ypo'ñeñoñanetpa' ahuo't muenatanet o'ch cotape'chatse'tyeset ñeñ ama pocteye' enteno ña. Añachña ñatse'tyenet ñeñ ama a'papahuoyaye. ²⁹ Añachña nenet pueyo'chreto ñeñ esocmañen ñeñ ama't mameshapa' ama pocteyaye ñeñtara pa'namen sosya'tsañechno. Ñeñtpa' añechno: agapanneñets ñeñ ama puerrollareyaye ñaña ñeñ ama puetaporeyaye, ñaña cotape'chatse'tyeñets ñeñ ama cohuenayaye, ñaña ye'chatse'tyeñets, ñaña ye'moñe'tanneño'pa' o'ch erro't ye'poñ po'psheñeñ, ñaña yeye'chapreteño'pa' o'ch ye'moñe'ch po'psheñeñ, ñaña muetsanna'teñets, eñoseñe'cheñets, ñaña shecanna'teñets, ñaña atsrre'mo'chen entanna'tueñets, ñaña a'metam'psare'tanna'teñets, ³⁰ ñaña sasare'tanna'teñets, ama't Yomporpa' ello e'moñe'teñet, ñaña ama't po'psheñeñpa' amach mecha'na'teñeto ama't mamesha, attachña e'ne ñañeñapa' cohuen entetset, ellopa' ommo'chenetcha'. Añach e'nyenet ñeñ ama cohuenayaye, attotcha'ña ama ame'ñeñeto ama't pomporet ama't ñaña pachoret. ³¹ Amach chenaneo pueyo'chreto ñeñ cohuentetsa Yomporecop, amach a'poctateneto po'ñoñ ñeñ atet otenet. Amach es amorrentenaye' enteneto ama't mamesha, amach es a'pretnenaye' enteneto ama't mamesha, ñaña amach es amuerenaye' enteneto ama't memesha. ³² Ñeñ ñatse'tyetsa atetpa' ama't eñoteñetañ e'ne Yomporsho't anaretetua ama't coñcheñets añecop ñeñ ñatse'tyetsa atetpa' tarraña ñetña'pa' ñeñtarach atet ñatse'tyesnenet. Ama't pamo'tseshetpa' ñerra'm e'ne attecma pohuenet ñametpa' chemerrña allempopa' ñeñtach erronaye' coshapretannenet.

2

Atto ama't judionesha'pa'cho'ña atpare'toñete't Yompor po'ñoñ

¹ Ñeñto'mar te'pa' o'ch notas allohuenes ñeñtes judioneshas, ñato' sapa' chate' sotenapañ sapa'cho'ña año'te' atteye' sey'cheno sosya'tsañ atet pena po'potantañ. Tarraña amate' erro'tenot soto atet tarro'mar allohueneypa' e'ne attecma yepena. Ñerra'm cha yoten po'psheñeñpa' ama cohuenayaye, tarraña atetpa' yañeña atet otetsa ama't erra'tsenoteya ñeñtey atet otets. ² Tarraña ama't atetpa' yeñoteñ Yomporpa' chocmach tsa'taterrana allohuen ñeñ atet es ñatse'tyets, erro'tencha' e'ne pocte' ent ña. ³ Sapa' chate' sotenapañ saptate' atarr morrentensa Yompor, amachña tsa'taterrso sa, ama't sapa'cho'ña attecma se'patse'tyen sosya'tsañ ñeñ atet pena po'potantañ, tarraña sapa' cha sotenanet ñetpa' amo' cohuenayayeto. ⁴ Amapa' sapa' chate' sotenapañ Yompor pueuereño't nanacpa' amach tsa'taterrso tarro'mar teme'ttsen ama erro't penso, atta cohuenes. Ama't seño'teñe añecopña teme'ttsen muerensa Yompor attoch ellopa' o'ch e'ne soctape'chuerr cohuen allohuenes. ⁵ Tarraña ñerra'm atta se'charrtena seyo'chro, amachña soctape'chuerro cohuen, allempochña allo'nach sesen atontatnomue' attoch tsa'tatuerrsa Yompor esempohuañencha' tsa'tatuerrya allohueney erro'tencha' e'ne pocte' entyesuerrey e'ne puesheña'ttsoy. Allempoña allohuen acheñenesha'pa' o'ch e'ne eñotueret ñeñtcha' e'ne atet tsa'tatuerrya e'ne puesheña'ttsoy, ñeñtpa' e'nech pocte'. ⁶ Ñaña tsa'tuerryach allohueney ñeñtey corra'yetsa arr patsro erro'tente' ye'pa'yena e'ne ñocop. ⁷ Ñerra'm chocma yocape'chen e'ne cohuen Yomporecop, ñaña ñerra'm chocma yocteññañ po'cohuenña, ñaña ñerra'm añ ye'nen attoch ñapa' e'nech cohuen entuerrey, ñaña attoch aphuerreycha' ñeñ alloch yocrrerra errponhuañen, allempoña

po'ñoçhpa' aphuerreycha' attoch yapa' corretsayach yocsheñeshocmañen tayoten e'ñe errronañohuen. ⁸ Tarraña ñerra'm yapa' aña cohuen yenten ñeñt yemnen ya, Yomporña po'ñoññapa' ñerra'm cha yatpare'teñ, aña yoc'ten ñeñt ama cohuenayaye Yomporecoppa' ñaña po'yoroçhenñoť po'ñoçhpa' çhocmach tsa'tatuerrya. ⁹ A'coñchatareñterrach allohuen ñeñt cotene' ñeñt ama cohuenayaye arr patsro, amueroçhtatareñterretcha' allohuenet ñeñt atet petset, ama't ñanom atet ñerra'm judionesha' alloťpa' ñaña ñeñt ama judioneshayaye. ¹⁰ Tarraña allohuen ñeñt cotene' ñeñt cohuentetsa Yomporecop arr patsropa' Yomporñapa' cohuencha' enterranet, aphuerranetcha' alloch e'ñe cohuentapreteret, aphuerranetcha' ñaña attoch cosha'huerret e'ñe cohuen pueyoçhreto. Atetcha' perran allohuen ñeñt e'ñe cohuen corra'yetsa, ama't ñanom atet ñerra'm judionesha' alloťpa' ñaña ñeñt ama judioneshayaye.

¹¹ Tarro'mar Yomporpa' ama ñapťa judionesha' morrenteno, añaña ñaña allohuen acheñenesha'pa' e'ñe morrentueña. Ñaña attecma Yomporpa' ama ñapťa coñchatenano ñeñt ama judioneshayaye, ñapa' ama't judionesha'pa' e'ñech coñchatuer. ¹² Ama't atet ñerra'm ñeñt ama judioneshayaye ñeñt ama echenaye Moisés po'ñoñ, ñerra'm añ cotenet ñeñt ama cohuenayayepa' elloña ñetpa' chenca'huerretcha', tarraña ñetpa' amach añeye' a'chencaterrahuet Moisés po'ñoñ. Tarraña judionesha'ñapa' ama't echeññañetañ Moisés po'ñoñ, tarraña ñerra'm attera, añach cotape'chyenet ñeñt ama cohuenayaye, ñetpa' añachña a'chencaterrahuet ñeñtara Moisés po'ñoñ. ¹³ Tarro'mar Yomporpa' ama pocteye' entenano ñeñt atfa e'muene' orrena po'ñoñ all serrpare'teññañet. Añaña pocte' enten Yompor, o'ch atet penet ñeñt e'ñe atet oten po'ñoñ. ¹⁴ Ñehua, o'ch yoc'tape'ch ñeñt atet pena acheñenesha' ñeñt ama judioneshayaye, añenesha' ñeñt ama echenaye Yompor po'ñoñ. Ñetpa' ama't ama echeneto Yompor po'ñoñpa' errotenopa' e'ñe pueyoçhretoť poctape'cheñoťetpa' ahuo'tcha' atet pa'yenet ñeñt e'ñe cohuentetsa Yomporecop, ñeñt e'ñe atet o' anuaretetua Yompor po'ñoño ñeñt atet poctetsa ñocop. Ama't ama echeneto Yompor po'ñoñ ñeñt atet aquellcareťpa' tarraña pueyoçhretoñapa' e'ñe eñoteñet erra'tsente' ñeñt cohuentetsa. ¹⁵ Ñeñt atet pa'yene' ñeñt cohuentetsa, yapa' yeñoteñ pueyoçhretoña eñoteñet ñeñt atet cohuentetsa, ñeñtara ñeñt atet oten Yompor po'ñoñ ñeñt o' anaretetua. Ñehua, o'ch yetma'ntacha atet ñerra'mrrate' Yompor po'ñoñpa' e'ñech pueyoçhreto aquellcare'tena. Tarro'mar e'ñe ñet pueyoçhretoťpa' eñotenet ñerra'm esempopa' o'ch pøhuerret ñeñt ama cohuenayaye, ñaña eñotenet ñerra'm esempopa' o'ch atet penet ñaña ñeñt e'ñe cohuen. ¹⁶ Tarro'mar yeñoteñ esempohuañen Yomporpa' eñotaturreycha' ñeñt ora allpon ya' nasotena te'. Yompor Puechemerña ñeñt Jesucristo ñach otats attoch tsa'tatya. Ñeñtapa' e'ñe atet ñeñt o' notuas ñeñtara noten allempo neserrpare'ten añ cohuen ñoñets alloch yequeshperra.

Atto judionesha' ama't echenetañ Yompor po'ñoñ patpare'teñoťetpa' nanac ayohuarettenet

¹⁷ Te'pa' o'ch alla neserrpare'taterrser ñeñtes judioneshas. Ñehua, sapa' cha soten sapa' judioneshaso' ñaña aña atarr seyemtena ñeñt nonase't Moisés, ñaña atarr sommo'chena tarro'mar sapa' soteneñ e'ño' puechemer penes Yompor. ¹⁸ Ñaña soteneñ e'ño' seño'tueñ ñeñt atet muenen ña. Ñaña po'ñoñ ñeñt atet anaretpa' ñeñto'ña seyçhatene' ñeñt atarr cohuentetsa Yomporecop. ¹⁹ Ñeñto'marña sapa' soteneñ, po'ñoçh atarro' es señoten, attoch seyçhateñ po'potantañ ñeñt ama es eñoteneto. Cha sottena ñerra'm ñeñteso' echa'nene' ñeñt ama entetso, amapa' ñerra'm ñeñteso' çhoyo'tamñene' ñeñt chopeñe'chets checmeto. ²⁰ Ñaña sapa' çhate' sotenapañ po'ñoçh atarrte' cohuen seyçhateñ po'potantañ ñeñt ama eñotenaye ñeñt cohuentetsa, ñeñt atet petsa ñerra'mrrate' cheshatollesha' ñeñt ama eñotenana' ñeñt cohuentetsa. Ñaña sapa' soteneñ

po'ñocho' esocmañeno' seño tuahuen, ora ama't allpon ñeñt' po'ñocho'tets, tarro'mar sapa' secheññaño' Yompor po'ñoñ ñeñto'ña esocmañen seño'tatene'. ²¹ Ñehua, te'pa' o'ch notas, sapa' ama't o' atarr sey'chateñ po'potantañpa' tarraña amaña sey'chatenoña e'ñe sañeña ñeñt' cohuentetsa Yomporecop. Ñaña sapa' ama't o' atarr seserrpare'ten atto ama etanna'tpahuo, tarraña sañapa' chocma setanna'tyena. ²² Ñaña sapa' ama't seserrpareneñ atto amo' achtapretpahuo taporets, tarraña elloña sapa' chocma sapretanena setapor. Ñaña sapa' ama't setsena'teneñ ñeñt' aye'chcataret, tarraña sañapa' ahuo't seyorayesña puerahuot' ñeñt' atarr co'chnesha' ñeñt' allo arca'tam'penet ñeñt' po'yoser penet. Ñeñt' atet etetspa' ñeñt'pa'cho'ña attecma enteñ Yompor ama a'p'apahuoyaye atet. ²³ Ñaña sapa' nanac sommo'chena tarro'mar sapa' secheññaño' Yompor po'ñoñ ñeñt' atet anaret' ama't ahua'toteñ. Tarraña ama't atteñpa' amaña atteye'ña sepeno ñeñt' atet oteney añ ñoñets ñeñt'cha' atet se'pa. Yomporñapa' cha sottatateñ ñerra'mrrate' ñapa' ama es eñotpeno ama't mamesha. ²⁴ Ama't atet oten Yompor po'ñoñ ñeñt' atet anuaret' ahua'toteñ, ñeñt'pa' atet oten: "Ama't ñeñt' ama judioneshayayepa' achma're'teñet Yompor e'ñe sesharmorot, e'ñe se'patse'tyeñot' ñeñt' ama't mameshapa' ama pocteye' enteneto ama't ñame'ttseta."

Atto ñeñt' po'ño'ch puechemer pen Yompor

²⁵ Po'ño'chña ñerra'm añ semnen o'ch setsoteññañ Moisés po'ñoñ ñeñt' atet anuaret'pa' añ poctetsañ o'ch setsorrannena, tarro'mar ñeñt'pa' sherbeneñ. Tarraña ñerra'm elloña satpare'teññañ po'poñ Moisés po'ñoñ ñeñt' atet oteney ñeñt'cha' atet ye'papa' ama't atto o' sa'tsorraretetuapa' ñeñt'pa' e'ñe orrena, attecma ñerra'm ama atsorraret'eyayye. ²⁶ Ñeñto'marña yeñoteñ ñaña, ama't ñeñt' ama atsorraret'eyayepa' ñerra'm añ atet penet ñeñt' atet oteney Yompor po'ñoño'pa' ama't ama atsorraret'eyayye, Yomporñapa' atet'cha' enteney ñerra'm e'ñe puechemer peney po'ño'ch. Attecmach enteney ñerra'mrrate' ñeñt' atsorraret', tarraña e'ñech puechemer perrey po'ño'ch. ²⁷ Ñeñto'marña yeñoteñ ama't ñeñt' atta corretsa atet eñalleta, ama atsorraret'eyaye, ñerra'm añ atet penet po'ño'ch ñeñt' atet oteney Yompor po'ñoño'pa' ñet'ñapa' pencaterrsetcha', tarro'mar ñetpa' ello metanennaset ñeñt' allpon cohuen o' se'pohua Yomporecop. Tarro'mar sapa' satpare'teññañ po'ñoñ ñeñt' atet anaret'. Metanenset sa, ama't sapa' secheññañeñ Yompor po'ñoñ ahua'toteñ, ñaña ama't sapa' e'ñe atsorruareteseñ. ²⁸⁻²⁹ Ñeñt' e'ñe po'ño'ch puechemer pen Yomporpa' ama ñap'tayaye ñeñt' eñalletetsa judionesheshot'. Añña po'ño'ch e'ñe puechemer pen ñeñt' e'ñech cohuen co'tape'chenet pueyo'chreto ñocop. Ñaña tsorraneñets e'ñe atta yachtsopa' ama esoyaye Yomporecop. Añña sherbets Yomporecop atto cohuen esyoctape'chen e'ñe yeyo'chrot'. Ñaña ñeñt'pa' huena e'ñe Parets Puecamquëño't, ama año'teye' hueno o'ch e'ñe ye'pa'yesua ñeñt' aquellca'yesaret' esheccha'ña puechemer perrey Yompor. Ñerra'm atet'cha' yoctape'cherr cohuen yeyo'chro Yomporecoppa' atto'chña Yomporpa' e'ñech pocte' entuerrey, ama'tcha' acheñenesha'pa' ama pocteye' entenyeto.

3

¹ Te'ña sapa' chate' sotenapañ judionesha'pa' amate' atarr sherbeno amapa' chate' sotenapañ ñeñt' atto tsorrannenetpa' amate' es sherbeno. Tarraña ñeñt'pa' ama atteyaye. Po'ño'chca'ye atarr sherba'yen judionesha'. ² Ñehua, o'ch yot ñanom ñeñt' atto sherbenet. Ñet'ña aparetet Yompor po'ñoñ ñanom atto ñet'cha' a'potenet ñeñt'ara ñoñets. ³⁻⁴ Tarraña ama allohuenacmaye' ame'ñeneto ñeñt' atet oteney Yompor po'ñoño't. Tarraña ama't atet pohuanenetpa' amate' erro'tenot' a'psateretoña Yompor ñeñt' atet oteney po'ñoño't, ama't mamesha. Ñapa' chocmach a'poctatuonay po'ñoñ ñeñt' atet o' otueney. Ama't allohuen erra'tsen acheñerpa' ama'tcha' ama a'poctatueneto ñeñt' atet eñorenepa' tarraña

señoche'pa'ch, Yompor e'ñe ñap'ta, ama puenesho po'ñoñ. Ama't atet' otene' Yompor po'ñoñ ñeñ't atet' aquellca'huaret' ahua'toteñ, ñeñ'tpa' all atet' otene':

Allohuen' acheñenesha'pa' eñotetepa'ña atto Yomporpa' ama puenesho po'ñoñ, ñaña ñerra'm esesha' atta otatse'tyets atto Yomporpa' año' pocteye' es peno, tarraña eñochetepa'ña Yomporña e'ñe pocte' es pets.

⁵ Ñeñ'to'mar napa' o'ch notas, e'ñe ya yepeñoñ ñeñ't ama cohuenayaye, attoña yorrtateññañ Yompor ñapa' ñaña e'ñe cohuenare' es pa'yets. Ñehua, ñerra'm yo'chñaro't atet' yeyenpapreteñ Yompor orrtate' po'cohuenña'pa' sañapa' chate' sotenapañ, Yomporpa' amate' pocteyayeña o'ch tsa'taterrya yo'chñaro'mar. Ñehua, aña' atta notenes atet' tarro'mar ñeñ'tpa' atet' eñosatse'tyen' acheñenesha'. ⁶ Po'ño'ch yeñoteñ e'ñe pocte' atetcha' tsa'taterrya Yompor. Tarro'mar ñerra'm ama pocteyaye ñeñ't atet' pena Yomporpa' ñeñ'tepña'pa' amate'cho' erro'teno eñoteñe ñaña atetcha' entyesuerrey allohueney esempohuañen.

⁷ Ñaña yaña ñerra'm esempo yeñosatse'tyen es ñeñ't ama atteyayepa' attoña yorrtateññañ Yompor ñapa' ñaña e'ñe po'ño'chare' ñeñ't atet' es otyen. Ama't e'ñe yeñosatse'teño'tpa' nanaccha' yecohuentateññañ Yompor. Ñehua, ñato' sapa' chate' atet' soten, ñerra'm atet' yeyenpapreteñ orrtate' Yompor po'cohuenña, amate' pocteyayeña o'ch attera entene' Yompor ñerra'm ñeñ'tey atarr sosey es pa'yets. ⁸ Sapa' aña sotatse'tyen, ama'tpa' apapo'ch ñeñ't ama cohuentetsoma' allochña'pa' e'ñe atto'tpa' o'ch yorrtaten ñeñ't cohuentetsa. Puesheña'tets' acheñ e'ñe pueyllatate'teñme'chatset neñoñpa' otyenet, ñeñ'tña'cho' atarr otenña Pablo. Tarraña Yomporcha'ña tsa'taterrahuet ñeñ't atet' otatse'tyenet. Ñaña ñeñ'tpa' e'ñe pocte' atsa'tatare'tterre'tepa'chña.

Atto allohueney ñeñ'tey' acheñey' chocma ochña'tecmay

⁹ Ñehua, sapa' chate' sotenapañ yapa' po'ño'chte' Yomporpa' entene' ñeñ'tey judioneshay e'ñe cohuenare' es yepa'yen. Ñaña chate' sotenapañ po'potantañ ñeñ't ama judioneshayayepa' ñetña'pa' amo' atteye' entenaneto Yompor. Tarraña ama't mameshapa' ama atteyaye. Tarro'mar napa' o' neñotatuanmas atto ama't allohueney ñeñ'tey' acheñey' chocma ochña'tecmay ama't ñeñ'tey judioneshay. Ama't ñaña ñeñ't ama judioneshayayepa' e'ñe attecmay ochña'tecmay. ¹⁰ Ama't Yompor po'ñoñ ñeñ't atet' aquellca'huaret' ahua'toteñpa' e'ñe attecma otene', ñeñ'tpa' atet' oten:

Ama't puesheñarro'teyapa' ama eñallyeña ñeñ'tey e'ñe pocte' pene' ñeñ't poctetsa Yomporecop.

¹¹ Ñaña ama't puesheñarro'teya ama chennayo yeyo'chro attoch yeñotoñ Yompor po'cohuenña. Amachña aña'ye' ye'neno ñeñ't atet' muenen Yompor, ama't puesheñarro'teya.

¹² Ama't allohueney ahua't yesa'neñ Yompor, ama't mamesha o'huañ yesherba' ñocop, ama't allohueney. Ama't puesheñarro'teya ama eñallyeña ñeñ'tey e'ñe cohuen es pets Yomporecop.

¹³ Atto e'ñe ya yeñosatse'teño't sosya'tsañe'chno yeñya'ñña'pa' cha ottena ñerra'mrrate' apampaña ñeñ't atoram'psare't. Atto yeñen yenamotpa' nanaccha' yeshcannena. Atto yeshqu'eñ yamo'ts yenamotpa' chach yottena ñerra'mrrate' sheche'p amtsañe'p atserr yepene' puenamot.

¹⁴ Ñaña ñetpa' añach eñotenet parrnomarña, ñaña chach chemama'tannenet.

¹⁵ Ñaña pa'tsrre'mueño'tetpa' machayo'tach muetseñet' acheñ.

¹⁶ Pottatse'teño'tetpa' chach nanac muero'chtatyeñet' acheñenesha', nanaccha' llecateyeñet.

¹⁷ Ama't ahua'toteñpa' ama aña'ye' ye'cheneto attoch e'ñe muetsoññeño'tpa' cohuen yem-tannenet.

18 Ñaña ama't mameshapa' amach añcha'na'tpahuoye' enteñeto Yompor. Arrpa' allohua ñeñt notenes e'ñe Yompor po'ñoñ ñeñt atet aquellca'huaret ahuatoteñ.

19 Ñaña yapa' yeñoteñ ñeñt atet otyen Yompor po'ñoñ ñeñt aquellca'huaret ahuatoteñpa' añecopña oten ñeñt echene' po'ñoñ, amaña añecpayaye ñeñt ama echaye'te po'ñoñ allempo. (Atet ñerra'm judionesha'pa' ama't ahuatoteñ echeññañet Yompor po'ñoñ, ñeñtara ñoñets ñeñt o' notuanmas ñorra' arr.) Ñeñto'marña ama't puesheñarroteña sa ama't ñeñtes judioneshaspa' amate' errotenot soto, sapa' e'ño' cohuen entenes Yompor. Attoña yeñoteñ ama't allohueney ñeñtey corretsa añe patsropa' ama pocteye' entenye Yompor ñeñt atet ye'pa'yena. 20 Tarro'mar yeñoteñ e'ñe yetsotateñoña añ ñoñets ñeñt atet anaret ahuatoteñpa' amach errotenot ama't puesheñarroteña e'ñe ya'poctatoña yañeña attoch e'ñe pocte' enteney Yompor. Añecpaña sherbeney añ ñoñets ñeñt atet anaret, ñeñtcha' yeñotatene' po'ñoñch yapa' nanac ochñañ enteney Yompor.

Atto Yomporpa' e'ñech pocte' entuene, e'ñe yeyemteñoña Jesucristo

21 Tarraña te'ña Yomporpa' o' eñotatey atto ellonetpa' eñall po'poñ attoch pocte' entuene Yompor, ñeñtpa' ama añeyaye o'ch yetsotatuena ora ñoñets ñeñt atet anaret ahuatoteñ. Tarraña Yompor po'ñoñ ñeñt anaret ama't ahuatoteñpa' ñeñtarecpa eñen añecop. 22 Attochña Yomporpa' e'ñech pocte' entenanet ama't allohuen erra'tsencha' yemtenaya Puechemer ñeñtara Jesucristo. Ama't allohueney attecma e'ñe pocte' entuene, e'ñe yeyemteñoña Jesucristo. 23 Tarro'mar allohueney attecma e'ñe yo'chña'tuen. Ama yetsoteññañe Yompor po'cohuenña ñeñt e'ñe atet muenen ña. 24 Ñeñt attoch e'ñe pocte' enteney Yomporpa' ñeñtpa' atet: E'ñe puemuereñoñey ahuo't apuey Puechemer ñeñt Cristo Jesús atto ñachña e'ñe yetsa'tuoya allohuen yo'chñar. Ñeñtpa' e'ñe atta apuey Yompor, ama eso yetsa'teño ama't coñe'ta. 25 Ñaña Yomporpa' ahuo't orrtatan Puechemer Cristo ñeñtcha' rromosets añe patsro, o'ch ashataretta po'rras e'ñe yocop. Allochña'pa' e'ñech e'shohuaretterra yo'chñar ñerra'm yeyemterach ña. Ñaña ahuo't atet pa Yompor attoch yeñoñch, ñapa' e'ñe pocte' atet pe't ahuat, tarro'mar acheñenesha' ñeñt corratset ahuatpa' Yomporpa' atta ahuantenanet po'chñar, ama ahuenaye' atsa'tatarettuerrreto po'chñaret. (Tarro'mar ñapa' e'ñe eñoteñ, Cristochña tsa'tuerrahuet po'chñaret ñamet ñeñt allpon ame'ñaye't ña ahuat.) 26 Ñaña ahuo't atet pa Yompor allochña'pa' attoch yeñoñch ñapa' e'ñe pocte' atet pena; teme'ttsen attochña e'ñech pocte' enteney e'ñe yeyemteñoñ Jesús.

Atto e'ñe ye'pa'yeñoña yañeña ñeñt cohuen yenten ya, Yomporña'pa' amach cohuenaye' entenye

27 Ñehua, atto e'ñe yeyemteñoña Cristo Yomporña'pa' e'ñech pocte' enteney, ñeñto'marña o'huañcha' eñalleta ñeñt allo yommo'chena e'ñe yañeña, ñeñt e'ñe yetsotateñoñ. Tarro'mar e'ñe ye'pa'yeñoña yañeña ñeñt e'ñe cohuen yenten ya, Yomporña'pa' amach pocteye' entenye. 28 Ñeñto'marña te'pa' e'ñe po'ñoñch yeñoteñ e'ñe yeyemteñoña Cristopa' e'ñech pocte' enteney Yompor ama't ama yetsoteno ñoñets ñeñt atet anaret ahuatoteñ.

29 Ñehua, o'ch noterrser masheñnesha judioneshacha', ñato' sapa' chate' sotenapañ Yomporpa' saptate' Seyomporer sepeñ ñeñtes judioneshas, amate'ña añecpa'nayaye ñeñt ama judioneshayaye. Tarraña napa' o'ch notas, ama't ñeñt ama judioneshayayepa' ñetpa'cho'ña Po'yomporer peñet. 30 Tarro'mar e'ñe patrpa Yompor. Ñaña ama't erra'tsena judionesha' ñeñtcha' ame'ñerraya Cristopa' Yomporña'pa' e'ñech pocte' entenanet. Ñaña attecma ama't erra'tsena ñeñt ama judioneshayaye ñeñtcha' yemterraya Cristo, ñetpa'cho'ña e'ñech pocte' entenanet Yompor. 31 Ñato' sa te'pa' chate' sotenapañ

po'ñooh yetsoateñoña añ ñoñets ñeñt atet anaret aphuerryeñ añ patspa' yapa' e'ñete' or-rena yeyemteñañ Yompor; tarro'mar ñerra'm atteñpa' Yomporpa' amate' a'pocatanñeña po'ñoñ ñeñt atet otan ahuañ Abraham. ¹⁵ Ñaña ñerra'm añ yocten añ ñoñets ñeñt atet anaretpa' nanaccha' a'coñchatareyeñ ñerra'm ama yetsoatueno ora allpon ñoñets. Ñaña ñerra'm ama eñallne añ ñoñets ñeñt atet anaretpa' amate' errotenoñ coñchatyeto tarro'mar amate' eñallne ñoñets ñeñtcha' ya'pote' ñeñt ochñartsotets.

Attoch a'naterrya Yomporpa' ñeñtpa' e'ñech yeyemteñoña ña

¹⁶ Ñeñto'marña yeñoteñ attoch a'naterrya Yompor ñeñt atet otahuapa' ñeñt po'ñoohpa' e'ñech yeyemteñoña ña attochña e'ñe pueuereñoñey e'ñech a'natuerrya allohueney. Amach ñapñayaya judionesha' ñeñt cotene' añ ñoñtsor ñeñt atet anaret, añecpa'naña allohueney ñeñteycha' yemterraya Yompor e'ñe attecptar atet pe't ahuañ yatañ Abraham. Tarro'mar ñapa' po'ñooh yatañ yepen allohueney. ¹⁷ Ama't Yompor po'ñoño ñeñt atet anuaret ahuañoteñpa' all orrtena ñeñt atet Yomporpa' otan ahuañ Abraham, ñeñtpa' atet oche't: "Shonte' pa'namen acheñpa' ñetñapa' pomporcha' pòhuerrpet. Añpa' e'ñe na atet o' neponaþ." Ñeñto'mar yeñoteñ Abraham e'ñe pueyemteñoñ Yomporpa' atet eñche't Yompor ñapa' pomporcha' per shonte' pa'namen acheñ. Ñeñtñapa' ñeñtara Yompor ñeñt nanac ahuañencat ñeñt eñotene' o'ch tantater-ran ama't ñeñt rromuets, ñaña ñeñt eñotene' e'ñe po'ñoñoñpa' o'ch orrtatan ama't ñeñt ama eñalle te'.

¹⁸⁻¹⁹ Allempo Yomporpa' atet otan Abraham "pesho'tpa' merenach shonte' pa'namen acheñ ñeñtcha' pòmporerraya" allempo Abrahampa' o' nanac po'nme'ten—charroch charra' char'te' echen. Tarraña Abrahampa' ama't eñotena o' nanac po'nme'ten, o' meten allempo attoch chemere'ten, ñaña puetapor Sarapa'cho'ña o' nanac po'nme'ten, amate' errotenoñ cheyore'terro, tarraña Abrahampa' ama quechpuenano atto yemtenana ñeñt atet otue Yompor. E'ñe pueyemteñoñ Yomporpa' allo'na sen cohueñe' Yompor o'ch aþ ama't pa'rra puechemer. ²⁰ Ama echarrteno pueyo'chro ama't mamesha añecop ñeñt atet o' otue Yompor. Allo'na sen yemuetnomaya Yompor ñeñt nanac ahuañencat pene'. E'ñe pueyemteñoñan Yompor, ñapa' chocmach otaþsa'tyesanete't Yomporpa' ñapña atarr ahuañencat. ²¹ Tarro'mar eñochet e'ñe Yompor po'huamenco't, po'ñoohpa' o'ch aþ ama't pa'rra puechemer ñeñt atet o' otue. ²² Ñeñto'marña Abraham e'ñe pueyemteñoñan Yompor Yomporñapa' e'ñe pocte' eñche't.

²³ Tarraña añ ñoñetspa' ama ñapñecpayaye Abrahamacop anarete. ²⁴⁻²⁵ Yocpa'naña anarete't allohueney ñeñteycha' yemtenaya Yompor, atto ñapa' a'rroyonay Puechemer ñeñt Jesús ñeñtcha' rromats e'ñe ya yo'chñarecop, ñeñtara Jesús ñeñt Yepartseshar yepen, ñaña atto Yomporpa' tantaterran Puechemer po'rromñoñ, attoch yeñoch yo'chñarpa' o' e'ñe atsa'taretetua. Ñeñto'marña te'pa' e'ñe yeyemteñoñ Yompor ñeñt atto a'pocatonay, yapa'cho'ña e'ñech pocte' enteney yaña.

5

Atto e'ñe yeyemteñoñ Yompor; e'ñech pocte' enteney, atarrcha' cosheñtso'tseney

¹ Ñeñto'marña te'pa' yeñoteñ e'ñe yeyemteñoña Jesucristo, Yomporñapa' e'ñe pocte' enteney, o'huañcha' yoro'cheno'tseney Yomporesho't, tarro'mar Yepartseshar Jesucristopa' ahua't a'pocatuerrnay yo'chñar Yomporesho. ² E'ñe attoña Cristopa' chapaterrey Yompor pueuereño attoch chocma bensare'tampeney; ñeñtpa' e'ñe yeyemteñoñ Cristo. Ñaña yapa' e'ñech yocsheñsha' yecueñ esempohuañencha' e'ñe poctacma yecohuentapretera Yompor. ³ Ñaña ama't yemuerochteñoñ o'ch yocshena tarro'mar yeñoteñ e'ñe yemuerochteñoñpa' allempoña yoctape'chen attoch ahuañencat pa'y Yompor attochña ya'huanten allohuen ñeñt echarr yentyen. ⁴ Ñaña attoña ya'huanten

allohuen ñeñt echarr yentyenpa' yapa' yeñoteñ Yomporñapa' e'ñech cohuen entuerrey. Ñaña ñerra'm yeñoteñ Yomporpa' e'ñe cohuen enterrey, yapa' e'ñe yeyemteñoñ o'ch yecuerr ñeñt o'patatenya Yompor. ⁵ Ñaña e'ñe yecueñoñ ñeñt o'patatenya Yompor ñapa' chocmach a'pocatanan po'ñoñ ñeñt atet oten yocop. Yapa' ama't esempapa' amach es ye'naterraye'te po'poñ, tarro'mar Yomporpa' ahuo't apuey Puecamquëñ ñeñtcha' yechetsa yeyochro ñeñtcha'ña yeñotatene' atto Yomporpa' nanac morrentenya.

⁶ Yapa' yeñoteñ nanac morrentenya Yompor tarro'mar ahua'tpa' ama es yocape'chpeno ama't mamesha Yomporecop attoch yequeshperrañ. Tarraña Yomporñapa' e'ñe allempocmapa' ahuo't mueñan Puechemer Cristo a'ne patsro ñeñtcha' rromosets e'ñe yocop ñeñt ey ama es cotape'chetso cohuen ama't mamesha Yomporecop.

⁷ Ñehua, yapa' arromña'teypa' yeñoteñ atarr torrapo' attoch yerroma po'psheñecop, ama't añ acheñrecop ñeñt atarr cohuen. Tarraña errotenopa' ama tama torrapahuoye' yenteno o'ch yerroma añ acheñrecop ñeñt atarr amueraña. ⁸ Tarraña yapa' ama't allempo ora ye'patse'tyen sosya'tsaña' e'ñe allempocmaña Cristopa' ahuo't roma yocop. Attoña Yomporpa' e'ñotaterrey yapa' nanac morrentenya. ⁹ Ñeñto'marña te'pa' e'ñe pocte' enteney Yompor tarro'mar Cristopa' ahuo't roma yocop. Elloña attoña a'queshpatey allochñapa' amach a'coñchatare'tey ama't errponaña. ¹⁰ Ama't allempo ora ye'moñe'teñ Yomporpa' Puechemerña po'rromño'tpa' ahuo't e'ñe yamo'tstannerra epay Pompor. Elloña te'pa' atto correna Cristopa' attoña yapa'cho'ña a'queshpaterreycha'. ¹¹ Elloña te'pa' e'ñe yocsheña Yompor tarro'mar Puechemer ñeñtara Yepartseshar Jesucristopa' ahuo't amo'tstaterrya e'ñe ña Pompor.

Atto yamo'mte' Adánpa' ñapa' cha a'chencatey; Yamo'mte'ña Cristopa' ñaña ya'queshpaterre'

¹² Ahua't puesheñarr yacma ñeñt pa'so'cheñ Adánpa' ahuo't orrtatan atpare'teñets a'ne patsro Yomporecop. Ñeñto'marña allempoteñ allohueney ñeñt ey acheñeypa' e'ñe attecma ye'pohua. Ñaña allempopa' ahuo't anare'tta attoch yo'chñaro'tpa' o'ch yerroma. Ñeñto'marña allohueney ñeñt ey acheñeypa' o'patuaya rromueñets tarro'mar allohueneypa' ñeñt ey yeñot ñeñt atet pa' ñanom yamo'mte' Adán. ¹³ Ñaña allempoteñ corre't Adán, acheñenesha' arr patsropa' ñeñt ey e'ñotet ñeñt atet atpare'tan Adán Yompor. Tarraña allempopa' ama eñalletena' ñoñets ñeñt atet anare't alloch a'coñchatare'tterret. ¹⁴ Tarraña attera o'patenanet rromueñets e'ñe allempoteñ corre't Adán ñeñt ey attera ñaña tarremphua allempo corre't ñaña Moisés ñeñt nahuet ñoñets. Ama't ama atpare'teñña'to Yompor po'ñoñ e'ñe atet atpare'te't Adán, tarraña attera o'patenanet rromueñets. (Ñeñto'mar yeñoteñ Adán po'chñaro'tpa' ahuo't anare'tta attoch o'patuaya allohueney rromueñets.) Ñeñtña yamo'mte' Adánpa' aña o'patatuaya ñeñt ey ama cohue-nayaye, tarraña Yamo'mte'ña Cristopa' allempo huapapa' ñapa' aña o'patatosya ñeñt e'ñe cohuenare'.

¹⁵ Tarro'mar e'ñe patparñesharrmorof Adánpa' ama atteyaye ñerra'm ñeñt ey atet atarr muerenya Cristo. Tarro'mar e'ñe puesheñarra po'chñaro't o'patya rromueñets allohueney pa'namen acheñey. Tarraña elloñapa' eñall po'psheñeñ, ñeñtara Jesucristo ñeñt ey muererraya. Attoña Yomporpa' orrtatonay puemuereña yocop alloña nanac cohuen es apatueney e'ñe atta allohueney pa'namen ñeñt ey acheñey. ¹⁶ Ñaña ñeñt ey atet muererraya Yompor, ñeñt ey pa' ama atteyaye ñerra'm ñeñt ey atet o'patuaya ochñarets ama't e'ñe puesheñarro'ta. Tarro'mar ñeñt ey atet pa' Adán ama't parrochapa' ñeñt ey yo'patatuenaya coñcheñets. Tarraña ñeñt ey atet a'queshpaterrey Yomporpa' ñeñt ey atet pa'. Ama't shonteñ yo'chñarpa' ñaña' e'ñech pocte' enteney e'ñe atta tarro'mar ñeñt ey o' a'pocatuonay Cristo. ¹⁷ Ñaña atto e'ñe puesheñarro'ta po'chñaro't o'patenya rromueñets,

tarraña elloña nanac muererrya Yompor attotña a'rroyerrnay Puechemer ñeñtara Jesucristo ñeñt o' a'pocatuerrnay yo'chñar Yomporesho attochña yapa' corretsayach.

¹⁸ Ñeñto'marña yeñoteñ atto e'ñe puesheñarroña po'chñarof ahuo't o'patatyet coñcheñets, attecma ñaña puesheñarr ñeñt Jesucristopa' ahuo't pohua ñeñt e'ñe cohuen, alloña a'pocaterrey, attochña yapa' corretsayach yocsheñeshocmañen tayoteñ errponohuañen. ¹⁹ Atto e'ñe puesheñarra ñeñt Adán ñeñt atpare'tene' Yompor, ñeñto'marña ñesharrmorof Yomporña' e'ñe ochñañoche' entueney ama't shonte' pa'namena'ttsoctmay ñeñtey acheñey. Tarraña puesheñarr ñeñt Cristo ñeñt e'ñe cohuen ame'ñenaya Yompor, ñeñtña' alloch e'ñe pocte' enteney Yompor, ama't shontey pa'namena'ttsoctmay ñeñtey acheñey.

²⁰ Ñaña allempo chap allempoch anare'tta ñoñets ñeñtcha' eñotaterrahuet ñeñtcha' atet pet ñaña ñeñtcha' ama atet a'papahuo elloña allempopa' ñetpa' o' eñoterret atarr atparña'tterret. Tarraña ama't atto nanac yatpare'tena elloña Yomporpa' nanac muererrya. ²¹ Attoña e'ñe ye'patse'tyeñof ñeñt ama cohuenayayepa' ahuo't anare'tta rromueñets ñeñtcha' yo'patenaya ñeñtña' coñcheñets. Tarraña elloña Jesucristo ñeñt Yepartseshar yepen ahuo't orrtatonay atto Yomporpa' nanac muererrya attoña a'pocatuerrnay yo'chñar. Attochña yapa' corretsayach yocsheñeshocmañen tayoteñ errponohuañen.

6

Atto ñeñt toma'ntena allempo yapataretta Cristocop

¹ Te'pa' e'ñe yeñoteñ ama't atet ye'patse'tyese't ñeñt ama cohuenayaye, Yomporpa' elloña nanac muererrya, atto peretna'huerrnay yo'chñar. Tarraña ama't atteñpa' amach yota'psa'tatsto "ñeñte'pñapa' o'ch allo'na ye'patse'tyesnena ñeñt sosya'tsañ tarro'mar Yomporpa' nanquëpa't muerenana ñeñt patse'tyene' ñeñt ama cohuenayaye ñaña ellopa' o'chcho' alla muererrya." ² Tarraña amach errotenof allo'na yeseno patse'tyesnomue' ñeñt ama cohuenayaye tarro'mar o' ya'ypo'ñerr yo'chñar allempoteñ o' yaguër Cristo. ³ Ama't seño'teñeña ñeñt toma'ntena allempo yapataretta Cristocop. Añ toma'ntena atto o' yeparrocmaterr epay Cristo, atet ñerra'mrrate' cho yerromapreteña Cristo allohueney ñeñtey apatarettetsa e'ñe yame'ñeño't Cristo Jesús. ⁴ Allempo yapatarettapa' e'ñe atet ñerra'mrrate' cho yerromapreteña Cristo ñaña atet ñerra'm cho yepampapreteña Cristo. Allempoña Yomporpa' ahuo't tantaterran Puechemer e'ñe po'huamencot ñeñt atarr cohuen, yapa'cho'ña ñeñtara po'huamencarotña e'ñe cohuen o' etserrataterrnay yocta'pña, ñeñtcha' atet yocrrena.

⁵ Tarro'mar e'ñe yeparrocmateño't epay Cristo o' yerromaprecha. (Attochña ya'ypo'ñerr ñeñt ama cohuenaye' entapretenye Cristo.) Ñaña ñerra'm yerromapreteña Cristo yeñoteñ o' yetantapretera attochña yocrrerra e'ñe cohuen ñocop. ⁶ Tarro'mar yeñoteñ ñeñtey acheñey ñeñt yeyochro'tsen ñeñt yoctape'chataye't sosya'tsañ ahua't ñeñtpa' o' a'mchechataretetuerra atet ñerra'mrrate' acorso'tam'psare'tta epuet Cristo. Attochña o'huañcha' cotape'chatse'tatnenedy yo'chñarañeña. Amach allo'na taruasatnenedy yo'chñar. ⁷ Ñato' o'ch yetma'ntacha atet pena arromña't. Ñehua, yapa' yeñoteñ ñerra'm esesha' rromatspa' amach errotenof allo'na cotape'chyesnenano sosya'tsañ. Yapa'cho'ña atetcha' yentena ñerra'mrrate' cho yerromuen, amach errotenof allo'na yoctape'chyesneno ñeñt sosya'tsañ enten Yompor. ⁸ Ñaña atto o' yerromaprecha Cristo, yapa' yeñoteñ ñaña e'ñe yeparrocmateño't Cristopa' alloña corretsayach, atet pena ñapa' e'ñe corretsa. ⁹ Tarro'mar yapa' yeñoteñ Cristopa' o' tanterra po'rromño't, amach alla rromuerre'te. Amach errotenof alla o'patere'te rromueñets. ¹⁰ Tarro'mar ñapa' atto rroma yo'chñarecoppa' ñeñtpa' e'ñe parrocha rroma ama't allohuenacop. Ñaña atto

correna te' ñeñtpa' e'ñe ora Pomporecpa. ¹¹ Yapa'cho'ña attecmuropa'ch yentena yaña yañeña. E'ñe yerromapreteñoñ Cristo Jesúsapa' o'ch ya'ypo'ñerr yo'chñar ñeñto'marña amach errotenoñ alla taruasaterryerro yo'chñar. Ñaña te'pa' e'ñe yeparrocmateñoñ Yepartseshar Cristopa' o'ch yocrraprecha e'ñe cohuen Yomporecop.

Attoch amach semnatatsche so'chñar o'ch alla taruasaterrnaserr sa'rromñañechets

¹² Ñeñto'marña te'pa' o'ch notas, amach semnatatsche so'chñarpa' o'ch alla taruasaterrnaserr sa'rromñañechets. Allochñapa' amach allo'na sepatse'tyesneno ñeñt atet muenatse'tatyenes sechets. ¹³ Amach semnatatsche sechets o'ch aña torrena ñeñt ama cohuenaye' enteno Yompor. Añcha'ña o'ch saphuer Yompor sechets allochñapa' ñachña torratenaya añecop ñeñt e'ñe cohuen enten ña. Ñato' o'ch yetma'ntacha atet ñerra'mrrate' cho yerromuen tarraña te'pa' o'ch alla yocrrerra cohuen Yomporecop. ¹⁴ Tarro'mar te'pa' amach errotenoñ allo'na taruasatnenye yo'chñar, tarro'mar te'pa' añ yeyemtena Yompor atto muerenyapa' ahuo't a'pocatonay yo'chñar. Ama aye' yeyemteno ñoñets ñeñt atet anaret ñeñtcha' atet yepohua esheccha' cohuen enteney Yompor.

¹⁵ Te'pa' yeñoteñ ama aye' yeyemteno ñoñets ñeñt atet anaret. Aña yeyemtena Yompor puemuerenoñ e'ñe yenpueney. Tarraña ama't atteña' ama pocteyaye o'ch allo'na yesen patse'tyerrayerr ñeñt ama cohuenaye' enteno Yompor ama't mamesha. ¹⁶ Ñato' o'ch yetma'ntacha atet. Ñehua, yapa' yeñoteñ ñerra'm esesha' yemnen ñeñtcha' yetaruasatene' aña patsro, ñeñtpa' po'ñoçh ñeñtcha' yepatronar yepen, ñaña e'ñech pauner yentatena attochña ñeñtch yame'ñena ñeñt yepatronar yepen. Ñaña attecmaçh yepena ñerra'm añ yemnen yo'chñarach yetaruasatene', tarraña ñerra'm añ yetaruasatene' yo'chñarpa' ñeñtpa' tsa'taterryach rromueñtso ñeñtara coñcheñtso. Tarraña ñerra'm añ yame'ñena Yompor ñeñt atet oteney po'ñoñoñ, ñeñtpa' alloch yortatyen e'ñe cohuen ñeñt e'ñe atet muenen ña. ¹⁷ Ñaña sapa' ahua'tpa' aña setaruasataye't so'chñar, tarraña te'ñapa' e'ñe seyoçhrocmañen o' same'ñera ora ñeñt atet pena Yompor pa'poteñ ñeñtara ñeñt serrpare'tatasete't. Ñeñto'marña te'pa' napa' atarr nocshena, atarr neparasyoso'teñ Yompor socop. ¹⁸ Ñaña te'pa' o'huañcha' taruasaterrnserr so'chñar. Añcha'ña setaruasaterre' Yompor erra'tsente' muenen ña. ¹⁹ Ñehua, Yompor poçta'ñoñtpa' atet netma'ntatensa atto yocrrena acheñey arr patsro allochñapa' cohuencha' çhaponasa seyoçhro Yompor poçta'ña. Ñeñt notenes po'ñoçhpa' ñeñtpa' atet sepe't ahua't e'ñe pocte' sente't e'ñe ora sechtsohuen allo'na sete't patse'tnomue' sosya'tsañ ñeñt ama cohuenaye' enteno Yompor. Te'pa'cho'ña attecmuropa'ch e'ñe pocte' senteñ ora sechtsohuen o'ch sepomuerra Yomporecop, allochñapa' attoch sa'cohuentataretterra e'ñe cohuen Partsocop ñeñt e'ñe atet muenen ña.

²⁰ Ñehua, ahua't allempo aña setaruasataye't so'chñarpa' ama aye' soçtape'che'te ñeñt e'ñe cohuen enten Yompor. ²¹ Tarraña ñeñt atet sepatse'tyese't sosya'tsañ ahua'tpa' ama es sherbase'te ama't mamesha, ñeñtara ama't te'pa' pencna'ntatenes. Yapa' yeñoteñ ñeñtpa' allach tsa'taterryañ rromueñtso, ñeñtara coñcheñtso. ²² Tarraña te'pa' o'huañcha' alla taruasaterryerr yo'chñar. Añcha'ña yetorratene' Yompor po'taruas attoch yesherbeñ. Allochñapa' ñach yetsa'tenaya alloch ya'cohuentataretterra e'ñe cohuen ñocop aña patsro. Allochñapa' attochña aphuerrey allochña yapa' corretsayach yocsheñeshocmañen tayoteñ errponañohuen. ²³ Tarro'mar yo'chñarpa' allach tsa'taterrya rromueñtso, ñeñtara coñcheñtso. Tarraña e'ñe yeparrocmateñoñ epay Yepartseshar Cristo Jesúsapa' Yomporña' aphuerreycha' e'ñe atta allochña yapa' corretsayach yocsheñeshocmañen tayoteñ errponañohuen.

7

Atto o'huañ amcha'noçhtana'tenya añ ñoñets ñeñt atet anaret ahua't Moiséseshoñ

¹ Te'pa' o'ch masheñneshacha' ñaña nochaneshacha' netma'ntatasa po'poñ coṭapñats. Ñehua, sapa' o' e'ñe señoṭueñ atet pena ñoñets ñeñt atet anaret arr patsro ñeñtcha' atet yepena. Sapa' señoṭen añ ñoñetspa' sherben tarrempohuach allempo yocrrena añe patsro. Tarraña ñerra'm esempo yerromapa' añ ñoñetspa' amach erroṭenoṭ allo'na yame'ña'neño. O'huañcha' yame'ñeña. ²⁻³ Atet ñerra'mrrate' ñeñt oteney paterr ñoñets ñeñt atet anaret. Ñeñtpa' atet oteney: Coyanasha' arrollare'tañpa' amach satstano puerrollar allempo correna añe patsro. Ñaña ñerra'm allempo correna puerrollar, ñerra'm o'ch yorer po'psheñeñ ñeñtcha' puerrollar perrpa' ñeñtpa' ama pocteyaye tarro'mar ñeñtpa' o'chña'tampeñets enteñ Yompor. Tarraña ñerra'm esempoch rromapes puerrollarpa' allempoñapa' o'huañcha' ame'ñatacha añ ñoñets ñeñt atet anaret puerrollarecop. Ñaña ñerra'm allempo yorer po'psheñeñ ñeñtcha' puerrollar perrpa' allempo ñeñtpa' e'ñe pocte' tarro'mar allempo, ñeñtpa' ama o'chña'tampeñtsoye' enteñe Yompor.

⁴ Ñeñto'marña o'ch masheñneshacha' ñaña nochanesha notas, yapa'cho'ña o'huañcha' añcha'nochtana'tenya añ ñoñets ñeñt atet anaret ahuat Moiséseshoñ, tarro'mar ñeñtey o' yame'ñerrapa' o' yerromapretera Cristo. Ñeñto'marña te'pa' e'ñe pocte' o'ch yo'patera po'psheñeñ. Ñaña ñeñt o' yo'patera te', ñeñtpa' Cristo ñeñtara ñeñt tanterrtsa rromot. Allochñapa' attoch yorrtatyen ñeñt e'ñe cohuen atet muenen Yompor. ⁵ Tarro'mar ahuat allempo e'ñe yañeña yoṭapña ora yoctenpa' ama't yeñoteneñ añ ñoñets ñeñt atet anaretpa' attera muenateney o'ch allo'na taruasatnenedy yo'chñar. Attoña al-lach chapaterryeñ rromueñtso attoch e'ñe yechenca'huerrañ. ⁶ Tarraña te'pa' e'ñe yerromapreṭeñoñ Cristo añ ñoñets ñeñt atet anaretpa' o'huañ añcha'nochtana'tenya atet ñerra'm ahuat. Ñeñto'marña te'pa' e'ñe cohuen yocrrena Yomporecop. Te'pa' ama añecpayaye ñeñt atet yepe't ahuat attoch e'ñe ya'muerochtame'teñoñ yetsotatuañ ñeñt atet otye't ñoñets ñeñt atet anaret. Añecopña yocrrena e'ñe cohuen Yomporecop tarro'mar te' Parets Puecamquẽña' o' etserrataterrnay yoṭapña.

Atto yo'chñarpa' atarr mopa'teney; amach muenatenye o'ch atet yeṭohua ñeñt atet oteney ñoñets ñeñt atet anaret

⁷ Ñehua, ñato' sapa' chate' sotenapañ napa' noteneste' Yompor po'ñoñ ñeñt atet anaretpa' ñeñtpa' amate' cohuenayaye. Tarraña ñeñtpa' ama atteye' notenso ama't mamesha. Atet napa' ñerra'm ama eñallñeña añ ñoñets ñeñt atet anaret, napa' amate' chaponañeña neyoçhro ñeñt ama pocteye' enteno Yompor. Atet ñerra'm ama eñallñeña añ ñoñets ñeñt yotene' "amach yeye'chapretanna'tatsto", napa' amate' chaponañeña neyoçhro ñeñt ama pocteye' enteno Yompor ñerra'm esempo es yeye'chapretannena. ⁸ Tarraña allempo chapona neyoçhro po'ñoçh atet oteney ñoñets ñeñt atet anaret ama es aye'chapretanna'tpahuo, no'chñar ñeñt neyoçhro'tsenpa' elloña nanaccha' es ye'chatse'tatyenen. Ñerra'm ama neñotenñe añ ñoñets ñeñt yotene' ama es aye'chapretanna'tpahuo, ñerra'mañpa' amate' neñotenñe ñeñt atet neye'chapreteña po'psheñeñ ñeñtpa' ñeñtña po'ñoçh no'chñar entapretenen Yompor. ⁹ Ahuat napa' allempo ama neñotena' ñoñets ñeñt atet anaret, nañapa' nanac cosheñtso'tsennoñ allempo. Tarraña allempoña neñoter ñeñt atet oteney ñeñtcha' atet yeṭa cohuen ñaña ñeñt ama atet apapahuopa' allempoteñña napa' neñotena po'ñoçhpa' shonte' no'chñar ñeñt neyoçhro'tsen. Allempoteñña napa' atarr nellquerra nanac. Neñoteñ añña no'patenaya rromueñets ñeñtara coñcheñets. ¹⁰ Ñaña añ ñeñtara ñoñets ñeñt atet anaret allo'ch yocrrenañ e'ñe cohuenpa' tarraña arepa't atteyaye, ñaña no'chñar allo natpare'ten ñoñets ñeñt atet anaret ñeñtach nanmayeñ rromueñtso.

¹¹⁻¹² Tarro'mar allempoteñ neñoterr añ ñoñets ñeñt atet anaretpa' no'chñar ñeñt neyoçhro'tsenpa' elloña nanac coṭape'chatse'tatenen sosey. Ama't nanac cohuenñ

Parets po'ñoñ ñeñt atet anareteñ, ñaãa atet oteney Parets ñeñtcha' atet yeþa' cohuen, ñaãa ñeñtcha' ama atet aþapahuoyaye, ñeñtþa' e'ñe cohuen, poctey. Tarraña na no'chñarpa' ama muenatenno o'ch cohuen es neþa', ñeñtþa' attepa't sheca'ne't. Napa' ama errof nepeno, neñoteñ aña no'patenaya rromueñets ñeñtara coñcheñets. ¹³ Te'ña sapa' çhate' sotenapañ añ ñoñets ñeñt e'ñe otets cohuenpa' ñeñtþa'tña yo'patatenaya rromueñets. Tarraña ñeñtþa' ama atteyaye. Añña ñeñt yo'patatenaya rromueñets, ñeñtþa' yo'chñar. Ñaãa Yompor po'ñoñ ñeñt atet anaref ñeñt e'ñe cohuenpa' ñeñtña o' a'poterrnay yo'chñar. Attochña yeñoterr yo'chñarpa' nanac sosey entapreteney Yompor.

Atto eñall epa ñeñt huomenc yepene' yeyoçhro

¹⁴ Yapa' yeñoteñ añ ñoñets ñeñt atet anaretpa' Partseshot e'ñe cohuen anareteñ, tarraña atet ñerra'm napa' arromñañota atet nepena, çhocmach neþatse'tyen ñeñt ama cohuenaye' enteno Yompor. E'ñe atet nepena ñerra'mrrate' aña netaruasatene' no'chñar. ¹⁵ Ama neñoteñe eso'marte'ña atet nepena, tarro'mar ama't ñeñtcha' atet o' neþohuapa' ama't napa' amach e'ñe pocteye' nenteñe. Tarro'mar ama't nemneñeñ aña' atet neþohua ñeñt e'ñe cohuen enten Yompor, tarraña arepa'tña atteye' nepeno. Añepa't atet nepen ñeñt ama nemnenñe, ñeñt po'ñoçh ama cohuenaye' enteno Yompor. ¹⁶ Ñaãa esempo o'ch neþohua ñeñt ama cohuenayaye, ñeñt ama't napa' ama nemnenñe, nañapa' neñoteñ attoña o' natpare'tua ñoñets ñeñt atet anaref ñeñt e'ñe cohuen. ¹⁷ Ñeñto'marña neñoteñ ñerra'm esempo o' atet neþohua ñeñt ama't napa' netsena'ten, ñeñtþa' neñoteñ ama e'ñe naye' atet petso. Añña atet neþatene' no'chñar ñeñt allo'tsenara neyoçhro. ¹⁸ Napa' neñotena e'ñe atta eñalletñan, neyoçhroña' ama eñalle attoch cohuen enten Yompor, ama't coñe'ta. Ama't nemneñeñ o'ch atet neþañ ñeñt e'ñe cohuen enten Yompor, tarraña ama errof nepeñe atet þatsa ñeñt atet cohuentetsa. ¹⁹ Ñeñt atet nepenapa' ama't napa' ama pocteye' nenteñe. Tarro'mar ama't nemneñeñ o'te' atet neþohua ñeñt e'ñe cohuen enten Yompor, tarraña arepa'tña atteye' nepeno. Añach atet nepena ñeñt ama nemnenñe ñeñt po'ñoçhpa' ama cohuenaye' enteno Yompor. ²⁰ Ñeñto'marña neñoteñ, ñerra'm esempo o' atet neþohua ñeñt ama't napa' ama nemnenñe, ñeñtþa' neñoteñ ama e'ñe naye' atet petso. Añña atet neþatene' no'chñar ñeñt allo'tsenara neyoçhro. ²¹ Ñeñto'marña te'pa' neñotena ñerra'm esempo yemneñeñ o'te' atet yeþañ ñeñt e'ñe cohuen enten Yompor, tarraña yo'chñar ñeñt yeyoçhro'tsenpa' çhocmach cotape'chateney ñeñt ama cohuenaye' enteno Yompor. ²² Tarraña atto Yompor o' cotape'chaterrey cohuen yeyoçhropa' ñeñtþa' alloch e'ñe yocsheññaña po'ñoñ. ²³ Tarraña ama't atetpa' yapa' yeñotena eñall po'poñ ñeñt huomenc yepene' yeyoçhro ñeñt çhocmach e'moñe'tenan ñeñt atet yoctape'chen cohuen Yomporecop. Ñaãa yo'chñar ñeñt huomenc yepene' yeyoçhropa' ñeñtña nanac mopa'tene' yechets.

²⁴ ¡Ee-say! Nanac llequëntso'tseney ya. Esha'huachca' ya'huañañperre'te' yo'chñar ñeñt nanac yemuerochtatene' ñeñtcha' yanerre'te' rromueñtso. ²⁵ Nanac neparasyoso'teñ Yompor tarro'mar neñoteññañ Puechemer ñeñt Yepartseshar Jesucristo ñepa'tña e'ñe ya'huañañperre' yo'chñar. Ñeñto'marña e'ñe yeyoçhropa' yemneñeñ o'ch yoctape'cherrñañeñ Yompor po'ñoñ, tarraña yo'chñarña' ñeñtña çhocmach yetaruasatene' e'ñe yechtso.

8

Atto Parets Puecamquëñpa' ñeñtña huomenc yepene' yeyoçhro

¹ Ñeñto'marña te'pa' yeñoteñ amach a'coñchatare'teye ama't puesheñarro'teya ñeñtey o' yeparrocmaterra Cristo Jesús. Ñehua, ñeñtey o' yeparrocmaterra Cristo, ñeñtþa' añ, atto o' cotape'chaterrey Parets Puecamquëñ, amaña aña'ye' yoctape'chatenaye

yo'chñar ñeñt yeyochro'tsen. ² Tarro'mar te'pa' atet ñerra'm napa' e'ñe neparrocmateñoñ Cristopa' añña Parets Puecamquëñpa' ñeñña huomenc nepene' neyochro, allochña napa' corretsanach tayoteñ ama't ñaña errponohuañen. Attoña o' a'huañañperren atto no'chñarpa' ñeñña huomenc nepaye't neyochro, ñeñtcha' nanmayeñ rromueñtso, ñeñtara coñcheñets. ³ Ñehua, añ ñoñets ñeñt atet anaret ñeñtcha' yetsotateneñpa' amach errotenoñ a'queshpatterrye, tarro'mar ya arromñañey yo'chñarpa' ama muenatenye o'ch atet yeñohua ora ñeñt atet oteney añ ñoñets. Tarro'mar añ ñoñetspa' ama eñalle attoch huomenc ñonay yeyocher esheccha' yetsotue ora allpon ñeñt atet oteney ñeñtcha' atet yeñohueneñ. Tarraña atto Yomporpa' ahuo't a'pocatuonay yo'chñar ñeñtpa' atet pa. Ñapa' ahuo't mueñonay e'ñe ña Puechemer ñeñtcha' eñalletostsa arr patsro e'ñe atet ñerra'm ya ñeñtey arromñañey, ñeñtey ochñañey. Allochña' ñach rromosets yo'chñarecop; allochña' attoch tsa'tuonaya yo'chñar. Attochña a'huañañperrey atto yo'chñara ñeñña huomenc yepene' yeyochro. ⁴ Atet o' ñonay Yompor attoch te' yapa' o'ch atet yeña cohuen ñeñt atet oteney Yompor po'ñoñ, allohueney ñeñtey atet petsa atet coñape'chateney Parets Puecamquëñ, ñeñtey o'huañ atet yeñatse'tyesa ñeñt atet coñape'chatse'tateney yo'chñar ñeñt yeyochro'tsen.

⁵ Tarro'mar ñeñt atet petsa ñeñt atet coñape'chatenanet sosya'tsañ ñeñt pueyochro'tsenetpa' añachña e'nenet ñeñt atet muenatse'tatenanet po'chets. Tarraña ñeñt atet petsa ñeñt atet coñape'chatenanet Parets Puecamquëñpa' añcha'ña e'mñotenet ñeñt atet muenatenanet Parets Puecamquëñ. ⁶ Tarro'mar ñerra'm añach ye'nen ñeñt atet muenatse'tateney yechetspa' ñeñtpa' ñeñtcha'ña yanerre' rromueñtso ñeñtara coñcheñtso. Tarraña ñerra'm añ ye'mñoten ñeñt atet coñape'chateney Parets Puecamquëñpa' ñeñtpa' ñeñtcha'ña allochña yapa' corretsayach e'ñe cohuen yocsheñeshocmañen.

Atto ñerra'm añach ye'nen ñeñt muenatse'tateney yechetspa' amach errotenoñ yame'ñeroña Yompor

⁷⁻⁸ Tarro'mar ñerra'm añach ye'nen ñeñt atet muenatse'tateney yechetspa' ñeñtpa' atet yepena ñerra'mrrate' cha ye'moñe'teñ Yompor; ñeñto'marña chach yatpare'teññañ po'ñoñ. Amach errotenoñ yame'ñeroña Yompor ñerra'm añach ye'nen ñeñt atet muenatse'tateney yechets. Ñaña ñerra'm attach yepenapa' amach errotenoñ yocshacheña Yompor.

⁹ Tarraña sapa' ama añeye' soñape'chatenaye sechets; añña soñape'chatene' Parets Puecamquëñ ñerra'm po'ñoñ Puecamquëñpa' o' yeçherra seyoçhro. Tarraña ñerra'm eseshas ama echenaye Cristo Puecamquëñ seyoçhropa' ñeñtesña po'ñoçhpa' ama puechemereyayso Yompor. ¹⁰ Ñehua, ya arromñañeypa' çhocmach yerroma arr patsro ochñartso'marecop. Tarraña ñerra'm Cristo yeçhena yeyochro yecamquëñoñpa' çhocmach yocrrena tarro'mar Yomporpa' e'ñe pocte' enteney. ¹¹ Yapa' yeñoteñ Yomporpa' ahuo't tantaterran Puechemer ñeñt Cristo Jesús po'rromñoñ. Ñaña ñerra'm Yompor Puecamquëñ yeçhena ya yeyochro, ama't arromñañeypa' yapa'cho'ña tantatuerreycha' yerromñoñ. Parets Puecamquëñoñpa' yocrra'huerrach, ñeñtara Puecamquëñ ñeñt yeçhetsa te' yeyochro.

¹² Ñeñto'marña masheñnesha ñaña noçhanesha, te'pa' añ e'ñe poctetsa o'ch e'ñe atet yepena ñeñt atet coñape'chateney Parets Puecamquëñ, ama pocteyaye o'ch atet yepena ñeñt atet coñape'chateney yechets. ¹³ Tarro'mar ñerra'm allo'na yocrra'nena ñeñt atet coñape'chateney yechetspa' ñerra'm yerromapa' yeçhenca'huerrach yo'chñarot, tarraña ñerra'm Parets Puecamquëñoñ o'ch ya'ypo'ñerr ñeñt atet pañtse'tateney yechetspa' yañapa' corretsayach.

Atto ñeñtey e'mñotene' ñeñt atet cotape'chateney Parets Puecamquëñ, ñeñteyñapa' o' po'ñoçh puechemer perrey Yompor

14 Tarro'mar allohueney ñeñtey e'mñotene' ñeñt atet cotape'chateney Parets Puecamquëñ, ñeñteyñapa' o' po'ñoçh puechemer perrey Yompor. 15 Ñeñto'marña amach alla yemcha'terrorro atet ñerra'mrrate' ñeñt ñañrets, atarrcha' mecha'tenan pamo'mte'. Tarro'mar yapa' allempoteñ o' yaguërrñañ Yompor Puecamquëñ yañapa' o' puechemer perrey po'ñoçh. Ñeñto'marña amach yemcha'nañoteye' yema'yocheño'tpa' o'ch yeçhore'ch, o'ch yoch: "Apa." 16 Tarro'mar ñeñtara Parets Puecamquëñ ñeñtña yeñotatene' yeyoçhro po'ñoçhpa' o' puechemer perrey Yompor. 17 Ñaña yapa' yeñoteñ atto o' puechemer perrey Yomporpa' yapa'cho'ña yagapapretercha' Cristo ora ñeñt allpon o'patatenya Yompor. Ñerra'm cho yemueroçhta Cristo'marecop te', atet pe't ña atarr mueroçhte't ahuat aña patsro, esempohuañen yapa'cho'ña yecohuentapreterach.

Atto ama't yemueroçhetuanena aña patsro, ñeñtpa' ama esoye' yenteñe

18 Ama't yemueroçhetuanena aña patsro, ñeñtpa' ama esoye' nenteñe. Tarro'mar neñoteñ esempohuañenpa' elloçhña nanac yecohuentapretera Cristo. 19 Ama't ora allpon ñeñt yentyen arr patsro ñeñt yeçhcatua Yomporpa' ñetpa'cho'ña elloña atarr cohueñet esempohuañencha' Yomporpa' orrtatuerreycha' ñeñtey o' puechemerasha' perrey, attoch allempochña o'ch yecohuentapretera Cristo. 20 Tarro'mar ahuat allempo atpare'te't Adán, Yomporñapa' ahuo't a'huañatan atto atarr sherbañ nanac ñeñt ora allpon pueyeçhcatar. Allempoñapa' o'huañ tama sherba'. Tarraña pueyeçhcatarpa' ama errof po, tarro'mar atet muenen Yompor. Tarraña ama't atet panetañpa' elloña te'pa' çhocma cohueñet attoch esempohuañen Yomporpa' o'ch alla a'cohuentatuerranet. 21 Tarro'mar ora allpon ñeñt yentyen aña patsropa' atet anaretet ñamet çhocmach mellasha'tuet, allempoñapa' o'huañcha' sherbet. Tarraña ñerra'm esempohuañencha', ñeñtey o' puechemer perrey Yompor o'ch yecohuentapretera Cristo, ñaña allempoña ora allpon Yompor pueyeçhcatarpa' ñetpa'cho'ña o'ch alla a'cohuentatare'tetuerret ñamet. 22 Yapa' yeñoteñ ora allpon ñeñt yentyen aña patsropa' çhocma mueroçhe'tyenet ama't teme'ttsen, tarro'mar ama a'cohuentatare'tterra'. Nanac llecanrroreyenet atet ñerra'mrrate' coyanesha' ñerra'm o' çhap allempoch cheyore'ten nanaccha' atsotenana pue'mar. Nanac llequëñtso'tsen tarremphuach allempoch eñalletatuan pue'mar. Allempoñapa' nanaccha' cosheñtso'tsen, tarro'mar o' eñalletatuan pue'mare'toll. Atetcha' peraña ñaña Yompor pueyeçhcatareçhno, nanaccha' cosha'rterret esempohuañencha' allempoch a'cohuentatare'tetuerret. 23 Ama ñapñayaya Yompor pueyeçhcatar mueroçhtetso. Yapa'cho'ña çhocma yemueroçhetyena arr patsro, amach e'ñeye' yeñmateno yeyoçhro. Tarraña ama't atetpa' o' yechen Parets Puecamquëñ ñeñt yeçhetsa yeyoçhro ñeñt ñanom apueney Yompor, alloñapa' orameñ ñaña ñeñt o'patatenya pa'namen. Ñeñto'marña yeñoteñ esempohuañenpa' aphuerreycha' ora allpon ñeñt o'patatenya. Ñeñto'marña yecueñ esempohuañen Yomporpa' o'ch orrtatuerrnay ñaña atto yapa' o' puechemerasha' perrey. Allempoña ya yeçhetspa' a'po'poñetuerrnaycha' attoçhña yecohuentapretera Cristo. 24 Allempoteñ o' yaguërrñañ Yompor Puechemer ñeñt Cristo yapa' yeyemteññaña ñeñt o'patatenya ñeñtcha' atet perrnay esempohuañen. Ñeñto'marña allempoteñ o' ya'qeshpatare'tterra çhocmach yecueñ esempohuañen allempoch a'po'poñetuerrnay yeçhets attoçhña yecohuentapretera Cristo. Po'ñoçhpa' ama a'po'poñetuerrnaya' yeçhets, ñeñto'marña teme'ttsen yecueñ. Ñerra'm o' a'po'poñetuerrnayeñ yeçhetspa' allempoñapa' amate' palltenañe o'ch yeyemteññaña ñeñt atet muenateney ña. 25 Tarraña ñerra'm çhocma yeyemteña Yompor ñeñt

atet oteney yeñoteñ atetcha'ña perrnay esempohuañen. Ñehua, ama't ama or-
rtena', te'pa' yeyemteñoñ ñapa' e'ñepa'chña yocsheñeshocmañen yecueñ. Amachña cha
yemuenme'chatsche.

Atto enamuenay Parets Puecamquëñ Yomporshot

²⁶ Ñaña attecma Yompor Puecamquëñ ñach yeyenpuene' ñerra'm esempo ama er-
rot es apen yenteno. Ñehua, atet ñerra'mrrate' allempo yellquëñesha' yema'yochena
ñato' ama yeñoteñe escha'ña yenañña Yompor ñeñt' e'ñe pocte' enten ña. Allem-
poña Parets Puecamquëñpa' ñachña enamats yocop e'ñe puellcapreteñoñey ya, e'ñech
pue'narña'teñoñ, amach choye' eñoreno attoña enamatennay Yompor yocop. ²⁷ Tarraña
Yomporpa' cohuenay allohueney ñeñt' atet yoctape'chen yeyochro, ñeñto'marña ñapa'
eñoteñ ñeñt' atet enamuenay Puecamquëñ, tarro'mar Puecamquëñpa' añach enamuen-
nay ñeñt' e'ñe pocte' enten Yompor yocop ñeñtey o' pueyochresha' perrey Parets.

Ñeñtey e'ñe eñotuaye't ahuat Yomporpa' ñapa' atarr cochnesha' o'patatenya

²⁸ Ñaña ama't es yehuapoya, yapa' yeñoteñ Yomporpa' ñach a'pocstatene' yocop,
allohueney ñeñtey morrentenaya ña, ñeñtey acraretey o'ch atet yepeññañ ñeñt' atet
muenen ña. ²⁹ Tarro'mar allohueney ñeñtey e'ñe eñotuaye't Yompor ahuat, ñeñteycha'
ame'ñerraya esempo, ñaña'ña' cotape'che't ahuat yocop ñeñt'cha' atet muenatey, al-
lochña' yach cotape'cherrets cohuen attochña yeye'chquërra e'ñe ora atet ñerra'm
Puechemer ñeñt' Cristotets. Allochña' allohueney yepo'narcha' yepañ Cristo ama't
shontey ñeñtey ame'ñetsa. ³⁰ Ñehua, allohuen ñeñt' atet cotape'che't Yompor yocop
ahuatpa' allempoña ahuo't chap allempoch chore'terrey o'ch yame'ñera. Allochña
ñeñtey a'chore'tareteypa' ñaña'ña' oten yocop e'ño' pocte' enteney e'ñe yeyemteñoñ Cristo.
Allochña' allohueney ñeñtey e'ñe pocte' enteney, Yomporña'ña' oten yocop yecohuen-
tapretero'ch Cristo esempohuañen.

³¹ Ñeñto'mar te'pa' o'ch notas, Yomporpa' atarr cohuen morrentenya. Ñaña
yapa' yeñoteñ atto nanac morrentenya Yomporpa' ama't eseshapa' amach errotenoñ
a'huañañperetoña atto morrentenya. ³² E'ñe puemorrenteñoñey ya ama't e'ñe ña
Puechemerpa' ama mopa'tam'pesye, elloña a'rroyonay Puechemer ñach rromosets
yocop allohuenacpay. Atto atarr morrentenya attoña yapa' yeñoteñ elloña attecma
esocmañencha' apa'yeney e'ñe allempoteñ apuerrey ñaña Puechemer Cristo. ³³ Ñeñtey
acrerr Yompor ñeñteycha' puechemer perr; ama't esesha' muenenayeñ o'ch ot-
teñe'chenyetañ, tarraña ñeñt'pa' ama esoye' yenteñe yocop, tarro'mar Yomporpa' oten
e'ño' pocte' enteney. Amach errotenoñ esesha' yetsa'taterrayo yo'chña', ³⁴ tarro'mar
Cristo Jesús'pa' ña rromats yo'chña'recop, elloña ñaña tanterrtsa po'rromñoñ, ñaña te'pa'
ña partsotapretenaya Pompor po'cohuenrot; alloteñña ñapa' eñorena yocop Pompor-
sho attoch es e'ñe a'pocstatennay. ³⁵ Atarr nanac morrentenya Cristo. Ama't ese-
shapa' amach errotenoñ puerratañpesyetoña atto nanac morrentenya Cristo. Ñaña
ama't erroteno'tsenya amach huañerroña atto nanac morrentenya Cristo. Ama'tcha'
añ ye'chapoya muero'chteñets, ama'tcha' nanac llequëñtso'tseney, ama'tcha' ñerra'm
esempo pue'moñe'teñoñetay cotare'tenyet, ama'tcha' ñerra'm esempo yepallta'yena
ñeñt'cha' yerren, ama'tcha' ñerra'm esempo yepallta'yena ñeñt'cha' yechorrena, ama't
ñerra'm esempo añcha'no'cheno'tseney, ama'tcha' ñaña allempoch muetsayet, amach
errotenoñ puerratañpesyetoña atto nanac morrentenya Cristo. ³⁶ Atetcha' perryetña ya
esempo e'ñe atet anaret Yompor po'ñoño ñeñt' aquellca'huaret ahuatoteñ. All anuaret
ñeñt' atto puesheñarr ñeñt' ame'ñatse'tpa' otane't Yompor, ñeñt'pa' e'ñe atet ot:

E'ñe yame'ñeñoṭeṭ ṗapa' yellapene'tcha' e'ñe autsa yemtsanate' ñeñt' ye'moñe'tene'.
Ñetpa' e'ñe amtsen entenyet e'ñe atet ñerra'm carrnero ñeñt' ḥocmach aneñet
allcha' muetsanachet.

³⁷ Ama't yemuerōḥetuahuapa' elloña nanaccha' ahuamencat perrey Cristo ñeñt'
nanac amorrentña yenten. ³⁸ Ñeñto'marña napa' neñoteñ, ñeñtey ame'ñenaya Cristo
Jesús ñeñt' Yepartseshar yepenpa' ama't erroteno'tsenya amach errotenoṭ huañerroña
ñeñt' atto nanac morrentenya Yompor. Ama't allempoch yerroma, ama't allempo
ñaña yocrenmeñpa' ḥocmachña morrentenya. Ama't Yompor po'millañoṭeñnashar
ñeñt' huetsa pue'ntañoṭpa' amach errotenoṭ puerratañpesyetoña ñeñt' atto mor-
rentenya. Ama't ora allpon ñeñt' añcha'noḥetyetsa, ama't ñaña ora allpon ñeñt'
añcha'tareṭetyetsa arr patsropa' ñetpa'ḥo'ña amach errotenoṭ puerratañpesyetoña
ñeñt' atto Yomporpa' nanac morrentenya. Ama't ñeñt'cha' yehuapoya te' ama't ñaña
ñeñt'cha' yehuapoya tsapaṭoneṭ, ñeñt'pa'ḥo'ña amach errotenoṭ a'huañañpesyetoña
atto Yomporpa' atarr morrentenya. ³⁹ Ama't errponenaṗaren yetuanena atarr eno,
amapa' ñaña o'pono patso ama't ñaña oño o'pono, allpa'ḥo'ña amach errotenoṭ
yesa'nmoña atto Yomporpa' nanac morrentenya. Ama't ora allpon ñeñt' yeḥcatua
Yompor añe patsropa' ñetpa'ḥo'ña amach errotenoṭ a'huañañpesyetoña ñeñt' atto
nanac morrentenya Yompor; allohueney ñeñtey ame'ñenaya Puechemer ñeñt' Cristo
Jesús ñeñt' Yepartseshar yepen.

9

*Atto Pablopa' atarr llequēnana pamo'tsna'tarnesha' ñeñt' israelnesha' ñeñt' acrañ
Yompor ñeñt'cha' pueyochresha' ṗañ*

¹ Ñaña ñeñt'cha' notas te'pa' ñeñt'pa' e'ñe po'ñoḥ atet, ama ḥoye' neshquēnso,
tarro'mar napa' o' name'ñera Cristo. Ñaña Parets Puecamquēñ ñeñt' yeḥetsa neyoḥro,
ñeñt'ña e'ñe eñotenen ñeñt'cha' atet notas ñeñt'pa' e'ñe po'ñoḥ atet. ²⁻³ Napa' atarr
nanac nellquēña nemo'nasheñnesha' ñeñt'ara judionesha' tarro'mar ñetpa' shontetañpa'
ama ame'ñeñeto Cristo. Ñeñt' nenen neyoḥro atto atarr nellquēnanet. Ñerra'm
errotenoṭ na'quesḥṗatanet o'te' na'quesḥṗaterranetañ. Ama't pocte' nenteñeñ o'ch
na'cmareṭtañ ñañeña attoch nechenquērra allochñapa' amach nentere Cristo, ñerra'm
atet neṗapa' ñetpa' ñato' o'te' na'quesḥṗaterranetañ. Tarraña ama't atet neṗatstañpa'
amach errotenoṭ na'quesḥṗaterraneto. ⁴ Ñaña namo'tsesha' judionesha' ñeñt'ara
israelena'tarnesha' ñeñt' acrañ Yompor ahuat ñeñt'cha' puechemeresha' ṗañ, ñaña
ñetpa' ḥocma entoñetañe't Yompor po'partsoña ahuat. Ñaña ñet Yomporpa' ḥocma
a'pocṭatanetañe't ahuat attoch ḥocmach a'natenanet. Ñaña ñetpa' apanetañe't Yompor
po'ñoñ ahuat, ñeñt'ña eñotatahuete't ñeñt' atet pocte' enten Yompor. Ñaña ñeñt'ara
judionesha' ñeñt' eñotaye't attoch nanac e'ñe coḥneshoṭ sherbeñetañ Yompor pa'paclo.
Ñaña ñeñt'ara judionesha' Yompor ahuatpa' ahuo't otanetañ ñeñt'cha' atet apuerranet
esempohuañen. ⁵ Ñaña ñeñt' ñanom yamo'mtayñeneshañ* yepe't ñeñt' nanac sherḃaye't
Yompor ahuatpa' ñetpa' ñeñt'ara judionesha' pamo'tsna'tarneshañ. Ñaña ama't ju-
diona'tareshoṭpa' ahuo't eñalletosa Cristo arr patsro ñeñt'ara ñeñt' nanac Partsotets ñeñt'
pomnaren pene' allohuen esocmañen. Ya'ye'ḥoḥtatoñepa'ch tayoteñ ama't errpono-
huañen. Ñeñt'pa' attetepa'ch Nompore.

⁶ Tarraña ama't allohuen judionesha'ña ama'tcha' ama ame'ñereto Cristopa'
Yomporñapa' amach errotenoṭ huañerroña po'ñoñ ñeñt' atet otanete't ahuat; ñeñt'pa'
ḥocmach etsota ñeñt' atet otanet, tarro'mar ñapa' ama puenesho po'ñoñ. Ñaña

* 9:5 Pablo otatse't yamo'mtayneshañ tarro'mar ñapa' judionesha'.

allohuen ñeñt israelena'tarpa' ama allohuenacmaye' Yomporena'tareyayeto. ⁷ Ñaña ora allpon po'mrenña Abrahampa' ama allohuenacmaye' po'noch Abraham puechemer entapreteñe Yompor. "Aña e'ñe puechemer entapreteñ Yompor ñeñt Isaac po'mrenña", ñeñt atet otan Yompor Abraham ahuat. ⁸ Ñeñto'marña yeñoteñ allohuen Abraham po'mreneña' ama allohuenacmaye' po'noch puechemer penaneto Yompor. Añachña puechemer pen ñeñt yemtenaya Yompor ñeñt atet otenanet. ⁹ Ñehua, yapa' yeñoteñ atet ahuat Yomporpa' otan Abraham ñeñtcha' aþ, ñeñtpa' atet ot: "Tsapaþ charo atet ñerra'm te' añempo, o'ch nohuerra allemponapa' petapor Sarapa' cheyore'tcha' ñeñtpa' asheñorrcha' ñeñtcha' Isaacatats." Arrpa' allohua ñeñt atet Yomporpa' otan Abraham.

¹⁰⁻¹³ Elloña te'pa' o'ch alla neyerpaterrser atto yatañ Isaacpa' ahuo't yoran Rebeca ñeñtcha' puetapor pa'. Ñaña allempo Rebecapa' totana Isaac puechemer ñeñt epuesha' Yomporña' otan Rebeca, atet och: "Ñeñtcha' eñalletatsa ñanom pechoyorpa' añcha' pomnaren pene' ñeñtcha' eñalletatsa chenta'." Arrpa' allohua ñeñt atet Yomporpa' otan Rebeca. Ñaña allempo ama eñalletena' puechoyoresha' Yomporña' ahuo't ye'choña paterr puechoyor ñeñt muenen ña, ama't allempopa' ama es yeçcateneta' ama't ñeñt cohuen enten Yompor amapa' ñeñt ama cohuenayaye. E'ñe atta ahuo't ye'chana puesheñarr ñeñt muenen ña; cheshatollpa' ama pueyeçcateñoñeye' cohuen ye'chyona Yompor, tarro'mar cheshatollesha'pa' ama es yeçcateneta' ama't coñe'ta. Attoña ahuo't etsota Yompor po'ñoñ ñeñt atet aquellca'huareñ ahuatoteñ, ñeñtpa' atet oten Yompor: "Jacobpa' atarr nemorrenteña, pa'mo'nasheñña Esaúpa' ama tama nemorrenteño." Atet pa' attoch yeñoch Paretspa' ña acrañtetsa ñapuet añecop ñeñt e'ñe ye'chena ña.

Atto Yomporpa' e'ñe pocte' entan o'ch puechemer þan ñaña ñeñt ama judioneshayaye

¹⁴ Te'ña ñato' sapa' çate' sotenapañ ñeñt atet ote't Yompor, ñeñtpa' amate' pocteyaye. Tarraña o'ch notas ñeñtpa' e'ñe pocte' atet ote't Yompor. ¹⁵ Tarro'mar yapa' yeñoteñ atet Yomporpa' otan ahuat Moisés, ñeñtpa' atet och: "Ñerra'm esesha' neye'cha na ñeñtcha'ña neyenpa'. Ñaña ñerra'm esesha' neye'cha na ñeñtcha'ña atarr nemorrentena." ¹⁶ Ñeñto'marña yapa' yeñoteñ ñerra'm esesha' muenen Yompor ñeñtcha'ña a'natena, ñeñtpa' e'ñe pocte'. Ñeñtpa' ama añoteyaye ñeñt atet yemnen ya acheñey, ñaña ama ya'mueroçhtame'teñoña ye'chenyoña Yompor. E'ñechña pemuereñoña ye'chenana erra'tsen muenen ña. ¹⁷ Ñaña yeñoteñ ñeñt atet Yomporpa' otan ahuat ñeñt añcha'tarettatset Egipto. Ñeñtpa' atet otan añcha'tareñ Faraón: "Na pene', ñeñteþ añcha'tarettetsa, attoch peshoch norrtat nehuamenc acheñeneshesho. Attochña ñetpa' o'ch serrpare'tyesonet erracmañen atto na ñeñten nanac ahuañençattetsa." ¹⁸ Ñeñto'marña yapa' yeñoteñ ñerra'm esesha' muenen Yompor o'ch a'natanetpa' ñeñtcha'ña a'natena. Ñaña ñerra'm esesha' muenen Yompor o'ch eçarrtenet pueyoçhreto, ñachña muenatenahuet.

¹⁹ Te'ña ñato' sapa' çate' sotenapañ: "Ñerra'm Yompor ñach yemnatene' ñeñt e'ñe atet muenen ñapa', yapa' amach erroñ yepe, ñeñto'marña amate' pocteyaye o'ch enteney yapa' amo' cohuenayaye, ñerra'm ña yemnatatene' o'ch es atet yeþa." Ñato' sapa' attate' soçtape'chatse'tyen seyoçhro. ²⁰⁻²¹ Tarraña masheñeshacha' ñaña noçhaneshacha', o'ch notas, Yomporpa' ama asasare'tpahuoyaye. Ñato' o'ch netma'ntatasa atet: Ñato' esesha'pa' o'ch yeçcatan coyemñ ñeñt patsrro'. Ñeñt e'ñe atet muenen ña, ñapa' ñeñtcha' atet yeçcat. Ñato' o'ch yeçcatan eprroga coyemñ, puerrogarrpa' atarrcha' cohuen, e'ñech cohuenoñ sherbenan pamo'mte'. Alloñapa' ñeñt a'pchat patspa' o'ch alla yeçcaterranerr po'prroguëñ puecoyemñ. Ñato' ñeñtpa' amach tama cohuenaye' pe, tarro'mar ñeñt yeçcate'pa' ama mueno o'ch orrtach acheñeneshesho. Tarraña coyemña' ñerra'm eñoreña'pa' amach sasare'tanoña pamo'mte', amach oche:

“Eso'marte' peyechcaten atet, ama cohuenaye' pe'pa'no.” Tarro'mar ñerra'm pamo'mte' muenets atetcha' ñan puecoyem, coyemñapa' amach erro't es po. Ñeñto'marña yeñoteñ Yomporpa' ama't erro'ten muena' o'ch atet ñonay, ñeñtpa' e'ñe pocte' ñocop, tarro'mar Parets añecoppa' ña otets ñapue't. Ñaña yapa' amach yesasare'che, tarro'mar Paretspa' ama asasare'tpahuoyaye.

²² Ama't atteñpa' elloña Yompor ahuatpa' atarr ahuantane't atto nanac atpare'che't ñeñt o'pate't chenquëñets. Ñerra'm ña muenatseñ e'ñe pocteñ attoch tsa'taterranetañ e'ñe allempocma po'yoro'chenño't. Attochña entatanetañ po'huamenc tarraña ama atteye' ñaneto, atñaña ahuantanete't po'chñaret. ²³ Allochñapa' attoch esempopa' chap o'ch orrtaterrnay allohueney po'cohuenña, ñeñtey o' muererrya yaña, ñeñtey ahuat Yomporpa' cotape'chonaye't yecohuentapretero'ch esempohuañen. ²⁴ Ate't ñerra'm ya ñeñtey judioneshay, ama't ñaña ñeñt ama judioneshayaye, tarro'mar ama judioneshayaya ñapue't chore'tenoña Yompor ñeñtcha' ame'ñaya. Allohueneyña te'pa' o' chore'terrey o'ch e'ñe yame'ña'huera. ²⁵ Ama't atet ote'teña Yompor ahuat, allempo otan Oseas ñach serrpare'te' ñeñt atet och Yompor, ñeñtpa' atet ot Yompor:

Ama't ñeñt ama nechemereyaye te'pa' tsapa'tone'tña' e'ñech nechemer ne'pohuerranet.

Ama't po'poñ acheñ ñeñt ama nemorrenteno te'pa' tsapa'tone'tña' e'ñech nemor-rentuerranet ñamet.

²⁶ Ama't e'ñe all ahuat Yomporpa' otanete't: “Sapa' ama nechemereyayso”, te'ña allpa' o'ch eñotueret, te'ñapa' e'ño' puechemerasha' o' p'ohuerranet Yompor, ñeñt Yompor ñeñt ama arromñatashayaye ama't ahuata.

²⁷ Elloña Isaías ñeñt a'mtaye't Yompor po'ñoñ ahuatpa' ñapa'cho'ña atet eñose't, ñeñtcha' atet perra israelena'tarnesha', ñeñtpa' atet ot: “Israelena'tarnesha'pa' mer-enach nanac shonte' atet ñerra'mrate' atet yenteññañ ontap po'mñer nanac shonte'. Tarraña ama'tcha' shontetañpa' amachña allohuenacmaye' a'queshpatare'tterreto; patanta'ttsachña ñeñtcha' a'queshpatare'tterrtsa. ²⁸ Tarro'mar Yomporpa' e'ñech tsa'tatuerrana shonte' acheñ arr patsro ñeñt atet otane't ñeñt e'maye't po'ñoñ. Amach allo'na ahuanta'nenaneto po'chñar.” ²⁹ Ñeñtpa' e'ñech atet perra ñeñt atet ote't Isaías, ñeñtpa' atet ot:

Ñeñt nanac Paretspa' ahuo't a'queshpaterrey ama't puesheña'ttso'teya. Ñerra'm ama atet pa'yeñepa' allohueneypa' e'ñech yoclla'huerrañ e'ñe poctacma, atet ñanet ahuat allempo a'cllatuaretta allohuenet ñeñt ye'chatse't añetso Sodom o'ña Gomorro.

Arrpa' atto Yomporpa' ama pocteye' entenano judionesha'

³⁰ Ñeñto'marña te'pa' yeñoteñ acheñenesha' ñeñt ama judioneshayaye ama't ama e'neñeto attoch e'ñe pocte' entanet Yomporpa' ñetña' ahuepa't enteret ñeñt e'ñe atto pocte' enteney Yompor allohueney ñeñtpa' ñeñtña' atto yeyemteña ñeñt atet oteney Yompor. ³¹ Tarraña judionesha' ama't e'neñetañ attoch pocte' entenanet Yomporpa' tarraña ñetña' ama entereto, tarro'mar aña e'ñe yemtenet o'ch e'ñe etsotuetañ ora allpon ñoñets ñeñt atet anarettenet; tarraña ama es etsotuenaye ora allohuen. ³²⁻³³ Yeñoteñ ama enterreto attoch pocte' entenanet Yompor, tarro'mar ama yemteñeto Yompor ñeñt atet otenanet. Ñetpa' aña e'ñe yemtenet o'ch ye'chcatyenet ñeñt e'ñe cohuen entenet ñet. Ñeñtpa' e'ñe atet pohuet ñeñt atet oten Yompor po'ñoñ, ñeñt anuaret ahuatoteñ, ñeñtpa' atet ot Yompor ahuat:

Napa' o'ch nemñanet puesheñarr ñeñtcha' atarr sherberrets all añetso ñeñt pa'so'cheñ Sión ñeñtara Jerusaléñ. Tarraña ñetpa' chach tsena'chet. Puetsena'teño'tetpa' o'huañ yemtenanet ñeñt atet noctape'chatanetañ. Tarraña ama't erra'tsena ñeñtcha' ame'ñerraya ñapa' ñetña' ellopa' amach alla es e'nerrete'te.

Ñeñtapa' atet toma'ntachet ahuať: Cristopa' ñach anarettatsa arr patso atet ñerra'mrrate' mapue' ñeñť atarrcha' sherben. Tarraña judionesha'ñapa' ama asherbenaye' eñcheto ama't mamesha, čha ottet ñerra'mrrate' atta epoto'tatse'tyeset ñesho ñeñť atma'ntataret mapue'.

10

¹ O'ch masheñneshacha' ñaña nočhaneshacha' notas, napa' neyočhrocmañen nemeñ namo'tsesha' ñeñťara israelena'tarpa' o'te' qeshpa'huerret ñamet. Ñeñťo'marña ñocpuetpa' chocma nema'yochamñpenanet Yompor. ² Napa' neñotenanetañ e'ñe po'ñočh mueneñetañ o'ch e'ñe sherberet Yompor, tarraña ama't atet muenenetañpa' po'ñočhpa' ama čhenanetoña pueyočhreto ñeñť po'ñočh atet muenen Yompor. ³ Po'ñočhpa' ama čhenaneto pueyočhreto ñeñť atet muenen Yompor atetcha' yepa attoch pocte' enteney ama't e'ñe allohueney. Ñetpa' otenapuetañ e'ñe pueyečhcateñoťet ñeñť cohuen entenet ñetpa' Yomporñapa' pocte'te' entapretenanet. Elloña ñetpa' ama mueneñeto o'ch yemterrñañet ñeñť atet oteney Yompor, ñeñťcha' attoch e'ñe po'ñočh pocte' enterrey ña. ⁴ Tarro'mar te'pa' o' huapa Cristo ñaña atet oteney Yompor ñerra'm yame'ñerrñaña Puechemer ñeñť Cristotetspa' attochña e'ñech pocte' enterreyña, ama't erra'tsena ñeñťcha' ame'ñerraya. Allochñapa' o'huañcha' aña yeyemtena o'ch atet yepohuen e'ñe cohuen ora allpon ñoñets ñeñť atet anaret attochña pocte' enterryeñ Yompor.

Arrpa' attoch e'ñe pocte' enteney Yompor ama't eseshaya

⁵ Ama't Moiséspa' atet ote't ahuať: “Ñerra'm yepohuenach e'ñe poctacma ñeñť atet anareťpa' esheccha'ña corretsayach errponohuañen.” ⁶ Tarraña attoch po'ñočh pocte' enteney Yompor ñeñťpa' e'ñech yeyemteñoť ña ñeñť atet oteney: “Amach yoctape'chatsto yeyočhro, ñato' este' yepalltena tarro'mar ama yepallteno o'ch ahuey ento attoch ya'suater Cristo arr patso. ⁷ Amaña yepallteno o'ch ahuey ñaña arromñañneshesho ñeñť o'pono'tsa'yen patso o'ch yetantatera' Cristo tarro'mar ñapa' ahuaťoteñ o' tanterra, ama arromñaťesho'tsenayaye.” ⁸ Tarro'mar Yompor po'ñoñpa' atet oten: “Añ cohuen ñoñets alloch yequeshperra, ñeñťpa' ama torrapahuoyaye attoch yenter, tarro'mar ñeñťpa' e'ñe yesho'tsen. Ñaña ama echarroyaye attoch ye'ñoroña, tarro'mar ñeñťpa' e'ñe yeyočhro'tsen.” Ñeñťpa' ñeñťara ñoñets ñeñť o' neserrpare'tatas atet añ poctetsa o'ch yame'ñera Cristo. ⁹ Tarro'mar ñerra'm čho ye'ñorena atto Jesúsapa' Yepartseshar yepeñ, ñaña ñerra'm e'ñe yeyočhrocmañen yame'ñeña atto Yomporpa' ahuať tantater po'rromñoťpa', allochñapa' yapa'čho'ña a'qeshpatareteycha'. ¹⁰ Tarro'mar ñerra'm yame'ñera Cristo yeyočhrocmañen, Pomporñapa' e'ñech pocte' enteney, ñaña ñerra'm čhochña ye'ñorena atto o' yame'ñera Cristo, attochña yapa' a'qeshpatareteycha'.

¹¹ Ñaña Yompor po'ñoñ ñeñť aquellca'huaret ahuaťoteñ, ñeñťpa' atet oten: “Ama't erra'tsena ñeñťcha' ame'ñerraya Yomporpa' ñetña ellopa' amach alla es e'nerrete'te.”

¹² Tarro'mar ama judioneshayaya ñapueť ame'ñenayoña Yompor. Ama't ñeñť ama judioneshayaye, ñetpa'čho'ña attecma ame'ñeñet Yompor. Tarro'mar e'ñe paťra Yepartseshar ñeñť e'ñe allohuenacpay. Shonte'ch esocmañen apa'yesuay ama't eseshaycha' ñeñťey enamueney. ¹³ Tarro'mar atet oten Yompor po'ñoñ: “Allohuenoteypa' ama't erra'tsenoteta čhore'te' Yompor pueyočhrocmañen attoch a'qeshpataretterretpa' Yomporñapa' a'qeshpateranetcha'.” ¹⁴ Tarraña amach erroťenoť yechore'cheña Cristo ñerra'm ama čho yeyemteño. Ñaña amate' erroťenoť yeyemteroña ñerra'm ama es ye'mare'tperro Cristocop. Ñaña amach erroťenoť ye'mare'che ñerra'm ama eñalle ñeñťcha' a'pote' po'ñoñ. ¹⁵ Ñaña amach erroťenoť a'poteññañetoña Yompor po'ñoñ, ñerra'm ama ña llesensenahueto. “Nanac cosheñťso'tseney ñerra'm esempo huapa ñeñťcha' a'potoťe' cohuen ñoñets ñeñť huetsa Yomporeshoť alloch yocsherra

e'ñe cohuen yeyochro." Añpa' allohua ñeñt e'ñe atet aquellca'huaret Yompor po'ñoño ahuatoteñ.

¹⁶ Tarraña ama't ñeñt pue'maran Yompor po'ñoñ amaña allohuenacmaye' ame'ñereto añ cohuen ñoñets ñeñt huetsa Yomporeshot. Ama't atet ote't Isaiás ahuat, ñeñtpa' atet ot: "Ama Nompore eseshaye' ame'ñenayo ñeñt atet o' neserrpare'tatuanet." Arrpa' allohua ñeñt atet ote't Isaiás ahuat. ¹⁷ Tarraña ama't atteñpa' elloña napa' o'ch notas, e'ñe yeserrpare'teñoñ Cristo po'ñoñ, acheñenesha'ñapa' o'ch e'mñoteñet. Allochñapa' e'ñe pue'mñoteñoñetpa' o'ch ame'ñeret Cristo.

¹⁸ Ñato' sapa' čhate' sotenapañ judionesha'pa' ñato' amate' pue'mareto añ cohuen ñoñets ñeñt huetsa Yomporeshot. Tarraña napa' o'ch notas, po'ñočhca'ye pue'maret tarro'mar atet oten Yompor po'ñoñ:

Ñeñt a'potene' Yompor po'ñoñpa' o' eñotatyaset erracmañen arr patsro, o' epa'huamocha Yompor po'ñoñ erraparen.

¹⁹ Te'ña sapa' ñato' čhate' sotenapañ judionesha' ñeñtara israelena'tarpa' ñato' amate' čhenaneto pueyochreto ñeñt atet cotape'chen Yompor. Tarraña napa' o'ch notas, po'ñočhca'ye eñoteñetañ Yomporñapa' o'ch ame'ñaterrana ñaña po'poñ acheñ ñeñt ama judioneshayaye. Ñehua, ñanompá' o'ch neyerpaterrsa ñeñt atet ote't Moisés. Moisés ahuatpa' ahuo't quellcanet añ ñoñets ñeñt atet och Yompor, ñeñtpa' atet ot Yompor:

Napa' o'ch name'ñatera po'poñ acheñenesha' ñeñt sapa' atta senteñ atet ñerra'mrrate' ama nechemereye' nepenaneto ñaña atta senteñ ñerra'mrrate' ama es eñoteneto. Tarraña napa' o'ch name'ñatuerranet ñetpa' sañapa' e'ñe sempa'teñoñenpa' o'ch se'moñe'terranet, tarro'mar allempo ñetpa' o'ch nechemeresha' neperranet ñamet. Arrpa' allohua ñeñt Moisés po'ñoñ ñeñt atet och Yompor ahuat.

²⁰ Allotpa' ñaña Isaiás ahuat ñañaapa' ama mecha'tenano judionesha'. Ñapa' ahuo't eñotatanet ñeñt atet och Yompor, ñeñtpa' atet ot Yompor:

Po'poñ acheñ ñeñt ama judioneshayaye ama't ñetpa' ama eseshaye' ne'nenaye, ñetñapa' o' enterrnet. Ama't ama eseshaye' na'p'to'tenaye errotenente'ña na ñeñt atet nepena, tarraña nañapa' o'ch neñotaterranet ñeñt atet nepena.

²¹ Ñaña ellonet Isaiáspa' serrpare'te't atetcha' perra judionesha' ñeñt atet eñorena Yompor ñocpuet, ñeñtpa' atet ot Yompor: "Napa' nellapene'tcha' chore'tame'tene' añ acheñeneshar attoch ñetpa' o'ch ame'ñerrnet. Tarraña amachña eseshaye' name'ñenayo, čhachña po'poñ entuennet allohuenet."

11

Atto judionesha'pa' a'ypo'ñareñtenetañ, tarraña ama poctacmaye' a'ypo'ñenanetoña Yompor

¹ Tarraña ama't atteñ, napa' o'ch notas, po'ñočh Yomporpa' ama e'ñe poctacmo' a'ypo'ña'huerrano pueyochreshachno, ñeñtaret ñeñtet israelena'tarnesha'. Atet ñerra'm na, napa'čo'ña israelena'taren tarro'mar napa' po'mrenñen Abrahamañ ñeñtara Benjamíñeñ mereñtsoren. ² Yomporpa' ama a'ypo'ña'huerrano pueyochreshachno. Ñetpa' e'ñe eñotuanete't ahuat ñeñtcha' pueyochreneshachno pa'. Ñaña napa' neñoteñ amach a'ypo'ña'huerraneto, tarro'mar ñeñtpa' atet aquellca'huaret Yompor po'ñoño ama't ahuatoteñ. Sapa' ama't seyerpuenoña ñeñt atet pe't Elías ahuat. Ñapa' ahuo't otteñe'chan israelnesha' e'ñe puema'yocheñoñ Yompor. ³ Ñeñtpa' atet otan Yompor ahuat: "Nompore, namo'tsesha' ñeñtara israelena'tarpa' epaye' muetsanatenapet ñeñt pa'mtene' peñoñ. Ama't ñaña Nompore ñeñt altar ñeñt allot yesherbeneñpa' o' e'ñe tore'tatuonapet. Ama't napa' o' e'ñe naptamña ñeñten pame'ñenaya.

Ama't te' Nompore napa'cho'ña o'patennet ahuo'ch muetsanet namña." Arrpa' allohua ñeñt atet otteñe'chane't Elías pamo'tsesha' Yomporesho ahua't. ⁴ Arrña'pa' atto eñorana'tana Yompor Elías ñeñt'pa' atet och: "Amaca' paptayaya ñeñte'p name'ñenaya, elloña eñallmeñ can'chroch mil israelena'tarnesha' ñeñt name'ñenaya ñeñt ama con'corpana'tenana' ma'yochaya ñeñt aye'chcataret ñeñt sochenet Baal. Ñetña'pa' nenenanet ellonet nocop." Arrpa' allohua ñeñt atet neyerpatensa atet ote't ahua't Yompor allempo eñorana'tana Elías. ⁵ Namña atet ñerra'm te'pa' attecma pena Yompor. Ama allohuenacmaye' a'ypo'ñenanetoña Yompor. Ñaña'pa' ama't puesheña'ttsapa' ahuo't ye'cherranet allochña'pa' attochña e'ñe puemuereño'tanetpa' o'ch a'queshp'aterranet. ⁶ Tarraña e'ñe puemuereño'tanet ahuo't a'queshp'atanet. Amaña añoteyaye atto cohuen es ye'chcatyenet ñet. Tarro'mar ñeñt cohuen ye'chcatyenet ñerra'm allo a'queshp'atenetaña'pa' Yomporña puemuereña'pa' amate' a'queshp'atane'ye' yenteñe.

⁷ Ñeñto'marña yeñoteñ, israelena'tarpa' ama allohuenacmaye' enterreto ñeñt e'nenet. Ñehua, ñeñt e'nenetpa' ñeñt'pa' attoch e'ñe pocte' enterranet Yompor. Puesheña'ttsa enterre' ñeñt ye'chena Yompor. Tarraña po'potantañña'pa' ama enterreto ñeñt atet muenen Yompor ñeñt attoch e'ñe pocte' entuerrey tarro'mar ñetpa' chocma echarrenanet pueyo'chreto o'ch pet ñeñt atet muenen Yompor. ⁸ Ñetña'pa' o' e'ñe atet pohuet ñeñt e'ñe atet anuaret Yompor po'ñoño ama't ahua'toteñ. Ñeñt'pa' atet oten: "Yomporpa' ñach ama muenatahueto o'ch es chapahueto pueyo'chreto. Ama'tcha' cho es entenetañ ñeñt atet pena Yomporpa' amach chenano pueyo'chreto ñeñt atet muenen Yompor. Namña ama'tcha' e'mñoteññañetañ Yompor po'ñoña'pa' amach chapaneto pueyo'chreto ama't ahua'ta ñeñt atet muenen Yompor. Ama't teme'ttsenpa' attecma penet." Arrpa' allohua ñeñt atet ote't Isaiás ñeñt'cha' atet perra judionesha'. ⁹ Elloña Davidpa'cho'ña ñapa' atet ote't ahua't, ñeñt'pa' atet ot:

Judionesha'pa' nanac a'nateña Yompor. Shonte' esocmañen echenet ñeñt alloch rrallme'chapretannenet. Tarraña ñeñt'pa' cha shequënanet tarro'mar ñetpa' otenapuetañ Yomporpa' e'ñe'fe' pocte' entenanet. Tarraña ñeñt'pa' ama atteyaye. Ñeñt'pa' ñeñt'cha'ña a'chencaterrahueto. Attoch e'ñe tsa'tatuerranet.

¹⁰ Ellopa' alla oterrer David ñocpuet, ñeñt'pa' atet ot:

Arepa'ch es chapahueto pueyo'chreto ñeñt atet muenen Yompor, attetach ñerra'mrrate' aporo'ye' ñeñt amach enteno. Chocmuepa'ch amuro'chtatarettenet e'ñech atet ñerra'mrrate' eñerr a'mo'ca'nenahueto ñeñt nanac amuro'chtatañ.

Atto Yomporpa' a'ypo'ñaneñ judionesha', ñeñt'pa' añecop attoch a'queshp'aterran ñaña ñeñt ama judioneshayaye

¹¹ Tarraña ama't atarr atpare'tena judionesha', napa' o'ch notas, amach e'ñe a'ypo'ña'huereto poctacma Yompor. Tarro'mar e'ñe patpare'teño'tet ñetpa' attoña Yomporpa' ahuo't ame'ñaterrana po'poñ acheñ ñeñt ama judioneshayaye attoch a'queshp'aterranet ñamet. Attochña judionesha'pa'cho'ña e'ñe puempa'teño'tet Yomporpa' ñato' o'ch alla ame'ñeret Yompor e'ñe cohuen. ¹² Atto atpare'tenan judionesha' Yomporpa' po'poñe'chnoña acheñenesha' arr patsropa' ahuo't chapanet attoch ame'ñeret ñamet Yompor. Ñehua, atto ama't patpare'teño'tetpa' yenpueñet po'poñ acheñ ñeñt ama judioneshayaye, yapa' yeñoteñ esempohuañen allempoch alla ame'ña'hueret Yomporpa' elloña pame'ña'hueño'tetpa' nanaccha' yenpueret po'poñ acheñ ñeñt ama judioneshayaye.

¹³ Ñeñt'pa' atet notenes ñeñtes ama judioneshayayso tarro'mar napa' allsensareten nach serrpare'tene' Yompor po'ñoñ socop ñeñtes ama judioneshayayso. Ñeñto'marña napa' nocshena, atarr cohuen asherben nenteñ ñeñt atet llesensenen Yompor.

14 Tarro'mar allochñapa' attoch name'ñatera ñeñt ama't ama judioneshayaye. Attochña ñato' judionesha' ñeñt e'ñe namo'tsna'taranetpa' e'ñe puempa'teño'tet Yomporpa' o'ch alla mueneret o'ch ame'ñerret ello atet sepena sa. Allochñapa' attochña a'qeshpatare'tterret ñamet, ama't puesheña'ttso'ta. 15 Tarro'mar ñeñt atto Yomporpa' ahuo't a'ypo'ñan judionesha', ñeñt'pa' añecop attoch amo'tsterrana po'poñe'chno acheñenesha' arr patsro ñeñt ama judioneshayaye. Ñaña yapa' yeñoteñ ñerra'm esempohuañen allempoch judionesha'pa' o'ch alla ame'ña'hueret Yompor, attochña o'ch alla aguërranet; ñetña allempopa' çhach otterret ñerra'mrrate' rromot o' tantuerret. 16 Tarro'mar atto ñeñt ñanom judioneshatatset' ahua'tpa' ñetpa' anare'ttete't Partsocop, allochñapa' po'mrenñenesha'pa'cho'ña ñetpa' acrare'tterretcha' ñamet e'ñe attecma. Ñato' o'ch yetma'ntacha atet pete't ahua't pocrramñ ñeñt nete't Partsocop. Ñeñt ñenmañ pocrrametpa' ahuo'ch yoreñet coñe't ñeñt nanac cohuen ñeñt'cha' nenet Yomporecop. Ñaña atto ñeñt ñanom pocrramñ yorenet Partsocoppa' ñeñt'pa' e'ñe cohuen, añña allot yoret pocrrametpa' ñeñtña pocrramet orapa' e'ñech cohuenare'. Ñaña ñato' o'ch yetma'ntacha po'poñ ñeñt atet pena tsachreçh. Ñehua, ñerra'm erra'tsen tsach ñerra'm puerçho'chno e'ñe cohuenare' puetacre'chnopa'cho'ña e'ñech cohuenare'.

17 Te'pa' ñeñtes ama judioneshayayso napa' o'ch notas, Yomporpa' ahuo't el- lopa'tetstatan patantarr judionesha' ñeñt atpare'tene' ña. Allochñapa' attoch sapa' o'ch separrocmaterr epas ñeñt ame'ñenaya Yompor. Ñato' o'ch netma'ntacha atet pena tsach ñeñt otenet olivoch. Ñehua, judionesha'pa' ñetpa' attet ñerra'mrrate' olivoch ñeñt e'ñe cohuen narmets. Tarraña ñato' ñeñt allpon puetaquërpa' ahuo't pecha'tam'pset ahuo't huapore'chet. Allochñapa' attoch a'tapa'llateret epuet ñeñt puetsa'to'mar olivochtaquër ñeñt ama narmetsoyaye. Sa ñeñtes ama judioneshayaysopa' sapa' aña puetaquër sepene' ñeñt puetsa'to'mar olivochtaquër. Te'ñapa' o' a'tapa'llataterret olivochtaacro allot apecha'taret ñeñt ahupore'taret. Allochñapa' attochña sapa'cho'ña o'ch separrocmaterr epas ñeñt ame'ñenaya Yompor, ñaña attoch sagapapreter Yompor pa'nateña ñeñt atet otane't Yompor judionesha' pa'tañeshañ ahua't. 18 Tarraña ama't atteñpa' sapa' amach sañeña nanac asherben sentatsterro. Ñaña amach sotatsto o'huañte' sherbenña añ judionesha' ñeñt toma'ntenaya olivochtaquër ñeñt ahupore'taret, tarro'mar sapa' señoche'pa'ch allotca'yeña huenaña sa sehuamenc tsachreçho't ñeñt atma'ntataret judionesha' pa'tañeshañ ahua't. Ama atteyayso ñerra'm ñeñt e'ñe puetacres o'ch ahua- mencat sepoñ puereçh, tarro'mar ama atteyaye, puereçhña e'ñe ahua'mencat sepene'ña sa.

19 Ñeñtes ama judioneshayayso, sapa' çhate' sotenapañ so'te'ña nanac sherbets ñeñto'maro' Yomporpa' ahuo't pecha'tam'psan judionesha' olivochtaacro't allochñapa' atto'ch sapa' o'ch e'ñe separrocmaterr. 20 Tarraña napa' o'ch notas, ama't po'ño'ch o' a'ypo'ñare'tta judionesha' añecopña a'ypo'ñare'tterret e'ñe pa'tpare'teño'tet Yompor. Ñehua, te'ña sapa' e'ñe seyemteño'ta Yompor o' separrocmaterr sa. Ñeñto'marña o'ch notas, amach sommo'chatsto, e'ñepa'chña sem'cha'na'teño't same'ñeña Yompor. 21 Tarro'mar atto Yomporpa' ahuo't huapore'tan olivochtaquër ñeñt e'ñe puetacra ñeñt toma'ntenaya judionesha' ñeñt ama ame'ñenayo ña, sapa'cho'ña ñerra'm attach sepena sam'apa' ahupore'tare'tescha' sam'a. 22 Señoche'pa'ch po'ño'ch Yomporpa' atarr cohuen amueraña. Tarraña ama't amuerañaña'pa' ama allocchama'metsoyaye, tarro'mar ñapa' çhocmach tsa'taterrana ñeñt ama ame'ñenayo ña. Ñerra'm çhocmach seyemteña atto nanac muerensa ñaña'pa' e'ñech cohuen entenes. Ñerra'm amach atet se'papa' sapa'cho'ña ahupore'tare'tescha' atet ñerra'm tsachtaquër. 23 Ñaña ama't judione- sha' ñeñt a'ypo'ñare'ttetsapa' ñerra'm o'ch alla ame'ña'hueret Yompor, ñaña'pa' o'ch alla parrocmataterranet po'pocheño. Tarro'mar Yomporpa' nanac ahua'mencat, ña

po'huamencotpa' o'ch alla parrocmataterranet po'pocheño. ²⁴ Tarro'mar sa ñeñtes ama judioneshayayso Yomporpa' e'ñe pocte' eñch o'ch parrocmataterres, ama't sapa' atet entenes ñerra'mrrate' nanac allaparo'tsenes atet pena ñeñt puetsato'mar olivoch. Ñaña sapa' apechtacre'charetas po'pchañoñ, ñaña' ahuo't a'parrocmaterres olivochtacro ñeñt narmets olivoch ama't sapa' ama e'ñe puetacreyayso ñeñt narmets olivoch. Atto pocte' eñch Yompor ñeñt atet ñonas sa, elloña judionesha'pa' nanaccha' cohuen enter-ranet o'ch alla parrocmataterranet, o'ch alla puetaquër ñaterranet olivoch ñeñt e'ñe ño puetaquër.

Atto judionesha'pa' a'queshpataretterretcha' ñamet esempohuañen

²⁵ Te'pa' o'ch masheñeshacha' ñaña nochaneshacha' neñotatas ñeñt ahuatoteñ ama eñotpahuoyaye. Ñeñtes ama judioneshayayso napa' nemneñ o'ch e'ñe señoach allochñapa' attoch amach sota'psa'tatsto sapa' atarro' es señoten. Ñeñt atet atpare'tena patantarr israelena'tarpa' ñeñtpa' mamecpa atet muenatenanet Yompor tarrempohuach allem-poch e'ñe etsotua attoch ame'ña'huerra allpon acheñenesha' ñeñt ama judioneshayaye. ²⁶ Allempochña allohuen israelena'tarnesha'pa' a'queshpataretterretcha' ñamet. O'ch etsoterra e'ñe atet aquellca'huaret Yompor po'ñoñ ahuatoteñ, ñeñtpa' atet ote't Yompor: Ñeñtcha' a'queshpataerrahuetpa' huapach. Arro'tcha' huapa ñeñt anetserpa' añ pa'so'cheñ Sión. Ñeñto'marña pamo'tsna'tarcha' ñosan israelena'tarnesha'. O'ch huapapa' a'huañañperrancha' Jacoboñ po'ñreneñ* ñeñt atto nanac atpare'teñet Yompor. ²⁷ Allempochña nahuanmañperranet po'chñaretpa' allempochña et-soterra ñeñt atet notanete't ahuat ñeñtcha' atet neperranet esempo. Arrpa' allohua ñeñt atet ot Yompor ahuat.

²⁸ Tarraña te' Yomporpa' atet entenanet ñerra'mrrate' ñeñt e'moñe'tene' tarro'mar ñetpa' ama mueneto o'ch ame'ñeññañet po'ñoñ ñeñt alloch po'ñoñch yequeshperra. Tarro'mar atet pena allochñapa' o'ch sa'queshpataretterra samña ñeñtes ama judione-shayayso. Tarro'mar Yomporpa' ahuatoteñ acrane't judionesha' ñeñtcha' atarr mor-rentena tarro'mar ñeñt pa'tañeshañ pete'tpa' ña a'crahuete't ahuat ñeñtcha' atarr mor-rentena. ²⁹ Tarro'mar Yomporpa' ama puenesho po'ñoñ. Atet otanete't ahuat ñeñtcha' o'pataterranetpa' e'ñech etsotuerra. Ñaña atet otanete't ñeñtcha' atet chore'terranet attoch e'ñe ame'ña'hueretpa' ñeñtpa'cho'ña e'ñech etsotuerra. ³⁰ Ahuat sapa' atarr satpare'che't Yompor, te'ñapa' judionesha' atet petsa atet satpare'te't sa ahuat. Tarraña te'pa' allempo atpare'ta judionesha'pa' ñeñtpa' attoch Yomporpa' o'ch muererrsa samña. ³¹ Ñaña te'pa' atto judionesha' attecma atpare'teñet Yompor atet satpare'che't samña ahuat, ñetpa'cho'ña muererranetcha' atet muerensa samña te'. ³² Tarro'mar atet penaña Yompor. Ñapa' muenatenan ora pa'namen acheñ o'ch atpare'tyeñet allochñapa' attochña ellopa' o'ch alla muererraneterr allohuenet.

Atto Yomporpa' ama eñotpahuoyaye ñeñt e'ñe atet cotape'chen ña

³³ Yomporpa' puemorreneteñotpa' esocmañen apa'yeney, ñeñtara Parets ñeñt atarr eñotañtetsa. Shonte' esocmañen eñoten pa'namen. Ya arromñañeypa' amate' er-rotenoñ yeñotuoñeña ñeñt atet penaña ña. Ñaña ama't mameshapa' amate' errotenoñ chaponayoña ya yeyochro ñeñt ora allpon ñeñt atet cotape'chyen ña. ³⁴ "Tarro'mar yapa' ama't puesheñarroñeya amate' errotenoñ yeñotuoña ora ñeñt atet cotape'chen Yompor. Ñaña yapa' ama't puesheñarroñeya amate' errotenoñ yoctape'chacheña Parets. ³⁵ Ñaña yapa' ama't puesheñarroñeyapa' amate' errotenoñ yetsa'choña Yompor attoch aphuerrey

* **11:26** Ñeñt otenet israelena'tarnesha', ñaña siño'marnesha', ñaña Jacob po'ñreneñ, ñaña jerusaléño'marnesha' ñetpa' ñeñfaretta judioneshet.

ñeñt̃ yemnen ya.” ³⁶ Tarro'mar ama't allohuen ñeñt̃ allpon es eñalletyetsa e'ñe Yompore-shofecma huena, e'ñe ña po'huamencot̃ eñalletena, ñaña e'ñe ñocop yechcatue. E'ñepa'ch ya'ye'chochtateññañ tayoteñ ama't errponañohuen. Ñeñtpa' attetepa'ch Nompore.

12

Atto añ poctetsa o'ch e'ñe yaphuer Yompor yechets

¹ Ñeñto'marña te'pa' o'ch masheñeshacha' ñaña no'chaneshacha' notas, atto Yomporpa' atarr muerenya, yapa' añ e'ñe poctetsa o'ch yaphuer Yompor yechets. O'ch yaphuer allohuen yechets atet̃ ñerra'mrrate' ñeñt̃ muetsete't̃ ahuat Yomporecop ñeñt̃cha' nenet̃ ñocop. Tarraña ya yechets e'ñech betnatot̃ yaphuer Yompor tarro'mar ñeñtpa' e'ñech ñocpa, ñeñt̃cha' nanac coshatene' ña. Attochña e'ñech yeyochrocmañen cohuen yoc̃ter Yompor. ² Allochñapa' amach allo'na atet̃ es yep̃atse't̃yesneno ñeñt̃ atet̃ yeychen ya añe patsro, ellochña yoc̃tape'cherr etserra attoch etserrataterrnay Yompor yoc̃tap̃ña. Attochña e'ñe cohuen señoche erra'tsente'ña muenen Yompor ñeñt̃ e'ñe cohuen enten ña, ñaña ñeñt̃cha'ña coshatene' e'ñe poctacma.

Atto Yomporpa' ama pocteye' entenye o'ch yot yañeña yo'ña nanac sherbets

³ Yompor puemuereñoenpa' ahuo't llesensenen attoch nach torretsa ñocop. Ñeñto'marña te'pa' notenes ñeñt̃ atet̃ muenen Yompor. Ama't puesheñarrotesapa' amach sentatsto sañeña ñeñteso' ello nanac sherbets. Añcha'ña pocte' sentena allpon sesherben atto puesheña'ttsos Yomporpa' ahuo't apa'yesas attoch e'ñe seyemteñoñ setorra'yesa ñocop. ⁴ Ñato' o'ch yetma'ntacha ñeñt̃ atet̃ pena yechets. Ñehua, yechetspa' ama e'ñe pa'rrayaya, atet̃ ñerra'm yecle' ñaña yot ñaña yetac. Ñaña ama e'ñe pa'rrayaye sherbenye, e'ñe po'poñe'tt̃socma sherbeney. Tarraña ama't po'poñe'tt̃socma sherbeneypa' e'ñe yocma yechets yep̃ohueñ, tarro'mar e'ñe pa'rtra yechets atet̃ petsa. ⁵ Ñaña attecma yepena allohueney ñeñt̃ey ame'ñenaya Cristo. Ama't shonteyeñ ñaña ama'tcha' po'poñe'tt̃socma yetorra'yesa ñocoppa' ñañapa' e'ñech pa'rtra enteney, atet̃ ñerra'mrrate' e'ñe po'chets peney. Attochña e'ñech yeparrocmaten e'ñe puesheña'tt̃soy epay Cristo. Attoña e'ñe yeparrocmateñoñ Cristopa' o'ch yeparrocmatuahua allohueney ñeñt̃ey ame'ñenaya Cristo.

⁶ E'ñech po'poñe'tt̃socma yetorra'yena Yomporecop, tarro'mar ñapa' ahuo't apa'yesey e'ñe po'poñe'tt̃socma ñeñt̃cha' atet̃ yesherbe' e'ñe cohuen. Ñehua, ñerra'm añ apueney alloch ya'potoñ po'ñoñpa' ya'potepa'ch errponcha' yemtatenya. ⁷ Amapa' ñerra'm añ apueney attoch yesherbe' po'psheññechno e'ñepa'chña cohuen yesherbenanet. Amapa' ñerra'm añ apueney attoch yeychateñ po'psheññechno e'ñepa'chña cohuen yeychatyenanet. ⁸ Amapa' ñerra'm añ yeñoten attoch yoc̃tape'chatyesanet ñeñt̃ cohuentetsa Yomporecop, e'ñepa'chña cohuen yoc̃tape'chateñ acheñenesha'. Amapa' ñerra'm añ yeñoten attoch es yapa'yes acheñenesha' ñeñt̃ es pallta'yetsapa' e'ñepa'chña yeñmañeshocmañen es yapa'yenanet, amachña cha yempa'tana'tatsche. Amapa' ñerra'm añ yeñoten attoch ya'mcha'tare'ttena, e'ñepa'chña yocsheñeshocmañen ya'mcha'tare'ttena, amachña cha yemuenme'chatsche. Amapa' ñerra'm añ yeñoten attoch yeyenpue' ñeñt̃ muerochtetsa, e'ñepa'chña yocsheñesha' yeyenpuenanet.

Atetcha' pa'yesa ñeñt̃ pueyochresha' pen Cristo

⁹ Amorrentanna'tpahuepa'ch yentannena e'ñe yeñmañeshocmañen. Ñaña allohuen ñeñt̃ ama cohuenaye' enteno Yompor o'ch e'ñe ya'mñeच्या nanac attoch ya'ypo'ñe'. Tarraña allohuen ñeñt̃ e'ñe cohuen enten Yomporpa' amach cha ya'ypo'ñatsche. ¹⁰ Ñaña añ poctetsa amorrentanna'tpo'ch yentannena allohueney atet̃ ñerra'm po'ñoche e'ñe yemo'nasheñ yep̃annena. O'ch atet̃ yeñch po'psheñeñ ñapa' atarr sherben, amachña yañeña nanac asherben entetso.

11 Amach čha sečllana'tatsto torraya ñeñt' cohuen enten Yompor. Añcha'ña e'ñech seyočhrocmañen sesherbe' Yepartseshar atto ahuamencat penes Parets Puecamquëñ.

12 Ñaña e'ñepa'ch socshena tarro'mar yapa' e'ñe yeyemteñoť yecuenña ñeñt' o'patatenya Yompor. Ñaña ñerra'm esempo huaponasa mueročhteñets e'ñepa'chña sa'huante'. Ñaña čhocmuepa'chña sema'yocheña Yompor.

13 Ñaña ñeñt' pueyochresha' pen Yompor ñerra'm esempo es pallta'yenet, sañapa' sapa'yesanetcha' ñeñt' pallta'yenet. Ñaña e'ñepa'chña cohuen sagapannena sepaclo.

14 Ñaña añ poctetsa o'ch senamoñ Yompor attoch a'natana ñeñt' se'moñe'tene'. Amachña čha sarrnomare'tatscho.

15 Ñaña ñerra'm esempo esesha' atarr coshetsa, sapa'čo'ña socshapretanetepa'ch. Ñaña ñerra'm esempo esesha' yahuetsa puellquëñoť, sapa'čo'ña sellcapretanetepa'ch.

16 Amachña čha atsrre'močhen sentanna'teno. Ñaña amach añ se'natsto attoch sommo'chena. Añcha'ña pocte' senten o'ch seyemteña ñeñt' ama esoshe'maye' entyeneto. Ñaña amach sentatsto sañeña, so'ña e'ñe sapuet atarro' es señoten.

17 Ñaña ñerra'm po'psheñeñ erroťen p'aspa' sapa' amach setsa'tatatsche ama't coñe'ta. Sapa' añcha'ña e'ñe sema'yočhra ñeñt' čhocma sepena ñeñt' cohuen enten allohuen acheñenesha'. 18 E'ñe puesheña'ttospa' čhochña se'nyes ñeñt'cha' atet sepa'yes ñeñt' pocte' enten allohuen acheñenesha'; attochña e'ñe cohuen sentannena. Allochñapa' o'ch socrrena e'ñe cohuen muechet e'ñe sagattsa ñeñt' parro'marneshas. 19 Te' o'ch masheñneshacha' ñaña nočhaneshacha' e'ñe nemorrenteñoťespa' o'ch notas, ñerra'm esempo po'psheñeñ erroť p'aspa' sañapa' ama't coñe'tapa' amach setsa'tatatsche. Añcha'ña semnat Yompor atto ñapa' tsa'taterranetcha'. Tarro'mar ñeñt'pa' atet oten Yompor po'ñoñ ñeñt' anuareť ahuaťoteñ. Allempo atet otanete't Yompor, ñeñt'pa' atet ot: "Napa' naña ñeñten atsa'tatañen, napa' nach tsa'tatuerrahuet." Arrpa' allohua ñeñt' atet ote't Yompor. 20 Añcha'ña atet sepoñ ñeñt' se'moñe'tene' ñeñt' e'ñe atet oteney Yompor po'ñoñ. Ñehua, ñeñt'pa' atet oten: "Ñeñt' se'moñe'tene' ñerra'm esempo cheporrenapa' sañapa' sapepa'ch ñeñt'cha' rra'. Ñaña ñerra'm esempo oñpa'ten sañapa' sapepa'ch ñeñt'cha' orr. Ñerra'm atetcha' sepe'pa' ñaña'ña o'ch penquëna nanac. Atarrcha' atserr e'man atto penquëna. Allempoñapa' ñato' e'ñe puepenquëñoťpa' ñeñt'cha'ña cotape'chatterre' cohuen." 21 Ñeñto'marña notas, ñerra'm esempo po'psheñeñ erroť p'aspa' sapa' amach sañeña muenatstaye o'ch alla setsa'tatera. Añcha'ña atet sepa' ñeñt' e'ñe cohuentetsa. Ñerra'm atet yepenapa' e'ñe yepeñoť cohuenpa' o'ch ya'huañat ñeñt' ama cohuenayaye.

13

Atto añ poctetsa o'ch yame'ñeña ñeñt' añcha'taretetyetsa añe patsro allochñapa' attoch yocrrena e'ñe cohuen muechet

1 Ñaña añ poctetsa e'ñe puesheña'ttsoypa' o'ch yame'ñya ñeñt' añcha'taretetyetsa ñeñt' pueyochresha' pen gobierno'. Tarro'mar amach eñallñeña ñeñt'cha' añcha'taretetyetsa ñerra'm ama Yompor muenatenahueto o'ch atet pet. Tarro'mar ñeñt' añcha'taretetyetsa arr patsropa' ñetpa' Yompor muenatenahueto o'ch atet pet. 2 Ñeñto'marña yeñoteñ ñerra'm esesha' atpare'tene' ñeñt' añcha'tarettetsa arr patsro ñapa' añe'na atpare'ten Yompor, tarro'mar Yomporpa' ña muenatenahueto o'ch añcha'taretetyenet arr patsro. Ñaña ñeñt' atpare'tene' ñeñt' añcha'tarettetsa arr patsro ñapa' e'ñe ñañaña patpare'teñoť atsa'tatarettach. 3 Ñaña ñerra'm čhocma ye'pa'yen ñeñt' cohuen enten añcha'taretpa' amach añcha'nočhenaye' yenteñeña ñeñt' añcha'tarettetsa, tarro'mar e'ñe atto'tapa' amach erroť pa'ye. Tarraña ñeñt' atpare'tene' ñeñt' atet muenen añcha'taretpa' ñetñapa' atarrcha' añcha'nočhen enteñeña añcha'tareť tarro'mar añcha'taretpa' čhocmach

tsa'taterranaña ñeñt atpare'tene' ña. Ñehua, ñerra'm ama semno o'ch amcha'nochen señch amcha'taretpa' e'ñechña cohuen es sepa'yen, attochña amcha'taretpa' e'ñech cohuen entenes, amach erroť paso ama't mamesha. ⁴Tarro'mar ñeñt amcha'tarettsa arr patsropa' añ torrenet ñeñt atet muenatenanet Yompor, allochñapa' attoch a'pocatenet esheccha' e'ñe cohuen yocrrena arr patsro. Tarraña ñerra'm añ atet sepen ñeñt ama cohuenayayepa' pocte'ñacho'ña allochñapa' attoch semcha'teñ amcha'taret, tarro'mar ñapa' ama orrena amcha'taretteno, chocmach tsa'tatana ñeñt atpare'tene'. Tarro'mar ñapa' Yompor muenatene' ñapa' ñach tsa'tatenaya allohuen ñeñt atet pene' ñeñt ama cohuenayaye. ⁵Ñeñto'marña añ pocte' o'ch yame'ñya ñeñt amcha'tarettsa arr patsro, allochñapa' attoch amach tsa'taterrye Yompor e'ñe ya yatparñoť. Elloña ñeñt atet yame'ñena, tarro'mar e'ñe yeyochropa' yeñotena ñeñtpa' e'ñe pocte' o'ch e'ñe yame'ñena. ⁶Ñeñto'marña ñaña añ pocetsa o'ch yetsa'ta impuesto, ñeñt atet anaret ñoñets ñeñt cobrenyet amcha'taretshot tarro'mar ñeñt amcha'taretetyetsa añ patsro, ñeñtpa' atet muenatenanet Yompor ñeñtcha' atet torrenet ñeñt po'taruas penet.

⁷Chocmach setsa'ta allohuen ñeñt atet anaret ñoñets atto cobrenyet atet ñerra'm allpon quelle ñeñt enamueney amcha'taretnesha' atet ñerra'm impuestočno, chocmach setsa'cha. Ñaña achen ñeñt amcha'na'tpo' entenetpa' chocmuepa'ch semcha'na'tueñ. Ñaña achen ñeñt atarr amorrentaretapa' chocmuepa'ch semorrentueña. ⁸Amach esesha' seteťatsto, ama't puesheñarra. Añcha'ña sepa' ñeñt pocetsa socop, o'ch semorreñcha samo'ts. Tarro'mar ñerra'm e'ñe yemorrenteña yamo'tspa' attochña yetsotua ora Yompor po'ñoñ ñeñt atet anaret ñeñtcha' atet yepenamet e'ñe cohuen. ⁹Atet ñerra'm paterr ñoñets ñeñt atet anaret ñeñtpa' atet oten: "Amach sechtapretanna'tatsto setapor." Po'poñ ñoñetspa' ñeñtpa' atet oten: "Amach semtsanna'tatsto." Po'poñpa' atet oten: "Amach setyesatsto"; po'poñpa' atet oten: "Amach setoma'tamřsatsche samo'ts." Po'poñpa' atet oten: "Amach seye'chapretanna'tatsto", ñaña eñall po'poñečno ñoñets ñeñt atet yechateney. Allohuen añ ñoñets ama't po'poñe'ttsocma atet yechateney, tarraña po'ño'chpa' e'ñe patrra oteney, ñeñtpa' atet oteney: "Atarrepachña yemorrenteña yamo'ts e'ñe atet atarr yemorrentena yañeña." Ñerra'm chocma yemorrenteña yamo'tspa' allempoña po'ño'chpa' yetsotuach ora allohuen ñeñt atet yechatyeny po'poñe'ttsocma ñoñets ñeñt atet anaret. ¹⁰Tarro'mar ñerra'm po'ño'ch chocma yemorrenteña yamo'tspa' amach yemno o'ch erroť yeťanet te't čha yelcatenanet. Añečno atetpa' ama morrenteñtsoyaye. Ñeñto'marña yeñoteñ ñerra'm po'ño'ch chocma yemorrenteña yamo'tspa' ñeñtpa' attochña e'ñe yetsotua ora allohuen ñoñets ñeñt atet anaret ahuatoteñ Yomporshot.

¹¹Atetcha' sephua ñeñt atet o' notuas, tarro'mar yeñoteñ o' chapmoch allempoch huerra Cristo, ñeñto'mar socoppa' añ pocetsa o'ch alla setanterra Cristocop amachña sečllañoña es sepa'yeno atet ñerra'm čha semuen. Tarro'mar ahuañmo'cha allempo ñanom yame'ñera Cristopa' allempo atarr atomat palltenmeñ attoch ya'queshpataretterra. Tarraña te'pa' ama atarr atomatmeñeyaye. O' mameshamerra attoch ya'queshpataretterra. ¹²Arr patsropa' eñall shonte' sosya'tsañečno. Nato' o'ch yetma'ntacha atet ñerra'mrate' yapa' checmeta yeyčhena. Tarraña te'pa' e'ñe atet pena ñerra'mrate' o' metuamoch checmete' o' puetarenmoch, tarro'mar yapa' yeñoteñ o' chapmoch allempoch huerra Cristo. Ñeñto'marña añ pocetsa o'ch yesuanom allohuen ñeñt ama cohuenayaye ñeñt atet atma'ntataret checmete'. Añcha'ña atet yeťa'yen ñeñt cohuen enten Yompor ñeñt atet atma'ntataret puetare'. Attochña yetorrena Yomporcop atet ñerra'mrate' čho yečllarena ñocop. ¹³Añepa'chña yeťa'yen cohuen ñeñt atet penet yeťo, ñeñt ama apencočhenayaye ñeñtpa' ama atteyaye ñerra'm ñeñt

atet penet tsapo. Amach yoc̄tapretatsto all nanac coshena aposañetechno, eñe porrare'teñoŋet all atarr pa'namen coshatse'tyenet. Ñaña amach yechta'yesatsto coyaneshačno, amach atet yeŋatsto ñeñt̄ pa'namen sosya'tsañechno. Amach ye'natsto atsrre'močen, ñaña amach ye'moñe'tanna'tatsto eñe yesope'cheñoŋ. ¹⁴ Añcha'ña ahuaencat̄ sepene' Yepartseshar Jesucristo, allochñapa' attoch amach semnatatsto sechets o'ch muenatse'tatas ñeñt̄ ama cohuenayaye.

14

Atto eñall ñeñt̄ epuoye' ame'ñenayañ Cristo tarro'mar ama huomencaye' penano pueyoçher Yomporecop

¹ Ñaña te'pa' o'ch notas po'poñ ñeñt̄cha' atet seŋa. Ñerra'm eñall sesho acheñ ñeñt̄ ame'ñetsañ tarraña ñapa' ama huomencaye' penano pueyoçher Yomporecop tarro'mar ama e'ñe eñoteñe po'ñoçh atet yeyemteña Cristo, sañapa' o'ch sagaŋ e'ñe cohuen attochña e'ñech parrocm̄a seyemteña Cristo. Tarraña amach añecpa sagape attoch sapa' o'ch sotnare'ch tarro'mar ñapa' po'poñoneŋ coŋape'chyen. ² Atet ñato' eñall acheñ ñeñt̄ ama huomencaye' penano pueyoçher Yomporecop tarro'mar ama e'ñe eñoteñe ñeñt̄ atet po'ñoçh yeyemteña Cristo; ñeñto'marña ñapa' çhach oten ama pocteyaye o'ch yerra'yes berr po'chets, añach paterr yerren narmetsoçhno. Elloña po'psheñneçhno e'ñe pueyemteñoŋet Cristo ñetñapa' otenet e'ñe pocte' o'ch yerra'yes ama't erra'tsena rreñets. ³ Ñeñtey pa'namen es rra'yetspa' amuepa'ch yentatsche ñeñt̄ tore'tetsa ñapa' ama es eñoto. Ñaña ñeñt̄ es tore'tetsapa' amuepa'ch otatsetye ya ñeñtey pa'namen es rra'yets ama pocteyaye o'ch yerratse'tyes pa'namen ñeñt̄ ama arrapahuoyaye. Tarro'mar Yomporpa' ñaña o' aguërrey attoch pueyochresha' perrey. ⁴ Ñeñto'marña yapa' yeñoteñ ama pocteyaye o'ch yotanna'tena e'ñe yagattsa Yompor pueyochresha'pa' ama pocteyaye ñeñt̄ atet penet. Tarro'mar ñetpa' Ayochreshatecpuet tarro'mar ñapa' ñaña ñapueŋ otets atto pocte' entenan pueyochresha' amapa' ñerra'm ama pocteye' entenano pueyochresha'. Ñaña Ayochreshat̄ Cristopa' çhocmach e'ñe pocte' entenan pueyochresha' tarro'mar ñapa' ñach ahuaencat̄ p̄ahuet pueyoçhro.

⁵ Ñaña ñato' eñall acheñ ñeñt̄ ama e'ñe eñotenaye ñeñt̄ atet e'ñe po'ñoçh yeyemteña Cristo, ñeñto'marña ñetpa' çha otenet añ poctetsa o'ch yonañcha'yen pate'tets yet ñeñt̄cha' atet yetsotayes attochña e'ñe pocte' enteney Yompor. Ñaña ñato' po'psheñneçhno ñeñt̄ atet ñerra'm yapa' otenet ama yepallteno o'ch yonañcha'yen pate'tets yet ñeñt̄cha' atet yetsotayes tarro'mar allpon yetpa' Yomporecm̄a pueyeçhcatuar. Tarraña puesheña'tsoypa' yeñocheŋa'ch ñeñt̄ e'ñe pocte' yentyen ya e'ñe yeyoçhro ñeñt̄cha' atet yeŋa. ⁶ Tarro'mar ñerra'm esesha' onañcha'yene' yet ñeñt̄cha' atet etsotayes, ñapa' atet oten ñeñt̄pa' atet yame'ñeña ya Yompor. Attecma yepena yañña ñeñtey ama onañcha'yenaye yet, yapa'çho'ña atet yame'ñeña Yompor. Ñaña ñeñtey pa'namen es rra'yetspa' yapa'çho'ña atet yame'ñeña Yompor, tarro'mar yeparasyoso'teñesha' Yompor es yerra'yen. Attecma pena ñaña ñeñt̄ es tore'tetsa, ñetpa'çho'ña atet ame'ñeñet Yompor ñaña ñetpa' e'ñe pueparasyoso'teñeshet Yompor es tore'tyenet.

⁷ Tarro'mar ama e'ñe ya yemneññoŋeye' atet es yeŋa'yeno añe patsro. Atto yocrrena añe patsropa' ñeñt̄pa' ama e'ñe yaptecpayaye, ñaña allempoch yerromapa' ñeñt̄pa'çho'ña ama yemneññoŋeye' yerromueno. ⁸ Tarro'mar atto yocrrena allponmat añe patsro ñeñt̄pa' añecop attoch yesherbeñ Yepartseshar. Ñaña allempo yerromuenpa' ñeñt̄pa' tarro'mar atet muenateney Yepartseshar. Ñeñto'marña yapa' yoten allempo yocrrena añe patsro ñeñt̄pa' ama yaptecpaye' yocrreno, ñeñt̄pa' Yepartsesharecop.

Ñaña allempo yerromuen, ñeñtpa'cho'ña ama yaptecpayaye, ñeñtpa'cho'ña Yepartse-sharecop. Ñeñto'marña ñeñtpa' chocma atet pena tarro'mar ñapa' e'ñe o'paterrya ñaña e'ñe ñocpay. ⁹ Tarro'mar Cristopa' ñeñtecop rroma, elloñapa' alla correrra attochña ñapa' ñach yamo'mte' yepen allohuene. Ama't allempo yocrrenmeñ, ama't ñaña allempo yerromuen, atterach yamo'mte' yepen, tarro'mar ñapa' pueñotuaran atet peney rromueñets ñaña atto yocrrena ñeñtey arromñañey.

¹⁰ Ñeñto'marña amach yotatsche yemo'nasheñ ñeñt atet pena ñapa' ñeñtpa' ama pocteyaye. Ñaña amach yotatsche ñapa' ama es eñoteno. Tarro'mar Cristo ñapa' ñach yoterre' errotentcha' entyerrey esempohuañen allempoch yapcherra allohuene ñesho.

¹¹ Tarro'mar Yompor po'ñoñ ñeñt anuaret ahuatoteñpa' ñeñt allpa' Yompor otatset atet: Napa' na ñeñten ama arromñañeshayayno ñaña ama puenesho neñoñ. Po'ñoçhpa' atetcha' perra esempohuañen. Ora allohuen acheñenesha'pa' concorpanrrorter-rnetcha'. Allñapa' otuerrnetcha': "Pa Yomporep ñeñtep atarr Partsop."

¹² Attoña yeñoteñ allohuene puesheña'ttsoy Yomporpa' a'metataterreycha' ñeñt atet o' yeñohuahuaena arr patsro.

Atto ama pocteyaye e'ñe atet yepeñoñ ya o'ch alla ya'puerratater yemo'nasheñ

¹³ Ñeñto'mar ama pocteyaye o'ch yañeña yotanna'ta ñeñt atet yentannena arr patsro. Añcha'ña yañeña e'ñech yeñotena ñeñt atet yepe'yena ya tarro'mar ñeñt atet yepe'yena yapa' ñato'rraña chate' ya'puerratater yemo'nasheñ ñerra'm ñapa' ama pocteye' entenano ñeñt atet yepe'yen ya. ¹⁴ Napa' e'ñe neyemteñoñ Yepartseshar Jesús neñoteñ e'ñe pocte' o'ch es yerra'yes tarro'mar neñoten allohuen rreñetspa' e'ñe arrapahuocma Yomporecop. Tarraña ñerra'm esesha' ama arrapahuoye' entenaye ñeñt allohuen rreñetspa' e'ñe ñocoppa' ama pocteyaye o'ch rrenan ñeñt rreñets. ¹⁵ Ama't e'ñe pocteñ o'ch yerra'yes, tarraña ñerra'm yemo'nasheñpa' ama arrapahuoye' enteñe, yapa' e'ñe ya yerreñoñpa' ñato' o'ch yeye'chateña allempoñapa' o'ch rre' ñaña, ñaña'pa' chach enteñ ñeñtpa' ochña'teñets Yomporecop. Atteñapa' ñato' o'ch alla puesuerran Yompor. Ñato' yerreñoñ ama't e'ñe cohueñeña' o'te' yequechpatater yemo'nasheñ Yompor. Ñeñto'marña notenes, amach yerratsto allempo, tet ñeñto'mara yequechpatater yemo'nasheñ Yompor. Ñaña ñerra'm atet yepeñ yemo'nasheñpa' po'ñoçhpa' ama yemorrenteño, ñeñtara yemo'nasheñer ama't Cristopa' ñocpa'na rroma. ¹⁶ Ñeñto'marña notenes, ama't pocteñ ñeñt atet yepe'yena, tarraña ñerra'm yemo'nasheñpa' ama pocteye' enteñe, ñaña'pa' ñeñtotach sasare'teney. Ñehua, ama't e'ñe pocteñ o'ch atet yepenañ, tarraña amach atet yepeatsche. ¹⁷ Tarro'mar ñerra'm añ yocteññañ Yompor po'cohueña atto pueyochresha' peney, ñeñt atto es yerra'yen amapa' atto es yetore'tyena, ñeñtpa' ama esoyayeña Yomporecop. Añña ñeñt nanac sherbets attoch yocteññañ Yompor po'cohueña, ñeñtpa' atto e'ñe pocte' es yepeannena añe patsro, ñaña atto e'ñe cohuen yentannena attochña yocrrena e'ñe cohuen muechet, ñaña attochña Parets Puecamquēñpa' chocmach coshateney yeyochro. ¹⁸ Ñerra'm atetcha' yame'ñeña Cristo, Pomporñapa' e'ñech cohuen enteney, ama't allohuen acheñenesha'pa'cho'ña e'ñech cohuen enteneyet.

¹⁹ Ñeñto'marña napa' notenes, añe'pa'chña ye'nen ñeñt attoch e'ñe yeparrocmaterr allohuene ñaña attochña e'ñe cohuen yeyenpannena. Allochñapa' allo'nach e'ñe huomenc yepeanna'tnena yeyocher Yomporecop. ²⁰ E'ñe ya yerreñoñ po'chetspa' amach ya'huañatatsterrñañe po'psheñeñ ñeñt atet ame'ñenanañ Yompor. Ama't allohuen rreñsoçhno cohuenacmañ ñeñtcha' yerra'yeneñ, tarraña ñerra'm yerreñoñ o'ch alla ya'puerratater po'psheñeñ attoch o'huañcha' ame'ñenana Cristo, ñeñtepeñapa' e'ñe pocte' amach yerratsto ñeñtcha' a'puerrataterre' po'psheñeñ, tarro'mar atetpa' ama cohuenaye' enteñe Yompor. ²¹ Ñeñto'marña notenes, ama't erra'tsena ñeñt atet

yepenoť po'psheñeñpa' o'ch alla ya'puerratater, ñeñteñpa' amach atet yepatsto, allochñapa' amach puerrero ama't puesheñarra ñeñt ame'ñenaya Cristo. Atet ñerra'm allempo yerren berr po'chets ñaña allempo yorren co'nes,* ñerra'm atet yepenoť o'ch alla ya'puerratater yemo'nasheñ, ñeñteñpa' añ poctetsa amach yerratsto berr po'chets, amach yorratsto ñaña co'nes, tarro'mar allempopa' ama cohuenaye' enteñe Yompor. ²² Ñerra'm e'ñe pame'ñeñoť Yompor peñotena ñeñt atet pepa'yena ñeñtpa' e'ñe pocte' entapreteneñ Yompor, tarraña ppa' e'ñech peyočhro poctape'cheñ Yompor atet, amachña čha pe'matare'tatstoña allo. Nanac cosheñso'tseney ñerra'm yeñotena po'ñočh e'ñe pocte' entapreteney Yompor ñeñt atet es yepa'yen, tarro'mar yeyočhropa' ama epuoye' es yepa'yeno. ²³ Tarraña ñerra'm esesha' ñeñt epuoye' es rra'yenpa' ñocoppa' ama pocteyaye o'ch rren, ñaña' ñeñtaña po'chñar pen. Tarro'mar ama pueñmañeshocmañenaye' es rreno, ñaña yapa' yeñoteñ ñerra'm ama yeñmañeshocmañenaye' es yepa'yeno, ñeñtpa' ñeñta yo'chñar entennay Yompor.

15

Atto añcha'ña ye'nen ñeñt e'ñe pocte' enten yemo'nasheñ

¹ Ñeñto'marña napa' notenes, ñeñtey e'ñe huomenc pene' yeyočher Yomporecop, ñeñtey ama epuoye' yame'ñeño Yompor, añña poctetsa o'ch yeyenpueñ yemo'nasheñ ñeñt ama huomencaye' penaye pueyočher Yomporecop ñeñt čhocma epuoye' ame'ñenana Yompor. Ñeñtpa' atetcha' yeyenpueñ, amachña añña atet es yepa'yeno ñeñt atet yemnen ya. ² Añcha'ña ye'nen o'ch atet yepen ñeñt e'ñe pocte' enten yemo'nasheñ. Ñeñtpa' atetcha' yeyenpueñ allochñapa' o'ch e'ñe huomenc pa'nman ñaña pueyočher Yomporecop, allochñapa' amach allo'na epuoye' ame'ñenano Yompor. ³ Amach añña atet es yepa'yeno ñeñt atet yemnen ya tarro'mar Cristopa' ama añña atet pa'yese'te ñeñt atet muene't e'ñe ñañeña. Añña pa'yese't ñeñt muenache't Pompor. Tarro'mar ñapa' ñeñtecopña mueročhte't ñeñt atet muenache't Pompor. Ñeñto'marña Cristopa' atet otane't Pompor, ñeñtpa' atet och: "Pa e'moñe'tetañpa' attoña sasare'tennet." Attoña e'ñe etsoterra ñoñets ñeñt atet aquellca'huare't ama't ahuatoteñ. ⁴ Ñaña allohuen añ ñoñets ñeñt atet aquellca'huare't ahuatoteñ, ñeñtpa' yocpa'naña atet anare't. Allochñapa' attoch yapa'čho'ña o'ch yečhaterryet ñeñt atet muenen Yompor. Allochñapa' attochña huomenc yepen yeyočher Yomporecop. Ñaña añ ñoñets ñeñt atet aquellca'huare't ahuatoteñpa' nanaccha' coshaterrey allochñapa' attočha'ña e'ñe yocsheñesha' yeyemteññaña Yompor ñeñt o'patatenya. ⁵ Yompor ñapa' ñeñt ahuaamencat yepene' ñaña ñapa' ñeñtña yocshatene' yeyočhro. Ñaña ñepa'chña e'ñe seño'taterre', allochñapa' attoch e'ñe cohuen seyčherr ñeñt atet muenen Cristo Jesús, allochñapa' e'ñech cohuen sentannena. ⁶ Allochñapa' allohuenespa' e'ñech parrocmá sa'ye'chočhtateññañ Yompor, ñeñtara Yepartseshar Jesucristo Pompor.

Atto ama't ñeñt ama judioneshayayepa' ahuo't aserrpare'tatarettet añ cohuen ñoñets alloch yequeshperra

⁷ Ñeñto'marña napa' notenes, e'ñech cohuen es sepanna'tyena allohuenes e'ñe atet cohuen o' perrey Cristo, allochñapa' attoch seyemteñoť parro cohuencha' sa'cshapretarettena Yompor. ⁸ Ñaña te'pa' o'ch notas, Cristopa' ahuo't huapa arr patsro attoch torrosa judioneshacop. Allochñapa' attoch allohuen acheñenesha'pa' o'ch čhapanet pueyočhreto, Yomporpa' ama puenesho po'ñoñ. Ñeñt e'ñe atet otane't judionesha' pa'tañeshañ ahuatpa' ñeñtcha' atet muenaterranet esempo, ñeñtpa' čhocmachña e'ñe etsoterra poctacma. ⁹ Ñeñtecopña huapa ñaña attochña acheñenesha'

* **14:21** Ñehua, Pablo añ toma'ntatanet vino ñeñt poco'nes penet all pa'nyo.

ñeñt̃ ama judioneshayaye ñetpa'cho'ña o'ch aye'chochtatoñet ñamet Yompor tarro'mar Yomporpa' ahuo't muerenanet ñamet. Attoña etsoterra ñoñets ñeñt̃ quellca'huet ahuať atet ñerra'mrrate' e'ñe Cristo ote' Pompor, ñeñt̃pa' atet ot:

Ñeñto'marña napa' o'ch na'ye'chochtatonap̃ allo'tsa'yen acheñenesha' ñeñt̃ ama judioneshayaye, allña'pa' na'choteneṽcha' nemorreñesha'.

¹⁰ Ñaña po'poñ ñoñets ñeñt̃ atet aquellca'huaret ahuaťoteñ, ñeñt̃pa' atet oten:

Ñaña sa ñeñtes po'poñ acheñes ñeñtes ama judioneshayaysopa' socshepa'ch saña, atet coshena judionesha' ñeñt̃ pueyochresha' pen Yompor.

¹¹ Ñaña po'poñ ñoñets ñeñt̃pa' atet oten:

Ñeñtes ama judioneshayaysopa' sa'ye'chochtatoñepa'ch Yompor, ama't allohuenes pa'namen acheñres sa'ye'chochtatoñepa'ch Yompor.

¹² Elloña Isaíaspa'cho'ña atet ote't̃ ahuať:

Esempopa' orrterrach puesheñarr ñeñt̃ Isai* po'mreneñ. Ñapa' orrterrach allochñapa' ñeñt̃cha' pa'mcha'tareter perr allohuen pa'namen acheñenesha', ñaña allohuenet ñachña atarr yemterret. Arrpa' allohua ñeñt̃ atet a'potete't̃ Cristo ahuať.

¹³ Yomporpa' ñachña atarr ayemuetpoterrtsa. Ñaña ñepa'chña socshatene' e'ñe poc-tacma. Allochñapa' amach eñalle ama't coñe'ta ñeñt̃cha' sellcatene' atto same'ñeña ña. Allochñapa' Paretsña Puecamquēñpa' ñachña ahuañencat sepene'. Attochña e'ñech socsheñesha' secuen ñeñt̃ o'patatensa Yompor.

Atto Pablopa' ahuo't llesenseñ Jesucristo attoch amach pueñcha'ñoṽeye' alla yerpater-raneto ñeñt̃ e'ñe pocte' enten Yompor

¹⁴ Ñaña te'pa' o'ch masheñnesha ñaña nochanesha notas, napa' neñotenes sapa' atarr semorrentannena ñaña neñotenes o' e'ñe chaponasa seyočhro ñeñt̃ atet muenatenes Yompor. Allochñapa' attochña e'ñe cohuen soctape'chatannena erra'tsentē' cohuentetsa Yomporecop. ¹⁵ Tarraña ama't atetpa' ama nemchañoṽeye' o' notuanmaso pa'namen arr necartof ñeñt̃ atet pocte' enten Yompor. Attoña o' alla neyerpaterrser ñeñt̃ atet muenen Yompor. Ñeñto'marña atet nepenes, tarro'mar e'ñe Yompor pueñuereñoṽenpa' ¹⁶ ahuo't muenatenen nach torretsa Jesucristocop. Erracmañen allemeñ anetso'mar netorrena, allo'tsa'yen acheñenesha' ñeñt̃ ama judioneshayaye. Napa' na a'potenahuet Yompor po'ñoñ ñeñt̃ po'ñočh alloch yequeshperra. O'ch name'ñatuera ñeñt̃ ama judioneshayaye, allempoñapa' attochña nehuapatamet Yomporesho atet ñerra'mrrate' cho es yapueñ Yompor, ñaña'pa' ñeñt̃cha'ña atarr coshatene'. Alloñapa' Paretsña Puecamquēñña'pa' ñachña a'cohuentatuerrahuet. Attochña e'ñe cohuen enteñet Yompor.

¹⁷ Ñeñto'marña te'pa' e'ñe neyemteñoñ Cristopa' e'ñe pocte' nenteñ o'ch e'ñe noc-sheña ñeñt̃ allo netorrena Yomporecop. ¹⁸ Napa' aña paterr noten atto Cristopa' e'ñe ahuañencat penen, ñeñto'marña chocma name'ñateña ama't ñeñt̃ ama judioneshayaye.

Atto neserrpare'tatanet Yompor po'ñoñ, ñetña'pa' ahuo't e'ñe name'ñatuanet. Ñaña atto napa' e'ñe cohuenare' es norrtatyen, ñetña'pa' ahuo't e'ñe cohuen ame'ñeñet Yompor.

¹⁹ Ñaña ñetpa' aña ame'ñatahuet ñeñt̃ atto e'ñe ahuañencat penen Cristo attoña norrtatanet Yompor po'partsoña ñeñt̃ ama puentareto. Ñetpa' ñeñt̃ña eñotatuahuet, ñeñt̃pa' po'ñočh e'ñe Parets Puecamquēñoñ ñeñt̃ e'ñe ahuañencat yepene'. Atteñapa' ora erracmañen o' neserrpare'tua añ cohuen ñoñets atto e'ñe yame'ñeñoñ Cristopa' o'ch yequeshperra. Ateña neserrpare'tyesnom allemeñ anetso'mar e'ñe Jerusaléñoṽeñ Ilírico'marohuen. ²⁰ Napa' aña atarr nemnen o'ch neserrpare'tyen añ cohuen ñoñets errap̃aren ñachhaya'mar all ama pue'mareto ñeñt̃ Cristotets. Attochña napa' amach

* **15:12** Isaíaspa' ñeñt̃ara Jesé. Ñehua, ñapa' ñeñt̃ puechemeran David ñeñt̃ añcha'tarettatse't̃ Jerusaléño.

arra neseno serrpare'tats all o' serrpare'tatuahua po'psheñeñ. ²¹ Attochña etsoterra añ ñoñets ñeñt atet aquellca'huaret ahuatoten, ñeñtpa' atet oten Cristocop: Acheñenesha' ñeñt ama't ahuatapa' ama aserrpare'tataretteneto ñeñt atet pena ña, ñetñapa' enteretcha'. Ñeñtara acheñer ñeñt ama pue'marano ñeñt atet pena ña, ñetñapa' cherranetcha' pueyoçhreto ñeñt atet pena ña.

Atto Pablopa' atarr sechena o'ch ahuo' anetso Romo o'ch emo'tenana' ñeñt ame'ñetsa all

²² Napa' shonte' neserrpare'tatyen erracmañen arr, ñeñto'marña ama eshcaye' neseno sesho. Ama't ahuañoñeñ atarr nesechenañ o'ch nabchensa', ama erroñ nepeñe. ²³ Tarraña na te'pa' o' ne'nua netaruas ñeñt atto neserrpare'tyen arro'mar allemeña. Ñaña napa' ahuañoñeñ nesechena o'ch nabchensa'. ²⁴ Ñeñto'marña te'pa' e'ñe po'ñoçh nesechena o'ch ahuen sesho o'ch nabchensa'. Allochñapa' o'ch yabchanna'ta allponmat, allempoñapa' ñato' atto'pa' o'ch seyenpa'n attoch neçhap ñaña Español. ²⁵ Ñehua, te'pa' ñanomcha' Jerusaléño neta, attoch nanmanet allpon ofrenda masheñeshacop ñeñt ame'ñetsa all. ²⁶ Tarro'mar allpon ñeñt ame'ñetsa Macedonio ñaña Acayo, ñetpa' e'ñe pocte' enteñet o'ch apuet allpon ofrenda, ñeñtcha' oñmachtet masheñesha' Jerusaléño ñeñt nanac es pallta'yenet. ²⁷ Macedonio'marnesha' ñaña Acayo'marnesha' ñetpa' ama judioneshayayeto. Tarraña e'ñe pocte' enteñet o'ch yenpueñet judionesha' ñeñt Jerusaléño'tsa'yen ñeñt nanac es pallta'yenet. Napa'cho'ña e'ñe pocte' nenteñ tarro'marña ñeñt judionesha' ñetpa' ñetña serrpare'taterret ñanom ñeñt ama judioneshayaye Yompor po'ñoñ. Ñeñt atet a'parettet ñetpa' ñeñtpa' puecamquëñecop. Ñeñto'marña te'pa' e'ñe pocte', ñeñt ama judioneshayayepa' o'ch alla yenpuerran ñaña ñeñt judionesha' ñeñt poctetsa po'chtsoçpuet alloch correnet arr patsro. ²⁸ Allempoch neçhap Jerusaléño o'ch napos masheñesha' ofrenda. O'ch naphuerranet attochña e'ñe ne'nua ñeñt netaruas nepen. Allempoñapa' o'ch ahuen ñaña Español. Ñehua, amach neçhena' Españolpa' o'ch nemo'tnomues allponmat, allotcha' nem'terrerr sesho'pa' allempochña o'ch ahuen Español. ²⁹ Ñaña neñoteñ ñerra'm esempoch neçhap sesho e'ñe neserrpare'tateñoñes Cristo po'ñoñ, sapa' nanaccha' nocshatterres e'ñe nanac Yompor pa'nateñoñ.

³⁰ Ñaña te'pa' o'ch masheñesha notas, e'ñe seyemteñoñ Yepartseshar Jesucristo, ñaña attoch apueney Parets Puecamquëñ alloch e'ñe yemorrentannena, sapa' çhocmach sema'yochapretna. Nanaccha' sema'yochapretna, ³¹ o'ch senamaton Yompor attoch cohuan'psen allochñapa' amach cha rromapno judionesha' ñeñt ama ame'ñetso all Judeo. Ñaña o'ch senamaton Yompor añecop judionesha' ñeñt ame'ñetsa Jerusaléño, attoch e'ñe cohuen entapretapnet ñeñtcha' naposanet. ³² Allochñapa' ñerra'm Yompor muenatspa' e'ñech nocsheñesha' neçhap sesho. Allñapa' namesoste' e'ñe cohuen allponmat, ñaña e'ñe yabchanna'teño'pa' o'te' alla e'ñe nocsherra neyoçhro. ³³ Yomporepa'chña e'ñe cohuen sa'nataya allohuenes, ñeñtara Yompor ñeñt e'ñe cohuen yocshatene' yeyoçhro. Ñeñtpa' attetepa'ch Nompore.

16

Atto Pablo arr po'carto'pa' e'ñe huom'cha'tuan ora allohuen ñeñt ame'ñenaya Cristo all anetso Romo

¹ Ñaña te'pa' añ necarto'pa' nemneñ o'ch neñotatas ñeñt yoçh yepen ya arr ñeñtpa' añ pa'so'cheñ Febe. Ñapa' ña sherbets Yompor pa'pacillo allecma apçhenet Yomporecop añ anetso Cencreo. ² Ñapa' mueneñ ahuo'ch ahuo' sesho. Ñerra'm esempo çhap seshopa' o'ch saga'p cohuen, ñeñt atet poctetsa o'ch yagapannena e'ñe cohuen, ñeñtey ame'ñenaya Yepartseshar Cristo. Ñaña ñerra'm o'ch çhap sesho, ñerra'm escha' palltosa ama't

erra'tsena, añ poctetsa sapa' o'ch seyenpueñ tarro'mar ñapa' atarr cohuen ayenpañ; ama't napa' nanac yenpuenen.

³ Napa' nemneñ añ necartoñ o'ch nehuom'cha'ch no'ch Priscila puerrollare'na ñeñfara masheñ Aquila, ñeññ parro netorrena ahuañmo'cha Cristo Jesúsocop. ⁴ Ñetpa' nanac yenpuennet ahuañmo'cha allempo muene' muetsanetañ. Ñetñapa' autsa rromatsetañ attot a'qeshpatnet na allempo muene' muetsaneñ ñeññ ne'moñe'tene'. Ñeñto'marña napa' atarr neparasyoso'tenanet ñaña ama naptayaya añña ñaña ñeññ allohuen ñeññ ama judioneshayaye, ñeññ e'ñe pame'ñeñoñet ap'cha'yenet allemeñ anetso'mar, ñetpa'cho'ña atarr parasyoso'teñet no'ch Priscila ñaña masheñ Aquila, tarro'mar ñetpa' ahuo't a'qeshpatnet, attot ellopa' o' alla neserrpare'tatererr ñeññ ama judioneshayaye. ⁵ Ñaña te'pa' o'ch nehuom'cha'ch allohuen masheñnesha' ñeññ pame'ñeñoñet chocma ap'chenet masheñ Aquila pa'paclo, all ye'chena epuet puetapor Priscila. Ñaña arr necarto'pa' nemneñ o'ch nehuom'cha'ch masheñ Epeneto ñeññ nanac nemorrentena. Ñapa' ña ñanom ame'ñenaya Cristo all anetso Acayo. ⁶ Allo'tpa' o'ch nehuom'cha'ch ñaña no'ch María ñeññ nanac torretsa sesho parro. ⁷ Te'ñapa' o'ch nehuom'cha'ch ñaña namo'ts ñeññfara masheñ Andrónico ñaña masheñ Junias, tarro'mar ñet ahuañmo'chapa' ñeññ parro ehucaretey. Ñetpa' ama't allsensareñnesha'pa' nanac asherben entarettet, tarro'mar ñetpa' ahuatoteñ ame'ñeret Cristo. Ama't allempo napa' ama name'ñena' ñetñapa' o' ame'ña'huet ñanom.

⁸ Allo'tpa' nemneñ o'ch nehuom'cha'ch ñaña masheñ Amplias ñeññ atarr nemuerena e'ñe yame'ñeñoñ Yepartseshar parro. ⁹ Allo'tpa' ñaña masheñ Urbano, o'ch nehuom'cha'ch ñaña ñeññ parro yetorrena ñeññ po'taruas pen Cristo Jesús. Allo'tpa' e'ñe nemorrenteño'tpa' o'ch nehuom'cha'ch ñaña masheñ Estaquis. ¹⁰ O'ch nehuom'cha'ch ñaña masheñ Apeles ñeññ chocma ahuantene' allohuen pa'namen topateñets attoña e'ñe cohuen cotenan Cristo. Allo'tpa' ñaña o'ch nehuom'cha'ch allohuen ñeññ pamo'ts pen Aristóbulo. ¹¹ Allo'tpa' ñaña namo'ts Herodión, allo'tpa' ñaña ñeññ pamo'tsesha' pen Narciso. Ñetpa' atarr ame'ñeñet Yepartseshar. ¹² Te'ñapa' nemneñ o'ch nehuom'cha'ch ñaña no'ch Trifena ñaña no'ch Trifosa. Ñetñapa' nanac torreññañet Yepartseshar po'taruas, allo'tpa' no'ch Pérsida ñapa'cho'ña nanac yemorrenteña atto nanac torrena ñaña Yepartsesharecop. ¹³ Ñaña arrpa' o'ch nehuom'cha'ch ñaña po'psheñeñ masheñ Rufo ñeññ pame'ñeñoñ nanac asherben yenteñ Yepartsesharecop. Ñaña pachore'na o'ch nehuom'cha'ch, tarro'mar ñapa' e'ñe atet nenteñ ñerra'mrrate' ñeññ e'ñe nachor nepen. ¹⁴ Te'ñapa' o'ch nehuom'cha'tererr po'potantañ masheñnesha' ñeññ añ Asíncrito, ñaña Flegonte ñaña Hermas, ñaña Patrobas, allo'tpa' ñaña Hermes, ñaña po'potantañ masheñnesha' ñeññ parrompaño'tsa'yenet. ¹⁵ Te'pa' o'ch alla nehuom'cha'tererr ñeññ masheñ Filólogo ñaña no'ch Julia, allo'tpa' ñaña masheñ Nereo epuet ñaña po'ch, allo'tpa' ñaña Olimpás, ñaña ama't allohuenet masheñnesha' ñeññ parrompaño'tsa'yenet.

¹⁶ E'ñe semorrentanna'teño'tpa' atet'cha' sehuom'cha'tanna'tena* ñeññ atet poctetsa Partsocop. Ñaña allohuenet masheñnesha' ñeññ ap'cha'yetsset allemeñ anetso'mar e'ñe pame'ñeñoñet Cristo, ñetpa'cho'ña mueneñet o'ch huom'cha'taset ñaña arr necartoñ.

Atto Pablo arr po'carto'pa' o' alla cotape'chaterraneterr po'pocheño

¹⁷ O'ch masheñneshacha' ñaña no'chaneshacha' noterrerr po'poñ añ necartoñ. Señotcha' añ acheñeneshar ñeññ muenene' o'ch ellopa'tetstatonaset socta'ña ñeññ atto same'ñeña Cristo, tarro'mar ñetpa' mueneñet o'ch cotape'chataset ñeññ ama atteyaye

* **16:16** Po'ño'ch oteneñ, "E'ñe semorrentanna'teño'ñ choc setso'ttsa'pa'tannena ñerra'm esempo sehuom'cha'tanna'tena." Ñeññapa' atet ye'chete't ahuat.

ñeñt atet o' yeychatuas. Ñeñt acheñer atetpa' o'ch sello'tsentach seshot, amach seyemtatstaneto ñeñt atet yechatenet. ¹⁸ Tarro'mar ñetpa' ama añeye' sherbeneto Yepartseshar Jesucristo. Aña cotape'chenet ñeñt atet muenenet ñet po'chets atto correnet. Atto serrpare'tenet cochnesha' ñoñets, ñeñt'pa' atta shequënet acheñenesha' ñeñt ama huomencaye' penaye pueyoçher. ¹⁹ Ñehua, allohueney yeñotenes sapa' o' same'ñera Cristo ñeñto'marña napa' atarr nocshensa. Añña nemnen o'ch e'ñe señot ñeñt e'ñe cohuentetsa Yomporecop. Allochñapa' amach soctape'chatsto ñeñt ama cohuenayaye. ²⁰ Allochñapa' Yomporpa' ahuencha' a'huañam̃psonas ñeñt atto atarr shequënes oneñt, ñeñtara Yompor ñeñt e'ñe cohuen yocshatene' yeyoçhro. Yepartsesharepa'chña Jesucristo e'ñe sa'natenaya.

²¹ Te'pa' o'ch alla neñotaterriserr añ necartot, masheñ Timoteopa'cho'ña mueneñ o'ch huom̃cha'tas ñaña, ñapa' ñeñt epan netorrena. Allotpa' ñaña añ namo'ts ma'psheño'maret ñetpa'cho'ña mueneñet o'ch huom̃cha'taset ñamet. Puesheñarrpa' añ masheñ Lucio, allotpa' ñaña masheñ Jasón, ñaña masheñ Sosípater.

²² Napa'cho'ña ñeñten sochetsa Tercio, e'ñe name'ñeñoñ Yepartseshar nemneñ o'ch nehuom̃cha'tas añ masheñ Pablo po'cartot. Napa' ñeñten quellcaten masheñ Pablo.

²³ Masheñ Gayopa'cho'ña muenen o'ch huom̃cha'tas ñaña. Na te'pa' e'ñe pa'paclo'tsenen ña, tarro'mar all neçhap. Ñapa' atet otenanet çhocmach apçhenet allohuenet pa'paclo ñeñt ame'ñetsa arr. Ñaña masheñ Erasto mueneñ o'ch huom̃cha'tas ñaña. Ñapa' ña tesorerotets arr Corinto, ña añño'tene' quelle anetsocop. Ñaña masheñ Cuartopa'cho'ña mueneñ o'ch huom̃cha'tas ñeñtara añ necartot.

²⁴ Yepartsesharepa'chña Jesucristo sa'nataya allohuenes. Ñeñt'pa' attetepa'ch Nompore.

Atto all huañen Yompor po'ñoñ añ cartotpa' ya'ye'choçhtatoñepa'ch ora allohueney

²⁵ Te'ñapa' ya'ye'choçhtatoñepa'ch Yompor tarro'mar ñapa' ñach ahuamencat sepene', ñeñt e'ñe atet oten añ cohuen ñoñets alloch yequeshperra. Ñeñtara añ cohuen cotapñats ñeñt neserrpare'tatenes ñeñt e'ñe atet pena Jesucristo ñeñt ahuatoteñ ama eñotpahuo.

²⁶ Tarraña te'pa' Yompor ñeñt ama arromñañeshayayepa' muenaterrey o'ch yeñoter ñeñt ama eñotpahuo ahuatoteñ. Ñehua, ñapa' ahuatpa' añ eñotate't ñeñt a'mta'yesaye't po'ñoñ, ñetñapa' ahuo'ch quellquënet ñeñt atet eñotatenanet Yompor. Attochña yeñoter yañña, ama't ñaña allohuen pa'namen acheñenesha'; allochñapa' attoch e'ñe yame'ña'huerra ora errañaren, ñeñtey pa'namen acheñey.

²⁷ E'ñe puemuereñoñey Jesucristo aye'choçhtataretepa'ch Yompor errponohuañen, ñeñtara Yompor ñeñt ñapueñ e'ñe eñotañtetsa. Ñeñt'pa' attetepa'ch Nompore. Allohua huañ añ necarta.

Pablo

AÑ ÑANOM SAN PABLO PO' CARTA ÑEÑT̃ QUELLCAN CORINTO' MARNESHA' 1 CORINTIOS

Atto Pablopa' quellcan carta añecop ñeñt̃ ame'ñetsa anetso Corinto

¹⁻² Masheñeshacha' ñaña nochaneshacha' ñeñtes allohuenes e'ñe same'ñeñoñ Yompor chocma sapchena parro all anetso Corinto, ñeñtes o' hua'ñerres Parets attoch pueyochresha' perres atto e'ñe separrocmateñoñ epas Cristo Jesúsapa' sañapa' sa'cohuentataretterra Partsocop. E'ñe parrocmahua'ñerres Parets attoch pueyochresha' perres, e'ñe attecma o' hua'ñerran allohuen ama't erra'tsena acheñer ñeñt̃ e'ñe pame'ñeñoñ chore'tene' Yepartseshar Jesucristo ama't errate' yecha'yenet. Ñeñña Jesucristo ñeñt̃ Yepartseshar yepen ora allohueney ñeñtey ame'ñenaya. Na Pablon sequellquene'ña añ carta epan masheñ Sóstenes. Napa' Jesucristo puellsensaren tarro'mar Yomporpa' ñeñtecopña o' chore'terren attoch nesherber. ³ Te'ña e'ñe nehuoncha'teño'tespa' o'ch notas: Yomporpa'chña sebensare'tam̃pene' ñeñtara Parets epuet Puechemer Jesucristo ñeñt̃ Yepartseshar yepen. Ñetepa'chña socshatene' e'ñe sa seyo'chro allohuenes.

Arrpa' all parasyoso'tam̃psanet

⁴⁻⁵ Te'pa' o'ch notas, napa' chocma neparasyoso'teñ Yompor socop tarro'mar ña puemuereño'tpa' atarr bensare'tam̃penes. E'ñe separrocmateñoñ Cristo Jesúsapa' o' eñotaterres pa'namen cochnesha' cotapñats seyo'chro. Ñeñto'mar te'pa' ama't ora allpon señosyen e'ñe ñesho'tpa' e'ñech cohuenare' señosyen. Ñaña ama't allohuen cohuen cotapñatspa' o' seño'tuer. ⁶ Ñeñt̃ atet yotuanmas ñeñt̃cha' atet p̃onas Cristo, te'pa' atetcho' o' etsotatuonas. ⁷ Ñeñto'marña te'pa' ama es palltetsa ñeñt̃cha' apuerrser po'poñ Yompor. Te'pa' aña palltetsa o'ch secuame'teñ esempohuañencha' huerra Yepartseshar Jesucristo. ⁸ Ñeñtara Jesús ñeñt̃cha' allo'na huomenc sepa'nene' seyo'cher. Attotach chap allempoch huerra Yepartseshar Jesucristo. Attochña allempopa' amach eñalle alloch otteñe'charetas ama't mamesha. ⁹ Tarro'mar Yomporpa' ama puenesho po'ñoñ, erro't otpa' atetcha' p̃a. Ñeñtara Yompor ñeñt̃ o' hua'ñerrey o'ch yeyemterrñaña Puechemer ñeñtara Yepartseshar Jesucristo.

Arrpa' all ye'chatanet attoch e'ñe patrra cotapñats anmuet

¹⁰ Te'pa' o'ch masheñeshacha' ñaña nochaneshacha' notas ñeñt̃cha' atet sepa, e'ñech patrra soctape'ch allohuenes. Amach allo'na soctape'chyesatsto po'poñe'ttsocma. E'ñech patrra cotapñats soctape'ch allohuenes; erra'tsen soctape'chpa' ñeñtach cohuen sent allohuenes. E'ñe patrra soctapño'tpa' o'ch separrocmatua allohuenes. E'ñe yame'ñeñoñ Yepartseshar Jesucristo ñeñto'marña notenes ñeñt̃cha' atet sepa. ¹¹ Tarro'mar ñeñt̃ parro ye'chena Cloépa' ñetpa' e'mare'tatnet atto' sepene. Ñeñt̃pa' atet otnet atto sa masheñeshacha' chocma po'poñ sentanna'tyena. ¹² Ñeñt̃ notenespa' ñeñt̃pa' atet sepene: Puesheña'ttsospa' atet sotyen: "Napa' añcha' name'ña masheñ Pablo." Po'potantañña' ñeñt̃pa' atet otyenet: "Napa' añcha' name'ña masheñ Apolos." Po'potantañña' ñeñt̃pa' atet otyenet: "Napa' añcha' name'ña masheñ Pedro."* Po'poñe'chnoñapa' atet otyenet: "Napa' añcha' name'ña Cristo." ¹³ Ñehua, ama't seño'teñeña, po'ño'chpa' ama eñalle attoch yellopa'tetstach Cristo. Po'ño'chpa' amaca'ye naye' corso'tam̃pseto ñeñt̃ e'ñe socop attoch na'queshp̃atas. Ñaña ama naye' same'ñeñoñ o' sapataretterroña Partsocop. ¹⁴ Napa' atarr neparasyoso'teñ Yompor tarro'mar napa'

* **1:12** Añ Pedropa' ñeñtara otenet Cefas.

ama muenatno o'ch napatas ama't puesheñarrotesa Partsocop. Ñehua, napa' e'ñe epsheña napat Partsocop, ñeñtpa' masheñ Crispo ñaña masheñ Gayo. ¹⁵ Napa' e'ñe nocshena tarro'mar te'pa' amach errotenoť sotno e'ño' na same'ñeñoť sapataretterra. ¹⁶ Ñehua, po'ñočh ellopa' napach masheñ Estéfanos epuet pamo'tsesha'. Ñerra'm eñallte' po'poñečno ñeñť napatpa' tarraña ñeñtpa' ama neñoteñe. ¹⁷ Napa' ama añecpaye' llesensa'noña Cristo o'ch napatyes Partsocop ñeñť allpon ame'ñetsa, añecpaña llesensa'n attoch o'ch neserrpare't cohuen ñoñets alloch yequeshperra. Ñaña ama añeye' cočhnesha' na neñoñ neserrpare'tatenso, tarro'mar ñerra'm aña neserrpare'tatenes cočhnesha' neñoñ name'ñatasapa' čhate' soten atto rroma Cristo corsochopa' ñeñtpa' amaca'ye es sherbeno attoch yame'ñera Cristo.

Añ ñoñets atto rroma Cristo corsocho, ñeñña ñoñets Yomporo po'huamenc alloch a'queshpatyerran acheñenesha'

¹⁸ Po'ñočh ñerra'm esempo yeserrparen atto Cristo rroma corsocho e'ñe ya yo'chñaroťpa' añña acheñenesha' ñeñť chenquetsapa' čhach otenapuetañ attate' yotatse'tyen. Tarraña ya ñeñtey a'queshpatareteypa' añña ñoñets atto rroma Cristo corsochopa' ñeñña ñoñetspa' yeñoteñ allotña huena Yompor po'huamenc attoch a'queshpatyerran acheñenesha'. ¹⁹ Tarro'mar añ ñoñetspa' e'ñe anuaret ama't ahuatoteñ, ñeñtpa' atet oten Yompor:

Ñeñť entetsa ñapa' nanaco' es eñoten patso'marecoppa' napa' o'ch na'huañañpesuanet ñeñť pueñoteñ. Ñaña ama't ñeñť entetsa ñapa' nanaco' eñotañtenapa' napa' o'ch nehupore'tañpes atto es eñotatse'tyenet.

²⁰ Ñehua, ama't señoteñeña, ama't ñeñť nanac es eñotatse'tyets arr patsro ama eñalleña ñeñť atarr asherben enten Yompor. Ñaña ñeñť atarr etsotayenayeñ ñoñets ñeñť atet anuaret ahuatoteñ ñaña ñeñť nanac eño'ñattetsañ añe patsro ama eñalleña ñeñť atarr asherben enten Yompor. Ñetpa' čhate' otenapuetañ atarrte' es eñotenet tarraña Yompor o' eñotatuay po'ñočh ñeñtpa' e'ñeca'ye orrena atet otatse'tyenet arr patsro. ²¹ Tarro'mar Yomporpa' e'ñe pueñoteñoť ñapa' ama pocteye' enteñe e'ñe ya yoctapñoťpa' o'ch yenter Yompor, ama't yapa' yoteneñ atarrte' es yeñoten. Añmapa' ñeñña pocte' enten Yompor: ñeñťara coťapñats ñeñť atto rroma Jesucristo yocop ñeñť čhach enteñet ñerra'mrrate' atta yotatse'tyen, añ ñeñťara coťapñats ñeñña muenen Yompor o'ch yeserrpare'toñ alloch a'queshpaterrey allohueney ñeñtey ame'ñenaya.

²² Ñerra'm esempo yeserrpare'tach judionesha' atto Cristo rroma yocop, ñetñapa' amach asherbenaye' entenetoña yoctapña tarro'mar ñetpa' añach muenet yorrtatanetepa'to' Cristo po'partsoña. Ñaña ñerra'm esempo yeserrpare'tateñ ñeñť ama judioneshayeyeto atto Cristo rroma yocop ñetpa'cho'ña amach asherbenaye' entonayetoña yoctapña tarro'mar ñetpa' añach muenet yorrtatanetepa'to' ñeñťcha' eñotatahuet e'ñete' po'ñočh atet yoten. ²³ Tarraña yapa' añcha'ña yeserrpare'tatanet atto Cristo rroma corsocho yocop. Tarraña añña judionesha' puetsena'teñoťetpa' amach cohuenaye' enteñeto. Ñaña ñeñť ama judioneshayaye ñetpa'cho'ña attach enteñet ñerra'mrrate' atta yotatse'tyen. ²⁴ Tarraña acheñenesha' ñeñť o' ame'ñerra ñetpa' o' čhapanet pueyočhreto po'ñočhpa' Cristo e'ñe Pompor po'huamencotpa' o'ch a'queshpaterrey, ñaña e'ñe Pompor pueñoteñoťpa' o'ch a'queshpaterrey. Attecma o' čhapanet pueyočhreto ñeñť o' ame'ñerra ama't ñeñť judionesha' ñaña ama't ñeñť ama judioneshayaye. ²⁵ Ñeñť ama ame'ñetsopa' ama't otenapuetañ Yompor poctapñapa' attate' otatse'tyen, tarraña ñeñťara poctapña e'ñe ña pueñoteñ ñeñña nanac sherbets. Acheñpa' ama't atarr es eñoteneñpa' tarraña poctapñetpa' ama tama sherbeno tarro'mar acheñpa' ama tama es eñotenet. Ñaña ama't otenetañ Yompor po'huamencpa' ama

añshe'maye' orrtenopa' tarraña yocoppa' ello metanennay allohueney yehuamenc tarro'mar yapa' arromñañaya. ²⁶ Ñehua, masheñneshacha' ñaña nochaneshacha' soctape'ch allempo hua'ñerres Cristo o'ch same'ñera. Allempo ama't acheñenesha'pa' entasete't sapa' ama esoye' seño'te tarraña Yomporpa' o' hua'ñerres, ñaña ama't ama sesherbena, ñaña ama't ama añeyayso puechemeres añcha'tare't. Ñehua, ñato' puesheña'ttsospa' ñeñtes, tarraña ama allohuenacmaye' attecmaso. ²⁷ Añña pocte' enten Yompor o'ch a'queshpatan acheñ ñeñt' acheñenesha'pa' chach otenapuetañ ñeñtpa' amate' es eñoteno. Tarrecop pocte' enteñ Yompor allochñapa' o'ch pencatan acheñenesha' ñeñt' nanac es eñotatse'tyets. Añpa'cho'ña pocte' enteñ Yompor o'ch a'queshpatan acheñ ñeñt' acheñenesha'pa' chach otenapuetañ ñeñtpa' amate' esoyaye. Tarrecop pocte' enteñ Yompor allochñapa' o'ch pencatan acheñenesha' ñeñt' chach otenapañ ñetpa' atarrte' es sherbenet. ²⁸ Añpa'cho'ña pocte' enteñ Yompor o'ch a'queshpatan acheñenesha' ñeñt' entenet ñeñt' ama esoshe'mayaye ñaña ñeñt' atsena'tare't. Ñaña añ acheñer muenen Yompor ñeñt' ama es echeno attoch sherba' ama't mamesha. Tarrecop mueneñ Yompor allochñapa' ño'tetpa' o'ch huapore'tam'psan acheñ poctapña ñeñt' añ patso'mara. E'ñech orrena enteret acheñ poctapña. ²⁹ Ñeñto'marña ya acheñeypa' ama't puesheñarroteya ama pocteyaye o'ch e'ñe yañeña cohuen yentena tarro'mar Yomporpa' ama atteye' entenye. ³⁰ Tarro'mar ñapta Yompor yapuene'ña attoch yapa' corretsayach. E'ñe yeparrocmateño' Cristo Jesús a'crrateney Pompor. Ñaña Yomporpa' atto nan Puechemer Cristo ñach yeñotaterre' ñeñt' cohuentetsa Yeyompor-recop, ñaña ñeñtara Cristo ñeñtcha' e'ñe cohuen a'pocstatene' yocop attoch cohuen entueney Pompor ñaña ñeñtara Cristo ñeñtña a'cohuentaterrey Partsocop, ñaña ñeñtara Cristo ñeñt yetsa'terroya yo'chñar attoch yequeshperra. ³¹ Ñeñto'mar atet anuaretta Yompor po'ñoñ ahuat: "Ñerra'm eseshaycha' es aye'chochtatetspa' Yomporecpuepa'chña es ya'ye'chochtaten."

2

Arrpa' all yerpaterranet atet serrpare'tatenaneta' ahuaña ñeñt' atto Jesucristo rroma yocop corsocho

¹ O'ch notas masheñneshacha' ñaña nochaneshacha', ahuaña allempo nechap seshopa' neserrpare'tatoses cohuen allempo na'potonas Yompor poctapña. Allempopa' ama cochneshoteye' neñoño' na'potonaso Yompor po'ñoñ atet noñets cochnesha' entyen acheñenesha'. Ñaña ama cochneshoteye' noctapño' na'potonaso Yompor poctapña atet ñerra'mrrate' acheñ ñeñt' nanac eñotañ entueñ allohuen acheñenesha'. ² Añña e'ñe patrra cotapñats neserrpare'tatenes ñeñt' atto Jesucristopa' rroma yocop corsocho. Tarro'mar allempopa' atet noten neyo'chro ñeñt'ach paterr o'ch neserrpare'tatanet. ³ Ama't allempopa' ama asherbenoteye' norrtoso sesho. Ñaña allempopa' atarr nemcha'ten, cha neyoruos nellquëño'. ⁴ Ñaña ama ne'ñoreño'te' e'ñe cohuen neserrpare'tataso attoch same'ña'na e'ñe neñoño'ta ñeñt' atet pena ñeñt' chach otenapañ ñapa' nanacte' es eñoten. Añña e'ñe neserrpare'teño'ta norrtatonas ñeñt' atet p'onay Parets Puecamquëñ e'ñe po'huamencot' Yompor. ⁵ Ñaña ya acheñeypa' ama't cochnesha'tatsta yocotapñapa' tarraña napa' ama nemno e'ñe na neñoteño'tpa' o'ch name'ñatasa. Napa' añña nemnen o'ch name'ñatasa e'ñe Yompor po'huamencot'.

Yompor Puecamquëñpa' ñeñtña es yeñotatene'

⁶ Tarraña ama't atetpa' esempopa' o'ch neserrpare'tach ñeñt' o' ame'ñerra huomenc. O'ch neserrpare'tatanet e'ñe cochnesha' cotapñats, ñeñtara Yompor poctapña ñeñt' atarr es eñotets. Tarraña añ cotapñatspa' amach patso'mareyaye, ñaña amach añeyaye

añcha'taretechno poctapña ñeñt añe patsro'tsen. Tarro'mar ñetpa'cho'ña huañerretcha' esempo. ⁷ Yomporepa'chña poctapña ya'poña ñeñt atarr es eñotets, ñeñtara ama't ahuañoteñpa' ama eñotpahuo poctapña. Tarraña ama't allempo ama ayeçhcatarettena' patspa' ñeñtñapa' o' anaretetua attoch cohuencha' ya'queshpataretterra esempo-huañen. ⁸ Añña añcha'taretnesha' ñeñt añe patsro'tsa'yenpa' ama çhapaneto Yompore poctapña. Ñerra'm çhapanetañcha' ahuaña pueyoçhretopa' amate' corso'tamperetañña Yepartseshar ñeñt atarr nanac cohuen. ⁹ Tarro'mar atet anuaretta Yompore po'ñoñ ahuañ, ñeñtpa' atet oten:

Ama't ahuaña ya ñeñtey arromñañteypa' ama yentare ñeñt o'patatenya Yompore ñeñt coçhnesha'tetsa yocop, ñaña ama ye'mare, ñaña ama çhaponaye'te yeyoçhro ñeñt o'patatenya Yompore ñeñteycha' morrenterraya ña.

¹⁰ Tarraña ñeñteyña ame'ñerraya ñeñtey allohueneypa' o' eñotaterrey Yompore e'ñe ña Puecamquëñoñ ñeñt chorratenya. Po'ñoçh yeñoteñ Yompore Puecamquëñpa' ña eñotuene' allohuen Yompore poctapña ñaña ama't ñeñt ama eñotpahuoyaye.

¹¹ Attecma yepena yaña ñeñtey acheñey. Amach errotenoñ po'psheñeñpa' eñotonay atet yoctape'chen ya yeyoçhro, e'ñech yapña yeñoteñ. Attecma pena ñaña po'potantañ amach errotenoñ eñotano Yompore poctapña, e'ñech Yompore ñapueñ Puecamquëñ eñotene'. ¹² Yapa' o' yagapoñ Yompore Puecamquëñ, amaña acheña poctapña yaguërro ñeñt patso'marecpa. Ñeñtara Yompore Puecamquëñ ñeñt çhapatene' yeyoçhro ñaña ñeñt yeñotatene' atto ña muerenya. E'ñe puemuereñoñey shonte' es apa'yeney. ¹³ Ñaña ñeñt ñoñets ñeñt yeçhateney Yompore Puecamquëñpa' ñeñtara ñoñets o'ch yeserrpare'tatas samña ama't ñaña po'potantañechno. Ñeñtpa' ama aneyaye ñoñets ñeñt atet yeçhatyen acheñenesha' ñeñt eñotañetyetsa. Ñaña ñeñt ñoñets atto yeçhateney Yompore Puecamquëñoñpa' ñeñt yeyçhatenes samña ñeñtes o' chorrerrsa samña Yompore Puecamquëñ.

¹⁴ Tarraña acheñenesha' ñeñt ama chorreña' Yompore Puecamquëñpa' amach errotenoñ çhapaneto Yompore poctapña ñaña amach errotenoñ agapoñeto ñeñtcha' apantantañ Yompore Puecamquëñoñ. Ñerra'm yeserrpare'tatanet atto es apueneñ Yompore Puecamquëñoñpa' ñetpa' çhach otyeset atto' yotatse'tyen. Tarro'mar ñapña çhenana pueyoçhro ñeñt chorrena Yompore Puecamquëñ. ¹⁵ Tarraña añña ñeñt chorrena Yompore Puecamquëñpa' ñetpa' çhenanet pueyoçhreto ora ñeñt atet pena Yompore. Tarraña ñeñt ama chorreno Yompore Puecamquëñ, ñetñapa' amach errotenoñ çhapaneto pueyoçhro esocopte' atet penaña ñeñt chorrena Yompore Puecamquëñ. ¹⁶ E'ñe attecma oteney Yompore po'ñoñ ñeñt anuaret ahuañoteñ, ñeñtpa' atet oten: "Esesha'huañe'ca' eñote'ña ñeñt atet cotape'chen Yompore attoch ñetpa' o'ch cotape'chateret ñamet Yompore." Tarraña te'ña yapa' attecma yoctape'chen atet cotape'chen Cristo.

3

Arrpa' all ama patrraye' cotape'cheno corinto'marnesha'

¹ Ñaña o'ch notas masheñeshacha' ñaña noçhaneshacha' ama't ahuañoteñ noteneñ o'ch noctape'chatas e'ñe cohuen, atet noctape'chateñ acheñ ñeñt e'ñe chorrena Yompore Puecamquëñ. Tarraña amach errotenoñ noctape'chataso tarro'mar sapa' atta socrrena atet muenatenes sechets. Cha sottena atet ñerra'm cheshatoll ñeñt ama eñotena'. Sapa' ama e'ñe çhennasa' ñeñt cohuentetsa Cristocop. Ñeñto'mar teme'ttsen atta noctape'chatenes atet ñerra'm cheshatolleshasa. ² Ñeñto'marña ahuañoteñ atta neñotatenes ñeñt ama torrapahuoyaye Yomporecop. Ñeñto'marña amach erroteno noctape'chaterrserro ello ñeñt nanac echarr cotapñats. Atta sottena ñerra'mrrate' ematoll, napa' attach nemomatenes semomos atet peñet ematoll, ñeñtara yoten

cotaññats Yomporecop ñeññ ama echarro. Ñaña ama echarroye' serrar napuenso, tarro'mar amate' erroteno setsoto, ama't teme'ttsenpa' ama setsoteññañe Yompor poctañña ñeññ nanac echarr. ³ Tarro'mar teme'ttsen atfa socrrena atef muenatenes sechets. Po'ñoçh ñerra'm esempo es yeye'chapretannena, amapa' ñerra'm çho ye'moñe'tannena, ñeññpa' atfa yocrrena atef muenateney yechets. Ñeññpa' ama'tña attera sorrteno atef pena acheñ ñeññ ama ame'ñenayo Cristo. ⁴ Tarro'mar ñerra'm çha yotyen: "Napa' añcha' name'ña Pablo", po'psheñeñña' ñato' oten: "Napa' añcha' name'ña Apolos." Ñeññ atef sepena çhachca'ye sottena ñerra'mrrate' ñeññ ama Cristona'tareyaye.

Puesheña'ttsoypa' añ yetorra'yena Yomporecop ñeññ atef yechyenyaya

⁵ Ñaña o'ch notas, yapa' ama esoyaye ama't Apolos, ama't na, añayaca'ye ñeññey torretsa Yomporecop. Yapa' amñareteya attoch o'ch yame'ñatasa. Puesheña'ttsoypa' añ yetorra'yena Yomporecop ñeññ atef yechyenyaya. ⁶ Atef ñerra'm napa' na ñanom same'ñate' Yompor po'ñoñ. Alloñña' ahuo't huapa ñaña Apolos, ñapa' ña seserrpare'tate' attoch allo'na sesen huomenc pa'nmue' seyoçher. O'ch netma'ntacha atef: Napa' atten ñerra'mrrate' ñeññ nare'tets. Alloñña' o'ch huapa po'psheñeñ ñeññcha' she'tamo're'tosets, Yomporña' ñach a'chpate' narmets. ⁷ Ñeñño'mar yeñoteñ ñeññ nare'tetspa' ama esoyaye, ama't ñaña ñeññ she'tamo're'tetspa' ama esoyaye. Añña Yompor ñeññña es a'chpatets ñaña sherbets. ⁸ Ñeñño'marña yeñoteñ ñeññey nare'tets ñaña ñeññey she'tamo're'tetspa' e'ñe parrocmaya yetorrena Yomporecop. Elloña Yomporpa' apa'yereycha' puesheña'ttsoy cohuen ñeññcha' atarr yocshatterre'. Apa'yereycha' erroteno' yetorra'yenoma ñocop. ⁹ Yomporpa' enteney atef ñerra'mrrate' parro yetaruasen ñocop. Sapa' Yomporpa' entenes atef ñerra'm ña pa'mres, allcha' nanac torrena ña.

Ñaña Yomporpa' entenes atef ñerra'm pocoll o'ch tomatey ña. ¹⁰ Atef ñerra'm na, Yompor puenereño'tpa' o' yeçhaten na o'ch neñoçh e'ñe huomenc, attoch nanomcha' ame'ñaterraya acheñenesha' Jesucristo. Ñehua, o'ch netma'ntacha atef ñerra'm Yomporpa' o' yeçhatenen attoch o'ch neñoçh tomate' pocoll e'ñe huomenc. E'ñe neñoteño't o'ch natomat ñanom quellpach e'ñe echarr. Alloñña' o'ch huapa po'psheñeñ ñeññcha' allo'na yeçcatnomue'. Tarraña ñeññcha' allo'na yeçcatnomue'pa' cotape'chepa' ñanom, pocte'te' atef peñ, ñato' amate'. ¹¹ Ñehua, añ quellpach ñeññ anare't ñanompa' ñeññ toma'ntenaya atef ñerra'm ya ñanompa' o'ch yame'ñera Jesucristo. Ñap'tach Cristo yame'ñerra. Ama eñalle po'poñ ñeññcha' yame'ñerra, tarro'mar amach erroteno't yame'ño po'poñ ñeññ ama Cristoyaye, añcha'ña ñeññara Cristo ñeññ o' yotuanmas. ¹² Ñeññ o' yame'ñata Cristo, ñetpa' allo'nach yeyçhatnenanet aco'pa attoch huomenc pa'nmuet pueyoçher. Ñehua, o'ch netma'ntacha atef: Ñerra'm çho yeyeçcaten pocoll ñanamcha' quellpach yatomat. O'chña echarr yatomatua quellpachpa' allo'nachña yesen yeçcatnomue' pocoll. Erra'tsenpa' ñato' o'ch yeçcatenan oropo' pocoll ñeññ atarr nanac cohuen, ñato' po'psheñeñpa' o'ch yeçcatan asrepo' ñeññ nanac cohuen ñaña, po'psheñeñña' o'ch yeçcatan cohuen mapyepo' ñeññ nanac tsa'te'. Tarraña ñato' po'psheñeñña' o'ch tomatan tablapo' ñeññ ama tama cohuenayaye, ñato' po'psheñeñña' aspanapo'ch, ñeññpa'çho'ña amach tama cohuenayaye, ñato' po'psheñeñña' attach yeçcatan atef ñerra'mrrate' posho'llpo' ñeññ ama cohuenayaye ama't mamesha. ¹³⁻¹⁴ Esemphuañeñña allempoch huerra Cristopa' entatuareteycha' allohueney ñato' espo'te' yeyeçcatyes yepaquell, ñato' oropo', ñato' tablapo' amapa' ñato' atef ñerra'm posho'llpo'. Ñehua, añcha'ña yeñotate' tso'. Yompor poyoroçhenño'tpa' o'ch etoman'pesyesonay yepacllaçhno. Ñehua, yeñoteñ ñeññ oropo' amach poyo, asrepo'pa'çho'ña amach poyo, mapyepo'pa'çho'ña amach poyo. Tarro'mar ñeññpa'

ama acrraño, ñeñto'marña nanac sherben. Tarraña tablapo'pa' ñeñtpa' poyuach, aspanapo'pa'cho'ña poyuach, posho'llpo'pa'cho'ña poyuach. Tarro'mar ñeñtpa' ama es sherbeno, attochña eñotuarēyeycha' e'ñe puesheña'ttsoy errotente' yeyeçcatyēs, ñato' cohuyente' ñato' amate' cohuenayaye allempo es yetorra'yesnoma Cristocop. Ñerra'm esempoç eñomāmpesyesonay yeyeçcatar ñerra'm amach poyo yeyeçcatar, allem-pochña yeñoch atto es yetorra'yesnoma Cristocoppa' ñeñtpa' e'ñe cohuen. Ñeñto'marña allempopa' aphuerreycha' e'ñe puesheña'ttsoy ñeñtcha' atarr yocshatterre'. ¹⁵ Tarraña ñerra'm yeyeçcatarña çha poyuapa' o'ch yeñoch atto yetorra'yesnoma Cristocoppa' ama es sherbeno, çhach a'chencatonay yeyeçcatar ñeñt Cristocpañ. Tarraña ama'tcha' a'chencatonay yeyeçcatar, yaña yecamquēñpa' queshperrach. Tarraña e'ñech yemue-rochenñoña yequeshperra atet ñerra'm çho poyen pocoll yañapa' o'ch yequeshpa.

¹⁶ Te'pa' o'ch notas po'poñ: Sapa' ama't señotheña Paretspa' o' pa'paquēll perres allohuenes ñeñtes ame'ñetsa. Yeparrocmatueñoñ allohueneypa' te'pa' e'ñe atet enterrey atet ñerra'm pa'paquēll, allcha' yeçhena Puecamquēñ ña. ¹⁷ Tarraña ñerra'm esesha' alla soctape'çhatterre' ñeñt ama cohuenaye' enteno Yompor ñeñña atet petsa çhach ottena ñerra'mrrate' çho a'matenan Parets pa'paquēll. Ñerra'm esesha'ña a'matene' Parets pa'paquēll ñeñña Yomporpa' çhocmach a'chencater. Tarro'mar Parets pa'paquēllpa' ñeñtpa' Partsocpa, saca'yeña o' pa'paquēll perresña Parets ñeñt e'ñe ñocpa.

¹⁸ O'ch noterrser po'poñ: E'ñech señoña sañeña. Ñerra'm eseshas otets, napa' atarr es neñoten añe patsro, añ pocte' o'huañepa'ch es eñotatse'tyēs e'ñe patso'mara. Añña pocte' o'ch orrta atet ñerra'mrrate' ama es eñoteno. Añepa'chña eñot ñeñt huetsa Yompore-shot. ¹⁹ Tarro'mar ñerra'm esempo ñeñtey acheñey añe patsro ñerra'm çha yotenapañ yapa' atarrte' es yeñoten, Yomporñaapa' atet enteney ñerra'mrrate' çha yotatse'tyen. Ñeñtpa' anuaret ñaña ahuatoteñ Yompor po'ñoño, ñeñtpa' atet oten: "Ama't atto es eñotatse'tyenetpa' Yomporñaapa' o'ch eñotanet atta otatse'tyenet, ama't ñetpa' otenapuetañ nanacte' es eñotenet tarraña ñeñtpa' shequēñtsa." ²⁰ Añ ñoñetspa'cho'ña anuaret ahuatoteñ, ñeñtpa' atet oten: "Ñeñt çha otenapañ nanacte' es eñotenpa' añña Yomporpa' eñotenanet ñeñt atet cotape'çhenet ñetpa' e'ñe orrena." ²¹ Ñeñto'marña te'pa' o'ch alla noterrser: Amach ellocma sa'ye'choçhtatanna'tyesatsto atet yocape'çhen ya ñeñtey arromñañey. Tarro'mar allohuen ñeñt apuenes Yompor ñeñtcha' soctape'çhate' cohuen. ²² Ama't na Pablonpa' Yompor o' na'n ñeñten allohuenacpas, ñaña ama't masheñ Apolos, ñaña ama't masheñ Pedro. Yomporpa' apueney allohuen ama't ñeñt yentyes añe patsro ñeñtcha' yeyenpue' ñeñt alloch yocsheña Yompor. Yocsheñepa'ch ama't allempo yocrrena, ñaña ama't allempoç yerroma, ñaña ama't ora allpon ñeñt eñall te' çhocmuepa'ch coshateney. Ñaña ora allpon ñeñtcha' eñalletatsa tsapañetpa' ñeñtpa'cho'ña coshatasepa'ch. Ama't allohuen ñeñt pa'namen esoçhno ñeñtpa' yocop ñeñtcha' yeyenpue'. ²³ Elloña yapa' e'ñe pueyochresha' pohueney Cristo allohueney, Cristoñaapa' Parets Puechemer pene'.

4

Atet pena ñeñt torretsa Cristocop

¹ Ñeñto'marña te'pa' notenes, epsheño'marey na epan masheñ Apolos, añ pocte' o'ch senteney atet ñerra'm ñeñtey torretsa Cristocop. Ñaña añ pocte' o'ch senteney atet ñerra'm yapa' eyeçharetey o'ch ya'potoñ Yompor po'cohuenña. ² Ñehua, yeñoteñ ñerra'm erra'tseney eyeçhareteypa' añcha'ña atet yepena atet yechenyet. ³ Ñato' sapa' sentenente' napa' nepena atet eyeçhareten ñato' amate', ñeñtpa' ama añeçpayaye ñeñt atet nellquēna na. Ama't acheñenesha' ñeñt añcha'taretetyetsa, ñerra'm errotente' entennet ñeñt atet nepenapa' ñeñtpa'cho'ña ama añeyaye ñeñt atet nellquēna na. Ama't

napa'cho'ña ama neyemteno ñeñt atet nentena e'ñe nañeña. ⁴ Ñehua, e'ñe cohuenare' nenteñeñ allohuen ñeñt atet es nepa'yen, tarraña ñeñtpa' ama añeyaye alloch yeño ch e'ñeñe' cohuenare' es yepa'yen. Añña e'ñe pocte' nenten Yepartsesharcha'ña otats e'ñeñe' pocte' entenen, amapa' ñato' amate'. ⁵ Ñeñto'marña notenes, amach sotatsto atet: añ acheñer nanac cohuen, po'psheñeñpa' ama cohuenayaye. Te'pa' amach sotatsto atet, tarro'mar esempohuañencha' huerra Yepartseshar. Allempopa' ñachña eñotatuerrets ñeñt ya'nasotyena te'. Ñaña ñachña eñotatuerrets ama't ñeñt atet yemna'yen yeyochro. Errponeycha' ñeñtey cohuen entuerr Yomporpa' allponeycha'cho' aye'chochtatuerr.

⁶ O' notuas ñeñt poctetsa ñeñtcha' atet sentey ya epan masheñ Apolos. Masheñeshacha' ñaña nochaneshacha' tarro'mar atet notenes, allochñapa' attoch seño ch añ pocte' e'ñech attecma senteñ ama't allohuen acheñ, e'ñe atet otene y Yompor po'ñoñ ñeñt atet anuaret ahuatoteñ. Allochñapa' amach yommo'chatsche acheñ ñeñt cohuen yenten e'ñe yañeña. ⁷ Sapa' atarr cohuen sentena sañeña tarraña amaña po'psheññeye' atarr eñotañ sentenaye ama't puesheñarra. Ama't allpon seño tyenpa' amaca'ye e'ñe soñaye' es seño tyeno; Yomporca'ye seño tatene'. Po'ño chpa' atto Yompor es eñotatenespa' eso'mare'tña sommo'chyenaña atet ñerra'm e'ñe soña es seño tyen.

⁸ Cha't sotenapañ o'te' nanac setsotoñ Yompor pocta'ña. Cha sottena atet ñerra'm ama es sepallteno ama't coñe'ta Yomporeshot. Yañapa' o'huañ acua'psenaye' senterrey. Sañapa' o' cha añcha'taretoyen sorrtena. Ñehua, e'ñe pocte' sa'mcha'tarettepa' tarro'mar ñerra'm po'ño ch o'ch sa'mcha'taretterrapa' ñato' attotpa' o'ch semnatey yaña o'ch ya'mcha'tarettapreterra. ⁹ Tarraña napa' noctape'chen ñato' ya ñeñtey allsensareteypa' Yomporpa' ñato' o'ch muenatan acheñenesha' yapa' o'ch a'ypo'ñerryet. Acheñenesha'ñapa' chach amtsen entenyet. Attach cohuañatyeny allohuen acheñenesha' arr patsro, ama't ñaña ñeñt Yompor po'millaño teñnaneshar o'ch cohuañatyet ñamet. ¹⁰ E'ñe yame'ñeñoñ Cristopa' añña acheñenesha'pa' chach otenet yapa' amo' es yeñoteno, tarraña sapa' chaña atet sentena ñerra'mrrate' atarr nanac eñotañes. Ñaña yapa' chach otenyet amo' esoshe'mayayye, tarraña sañapa' attaña ahuañencatoyen sentena. Ñaña sapa' nanac añcha'na'tpo' entenset, yañapa' amach acua'psenaye' entenyeto. ¹¹ Yañapa' teme'ttsen yemuerochtana ama't yachporrñoñ, yo'ñpaño te'na yemuerochtana ñaña yemuelleño te'na. Atta epaye' atserrpenyet, ñaña ama yecheno allcha' yeycha. ¹² E'ñe yetorreñoñ nanac yetaruasen e'ñe ya yotoñ. Ñaña ñerra'm esempo sasare'tenyetpa' yañapa' o'ch yenamatenanet Yompor pa'nateña ñocpuet. Ñaña ñerra'm esempo pue'moñe'teño tet cotare'tenyetpa' yañapa' attach ya'huantenanet. ¹³ Ñaña ñerra'm esempo sochatse'tenyetpa' yañapa' chach yamo'tstanet cohuen. Ñaña ama't teme'ttsen entenyet atet ñerra'mrrate' es ahuaapore'taret, ñeñt ama es sherbetso ama't mamesha arr patsro.

¹⁴ Napa' ama añe cpaye' nequellquënnaso añ ñoñets attoch o'ch nepencatas, añe copña nequellquënnas attoch noctape'chatterres e'ñe cohuen atet ñerra'm e'ñe nechemeres ñeñt nanac nemuerara. ¹⁵ Na po'ño chpa' atet nentenes ñerra'mrrate' e'ñe nechemereshas. Tarro'mar ahuaña allempo neserrpare'tatoses cohuen ñoñets ñeñt Yomporeshotpa' o' name'ñatasa Cristo Jesús, ñeñtpa' atet ñerra'm cho nechemere'tensa Cristocop. Ñeñto'marña te'pa' notenes, ama't eñall shonte' acheñ ñeñtcha' soctape'chatterre' ñeñt cohuentetsa Cristocop, tarraña e'ñe patrpa sompor sepen ñeñt ñanom same'ñate', ñeñtpa' atet ñerra'm na. ¹⁶ Ñeñto'marña napa' notenes: Atet sentenen atet nepena na e'ñe cohuen, sapa'cho'ña atetcha' sepa saña.

¹⁷ Ñeñto'marña nemñonas masheñ Timoteo; ñapa'cho'ña nechemer nepeñ. Ñapa' nanac nemorrenteña, ñapa' chocma ame'ñenana Yepartseshar. Ñapa' ñach seyerpate' Cristo pocta'ña ñeñtara cotapñats neychatyes erracmañen errate' pame'ñeño tet

apchenet Yomporecop. ¹⁸ Patanta'ttsospa' nanac sommo'chena atfo es señotyen. Sapa' čha't sotenapañ ñato' napa' amach nečhapoña sesho. ¹⁹ Tarraña po'ñočhcha' nečhap sesho ñerra'm Yomporcha' muenats. Ama't tayecmapa' pocte' o'ch ahuen ñerra'm ña muenats. EsemPOCH nečherrerra' allemPOCHña neñotos ñeñt' ommo'chetsa, ñato' po'ñočhte' ahuamencatet Yomporecop, amapa' ñato' attate' ommo'chenet. ²⁰ Amaña e'ñe ñapfa yeserrpare'teñoŷ yorrtateññañeña Yompor po'cohuenña atfoch atarr ayochreshattena ña; po'huamencote'nachña yorrtateññañ po'cohuenña. ²¹ Ñehua, te'pa' o'ch na'p'to'tas: ¿Errořena't semnen ñeñt'cha' atet neřoses allemPOCH nečhap sesho? Ñato' o'ch necoñchatoses, ñato' o'ch soctape'cherr cohuen tayecma atfoch esemPOCH nečhappa' amach eñalle atfoch o'ch necoñchatoses. AllemPOpa' ñato' ellochña čhach nemuerossa e'ñe cohuen.

5

Atfo Pablopa' ama pocteye' entano atfo puesheñarr corinto'marnesha' orrtatan ñeñt' ama pocteyaye tarraña pamo'tsesha'ñapa' ama erroteye' oteñeto

¹ Ñehua, te'pa' o'ch notas po'poñ. Tarro'mar atet otyenet, po'ñočh eñallo' sesho puesheñarr yacma ahua' yorerran pachoretsore'. Ñeñt'pa' nanac ochña'teñets atet, tarro'mar ama't ñeñt' ama ame'ñetsopa' ama pocteye' entenetoña atet. ² Tarraña sapa' čhocmo' cohuen senteñ ñeñt' atet sepena. Eso'mare'tña ama čhoye'ña llecatenso. Tarro'mar ñeñt' ochña'tets atetpa' amach allo'na senteñe atfoch o'ch allo'na separrocmatnen epas. ³⁻⁴ Ama't napa' ama allo'tsenno parro, tarraña e'ñe neyerpueñořespa' allo'tseney parro. Ama't ama allo'tsennopa' napa' o'ch notas necartoř ñeñt' pocte' nenten na, atfecma ñerra'm allo'tseney parro. Napa' o' neñočh ñeñt'cha' atet sepe' ñeñt' ochña'tets atet. O'ch notas ñeñt'cha' atet sepe': O'ch sapčha allohuenes e'ñe same'ñeñoř Yepartseshar Jesús; napa'čo'ña e'ñe neyerpueñořespa' allo'tseneycha' parro. Allochñapa' e'ñe Yepartseshar Jesús po'huamencořpa' ⁵ o'ch sepoñ ñeñt' yacmar o'ch sapuer oneñeř atfoch a'coñchatoñ po'chets. Allochñapa' puecamquẽñpa' queshperrach esempohuañencha' huerra Yepartseshar Jesús.

⁶ O'ch alla noterrser: Sapa' ama't sommo'chenañ atfo e'ñe cohuenare' es sepeneñpa' tarraña ñeñt'pa' ama pocteyaye, tarro'mar atfa e'ñe semnateñ ačeñ o'ch allo'na ochña'tnen. Ama't señoteñe ñerra'm allo'na yemnatneñ o'ch ochña't ama't e'ñe puesheñarrořapa' tsapařonetpa' o'ch pet allohuenet atet. Ñato' o'ch netma'ntacha atet: "Ñerra'm yena' coñe't chase' allempo yeyečcaten pan, ama't e'ñe coñe'ta yena'pa' o'ch epa'hua ora, atfoch e'ñe rropa'ptatuan ora pan." ⁷ Ñeñto'marña o' notas o'ch sa'ypo'ñerr ñeñt' ahuař soctapña ñeñt' nanac sosey. Añcha'ña o'ch setserrataterr soctapña. Tarro'mar po'ñočh etserra o' yečcaterres Yompor. O'ch netma'ntacha atet pete't ahuař allemPO o'ch čherr pascuapo čhocmach huapore'tuet allohuen pan ñeñt' a'chareř. O'ch yečcatet etserra pan ñeñt' ama a'chareřeyaye. Ñaña pascuapopa' čhocmach muetsete't carrnerotoll, tarraña te'pa' Cristoña o' amtsareřta yocop. ⁸ Ñaña ahuař pascuapo añ coshatahuate't pan ñeñt' ama a'chareřeyaye tarraña te'pa' añcha'ña yocshaterre' atfoch o'ch ya'ypo'ña'huerr ñeñt' ahuař yocřapña ñeñt' allo yo'chña'tare'te't ñaña ñeñt' nanac sosey Yomporecop. Añcha'ña o'ch yocřape'cherr etserra ñeñt' e'ñe cohuenare' cořapñats Yomporecop ñeñt'ara cořapñats ñeñt' e'ñe po'ñočh cohuen.

⁹⁻¹⁰ Te'pa' o'ch notas po'poñ. Ahuaña po'poñ necartořpa' atet notuas: Amach seyemtatscho ñeñt' cheta'yene' coyanesha' amach pueřaporeyaye. Ñehua, allemPO notas necartořpa' añecop noten ñeñt' ame'ñetsa tarro'mar ñerra'm attera cheta'yenan coyanesha', amach seyemtatsche ačeñ ñeñt' atet petsa. Tarraña ama añecpaye' atet noteno ñeñt' ama ame'ñetso ñeñt' atet petsapa' amach seyemtatsche. Tarro'mar añe patsropa' čhocmach

yeyemcha ama't ñeñt ama ame'ñetso, atet ñerra'm ñeñt cheta'yene' coyanesha' ñeñt ama puetaporeyaye, ñaña atet ñerra'm ñeñt atarr es ye'chapretetsa, amapa' ñaña eñet, ñaña ñeñt ma'yochenaya ayeçhcataret. Ñerra'm ama yeyemtantetopa' amate' erroteno yocroña aña patsro. ¹¹ Añña notenes amach seyemtatsche ñeñt otets ame'ñenano' Cristo tarraña ñeñt attera cheta'yene' coyanesha' ñeñt ama puetaporeyaye, amapa' ñeñt attera es ye'chapretetsa, amapa' ñeñt attera ma'yochenaya ayeçhcataret, amapa' ñeñt attera sasare'tets, amapa' ñeñt attera posa'tarets, amapa' ñeñt attera etyets. Ñeñt atet pa'yetsapa' amach seyematstero, ñaña ama't attapa' amach serrallme'cherro epas. ¹² Ñehua, añecop atet o'notuas, tarro'mar yocoppa' ama pocteyaye o'ch yotteñe'cheñ ñeñt ama ame'ñetso. Yocoppa' añña e'ñe pocte' o'ch yotteñe'cheñ ñeñt pame'ñeñotet atterach es pantenet. ¹³ Yomporpa' ñachña otteñe'cherre' ñeñt ama ame'ñetso. Sapa' aña poctetsa socop sehuapore'ch ñeñt atterach sosya'tsañach orrtatyenet.

6

Atto ama pocteyaye o'ch yetmantanna'ta

¹ Te'pa' o'ch noterrser po'poñ. Ñaña o' ne'mare'tas atto sapa' çhocmo' setmantannena ñerra'm esempo errot sepannena, ñaña ama't ñeñteso' pueyochresha' o' perrsoñ Parets. Eso'mare't çhocma soteña añcha'taret ñeñt ama ame'ñetso o'ch a'poctatonas ñeñt atto se'moñe'tannena. Socoppa' añña pocte' o'ch soch puesheñarr ñeñt e'ñe parrocma same'ñena ñetcha'ña a'poctate' ñeñt atet sepannena. ² Ama't señoñe ya ñeñtey o' pueyochresha' perrey Paretspa' yach añcha'tarettertsa allohuen acheñeneshacop arr patsro esempohuañen. Ñehua, ñerra'm po'ñoçh yeñoñeñ o'ch ya'mcha'taretterra allohuen acheñeneshacop arr patsro esempohuañenpa' eso'mare'tña ama señoñeñe o'ch sa'poctat ñoñets e'ñe sañeña ñeñt ama torrapahuoyaye. ³ Ñaña ama't señoñeñe esempohuañenpa' yach añcha'tarettertsa ama't Yompor po'millañoñenasharecop. Ñeño'marña te'pa' notenes e'ñe pocte' o'ch ya'poctatanna'ta ya yeñoñ ñeñt atet yeyçhena te' arr. ⁴ Ñerra'm esempo esocop setmantannenapa' eso'mare'tña o'ch sene' puesheñarr ñeñt ama cohuenaye' enteno ñeñt ame'ñetsa, ñach a'poctate' señoñ socop. ⁵ E'ñe nepencna'ntateñoñes sapa' ñeño'marña atet notenes: Seshopa' ¿ama'tña eñalleña ama't puesheñarra ñeñt ame'ñetsa ñeñt eñotene' o'ch a'poctatan ñoñets? Ñeñt eñotene'pa' e'ñe pocte' ñach a'poctatene' señoñ ñeñtes parro same'ñena. ⁶ Tarraña te'pa' ama atteye' sepeno. Çhocmo' setmantannena ama't ñeñteso' parro same'ñenañ. Sapa' ahuo'chçho' ahues tomantanna'ttsa a'yo allo'tsen acheñ ñeñt ama ame'ñetso, ñapa' ahuo'chçho' a'poctatonas señoñ socop.

⁷ Tarraña ñeñtpa' ama pocteyaye ama't mamesha o'ch setmantannena. Tarro'mar ñerra'm çhocma yetmantannenapa' ñeñtpa' ama aye' yepeno atet muenen Yompor. Añña ñerra'm esempo errot ponas po'psheñeñpa' eso'mare'tña amaña alla sa'huantannenoña ñeñt atto errot es sepanna'tyena. Ñaña ñerra'm esempo es puerratampensetpa' eso'mare'tña amaña alla sa'huantenaneto. Añ poctetsa o'ch alla ya'huantenanet alla. ⁸ Tarraña sañapa' ama atteye'ña sepeno. Añña sapa' çhocmo' errot sepannena, ñaña çhocmo' es seprratamñpsannena ama't e'ñe sagattsa ñeñtes ame'ñetsañ.

⁹ Ama't señoñeñeña ñeñt ama cohuen es petsopa' amach es o'paterroña all añcha'tarettena Yompor. Amach semnatatsche po'psheñeñ o'ch atta shecare'tas. Po'ñoçh atet notenes, ñeñt cañoresha'tetspa' amach es o'paterro all añcha'tarettena Yompor. Ñaña ñeñt po'yomporer pa'yene' ayeçhcateretpa' ñetpa'çho'ña amach es o'patataretterretoña all añcha'tarettena Yompor, ñaña ama't ñeñt apretets taporets, ñaña yacmanesha' ñeñt agapanetsa e'ñe ñagattset. ¹⁰ Allo'tpa' ñaña ñeñt etyets ñaña

ñeñt atarr es ye'chapretyetsa, ñaña ñeñt posa'tare'tyets, ñeñt atet pa'yetsapa' amach es o'patataretterreto all amcha'tarettena Yompor. Allotpa' ñaña ñeñt achmare'tets ñaña ñeñt puerratanpesyets ñetpa'cho'ña amach es o'patataretterreto all amcha'tarettena Yompor. ¹¹ Sapa'cho'ña puesheña'ttsos attecma sepe't samã ahuaña. Tarraña te'pa' o' e'shohuaretterra so'chñar, attoña o' sa'cohuentataretterra Partsocop. E'ñe seyemteñoñ Yepartseshar Jesucristo te'ña Pomporpa' o' pocte' enterres. Ñaña e'ñe puechorreñoñes Yompor Puecamquëñpa' o' pocte' enterres Yompor.

Añ pocte' o'ch e'ñe yecuen cohuen yechets tarro'mar ñeñtara yechetspa' po'chets peñ ñaña Cristo

¹² Te'pa' o'ch noterrser po'poñ. Ñehua, napa' neñotenes puesheña'ttsospa' atet sotatse'tyen, "e'ño' pocte' ye'pa'yes ama't erra'tsente' yemnen." Ñehua, yapa' yeñoteñ Yompor po'ñoñpa' ama't ama atet otenyeñe amach es ye'pa'yesatsto, ñeñto'marña "e'ñe pocten allohuenpa' o'ch es ye'pa'yeneñ." Tarraña ama't e'ñe pocten o'ch atet es ye'pa'yeneñ allohuenpa' tarraña ñerra'm ñeñtpa' ama añecpayaye alloch yeyenpueñ yamo'ts attoch e'ñe huomenc ye'panna yeyocher Yomporecoppa' ñehua, ñeñtepñapa' amach atet ye'patsto. Ñaña ama't pocten allohuenpa' o'ch es ye'pa'yespa', tarraña ama pocteyaye o'ch nanac es yayomatse'tyesa tarro'mar ñerra'm es nanac yayomenapa' ñeññaña pomnaren pene'ña yechets. ¹³ Ñaña neñotenes puesheña'ttsospa' atet sotatse'tyen, e'ño' pocte' senten o'ch señmatat sechets e'ñe sa secañoresha'teñoñ tarro'mar ñeñtecpo' yechquëñaña sechets o'ch atet se'pateñ. Ñeñto'marña atet setma'ntatenaña sechets ñerra'mrate' allempo sachporrena choch serra' serrar attochña e'ñe señmatat sat e'ñe ora sechtsohuen tarro'mar satpa' ñeñtecpo' yechquëña. Tarraña te' napa' o'ch notas, ama't pocten o'ch yeñmatateneñ ya't arr patsropa' chapcha' esempohuañen allempopa' o'huañcha' yemna' ya't ñaña yerrar, tarro'mar atet ne' Yompor. Tarraña ama't pocten o'ch yeñmatateneñ ya'tpa' tarraña ama pocteyaye o'ch e'ñe yeñmataten yechets yecañoresha'teñoñ tarro'mar ama añecpaye' aye'chcatareteña yechets attoch yecañoresha'ten. Yechetspa' añecopña aye'chcataret attoch yetorra'yesa Yepartsesharecop. Ñaña ñapa' ñach yecuanmpene'ña yechets. ¹⁴ Ñeñto'mar Yomporpa' o' tantaterran Puechemer ñeñt Yepartseshar yepen ya. Ñeñto'marña yeñoteñ yapa'cho'ña esempohuañenpa' tantaterrnaycha' yamã yechets. E'ñe po'huamenco'tpa' tantatuerreycha'.

¹⁵ Ama't señoñeña e'ñe yeparrocmateñoñ Cristopa' ñeñt ya yechetspa' po'ño'chpa' ñeñtara po'chets pen ñaña Cristo. Ñeñto'marña notenes, atto ñeñt po'chets pen Cristo ñeñtara ya yechetspa' eso'mare'tña e'ñe pocte' sentenña e'ñe ya yechtso'tpa' o'ch yecañoresha'tach Cristo. Amaca'ye pocteyaye o'ch yetsetach Cristo po'chets epuet yecañoresha'. ¹⁶ Ñehua, ama't señoñeña ñerra'm esempo yo'chña't epay ottatsña'tpa' epsheño'marey o'ch e'ñe yeparrocmatat yechtso. Po'ño'ch atet enteney Yompor atet oteney po'ño'ñoñ ñeñt anuaret ahua'toteñ, añmapa' ñeñt atet oten: "ñeñt epsheño'maretpa' e'ñech patrã po'chets penet." ¹⁷ Tarro'mar e'ñe yeparrocmateñoñ Yepartsesharpa' epsheño'mareypa' e'ñech patrã yoc'tape'chen yeyochro ñeñt yecamquëñecop.

¹⁸ Ñeñto'marña notenes añ pocte' o'ch sa'ypo'ñer cañoresha'teñets. Po'poñe'chno ñeñt ye'pa'yen sosey'pa' ñeñtpa' ama yechtsoye' ya'sosyateno. Tarraña añña cañoresha'teñetspa' ñeñtpa' e'ñe ya yechets ya'sosyateno. ¹⁹ Ama't señoñeña ye'narpa' ñeñtara pa'paquëll pen Parets Puecamquëñ ñeñt chorratenya Yompor. Ñeñto'mar yeñoteñ yechetspa' ama yoyaye, ñeñtpa' Yomporo tarro'mar ²⁰ ñapa' ahuo't rañterrya. Atto rañterryapa' nanac muerochta Puechemer attoch tsa'tuerrnaya yo'chñar. Ñeñto'marña notenes, ama't atto yocrrena yechtso'tpa' Yomporepa'chña yecohuentaten e'ñe yecamquëñohuen tarro'mar ñeñt epo'marpa' Yomporo.

7

Atetcha' yeḡa ñerra'm yemneñ o'ch yesna'ta

¹ Te'pa' o'ch neserrpare'tatas ñeñt atet sa'ḡto'ten ahuaña secartot. Ahuo't sa'ḡto'ten pocte'te' o'ch yesna'ta. Ñehua, ñanom o'ch notas atet, e'ñe poctetñ amate' yeyoratsche coy- anesha' ñeñtcha' yetapor yeḡa'. ² Tarraña ellopa' añ pocte' ñaña allohueney yacmane- shay o'ch yeyore puesheñarr coyanesha' ñeñtcha' yetapor yeḡa'. Coyanesha'pa'cho'ña pocte' ñaña echanepa' e'ñe ña puerrollar. O' notas atet tarro'mar ñerra'm ama cho seyoro puesheñarr ñeñtcha' setapor seḡa'pa' attate' allo'na secañoresha'tnen. ³ E'ñe pocte' epas setaporpa' sagapanna'tepa'ch. ⁴ Tarro'mar coyanesha' ñeñt arrollareḡpa' ama e'ñe ñapḡayaye po'chets, ñeñtḡpa' puerrollaro'nach. Ñaña yacmapa'cho'ña amach ñapḡayaye po'chets, ñeñtḡpa' puetaporo'nach. ⁵ E'ñe pocte' chocmach sagapannena. Tarraña ñerra'm erroteno esempo pocte' senteñ epsheño'mares o'ch sa'pocstat ñoñets e'ñe sañeña amach sagapanna'terro allponmat attoch añach sema'yochra ma'yochatsa. Tarraña ñerra'm o' met allponmat allempo o' sa'pocstatuepa' pocte' o'ch alla sagapan- nerra. Tarro'mar ñerra'm ama ahuen sagapannerropa' chate' oneñeḡpa' topatas amate' sa'huanto.

⁶ Tarraña ama notenso ñeñtch paterr pocetsa o'ch yesna'ta, añpa' atḡa notenes ñerra'm semneñ o'ch sesna'tapa' pocte' sena'tepa'. ⁷ Tarraña napa' e'ñe pocte' nenteñ ñerra'm allohuenes atteseñ ñerra'm na.* (Tarro'mar Yomporpa' ahuo't apuen attoch amach nemno coyanesha'.) Tarraña allohueneypa' ama attecmayayye. Tarro'mar Yomporpa' ahuo't apa'yeseḡ ellocma atetcha' yesherbe' e'ñe cohuen.

⁸ Ñaña o'ch notas, ñeñtes ama ataporetēsoḡpa' e'ñe poctetñ amate' sesna'tatsto. Ñaña ñeñtes rretorraneshaspa' e'ñe poctetñ ñaña amate' sesome'terro. E'ñe poctetñ o'te' soccrañ e'ñe atḡa atet nepena na. ⁹ Tarraña ama't notensoñ atetpa' ñerra'm ama erroteno sa'huantopa' e'ñe pocte' sesna'tepa'. Ama pocteyaye o'ch atḡa nanac yemneñ coyanesha'. Añña pocte' yesna'tepa'. Tarraña añña nanac cohuen ñaña amach yesna'to.

¹⁰ Te'pa' o'ch notas ñeñtes arrollaretes ñeñtcha' atet seḡa. Ñehua, po'ño'ch ama naye' otetso, añña Yepartsesharña otets. Añ pocte' amach sesatstere serrollar. ¹¹ Tarraña ñerra'm eseshas serre' serrollarpa' añ pocte' amach sesome'tatsterro ello, amapa' o'ch alla samo'tstera serrollareshe'mañ. Ñaña o'ch notas samña ñeñtes ataporetēs, amach sesatstere setapor.

¹² Te'pa' o'ch notas ñeñt atet pocte' nenten na. Ama't Yepartsesharpa' ama otenñe ñeñt pocetsa añecop, tarraña napa' o'ch neñotatas ñeñt pocte' nenten na. Ñerra'm puesheñarr yacma ñeñt o' ame'ñerra ñeñt atapore'tañ, tarraña ñerra'm puetaporpa' ama ame'ñeno, añ pocte' amach satsterrano puetapor ñerra'm puetaporpa' ama mueno o'ch ahuer. ¹³ Attecma ñaña puesheñarr coyanesha' ñeñt o' ame'ñerra ñeñt arrollare'tañ, tarraña ñerra'm puerrollarpa' ama ame'ñeno, añña pocte' amach satsterrano puerrollar ñerra'm puerrollarpa' ama mueno o'ch ser. ¹⁴ Tarro'mar ñerra'm puetaporpa' ame'ñena, chocma eñall attoch o'ch ame'ñatana puerrollar. Attecma ñaña ñerra'm puesheñarr yacma ñeñt ame'ñetsa, chocma eñall attoch ame'ñatana ñaña puetapor. Ñaña ñerra'm sesannenapa' ñato' sechemereshapa' amach es eñoterro Partsocop. Tarraña ñerra'm ama sesannerropa' sacñeñarnesha'ñapa' o'ch so'patacha ñaña Parets. ¹⁵ Tarraña ñerra'm puesheñarr yacma ñeñt ama ame'ñetso, ñerra'm mueneñ o'ch serran puetapor ñeñt ame'ñetsa, ñehua, pocte' serepa'. Tarro'mar puetapor ñeñt ame'ñetsapa' ama es palltetso puerrollarecop. Ñaña Yomporpa' ama mueno ellopa' o'ch allo'na ye'moñe'tanna'tnena yerrollarecop. Attecma ñerra'm puesheñarr coyanesha' ñeñt ama ame'ñetso, ñerra'm mueneñ o'ch serran puerrollar ñeñt ame'ñetsa, ñehua, pocte' serepa'. ¹⁶ Atet notenes

* 7:7 Ñehua, Pabloḡpa' ama eñalle puetapor.

sesannerrepa' tarro'mar ñeñtes arrollaretespa' po'ñoçhpa' amach erroteno señoche ñato' sa'queshpachcha' serrollar, ñato' amate'. Ñaña ñeñtes ataporetespa' amach erroteno señoche ñato' sa'queshpachcha' setapor, ñato' amate'.

¹⁷ Ñeñto'mar te'pa' o'ch noterrser, erroteno'tseneste' ama't allempo errte' same'ñera Yepartsesharpa' atterasepa'ch. Ñaña atet muenatyeney Yomporpa' attepa'ch yepena puesheña'ttsoy. Ñeñtpa' attecmaç neyçhatyes ama't ñaña ora allohuen ñeñt pame'ñeñoçet apçha'yetsa allemeñ anetso'mar. ¹⁸ Atet ñaña ñerra'm puesheñarr yacma allempo errte' ame'ñerrtset, ñerra'm allempopa' o' atsorraretetuet atet yeche't judionesha'pa' te'pa' ama pallteno o'ch a'huañerran all tsorret ahuañ. Attecma ñaña po'psheñeñ allempo errte' ame'ñerrtset, ñerra'm ñetpa' ama atsorrareçeto, te'pa' ama pallteno o'ch atsorrareçtet atet yeçhena judionesha'. ¹⁹ Ama't ya'tsorrareçtatstapa' ñeñtpa' ama es sherbeno. Ñaña ama't ama ya'tsorrareçtatstopa' ñeñtpa'çho'ña ama es sherbeno. Añña nanac sherbets o'ch yeça ñeñt atet oteney Yompor. ²⁰ Ñeñtpa' o'ch alla noterrser, añ poçte', ama't erroteno'tseneste' allempo errte' same'ñerrapa' atterasepa'ch. ²¹ Ama't allempo errte' pame'ñerra, ama't añeçte' ñeñt ataruasatareç e'ñe attapa' e'ñe poçte', amach pellcatsto. Atterach petaruasen pepatronarecop, tarraña ñerra'm errotenoç o'ch pa'rroyaterra pepatronareshoçpa' e'ñeç poçte' a'rroyerrpetepa' allot taruasatenpet e'ñe atfa. ²² Ñato' o'ch netma'ntacha atet: Eñall puesheñarr yacma ñeñt ataruasatareç e'ñe atfa, tarraña o' çhap allempo agapan Yepartseshar ñeñtcha' Pamo'mte' perr. Allempopa' ama't attera taruasateñeñ ñeñt po'patronar pen arr patsopa' tarraña te'ña Cristopa' a'rroyatamper po'çhñar ñeñt nanac taruasataye't ahuaña. Te'pa' añcha'ña taruasaterre' Cristo ñeñt Yepartseshar yepen. Ñaña eñall puesheñarr yacma ñeñtñapa' cohueno'tsen ñeñt ama ataruasatareçeyaye. Ñapa'çho'ña o' çhap allempoch aguërran Yepartseshar Cristo ñeñtcha' Pamo'mte' perr. Te'ña Pamo'mte' Cristopa' ñachña taruasaterre' e'ñe cohuen ñeñt ahuañapa' ama ataruasatareç e'ñe atfa. ²³ Cristopa' o' rañterrya. Atto rañterryapa' nanac mueroçhta attoch tsa'tuerrnaya yo'çhñar. Ñeñto'marña notenes, amach acheña ñapueç samo'mte' sepatsto, añña e'ñe po'ñoçh Yamo'mte' yepen Cristo. ²⁴ Ñeñto'marña masheñneshacha' ñaña noçhaneshacha' o'ch noterrserr alla, ama't erroteno'tseneste' allempo errte' same'ñera Cristopa' poçte' atterasepa'ch. Tarraña Yomporepa'chña seyempue'.

²⁵ Te'pa' o'ch noterrserr po'poñ. Añpa' ñeñt atet sa'pçto'ten ahuaña ñato' poçto'te' ahuo'ch some'ta ñeñt shopsheshare'. Ñehua, napa' o'ch notas, Yepartsesharpa' ama otenyeñe ñeñtcha' atet yepe' shopshesharecop, tarraña napa' o'ch neñotatas ñeñt poçte' nenten e'ñe na, tarro'mar Yepartseshar puemuereñoçpa' ahuo't eñotañ pa'n attoch sapa' seyemuetna. ²⁶ Ñehua, ñanompá' o'ch notas: Ama't te'pa' çhocma huennaya shonte' esocmañen ñeñt echarr yentyen ñeñto'marña poçte' nenteñ amate' sesome'to, ñaña amate' sesna'to. Añña poçtetsa attate' yocrra. ²⁷ Tarraña ñerra'm o' seyore coyanesha'pa' e'ñe poçte'; te'pa' amach sesatstere. Atteña ñerra'm ama seyoreña' coyanesha'pa' poçte' ñaña; te'pa' amach seyoratsche. ²⁸ Tarraña ñerra'm esempo semne' o'ch sesna'tapa' e'ñe poçte'. Ñaña ñerra'm esempo coyanesha'pa' mueneñ o'ch some'ta, ñeñtpa'çho'ña e'ñe poçte', tarro'mar ñeñtpa' ama ochña'teñtsoyaye Yomporecop. Tarraña ñerra'm yacmapa' o'ch sena'ta, ñaña ñerra'm coyanesha'pa' o'ch some'ta ñaña, allempopa' o'ch echan shonte' ñeñtcha' llecatyese' attoch corret arr patsro. Ñeñto'marña notenes amach sesna'tatsto, coyanesha'pa'çho'ña amach some'tatsto, tarro'mar napa' ama nemno o'ch sechen shonte' ñeñtcha' sellcatyene'.

²⁹ Ñeñto'marña masheñneshacha' ñaña noçhaneshacha' nemneñ o'ch alla noterrser. Te'pa' ama atonaye' pallteno char attoch yetorrena Yomporecop. Ñeñto'marña o'ch notas ñeñtes o' setapore't, ama't o' setapore'tpa' añña poçtetsa e'ñe tayoteñ amach patrra

sellcatsto ñeñt setaporecpa. Añecpa'nachña setorrena Yomporecop. ³⁰ Ñaña ñerra'm esempo huaponasa llequëñetspa' amach ñeñtota yequeçpatsterro atto yetorrena Yomporecop. Ñaña ama't esempo es nanac yocshatene'pa' amach ñeñtota yepsatstere Yompor. Ñaña ñerra'm esempo yapa' esocmañen yechenpa' tarraña amach ñeñtota yepsatstere Yompor. ³¹ Ñaña ñerra'm esempo es yeþa'yen ñeñt patso'marecpapa' amach e'ñe ñeñta yocshatsto ñeñt patso'marecpa. Tarro'mar ñeñt atet yeychen añ patso'marpa' ñeñtpa' huañerrcha' esempo.

³² Ñeñto'marña notenes añechno, tarro'mar nemneñ sapa' amach eñalletatsto po'poñ ñeñtcha' nanac sellcate'. Atet pena yacma ñeñt ama ataporetepa' añach e'ñe llequëna ñeñt Yomporecop. E'ñech ma'yoçhrenana attoch coshatenan Yepartseshar. ³³ Tarraña yacmaña ñeñt ataporetepa' añach e'ñe llequëna ñeñt atto yocrrena añe patsro. Ñaña añach ma'yoçhrena attoch coshatenan puetapor. ³⁴ Ñeñto'marña amach errotenoñ patrra ma'yoçhreno ñeñt Yomporecop. Attecma pena ñaña coyanesha' ñeñt ama arrollarete. Añach ma'yoçhrena ñeñt Yomporecop. E'ñe po'chtsohuenpa' mueneñcha' o'ch a'rroya Partsocop. Ñaña ama't ora poctapñohuenpa' o'ch ma'yoçhrena Partsocop. Tarraña coyanesha' ñeñt arrollaretepa' añach lleca ñeñt atto yocrrena añe patsro, ñaña añach lleca attoch coshatan puerrollar.

³⁵ Ñeñt notenespa' ama añecpayaye attoch o'ch nompa'tas amach sesna'tatsto. Añecopña atet notenes attoch napa' neyenpas, attoch çhocma cohuenare' es sorratyen. Ñaña çhocmach socsheñsha'pa' o'ch sema'yoçhrena Yomporecop, amach eñalletatsto ñeñtcha' sepatene'.

³⁶ Te'pa' o'ch noterrser po'poñ: Ñerra'm eseshas echene' seseñ ñeñt o' po'natuena, ñaña ñerra'm pocte' senteñ o'ch some'tapa' ñehua, pocte' some'tepa'. E'ñe pocte' o'ch semnach some'tepa' tarro'mar ñeñtpa' ama ochña'teñtsoyaye Yomporecop. ³⁷ Tarraña ñerra'm erra'tsenotespa' sechen seseñ, ñaña ñerra'm ama semno o'ch some'ta, ñaña ñerra'm seseña' e'ñe pocte' enteñ amach some'tatstopa' ñehua, pocte' ñaña amach sesome'tatatsche. Ñerra'm po'ñoçh señoñteñ seyoçhro añpa' e'ñe pocte' atet, ñehua, amach sesome'tatatsche. Elloña ñeñtpa' nanac cohuen. ³⁸ Ñeñto'marña te'pa' o' notas: Ñerra'm erra'tsenotes muenate' seseñ o'ch some'tapa' ñeñtpa' pocte'. Tarraña ñerra'm erra'tsenotes ama some'tataye seseña'pa' elloña ñeñtpa' nanac cohuen.

³⁹ Te'pa' o'ch noterrser po'poñ. Ama't esempapa' ama pocteyaye coyanesha'pa' o'ch serran puerrollar. Ama't errponmatcha' correna puerrollarpa' amach satstere. Tarraña ñerra'm esempo rroma puerrollar, allempopa' e'ñe pocte' o'ch some'terra ello, tarraña ñerra'm erra'tsencha' muenerr ñeñtcha' yorerre' ñeñtpa' ame'ñenach ñaña. ⁴⁰ Tarraña ama't o' notuaseñ e'ñe pocte' o'ch some'terra rretornanesha', elloña napa' noctape'cheñ ñerra'm o'ch some'terra, ñato' allempopa' cosherrañcha' mame'. Tarraña ñerra'm amach some'terro, napa' noctape'cheñ ñato' allempopa' ellochña nanaccha' cosherra ñapueñ. Napa' noten Yompor Puecamquënoñ neñoten atet.

8

Arrpa' all cotape'chatan corinto'marnesha' añecop ñeñt amtsaret ayeçcataretecop

¹ Te'pa' o'ch neserrpare'tatas po'poñ ñeñt atet sa'p'to'tenen ahuaña, ñeñtpa' atet sotenen: Ñeñtey ame'ñenaya Cristopa' ñato' ¿pocto'te' o'ch serra' po'chets ñeñt muetsenet ayeçcataretecop? Napa' neñotenes puesheña'ttsospa' sotyen sapa' señoñeno' ñeñt cohuentetsa Yomporecop. Ñehua, po'ñoçh allohueneypa' yeñoñteñ ñeñt cohuentetsa Yomporecop. Tarraña ñerra'm esempo yoten: "Napa' e'ñe neñotuen ñeñt cohuentetsa Yomporecop", ñerra'm e'ñe yommo'cheñoña yotenpa' ñeñtpa' e'ñech orrena atet yoten. Yommo'cheñoña'pa' amach çhoye' yeyenpanno attoch huomenc yeþa'

yeyocher Yomporecop. Yemorrentanna'teñoŧpa' čhochña yeyenpanna'ta. ² Tarro'mar ñerra'm esempopa' čhach yotenapañ o'te' e'ñe es yeñotua poctacma, tarraña yeñoteñ po'ñočpa' čhocma yepalltena o'ch e'ñe yeñotua poctacma ñeñŧ cohuentetsa. ³ Tarraña e'ñe yemorrenteñoŧ Yomporpa' ñapa' eñoteny yapa'čo'ña yeñoteñ ñeñŧ cohuentetsa ñocop.

⁴ Te'pa' o' notuas atet te'ñapa' o'ch neserrpare'tatas ñeñŧ cohuentetsa Yomporecop. Ñeñŧey ame'ñenaya Cristopa' pocte'te' o'ch yerren po'chets ñeñŧ amtsaret ayečcataretēcop, ñato' amate' pocteyaye. Ñehua, yeñoteñ ñeñŧ ayečcataretē ñeñŧ toma'ntatenet ñetpa' po'ñočpa' ama eñalle Yompor ñeñŧ atet. Yapa' yeñoteñ Yomporpa' e'ñe patrra. ⁵ Po'ñočpa' ñetpa' pa'namen po'yomporer pa'yenet ama't atet ñerra'm ñeñŧ ento'tsa'yen, ñaña ama't ñeñŧ aña patsro'tsa'yen. Ñetpa' pa'namen po'yomporer pa'yenet, ñaña pa'namen po'partseshar pa'yenet. ⁶ Tarraña ya yocoppa' yeñoteñ Yompor Apapa' e'ñe patrra, ñeñŧ Yompor ñeñŧ yečcatue' allohuen ñeñŧ yentyen, ñaña yapa' ahuo't yečcatey e'ñe ñocop. Ñaña yeñoteñ Yepartsesharpa' e'ñe patrra ñeñŧara Jesucristo ñeñŧ yečcate' allohuen ñeñŧ yentyen. Te' yapa'čo'ña apueney atto yocrrena.

⁷ Tarraña acheñenesha'pa' ama allohuenacmaye' yoctape'chueno atet. Ñeñŧo'marña puesheña'tetspa' ahuaŧoteñ yečhete't o'ch nenet es po'chets ayečcataretēcop. Ñeñŧo'marña ñerra'm esempo rrenet ñeñŧ po'chets ñeñŧ muetsenet ayečcataretēcoppa' e'ñech atta rreñet po'tomña. E'ñe po'tomñapa' otenet ñato' ama pocteyaye o'ch yerren po'chets ñeñŧ nenet ayečcataretēcop. Ñetpa' atta enteñet ama arrapahuoyaye ñeñŧ Yomporecop. Tarro'mar ama čhenaneto pueyočhro atto ñeñŧ e'ñe poctetsa Yomporecop. ⁸ Ñehua, yapa' yeñoteñ ñeñŧ yerrenpa' ama añecpayaye attoch e'ñe cohuen entey Yompor. Ama't yerreñ, ñaña ama't ama yerreñe ñehua, e'ñe attecma enteny Yompor. ⁹ Tarraña e'ñech señoŧa: E'ñech acoŧa es seŧa'yen. Ama't yapa' yeñoteñ Yomporpa' e'ñe pocte' enteñeñ o'ch yerren po'chets ñeñŧ anaret ayečcataretēcoppa' tarraña ñato' yerreñoŧ añečhnopa' čhate' alla ya'puerratatuer ñeñŧ ama tama huomenc penaye pueyočher Yomporecop. ¹⁰ Tarro'mar ñato' sapa' atette' sepena. Ñato' o'ch ahuenes puerahuo allo'tsen ayečcataretē, allñapa' ñato' o'chčo' serros po'chets ñeñŧ amtsaret ayečcataretēcop. Ñaña ñato' sapa' e'ñech socsheñesha' serreñ tarro'mar sapa' señoŧeñ ñeñŧpa' ama esoye' enteñe Yompor. Tarraña ñato' e'ñe allempoña serreñpa' ñato' o'ch entas po'psheñeñ ñeñŧ parro same'ñena. Tarraña ñapa' ñato' ama pocteye' enteñe o'ch yerren po'chets ñeñŧ amtsaret ayečcataretēcop. Ñato' o'ch peye'chateña ñaña pemo'nasheñ o'ch rreñ ñaña ñato' ama't ñapa' ama pocteye' enteñe. ¹¹ Tarraña ñerra'm ñapa' o'ch rrenan po'chets ñeñŧ anaret ayečcataretēcoppa' ñapa' o'ch enteñ atetpa' ochña'teñets Yomporecop. Atteñapa' ñato' o'ch alla puesuerran Yompor. Ñeñŧo'marña notenes, ñato' e'ñe yeñoteñoŧ ñeñŧ cohuentetsa Yomporecoppa' o'te' ya'chencatach yemo'nasheñ ñeñŧecop Jesúsapa' rroma ñaña. ¹² Ñerra'm esempo atet yeŧapa' čhate' yeyora yo'chñar yemo'nasheñecop tarro'mar o' yeye'chatera o'ch perra ñeñŧ ama pocteye' enteno ña. Ñehua, ñerra'm esempo yeyora yo'chñar yemo'nasheñecoppa' e'ñe ñoŧpa' o'ch yo'chña't ñaña Cristocop. ¹³ Ñeñŧo'marña te'pa' o'ch notas atet, ñerra'm esempo yerren po'chets ñeñŧ anaret ayečcataretēcop, ñerra'm yerreñoŧpa' ñato' ya'puerratater yemo'nasheñpa' e'ñe poctey amach yerratsto ñeñŧ po'chets. Ñeñŧo'marña napa' ama't esempapa' amach nerratsto ñeñŧ po'chets te'ta' neyoren no'chñar nemo'nasheñecop attočha' na'puerratater.

9

Atto e'ñe poctey ñeñŧ torretsa Yomporecoppa' o'ch es yesherbeñ

1 Te'pa' o'ch neñotatas po'poñ ñeñt atet nepena na. Napa' e'ñe pocten o'ch ne'pa'y'es e'ñe erra'tsencha' nemnen na tarro'mar sapa' señotenen atto napa' ama eñalle ñeñt neyechare'tenaya na, tarro'mar napa' allsensare'ten Yomporeshot. Ñaña señotenen napa' o' orrterrana Yepartseshar Jesús, ñaña señotenen ña ahua'mencat nepene' tarro'mar e'ñe na ne'torreñoñ ñocop attoña same'ñerra samã. 2 Ñehua, ama't po'potantaña' otyenetañ napa' amo' allsensare'teyayno tarraña sapa' señotenen po'ño'ch napa' allsensare'tenca'ye tarro'mar napa' ñeñten same'ñaterraya samã. Atto sapa' e'ñe cohuen same'ñera Yompor, attoña señotateña allohuen po'ño'ch napa' Yomporeshot allsensare'ten. Ñeñto'marña e'ñe pocten o'ch ne'pa'y'es e'ñe erra'tsencha' nemnen na ñeñten allsensare'ten, tarraña ñeñtpa' ama atteye' nepeno tarro'mar napa' ama nemno e'ñe atet nepeño' o'ch nepatare't cohuen ñoñets alloch Cristopa' a'queshpaterres.

3 Ñeñto'marña te'pa' o'ch notas ñeñtcha' atet nanapanet ñerra'm esempo a'p'to'tare'tnet, pocto'te' ñeñt atet ne'pa'yena. 4 Po'ño'chpa' e'ñe pocten nocop o'ch serratallme'chennoñ allempo neserrpare'tatenes. Ñaña pocten sapa' o'ch sapnoñ ñeñtcha' norryen. 5 Ñaña nocop e'ñe pocten ñerra'm eñalleñ ne'tapor o'ch nanemñ ñeñt parro yame'ñena all nechopeñe'chyen. Atet pena po'potantañ allsensare'tnesha', ñaña atet pena Yepartseshar pa'mo' nasheñnesha', ñaña ñeñt atet pena Pedro. 6 Ñaña sapa' ñato' chate' soten e'ñe pocte' e'ñe epsheño'marey epan masheñ Bernabé yaptach yetaruasen attoch yechen ñeñtcha' yerren. Po'ño'chpa' po'potantañe'chno ñeñt torra'yetsa Yomporecoppa' ñetñapa' arratare'ttenet e'ñe atta. 7 Po'ño'chpa' ñeñt atet pena solltarnesha'pa' ñetpa' e'ñe atta apare'ttenet ñeñt palltenet, amach es tsa'teneto. Ñaña atet pena ñeñt nare'tene' narmets. Ñetpa' e'ñe puenare'teño'tpa' chocmach tsumueññañet puenaremñ pue'mer. Ñaña atet pena ñeñt po'taruas pene' o'ch cohua'mpenan carrnero ñaña cabra. Ñetñapa' chocmach orreññañet puemomos. 8 Sapa' chate' sotenapañ ñeñt atet notenes, ñeñtpa' e'ñete' nañeña noctapño' atet notyenes ñeñt atet yoctape'chyen ya allohueney ñeñtey arromña'tey. Tarraña ñeñtpa' amaca'ye atteyaye tarro'mar ñeñtpa' ñeñtara ñoñets ñeñt atet anaret ahua'toteñ. 9 Tarro'mar Moisés po'ñoñ ñeñt atet anuaret ahua'toteñ, ñeñtpa' atet oten: "Ñerra'm esempo satmama'tateñ huaquesh attoch es serrocllome'chach pa'tcot allempopa' amach sempanma'tatsche attoch ñapa'cho' rranepa'ña ñeñt serrocllome'chateñ." Ñehua, yapa' yeñoteñ Yomporpa' ama e'ñe ñap'tecpa huacshcop eñose'te. 10 Po'ño'chpa' yocpa'ñaña eñose't ñeñtey torra'yetsa ñocop. Tarro'mar e'ñe puemorrenteño'tey yapa' Yomporpa' e'ñe pocte' enteñ arratare'teycha' yaña all yetorra'yena ñocop. O'ch netma'ntacha atet: Ñerra'm cho yetamuenpa' chocmach yeyemtena ñeñtcha' yenare't all, o'ch choppa' ñeñtcha'ña yetsomuerr. Ñaña ñerra'm cho es yerrocllome'chenpa' chocmach yeyemtena ñeñt yerrocllome'chen, tarro'mar yapa' yeñoteñ chocmach apuerryet allpon. 11 Ñehua, o'ch alla netma'ntatererr po'poñ. Allempo yeserrpare'tatenes Yompor po'ñoñ ñeñtpa' attecma ñerra'm cho yenare'ten narmets pue'llomer sesho. Ñeñt atet nare'teñetspa' sherben attoch e'ñe yocrra Yomporecop. Ñehua, ñerra'm yapa' o' yeñotatas ñeñt sherbets errponohuañen yecamquene'coppa' ama'tña pocte' senteñeña sapa' o'ch sapueneñ ama't coñe'ta ñeñt yepalltena alloch yocrra aña patsro. 12 Po'ño'chpa' po'potantañe'chno ñeñt seserrpare'tatene', ñetpa' enamuenset o'ch sapanet ñeñt alloch correnet. Ñehua, ñeñtpa' e'ñe pocte'. Atto ñetpa' es enamuensetpa' elloña yocoppa'cho'ña e'ñe pocte' o'ch es yenamas yaña.

Tarraña ama't e'ñe pocten o'ch es yenamaseña' po'ño'chpa' ama't coñe'ta ama es yenamuenso. Chocma ya'huanteñ ñeñt echarr yenten yocop. Ama't e'ñe pocten o'ch es yenamuenespa' tarraña amaña es yenamuenso tarro'mar ñerra'm ama poct-

eye' señchepa' yeñoteñ amate' se'mñoto Yompor po'ñoñ ñeñt atet yeserrpare'tatenes. Yapa' ama yemno o'ch yepatare't cohuen ñoñets alloch Cristopa' a'queshpaterres. ¹³ Elloña sapa' señoteñ ñeñt torretsa Parets pa'paclopa' e'ñe allara Parets pa'paclopa' chocmach entenet puerrar. Ñaña añ cornesha' ñeñt muetsene' huaquesh amapa' carrnero Yomporecoppa' ñetpa'cho'ña e'ñe allotpa' rrenet ñeñt amtsaret Yomporecop. ¹⁴ Attecma ñaña Yepartsesharpa' nan po'ñoñ. Ñeñtpa' atet ot: Ñeñt serrpare'tene' cohuen ñoñets alloch sequeshpapa' e'ñe pocte' pueserrpare'teñoñ ñeñt e'mñotene'pa' pocte' o'ch apueñet ñeñt palltena alloch corra. ¹⁵ Ñehua, ama't e'ñe pocten o'ch sapuenoñ ñeñt nepalltenapa' tarraña napa' ama't ahua'tapa' ama es notase'te o'ch es sapuen. Ama't te'pa' ama ñeñtecpaye' nequellquennaso atet. Tarro'mar ama nemno o'ch huañ atto neserrpare'tatenes e'ñe atta. E'ñechña nocsheñsha' neserrpare'tatenes e'ñe atta. Ñerra'm o'ch huañ atto neserrpare'tatenes e'ñe attapa' añate' pocte' nenten o'ch nerroma. Tarro'mar napa' ama nemno ama't eseshapa' o'ch puerratañpsenña ñeñt allo e'ñe nocshena.

¹⁶ Ñaña e'ñe neserrpare'teñoñ cohuen ñoñets napa' amate' errotenoñ e'ñe atta nommo'cho, tarro'mar napa' e'ñe atet eyechareten. Ñerra'm ama atet neþopa' napa' nanacte' llequẽntso'tsenen. ¹⁷ Ñerra'm e'ñe na nemneññoña neserrpare'teneña' ñehua, pocten o'ch tsa'tenna Yompor attoch coshaterren. Tarraña ñerra'm atet otenen Yomporpa' ñeñtpa' ama ñañeña nemneññoñeye' neserrpare'teno. Po'ñoçhpa' allsen-sareten ñeñto'marña neserrpare'taterña acheñenesha'. ¹⁸ Ñeñt ellonet apuenen Yompor ñeñtcha' atarr nocshate' na, ñeñtpa' attot neserrpare'tatenes cohuen ñoñets e'ñe atta. Ama't e'ñe pocten o'ch setsa'tnapa' tarraña napa' ama nemnoña atet.

¹⁹ Ñaña ama't ama eñalle puesheñarr ñeñtcha' neyechayapa' po'ñoçhpa' añña nanac netorratenaya allohuen acheñenesha' tarro'mar na atet muenets. Ñaña tarro'mar netorrana ñocpuet attoch name'ñacha shonte' acheñenesha'. ²⁰ Ñaña allempo allo'tsenen parro epan namo'tsesha' judionesha'pa' napa' o'ch nepena atet yeçhenet ñet. Allochñapa' ñetpa' o'ch e'mñoterrnet; e'ñe pue'mñoteñoñetpa' ñato'rraña o'ch name'ñatera namo'tsesha' judionesha'. Ñerra'm esempo allo'tsenen parro epan ñeñt cotene' Moisés po'ñoñ ñeñt atet anaretpa' napa' ama'tcha' ama nocteno ñeñt atet cotape'chenet ñetpa' tarraña napa' amach nachmare'taneto ñeñt atet penet ñet, allochñapa' ñato' attotpa' o'ch name'ñatanet ñamet. ²¹ Ñaña ñerra'm allempo allo'tsenen parro epan ñeñt ama cotape'chenaye ñoñets ñeñt atet anaret Partsocop, napa'cho'ña o'ch nepena atet ñerra'mrrate' ama nocteno ñoñets ñeñt atet anaret Partsocop. Ñehua, po'ñoçhpa' nocteneñña ñeñt ñoñets ñeñt atet anaret Partsocop tarro'mar añcha'ña e'ñe nocten Cristo po'ñoñ. Atetcha' nepeñña ñeñt ama es cotape'chetso Partsocop allochñapa' attotcha' name'ñaterranet ñamet Cristo ama't ñeñt ama es cotape'cheno Partsocop ama't mamesha. ²² Ñaña ñerra'm esempo allo'tsenen parro epan ñeñt ama huomenc penaye pueyoçher Yomporecoppa' napa'cho'ña o'ch nepena atet ñerra'mrrate' ama huomencayaye ñaña neyoçher Yomporecop, allochñapa' attoch noctape'chach cohuen ñeñt ama huomenc penaye pueyoçher Yomporecop. Ñaña ama't erra'tsena acheñ errotencho' cotape'chenpa' napa'cho'ña allempo allo'tsenen parro epan atetcha' nepena ñaña atet pocte' entenet ñet, allochñapa' attoch ama't errotenette' attochña na'queshpateranetcha' ama't patanta'ttsa. ²³ Atetcha' nepena attoch name'ñatanet ñerra'm esempo neserrpare'tatanet cohuen ñoñets atto Cristopa' ñach ya'queshpaterre'. Attoch napa'cho'ña e'ñe name'ñeñoñ Cristopa' nocshapretanetcha' ñerra'm ame'ñeret ñamet Cristo.

²⁴ Te'pa' o'ch noterrser po'poñ, ñato' o'ch netma'ntacha atet. Ñehua, po'ñoçh sapa' señoteñ ñerra'm esempo o'ch eñoçhet esesha'te' nanac matetsapa' shonte'ch acheñ

matatsa. Allohuenetpa' mueneñetcha' o'ch meshe'tuet po'poñechno acheñ attoch ganet premio. Tarraña ama'tcha' shonte' matatsapa' eñallachña puesheñarr ñeñtcha' ganatuaya allohuen ñeñt parro matacha'tet. Ñeñto'marña te'pa' añ poctetsa o'ch yetorrena yamã e'ñe cohuen Yomporecop attoch yegana ñeñt o'patatenya ña. ²⁵ Ñaña yeñoteñ allohuen ñeñt po'taruas pene' johueñetspa' ñetpa' o'ch pohuanmuet ora ñeñt atet poctetsa attoch echet po'huamenc esheccha' ganet. Ñeñto'marña ñetpa' o'ch quechpa'huet ñeñt ayorampsañ yehuamenc. Ñeñtpa' añecop atet penet attoch ganet premio atet ñerra'm copa.* Ñehua, ñeñt atet penet ñet attoch ganet copa, ama't ñeñt copapa' ahuañaña, ñeñtepñapa' yapa' o'ch yetorra yamã Yomporecop attoch yegana ñeñt o'patatenya ñeñt ama ahuañaño. ²⁶ Atet pena ñeñt matetsapa' e'ñech pa'charr matena. Ñehua, napa'cho'ña e'ñech patrra nema'yo'chra Yomporecop. Atet ñaña ñerra'm esempo ye'chotna'tena, ñerra'm atfa ya'mtapechpa' amach errotenot yegano. Ñeñtepñapa' napa' amach atfa na'mtapechatsto ñeñt Yomporecop. ²⁷ Chochña neunat nañeña nechets. E'ñe nach taruasate' nechets Yomporecop. Atetcha' ne'pa' tarro'mar ama't na serrpare'tate' po'psheñechnopa' ñato'rraña ellopa' te't alla ahua'pore'tareten nañeña tarro'mar ama netsotoñe ñeñt muenen Yompor.

10

Arrpa' all yerpatanet ñeñt atet patse'tyese't ahua't israelena'tarnesha'

¹ Ñeñto'mar te'pa' masheñeshacha' ñaña no'chaneshacha' o'ch noterrser po'poñ. Nemneñ o'ch neñotatas ñeñt atet pe't ahua't yatañeshañ. Allempo chopeñe'chyesete't amaretarero'marpa' añ anmahuete't os ñeñt cohua'mpsatanete't Yompor e'ñe allohuenet. Ñaña Yomporpa' ellopa'tetstatan sa'p attoña orrtatanet toñ allcha' e'ñe cohuen oñmuet patso. Attoña metanuet sa'p ñeñt otenet Sa'p Tsasasen. ² Ñaña ahua' na'nmet Moisés ñeñtcha' pa'm'cha'tareter pet. Ñaña e'ñe pame'ñeñotet Moisés allohuenetpa' ahua't a'natenanet os. Ñato' o'ch netma'ntacha atet, ñetpa' allohuenet apatarettet oñot ñaña osot e'ñe pueyemteñotet Moisés. ³ Ñaña allohuenet Paretspa' apanete't puerrar ñeñt rrete't allohuenet ñeñt mueñanete't entot. ⁴ Ñaña allohuenetpa' chocmo' apanete't Parets ñeñt orrete't allohuenet. Tarro'mar ahua't allempo potanet oñ e'ñe mapueto't allot orretpa' ñeñtña mapue'pa' toma'ntenana Cristo ñeñt Partsotets ñaña. Po'ño'ch Cristo ñeñt onahuete't ñaña ñeñtara ñapa' ña co'ta'nmahuete't. ⁵ Ama't Yomporpa' nanaco' a'natanetañe'tpa' tarraña ñapa' amo' pocteye' entane'te atto ñetpa' atpare'tyesete't. Ñeñto'marña ahua' a'cllatatuanet e'ñe alla amarato. Puesheña'ttso' pocte' ente't Yompor ñeñt e'ñe cohuen co'tape'chyestse't.

⁶ Ñaña ñeñt atet patse't ñeñt ama pocteyayepa' añ ye'chateney yamã amach yeye'chapretatsto yamã atet. ⁷ Ñaña amach yeyomporer ye'patsche ñeñt aye'chcataret ñeñt ma'yo'chyesete't ñet patanta'tets. Yapa' yeñoteñ añecop atet pete't, tarro'mar atet anua're't Yompor po'ñoñ, ñeñtpa' atet oten: "Acheñenesha'pa' o' anorr'cha'tet, o'ña anorr'cha'tuetpa' o' rrallme'chapretet. Allo'tpa' orryeset ñaña. Allempoña o' rrallme'chapretuetpa' o' tantrra'terret o'cho' alla coshame'tam'perret pueye'chcatar." ⁸ Ñaña ama pocteyaye o'ch yecañoresha'ten atet pete't ñet patanta'tets. Ñeñto'marña shonte' acheñenesha' colla'huatsa allempo, e'ñe vientitrés mil acheñenesha' rromats e'ñe pam'tarrocoma. ⁹ Ñaña ama pocteyaye e'ñe po'tomñapa' o'ch ya'llocchame'ch Yompor. Ñeñt atet pe't patanta'tets acheñenesha'pa' ñeñto'maro'ña shonte' acheñenesha' ñeñt a'chanatyeshche'ppa' e'ñe colla'huet. ¹⁰ Ñaña ama pocteyaye o'ch yetanmare'cha

* **9:25** Po'ño'ch aña'pa' oten choyo'mets tarro'mar ñeñt po'premio pete't ahua't.

Yompor. Ñeñt atet pe't ñaña patanta'tets acheñenesha'pa' ñeñto'maro'ña amñareñtet ñeñt amtsañpa' o' a'cllatuanet.

¹¹ Tarro'mar ñetpa' atet huapyesane't pa'namen allochña yapa'cho'ña o'ch yeñoch yaña ama pocteyaye o'ch atet yeña yaña. Ñeñto'marña ama't ahua'tpa' atet quellquët atet pete't allempo, ñeñt'pa' e'ñe yocpa'naña ñeñtey te'pa'cho'ña huaponayach allempoch mellapoterra. Añpa' ñeñt atet yeçhateney yaña amach yeñatsto atet pete't ñet. ¹² Ñeñto'marña te'pa' o'ch notas, e'ñech seño'ta. Amach sota'psa'tatsto, napa' amach neño ñeñt atet pete't ahua't. Tarro'mar ñerra'm esempo yot atet'pa' ñato'rraña machayota alla atet yeperra yaña ñeñt ama pocteyaye. ¹³ Tarro'mar allohueneypa' çhocmach huaponaya topateñets, ñeñtara topateñets ñeñt yeçhenoya allohueney ñeñtey arromña'tey. Tarraña Yomporpa' çhocmach yeyomcha tarro'mar ñapa' ama muenatenye o'ch topatey attoch metanonay yehuamenc. Tarraña ñerra'm esempoch çhaponaya topateñetspa' ñapa' çhocmach orrtatonay attoch ya'huante' attoch amach metanonaye yehuamenc.

¹⁴ Ñeñto'marña masheñeshacha' ñaña noçhaneshacha' notenes, e'ñe pocte' o'ch sa'ypo'ña'huerr ñeñt ayeçcatareteçhno ñeñt po'yomporer penet ñet. ¹⁵ Sapa' seño'tueñ ñeñt cohuentetsa Yomporecop. Ñeñto'marña o'ch notas, ¿ama't pocte' senteñe ñeñt o' notuas? ¹⁶ Ñeñto'marña allempo yorreññañ ñeñt toma'ntenaya Cristo po'rras ñeñt atet anaret Yomporecoppa', çhoc ñanom yema'yochañpesya attoch yeparasyoso'ch Yompor. Allempo yorreñ allohueneypa' e'ñech yeyemteño't Cristo ñeñt rromats yocop po'ñoçhpa' o'ch yeparrocmatua allohueney ama't ñaña Cristo. Ñaña attec'mach yepena ñerra'm esempo yerren pan ñeñt toma'ntenaya Cristo po'çhets. Allempo yeshota'ten pan, o'ch yerreñ parro allohueneypa' e'ñech yeyemteño't Cristo ñeñt a'rroye' po'çhets yocop po'ñoçh allempopa' e'ñe yeparrocmatuen allohueney ama't ñaña Cristo. ¹⁷ Ñaña ama'tcha' shonteypa' e'ñech pa'tra pan yeshota't ñeñtcha' yerra'yes ama't allohueney. Ñeñto'marña yeñoteñ ama't shonteypa' e'ñe yeparrocmateño't Cristopa' e'ñe pa'tra enteney allohueney, ñaña ñeñtara e'ñech po'çhets peney.

¹⁸ Ñehua, o'ch yoc'tape'ch ñaña ñeñt atet pe't israelena'tarnesha'. Ñetpa' o'ch muetset huaquësh amapa' carrnero Yomporecop. Allo'tña'pa' o'ch rrenet ñeñt puecha'yetsa. Allempo rreñetpa' po'ñoçh e'ñech pueyemteño'tet Yomporpa' o'ch parrocmatet epuet Parets. ¹⁹⁻²⁰ Ñehua, po'ñoçhpa' ama notenso ñerra'm esempo serren po'çhets ñeñt amtsaret ayeçcatareteçhoppa' o'ch separrocmat epas, tarro'mar ama't toma'ntateñetañ Paretspa' ama Partsoyaye. Añña notenes ñerra'm esempo ñeñt ama ame'ñenayo Cristopa' o'ch es muetset ayeçcatareteçhcop, tarraña po'ñoçhpa' añe'c'pa muetseñet oneñe'çhcop, ama añe'c'paye' muetseñeto Yomporecop. Ñeñto'marña napa' notenes ñato' amach serratsche tarro'mar ama nemno e'ñe serreño'tpa' te't separrocmaten epas oneñe't. ²¹ Po'ñoçhpa' amate' erro'teno't yeparrocmatona epay Yepartseshar Cristo ñerra'm çha yeparrocmaten epay oneñe't. Ñeñto'marña notenes amate' erro'teno't e'ñe yeyemteño't Cristopa' o'ch yorr ñeñt ñocop, ñaña ñerra'm aña yetsoten ñeñt oneñe'çhcop. Ñaña amate' erro'teno yerroña parro ñeñt anaret Yepartsesharecop, ñaña ñerra'm aña yetsoten ñeñt oneñe'çhcop. ²² Ñerra'm atet ye'papa' çhate' ya'llocchame'ch Yompor ñaña e'ñe puempa'teño'teypa' çhate' ya'tsrre'mach. Çhate' yotta ñerra'm yapa' nanac ahua'mencatey, ñaña'pa' amate' ahua'mencateye' yenteñe.

Atto ama't e'ñe pocteñ o'ch es ye'ña'yeseñpa' tarraña amach yeñatsto

²³ Ñeñto'mar te'pa' o'ch alla noterserr, e'ñe pocteñ o'ch yerreneñ po'çhets ñeñt amtsaret ayeçcatareteçhcop, tarro'mar Yompor po'ño'ña'pa' ama otenñe amach yeñatsto atet. Tarraña ama't eñalleñ pa'namen ñeñt e'ñe pocteñ o'ch ye'papa' tarraña ñerra'm ñeñt'pa'

ama añecpayaye alloch huomenc yeþa' yeyoçher Yomporecoppa' ñehua, ñeñteþña' amach atet yeþatsto. Ama't eñalleñ pa'namen ñeñt e'ñe pocten o'ch yeþapa' tarraña ñerra'm ñeñtpa' ama añecpayaye alloch yeyenpue' po'psheñeñ attoch huomenc þan pueyoçher Yomporecoppa' ñehua, ñeñteþña' amach atet yeþatsto. ²⁴ Añcha'ña o'ch yepena attoch yeyenpue' yamo'ts attoch o'ch huomenc pet pueyoçher. Amachña aña yellcatsto ñeñt e'ñe yocpa.

²⁵ Ñaña o'ch notas ñeñtcha' atet seþa: Ñerra'm esempo seta allecma vendenet po'chetspa' amach sa'þto'tatsche ñeñt vendets, amach sotatsche atet: "Añ po'chetspa' ¿añe't ñeñt amtsare't ayeçhcataretecop?" Amach sa'þto'tatsto allochña' esheccha' serre' e'ñe cohuen. ²⁶ E'ñe pocte' o'ch yerren ama't erra'tsente' po'chets tarro'mar allohuen es yentyen arr patsro ñeñtpa' Yomporo pueyeçhcatuar. Ñaña ama't ora patspa' e'ñe ñocma.

²⁷ Te'pa' o'ch notas po'poñ ñeñtcha' atet seþa. Ñerra'm esempo ñeñt ama ame'ñenaye Cristopa' o'ch hua'ñas o'ch serrallme'chapreteña' ñaña ñerra'm sapa' sesechapa', e'ñe pocte' o'ch ahues ñaña o'ch serra' ama't erra'tsencha' po'chets apaset. Po'tomña amach sotatsto atet: "Ta', ¿pocte'te' o'ch yerren añ po'chets? Ñato' ñeñtara añ po'chets ñeñte' amtsare't ayeçhcataretecop." ²⁸⁻²⁹ Tarraña o'ch notas po'poñone't: Ñerra'm allo'tsen puesheñarr ñeñt ama pocteye' entenaye o'ch yerren po'chets ñeñt amtsare't ayeçhcataretecoppa' ñerra'm ñapa' o'ch otas: "Añ po'chetspa' ñeñt amtsare't ayeçhcataretecop", ñehua, allempopa' añ pocte' amach serratsche. Amach yerratsche tarro'mar añ pocte' amach yeþatsto ñeñt ama pocteye' enteno po'psheñeñ, ñato' ama't yapa' e'ñe pocte' yenteñeñ o'ch yerre'.

Ñehua, ñato' sapa' o'ch sot: "Ta', ¿eso'marte' pocte' yapa' o'ch yeþa ñeñt atet pocte' enten po'psheñeñ? ¿Eso'marte'ña ama pocteyaye o'ch yeþa ñeñt atet pocte' yenten ya?"

³⁰ Ñaña ñato' o'ch sot atet: "Ñerra'm po'ñoçh neparasyoso'teño'tpa' nerren nerrarpa' ¿eso'marte'ña otenet ama pocteyaye o'ch nerra' ñeñt o' neparasyoso'tañpesua?"

³¹ Ñeñto'mar te'pa' o'ch notas: Ama't erra'tsena es yeþa'yenpa' añ pocte' o'ch yorrtena e'ñe cohuen, attoch acheñenesha' o'ch aye'choçhtateññañet ñamet Yompor. Ama't allempo es yerra'yen, ñaña ama't allempo es yorryenpa' añ pocte' o'ch yorrtaten e'ñe cohuen Yomporecop. ³² Añ pocte' amach yeþatsto ñeñt ama pocteye' enteno judionesha'. Ñaña añ pocte' amach yeþatsto ñeñt ama pocteye' enteno ñeñt ama judioneshayaye. Ñaña amach yeþatsto ñeñt ama pocteye' enteno allohuen acheñenesha' ñeñt ame'ñenaya Yompor. Tarro'mar ñerra'm atet yeþa ñeñt ama pocteye' entenetopa' çate' ya'psatateranet Yompor. ³³ Ñeñto'marña napa' ama't erra'tsena neþa'yenpa' añña nemneñ o'ch nocshach allohuen acheñ ñeñt atet pocte' entenet ñet. Tarro'mar napa' ama ne'nen ñeñt e'ñe nocpa, añña ne'nen ñeñt sherbets allohuen acheñenesha'cop. Tarro'marña napa' çhocma ne'nen atet, allochña' attoch na'qeshþaterranet.

11

¹ Ñeñto'marña napa' notenes: Atet sentenen ñeñt atet nepena napa' ñeñtpa' e'ñe pocte' ñeñtcha' atet seþa saña, tarro'mar napa' añ nepena ñeñt atet pena ñaña Cristo.

Ñeñt poctetsa ñeñtcha' atet þa coyaneshaçhno allempo yapçhena Parets pa'paclo

² Te'pa' o'ch masheñeshacha' ñaña noçhaneshacha' notas po'poñ. Napa' e'ñe pocte' nentenes atto sapa' ama sepseno ñeñt atet neyçhatuanmas ñeñtcha' atet seþa, ñaña atto çhocma seyerpuenna. ³ Te'ña añmapa' ñeñt nemneñ o'ch señoçh saña, atto ya allohueney ñeñtey asheñorreypa' añ pomnaren yepene' Cristo. Añña coyanesha'pa' añ pomnaren penahuet puerrollar. Cristoña' añ pomnaren pene' Pompor.

⁴ Ñeñto'marña yoten ama pocteyaye ya ñeñtey asheñorreypa' o'ch yeca'mataño'ta

allempto yema'yochena, amapa' allempto ya'poteññañ Yompor po'ñoñ. Tarro'mar ñerra'm esempo yeca'matamño'tenapa' chach yottena ñerra'mrrate' po'psheñña acheñ pomnaren yepene', amach añeye' pomnaren yepenaye Cristo. Atteñapa' o'ch cha yepencna'ntach Cristo ñeñt' po'ño'ch pomnaren yepene'. ⁵ Yapa' añña yoten coyanesha'pa' e'ñe pocte' o'ch ca'matamño'ta ñerra'm esempo ma'yochena, amapa' ñerra'm allempto a'potenan Yompor po'ñoñ. Tarro'mar ñerra'm ama ca'matamño'topa' chach ottena ñerra'mrrate' ama puerrollareye' pomnaren penaye. Ñeñto'marña yapa' atarrcha' pencna'ntateney poñ tarro'mar ama choye' ca'matamño'teno. Ñerra'm ama ca'matamño'topa' añ poctetsa penquëpa' tarro'mar cha ottena atette'ña ñerra'm ashopena'taref. ⁶ Atteña ñerra'm coyanesha' ama mueno o'ch ca'matamño'tapa' ñehua, ama'tpa' shopena'tatepa'. Attochña ñerra'm o'ch cha pencana atto shopena'tenapa' ñehua, ama'tpa' ca'matamño'tepa'. Ñaña ñerra'm puetsorrmo'tateño'tpa' o'ch pencapa' ñehua, ama'tpa' ca'matamño'tepa' ñaña. ⁷ Yocopña ama pocteyaye ñeñtey asheñorreypa' o'ch yeca'matamño'ta, allempto yeserrpare'ten Yompor pa'paclo tarro'mar ya Yomporpa' puetma'ntatarey ña, ñaña yapa' chocma po'cohuenña peney. Tarraña coyanesha'pa' añ po'cohuenña pene' puerrollar. ⁸ Ñehua, tarro'mar ahuañ Yomporpa' asheñorroñ yeçcatan coyanesha'. Asheñorpa' ama coyanesho'teye' yeçcache. ⁹ Ñaña yeñoteñ asheñorpa' ama añecpaye' yeçcache coyanesacop. Añecopña yeçcatan coyanesha' attoch o'ch yenpa'y ya ñeñtey asheñorrey. ¹⁰ Ñeñto'marña añ pocte' coyanesha'pa' o'ch ca'matamño'tena attoch ama't Yompor po'mllaño'teñnanesharpa' o'ch eñochet añ po'ño'ch pomnaren pene' puerrollar. ¹¹ Tarraña e'ñe yame'ñeñoñ Yepartsesharpa' añ pocte' ya ñeñtey asheñorreypa' o'ch yeyenpueñ yaña coyanesha'. Coyanesha'pa'cho'ña pocte' o'ch yenpueney ya ñeñtey asheñorrey. ¹² Ñeñto'marña yeñoteñ ahuañ Yomporpa' asheñorroñ yeçcatan coyanesha'. Ñaña e'ñe allempoteñ ama't ya ñeñtey asheñorreypa' ahuo't eñalletateney coyanesha'. Tarraña po'ño'chpa' yeñoteñ ñeñtpa' e'ñe Yomporeshotecma huena.

¹³ Ñehua, o'ch na'p'to'tas: Ñeñt' atet seyçhena sa ¿ama't pocteye' senteñeña coyanesha'pa' o'ch ma'yochenana Yompor ñerra'm ama ca'matamño'teno? ¹⁴ Ñeñt' atet yeyçhena yapa' ñeñtpa' añ yeñotatene' ñerra'm ya ñeñtey asheñorreypa' esempo atesha'ta yeçpa' o'ch pencateney. ¹⁵ Tarraña ñerra'm coyanesha'ña atesha'tatsa pue'chpa' e'ñech cohuen entapreteñ allohuen acheñenesha'. Ñaña ñerra'm ateshet pue'chpa' ñeñtpa' alloch ca'matamño'tenet, tarro'mar ñetpa' atet yeçcatanet Yompor. ¹⁶ Ñehua, ñerra'm eseshas ama pocteye' entaye ñeñt' atet o' notuaspá' ñehua, pocte' o'ch alla noterrser; tarro'mar ñeñt' atet o' notuaspá' ñeñtpa' atetcha' sepa tarro'mar ama eñalle po'poñ ñeñt' pocte' yenten. Ama't ñaña allohuen ñeñt' pame'ñeño'tet Yompor ñeñt' apcha'yetsapa' ñetpa'cho'ña pocte' enteñet ñeñt' atet o' notuas.

Añpa' ñeñt' ama a'papahuo allempto yorren ñeñt' toma'ntenaya Cristo po'rras

¹⁷⁻¹⁸ Te'pa' o'ch notas po'poñ ñeñt'cha' atet sepa allempocma sapçhena. Tarraña ñanompa' o'ch notas, ama pocteye' nentenso ñeñt' atet sepena te' allempocma sapçhena. Tarro'mar ñeñt' atet sepenapa' ama añecpayaye attoch seyennpanna e'ñe cohuen, elloña ñeñtpa' cha epatenes. Tarro'mar napa' o' ne'mare'tas ñeñt' atet sepena. Ñerra'm esempo sapçhena e'ñe same'ñeño'tpa' amo'ch patrraye' soctape'cheno. Elloña sapa' atto'ch nanac es sotnare'tannena. Ñeñto'marña napa' noten ñato' po'ño'chte' atet sepena. ¹⁹ Po'ño'ch ñeñtey ame'ñetsapa' chocmach eñall ñeñt'cha' ama paçharroye' ame'ñatso, ñeñto'marña ya allempopa' o'ch yeñoch ñeñt' e'ñe paçharr cotape'chets, ñaña o'ch yeñoch ñeñt'cha' ama paçharroye' cotape'chatso. ²⁰ Ñaña ñerra'm esempo sapçhenapa' e'ñe

seyerpueñoŧ Yepartsesharpa' ahuo'ch serrallme'chen, tarraña po'ñočpa' ama Yepartsesharecpaye' serrallme'cheno. ²¹ Tarro'mar puesheña'tets e'ñe pa'chporrñoŧetpa' ahuo'chčo' rrenet ñanmacma, amo'chña parrocmaye' serrallme'cheno. Ñeñto'marña ñato' puesheña'tetspa' ahuo'ch atta nanac cheporrena, ñato' po'psheñeñña' ahuo'ch čha posa'tyes. ²² Ñeñŧ atet sepenapa' ama pocteyaye tarro'mar sapa' sechenca'yeña sep-aquëll allcha' serren ñaña allcha' es sorryen. Eso'mare'tña amaña añcha'na'tpahuoye' senteññañeña Yompor pa'paquëll. Allña'pa' o'ch atta sepencateñ ñaña ñeñŧ ama es echetso. Te'ña po'ñočh napa' o'ch notas, amaca'ye nocshapretensoña sa ñeñŧ atet sepena.

Atet pa Jesús allempo ñanom toma'ntatana po'rras orrpapo'
(Mt. 26.26-29; Mr. 14.22-25; Lc. 22.14-20)

²³ Añmapa' ñeñŧa atet yečhatnerrey Yepartseshar ñeñŧcha' attoch yeyerpueña. Ñeñŧara ñoñets sapa' o' neñotatuas ahuañacma. Ñeñŧpa' atet oten: Ñeñŧe tsaprocmá allempo Judaspa' pomuerran Yepartseshar Jesús, ñaña'pa' chetan pan. Chetan panpa' ²⁴ parasyoso'tamŧes alloñña'pa' shota'čpa' atet otanet: "Añmapa' ñeñŧ toma'ntenaya nechets ñeñŧcha' atserrparetterra socop. Añmapa' ñeñŧcha' atet sepa. Ñerra'm esempo serren pan atetpa' e'ñech seyerpueñoŧen napa' o'ch serre'." ²⁵ Allempoña o' rrohueta'pa' attecma pa' o' chetan ñaña orramets allocma orrete'tpa' atet otanet: "Añ ñeñŧcha' sorrpa' ñeñŧ toma'ntenaya nerras ñeñŧcha' etserra anaret allochña'pa' attoch aŧretna'huareterra so'chñar. Añmapa' ñeñŧcha' atet sepa: Ñerra'm esempoch sorren ñeñŧ toma'ntenaya nerraspa' e'ñech seyerpueñoŧen napa' sorreñcha'." Añpa' allohua ñeñŧ atet oterrey Yepartseshar. ²⁶ Ñeñto'marña te'pa' ñerra'm esempo yerren añ pan, ñaña yorren añ orrpapo'pa' čhocmach yeñotach acheñenesha' atto rroma Yepartseshar yocop. Ñeñŧpa' e'ñech tayoteñ atet yeŧa tarremphuach esempohuañencha' huerra.

Añpa' ñeñŧcha' atet yeŧa allempo yorren ñeñŧ toma'ntenaya Cristo po'rras

²⁷ Tarraña ñerra'm yapa' ama yeyerpueñoŧeye' e'ñe ña yerreno pan, ñaña o'ch yorr ñeñŧ toma'ntatana Yepartseshar po'rraspa' yapa' čate' yeyora yo'chñar e'ñe ya'llocchame'teñoŧ Yepartseshar po'čets ñaña po'rras. ²⁸ Ñeñto'marña te'pa' o'ch notas, amach sorreña'pa' o'ch soctape'ch ñanom, o'ch señoŧa sañeña ñeñŧ atet o' seŧohua. ²⁹ Tarraña ñerra'm atta ama es yepčheno rre', ama yocape'cho ñanom ñeñŧ toma'ntatana Yepartseshar po'četspa' ñerra'm atta yerre' ñaña atta yorrpa' e'ñe yerreñoŧ ñaña yorreñoŧpa' atsa'tatareŧeycha'. ³⁰ Ñeñto'marña seshopa' shonte' acheñenesha' ñeñŧ ama a'ñshe'mtetso, ñaña po'potantañpa' čha atsna'tyeset, po'potantañña'pa' o' rromayeset. ³¹ Tarraña ñerra'm čho ñanom yocape'ch e'ñe cohuen, o'ch yeñota yañeña ñanompá allempoña po'ñočpa' amach atsa'tatareŧeye. ³² Tarraña ñeñŧcha' atet tsa'tatya te' Yomporpa' ñeñŧpa' añecop attoch coŧape'chaterrey e'ñe cohuen attoch esempohuañenpa' amach a'coñchatareŧeye epay ñeñŧ ama ame'ñetso arr patsro.

³³ Ñeñto'marña masheñeshacha' ñaña nočhaneshacha' te'pa' o'ch noterrser: Ñerra'm esempo sapčha allohuenes o'ch serra' ñeñŧ anaret Yepartsesharecoppa' añ pocte' čoch ñanom secuanna'ta attoch o'ch serreñ e'ñe parrocmá. ³⁴ Tarraña ñerra'm eseshas cheporratsapa' e'ñe pocte' o'ch serrerra' sepacllo. Tarro'mar ama pocteyaye e'ñe sapčheñoŧpa' o'ch secoñchatanna'ta. Ñaña po'poñečno ñeñŧ palltetsapa' allach neserrpare'tatoses ñerra'm esempoch nečap sesho.

12

Atto Parets Puecamquëñpa' apa'yeney po'poñe'ttsocma attoch yetorra'yesa Yompor-cop

¹ Te'pa' masheñshacha' ñaña nochaneshacha' o'ch yeserrpare't ñaña atto Parets Puecamquëñpa' ñach ahuaencat yepa'yese' attoch yetorra'yesa po'poñe'ttsocma Yomporecop. Tarro'mar napa' nemneñ o'ch señoch ñeñ e'ñe atet pennay Parets Puecamquëñ.

² Ama't sapa' señoñ ahuañmo'cha allempo ama same'ñerra'pa' atta sema'yochatse'tyese't ayeçhcatareteçhno. Ñaña ayeçhcatareteçhnopa' ama't ama eñorenopa' atta nanac ame'ñatase't, ama't all seta'yese't. ³ Tarraña ñerra'm machaya esesha' eñoratsa, napa' nemneñ çhochña e'ñe señoch ñato' po'ñoçhte' añ eñoratene' Parets Puecamquëñ, ñato' amate'. Ñeñto'marña o'ch neñotatas atet attoch sapa' señoch: Ñerra'm esesha' achmãre'tene' Jesús'pa' ñeñña sapa' o'ch señoch ama añeye' eñoratene' Yomporecop. Tarraña ñerra'm esesha'ña otets: "Jesús'pa' ñeñ po'ñoçh Yepartseshar yepen", ñeñña po'ñoçhpa' o'ch señoch añ eñoratene' Parets Puecamquëñ.

⁴ Ñaña Yomporecop ama't e'ñe patrra Puecamquëñpa' tarraña ñapa' o'ch ahuaencat pa'yese' attoch yetorra'yesa e'ñe po'poñe'ttsocma Yomporecop.

⁵ Ama'tcha' po'poñe'ttsocma yetorra'yesa'pa' tarraña ñeñtarach paterr Yepartseshar yesherbã'huen allohuene'.

⁶ Ñaña ama't eñalleñ po'poñe'ttsocma atto ahuaencat pohuene' allohuene' tarraña e'ñe patrra Yomporecop ñeñ ahuaencat yepene' allohuene'.

⁷ Ñaña allohuene' Parets Puecamquëñpa' ahuo't apa'yese' attoch yorrtatyesoñ Yomporecop po'huamenc. Ñeñpa' añecop aparetey attoch yeyenpanna'ta alloch huomenc yepa'yese' yeyoçher Yomporecop.

⁸ Atet ñerra'm ñato' puesheñarr Parets Puecamquëño'pa' o'ch a' attoch e'ñe eñotan ñeñ cohuentetsa Yomporecop, attoch ñapa' o'ch co'ape'chatan pamo'tsesha'.

Ñato' po'psheñeñ añ Parets Puecamquëñpa' o'ch nanac çhapatoñ pueyoçhro ñeñ cohuentetsa Yomporecop, attoch ñapa'cho'ña o'ch yenpan pamo'tsesha'.

Tarraña ñeñtara Parets Puecamquëñ ñeñña eñotatenahuet.

⁹ Ñato' po'psheñeñpa' nanaccha' yemtenana Yomporecop. Ñeñtara Parets Puecamquëñpa' o'ch a' attoch yemcha nanac. Ñato' po'psheñeñpa' o'ch a' po'huamenc attoch a'crratyesan atsnañeteçhno.

Tarraña ñeñtara Parets Puecamquëñ ñeñña apuene' attoch a'crratyes.

¹⁰ Ñato' po'psheñeñpa' o'ch a' attoch orrtatyesan Yomporecop po'partsoña. Ñato' po'psheñeñpa' nanaccha' cohuen a'potan Yomporecop po'ñoñ.

Ñato' po'psheñeñpa' o'ch eñotyasan pa'namen co'apñats, attoch ñapa' o'ch eñoch erro'tte' huena ñeñ co'apñats, ñato' Parets Puecamquëño' amapa' oneñe'tate' po'co'apña.

Ñato' po'psheñeñpa' Parets Puecamquëñcha' eñotatenene' eñosyets po'poñ ñoñtso. Amapa' ñato' po'psheñeñpa' o'ch a'mtan ñoñets atet eñenet po'poñ ñoñtso.

¹¹ Tarraña allohuene'pa' e'ñe patrra Parets Puecamquëñ ñeñtcha' yeñotatenene' ñeñtara ñeñtcha' yapa'yese' puesheña'ttsoy erra'tsencha' muena' ña attoch yetorra'yesa pa'namen ñocop.

Ama't e'ñe po'poñe'ttsocma yetorra'yena Yomporecoppa' tarraña ñapa' e'ñe attecma cohuen entene'

¹² Ñato' o'ch netma'ntacha ñeñ atet yeçhquëna yechets. Ñehua, allemeñ yechetspa' ama'tcha' ellopa'tetstena'pa' tarraña allohuene'pa' e'ñe patrra yechtsof. Attecma yepena yamã allohuene' ñeñtey ame'ña'yenaya Cristo. Ama't shonteyeñ po'poñe'ttsocmaypa' tarraña e'ñe yame'ñeño' Cristopa' o'ch yeparrocmatuahua allohuene'.

¹³ Tarro'mar allempo o' yapatare'tetuapa' Parets Puecamquëñpa' o'ch parrocmataturrey allohuene'. Ama't ñaña po'poñe'ttsocmay aheñe' atet ñerra'm patanta'ttsoy'pa' judioneshay, ñato' po'potanta'pa' amach judioneshayaye.

Tarraña allohuene' e'ñe puechorreño'fey Parets Puecamquëñpa' e'ñe allempoteñpa' o'ch yeparrocmatua allohuene'.

Ama't ñaña aheñ ñeñ ataruasatare't e'ñe atta ñeñ ama esoye' enteñeto ñaña aheñ ñeñ e'ñe cohueno'tsen. Tarraña e'ñe puechorreño'fey Parets Puecamquëñ ñeñ e'ñe patrrapa' e'ñe allempoteñpa' o'ch yeparrocmatua allohuene'.

14 O'ch alla netma'ntatererr ñeñt atet yeçhquëna yechets. Ñehua, atet ñerra'm allemeñ yechetspa' ama pañraye' yeçhquëtso, shonte'ca'ye yeçhquëtso. Tarraña ama't shonte' yeçhquënañ yechetspa' e'ñe pañra yechets ottetsa. Attecma yepena yaña allohueney ñeñtey ame'ña'yenaya Cristo. Ama't shonteyen po'poñe'ttsocmaypa'tarraña e'ñe yame'ñeñot Cristopa' o'ch yeparrocmatuahua. 15 Ñehua, o'ch netma'ntatererr po'poñ: Ñato' atet ñerra'm yetacpa' o'ch ot: "Napa' ama es nesherbena atet sherben otats, ñeñto'marña ama pocteye' nenteñe o'ch neparrocmat epan ye'nar." Tarraña ama't atet oteneñ yetacpa' ñeñtpa' ama atteyaye, chocma parrocmaten. 16 Amapa' ñato' atet ñerra'm yetpa' o'ch ot: "Napa' ama es nesherbena atet sherben quëllo'yets ñeñto'marña napa' ama pocteye' nenteñe o'ch neparrocmat epan ye'nar." Tarraña ama't atet oteneñ yetpa' ñeñtpa' ama atteyaye, chocma parrocmaten ñaña. 17 Ñerra'm yechetspa' e'ñe yeçlloyochayapa' amate' erroteno ye'mueno. Ñaña ñerra'm yechetspa' e'ñe yetochayapa' amate' erroteno es yemosyeno. 18 Tarraña po'ñoçhpa' ama atteyaye yeçhcatye Yompor. Ñapa' ahuo't ne' attoch yeçhca'yesa allemeñ yechets ñeñt atet pocte' ent ña. Ñeñto'marña yeñoteñ ama't errotencho' yetorra'yesa Yomporecop pueheña'ttsoypa' ñeñtpa' chocma sherba'yen. 19 Po'ñoçhpa' ñerra'm yechetspa' aña yeçhcatsa pañerr atet ñerra'm e'ñe yeçlloyochayapa' amate' errotenot orrtoña e'ñe cohuen ora yechets. 20 Tarraña po'ñoçhpa' ama atteyaye ayeçhcataretey. Aña chocma eñalleteya allemeñ yechets. Tarraña ama't ellopa'tetstenañpa' e'ñe pañra yechets ottetsa. Ñeñtpa' attecma yepena yaña allohueney ñeñtey ame'ña'yenaya Cristo. Ama't po'poñe'ttsocma yetorra'yesa Yomporecoppa' tarraña e'ñe yame'ñeñot Cristopa' o'ch yeparrocmatuahua allohueney.

21 Ñato' o'ch netma'ntatererr po'poñ: Atet ñerra'm yeçlle'pa' ama pocteyaye o'ch otan yot: "Napa' ama nepallteno ñeñt atet pesherven pa." Ñaña yoñpa' ama pocteyaye o'ch otan yetac: "Napa' ama nepallteno ñeñt atet pesherven pa." 22 Ñeñto'marña ama pocteyaye o'ch yoctape'chyes atet, tarro'mar ora allohuen yechetspa' e'ñe sherba'huen. Ñato' yapa' çhach yotenapañ ñato' erra'tsen yechetspa' amate' es sherbeno. Tarraña ñato' ñeñfara yechetspa' ello metana'tuenan atto sherben po'poñeçhno yechets. Attecma yepena yaña allohueney ñeñtey ame'ña'yenaya Cristo. Ñato' yapa' çhach yotenapañ ñato' erra'tsen acheñpa' amate' es sherbeno. Tarraña ñato' ñeñña acheñpa' ello metana'tuenan atto sherben po'poñeçhno acheñ. 23 Ñaña ñerra'm erra'tsen yechets ama tama cohuenaye' yentenopa' ñato' o'ch yehorrataña e'ñe cohuen attoch ellopa' o'ch yorrta nanac cohuen. Ñaña ñato' erra'tsen yechets ñeñt yepencatene'pa' ñato' o'ch ya'nach e'ñe cohuen. 24 Tarraña ñeñt e'ñe cohuen yechetspa' amach yemno o'ch ya'nach, aña chocña yorrtañ. Atet yeçhcatonay Yompor yechets attoch ama't ñeñt ama tama cohuenaye' yentenopa' o'ch yañño'teñ e'ñe cohuen attoch ellopa' o'ch orrta nanac cohuen. 25 Allempoña allemeñ yechetspa' o'ch parrocmatet e'ñe cohuen, ñaña allempopa' o'ch e'ñe cohuen yenpannenet. 26 Ñeñto'marña ñerra'm esempo pañerr yechetspa' atserrtena allohuen yechetspa'cho' o'ch atsotapretannenet. Ñaña ñerra'm pañerr yechetspa' o'ch orrta e'ñe cohuen allohuen yechetspa'cho' o'ch coshapretannenet. Attecma yepena yaña ñeñtey ame'ña'yenaya Cristo. E'ñe yeparrocmatanna'teñot ñerra'm pueheñarr yamo'ts cha llequëna ñeñt parro yame'ñenapa' allohueney ñeñtey ame'ñetsapa' o'ch yellcapretannena. Amapa' ñerra'm pueheñarroteypa' nanac yocshenapa' allohueneypa'cho'ña o'ch yocshapretannena.

27 Ñehua, aña yechets ñeñt o' notuapa' aña toma'ntena ya allohueney ñeñtey o' yame'ñera, Cristopa' o' enterrey atet ñerra'm e'ñe ña po'chtsoy, tarro'mar o' yeparrocmat epany Cristo. Ñaña ama't shonteyen e'ñe po'poñe'ttsocmaypa'tarraña e'ñe

yeparrocmateñoŕpa' o' atet yeperra atet ñerra'm Cristo po'chtsoy. ²⁸ Ñaña allohueneŕ e'ñe yame'ñeñoŕ Yomporpa' e'ñe po'poñe'ttsocma yetorra'yena Yomporecop. Tarro'mar Yomporpa' atto na'yesonay pa'namen attoch yetorra'yesa ñocop. Ñanompa' ahuo't nan puesheña'tets allsensareñesha'. Alloŕpa' ahuo't nan po'poñe'chno ñeñŕcha' a'pote' po'ñoñ. Alloŕpa' ahuo't nan ñaña po'potantañ ñeñŕcha' ye'chatenahuet Yompor po'ñoñ. Alloŕpa' ahuo't nan po'potantañ ñeñŕcha' orrtate' po'partsoña. Alloŕpa' ahuo't nan po'potantañ ñeñŕcha' torratsa attoch a'crratyeseŕ ñeñŕ atsna'tyets. Po'potantañña'pa' ahuo't ne' ñeñŕcha' torratsa yenpue' allohuen acheñenesha'. Po'potantañña'pa' ahuo't ne' ñeñŕcha' ye'chenahuet allohuenet. Po'potantañña'pa' ahuo't ne' ñeñŕcha' e'ñosyeseŕts pa'namen ñoñtso. ²⁹ Po'ño'chpa' ama allohuenacmaye' allsensareŕeye. Ñaña ama allohuenacmaye' ya'poŕeno Yompor po'ñoñ. Ñaña ama allohuenacmaye' yey'chateno. Ñaña ama allohuenacmaye' yorrtateñña'ne Yompor po'partsoña. ³⁰ Ñaña ama allohuenacmaye' ya'crratyene atsnañe'che'chno. Ñaña ama allohuenacmaye' ye'ñosyeno po'poñ ñoñtso. Ñaña ama allohuenacmaye' ya'mŕteno ñoñets ñeñŕ eñets po'poñ ñoñtso. ³¹ Tarraña ama't ama allohuenacma atŕeyepa' e'ñe pocte' o'ch yeye'chena ñeñŕcha' yetorra'yena e'ñe cohuen puesheña'ttsoy Yomporecop. Tarraña ellopa' o'ch neñotatas po'poñ ñeñŕ nanac sherbets Yomporecop.

13

Eñall paterr ñeñŕ nanac sherbets, ñeñŕpa' añ: atto amorrentanna'tpahuepa'ch allohueneŕ

¹ Ama't ye'ñosyeseŕts e'ñe cohuen pa'namen acheñ po'ñoñetoña' ñerra'm ama yemorreñcho yamo'tspa' e'ñe ye'ñosyeñoŕpa' añña Yomporpa' attach enteneŕ atet ñerra'mrrate' con ñeñŕ atta ama'to'chtetsa. Tarro'mar ama yemorrenteñoŕeye' ye'ñosyeno pa'namen ñoñets. Ñato' ama't yapa' ye'ñosatsetyes e'ñe cohuen atet ñerra'm Yompor po'millañoŕeñnanesharña' ñerra'mña ama yamo'ts yemorrentenopa' e'ñe ye'ñosyeñoŕ Yomporpa' attach enteneŕ atet ñerra'mrrate' patashtalla challachallatspenet. Tarro'mar ama yemorrenteñoŕeye' ye'ñeno. ² Ñaña ama't yapa' ye'ñotatset a'mŕte' Yompor po'ñoñ, tarraña ñerra'm ama yemorreñcho yamo'ts, atetpa' amach esoye' entenye. Ñaña ama't ye'ñotatset o'ch ya'poŕa ñeñŕ ñapŕa eñoten Yompor tarraña ñerra'm ama yemorreñcho yamo'tspa' ñeñŕpa'cho'ña amach esoye' entenye Yompor. Ñaña ama't ye'ñotatset ora allpon ñeñŕ eñall, tarraña ñerra'm ama yemorreñcho yamo'ts, ñeñŕpa'cho'ña amach esoye' entenye Yompor. Ñaña ñato' nanac yeyemteñoŕ Yomporpa' aphueneŕ allohuen ñeñŕ yenamueñ, ama't ñeñŕ echarr yentyen. Ñato' o'ch netma'ntacha atet: Ñato' o'ch yoch Yompor, añ aspenetpa' chenquëpa'. Ñato' e'ñe yeyemteñoŕ Yomporpa' o'chcho' chenca. Tarraña ama't yeyemteñoŕ Yomporpa' o' ye'pohua atet, tarraña ñerra'm ama yemorreñcho yamo'tspa' atŕecma enteneŕ Yompor, ama esoyayye. ³ Ñaña ama't es yapa'yeseŕch huocchañesha' ora allohuen ñeñŕ yechyenña', ñerra'm ama yemorrenteñoŕeye' es yapa'yenanetopa' ama't atet ye'patstapa' Yomporpa' amach cohuenaye' entenye. Ñaña ama't e'ñe yame'ñeñoŕ pocte' yentatsech pue'moñe'teñoŕetay o'ch chamayet ora beñnatoteŕpa' tarraña ñerra'm ama yemorrenteño yamo'ts, ama't atet ye'patstapa' Yomporpa' atŕerach amach cohuenaye' entenye.

⁴ Tarraña ñerra'm esempo po'ño'ch cho yemorrenteña yamo'tspa' e'ñech acopa es ye'pa'yenanet, attach ya'huantenanet ñaña cho'chña ya'muerañtena. Ñaña amach cha es yeye'chapretyenaneto, ñaña amach cha yommo'chana'tatstaneto. ⁵ Ñaña amach yañeña entatstatso e'ñe cohueney. Ñaña ñerra'm esempo po'ño'ch cho yemorrenteña yamo'tspa' e'ñechña pocte' es ye'pa'yenanet, ñaña amach añ ya'natsto ñeñŕ e'ñe atet

yemnen ya. Añcha'ña ye'nen ñeñt atet muenen po'psheñeñ. Ñaña ñerra'm esempo po'ñoçh cho yemorrenteña yamo'tspa' amach cha ye'moñe'tyenaneto, ñaña amach cha atsrre'moçhen yentuenaneto. ⁶ Ñaña ñerra'm esempo es pohua po'psheñeñ ñeñt ama pocteye' enteno Yomporpa' ñerra'm po'ñoçh amuerañaypa' yapa' amach cha yocshatsto. Añcha'ña yocshapretena ñerra'm esempo e'ñe cohuenare' es penet. ⁷ Ñerra'm po'ñoçh cho yemorrenteña yamo'tspa' ama't cho errof ponaypa' yapa' chocmach ya'huantoñ. Ñaña ñerra'm po'ñoçh cho yemorrenteña yamo'tspa' chocmach yeyemcha ñeñt atet pena amapa' ñeñt atet oten. Ñaña ñerra'm po'ñoçh cho yemorrenteña yamo'tspa' e'ñe yeyemteñoñanet chocmach yeyenpuenanet attoch huomenc pet pueyoçher ñamet Yomporecop. Ñaña ñerra'm po'ñoçh cho yemorrenteña yamo'tspa' chocmach ya'huanta'huanom pa'namen topateñtsoçhno.

⁸ Atto yemorrentannenapa' ñeñtpa' amach ahuañañaatto ama't errponaña. Ñaña te'pa' ama't ya'poteññañeñ Yompor po'ñoñ tarraña esempohuañenpa' huañcha' atto ya'poteñ te'. Ñaña ama't atto te'pa' yeñosyen po'poñ ñoñtsopa' ñeñtpa'cho'ña esempohuañenpa' huañcha'. Ñaña ama't atto yeñotañtena te'pa' ñeñtpa'cho'ña esempohuañenpa' huañerrcha'. ⁹ Tarro'mar ama't allpon es yeñotyen te'pa' ama e'ñe yeñotueñe poctacma. Ñaña ama't te'pa' ya'poteññañ Yompor po'ñoñ ñeñtpa'cho'ña ama e'ñe yeñotueñe poctacma. ¹⁰ Tarraña ñerra'm esempoch huerra Cristo ñeñt e'ñe eñotañtetsa poctacmapa' allempoña yapa' o'ch e'ñe es yeñotuahua yaña.

¹¹ Ñehua, ñato' o'ch netma'ntacha atet: Napa' allempo cheshenna'pa' atta neñosatse'tyese't atet eñen cheshatollesha'. Ñaña allempopa' atta noctape'chatse'tyese't atet cotape'chyen cheshanesha'. Ñaña añach cohuen nentapretyese't atet cohuen entyen cheshatollesha'. Tarraña te'pa' o' nepo'npa' o'huañ noctape'chatse'tyes atet pena cheshatollesha'. ¹² Ñaña yapa' ama yeñotueno e'ñe ora atet pena Parets. Ñehua, ñato' o'ch netma'ntatererr atet: Yapa' cha yottena atet ñerra'mrrate' rerpatofa yecueñ Yompor, amach tama yechme'teñe. Tarraña esempohuañenpa' yentercha' e'ñe allame'tets. Ñaña te'pa' atto es yeñotyen mamesha'tets, tarraña esempohuañenpa' yeñotuerrcha' ñeñt e'ñe atet pena Parets, e'ñech yeñotañtueterra atet pena te' Yomporpa' e'ñe eñotueney ñeñt atet yepena. ¹³ Ñeñto'mar te'pa' yeñoteñ eñall ma'pa ñeñtcha' ama ahuañañaattatso ñeñtpa' añ: atto yeyemteña Yompor, ñaña atto yeyemteñoñ yecuame'teñ ñeñt o'patatenya, ñaña atto yemorrentannena. Tarraña añ ma'po'marpa' añña nanac sherbets Yomporecop atto yemorrenteña allohuen acheñenesha'.

14

Ama't yeñosatsetyes po'poñ ñoñtsopa' ñeñtpa' ama tama sherbeno

¹ Ñeñto'marña te'pa' añ poctetsa o'ch yema'yoçhrena attoch yemorrentanna'ta e'ñe poctacma. Ñaña añ pocte' o'ch yeye'chaprecha Yompor attoch o'ch apa'yese'y e'ñe Puecamquëñoñ attoch yetorra'yesa ñocop. Añña e'ñe pocte' o'ch yeye'chaprecha nanac attoch apuey o'ch ya'potoñ po'ñoñ e'ñe eñotoçhen. ² Tarro'mar ñeñt eñets po'poñ ñoñtsopa' añcempa sherben attoch eñora epuet Yompor, tarro'mar añña acheñenesha' ñeñt e'ññotenahuetañpa' amach esesha' eñotenaye ñeñt atet oten. Ama't añ ye'ñoratatste' Parets Puecamquëñ ñeñt ama eñotpahuo ñoñetsña' ñerra'm acheñenesha'pa' ama eñoteñeto atet yotyenanet, ñeñtpa' e'ñe Yompora ñapuef e'muene'. ³ Tarraña ñerra'm esempo ya'potoñ Yompor po'ñoñ e'ñe eñotoçhenpa' ñeñtpa' po'ñoçh choch es yeñotatenanet attoch huomenc penet pueyoçher Yomporecop. Ñaña choch yeñotatanet ñeñt atet oteney Yompor po'ñoñ ñeñtcha' atet ye'pa e'ñe cohuen. Ñaña choch yeñotatanet Yompor po'ñoñ attoch ñetpa' coshenet Yomporecop. ⁴ Tarraña ñeñt eñets po'poñ ñoñtsopa' ñeñtpa'

amach atteye' peno. Añecpach eñen e'ñe ñocpa attoch huomenc ñan pueyoçher e'ñe ñañeña. Tarraña ñerra'm esempoña ya'poteññañ Yompor po'ñoñ e'ñe eñotoçhenpa' ñeñtpa' çhoch po'ñoçh es yeñotateñ allohuen ñeñt ame'ñetsa attoch huomenc penet pueyoçher Yomporcop.

⁵ Ñehua, po'ñoçhpa' pocte' nenteñ o'ch seños po'poñ ñoñtso allohuenes, tarraña ñeñt nanac nemnen o'ch señospa' ñeñtpa' añ: o'ch sa'potoñ Yompor po'ñoñ e'ñe eñotoçhen ñeñt allo yeñen. Tarro'mar ñerra'm esempo ya'potoñ Yompor po'ñoñ e'ñe eñotoçhenpa' nanaccha' yesherven Yomporcop. Tarraña ñerra'm esempoña yeñen po'poñ ñoñtsopa' amach tama yesherbena. Ñehua, pocte' enteñ Yompor ñerra'm po'ñoçh eñall puesheñarr ñeñt a'mtene' ñoñets e'ñe ya yeñoño, attoch allohueney ñeñtey ame'ñetsapa' o'ch çhaponaya Yompor po'ñoñ yeyoçhro attoch huomenc yeña' yeyoçher. ⁶ O'ch notas masheñneshacha' ñaña noçhaneshacha' ama't napa' ñerra'm machayoña neçhap seshopa' ñerra'm nañapa' aña neserrpare'tatoses po'poñ ñoñtso ñeñt ama yeñenopa' errotenoçuate'ñaca'yeña señoçh tarro'mar amaca'ye se'muenoña ñeñt ñoñtsor ñeñt atet notenes attoch e'ñe cohuen neyenpas. Tarraña añña pocte' socop napa' çhocmach na'poñonas e'ñe eñotoçhen ama't coñeña'ttsa ñeñt atet eñotatenen Yompor. Ñaña napa' elloña çhochña es neñotatyesas po'poñ ñeñt ama señoçh sa. Ñaña napa' çhochña na'poñonas mamesha'tets Yompor po'ñoñ, ñaña çhochña es neyçhatas ñeñt cohuentetsa.

⁷ Ñato' o'ch netma'ntacha ñeñt atet pena pencoll, ama't pencollpa' ama acheñeyaye. Atet ñerra'm napa' esempo nepenclla'tenña' ñerra'm ama cohuenaye' na'poçhe'teno nepencollpa' amach esesha' eñotaye errotenete' neçhateñ. Amapa' atet ñerra'm napa' esempo netoca' yetarra,* ñerra' ama atteye' netoco atet toquëñetpa' amach esesha' eñotaye errotenete' neçhateñ. ⁸ Ñehua, ñato' o'ch netma'ntatererr po'poñ. Atet ñerra'm esempo o'ch ahuanmuet quellaratsapa' çhoch ñanom puesheñarr solltarpa' o'ch corneta't quellareñtsoreçho, attoch solltarnesha'pa' o'ch eñoçh o' çhap allempoch ahuanmuet quellaratset. Tarraña ñerra'm solltarpa' ama cohuen a'poçhe'tano po'cornetpa' añña solltarnesha'pa' amach eñoçheto ñato' añecopte' a'toreñet attoch ahuanmuet quellaratset. ⁹ Attecma pena ñaña yocop ñerra'm esempo yeserrpare'ten po'poñ ñoñtso ñeñt ama allo eñeno acheñenesha', ñetpa' amach errotenoç çhapaneto pueyoçhreto ñeñt atet yotenanet. Atetpa' çhach yottena atette'ña ama eñalle acheñenesha' ñeñt ye'mñotene'. ¹⁰ Po'ñoçhpa' eñalleñcha' shonte' po'poñe'ttsocma ñoñets ñeñt atet yeñosyen añ patsro. Ñaña po'poñe'ttsocmay acheñey ñeñtey eñotyene' ñeñt e'ñe yeñoñ allo yeñosyen. ¹¹ Tarraña ñerra'm po'psheñeñpa' o'ch serrpare'tatey e'ñe ña po'ñoño ñeñt ama allo yeñeno yapa', ñeñtpa' amach yeñoche errotenete' oteneñ ña po'ñoño. Yapa' attach ye'mueñ ñerra'mrrate' atta otatsen. Ñaña attecmay yaña ñerra'm yapa' o'ch yeserrpare'tach ñeñt ama eñetso yeñoñopa' amach eñoche errotenete' yoteñ yeñoño. Ñapa'çho'ña attach e'mueney ñerra'mrrate' atta yotatsen. ¹² Napa' tarro'mar atet notenes tarro'mar sapa' çhocma seye'chyena atto Parets Puecamquëñpa' o'ch ñatyesas ñeñt atet semna'yen sa. Tarraña napa' añña'ña o'ch notas, añña pocte' o'ch seye'chena attoch señoçh e'ñe cohuen alloch huomenc señoñ pueyoçher allohuen ñeñt ame'ñetsa.

¹³ Ñeñto'mar te'pa' o'ch notas: Ñerra'm esesha' eñosets po'poñ ñoñtsopa' añ pocte' ma'yochanepa' Yompor attoch eñotach o'ch a'mtan ñoñets e'ñe eñotoçhen añ ñeñtara ñoñtso. ¹⁴ Tarro'mar ñerra'm esempo yema'yochena po'poñ ñoñtsopa' ama't e'ñe Parets Puecamquëñ yema'yochatate'pa' tarraña allempo po'ñoçhpa' amach aye'ye' yocape'chena attoch yeyenpue' yamo'ts. ¹⁵ Ñehua, ñeñto'marña te'pa' o'ch notas ñeñtcha' atet yeña'yesa e'ñe cohuen. Po'ñoçhpa' e'ñe pocte' o'ch ma'yochatey Parets Puecamquëñ po'poñ ñoñtso, tarraña añ e'ñe pocte' ñaña o'ch yema'yochena e'ñe

* **14:7** Po'ñoçh añpa' oten arpa.

eñotochen. Ñaña attecma e'ñe pocte' Parets Puecamquëñoŧpa' o'ch yemorreacha Yomporecop po'poñ ñoñtso, tarraña añ pocte' ñaña o'ch yemorreachena allo e'ñe yeñen. ¹⁶ Tarro'mar ñerra'm po'poñ ñoñtso ya'ye'chochtateññañ Yomporecop atet eñoratey Puecamquëñ, tarraña ñerra'm allo'tsa'yen po'poñechno acheñenesha' ñeñt e'ñe errote' e'mñotetspa' amach errotenoŧ pocte' entapretyeto atto ya'ye'chochtateññañ Yomporecop, tarro'mar ama e'muennayeto yeñoñ. ¹⁷ Ñaña ama't e'ñe cohuen yeparasyoso'teñeñ Yomporecop tarraña ñerra'm po'poñ ñoñtso yema'yochena, ñeñt'pa' ama añecpayaye alloch huomenc yeñoñ po'psheñeñ pueyocher, tarro'mar ama eñoteñeto errotenoŧ yoten. ¹⁸ Napa' atarr neparasyoso'teñ Yomporecop, tarro'mar ama't napa'cho' neñoteñ eñosets po'poñ ñoñtso. Ñato' ñeñt'pa' ello metanennas allohuenes atto señosyen po'poñ ñoñtso. ¹⁹ Tarraña allempo yapchena allohueney ñeñt'ey ame'ñetsapa' napa' añña pocte' nenten o'ch neserrpare't ama't e'ñe coñe'ta ñoñets ñeñt eñotochen attoch e'ñe yeñotue. Añña ama tama cohuenaye' nenteno ama'tcha' neserrpare'ten shonte' ñoñets, tarraña ñerra'm po'poñ ñoñtso neñenpa' ñeñt'pa' amach choye' neyenpueñe namo'ts.

²⁰ Ñeñto'marña masheñneshacha' ñaña nochaneshacha' amach soctape'chatsto atet cotape'chen cheshaneshacha' ñeñt ama eñotenaye ñeñt atet cohuentetsa. Ñehua, po'ñoñch ñerra'm esempo yocotape'chyen sosya'tsañ allempoña pocte' o'ch yocotape'chen ñeñt atet cotape'chen cheshatoll, tarro'mar cheshatollpa' ama tama cotape'cheneta' sosya'tsañ. Tarraña allempo yocotape'chen ñeñt cohuentetsa Yomporecoppa' allempoña po'ñoñchpa' o'ch yocotape'chen atet cotape'chen po'naneshacha' ñeñt atarr es eñotets. ²¹ Añpa' ñeñt Yomporecop po'ñoñ ñeñt atet anare't ahuatoteñ allempo Yomporecop atet otane't israe'lena'tarneshacha'. Ñeñt'pa' atet otanete't: "O'ch noñmatas po'poñ acheñ ñeñt'cha' seserrpare'tatene' e'ñe ñet po'ñoñeto tarraña ama'tcha' atet neponaspa' amach esesha' name'ñerraye tarro'mar amach eseshaye' eñotaye ñeñt atet aserrpare'tatere'tenet." Ñeñt'pa' Yomporecop atet otahuete't ahua't. ²² Ñeñto'marña te'pa' atet notenes ama't yeserrpare'tatset po'poñ ñoñtso'pa' ñeñt'pa' ama añecpayaye attoch yame'ñacha ñeñt ama ame'ñetso tarro'mar añ ñoñets ñeñt ahuatoteñ anare't ñeñt'ña yeñotatene'ña ama'tcha' yeserrpare'tatset po'poñ ñoñtso amach esesha' yame'ñerrayo. Ñeñt'cha'ña yeñotate'ña erra'tsente' po'ñoñch ñeñt ama ame'ñetso. Tarraña ñerra'm esempo ya'poteññañ Yomporecop po'ñoñ e'ñe ya yeñoño ñeñt atarr eñotochen, añña ñeñt ame'ñetsa ñetñapa' e'ñech cohuen e'mñoteñet allochña huomenc yepenamet pueyoçhret Yomporecop. Ñeñt'cha'ña yeñotate'ña ñetpa' po'ñoñch ame'ñenet tarro'mar ñeñt po'ñoñch ama ame'ñetso, ñetpa' amach mueneñeto o'ch e'mñotet ama't ñeñt atarr eñotochen ñoñets. ²³ Ñaña o'ch notas, ñerra'm esempo sapchena allohuenes ñeñtes ame'ñetsa, ñerra'm allohuenespa' atto señosyen po'poñe'ttso'cma ñoñtso'pa' ñerra'mña machaya huapa ñaña ñeñt ama ame'ñetso amapa' ñeñt errote' e'mñotetspa' ñetpa' ama'tte'ña cha otaseto cho'te' semospuena. ²⁴ Tarraña ñerra'm esempoña sa'poten allohuenes Yomporecop po'ñoñ e'ñe eñotochen ñerra'm allempoña huapa ñeñt ama ame'ñetso amapa' ñeñt errote' e'mñotetspa' ñeñt'ña atet seserrpare'ten Yomporecop po'ñoñpa' ñato' allohuenetpa' o'ch chapamet pueyoçhro, o'ch eñotet ñañeñeta ñeñt atet cotape'chyenet ñetpa' ñeñt'pa' ama pocteyaye Yomporecop. ²⁵ Allempoñapa' ñato' o'ch yore'tanet po'chñaret ñeñt cotape'chatyenahuet pueyoçhro e'ñe a'nahua ñato' puellquëñoŧetpa' o'ch concorpuet ñato' o'ch aguëret ñamet Yomporecop. Tarro'mar ñato' allempo'pa' o'ch ot: "Po'ñoñchepa't Yomporecop se'ñoratylene'."

Parets pa'paclopa' ama aserrpare'tpahuo e'ñe parrocoma

²⁶ Ñehua, masheñneshacha' ñaña nochaneshacha' ñeñt'cha' atet sepa cohuen ñeñt'pa' atet: Sapa' allempo sapchenapa' ñato' puesheña'ttsospa' o'ch semorrechena, ñato' po'psheñeñpa' o'ch yeçhatenet, ñato' po'psheñeñpa' o'ch a'potan ñeñt atet eñotateñ Yomporecop, ñato' po'psheñeñpa' o'ch eños po'poñ ñoñtso, ñato' po'psheñeñpa' o'chcho'

a'mitan añ ñoñets. Tarraña ñeñtpa' añecopcha' atet sepa attoch huomenc sepoñ po'psheñeñ pueyoçher. ²⁷ Tarraña ñerra'm eseshas eñosets po'poñ ñoñtsopa' ama pocteyaye o'ch seños e'ñe allohuenes, ñato' e'ñech epsheña eñosets amapa' ma'psheña allotpa' ñeñtach. Ñaña añ pocte' ñeñtcha' eñosetspa' ñaptepa'tetscha' eñoset. Tarraña añ pocte' ñaña eñallcha' ñeñtcha' eñotatenahuet ñoñets ñeñt atet eñenet. ²⁸ Tarraña ñerra'm ama eñalle ñeñtcha' eñotatahuet ñoñetspa' amach eñosatsteto e'ñe alla allempo sapçhena allohuenes ñeñtes ame'ñetsa. Allempopa' eñorana'chetepa' Yompor e'ñe ñapfeto e'ñe pueyoçhreto. ²⁹ Ñaña añ pocte' e'ñech epsheña, amapa' ma'psheña ñeñtcha' a'pote' Yompor po'ñoñ. Po'poñeçhno acheñenesha'pa' añ pocte' çhoch e'mñoçhet, ñaña çhoch cotape'chet po'ñoçhte' atet oteneý Yompor. ³⁰ Ñaña ñerra'm esempo po'psheñeñ mueneñ o'ch a'potan ñeñt eñotateñ ñaña Yompor Puecamquẽñpa' añ pocte' allempopa' amach serrpare'tatsto ñeñt ñanom serrpare'tets. ³¹ Attochña o'ch sa'potuoñ allohuenes Yompor po'ñoñ e'ñe saptepa'tets, ñaña attoch allohuenespa' o'ch e'ñe señoçh, ñaña attoch allo'na coshatnenes Yompor po'ñoñ. ³² Tarro'mar ñeñteý a'potene' Yompor po'ñoñpa' çhocmach eñall attoch yeunata yañeña ñanom attoch çhocma yemnatannena. ³³ Yomporpa' ama mueno o'ch atta yano'tatse'ten allohueney, añña muenen o'ch yesen e'ñe cohuen.

Ñaña atet pena allemeñ anetso ñeñt apçha'yetsa ñeñt pueyoçhresha' pen Parets. Ñaña allempo sapçhena allohuenes ñeñtes ame'ñetsapa' ³⁴ coyaneshaçhno'pa' amach serrpare'tatsteto, tarro'mar ñeñtpa' ama pocteyaye. Añña pocte' çhoch ame'nyet ñeñt añcha'tarettetsa, ñeñtpa' atet oteneý ñoñets ñeñt atet anaret ahuatoteñ. ³⁵ Ñehua, ñerra'm mueñenet o'ch es eñotetpa' a'poto'chetepa' puerrollaret allempo çherret pa'paclo, tarro'mar ama pocteyaye coyanesha'pa' o'ch serrpare't allempo yapçhena ñeñteý ame'ñetsa.

³⁶ Ñehua, ñerra'm ama pocteye' senteñe ñeñt atet o' notuaspa' ñehua, o'ch notas atet: Yompor po'ñoñpa' ama e'ñe sa soçta'pñoçteýe' hueno, ñaña ama e'ñe saptecpa hueno. ³⁷ Ñaña ñerra'm esesha' otats, "napa'çho'ña na'poteññañ Yompor po'ñoñ", ñehua, eñotanepa' ñeñt atet noten necartotpa' ñeñtpa' po'ñoçh atet oteneý Yepartseshar ñeñtcha' atet yeña. Ñaña ñerra'm esesha' otats, "napa'çho'ña chorrenna Parets Puecamquẽñ", ñehua, ñapa'çho'ña eñotanepa' ñeñt atet noten necartot ñeñtpa' po'ñoçh atet oteneý Yompor ñeñtcha' atet yeña. ³⁸ Tarraña ñerra'm esesha' ama name'ñayo ñeñt atet o' notuaspa' ñehua, ñapa' amach se'mñoçtatsche.

³⁹ Ñeñto'marña te' masheñneshacha' ñaña noçhaneshacha' o'ch noterrser: Añ pocte' o'ch sema'yochrena a'pote' Yompor po'ñoñ e'ñe eñotoçhen ñoñtso, tarraña pocte' o'ch semnatenet eñosetepa' po'poñ ñoñtso. ⁴⁰ Tarraña ama't erra'tsencha' sepa'yespa' e'ñech cohuen sesen ñeñt poçtetsa, ñaña çhocmach semnatanna'ta o'ch es sepa'yes e'ñe saptepa'tets.

15

Allempo tanterra Cristopa' ahuo't orrterrana shonte' acheñenesha'

¹ Te'pa' o'ch masheñneshacha' ñaña noçhaneshacha' notas po'poñ. Napa' nemneñ ellopa' o'ch alla neyerpaterrser e'ñe erroçtente'ña ñeñt e'ñe atet pena cohuen ñoñets ñeñt neserrpare'tatuanmas, ama't ahuatoteñ. Ñeñtpa' ñeñtara cohuen ñoñets ñeñt o' same'ñerra, ñaña ñeñtara ñoñets ñeñt allo o' huomenc seperr seyoçher. ² Ñaña ñeñtara ñoñets allo o' sa'queshpataretterra ñerra'm amach sequeçhpue, tarraña ñato' po'ñoçhpa' ama çhoýe' same'ñeno.

³ Ñaña ñeñt neserrpare'tatas ama't ahuatoteñpa' ñeñtara cotapñats ñeñt atet eñotatenet ñaña, ñeñt nanac sherbets, ñaña ñeñtara ñoñets ñeñt atet anuaret Yompor po'ñoño ama't ahuatoteñ. Ñeñtpa' atet o' neserrpare'tatuas: Cristopa' rroma

yo'chñarecop, ⁴ allotpa' apamparetta, tarraña poma'pamtañopa' alla tanterra. Ñeñtpa' attecma oten ñaña ñeñt atet anuaret ahuañoteñ Yompor po'ñoño. ⁵ Allempo tanterrapa' ñanempa' orrterrana Pedro, allotpa' orrterrana allohuen pueyochresha'. ⁶ Allotpa' orrterrana ñaña shonte' acheñenesha' ñeñt ame'ñetsa. Ñato' metanenante' quinientos acheñenesha' ñeñt enterre' allempo e'ñe parrocmuet. Ñeñt enterre' allempopa' ama't teme'ttsen shontet corra'yenet. Tarraña puesheña'tetspa' o' colla'huenet. ⁷ Allotñapa' orrterrana ñaña Jacobo, allotpa' orrterrana ñaña allohuen po'poñechno ñeñt allsensaretnesha'.

⁸ E'ñe chenta'ñapa' orrtona ñaña, ama't napa' ama esoyayno. Atta nentena ñerra'mrrate' sapeñtsoma'tota ne'ñallettera Yomporecop. ⁹ Po'poñechno allsensaretnesha'pa' ñetpa' nanac sherbenet, tarraña napa' ama't allsensareteneña'pa' ama tama nesherbena. Ñaña napa' pocte' nenteñ amach otatsetneto allsensareten, tarro'mar napa' nanac na'muerochtache't ñeñt ame'ñenaya Yompor. ¹⁰ Tarraña ama't atet nepe'tpa' Yomporpa' atarr morrentna. E'ñe puemuereño'tpa' attoña a'pnaserren ñeñt nanac sherbets ñocop. Tarraña ama orrena morrentno Yompor, tarro'mar te'pa' nanac netorrana Yomporecop. Po'potantañ allsensaretnesha'pa' ama't torra'yenet Yomporecoppa' tarraña napa' ello nanac netorrana atet torrenet ñet. Ñehua, ama't noteneñ napa' netorrana Yomporecop, po'ño'chpa' ama naye' torretso, añña Yompor puemuereño'tpa' ñeñtña torretsa na nechtso't. ¹¹ Ñehua, amach yoto ñeñtey nanac sherbets, ñato' na amapa' po'poñechno allsensaretnesha'. Añcha'ña yot ñerra'm ya po'ño'ch yeserrpare'teño't o' same'ña'huerrapa' ñeñtña nanac sherbets.

Atto esempohuañenpa' yetantuerrach rromot

¹² Ñehua, ñerra'm po'ño'ch o' same'ñerra ñeñt atet yeserrpare'tatenes atto Cristopa' o' tanterra allempo rroma, eso'mare'tña soten ñerra'm yerromapa' amach erroteno't yetanterro. Po'ño'ch ñeñtpa' atet oten puesheña'tets ñeñt sesho'tsen. ¹³ Ñehua, ñerra'm po'ño'ch ama eñalle attoch yetanterra yapa', Cristopa'cho'ña amate' tanterrañe ama't teme'ttsen. ¹⁴ Ñerra'm po'ño'ch Cristopa' teme'ttsen rromueneña' ñeñt atet yeserrpare'tatenes te'pa' amate' es sherbenne. Ñaña ñerra'm po'ño'ch ama tanterrañe Cristopa' te'pa' e'ñe'e' orrena yeyemteñañ. ¹⁵ Ñaña ñerra'm po'ño'ch ama tanterrañe Cristopa' yapa' attate' yeshquënsoñ atto' pena po'ño'ch Yompor, tarro'mar yapa' o' yeserrpare'tuoñ Yompor atto ñapa' o' tantaterran Puechemer Cristo. Tarraña ñerra'm po'ño'ch ama eñallne attoch yetanterra rromotpa' ñeñtña atet o' yeserrpare'tatuas atto Yomporpa' o' tantaterran Puechemer Cristo, ñeñtpa' amate' po'ño'choyayñe. ¹⁶ Po'ño'chpa' ñerra'm amach yetanterro yapa', Cristopa'cho'ña teme'ttsente' ama tanterrañe. ¹⁷ Ñaña ñerra'm po'ño'ch teme'ttsen amach tanterrañe Cristopa' e'ñe'e' orrena seyemteñañ, ñaña so'chñarpa' amate' a'pretnareteñe teme'ttsen. ¹⁸ Ñaña allohuen ñeñt o' colla'huena ñeñt ame'ña'nmaya Cristopa' ñetpa' o'te' e'ñe poctacma chenca'huerretañ. ¹⁹ Ñaña ñerra'm añecpa yeyemteñañ Cristo allempo huomñchenya', ñaña ñerra'm po'ño'ch amach yetanterro, ñerra'm atteña' nanacte' llequëntso'tsenyeñ. Ñeñt llequëntspañe' ello'te' metanenaneñ ñeñt atet yellcatyene' añe patsro.

²⁰ Tarraña ñeñtpa' ama atteyaye, tarro'mar po'ño'ch Cristopa' o' tanterra ñanom. Atto tanterrapa' amach alla rromuerre'te allochñapa' esempohuañen allohueneñ ñeñtey ame'ña'nmaya Cristopa' yapa'cho'ña attecma'ch yetanterra. ²¹ Atet pa' ñaña ahuañ Adán e'ñe ña po'chñaro't o' anare'tta attoch yerroma, ama't e'ñe puesheñarroña. Te'pa'cho'ña e'ñe puesheñarro'tpa' o' orrterra attoch yetanterra ama't esempoch yerroma. ²² Tarro'mar e'ñe po'chñaro't Adán ñeñtey pamo'tsna'tareypa' yocoppa'cho'ña o' anare'tta attoch yerroma yaña allohueneñ. Tarraña te'pa' e'ñe yeparrocmateño't Cristopa' ello'ch alla yocrra'huerra allohueneñ. ²³ Tarraña ñeñtpa' atetcha' perra:

Cristo ñanom o' tanterra allochñapa' ñerra'm esempoch huerra, yapa'cho'ña ñeñtey ame'ñenayapa' attec mach yocrra'huerra allohueney. ²⁴⁻²⁸ Allempoña Cristopa' o'ch puerratanpesuan po'huamenc allohuen ñeñt añcha'taretetyetsa, ama't ñaña ñeñt añcha'noçhetyetsa, ñaña ñeñt ahuamencatetyetsa. Tarro'mar añ poctetsa Cristopa' ñach añcha'tare'ttertsa e'ñe ñapue't esempohuañencha' yoranpesuan po'huamenc allohuen ñeñt e'moñe'tene'. Ñaña esempohuañen e'ñe chenta'pa' o'ch a'huañañperrey rromueñets ñeñt o'patatare'tey te' allohueney. Tarro'mar Cristopa' o' aphue Pompor po'huamenc attoch pomnaren penan allohuen esocmañen. Ñehua, ama't oteneñ Yompor po'ñoñ Cristopa' pomnaren penano' allohuen esocmañenpa' tarraña yeñoteñ amach pomnaren ñano Pompor, tarro'mar Pomporpa' ña apuene' po'huamenc. Esempohuañencha'ña pomnaren ñohuan allohuen esocmañen allempoña Cristopa' o'ch aphuerran Pompor ñeñt nanac Parets atto añcha'tare'ttena. Allempoña Pomporpa' o'ch alla pomnaren perran Cristo ñeñtara Pompor ñeñt o' ahuamencat o' ñohue. Allempoña Pomporpa' ñach añcha'tare'ttertsa, ñaña allempopa' ñach pomnaren perre' allohuen esocmañen. Allempopa' o'ch mellapoterra.

²⁹ Te'pa' o'ch alla noterrser po'poñ. Ñerra'm po'ñoçh ama eñalle attoch yetanterra esempohuañenpa' eso'mare'tña puesheña'tets acheña' apatare'ttenaña añecop ñeñt o' rroma. Po'ñoçh ñerra'm amach errotenot tanterro ñeñt o' rromapa' eso'mare'tña apatare'ttenetña ñeñtecop.

³⁰ Ñaña ñerra'm po'ñoçh amach errotenot yetanterropa' eso'mare'tña pocte' nenteñ e'ñe name'ñeño'tpa' ama't çhocma nemueroçhtena ñocoppa' e'ñe pocte' nenteñ. ³¹ Napa' atet noten tarro'mar pate'tets yetpa' e'ñe na'llpuepño'ta ama muetsayenneto. Ñehua, neñoteñ ñeñt'pa' attec mach ña'net. Tarraña masheñeshacha' ñaña noçhaneshacha' errponcha' nemueroçhtapa' allponcha' nocshapretensa saña, tarro'mar e'ñe yeparrocmateño't epay Yepartseshar Jesucristo. ³² Ñaña arr Efesopa' e'ñe na'llpuepño'ta a'qeshp'atnet atet ñerra'mrate' cho norrotena epan ma'yarr. Tarraña ñerra'm amach errotenot yetanterropa' ñeñtña atto na'llpuepño'ta a'qeshp'atyennetpa' amach es sherba'no, tarro'mar ñeñt patso'marecpapa' ama sherbeno. Po'ñoçhpa' ñerra'm amach eñallñe attoch yetanterraña'pa' e'ñe pocte' o'ch yoteneñ: "Te'pa' achsha'yespahuepa'ch, ñaña o'ch yotanna'ta arrallme'chapretyespahuepa'ch, ñaña o'ch yotanna'ta orrare'tyespahuepa'ch tayepa'tña'pa' huomñchay. Tsapa'tonetña o'ch yerromapa' amach allo'na atet ye'pa' neno."

³³ Tarraña amach sota'psa'tatso atet, tarro'mar yeñoteñ "ñerra'm esempo yeyemteña ñeñt atta cotape'chatse'tyets ñeñt ama cohuenayaye Yomporecop yapa'cho'ña çhach shequenyet tarro'mar tsapa'tonetpa' ñato' o'ch alla atet yeperra yaña atet ña'yenet ñet, ama't te' yapa' e'ñe cohuen yoctape'chen Yomporecop." ³⁴ Añña pocte' o'ch soctape'cherr ello, ñaña o'ch sequeçhp'uer ñeñt atet se'pa'yese't ñeñt ama pocteyaye Yomporecop. Te'pa' sepenquëpa' tarro'mar ñato' po'ñoçh ama seño'teñe Yompor allohuenes.

Atet'cha' yepo'poñet allempoch yetanterra rromot

³⁵ Te'pa' o'ch notas po'poñ. Ñehua, ñato' puesheñarro'tespa' atet sotenen: "Amate' errotenot yetanterraña rromot. Ñerra'm po'ñoçh atanterrapo' rromot, yechetsña allempopa' çerro'tena'tcha'ña orrterra?" ³⁶ Sapa' are'tña es seño'teno. Ñehua, ñato' o'ch netma'ntacha atet: Yeñoteñ ñerra'm es yenare't pue'llomerpa' amach ahuen chopo. Choch ñanom puetsa' pa'tall esheccha'ña chop. ³⁷ Ñaña ama a'ñeye' yenare'teno narmets ora ñeñt e'ñe atet chopuets. Atet ñerra'm chop* yenare'tpa' pue'llomñrach yenare'teññañ. ³⁸ Ñaña ñeñt'pa' Yomporcha' a'chpate', tarraña ñeñt'cha'ña chopatspa'

* 15:37 Po'ñoçh añpa' oten trigo.

o'ch po'poñet ñeñt atet orrtena ahuaña pue'llomer. Ñeñtpa'cho' Yompor a'po'poñetatene' tarro'mar atet muenen ña. Ñaña ñerra'm po'poñe'ttsoema es yenare't pue'llomerpa' e'ñech po'poñe'ttsoema chopyes ñaña narmets ñeñt e'ñe atet anare't. ³⁹ Añpa'cho' chetsotspa' e'ñe po'poñe'ttsoema chetsots, ama e'ñe attecmayaye. Atet ñerra'm ya acheñeypa' po'poñcho' yechets yechen. Ñaña es berrochnopa' po'poñcho' po'chets pen. Ñaña o'technopa'cho' po'poñ po'chets pen ñaña. Cacachnopa'cho'ña po'poñcho' po'chets pen ñaña. ⁴⁰ Ñaña ñeñt allpon ento'marnesha' ama e'ñe attecmayayeto ñerra'm patso'marnesha'. Tarraña ñeñt ento'tsa'yenpa' ellonetcho' cochnesha'tyenet tarro'mar atet anare'tet. Ñeñt patso'tsa'yenpa'cho'ña ellonetcho' cohuenetyenet ñamet tarro'mar ñetpa'cho'ña atet anare'tet. ⁴¹ Ñaña atet cohuentena atsne'pa' ñeñtpa' po'poñ poptena tarro'mar atet anare't ñaña. Arrorrrpa'cho'ña po'poñonetcho' cohuentena tarro'mar atet anare't. Rantochnopa'cho'ña po'poñonetcho' cohuenetyenet. Ñaña pate'tets rantopa' po'poñe'ttsoema cohuenetyenet ñamet tarro'mar atet anare'tet. ⁴² Attecmach yeperra yaña ñerra'm esempohuañencha' yetanterra. Ñeñt atet orrtena te' yechetspa' allempoch yetanterra' amach atteraye' yorrterro. Te'pa' arromñañayapa' chocmach yerroma allotpa' o'chcho' pampa'yet allcha' puetsohuerr yechets. Tarraña esempoch yetanterra' amach alla ya'rromñañerre'te. ⁴³ Ñaña te' yechetspa' atarr pencna'ntatene' tarro'mar chocmach yatsna'ten. Ñerra'm yatsna'tpa' o'chcho' yerroma, allotñapa' o'chcho' pampa'yet. Tarraña ñerra'm esempoch yetanterra' allempo yechetspa' amach alla pencna'ntaterrye'te. Allempopa' e'ñech cohuen yorretyena. Ñaña te'pa' ama ahuañencateye ñeñto'marña chocma yerromuen, allotñapa' o'chcho' pampa'yet. Tarraña ñerra'm esempoch yetanterra' allempopa' nanaccha' ahuañencateye. ⁴⁴ Atet yeyeçquena te' arr patso'marpa' ñeñtpa' chocmach yerroma, allotñapa' o'chcho' pampa'yet. Tarraña ñerra'm esempoch yetanterra' allempopa' camuecñetsofach yorrterra. Po'ñoçh yeñoteñ atet yorrtena te' yechtso'tpa' yeñoteñ ñaña yecamqueno'tpa'cho'ña yorrterrach esempohuañen.

⁴⁵ Ñeñto'marña ama't Yompor po'ñoño atet anuare't ahuañoteñ, ñeñtpa' atet oten: "Allempo Adánpa' yeçcach Yompor allempoñapa' ahuo't a'p po'rerrña attoch corra e'ñe po'chtso't. Ñeñto'mar Adánpa' ñeñt ñanom acheñetats." Tarraña chenta'ñapa' acheñetos ñaña Cristo attoch ñach yapuerre' ello o'ch alla yocrra'huerra yecamqueno't.

⁴⁶ Tarro'mar Yomporpa' atet na'y. Ñanompa' o'ch yocrra e'ñe yechtso't, esempohuañenñapa' o'ch alla yocrra'huerra ñaña yecamqueno't. ⁴⁷ Tarro'mar ñeñt ñanom acheñ ñeñtara Adánpa' patsa ayeçcataret, ñeñto'marña ñapa' atta patso'marneshat. Tarraña puepañ ñeñt acheñetosets ñeñtara Yepartseshar Jesucristo ñeñtpa' ento't huapa. ⁴⁸ Ñaña ñeñtey arromñañeneshaypa' yapa'cho'ña attaya ñerra'mrrate' Adán ñeñt ayeçcataret pats. Tarraña ñeñtey ame'ñenaya Cristo ñeñt huaptsa ento'tpa' yapa'cho'ña yocrra'huerrach yecamqueno't ento atet ñerra'mrrate' Cristo ñeñt huaptsa ento't. ⁴⁹ Atteña te'pa' atta yeyeçquena yechtso't atet ñerra'mrrate' Adán ñeñt ñanom ayeçcataret pats tarraña esempohuañenpa' yeyeçquerrach ello atet ñerra'mrrate' Cristo ñeñt huaptsa ento't.

⁵⁰ Ñeñto'marña masheñneshacha' ñaña noçhaneshacha' notenes: E'ñe yechtso'tpa' amach es yo'pato all añcha'tare'ttena Yompor. Tarro'mar allempo arromñañayapa' amate' erro'teno't es yo'patoña ñeñt ama ahuañaño. ⁵¹ Ñehua, o'ch neñotatas ñeñtcha' atet perra esempo, ñeñt ñapta eñoteñ te' Yompor. Po'ñoçhpa' amach e'ñe allohueney yerromhuo. Tarro'mar ñeñtey orameñ corretsa allempoch huerra Cristopa' amach yerromo. Allempopa' attach yepo'poñet ⁵² e'ñech machayo'ta e'ñe allempocma esempoch e'morrterra Yompor po'pocctor e'ñe allohuanen. Ñehua, ñeñtpa' atetcha' perra allempo.

Ñanompa' o'ch e'morrterra Yompor po'pocor. Allempoñapa' o'ch tanrra'tuena ñeñt colla'huatsa ahuañoteñ. Allempochña tanterretpa' amach alla arromñafterrete'te. Yaña ñeñtey orameñ corretsapa' yapa'cho'ña o'ch yepo'poñet e'ñe allempocma. ⁵³ Tarro'mar yechets ñeñt aptsañapa' añ palltetsa o'ch puenasa ñeñt ama aptsaño. Tarro'mar ñeñtey arromñañeyepa' añ palltetsa o'ch yepnasa ñeñt ama arromñañeyaye. ⁵⁴ Ñerra'm esempo yechets ñeñt aptsañapa' ñerra'm o'ch puenasa ñeñt ama aptsaño, ñaña ñerra'm esempo ñeñtey arromñañeyepa' o'ch yepnasa ñeñt ama arromñañeyayepa' e'ñe allempopa' o'ch e'ñe etsotua ñoñets ñeñt atet anaret ahuañoteñ, ñeñtpa' atet oten: "Allempo o'ch huañerrña ñeñt atto o'patenya rromueñets. ⁵⁵ Ñeñto'marña allempopa' amach yerromuerre'te, tarro'mar amach eñalletterre'teña ñeñtcha' alla ya'tserrperrayerr ama't yerromñoña."

⁵⁶ Tarro'mar te'pa' yo'chñaroñ o'patenyaña rromueñets, tarraña allempopa' amach eñalle yo'chñar. Ñaña yatpare'teñoñ ñoñets ñeñt atet anaretpa' ñeñtña yo'patataye'tña rromueñets allempo nanac yeyore't yo'chñar. ⁵⁷ Ñeñto'marña te'pa' yeparasyoso'chepa'ch Yompor tarro'mar atto apuey Puechemer ñeñtara Yepartseshar Jesucristo ñeñtcha' chocma ya'pocstatene' allohuen pa'namen ñeñt yocop.

⁵⁸ Ñeñto'mar e'ñe nemorrenteñoñpa' o'ch masheñneshacha' ñaña noçhaneshacha' noterrser: Te'pa' huomenquëpa'ch sepa' seyoçher, amach sequeçhpatstere. Ñaña chocmuepa'ch setorrena Yomporecop. Ñaña sapa' señoche'pa'ch ñeñt atto yetorrena Yomporecopa' ama orrena yetorreno.

16

Añ quellepa' ñeñt apete't huocchañneshachno

¹ Te'pa' o'ch notas po'poñ. Añ allpon quelle ñeñt chocma senen huocchañneshachnocop ñeñt ame'ñetsa, ñeñtpa' attecmaçh sepa. Tarro'mar ñeñt ame'ñetsa Galaciopa' o' neñotatuanet ñeñtcha' atet pet, ñeñto'marña sapa'cho'ña atetcha' sepa sama. ² Ñeñtpa' atetcha' sepa: Pa'tetets temençpa' añ pocte' chocmach sena'yes ellopa'tets errponcha' semna'yes o'ch sena'yes Yomporecop. Ñaña errponte'ña sechyen ñeñtcha' sena'yes Yomporecop, ñato' aton amapa' ñato' coñe't. Ñeñtpa' o'ch sañño'tue e'ñe ellocma attotach o'ch satontatyes. Allochñapa' ñerra'm esempoçh neçhap seshopa' amach pallteno e'ñe allempopa' o'ch taya sena'yes. ³ Ñaña ñerra'm esempoçh neçhap seshopa' o'ch nequellca' carta ñeñtcha' nemña Jerusaléño. Ñaña o'ch nemñe acheñ ñeñtcha' anmue' quelle, ama't erra'tsena acheñ ñeñtcha' pocte' senten sa. ⁴ Ñaña ñerra'm pocte' senteñ o'ch ahuen namapa' e'ñe pocte' o'ch yahuanena e'ñe parro.

Allempo sechena Pablo o'ch ahuo' po'poñ anetso'mar

⁵ Ñaña ñerra'm esempoçh ahuen arrot attoch neçhap seshopa' napa' noctape'cheñ arrcha' noñem Macedonio'mar. ⁶⁻⁷ Añ atarr nemnen ñerra'm Yompor muenatspa' allate' na'llponmat sesho, ñato' allate' nechara'pena. Tarro'mar napa' ama nemno o'ch atta nepomuetnom sesho, añña napa' nemneñ ñerra'm Yompor muenatspa' allate' natomat. Ñaña ñato' e'ñe allotpa' o'te' sanemyesen errachcho' neshecha allempo. ⁸⁻⁹ Tarraña te'pa' amach erra neto. Allanach arr Efeso tarro'mar te'pa' eñall attoch o'ch neserrpare'tatyes shonte' Yompor po'ñoñ. Ñaña te'pa' neñoteñ ñato' o'ch ame'ñenna shonte' acheñ, tarraña chocma eñall ñaña shonte' ñeñtcha' nepatare'tene'. Tarraña o'ch çhap Pentecostepopa' o'ch ahuerren arrot.

Atet otanet Timoteocop

¹⁰ Ñaña o'ch notas, ñerra'm esempoçh çhap masheñ Timoteopa' o'ch sagañ e'ñe cohuen, allochñapa' amach cha llecoso sesho. Tarro'mar ñapa'cho'ña nanac torrena

Yomporecop atet ñerra'm na. ¹¹ Ñaña ñerra'm esempoch chap seshopa' añ pocte' chocmach se'mñoch e'ñe cohuen. Ñaña e'ñech cohuen seyempue' allochñapa' ñerra'm esempo puerrerra allo'pa' e'ñech pocsheñsha' cherr nesho. Tarro'mar napa' chocma necueñ masheñ Timoteo epan po'poñechno masheñneshachno.

¹² Ñaña masheñ Apolospa' nanac nemñare'teñ o'ch emo'tensa' epuet po'poñechno masheñneshapa' tarraña te'pa' ñapa' ama mueno. Tarraña esempopa' chomach chap sesho ñerra'm esempoch pocta'huoña.

Allempo so'terranet po'carto'

¹³ E'ñe allohuanenpa' o'ch noterrser: Te'pa' e'ñech señoa, tarro'mar chocma eñall ñeñtcha' ya'psaterre' Yompor. Ñaña e'ñe same'ñeño'pa' huomenquëpa'ch seña' seyo'cher. Ñaña amach señcha'tatsto, chochña seumencta Yomporecop. ¹⁴ Ñaña ora allpon ñeñt seña'yenpa' e'ñepa'ch semorrentanna'teño' es seña'yen.

¹⁵ Te'pa' o'ch masheñneshacha' ñaña nochaneshacha' notas po'poñ. Sapa' seño'teñ ñaña atto masheñ Estéfanaspá' ña ñanom ame'ñer'tsa ahuat all Acayo. Ñaña ahuo't ame'ñerret epuet pamo'tsesha'. E'ñe allempoteñ ñetpa' ahuo't torra'yenet añecop attoch yenpuet allohuen ñeñt pueyochresha' o' perr te' Parets. ¹⁶ Ñeño'mar te'pa' o'ch notas: E'ñe pocte' o'ch se'mñoch Estéfanas, ñaña ama't allohuen po'poñechno acheñ ñeñt chocma torrapretetsa Yomporecop. ¹⁷ Napa' te'pa' atarr nocshena tarro'mar o' huapa arr nesho masheñ Estéfanas ñaña Fortunato ñaña Acaico. Tarro'mar sapa' ama't ama sehuapopa' ñetpa' o' huapuet. ¹⁸ Ñetpa' atarr coshatosnet neyo'chrocmañen. Ñato' sapa'cho'ña o'te' coshataset. Cohuenepa'ch señch acheñ ñeñt atet petsa.

¹⁹ Ñaña allohuen ñeñt ame'ña'yetsa arr Asio'marpa' mueneñet o'ch huomñcha'taset ñamet añ necarto'. Masheñ Aquilapa'cho'ña mueneñ o'ch huomñcha'tas epuet puetapor Priscila. Ñaña allohuen masheñneshá' ñaña nochaneshachno ñeñt pame'ñeño'tet ap'chetset Aquilapahuo mueneñet o'ch huomñcha'taset ñamet. Tarro'mar e'ñe yepar-rocmateño' epay Yepartsesharpa' o' huomñcha'taset añ necarto'. ²⁰ Ñaña allohuen masheñneshachno ñaña nochaneshachno ñeñt arro'tsa'yenpa' mueneñet o'ch huomñcha'taset ñamet. E'ñe semorrentanna'teño'pa' atetcha' sehuomñcha'tanna'tena ñeñt atet poctetsa Partsocop.*

²¹ Añ coñe'tpa' o'ch nequellca' ñaña e'ñe na noto', attoch o'ch nehuomñcha'tas ñaña.

²² Ñerra'm esesha' ama morrentenaye Yepartseshar Jesucristo ñeñtña atet petsa a'coñchatareftepa'ch. Te'pa' ñeñtch notas, huerrnayepa'te' ñeñt Yepartseshar yepen.

²³ Yepartsesharepa'chña Jesucristo sa'natenaya allohuenes. ²⁴ E'ñe name'ñeño' Cristo Jesús atarr nemorrentensa. Te'pa' ñeñtch notas, ñeñt'pa' attetepa'chña Nompore. Allohua.

Pablo

* **16:20** Po'ño'ch oteneý, "E'ñe semorrentanna'teño' choch setso'ttsa'pa'tannena ñerra'm esempo sehuomñcha'tanna'tena ñeñt atet poctetsa Partsocop." Ñeñt'pa' atet ye'chete't ahuat.

AÑ PUEPAÑ SAN PABLO PO' CARTA ÑEÑŦ QUELLQUËRRANERR CORINTO' MARNESHA' 2 CORINTIOS

Atto Pablopa' alla quellquërranerr carta añecop ñeñŦ ame'ñetsa anetso Corinto

¹ Masheñeshacha' ñaña nochaneshacha' ñeñŦes allohuenes ame'ñenaya Yompor ñaña e'ñe same'ñeñoŦ chocma sapçhena Yomporecop all anetso Corinto. Ñaña añ cartapa' añecpa'ñaña nequellquëñ allohuenacop ñeñŦ o' pueyochresha' perranet Parets ñeñŦ apçha'yetsa allemeñ anetso Acayo'mar. Na Pablon o'ch alla nequellquërrnaserr po'poñ carta epan masheñ Timoteo. Napa' ñeñŦen Jesucristo puellsensaren tarro'mar atet muenen Yompor. ² Te'pa' e'ñe nehuom'cha'teñotes sa napa' o'ch notas: Yomporepa'chña sebensare'tam'pene' ñeñŦ nanac Parets epuet Puechemer Jesucristo ñeñŦ Yepartseshar yepen. Ñetepa'chña socshatene' e'ñe sa seyoçhro allohuenes.

Yomporpa' ñachña chocma yocshatene' allempo es yehuenoya

³ Aye'choçhtaterrapo'ch Yompor, ñeñŦara ñeñŦ Pompor pen Yepartseshar Jesucristo. ÑeñŦara Yompor ñeñŦ atarr amueraña, ñeñŦcha' chocma yocshaterre' allempo es yellcatene' yeyoçhro. ⁴ Ñerra'm esempo huennaya pa'namen ñeñŦ amueroçhtatañtetsa ñapa' ñachña chocma yocshaterre'. Tarro'mar o' coshaterrey Yompor, allochña yapa'çho'ña attoch yeñoteñ o'ch yocshater yaña masheñesha' ñerra'm esempo huapanet ñamet ñeñŦcha' mueroçhtatahuet. Añ poçtetsa o'ch yocshaterranet ñet atto Yomporpa' o' coshaterrey yaña. ⁵ Atto nanac yemueroçhtapreteña Cristo tarraña ñachña ello atarr yocshaterre'. ⁶ ÑeñŦo'marña te'pa' o'ch notas, ñerra'm esempo nemueroçhtena na, ñeñŦpa' e'ñe po'ñoçh socop, tarro'mar ñerra'm esempo nemueroçhtena napa' ñeñŦpa' alloch socsherra samña attotcha'ña sequeshperra. Ñaña ñerra'm esempo coshaterren Yompor ñeñŦpa'çho'ña alloch nocshaterres samña. Allochñapa' e'ñe socsheñeshocmañen çhocmach sa'huanten allohuen mueroçhteñets ñeñŦ atet nepena na. ⁷ ÑeñŦo'mar napa' neñotenes çhocmach sa'huanta' ñeñŦ echarr senten. Tarro'mar napa' neñoteñ ñerra'm allpon semueroçhtapretna, elloña allempopa' o'ch alla e'ñe socshapreterrna atto Yomporpa' ñachña chocma yocshaterre'.

⁸ Ñehua, te'pa' nemneñ o'ch masheñeshacha' señoten ñeñŦ atet nemueroçhtosa ahuaña all anetso Asia. Allempopa' napa' atarr nanac nellquëna. Napa' notapañ çhach nerroma, amach erroŦ nepe o'ch na'queshpata nañeña. ⁹ Po'ñoçh napa' neñoteñ neyoçhro te'pa' o' çhapona ñeñŦ nocop allempoch nerroma. Tarraña añecpa huapona echarrteñets atet, allochñapa' attoch e'ñe neñoteñ Yomporcha'ña neyemtena. Amachña nañeña yemtetso. Tarro'mar Yompor po'huamencot ama't arromña'pa' çhocmach tantater. ¹⁰ Tarraña ama't muene' nerromañ Yomporpa' allorocma tantaterren po'huamencot attoch ama nerromo. ÑeñŦo'marña napa' neñoteñ Yomporpa' çhocmach a'queshpaterrey. ÑeñŦo'marña te'pa' ñachña chocma neyemtena. Neñoteñ allo'na sen na'queshpatnene' ñerra'm esempo es nohuerroyerr ñeñŦ atarr echarr. ¹¹ Ñaña añ poçtetsa o'ch sema'yocham'penna attoch seyepa'n. Ñaña shonte' acheñenesha' ñerra'm esempo eñotennet atto Yomporpa' çhocma a'natenna e'ñe puema'yocheñoŦet ñet, allempopa' çhocmach parasyoso'teñet Yompor atto a'natenna.

Atto Pablopa' ama eñotenano puehquëñ

¹² Ñehua, te'pa' o'ch notas po'poñ ñeñŦ atet noctape'chen. Napa' ñeñŦña atarr nocshatene' nanac. Napa' neñotena neyoçhro po'ñoçh arr patsropa' çhocma noctape'chen

ñeñt atet pocte' enten Parets. E'ñe name'ñeñoť Yompor, napa' ama nemno o'ch esha' neshca'yes ama't mamesha. Elloña sapa' ama nemno o'ch neshcas ama't e'ñe mamesha. Ama aña neyemteno ñeñt atet yocťape'chen ya acheñey arr patsro, añcha'ña neyemteñoť Yompor attoch ñach neyenpuene'. E'ñe puemuereñoť ñachña neñotatene' ñeñt cohuen enten ña. ¹³ Ñehua, sapa' čhate' sotapañ napa' attate' neshquēnes ñeñt notenes necartot. Tarraña ñeñt allpon notenes necartotpa', o'ch selleye' allochñapa' esheccha' señoč ñeñťpa' e'ñe po'ñoč atet, añ ñoñetspa' ama shequēntsoyaye. Napa' necuenes esempohuañen o'ch e'ñe seyemtenna e'ñe poctacma, o'ch e'ñe señoč ñeñt atet notenes necartot ñeñťpa' e'ñe po'ñoč atet. Napa' ama čhoje' neshquēnsa. ¹⁴ Ama't te'pa' ama e'ñe poctacmaye' seyemtenno, tarraña ñerra'm seyemtenna e'ñe poctacma, allem-poñapa' ñerra'm esempoch huerra Yepartseshar Jesúsapa' atto socshenna na, napa'čho'ña allempopa' nocsherrsach saña.

Atto Pablopa' sechenañ o'ch emo'tenana' corinto'marnesha'

¹⁵⁻¹⁶ Napa' notenapañ čhocmate' seyemtenna, tarro'mar napa' ama čhoje' neshquēnsa. Ñeñto'mar napa' ahuaña nesechena o'ch ahuen Macedonio, napa' noctape'cheñ o'ch nemo'tnomues. Choncha'ña metats ñaña Macedonio, allempoña noctape'cheñ o'ch nerr Macedonioťpa' o'ch alla nemo'tnerrser. Attoch puepocheño o'ch nocshatterres, ñaña attoch seyepa'n saña o'ch alla ahuerren Judeo. ¹⁷ Tarraña ama't atet noctape'cheneñ o'ch nemo'terrsañpa' tarraña ama neseno o'ch nabčherrsá'; ñeñto'marña sapa' čhate' sotenapañ napa' epuote' noctape'chen cohuen. Sapa' attate' sentenen atet ñerra'm acheñ ñeñt attach es puechena arr patsro. Ama'tcha' otenan acheñenesha' ñeñťcha' atet pa, tarraña pueyočhroñapa' cotape'chenayach po'poñ. ¹⁸ Tarraña napa' ama atteye' noctape'cheno. Ñerra'm es notenes ñeñťcha' atet neřapa' neyočhroñapa' ama esoye' noctape'cheno po'poñ. Tarro'mar Yompor ñerra'm es oteney ñeñťcha' atet řonaypa' atetča'čho' pennay tarro'mar ñapa' ama puenesho po'ñoñ. ¹⁹ Ñaña Yompor Puechemer ñeñťara Cristo Jesús ñerra'm es oteney ñeñťcha' atet řonaypa' atetča'čho' pennay, čhocmach orrtateñ e'ñe po'ñoč, tarro'mar ñapa'čho'ña ama puenesho po'ñoñ. Ñeñťara Jesucristo ñeñt čhocma yeserrpare'tatenes epan masheñ Silvano ñaña masheñ Timoteo. ²⁰ Tarro'mar allohuen ñeñt allpon atet oteney Yompor ñeñťcha' atet perrnay, Puechemerña ñeñt Cristo Jesús ñaña e'ñe etsotatuene' po'ñoñ. Ñeñto'mar ñerra'm esempo yoten "attetepa'ch Yompore yocop" yeñoteñ Cristopa' ñaña e'ñe etsotatuene' Pompore po'ñoñ yocop. Allochñapa' attoch e'ñe cohuen ya'ye'čochťateññañ Yompor. ²¹ Ñeñťara Yompor ñeñt ahuañencat pene' allohueney yeyočer e'ñe yame'ñeñoť Puechemer Cristo. Ñeñťara Yompor ñeñt yellsensene' attoch yetorra'yesa ñocop. ²² Ñaña ñapa' ahuo't apuerrey attoch yeñoter o' puechemer perrey ña. Ñeñťpa' ñato' o'ch netma'ntacha atet ñerra'mrrate' aynatuareťey Yomporecop. Ñaña ahuo't apuerrey Puecamquēñ ñeñťcha' yečherrtsa yeyočhro ñeñťpa' ñeñťcha'ña yeñotatene' orameñ shonte' ñeñt o'patatenya Yompor.

²³ Te'pa' o'ch neñotaterrser ñeñt atet noctape'chen ñeñto'marña ama nemo'terrso ahuaña. Yomporpa' eñotenen ñeñťcha' atet notas ñeñťpa' e'ñe po'ñoč atet. E'ñe nemor-renteñoťes sapa' ama nečerro all seyčhena Corinto. Tarro'mar ama neto, ñerra'm netañ o'ch nečhap seshopa' čhate' muene' neče'ptare'tyesoses e'ñe sa satpare'teñoťen. Ñerra'm atetpa' čhate' alla nellcaterres. Ñeñto'mar te'pa' o'ch notas e'ñe nemor-renteñoťes sapa' attotña ama nečerro sesho. Ñerra'm po'ñočťe' ama atteye' notensopa' Yomporepa'čhña na'chencaterre'. ²⁴ Ama añecpaye' notenso attoch sapa' o'ch sa'mčha'tareťer seperren na, ñeñťes ame'ñenaya Yompor. Añcha'ña netorrapretasa

attoch neyenpas. Ama't atto o' huomenc same'ñeñañ Yompor; napa' chocmach ne'torrena socop allochñapa' attoch señañeshocmañen socter Yompor e'ñe poctacma.

2

¹ Ñehua, ama'tcha' nemneñeñ o'ch alla ne'cherrerr sesho tarraña napa' ahuo't alla noctape'cherr ello neyo'chro, noten amach neto tarro'mar ama nemno o'ch ne'chap nellquëñesha' sesho te't sapa' o'te' alla nellcaterr'serr samña. ² Tarro'mar noten ñerra'm ne'ñotare'teñotes na o'ch alla nellcaterrespa' attoch nellcaterres sa, sellquëñapa' amach nocshapretaso, tarro'mar sapa' sañeña e'ñe nocshatene'. ³ Ñeño'marña ama ne'cherro sesho ahuaña, aña nequellconas carta ñeñtcha' soctape'chattere' e'ñe cohuen. Allochñapa' ñerra'm machayota ne'cherr sesho ñerra'm o'ch alla soctape'cherr cohuen, ñeñtcha'ña atarr nocshapretuerra. Allochñapa' amach tama nellquënsa tarro'mar añ poctetsa socop chocmachña e'ñe socshatteren. Ñaña neñotenes ñerra'm esempo nocshena na sapa'cho'ña allohuenespa' o'ch e'ñe socsherra. ⁴ Ñaña allempo nequellconas añ carta ahuañapa' e'ñe nellquëñesha' nequellquënnas. Ama neñmateno neyo'chro ama't mamesha, e'ñe ñeña nenen neyo'chro. Elloñapa' e'ñe neya'chpeñesha' nequellquënnas ñeñt carta. Napa' ama añe'cpaye' nequellquënnaso carta attoch nellcatas sa; añe'cpaña nequellquënnas attoch sapa' o'ch seño'ch atarr nanac nemorrentensa.

Arrpa' all cotape' chatanet attoch peretnet atparñañ

⁵ Ñaña añ acheñer ñeñt atpare'tetsa seshopa' ama naptayaya llecatenno na, añña ama't sapa'cho'ña allohuenespa' chocma llecatenes. Ñehua, tarraña ama't atteñpa' ñato' o'ch notas ama allohuenacmas atet petso, te't atta atarr natontaten ñoñets ñeñt ama atteyaye po'ño'ch. ⁶ Ñaña te'pa' o'ch notas, e'ñe pocte' atto o' secoñchatue ñeñt acheñer, te'pa' allohuach. Ama't shonteseñ ñeñtes pocte' entenayeñ o'ch secoñchattererr ñeñt atparñañ, tarraña te'pa' ñeñt'ach. ⁷ Te'pa' añña poctetsa o'ch alla se'pretner, allochñapa' attoch socshater, te't atta nanac llequëna, puellquëño'pa' o'te' alla que'chpuerran Yompor. ⁸ Ñeño'mar te'pa' notenes añ poctetsa o'ch sorr'tatoñ cohuen ñocop attoch eñoter po'ño'chpa' atarr semorrenteña. ⁹ Ñeñe'cpaña noctape'chatas ahuaña necartot ñeñtcha' atet sepe' ñeñt atpare'tetsa attoch netpatenes o'ch neñotas ñerra'm po'ño'chte' e'ñe same'ñena ñeñt poctetsa Yomporcop, ama't erroteno'tsensa. ¹⁰ Ñaña o'ch noterr'serr, ñerra'm esesha' se'pretner sa, napa'cho'ña e'ñech pocte' nenteñ naña a'pretnare'tterrepa'ch. Ñeñt chocma na'pare'tene' ahuaña te'ña ñapa' o' ne'pretner, ñeñt'pa' e'ñe socop. Ama't Cristopa' e'ñe entenen. ¹¹ Ñaña añ e'ñe poctetsa o'ch ye'pretnannena. Allochñapa' ama't oneñe'pa' amach alla a'psaterrye Yompor. Tarro'mar ñapa' yeñoteñ chocma e'nenan attoch shequëney.

Atto Pablopa' atarr llequënana corinto'marnesha' allempo ama huerra' Tito Corintot

¹² Te'pa' o'ch neñotaterr'serr ñeñt atet ne'pa ahuaña. Ahuaña allempo ne'cherr Troaso, napa' o'ch neserrpare'tatanetañ Cristo po'ñoñ ñeñt alloch yequeshperrapa' shonte' acheñenesha' mueneñetañ o'ch e'mñotoñet Yepartseshar po'ñoñ, ¹³ tarraña napa' ama't mamesha ama neñmateno neyo'chro tarro'mar allpa' ama nentose masheñ Tito. Ñeño'mar ama na'po all, atta neso'tnerranet, o'ch ne'cherr all anetso Macedonia.

Yomporpa' chocma moñenya allempo es yehuenoya

¹⁴ Yeparasyoso'chepa'ch Yompor tarro'mar ñapa' chocma moñenya allempo es yehuenoya. Ñaña e'ñe yeyemteñoñ Puechemer Cristo Jesús'pa' chapaterreycha' cosheñtso. Ama't yapa' o' muenaterrey attoch ya'poterrñañ po'ñoñ erraparen, allochñapa' attoch epa'huerra po'cohuenña erracmañen. Ñato' o'ch netma'ntacha atet ñerra'mrate' ñeñt atarr es eñmosa'ttetsa, chach epa'hua e'ñe cohuen erracmañen

pueñmosañteña. ¹⁵ Tarro'mar ñeñtey a'potene' Cristo, Pomporñapa' e'ñe atet enteney ñerra'mrrate' ñeñt eñmosañtetsa e'ñe cohuen ñocop, ñeñtcha' epa'huerrtsa erracmañen allo'tsa'yen acheñenesha' añ patsro. Patanta'tetspa' pame'ñeñotetpa' a'queshpataretterretcha', patanta'tetsña ñeñtcha' ama ame'ñerrtsopa' ñetpa' chenca'huerretcha'. ¹⁶ Acheñenesha' ñeñtcha' chenquèrrtsapa' e'ñech atet enteññañet Yompor po'ñoñ ñeñt yeserrpare'ten ñerra'mrrate' ñeñt amtsañtetsa, añña ñeñteycha' queshperrtsapa' yañapa' o' yenterrñañ Yompor po'ñoñ atet ñerra'm es ñeñt ama ahuañaño alloña yapa' corretsayach. Ñato' o'ch netma'ntacha ñerra'mrrate' ñeñt atarr eñmosañ ñeñtcha'ña ya'crraterre' errponohuañen. Esesha'huachñaca' pocte' enterrña Yompor ñeñtcha' serrpare'terre' po'ñoñ. ¹⁷ Añ pocte' enten Yompor ñeñtcha' serrpare'tene' po'ñoñ ñeñt e'ñe pueñmañeshocmañen serrpare'tene'. Atet ñerra'm ya, tarro'mar yapa' ama çhoye' yetseteno Yompor po'ñoñ acheñ poçtañño ñeñt atet pena shonte' po'potantañ acheñenesha'. Ñetpa' atet penet attoch pocshateñoñ acheñenesha'pa' o'ch es apa'yenanet. Añcha'ña e'ñe yeñmañeshocmañen yeserrpare'teññañ po'ñoñ atet llesenseny Yompor. Ñapa' enteney ñeñt atet ye'ñorena ñocop e'ñe yeyemteñoñ Puechemer Cristo.

3

Atto Pablopá ama pallteno o'ch quellcoñet carta attoch cohuen enteñ acheñenesha'

¹ Sapa' çhate' sotenapañ napa' o' alla neñerrerr e'ñe cohuen, ñato' nocpate', ñato' çhate' nommo'chena. Tarraña ñeñtpa' ama atteyaye. Amapa' ñato' sapa' çhate' sotenapañ añte' nepalltena carta ñeñtcha' señoate' atto po'poñ anetso'marnesha'pa' e'ñech cohuen entapretennet atto napa' cohuen netorrena Yomporecop. Tarraña napa' ama es nepallteno. Ñehua, ñaña çhate' sotenapañ añte' nepalltena carta ñeñtcha' sequellcon sa alloch señoatich po'potantañ acheñ atto e'ñe cohuen sentenen na, atet pena po'psheññeçhno ñeñt serrpare'tets attoch cohuen enteñ acheñenesha' e'ñe ñañaña. ² Tarraña napa' ama nepallteno ñeñt po'poñ carta ñeñtcha' eñotate' po'potantañ acheñenesha' ñeñt atto netorrena na Yomporecoppa' ñeñtña atarr sherbets. Tarro'mar sapa' saña e'ñe sherbets atet ñerra'mrrate' necarta nepenes. Tarro'mar allempo acheñenesha' eñotenset sa atto te'pa' o' soçtape'cherr cohuen Yomporecop, ñeñtcha'ña eñotatenahuet ñeñt atto netorrena na, ñeñtpa' ñeñtña e'ñe sherbets Yomporecop. Ñato' o'ch netma'ntacha atet: Na necarta ñeñtña eñotatenahuet ñeñtpa' all aquellcaret e'ñe neyoçhro ñeñtcha' lleyen allohuen acheñenesha' ñeñtcha'ña eñotatenahuet. ³ Ñaña sa atto te'pa' sorrdaten ñeñt e'ñe cohuentetsa, acheñenesha'ñapa' o'ch eñotapretaset ñeñtpa' po'ñoçh Cristo po'taruas pene'. Ñato' o'ch netma'ntacha atet: Sapa' atet sesherven ñerra'mrrate' yecarta ñeñtcha' eñotatenahuet, ñeñt cartapa' o' quellca'huonay Cristo e'ñe ña. Añ cartapa' ahuo't aquellca'huareta ahuañmo'choteñ allempo yapa' yeçhapatonas Yompor po'ñoñ ñeñt same'ñatate' Yompor. Tarraña añ cartapa' ama ayo'e' aquellcaretto tinto, añña Yompor Puecamquëñoñ anareta, ñeñtara Yompor ñeñt ama arromñañeshayaye. Tarraña añ cartapa' ama arreye' aquellcarete mapyettallo. Añpa' arrña aquellcaret e'ñe ya yeyoçhro ama't ñeñtey arromñañey.

Atto Yomporpa' a'pocstaterrnay e'ñe etserra

⁴⁻⁵ Napa' neñoteñ ama nepallteno po'poñ carta ñeñtcha' eñotatenahuet. Saña ñeñtes e'ñe necarta nepenes. Ama notenso e'ñe ñañaña nohuamencoñ es nepa'yen. Añña e'ñe neyemteñoñ Cristo napa' netorrena Pomporecop. Ora allohuen es nepa'yen Yomporña ahuañencat nepene'. ⁶ Ñeñtara Yompor ñeñt ahuañencat yepene' allochñapa' attoch yeserrpare'terrñañ poçtañña ñeñt atet a'pocstaterrnay e'ñe etserra. Añpa' ama atteyaye

atef pa ahuaŧ Yompor allempo apan Moisés po'ñoñ ñeñŧ anarettatse't ñeñŧcha' e'ñe yet-sotuañ esheccha' a'queshpateney Yompor. Ñeñŧ ama etsotaye'te, ñocpuetpa' o' anarettet rromuetcha', chenguërretcha'. Tarraña ñeñŧ atto a'pocatuerrnay Yompor etserra, ñeñŧpa' atto apueney Puecamquëñ alloch yocrra'huerra, ŧayoteñ errponohuañen.

⁷ Añ ñoñets ñeñŧ aquellcarettatsa mapyettallo, ñeñŧ ama etsotenaye, ñocpuetpa' o' anarettet rromuetcha', chenguërretcha'. Ñaña ahuaŧ allempo Yomporpa' apan Moisés po'ñoñ atef, e'ñe po'cohuentañoŧ apan Moisés. Moiséspa' atef orrta pa'clloyoŧ cha poptena, atarr a'rrechatañ. Ama't israelneshapa' ama eshcaye' cohuaclle'cheto. Tarraña ama't atef pañpa' acopoteñ maya'huanerr ñeñŧ atto poptena. ⁸⁻⁹ Ama't añ coŧaŧñatser ñeñŧcha' ya'chencaterrayeñpa' tarraña Yomporpa' atarr cohuenoŧ orrtach allempo. Te'ña e'ñe ellonetpa' o' alla orrtaterrnayerr ña poctañña attoch e'ñe pocte' entuerrey. Ñeñŧpa' e'ñe Parets Puecamquëñoŧ orrtatuerrnay ñeñŧo'marña ñapa' ello cohuentena nanac. ¹⁰ Ñeñŧ atef popta ahuaŧ Moisés pa'clloyoŧ allempo aŧ Yompor po'ñoñ, te'ña ñeñŧpa' o'huañ e'ñeye' cohuenaye' yeñch tarro'mar te'pa' eñall Cristo po'ñoñ ñeñŧ atarr cohuen yenten, ello metanenan atto cohuenta't Moisés po'ñoñ. ¹¹ Tarro'mar ñeñŧ atef cohuenta't Moisés ñeñŧpa' acopoteñ maya'huanerr atto cohuentena. Tarraña te'pa' atto cohuentena Cristo po'ñoñ ñeñŧpa' amach ahuañañaŧterro, ñeñŧo'marña ñeñŧpa' ello metanenan Moisés po'cohuenña.

Atto Cristo po'cohuenña ñeñŧpa' amach ahuañañaŧterro

¹² Yapa' o' yeñoterrñañ Cristo po'cohuenña ñeñŧpa' amach ahuañañaŧterro. Ñeñŧo'marña yapa' ama yepenquëñoŧeye' yeserrpare'teññañe po'ñoñ. ¹³ Yapa' ama atteye' yepeno atef pa ahuaŧ Moisés. Ñapa' cha huañerr atto popta pa'clloyoŧpa' ahuo't ca'macclle'cha allochña israelneshapa' amach eñcheto pa'clloyoŧ o' huañerr atto poptena. ¹⁴ Israelneshapa' ama çhapaneto pueyoçhreto attoch coŧape'cherret cohuen Yomporecop. Ama't teme'ttsen ñerra'm esempo lleyeññañet ñeñŧ a'pocatat Yompor ahuaŧ attaretach amach çhapaneto pueyoçhro ñeñŧ atef muenen Yompor. Po'ñoçhpa' añoŧcha'ña çhaponaya yeyoçhro ñeñŧ atef muenen Yompor e'ñe yeyemteñoŧ Puechemer ñeñŧ Cristo. Israelneshapa' ama cohuenaye' enteñeto Cristo ñeñŧo'mar noten ñetpa' teme'ttsen atef penet ñerra'mrrate' çho ca'macclle'chenet. ¹⁵ Po'ñoçh ama't teme'ttsen ñerra'm esempo e'mñotenet all lleyeññañet Moisés po'ñoñ amach es eñoteneto. Chach ottenet ñerra'mrrate' cha es a'npuenahuet attoch amach eñotoñeto Yompor poctañña. ¹⁶ Tarraña ama't puesheñarrotëya ñeñŧey erra'tseney acheñrey, allemputeñ yaguër Yepartseshar Cristo, allemputeñcha'ña çhaponaya yeyoçhro ñeñŧ atef muenen Yompor; Cristopa' ñachña yehuapore'tamŧse'ña ñeñŧ ya'npuenayeñ. ¹⁷ Ñeñŧ yoten Parets Puecamquëñ, ñeñŧara Yepartseshar Cristo Puecamquëñ. Ñaña atarr cosheñtso'tseney ñerra'm esepoch çhaponaya Cristo Puecamquëñ yeyoçhro. O'huañcha' yemueroçhtame'ta attoch puechemer perrey Yompor, e'ñech yocsheñsha' yocter Yompor. ¹⁸ Allohueney ñeñŧey ame'ñenaya Yepartseshar Cristo, ña Puecamquëñpa' ñachña ya'po'poñeterre', allochña' allo'nach yesen cohuentapretaya Cristo. Yapa' ama atteyayye ñerra'mrrate' ñeñŧ a'nataclle'charet attoch amach enteññañeto Cristo po'cohuenña. Yapa' e'ñe yecueñoŧ Cristo po'cohuenña, yapa'çho'ña o'ch yecohuentapreteña yaña, atef ñerra'mrrate' rerep poptetsa ñerra'm çho yecuach atrretonet.

4

Atto Pablopa' atarr cohuen yeçhatenanet Yompor po'ñoñ

¹ Yomporpa' e'ñe puemuereñoŧ muenatenen o'ch netorreññaña ñeñŧ nanac sherbets ñocop. Ñeñŧo'marña napa' ama nellquëñoŧeye' neserrpare'teññañe po'ñoñ. ² Ñeñŧ

a'nahua es pa'yenet ñeñt apencochen yenten yocop ya ñeñtey torretsa Yompore-coppa' ñeñña napa' o' na'ypo'ñañper. Ñaña napa' ama es neshquẽñoñ nepa'yeno masheñeshacop. Ñaña napa' allempo neserrpare'tateñ acheñenesha' ama choye' na'po'poñeteññañe Yompore po'ñoñ. Añcha'ña e'ñe na'poteññañ Yompore po'ñoñ e'ñe po'ñoñ ñeñt atet oten po'ñoñ. Yomporepa' entenen ñeñt atet notenes ñeñtpa' e'ñe po'ñoñ atet. Ñaña ama't erra'tsena acheñer ñeñt eñotene' ñeñt e'ñe pocte' entenet ñet pueyoçhretopa' ñetpa'cho'ña e'ñech cohuen entapretennet. ³ Atto yeserrpare'teññañ Yompore po'ñoñ ñeñt po'ñoñ alloch yequeshperra tarraña patantarr acheñenesha'pa' amach çhapaneto pueyoçhreto ñeñt alloch yequeshperra. Ñeñt atet petsapa' allo'na senet allcha' chenca'huerret. ⁴ Ñeñtara acheñenesha' ñeñt ama ame'ñetso, ñetpa' añña po'yompore penet arr patsro ñeñt oneñet, ñeñña ama muenatenaneto o'ch çhapanet pueyoçhreto Yompore po'ñoñ; allochñapa' attotcha' amach eshcaye' cohuen enteññañeto Cristo po'cohuenña. Ñapa' attecma cohuentena ñerra'mrrate' Pompor Parets ñeñt ama entpahuoyaye. Ñeñt po'cohuenñapa' ñeñtara yoten cohuen ñoñets alloch yequeshperra. Ñato' o'ch netma'ntacha atto oneñetpa' a'nataclle'chenanet attochña amach eshcaye' cohuen enteññañeto Cristo po'puetarenña. ⁵ Tarro'mar ñeñtey e'ñe yeñmañeshocmañen seserrpare'tatene'pa' ñeñtpa' ama añecpaye' atet yepeno attoch senteney ya ñerra'mrrate' samo'mte' sepeney. Añcha'ña yeserrpare'tatenes Jesucristo, ñachña Separtseshar sepen. Yapa' añña atarr yetorrena socop e'ñe yemorreneteñoñ Jesús. ⁶ Ñehua, yapa' yeñoteñ atet ot ahuañ Yompore, ñeñtpa' atet ot: "Eñalletepa'ch pueta're' allochñapa' o'huañcha' checmet." Ñeñtara Yompore te'ñapa' o' a'puetarsañperrnay yaña yeyoçher allochñapa' attoch yeñotater po'potantañ acheñenesha' atto Cristopa' ña orrtatene' Pompor po'cohuenña.

Ama't ama esoshe'mayayye e'ñe yeyemeteñoñ Yomporepa' ñapa' çhocmach ahuañencat peney

⁷ Ñeñtpa' atto Yomporepa' ahua't chorrerria yeyoçhro po'cohuenña, ama't yapa' arromñañaya, ama esoshe'mayayye. Añecopña o' chorrerria ya ama't ñeñtey ama esoshe'mayayye, allochñapa' attoch eñochet ñeñt atto atarr ahuañencat yentenapa' ñeñtpa' ama yoyaye yehuomenc, ñeñtpa' Yomporeshoñ huena. Ñato' o'ch netma'ntacha atet ñerra'm ahuañ po'poñ acheñ ñerra'm esempo atarr es morrentenetpa' o'ch esha'teñet patsrrogo ama't ñeñt coyenpa' ama e'ñe cohuenayaye. ⁸ Ñehua, ama't allenñateñcha' huaponaya ñeñtcha' atarr ya'llpatate', tarraña çhocmach eñall attoch yesuanemñ. Ñaña ama'tcha' atarr yellquẽñañ nanacpa' tarraña çhocmach eñall attoch yesuanemñ allohuen ñeñt allcatañtetsa. ⁹ Ñehua, ama'tcha' cotare'teney ñeñt ye'moñe'tene' tarraña Yomporepa' amach a'ypo'ñenye ama't mamesha. Ama'tcha' o'shshe'mayet patsopa' çhocmach alla yetanterra. ¹⁰ Chocmach muene' yerromañ atet pete't Jesús. Tarraña atto Jesúsapa' o' alla tanterra yapa'cho'ña attoña o' a'queshpaterrey allempo es yehuenoya. Attochña yeñotach acheñenesha' atto Jesús te'pa' o' betterra. ¹¹ Atto allponmat yocrrena añe patsro yapa' çhocmach pomatatenyet yerromuepa'to'. E'ñe yemorreneteñoñ Jesús atet penyet. Tarraña atto Jesúsapa' o' alla tanterra, yapa'cho'ña attoña a'queshpaterrey allempo es yehuenoya ama't yapa' arromñañeneshaya. Attochña yeñotach acheñenesha' atto Jesús te'pa' o' betterra. ¹² E'ñe netorreñoñ Cristocop çhocmach nanac nemueroçhetuanena autsanca' rromuets. Tarraña ñeñtpa' atarr cohuen socop tarro'mar ñeñtpa' alloch e'ñe sequeshpa'huerra samña.

¹³ Añmapa' ñeñt atet oten Yompore po'ñoñ ñeñt atet anua're' ahuañoteñ ñeñtpa' atet oten ñeñt quellquẽ' libro Salmos, "Napa' atarr neyemteña Yompore ñeñto'mar atet ne'ñorena ñocop." Yapa'cho'ña e'ñe attecma yocape'chen yaña. E'ñe attecma yeyemteña Yompore, ñeñto'mar yapa'cho'ña attecma ye'ñorena yaña. ¹⁴ Yapa' yeñoteñ Yomporepa' ahua't

tantaterran Puechemer ñeñtara Yepartseshar Jesús. Ñeñto'mar yeñoteñ yapa'cho'ña tantatuerreycha' Yompor e'ñe atet ñan Puechemer Jesús, allochñapa' ama't sapa' o'ch chapatuerres allohuenes e'ñe parro ñesho. ¹⁵ Ñeñto'marña napa' Yomporña nemnate' o'ch nemuerochtame'ta; ñeñtpa' e'ñe socop, allochñapa' attotcha' Yompor puemuereña chapcha' shonte' acheñeneshesho, allochñapa' shonte'ch acheñenesha' allo'nach senet parasyoso'tnomuet Yompor, attochña e'ñe cohuen ya'ye'chochtateññañ Yompor.

¹⁶ Ñeñto'marña napa' ama nellquëñoteye' netorreññañoña Yompor po'taruas. Ama't nechetspa' allo'na sen huañuanmats atto noumencna'ntena, tarraña necamquëñña' allo'na sen huomencatnomuets e'ñe pate'tets yet. ¹⁷ Tarro'mar ñeñt atto allpon yemue-rochtame'tyena a'ñe patsro, ñeñtpa' ama esoyaye, e'ñe mamecpa. Ñeñtpa' añecpaña huennaya allochñapa' attoch huapatuerrnay ñeñt atarr nanac cosheñets ñeñt ama ahuañaño ama't errponaña, ñeñt ello nanac atarr cochnesha'tetsa, ñeñt atarr nanac cohuen. ¹⁸ Tarro'mar yapa' ama a'ñeye' yeyemteno ñeñt allpon cochnesha' yentyen arr patsro, tarro'mar añechno ñeñt allpon yentyenpa' huañerrcha'. Yapa' añña yeyemtena añechno ñeñt cohuentetsa Yomporecop ñeñtpa' ama entpahuoyaye ñaña ñeñtpa' amach huañerro ama't errponaña.

5

Atto Yomporpa' o' añño'terrnay ñeñtcha' yepaquëll yeperr all pue'ntaño

¹ Yapa' yeñoteñ ñeñtey arromña'ey, yechetspa' chocmach huañerr. E'ñe mamecpa sherbeney a'ñe patsro, atet ñerra'mrrate' yequërpachet ñeñt pocollashe'm all yem-anatena. Ñeñt pocollashe'mpa' mamecpach sherba'y. Yechetspa'cho'ña mamecpa sherbeney atto yocrrena a'ñe patsro ñeñt yepacllashe'm yepen. Tarraña yapa' o' yeñoter ñerra'm esempoch yerroma, Yomporpa' o' añño'terrnay ñeñtcha' yepaquëll yeperr all pue'ntaño allcha' yeycha'huerra, ñeñtpa' amach ahuañaña'terro. Ñeñtcha' yepaquëll yeperr allpa' ama arromña'eshaye' yechcatenaye, Yomporña yechcatene'. ² Po'ño'ch arr patsro yechets ñeñt yepaquëll yepenpa' chocmach es e'mnatatuene'. Ñeñto'marña yapa' atarr yemneñ o'ch yechorrerra ñeñtcha' yepaquëll yeperr Yompor pue'ntaño. ³ Tarro'mar yemneñ yecamquëñpa' o'ch chorrerrana ñeñtcha' pa'shtam perr Yompor pue'ntaño, allochñapa' yecamquëñpa' amach atta huocchapoterro chocmach eñall ñeñtcha' chorrena. ⁴ Tarraña atet ñerra'm te' orameñ yechets ñeñt yepaquëll yepen atto yocrrena arr patsro, chocmach eñall ñeñtcha' e'mnatatuene'. Ñeñto'marña yapa' atarr yemneñ ama't ama yerromuena', yechetspa' o'ch a'po'poñeterrnay Yompor tayoteñ ama't esempo huerra, ñeñtcha'ña pa'shtam perr yecamquëñ. Allochñapa' attoch yocr-rerra etserra correñets ñeñt amach ahuañaña'terro, ñeñtcha'ña a'huañaterre'ña ñeñt atto ya'rromña'te't. Ñato' o'ch netma'ntacha atet ñerra'mrrate' o'ch yechorra shetamuets ñeñt e'ñe etserra emarr ñeñtcha' yena' enot o'ch yepmata. Allochñapa' ñeñtcha' yena' enot, ñeñtcha'ña a'natue'ña mellashañ ñeñt yechorre't ahuaño'teñ. Allochñapa' attoch eñall ñeñtcha' yechorratenaya. ⁵ Ñeñt yemnatene' e'ñe atet ñeñtpa' Yompor ña atet yepatene', tarro'mar ñapa' chorrenya Puecamquëñ ñeñtña yeñotatene' orameñ eñall cohuenñats ñeñt o'patatenya ñeñtcha' aphuerrey Yompor.

⁶ Ñeñto'marña e'ñe yeyemteño't Yompor chocmach yecueñ ñeñtcha' atet perrnay esempo. Yeñoteñ yechets yepaquëll yepenmeñ arr patsro alla'paro'tsenmeñey attoch yeycha'huerra Yepartsesharesho. ⁷ E'ñe yeyemteño't Yomporpa' allo'nach yesen eñotnomue' ñeñtcha' atet perrnay ña, ama a'ñeye' es yeñotatenaye ñeñt yentyen arr patsro. ⁸ E'ñe yeyemteño't Yompor chocmach yecuen ñeñtcha' atet perrnay ña. Ñaña yapa' añ atarr cohuen yenten o'ch huañ atto yocrrena arr patsro, o'ch yesa'nom yechets ñeñt yepaquëll yepen arr attoch yechap allcha' yocrra'huerra Yepartsesharesho.

⁹ Yapa' ñeñtach paterr yema'yochrena chocmuepa'chña yocshateñ Yepartseshar, ama't allempo orameñ yocrrena e'ñe yechtso arr patsro, ñaña ama't allempoch yerroma o'ch yesa'nom yechets e'ñepa'ch Yepartsesharesho'tseney attoch yocshateñ e'ñe all pue'ntaño. ¹⁰ Tarro'mar o' anare'tta allohuenacpay yehuapuepa'to' Cristesho allcha' eñotatare'tey e'ñe puesheña'ttsoy. Allochñapa' allcha'ña atet pa'yesey erro'tencha' entapretuerrey, ñato' e'ñech cohuen entapretuerrey atto e'ñe cohuen es ye'pa'yen e'ñe yechtso' allempo yocrrena arr patsro, ñato' amach cohuenaye' entapretuerrye.

Atto Pablopa' e'ñe pueñmañesha' e'ñe cohuen es orrtatyen

¹¹ Ñeñtpa' ama't atarr yoro'chen yenteñeña Yompor, tarraña nocoppa' ama yoro'chenayaye tarro'mar Yomporpa' entenen e'ñe cohuen ñeñt atet nepena. Te'pa' aña palltetsa o'ch noctape'chater allohuen acheñenesha' attoch ñetpa'cho'ña e'ñech cohuen entapretennet. Ama't sapa'cho'ña te'pa' necuenes, nemneñ o'ch se'noter samña e'ñe seyo'chro atto e'ñe neñmañesha' cohuen es ne'pa'yen. ¹² Ñeñt atet notenes te'pa' ñeñtpa' ama añecpayaye o'ch alla neñerrerr cohuen ñeñt e'ñe nocpa. Añecopña o' alla neñerrerr atet allochñapa' o'ch alla socshapreterrna, allochñapa' attoch se'noch ote' ñeñt e'ñe ñañaña cohuen entetsa e'ñe pocta'pño'mara. Ama a'neye' eñoteno pueyo'chro ñeñt cohuentetsa Yomporecop. ¹³ Ñehua, sapa' cha'te' sotenen napa' cho' muene' nemospuena. Ñerra'm po'ño'ch cha nemospuenapa' ñeñtpa' e'ñe pocte' Yomporecop. Ñaña ñerra'm ama cho'ye' nemospueno atto e'ñe cohuenare' es noctape'chen ñeñtpa'cho'ña e'ñe pocte' allo nesherbene's sa. ¹⁴⁻¹⁵ Ñaña atto Cristopa' atarr morrentenya ñeñña ama yemnatenaye o'ch allo'na yesen corratsa e'ñe yocpa. Ñaña atto te'pa' ye'noteñ Cristo ahuo't rroma allohuenacpay, allochñapa' atto yocrrena yapa' o'huañcha' yocrra e'ñe yocpa. Ñeñtpa' ñeñtara yoten o' yerromaprecha Cristo, allohueney ñeñtey ame'ñenaya. Añcha'ña atet yocrrena e'ñe ñocop, ñeñt rromats yocop, elloñapa' alla tanterra yocop. ¹⁶ Ñeñto'marña napa' ama't puesheñarrapa' o'huañcha' cohuen nenteñ ñeñt e'ñe cohuen enten po'potantañ acheñenesha' arr patsro e'ñe ñet pocta'pño'maret, ñeñtpa' arromña'ta pocta'pña. Tarraña ama't na ahua'tpa' cohuen nentapretanete't pocta'pña. Ñeñto'marña napa'cho'ña tsena'tatnete't Cristo allempo, tarraña te'pa' o'huañ atet neñch Cristo. ¹⁷ Ñeñto'marña ñeñtey o' yeyemtera Cristo, Yomporpa' o' etserrataterrnay yocpa'pña e'ñe poctacma. Ñeñt atet yoc'tape'che't ahua't, ñeñtpa' o' huañerr, te'ñapa' o' e'ñe yoc'tape'cherr ñeñt e'ñe cohuenare' etserra.

¹⁸ Ñeñña o' atet perrnay Yompor ñeñt muenatan Puechemer Cristo, ñachña yamo'tstaterre' Pomporesho. Ñeñtara Yompor ama't napa' ahuo't llesensa'n attoch neñotach acheñenesha' allochñapa' ñetpa'cho'ña o'ch amo'tsterranet ñamet Yompor. ¹⁹ Ñaña atto Yomporpa' muenatan Puechemer Cristo allempopa' ñachña allo'na sets yamo'tstataya allohueney acheñeneshay Pomporesho. Allochñapa' o'huañcha' allo'na ochña'ñenesha' enteney Yompor. Attoña yapa' apuerrey llesens ellonet attoch yach eñotatyese' pa'namen acheñenesha' allochñapa' ñetpa'cho'ña attoch e'ñe amo'tsterranet Yompor. ²⁰ Ñeñto'marña yapa' allsensare'tey ñeñtcha' yetaruas yeperr ñeñteycha' eñosets cohuen Cristocop attoch yame'ñacha allohuen acheñenesha'. Ñeñtpa' atto Yomporpa' o' hua'ñerres o'ch same'ñera, tarraña ñeñtpa' e'ñe ya yeserrpare'tateño'es o' hua'ñerres Yompor. Ñeñto'mar te'pa' o'ch notas Cristocop, ñach same'ñerra allochñapa' attoch e'ñe amo'tsterrsa Yompor e'ñe poctacma. ²¹ Añ ñeñtara Cristo ñapa' ama't parrochapa' ama p'ano ñeñt ama pocteye' enteno Pompor Parets, tarraña Pomporña'apa' ahuo't muenateñ o'ch atet a'pare'tta ñerra'mrrate' acheñ ñeñt atarr ochña't. Tarraña ñeñt atto a'pare'ttapa' ñeñtpa' e'ñe yocop. Allochñapa' e'ñe yeyemteño't Puechemer Cristo, Pomporña yapuerre' alloch e'ñe pocte' enterrey.

6

Ñeñi torretsa Yomporecoppa' añ poctetsa ñocop chocmach orrtatenan ñeñi e'ñe pocte' enten Yompor

¹ Te'pa' atto yetorraprecha Yompor, napa' o'ch notas, amach e'ñe orrena sagapatstoñe Yompor puemuereña. ² Ñehua, ñeñt'pa' atet oteney Yompor po'ñon ñeñt' anuaret' ahuatoteñ, ñeñt'pa' Yompor atet otets:

Allempo sechore'tenen napa' e'ñe ne'mñotenes ñeñt' atet sotenen, tarro'mar allempopa' o' chap ñeñt' poctetsa o'ch saguërren. Nañapa' o'ch naguërres samã. Attoña napa' ahuo't neyenpas tarro'mar allempopa' o' chap ñeñt' poctetsa attoch na'qeshpaterres.

Ñeñto'marña na te'pa' o'ch notas, o' e'ñe chap allempo ñeñt' poctetsa o'ch saguër Yompor, tarro'mar te'pa' o' chap allempoch a'qeshpaterrey.

³ Ñehua, yapa' yeñoteñ ñeñt'ey ame'ñetsa ñerra'm o'ch ye'pa'yen ñeñt' ama pocteyaye Yomporecop ñeñt'ña ama ame'ñetsopa' chach ya'npare'teñ attoch ame'ñerret ñamet. Ñeñto'marña yapa' ama yemno ama't mamesha o'ch ya'npare'ch ama't puesheñarra allochñapa' attoch ame'ñeret ñamet Yompor. Ñaña ya atto yetorrena Yomporecoppa' ama yemno o'ch atet entapretyet ñeñt' ama cohuenayaye. Allochñapa' amach achmãre'teññañeto Yompor po'taruas e'ñe ya atet ye'patse'tyeño. ⁴ Yapa' añña yemen ama't erroteno'tsenya chocmach yemneñ o'ch yeñotach acheñenesha' po'ño'ch e'ñe cohuen yetorrena Yomporecop ñeñt' atet poctetsa yocop ñeñt'ey torretsa Yomporecop. Ñeñt'pa' añechno ñeñt'cha'ña eñotaterrahuet: allpon es yehuapoyapa' chocmach ya'huanteñ e'ñe cohuen, ama't allpon atto yemurochtame'tyena, ama't allpon ñeñt' yepallta'yena, chocmach ya'huanteñ allohuen. Ama't ora allohuen ñeñt' allpon ñeñt' allcatañtetsa, tarraña ñeñt'pa' chocmach ya'huanteñ. ⁵ Ñaña atto ashta'yenyet, atto yottampenyet, atto ama'tochtana'tenyet pa'tsrre'mueño'tet, atto atarr nanac yetaruasen, atto yarepen torratta Yomporecop, atto yemurochtana yachporrño't, ñeñt'ña eñotatene'ña allohuen acheñenesha' atto yapa' e'ñe cohuen yetorrena Yomporecop.

⁶ Ñaña atto yeñmañesha' yocrena, ama sosya'tsañeye' yoctape'chyeno, ñaña atto yeñoten ñeñt' e'ñe po'ño'ch Yompor po'ñoñ ñeñt' ama shequëñtsoyaye, ñaña atto es ya'huanta'yen, amachña cha atsrre'matenye, ñaña attochña e'ñe ya'muerañtana, ñaña atto chorrenya Parets Puecamquëñ, ñaña atto e'ñe cohuen yemorrenteña allohuen masheñeshachno, ñeñt'pa'cho'ña ñeñt'ña eñotatene'ña acheñenesha' atto yapa' e'ñe cohuen yetorrena Yomporecop. ⁷ Ñaña atto ye'ñorena ñeñt'pa' e'ñe po'ño'ch atet. Yomporña po'huamenc ñeñt' ahuamencat yepene'. Ñaña ñeñt' e'ñe pocte' enten Yompor, ñeñt'pa' ñeñt'ña allo chocma es ye'pa'yen, alloña yeçllarena Yomporecop, ñeñt'pa' alloña yemoñeññaña Yompor pocta'ña. ⁸ Erroteno e'ñech cohuen entapretyet, tarraña errotenoñapa' amach cohuenaye' entapretyeto; erroteno e'ñech cohuen eñosyenet yocop, errotenoñapa' chach sasare'tenyet. Errotenopa' attach entenyet ñerra'mrrate' atta yeshquën, ama't amach choye' yeshquëno. ⁹ Errotenopa' e'ñech cohuen emchorrenyet, errotenoñapa' amach acua'psenaye' entenyeto. Errotenopa' autsaycha' rromuets, tarraña chocmach allo'na yesen huomchetsa. Erroteno ama'tcha' a'coñchatare'tey, yañapa' corretsayach. ¹⁰ Ñaña erroteno ama'tcha' yellquëñaña' tarraña chocmach alla yocsherra. Ñaña ama't e'ñe huocchañeypa' shonte'ch cochnesha' cotapñats yapa'yes po'potantañ. Ama't ama es yechenñe arr patsro, tarraña shonte' esocmañen es yechen Yomporeshot.

Atto Pablopa' e'ñe pueyoçhrocmañen morrentenana allohuen ñeñt' ame'ñenaya Yompor

11 Te'pa' masheñneshacha' corinto'marnesha o' neñotatuas ora allpon ñeñt atet noctape'chen neyoçhro. E'ñe neyoçhrocmañen nemorrentensa. 12 Nocoppa' ama palltenmeñe ama't mamesha attoch nemorrenterra e'ñe poctacma. Añña sapa' çhocmate' sepalltena attoch semorrenterra naña. 13 Napa' e'ñe nechemeresha' nepenes. Ñeñto'marña o'ch nenamas, o'ch notas, atto napa' e'ñe neyoçhrocmañen nemorrentensa sa, sapa'cho'ña añ poctetsa e'ñe seyoçhrocmañenpa' o'ch semorrenterra naña.

Atto ama ayemuetpahuo ñeñt ama ame'ñetso

14 Te'pa' o'ch noterrser po'poñ, amach e'ñe seyemtatsche ñeñt ama ame'ñetso, tarro'mar amach patrraye' soctape'chueno. Acheñ ñeñt e'ñe pocte' es pa'yetspa' amate' erroteno't yemtanoña acheñ ñeñt ama cohuenaye' es pa'yetso, tarro'mar ama attecma'ye' es pa'yeneto. Ñato' o'ch netma'ntacha atet ñerra'mrrate' checmete'pa' amate' erroteno't alla epteto parro epuet puetare'. 15 Ñeñt atet pena Cristo ñaña oneñe't amate' erroteno't cohuen amo'tstanna'teto. Attecma ñaña ñeñt ame'ñetsapa' amach patrraye' cotape'chueneto epuet ñeñt ama ame'ñetso.

Atto yapa' pa'paquëll peney Yompor

16 Ñaña ñeñt pa'paquëll pen Yomporpa' ama atteyaye ñerra'mrrate' ñeñt ayeçhcataret ñeñt po'yomporer pa'yen po'potantañ acheñenesha' arr patsro. Tarro'mar ama't yapa' allohueney ñeñtey ame'ñenaya, yañapa' pa'paquëll peney Yompor ñeñt ama arromña'teshayaye. Añpa' ñeñt atet oten Yompor:

Napa' çhocmach neyçhena e'ñe ñesheto parro allcha' nechopeñe'chen. Napa' Po'yomporer pennet, ñetpa'cho'ña e'ñe neyochrenesha' nepenanet.

17 Ñeñto'marña Yomporpa' oteney:

Añ poctetsa o'ch sesuanem ñeñt ama ame'ñetso, allochña'pa' o'ch sellopa'tetstatua socta'ña. Amach seyçhapretatsto sosya'tsañ ñeñt orrtatyenet. Allochña'pa' attochña napa' o'ch naguërres e'ñe nocsheñesha'.

18 Allochña sapa' attochña e'ñe Sompor seperren na, napa'cho'ña o'ch nechemeresha' ne'pohuerres ama't ñaña allohuen nesñeneshohuen. Ñeñtpa' atet ot Yompor ñeñt nanac partsotets.

7

1 Ñehua, e'ñe nemorrenteño'es, masheñneshacha' ñaña noçhaneshacha' o' notuas atet oteney Yompor ñeñt'cha' atet perrnay. Ñeñto'marña te'pa' añ poctetsa yocop yapa' o'ch yesuanem ora allohuen ñeñt çhocma a'sosyatene' yechets ñaña ñeñt çhocma a'sosyatene' ama't yecamquëñ. Añña e'ñe yeñcha'na'teño't Yomporpa' añcha'ña yema'yoçhrena ñeñt pocte' enten ña.

Atto Pablopa' o' alla atarr coshater corinto'marnesha' tarro'mar o' cotape'cherret cohuen e'ñe etserra

2 Napa' atarr nemneñ, masheñneshacha' o'ch alla semorrenterra e'ñe seyoçhrocmañen. Napa' ama't puesheñarro'esapa' ama cho erro't ne'paso, ñaña ama't puesheñarro'esapa' ama añeye' neyçhataso ñeñt ama cohuenayaye, ñaña ama't puesheñarro'esapa' ama çhoye' neshcare'taso ama't e'ñe mamesha. 3 Ñeñtpa' ama añecpaye' notenso o'ch neyohuare'tasa. Añecopña o' alla noterrser e'ñe nemorrenteño'es ñeñt atet o' notuanmas. Po'ñoçhpa' atarr nemorrentensa e'ñe neyoçhrocmañen. Ñeñto'marña napa' e'ñe pocte' nenteñ e'ñech parrocmayocrena ama't ñaña e'ñech parrocmayerroma. 4 Napa' neñotenes sapa' çhocmach se'pa'yen ñeñt cohuentetsa Yomporcop. Ñeñto'marña napa' atarr nocshapretensa. Ama't nellquëñañ nemueroçhteño'tpa' elloña o' alla nanac socshatterren.

⁵ Ama't allempo neçherr Macedoniopa' çhocma atarr nellca'huerrerr alla. Allpa'cho'ña çhocma es nehuapoya pa'namen ñeñña ama't mameshapa' ama eshcaye' neñmatataye neyoçhro attoch e'ñe cohuen nellapsos muechet. ⁶ Atteña'pa' o' çherr masheñ Tito. Atto çherr masheñ Titopa' allempoña Yomporpa' alla coshaterren neyoçhro, ñeññara Yompor ñeññ çhocma yocshatene' allempo es yelcatene'. ⁷ Ama e'ñe aña nocshataye atto çherr Tito, aña atarr nocshatene' ñeññ atto e'ñe cohuen entapretensa', ñapa'cho'ña atarr socshater. Ñehua, ñapa' eñotatuerren atto sapa' atarr o' seyerpuenna, ñaña o' eñotatuerren atto sellquëño sapa' o' alla same'ñerra e'ñe cohuen, ñaña o' eñotatuerren atto o' alla sellcapreterrna ñeññ atto sellcatenen na. Ñeññ allpon serrpare'tatuerren, napa' ñeñña ello atarr nanac nocshaterre'.

⁸ Carta ñeññ nequellconas ahuaña, ñeñña'pa' çha llecatas. Ñeñño'marña allempo napa'cho'ña çha muene' llecatna ñaña tarro'mar o' nemñonas atet carta. Ama't te'pa' neñoteñ añ necarta çha llecatenes tarraña ñeñña'pa' e'ñe mamecpa, ñeññ e'ñe pocte' nenteñ. ⁹ Attoña te' napa' e'ñe cohuen nocshena. Ñeñña'pa' ama añecpaye' nocsheno atto sapa' nellcatas. Te' napa' añecopña nocshena atto sapa' e'ñe sellquëño o' alla same'ñerra e'ñe cohuen. Tarraña atto sellquëna sapa' ñeñña'pa' atet senteñ ñerra'm Yompor sellcatene' ñeññcha'ña same'ñaterraya e'ñe cohuen ñocop. Ñeñño'marña ñeññ atet neponas, ñeñña'pa' e'ñe cohuen socop, ñeññ allopa' ama çhoye' erroten nepenso ñeññ ama pocteyaye ama't mamesha. ¹⁰ Tarro'mar ñerra'm esempo atet yenteñ Yomporña atet yelcatene' ñeñña'pa' e'ñech pocte' yenteñ tarro'mar ñeñña'pa' alloch yoctape'çherr cohuen ñocop, allochña'pa' attochña yequeshperra. Tarraña atto yellquëna arr patsro, ama Yomporecpaye' yellquëno ñeñña'pa' ñeñña' allo'na aneey rromueñtso, allcha' yechenquërra poctacma. ¹¹ Sa sellquëña'pa' e'ñe atet senteñ ñerra'm Yompor e'ñe sellcatene'. Ñeñño'marña allempoteñ yoroçhen senten sa so'chñar ñeñño'marña sapa' semneñ o'ch alla cohuen nentapreterres. Ñaña ñeñña'pa' apencoçhen senteñ ñeññ atarr atparñañ. Ñeñño'marña semñaño'pa' atarr semneñ o'ch alla senterren, attoch e'ñe cohuen na'poctatonas. Ñaña allempoteña e'ñe pocte' senteñ o'ch secoñchach ñeññ atparñañtetsa. Ñeñño'marña te'pa' atet o' sephuerra ñeññ e'ñe pocte' nenten, allochña'pa' amach allo'na sa'yohuaretteno. ¹² Ñaña o'ch notas, ahuaña allempo nequellquërrnaserr añ necartapa' ama atparñañecpaye' nequellquërrnaserro ñaña ama nocpaye' nequellquërrnaserro ñeññten atarr atpare'tenet. Añecpa'ñaña nequellquërrnaserr carta allochña'pa' attoch çhaponasa seyoçhro po'ñoçh sapa' atarr semorrentenna. Ama't Yomporpa' eñotenes. ¹³ Ñeñño'marña attoña o' alla atarr socshaterrey.

Elloña napa' añ atarr nocshaterre' atto nenter masheñ Tito atto ña ahuo't alla atarr socshater, e'ñe pueyoçhrocmañen o' atarr cosherra. ¹⁴ Ñehua, ahuaña allempoch ahuo' masheñ Tito sesho, napa' atet noch sapa' atarrcha' cohuen same'ñya. Allempoña çhap seshopa' e'ñe atet same'ñya ñeññ atet noch. Ñeñño'marña napa' ama't mameshapa' amach erroteno sepenatno, ama atta nommo'chenso. E'ñe po'ñoçh atet sephuena ñeññ atet noch Tito. Ñaña ñeññ ora allpon atet notas, ñeñña'pa' e'ñe po'ñoçh atet. ¹⁵ Ñaña e'ñe semña'na'teño'pa' ahuo't sagañ Tito e'ñe cohuen. Ñaña ñeññ ora allpon cotape'chatas Tito sapa' ahuo't e'ñe cohuen ame'ñaterrsa. Ñeñño'marña te' Titopa' e'ñe pueyerpueño'es, ñapa' atarr morrentensa nanac. ¹⁶ Ñeñño'marña napa' atarr nocshena tarro'mar neñotenes sapa' o' same'ña'huerra e'ñe cohuen.

8

Atto macedonio'marnesha'pa' e'ñe pocsheñeshocmañen es apa'yenet Yomporecop

¹ Ñehua, te' masheñeshacha' ñaña nochaneshacha' o'ch neñotaterrser attó Yomporpa' orrtaterranet pueuereña allohuenacop ñeñ pame'neñofet chocma apcha'yenet all anetso Macedonio'mar. ² Ñehua, macedonio'marnesha'pa' ama't shonte' pa'namen huenanet ñeñ atarr topatenahuet, tarraña ñetpa' chocma atarr coshenet. Ñaña ama't atarr huocchañetyenet, tarraña ñetpa' chocma apa'yeñet po'potantañ ñeñ atarr es nanac palltetsa. Apa'yeñet e'ñe pocsheñeshocmañen atet ñerra'mrrate' ñetpa' shonte' esocmañen echenet po'checom. ³ Napa' neñotenanet ñetpa' ahuo't pomyenet ñeñ allpon muena'yenet ñet puesheña'ttset. Ama't ñocpuetpa' palltenetañ tarraña elloneñña'pa' o' alla apa'yereterr po'psheñeñ po'pocheño, ama't ñocpuetpa' palltenetañ. Ñet e'ñe puenenñofet atet penet. ⁴ Ñetpa' chocma a'p'to'tennet pocte'te' o'ch notanet attoch yenpuet ñamet ñeñ masheñeshachno huocchañeshachno. ⁵ Napa' e'ñe allpona notanet ñetña elloneñpa' atarr shonte' pomyeset, tarraña ama't allempo ama pomueneta' po'çllayor Yomporecop, ñetña'pa' ñanmacmuet o' e'ñe pomhuerret Yomporecop, allo'tpa' ñaña yocop ñeñ atet muenateney Yompor allohueney. ⁶ Atet nenteñ macedonio'marnesha' atarr es pomuenet Yomporecop, ñeñto'marña te'pa' o' alla notererr masheñ Tito o'ch alla ahuererr sesho, allochña'pa' attoch allo'nach señotnen e'ñe cohuen pomuene' Yomporecop, ñeñ allpon yechatensa' ahuaña Tito. ⁷ Ñaña sapa' atarr setsoteññañ allohuen ñeñ cohuen enten Yompor. Ñanompa' atarr seyemteña Yompor, ñaña atarr cohuen seserrpare'teññañ po'ñoñ, pa'namen esocmañen es señotyen, ñaña e'ñe socsheñesha' es sepa'yen Yomporecop, ñaña e'ñe cohuen semorrentenya. Ñaña e'ñe setsotuen ñeñ atet cohuentetsa Yomporecop. Ñeñto'marña te'pa' ñaña sepalltena paterr attoch o'ch setsota eñote' apa'yese' po'potantañ ñeñ es pallta'yetsa.

⁸ Napa' ama neyechare'teñofoye' notenso atet, añña nemnen o'ch neñotatas ñeñ atet pena po'potantañ ñeñ e'ñe pocsheñeshocmañen es apa'yeñet ñeñ es pallta'yetsa. Allochña ñerra'm ñeñ señot, napa' neñotenes atetcha' sepo'huerria samña. Attoña neñotenes e'ñe po'ñoch semueranna'tuena allohuenes. ⁹ Ñehua, sapa' o' señoter ñeñ atet pa' Yepartseshar Jesucristo. Ñapa' atarr amuerañtosa, ñapa' esocmañen echeneñ Pomporesho, tarraña e'ñe puemorrenteñofoye ya, ñaña'pa' atta huocchañetos. Allochña e'ñe puehuocchañeteñofo yocop, yañapa' shonte'ch esocmañen yecherr Yomporeshot.

¹⁰⁻¹² Ñehua, sa ahuaña charopa' atarr semneñ o'ch es sapa'yeñ acheñenesha' ñeñ es pallta'yetsa. E'ñe socsheñesha' sapa' ahuo't samotech es apa'yese' po'potantañ. Ñeñto'marña te'pa' añ e'ñe pocte' nenteñ socop. Te'pa' allo'nach sesen socsheñeshocmañen es apa'yeshahuet, e'ñe allpon semna'yen puesheña'ttsos, e'ñech allpon sapa'yesanet. Tarro'mar ñerra'm e'ñe yemneññofo es yap Yomporecop, ñapa' e'ñech pocte' enteñ ama't e'ñe errpona yemneñ o'ch yap. Tarro'mar ñapa' amach enamyen aton ñerra'm ama yecheñe. Allochña'pa' o'ch senue e'ñe poctacma. Atto'tcha'ña setsotua allohuen ñeñ atet poctetsa Yomporecop.

¹³ Napa' ama notenso tarrecopcha' es sapa'yen allochña'pa' o'ch atta atarr es sepalltena sa. ¹⁴ Añecopña notenes o'ch sattecmatua. Atet ñerra'm te'pa' shonte' sechen, socoppa' añ poctetsa o'ch sapa'yeñ ñeñ es pallta'yetsa te'. Allochña'pa' ñerra'm esempo es sepalltena samapa' añ poctetsa o'ch apuerrset ñamet, allochña'pa' attochña e'ñech sattecmaten. ¹⁵ Ñeñtpa' atet oteney Yompor po'ñoñ ñeñ atet anuaret ahuafo'teñ, ñeñtpa' atet oten: "Ñeñ echene' shonte'pa' amach es a'pchateno. Ama't ñaña ñeñ echene' coñe'tpa' amach es pallteno."

Atto Titopa' alla ahuererr po'pocheño Corinto

¹⁶ Napa' chocma neparasyoso'teñ Yompor tarro'mar añ nenan masheñ Tito pueyo'chro atto ñapa'cho'ña chocma llecapretensa atet ñerra'm na. ¹⁷ Ñeñto'marña

allempto noteñ o'ch ahuerri sesho, ñapa' e'ñe pocte' enteñ. Elloña ñapa' e'ñe puenneññoñ atarr sechena o'ch alla ahuerrierr o'ch abcherrsa'.

¹⁸ Ñaña yapa' o'ch yemñererr masheñ Tito epuet ñaña po'psheñeñ masheñ. Ñehua, añ masheñerpa' allohuen ñeññ ap'cha'yetsa pame'ñeñoñetpa' atarr cohuen enteñet atto ser- rpare'tatenanet añ cohuen ñoñets ñeññ alloch yequeshperra. ¹⁹ Elloña ñeññ masheñerpa' allohuen ñeññ ap'cha'yetsa pame'ñeñoñetpa' o' net o'ch yechopeñe'ch parro attoch ñach yeyenpuene' ñeññ atto yetorrena o'ch yeyenpueñ po'potantañ. Ñeññpa' añecop sherben attoch aye'chochtateññañet Yompor, ñaña añecop sherben attoch eñoteñet e'ñech yocsheñesha' yemneñ o'ch yeyenpannena e'ñe cohuen. ²⁰ Ñeñño'marña o' net ñaña po'psheñeñ masheñ allochñapa' atto yap'chaten quellepa' amach cha sasare'tenyeto quellayo'mara. ²¹ Tarro'mar yapa' añña yema'yoçhrena o'ch yorrtat ñeññ e'ñe cohuen enten Yompor, ama't ñaña ñeññ cohuen enten acheñenesha'.

²² Ñehua, te'pa' o'ch yemñonas po'poñ masheñ ñeññcha' tatsa, ma'psheña. Ñeññ po'psheñeñ masheñpa' napa' neñoteñ ñapa' e'ñe pocsheñeshocmañen atarr cohuen es ma'yoçhra'yena ñeññ cohuentetsa Yomporecop. Ñaña ama't te' atto e'mare'tenes sa e'ño' cohuen same'ñeña Yompor, elloña te' ñapa' atarr mueneñ o'ch allo'na sen torra'nmatsa e'ñe cohuen Yomporecop. ²³ Ñaña ñerra'm esesha' sa'p'to'tene' o'ch otaset, “¿ama't se'mare'teñe masheñ Tito, erro'tsente'?” sañapa' o'ch soch “ñapa' añ epuet torrena masheñ Pablo taruasats Yomporecop attoña e'ñe sherbeney yaña.” Amapa' ñerra'm a'p'to'taset ñaña añ po'psheñeñ masheñecop, sañapa' o'ch señotatanet ñetpa' arroñ amñareñtenet all ap'chena allohuen masheñneshaçhno ñeññ ame'ñetsa all Macedonio. Ñetpa' e'ñe cohuen orrtatenet Cristo po'cohuenña. ²⁴ Ñeñño'marña te'pa' o'ch notas e'ñech cohuen sagañ añ masheñnesha', allochña ñetpa' esheccha' eñotaset sapa' po'ñoçh atarr semuerenanet, attochña eñotas ñaña allohuen masheñnesha' ñeññ pame'ñeñoñet ap'cha'yetsa allot amñareñtenet. Allochñapa' o'ch eñotaset po'ñoçh e'ñe cohuen same'ñena ñeññ atet notenanet socop.

9

Yomporpa' añ atarr morrentena ñeññ e'ñe pocsheñeshocmañen es apa'yets ñocop

¹ Ñaña ñeññcha' sap'chen alloch seyempue' masheñnesha' ñeññ atarr es pallta'yetsa Jerusaléno, napa' neñotenes ama sepallteno o'ch alla noctape'chaterrser necar- tot ñeññcha' atet seña. ² Tarro'mar napa' neñotenes ñeññpa' atet atarr semnen sa. Ñeñño'marña arr Macedonio çhocma noteñ macedonio'marnesha' sapa' çhocma semneñ o'ch es sapa'yes añecop ñeññ atarr es pallta'yetsa. Ñeñño'marña napa' e'ñe nocsheñeshocmañen neñotateñ macedonio'marnesha' ñeññ atet sepena sa ñeññes acayo'marneshas ñeññarasa corinto'marneshas. Ñehua, napa' o' neñotatanet atto ahuaña charo sapa' semneñeñ o'ch e'ñe sa'pocstat attoch es sapa'yes ñeññ atarr es pallta'yetsa. Atto sapa' atarr semneñ o'ch seyempue' ñeññ atarr es pallta'yetsa, ñeñño'marña all Macedonio'tpa'cho'ña te'pa' eñall shonte' ñeññ muenets o'ch es apa'yenet ñamet. ³ Tarraña ama't napa' neñotenes atarr semneñeñ o'ch seyempue' ñeññ atarr es pallta'yetsa, ñeñño'marña napa' o'ch nemñonas añ masheñnesha' ñeññcha' otatsa. Ñetpa' o'ch yenposset attoch sap'cha' añecop ñeññ es pallta'yetsa. Allochñapa' ñerra'm e'ñe cohuen sañño'tue, attochña eñotaset ñeññ e'ñe cohuen notenanet socop, ñeññpa' e'ñe po'ñoçh atet sephuena. ⁴ Allochñapa' ñerra'm esempo neçhap naña sesho epan ñaña masheñneshaçhno macedonio'marnesha' ñerra'm yentoses ama sap'chatueña', allempoña yapa' çhate' parroçma yepencna'ntatanna'ta. Allempoña e'ñe'e' orrena neyemtensa. ⁵ Ñeñño'marña napa' añ pocte' nenten o'ch noch po'psheñeñ masheñnesha' ñetpa' otetepa' ñanmacmuet, ñeññcha' sabcherraya' attoch ñetpa' o'ch yenposset attoch

e'ñe sap'cha'hua ñeñt semnen sa o'ch e'ñe saphue ñeñt es pallta'yetsa Jerusaléño, ñeñt atet sot ahuatoteñ. Tarro'mar napa' e'ñe pocte' nenteñ sa e'ñe semneññoñ e'ñech señañesha' es sapa'yese ñeñt atarr es pallta'yetsa. Amachña cha es enamare'tyenseto attoch es sapuenanet.

⁶ Chocmach seyerpuena añ ñoñets, ñeñt'pa' atet oten: Ñerra'm ya atarr coñe't es yapa'yen Yomporecop, yapa'cho'ña o'ch alla yaguërr ñeñt atarr coñe't. Ñerra'm atarr aton es yapa'yen Yomporecop, yapa'cho'ña o'ch alla yaguërr ñeñt atarr aton. Ñehua, ñato' o'ch netma'ntacha atet ñerra'mrrate' cho yenare'tatse'ten ya'mro. Ñerra'm atarr coñe't yenare'tatse'tpa' atarrcha' coñe't ya'yapa'cherr ñerra'm esempo po'nen. Ñerra'm atarr aton yenare'tatse'tpa' atarrcha' aton ya'yapa'cherr ñerra'm esempo po'nen. ⁷ Ñaña añ poctetsa e'ñe puesheña'ttsoy o'ch yapa'yen e'ñe allpon ñeñt pocte' yentyen e'ñe ya yeyo'chro. Amachña yempañoña es yapa'yeno ñaña amachña puenamare'teño'teta es yapuenaneto. Tarro'mar Yomporpa' añña atarr morrentena ñeñt e'ñe pocsheñeshocmañen es apa'yets. ⁸ Ñaña Yomporpa' shonte' esocmañen echen ñeñt'cha' apuerres allochñapa' attoch chocma sechencha' shonte' ñeñt atarr cohuen socop, ñaña sechencha' shonte' attoch seyempuen pa'namenot ñeñt cohuentetsa Yomporecop. ⁹ Añpa' ñeñt atet oten Yompor po'ñoñ ñeñt anuaret ahuatoteñ, ñeñt'pa' atet oten:

Ñeñt atarr es apuene' huocchañesha' ama't ahuatapa' amach apsaretterro ñeñt atto e'ñe cohuen es pen.

¹⁰ Yomporpa' apuenescha' shonte' esocmañen allochñapa' attoch chocma sechencha' shonte' attoch seyempuenanet pa'namenot ñeñt cohuentetsa Yomporecop. Ñaña ñapa' allo'nach sen es sapuene' pa'namen allochñapa' allo'nach sesen yenpuene' pa'namenot ñeñt cohuentetsa Yomporecop. Ñeñt'pa' ñerra'm netma'ntacha ñato' o'ch not: Ñeñtara Yompor ñeñt yapuene' puerets ñeñt'cha' yenare'ten o'ch chap allempo po'nenpa' allempochña yeyoren ñeñt'cha' yerrar yepen, ñeñt'pa' Yomporña a'torene' attoch ya'yapa'cheñ o'ch yeshonteñ. ¹¹ Attochña sapa' sechencha' allohuen shonte' esocmañen allochñapa' attochña shonte'ch esocmañen sapa'yeyñ ñeñt es pa'namen pallta'yetsa. Ñerra'mña atet se'papa' yañapa' yach aphuerrahuet attochña ñetpa' chore'teñet Yompor o'ch ochet "Parasyos Nompore, pa yapuene' ora allohuen." ¹² Ñerra'm atet'cha' sepene es apa'yese' masheñesha' ñeñt ame'ñetsa, ama e'ñe añecpa sherbeno attoch es sapuenanet ñeñt palltenet. Añecpa'ñaña sherben attoch ñetpa'cho'ña atarrcha' chore'chet Yompor o'ch ochet: "Parasyos Nompore, pa yapatene' ñeñt allpon yepalltena." ¹³ Ñaña attoña ñetpa' aye'chochtateññañet'cha' Yompor, tarro'mar o'ch eñotenset sapa' po'ño'ch attera same'ñeññaña Cristo po'ñoñ. Tarro'mare'ñaña ñetpa' aye'chochtateññañet'cha' Yompor, atto sapa' sapuenanet pa'namen ñeñt allpon palltenet ñet, ñaña po'potantañecop. ¹⁴ E'ñech pueyerpueño'tetas sapa' ñetpa' atarrcha' nanac chore'tatonaset Yompor, tarro'mar sapa' o'ch sorratanet Yompor puemueresha' allo atarr muerenya. ¹⁵ Yeparasyoso'chepa'ch Yompor tarro'mar ña yapuene' Puechemer, ñesho'ña huena ora muereñets ñeñt atarr co'chneshare'. Ama't yemneñeñ o'ch ya'ye'chochtatue e'ñe poctacma, tarraña ya arromña'teypa' amach erro't yepe, ñaña ama yeno yeñoñ attoch ya'ye'chochtatuoñ e'ñe poctacma ñeñt atet yocshena yeyo'chro.

10

Atto Pablopá' eñotatan corinto'marnesha' ñapa' e'ñe po'ño'ch allsensaret Yomporeshot

¹⁻² Ñehua, te'pa' na Pablon o'ch alla noctape'chaterrser e'ñe nemueresha' atten ñerra'm Cristo ñeñt nanac amuerañtostsa. Puemueresha' yepa' ñapa' e'ñe pocte' eñche't o'ch atet enteñet ñerra'm ñapa' ama esoshe'mayaye. Ñehua, sapa' patanta'ttsopa'

attach sentenen ama erroť notenso atsrre'moĉhen ñerra'm esempo allo'tsenen sesho. Tarraña ñerra'm esempo allaparo'tsenen, allempo nequellquënnas cartapa' allempoña sapa' atet sentenen ñerra'mrrate' ama ĉoye' nemĉha'tenso ama't e'ñe mamesha, e'ñech eche'ĉharr notenes necartot. Tarraña ñeñtpa' ama atteyaye. Ama't allempo allo'tsenen sesho, ñerra'm nemneñeñ atet ne'ñoronasapa' e'ñete' eche'ĉharr ne'ñorennasa. Ñeñto'marña te'pa' e'ñe neyoĉhrocmañen o'ch notas, soctape'ĉherr cohuen e'ñe tayecma allochñapa' ñerra'm esempoch neĉherr seshopa' amach ĉha se'ñoratno eche'ĉharr. Tarro'mar ñerra'm ama soctape'ĉerro cohuen, po'ñoĉ ñerra'm esempo neĉherr seshopa' ĉach se'ñoraten eche'ĉharr, ñeñtes notene' napa' e'ño' nañeña noctapñoť atet es neĉatse'tyen ñeñť atet pa'yena acheñenesha' arr patsro, ñeñtpa' e'ñe ñocueta sherben. Tarraña napa' ama atteye' nepeno. ³ Ñehua, ama't napa' nocrrrena arr patsro atet yocrrrena allohueney acheñey tarraña ñeñť atet nema'yochrena Yomporecop, ñeñtpa' ama atteyaye ñeñť atet ma'yochrena acheñenesha' arr patsro. ⁴ Tarro'mar ñeñť atet yema'yochrena Yomporecoppa' ñeñtpa' ama añeyaye ñeñť atet yoctape'chen ya acheñey arr patsro. Añña atto yema'yochrena ñocop, e'ñe ña po'huamencot atet yepena. Attochña yehuapore'toñ allohuen ñeñť epatare'tene' Yompor poctapña. ⁵ Ñaña allohuen serrparñatsoĉhno ñeñña epatare'tene' Yompor po'ñoñ ñeñťcha'ña yehuapore'tua. Ñaña allohuen coťapñatsoĉhno atto nanac ommo'chenet, ñeñña ama muenatenahueto attoch enteret Yompor, ñeñtpa'ĉho'ña Yomporcha'ña po'huamencot o'ch yehuapore'tue. Ñaña ñeñť allpon yoctape'chyen arr patsro ñeñña atpare'tatene' Yompor poctapña, ñeñťcha'ña ya'meta'huerr Cristesho, allochñapa' attochña Cristopa' o'ch ame'ñatera. ⁶ Ñaña ñerra'm o' alla name'ñatuerrsa e'ñe cohuen, tarraña ñerra'm esesha' ora atpare'tetsa, napa' e'ñe pocte' nenteñ o'ch yecoñchach ñeñť atet atpare'tetsa. ⁷ Sapa' aña cohuen senten ñeñť allpon sentyen secloyot. Ñerra'm esesha' entetsa atet ñapa' Cristo mueñene', ñeñť acheñerpa' eñoche'pa' napa'ĉho'ña Cristoña nemñene'. ⁸ Ama't atarr natontaten neñoñ atto alla noterrser napa' Cristo puellsensaren, tarraña napa' ama ĉoye' neyllateno neñoñ attoch nepenca. Tarro'mar atto llesensa'n Yepart-seshar Cristopa' ñeñtpa' añecopña attoch neyenpas attoch allo'na sesen huomenc pa'nmue' seyocher Yomporecop. Ñeñtpa' ama añecpayaye alloch na'puerrataterres ñeñť atto same'ñena. ⁹ Napa' ama nemno o'ch añcha'noĉhen sentenen e'ñe necartota. ¹⁰ Tarro'mar patanta'ttsos atet sentennan necarta ñerra'mrrate' atarr eche'ĉharrot es notenes ñeñť atarr echarr senten. Ñaña ñerra'm esempo allo'tsenen sesho sapa' ama ahuaamencatoyenaye' sentenno ama't mamesha, ñaña atto neserrpare'tatenespa' ama't e'ñe mameshapa' ama asherbenaye' senteñe. ¹¹ Tarraña acheñenesha' ñeñť atet otetspa' eñochetepa'ch ñerra'm erroť notas necartot ama't atarr allaparo'tsenen atetĉha'ĉho' po'ñoĉ nepennas ñerra'm esempoch neĉherr sesho.

Atto Yomporpa' ama pocteye' entenano acheñenesha' o'ch cohuen entenet e'ñe ñañeñeta

¹² Napa' ama't mameshapa' ama nemno o'ch sentenen napa'ĉho'ña ñato' attente' ñeñť atet pena po'potantañ ñeñť atarr cohuen eñosyets e'ñe ñocueta. Napa' ama nemno o'ch not napa' e'ñe attecma nepena atet penet ñet. Tarro'mar ñeñť atet penet ñetpa' ama cohuenayaye. Ñetpa' e'ñe ñañeñeta poctapñetpa' coshapretannenet e'ñe ñagattseta. E'ñe ñañeñeta poctapñetpa' cohuen entapretanna'tyenet, ñeñtpa' atta otatse'tyenet. ¹³ Tarro'mar yapa' ama yoyaye yoctapña ñeñť atarr yocshapretan-nena. Añña Yompor poctapña ñeñtpa' allohua onañchareť yocop ñeñťcha' e'ñe cohuen yocshapretannena. Ñaña Yompor poctapña ñeñť atet onañchennaypa' ñeñtpa' añecpa'ñaña sherben attoch yeĉhapatonas Yompor po'ñoñ e'ñe seshohuen ñeñtes corinto'marneshas. ¹⁴ Ñeñto'marña yapa' ama ĉho yatontateññañe Yompor poctapña

tarro'mar ñeñt allpon onañchennay, ñeñtpa' e'ñech allohua yetorrena ñocop. Ñeñtpa' añe'pa'naña sherben attoch ye'chapat Yompopor po'ñoñ ama't seshohuen. Ñeñto'marña ya ahuatpa' yanom 'chapate' Yompopor po'ñoñ sesho ñeñtara añ cohuen ñoñets alloch yequeshperra e'ñe yame'ñeñoña Cristo. ¹⁵ Ñaña ya e'ñe yocoppa' ama yemno o'ch yommo'choña po'psheñeñ po'taruas ñeñt ñanom torratsa all Yomporecop. Tarraña yapa' yecuenes ñerra'm esempo sa o'ch allo'na sesen ame'ñetsa cohuenpa' allempoña napa' noctape'chen ellonet o'ch alla netorrerra sesho. ¹⁶ Attochña ama't allpon anetso'chno ñeñt allemeñ allo'tsa'yen ellonet seshotpa' allña nesechena ñaña allcha'ña neserrpare'tatyesosanet Yompopor po'ñoñ, ñeñtara cohuen ñoñets alloch yequeshperra. Nemneñ o'ch na'potoñ Yompopor po'ñoñ all ama aserrpare'tataretteneta' allochñapa' amach 'cha nommo'choñe po'psheñeñ po'taruas ñeñt ñanom serrpare'tats all.

¹⁷ Ñerra'm esesha' muenetseñ o'ch e'ñe cohuen eños pueñeñarrocop tarraña ñeñtpa' Yomporecopcha'ña e'ñe cohuen eñen. ¹⁸ Tarro'mar añ acheñer ñeñt eñoretsa e'ñe cohuen ñocpapa' ñeñtpa' ama pocteye' enteñe Yompopor. Tarraña ama't erra'tsena acheñer Yomporcha' eñosets cohuen ñocop, ñeñña e'ñe pocte' enten ña.

11

Atto ommoñañenesha'pa' ahuo't shequënan corinto'marnesha' ñetpa' allsensareteto'

¹ Napa' atarr nemneñ o'ch se'mñoton atto 'cha muene' atta es notatse'tyen. Po'ño'ch o'ch notas, se'mñoton ñeñt atet es notatse'tyen, allochñapa' attoch neñotatas ñeñt atet noctape'chen. ² Tarro'mar napa' atarr necuenes atet ñerra'm Yompopor ña secuene'. Tarro'mar napa' añ no'patatensa Cristo attoch allohuenes o'ch e'ñe napuas poctacma. Atto o'patataretes, napa' o'ch necuenes attoch amach yoratstaso po'psheñeñ. Ñehua, o'ch netma'ntatasa atet ñerra'mrrate' pueñeñarr yacma ñeñt esñeñ. Po'seññapa' o'ch o'patacha pueñeñarr yacma ñeñtcha' puerrollar 'pa'. Ñapa' o'ch cohuanpenan po'señ e'ñe cohuen tarremphuach esempoch huapa ñeñt o'patenaya allempochña pomanña po'señ ñeñt ama a'pllarereyaye. Ñeñto'marña napa' e'ñe atet nentenes ñerra'mrrate' nesñenesha' nepenes attoch napuas Cristo ñeñt atet ñerra'mrrate' ñeñtcha' e'ñe serrollar se'pa' ñapueñ. ³ Tarraña napa' 'cha sellcatenen. Napa' noten sapa' o'te' 'cha semnatena o'ch shecaset samña, atet 'pa ahuañ sheche'p allempo shecan Eva tarro'mar ñeñt sheche'papa' atarr etsotenan shequëñets. Ñerra'm sapa'cho'ña pueñquëñoñetaspa' añach ye'chatenset ñeñt ama cohuenayaye co'ta'pñats, ñeñto'marña o'huañcha' allo'na sesen ame'ñenaya Cristo ñapueñ ñeñt e'ñe cohuen. ⁴ Tarro'mar sapa' ñerra'm esempo huena po'potantañ sesho, ama't serrpare'tatensetañ ñeñt atet pe't Jesús tarraña ñeñtpa' ama atteyaye ñeñt atet yey'chatuas ya ahuañmo'cha, sañapa' eso'mare'tña allorocma e'ñe socsheñesha' same'ñeña. Ama't serrpare'tatenset po'poñ co'ta'pñats ñeñtpa' ama añeyaye Yompopor poctapñña, sañapa' allorocma'tña e'ñe pocte' senteñ o'ch same'ñya. Ama't serrpare'tatensetañ po'poñ ñoñets alloch sequeshperrañ, ñeñtpa' ama añeyaye ñeñt e'ñe cohuen ñoñets ñeñt same'ña'hua ahuañmo'cha, tarraña sañapa' e'ñe't pocte' senteñ o'ch ame'ñataset po'poñ ñoñets. ⁵ Ñaña ñetpa' atta ommo'chenet allsensareteto' Yomporeshot, ñetpa' atarro' sherbenet. Tarraña napa' elloña atarr asherben nentena. ⁶ Ama't napa' ama ay'chatare'teno attoch neserrpare't co'chneshare' ñoñets tarraña napa' e'ñe neñotueññañ Yompopor po'ñoñ. Sapa' señotenen ñeñt atet notenes ñeñtpa' e'ñe po'ño'ch atet tarro'mar shonte' pa'namen norrtatyen erracmañen ñeñña e'ñe señotatene'.

⁷ Ñehua, sapa' amate' pocteye' sentenno tarro'mar ama't ahuañmo'chapa' ama 'choye' necobraso atto neserrpare'tatensa' Yompopor po'ñoñ ñeñt alloch yequeshperra. Ñato' amate' asherbenaye' sentenno atto ama necobraso. Tarraña ñeñtpa' añecop sherben attoch sapa' o'ch tantaterres Yompopor sosya'tsañot allochñapa' o'ch puechemer

perres samña. ⁸ Ñehua, po'poñ anetso all ap'cha'yenet pame'ñeño'tet Yompor, na er-rotenopa' chocma naguënanet ñeñt allpon muenenet o'ch tsa'tnet e'ñe ñet pocta'pño'tet. Ñeñto'marña ama pallteno o'ch setsa'tna samña atto neserrpare'tatenes. Ñeñt napa' atet nenteñ ñerra'mrrate' po'poñ anetso all ap'cha'yenet pame'ñeño'tet Yompor, napa' ahuo't neprratam'psanet ñet attoch nesherb'as sa. ⁹ Ahuañmo'cha allempo na'posa seshopa' ñerra'm esempo nanac es nepalltena, sapa' ama't puesheñarro'tesapa' ama na'tsrre'mo'chtana'taso es senamare'te' ñeñt nepalltena. Tarraña allempo atarr es nepalltenapa' o' huacha'ta masheñnesha' Macedonio't, ñetñapa' o' aposnet allpon ñeñt atarr nepalltena. Attoña allponmat na'puena sesho ahuañmo'cha, napa' ama't mame-shapa' ama nemno o'ch na'tsrre'mo'chtana'tasa ama't e'ñe puesheñarro'tesa. Ñaña napa' chocmach atet nepena. ¹⁰ Napa' neñotena Cristopa' entenen e'ñe po'ño'ch cohuen ñeñt atet nepena, ñeñto'marña napa' ama't eseshapa' amate' erro'teno't que'chpatatnetoña atto e'ñe cohuen neserrpare'teññañ Yompor po'ñoñ e'ñe atta ñeñt allo atarr nocshena, ama't errap'aren nesen Acayo'mar. ¹¹ ¿Eso'marte'ña atet notenes? ¿Ama't seño'teñe? Chate' sotenapañ amate' nemorrentenso. Tarraña ñeñt'pa' ama atteyaye. Yomporña nentene' atarrca'ye nemorrentensa.

¹² Napa' chocmach atet nepena amach necobrenso ñeñt atet pena po'potantañ ñeñt pommo'cheño'teta serrpare'tatyenset. Allochña ñetpa' amach erro'teno't otneto napa'cho'ña ahuo' na'tsrre'mo'chtana'ch naña acheñenesha' atet penet ñet. Tarro'mar napa' ama pocteye' nenteñe o'ch otet e'ño' attecma yetorrena Yomporecop. ¹³ Tarro'mar ñeñt atet acheñpa' ama Yomporeye' llesensenaye, ñetpa' aña po'taruas penet shequëñets attoch ganenet e'ñe atta. Atta mueneñet o'ch po'poñtetet ahuo'ch orrtet atet ñerra'm Cristo puellsensar. ¹⁴⁻¹⁵ Ñehua, yapa' yeñoteñ oneñe'tpa' chocma atet pena ñaña o'ch po'poñtet atto'tcha' shequëney. Oneñe'tpa' chocma orrtatennay ñeñt'cha' cohuen yenten ya, o'ch orrtatennay atet ñerra'mrrate' ñapa' Yompor po'puetarenño't amñare't ñeñt atarr cohuen. Ñeñto'marña yeñoteñ oneñe't pueyochresha' ñeñt torretsa ñocoppa' ñetpa'cho'ña atarrcha' ashcañareret, mueneñet o'ch po'poñtetet atto'tcha' orrtenet atet ñerra'm añ acheñer ñeñt e'ñe po'ño'ch torretsa Yomporecop. Tarraña ñeñt atet petsapa' añ o'patenahuet coñcheñets ñeñt poctetsa añecop ñeñt atet patse'tyetsa.

Atto Pablopa' pa'namenot muero'chtateñet e'ñe pame'ñeño't Cristo

¹⁶ Ñehua, te'pa' o'ch alla noterr'serr. Amach sentatsetno napa' attate' notatse'tyen. Ñehua, ama't sentenen atet ñerra'm otatsña'tenpa' notatse'teño'tña'pa' se'mñnoten. Tarro'mar napa'cho'ña o'ch e'ñe cohuen neños ñeñt e'ñe nocpa atet ñerra'mrrate' cho nommo'chena mame'. ¹⁷ Ñehua, ñeñt atet notenes te'pa' ama cohuenayaye tarro'mar ama añecpaye' llesensa'noña Yepartseshar o'ch e'ñe cohuen neñen ñeñt e'ñe nocpa. Te'pa' e'ñe na notatse'teño't e'ñe cohuen neñen ñeñt e'ñe nocpa atet ñerra'mrrate' cho nommo'chena. Tarraña ñeñt atet notenes neñoteñ ñeñt'pa' e'ñe po'no'ch netsotueñ. ¹⁸ Atto shonte' po'potantañ ommo'chyenet ñeñt atet etsotenet ñet arr patsro, napa'cho'ña o'ch neñosatse'tapretyesamet atet ñerra'mrrate' cho nommo'chapretyenanet. ¹⁹ Sapa' e'ñe atet sentena sañeña atarro' es señoten ñeñto'marña e'ñe pocte' senteñ o'ch se'mñoteññañ ama't otatsña't ñeñt atto ommo'chena. ²⁰ Ama't ñet atto pomnaren penset, sañapa' e'ñech pocte' senteñ. Ama't es puerrratam'psaset ñeñt allpon sechyen, sañapa' e'ñech pocte' senteñ. Ama't pa'namenot shecare'tenset, sañapa' e'ñech pocte' senteñ. Ama't atarr puetsena'teño'tetaspa' sañapa' e'ñech pomnaren sepatena. Ñerra'm esempo ama't cho tacllapechenset, sañapa' e'ñech pocte' senteñ atto atarr pencna'ntatenset. ²¹ Napa' ama nepenquëño'teye' notenso, napa' ama nemno nehuamencot'pa' o'ch pomnaren nepenes, atet penes po'potantañ.

Ñehua, tarraña ama't errotente' ommo'chyenetpa' napa'cho'ña o'ch atet neñosatse'tapretyesane't. Notatse'teño'tpa' chach nottena atet ñerra'mrrate' cho nommo'chapreteña ommoña'fenesha'. ²² Ñetpa' pommo'cheño'tetpa' otenet ñetpa' hebreonesheto'. Ñehua, napa'cho'ña o'ch notas, hebreoneshan naña. Ñetpa' pommo'cheño'tet otenet israelena'tareto'. Ñehua, napa'cho'ña o'ch notas israelena'taren naña. Naña ñetpa' otenet po'mrenñaneto' yatañ Abraham. Ñehua, napa'cho'ña po'mrenñen yatañ Abraham. ²³ Ñetpa' pommo'cheño'tet otenet ñetpa' atarro' torrenet Cristocop. Ñehua, napa'cho'ña elloña atarr nanac netorrena Cristocop. Ama't e'ñe notatse'teño'ta noten, ñeñ'tpa' e'ñe po'ño'ch atet. Ama't allpon torrenet ñet, elloña napa' atarr nanac netorrena na. Naña ama't allpon amuero'chtataretetyenet ñet elloña napa' atarr nanac amuero'chtatareten. Allpon ayottam'psare'ten all coñchatennet, ñeñ'tpa'cho'ña nanac atonoche'tats. Naña allpon ashtennetpa' ñeñ'tpa'cho'ña atarr nanac atonoche'tats. Naña ñeñ't allpon autsan' rromuetseñ, ñeñ'tpa'cho'ña atarr nanac atonoche'tats. ²⁴ Naña judionesha' e'ñe pue'moñe'teño'tetan napa' atet ashtennet e'ñe amnaroche'tats. Allempoña ashtennetpa' ma'poch charra' puechena escon ñeñ't atto pacapacatspennet. ²⁵ Naña ellonetpa' o'ch'cho' alla nallerrneterr ñaña tsach'po, e'ñe ma'poche'ttsocma nallennet. Po'poche'ño'pa'cho'ña parrochpa' o'cho' alla rrolle'terrneterr. Po'poche'ño'pa'cho'ña allempo nesen noñto sapo'marpa' alla nepotam'perrerr ma'poche'ttsocma. Allempopa' alla narepen alla nellapen oño enopa'rrtatsa. ²⁶ Napa' chocma nechopeñe'chyen ella'par allo'tsa'yen pa'namen ñeñ't atarr am'cha'no'chenare', atet ñerra'm allempo netam'pena noñto oño'mar, ñaña allempo nechap all am'cha'no'chtana eñe'te'chno, ñaña allempo am'cha'no'chtana'tenen namo'tsesha' ñaña po'poñ acheñ ñeñ't ama judioneshayaye. Naña ñeñ't am'cha'no'chetyetsa all anetso'mar, ñaña ñeñ't am'cha'no'chetyetsa all puetsato'mar, ñaña ñeñ't am'cha'no'chetyetsa all oño'mar. Naña ñeñ't atto am'cha'no'chtana po'potantañ ama't otenetañ masheñpa' tarraña ama masheñeyayeto, ñetpa' ama ame'ñeñeto Yompor. ²⁷ Elloña chocma atarr netaruasen, ñaña shonte' ñeñ't atarr echarr nentyen. Naña atonoche'tats atarr nanac na'huanten nemoñ torratta Yomporecop. Naña epaye' nemuero'chtana nachporrño't, ñaña no'ñpaño't tarro'mar ama eñalle ñeñ'tcha' nerren ñaña ñeñ'tcha' norren. Naña epaye' muero'chtatenen senet tarro'mar ama eñalle neshtam ñeñ'tcha' nechorra, o' e'ñe neptsapesua.

²⁸ Naña ellonet napa' chocma nellquëña ñeñ't pame'ñeño'tet allemeñ ap'cha'yetsa. Napa' aña'naña chocma nellcatene' ñeñ't atarr torrapo' nentyen pa'namen. ²⁹ Ama't erra'tsena acheñer ñerra'm ama huomencaye' penano pueyo'cher Yomporecop, nañapa' atarrcha' nellcapreteña. Ñeñ'tña atet nellcapreteña nañapa' o'ch atet ne'muen neyo'chro ñerra'mrrate' o'huañ huomenc ne'pa' neyo'cher Yomporecop. Naña ama't erra'tsena acheñer ñerra'm o'ch a'puerratateret o'ch atet perran ñeñ't ama pocteye' enteno Yompor, naña nepencapreteño'tpa' ama't mameshapa' amach pocteye' nenteñe. ³⁰ Ñato' te'pa' o'ch noterrser po'poñone't co'pa'ñats. Sapa' po'ño'ch señosatse'tatyenen cohuen ñeñ't e'ñe nocpa. Aña cohuen nenten attoch neños cohuen ñeñ't e'ñe nocpa, ñeñ'tpa' atto ama ahuamencatoyenaye' enteno acheñenesha'. ³¹ Yomporpa' eñotenen ñeñ't atet notenes, ñeñ'tpa' ama shequëñtsoyaye. Ñeñ'tara Yompor ñeñ't Pompor pen ñaña Yepart-seshar Jesucristo ñeñ'tcha'ña ya'ye'cho'chtaterr tayoteñ errponohuañen. ³² Ñehua, napa' o'ch neyerpatasa atet a'pare'ten ahuañmo'cha allempo Damasco'tsenen. Ñehua, ñeñ't am'cha'tare'ttate't all Damasco, ñeñ'tpa' ñeñ'tara am'cha'tare't Aretas pueyochresha'. Ñeñ'tña nene'ña guardianesha' ñeñ't camretsa allemeñ yetarro't. Ñetpa' añecop camrenet attoch rroma'netañpa' o'ch yottam'pesnetañ allcha' coñchatnetañ. ³³ Tarraña napa' arr

esha'tnet cañiro atfoña cha'nmaterrnet ventanoť allotña a'suatam̄perrnet conchtoť. Atfoña e'ñe cohuen nequeshperra, ñeñto'marña ama eshcaye' rroma'noña guardia.

12

Atto Pablopa' a'tapataretta Yompor pue'ntaño ñeñt e'ñe poma'ptaño hua

¹ Ñeñt atto señosatse'tatyenen e'ñe cohuen nocpa, ñeñtpa' ama es sherbeno. Tarraña ama't atteñpa' o'ch alla neserrpare'taterrser atto Yepartseshar ñaña es negatyene' ñeñtña es neñotatyene'. ²⁻³ Ñehua, napa' neñoteñ na puesheñarrana ñeñten ame'ñenaya Cristo te'pa' o' met charra' puechena pa'tats char, allempoña napa' a'tapaten Yompor pue'ntaño ñeñt e'ñe poma'ptaño hua. Napa' ama neñoteñe, ñato' orate' nechtso a'tapatareten, amapa' ñato' necamquēñotate' a'tapatnet. Ñeñtpa' Yomporña eñotene'. Napa' e'ñe neñoteñ po'ñočh a'tapatareten Yompor pue'ntaño all atarr nanac cosheñtso'tsa'yenet. ⁴ Ñoñets ñeñt ne'muena' allpa' ama aserrpare'teno tarro'mar ya arromñaŕey ama pocteyaye o'ch yeserrpare't allo. ⁵ Ñeñt atet aĤareteneñ allempo, ñeñtpa' e'ñe pocten o'ch cohuen neñoseñ e'ñe nocpa, tarraña amach atet neĤatsto, añachña nocshena atto ama ahuamencatoyenaye' entenno acheñenesha'. ⁶ Ñehua, ñeñt atet aĤareteneñ allempo ñeñtpa' e'ñe pocten o'ch cohuen neñoseñ e'ñe nocop, ñeñtpa' ama čhoŕe' notatse'teno, tarro'mar ñeñtpa' e'ñe po'ñočh atet aĤareten. Tarraña napa' ama nemno o'ch cohuen neños e'ñe nocpa. Añachña nemnen ñeñtcha' cohuen entapretennet ñeñt e'ñe allpona entapretennet ñeñt atet es neĤa'yen cohuen ñaña ñeñt e'ñe allpona e'mñotapretennet ñeñt atet e'ñe cohuen neserrpare'ten.

⁷ Atto Yepartseshar ñaña es negatyene' ñeñtña es neñotatyene' ñeñtpa' atarr cohuen nanac yenteñ. Tarraña napa' attoch amach nocsheno e'ñe nañeñapa' Yomporña nemnatene' e'ñe nechtso ñeñtña atarr nemueročhtatame'tene' nanac. Ñeñt atto nanac nemueročhtena, napa' atet nenteñ ñerra'mrrate' aj nechtsotam̄pena ñeñtpa' oneñešhotña huennana ñeñtña atarr atserr nepene'. Atfoña Yomporpa' ama muenatenno o'ch nocshena e'ñe nañeña. ⁸ Napa' o' ma'poche'tats nenamueñ Yompor a'huañam̄perrnepa' ñeñt atarr nemueročhtatene'. ⁹ Tarraña ñapa' ahuo't otenen: "Amach na'huañam̄Ĥsatsterrpe, tarraña napa' atta čhocma atarr nemuerenĤa, Ĥapa' ñeñtña pepalltena. Tarro'mar ñeñt ama eñalle e'ñe ña po'huamencpa' ñeñtcha'ña orrtatene' na nehuamenc." Ñeñtpa' atet otenen Yompor. Ñeñto'marña atto napa' ama eñalle e'ñe na nehuamenc, ñeñtpa' ñeñtña atarr nocshatene' na, tarro'mar neñoteñ ñerra'm attenpa' Cristo po'huamencña ñeñt nechorrenaya; ñeñtña norrtatenpa', ama noyaye nehuamenc, ñeñtpa' Cristo. ¹⁰ Ñeñto'marña napa' añ atarr nocshatene' atto napa' ama ahuamencatoyenayayno ñaña atto atarr pencna'ntatennet tarro'mar ama esoye' entenneto. Ñaña napa' añña nocshatene' ñeñt allpon atarr echarrare' nentyen, ñaña atto čhocmach cotare'tennet, ñaña ama't allpon ñeñt nehuenoya ñeñtña atarr nocshatene'. E'ñe pocte' nenteñ o'ch nemueročhta Cristocop. Tarro'mar neñoteñ ñerra'm esempo ama ahuamencatoyenaye' yenteno e'ñe ya, allempoña Cristopa' ahuamencat peney.

Atto Pablopa' atarr llequēnana corinto'marnesha' ñeñt ame'netsa

¹¹ Sapa' atto señosatse'tatyenen e'ñe cohuen ñeñt e'ñe nocpa, tarraña ama't atteñpa' napa' e'ñe po'ñočh notatse'tyen, tarro'mar napa' ama nepallteno o'ch neños e'ñe cohuen ñeñt e'ñe nocpa. Añña palltetsa sa o'ch señosapreten cohuen ñeñt e'ñe nocpa. Tarro'mar sapa' señotenen atarr asherĤoyenen. Ama't po'potantañ ñeñt atarr se'mñotatene' atarr ommo'chenetañ, ñetpa' allsensareteto' Yomporeshoť, ñetpa' atarro' nanac sherbenet, elloña napa' atarr asherben entenen Yompor, ama't napa' ama esoye' nenteno. ¹² Tarro'mar ahuañmo'cha allempo na'puena sesho, napa' allña norrtatyesonas

Yompor po'huamenc ñeñt atarr echarrare' ñeñt sapa' ama't ahuaŕapa' ama sentare ñeñtcha'ña seŕotate' ñeñtpa' Parets po'huamenc ñaña ñeñtcha' seŕotate' napa' po'ñoçh Yomporña nellsensene'. Ñeñto'marña e'ñe cohuen na'huantennas ñeñt atarr torrapo' sentyen. ¹³ Attecma es norrtatyennas ñeñt atet neŕa'yes po'potantañ ñeñt pame'ñeñotet apçha'yetsa allemeñ anetso'mar. Añña ama na'tsrre'moçhtana'taso es senamare'tyese'. Tarraña ñerra'm ama pocteye' sentono ñeñt cohuenare' neponaspa', ñehua, ñato' o'ch sepretnarren.

¹⁴ Te'pa' poma'pocheño'pa' o'ch ahuerrierr sesho. Attecmach neŕohuerrerr; amach na'tsrre'moçhtana'taso es senamare'te' ñeñt nepalltena na. Tarro'mar napa' ama aŕeye' ne'nen ñeñtcha' es sapuen na; napa' añña nemnen o'ch sepomhua sañeña Cristesho. Tarro'mar napa' atet nentenes ñerra'mrrate' po'ñoçh e'ñe nechemer nepenes. Ñehua, cheshaneshapa' ama aŕeye' pallteneto o'ch es a'yapaçhet ñeñtcha' añño'tet pamo'mtayecop. Añña nanac palltetsa, pamo'mte'chña es a'yapaçhets ñeñt puechemereshacop. ¹⁵ Ñeñto'marña e'ñe nocsheñsha' o'ch nepomhua e'ñe nañeña ñeñtpa' e'ñech socop. Allochñapa' attoch sequeshperra saña. Ñaña allpon nechyen, e'ñe nocsheñsha'pa' o'ch nepomyeñ e'ñe socop. Ama't napa' elloña atarr nemorrentensa sañapa' o'huañ e'ñeye' semorrentenna na.

¹⁶ Sapa' seŕotenen napa' ama na'tsrre'moçhtana'taso es senamare'te' ñeñt e'ñe nocop. Tarraña sapa' çate' sotenapañ napa' atarrte' neñoteñ attoch neshcare'tas ñeñt e'ñe po'poñe'ttsoçma shecare'teñets. ¹⁷ Ñeñt nemña ahuañmo'cha epsheña sesho, çate' sotenapañ ñeñtpa' tarreçpate' attoch shecare'taset. ¹⁸ Ñehua, na te'pa' o' nesechach masheñ Tito ñeñtcha' tatsa sesho, epuet po'psheñeñ masheñ o' nemñanet epsheño'maret sesho. Sapa' çate' sotenapañ masheñ Titopa' o'ch shecare'tensa'. Ama't seŕoteñeña yapa' attecma cohuen yoçtape'chen yeyoçhro epan masheñ Tito ñaña attecma es yeŕa'yennas e'ñe cohuen.

¹⁹ Sapa' çate' sotenapañ añeçpate' neñen cohuen nocop allochñapa' attoch o'ch alla cohuen sentuerren. Tarraña e'ñe nemorrenteñoes masheñneshacha' ñaña noçhaneshacha' o'ch notas, ñeñtpa' ama nocpayaye. Añecopña notenes ñeñt e'ñe socop allochñapa' o'ch alla huomenc seperr seyoçher Yomporecop. Napa' e'ñe neyemteñoç Cristo, Yomporñapa' entenen ñeñt atet notenes. ²⁰ Tarro'mar e'ñe nellquëñoes sa noten, ñato' esempoçh neçherr sesho, ñerra'm attera nentyesuerrerr ñeñt atet seŕatse'tyena, napa' ñeñtcha'ña atarr nellcatuerrayerr sesho. Attoña ñerra'm sentapuerren nellquëñsha' neçherr seshopa' ñeñtcha'ña sellcate' saña. Ñato' o'ch nentuerrerr attera se'moñe'tannena, attera es seye'chapretannena, attera sa'tsrre'mare'tatannena sañeña attoch o'ch sa'mçha'tareta; ñato' attera sesasare'tanna'tyena, attera sa'metare'tamŕsannena, ñaña e'ñe puesheña'ttsos attera atarr cohuen sentena sañeña, ñato' attera se'moñe'tanna'teño'pa' seche'çhame'tanna'tyena. ²¹ Ñaña napa' nellquëñoes sa noten, ñerra'm esempo neçherrerr sesho po'pocheño'pa' ñato'rraña o'te' alla pencna'ntaterrerr Yompor e'ñe so'mara. Tarro'mar ñato' patanta'ttsos ama sequeçhpueno ñeñt ama pocteye' enteno Yompor ñeñt atet seyçha'yen sa sosya'tsañeçhno, ñaña atto seçhta'yeyñ coyaneshachno ñeñt ama setaporeyaye, ñaña coyaneshapa'çho'ña aguënan yacma ñeñt ama puerrollareyaye, ñaña atto sayomãtse'tyena ñeñt po'ñoçh ama atet aŕapahuoyaye. Ñato' attera seŕatse'tyena atet sepe't ahuaŕ ama llecatensoña so'çñar attoch soçtape'çherr etserra cohuen. Ñeñto'marña ñerra'm esempo neçherrerr sesho ñerra'm attera nentuerrerr; nellquëño'pa' çate' neya'na'tuerres.

E'ñe allohuanen atet cotape'chatyesnerranet pa'namen esocmañen

¹ Ñato' poma'pocheño o'ch alla ahuerrnerr sesho. Ñaña o'ch notas po'poñ, ñeñt' otteñe'charettetsa, ñerra'm epsheña a'metare'tam'pene' amapa' ma'psheña, allempopa' pocte' o'ch ye'mñoch ñato' po'ñochte' atet patse'tyena. ² Ahuañmo'cha allempo puepocheño necherr sesho, ñeñt' attera patse'tyetsa ñeñt' ama pocteyaye, napa' o' notuanet allempo ñeñt'cha' atet a'parettet ñerra'm atteretach. Ñehua, te'pa' necar-to'tpa' o'ch alla noterraneterr ñet, ama't e'ñe allohuenes o'ch notas, ñerra'm esempo necherrerr po'pocheñopa' o'ch ne'ñotare'tuerres allohuenes ñeñtes attera patse'tyetsa. ³ Allochñapa' sapa' e'ñech señotuenen po'ño'ch nach eñorostsa ñeñt' atet muenatenen Cristo. Ñehua, ñeñt'pa' tarro'mar sapa' chocma senamuenen o'ch norrtatennasa' attoch señoten napa' po'ño'ch Cristo ne'ñoratene'. Ñaña Cristopa' e'ñe po'huamencotña chocmach erro'ten es pa'yennas, ñaña atarr ahuamencat penes. ⁴ Ñehua, po'ño'ch yeñoteñ allempo corso'tam'pset Cristopa' ama ahuamencateye' enteñeto tarraña Pomporña e'ñe po'huamencot' alla tantater. Yapa'cho'ña attecma yeñotena ama ahuamencateye' yenteno ñerra'm ña, tarraña te'ña yapa' o' yocrrerra po'huamencot' Yompor attey ñerra'm ña. Attoña po'huamencot' Yompor e'ñe cohuen yesherbenes.

⁵ Te'pa' o'ch noterrerr, socoppa' añ poctetsa o'ch señota sañeña, ¿po'ñochte' same'ñena? O'ch señota esheccha' seño'ch po'ñochte' sapa' same'ñena. Ama't señoteñe Jesucristoña sechorrenaya. Ñehua, ñerra'm po'ño'ch ama same'ñeño, amachña erro'tenot' chorraso. ⁶ Tarraña napa' chocma necuenes o'ch chaponasa seyo'chro attochña señoten po'ño'ch napa' añ nellsensene' Yompor. ⁷ Napa' nema'yocheno'tpa' chocma nenamuennas Yompor socop attoch amach allo'na atet sepatsto ñeñt' ama cohue-nayaye Yomporecop. Ñeñt'pa' ama añecpayaye attoch sapa' o'ch señotenen napa' po'ño'ch allsensareten Yomporeshot. Añecopña nenamuennas Yompor socop attoch sapa' chocmach sepa'yen ñeñt' cohuen enten Yompor, tarro'mar ñeñt'pa' ñeñt'ña e'ñe cohuentetsa Yomporecop. Ñeñt'pa' atetña nemnen socop ama't napa' atet sentennoñ atet ñerra'mrate' ama allsensareteno Yomporeshot. ⁸ Tarro'mar napa' ama nemno o'ch nepatare't ñeñt' e'ñe po'ño'ch cohuentetsa Yomporecop. Napa' añña atarr nemnen o'ch nepatuahuoñ ñeñt' e'ñe po'ño'ch cohuentetsa ñocop. ⁹ Ñerra'm soctape'cherr cohuen attochña huomenc seperr seyo'cher Yomporecop amach nepallteno o'ch norrtatonas nehuamenc atto allsensareten Yomporeshot. Tarraña atetpa' e'ñe pocte'. Ama't napa' ama ahuamencatoyenaye' sentenno, tarraña ñerra'm sapa' ahuamencat perres Yompor, ñeñt'pa' e'ñe pocte' nenteñ. Ñaña atto nema'yochena socop allo'nepa'chña sesen e'ñe huomenc pa'nmue' seyo'cher Yomporecop. ¹⁰ Ama't ella'paro'tsenen o'ch nequellquërrnaserr necarta, ama't ama nesena' sesho, allochñapa' o'ch alla soctape'cherr cohuen Yomporecop. Attochña ñerra'm esempo necherr seshopa' amach cha muene' neche'chame'tyesuerrso attoch señoton ñeñt' atet llesensenen Yepartseshar. Tarro'mar atet allsensareten, ñeñt'pa' ama añecpaye' sherbeno alloch na'puerratatuerres, ñeñt'pa' añecopña sherben attoch neyenpas huomenc pa'nmue' seyo'cher Yomporecop.

Arrpa' all e'ñe poctacma so'tnerranet po'cartot

¹¹ Te' masheñneshacha' ñaña no'chaneshacha' allohuach notas añ necartot. E'ñe neso'teñotespa' o'ch notas, Yomporepa'chña sa'nataya. Te'pa' ñeñtach noterrerr mame'. Allo'nepa'chña sesen cotape'chnomue' ñeñt' e'ñe cohuentetsa Yomporecop. Ñeñt' atto o' noctape'chaterrerr añ necartot, se'mñotonepa'ch neñoñ attoch socsherra e'ñe poctacma. E'ñepa'chña patrra soctape'chuen allohuenes, attochña e'ñech cohuen sentannena. Yomporepa'ch sa'nataya ñeñt'ara Yompor ñeñt' atarr amorrentña ñeñt'ña atarr yocshatene' yeyo'chro. ¹² E'ñe semorrentanna'teño'tpa' atet'cha' sehuom'cha'tanna'tena

ñeñĩ atet pochtetsa Partsocop.* 13 Ñaña arrpa' allohuen ñeñĩ o' pueyochresha' perr Parets, ñetpa' mueneñet o'ch huom̃cha'taset ñamet arr necartoĩ.

14 Yepartsesharepa'chña Jesucristo sebensare'tam̃pene' allohuenes, ñaña Yomporepa'chña semorrentaya attoch semorrentannena saña, ñaña Puecamquẽñepa'chña sechorrenaya attoch e'ñe separrocmatuahua allohuenes epas Cristo. Te'pa' ñeñĩtach notas, ñeñĩpa' attetepa'chña Nompore. Allohua.

Pablo

* 13:12 Po'ñoçh oteneý, "E'ñe semorrentanna'teñoĩ çoch setso'ttsa'pa'tannena ñerra'm esempo sehuom̃cha'tanna'tena ñeñĩ atet pochtetsa Partsocop." Ñeñĩpa' atet yeçhete'ã ahuat.

AÑ SAN PABLO PO' CARTA ÑEÑT̃ QUELLCAN GALACIO' MARNESHA' GÁLATAS

Atto Pablopa' quellcan carta añecop ñeñt̃ ame'ñetsa anetso Galacio

¹⁻² Masheñneshacha' ñaña nochaneshacha' ñeñtes allohuenes same'ñeñoť apcha'yetsa allemeñ anetso Galacio'mar. Na Pablon sequellquëne'ña añ carta ñeñten Jesucristo puellsensaren. Napa' ama acheñeye' nellsensenaye, Jesucristoña nellsensene' epuet Pompor Parets ñeñt̃ tantaterre' Puechemer rromot̃. Ñaña allohuen masheñneshachno ñeñt̃ parro arro'tsenen, ñetpa'cho'ña mueneñet o'ch huom̃cha'taset ñamet añ necar-toť. ³ Te'pa' e'ñe nehuom̃cha'teñoťes o'ch notas: Yomporepa'chña sebensare'tam̃pene' ñeñt̃ atarr Parets epuet Puechemer Jesucristo ñeñt̃ Yepartseshar yepen. Ñetepa'chña socshatene' e'ñe sa seyočhro allohuenes. ⁴ Ñeñtara Jesucristo ñeñt̃ e'ñe pocte' ente' o'ch rroma yo'chñarecop attochña yapa' cohueno'tseneycha' ama't añ patsropa' sosya'tsaño'tsenya, tarro'mar ñeñt̃pa' atet pocte' eñch Pompor ñeñtara Yompor ñeñt̃ nanac Parets. ⁵ Ñeñtara Paretspa' aye'chočhtaterrapo'ch e'ñe tayoteñ errponohuañen. Ñeñt̃pa' attetepa'ch Nompore.

All eñotatanet atto ama eñalle po'poñ alloch yequeshperra

⁶ Te' napa' o'ch notas: Eso'mare'tña e'ñe mamecmapa' o' alla soctape'chyerr po'poñ. Sapa' cha semneñ o'ch sequechpuer Yompor ñeñt̃ o' hua'ñerres o'ch same'ñerrñaña Puechemer Cristo ñeñt̃ rromats attoch sequeshperra. Tarraña sañapa' cha semneñ o'ch alla soctape'cherr po'poñ ñeñto'ch sa'queshpaterrayeñ. ⁷ Po'ñočhpa' ama't ama eñalle po'poñ alloch yequeshperrapa' añña ñeñt̃ huapyetsa seshopa' ñetpa' cha mueneñet o'ch alla moññe'taterrset soctapña. Ñaña ñetpa' mueneñet o'ch a'po'poñetonaset soctapña ñeñt̃ coťapñats po'ñočh alloch yequeshperra e'ñe yame'ñeñoťa Cristo. ⁸⁻⁹ Tarraña napa' o'ch notas: Ama't erra'tsencha' seserrpare'tate' po'poñ coťapñats ñeñt̃ ama ñeñtarayaye ñeñt̃ atet o' same'ñerra ahuañapa' ñeñt̃ acheñerpa' amuepa'ch yenpueñe Yompor. Ama't yapa'cho'ña ñerra'm o'ch alla yeserrpare'taterrser ello ñeñt̃ ama ñeñtarayaye ñeñt̃ atet o' neserrpare'tatuas ahuaña ñeñt̃ po'ñočh alloch yequeshperra yapa'cho'ña amuepa'ch allo'na yenpa'nenye Yompor. Ñaña ama't añ atet patsa ñeñt̃ Yompor po'millañoťeñer entotpa' ama't ñapa'cho'ña amuepa'ch yenpueñe Yompor. Ama't ñeñt̃pa' o' notuaseñ ahuatoteñpa' tarraña te'pa' o'ch alla noterrser, amuepa'ch yenpueñe Yompor ñeñt̃ atet petsa.

¹⁰ Te' sapa' señoťenen napa' ama añecpaye' notenso attoch cohuen entenen acheñ, añña nemnen o'ch cohuen entenen Yompor. Ñaña ama acheñeneshaye' nemneno o'ch nocshach tarro'mar ñerra'm aña orameñ nemneñ o'ch nocshach acheñpa' ñeñtepñapa' amate' erroťeno noto napa' pueyočher penen Cristo.

Atet pa Pablo allempo errte' allsensareťterra

¹¹ Napa' nemneñ masheñneshacha' ñaña nochaneshacha' o'ch señočh ñeñt̃ atet neserrpare'tatas ahuañapa' ñeñt̃pa' ama acheño'yaye poctapña alloch yequeshperra. ¹² Napa' ama acheña neñotatenaye atet, ñaña napa' ama esesha' neyčhatenaye. Añña e'ñe Jesucristo ñaña e'ñe neñotatene' atet.

¹³ Sapa' o' se'mare'tuan atet nepe't̃ ahuañmo'cha allempo noctoñe't̃ judionesha' poctapña. Napa' allempo nanac noctare'che't̃ ñeñt̃ ame'ñenaya Yompor. Napa' atarrcha' nemne't̃ o'ch na'cllatuanet. ¹⁴ Napa' e'ñe netsotoñe't̃ judionesha' poctapña. Napa'

ello nemítana'tue't shonte' nacmanesha' judionesha' ñeñt' parro neyemte't. Napa' nanac nema'yo'chroñe't judionesha' po'capña ñeñt' atet ye'che't ahuatnaneshañ, ñaña ñeñtara atet ye'chatyesete't ñaña puechemerashañ. ¹⁵⁻¹⁶ Tarraña Yomporpa' ahuo't acrerren ahuatoteñ ama't allempo ama ne'ñalletena'. Tarro'mar allempo chap allempoch eñotaterrenpa' o' yematerrna Puechemer ñeñtara Jesús. E'ñe puemuereñoten nanacpa' o' chore'terren attoch nach serrpare'te' po'ñoñ allo'tsa'yen ñeñt' ama judioneshayaye. Ñaña allempo e'ñe pocte' enteñ Yompor o'ch eñotaten atetpa' napa' ama esesha' na'p'to'to ama't puesheñarra. ¹⁷ Ñaña ama't Jerusaléñapa' ama neto o'ch nenteña' ñeñt' allsensaretnesha' ahuatoteñ. Elloña napa' arra ahuen all oteñet Arabia, allpa' ama acheñempaño'yaye. Allñapa' all na'llponmatena' e'ñe alla; allotñapa' alla nepuerrerra Damasco.

¹⁸ O'ña met ma'pa char allempañapa' ahuen Jerusaléño o'ch nenteña' masheñ Pedro.* Allñapa' alla na'pa ñesho çharramat puechena amnarmat. ¹⁹ Tarraña allempo allo'tsenenpa' ama nenteño po'psheññe'chno ñeñt' allsensaretnesha', ñapña nenteña' masheñ Jacobo† ñeñtara ñeñt' pa'mo'nasheñ pen Yepartseshar Jesús. ²⁰ Po'ño'chpa' ama't Yomporpa' eñotenen ñeñt' atet notenespa' ñeñt'pa' e'ñe po'ño'ch atet.

²¹ Allempoña nerr, arr nasuanerr Sirio'mar ñaña Cilicio'mar. ²² Tarraña ama't allempo ñeñt' ame'ñenaya Cristo all Judeo'marpa' ñetñapa' ama eseshaye' nechme'tenaye. ²³ Tarraña ahuo't e'mare'chet ñeñt' cotare'tahuete't ahuaña te'ñapa' o' serrpare'terran attoch yame'ñerra ñeñtara co'apñats ñeñt' chocma mueneñ ahuaña o'ch huapore'tater. ²⁴ Ñeñto'marña te'pa' e'ñe no'marpa' nanac aye'cho'chtateññañet Yompor.

2

Atto po'psheññe'chno allsensaretnesha' e'ñe pocte' eñchet Pablo

¹ Allempoña o' meterrerr çharra' char puechena pa'tatspa' o' alla ahuernerr Jerusaléño epan ñaña masheñ Bernabé. Ñaña o' nanemí masheñ Tito. ² Napa' ahuernerr alla tarro'mar atet oten Yompor. Allempoña ne'chap Jerusaléñopa' neserrpare'tatosanet ora allohuen ñeñt' atet o' neserrpare'tatue ñeñt' ama judioneshayaye. Neñotach ñaña Jerusaléño'marnesha' ñeñt' atet neserrpare'tatyeñ acheñenesha' e'ñe yame'ñeñoña Cristopa' o'ch yequeshperra. Ñehua, ñanompa' neserrpare'tach ñeñt' am'cha'taretetyetsa Jerusaléño e'ñe ñap'teto. Napa' tarro'mar notanet atet allochñapa' attoch neñoch ñato' pocte'ch entapretnet ñeñt' atet nepena, allochñapa' atto neserrpare'tatyenpa' amate' e'ñe orrena neserrpare'tyeno. ³ Allempoña neserrpare'tatuanet atetpa' e'ñe pocte' eñchet ñeñt' atet neserrpare'tyen. Ñeñto'marña ama't allo'tsen masheñ Tito ñeñt' ama judioneshayayepa' ama't e'ñe puesheñarrofetapa' amaña eseshaye' notaye netsorrachepa'to' masheñ Tito tarro'mar ñapa' ama judioneshayaye.* ⁴ Tarraña ama't allempopa' ama eñallñeña ñeñt' torrapo' yentyenpa' añña puesheña'tetspa' o' huapyesa yesho. Ñaña ñetpa' ama't otenetañ ahuo' ame'ñerret atet ñerra'm ya tarraña e'ñe a'nahuapa' mueneñetañ ahuo'ch nonayet ñoñets ñeñt' nanac torrapo' yenten. Ñetpa' añecpa huapuet a'nahua o'ch e'monayet atto yapa' yoten e'ñe yame'ñeñoña Cristo Jesúsapa' o'ch yequeshperra. Tarraña ñetpa' añña mueneñetañ o'ch alla nerrnayet judionesha' po'capña ñeñt' nanac torrapo' yenten. ⁵ Tarraña yapa' ama yemnataneto ama't e'ñe mamesha, tarro'mar yapa' ama yemno o'ch alla ya'po'poñeta'mperres ñeñt' cohuen ñoñets ñeñt' e'ñe po'ño'ch alloch yequeshperra.

* **1:18** Añ Pedropa' ñeñtara otenet Cefas. † **1:19** Jacobopa' ñeñtara ñeñt' sochenet Santiago. * **2:3** Añ ñoñets "at-sorrare't", añ ñeñt' otets atet ye'che't judionesha'. Ñeñt'pa' atet: Ñerra'm allempo eñalletena asheñorrofollesha' ñeñt' e'ñe judionesha'pa' añña pomporpa' o'ch tsorratenet po'chtso. Ñehua, ñeñt' tsorratenetpa' ematollach o'ch çhapa'muen po'psocmatño. Ñehua, po'chtso allcha' tsorret asheñorrofollla' all e'ñech poteretollo e'ñe poñot pa'rmatollo.

⁶ Allempoña neñotach amcha'taretnesha' ñeñt Jerusaléno'tsa'yen ñeñt atet o' nepohuapa' tarraña amaña erroť otneto ñeñto' nepalltena ñeñtcha' atet nepa. Ñehua, po'ñočh napa' ama nepallteno o'ch e'mñotaten amcha'taret tarro'mar ama ñapta amcha'taret pocte' entenoña Yompor. Ñeñto'marña ñeñt pa'mcha'taretneshar penet ñeñt ame'ñetsa amaña erroť otneto ñeñto' nepalltenmeñ ñeñtcha' atet nepa. ⁷ Añña ñetpa' e'ñe pocte' entnet, tarro'mar o' eñochet napa' po'ñočh allsensareten o'ch neserrpare'tach acheñenesha' cohuen ñoñets, ama't ñeñt ama judioneshayaye. Attecma ñaña masheñ Pedro allsensaret o'ch serrpare'tan cohuen ñoñets judioneshacop, napa'cho'ña attecma allsensareten o'ch neserrpare't cohuen ñoñets añecop ñeñt ama judioneshayaye. ⁸ Tarro'mar ñeñtara Yompor ñeñt llesense' Pedro o'ch serrpare'tatan judionesha', napa'cho'ña ñeñtara Yompor ñeñt nellsense' ñaña o'ch neserrpare'tach ñeñt ama judioneshayaye.

⁹ Ñeñto'marña ñeñt amcha'taretetyetsa atet ñerra'm masheñ Jacobo ñaña masheñ Pedro ñaña masheñ Juanpa' ñetpa' e'ñe eñochet po'ñočh napa' Yompor o' yenpuerren. Ñeñto'mar ñetpa' e'ñe cohuen agapyet epan masheñ Bernabé. Pagapueñoťetaypa' orratyot pot po'cohuenroť attoch yeñotanna'ta e'ñe attecma yocťape'chen Yomporecop. Allempoña ñetpa' e'ñe pocte' entyot yeserrpare'tachepa'to' ñeñt ama judioneshayaye, atet ñerra'm ñetpa' o'ch serrpare'tachet ñeñt judionesha'. ¹⁰ Ñetpa' aña paterr otyet, es yapa'yeseпа'to' huocchañneshačhno; ñeñtña ama't napa' e'ñe pocte' neñch ñaña.

Allempo Pablopa' muene' che'ptare'tan Pedro

¹¹ Tarraña allempo čhap ñaña masheñ Pedro Antioquíopa' napa' čha muene' neche'ptare'ch allempo yeserrpare'ten parro, tarro'mar allempo ñapa' añ pa ñeñt ama pocteyaye. Ñeñtpa' atet pa, ¹² allempo e'ñe errte' čhets masheñ Pedro Antioquíopa' ñapa' allenta rrallme'chapretosan ñeñt ama judioneshayaye. Tarraña allempoña čhačha't ñaña puesheña'tets ñeñt huetsa masheñ Jacobueshotpa' allempoña masheñ Pedropa' o'huañ rrallme'chapretan ñeñt ama judioneshayaye, tarro'mar ñapa' añ mecha'ten ñeñt cotene' judionesha' poctapña. Ñeñto'marña e'ñe allempopa' o'huañ rrallme'chapretanet, ñaña o'huañ yemtanet. ¹³ Añpa'cho'ña judionesha' ñeñt ame'ñetsapa' ñetpa'cho'ña o' atet pa'yaset ñamet ñeñt atet pena masheñ Pedro. Ñeñto'marña allempopa' ama't masheñ Bernabépa' o' pachet ñaña ñeñt atet penet ñet. Po'ñočhpa' ama't eñoteñetañ ama atet ařapahuo. ¹⁴ Tarraña allempo nentanet ama e'ñe pačharroye' peneto ñeñt cohuen ñoñets ñeñt po'ñočh Yompor po'ñoñ allempoña napa' atet noch masheñ Pedro e'ñe allo'tsa'yen allohuen acheñenesha', ñeñtpa' atet noch: "Papa' ama't judioneshapeñpa' tarraña o' peřohua ñeñt atet pena ñeñt ama judioneshayaye, te'ñapa' eso'mare'tña pañapa' pemneñ o'ch penoñña ñeñt ama judioneshayaye añ ñoñets ñeñt atet anaret judioneshacop ñeñt ama't papa' ama atteye' pepeno atet anaret añ ñoñets."

Ama't judionesha'pa' e'ñech attecma a'queshpatareťterret ñerra'm ame'ñeretcha' Jesús

¹⁵ Yapa' e'ñe judiona'tareshoť e'ñalletñay. Tarraña yapa' ama atteyayye ñerra'm ñeñt ama judioneshayaye ñeñt nanac ochñať. ¹⁶ Tarro'mar ya ama't judioneshaypa' yeñoteñ e'ñe yame'ñeñoťa Jesucristopa' o'ch pocte' enterrey Yompor, ñeñtpa' ama añoťeyaye o'ch e'ñe yeřohua ñeñt atet anaret judioneshacop. Añña e'ñe yame'ñeñoťa Jesucristopa' o'ch pocte' enterrey Yompor, ñeñto'marña o' yame'ñera Cristo, tarro'mar yeñoteñ e'ñe yetsoťeñoťa ñeñt atet anaret judioneshacoppa' amach pocte' enterrye Yompor ama't puesheñarrotteya.

¹⁷ Ñaña te' yapa' e'ñe yame'ñeñoť Cristopa' yeñoteñ e'ñech pocte' enterrey Yompor. Tarraña ama't atarr yeyemteñapa' čhocmach yentena yapa' ochñaťey. Ñeñto'marña

sapa' chate' sotenapañ Cristopa' ñeñtēña ochña'tatañtetsa. Tarraña ñeñtpa' amaca'ye atēyaye. ¹⁸ Tarraña ñerra'm o'ch alla yoctape'cherrerr ora allohuen ñoñets ñeñt atē anaret judioneshacop ñeñt o' yepuesuanom ahuañapa' elloña allempopa' o'ch alla yenterra yapa' nanac ochñaŕey. ¹⁹ Tarro'mar ñeñt ñoñets ñeñt atē anaret judioneshacop ahuaŕpa' te' napa' neñoteñ ñeñtpa' ama añecpayaye attoch o'ch ya'queshpatterra yañeña. Ñeñto'marña ya ñeñŕey o' yame'ñera Cristo yapa' o' ya'ypo'ñamper attochña te'pa' o'ch yocrrerra cohuen Yomporecop e'ñe yeyochrohuen. ²⁰ Ñeñto'marña yapa' o' yequechpa'huerr atē muenatse'tatyese't yechets. Ñeñto'marña o' e'ñe atē yeperra ñerra'mrrate' o' corso'tamperryet epay Cristo. Te'pa' ama't ora yocrrenañpa' tarraña ama yaye' corretso, añña Cristo ñeñt yechorrenayapa' ñeñtña corretsa te' yechtso. Te'pa' e'ñe yeyemteñoŕ Yompore Puechemerpa' yocrrena e'ñe cohuen arr patsro, tarro'mar ña yemorrenterraya, ñaña ña rromats yocop. ²¹ Ñeñto'mar te'pa' ama yemno o'ch yehuapore'terrñañ Yompore puemuereña atto apuey Puechemer alloch yequeshperra. Tarro'mar ñerra'm eñalleñ attoch yequeshperrañ e'ñe yetsoteñoŕa ñoñets ñeñt atē anaretpa' ñeñteñpa' atto rroma Cristopa' amate' es sherbeno.

3

E'ñe yame'ñeñoŕa Cristopa' o' yequeshperra, ama añ yetsoteñoŕe ñoñets ñeñt atē anaret judioneshacop

¹ Sapa' nanac galacio'marneshacha' sepanteñ. Po'ñoŕh sa o'ca'ye cha shecaset attoña te' sapa' o'huañ same'ñenaña ñeñt e'ñe po'ñoŕh alloch yequeshperra. Ama't ahuaña allempo yeserrpare'tatensa'pa' yapa' añ yeñotatuas atto po'ñoŕh Jesucristopa' o' acorso'tamŕsaretta e'ñe yocop. Ñeñtña po'ñoŕh same'ñaña sa allempo. ² Ñeñto'marña te'pa' nemneñ o'ch neñotatas ama't añ paterr ñoñets: Sapa' e'ñe seyemteñoŕ ñeñt Cristo po'ñoñ attoña chorrasaña Parets Puecamquēñ. Amaña añoteye' chorraso e'ñe setsoteñoŕ añ ñoñets ñeñt atē anaret judioneshacop. ³ Eso'mare'tña sapa' nanac sepanteñ. Atto sa ahuañapa' añ seyemtena Parets Puecamquēñ ñeñt ahuamencat añañpa' eso'mare'tña te'ñapa' o'ch alla seyemterrerr e'ñe sañeña setsotateñ. ⁴ E'ñehuachñaca' orrena atarr semueroŕhetyesa. Po'ñoŕh ñato' ñeñtpa' amate' e'ñe orrenayaye ñerra'm o'ch alla soctape'cherr cohuen. ⁵ Ñaña allempo Yomporpa' chorrataasa Puecamquēñpa' ñapa' añ orrtatonas partsoteñets e'ñe sesho. Ñehua, ñeñtpa' amaca'ye añoteye' orrto e'ñe sa setsoteñoŕ ñeñt atē anaret judioneshacop, ñeñtpa' añotca'yeña orrta e'ñe same'ñeñoŕa ñeñt atē yeserrpare'tatuas.

Abrahampa' e'ñe pueyemteñoŕ Yomporpa' o' pocte' eñch Yompor

⁶ Ñehua, Abrahampa' nanac yemtane't ñeñt atē och Yompor, ñeñto'marña Yomporpa' e'ñe pocte' eñche't. ⁷ Ñeñto'marña yeñoteñ ñeñt nanac yemtenaya ñeñt atē oten Yompor ñeñtña Yomporpa' e'ñe pocte' enteñ atē ñerra'm puechemereshanet Abraham. ⁸ Yomporpa' e'ñe eñotue't ahuatoteñ ama't ñeñt ama judioneshayayepa' o'ch ame'ñeret esempo, ñaña e'ñe pame'ñeñoŕetpa' pocte'ch enterranet. Ñeñto'marña ama't ahuatoteñpa' e'ñe anuaret po'ñoño. Yomporpa' atē otan Abraham: "E'ñe peshotpa' o'ch nebensare'tamŕpes allohuen pa'namen acheñ." Ñeñto'marña yeñoteñ ama't ahuatoteñ Yomporpa' serrpare'tatane't Abraham ñeñt cohuen ñoñets alloch yequeshperra. ⁹ Ñeñto'marña yeñoteñ te'pa' allohuen ñeñt ame'ñenaya Cristopa' e'ñe attecma cohueno'tsenacma atē ñerra'm Abraham ñeñt nanac ame'ñaye't Yompor ahuaŕ.

¹⁰ Tarraña allohuen ñeñt yemtenaya ñoñets ñeñt atē anaret judioneshacop o'ch e'ñe etsotuet ñetñapa' o' anarettet allohuenetpa' a'coñchatare'ttetcha' tarro'mar atē anuaret Yompor po'ñoño ama't ahuatoteñ, ñeñtpa' atē oten: "Allohuen ñeñt ama etsotuenaye

e'ñe poctacma allohuen allpon ñoñets ñeñt atet anaret quellco, ñaña ñerra'm ama pohueto allohuen ñeñt atet anaretpa' a'coñchatareftetepa'ch." ¹¹ Ñeñto'marña yeñoteñ amach pocteye' enterrye Yompor e'ñe yemneññoa o'ch yetsotua añ ñoñets ñeñt atet anaret, tarro'mar amach errotenoŷ yetsotuo ora allpon ñeñt atet anaret. Ñeñto'marña ama't puesheñarroŷeyapa' amach pocteye' enterrye Yompor. Ñeñto'mar ama't Yompor po'ñoñopa' atet anuaret ahuatoteñ, ñeñtpa' atet oten: "E'ñe yeyemteñoa Yompor ñapa' o'ch pocte' enterrey attoch ello yocrrerra errponohuañen." ¹² Tarraña ñeñt ñoñets ñeñt atet anaret judioneshacoppa' ama atteye' oteno, ñeñtpa' atet oten: "Ñerra'm yeŷohuencha' e'ñe poctacma ñeñt atet anaretpa' esheccha' ello yocrrerra errponohuañen."

Cristopa' e'ñe pocte' eñch attoch ñach arrnomarettatsa yocop

¹³ Ñoñtsopa' ama't o'patatenyañ coñcheñets tarraña Cristopa' ñaña coñcherrtsa e'ñe yocop attochña yapa' amach yecoñcherro. Ñeñtpa' yeñoteñ tarro'mar ama't ahuatoteñpa' atet anuaret Yompor po'ñoño, ñeñtpa' atet oten: "Ama't erra'tsena acheñer puepen-cateñme'chatset cho echañchet tsachopa' ñeñtpa' a'coñchatareŷcha' entyes acheñenesha'." ¹⁴ Ñeñto'marña yeñoteñ e'ñe pame'ñeñoŷet Jesucristopa' o'ch eñalleta attoch Yomporpa' e'ñech pocte' entanet ñamet ñeñt ama't ama judioneshayaye, attecma pe't ahuatoteñ Yompor e'ñe pocte' entane't Abraham. Ñaña e'ñe yame'ñeñoŷpa' attoña eñall attoch chorrerrya allohueney Parets Puecamquëñ, atet Yomporpa' otan ahuat Abraham.

Ñeñt atet Yomporpa' otan ahuat Abraham ñeñtcha' atet poñ

¹⁵ Ñehua, masheñneshacha' ñaña noçhaneshacha' te'pa' o'ch alla neñotaterrrserr po'poñ. Ñehua, ñato' o'ch netma'ntacha ñeñt atet yocrrena añ patsro. Atet ñerra'm puesheñarr yacmapa' o'ch a'poctachet epuet po'psheñeñ, o'ch quellcatet, allotpa' o'ch quellca'huet pa'so'cheñ all, allochñapa' amach errotenoŷ esesha' a'po'poñeterroye po'ñoñ ñeñt atet o' quellcatuet, ñaña attoch amach esesha' huapore'terroye po'ñoñ. Atet yepena yaña ama't acheñaya atet petsa ellohuate'ñaca' Yomporpa' ama pueno po'ñoñ. ¹⁶ Yompor ahuatpa' atet otan Abraham ñeñtcha' atet poñ e'ñe puesheñarroŷ po'mñrenñoŷ. Tarraña ama allohuenaye' po'mñrenñecop atet oche, e'ñe puesheñarrocpa atet och, ñeñtpa' yeñoteñ ñeñtara ñeñt Cristotats. Ñeñtpa' attecma oten ama't ahuatoteñ Yompor po'ñoñ. ¹⁷ Añmapa' ñeñtña atet neyçhatenes. Ñehua, yapa' yeñotueñ atto Yomporpa' a'poctachet ama't ahuatoteñ epuet Abraham. Alloñapa' allempo o' met cuatrocientos treinta charpa' allempoñapa' çhap allempoch anaretta añ ñoñets judioneshacop ñeñt atet quellcanet Moisés. Tarraña ama't o' anaretta añ ñoñets ñeñt quellcanet Moiséspa' tarraña ñeñtpa' yeñoteñ amach erroteno huapore'tatereto ñeñt atet o' anaretetua ñeñt atet o' a'poctatua Yompor epuet Abraham ama't ahuatoteñ, tarro'mar Yomporpa' ama puenesho po'ñoñ. ¹⁸ Ñaña ñerra'm eñalleñ attoch yequeshperrañ e'ñe yetsoteñoa añ ñoñets ñeñt atet quellca' ahuat Moiséspa' ñeñtepñapa' amate' palltenañe attoch Yomporpa' otan ahuat Abraham o'ch eñalleta e'ñe ña po'mñrenñoŷ puesheñarr ñeñtcha' ya'queshpaterre' e'ñe yame'ñeñoŷa ñeñt atet oteney.

¹⁹ Añ ñoñets ñeñt atet net allempopa' ñeñtpa' atet pa: Yomporpa' ahuo't mueñan po'mllañoŷeñnaneshar attoch ñetpa' o'ch eñorana'chet Moisés attoch ñach a'mte' añ ñoñets judioneshacop. Tarraña añ ñoñetspa' e'ñe tarremphua sherba' allempo huapa Cristo atet Yompor otan ahuat Abraham. E'ñe po'ñoçh yame'ñeñoŷ a'queshpaterreycha'. Te' ellonetpa' o'ch neñotatas ñeñtecop nanña ellonet Moisés po'ñoñ. Ñehua, ñeñtpa' añecpa anaretta attoch yeñoçh ñeñt allpon ochña'teñets enten Yompor ñaña attoch ñeñtcha' yeñotatene' ñerra'm esempo o' yeŷohua ñeñt ama pocteye' enteno Yompor. ²⁰ Tarraña allempo Yomporpa' eñorana'tana Abraham ñeñtcha' atet poñpa' allempopa' e'ñe ña ote'

allame'tets. Allempo Yomporpa' ama esesha' oto po'psheñeñ ñeñtcha' a'mtahuet añ ñoñets.

Añ ñoñets ñeñt atet anaret ahuaťoteñ judioneshacop añecopña sherben ñeñtcha' yame'ñaterraya Cristo

²¹ Ñehua, ñato' sapa' o'ch soten, ñeñtepñapa' añ ñoñets ñeñt atet quellcanet Moiséspa' ta', čote' epatenan Yompor po'ñoñ ñeñt atet otan ahuať Abraham. Ñeñtpa' amaca'ye atteyaye. Tarro'mar ñerra'm eñalleñ e'ñech ñoñtsoťa ñeñt atet anaret o'ch etserrater-rnayeñ cohuen yeyočer Yomporecoppa' amate' palltenañeña po'poñ attoch pocte' enterrey Yompor; ñeñtpa' e'ñete' ñoñtsoťa ñeñt atet anareťpa' o'ch pocte' enterryeñ Yompor; tarraña ñeñtpa' ama atteyaye. ²² Tarro'mar Yompor po'ñoñ ñeñt anuaret ahuaťoteñpa' oteneý, allohueneýpa' e'ñe yo'chña'tuen, amach erroťenoť e'ñe yetsotuoñe ñeñt atet anaret Yomporecop. Ñeñto'marña ñeñtpa' ama añecpayaye alloch yequesh-perra. Añña e'ñe yame'ñeñoťa Jesucristopa' o'ch yequeshperra, ñeñtara Cristo ñeñt atet Yomporpa' otan ahuať Abraham.

²³ Ahuať allempo ama huena' Cristo ñeñtcha' yame'ñerrapa' amach erroťenoť ya'ypo'ñerro añ ñoñets ñeñt atet anaret. Atta yepeť tarremphua allempo huapa Cristo attoña e'ñe yame'ñeñoťa ñapa' o'huañcha' allo'na amcha'nočhta ñoñets yocop.

²⁴ Ñehua, ñato' o'ch netma'ntacha atet. Añ ñoñets ñeñt atet anaret judioneshacoppa' ña yecuañpsayeť ahuať. Ñeñtpa' tarremphua atet pa' allempo huapa Cristo, ñaña añ ñoñetspa' añecpa sherba' attoch ame'ñaterraya Cristo, allochñapa' e'ñe yame'ñeñoťa ñapa' o'ch pocte' enterrey Yompor. ²⁵ Tarraña te'ña o' yame'ñera Cristopa' ama yepallteno ñeñtcha' allo'na yecuañpse'.

E'ñe yame'ñeñoťpa' atetcha' enterrey Yompor ñerra'mrrate' e'ñe puechemereý Abraham

²⁶ Tarro'mar te'pa' e'ñe yeparrocmateñoť Cristo Jesúspa' o'ch puechemer perrey allohueneý Pompor, tarro'mar e'ñe yame'ñeñoť Puechemer. ²⁷ Ñaña allohuenes ñeñtes o' sapatareťterra e'ñe same'ñeñoť Cristopa' o' chorrerrsa Cristo. ²⁸ Ñaña te'pa' e'ñe yeparrocmateñoť epay Cristo, Yomporpa' ama po'poñe'ttsocmaye' enteneý, e'ñe attecma enteneý allohueneý, ama't judionesha', amapa' ñeñt ama judioneshayaye, amapa' ñeñt ataruasatareť e'ñe atta, amapa' ñeñt ama ataruasatareťeye e'ñe atta. E'ñe attecma enteneý allohueneý ama't asheñorrey, ama't ñaña coyanesha'. Tarraña Yomporpa' e'ñe attecma enteneý. Tarro'mar e'ñe yeparrocmateñoť epay Cristo Jesús e'ñe puesheña'ttsoýpa' o'ch e'ñe yeparrocmatua allohueneý e'ñe parro. ²⁹ Ñaña ñerra'm yapa' Cristona'tareýpa' añña Yomporpa' e'ñe atet enteneý ñerra'mrrate' po'mreñeñ peney Abraham. Ñeñto'marña yapa' o'ch yagapapreter ñeñt atet Yomporpa' otan ahuať Abraham ñeñtcha' atet a'nacha.

4

Atto Cristopa' a'huañampherran acheñenesha' atto amcha'nočhtanete't ahuať ñoñets ñeñt atet anaret

¹⁻² Ñeñt notenespa' ñato' o'ch netma'ntacha atet. Ñerra'm puesheñarr yacma eñall puechemer, esempoña o'ch po'nerr allempoch o'paterrana ora allpon echen pompor. Ñehua, ama't yeñoteñ ñapa' o'ch o'paterrana ora allpon echen pomporpa' tarraña allempo ama po'nenapa' amach es o'patena' ama't coñe'ta. Ñaña allempo ama po'nenapa' amach erroťenoť es pa'yesoña e'ñe ñoťa, tarro'mar allempopa' čocma eñall puesheñarr ñeñt cohuañpene', ñaña allempopa' čocmach es tsa'teññañet ñeñt chesar. Allempoña atet penapa' čach ottena ñerra'mrrate' atta ñañreteñet, ama't ora allpon echeneñ pomporpa' ñocpañ. Tarraña esempoña čhap pompor ponañcho allempoch po'n puechemerpa' allempoñapa' o'ch agapan ora allpon echen pompor.

³ Ñeñt'pa' atet yepe't yama ahua't. Allempopa' atet yepe't ñerra'mrrate' cheshanesha'. Ñaña allempopa' aña yame'ñataye't ñeñt' pocta'ña pa'yese't ahua'tnanesha' arr patsro. ⁴ Tarraña allempoña o' etsota allempo onañche' ahua't Yomporpa' o' mueñonay Puechemer arr patsro. Arrñapa' eñalletach puešheñarr coyanesha' ñeñt' judiona'tar. Añña ñoñets ñeñt' atet anaret' judioneshacoppa' nanac am'cha'nochte't allempo ama't ñocop. ⁵ Tarraña Cristopa' añecop eñalleta attoch a'huañañperrey atto am'cha'nochtena añ ñoñets yocop. Ñeñt'pa' añecop atet pa' attoch puechemer perrey Yompor.

⁶ Te'ña Yomporpa' o' puechemer perrey ñeñto'mar o' mueñernay Puecamquëñ ñeñt'cha' ye'cherrtsa yeyochro. Ñeñt'ña Puechemer Puecamquëñpa' ñeñt'cha' yeñotatene' ñerra'm esempo ye'chore'ch ama't Paretspa' e'ñe pocte' o'ch yoch, "Apa." ⁷ Ñeñto'marña te'pa' yeñoteñ o' puechemer perrey Yompor, ama pueñañrayaya penye. Ñeñto'mar yeñoteñ ñerra'm po'ño'ch o' puechemer perrey Yompor, yapa' yo'patapreterach ora allpon o'patatenya te' Yompor.

Ñerra'm yapa' o'ch alla yeyemterrerr añ ñoñets ñeñt' atet anaret' judioneshacoppa' ñeñt'pa' e'ñech orrena nanac yetorrerra

⁸ Ahua't allempo ama seño'terra' ñeñt' e'ñe po'ño'ch Yomporpa' aña seyomporer sepe't ñeñt' po'ño'ch ama Yomporeyaye. Sañapa' ñeñt'ña nanac ame'ñatasete't. ⁹ Tarraña te'pa' o' senterr ñeñt' e'ñe po'ño'ch Yompor, amapa' ñato' o'ch yot, Yomporpa' o' enterres sa. Te'ñapa' eso'mare'tña semneñ o'ch alla sepurrerra, o'ch alla same'ñerra añ co'ta'ñats ñeñt' ama es sherbeno sañapa' allo'ch po'no'ch sequeshperra. Eso'mare't semneñña o'ch alla setorrerrerr nanac ñeñt' e'ñe orrena. ¹⁰ Ñaña sapa' chocma sonañcha'yen ye't ñeñt'cha' atet setsotayen atto'ch sequeshperrañ—pueña'tets arrorr, ñaña pate'tets char, amapa' allempo chocma coshena judionesha'. ¹¹ Ñeñto'marña nellquëño'tpa' atet noten, ñeñt' atto ne'torrrena ahuaña socoppa' ñato' amach es sherberro.

Arrpa' all yerpatanet atto ñetpa' e'ñe cohuen agapet allempo ñanom asena' Galacio

¹² Te'pa' o'ch masheñneshacha' ñaña no'chaneshacha' notas, atarr nemneñ o'ch soctape'cherr atet noctape'chen na. Tarro'mar napa' o' na'ypo'ñerrñañ judionesha' pocta'ña. Te'pa' o' noctape'cherr ñeñt' atet sepe't ahua't sa, allempo ama soctape'cherrñaña' judionesha' pocta'ña. Ahuañmo'cha allempo allo'tsenen seshopa' e'ñe cohuen semuera'ne't. ¹³ Sapa' seño'tuenen atto napa' allempo ñanom ne'chap seshopa' napa' cha natsna'tos ñeñto'mar allempopa' eñall attoch neserrpare'tatas añ ñoñets alloch ye'queshperra. ¹⁴ Ñaña ama't añ atsnañtsorpa' nanac sosey nenteñpa' tarraña sapa' ama setsena'tno, ñaña ama sa'ypo'ña'no. Elloña sapa' o' sagapuen e'ñe cohuen atette'ña ñerra'm Yompor po'millaño'teñer huetsa sesho, ñaña e'ñe atet sagapuen ñerra'mrrate' naña Jesucristotets. ¹⁵ Ñehua, te'pa' eso'mare'tña o'huañ tama socsha'na. Ahuañmo'chapa' nanac semuera'ne't, ñaña allempopa' ama't esa nepalltapa' sañapa' o'ch'cho' sapuen, ñaña ama't añcha' nepalltañe't neclle'pa' napa' neñotenes ñerra'm erro'tenot serrotañ seclle'pa' ama't ñeñt'pa' ñeñt'e' sapnoñe't. ¹⁶ Ñato' sapa' chate' sotenapañ chote' o' ne'moñe'tas, tarro'mar napa' o' neserrpare'tatas ñeñt' e'ñe po'ño'ch atet noten.

¹⁷ Po'potantañ ñeñt' sey'chatene' judionesha' pocta'ñapa' ama't nanac ma'yo'chrenetañ socoppa' tarraña ñeñt'pa' ama añecpayaye attoch yenpaset e'ñe po'ño'ch. Ñetpa' añecpa mopa'tenset attoch o'ch socshapretanet nanac e'ñe ñañeñeta. ¹⁸ Ñehua, napa' e'ñe pocte' nenteñ o'ch yemneñ acheñenesha' o'ch coshapretenyet ñerra'm po'ño'ch añecop yema'yo'chrena attoch yeyenpanet e'ñe po'ño'ch. Atet napa'cho'ña nemneñ chocmach socshapretna ama't allempo ama allo'tsenye parro. ¹⁹ E'ñe nemorrenteño'tes atet nentenes ñerra'mrrate' nechemereshas, ñaña te'pa' alla nemuero'chterrerr socop. Atet

nanen atserr atette'ña coyanesha' atsotenaya pue'mar. Tarraña napa' chocmach nemue-rochta esempohuach e'ñe chorrassa Cristo, attoch ñach soctape'chaterre' e'ñe poctacma cohuen. ²⁰ Esuaca' alla nene' tayecma sesho attofe' neserrpare'tatas e'ñe cohuen, allochñapa' amate' cha muene' neche'ptare'taso. Tarraña ñeñtpa' amach errotenoŧ, po'ñoçhpa' chocma sellcatenen.

Te'pa' e'ñe yame'ñeñoŧ Cristopa' o'huañcha' yeyemta añ ñoñets ñeññ atet anaret; ñeñtpa' añ toma'ntena Agar ñaña Sara

²¹ Ñehua, te'pa' o'ch se'mñnoten sa ñeññes muenets o'ch alla seyemterra añ ñoñets ñeññ atet anaret ahuatoteñ. Sapa' ama't señoŧeñe ñeññ atet oten añ ñoñets ñeññ atet anaret. ²² Ñehua, te'pa' o'ch neñotatas ñeññ atet oten ñoñets ñeññ atet anaret Yompor po'ñoño ahuatoteñ. Ñeñtpa' atet oten: Abrahampa' eñall epsheña puechemer. Puesheñarrpa' arroŧ chemere't pueñañreshoŧ ñeññ pa'taruasañer pe't. Ñeññ coyane-sha'pa' añ sochena Agar. Po'psheñeññapa' e'ñe puetaporeshoŧ chemere't ñeññ ama pa'taruasañreyaye. ²³ Ñeññ puechemer ñeññ eñalletatsa pueñañreshoŧpa' atet eñalleta ñeññ e'ñe attecma yeyeçhquëna allohueney acheñey. Tarraña po'poñ puechemer ñeññ eñalletatsa puetaporeshoŧ ñeññ ama pa'taruasañreyaye ñeñtpa' añecop eñalleta attoch etsota Yompor po'ñoñ ñeññ atet otan ahuatoteñ Abraham. ²⁴ Ñeññ atet papa' ñeñtpa' añ yeçhateney tarro'mar añ epsheño'mar coyanesha'pa' añ toma'ntena atto Yomporpa' epsheñoŧ a'poctatonay. Ñeññ Agarpa' añ toma'ntena atto Yomporpa' eñorana'tanet ahuat Sinaíŧno. Allempoteñ anaretta añ ñoñets ñeññcha' atet etsotetañ. Ñeññña ñoñetspa' añ toma'ntena Agar, tarro'mar ña puechoyoresha'pa' añña añcha'noçhtana'tenahuet añ ñoñets ñeññ atet anaret. ²⁵ Agarpa' po'ñoçh shallchenana aspenet Sinaípen ñeññ Arabio'tsen. Ñaña ñeññara Agarpa' toma'ntenana judionesha' ñeññ pa'netser pene' Jerusaléñ. Tarro'mar allohuen judiona'tarpa' teme'ttsen añña añcha'noçhtana'tenahuet añ ñoñets ñeññ atet anaret ahuatoteñ. ²⁶ Tarraña ñeññey ame'ñenaya Cristopa' añ ñoñets ñeññ atet anaret ahuatoteñpa' ama añcha'noçhteno yocop. E'ñe yame'ñeñoŧa allohueney Cristopa' e'ñe cohueno'tseney. Ñaña ñeñtpa' e'ñe cohuen yenteñ atet ñerra'mrrate' yachor. Ñaña ñeñtpa' atetcha' netma'ntatererr atet: E'ñe yepar-rocmateñoŧ allohueney epay Cristopa' e'ñe attey ñerra'm Yompor pa'netser etserra Jerusaléñ, ñaña ñeñtpa' e'ñe atet yenteñ ñerra'mrrate' yachor. ²⁷ Ñeñño'marña atet anaret Yompor po'ñoñ ahuatoteñ, ñeñtpa' atet oten toma'nteñtso:

Coshepa' coyanesha' mueçhoŧ ñeññ ama achyore'tño, ñaña pocsheñeshoŧpa' rranare'tepa' ñeññ ama't ahuatapa' ama patsotarano pue'mar, tarro'mar ama't añ coyanesha' ñeññ aqueçhpareŧ mame' (ñeññara Sarapa') shonte'ch acheñenesha' pachor perre'. Elloch metanerran allpon puechoyor echen ñeññ agapue' puerrollar (ñeññara Agar).

Ñeññ ñoñetspa' añ toma'ntena atto te'pa' yame'ñeñoŧ Cristo ñeññña nanac sherbets attoch atonterra acheñ ñeññcha' pueyochresha' perr Yompor. Tarraña ñoñets ñeññ atet anaret ahuatoteñpa' ñeñtpa' ama tama sherbeno attoch atonterra ñeññcha' pueyochresha' perr Yompor.

²⁸ Ñehua, o'ch notas masheñneshacha' ñaña noçhaneshacha', allohueney ñeññey ame'ñenaya Cristo, yapa' attey ñerra'm Abraham puechemer ñeññ Isaac ñeññ eñalletatsa attoch etsota Yompor po'ñoñ ñeññ atet otoñ pompor Abraham. Tarro'mar yapa'çho'ña attoña ye'ñalletterra ello attoch etsota Yompor po'ñoñ ñeññ atet ote't ama't ahuatoteñ. ²⁹ Tarraña ñeññ eñalletatsa ahuat ñeññ e'ñe attecma yeyeçhquëna allohueney acheñey (ñeññ sochet Ismael) ñapa' chocma e'moñe'tane't ñeññ eñalletatsa atto etsota Yompor po'ñoñ. Attecmaçh perra ñaña te'. Ñeññcha' eñallettertsa ñeññ e'ñe attecma yeyeçhquëna

allohueney acheñey ñeñtara ñeñt muenene' o'ch etsotan judionesha' poctapña ñetpa' čhocmach e'moñe'tenyet ñeñtey eñalletertsa Yompor Puecamquëñoñ. ³⁰ Ñehua, ama't señoñeña ñeñt atet oteneý Yompor po'ñoñ ñeñt anuaret ahuañoteñ. Po'ñoñ oteneý atto Yomporpa' otan ahuañ Abraham ñeñtpa' atet och: "O'ch pehuapore'ch peñañra epuet puechoyor, tarro'mar ña puechoyorpa' amach es o'patapretaño, amach atteýe' po puechoyor ñeñt eñalletatsa petaporeshot ñeñt ama pa'taruasañreyaye." ³¹ Ñeñto'marña te' masheñeshacha' ñaña nochaneshacha' o'ch alla noterrser: Ama pallteno o'ch yame'ña judionesha' poctapña. Ñato' o'ch netma'ntacha atet: Ama puechoyoreyaye Abraham pueñañra ñeñt pa'taruasañer e'ñe atta. Añña puechoyorey Abraham puetapor ñeñt ama pa'taruasañreyaye. Ñeñtara ñeñt yoten e'ñe yame'ñeñoña Cristopa' e'ñech cohueno'tseney.

5

Atto te'pa' atarr cohueno'tseney, te'ñapa' amach yequečpatstere

¹ Cristopa' o' a'poctaterrnay attoch e'ñe yame'ñeñoñpa' cohueno'tseneycha'. Attoch yocoppa' amach añcha'nočhteno ñoñets ñeñt atet anaret judioneshacop. Ñeñto'mar te'pa' amach allo'na same'ñatsterrero judionesha' poctapña ñeñt nanac amueročtatañ. E'ñepa'chña huomenc sepa' seyočher Cristocop.

² Ñehua, te'pa' o'ch se'mñnoten na ñeñten allsensareten ñeñtcha' atet notas: Ñeñt atet seyemtenañ atto'ch sequeshperra e'ñe setsorranna'teñoñapa' tarraña ñeñtoñ Cristopa' amach errotenoñ yenpaso.* ³ Tarraña te'pa' o'ch alla noterrser, ñeñt muenets o'ch atsorrarettapa' ñehua, po'ñoñ añ palltetsa ñaña o'ch e'ñe etsotuan ama't ñaña allohuen ñoñets ñeñt atet anaret judioneshacop. ⁴ Ñeñtes muenets o'ch pocte' entas Yompor e'ñe setsoteñoñ ñoñets ñeñt atet anaretpa' sañapa' o' alla sequečpuerña Cristo. Ñeñto'marña te'pa' amach errotenoñ muererrso Yompor. ⁵ Tarraña yapa' e'ñe yeyemteñoñ Cristopa' e'ñe yocsheñsha' yecuen esempohuañencha' yečhačherr Yomporesho tarro'mar yeñoteñ o' pocte' entuerrey Yompor. Ñaña e'ñe ña Puecamquëñoñ te'pa' o' ya'poctataretterra. ⁶ Ñerra'm o' yeparrocmaterr epay Cristo Jesúsapa' ama sherbeno atto yetsorranna'tena, ñaña ama't ama atsorrareteyepa' ñeñtpa'cho'ña ama sherbeno Yomporcop. Aña ñapueñ sherbets e'ñe yame'ñeñoñ Cristopa' o'ch yemorrentanna'ta.

⁷ Sa ahuañmo'chapa' e'ñe cohuen same'ñye't Cristo. Te'ñapa' po'ñoñca'ye o'cha a'psaterrsetña añ ñoñets ñeñt e'ñe po'ñoñ Yompor po'ñoñ. ⁸ Ñeñtpa' ama Yompor-eye' sa'psatenaye, tarro'mar ñapa' o' hua'ñerres o'ch same'ñerrñaña Puechemer Cristo. ⁹ Ama't señoñeñe ama't puesheñarra yečhatats po'poñ ñeñt ama po'ñoñchoyayepa' mameshapa' o'ch epa'hua erracmañen ñeñt atet yečhaten. Ñato' o'ch netma'ntacha atet pena chase'. Ama'tcha' coñe'ta chasetoll yena'pa' mameshapa' o'ch a'chasa'huan emasa. ¹⁰ Tarraña ñeñt semoñne'tatene'pa' tsa'taterach Yompor, ama't erra'tsena atet petsa. Tarraña na e'ñe neyemteñoñ Yepartsesharpa' neñotenes te'pa' o'ch alla sequečpuerr ñeñt atet yečhatenes po'psheñeñ, o'ch alla same'ñerra ñeñt neyčhatenes.

¹¹ Ñato' napa'cho'ña čhañe' otyennet año' neserrpare'taten o'ch yetsorranna'ta attoch yequeshperra. Ñehua, masheñeshacha' ñaña nochaneshacha' ñerra'm po'ñoñ ñeñtara neserrpare'tateneñ atetpa' amate' errotenoñ e'moñe'tennoñeña judionesha' ñeñt serrpare'tene' o'ch yetsorranna'ta. Tarraña po'ñoñpa' ama atteýe' neserrpare'tateno. Añña neserrpare'taten atto Cristopa' rroma corsocho yocop atto tsa'tuerrnaya yo'chñar, allochñapa' e'ñe yame'ñeñoña ñapa' o'ch yequeshperra. Ñeñtña atet

* 5:2 O'ch secue' nota 2.3.

neserrpare'teñoť añña ñeñť serrpare'tene' o'ch yetsorranna'tapa' ñetñapa' ñeñťña nanac
atsrre'matenahuet. Ñerra'm o'huañcha' atet neserrpare'tañpa' o'huañte' e'moñe'tnetañ.
¹² Napa' atarr nemneñ ñeñť chocma semoññe'tatene'pa' o'te' alla quechpa'nerres.

*E'ñe yemorrenteñoť yamo'tspa' o'ch e'ñe yetsotua allohuen ñoñets ñeñť atet anaret
Yomporeshot*

¹³ Tarro'mar sa masheñneshacha' ñaña nochaneshacha' o' hua'ñerres Yompor attoch
cohueno'tsenescha'. Ñapa' ama mueno o'ch añcha'noçhtena socop ñoñets ñeñť atet
anaret. Tarraña ama't o' hua'ñerrey Yompor attoch cohueno'tseneypa' ñeñťpa' ama
añecpayaye o'ch yeřa'yesa nanac sosey ñeñť atet muenateney yechets. Ñapa' mueneñ
e'ñe yemorrentanna'teñoťpa' o'ch yeyenpanna'ta, tarro'mar yapa' cohueno'tseney.
¹⁴ Ñerra'm cho yemorrencha yamo'tspa' ñeñťpa' attoch ama't e'ñe parrotapa' o'ch yet-
sotua ora allohuen ñoñets ñeñť atet anaret ahuatoteñ Yomporeshot, tarro'mar Yompor
po'ñoñpa' oteney: "Atarrepach semorreñcha samo'ts e'ñe atet atarr semorrentena
sañeña." ¹⁵ Tarro'mar ñerra'm sapa' chocma se'moñe'teñ samo'ts, amapa' cha amtsen
senteñ samo'ts, ñeñťpa' ama pocteyaye atet sepena, tarro'mar ñerra'm atet sepenapa'
señoche'pa'ch attotcha'ña chach sa'chencatannerra e'ñe sagattsa.

Ñeñť atet cotape'chateney Parets Puecamquëñ, ñaña ñeñť atet muenateney yechets

¹⁶ Tarraña napa' o'ch notas ñeñť poctetsa ñeñťcha' atet seřa. E'ñepa'chña co-
huen socrrena Partsocop ñeñť atet cotape'chatenes Parets Puecamquëñ. Allochñapa'
amach allo'na seřa'yesneno ñeñť atet muenatyenes sechets. ¹⁷ Tarro'mar ñeñť atet
muenatse'tateney yechetspa' ñeñťpa' ama yemtenano ñeñť atet cotape'chatyeny
Parets Puecamquëñ. Añpa'cho'ña Parets Puecamquëñpa' ama yemtenano ñeñť atet
muenatse'tateney yechets. Ñeñťo'marña amach errotenoť yoctape'cho e'ñe patrra
cotapñats, tarro'mar ñetpa' cha e'moñe'tannenet. ¹⁸ Tarraña ñerra'm po'ñoçh yeřa
atet cotape'chateney Parets Puecamquëñpa' allempopa' amach errotenoť añcha'noçhto
yocop añ ñoñets ñeñť atet anaret ahuatoteñ, tarro'mar ñapa' añcha' p'tateney ñeñť atet
muenen Yompor.

¹⁹ Ñehua, yapa' o' yeñotuer ñeñť atet muenatse'tateney yechets. Ñeñť allpon yem-
natse'tyenpa' ñeñťpa' atet ñerra'mrrate' erra'tsente' cheta'yene' coyanesha' ñeñť amach
puetaporeyaye, atet ñaña erra'tsente' coyaneshar ñeñť cheta'yene' yacma ñeñť ama
puerrollareyaye, ñaña atet ñerra'mrrate' ñeñť nanac cotape'chyene' sosya'tsañ, ñaña
ñeñť nanac yomenaya ottatsñats. ²⁰ Ñaña ñeñť po'yomporer pa'yene' po'poñeçhno
ñeñť ama po'ñoçh Yomporeyaye, ñaña atet pena achyotañeçhno, amapa' ñeñť atet
pena pa'llerrnanesha' ñaña ñeñť atet pena amase'ñeť. Ñaña po'poñ ñeñť atet mue-
natse'tyen yechetspa' ñeñťpa' atet ñerra'mrrate' e'moñe'tanna'teñets, ñaña orroteñets,
ñaña ye'chapretanna'teñets, ñaña atsrre'mare'teñets, ñaña moparrñats, ñaña elloptan-
neñets atto amach e'ñe amo'tstanneneto, ñaña atet pena ñeñť cotape'chyene' po'poñ
cotapñats ñeñť ama po'ñoçhoyaye. ²¹ Ñaña po'poñeçhno ñeñť atet muenatse'tyen
yechetspa' atet ñerra'm ye'chapreteñets, ñaña muetsanna'teñets, ñaña posa'tarñats,
ñaña arepsarñats porrare'teñoť, ñaña eñallmeñ po'poñeçhno shonte' attema't ñeñť atet
o' notua. Te'pa' o' alla noctape'chaterrser ñeñťara atet notuanmas ama't ahuaña, ñeñť
atet petsapa' amach es o'patatereto all añcha'tarettena Yompor.

²² Tarraña ñeñť pene' cohuen ñeñť atet yeçhateñ Parets Puecamquëñpa' ñeñťpa'
atetcha' pena, o'ch morrentenana pamo'ts, ñaña e'ñech cosha'huenta pueyoçhro
Yomporecop, ñaña amach es llecatenaye ama't e'ñe mamesha, e'ñech ahuenta'huanan
allohuen ñeñť echarr entyen. Ñaña ñeñť pene' cohuen ñeñť atet yeçhateñ Parets
Puecamquëñpa' o'ch amuerañtana, ñaña o'ch yenpa'yenan pamo'tsesha', ñaña erroť

otpa' atetcha'cho' pena. ²³ Ñaña amach atsrre'ma'peno ñaña e'ñech puetpara es pa'yen. Ñerra'm ñeñña atet o' yepohuapa' o'ch yetsotua allohuen ñoñets ñeññ atet anaret Yomporeshot. ²⁴ Ñaña ñeññ po'ñoch o' pueyochresha' perr Cristo Jesús'pa' o' hueneran ñeññ atet muenatse'tyen yechets ñeññ atto es yeye'chyena ya acheñey. Ñeñña'pa' e'ñech atet yentena ñerra'm acorso'tam̄psaretey. ²⁵ Atto Parets Puecamquëñpa' o' apuerrey attoch yocrrerra e'ñe cohuen Yomporecop, te'pa' añ pocte' o'ch ye'pa'yena e'ñe cohuen ñeññ atet cotape'chateney Parets Puecamquëñ.

²⁶ Amachña cha yommo'chueno, ñaña amach cha es yotnare'tanna'tyeno, ñaña amach cha yeye'chapretanneno.

6

Añ pocte' chocmach yeyenpanna'ta attoch yemesha allohuen topateñets

¹ Ñaña o'ch masheñneshacha' ñaña nochaneshacha' notas, ñerra'm esempo señoñeñ po'psheñeñ o' pohua ñeññ ama pocteye' enteno Yomporpa' sa ñeññes o' cotape'chaterres cohuen Yompor Puecamquëñpa' sach alla cotape'chatterahuet cohuen attoch alla tannerret Yomporecop. Tarraña e'ñe semuereño'pa' e'ñech aco'pa soctape'chatanet cohuen. Tarraña sapa'cho'ña e'ñech señoña, te't sapa'cho'ña attecma se'pa sam̄a ñerra'm esempo topatenes oneñeñ o'ch p̄atenes ñeññ ama pocteye' enteno Yompor. ² Ñaña añ poctetsa chocmach yeyenpanna'ta attoch ya'huanta'hua allohuen topateñets. Ñerra'm atetña yepohuapa' o'ch yetsotuoñ Cristo po'ñoñ ñeññ atet oteney o'ch yemorrentanna'ta.

³ Ñerra'm esesha' pommo'cheñoñ oten, "napa' ama cho es neye'chcateno Yomporecop ñeññ ama pocteyaye", ñeñña'pa' ñañeñach shequëtsa, tarro'mar po'ñoch ñeññ atet acheñpa' amach es sherbeno Yomporecop. ⁴ Tarro'mar puesheña'ttsoypa' choch ñanom yeñota erro'tente'ña yocrrena. Ñerra'm yeñotena e'ñe po'ñoch cohuen yoctape'chen yeyochropa' ñeñña nanac acsha'po'. Tarro'mar ama acsha'pahuo ñerra'm esempo yeñch po'psheñeñpa' o' pohua ñeññ ama pocteye' enteno Yompor. ⁵ Ñaña añ pocte' e'ñe puesheña'ttsoy o'ch ya'huanten topateñets ñeññ yehuenoya.

⁶ Ñaña te'pa' o'ch notas po'poñ: Ñeññ e'mñotene' Yompor po'ñoñpa' añ pocte' o'ch es cohuen apa'yaset ñeññ ye'chatenahuet Yompor po'ñoñ.

⁷ Amach sepantatsche, o'ch señoñch po'ñoch Yomporpa' ama allocchame'tpahuo. Tarro'mar ñerra'm yeye'chcaten ñeññ cohuentetsa Yomporecop arr partsropa' ñach yapuerre' ñeñña'pa' yocshatterre' tsapa'oneñ. Tarraña ñerra'm ye'pa'yes ñeññ ama cohuenayaye, ñeñña'cho'ña ñach yetsa'taterraya esempohuañen. Nato' o'ch netma'ntacha atet. Ñerra'm es yenare'tpa' ñeñña'cho' emere'tats tsapa'oneñ. ⁸ Attecma ñaña ñerra'm añ ye'patse'tyen ñeññ atet muenatse'tyen yechetspa' ñeññara ñeññ ye'pa'yenapa' a'chencataterreycha'. Tarraña ñerra'm añ yoctape'chen cohuen ñeññ atet cotape'chateney Parets Puecamquëñpa' ñeññara Puecamquëño'pa' yocrrerrach esempohuañen. Nato' o'ch netma'ntatererr atet: Ñerra'm te'pa' e'ñe cohuen yenare'ten, tsapa'oneñpa' nanaccha' coshatterrey. Tarraña ñerra'm te'pa' ama cohuenaye' yenare'teno, tsapa'oneñña'pa' nanaccha' llecatterrey. ⁹ Ñaña amach yemuenme'chatsche pa'yese' ñeññ cohuenetyetsa Yomporecop. Tarro'mar esempohuañen allempoch e'ñe pocte' enteñ Yomporpa' apuerreycha' ñeñña'pa' yocshatterre' ñerra'm amach cha yeque'chpuere. Nato' o'ch netma'ntatererr atet: Ñerra'm te'pa' ama yemuenme'cheñe nare'tatspa' tsapa'oneñña'pa' nanaccha' shonte' me'tarsats. ¹⁰ Ñeñño'marña te'pa' o'ch notas: Chocmach yeyenpa'yes allohuen yamo'tsesha' tayepa'tña orameñ attoch yeyenpanna'ta. Ñaña añña nanac cohuen ñerra'm cho yeyenpueñ yamo'ts ñeññ parro o' yame'ñera Cristo.

Arrpa' all so'terranet añ cartot

¹¹ Te'pa' e'ñe na nototpa' o'ch nequellconas mame'. Sapa' o'ch sent ñeñt ateshaclo'yerr quellecpa' ñeñtpa' na quellquëne'. ¹² O'ch alla noterrser: Ñeñt muenene' o'ch tsorrataspa' añecpa mueneñet attoch judionesha'pa' o'ch cohuen entanet. Tarro'mar ñetpa' ama mueneñeto o'ch e'moñe'tanet judionesha'. Ñetpa' eñoteñet ñerra'm o'ch serrpare'tet atto e'ñe yame'ñeñoña Cristo ñeñt rromats yocop o'ch yequeshpapa' añña judionesha'pa' o'ch e'moñe'tanetpa' o'ch cotare'tanet. ¹³ Tarraña ama't ñeñt o' at-sorrare'tetuapa' ama ame'ña'hueneto allohuen ñoñets ñeñt atet anaret judioneshacop. Ñetpa' añña muenenet e'ñe same'ñeñoñ ñetpa' o'ch tsorratatenset attoch ñetpa' o'ch ommo'chuerrnaset judioneshesho sechets. ¹⁴ Tarraña napa' ama't ahuatapa' ama nemno o'ch atet nommo'chena. Napa' añña nemnen chocmach na'ye'chochtatoñ Yepartseshar Jesucristo ñeñt rromats corsocho yocop. Ñeñña name'ñeñoñ o' neunerr ñeñt atet nemnatse'tyese't ahuañmo'cha ñeñt patso'marecpa. Te'pa' o'huañ nommo'cha ñeñt patso'marecpa. Napa' atet nentena ñerra'm acorso'tamñsareten. ¹⁵ Ama't ya'tsorrare'ttatstapa' ñeñtpa' ama es sherbeno. Ñaña ama't ama ya'tsorrare'ttatstopa' ñeñtpa'cho'ña ama es sherbeno. Añña nanac sherbets Yomporecop, o'ch yeterrataterr yocapña, o'ch yeye'chquërra etserra Yomporecop. ¹⁶ Yomporepa'chña sa'nataya allohuenes ñeñtes atet petsa ñeñt atet o' notuas ñeñt cohuentetsa Yomporecop. Ñaña Yomporepa'chña semueraya allohuenes ñeñtes po'ño'ch Yomporena'tares.

¹⁷ Te'pa' ama pocteyaye ama't puesheñarrapa' o'ch alla orrtaterrnanerr ñeñt atarr echarr nenten nocop tarro'mar ñeñt atet neychatenpa' ñeñña po'ño'ch Yompor poctapña. Tarro'mar teme'ttsen orretyena nechets all mare'tayena all atserrpatse'tyesnet ahuañmo'cha. Te'pa' ñeñña eñotatyenahuet po'ño'ch napa' netorrena Jesúsocop ñeñt Yepartseshar yepen.

¹⁸ Te'pa' ñeñtach masheñeshacha' ñaña no'chaneshacha' notas, Yepartsesharepa'chña sa'nataya, ñeñtara Jesucristopa' ñepa'chña semueraya. Ñeñtpa' attetepa'chña Nompore. Allohua.

Pablo

AÑ SAN PABLO PO' CARTA ÑEÑT̃ QUELLCAN EFESO' MARNESHA' EFESIOS

Atto Pablopa' quellcan carta añecop ñeñt̃ ame'ñetsa anetso Efeso

¹ Masheñeshacha' ñaña nochaneshacha' ñeñtes allohuenes pueyochresha' o' perres Parets ñeñtes ame'ñenaya Cristo Jesús all anetso Efeso. Na Pablon sequellquêne'ña añ carta ñeñten Jesucristo puellsensaren tarro'mar ñeñtpa' atet muenen Yompor. ² Te'pa' e'ñe nehuomñcha'teñoñes sa, napa' o'ch notas: Yomporepa'chña sebensare'tañpene' ñeñt̃ nanac Parets epuet Puechemer Jesucristo ñeñt̃ Yepartseshar yepen. Ñetepa'chña socshatene' e'ñe sa seyoçhro allohuenes.

Atto Yomporpa' e'ñe pa'nateñoñey çhocma apuency ñeñt̃ atarr cohuen sherbets yecamquẽñecop

³ Te'pa' aye'choçhtatpahuropa'ch Yompor ñeñt̃ Pompor pen Yepartseshar Jesucristo. E'ñe yeparrocmateñoñ epay Cristo, Pomporñapa' e'ñe pa'nateñoñey çhocma cotape'chateney ora allpon ñeñt̃ esocmañen coçhnesha'tetsa all pue'ntaño ñeñt̃ atarr sherbets yecamquẽñecop. ⁴ Ateñ ahuat pa'motroteñ allempo ama ayeçhcatarettena' añe patserpa' Yomporñapa' allempoteñña acrañperrey parro epay Puechemer Cristo attoch yapa' a'parrocmataterreycha' epay Puechemer. Tarro'mar añecop acrañperrey Puechemereshoñ allochña yapa' añach e'ñe yema'yoçhrena ñeñt̃ cohuentetsa Partsocop. Allochñapa' attochña e'ñe pocte' entueney Yompor, amach eñalle attoch otteñe'cherrey ama't e'ñe mamesha. ⁵ Ñapa' atarr morrentenya; e'ñe puemorrenteñoñeypa' o' e'ñe a'pocatonay yocop ama't ahuatoteñ. Ñeñtpa' attochña e'ñe puechemer perrey. Ñeñtpa' añña e'ñe etsotatuere' Puechemer Jesucristo. Yomporpa' e'ñe atet a'pocatuonay tarro'mar ñeñt̃ atto morrentenya ñapa' atetña muenen. ⁶⁻⁷ Aye'choçhtatpahuropa'ch Yompor atto ñapa' atarr nanac cohuen muerenya. Atto ñapa' ahuo't mueñonay Puechemer Cristo ñeñt̃ rromosets yocop. Atto ashataretta po'rras ñeñtpa' alloña tsa'tuerrnaya yo'chñar. Te'ña ya e'ñe yeyemteñoñ Puechemer, Pomporñapa' attoña o' e'shohuerrnaya ñeñt̃ yo'chñar yepe't. Ñeñto'marña yapa' yeñoteñ ñapa' atarr morrentenya. Atto atarr morrentenana Puechemer Jesúsapa' yapa'cho'ña attecma atarr morrentenya e'ñe yeparrocmateñoñ Yompor Puechemer. ⁸⁻¹⁰ Yapa' yeñoteñ Yomporpa' atarr morrentenya tarro'mar ña te'pa' o' eñotatuerey e'ñe ora ñeñt̃ atet cotape'chen ña ama't ñeñt̃ ama eñotpahuo ahuatoteñ. Ñapa' o' e'ñe eñotaterrey yeyoçhro ñeñt̃ atet muenen ña. Ñeñtpa' añña atet muenen ña: Ñerra'm esempoch çhap allempoch etsoterra allempo onañche' ahuat Yomporpa', allempoña Cristo ñach etsotatuere' allohuen ñeñt̃ allpon eñall, ama't ora allpon ñeñt̃ pue'ntaño'tsa'yen ama't ñaña ora allpon ñeñt̃ añe patsro'tsa'yen. E'ñech Cristesho a'yapaçha'huerret allcha'ña e'ñe yeparrocmatuerr allohueney.

¹¹ Yomporpa' atarr coçhnesha' o'patatenana Puechemer Cristo. Ya'ñaña e'ñe o'patatena atto e'ñe yeparrocmateñoñ Cristo. Ñehua, ñeñtpa' atet cotape'che't Yompor ahuat yocop. Ñeñto'marña te'pa' atetña o' perrnaya ñeñt̃ atet cotape'che't ña ñeñt̃ e'ñe pocte' ente't e'ñe ña pomnenñoñ. Tarro'mar Yomporpa' ama puenesho po'ñoñ, çhocmach e'ñe etsotuerra ñeñt̃ allpon atet onañchen ña. ¹² Ñeñtpa' atet e'ñe cohuen ponay Yompor allochñapa' attochña ya'ye'choçhtaterrñañ ora allohuen ñeñt̃ po'cohuenña pen ña, allohueney ya ñeñtey yanom o' yeyemterrñaña Puechemer ñeñt̃ara Cristo. ¹³ Sapa'cho'ña te'pa' o' se'muerrñañ Yompor po'ñoñ ñeñt̃ ñoñets e'ñe po'ñoçh

alloch sequeshperra samña. Attoña sapa'cho'ña o' same'ñera Cristo. E'ñe seyemteñoña sa, Yomporñapa' o' chorraterresa Puecamquëñ ñeñtcha' señoate' po'ñoçh o' puechemer perres. Ñehua, ñeñtpa' ñeñtara Parets Puecamquëñ ñeñt atet ote't ahuat Yompor ñeñtcha' aphuerrey esempo. ¹⁴ Ñeñtara Puecamquëñ ñeñt apueneñ ñanom ñeñtpa' ñeñtcha'ña yeñotate' orameñ ñeñt o'patatenya Yompor. Attochña ñerra'm esempo a'queshpaterrey poctacma ñeñt o'patatena, allempochña yaguërr ñeñt allpon orameñ o'patatenya. Ñeñto'marña añ poctetsa ya'ye'choçhtatoñepa'ch ora allohuen ñeñt po'cohuenña pen ña.

Arrpa' atto ma'yochampenanet Pablo

¹⁵ Ñeñto'marña na te'pa' o'ch notas, napa' o' ne'mare'tas atto sapa' atarr same'ñeña Yepartseshar Jesús ñaña ne'mare'tenes atto sapa' e'ñe cohuen semuerannena allohuenes ñeñtes pueyochresha' perres Parets. ¹⁶ Ñeñto'marña napa' çocma neparasyoso'teñ Yompor allempo nema'yochamïpensa. ¹⁷ Ñaña nenamuennas Yompor ñeñt Pompor pen Jesucristo, ñeñtara Yompor ñeñt atarr cohuen Partsotets. Añ nenamuennas, Yompor Puecamquëño'tpa' eñotate'sepa'ch ñeñt e'ñe atet pena ña poctapña. Attochña sapa' esheccha' señoterrña ñeñt atarr cohuen sherbets ñocop ñeñt ama't ahuata sapa' ama seño'te. ¹⁸ Ñaña ñapa' çapatonascha' seyoçhro attochña señoterrñañ ora allpon ñeñt po'cohuenña ñeñt yecuen ñeñtcha' aphuerrey Yompor esempo tarro'mar yapa' ñeñtecopña çhore'terrey ahuatoteñ. Ñaña o'ch señoçh atarr nanac cohuen ñeñtcha' aphuerrey Yompor, ñeñtpa' alloch yapa' corretsayach errponañohuen allohueney ñeñt pueyochresha' pen. ¹⁹⁻²⁰ Ñaña te'pa' o'ch señoterrñañ Yompor po'huamenc atarr nanac huomenc ama atpa'huapahuo ñeñt atet ahuamencat peney allohueney ñeñt ame'ñenaya ña. Ñeñtpa' ñeñtara po'huamenc ñeñt atarr huomenc orrtatan allo tantaterran Puechemer Cristo allempo rroma. O' tantater ñeñtara po'huamencot attoña çhapater ñesho allña' anorruerr Pompor po'cohuenrot all pue'ntaño allña e'ñe partsotuerr epuet Pompor. ²¹ Ña te'pa' atarr añcha'tare'tena nanac. Atto añcha'tare'tena ñapa' ñeñtpa' e'ñe metana'tuenan ora allpon allohuen ñeñt añcha'tare'tetyetsa ñaña ora allpon allohuen allsensaretetyetsa ñaña ora allpon allohuen ñeñt ahuamencatetyetsa ñaña ora allpon allohuen ñeñt ayochreshatetyetsa ñaña ora allpon allohuen ñeñt cohuen entyetsa ama't allohuen so'chñetsoçhno. Cristoña po'huamencot e'ñe metana'tuenanet allohuenet. Ñaña ñapa' ama mamecpayaya atet peno, ñapa' tayoteñña ñaña errponañohuencha' atet pena. ²² Ñaña Yomporpa' o' nan Puechemer Cristo allochña' ñach pomnaren pene' ora allpon ñeñt esocmañen eñall. Ñaña allohuen allpon ñeñt ame'ñenaya, Yomporpa' attoña apanet Puechemer allochña' ñach yochresha'tenahuet allohuenet. ²³ Ñato' o'ch netma'ntacha atet: Allohueney allponey ñeñt ame'ña'yenaya Cristo, Cristoña' e'ñe yeyoçher* yepohueñ allohueney, yañapa' Cristo po'chets yepene' allohueney. Ñeñto'mar ñeñt ame'ñenaya Cristo e'ñe allohueney e'ñe parrocmay, Cristoña' e'ñe ña yechorra'huenaya, tarro'mar ñapa' e'ñe po'chets pohueney allohueney.

2

Atto Yomporpa' e'ñe puemuerneñtey ya o' a'queshpaterrey

¹ Ama't atet ñerra'm sa. Sapa'cho'ña ahuatpa' aña soçtape'chyese't ñeñt ama cohuenaye' enteno Yompor. ² Aña seyçhe't ñeñt atet patse'tyena acheñenesha' arr patsro ñeñt ama ame'ñetso. Allempo sapa' aña same'ñataye't oneñet ñeñt pa'mcha'tare'ter pen allohuen ñeñt erracmañen añcha'noçhetyetsa entot ñeñt ama entpahuoyaye. Ñeñtña

* **1:23** Ñehua, po'ñoçh Cristopa' arr atma'ntataret atet ñerra'mrrate' ñeñt yoñ yepen.

oneñeĭ poĉtapñapa' ñeñĭ atarr coshatene' allohuen acheñenesha' ñeñĭ atparñatetsa te' arr patsro. ³ Ñehua, ama't allohueney ahuatpa' e'ñe attecma yeyĉhe't. Aña yocĉape'chyese't ñeñĭ e'ñe atet yemnats'e'tyen ya, ñeñĭ atet muenatse'tateney ya yechets ñaña ñeñĭ cohuen yente't e'ñe yañeña yocĉapñoĭ. E'ñe ya yocĉapñoĭ ñeñĭ atet yeyĉhe'tpa' ñeññaña e'ñe yocĉape'chatse'tatyese't. Ñeñto'marña Yomporpa' aña o'patatye't attoch coñchaterrey. Ñehua, ama't allohuen po'potantañ acheñenesha' ñeñĭ atet p̄atse'tyesete'tpa' Yomporñapa' e'ñe attecma o'patatanete't ñeññara coñcheñets. Ñerra'm allempocmach yerromaña' e'ñech yechenca'huerrañ, ⁴ tarraña Yomporñapa' atarr nanac amorrentña, atarr muerenya. E'ñe ña puemuereñoĉeypa' o' a'qeshp̄aterrey. ⁵⁻⁶ Ñato' o'ch netma'ntacha atet ñerra'm o' yerroma yo'chñaroĭ tarraña Yomporpa' o' alla tantaterrey. Ñehua, allempo tantaterran Puechemer Cristopa' ya'naña tantaterr tarro'mar e'ñe yeparrocmaten epay Cristo. Ñaña atto ĉapaterran Po'cristor pue'ntaño allcha' atarr cosheñtso'tsen, ya'naña o' ĉapaterr allcha' atarr cosheñtso'tseney yaña tarro'mar e'ñe yeparrocmaten epay Po'cristor. O'ch netma'ntacha atet ñerra'mrate' o' yeĉhap Yompor pue'ntaño allcha' yecohuentapretera Cristo. ⁷ Attoña Yomporpa' ĉocmach orrtatennay puemuereña ama't errponañohuen. Attoña o' ĉaphuonaya yeyoĉhro Yomporpa' atarr muerenya nanac. Atto atarr muerenana Po'cristor ya'naña atarr muerena tarro'mar yapa' yeparrocmaterrñaña Po'cristor ñeññara Jesús. ⁸ Tarro'mar po'ñoĉ e'ñe puemuereñoĉey Yomporñapa' a'qeshp̄aterrey e'ñe yeyemteñoĉa ña. Ama añoĉeye'ña a'qeshp̄aterreye atto e'ñe cohuenare' es yeĉpa'yen ya. Yomporpa' e'ñe atta a'qeshp̄aterrey. ⁹ Ñaña ama yetorreñoĉeye' ñocop a'qeshp̄aterreyeña Yompor attoch tsa'terrya ñeñĭ allpon yetorra ñocop. Tarro'mar ñerra'm e'ñe yetorreñoĉa ya'qeshp̄atenañ, yañapa' ĉate' atarr cohuen yentena yañeña ñeñĭ atto ya'qeshp̄atena. Allempoña Yomporpa' amate' a'qeshp̄atañeye' yenteñe. ¹⁰ Tarraña Yomporpa' o' etserrataterrnay yocĉapñapa' allochñapa' attoch e'ñe cohuen es yeĉpa'yen. Po'ñoĉ e'ñe yeparrocmateñoĉ Cristo, Yomporñapa' o' etserra yeĉcaterrey. Tarro'mar ñapa' ama't ahuatoteña' atet coĉape'che't yocop attochña yapa' e'ñepa'chña cohuenare' es yeĉpa'yen.

Cristopa' e'ñe cohuen amo'tstatanna'tña allohuenacop

¹¹ Ñehua, te'pa' o'ch alla seyerpuerra ñeñĭ atet sepe't ahuat. Allempopa' atarr allaĉaro'tsa'yenes Yomporeshoĭ. Ñehua, sapa' atet eñalletñas ama judioneshayayso. Añña ñeñĭ atet eñalletena judionesha' ñetpa' aña yeĉchenet o'ch tsorrannenet. Ñeñto'marña ñetpa' otarettenet atsorrareñnesha'. Ñeñto'mar ñet sañapa' atta sochatse'tenset sapa' año' atsorratareñneshayayso año' puechemereyayso Yompor. ¹² Po'ñoĉ allempo sapa' atarr allaĉaro'tsa'yenes Cristeshoĭ tarro'mar ama separrocmaterra' epas. Ñaña ama't israelena'tarnesha' ñeñĭ otenet Yompor pueyochresha', sañapa' ama parro'marneshayayso. Ñaña atto Yompor a'pocĉatan israelena'tar allempo otanete't ñeññcha' atet yenpuer-ranet esempo, saña allempopa' ama't mameshapa' ama se'mare'tpera'. Ama es se-cueno ama't mamesha ñeññcha' sa'qeshp̄aterre' tarro'mar allempo sapa' ama eñalle Seyomporer ñeññcha' po'ñoĉ seyemtena saña arr patsroĭ. ¹³ Tarraña te' sapa' o' señoĉer Cristo Jesús ñeñĭ rromats ñaña socpa'na. Ashataretta po'rras ama't saña so'chñareĉpa'na. Ñeñto'marña yoten e'ñe po'rrasoĭ attoña o' ĉapaterres saña Yomporesho ama't sa ñeññes ahuat atarr allaĉaro'tsa'yenes Yomporeshoĭ. ¹⁴ Tarro'mar Cristopa' atarr amo'tstatanna'tña allohuenacop. Ama't ya ñeññey judioneshay ñaña sa ñeññes ama judioneshayayso, Cristoña' ahuo't parro'marneshatatey allohueney. Ñaña ñeñĭ atto atsrre'moĉhen yentanna'tyese't ahuat ñaña' o' huapore'tam̄pesyeny ñeñĭ yellopa'tetstatyese't ahuat. ¹⁵ Ñeññpa' atet p̄onay Cristo allempo rroma yocop.

E'ñe ña po'chtso'tpa' o' a'huañañpeney atto am'cha'no'chen yenten añ ñoñets ñeñt atet anaret ahuat judioneshacop, ñeñtara pa'namen a'pocotateñtsoñ ñeñt atet anarettetañ ñocpuet ñeñt'cha' atet pohuetañ. Attoña allempoteñpa' o' e'ñe patrra yoc'tape'chen ñeñt atet co'tape'chateney Cristo. Allempoteñña amach alla atsrre'mo'chen yentanna'tyerre'te. Ñato' o'ch yot atto ahuat allohuen acheñenesha' ellopa'tetstete't e'ñe ñet poc'tap'ño'mareta, Cristoñapa' o' a'huañañpsanet attoña e'ñe parrocmataturrey, e'ñe cohuen yamo'tstanna'tuerra allohueney. ¹⁶ Attoña epotanto'marey e'ñe yeparrocmateño't, Cristoñapa' e'ñe cohuen amo'tstaterrya ñaña Pomporesho. E'ñe puerromño't corsochopa' ñaña'pa' o' a'pocatonay Pomporesho. Atto ñapa' o' a'huañañperrey ñeñt ahuat atto chocma ye'mo'ñe'tanna'tyese't.

¹⁷ Ñeñto'marña Cristopa' huapa. Ñach yeserrpare'tatose' cohuen ñoñets atto ñapa' ña amo'tstanna'tatañtetsa. Attecma serrpare'tatosey allohueney, ama't sa ñeñtes ama judioneshayayso ñeñtes atarr allaparo'tsa'yenes atet entyenesña Yompor. Attecma serrpare'tatosey ama't yaña ñeñtey judioneshay ñeñtey e'ñe allame'ttsa entyeny Yompor. ¹⁸ Attoña allohueney ama't ñeñtey judioneshatets ñaña ñeñt ama judioneshayaye e'ñe Cristeshotecma e'mñoteneyña Yompor tarro'mar Puecamquëñpa'cho'ña e'ñe patrra ñeñt yechorrenaya allohueney. ¹⁹ Ñeñto'marña te'pa' o'ch notas, sa ñeñtes ama judioneshayayso, te'pa' e'ñe parro'marneshacmay entenyña Yompor, ama't allohuen ñeñt pueyochresha' pen Parets, tarro'mar allohueney e'ñe puechemerasha' peney Yompor. Ñeñto'marña te' sa ama atteye' entenso atet ñerra'mrrate' ñeñt ama puentareña, o'huañ atteye' entenes ñerra'mrrate' ñeñt atta huetsa po'poñ anetsot. ²⁰⁻²² Ñeñt atet entenes te'pa' ñato' o'ch netma'ntacha ñeñt atto yatomaten pocoll. Ñehua, atto cohuen torra'yese't allohuen ñeñt allpon Yompor puellsensarnesha' epuet ñaña allohuen ñeñt allpon a'mta'yese't po'ñoñ, ñetpa' añ toma'ntete't ñeñt ñanom yatomaten allo echarr yepen yepaquëll. Ñaña Jesucristopa' añ toma'ntena pocoll po'quellpach ñeñt atarr echarr orrene' pocoll. Ñehua, sa ñeñt atto o' separrocmaterra Yepartseshar Cristo, pueconer penes ñaña pueyopacher penes allohuenes ñeñtes e'ñe huomenc rremuene' pocoll. Attoña e'ñe cohuen sa'yechcataretterra puepahuarr pocoll, ñeñtes pa'paquëll o' perres Parets, attoña o' yecherra Puecamquëñ sesho.

3

Atto Pablopa' allsensaretterra o'ch serrpare'tatan ñeñt ama judioneshayaye

¹ Ñeñto'marña napa' chocma nema'yochena socop. Neserrpare'tateño'tes sa Cristo Jesús ñeñtes ama judioneshayayso ñeñto'marña na te'pa' yottañpenet. ² Ñehua, sapa' o'te' se'mare'tuan atto Yomporpa' o' llesenserren e'ñe puemuereño'ten, nach a'potene' po'ñoñ socop sa ñeñtes ama judioneshayayso. ³ Seño'teñte' ñaña atto gaterren Yompor atto te'pa' o' neñoterrñañ ñeñt ahuatoteñpa' ama eñotpahuoyaye. Ñehua, ñeñtpa' o' notuanmas mame' necarto't. ⁴ Ñerra'm esempoch selleyon ñeñt nequellquënnas allem-pochña seño'ch napa' po'ño'ch o' chapona neyo'chro e'ñe ora ñeñt atet sherbeney Cristo, ñeñt ama't ahuatoteñ ama eñotpahuoyaye. ⁵ Tarro'mar ahuatpa' ama chena' allempo pocte' enteñ Parets o'ch eñotatey ya ñeñtey arromña'teneshay ama't ñeñt corretsa allempo. Ñeñto'marña allempopa' ama e'ñeye' eñotatuanete'te atet ñerra'm te'pa' e'ñe Puecamquëño't e'ñe eñotatuenan allohuen ñeñt pueyochresha' pen ña atet ñerra'm ñeñt puellsensarnesha' pen ñaña ñeñt a'mtene' po'ñoñ. ⁶ Ñeñt eñotatey te'pa' ñeñtpa' atto ama't ñeñt ama judioneshayaye, ñetpa'cho'ña o'patapreteretcha' Yompor ñeñt'cha' apuerranet attecma o'patatenya yaña ñeñtey judioneshay. Te'pa' e'ñe separrocmateño't Cristo, te'ña sapa' e'ñe po'chets penes atet ñerra'm ya ñeñtey judioneshay. Attoña o' e'ñe

yeparrocmatuahuerr allohueney. Ñaña atet ote't Yompor ahuat ñeñtcha' atet cohuen perrnay esempo e'ñe Cristeshot attoch a'queshpaterreypa' ñeñtpa' añecpa'ñaña ñeñt ama judioneshayaye. Ñehua, ñet añoť a'queshpataretterret atto e'ñe pame'ñeñoťet añ cohuen ñoñets ñeñt alloch yequeshperra allohueney.

⁷ Ñeñto'marña napa' o' naparetterra llesens attoch nach torrerraya serrpare'terre' añ cohuen ñoñets ñeñt alloch yequeshperra. Napa' atto naparetterra amaña añoťeye' o' naparetterro atto e'ñe cohuen es nepa'yen ñeñt e'ñe nocpa. Ñapa' e'ñe puemuereñoťen o' ahuamencať perren, ⁸ ama't napa' ama esoyayno ama't mamesha, atarr coñe'tot nesherven. Ora allohuen allpon ñeñt pueyochresha' pen Parets ñeñt sherbene' ña, ñaña ellonetpa' e'ñe atet nentena ñerra'mrrate' atarr coñe'tot nesherveñ Parets. Tarraña ama't ama esoyaynopa' Yomporña puemuereñoť o' muenaterren nach serrpare'tatyese' ñeñt ama judioneshayaye. Attochña nach eñotatyenahuet atto Cristopa' shonte' esocmañen echyen pa'namen ñeñtña yo'patapreteña ñeñtey yemtenaya ña. Ama't ya arromñaťaya amate' erroťenot e'ñe ċhaphuonayo yeyoċhro ñeñt ora allpon o'patataretey e'ñe yeyemteñoť Cristo. ⁹ Ñaña nach eñotatyene' ama't allohuen acheñenesha' ñeñt atet coťape'chennay Yompor. Tarro'mar ñeñtpa' ahuatoteñ ama eñotpahuoyaye tarro'mar ama ċhena' allempoch a'poterrnay Yompor, ñeñtara Yompor ñeñt e'ñe yeċhcatuahue' ora allpon ñeñt yentyen. ¹⁰ Allochñapa' allohuen ñeñtcha' allpon ame'ñerrtsapa' ñetñapa' orrtateññañetcha' Yompor atto ñapa' atarr esocmañen es eñoten. Attochña ama't allohuen ñeñt amċha'taretetyetsa ñaña allohuen ñeñt allsensaretetyetsa all ento, ñetpa'ċho'ña eñotueñet atto Yomporpa' atarr esocmañen es eñoten ñeñt nanac sherbets yocop. ¹¹ Ñeñtpa' atet coťape'ċe't Yompor ahuat pueyochreshacop ñeñtcha' sherbats allempoteñ e'ñe errponañohuen. Ñaña añ onañċe't ñeñtcha' etsoterre' poctapña ñeñtpa' añ Cristo Jesús ñeñtara Yepartseshar yepen. ¹² Ñeñto'marña yapa' e'ñe yame'ñeñoť Cristo e'ñech yeñmañesha' yeċhore'teñ Yompor. Amach yeñċha'ñañoťeye' yeċhore'teñ tarro'mar añ yeyemteññaña Puechemer Cristo ñeñt o' a'poctaterrey Pomporesho. ¹³ Ñeñto'marña napa' o'ċ notas, atto señoťenen napa' atarr nemueroċhtena socop, sapa' amach sellquēñoťa se'ċharrtatatsto seyoċher. E'ñepa'ċhña cohuen socshapretenna.

Atto Cristopa' atarr morrentenya

¹⁴ Ñeñto'marña napa' ċhocma neconcorpuena Yomporeshonet allot nema'yocham̄pensa. ¹⁵ Ñeñtara Yompor allot huena ora allpon pa'namen acheñenesha' ñeñt e'ñe pamo'tsna'tarecma p̄annenet ama't ñeñt pue'ntaño'tsa'yen ama't ñaña allpon ñeñt patso'tsa'yen. ¹⁶ Atto Yomporpa' shonte' esocmañen echyen ñeñt atarr nanac cohuenñatsotets Puecamquēñoťpa' ñepa'ċhña atarr ahuamencať sepene' e'ñe seyoċhro. Nema'yochenoťpa' atet nenamuennas Yompor. ¹⁷ Ñaña ċhocmuepa'ċh yeċhena Cristo e'ñe seyoċhro e'ñe seyemteñoť ña. Allochñapa' attochña e'ñe sagapoñ Yompor puemorrenteña attoch e'ñe huomenc sepa' seyoċher Yomporecop. Atet ñerra'mrrate' tsach ñeñt atarr erċhať e'ñech huomenc orrena patso, allochña pue'chorpa' e'ñech cohuen ten. ¹⁸⁻¹⁹ Allochñapa' attochña atarrċha' huomenc ċhaponasa seyoċhro atto Cristopa' atarr nanac morrentenya. Ñeñt allpon atto atarr morrentenyapa' ñeñtpa' ama ahuañaño. Ñato' o'ċ netma'ntacha atto yeċhope'ċhen patso. O'ċ ahuey tenonet, ama'tċha' yeċhap baċhayo amach yeñtanhuoñeña ñeñt atto morrentenya Cristo. Attecma ñaña toponet ama'tċha' yeċhap baċhayo amach yeñtanhuoñeña ñeñt atto morrentenya Cristo. Attecma ñaña onnaťonet ama'tċha' yeċhap baċhayo amach yeñtanhuoñeña ñeñt atto morrentenya Cristo. Attecma ñaña enonet ñaña o'pononet, ama'tċha' yeċhap atarr allaċarpa' amach yeñtanhuoñeña ñeñt atto morrentenya Cristo. Ama't ñaña allohuen ñeñt allpon ñeñt ame'ñenayapa' eñoċetepa'ċh ñamet atto

atarr morrentenya Cristo. Tarraña ama't ama e'ñeye' eñotpahuoyaye ora allpon ñeñt atet pena Cristo puemorrenteña yocop, tarraña sapa' señoche'ch ama't e'ñe allpona. Ñeñtpa' atet nenamatennas Yompor. Allochñapa' attochña e'ñe poctacma chorrerrsa Yompor.

Aye'chochtatpahu'ch Yompor allohueney e'ñe yame'ñeño

²⁰⁻²¹ Te'ñapa' aye'chochtatpahu'ch yenteñ Yompor tarro'mar ña ahua mencat yepene'. Ña po'huamenco'tpa' atetcha' patonay ya ñeñt allpon yenamueñ, elloña ñapa' atetcha' pennay elloch metana'tuonay ñeñt allpon yenamueñ. Ñaña elloña metana'tuennay ñeñt allpon yocape'chyen. Elloña nanacocmañen e'ñe cohuen es pennay e'ñe po'huamenco't ña. Ya'ye'chochtatoñepa'ch Yompor allohueney ñeñtey yame'ñeño' chocma yap'cha'yena ñocop. Aye'chochtatpahu'ch tayoteñ ama't ñaña errponañohuen tarro'mar ña yapuerre' Puechemer ñeñt Cristo Jesús. Ñeñtpa' atetepa'ch Yompore yocop.

4

Attoch e'ñe yeparrocmatuen allohueney ñeñtey ame'ñenaya Cristo

¹ Ñeño'marña te'pa' añ notenes ama't na ñeñten ayottam'psareten e'ñe netorreño' serrpare'te' Yepartseshar Cristo. Te'pa' o'ch notas: E'ñech cohuen es sorrtatyen ñeñt atet poctetsa añecop ñeñt o' hua'ñerr Yompor ñeñt'cha' pueyochresha' perr atet ñerra'm sa. ² Ama't mameshapa' amach sañeña entatstatso ñeñteso' atarr nanac sherbets. E'ñe semorrentanna'teño' e'ñech aco'pa es se'panna'tyena. Chocmuepa'ch sa'huantannena ñerra'm erro't penes po'psheñeñ, amachña se'moñe'tatsche saña. Añcha'ña e'ñech cohuen semorrentanna'tuena allohuenes. ³ Añepa'chña se'nen attoch sepaterrtat socta'ña allohuenes ñeñt e'ñe atet paterr cotape'chatenes Parets Puecamqu'ñ. Allochñapa' e'ñe separrocmateño', e'ñech cohuen sentannena, amachña cha po'poñ sentanna'tueno. ⁴ Tarro'mar po'ño'chpa' e'ñe yeparrocmatuen allohueney ñeñtey ame'ñenaya Cristo ñaña ñeñtara paterr Parets Puecamqu'ñ ñeñt yechorra'yenaya allohueney. Ñaña ama't pa'nameney shontey ñeñtey o' chore'terrey Yompor tarraña e'ñe ñeñtara yeyemteño' yecuen allohueney ñeñt o'patatenya Yompor ñeñt'cha' apa'yesserrey. ⁵ Po'ño'chpa' e'ñe patrra Yepartseshar Cristo ñaña ñeñtara patrra pocta'ña ñeñt yame'ña'huena allohueney, ñaña e'ñe allohueney attecma yapataretta e'ñe yame'ñeño' Cristo. ⁶ Ñaña e'ñe patrra Parets ñeñt Yeyomporer yepohuen allohueney, ñeñtara ñeñt ya'm'cha'tareter yepohuen allohueney. Ñaña ñeñtara Yompor ñeñt yetorratyenaya pa'namen allohueney ñaña ñeñtara Yompor ñeñt yechorra'yenaya yeyochro allohueney.

Atto Cristopa' apa'yeney allohueney attoch yetorra'yesa e'ñe po'poñe'ttso'cma

⁷ Ñaña Cristopa' apa'yeney allohueney e'ñe po'poñe'ttso'cma attoch yetorra'yesa Yomporecop e'ñe pa'namenot. Puesheña'ttsoypa' o'ch apa'yesey errponte' pocte' enten ña. ⁸ Ñehua, ñeñtpa' atet oteney Yompor po'ñoñ ñeñt aquellca'huaret ahuatoteñ, ñeñtpa' atet oten Cristocop:

Allempo a'terr pue'ntañopa' ahuanerran allohuen ñeñt e'moñe'tene' attotña a'mchechuahuerranet. Allempoñapa' e'ñe pocsheñesho' shonte' es apa'yesserran acheñenesha'.

⁹ Ñehua, all oten "a'terr pue'ntaño." Ñeño'marña yeñoteñ allempo ama a'terra'pa' ñapa' ento' asuaña, chap ama't allohuanen patso o'pono. ¹⁰ Ñeñtara ñeñt sohuatsa ento' ñeñtpa' ñeñtara ñeñt a'terrets ama't e'ñe allohuanen ento. Attotña e'ñe erracmañen epa'huena Cristo. ¹¹ Ñaña ñeñt atet oten ñoñets ñeñt anaret ahuatoteñ atto shonte' es apa'yenan acheñenesha' ñeñtpa' añ oten ñeñt atto ñapa' e'ñe po'huamenco't

es apa'yeney attoch yetorra'yesa po'poñe'ttsocma ñocop. Patantarr acheñpa' atet aparettet o'ch torrenet atet ñerra'm ñeñt allsensarettetsa Yomporecop; po'potantaññapa' añcha' torrenet o'ch a'miteññañet Yompor po'ñoñ; po'potantaññapa' añcha' torrenet o'ch serrpare'tatoñet po'ñoñ acheñenesesho'mar; po'potantaññapa' añcha' torrenet o'ch cohuanpenan allohuen ñeñt ame'ñetsa ñeñtara ñeñtcha' yechatenahuet Yompor po'ñoñ. ¹² Attoña ahuaencat pa'yeney allochñapa' ñach po'huamencaro yetorra'yesa po'poñe'ttsocma e'ñe puesheña'ttsocmay ñeñtey pueyochresha' o' perrey Parets. Attochña e'ñe cohuen yeyenpanneño'tpa' o'ch huomenc yeñanna'ta yeyocher Yomporecop allohueney ñeñtey ame'ñenaya Cristo. ¹³ Attochña e'ñe yeparrocmatuen e'ñe yame'ñeño't Yompor Puechemer ñeñt Cristo tarro'mar allohueneypa' o'ch yeñotuerr ñeñt e'ñe cohuenare' ñeñt atet yechateney Yompor Puechemer. Attochña o'ch e'ñe atet yeñohuen yaña ora allpon ñeñt cohuentetsa ñeñt atet pena Cristo ñeñt yechorra'yenaya. Ñato' o'ch netma'ntacha o'ch not, yapa' o' e'ñe yepo'n Cristocop. ¹⁴ Ya te'pa' ama atteye ñerra'm cheshanesho' ñeñt ama es eñotetso ñeñt epuoye' cotape'chene' cohuen. Ñehua, atet ñerra'm cheshanesho' te'pa' ñato' po'poñcha' cotape'chyenet, ñato' tsapañapa' o'chcho' cotape'chyeneterr po'poñ. Yapa'cho'ña atet yepena yaña allempo ama yepo'nená' Cristocop. Yaña ñeñtey ama epuoye' yoctene Cristopa' amach erroteno't ye'mñocheña ya ashcañ attoch ame'ñatya ña poctañña, attoch o'ch pantatey. ¹⁵ Yapa' añachña e'ñech patrre yoctape'chen ñeñt e'ñe po'ño'ch alloch yequeshperra ñeñt atet oteney Yompor po'ñoñ. E'ñech yemorrentanna'teño't es yeña'yen. Attochña e'ñe yeñohuen allohuen ñeñt atet cotape'chateney Cristo. Attochña yapa' e'ñech ora yoctape'chen e'ñe atet cotape'chen Cristo. Ñeñto'marña esheccha'ña yeparrocmat epay Cristo, ñeñtña Cristopa' yeyocher* yepeñ ñeñt chocma yoctape'chatene' cohuen Yomporecop. ¹⁶ Ñato' o'ch netma'ntacha ñeñt atet pena yechets. Ñehua, yechetspa' amach erroteno't ellopa'tetsteno. Ama't allemeñ meyna'ten yechets chocma parrocmaten atto rremannenet e'ñe cohuen attoña yenpannenet. Ñaña yapa' yame'ñeño't Cristo e'ñe po'chets ñohueney allohueney ama't pa'namen acheñrey. Attoña Cristopa' e'ñe parrocmatateney ñeñto'marña e'ñe yemorrentanna'teño't o'ch yeyenpannena e'ñe cohuen. Attochña allo'nach yesen atontatnomue' ñeñt atet eñotateney Yompor o'ch yemorrentannerra allohueney.

Atto Yomporpa' o' etserrataterrnay yoctañña ñeñt atet muenen ña

¹⁷ Ñeñto'marña te'pa' o'ch notas ñeñt po'ño'ch sherbets Yepartsesharecop. Sapa' amach allo'na atet seña'yesheno ñeñt atet patse'tyena ñeñt ama ame'ñenayo Yompor. Tarro'mar ñeñt atet cotape'chatse'tyenet ñetpa' ñeñt'pa' e'ñe orrena ama't mameshapa' ama es sherbeno. ¹⁸ Ñetpa' ama chenaneo pueyochreto ñeñt Cristo poctañña. Ñetpa' cha ottenet ñerra'mrrate' atarr checmeto'tsenet. Tarro'mar ñetpa' atarr echarretenet pueyochret attoch co'teret Yompor. Ñeñto'marña amach enterreto correñets ñeñt huetsa Yomporesho't tarro'mar ama eñoteñeto Yompor. ¹⁹ Ñet po'chñaret ama't mamesha o'huañcha' apenco'chen eñchet. Ñetña' e'ñech pocsheñesha' pomuenet po'chets attochña e'ñe ñeñta yoma'yenet ñeñt pa'namen sosya'tsañechno ñeñt ama aña'pahuoyaye ama't mamesha. ²⁰ Tarraña sapa' amaña atteye' sey'cheno. Sapa' añña sey'chen ñeñt atet yechateney Cristo. ²¹ Tarro'mar napa' neñotenes sapa' o' se'mñoterrñañ Cristo po'ñoñ allempo yeychetas ñeñt e'ñe po'ño'ch attoch yeyemtera Jesús. ²² Sa ahua'tpa' atta soctape'chatse'tyese't te'ña ñeñt'pa' o'ch sa'ypo'ñañper. Sapa' ñeñtña atarr seshcare'taye't attoña añach e'ñe semnatse'tyese't ñeñt ama cohuenayaye ama't mamesha. ²³ Te'ña sapa' añepa'chña setserrataterra' Yompor e'ñe ora ñeñt atet

* 4:15 O'ch secue' nota 1.23.

soctape'chyen seyoçhro. ²⁴ Añepa'chña chorraterrsa Yompor ñeñtcha' soctape'chatterre' cohuen e'ñe etserra. Ñeñtpa' attochña etserrataterrnas Yompor soctapña e'ñe atet cotape'chen ña. Allochñapa' attoch e'ñe pocte' es sepa'yen arr patsro ñeñt e'ñe po'ñoçh cohuen enten Parets.

Arrpa' all cotape'chatyenanet pa'namen ñeñt atarr sherbets

²⁵ Ñeñto'marña te'pa' añ poctetsa socop amach allo'na seshcare'tanna'tyesneno. E'ñe puesheña'ttsos erroten sotannena, e'ñepa'ch po'ñoçh sa'poctaten señoñ samo'tseshacop. Tarro'mar e'ñe yame'ñeñoñ Cristo e'ñe yeparrocmatuen.

²⁶ Ñaña ñerra'm esempo sa'tsrre'mapa' amach alla señoatoña' o'ch sorrtat ñeñt ama cohuenayaye. Ñaña çhocmach semach'a'nerr e'ñe mamecma amachña ñeñtaña sellap̄sateno. ²⁷ Allochñapa' attoch amach yemnatatsche oneñeñ o'ch atarr topateneý, tarro'mar yocop ama pocteyaye o'ch yemnach oneñeñ o'ch atarr ahuañencañ peney.

²⁸ Ñaña ñerra'm eseshas etetspa' añ poctetsa te'ñapa' amach allo'na setyesatsetneno. Ñeñt acheñerpa' taruasepa'ña e'ñe ña potot. Ama't erra'tsena ñeñtcha' po'taruas pa'pa' ñeñt taruasp'a' e'ñe cohuen ama apencoçhenayaye. Allochñapa' attoçha' echenan shonte' attoch apa'yesan ñaña po'potantañ ñeñt atarr es pallta'yetsa.

²⁹ Amach yeñosatse'tyesatsto ñeñt ama cohuenayaye ama't mamesha. Añcha'ña yeñosyen ñeñt e'ñe cohuen entuen allohuen acheñenesha' ñeñtcha' yenpuene' ñeñt e'mñotets. Attochña ñetpa' o'ch huomenc pet pueyoçher Yomporecop. ³⁰ Attochña amach çha yellcateññañe Yompor Puecamquëñ ñeñt yeçhetsa yeyoçhro ñeñtara ñeñt Puecamquëñ pen ñeñt atarr cohuen Parets. Tarro'mar puechorreñoçey ya, Parets Puecamquëñ ñeñtpa' ñeñtña yeñotatene' yapa' puechemer peney Yompor tayoteñ ñaña esempohuañencha' allempoch ya'queshpatarefterra.

³¹ Amach atsrre'moçhen sentanna'tatsto ama't seyoçhra. Allochñapa' attoch amach çha sa'tsrre'mare'tatanneno, attochña amach seche'çhame'tanneno. Ñaña amach sesasare'tanna'tatsto. Ama't mameshapa' amach se'moñe'tanna'tatsto. ³² Añcha'ña e'ñech cohuen yentannena ñaña e'ñech cohuen yemuerannena. Ñaña añña poctetsa çhocmach yeçpretnannena atto Yomporpa' o' peretnerrey yaña. Ñeñtpa' añoñ peretnerrey atto rroma Puechemer Cristo yocop.

5

Ñeñteý puechemer pen Yomporpa' o'ch yorrtaten ñeñt atet muenen ña

¹ Yomporpa' atarr morrentenya, attoña e'ñe puechemer peney. Ñeñto'marña yocoppa'çho'ña añ poctetsa o'ch yorrtateññañ ñeñt atet cohuenare' es pa'yen ña ñeñt Yeyomporer yepen. ² Elloña Cristopa' atarr morrentenya. Ñeñto'marña e'ñe pocte' eñch attoña poma ñañeña atto rroma yocop atet pete't ahuañ allempo muetsete't carrnero Yomporecop. Ñeñtña e'ñe cohuen ente't Yompor e'ñe atet ñerra'mrrate' ñeñt allo atarr eñmosa'ttam̄psachete't ahuañ ña. Atto atarr morrentya Cristo, yocoppa'çho'ña añ poctetsa e'ñech cohuen yemorrentanna'tuena.

³ Ñaña amach ye'pa'yesatsto ñeñt ama pocteye' enteno ña. Ama't parrocha amach yeçtatsche ñeñt ama yetaporeyaye, ñaña coyanesha'pa' amach agapatstano ñeñt ama puerrollareyaye. Ñaña ama't mameshapa' amach ye'patsto ñeñt atarr sosya'tsañetyets ñaña ama es aye'chapretanna'tpahuo. Ñeñt atet poctetsa allohuenacpay ñeñteý pueyoçhresha' o' perrey Parets. Allochñapa' ama't parrochapa' amach erroteno't otyeto' yapa' atto yepena. ⁴ Ñaña serrpare'tatse'teñets sosya'tsañ ñeñt ama aserrpare'tpahuo'yaye ñeñto'marña yapa' amach atet ye'patsto ama't mamesha. Ñaña otatse'teñets ñeñtpa' ama sherbeno Yomporecop ñeñto'marña yapa' amach

atef yepatsto. Ñaña allocchame'tanneñets ñeñt ama ayellsheñe'chpahuoyaye allo, ñeñtpa'cho'ña amach atef yepatsto. Añcha'ña yapa' Yomporepa'chña yeparasyoso'ten. ⁵ Sapa' señoñeñ ñeñt cañoresha'tetspa' amach es o'paterroña Yomporecho ama't e'ñe esempaña allcha' añcha'tareterra Cristo epuet Pompor. Ñaña allohuen ñeñt eñotene' pa'namen sosya'tsañ, ñeñtpa'cho'ña amach es o'patatareterrtsoña all añcha'tarettena Yompor. Ñaña ñeñt atarr es ye'chapretetsa añña po'yomporer pen ñeñt atarr es ye'chatse'tatene'. Ñeñto'marña ñapa'cho'ña amach es o'patateñoña Yompor all añcha'tarettena. ⁶ Amach se'mñotatsche acheñ ñeñt muenene' o'ch shecare'tas o'ch otas ñeñtcha' atef sepatse'ta samã ñeñtpa' e'ñe pocte' Yomporecop. Tarraña napa' o'ch notas, ñeñtpa' ama po'ñoçoyaye, tarro'mar Yomporpa' chocmach coñchatuerran allohuen ñeñt atef atpare'tetsa, ñeñtpa' o' e'ñe notuanmas. ⁷ Ñeñto'marña te'pa' o'ch notas, sapa' amach socshapretatstaneto ñeñt atef patse'tyenet.

Ñeñt atef yorrtatyen allempo o' yocrrerra e'ñe cohuen puataro

⁸ Ñehua, sapa' ahuatpa' po'ñoçh e'ñe atef socshapretatse'tyese't allempo sapa' checmeta socrra'yese't. Tarraña te' e'ñe seyemteñoñ Yepartseshar o' chapatonas seyoçhro ñeñt cohuen enten ña. Ñeñto'marña te' socoppa' añ poctetsa o'ch sorrtateññañ ñeñt cohuen enten ña, atto sapa' o' socrrerra puataro. ⁹ Ñehua, ñerra'm puataroch yocrrena, ñeñtpa' atetcha' yorrtatyen. E'ñech cohuenacma es ye'panna'tyena ñeñt e'ñe pocte' enten Yompor ñaña ñeñtpa' ama shequëñtsoyaye ama't mamesha. ¹⁰ Ñaña socoppa' añ poctetsa o'ch sema'yoçhra eñotnomue' ñeñtcha' atarr cohuen entapretenes Yepartseshar. ¹¹ Ñaña te'pa' o'ch alla noterrser, amach socshapretatsche ñeñt atef patse'tyenet, ñeñtpa' ama es sherbeno ama't e'ñe mamesha. Tarro'mar ñetpa' checmeta correnet. Sapa' añcha'ña sorrtatyen ñeñt e'ñe cohuenare' allochñapa' attoch eñochet ñeñt atef patse'tyenet ñet, ñeñt ama't mameshapa' ama cohuenaye' enteñe Yompor. Ñeñtpa' ñato' yapa' o'ch yot, yapa' o' ya'puetarsañpsanet ñet ñeñt atef patse'tyenet checmeto. ¹² Ñehua, sapa' señoñeñ ñeñt atef patse'tyenet a'nahua. Ñerra'm ya'mete'pa' ñeñtpa' atarr apencoçhen. ¹³ Ñaña ñerra'm ya'puetarsañpsanet ñet ñeñt patse'tyenet ñeñt ama cohuenayaye, attoña ñetpa' o'ch çhapanet pueyoçhro ñeñt atef penet ñetpa' po'ñoçh ama cohuenayaye. ¹⁴ Ñeñto'marña socoppa' atef açhotenes añ ñoñets: Papa' ñeñte'p atef patse'tyetsa e'ñe atep' ñerra'm çha atarr rroma pemuen. Te'ñapa' o'ch pe'manerra o'ch petanterra atto rroma pemuen. Cristopa' ñach pa'puetarsañperre'.

¹⁵ Ñeñto'marña te'pa' o'ch notas: Señoña e'ñe erroñente' sepa'yen, ñato' cohuent'e' ñato' amate' cohuenayaye. Amach atef sepatsto atef ñerra'mrrate' ñeñt ama es eñotetso. Añcha'ña atef sepa'yes atef ñerra'm ñeñt atarr es eñotets ñeñt cohuentetsa Yomporecop. ¹⁶ Te'pa' arosña atfa es pueçhatstatsa çhochña yetorra Yomporecop tarro'mar te' acheñenesha' atarr sosey yeçchatyenet arr patsro. ¹⁷ Ñeñto'marña notenes amach atfa es sepçhatsto ñeñt atef pena ñeñt ama es eñotetso. Sapa' añcha'ña o'ch señoñeñ ñeñt atef muenen Yepartseshar ñeñtcha' atef ye'pa ñeñt cohuen enten ña. ¹⁸ Ñaña o'ch notas, amach seposa'tatsto; ñeñtpa' çhach cotape'chatenes sosya'tsañeçhno attoch a'puerrataterres. Amach seposa'tatsto, añepa'chña sechorrenaya ñeñtcha' socshatene' ñeñtara Parets Puecamquëñ. ¹⁹ Añepa'chña e'ñe socshapretannena ñeñt atef saçhoteñ Yepartseshar. E'ñepa'chña socsheñesha' seyoçhrocmañen semorrechena allo ya'ye'choçhtateññañ Parets, ñaña allohuen morreñtsoçhno ñeñt Partsocop. ²⁰ E'ñe yeyerpuëñoñ Yepartseshar Jesucristo çhocmuepa'ch yeparasyoso'teññañ Pompor allohuenacop pa'namenacop. ²¹ E'ñe semorrenteñoñ Cristopa' e'ñepa'chña cohuen same'ñannena. Attoçhña yecohuentateññañ Cristo.

Arrpa' all cotape' chatan yacma epuet puetapor

²² Ñeñtes arrollaretes o'ch notas, añ pocte' serrollarpa' ñachña e'ñe same'ñena atet yepen ñaña Yepartseshar Cristopa' ñachña e'ñe same'ñena. ²³ Tarro'mar serrollarpa' añ poctetsa atetcha' senteñ ñerra'mrrate' samo'mte' sepeñ. Attecma yepena yaña allohueney ñeñtey ame'ñetsa, añ Yamo'mte' yepen Cristo ñeñt' yecuanmpene'. Tarro'mar ñapa' o' a'queshpaterrey ñeñtey o' po'chets perrey. ²⁴ Ñeñto'mar añ pocte' serrollarpa' ñach pomnaren sepene' allohuenacop, attecma yaña ñeñtey ame'ñetsapa' añcha' pomnaren yepene' Cristo.

²⁵ Te'pa' o'ch notas samña ñeñtes ataporetas, añ poctetsa e'ñech cohuen semorreñcha setapor. O'ch semuerya nanac atet peney Cristo atarr muerenya yaña ñeñtey ame'ñenaya ña. Ñeñto'marña puemorrenteño'tey ya ñapa' e'ñe pocte' eñch o'ch rroma yocop. ²⁶ Allochñapa' attochña e'ñe e'shohuerrnay allohuen yo'chñar o'ch a'cohuentaterrey Partsocop. Ñehua, ñeñt' toma'ntena allempo yapataretterra Yomporecop. Ñaña po'ñoñpa' ñeñtña e'ñe ya'cohuentaterre'. ²⁷ Allempoña o' ya'cohuentataretterra' ñapa' mueneñ o'ch aguërrey allohueney ñeñtey ame'ñenaya ña. Ñaña ya atto o' ya'cohuentataretterra' amach alla eñallettere'te ama't mamesha ñeñtcha' ya'sosyaterrey. Amach alla enterrye'te atto ama cohuenaye' yorrteno ama't erro'tena. E'ñechña ya'cohuentataretterra Partsocop. ²⁸ Po'ño'chpa' ñeñtes ataporetaspa' añ poctetsa socop e'ñepa'ch cohuen semuerya setapor e'ñe atet atarr semorrentena sañeña. Tarro'mar ñerra'm atarr yemorrenteña yetapor ya'ñaña atarr morrentetsa, tarro'mar yetaporpa' ñeñtara yechets yepen. ²⁹ Ñehua, yapa' yeñoteñ ama't e'ñe puesheñarro'teya ama yetsena'tenoña e'ñe ya yechets. Chochña e'ñe cohuen yerren esheccha' e'ñe huomencna'ntateney. E'ñech cohuen yecuen e'ñe ya yechets. Attecma peney ñaña Cristo atarrcha' cohuanmpeney ya allohueney ñeñtey ame'ñenaya ña. ³⁰ Tarro'mar ñapa' ña e'ñe po'ño'ch po'chets p'ohuene' ya. Pa'namenot po'chets pa'yeney allohueney ñeñtey ame'ñenaya ña. ³¹ Ñehua, Yompor po'ñoñ ñeñt' aquellcare't ahuatoteñ ñeñt'pa' atet oten: "Ñeñto'marña ñerra'm esempo yesna'ta amapa' coyanesha'pa' o'ch echan puerrollar, añ pocte' o'huañcha' tama yeyemteña yachor ñaña yompor. Allochñapa' attoch e'ñe yeparrocmaten epay yetapor. Attoña e'ñe epsheño'mareypa' e'ñech patrra yechets yepen." ³² Ñeñt'pa' ahuatoteñ ama eñotpahuoyaye ñeñt' toma'ntatenya añ cotapñats. Tarraña te'pa' napa' noten añ yetma'ntenaya ñeñt' atarr cohuen ñeñt' atto e'ñe yeparrocmaten epay Cristo allohueney ñeñtey ame'ñenaya ña, ñeñtara ñeñt' po'chets yepene' allohueney. ³³ Ñeñto'marña o'ch alla noterrser, e'ñe puesheña'ttsospa' e'ñepa'ch cohuen semuerya setapor atet atarr semorrentena e'ñe sañeña. Ñaña ñeñtes coyaneshaspa' o'ch notas, añ poctetsa ñaña socop semorrenteño'tpa' same'ñyach serrollar, ñaña e'ñech cohuen senteñ.

6

Arrpa' all cotape' chatan cheshanasha' epuet pamo'mte'

¹ Te' cheshaneshacha' o'ch notas ñeñt' poctetsa socop ñeñtcha' atet sepa. E'ñe same'ñeño't Yepartseshar Cristo chocmuepa'ch e'ñe cohuen same'ñeña sompor ñaña sachor, tarro'mar ñeñt' poctetsa socop. ² "Ñaña e'ñe semorrenteño't somporpa' chocmuepa'ch señcha'na'ch ñaña sachor" tarro'mar ñeñt'pa' ñeñt' e'ñe ñanom atet ot Yompor ñeñtcha' atet yepen yamo'mte' allochñapa' attoch e'ñe cohuen a'natenya Yompor. ³ "Attoch pa'nateñotes e'ñe cohuenpa' atomatcha' socrena arr patsro."

⁴ Te'pa' o'ch notas samña ñeñtes pamo'mte' pen cheshanesha', se'moñe'teño'tpa' amach sa'tsrre'mare'tatatsche sacñeñarnesha'. E'ñechña añe'tolloteñ e'ñe secuam'peño' co-huenpa' o'ch sey'chatyenanet e'ñe cohuen attoch ñetpa'cho'ña o'ch ame'ñeret ñamet Yepartseshar Cristo. Ñaña amach semnatatstaneto o'ch atfa atarr atpare'taset.

Arrpa' all cotape'chatan ataruasañ epuet po'patronar

⁵ Te'pa' o'ch notas samña ñeñtes ataruasataretes ñeñt poctetsa socop. Chocmach same'ñya ñeñt setaruasatene' arr patsro. Ama't erra'tsena apuenset ñeñtcha' setaruas sepa' e'ñechña sem'cha'na'teño't setaruasen e'ñe cohuen seyo'chrocmañen. Ama't acheñecpa setaruasenpa' atet'cha' setaruasen ñerra'mrrate' Cristocop setaruasen.

⁶ Amachña e'ñe puecuam'peño'tesa sema'yore'teno taruasats attoch e'ñe cohuen socshach sepatronar attoch e'ñe pocte' entenes. Añcha'ña ama't acheñecpa setaru- asenpa' e'ñechña atet sesherbeñ cohuen ñerra'mrrate' Cristo sesherben. E'ñechña seyo'chrocmañen sepena cohuen ñeñt atet muenen Yompor. ⁷ E'ñe semneñño'tpa' e'ñech cohuen socsheñeshocmañen setaruasen tarro'mar ama ñap'ta acheñecop setaruaseno, Yomporecpa'naña setaruasen. ⁸ Te' sapa' e'ñe seño'teñ ama't erra'tsente' cohuen es yepa'yen, Yepartsesharñapa' chocmach alla aphuerrey e'ñe puesheña'ttsoy ñeñtcha' atarr cohuen yocshaterre' ama't añ acheñer ñeñt ataruasataret amapa' añ acheñer ñeñt e'ñe cohueno'tsen, attecmach apa'yesuerranet ñeñtcha' atarr cohuen coshaterrahuet ñet.

⁹ Ñaña te'pa' o'ch notas ñeñtes taruasatets. Sapa'cho'ña atet'cha' sepoñ sa'taruasañer ñeñt atet poctetsa, amachña cha sechemama'tyenaneto. Seño'chepa'ch sapa'cho'ña sechen Samo'mte' Cristo ñeñt pue'ntaño'tsen. Ñeñtara ñeñt Pamo'mte' pen allohuen sa'taruasañrenesha'. Ñaña ñapa' ama puesheña'ttsa morrenteno.

Ñeñt apueney Yompor ñeñtcha' yemoñenaya attoch amach alla a'puerrataterrye oneñeñ

¹⁰ Allohuanen arr necarto't o'ch masheñeshacha' ñaña no'chaneshacha' notas, ahuamencatepa'ch pas Yepartseshar tarro'mar ñapa' ña atarr ahuamencattetsa.

¹¹ Ñeño'marña añ poctetsa yocop o'ch yaguërrñañ ora allpon ñeñt apueney Yompor allochñapa' ñeñtcha'ña yemoñenaya attoch amach alla a'puerrataterrye oneñeñ. Tarro'mar yeño'teñ oneñe'tpa' chocma e'nenan attoch shecare'teney. ¹² Tarro'mar po'ño'chpa' ama acheñeye' ye'cllaren ñeñt entpo' po'chets. Yapa' añña ye'cllaren oneñe'te'chno ñeñt ama erro't apapahuo e'ñe ya yoto't tarro'mar ñeñt'pa' ama entpahuoyaye po'chets erro'tente'ña. Tarraña ñeñt'pa' atarr añcha'no'chetyena ñaña atarr ahuamencate'chno. Attoña pomnaren penan allohuen acheñenesha' arr patsro ñeñt patse'tyene' ñeñt ama cohuenayaye ñeñt checmeto'tsena. Ñeñtara oneñe'te'chno ñeñt ama cohuenaye' ye'chcatetso ñeñt erracmañen añcha'no'chetyetsa entot.

¹³ Ñeño'marña notenes, o'ch saguërrñañ allohuen allpon ora ñeñt apueney Yompor allochñapa' ñeñtcha'ña allo yemoñena attoch amach alla a'puerrataterrye oneñeñ ñerra'm esempo atarr nanac topateney. Tarraña ama't allempo pa'namenot atarr topateney yañapa' amach erro'tenot a'puerrataterrye. ¹⁴ Te'pa' o'ch neñotatas ñeñt apueney Yompor ñeñtña yemoñenaya attoch ama a'puerrataterrye oneñeñ allempo topateney. Ñato' o'ch netma'ntacha ñeñt atet pa'namen chorra'yena solltarnesha' allempo quellarenet.* Ñeñt ñanom ñeñt'pa' Yompor po'ño'ñ ñeñt e'ñe po'no'ch ama shequëntsoyaye ama't mamesha. Ñeño'marña yapa' e'ñech yeñmañesha' es yepa'yen, amach yeshcare'tanna'tyesatsto. Ñato' o'ch netma'ntacha ñeñt'pa' ñeñtña yechanar yepen ñeñtcha' ahuamencat yepe' atet ñerra'm solltar apueñet chanarets alloch chanena ñeñt quellarenet. Elloñapa' e'ñepa'ch cohuen es yepanna'tyesnoma ñeñt

* **6:14** Ñehua, ñeñt'pa' atet chorra'yese't ahuat solltarnesha' allempo quellarete't.

atet e'ñe pocte' enten Yompor. Ñeñtpa' añ toma'ntena asrom atet ñerra'mrrate' ñeñt chorrena solltar ñeñt a'natene' puesomap allempo quellarena. ¹⁵ Te'ñapa' o'ch se'shpo'cha e'ñe socsheñsha' o'ch ahues allcha' seserrpare'tyena' atto Yomporpa' o' amo'tsterrya attochña e'ñe cohuen a'queshpaterrey. Ñeñtpa' añ toma'ntena atet pena solltar o'ch nan po'sapatpa' o'ch ahuo' allcha' quellarsa. ¹⁶ Elloña ñeñt nanac sherbets ñeñtpa' añ, chocmuepa'ch e'ñe cohuen yeyemteña Yompor ñeñt atet oteney. Ñeñtpa' añ toma'ntena solltar pue'scudo allo a'natena allochñapa' attoch ama etaretteneto. Ñehua, atto huomenc topateney oneñeñ ñato' o'ch netma'ntacha ñerra'mrrate' ñapa' cho sanapecheney po'chopaño ñeñt huoretnets. Tarraña ya e'ñe yeyemteñoñ Yompor ñeñtpa' ñeñtña ye'scudo yepen ñeñtcha' chocma emayene' oneñeñ po'chopañ ñeñt huoretnets allo sanapecheney. ¹⁷ Ñaña yapa' yeñoteñ Yomporpa' te'pa' o' a'queshpaterrey, ñeñtña yemoñenaya. Ñeñtpa' añ toma'ntena atet pena solltar o'ch na'nman asret poño attoch ama etto'cheto. Ñaña o'ch yerrmoñ Yompor po'ñoñ yeyochro ñeñt atet eñotateney ña Puecamquëñoñ; ñeñtpa' ñeñtña yepanmet yepen alloña yeçllareña oneñeñ. ¹⁸ Ñaña sapa' chocmuepa'ch sema'yochena ama't erroteno'tsensa. Añcha'ña seyepuene' Parets Puecamquëñ. Allochñapa' attochña chocma sema'yochrena ma'yochatsa. O'ch senamñ Yompor ora allpon ñeñt sepalltena, ñaña chocmuepa'chña e'ñe sema'yochamñpesueña allohuen ñeñt pueyochresha' pen Parets. ¹⁹ Napa'cho'ña chocmuepa'chña sema'yochamñpenna. O'ch senamon Yompor nocop allochñapa' ñachña ne'ñoratene' attoch amach nemcha'nañoña neserrpare'teññañe po'ñoñ. Allochñapa' attochña neñotatyesanet cohuen ñoñets ñeñt alloch e'ñe yequeshpa'huerra allohueney; ñeñtpa' ama eñotpahuoyaye, ama't ahuatoteñ. ²⁰ Napa' allsensareten ñeñten eñosyets e'ñe cohuen Yomporecop. E'ñe neñosyeñoñ Yomporecop ñeñto'marña te'pa' yottamñpennet. Ñeñto'marña nemneñ o'ch sema'yochamñpenna attoch amach nemcha'nañoña neserrpare'teno ñeñt e'ñe cohuen ñoñets alloch yequeshpa'huerra. Attochña e'ñe nocsheñeshocmañen neserrpare'ten tarro'mar ñeñt e'ñe cohuen atet poctetsa nocop.

Arrpa' all so'tnerranet e'ñe po'cartot

²¹⁻²² Te'ñapa' o'ch notas, o'ch nemñonas masheñ Tíquico ñeñt atarr nemorrentena. Ñapa'cho'ña chocma atarr cohuen torrena Yepartsesharecop. Ñapa' ñeñto'marña o' nemñe sesho allochñapa' ñach señotatuere' ñeñt atet yepena ya arr. Attochña atarr coshatuerres seyoçhro.

²³ Te'ña masheñeshacha' ñaña noçhaneshacha', Yomporepa'chña semor-rentanna'tataya e'ñe same'ñeñoñ, ñeñtara Parets epuet Puechemer Jesucristo ñeñt Yepartseshar yepen. Ñetepa'chña socshatene' seyoçhro. ²⁴ Ñaña ñetepa'chña e'ñe sa'natenaya allohuenes ñeñtes e'ñe cohuen morrentenaya Yepartseshar Jesucristo. Ñeñt atto semorrenteñapa' amach ahuañañañterro ama't e'ñe ahuaña. Ñeñtach notas, ñeñtpa' attetepa'ch Nompore. Allohua.

Pablo

AÑ SAN PABLO PO' CARTA ÑEÑT̃ QUELLCAN FILIPOSO' MARNESHA' FILIPENSES

Pablopa' quellcan carta all ayottam̃psarettena; añecop quellquë' ñeñt̃ ame'ñetsa anetso Filiposo

¹ Masheñeshacha' ñaña nochaneshacha' ñeñtes allohuenes o' pueyochresha' perres Parets e'ñe separrocmateñoñ Cristo Jesús all anetso Filiposo, ama't ñaña sa'mcha'tareterneshohuen ñaña ñeñtes diáconochnos ñeñtes sherbets all puerahuo. Na Pablon epan masheñ Timoteo ñeñten sequellquëne'ña añ carta. ² Te'pa' e'ñe nehuom̃cha'teñoñes sa, napa' o'ch notas: Yomporepa'chña sebensare'tam̃pene' ñeñt̃ nanac Parets epuet Puechemer Jesucristo ñeñt̃ Yepartseshar yepen. Ñetepa'chña socshatene' e'ñe sa seyoçhro allohuenes.

Arrpa' atet̃ ma'yocham̃penanet Pablo

³⁻⁴ Te'pa' o'ch notas, allempo nema'yocheña Yomp̃or ñeñt̃ neyemtena na, neyer-pueñoñespa' çhocma nocshensa Yomp̃oreshot̃. Ñeñto'marña allempo es nenamuen-nas Yomp̃orpa' çhocma nocshensa Yomp̃oreshot̃ allohuenes. ⁵ Tarro'mar allempoteñ saguër Cristopa' sapa' allo'na't sesen ame'ñatsa teme'ttsen. E'ñe same'ñeñoñpa' attoña sellcapretna attoch erroñenoñpa' o'te' epa'huerra erracmañen añ cohuen ñoñets alloch yequeshperra. ⁶ Ñaña napa' neñoñenes atto Yomp̃orpa' o' ame'ñatasa ahuaña, te'ñapa' ñepa'chña allo'na'ahuamencat̃ sepa'nmue' e'ñe ñocop, tayoteñ ama't esempohuañencha' huerra Jesucristo pue'ntañoñ. ⁷ Ñeñt̃ atet̃ nentapretenespa' ñeñt̃pa' e'ñe pocte' tarro'mar atarr nemorrentensa e'ñe neyoçhrocmañen. Ñeñto'marña yellcanna'teñoñpa' yeñoñeñ Yomp̃or e'ñe puemuereñoñpa' amach a'ypo'ñerrno na ama't ñaña sa. Atet̃ napa' ama't cárcelo'tsenen Yomp̃or puemuereñoñenpa' amach a'ypo'ñerrno. Ñaña ñerra'm allempo achm̃are'tenet añ cohuen ñoñets alloch yequeshperra, atto napa' nemoñena añ cohuen ñoñets, Yomp̃or puemuereñoñenpa' çhocma ahumencat̃ penen. Ñaña allempo name'ñateña acheñenesha' añ cohuen ñoñets alloch yequeshperra, Yomp̃or puemuereñoñpa' çhocma ahumencat̃ penen. ⁸ Ñeñto'marña te' Yomp̃orpa' eñotenen po'ñoçh te'pa' nanac neyerpuensa. E'ñe atet̃ nanac nemorrentensa ñerra'm atet̃ mor-rentenya Jesucristo e'ñe cohuen. ⁹ Atet̃ nenamuennas Yomp̃or socoppa' atet̃ noten, allo'nepa'ch sesen morrentanna'tnomtsa nanac ñaña allo'nepa'ch sesen eñotnomue' ñeñt̃ nanac sherbets yamo'tseshacop. Allochñapa' attoch çhocma yorrtaten yemor-renteña e'ñe po'ñoçh. ¹⁰ Attochña señoçh erra'tsentē'ña nanac cohuen sherbets Yomp̃ore-cop. Allochñapa' e'ñe señoñeñoñpa' añepa'chña atet̃ sepa'yen ñeñt̃ e'ñe cohuenare'. Allochñapa' amach cha sa'yohuare'tterro ñerra'm esempohuañencha' huerra Cristo. ¹¹ Ora atet̃ nenamuennas Yomp̃or socoppa' atet̃ noten, e'ñe same'ñeñoñ Jesucristo poctacmapa' añepa'chña cohuen atet̃ sepa'yen ñeñt̃ nanac sherbets Yomp̃orecop. Ñerra'm atet̃ yepe-napa' attochña e'ñe cohuen ya'cshapretare'ttena Yomp̃or po'cohuenña.

Atto epatuan allohuenacop Yomp̃or po'ñoñ e'ñe cárcelot̃

¹² Ñeñto'marña masheñeshacha' ñaña nochaneshacha' o'ch neñotatas, ama't atto ay-ottam̃psare'ten cárcelo' ñeñt̃pa' ama añecpayaye attoch o'ch epatare'tenan cohuen ñoñets alloch yequeshperra. Elloña e'ñe attoñpa' allo'nach sen epa'huatsa Yomp̃or po'ñoñ. ¹³ Ñeñto'marña te'pa' allohuen guardianesha' ñeñt̃ cohuañpene' am̃cha'tare'tepo' ñetpa'cho'ña o' e'ñe eñotuanet atto ayottam̃psare'ten cárcelopa' añoñña e'ñe name'ñeñoñ

Cristo atet pennet. Ñaña ama't pa'namen acheñenesha' te'pa' o' eñotuanet ñeñtecop nemueroçhtena. ¹⁴ Ñeñto'marña te'pa' shonte' masheñnesha' e'ñe allo'na senet yemuet-nomuet Yepartseshar Cristo poptacma, tarro'mar ñetpa' atet entennet e'ñe name'ñeñoña Cristo nemueroçhtena cárcelo. Ñeñto'marña ñetpa'cho'ña o'huañ mecha'na'tet serrpare'tet Yompor po'ñoñ.

¹⁵ Ñehua, po'ñoçhpa' eñall puesheña'tets tarrecpach serrpare'tenet Cristo e'ñe pue'matare'teñoñetan na. Tarraña po'psheññechnopa' e'ñech pocsheñeshocmañen a'poteññañet Yompor po'ñoñ. ¹⁶⁻¹⁷ Añpa' e'ñe puemorrenteñoñetan atet penet tarro'mar ñetpa' eñotennet napa' anareten atto nach moñenaya añ cohuen ñoñets alloch yequeshperra ñerra'm esempo achmãare'teñet. Tarraña ñeñña serrpare'tene' Cristo po'ñoñ e'ñe ñocpuetapa' amach pueñmañeshacmaye' serrpare'teneto. Ñetpa' çate' otenapuetañ allo'nach atsrre'moçhen entatnennet ama't cárcelo'tsenen.

¹⁸⁻¹⁹ Ñehua, ama't atetpa' nocoppa' e'ñe pocte'. Ama't erroteno serrpare'tenet cohuen ñoñets Cristocop, nocoppa' e'ñe pocte' nenteñ. Tarro'mar ama't puehquẽñme'chatsa serrpare'tenet Cristo, ama't ñaña pueñmañesho'cha' serrpare'tenetpa' napa' ñeñtcha'ña nanac nocshatene'. Ñeñto'marña napa' çhocmach nocshena tarro'mar napa' neñotenes sapa' çhocma sema'yochamñenna ñaña neñotena Jesucristo Puecamquẽñpa' ñeñña ahuamencañ nepene'. Ñeñto'marña neñoteñ añ muerocchteñets tsapañone'tpa' a'poptatare'tcha' e'ñe cohuen nocop.

Atto Pablopa' ora allpon corre't arr patsropa' ñeñtpa' e'ñe ora Cristocop

²⁰ Ñeñto'marña e'ñe nocsheñnesha' necueñ tarro'mar neñoteñ amach apencatare'teno ama't mamesha. Ñaña amach nemñcha'nañotayaya ne'ñoreno e'ñe cohuen Cristocop. Attochña napa' acshapre'tpo' entapre'tennet Cristo, ama't napa' erroteno'tsenencha' ama't ñerra'm nerroma amapa' ñerra'm ora nocrenmeñ. Ateñ ahuatoteñpa' te'pa'cho'ña attecmeupa'ch pena. ²¹ Tarro'mar napa' allpon nocrena arr patsropa' ñeñtpa' e'ñe ora Cristocop. Ñaña ama't çho nerromapa' ñeñtpa' elloña nanac cohuen nocop. ²² Ñaña ñerra'm allempo nocrenmeñpa' torrenayanach Yompor po'taruas tarro'mar attotcha'ña allo'nach nesherbãatneññañ Yompor po'ñoñ. Ñeñto'marña ñeñtcha' nanac nemna' te'pa' ama neñoteñe erra'tsente'ña ñeññ nanac sherbets, ñato' o'ch nerroma tayecma amapa' ñato' corretsanach. ²³ Ñeññ nanac torrapo' nenten o'ch notas ñeññ atarr cohuen nenten, ñato' o'ch nerroma amapa' corretsanach. Napa' nemneñeñ o'huañcha' nocrra añe patsro allochñapa' o'ch neçhap tecma Cristesho, tarro'mar ñeñtpa' elloña nanac cohuen nocop. ²⁴ Tarraña ñerra'm amach nerromopa' ñeñtcha'ña nanac sherbãts socop. ²⁵ Ñeñto'marña napa' neñoteñ amach nerromo, amach nesa'nerrso, allochñapa' allo'nach nesen seyçhatnomue' allohuenes atto ñerra'm allo'na yesen yemtaya Cristopa' çhocmachña yocshena. ²⁶ Allochñapa' ñerra'm esempo neçherr seshopa' allempochña alla neñotaterrser nanac, attoch allo'na sesen nanacocmañen coshaya Cristo.

Chocmuepa'ch yocrrena e'ñe cohuen ñeññ atet oteney Yompor po'ñoñot

²⁷ Te'pa' añach notas, çhocmuepa'ch socrra e'ñe cohuen ñeññ atet yorrtaten ñeñtey ame'ñenaya Cristo po'ñoñ. Allochñapa' ñerra'm machayota nabcherrsa' amapa' ñerra'm ama'tcha' ama yaçchannerropa' e'ñepa'chña cohuen ne'mare'tenes atto e'ñe huomenc sepen seyocher attoch e'ñe patrra soctape'chen. Ñaña o'ch ne'mare'tas atto sapa' sema'yochrena allohuenes parro attoch semoñena añ cohuen ñoñets alloch yequeshperra. ²⁸ Ñaña amuepa'chña añe seyore'tatstaye ama't mamesha ñeññ se'moñe'tene' tarro'mar ñetpa' ñeñtcha'ña eñotatahuet po'ñoçh ñetpa' amach queshperreto. Tarraña yocopñapa' ñeñña yeñotatene' po'ñoçhpa' yequeshpa'huerrach. Añechnopa' Yomporo poptañña. ²⁹ Ama patrrayaya muenatenye Yompor atto o' yame'ñera Cristo. Añña e'ñe

puemuereñoŧey muenateney ñaña e'ñe yame'ñeñoŧpa' čhochña yemueročhta ñocop.
 30 Ñeño'marña sapa'čo'ña e'ñe pocte' o'ch sa'mueročhtataretta Cristocop e'ñe atet sentenen na ahuaŧoteñ ama't teme'ttsenpa' se'mare'tenen napa' allo'tsenarana all nemueročhtena e'ñe name'ñeñoŧ Cristo.

2

Atetcha' yentena yañeña e'ñe puesheña'ttsoy atet ente't Cristo e'ñe ñañeña

1-2 Te'pa' o'ch notas ñaña po'poñ. Ñerra'm po'ñočh yame'ñeñoŧ Cristo e'ñech yocshatanena allempoña po'ñočh sapa' socshaterrencha' namña. Añña ñeñŧcha' nocshatene' e'ñe poctacma ñerra'm e'ñech paŧrra soctape'chuen allohuenes. Ñaña ñerra'm po'ñočh e'ñe yemorrentanna'teñoŧ e'ñech yeyemtanna'tuenapa' ñehua, te'ñapa' čhocmuepa'ch semorrentannena ama't e'ñe sagattsa ñeñŧes e'ñe parro'marneshacmas. Ñaña ñerra'm allohueney po'ñočh chorra'huenya ñeñŧara Parets Puecamquëñpa' ñeñŧoŧcha'ña e'ñepa'ch sepaŧrratuen soctapñoŧ allohuenes. Ñaña ñerra'm po'ñočh e'ñe socsheñesha' semuerannena' ñeñŧoŧcha'ña amach po'poñ sentanna'tuatsto. 3-4 Ñaña amach aña atarr sellcatsto ñeñŧ e'ñe socpa. Añcha'ña puesheña'ttsospa' sellcapreta ñeñŧ llecatyene' samo'ts. Ñaña amach sañeña entatstatso atet ñerra'mrrate' ñeñŧes nanac sherbets. Añcha'ña atet sent samo'ts atet ñerra'mrrate' ñetña nanac sherbetset, pañapa' amach es asherbenaye' penteno.

5 Añña pocte' o'ch senta sañeña atet ente't Cristo Jesús e'ñe ñañeña allempo huapa aña patsro. 6 Ñehua, ñapa' ama't nanac Paretspa' ama ommo'chane'te po'partsoña. 7-8 Ñapa' e'ñe pocte' enche't o'ch atet enteñ acheñenesha' ñerra'mrrate' ñapa' ama Partsoyaye, o'ch atta orrtena ñerra'm ama esoyaye atet pena acheñ ñeñŧ e'ñech pauner aŧarettena. Tarraña añecop atet pe't attotcha' sherbenan Pompor ama't ñaña acheñenesha'. Ñaña ñapa' ama't Paretspa' o' acheñetos arr patsro, e'ñe atet orrtosa ñerra'm ya ñeñŧey arromñaŧey. Ñaña' allo'na sen pauner entatatsa attotña e'ñe pue'mñoteñoŧ Pomporpa' e'ñe pocte' eñch o'ch rroma corsocho ñeñŧ nanac apencočhen entete't ñerra'm esesha' rromats atet corsocho. 9 Ñeño'marña attotña Pomporpa' o' alla nanac a'cohuentater ñaña o' alla aphuer ello pa'so'cheñ ñeñŧ nanac cohuen sherbets. Ñeñŧña so'chñetspa' ello metana'tuanenan allohuen po'poñečhno so'chñetsočhno. 10-11 Ñeño'marña esempo-huañenpa' allohuenet po'yorñoŧetpa' a'meta'hueretcha' e'ñe poctacma, Jesucristepa'tña ñeñŧ nanac partsotets. Allochñapa' atto e'ñe pame'ña'rreñoŧet Jesús pa'so'chñopa' con-corpa'rretueretcha' allohuenet ñeñŧ allpon eñall ama't allohuen ñeñŧ ento'marnesha' ñaña allohuen patso'marnesha' ñaña allohuen o'pono'tseneshachno ñeñŧ patso'tsen. Attochña allempopa' aye'chočhtataretterra Yompor ñeñŧ nanac Parets.

Añachyema'yochrena attoch allo'nach yesen ama't acoŧa etsotyenomue' ñeñŧ poctetsa Cristocop

12 Te'pa' e'ñe nemorrenteñoŧes masheñnesha ñaña nočhanesha o'ch notenes, ahuañmo'chapa' čhocma se'mñotne't ñeñŧ atet notase't allempo sesho'tsenen. Te'pa'čo'ña attecmach se'mñoten ñeñŧcha' atet noterserr ama't te'pa' nanac bačhayo'tsenen seshoŧ. Te'pa' añach notas ñeñŧcha' atet seŧa. Chocmuepa'ch sema'yochra attoch allo'nach sesen etsotnomue' ñeñŧ cohuen enten Yompor, tarro'mar ñapa' ñeñŧecopña o' a'quesħaterres. Tarraña e'ñech semĭcha'na'teñoŧ seyomcha Yompor tarro'mar yeñoteñ yoročheno'tsenya ñerra'm ama Yompor po'huamenco yeyemto. 13 Tarro'mar Yompora e'ñe yemnatene' e'ñe yeyočhro ñeñŧ cohuen enten ña. Ñaña ñapa' ñach ahuañencat yepene' attoch yetsotoñ ama't ora erra'tsencha' coshatene' ña.

¹⁴ O'ch noterrser ellonet te'pa' ñeñt ama atteye' es sepeno. Ama't eseshacpa amach epuoye' es atet sepeno, señoseñesho'pa' amach es sotnare'tanna'tatsto. ¹⁵ Allochñapa' ñerra'm ama atet yepenopa' e'ñech cohuen entyeny allohuen acheñenesha', amach eñalle attoch esesha'pa' o'ch eñosenet yocop año' pocteye' es yepa'yeno, tarro'mar e'ñech cohuen es yoctape'chyen attoch yorrtaten atet penaña ñeñt po'ño'ch o' puechemer per Yompor. Amach eñalle ñeñtcha' a'sosyatene' atto yocrrena e'ñe cohuen Yomporecop añe patsro. E'ñech cohuen yorrtena acheñeneshacop ama't ñeñt ama ame'ñetso ñeñt atarr nanac sosey co'tape'chenet. Cohuencha' yorreyena atet ñerra'mrrate' ranto'chno ñeñt a'puetarene' checmete' tsapo. ¹⁶ Attoch sa'puetarsañpsanetpa' choch señotaterranet ñoñets ñeñt huetsa Yomporesho' alloch yocrrerra e'ñe cohuen. Allochñapa' ñerra'm esempohuañencha' huerra Cristopa' socshaterrencha', tarro'mar neñotercha' ama e'ñe orrena nanac ne'torrerrocop. ¹⁷ Ñaña ama'tcha' machayota muetsataterrenet arr atto napa' o' name'ñatasa, napa' atarr nocshena ñaña te'pa' cho'ña nocshapretensa atto same'ñerra. Añña same'ñeñapa' ñeñtcha' yehuapateññañ Yompor atet ñerra'mrrate' ñeñt amtsarettetsa ñocop. Ñaña nerraspa' ñeñtcha' orrtatsa ñerra'mrrate' ñeñtcha' ashatarettatsa all ñeñtcha' o'patateñet Yompor. ¹⁸ Ñeñto'marña napa' nemneñ sapa' amach cha sellcatsto, chochña socshapreterrna ñeñt atet o' notuas.

Timoteopa' nanac cohuen llecapretane't pamo'tsesha'

¹⁹ Te'pa' o'ch notas ñeñt atet noctape'chen. Añ noctape'chen o'te' nemñer masheñ Timoteo tayecma o'ch enterrsa', ñerra'm atetcha' muena' Yepartseshar Jesús. Allochñapa' ñach neñotatuierre' errotente' sepa'yena, allochñapa' attoch socshaterren ñerra'm cohueno'tseneste'. ²⁰⁻²¹ Añcha' nemñonas masheñ Timoteo tarro'mar ama eñalle ama't puesheñarra ñeñt co'tape'chene' cohuen atet ñerra'm ña ñeñtcha' e'ñe po'ño'ch sellcapretenaya ñeñt echarr sentyen. Tarro'mar ama't eñalleñ ñeñt parro yetorrena, ama allohuenacmaye' llecapretenseto ñeñt echarr sentyen. Añach torra'yenet ñeñt e'ñe ñocpueta. Amachña añeye' llecapreteneto attoch torrenet ñeñt nanac sherbets Jesucristocop. ²² Ñaña sapa' e'ñe señotueñ atet masheñ Timoteopa' e'ñe cohuen pa'yena allempo parro yeserrpare'tatyen añ cohuen ñoñets alloch yequeshperra. E'ñe cohuen torrapretenna atette'ña ñerra'm yechemerpa' e'ñech cohuen yenpueny yetaruas. ²³ Ñehua, esempoch e'ñe neñoch ñato' errotente' poctetsa nocoppa' napa' noctape'cheñ o'ch nemñonas masheñ Timoteo. ²⁴ Na te'pa' añ necuen Yepartseshar Cristo ñerra'm ñach muenats, napa'cho'ña nabcherrsa'ch amach atarr natomatatatsche.

Atto Epafroditopa' yenpa'yesosan Pablo all cárcelo

²⁵ Ñaña o'ch notas po'poñ, e'ñe pocte' nenteñ te'pa' o'ch alla nemñer sesho masheñ Epafrodito ñeñt parro yetaruaseño'pa' nanac yetorre't Yomporecop. Ñeñtara masheñ Epafroditopa' ñeñt semñon ahuaña ñach neyenpa'yesose' all es nepalltena ñeñtcha' neyenpose' arr. ²⁶ Napa' e'ñe pocte' nenteñ te'pa' o'ch alla ahuer sesho, tarro'mar ñapa' nanac yerpuensa attoch o'ch alla entuerres. Tarro'mar ñapa' añ nanac llecatene' atto sapa' ahuo't se'mare'ch ñapa' cha atsna'tos arr. ²⁷ Ñehua, po'ño'ch ahuañapa' cha atsna'tos cha muene' rromañ, tarraña Yompor e'ñe puemuereño'teypa' o' alla a'crrater atto ñerra'm rromañpa' ellote' na'na llecatañ arr cárcelo. ²⁸ Ñeñto'marña e'ñe poctennana o'ch nemñer e'ñe tayecma sesho allochñapa' o'ch socshapuera ñerra'm esempoch cherr e'ñe sesho. Allochñapa' amach ña'na allo'na nellcatnenaye. ²⁹ E'ñech separasyoso'teñesha' Yepartseshar Cristo o'ch sagapapuer ñaña e'ñe socsheñeshocmañen. Ñaña o'ch notas, chochmuepa'ch semorrenteña ama't erra'tsena acheñer ñeñt e'ñe atet senten ñerra'm ña. ³⁰ Atto ñapa' e'ñe puemneñño't o'ch torra Cristocop cha atsna't ama't cha muene' rromañ. Atarr yoreretso't correrra arr, tarraña ñapa' ama ñeñtayaya mecha'to attoch ñapa' o'ch

yenposen, ñeñt sapa' amate' erroť sepe attoch sehuaĉha'ta baĉhayoť e'ñe puesheña'ttsos attoch seyenuenna' arr.

3

Arrpa' all eñotatyasanet ñeñt e'ñe po'ñoĉ sherbets Yomporecop ñaña ñeñt e'ñe orrena cotapñats

¹ Ellonetpa' o'ch alla masheñnesha ñaña noĉhanesha noterrser po'pocheño, e'ñe same'ñeñoť Yepartseshar Cristopa' ĉhocmuepa'ch socshena. Ama't te'pa' o'ch alla noterrser atet tarro'mar amach nemuenme'che sotare'te' atet, tarro'mar ñeñtpa' ñeñtĉha' nanac seyemta sa. ² Ñaña te'pa' o'ch notas po'poñoneť. Señota'tach ñato'tña seyemteña' ñeñt aĉeñeneshar ñeñt añach torrenet ñeñt ama cohuenayaye, ñeñt e'moñe'tene' cohuen serrparñats ñeñt alloch po'ñoĉ yequeshperra. Ñetpa' e'ñe atet nentenanet ñerra'mrrate' oĉec ñeñt nanac atsena'tareť. Ñeñt judionesha' ñeñt o' notuanmaspa' añach ma'yoĉhrenet cotapñats attoch tsorrannenet atto'ch puechemer perranetañ Yompor. ³ Tarraña yapa' yaña e'ñe po'ñoĉ puechemer o' enterrey Yompor, tarro'mar yapa' e'ñe yeñoteñ ama yetsorranna'teñoťeye' puechemer penyey Yompor. Po'ñoĉ puechemer perrey tarro'mar yapa' e'ñe yocsheñoť Parets ñeñtpa' e'ñe Puecamquēñoť huena. Ñaña puechemer o' perrey Yompor tarro'mar yapa' yocsheññaña Puechemer Cristo Jesús ñaña tarro'mar yapa' ama añeye' yeyemteno ñeñt atet yetsotaten e'ñe yañeña, ñeñt e'ñech yechtsochaya. ⁴ Ñehua, ñerra'm esesha' ñetpa' ĉate' otenapuetañ añe' poctetsa o'ch yeyemtena ñeñt allo es yepenañ alloch yequeshperra e'ñe yoťoťapa' nocoppa'ĉho' eñalleñ shonte' ñeñt neyemtenañ, tarro'mar ñeñt allpon o' netsotatuena' ello metana'tuenan allohuen po'psheñneĉhno namo'tseshaĉhno puet-sotateñ. ⁵ Tarro'mar napa' o' e'ñe allpon netsotueññañ judionesha' poctapña: Ama't po'psocmatñoťeñ allempo ne'ñalletuapa' napa' atsorrataťolle'tareťen* ñeñt atet anuareť allohuen asheñorroťolleshacop ñeñtey judioneshay, tarro'mar e'ñe israelena'tareshoť ñeñt e'ñe judiomreyoť eñalletñan. Ellonetpa' ñaña napa' Benjamín po'mrenñen. Ñaña napa' e'ñe hebreoneshan tarro'mar ach ñaña apapa' e'ñe judioneshet poctacma ñeñt eñets e'ñe ya yeñoño ñeñtara hebreaoĉo. Alloťpa' ñaña na ahuaťpa' e'ñe fariseoneshan ñeñten nanac ma'yoĉhraye't attoch netsotua ora allpon ñoñets ñeñt aquellca'huareť judioneshacop. ⁶ Nanac netsote't judionesha' poctapña. E'ñe nemoñseñoť yoctapña napa' ne'moñe'che't allohuen ñeñt o' ame'ñerrana Cristo. Ñeñto'marña epaye'ch ne'name'tanete't attoch erroťenoťpa' o'te' erroť nepatanet. Ñaña ora atet oteney ñoñets ñeñt atet anareť judioneshacop napa' ĉhocma e'ñe atet nepohuahue't. Ñeñto'marña ama eñalle'te ama't patrra ñeñt nepalltena attoch ello po'psheñeñpa' o'ch otnet ñeñto' nepalltenmeñ. ⁷ Allempo atet netsotrrote't ñeñtecop nañapa' ñeñta notenapañ ñeñte'ña nanac sherbets nocop. Tarraña te'ñapa' e'ñe nemorrenteñoť Cristopa' o' neñoter ñeñt allpon o' nepohuahua' amach es sherberro nocop ama't coñe'ta. ⁸ Ama't ellonet allohuen po'poñeĉhno ñeñt nente't ñeñto'ch sherbatseñ nocoppa' te'ña e'ñe neyemteñoť Cristopa' ama asherbenaye' nente'ñe, ama't coñe'ta, tarro'mar te'pa' o' neyemtera Yepartseshar Cristo Jesús ñeñt nanac sherbets. Ñapa' ello metana'tuenan allohuen po'poñeĉhno ñeñt atet nente't na ñeñto'ña nanac sherbets. Ñeñto'marña nemorrenteñoť Cristo te'pa' o' nepuesuerr ora po'poñeĉhno, nocop te'ñapa' ama esoye' nente'ñe eshecĉha' te'pa' e'ñech nocsheñesha' nocter Cristo. ⁹ Alloĉhñapa' e'ñe yeparrocmateñoť Cristo, Pomporpa' e'ñech pocte' enteney tarro'mar amach aňoťeye' a'queshpaterrye e'ñe yoťoťa ama't yetsotatsetuahua ñoñets ñeñt atet anareť judioneshacop. Aňoťĉha'ña te'pa' e'ñech pocte' enterrey e'ñe yeyemteñoťa ñeñt Puechemer pen ñeñtpa' Cristo. ¹⁰ Atto e'ñe yeparrocmateñoť

* 3:5 O'ch secue' nota San Lucas 1.59.

Cristopa' o'ch yaguërrñañ po'huamenc atto ñapa' nanac ahuamencattena allempoteñ tanterra puerromñoñ. Ñaña e'ñe yeyemteñoñ Cristopa' e'ñech pocte' yeñch ama't e'ñe erroteno'pa' o'ch yemueroçhta e'ñe ño'mara atto ñapa' nanac amueroçhtatarette't. Ñaña ama't yemueroçhetuaneñoñ Cristocopcha' yerromapa' ñeñtpa' e'ñepa'ch pocte' yeñch tarro'mar atetcha' yerromaprecha Cristo. ¹¹ Attochña yapa'cho'ña yetantuerrach esempohuañen.

Ñeñtach e'ñe paterr llequë't Pablo

¹² Ñehua, napa' ama noteno napa' o' e'ñe poctacma netsotuahuen ora allpon ñeñt pocte' enten Cristo. Ñaña po'ñoçhpa' ama noteno napa' e'ñe es coçhneshare' noctape'chuen. Tarraña ama't atet neñotenapa' elloña te'pa' allo'ña nesen ama't aco'pa o'ch netsotnom ñeñt pocte' enten Cristo Jesús, tarro'mar ñapa' ñeñtecop o' pueyochresha' perren. ¹³ Napa' masheñnesha ñaña noçhanesha neñotena po'ñoçhpa' ama atteye' ne'pohueno ora allpon ñeñt cohuentetsa Cristocop. Tarraña ama't atetpa' amach ñeñta neyerpuerre'te, çochña nepuesuanom ñeñt atet ne'patse'tyese't ahua'toteñ. Te'ñapa' añach nema'yoçhrena attoch allo'nach nesen ama't aco'pa etsotayesnomue' ñeñt poctetsa Cristocop. ¹⁴ Tarro'mar ñeñtecop o' çhore'terrey Yompor pue'ntaño't attoch e'ñe yeparrocmateño't epay Puechemer ñeñt Cristo Jesús, esempopa' ye'pohuerrach ora errponte' e'ñe pocte' enten ña. Allochña'pa' aphuerreycha' ñeñt o'patatenya ñeñtcha' nanac yocshatuerre' allohueney ñeñtey o' yame'ñera.

¹⁵ Ñaña o'ch notas ñeñtes po'ñoçh o' same'ña'huera Cristo ahuañmo'çhoteñ, te'pa' ñeñtña o' notuanmas e'ñepa'ch seyoçhre'cha. Ñaña ñerra'm erra'tsente' soçtape'chyen ñeñt ama atteye' poctetso Yomporecoppa' ñeñtpa'cho'ña e'ñe ña Puecamquëño'tpa' ñach e'ñe seño'tatuerre'. ¹⁶ Añcha'ña e'ñe pocte' o'ch ye'pohuena ñeñt allpon o' çhapatuonay Yompor e'ñe yeyoçhro ñeñt yeñoten erra'tsente' e'ñe pocte' enten ña.

E'ñech cohuen yocrrena atet corre't Pablo

¹⁷ Ñaña o'ch masheñneshacha' ñaña noçhaneshacha' o'ch notas, ñeñt atet sentenen atet nocrrena napa' sapa'cho'ña atetcha' socrra samña allohuenes. Ñaña añcha'ña secua' ñeñt señoten erra'tsente' ñeñt e'ñe atet corretsa cohuen ñeñt atet entenyet ya. ¹⁸ Tarro'mar añ patsropa' eñall shonte' acheñnesha' ñeñt atet penetpa' yapa' yeñoteñ ama ayemuetpahuoye' enteñeto atto Cristopa' rroma corsocho attotcha' yequesh-perra. Ama't ñeñtpa' shontoch o' notuanmas ahuañapa' te'pa'cho'ña e'ñe nanac nel-lquëñesha'pa' o' alla noterrser. ¹⁹ Ñetpa' aña o'patenahuet attoch allohuenetpa' e'ñech chenca'huerret. Añach yomña'yenet attoch rra'yenet amapa' orrare'tyenet. Ñeñt atet yomñatse'tyenetpa' ñeñtpa' atet ñerra'mrrate' ñeñta po'yomporer penet. Ama't ñeñtcha' pencatahuetañpa' tarraña ñetñapa' ñeñtach atarr coshatenahuet. Ñaña añach e'ñe nenet pueyoçhro ñeñtcha' atet coshatse'tatyenahuet arr patsro. ²⁰ Tarraña yapa' o'huañ atteye' yoçtape'ch tarro'mar añ patsropa' ama't all yeyçhenañpa' tarraña po'ñoçhpa' ama ya'netsreyaye. Tarro'mar ya'netsro allcha' yeyçherra ya errponohuañenpa' ñeñtpa' all Yompor pue'ntaño. Ñeñtara pue'ntaño'tpa' yecueñ allot esempohuañencha' huerra Yepartseshar Jesucristo ñeñt Ya'queshpatañer yepen. ²¹ Ñerra'm o'ch huerra añe patsropa' ya ñeñtey arromña'feypa' ñapa' o'ch a'po'poñetuerrnay yechets, allochña'pa' yapa'cho'ña yorrterrach e'ñech attey ñerra'm ña po'partsoteño'tpa' nanac cohuentena. E'ñech ña po'huamenco't a'po'poñetuerray ñeñtara po'huamenco'tpa' e'ñech pomnaren p'ohuerran allohuen allpon ñeñt eñall.

4

1 Ñeñto'marña masheñeshacha' ñaña noçhaneshacha' e'ñe nemorrenteñoñespa' o'ch notas, çhocmuepa'ch huomenc sepa'nem seyoçher Cristocop ñeññ Yepartseshar yepen. Añpa' atet notenes tarro'mar sapa' çhocma neyerpuensa ñaña çhocma socshatenen atto sapa' e'ñe cohuen same'ñena. Nanac nocshensa tarro'mar napa' nentenes atet ñerra'mrrate' necopa' ñeññ o' naguërr e'ñe netorreñoñ Yomporecop e'ñe so'mar. Atarr nanac nemorrentensa.

2 Ñaña o'ch noteñ noçhanesha' Evodia ñaña Síntique, amach allo'na po'poñ entanna'tatsetneneto tarro'mar e'ñe yame'ñeñoñ Yepartseshar Cristopa' e'ñech cohuen yemuerannena. 3 Ñaña o'ch notas, ama't erra'tsenoñesa ñeññes po'ñoçh nanac neyemtenapa' o'ch samo'tstatanna'terranet añ epsheña coyanesha' tarro'mar ahuañmo'chapa' e'ñe parrocmá nanac yema'yochre't attoch epa'hua añ cohuen ñoñets alloch yequeshperra, ñaña epay Clemente ñaña po'potantañ ñeññ parrocmá nanac yetorre't ahuañmo'cha. Ñet pa'so'chñechnopa' o' aquellca'huare'tterret attochña ñetpa' corretsetach.

E'ñe yame'ñeñoñ Yomporpa' çhocmuepa'ch yocshena

4 Te'ñapa' o'ch noterrser atet, e'ñe same'ñeñoñ Yepartseshar Cristopa' çhocmuepa'ch socshena. O'ch alla noterrser; çhocmuepa'ch socshena. 5 Eñotuasepa'ch allohuen acheñenesha' atto sapa' e'ñe cohuen acheñres, amach cha po'poñ es sentatatsetuenaye, ama't erroteno'tsenes. Tarro'mar yeñoteñ po'ñoçhpa' alla'tsena Yepartseshar Cristo.

6 Amach es sellcatsto ama't e'ñe mamesha. Añcha'ña ama't erroteno'tsenes e'ñe sema'yocheñoñpa' çhocmuepa'ch sotue Yompor ñeññ sellcatyene' ñaña e'ñe socsheñoñ Yomporpa' çhocmuepa'ch senamyeyñ ñaña ñeññ sepallta'yena. 7 Ñerra'm atetcha' çhocma sepena, Yomporpa' ñachña ama semnatenaye o'ch es sena'yen seyoçhro ama't coñe'ta. Attoch eñmataterrnay Yompor yeyoçherpa' ya acheñey e'ñe yocpa'ñoñapa' amate' erroteno't e'ñe yotapa' yeñmataterro atet. Ñeñto'marña e'ñe yeparrocmateñoñ epay Cristo Jesús, Pomporñapa' cohuanñpennaycha' yeyoçher attoch amach allo'na yena'nenno yeyoçhro ñeññ allcatañtetsa.

Añcha'ña e'ñe cohuen yoctape'ch ñeññ e'ñe cohuen entuen allohuen acheñenesha'

8 Te'ña masheñesha ñaña noçhanesha e'ñe allohuanenpa' o'ch noterres, añcha'ña soctape'chyes ora erra'tsente' señoñen ñeññ e'ñe cohuenetyetsa ñaña ñeññ ora cohuen entuapotetsa. Ñeññcha'ña soctape'chyes ora erra'tsente' ñeññ ama shequëñtsoyaye, allotpa' ñaña ora erra'tsente' asherben entpahuotets, allotpa' ñaña ora erra'tsente' ñeññ poctetsa, allotpa' ñaña ora erra'tsente' ñeññ ama sosya'tsañeyaye, ñaña ora erra'tsente' amorrentanna'tatañtetsa, ñaña ora erra'tsente' ñeññ e'ñe cohuen aserrpare'tpahuotets. Ora allpon añechnopa' ñeññcha'ña atet soctape'chyes.

9 Ñaña o'ch noterrser po'poñ ñeññcha' atet sepa. Allpon o' neyçhatuas, ñaña allpon o' neçhapatuonas seyoçhro, ñaña allpon o' neñotatyesas, ñaña allpon sentenen ñeññ atet es nepa'yena napa' sapa'cho'ña te'ñapa' e'ñepa'chña atet es sepa'yen samã. Allochñapa' Yompor ñeññ acshatañtetsa yeyoçhropa' ñachña parro'tsenes allohuenes.

Atto filiposo'marnesha'pa' es apueñet Pablo ñeññ pallta'yena

10 Ñaña o'ch notas, e'ñe neyemteñoñ Yepartseshar Cristo, napa' atarr nocshena tarro'mar sapa' o' alla seyerpuerrna. Ñehua, napa' ama notenso o'te' sepuesuerren, añña noten sapa' ama't erro't sepeñe attoch seyepa'n. 11 Ama çho es nemnapreteñoñeye' notenso atet, tarro'mar na te'pa' o' çhaponá neyoçhro ñeññ atet cohuentetsa, ñeñto'marña te'pa' o' attañña neyçha ama't erroteno'tsenanapa' tarraña atachña çhocma nocshena neyoçhro. 12 Ñehua, napa' neñotena errotenopa' nanaccha' es nepallta'yese't atto yocrrena añe patsro, ellonetña errotenopa' esocmañencha'

nechyese't. Tarraña ama't erroteno'tsenenpa' na te'pa' o' neño'ch o'ch attaña ney'cha; ñerra'm es nepalltena errotenopa' amach čha llecatenno, ama't čho esocmañen es nechyes errotenopa' amach čha nommo'cheño. Ñaña attecma'ch nocshena ama't esempo eñall shonte' nerrar ñeñt'cha' neyetena, amapa' esempo ama eñalle ñeñt'cha' nerren, amach es ne'nenno. ¹³ Ñeñto'marña napa' e'ñe neñoteñ, yapa' ama't erroteno'tsenyapa' čhocmach ahuamencatey tarro'mar Cristopa' ñach nanac ahuamencat yepene'. ¹⁴ Tarraña ama't o' notuanmas atetpa' e'ñe pocte' nenteñ atto sapa' sellcapretena ñeñt' nemueročhtatene' arr.

¹⁵ Ñaña sa ñeñtes filiposo'marneshas e'ñe seño'tueñ allempo ñanom neserrpare'tnom cohuen ñoñets alloch yequeshperra, allempo non Macedoniot, allempopa' ama't allemeñ anetso'marpa' ama eñalle acheñenesha' ñeñt' atet apčherrtsa Yomporecop ñeñt'cha' nellcapretenaya attoch e'ñe parrocmá es yapanna'ta. Sapa' saña e'ñe sapta ñeñtes es napuene' ñeñt' allpon nepalltena. ¹⁶ Napa' ama't ahuañmo'cha allempo Tesalónico'tsenenpa' ama parrocho'tayaya sapa' čhocma soñmaten ñeñt' sapuenen añecop ñeñt' nepallta'yena all. ¹⁷ Ñehua, napa' ama nocpaye' nemnapretenso o'ch es sapuenen. Añña nemnen ñaña allochñapa' socoppa'čho'ña ellopa' o'ch atonetnoma attoch coshatuerres Yompor. ¹⁸ Te'pa' o' aposen masheñ Epafrodito ñeñt' allpon soñmaten nocop. Ñeñt' allpon o' nagaponaspa' te'pa' ama es nepallteno ama't coñe'ta, elloña čha metanuosan allpon ñeñt' nepalltena. Ñeñt' allpon sapuanpa' napa' e'ñe attecoptar nenteñ ñerra'mrrate' ñeñt' apuenet Yomporecop ñeñt' eñmosañtetsa ñeñt'cha' e'ñe pocte' enten, ñaña ñeñt'cha' nanac coshatene' ña. ¹⁹ Ñaña Yompor ñeñt' e'ñe neyemtena napa' ñachña sapuerre' saña ama't ora ñeñt' allpon sepallta'yena sa, tarro'mar e'ñe yeparrocmateño't epay Puechemer ñeñt' Cristo Jesús ñeñt' e'ñe esocmañen es echyetspa' nanacocmañencha' esocmañen apuerrey yaña. ²⁰ Aye'chočhtataretepa'ch Yompor ñeñt' atarr Parets. Ñeñt'pa' attetepa'ch ama't tayoteñ errponohuañen.

Arrpa' all so'tnerranet e'ñe po'cartot

²¹ Ñaña o'ch notas, o'ch sehuom'cha'ch allohuen ñeñt' pueyochresha' o' perr Cristo Jesús. Ñaña allohuen masheñnesha' ñeñt' e'ñe parro'tseneypa' ñetpa'čho'ña mueneñet o'ch huom'cha'taset ñamet arr necartot. ²² Ñaña allohuen ñeñt' pueyochresha' o' perranet Parets arr Romopa' ñetpa'čho'ña mueneñet o'ch huom'cha'taset ñamet necartot. Ñeñt' nanac muenets atetpa' ñeñt'pa' ñeñt' parro yečhena ñeñt' atarr añcha'taretetsa arr Romo.

²³ E'ñe Yepartseshar Jesucristopa' ñepa'chña e'ñe sa'natenaya allohuenes. Te'pa' ñeñt'ach notas, ñeñt'pa' attetepa'chña Nompore. Allohua.

Pablo

AÑ SAN PABLO PO' CARTA ÑEÑT̄ QUELLCAN COLOSASO' MARNESHA' COLOSENSES

Atto Pablopa' quellcan carta añecop ñeñt̄ ame'ñetsa anetso Colosaso

¹⁻² Masheñeshacha' ñaña nochaneshacha' ñeñtes o' pueyochresha' perres Parets e'ñe seyemteñoŕ Cristo, sa ñeñtes yeçhetsa all anetso Colosaso. Na Pablón sequellquêneña añ carta epan masheñ Timoteo. Napa' ñeñten Cristo Jesús puellsensaren tarro'mar atet muenatenen Yompor. E'ñe nehuom̄cha'teñoŕes sa napa' o'ch notas: Yomporepa'ch Parets sebensare'tam̄pene' ñepa'chña socshatene' e'ñe sa seyoçhro allohuenes.

Arrpa' all parasyoso'teñet Yompor ñocpuet

³ Yapa' allempo yema'yocham̄pensapa' çhocma yeparasyoso'teñ Yompor, ñeñtara Yepartseshar Jesucristo Pompor. ⁴ Tarro'mar yapa' o' ye'mare'tas atto sapa' atarr same'ñeña Cristo Jesús. Ñaña ye'mare'tenes sapa' atarr semuereña allohuen ñeñt̄ pueyochresha' pen Parets. ⁵ Ñeñt̄pa' tarro'marña sapa' atet atarr seyemteña sapa' e'ñe same'ñeñoŕ Cristopa' sapa' añ atarr seyemtena ñeñt̄ o'patatensa all pue'ntañ. Ñeñt̄ña sapa' ahuañoŕeñ se'mñotenña cohuen ñoñets ñeñt̄ e'ñe po'ñoçh Yompor po'ñoñ alloch yequeshperra. ⁶ Ñeñt̄ña cohuen ñoñets ñeñt̄ çhapats sesho ñeñt̄ña te'pa' allemeñ çhapyen, allpa'çho'ña nanac ame'ñatenana shonte' acheñenesha'. Allpa' allo'na senet orrtatyaset ñeñt̄ e'ñe cohuen enten Yompor. Ñetpa' e'ñe atet penet atet sepene sam̄a. Sa po'ñoçh allempo errtes e'muerre' Yompor po'ñoñ atto ñapa' atarr morrentenya, sañapa' e'ñe allempoteñ çhaponasa seyoçhro ñeñt̄ña ñoñetspa' e'ñe po'ñoçh Yomporo po'ñoñ. Allempoteñña sapa'çho'ña allo'na sesen orrtatyestnomue' ñeñt̄ e'ñe cohuen enten Yompor. ⁷ Ñeñtara cohuen ñoñets ñeñt̄ ñanom yeçhatas masheñ Epafras. Ñapa' ñeñt̄ e'ñe parroçma yetorrena Yomporecop, atarr yemuerannena. Ñapa' çhocma atarr cohuen torrena Cristocop ñeñt̄ña e'ñe socop. ⁸ Ñapa' e'ñe cohuen eñotaturrey atto sapa' atarr semorrentannena e'ñe same'ñeñoŕ Cristo.

Arrpa' all ma'yocham̄peñet colosaso'marnesha'

⁹ Ñeñto'marña allempo ye'mare'tas allempoteñ yapa' ama yequeçhpueno sema'yocham̄psaya Yompor. Yapa' añ yenamuennas Yompor: Sapa' çhocmuepa'chña eñotatenes ñeñt̄ atet muenen ña ñeñt̄cha' atet sepa'yes e'ñe cohuen ñocop. Ñaña çhaponasepa'ch seyoçhro ora allohuen ñeñt̄ atarr cohuentetsa yecamquẽñecop. ¹⁰ Allochñapa' o'ch e'ñe seyçherr ñeñt̄ atet poctetsa allohuenacop ñeñt̄ey pueyochresha' pen Yepartseshar. Allochñapa' attochña e'ñe socshateñ. E'ñe atto es cohuen sorrtatyenpa' nanaccha' cohuenoŕ sesherbeñ. Allo'nepa'chña sesen eñotnomue' ñeñt̄ atet penaña Parets. ¹¹ Ñaña añ yenamuennas Yompor: Po'partsoteña ñeñt̄ cohuenñatsotetspa' e'ñepa'chña ahuañencat̄ p̄a'yesas e'ñe poctacma allochñapa' amach çha sequeçhpatstere. E'ñechña socsheñesha' sa'huanta'huanomña allohuen ñeñt̄ atarr echarr sentyen. ¹² Ñaña sapa' çhocmuepa'ch separasyoso'ch Yompor tarro'mar ñapa' a'poctaterrnay attoch yagapapreter yam̄a ñeñt̄ o'patatenana allohuen pueyochresha'çhno. Ñeñt̄ña sapa' ñeñt̄ po'cohuenña pen ñeñt̄ atarr cohuentetsa allñapa' puetaretsa. ¹³ Tarro'mar te' Yomporpa' o' cheterrey cheçmetoŕ all am̄cha'noçhtena oneñet. Te'ña yapa' o' çhapterrey po'cohuenño all ayochreshattena e'ñe ña Puechemer ñeñt̄ Jesucristo ñeñt̄ atarr morrentena ña. ¹⁴ Ñeñt̄ña Jesucristo ñeñt̄ña rromats yocop

ñapa' attoña e'ñe tsa'tuerrnayaña yo'chñar attoch e'ñe peretna'huerrnay yo'chñar esheccha'ña e'ñech cohuen a'queshpaterrey Yompor.

Allempo ashataretta Cristo po'rras corsocho, ñeñña e'ñe a'mchechatue'ña allohuen esocmañen

¹⁵ Yompor Paretspa' ama entpahuo, tarraña Cristoña ama't entpo'pa' ñapa' e'ñe parro attecma ñerra'm Pompor Parets ñeñt ama entpahuoyaye. Ora allohuen allpon eñalleteysta, Cristoña' e'ñe ñanom eñall ñeñtcha' pomnaren penahuet allohuenet. ¹⁶ Allohuen ñeñt allpon ayeçcataretetyestsa ña e'ñe yeçcatuahuet, ama't ora allpon ñeñt ento'tsa'yen ñeñt ama entpahuoyaye ñaña allohuen ñeñt yentyen arr patsro, e'ñe ñocma pueyeçcatuar. Ñaña allohuen ñeñt allpon amcha'taretetyestsa, ñaña allohuen ñeñt allpon ayochreshatetyestsa, ñaña allohuen ñeñt allpon amcha'noçhetyestsa eracmañen, ama't ñaña allohuen ñeñt allpon huomenc entyestsa, ora allohuenet ñeñtet ayeçcataretet e'ñe ñocma pueyeçcatuaranet. E'ñe ñocpacma ayeçcataretetyesuahuet. ¹⁷ Ora allpon ñeñt esocmañen eñallpa' ñaña' e'ñe ñanom eñall. Ora allpon ñeñt esocmañen eñallpa' ñapa' ña orratyenahuet. ¹⁸ Cristoña' yeyoçher* yepohueñ allohueney ñeñtey parrocmatenaya e'ñe yame'ñeñoñ ña, tarro'mar ñapa' ña yoçtape'chatene' e'ñe cohuen allohueney ya ñeñtey e'ñe po'chets pòhueney. Ñeñto'mar Cristopa' pomnaren peney allohueney ñeñtey ame'ñenaya ña. Ñapa' e'ñe ñanom orrtatene' allochña yapa' corretsayach allohueney ñeñtey e'ñe po'chets pòhueney e'ñe yeparrocmateñoñ epay ña. Ñaña ñapa' ñanom tanterrtsa rromot, ñeñtña' ellochña nanac sherberr. Ñeñtpa' tarro'mar atet pa' allochña' ora ñeñt esocmañen allpon eñall, ñetña' Cristochña e'ñe ñanom nanac cohuen entyenet. ¹⁹ Pompor Parets e'ñe pocte' enteñ o'ch e'ñe cohuen chorrataña ora allohuen po'partsoña. ²⁰ Ñaña' e'ñe alla parrocmaten Pomporesho e'ñe parrocmata allohuen esocmañen, ama't ñeñt patso'tsa'yen, ama't ñeñt ento'tsa'yen. Allempo ashataretta Cristo po'rras corsocho, ñeñña e'ñe a'mchechatue'ña allohuen esocmañen.

²¹ Ama't sa ahuatpa' atarr ella'paro'tsa'yenes Yomporeshot. E'ñe se'moñe'teñoñ Yompor seyoçhro saña' aña seyeçcatyese't ñeñt ama cohuenayaye. ²² Tarraña te'ña Yomporpa' o' e'ñe parrocmata'terres e'ñe ñesho. Ñehua, allempo amueroçhtataretta Cristo e'ñe ña po'chtso atto rroma, ñeñtpa' attochña e'ñe parrocmata'terres saña. O' e'ñe parrocmata'terres attoña sapa'çho'ña o' sa'cohuentataretterra Partsocop, ñaña attoch amach sa'tanmare'tterro, amach eñalle attoch sotte'ne'charetterra. Te'pa' atetca'ye enterresña Yompor. ²³ Ñerra'm po'ñoçh çhocmach same'ñera Cristo, ñerra'm e'ñech huomenc seperr seyoçher attochña sapa' amach sepurrerro. Cohuen ñoñets ñeñt o' se'mhua alloch yequeshperra ñerra'm amach cha sa'ypo'ña'mpere ñeñt o' seyemterra Yomporña' enterrescha' o' e'ñe sa'cohuentataretterra. Añ cohuen ñoñets ñeñt o' se'mare'tua sa, te'ña' aserrpare'tataretterrach ñaña allohuen ñeñt corra'yetsa aña patsro. Ñeñto'marña na ñeñten Pablon nach sherberrets te'ña' nach serrpare'taterrahuet.

Atto Pablo a'potan ñeñt ahuatoteñ ama eñotpahuo

²⁴ Te'ña na e'ñe nemueroçhteñoñ socoppa' atarr nocshena. E'ñe nemueroçhteñoñ nechtopa' ñeñtpa' attoña netsotatenas allpon ñeñt palltetsa attoch nemueroçhtaprecha Cristo allohuenacop ñeñt ame'ñenaya ña ñeñt e'ñe po'chets pen Cristo ñeñt e'ñe a'parrocmata'ten. ²⁵ Ñeñto'marña te'pa' nach sherberre' allohuen ñeñt ame'ñenaya Cristo. Atet llesensenen Parets e'ñe socop, attochña napa' o'ch e'ñe na'potuerrñañ ora Yompor po'ñoñ. ²⁶ Añcha' na'poterr ñeñt ama't ahuatapa' ama eseshaye' eñotaye'te e'ñe

* **1:18** Ñehua, po'ñoçh Cristopa' arr atma'ntataret atet ñerra'mrrate' ñeñt yoñ yepen.

yatañeshapoñen tarro'mar allempopa' ama chena' allempoch eñotatteranet Yompor. Tarraña te'ñapa' e'ñe eñotatterey Yompor allohueney ya ñeñtey pueyochresha' pen Parets. ²⁷ Te'ña Yomporpa' atarr mueneñ o'ch eñotatterey ñeñt atarr cochneshare' ñeñt po'cohuenña e'ñe ahuatoteña' ama eseshaye' eñotaye'te. Te'ña ñeñt po'cohuenña' o' e'ñe orrtataretterra añecop ama't ñeñt ama judioneshayaye. Ñeñña ama eñotete'te ahuatpa', ñeñña' añepa't Cristo ñeñt chorrenaya yeyo'cher. Attoña e'ñe yeyemteño' ña yañapa' o'ch yecohuentapretera.

²⁸ Ñeñto'marña Cristopa' chocmach ya'poteñ. E'ñechña cohuen yoc'tape'chatyeñ allohuen ama't erra'tsena acheñer. Ñaña e'ñech cohuen yey'chatyeñña allohuen ama't erra'tsena acheñer attochña ñetpa'cho'ña e'ñech eñotyeyet ñeñt atet pena Cristo. Attoña e'ñe pueyemteño'et Cristopa' o'ch ame'ñeñet e'ñe poctacma. ²⁹ Ñeñto'marña napa' nanac netorrena ñocop. E'ñe po'huamenco ñeñt atarr ahua'mencat nepene' attoña napa' chocma atarr netorra'yena ñocop.

2

¹ Napa' nemneñ o'ch señoch atto napa' e'ñe nellquëñotes sa atarr nanac netorrena socop. E'ñe attecma netorrena ñaña laodiceo'marneshacop, ama't ñaña allohuenacop ñeñt ama puentarno. ² Allochña' attochña e'ñe socsherra seyo'chrohuen atto e'ñe semorrentanna'teño'tpa' o'ch e'ñe separrocmaterr. Attochña chaponasa seyo'chro attoch atarr es señotyerr. O'ch señoterr ñeñt ama eñotete'te ahuatoteñ, ñeñtpa' ñapñaña Yompor eñotene'. Ñeñtpa' e'ñepa'tca'ye Cristesho'tsenña ³ allohuen pa'namen eñoteñets ñeñt nanac cochneshare' yentyen. Ñeñtpa' e'ñe yeyemteño'ña Cristo esheccha' yeñoterrña ñeñt ama't ahuatapa' ama eñotpahuo. ⁴ Ñeñto'marña napa' atet notenes allochña' sapa' amach esesha' seshquërraye ama'tcha' cotape'chatyesaset ñeñt atarr cohuen ñoñets sentyerreñ. ⁵ Ama'tcha' ama allo'tsenno e'ñe na tarraña neyerpueñoses neyo'chropa' e'ñe parro'tsa'yenacmay. Sapa' e'ñech nocsheñesha' nentyenes atto e'ñe cohuenare' es sorrtatyen. Ñaña nentenes atto e'ñe same'ñeño't Cristo o' e'ñe huomenc sepa'yen seyo'cher ñocop.

⁶ Atto o' sagapuer Yepartseshar Cristo Jesús, te'ña sapa' allo'nepa'ch sesen e'ñe parrocmatats epas. ⁷ Attochña sapa' e'ñech huomenc serrmuerrñañ po'ñoñ atet ñerra'mrrate' tsachrech atarr huomenc rromuenan pats, e'ñe separrocmateño't epaspa' allo'nepa'chña atonetnomaña ñeñt atto same'ñena. E'ñe same'ñeño'tpa' huomenquëpa'chña sepa'yenom seyo'cher. Atterepa'chña allo'na sesen ñeñt atet yechatyenes. Ñaña chocmuepa'chña separasyoso'chña Yompor.

E'ñe yame'ñeño't Cristopa' o'ch yesuanomña atet muenatyese't yechets

⁸ Señota'tach allochña sapa' amach esesha' seshquërraye. Ñato'rraña po'poñ cotapñatso'tpa' chate' shequërrset. Ñeñt cotapñatserpa' e'ñe orrena tarro'mar ñeñtpa' atta shequënsset. Ñeñtpa' arromñaña a'mtene'ña poctapña ñeñt atto shecare'tyenet. Ñeñtpa' patso'marnesha, ñeñtña' ama poctenanoña Cristo poctapña.

⁹ Tarro'mar Cristo atto acheñetos ñepa'tña chorrenayaña allohuen Yompor po'partsoña. ¹⁰ Sapa' e'ñe separrocmateño't Cristo sa'ñaña chorrappretenayaña Parets. Ñeñt allohuen allpon amcha'taretetyestsas, Cristoña' e'ñe ñapña atarr sherben. Ñaña allohuen ñeñt allsensaretetyestsas, ñaña' e'ñe ñapña atarr sherben. ¹¹ Sapa' e'ñe separrocmateño't Cristo te'pa' sesuanom atet muenatyese't sa sechets. Ñeñtpa' ama añoteye' hueno o'ch setsorratannena e'ñe sañeña sechets ñeñt atet yechena judionesha'. Ñeñtpa' Cristesho'tña huena e'ñe seyemteño't ña. Ñeñto'marña e'ñe separrocmateño't Cristopa' te'ña sapa' o' seyomporena'tarterra e'ñe po'ño'ch. ¹² Tarro'mar allempo

sapataretta Yomporecop sapa' añ setma'ntena ñerra'mrrate' cho sepampapreteña Cristo. Elloña e'ñe sa same'ñeñoŕpa' attoña o' setantapreteraña Cristo. Tarro'mar sapa' añ same'ñate' atto Yomporpa' orrtatan po'partsoteña allo tantaterran Puechemer allempo rroma. ¹³ Ahuat sapa' so'chñarotña ama es soctape'chperra' seyoçhro ama't e'ñe mamesha ñeñt cohuentetsa Yomporecop. E'ñe atet sepe't ñerra'm po'poñ acheñ ñeñt ama Yomporena'tareyaye. Ñeñto'marña sapa' cha sottet ñerra'mrrate' secamquëñpa' cha rromuen. Tarraña te'ña Yomporpa' o' apuerres attoch sapa'cho'ña corretsasach e'ñe atet pena Cristo, tarro'mar ñapa' o' peretna'huernnas allohuen so'chñar. ¹⁴ Tarro'mar ñapa' o' e'ñe e'shohuerrnay ñoñets ñeñt o' quella'huetañ alloch yotteñe'charetterrañ ya, atet oten ñoñets ñeñt atet anaret ahuatoteñ. Ñeñt ñoñets Paretsñapa' alla a'huañatañperrey atet ñerra'mrrate' ñeñt apatarettetsa corsocho. ¹⁵ Ñeñtña añcha'noçhetyetsa añe patsro ama't ñaña ñeñt huomenc entyetsapa' Cristoñapa' e'ñe puerratanñpesuerranet allo añcha'noçhetyenet. Atto rroma corsocho allotña e'ñe a'mtsoññetueranet. Allempoñapa' orrtatanet allohuenet acheñeneshesho attoch ñetpa' eñoçhet ñeñt'pa' o' aprrataretterra po'huamenc.

¹⁶ Ñato't same'ñeña'ña ama't erra'tsena acheñer ñeñt'cha' sote' sa amo' pocteyaye ñeñt atto es serra'yen ama't ñaña atto es sorryen. Ñaña amach same'ñatsche ñeñt'cha' sotene' sapa' amo' setsotenoña añ yetñatser ñeñt allpon ana'yese' judioneshacop, ama't allempoch çherrerr pate'tets char, ama't ñaña allempoch e'ñe errte' orrterrtsa pueña'tets arorr. Ñaña amach same'ñatsche ñeñt'cha' sotene' sapa' año' setsotenoña ñeñt yetñatser ñeñt anaret allempocma yamesen. ¹⁷ Ñeñt'pa' pa'choyeshe'maca'ye peñña ñeñt huapatsa. Ñeñt huapatsapa' po'ñoçhpa' ñeñt'ca'yeña Cristo ñeñt atarr sherbets. ¹⁸ Ñaña amach same'ñatsche ñeñt'cha' soterre' sapa' año'ch saguërroña attoch coshaterres Yompor tarro'mar sapa' año' atteye' sepeno ñeñt atet penet ñet. Ñeñt acheñer atet, ñetpa' añña cotape'chyenet o'ch muerochtatenet e'ñe ñañeñeta, tarraña ñetpa' pommo'cheñoña atet penet ñeñt po'ñoçhpa' ama es sherbeno Yomporecop. Ñeñto'marca'yeña ñetpa' añaca'ye ma'yochyenet Yompor po'millañoñeñer. Ñaña ñetpa' añña nanac yemtenet ñeñt entpesa'tyenetañ. Poctapñotet ñeñt e'ñe ñeta po'chtsofet huena, ñetpa' ñeñt'ca' atarr ommo'chenet, ñeñto'marña ñeñt'pa' e'ñe orrena atet penet. ¹⁹ Ñetpa' ama parrocmateñeto Cristo ñeñto'marña ama pueyoçhreye' peñetoña Cristo. Ñehua, yapa' yoten yeyoçher* ñeñtña atarr sherbets tarro'mar ñeñt atarrtatene'ña ora yechets. Atet pena yelloquëm ñaña yechtsoreçh ñeñtña orrene'ña yechets ñeñto'marña e'ñe parrocmateñ attoña ora yechetspa' atarrtena. Atet penaña Cristo atet ñerra'm po'ñoçh ñeñt yeyoçher yepen. Allohueney ñeñtey ame'ña'yenaya Cristo e'ñe parrocmatateney, allochña yapa' allo'nach yesen orrtatyesnomue' ñeñt atarr sherbets Yomporecop tarro'mar yapa' atet muenateney Yompor.

²⁰ Sa atto o' serromapretera Cristo ñeñto'marña añ cotapñatser arr patsro ñeñt arromñañenesha poctapña, ñeñt'pa' amaca'ye socpayaye. Sa atto o' serromapretera Cristo ñeñt'pa' añecop attoch sequeçhpuerrñañ arromñañenesha' poctapña. Te'ñapa' eso'mare'tcha'ña alla same'ñerrerrña patso'mar cotapñats. Ñato'tña same'ñeña'ña ñerra'm esempo otenset: ²¹ "Amach es sa'pllatsetyesatsto, amach es serratse'tyesatsto, amach es sechta'yeseatsto." Tarraña ñeñt'pa' e'ñech orrena atet otenset, ²² tarro'mar ñeñt allohuen ñeñt añe patsro'tsen ñeñt'pa' e'ñeca'ye e'nuapo'. Ñerra'm ye'nuepa' o'ch e'ñe huañ. Ñeñto'marña ñeñt'cha' atet sotese' ñeñt'pa' arromñañaca'ye poctapña yeçhatenset. ²³ Ñetpa' po'ñoçhpa' orrtenetañ atet ñerra'm esocmañen eñotuenetañ ñeñt cohuentetsañ tarro'mar puema'yochreñoçetpa' muechatse'tyenet, ñaña ñetpa' e'ñe ñañeñeta mue-

* 2:19 O'ch secue' nota 1.18.

rochtatetset po'chets, tarraña e'ñe pommo'cheñoteta atet penet. Tarraña ñeñt atet penet ñeñtpa' amaña añeye'ña atet peneto alloch huenaterret ñeñt atet muenatse'tatyenanet po'chets pa'namen sosya'tsañechno.

3

Añach soctape'chen ñeñt atet muenen Cristo ñeñt pue'ntaño'tsen

¹ Atto po'ñoch o' setantapretera Cristo, te'ñapa' añach soctape'chen ñeñt atet muenen Cristo ñeñt pue'ntaño'tsen. Ñapa' allña atarr partsoten e'ñe Parets po'cohuenrot. ² Ento'marecopcha'ña sema'yoçhra. Sapa' amachña aña sema'yoçhratsto ñeñt patso'marecpa ³ tarro'mar sapa' o'huañcha' socshenaña ñeñt patso'marecpa. Te'ña sapa' e'ñe ates ñerra'mrrate' puesheñarr ñeñt rromuets o'huañcha' allo'na cosha'nenana ñeñt patso'marecpa. (Ñeñto'marña yapa' yoten o' yerromapretera Cristo.) Te'ñapa' ñeñtña yocshatene' ñeñt ora allpon atarr cohuen enten Cristo. Te'pa' atto yocrrerra ello e'ñe yeparrocmateñot Cristo ñeñt parrocmatene' Pomporets, ya'naña o' yeparrocmaterr epay Parets ama't ñeñtpa' ama entpahuoyaye. ⁴ Ñeñto'marña ñerra'm esempoch orrterra Cristo ñeñt allo e'ñe yocrrena, allempoña sapa'cho'ña sorrterrach saña epas Cristo. Attochña sapa' o'ch secohuentapretera saña.

O'ch yesuanom ñeñt mellashañ cotapñats ñeñt ama pocteye' enteno Yompor

⁵ Ñeñto'marña socoppa' añ poctetsa: Ama't erra'tsena sechets ñeñt soctape'chatene' patso'marpa' çhosaña a'mchechatterre', ñeñt atto sechta'yeñ ñeñt ama setaporeyaye, ñaña pa'namen sosya'tsañechno ñeñt atet muenatse'tatyeney yechets, ñaña allpon yemnatse'tyen ñeñtpa' ama cohuenaye' entapretenye Yompor, ñaña atto es atarr yeye'chapretanna'tyena, ñeñtpa' ñeñtña yeyomporer yepen. ⁶ Ñeñto'marña Yomporpa' entaterranetcha' po'yoroçhenña ama't allohuen ñeñt atpare'tene'. ⁷ Sapa'cho'ña ahuatpa' e'ñe attecma soctape'chyese't allempo sapa' sosya'tsañeçpa socre't. ⁸ Tarraña te'ña ñeñtpa' çhosaña a'ypo'ñañperre', ama't ora allohuen e'moñe'tanna'teñets, atsrre'mueñets, o'patarñats, achmare'tanna'teñets, ama't allohuen eñosatse'teñtsoçhno ñeñt atarr sosya'tsañechno. ⁹ Ñaña amach seshcare'tanna'tatsto tarro'mar te'pa' o' sesuanemñ ñeñt mellashañ ñeñt atet soctape'chatyesaye't seyoçhro. Ñeñt atet sepa'yese't ahuat ñeñt ama pocteye' enteno Yompor ñeñtpa'cho'ña o' sesuanemñ. ¹⁰ Sapa' añaña sechorrerraya ñeñt etserra ñeñtcha'ña soctape'chatterre' ello etserra allochña setserrataterrña soctapña. Attoña e'ñe setserrateñotpa' o'ch soctape'cherr e'ñe cohuen ñeñt atet cotape'chen Yompor ñeñt seyeçhcate'. Attochña sapa' allo'nach sesen eñotnene' ñeñt atet cotape'chen ña. ¹¹ Atto yetserrataterr yocapña Cristocop, yaña allohueneypa' e'ñeçca'ye attecma puechemer pohueneyña Yompor. Ñeñto'marña yocoppa' ama eñalleña attoch yotaretta yapa' po'poño' acheñrey, yapa' ellopa'tetstatareyeyo' año' judioneshayayye, año' atsorrareteyayye, ñaña po'poño' acheñrey ñeñt ahuapña po'poñ anetsoñ ñaña ñeñteyo' yapa' año' es yeñoteno ñaña ñeñt acheñrey ñeñteyo' ataruasatarey e'ñe atta ñaña ñeñt acheñrey e'ñe cohueno'tseney, tarro'mar Cristopa' ñeñtca'yeña e'ñe allohuenacpay, ñapa' ña e'ñe yechorra'huenaya allohueney pa'namen acheñrey ñeñt parrocmatenaya.

¹² Yomporña puemorrenteñotes sapa' o' acrerres ñeñtescha' a'cohuentatarettertsa Partsocop. Atto acrerrespa' e'ñepa'chña seyçhen attoch e'ñe cohuen semuerannena, e'ñepa'chña cohuen es sorrattyen po'potantañecop. Sapa' e'ñepa'chña pocte' señch ñerra'm po'psheñeñ o'ch entenes sapa' ama esoshe'mayayso. Ñaña sapa' amachña aña se'natsto ñeñt e'ñe socpa ñeñt atet soctape'chen sa tarro'mar sapa' ñeñtes alleshoncatets. Ñeñto'marña sapa' e'ñepa'chña sa'huanta'huanomña ñeñt atarr echarrare' sentyen.

13 Ñaña e'ñepa'chña cohuen es sa'huantannena ñerra'm esempoch señch po'psheñeñ ñeñt ama pocteye' orrtateno socop, sapa' e'ñechña cohuen sepretnannena. Atto Yepartseshar Cristopa' o' peretna'huerres sa, sapa'cho'ña chocmachña sepretnannena samña. 14 Ñeñt atarr nanac sherbets o'ch seyçherr attoch semorrentannena e'ñe cohuen. Tarro'mar ñerra'm po'ñoçh yemorrentannenapa' amate' erroteno't ya'ypo'ñerroña po'poñeçhno ñeñt cohuenteyetsa ñeñt atet ye'pa'yen. Attochña allo'nachña yesen et-sotnomue'ña parrocmateñets. 15 Atto Yompor o' e'ñe coshaterres seyoçhro, ñeñtcha'ña soctape'chaterre'ña e'ñe cohuen, tarro'mar ñeñtecopña o' chore'terreyña Yompor attoch e'ñe yeparrocmatuerr allohueney ñeñtey ame'ñenaya. Ñaña o'ch notas: Sapa' chocmuepa'chña separasyoso'teñ Yompor.

16 Cristo po'ñoñpa' chocmuepa'chña e'ñe cohuen soctape'cheñ sa seyoçhro, attochña e'ñe ora señoñehuenpa' chocmuepa'ch seyçhatannena attoch e'ñe cohuen socshatan-nena. Ñaña separasyoso'teño'tpa' semorreche'pa'ch allohuen morreñtsoçhno ñeñt Part-socop attoch sa'ye'choçhtatoñ atto saçhoteñ. Socsheñeshohuenña seyoçhropa' separasyoso'che'pa'ch Yompor. 17 Ama't esa ñeñt atet es se'pa'yen ama't esa ñeñt atet seño'syen, e'ñechña seyemteño't Yepartseshar Jesús attochña sapa' es se'pa'yes. Ñeñto'marña sapa' chocmuepa'ch separasyoso'teñ Yompor Parets e'ñe Yepartseshar Jesucristo pa'so'chño.

Atetcha' yocrra añecop ñeñt parro yepaclo'tsa'yen

18 Te'pa' o'ch notas samña ñeñtes arrollaretes: Ñeñt serrollar sepenpa' e'ñech cohuen same'ñeña tarro'mar atet poctetsa yocop allohuenacpay ñeñtey ame'ñenaya Yepart-seshar Jesucristo. 19 Ñaña sa ñeñtes ataporetespa' o'ch notas samña: E'ñech cohuen semuerya setapor, amachña çha muene' erro'tuanen sepeñeña setapor. 20 Ñaña sa cheshaneshacha' o'ch notas samña: Chocmach same'ñya sompor ñaña sachor amachña çha sa'tpare'tatsto. Ñerra'm atetcha' se'papa' e'ñech cohuen coshensa ama't Yompor Parets. 21 Ñaña o'ch notas samña ñeñtes achemereshatneshas: Amachña çha sa'tsrre'mare'tatatscheña sechemerasha', te't çha nanac sellcatyenanet. E'ñe puellquëño'tetpa' çhach atarr quellañtsotyaset, amach e'ñe cohuenaye' ame'ñenseto. 22 Ñaña sapa' o'ch notas samña ñeñtes ataruasataretes e'ñe atta: Chocmachña e'ñe cohuen same'ñyaña ñeñt samo'mte' sepen añe patsro. Amachña puecuampeño'tesaña sema'yoreñ setaruasatsto, ñeñtpa' añecpaña atet sepena attoch e'ñe cohuen entenes samo'mte'. E'ñechña sema'yorñecma seyoçhrocmañen e'ñech cohuen setaruasen. E'ñechña sem'cha'na'teño't Yompor setaruasen e'ñe cohuen. 23 Ama't erra'tsena ñeñt setaruas se'pa'yen e'ñechña seyoçhrocmañen e'ñe cohuen setaruasen. Tarro'mar ama't acheñecpa setaruasenpa' e'ñechña atet sepena ñerra'mrrate' Yamo'mtayecop Jesucristo-cop setaruasen. 24 Sapa' e'ñe seño'teñ ñapa' añ o'patatensa ñeñtcha' atarr socshaterre' tarro'mar sapa' po'ñoçh añ sesherben Cristo ñeñt e'ñe po'ñoçh Yamo'mte' yepen. 25 Tarraña allohuen ñeñt atet pa'yene' ñeñt ama pocteye' enteno Yompor, ñetñapa' atsa'tataretterretcha' ñeñt allpon pa'yesaye't ñeñt ama pocteyaye. Ñeñto'marña ama't pueheñarro'teta ñocpuetpa' amach eñalleña attoch pocte' enterranet Yompor.

4

1 Ñaña sapa' o'ch notas samña ñeñtes pamo'mte' pen ñeñt setaruasaten. Sapa' atetcha' sepe'ña sa'taruasañer ñeñt e'ñe pocte' entenet ñet. Ñaña sapa' seño'che'pa'ch sapa'cho'ña sechenca'yeña Samo'mte' ñeñt pue'ntaño'tsen.

2 Ñaña te' allohuenespa' o'ch notas samña: Chocmuepa'chña sema'yoçhrenaña ma'yochatsa, amach seçllaño'ta sema'yocheñoña Yompor. E'ñechña separasyoso'teñesha' sema'yocheña. 3 Ñaña o'ch sema'yocheña Yompor yocop, o'ch senamonay attoch eñalleta allcha' yeserrpare'toñ po'ñoñ, allcha' e'ñe ya'potua ñeñt ahua'toteñ ñeñt ama't

puesheñarrapa' ama eseshaye' eñotenaye ñeñt atet penaña Cristo. Ñeñto'marña na te'pa' ayottam̄psareten cárcelo. ⁴ Ñaña añcha' senamon Yompor allochña napa' o'ch e'ñe neñotaterranet e'ñe eñotochen ñeñt atet poctetsa nocop o'ch e'ñe na'potuer allohuen.

⁵ Ñaña añecop ñeñt ama ame'ñetso sapa' seño'tepa'chña ñeñt cohuentetsa ñeñtcha' atet sepanet. Ama't taya sapa' arosña atta es puechatstatsa. ⁶ E'ñe semuereño'tpa' chocmuepa'chña e'ñe cohuen se'ñorana'tyenanet, allochña ñetpa' e'ñech cohuen entonaset ñeñt atet señen. Allochña sapa' seño'chcha' eñorana'tyesahuet attoch e'ñe cohuen sanapyesamet e'ñe puesheña'ttso'cmet.

Arrpa' all so'terranet po'cartot

⁷ Ñaña te'pa' o'ch notas, masheñ Tíquico ñach seño'tatenaya' allohuen ñeñt atet nepena na arr. Ñapa' atarr yemuerannena, ñapa' chocma e'ñe cohuen yenpuenen atto yetorrena Yepartsesharecop. ⁸ Ñeñto'marña napa' ñeñtecopña nemñeñña sesho ñach seño'tatenaya' ñeñt atet yepena ya arr. Ñaña ñach socshatose' e'ñe seyo'chrohuen. ⁹ O'ch nemñe epuet masheñ Onésimo. Ñapa'cho'ña chocma atarr cohuen yenpuenen, nanac yemuerannena. Ñapa' e'ñe parro'marneshas. Ñetcha'ña seño'tatose'ña allohuen ñeñt atet yepena ya arr.

¹⁰ Ñaña masheñ Aristarcopa'cho'ña mueneñ o'ch huom̄cha'tas añ necartot. Ñapa'cho'ña e'ñe parro'cma ayottam̄psaretey. Allo'tpa' o'ch huom̄cha'tas ñaña masheñ Marcos ñeñtara añ paterr necartot. Ñapa' Bernabé puepa'ñer. Napa' o' notuas atetcha' sepe' masheñ Marcos. Ñerra'm esempoch chap seshopa' e'ñech cohuen sagañ. ¹¹ Ñaña masheñ Jesús ñeñtara sochetsa Justo, ñapa'cho'ña mueneñ o'ch huom̄cha'tas añ necartot. Ñetpa' ñeñtet ñapueñ judioneshet ñeñt ame'ñetsa, ñetña netorrapretenet Yomporecop attoch atarr ayochreshattena ña. Ñetña atarr nocshatene'. ¹² Ñaña masheñ Epafras ñeñt parro'marneshas, ñapa'cho'ña mueneñ o'ch huom̄cha'tas ñaña. Ñapa'cho'ña nanac torrena Cristocop. E'ñe puema'yocheño't huomencpa' atarr torrena socop. Puema'yocheño'tpa' chocma enamatennas Yomporeshot attoch e'ñe huomenc sepa'nom seyo'cher Yomporecop. Ñaña añ enamuenas attoch e'ñech poctacma chaponasa seyo'chro ora allohuen ñeñt atet muenen Yompor. ¹³ Ñocoppa' o' e'ñe neñotatuas ñeñt atet nanac torrena socop ñaña añecop ñeñt Laodiceo'tsa'yen, ñaña ñeñt Hierápoliso'tsa'yen. ¹⁴ Ñaña masheñ Lucas ñeñt apartañtetsa, nanac yemuerannena, ñapa'cho'ña mueneñ o'ch huom̄cha'tas añ necartot. Masheñ Demaspa'cho'ña mueneñ o'ch huom̄cha'tas ñaña.

¹⁵ Te'ña sapa' o'ch sehuom̄cha'ch saña nocop masheñneshachno ñaña nochaneshachno ñeñt Laodiceo'tsa'yen. O'ch sehuom̄cha'ch ñaña Ninfas, sehuom̄cha'ch ñaña allohuen ñeñt chocma ap'chetsa ña pa'paclo e'ñe pame'ñeño'tet Cristo. ¹⁶ Esemppoch lleya'huet añ carta sesho allo'tpa' o'ch selleyach ñaña laodiceo'marnesha' ñeñt pame'ñeño'tet Cristopa' chocma ap'chenet ñamet. Ñaña po'poñ necarta ñeñt nemñen Laodiceo sapa'cho'ña selleye'ch ñerra'm esempoch huapateret Laodiceot o'ch cherr sesho. ¹⁷ Ñaña o'ch soch masheñ Arquipo ñeñt atet noten na, po'ño'chpa' etsotanepa'ña ñeñt atet yecheña Yepartseshar ñeñtcha' po'taruas pa' ñocop.

¹⁸ Na ñeñten Pablon arrpa' nequellquëño't e'ñe na noto'tpa' o'ch nehuom̄cha'tnerres. Te'pa' o'ch seyerpa'na napa' ayottam̄psareten. Te'pa' ñeñtach notas, Yomporepa'chña sa'nataya. Ñeñt'pa' attetepa'ch Nompore. Allohua.

Pablo

AÑ ÑANOM SAN PABLO PO' CARTA ÑEÑT̃ QUELLCAN TESALÓNICO' MARNESHA' 1 TESALONICENSES

Atto Pablopa' quellcan carta añecop ñeñt̃ ame'ñetsa anetso Tesalónico epuet Silvano ñaña Timoteo

¹ Masheñeshacha' ñaña nochaneshacha' ñeñtes allohuenes apchetsa all anetso Tesalónico e'ñe seyemteñoñ Yompor Parets epuet ñaña Puechemer Jesucristo ñeñt̃ Yepartseshar yepen. Na Pablon sequellquëne'ña añ carta epan masheñ Silvano ñaña masheñ Timoteo. E'ñe nehuom̃cha'teñoñes sa napa' o'ch notas: Yomporepa'ch sebensare'tam̃pene' ñeñt̃ara Parets epuet Puechemer Jesucristo ñeñt̃ Yepartseshar yepen. Ñetepa'chña socshatene' e'ñe sa seyoçhro allohuenes.

Atto ame'ñena ñeñt̃ apchetsa Tesalónico

² Yapa' yema'yoçham̃peñoñes sa çhocma yeparasyoso'teñ Yompor socop allohuenacpas. ³ Tarro'mar allempo yema'yocheña Yompor çhocma yeyerpuensa atto sapa' e'ñe seyemteñoñ Yompor atarr se'torra'yena ñocop ñaña e'ñe semorrentanna'teñoñpa' atarr seyenpannena. Ñaña e'ñe seyemteñoñ Yepartseshar Jesucristo sapa' o' huomenc sepa'nom seyoçher e'ñe ñocop. ⁴ Masheñeshacha' ñaña nochaneshacha' Yomporpa' atarr morrentensa. E'ñe yeñoteñ Yomporpa' ahuatoteñ acrerres sa ñeñtescha' ame'ñerraya. ⁵ Tarro'mar añ cohuen ñoñets ñeñt̃ yeserrpare'tatoses ahuaña, ñeñt̃pa' ama ñoñtsenochayayo, yapa' añña ahuamencat yepene' Parets Puecamquëñ allochñapa' atto sapa' o' çhaponasa seyoçhro ñeñt̃ ñoñetspa' e'ñepa't po'ñoçh ñeñt̃pa' ama shequëñtsoyaye. Sapa' e'ñe señoñteney ñeñt̃ atet e'ñe cohuen yorrtatyesonas allempo allo'tseney sesho.

⁶ E'ñe atet sentey ya ñeñt̃ atet yepena, sapa'cho'ña te'pa' e'ñech atet sepena sam̃a, ñaña e'ñe atet cohuen orrtatyen Yepartseshar Jesucristo sapa'cho'ña te'pa' ñeñt̃ara sorrtatyen sam̃a. Atto sagapoñ Yompor po'ñoñ e'ñe socsheñesha' Paretsña Puecamquëñ socshate'ña e'ñe sa seyoçhro. E'ñe same'ñeñoñ ama't atarr sa'mueroçhtatare'tetyena tarraña sapa' çhocma atarr socshena. ⁷ Ñeñto'marña allohuen ñeñt̃ ame'ñetsa Macedonio'mar ñaña Acayo'mar, ñetñapa' atet eñotenset e'ñe cohuen sorrtatyen Yomporecop, ñetpa'cho'ña te'pa' e'ñe attecma orrtatyenet ñamet Yomporecop. ⁸ Te'ña e'ñe seshot o' epa'hua Yompor po'ñoñ all serrpare'tyeñet. Ama allayayo Macedonio ñaña Acayo, oraña o' e'ñe epa'hua erraparen allemeñ. Erraparen o' e'mare'tuaset sapa' atarr same'ñeña Yompor. Te'ña ñet o' e'mare'tuetpa' ñocpuetpa' ama pallteneto o'ch alla yoterraneterr ya ello. ⁹ Ñetñapa' serrpare'tyenyet atto sapa' e'ñe cohuen sagapapuey. Ñaña serrpare'tatanna'tyenet atto sapa' o' soctape'cherr ello cohuen Yomporecop o' sequeçhpa'huerr ñeñt̃ semchatse'tyese't ayeçhcataret. Te'ña ñeñt̃pa' o' sequeçhpa'huer e'ñe poctacma attotña allempo'teñ e'ñe cohuen sesherber Yompor ñeñt̃ ama arromñañeshayaye ñeñt̃ e'ñe po'ñoçh Yompor. ¹⁰ Ñaña serrpare'tyeñet atto sapa' e'ñe seyemteñoñ atarr secueññañ Yompor Puechemer esempohuañencha' huerra pue'ntañoñ ñeñt̃ara Puechemer ñeñt̃ tantaterr allempo rroma, ñeñt̃ara Jesús ñeñt̃cha' ya'queshpaterre' ñerra'm esempoch yoroçhtatuer Yompor.

2

Atet pa Pablo allempo Tesalónico'tsen

¹ O'ch masheñeshacha' ñaña nochaneshacha' notas: Saña po'ñoçhpa' e'ñe señoñteñ ahuañmo'cha e'ñe cohuen sagapapuey, ama orrena yemo'tenso. ² Ellonetpa' e'ñe

señoteñ ama't epaye' muerochtatyete't Filiposo, ama't errotuanen pa'yetañe't, tarraña Yomporña atarr ahuamencat pa'ye't atto yapa' e'ñe yeyemteñoñ ña yeserrpare'tatas samã añ cohuen ñoñets ñeñt huetsa Yomporeshot. Ama't allo'tsa'yen ñaña ñeñt nanac epatarñatetyetsa, yañapa' chocmaña yeserrpare'tatase't. ³ Ñeñtpa' ama pan-teñsofeye' yoctape'chataso, ñaña ama sosya'tsañeye' yoctape'chataso, ñaña ama e'ñe ya yeshquëñoñ yoctape'chataso. ⁴ Elloña ya Yomporpa' e'ñe pocte' enteney ñeñto'mar llesensa'y yach a'poterre' po'ñoñ ñeñt e'ñe po'ñoçh cohuen ñoñets alloch a'queshpaterrey. Ñeñt atet ye'ñorenapa' ama añecpayaye o'ch e'ñe orrena yocshach acheñenesha', yapa' añecopña ye'ñorena attoch yocshateñ Yompor ñeñt e'ñe yentuene' ñeñt atet yoctape'chyen yeyoçhro. ⁵ Ñeñto'marña sapa' señotheney ya ama't ahuatapa' ama e'ñe ya yeñoñoñ yocshatenso attoch e'ñe cohuen sentuene'y. Ñaña ama't ahuatapa' ama erra yeshquënso attoch sapa' o'ch sapuey ñeñt yemnapretenes. Ñeñtpa' ama't Yomporpa' e'ñe pocte' entapreteney ñeñt atet yepenes. ⁶ Ñaña ama't ahuata ama añeye' yellquëno attoch sapa' o'ch secohuentatennay ama't ñaña allohuen po'potantañeçhno. Ñaña yapa' ama't Cristo yellsensenayeñ ñeñto'marña yocoppa' e'ñe pocten o'ch atet yepennaseñ ñeñt atet pena añcha'taret, tarraña yapa' amaña yemno o'ch atet yepen-nasa. ⁷ Tarro'mar yapa' yemuereñoñes sapa' e'ñe cohuen es yorrtatyennas. E'ñe atet yentenes ñerra'mrrate' cheshatollesha' e'ñech cohuen muereña pachor. ⁸ Atarr nanac yemorrentensa ñeñto'marña ama e'ñe ñapta cohuen ñoñets yapuenso ñeñt Yompor po'ñoñ. Elloña yocoppa'cho'ña pocte' yenteñ o'ch yesuanom ñeñt e'ñe yocpa attoch yeyenpas samã tarro'mar sapa' atarr yemorrentensa. ⁹ Ñeñt atet yepena ya, amate' masheñneshacha' cha sepsenye atto nanac yetaruase't yeto e'ñe tsapome'tets allempo allo'tseney sesho. Ñeñtpa' añecop atarr yetaruase't allochñapa' attoch sa ama't puesheñarroñesapa' amach cha ya'tsrre'moçhtana'taso allempo yeserrpare'tatase't co-huen ñoñets ñeñt Yompor po'ñoñ.

¹⁰ Sapa' e'ñe sentye't, Yomporpa'cho'ña e'ñe enteney atto yapa' e'ñe cohuen yorrtatyenes socop ñeñtes ame'ñetsa all. Ñeñtpa' e'ñe cohuen yorrtatyen Partsocop ñeñt e'ñe pocte' enten ña allochñapa' attoch amach errotenoñ otenyeto "ama pocteyaye ñeñt atet sepena." ¹¹ Sapa' señotheney yapa' e'ñe atet yentenes ñerra'mrrate' e'ñe yechemerasha' yepohuenes. Ñeñto'marña e'ñe cohuen yoctape'chatase't e'ñe puesheña'ttsos. E'ñe cohuen yocshaterres, e'ñe cohuen yoctape'chatase't ¹² po'ñoçh sapa' e'ñepa'chña cohuen sorrtatyen ñeñt atet poctetsa añecop ñeñt po'ñoçh ame'ñenaya Yompor tarro'mar ñapa' o' hua'ñerres o'ch so'patapretera all añcha'tareñtena ña, attochña secohuentapretera samã.

¹³ Ñeñto'marña añecop chocma yeparasyoso'teñ Yompor ñaña atto sapa' allempo ye'mñotaterres Yompor po'ñoñ sañapa' e'ñe cohuen saguërrñañ po'ñoñ. Ama't ya seserrpare'tatosayeñ ama acheña po'ñoñ senteñe, ñeñtpa' Yomporoña po'ñoñ sentña allempo. Ñehua, ñeñtpa' e'ñe po'ñoçh Yompor po'ñoñ. Te'ña sa ñeñtes o' same'ñerra, Yomporña po'ñoñ o' cotape'chaterres e'ñe cohuen seyoçhro o' e'ñe huenaterres ñeñt atet chocma sepatse'tyese't ahuat; te'ña sapa' añ sorrtatyen ñeñt e'ñe cohuen enten Yompor. ¹⁴ Sapa'cho'ña masheñneshacha' e'ñe atet sa'muerochtatareñtena Yomporecop e'ñe atet pe't ñeñt ñanom apçhatsa Yomporecop ñeñt Judeo'tsa'yen. Ñetpa' e'ñe pueyemteñoñet Cristo Jesús, judionesha'ña ñeñt e'ñe pamo'ts penetpa' atarr muerochtatenanet. Sapa'cho'ña e'ñe seyemteñoñ Cristo atarr muerochtatenes samã samo'tsesha'. ¹⁵ Ñeñfara judionesha' ñeñt muetse' Yepartseshar Jesús ñaña ñet muetsanatete't ñeñt a'mña'yese't ahuat Yompor po'ñoñ. Ama't te' yapa'cho'ña pue'moñe'teñoñetay o' cotare'terryeterr yaña. Ñeñto'marña Yomporpa' ama't e'ñe mameshapa' ama cohuenaye' entenaneto tarro'mar ñetpa' añe'na e'moñe'tenet allo-

huen pa'namen acheñenesha'. ¹⁶ Ñetpa' atarr epatare'tenyet attoch yeserrpare'tach po'poñ acheñ ñeñt ama judioneshayaye attoch ñetpa'cho'ña o'ch a'queshpatare'tterret. Attoña ñetpa' atarr nanac yorenet po'chñaret. Tarraña te'ña Yomporpa' o' entatuer-rmochanet po'yorochenña.

Secherra Pablo o'ch abcherraneta'

¹⁷⁻¹⁸ Ñaña o'ch masheñneshacha' ñaña no'chaneshacha' notas: Yaña po'ño'ch allempo cha'nmataterryet seshot allempoteñña ama't esempapa' ama yabchanna'terro e'ñe teme'ttsen. Chemerrña te' yapa' o' e'ñe yaptamerra. Tarraña ama't ama allame'ttsa yabchannenopa' yeyochroñapa' e'ñe parrocmatetsey. Yapa' chocma yesechenañ o'ch yabcherrsa' ama't napa' allponoche'tats nesechenañ. Tarraña oneñeñña' chocma epatare'teney. ¹⁹⁻²⁰ Tarro'mar sapa' saña ñeñtes atarr yocshatene'. Ama't allempoch huerra Yepartseshar Jesucristo sapa' saña ñeñtescha' atarr yeyemterra, ñeñtescha' atarr yocshaterre' allempo, tarro'mar sapa' ñeñtescha' yapataterre' ñeñtcha' atarr yocshatene'ña ya allempo.

3

¹ Allempoña na o'huañ na'huanta' ñeñt atto nellquënsa ñato' erroteno'tseneste', ñeñto'marña napa' e'ñe pocte' neñch o'ch alla na'pa napuet Atenso ² attoch nemñonas masheñ Timoteo ñach semo'terraya', ñach seserrpare'tatose' attoch e'ñe huomenc sepa' seyo'cher ñeñt atto same'ñena. Ñach socshaterre' ello ñeñt atto same'ñena. Tarro'mar masheñ Timoteo ñapa'cho'ña atarr cohuen yetorrena parro Yomporcop. Atarr serrpare'tatyenanet cohuen ñoñets atto Cristopa' ña a'queshpatañtetsa. ³ Ñach soctape'chaterre' e'ñe cohuen Yomporcop allochñapa' ama't atto atarr amue-rochtataretes, amachña ñeñto'ta sepurratsterro ama't puesheñarrotesa. Ñehua, sapa' e'ñe seño'teñ chocmach huaponaya ñeñt amue-rochtatañ yenten. ⁴ Allempo e'ñe allo'tsa'yenacmay allohueny e'ñe parro allempo yapa' atet o' yotuas chocmach huaponaya muerochteñets. Ñeñtña te'pa' atetcho' o' pónasa, te'pa' e'ñete' seño'teñ e'ñe po'ño'ch atet. ⁵ Ñeñto'marña ahuaña allempo o'huañ na'huanta' ñeñt atto nellquënsa naña allempo nemñe masheñ Timoteo attoch neñotas sapa' erroteneste'ña sa, ñato' atterate' sesen ame'ñaya Yompor. Napa' nellquëño'tpa' atet noten ñato'rraña oneñeñt puetpateño'tes o'te' cha quechpaterres Yompor. Ñerra'm atet seperra napa' atet noten ñeñt atto netorrena e'ñe socoppa' ñato'rraña ñeñtpa' e'ñete' orrena.

⁶ Tarraña allempo huerra masheñ Timoteo seshot, ñapa' serrpare'tatuerrey cohuen ñoñets, sapa' attera e'ñe cohuen same'ñena, e'ñe cohuen attera semorrentannena. Ñaña serrpare'tatuerrey atto sapa' chocma seyerpuenya socsheñesha' ñaña atarr semneñ o'ch yabchannerra parro. Yapa'cho'ña e'ñe attecma atarr yemneñ yaña. ⁷ Ñeñto'marña masheñneshacha' ñaña no'chaneshacha' yapa' ama't allohuen es yehuenoya ñaña ama'tcha' atarr yemue-rochetuanena, te'ñapa' o' alla socshaterrey. Atto yeñoterres sapa' attera cohuen same'ñena ñeñtña atarr yocshaterre'. ⁸ Atto sapa' e'ñe cohuen huomenc sepen seyo'cher Yepartsesharecop, napa' ñeñtña e'ñe cohuen nocshatene' atto nocrrena arr patsro. ⁹ Ñeñto'marña atarr nanac yeparasyoso'teñ Yompor socop. E'ñe yeyochropa' chocma yocshensa Yomporesho ñeñto'marña chocma yeparasyoso'teñ Yompor socop. ¹⁰ Chocma yenamueñ Yompor yeto ama't ñaña tsapo attoch yabchannerra. Atarr yemneñ o'ch yoc'tape'chaterrsa' erra'tsente'ña sepalltena attoch same'ñera e'ñe poctacma.

¹¹ Yompor Parets ñaña Yepartseshar Jesús ñetepa'chña ye'chapaterre'ña sesho. ¹² Yepartsesharepa'chña atontaterre'ña semorrenteña allochñapa' allo'nach nanac

sesen morrentanna'ttsa e'ñe sagattsa attochña allo'nach sesen morrentenaya allohuen acheñenesha', e'ñe atet yepena ya sapa' nanac yemorrentensa. ¹³ E'ñe semorrentanna'teñoñ seyoçherñapa' e'ñech huomenc pennas Yepartseshar Cristo. Ñerra'm atetcha' sepa' allempopa' amach errotenoñ otteñe'chuerrsoña Yompor tarro'mar sapa' e'ñech cohuen es sorratyen Partsocop e'ñe tayoteñ. Attepa'chña entuerresña Yompor Parets ñerra'm allempoch huerra Yepartseshar Jesús. Esempto po'ñoçhpa' huerrach epuet allohuen ñeñt pueyochreshaçhno pen ñeñt e'ñe pocte' enten Parets.

4

Allo'nepa'chña cohuen yesen orrtatyensene' ñeñt atet e'ñe pocte' enten Yompor

¹ Te'ña masheñeshacha' ñaña noçhaneshacha' napa' o'ch notas, e'ñe yame'ñeñoñ Yepartseshar Jesús, sapa' allo'nepa'chña cohuen sesen orrtatyensene' ñeñt atet e'ñe pocte' enten Yompor ñeñt yeyçhatuas ahuañmo'çoteñ.

² Sapa' po'ñoçhpa' o' señoñter ñeñt atet yeyçhatuas e'ñe yame'ñeñoñ Yepartseshar Jesús attochña sapa'cho'ña o'ch sorratyen ñeñt cohuen enten ña. ³ Po'ñoçh ñeñtapa' Yomporña muene'ña atet, sapa' o'ch sa'cohuentataretterra ñocop attochña ama't puesheñarroñapa' amach sechtatscheña ñeñt ama setaporeyaye. ⁴ E'ñe puesheña'ttsospa' çhochña e'ñe señoçh attoch e'ñe cohuen seyore coyanesha' ñeñtcha' e'ñe ñapueñ setapor sepa'. Atetpa' e'ñech pocte' entapretenes Parets, ama't ñaña allohuen acheñenesha'. E'ñechña cohuen senteña setapor. ⁵ Amachña e'ñe añecpa seyoroña setapor attoch e'ñe socshaten sechets ñeñt atet pena po'potantañ acheñenesha' ñeñt ama eñotenaye Yompor. ⁶ Ama't puesheñarrotesapa' amach so'chña'tamñpsatscheña semo'nasheñ, amach sechtapretatsche puetapor. Allohuen ñeñt atet ye'pa'pa' çhocmach tsa'taterrya Yompor esempo. Ñeñtapa' ahuañmo'çoteñ e'ñe po'ñoçh o' yotuas. ⁷ Yomporpa' ama añecpaye' çhore'tenye o'ch aña atet ye'pa'yes ñeñt atarr sosey, añecopña çhore'teney o'ch e'ñe ya'cohuentataretterra ñocop. ⁸ Ñerra'm esesha'ch atpare'tene' ñeñt atet neyçhatenes ñetpa' ama acheñeye' po'ñoñ atpare'teneto, ñeñtapa' Yomporña po'ñoñ atpare'tenet ñeñtara Yompor ñeñt yapuene' Puecamquëñ ñeñtcha' ya'cohuentatene' e'ñe ñocop.

⁹ Atto semorrenteña allohuen masheñeshachnopa' te'ña sapa' ama sepallteno o'ch alla noterrser necartoñ, sapa' o' eñotaterres Yompor attoch semorrentannerra allohuenes. ¹⁰ Po'ñoçh e'ñe semorrentueña allohuen ñeñt ame'ña'yetsa allemeñ Macedonio. Tarraña ama't atet sepena'ña' ellopa' o'ch masheñeshacha' ñaña noçhaneshacha' alla noterrser: Allo'nepa'ch sesen morrentanna'tnomtsa e'ñe cohuen. ¹¹ Sapa' añcha'ña se'nen attoch e'ñe cohuen muechet seyçhena sa'netsro, amachña aña sorratatsetyeso attoch se'moñe'tannena. Ñaña o'ch alla noterrser e'ñe sa soto'pa' çhocmachña setaruasa'yes ñeñt atet o' notuas. ¹² Cohuencha' setaruasa'yes allochñapa' e'ñech cohuen entenes ama't ñeñt ama ame'ñetso. Ñaña sapa' añecopcha'ña setaruasa'yes attoch amach cha es sepallteno.

Attoch tantuerra ñeñt arromñañesha' allempoch huerra Jesús

¹³ Masheñeshacha' ñaña noçhaneshacha' yapa' yemneñ o'ch e'ñe señoñter erroteno'tsa'yente'ña ñeñt pame'ñeñoñ rromuets. Allochñapa' amach atta atarr sellquënaneto ñeñt atet pena po'potantañ, ñetpa' ama es yemteneto. ¹⁴ Yapa' atto yame'ñeña Jesús ña ama't rroma ellopa' alla tanterra, yame'ñeña ñaña Yomporpa' attecnoch tantatuerrey allohueney ñeñteycha' e'ñe yame'ñeñoñ Jesucristo yerroma.

¹⁵ Ñeño'marña te' sapa' o'ch neñotatas ñeñt atet eñotaterrey Yepartseshar Jesucristo, ñeñtapa' atet yeçhatey: Allohueney ñeñteycha' orameñ corretsa allempoch huerra ña ñeñteycha' ama rromhuetsa' allempo, ya'ñapa' amach yotamñpesyoña yanom ñeñt o' rromhua, añcha' ñanom oterrtsa ñeñt o' rromhua alloñtapa' yaña ñeñtey orameñ

corretsa, tarro'mar allempopa' atetcha' perra. ¹⁶ Partsesha'pa' ñachña eñerrets huomenc ñaña ñeñt pa'mcha'tareter pen allohuen mellañoñeñnesha' ñachña rrana'nerrtsa, e'ñech allempocma e'morrterra ñaña Yompor po'pctor. Attochña ñapa' sohua'nerra pue'ntañot. Ñeñña rromuets ñeñt ameña'nmaya Cristo ñetña allempopa' ñanmuetcha' tanrra'tuerret. ¹⁷ Alotñapa' yaña ñeñtey orameñ corretsa arr patsro a'tapatareteycha' yaña oso e'ñe parro epay ñeñt o' tanrra'tuena rromot attochña e'ñech parrocmayepoc-ter Yepartseshar eno. Attochña e'ñe allohueneypa' parro'tseneycha' epay Yepartseshar e'ñe allempoteñ errponañohuen. ¹⁸ Ñeñto'marña sapa' chocmach seyerpatannena añ cohuen ñoñets attoch e'ñe cohuen socshatannena.

5

¹ Te'ña masheñeshacha' ñaña nochaneshacha' socoppa' ama pallteno o'ch alla noterrser añ necartot e'ñech esempo etsoterra allempoch huerraña Yepartseshar. ² Tarro'mar sapa'cho'ña o' e'ñe señoter cherrcha' paterr yet allempoch huerra Yepartseshar Jesús. Allempopa' e'ñech machayota huerra e'ñe atet ñerra'm esempo huennaya eñet tsapo e'ñech machoyota huapa. ³ Allempo amach chena' ñeñt yete allempoch huerra Yepartseshar acheñenesha'ña arr patsro ñetñapa' atetcha' otyerret allempo: "Te'ña yapa' e'ñe cohuen muechet yeychena arr patsro. Yocoppa' ama't ahuatapa' amach eñalleteroña ñeñtcha' yeyore'tame'terre'." Tarraña e'ñech allorocma machayotach huerranet ñeñtcha' e'ñe a'cllatuerrahuet. Allempo ama't puesheñarrapa' amach eñalleña attoch yeterret. E'ñech atet cherranet ñerra'mrate' allempo atsotenana coyanesha' pue'mar amach eñalleña attoch yetañpsana atto atserpeñ pue'mar attoch amach atserrpe. ⁴ Tarraña saña po'ñoñ masheñeshacha' ñaña nochaneshacha' sapa' ama checmeto'tsenayayso ñeñt atet pena acheñenesha' ñeñt ama ame'ñetso. Sapa' e'ñe señoteñ ñeñto'marña ama'tcha' machayota huerra e'ñe atet machayota huennaya eñet, sañapa' amach cha seyorenatsto. ⁵ Tarro'mar sapa' e'ñe same'ñeñoñ Cristo e'ñe señoteññañ po'cohuenña ñeñto'marña napa' o'ch netma'ntatasa sapa' puetarenana'tarneshas ñaña yetena'tarneshas. Po'ñoñ yapa' ama tsapo'marneshayayye ñaña ama checmeto'marneshayayye tarro'mar yapa' ama aye' ye'p'eno ñeñt atet patse'tyen ñeñt ama ame'ñetso. ⁶ Ñeñto'marña o'ch notas: Yapa' amach cha ye'cllatsto Yomporecop, tarro'mar ñerra'm atet ye'papa' chach yottena ñerra'm cha yemuen Yomporecop atet pena po'potantañ ñeñt atta es puecha'yetsa. Yapa' amachña cha yemanrra'tatsto chochña e'ñe yeñotena attochña yeñose're'tyesuena. ⁷ Ñehua, yeñoteñ ñeñt manrretspa' tsapoch manrrenet ñaña ñeñt posa'tare'tyetspa' tsapoch posa'tare'tyenet. ⁸ Tarraña yapa' yeto'marneshay ñeñto'mar chocmuepa'ch e'ñe yeñoteñot yeñose're'tyesuena. E'ñe yame'ñeñoñ Yompor ñaña yemorrentanna'teñoñ ñeñña cohuanpene'ña yeyocher Yomporecop attoch amach aña yocape'chatsto ñeñt ama pocteye' enteno Yompor. Ñeñtpa' añ toma'ntena asrom atet ñerra'mrate' ñeñt chorrena solltar ñeñt a'natene' puesomap allempo quellarena attoch ama etaretteneto. Ñaña yapa' yeyemteñoñ Cristo te'ñapa' e'ñe a'queshpatarey ñeñtpa'cho'ña ñeñña yemoñenaya. Ñeñtpa' añ toma'ntena atet pena solltar o'ch na'nman asret poño attoch ama etto'taretteto. ⁹ Tarro'mar Yompor po'ñoñcha' ama aye' o'patatenyo attoch coñchatuerrey; yapa' añña o'patatenya attoch e'ñe cohuen a'queshpaturrey allohueny e'ñe yame'ñeñoña Yepartseshar Jesucristo ¹⁰ ñeñt rromats yocop, attochña ama'tcha' o' yoclla'huenañ allempoch huerra amapa' ñato' orameñ yocrenmeñ allempoch huerra atterayach yañapa' corretsayach epay ña e'ñe parro. ¹¹ Ñeñto'marña te'pa' notenes, sapa' chocmuepa'ch socshatannena Yomporecop. Chocmuepa'chña huomenc sepanna'ta seyocher Yomporecop e'ñech atet se'pa tayoteñ.

Pablopa' e'ñe cohuen cotape'chatyesanet

12 O'ch masheñneshacha' ñaña nochaneshacha' notas po'poñ, semcha'na'teñoŕpa' e'ñepa'ch cohuen semorrenteña allohuen ñeñŕ torra'yetsa Yomporecop sesho tarro'mar ñetpa' e'ñe Partsesheshoŕ anarettenet ñeñŕcha' añcha'tarettatsa socop, ñetcha'ña soctape'chatene'ña e'ñe cohuen. 13 Atto atarr torrenet Yomporecop sañapa' e'ñepa'chña cohuen sentenanet, atarrcha' semorrentenanet. Ñaña ama't allohuenes e'ñe sagattsapa' e'ñepa'chña cohuen sentannena attoch e'ñe cohuen seyçhena e'ñe señmañesha'.

14 Ñaña o'ch masheñneshacha' alla noterrser ñeñŕcha' atet sepa: Ñeñŕ atarr quellañtsotyets sesho sachña cotape'chaterrahuet cohuen attoch amach allo'na quellañtsoteneto. Ñaña ñeñŕ ama coshetso sachña e'ñe cohuen coshaterrahuet ñaña ñeñŕ ama huomencaye' penaye pueyoçher Yomporecop, sachña e'ñe cohuen coshatyer-rahuet attoch e'ñe huomenc perret ñamet pueyoçher Yomporecop. E'ñe allohuenet saña e'ñe semorrenteñoŕanet ñetpa' çhocmuepa'chña e'ñe cohuen sa'huantenanet.

15 Ñaña sapa' çhocmuepa'ch e'ñe cohuen señoŕtena allochñapa' ñerra'm po'psheñeñ erroŕ ponaspa' sapa' ama't e'ñe puesheñarroŕesa amach setsa'tatatsche ama't coñe'ta. Añcha'ña e'ñechña cohuen sepeñ samo'ts ama't ñaña allohuen po'potantañ acheñenesha'.

16 Ñaña sapa' çhocmuepa'ch e'ñe cohuen socshena. 17 Ñaña çhocmuepa'chña sema'yochena. 18 Ñaña ama't erroŕeno'tsensa çhocmuepa'ch separasyoso'teñ Yompor tarro'mar ñeñŕpa' atet muenen e'ñe yocop allohuenacpay ñeñŕey yemtenoya Puechemer ñeñŕ Cristo Jesús.

19 Ñaña amach satpare'tatsche ñeñŕ atet cotape'chatenes Parets Puecamquëñ e'ñe seyoçhro, tarro'mar ñerra'm atet seŕapa' çhate' sa'huañaterrñañ ñeñŕ atet eñotatyenes Yompor Puecamquëñoŕ. Ñeñŕpa' e'ñe atet ñerra'mrrate' o' semayerrñañ Yompor po'urare. 20 Ñaña amach atet sentatsche ñeñŕ atet eñoraten Parets Puecamquëñoŕ ñerra'm ama asherbenaye' senteñe. 21 Allohuen ama't erra'tsena çhochña ñanom señoçh ñato' e'ñeŕe' cohuen ñato'pa' amate' cohuenayaye. Ñeñŕ allohuen erra'tsencha' e'ñe cohuen sentyes ñeñŕñapa' amach sequeçhpatstere ama't ahuata. 22 Tarraña allohuen erra'tsencha' ama cohuenaye' sentyeso ñeñŕñapa' çhosaña a'ypo'ñerre'.

23 Yompor ñeñŕ e'ñe yocshatene' yeyoçhro, ñepa'chña e'ñe sa'cohuentaterre' e'ñe cohuen Partsocop. Chocmuepa'ch allo'na sesen e'ñe cohuen allochñapa' ñerra'm es-empoch huerra Yepartseshar Jesucristo, socoppa' amach eñalleña ama't coñe'ta attoch otteñe'chuerres ama't secamquëñoŕhuen, ama't seyoçhrohuen, ama't ñaña sechtsohuen. 24 Tarro'mar Yompor ñeñŕ o' çhore'teres ñapa' ña atarr ayemuetpotetsa, ñachña setso-tatue'ña e'ñe ora allohuen ñeñŕ e'ñe cohuentetsa ñocop.

Arrpa' all so'terranet po'cartoŕ

25 O'ch masheñneshacha' ñaña nochaneshacha' notas, çhocmach sema'yochañpesya yaña.

26 Ñaña te'pa' nemneñ o'ch nehuomçha'tas allohuenes ñeñŕes ame'ñetsa.*

27 Ñaña te'pa' o'ch notas, e'ñe yemçha'na'teñoŕ Yepartseshar Cristo añ cartapa' o'ch selleyach allohuen masheñneshachno ñaña nochaneshachno.

28 Yepartsesharepa'chña Jesucristo sa'natenaya e'ñe allohuenes. Ñeñŕach notas, ñeñŕpa' attetepa'ch Nompore. Allohua.

Pablo

* 5:26 Po'ñoçh oteney. "Choch setso'ttsa'pa'tannena ñerra'm esempo sehuomçha'tanna'tena ñeñŕ atet poctetsa Partsocop." Ñeñŕpa' atet yeçhete't ahuat.

AÑ PUEPAÑ SAN PABLO PO' CARTA ÑEÑŦ QUELLQUËRRANERR TESALÓNICO' MARNESHA' 2 TESALONICENSES

Atto Pablopa' quellquërranerr carta añecop ñeñŦ ame'ñetsa anetso Tesalónico epuet Silvano ñaña Timoteo

¹ Masheñeshacha' ñaña nochaneshacha' ñeñŦes allohuenes apçhetsa all anetso Tesalónico e'ñe seyemteñoŦ Yompor Parets epuet ñaña Puechemer Jesucristo ñeñŦ Yepartseshar yepen. Na Pablon o'ch alla nequellquërrnaserr po'poñ carta epan masheñ Silvano ñaña masheñ Timoteo. ² E'ñe nehuomŦcha'teñoŦes sa napa' o'ch notas: Yomporepa'chña sebensare'tamŦpene' ñeñŦara Parets epuet Puechemer Jesucristo ñeñŦ Yepartseshar yepen. Ñetepa'chña socshatene' e'ñe sa seyoçhro allohuenes.

Allempoch huerra Cristopa' a'coñchatareŦterrach allohuen ñeñŦ ama eñotaye'te Yompor

³ O'ch masheñeshacha' ñaña nochaneshacha' notas, e'ñe pocte' çhocmach yeparasyoso'teñ Yompor socop tarro'mar sapa' po'ñoçh allo'na sesen ame'ña'nmaya Yompor ñaña allohuenes e'ñe puesheña'ttsospa' allo'na sesen morrentanna'tyesnomtsa. ⁴ ÑeñŦo'marña yañapa' atarr yocshensa. E'ñe yocsheñoŦpa' atarr cohuen yeñosyen socop all allampaño'mar all apçha'yenet Yomporecop. Ñetpa' çhocma yeñotatyenanet atet sepena sa, ama't ñeñŦ se'moñe'tene' ñeñŦ çhocma soçtare'tene' atto mueroçhtatenset, tarraña sañapa' çhocma atarr sa'huantenanet e'ñe same'ñeñoŦ Yompor. ⁵ Ñehua, yapa' yeñoteñ Yomporpa' e'ñe pocte' es pa'yen. ÑeñŦo'marña yeñoteñ sapa' e'ñe same'ñeñoŦ ña, ñaña' e'ñeca'ye pocte' entenes allochñapa' attoch seçherr all añcha'tareŦtena ña, sapa' ñeñŦecopña atarr sa'mueroçhtatareŦtena te'.

⁶ Tarraña Yomporpa' e'ñe pocte' enteñ ñach tsa'taterraya mueroçhteñtso allohuen ñeñŦ semueroçhtatene' sa te'. ⁷ ÑeñŦ atto atarr semueroçhtena te' e'ñe ñocop, Yomporña' e'ñe pocte' enteñ socop, ñachña ello socshaterre'ña sa e'ñe atet atarr coshateney ya. Yapa' ñeñŦcha'ña atarr yocshaterre' ñerra'm esempoch orretuerra Yepartseshar Jesús allem-poch huerra pue'ntañoŦ. Ña po'ñoçhpa' orretuerrach epuet po'mllañoŦeñnaneshar ñeñŦ atarr ahuamencatesha' pa'yen. Ñapa' e'ñech po'yoroçhenñoŦ huerra atet ñerra'mrate' tso' huoretnets. ⁸ Allempoch huerrapa' coñchatuerrancha' allohuen ñeñŦ ama eñotaye'te Yompor ñeñŦ ama ame'ña'poye' entaye'te cohuen ñoñets ñeñŦ Yepartsesharecop Je-sucristo. ⁹ Ñetña' attoch a'coñchatareŦterretpa' chenca'huerretcha' errponañohuen. Attoch ñetpa' o'ch ellopa'tetstatareŦterret amach entereto Yepartseshar, amach en-terrñañeto po'cohuenña all nanac partsotena. ¹⁰ Ñapa' tarro'marcha' huerra attoch allohueney ñeñŦey pueyochresha' pen Parets, yañapa' yecohuentatapuerrñañcha'. Al-lohueney ñeñŦey ame'ñaye't atarrcha' yecuanrrortapuer. Sa'nachña cohuentatapuerre' tarro'mar sapa'çho'ña same'ñena cohuen ñoñets ñeñŦ yeñotatenes.

¹¹ ÑeñŦo'marña yapa' çhocma yema'yochamŦpensa allochñapa' attoch Yomporpa' e'ñe pocte' entenes atto ñapa' o' çhore'terres o'ch pueyochresha' perres saña. Ñaña yapa' añ yenamuenas Yompor e'ñepa'chña po'huamencoŦ etsotatonasña allohuen ñeñŦ atet soçtape'chyen cohuen ñocop ñaña ora ñeñŦ allpon setorra'yena e'ñe same'ñeñoŦ ña. ¹² Attochña sapa' e'ñech cohuen secohuentaterrñañ Yepartseshar Jesús, ñaña' cohuen-taterrescha' saña. ÑeñŦpa' e'ñe Yompor pemuereñoŦey ñaña Yepartseshar Jesucristo.

2

Allempoch orrterra puesheñarr acheñ ñeññ atarr atparñaãtetsa

¹ Te'pa' o'ch masheñneshacha' ñaña nochaneshacha' neñotatas po'poñ ñeññpa' añ allempoch huerra Yepartseshar Jesucristo attoch ñapa' o'ch apchatuerrey allohuene e'ñe ñesho. ² Te'pa' ñeñño'marña notenes: Ama't puesheñarrotesapa' ñato't cha yore'tensa'ña po'poñ coñapñats. Sapa' amach cha seyorenatsto ama'tcha' se'mare'ter o' cherr allempoch huerra Yepartseshar. Ama'tcha' otasetañ ñetpa' e'ño' Parets Puecamquëñ eñoratenahuet, sañapa' ñato'tña cha seyorena'. Ama'tcha' pueserrparñoñet atet otaset, sañapa' amach seyorenatsto. Ama'tcha' atet otasetañ te'pa' o' chap carta ñeññ mueñen Pablo ñeññpa' atet oten carta, te'pa' o' cherr allempoch huerra Yepartseshar, saña e'ñe seyorñoñpa' ñato'tña ñeññaña same'ñena'. ³ Ama't puesheñarrotesa sapa' amach se'mñotatstaneto ama't e'ñe errotencha' otyesaset, tarro'mar ñetpa' atetcha' shecare'tasetañ. Ñeñño'marña napa' o'ch notas, allempopa' amaca'ye cherra' ñeññeño ñeññe yetñatsroch huerra Yepartseshar, ato'tña atarr atonterra' ñeññcha' quechpuerre' Yompor. Ñaña allempopa' orrterrach puesheñarr acheñ ñeññ atarr atparñaãtetsa, ñeññpa' chenquëñtsa o'patenaya. Ñaña Yomporach atarr e'moñe'terr ñaña allohuen acheñenesha' ñeññ muechatse'tyene' pa'namen ñeññ po'yomporer pa'yenet ñachña e'ñe tanterrahuet. ⁴ Ñaña ñeññña atparñaãpa' e'ñe pommo'cheñoñpa' atetcha' oterran acheñenesha' ñapa' ño'ña e'ñe Yomporeretets. Attochña ama't Parets pa'paclopa' o'ch anorruerr, o'ch e'ñe atet perra ñerra'mrrate' ña po'ñoñch Yomporeretets.

⁵ Sapa' ama't seyerpuenoña allempo allo'tsenmeñen sesho na ama't ñeññpa' e'ñe notuase't. ⁶ Sapa' señoñe'ñe' ñeññ onare'tatene'ña ña atto' amo' huerro tarraña chocmach orrterra allempoch cherr e'ñe atet onañchareñ ñocop. ⁷ Ama't e'ñe tayoteñ atto atpare'tenet ñoñets ñeññ atet anaretpa' ñetña e'ñe a'nahuapa' chocma atet penet. Tarraña te'pa' eñall ñeññ onare'tatene' ñeññ acheñer ñeññcha' atarr atparñaãterrtsa, ñeññña' chocmach atet pena tarremphuach esempoch aprratamñsaretterra ñeññ onare'tatene'te'. ⁸ O'ch aprratamñsaretterrapa' ñeññña acheñer ñeññcha' atparñaãterrtsa allempochña orrtataretterra. Tarraña allempoch huerra Yepartseshar Jesús ñachña e'ñe puenamo' po'rreññoñpa' ñeññcha' muetserre'ña ñeññ atarr atparñaãtetsa. Attoch orrterra Jesús e'ñe ña po'partsoteñoñ ñeññcha'ña e'ñe a'mchechatterre'ña ñeññ atparñaãtetsa. ⁹ Ñehua, ñeññ acheñerpa' oneñe' atarr ahuamencat pene' attoch orrterra. Ñeñño'marña pa'namencha' orrtaterr ñeññ po'partsoña pen ña ñeññ ama't ahuata acheñenesha' arr patsropa' ama't puesheñarroñetapa' ama puentareto. Tarraña ñeññ po'partsoteña pen ñapa' ñeññpa' ama Yompor-eye' apuenaye, ñeññpa' oneñeña apuene' atto shecare'tyenan acheñenesha'. ¹⁰ Attoch e'ñe pa'namenot atarr shecare'tyerran acheñenesha' ñeññ ama't mameshapa' ama pocteyaye. Añcha' ashcare'tterrtsa allohuen ñeññ ama ame'ñetso ñeññ o'patena chenquëñets. Tarro'mar ñetpa' ahuatoteñ ama ame'ña'poye' enteññañetoña Yompor po'ñoñ ñeññ e'ñe po'ñoñch alloch a'queshpataretterretañ. ¹¹ Ñeñño'marña Yomporpa' muenaterranetcha' o'ch atarr ashcare'tterret, attochña ñetpa' e'ñech aña ame'ñerret shequëñets ñeññ ama po'ñoñchayaye ama't mamesha. ¹² Attochña allohuen ñeññ ama ame'ña'poye' entaye'te Yompor po'ñoñ ñeññ e'ñe po'ñoñch qeshpeñets, ñetpa' aña coshete't ñeññ ama pocteye' enteno Yompor, ñeñño'marña ñetpa' a'coñchataretterretcha' allempo.

Yapa' e'ñe ahuatoteñ acrerrey Yompor attoch a'queshpaterrey

¹³ Tarraña saña masheñneshacha' ñaña nochaneshacha', yapa' chocma yeparasyoso'teñ Yompor socop ñeññes atarr muerena Yepartseshar. Tarro'mar Yomporpa' ahuatoteñ acrerres sa attoch a'queshpaterres e'ñe cohuen. Ñeññpa' añcha' sa'queshpaterre' atto Parets Puecamquëñpa' e'ñe a'cohuentatenes ñocop atto sapa' e'ñe cohuen same'ñerrñaña

po'ñoñ ñeñ e'ñe po'ñoñ alloch yequeshperra. ¹⁴ Sapa' ñeñtecopña chore'terresña Yompor allempo yeserrpare'tatase't cohuen ñoñets alloch a'queshpaterrey Yompor. Attochña sapa'cho'ña secohuentapreterach Yepartseshar Jesucristo esempohuañen.

¹⁵ Ñeñto'marña o'ch masheñeshacha' ñaña nochaneshacha' noterrser: Sapa' e'ñepa'chña huomenc sepa'nom seyo'cher Yomporecop. Ñaña ora allpon ñeñ yeychatyesase't e'ñe ya yenamot yeserrpare'tatase't ama't ñaña yecartot ñeñña' e'ñepa'ch huomenc seyo'chre'cha. ¹⁶⁻¹⁷ Te'ñapa' o'ch notas: Yepartseshar Jesucristo ñaña Yompor Parets ñetepa'chña e'ñe cohuen socshatterre'ña sa seyo'chro, ñetepa'chña ahuaenca't sepa'yese' allochña'pa' attochña sapa' chocmach señosyen ñeñ e'ñe cohuen ñoñets ñaña e'ñechña cohuenare' es sorratyen. Tarro'mar Yomporpa' ñeñña atarr yemorrentenaya, ñapa' ña ñeñ chocma yocshatene' yeyo'chro. Ñeñña cosheñetspa' amach ahuañañat'erro ama't errponaña. Ña e'ñe puemuereno'pa' chocma eñotateney e'ñe cohuen ñeñ atarr yeyemtena.

3

Atto Pablopa' otanet chocmach ma'yochampeñet

¹ Masheñeshacha' ñaña nochaneshacha' te'ña e'ñe allohuapa' o'ch notas: Sapa' chocmach sema'yocham'pesya yaña. O'ch senamueñ Yompor attoch epa'huerra tecma Yepartseshar po'ñoñ erraparen, cohuenepa'ch entyeññañet po'ñoñ e'ñe atet atarr cohuen señch samã allempo chap sesho. ² Tarro'mar acheñenesha'pa' ama allohuenac'maye' ame'ñeneto, shonte' ñeñ atpare'tene' Yompor ñaña shonte' atsrre'mñañesha' ñeñ ama cohuenayaye. Ñeñto'marña sapa' añcha' senamueñ Yompor amuepa'chña cha epatare'tatsetyeto. ³ Tarraña Yepartsesharpa' ñachña atarr yeyemtena, ñachña ahua'menca't sepene', ñach secuam'pene', ñach sa'nataya, amach muenatano o'ch chaponasa ñeñ ama cohuenayaye. ⁴ Ñaña yapa' e'ñe yeyemteño' Yepartseshar sapa' e'ñe yeñotenes ñeñ atet yotenes sañapa' e'ñech atet sepena te' ama't ñaña tsapa'one't chocmachña atet sepena. ⁵ Yepartsesharepa'chña Jesús e'ñe cohuen señotatene'ña seyo'chro atto Yomporpa' atarr morrentensa, attochña e'ñech cohuen sa'huanta'huanom allohuen topateñets e'ñe atet pe't Cristo.

Yocoppa' añ poctetsa chocmach yetaruasen

⁶ Te'ñapa' masheñeshacha' o'ch notas e'ñe Ya'm'cha'tareter Jesucristo pa'so'chño, sapa' ñato't seyemteña'ña ñeñ atarr quellañets ñeñ amach mueno taruasa'. Ñeñ atet petsapa' ama mueno o'ch ame'ñañaña ñeñ atet yeychatenes. ⁷ Sapa' e'ñe seño'teñ añ poctetsa socop o'ch atet sepena samã e'ñe atet senteney ya. Yapa' allempo allo'tseney parro yapa' chocma yetaruasen. ⁸ Yapa' ama't erro'tena ama't pueheñarrapa' ama yerraprecheña puerrar e'ñe atta. Ñamche'ña yapa' chocma yetaruasen yeto e'ñe tsapome'tets atot yentña ya yerrar allempo allo'tseney sesho. Yapa' ama choye' ya'tsrre'mo'chtana'taso ama't pueheñarro'tesa. ⁹ Ama't e'ñe poctet' o'ch serratapyeñ e'ñe atta, tarraña yapa' ama yemno tarro'mar yapa'cho'ña yemneñ o'ch yetaruasos yaña allochña'pa' attoch yorrtatonas ñeñ e'ñe cohuentetsa socop allochña'pa' atet'cha' sepa samã. ¹⁰ Allempo allo'tseney seshopa' atet yotas, ñerra'm esesha'ch atarr quelletspa' arepa'ña rratstats, rranepa' po'çllañ. ¹¹ Yapa' ye'mare'tenes pueheña'ttsos sapa' seçllaño'pa' atta sel-lapene't, ama choye' setaruaseno ama't mamesha, añaña e'ñe setorra'yena sa ñeñ ama es sherbeno. ¹² Allohuenes ñeñtes atarr quellañsarerespa' te'pa' o'ch notas e'ñe Ya'm'cha'tareter Jesucristo pa'so'chño, sapa' choñaca'yena setaruasa'ña e'ñe cohuen señañesha' atot'cha' sechen allpon ñeñ sepallta'yena arr patsro.

¹³ Ñaña sa masheñeshacha' ñaña nochaneshacha', sapa' ñato'tña cha semuenme'chena'ña orrtatyese' cohuen ñeñ attecma sepa'yena. ¹⁴ Ñerra'm esesha'ch

ama e'ññotaye atet yotenes añ yecartot, ñeñña acheñerpa' o'ch se'ñotorrtach ñapa' chocma atet pena. Sañapa' ñato'tña seyemteña'ña ñeññ atet petsa, allochñapa' attotcha' penquerra. ¹⁵ Tarraña amach atet sentatsche ñerra'mrrate' cho se'moñe'teñ. Sapa' chochña e'ñe cohuen soctape'chater atet e'ñe cohuen yoctape'chateñ yemo'nasheñ.

Arrpa' all so'terranet po'cartot

¹⁶ Yepartseshar ñeññ e'ñe yocshatene' yeyochro ñepa'chña socshaterre' sa seyoçhro ama'tcha' erroteno'tsenes. Yepartsesharpa' e'ñepa'chña parro allo'tsenes allohuenes.

¹⁷ Na ñeññen Pablon arrpa' nequellquëñoñ e'ñe na nototpa' o'ch nehuomcha'tnerres. Sapa' ñeññcha'ña señotate' añmapa' e'ñe no necarta. Allohuen ñeññ e'ñe no necartapa' attecma nequellquëñ. ¹⁸ Yepartsesharepa'chña Jesucristo sa'natenaya e'ñe allohuenes. Ñeññach notas, ñeññpa' attetepa'ch Nompore. Allohua.

Pablo

AÑ ÑANOM SAN PABLO PO' CARTA ÑEÑT̃ QUELLCAN TIMOTEO 1 TIMOTEO

Atto Pablopá' quellcan carta Timoteocop

¹⁻² Masheñe Timoteo ñeñteḡ e'ñe yame'ñeñoḡ e'ñe atet nenteneḡ ñerra'mrrate' e'ñe nechemer nepeneḡ, na Pablon pequellquene'ña añ carta ñeñten Jesucristo puellsen-saren, tarro'mar ñeñtpa' atet llesenserren Yompor Parets epuet Puechemer Jesu-cristo ñeñtcha' nanac yeyemterra. Ñeñtpa' ñeñtara Yompor ñeñt Ya'queshpatañer yepen, ñaña ñeñtara Puechemer Jesucristo ñeñt Yepartseshar yepen. Te'pa' e'ñe nehuom̃cha'teñoḡeḡpa' o'ch notaḡ, Yomporepa'chña pebensare'tam̃pene' ñeñt nanac Parets epuet Puechemer Cristo Jesús ñeñt Yepartseshar yepen. Ñetepa'chña pemuere-naya. Ñetepa'chña ḡocshatene' e'ñe ḡa peyoḡhro.

Timoteopa' ña cotape'chaterrahuet cohuen all anetso Efeso all ayḡhatarettenet po'poñ cotapñats

³ Ñaña te'pa' o'ch notaḡ, ahuañmo'cha allempo nesechena o'ch ahuen Macedoniopa' atet notnomueḡ, ḡapa' allach ḡa'pa Efeso attoch ḡach cotape'chatyese' ñeñt yeḡchatyets po'poñ cotapñats, attoch ñetpa' amach allo'na yeḡchatneneto ñet poḡtaḡñet ñeñt ama po'ñoḡhoyaye. Te'pa' ñeñtecopña nequellquennaḡ añ carta allochñapa' o'ch alla neyer-paterrperr. ⁴ Ñaña te'pa' ḡach otyesahuet attoch amach allo'na cotape'chatyesneneto e'ñe ñet pueserrparñet ñeñt ama po'ñoḡhoyaye. Ñaña ḡach otyesahuet attoch amach allo'na cotape'chatyesneneto ñeñt atet serrpare'tatyesanete't pa'tañeshañ. Tarro'mar ñeñt serrparñatspa' atta nanac moññe'tateñet acheñenesha'. Ñeñtpa' ama añecpayaye alloch e'ñe yeñoter erra'tsente' e'ñe po'ñoḡh alloch yesherber Parets ñeñt atet muenen ña. Añña e'ñe yame'ñeñoḡa Cristopa' o'ch yeñoter.

⁵ Yomporpa' añña muenen o'ch yeyḡhach acheñenesha' amorrentanna'tpahuepa'ch allohueneḡ. Tarro'mar e'ñe yame'ñeñoḡ Cristo poḡtacma arrña yeyoḡhropa' e'ñech cohuenare' yoctape'chyen Yomporecop. Ñaña e'ñech yeñmañesha' yoctape'chen co-huen. ⁶ Tarraña puesheña'tets acheñenesha'pa' ahuo't alla queḡhpa'huerret ñeñt atet muenen Yompor. Ñeñtña atet serrpare'tatenet po'poñ cotapñats, ñeñtñapa' ama es sherbeno ama't mamesha Yomporecop. ⁷ Ñetpa' añña muenenet ahuo'ch orrtet atet ñerra'mrrate' nanac etsotenet añ ñoñets ñeñt atet anareḡ judioneshacop ahuaḡ. Tarraña ama't atet penetañpa' amaña eñoteñeto este'ña yeḡchateneyña añ ñoñets ñeñt ḡhocma serrpare'tenet. Ama'tcha' ñeñtña nanac torrenetañpa' amachña ḡhenaneto pueyoḡhro ñeñt po'ñoḡh atet yeḡchateney ñeñt ñoñets.

Attoch yeñoch eseshacopte' sherben añ ñoñets ñeñt atet anaret

⁸ Ñehua, allohueneypa' e'ñe yeñotueñ, ama't erra'tsena ñoñets ñeñt atet anareḡ ñeñtcha' atet yeḡpapa' ḡhocma sherben ñerra'm añecop yesherbaten añ ñoñets ñeñt atet muenen Yompor. ⁹ Ñaña allohueneypa' e'ñe yeñotueñ añ ñoñets ñeñt atet anareḡ ñeñtcha' atet yeḡpapa' ama añecpaye' anareḡe acheñenesnacop ñeñt cohuenare' es ḡa'yets, tarro'mar ñetpa' o' yeḡcha'hueñet e'ñe poḡtacma. Ñeñtpa' añecpa anareḡ añ acheñrecop ñeñt ama es otapespahuo, ñaña ñeñt nanac atpare'tetsa, ñaña ñeñt ama es ḡhenoyo pueyoḡhro ñeñt cohuentetsa Yomporecop, ñaña ñeñt nanac ochña'tare'tets, ñaña ñeñt ama añcha'na'tpo' entenaye Yompor po'ñoñ, ñaña ñeñt ama't Paretspa' achm̃are'teñcha'.

Ñaña añecpa anaret añ ñoñets añ acheñrecop ñeñt amtsañtetsa, ñaña ñeñt muetsene' pompor, ama't ñaña pachor. ¹⁰ Ñaña añecpa anaret añ ñoñets añ acheñrecop ñeñt cañoresha'tets, ñaña ñeñt aguëne' pacma, ñaña ñeñt a'yetyene' acheñ, ñaña ñeñt atfa toma'tyets, ñaña ñeñt shecare'tyets ama'tcha' atarr huomenc nenaneñña po'ñoñ Yompor pa'so'chño, ñaña ama't erra'tsente' acheñer ñeñt atpare'tene' ñeñt atet cohuen yeçhateney Yompor po'ñoñ. ¹¹ Ñaña ñeñt atet yeçhateney Yompor po'ñoñ ñeñtpa' ñeñtara cohuen ñoñets ñeñt alloch a'queshpaterrey Yompor e'ñe po'cohuenño, ñeñtara Yompor ñeñt nellsenserre' na o'ch neserrpare'toñ po'ñoñ, ñaña ñeñtara Yompor ñeñt atarr ya'ye'choçhtatyen allohueney.

Atto Pablo pa' atarr parasyoso'ten atto atarr ahuamencat per Yompor

¹² Tarraña ama't ña nellsenserrayeñpa' napa' nanac neparasyoso'teñ Yepartseshar Jesucristo tarro'mar atto nanac ahuamencat pa'n. Ñaña nanac neparasyoso'teñ Yompor, tarro'mar ñapa' e'ñe pocte' enterren o'ch nesherber ¹³ ama't na ahuatpa' nanac nachmare'che't Cristo, ñaña nanac noctare'che't ñeñt ame'ñaye't ña, ñaña nanac na'tserrpa'yesanete't. Tarraña ama't atet nepe'tpa' Yomporpa' ama coñe'ta morrenterno tarro'mar allempopa' ama es nechenoyo neyoçhro, ñaña allempopa' ama name'ñe'te. ¹⁴ Tarraña Yomporpa' ama coñe'ta morrenterno, ñeñto'marña ame'ñataterra attotña te'pa' e'ñe neyemteñoñ ñapa' nemorrentera allohuen acheñenesha'.

¹⁵ Ñeñto'mar te'pa' o' neñoter añepa'tña ñoñets ñeñt e'ñe po'ñoçh: Cristo Jesús pa' añecopña huapa añ patso attoch a'queshpatosan allohuen ochñañenesha'. Ñeñto'marña te' napa' neñotena, allohuen ñeñt ochñañenesha'pa' na ello metana'tuenahuet po'chñaret. Ñeñto'mar te'pa' aña poctetsa o'ch yame'ña'huerra ñeñtara añ ñoñets. ¹⁶ Ñeñto'mar Yomporpa' attotña peretnerren na, ama't napa' nanac ochñañen, allochñapa' attoch eñochet ama't erra'tsente' acheñer ñeñt nanac ochña'tpa' attera nanac morrenteña Jesucristo. Allochñapa' ñerra'm esesha'ña ame'ñerrayapa' ñetñapa' corretsetach pocsheñeshocmañen tayoteñ e'ñe errponañohuen. ¹⁷ Ñeñto'marña te'pa' nanac nocsheñoñ noten, amorrentpahuepa'ch Yompor ñeñt partsotets e'ñe ñapue't ahuatoteñ errponohuañen, ñeñtara ñeñt ama arromñañeshayaye ama't ahuata, ñeñt ama't eseshapa' ama puentare, ñeñtara ñeñt e'ñe ñapue't eñotañ. Ñeñto'marña yecohuentatoñepa'ch tayoteñ errponohuañen. Ñeñtpa' attetepa'ch Nompore.

Añpa' ñeñt atet otan Timoteo ñeñtcha' atet pa

¹⁸⁻²⁰ Te' masheñe Timoteo ellopa' o'ch alla noterrperr po'pocheño ñeñtcha' atet pepa, tarro'mar atet nentenep atet ñerra'mrrate' e'ñe nechemer nepenep. Te'pa' e'ñech peyoçhrocmañen petorra Yomporecop atet ñerra'mrrate' cho yeçllarena. E'ñe pame'ñeñoñ Cristo e'ñech peñmañeshocmañen es porrtatyen. Napa' añ noctape'chen ñeñt atet eños e'ñe cohuen pocop ahuañmo'cha ñeñt a'mtene' ñoñets Yomporeshot. Ama't papa' chocmuepa'ch peyerpa ñeñt atet a'poctat pocop, tarro'mar ñeñt atet eños pocoppa' ñeñtcha' allo'na ahuamencat pepene'. Ñaña chocmach pame'ñya Cristo e'ñe cohuen e'ñe peñmañesha', tarro'mar ñerra'm ama e'ñe yeñmañesha' yocteñe Cristopa' ñato' acoponetpa' o'huañcha' yame'ñera Cristo. Ñeñt atet pa' ahuaña epsheña yacma ñeñt pa'so'cheñ Himeneo ñaña Alejandro, ñaña po'poñeçhno acheñ ñeñt atet petsa. Ñeñto'marña napa' napuenanet oneñeñ ñeñtara epsheña yacma attoch ñapa' o'ch muerochtatamet allochñapa' o'ch eñochet ama achmare'tpahuo Yompor.

2

Atto e'ñe pocte' o'ch yema'yochampesya ñaña ama't añcha'tareteçhno

1 Te'pa' o'ch notap̄ po'poñ ñeñtcha' atet̄ p̄octape'chatyēs acheñenesha' ñeñtcha' atet̄ pet. Ñanompa' ma'yocham̄pesyetepa'ch allohuen acheñenesha', ñaña enamatoñetepa'ch acheñenesha' Yompor; ñaña parasyoso'chetepa'ch Yompor. 2 Ñaña ma'yocham̄pesyetepa'ch allohuen am̄cha'tarete'chno ama't ñaña gobiernō'. Allochñapa' attoch Yomporpa' co'tape'chatanet e'ñe cohuen attoch am̄cha'tarettet e'ñe cohuen, allochñapa' attoch yocrrena yama e'ñe cohuen muechet. Ñerra'm atet̄ penetpa' attochña eñall ñaña yocop attoch yema'yochrena e'ñe cohuen Yomporecop, ñaña attoch e'ñe cohuen yentannena. 3 Ñerra'm atet̄ña yepenapa' e'ñech cohuen enteney Yompor ñeñt̄ Ya'qushp̄atañer yepen. 4 Tarro'mar ñapa' mueneñ allohuen acheñenesha'pa' o'ch a'qushp̄aterranet, ñaña mueneñ o'ch eñotatuerranet añ ñoñets ñeñt̄ e'ñe po'ño'ch Yompor po'ñoñ. 5 Tarro'mar yapa' yeñoteñ Yomporpa' e'ñe patr̄ra. Ñaña yeñoteñ e'ñe puesheñarra ñeñt̄ chocma eñets yocop Yomporesho, ñeñtara Yompor Puechemer ñeñt̄ Jesucristo ñeñt̄ acheñetosets arr patsro. 6 Ñaña ñeñtara ñeñt̄ a'rroyatsa e'ñe ñañaña attoch puerromueñoñ ñapa' o'ch tsa'tuonaya yo'chñar e'ñe allohueney ñeñt̄ey acheñey. Ñeñt̄pa', atet̄ orrtatonay Pompor allochñapa' attoch yeñoch ñeñt̄ atet̄ co'tape'chen ña. Allempoña chap allempo e'ñe pocte' enteñ Pompor o'ch chap añ patsropa' allempoña e'ñe eñotatey ñeñt̄epa't atet̄ co'tape'chen Pompor. 7 Ñeñt̄o'marña napa' na allsensaret̄ atto nach chopeñe'chats erracmañen atto e'ñe na neserrpare'tateño'tpa' o'ch name'ñatyesanet ñeñt̄ e'ñe po'ño'ch Yompor po'ñoñ, ama't ñeñt̄ ama judioneshayaye. Ñeñt̄ atet̄ noten e'ñe name'ñeñoñ Cristo ñeñt̄pa' e'ñe po'ño'ch tarro'mar ñeñt̄pa' ama shequēñtsoyaye.

Añ poctetsa e'ñech yeñmañesha' yema'yochena

8 Ñaña napa' nemneñ ora ama't errate' ap̄cha'yenet Yomporecoppa' añ yacmanesha' allempo echantenet pot puema'yocheño'tetpa' e'ñepa'ch pueñmañesha' ma'yochenet, amachña cha po'poñ entueneto pueyo'chro, ñaña amach cha atsrre'mo'chen entueneto. 9-10 Atet̄ ñaña coyanesha'chnopa' chorretepa' atet̄ chorra'yena po'potantañ pacmanesha' ñeñt̄ po'nanesha'. Amachña añ chorra'yestatsteto attoch aye'charettenet e'ñe ñet po'llchapota. Ñaña pue'chetpa' e'shorretepa' atet̄ e'shorra'yena po'potantañ. Añña ama pocteyaye o'ch añ ma'yochret attoch añño'tet e'ñe cohuen pue'ch. Añotepa'chña orrtet e'ñe cohuen atto amuerañtenet, ñaña atto cohuenare' es p̄a'yenet. Amachña añ cohuen orrtatenahueto atto na'yenet oro, amapa' seretsma't̄ ñeñt̄ nanac tsa'te', ñaña atto es chorra'yenet ñeñt̄ nanac co'chnesha' ñeñt̄ nanaccha' tsa'te'. Añepa'chña atet̄ penet ñeñt̄ e'ñe cohuentetsa Yomporecop, ñeñt̄ poctetsa coyaneshacop ñeñt̄ otets ñapa' o' ame'ñerrana Yompor. 11 Ñaña allempo sap̄chena Yomporecoppa' añ coyane-sha'chnopa' e'm̄ñotetepa' e'ñe muetsoññen attoch es eñotet. Amachña cha atpare'teneto ama't mamesha. 12 Ñaña allempo sap̄chena Yomporecoppa' napa' ama pocteye' nenteñe coyanesha'pa' o'ch ye'chaten all chorren allohuen yacmanesha', ñaña amach pomnaren p̄atstano yacma. E'ñepa'chña mam̄tetenet allempo sap̄chena Yomporecop. 13 Tarro'mar Adánpa' ñanom aye'chcataret̄ acheñ, allotpa' ñaña Eva ñeñt̄cha' puetapor p̄a' Adán. 14 Ñaña Adánpa' ama esesha' shecaye. Añ shecoñet puetapor Eva, allot orrta atparñats Yomporecop. 15 Ñeñt̄o'marña te' allempo cheyore'ten coyanesha'pa' e'ñech pa'llpuepño'ta cheyore'ten. Tarraña ama't atteñpa' Yomporñapa' chocmach yenpueñ attoch chocma queshpenet e'ñe cohuen, ñerra'm po'ño'ch chocma ame'ñenet, ñaña ñerra'm chocma amuerañtenet, ñaña ñerra'm e'ñe cohuen es orrtatyenet Partsocop, ñaña ñerra'm e'ñe cohuen ye'chenet.

3

Attoch yeñoch erra'tsente' pocte' ñeñt̄cha' yena' am̄cha'taret̄ puerahuo

1 Te'pa' o'ch notap̄ po'poñ ñeñt̄ e'ñe po'ñoçh atet. Ñerra'm esesha' muenats o'ch am̄cha'taretta allohuenacop ñeñt̄ ame'ñetsa ñeñt̄ atarr muenene' o'ch torrena Yomporecop ñeñt̄pa' e'ñe poctey ñeñt̄ atarr mueneneñ tarraña eñoche'pa'chña atarr torrapo' attoch e'ñe cohuen orrtatyesan ñeñt̄ atarr sherbets. 2 Tarro'mar ñeñt̄ muenets o'ch am̄cha'taretta allohuenacop ñeñt̄ ame'ñetsapa' añcha' se'n ñeñt̄ etsotuene' añechno. Ñeñt̄cha' sena' am̄cha'taretpa' añcha' se'n ñeñt̄ e'ñe cohuenare' es pets. Ñeñt̄ ama't ahuatapa' amach eñalle attoch tanmare'cha acheñenesha' ama't mamesha. Ñaña ñeñt̄cha' pa'm̄cha'tareter pa'yes allohuen ñeñt̄ ame'ñetsapa' añcha' sena'yes erra'tsente' senten e'ñe patr̄ra puetapor pen (ñerra'm ataporet), ñaña ñeñt̄ nanac ma'yoçhrenaya ñeñt̄ cohuentetsa Yomporecop, ñaña ñeñt̄ e'ñe eñotuene' ñeñt̄ cohuentetsa, ñaña ñeñt̄ am̄cha'na'tpo' entuen allohuen acheñenesha'. Ñaña añ e'ñe poctey o'ch am̄cha'taretta ñeñt̄ e'ñe cohuen aguene' acheñenesha' pa'paclo, ñaña ñeñt̄ e'ñe cohuen yeçhatene' acheñenesha' Yompor po'ñoñ. 3 Ñaña añcha' se'n ñeñt̄ ama posa'tare'tetso, ñaña ñeñt̄ amach orroña'feyaye. Ñaña añcha'ña se'n ñeñt̄ e'ñe cohuen muerenana pamo'ts, ñaña ñeñt̄ ama atsrre'mña'feyaye, ñaña ñeñt̄ ama nanac ye'chapretetso quelle ñeñt̄ apencoçhenot o'ch gana. 4 Ñaña ñeñt̄cha' am̄cha'tarettatsapa' añcha' se'n ñeñt̄ e'ñech cohuen ame'ñatuenana puechemeresha', ñaña ñeñt̄ e'ñech mecha'na'tueñ allohuen ama't ñeñt̄ parro yeçhena. 5 Tarro'mar ñerra'm ama eñotenano attoch e'ñe cohuen ame'ñatuana ñeñt̄ parro yeçhenapa' amachca'ye cohuenaye' am̄cha'tarettoña allohuenacop ñeñt̄ ame'ñenaya Yompor. 6 Ñaña ñeñt̄cha' am̄cha'tarettatsapa' amach añ senatsto ñeñt̄ errte' ame'ñetsa, tarro'mar ñerra'm añ sena' am̄cha'taret ñeñt̄ errte' ame'ñetsapa' ñeñt̄pa' amach e'ñe eñotuenano ñeñt̄ cohuentetsa Yomporecop, allempopa' e'ñe ña pa'm̄cha'taretteño'tpa' çate' atarr ommo'cha. Tarro'mar ñerra'm çha yommo'chapa' ñeñt̄pa' ama pocteye' enteñe Yompor. Çate' ahupore'taretey atet pet ahuat oneñeñ e'ñe pommo'cheño'tpa' ahuo't huapore'chet. 7 Ñaña ñeñt̄cha' am̄cha'tarettatsapa' añcha' sena' ñeñt̄ ama't ñeñt̄ ama ame'ñetsopa' e'ñech cohuen entueñet ñamet. Tarro'mar ñerra'm nanac sasare'tey ñeñt̄ ama ame'ñetso, e'ñe puesasare'teyo'tpa' ñato'rraña çate' oneñe'tpa' nanac topachpa' ellopa' o'te' alla nanac atpare'terran Yompor.

Attoch yeñoçh ñaña erra'tsente' poctey ñeñt̄cha' yena' diácono

8 Attecmach pa ñaña ñeñt̄cha' sherbets Yompor pa'paclo, ñeñt̄ otenet diácono. Ñeñt̄cha' sherbatspa' añcha' se'n ñeñt̄ am̄cha'na'tpo' entuen allohuen acheñenesha', ñaña ñerra'm erro't o'tpa' amach shequeno, ñaña ñeñt̄ ama posa'tare'tetso, ñaña ñeñt̄ ama nanac ye'chapretetso quelle ñeñt̄ apencoçhenot o'ch gana. 9 Ñaña ñeñt̄cha' sherbats Yompor pa'paclopa' añcha' se'n ñeñt̄ e'ñech pueñmañesha' ma'yoçhrenaya ora ñeñt̄ atet yame'ñera Cristo ñeñt̄ e'ñe po'ñoçh cohuen. 10 Ñeñto'marña añ poctey çoch ñanom secue' ñeñt̄cha' sena' diácono. Ñerra'm atette' pena ñeñt̄ atet o' notuapa' ñehua, poctey o'ch sene' ñeñt̄cha' sherbats Yompor pa'paclo. 11 Attecmach ñaña coyaneshachnopa' am̄cha'na'tpo'ch enteñ allohuen acheñenesha', ñaña amachña atta nanac puetomañenteneto, ñaña ñeñt̄ nanac ma'yoçhrenaya ñeñt̄ cohuentetsa Yomporecop, ñaña e'ñech cohuen cotape'chenet Partsocop. 12 Ñaña ñeñt̄cha' sena' diáconopa' añcha' sena' erra'tsente' senten e'ñe patr̄ra puetapor pen (ñerra'm ataporet), ñaña erra'tsente' senten ñeñt̄ e'ñe cohuen ame'ñatuenaya puechemeresha' ñaña ñeñt̄ e'ñe cohuen ame'ñatuenaya ñeñt̄ parro yeçhena pa'paclo. 13 Tarro'mar ñeñt̄ e'ñe cohuen sherbets atet ñerra'm diáconopa' e'ñech cohuen entueñ allohuen acheñenesha', ñaña o'huañcha' pom̄cha'naño'fayaya serrpare't ama't e'ñe mamesha atto atarr ame'ñenana Cristo Jesús.

Ñeñi atet cotape'chateney Yompor attoch yame'ñerapa' ñeñtpa' nanac cochnesha' ama't ahuatoteñpa' ama eseshaye' eñotenaye

¹⁴ Te'pa' o'ch notap̄ po'poñ. Napa' nesechenañ o'ch nabcherrpa'. ¹⁵ Tarraña ñerra'm ama nehuapopa' amach sepallteno sapa' o'ch señoçh ñeñtcha' atet sepa, tarro'mar o' notuap̄ añ necartot ñeñtcha' atet sepa ñeñtes parro same'ñeña Yompor, ñerra'm esempo sapçhena Yomporecop, ñeñtara Yompor ñeñt ama arromñañeshayaye. Ñaña ñeñtara Yompor ñeñt e'ñe yame'ñeñoñ allohueneypa' choçhña yorrtatyen ñeñt e'ñe po'ñoçh Yompor po'ñoñ amachña çha ya'nasoteño. ¹⁶ Ñaña yapa' yeñoteñ ñeñt atet cotape'chateney Yompor atto yame'ñerapa' ñeñtpa' nanac cochnesha' ama't ahuatoteñpa' ama eseshaye' eñotenaye. Añpa' ñeñt atet ya'çhoteñ Cristo:

Ama't Paretspa' o' acheñetos añe patsro, tarraña Yompor Puecamquëñoña nanac ahua-mencattosa ñeñt eñotateneyña acheñenesha' ñapa' e'ñe po'ñoçh cohuen. Ama't allohuen mellañoñeñnanesha'pa' e'ñe entuoñete't ñeñt atet pa'yese't añ patsro, ñaña ñeñt ame'ñaye'tpa' çhocma a'potet Cristo erracmañen arr patsro ama't all ama judioneshayaye. Ñaña shonte' acheñ ame'ñerraya Cristo, allotña Yompor po'cohuenño'tpa' o' alla aguër pue'ntaño.

4

Atto esempohuañenpa' puerruerrach patantarr ama't ñeñt ame'ñetsa te'

¹ Te'pa' o'ch notap̄ po'poñ. E'ñe po'ñoçh atet eñotateney Parets Puecamquëñoñ. O'ch mellapoterrmochapa' puerruerrach patantarr acheñ ama't ñeñt ame'ñetsa te'. Allempopa' o'ch alla ame'ñeret ñeñt ashcañtetsa, ñaña o'ch añ ma'yoçhrerret oneñeñ poçtap̄ña. ² Tarro'mar o'ch alla ame'ñeret acheñ ñeñt ashcañtetsa, ñeñtara acheñ ñeñt ama es çhenoyo pueyoçhro ama't mamesha ama't allempo o' achm̄are'tuan Yompor. ³ Ñaña ñeñtara añ acheñpa' o'ch otyenan acheñenesha', ama poçteyaye o'ch sesna'ta. Ñaña ama poçteyaye o'ch es serratse'tyes. Tarraña allohuen ñeñt yerrenpa' e'ñe poçte' o'ch yerreñ, ñeñto'mar yeçhcach Yompor ñeñtcha' yerren. Tarro'mar ñeñtey o' yeñoterr ñeñt e'ñe po'ñoçh Yompor po'ñoñ, ñaña ñeñtey ame'ñetsapa' e'ñe poçte' o'ch yerren e'ñe yema'yocheñoñ Yompor. ⁴ Tarro'mar allohuen ñeñt yeçhcatua Yompor ñeñtcha' yerrenpa' e'ñe cohuenacma, ñeñto'marña amach errotenot yoto ama poçteyaye o'ch yerre'. Añña poçte' çhocmach es yerren e'ñe yeparasyoso'teñoñ Yompor. ⁵ Yema'yoçhampeñoñ yerrarpa' e'ñe poçte' Partsocop o'ch yerreñ, tarro'mar ñeñtpa' atet oteneñ Yompor.

Atto Timoteo atarr cohuen sherbenan Jesucristo

⁶ Te'pa' o'ch masheñe Timoteo notap̄ po'poñ. Ñerra'm atetcha' peyçhatyes acheñenesha' ñeñt ame'ñetsa ñeñt atet o' notuap̄pa' allempoña po'ñoçhpa' e'ñeçh cohuen pesherbeñ Yepartseshar Jesucristo. Tarro'mar atto poçtape'cheññan Yompor po'ñoñpa' ñeñtcha'ña allo'na ahua-mencat pepene'. Ñaña atto poçtape'chen e'ñe cohuen Yomporecoppa' ñeñtcha'ña allo'na ahua-mencat pepene'. ⁷ Ñaña amach pe'mñotatsto serrparñats ñeñt ama añeyaye ñeñt atet yeçhateney Yompor po'ñoñ attoñ yame'ñera Cristo, tarro'mar ñeñtpa' ama es sherbeno. Añcha'ña pema'yoçhra ñeñt atet yeçhateney Yompor po'ñoñ. ⁸ Ñaña añcha'ña o'ch pema'yoçhra attoch huomenc pepa' peyoçher Yomporecop. Atet pena po'potantañ acheñenesha' ma'yoçhraya attoch huomenctatet e'ñe ñañeñeta po'çhets, ama't ñeñtpa' ama tama es sherbeno. Tarraña pa'papa' añcha'ña pema'yoçhra attoch huomenc pepa' peyoçher Yomporecop, tarro'mar ñeñtpa' ello nanac sherben attoch yocrra cohuen añe patsro, ñaña sherben attoch ello yocrra'huerra cohuen esempohuañen. ⁹ Ñeñt atet noteneppa' e'ñe po'ñoçh atet, ñeñto'marña añ poçte' o'ch ame'ñyet allohuenet. ¹⁰ Ñeñto'marña te'pa' ama't e'ñe

yemuerochteñoŕpa' čhocma yetorrena Yomporecop, tarro'mar ñapa' ñach yeyemterra e'ñe poctacma, ñeñŕ Yompore ñeñŕ ama arromñateŕhayaye, ñaña ñeñŕara Yompore ñeñŕ Ya'gushpatañer yepen allohueney añecop ñeñŕey ame'ñenaya.

¹¹ Te'pa' ñeñŕ atet o' notuaŕpa' ñeñŕcha' atet pŕotyes acheñenesha' ñeñŕcha' atet pet, ñaña e'ñech cohuenacma peyčhatyesanet. ¹² Ñaña čhocmach pŕorra e'ñe cohuen acheñenesha'cop, attoch ñetpa' e'mñotapet ama't pŕapa' nanac huepueshaŕ. Ñaña čhocmach pŕorra cohuen ama't atet pe'ñorena, ñaña ama't allempo es peŕa'yen. Ñaña čhocmach pemuereña acheñenesha', ñaña čhocmach pŕame'ñya e'ñe cohuen Yompore, ñaña ama't peyočhropa' čhocmach pŕoctape'ch e'ñe cohuen ñeñŕ atet pena ñeñŕ e'ñe po'ñočh Cristona'tartetsa. Allochñapa' e'ñe peshoť añña acheñenesha' ñeñŕ ame'ñetsapa' o'ch čhapanet pueyočhreto ñeñŕ atet cohuentetsa Yomporecop. ¹³ Ñaña te'pa' ama't ama nečhena' napa', čhocmach pelleyatanet Yompore po'ñoñ allempo čhocma sapčhena allohuenes. Ñaña čhocmach peserrpare'tatanet, ñaña e'ñech cohuen peyčhatenanet. ¹⁴ Ñaña čhocmach peyerpa atto ahuañmo'cha Yomporepa' ahuañmencat pŕaŕ allempo ñeñŕ pompornesha' pen ñeñŕ ame'ñetsapa' ñetpa' net pot pesho. Ñaña atto eñoratanet Yompore ñetña allempopa' e'ñe cohuen eñosyeset pŕocop. Ñeñŕo'marña te'pa' añ poctetsa čhocmach peťorra Yomporecop.

¹⁵ Chocmach pema'yočhra ñeñŕ cohuentetsa Yomporecop, ñaña čhoch pŕayomya, attoch acheñenesha'pa' entonapet ñeñŕ atet petsoten Yomporecop. ¹⁶ Ñaña čhocmach peñota pŕañeña, ñato' cohuentet' pŕoctape'chen, ñato' amate'. Ñaña čhocmach peñota pŕañeña ñato' e'ñete' atet peyčhaten. Ñaña čhocmach peyčhat cohuen e'ñe atet oteney Yompore po'ñoñ attoch pequeshperra pŕa, ñaña allohuen ñeñŕ pe'mñotene'.

5

Añpa' ñeñŕcha' atet yeŕannena ñeñŕey ame'ñetsa

¹ Masheñe Timoteo, te'pa' o'ch noterrperr po'poñ. Amach peche'ptare'tatsche ñeñŕ po'nare' yacma ñerra'm esempo pantenet. Elloña čhochña pŕoctape'chaterranet cohuen e'ñe acoŕa. Atetcha' pentanet ñerra'mrrate' e'ñe pŕompore pepenanet. Añña allohuen hueparneshačhno'pa' atetcha' pentanet ñerra'mrrate' e'ñe pemo'nasheñ pepenanet poctacma. ² Ñaña coyaneshačhno ñeñŕ po'nare'pa' atetcha' pentanet ñerra'mrrate' e'ñe pŕachor pepenanet poctacma. Añña ñeñŕ shopshare'pa' atetcha' pentanet ñerra'mrrate' e'ñe pŕoch pepenanet poctacma. Amachña čha muene' pŕallocchame'tyenaneto ama't mamesha.

³ Ñaña añ poctetsa čhocmach seyenpue' rretorrnanesha' ñerra'm esempo ama eñallete ñeñŕcha' yenpahuet. ⁴ Tarraña ñerra'm erra'tsen rretorrnaneshar echene' puechoyoresha' amapa' pue'ñaresha', ñeñŕpa' añ pocte' ñetach cohuanpset pachor. Tarro'mar añ pocte' e'ñe ñet o'ch eñochet ñanamcha' añ yecuanpŕes yamo'ts attochña yesherber Yompore ñaña attoch yesherbeñ yamo'mte' atto ñetpa' cohuanpŕesyet yaña ahuať. Tarro'mar ñerra'm atet yeŕapa' e'ñech yocshateñ ama't Yompore. ⁵ Añpa' attoch señočh erra'tsente' rretorrnaneshar palltetsa o'ch seyenpue': Añcha' seyenpa' ñeñŕ rratotetsa e'ñe ñapña ñeñŕ ama echenaye puechoyoresha', ñaña ñeñŕ e'ñe yemtenaya Yompore, ñaña ñeñŕ čhocma ma'yočhenaya Yompore pate'tets yeť, ñaña ama't tsapo. ⁶ Tarraña erra'tsen rretorrnaneshar ñeñŕ atta coshatse'tyetsapa' čhach ottena ñerra'mrrate' o' rroma, ama't allempo correnmeñ. ⁷ Te'pa' o'ch pŕotanet ñeñŕcha' atet pet attoch ama eñalle ama't eseshapa' o'ch sasare'tanet. ⁸ Ñerra'm esesha' ama muenenaye o'ch cohuanpŕsan pamo'ts ama't ñeñŕ parro yečhena ñeñŕña acheñ atetpa' amaca'ye po'ñočhaye' ame'ñenano ñeñŕ atet oteney Yompore. Ñaña ñeñŕ atet acheñpa' amach pocteye' enteñe Yompore ama't mamesha. Ñeñŕpa' elloch metaneñ ama't ñeñŕ ama ame'ñetso.

⁹ Ñaña po'poñ attoch señoch erra'tsente' rretorraneshar ñeñt' pocte' ñeñt'cha' seyepa', ñeñt'pa' erra'tsente' po'nmeneshar ñeñt' echene' pechapoch çharra' po'charña, ñaña ñeñt' patrrach puerrollar pe't. ¹⁰ Ñaña erra'tsente' senten ñeñt' e'ñe cohuenare' es pets, ñeñt' e'ñe cohuen cohuanpene' puechoyoresha', ñaña ñeñt' nanac amueraña, ñaña ñeñt' e'ñe cohuen aguëne' puemo'to', ñaña ñeñt' e'ñe pueñmañesha' sherbene' allohuen ñeñt' ame'ñetsa, ñaña ñeñt' nanac yenpuene' ama't ñeñt' mueroçhtetsa, ñaña ñeñt' nanac pa'yene' po'poñeçhno ñeñt' cohuentetsa.

¹¹ Tarraña ñeñt' rretorraneshar attera shopsheshameñ ñeñt' ama echenana' pechapoch çharra' po'charñapa' amach sagapatsche, tarro'mar ñerra'm machaya muenme'cherran sherbe' Cristopa' o'te' alla some'terra, ¹² çhate' tanmare'cha acheñenesha' tarro'mar amach etsotano ñeñt' atet otan Cristo ahuañmo'cha. ¹³ Ñaña ñato' o'ch atta nanac quella', ñato' po'çllaño'tpa' ñato' o'ch atta ta'yesa po'poñ pocollo'mar serrpare'tatse'tyesets pa'namen ñoñets, ñaña ñato' o'ch atta a'metare'tyesan ñeñt' atet pa'yena po'psheñeçhno ama't ñeñt' ama otenayaye. ¹⁴ Ñeñto'marña napa' e'ñe pocte' nenteñ ñeñt' shopsheshameña' some'terrepa' ñaña cheyore'terrepa' attoch añach ma'yoçhrena ñeñt' pa'paçllacop. Ñerra'm atet penetpa' attochña amach eñalle ama't ñeñt' ye'moñe'tene'pa' amach sasare'tye. ¹⁵ Tarro'mar puesheña'tets rretorranesha'pa' o' alla puerruerret o' alla coteret oneñe't.

¹⁶ Te' ellopa' o'ch notap' po'poñone't. Ñerra'm eñall ama't coyanesha' ñeñt' ame'ñetsa, ñaña ñerra'm ña pamo'ts rra'totatsapa' e'ñe pocte' ñañeñach cohuanpse' pamo'ts. Allochñapa' amach pallteno allohuen ñeñt' ame'ñetsapa' o'ch apueñet ñeñt' pallta'yena. Allochñapa' attoch añcha'ña yenpuenet po'poñeçhno rretorranesha' ñeñt' ama echenaye pamo'ts ñeñt'cha' yenpuene'.

Añ poctetsa ñeñt'cha' atet yepen ñeñt' nanac torretsa Yomporecop

¹⁷ Te'pa' o'ch notap' po'poñ. Ñeñt' pompornesha' pen ñeñt' ame'ñetsapa' ñerra'm e'ñe cohuen añcha'tarettenetpa' e'ñe pocte' acheñenesha'pa' cohuencha' cosheñet, ñaña ellopa' añ pocte' o'ch es apueñet ñeñt' palltena. Ñeñt'pa' ñeñt'cha' atet sepeñ erra'tsencha' ñeñt'pa' po'taruas pe' atto serrpare'ten, ñaña ñeñt' e'ñe ma'yoçhrenaya yeçhatets Yomp' po'ñoñ. ¹⁸ Tarro'mar ama't Yomp' po'ñoñ ñeñt' anuaret' ahuatoteña'pa' atet toma'ntateney, ñeñt'pa' atet oten: "Ñerra'm esempo sa'mama'tateñ huaquesh attoch es serrocllome'chach pa'tco't, allempopa' amach sempanma'tatsche. E'ñe pocte' rranepa' ñaña ñeñt' serrocllome'chateñ." Ñaña ñeñt' atet oten po'poñ Yomp' po'ñoñ: "Ñeñt' ataruasaña' e'ñe pocte' çhocmach agapan po'tsa' atto taruasen."

¹⁹ Ñaña ñerra'm eñall puesheñarr ñeñt' a'metare'tam'pene' ñeñt' pompor pen ñeñt' ame'ñetsapa' sapa' amach same'ñatscho. Añña ñerra'm epsheña a'metare'tam'pene' amapa' ma'psheña, allempopa' pocte' o'ch se'mñoçh, tarro'mar allempopa' o'ch señoch ñato' po'ñoçhte' atet. ²⁰ Atteña ñerra'm po'ñoçhte' atet pena, allempo allo'tsa'yen allohuen acheñenesha'pa' añ poctetsa o'ch soch ñeñt' atetpa' ama aña'pahuo. Allochñapa' po'potantaña'çho'ña esheccha' mecha'na'tenet. ²¹ Aña' çhocmach atet peña ñeñt' atet o' notuap' ama't erro'tente' o' pohua ñeñt' parro nanac peyemtena ahuaña. Tarro'mar Yomp'pa' entene'p epuet Puechemer Jesucristo ñeñt'ara Yepartse-shar yepen, ñaña epuet po'mllaño'feñaneshar ñeñt' epuet yemtena ña. Allohuenetpa' e'ñe entuenpet ñeñto'marña te'pa' añ pocte' o'ch pepena ñeñt' atet o' notuap'. ²² Te'pa' o'ch noctape'chaterrperr po'poñ ñeñt'cha' atet sepa. Ñerra'm esempo semneñ o'ch sena'yes ñeñt'cha' añcha'taretterrtsa Yomporecop, amach ahuen senatstere ñeñt'cha' añcha'taretterrtsa, çhocña secua'yes erra'tsente' acheñer ñeñt' e'ñe cohuen es pa'yets. Tarro'mar ñerra'm aña sena'yes ñeñt' ama cohuen es petsopa' te't e'ñe ña po'chñarōtpa'

atet sepena samã. Ñeñto'marña te'pa' chocmach pã'ypo'ñañpes ñeñt ama cohuenayaye ama't mamesha.

²³ Te'pa' o'ch notap̃ po'poñ. Atto pãpa' chocma pãtsna'tame'ten, ñaña atto at-serrpare'tenep̃ pãtopa' añ pocte' amach p̃orratsterrerro e'ñe ñapue't oñ, añcha'ña epuet p̃orr coñe't vino.

²⁴ Ñaña te'pa' o'ch notap̃ po'poñ attoch peñoch. Eñall puesheña'tets acheñ ñerra'm esempo pena ñeñt ama cohuenayaye Yomporecoppa' yapa'cho'ña o'ch yeñotanet al-lorocma. Allempoña yapa' o'ch yot, po'ñoçh añpa' ama pocteyaye. Tarraña eñall ñaña po'poñeçhno acheñ ama't esempo pet ñeñt ama cohuenayaye Yomporecoppa' ñeñtpa' amach esesha' eñotaye ama't puesheñarrota. Tarraña esempohuañenpa' orrtatuaretterrach. ²⁵ Atteçma pena ñaña ñerra'm esempo yepena e'ñe cohuen, acheñenesha'pa' o'ch entuenyet e'ñe cohuen. Tarraña errotenopa' ama't e'ñe cohuen enteney Yomporpa' acheñenesha'pa' amach e'ñe cohuenaye' entenyeto. Tarraña esempohuañenpa' çherranetcha' pueyoçhro.

6

Añpa' ñeñt poctetsa ñeñtcha' atet pã ñeñt ataruasataret e'ñe atta

¹ Te'pa' o'ch notap̃ po'poñ ñeñt poctetsa ñeñtcha' atet pã ñeñt ataruasataret e'ñe atta ñeñtara ñeñt o' ame'ñerrana Cristo. Añ pocte' ñetpa' cohuencha' eñchet po'patronar, attoch e'ñe ñotofetpa' amach erroteno't eñalle attoch achmãre'tachet Yompor, ñaña ñeñt atet yeyçhaten Cristocop. ² Ñaña ñeñt ataruasataret e'ñe atta, ñerra'm po'patronarpa' ame'ñenet ñametpa' elloña allempopa' amach atpare'tatscheto ama't mamesha, tarro'mar o' pa'mo'nasheñ peret e'ñe pame'ñeño'tet Yompor. Amach ota'psa'tatsteto "te'pa' ama'tcha' ama e'ñe name'ñyo nepatronarña' o' ame'ñerrapa' amach erro't pã'no." Elloña te'pa' e'ñech yemorrenteñesha' yesherbeñ yemo'nasheñ e'ñe cohuen. Masheñe Timoteo, añpa' chocmach peyçhatanet, ñaña o'ch p̃otanet ñeñtcha' atet pet.

Cotap̃ñats ñeñt ama po'ñoçhoyaye

³ Ñerra'm esesha' yeçhatats po'poñ cotap̃ñats ñeñt ama atteyaye atet yeçhateney Yepartseshar Jesucristo ñeñt po'ñoçh atet muenen Yomporpa' ⁴ ñeñt acheñ atetpa' attach ommo'chena, po'ñoçh ñeñtpa' ama çhoye' es eñoteno. Ñeñt atet acheñerpa' añeçpach atet pena attoch es otnare'tyesan acheñenesha' e'ñe po'poñ cotap̃ñatso'mara. E'ñe potnare'tanna'teño'tetpa' o'ch atta atsrre'mare'tet, ñaña o'ch atta e'moñe'tanna'tet, ñaña o'ch atta sasare'tanna'tyeset, ñaña allempopa' o'huañcha' eñoranna'tet. ⁵ Po'ñoçh añ acheñ ñeñt atta cotape'chatse'tets e'ñe ñañaña poctap̃ño'tpa' po'ñoçhpa' amach cotape'chenano ama't mamesha ñeñt cohuentetsa ñaña amach eñotenano ñeñt po'ñoçh alloch yequeshperra. Ñetpa' attach chocma mueneñet o'ch es otnare'tanna'tyeset. Ñaña ñetpa' añeçpach mueneñet o'ch serrpare'tet Yomporecop attoch ganet esocmañen. Ñeñto'marña ñeñt atet acheñpa' amach peyemtatscho. ⁶ Ñehua, po'ñoçh yapa' yeñoteñ e'ñe yame'ñeño't Cristopa' shonte' yechen esocmañen. Ñeñto'marña yapa' ñeñtach nanac yocshena. ⁷ Tarro'mar allempo ye'ñalleta ahuatpa' atta ye'ñalleta muelle'mco't. Te'pa'cho'ña ñerra'm esempo yerromuenpa' amach erroteno't yahuanmo yechecom. ⁸ Ñeñto'mar yapa' amach es yelcatsto. Ñerra'm yechen ñeñtcha' yerra' ñaña ñeñtcha' yechorrappa' ñeñtach yocshena. ⁹ Tarro'mar ñeñt muenets o'ch echan esocmañenpa' amach erroteno't ahuantano atto topatyeney oneñe't. Attach pa'namen ye'chatse'tyenet ñeñt ama es sherbetso. Elloña ñeñtpa' ñeñtcha' anmahuet chenquëñtso esempohuañen. ¹⁰ Tarro'mar e'ñe yeye'chapreteño't quellepa' allo't huenaña esocmañen sosya'tsañ. Tarro'mar puesheña'tets ñeñt nanac muenets o'ch ganet shonte' quellepa' atteñapa'

o'huañcha' ame'ñyet Yompor. Ñeñto'marña acoṓonetpa' o'ch huapanet shonte' ñeñtcha' nanac llecatahuet.

Añach paṓerr yema'yoçhra ñeñt cohuentetsa Yomporecop

¹¹ Tarraña ṓapa' amach atet peṓatsto tarro'mar ṓapa' anareṓeṓ Yomporecop. Ñeñto'marña ṓapa' añach pema'yoçhra ñeñt cohuentetsa Yomporecop, ñaña çhocmach peyerepya Yompor, ñaña çhocmach ṓame'ñya cohuen, ñaña çhocmach pemorrencha ṓamo'ts, ñaña çhocmach ṓa'huanta'huanom ñeñt atarr echarr pentyen amach ṓañeña e'ñe cohuen entatstatso. ¹² Ñaña çhocmach ṓame'ñya cohuen Yompor atet ñerra'm çho peçllarena Yomporecop. Allochñapa' esheccha' peñoch ṓapa' corretsaṓach tayoteñ e'ñe errponañohuen. Ñeñto'mar Yomporpa' çhore'taṓ ahuaña allempo peñotach allohuen acheñenesha' atto ṓapa' o' ṓame'ñerra. ¹³⁻¹⁴ Te'pa' o'ch masheñe noterrperr po'poñ ñeñtcha' atet peṓa. Chocmach petsotua ora ñeñt atet oteneṓ Yompor. Amach ṓoctape'chatsto po'poñoneṓ attoch amach eñalle attoch tanmare'taṓa acheñenesha'. Añpa' atetcha' peṓa tarremphua esempohuañencha' huerra Yepartseshar Jesucristo. Tarro'mar ama't te' Yomporpa' enteneṓ, ñeñtara Yompor ñeñt yapuene' yocreña teme'ttsen, ñaña allohuen ñeñt yentyen. Ñaña Puechemer Jesucristopa'çho'ña enteneṓ, añ ñeñtara Cristo ñeñt eñosets e'ñe cohuen allempo a'ṓto'tare'teñ Poncio Pilato. ¹⁵ Eempohuañencha'ña pocte' enter Yomporpa' allempochña mueñerranerr alla Puechemer arr patsro, ñeñtara Yompor ñeñt e'ñe patrra, ñaña ñeñtara ñeñt atarr ya'ye'choçhtatyen allohueney, ñaña ñeñtara ñeñt nanac ahuañencaṓ, ñeñt Pompor pen ama't allohuen ñeñt añcha'taretetyetsa, ñaña allohuen ñeñt ayochreshatetyetsa. ¹⁶ Ñaña ñeñtara Yompor ñeñt ñapueṓ ama arromñañeshayaye, ñeñtara Yompor ñeñt yeçheta allo'tsen puetare' ñeñt nanac a'rrechatañ all amach errotenoṓ yeçhapo. Ama't puesheñarra acheñpa' ama puentare all, tarro'mar amate' errotenoṓ yeçhapo. Ñeñto'marña ya'ye'choçhtatoñepa'ch Yompor, ñaña ahuañencaṓepa'ch tayoteñ erponohuañen. Ñeñtapa' attetepa'ch Nompore.

Arrpa' all cotape'chatan ñeñt nanac eçllayoreṓ

¹⁷ Te'pa' o'ch notaṓ po'poñ. Ñeñt nanac ehecmaṓtetsa añ patsropa' o'ch ṓotanet amach ommo'chatsteto e'ñe po'cheçmoṓ, ñaña amach cotape'chatsteto ñato' poçllayoroṓpa' amach es pallterreto, tarro'mar ñeñtapa' huañerrcha' esempohuañen. Añña yemchetepa' Yompor ñeñt ama arromñañeshayaye ñaña ñeñt yapuene' shonte' esocmañen ñeñtcha' çhocma yocshatene'. ¹⁸ Ñaña o'ch ṓotanet petepa' e'ñe cohuen Yomporecop, ñaña es apa'yesetepa' ñeñt es palltetsa, ñaña amuerañtetepa'. ¹⁹ Ñerra'm atetcha' petpa' eñallcha' shonte' alloch coshaterranet tsapaṓoneṓ Yompor. Ellopa' o'ch apanet ñaña attochña ñetpa' corretsetach pocsheñeshocmañen tayoteñ e'ñe errponañohuen.

Ñeñt atet otan Timoteo e'ñe allohuanen

²⁰ E'ñe allohuanenpa' o'ch masheñe Timoteo noterrperr alla: Chocmach petsotua ora ñeñt atet oteneṓ Yompor. Amach pe'mñnotatsche ñeñt çhocma muenets o'ch es otnare'tanna'tyesa. Ñeñtapa' ama sherbeno ama't mamesha Yomporecop. Ama't ñetpa' otenetañ po'ñoçho' es eñotenetpa' tarraña yapa' yeñoteñ ñeñtapa' ama po'ñoçhoyaye. ²¹ Tarro'mar puesheña'tets ñeñt coṓene' atetpa' ama çhenaneto pueyoçhro ñeñt atet yame'ñeña Cristo.

Te'pa' Yomporepa'ch ṓa'nataya. Ñeñtach notaṓ, ñeñtapa' attetepa'ch Nompore. Allohua.

Pablo

AÑ PUEPAÑ SAN PABLO PO' CARTA ÑEÑT̃ QUELLQUËRRANERR TIMOTEO 2 TIMOTEO

Atto Pablopá' alla quellquërranerr carta Timoteocop

¹⁻² Masheñe Timoteo, ñeñteḡ nanac nemuerena tarro'mar atet nenteneḡ ñerra'mrrate' e'ñe nechemer nepeneḡ. Na Pablon o'ch alla nequellquërranerr po'poñ carta, ñeñten Jesucristo puellsensaren tarro'mar atet muenen Yompor attoch nach eñotatyese' allohuen acheñenesha' ñeñt̃ atet oteneḡ Yompor: E'ñe yeyemteñoḡ Puechemer Cristo Jesús pa' yañapa' corretsayach yocsheñeshocmañen tayoteñ e'ñe errponañohuen. Te'pa' e'ñe nehuom̃cha'teñoḡteḡpa' o'ch notaḡ: Yomporepa'chña pebensare'tam̃pene' ñeñt̃ nanac Parets epuet Puechemer Cristo Jesús ñeñt̃ Yepartseshar yepen. Ñetepa'chña pemuerenaya. Ñetepa'chña ḡocshatene' e'ñe ḡa peyoḡhro.

Atto Timoteo e'ñe cohuen ame'ñena

³ E'ñe neyerpueñoḡteḡpa' napa' ḡhocma neparasyoso'teñ Yompor ḡocop, yeḡo ama't ñaña tsapo allempo ḡhocma nema'yocheña Yompor ḡocop. Ñeñtara Yompor ñeñt̃ ḡhocma neñmañesha' nesherven, atet sherbe't ñaña ahuaḡ natañneshañ. ⁴ Ñaña napa' ḡhocma neyerpuena allempo peya'na'tapuen ahuañmo'cha. Ñeñto'mar te' napa' nemneñ errotenohuaca' yentannerra attote' ḡocshaterren. ⁵ Ñaña ḡhocma neyerpuenḡa atto ḡapa' e'ñe cohuen ḡame'ñena, ñaña atet ame'ñena ñaña ḡacnor Loida ñaña ḡachor Eunice. Ñeñto'marña napa' neñoteñ ḡapa'ḡho'ña ḡhocmate' ḡame'ñena e'ñe cohuen.

Atto ama apenca'pahuo e'ñe yeserrpare'teñoḡ Yompor po'ñoñ

⁶ Ñeñto'mar napa' nemneñ o'ch alla neyerpaterrperr atto ahuañmo'cha Yomporpa' ahuañmencat ḡaḡ allempo nena' naña not pesho. Ñeñto'marña te'pa' amach pemuenme'chatstoñe ñeñt̃ atet otaḡ Yompor. ⁷ Tarro'mar Yomporpa' ama añecpaye' chorratenyoña Puecamquëñ attoch yapa' o'ch ḡha yeñcha't, añecopña chorratenya attoch ahuañmencat ḡa'y, ñaña attoch yemorrentanna'ta allohueneḡ, ñaña attoch e'ñe cohuen yorrtatyen ñeñt̃ atet muenen Yompor. ⁸ Ñeñto'marña te'pa' amach pepencatsto atto peserrpare'teññañ ñeñt̃ atet pena Yepartseshar Cristo. Ñaña amach pepencatsto e'ñe no'mar atto napa' o' cárcele'terrnet e'ñe name'ñeñoḡ Cristo. Elloña ḡhochña pocte' peñch ḡaña o'ch pemueroḡhtapretna e'ñe peserrpare'teñoḡ Cristo po'ñoñ tarro'mar Yomporpa' attoña ahuañmencat peneḡ. ⁹ Ñeñtara ñeñt̃ o' a'quesḡpaterrey, attoña o' ḡhore'terrey attoch yema'yoḡhra ñeñt̃ cohuentetsa Partsocop. Tarraña añmapa' ama añoteyaye atto e'ñe cohuen es yeḡa'yese't ahuaḡ, añmapa' tarro'mar atet muenen ña. Yomporpa' nanac morrentye't ñeñto'mar ama't ahuaḡoteñpa' ahuo't o'patatya Puechemer Cristo Jesús. ¹⁰ Ñeñt̃ huapatsa attoña te'pa' o' yeñoter atto nanac morrentya Pompor. Ñeñtara Puechemer Jesucristo ñeñt̃ Ya'quesḡpatañer yepen, tarro'mar ñach ya'quesḡpaterre' yerromñoḡ attoch elloch yocrra'huerra, allempopa' amach alla ya'rromña'terre'te. Ñeñto'marña yoten te'ña yapa' o' a'huañam̃perrey Cristo atto o'patye't rromueñets. Te'pa' o' yeñoter tarro'mar atet yeḡchateneḡ cohuen ñoñets ñeñt̃ huetsa Yomporeshoḡ.

¹¹ Ñeñt̃ña añ cohuen ñoñetspa' ñeñtecop allsensareten attoch nach a'pote' allemeñ acheñeneshesho'mar ama't ñaña ñeñt̃ ama judioneshayaye, ñaña attoch nach yeḡchatyesahuet ñeñtara añ ñoñets. ¹² Ñeñto'marña te'pa' e'ñe neserrpare'teñoḡ añ ñoñetspa' mueroḡhtatennet, tarraña napa' ama nepenquëno tarro'mar napa'

neñoteñ Yompor ñeñt neyemtenapa' nanac ahua-mencať. Ñeñto'marña neñoteñ e'ñe po'huamencotpa' o'ch cohuanp̄son ora all netorra'yeseť ñocop ñeñt atet yechenna ama't tayoteñ esempohuañencha' huerra.

¹³ Papa' chocmach p̄otape'ch ñeñt atet o' neychatuanmař, ñeñtara ñoñets ñeñt e'ñe pačharr cotap̄ñats. Ñaña peparrocmateñoť Cristo Jesúsapa' chocmach p̄ame'ñya cohuen, ñaña chocmach p̄a'muerañta. ¹⁴ Ñaña chocmach peñota, amach p̄a'po'poñetatstoñe Yompor p̄otap̄ña ñeñt atet yechenp̄a Yompor. E'ñe po'huamencot Parets Puecamquẽñ ñeñt yechetsa yeyochro ñepa'chña peyenpue'.

Atto puesheña'tetspa' a'ypo'ña'huaneret Pablo

¹⁵ Napa' o' notap̄ atet tarro'mar ama't p̄apa' peñoteñte' shonte' acheñ ñeñt yečha'yetsa Asio'marpa' o' sohuanerrnet, atet ñerra'm Figelo ñaña Hermógenes. ¹⁶ Te'pa' aña chocma nocshatene' Onesíforo tarro'mar ñapa' ama penquẽnno ama't napa' cárcelot'senen. Ñeñto'marña Yomporpa' a'natanepa' Onesíforo pamo'tsesha'. ¹⁷ Ahuañmo'cha allempo čhap Onesíforo arr Romopa' ñapa' nanac e'name'terren attoť enterren. ¹⁸ Ama't p̄apa' nanac peñoteñ, ahuañmo'cha Efesopa' ñapa' nanac yenpa'y. Ñeñto'marña Yomporpa' muera'huerepa'ch esempohuañencha' huerra po'yoročhenñoť.

2

Ñeñtcha' atet yetorra e'ñe cohuen Jesucristocop

¹ Nechemere Timoteo, e'ñe peparrocmateñoť Cristo Jesúsapa' huomenquẽpa'ch pepa' peyočher tarro'mar ñapa' chocmach yenpař. ² Allpon pe'moneť ñeñt atet neserrpare'tacheť shonte' acheñenesha'pa' p̄apa'čho'ña te'pa' attec-mach peyčhach po'poñečno ñeñt ame'ñetsa attoch ñetpa'čho'ña eñochet yečhatet allohuen pamo'tsesha'.

³ Ñaña o'ch notap̄ po'poñ. Papa' amach pem̄cha'tatsto attoch pemueročtapretya. Chochña pocte' peñch o'ch pemueročhta atet ñerra'mrrate' cho pečllarena e'ñe cohuen Jesucristocop. ⁴ Ñato' o'ch netma'ntacha ñeñt atet pena solltarnesha'. Solltar ñeñt ejército'tsenpa' amach es cotape'cheno po'poñoneť ñeñt atet pena ñeñt ama ejército'tseno. Añach paťerr cotape'chen attoch coshatan ñeñt mandene'. Añ toma'ntena yapa'čho'ña añach paťerr yotape'chen attoch yocshach Jesucristo ñeñt yeyechenaya yaña. ⁵ Ñato' o'ch netma'ntatererr po'poñ ñeñt atet pena ñeñt atarr jueguẽtsa. Ñeñt atarr cohuen jueguẽtsa chocmach jueguẽnet e'ñe cohuen e'ñe atet anarettenet ñocpuet attoch e'ñe cohuen ganet. Ñerra'm ama e'ñe atet jueguẽto e'ñe atet anarettenet ñocpuet, amach errotenoť aparettoña ñeñtcha' coshatahuet ñeñtecop atarr jueguẽnet. Ñeñtpa' añ toma'ntena yapa'čho'ña ñerra'm amach atet yeperro ñeñt atet anaret Yompor po'ñoñ yocop, amach errotenoť apuerrye ñeñtcha' nanac yocshaterre'. ⁶ O'ch netma'ntatererr po'poñ. Ñeñt nanac taruaset pa'mropa' ñapa' ñanomcha' rre' ñeñt nare'ten. Ñeñtpa' añ toma'ntena ñeñt nanac torretsapa' Yomporecop ñapa'čho'ña nanaccha' coshateñ po'taruas ñeñt atet torrena Yomporecop. ⁷ Ñehua, p̄otape'ch ñeñt atet noteneř tarro'mar Yepart-sesharpa' čapatonařcha' peyočhro ora ñeñt atet toma'ntena añečno.

Añ pocte' chocmach yeyerpueña Jesucristo

⁸ Amach pepsatsto atto Jesucristopa' tanterra allempo rroma, ñeñtara ñeñt po'mreneñ David, ñaña ñeñtara Cristo ñeñt chocma neserrpare'ten attoch yequeshperra. ⁹ Ñeñto'marña napa' attotña huanca'net atto te'pa' nanac nemueročhtena atet ñerra'mrrate' amtsañen. Tarraña Yompor po'ñoñpa' amach errotenoť huanquẽto. ¹⁰ Ñeñto'marña napa' chocma na'huanten atto nemueročhtena, allochñapa' ñerra'm erra'tsencha' acerrr Yompor ñeñtcha' ame'ñerrayapa' queshperretcha'

e'ñe pame'ñeñoŧet Cristo Jesús. Ñaña all Yompor po'cohuenñopa' correrretcha' errponohuañen.

¹¹ Añ ñoñets allo chocma ya'choteñ Yomporpa' e'ñe po'ñoŧh atet:

Ñerra'm e'ñe yame'ñeñoŧ Cristo yerromapa' yeycherrach parro epay Cristo.

¹² Ñaña ñerra'm cho yemueroŧtaprecha Cristopa' ya'mcha'tarettapreterach esempohuañen. Tarraña ñerra'm cha ya'nasoteña'pa', ñapa'cho'ña a'nasoterryach esempohuañen.

¹³ Ama't allempo yapa' ama yeyemteño, tarraña po'ñoñ ñeñŧ atet otenpa' chocma po'ñoŧh atet, tarro'mar amach errotentō alla a'po'poñeterrano ñañaña po'ñoñ.

Atto Yomporpa' e'ñech cohuen pa'taruasañer peney

¹⁴ O'ch alla noterrperr po'poñ: Chocmach peyerpacha acheñenesha' ñeñŧ atet o' notuaŧ, ñaña o'ch potanet e'ñe Yompor po'huamencōt amach allo'na otnare'tanna'tyesneneto e'ñe ñañañeta potaŧño'maret. Tarro'mar atto es otnare'tanna'tyenetpa' ama't mameshapa' ama es sherbeno. Ñerra'm attach penetpa' atteña'pa' o'ch alla puerruerra allohuen acheñenesha' ñeñŧ e'mñotenahuet. ¹⁵ Tarraña papa' añcha'ña pema'yoŧhra ñeñŧ cohuentetsa Yomporecop attoch ñapa' entaŧ e'ñe cohuen ataruasañeŧ. Amach eñalle ñeñŧcha' pepencate' all peŧorra'yena ñocop. Attochña chocmach pesherbatoñ po'ñoñ ñeñŧ e'ñe po'ñoŧh ama shequēñtsoyaye. ¹⁶ Ñaña papa' amach pa'na otnare'tatstahueto ñerra'm esempo es otnare'tanna'tyenet. Tarro'mar ñeñŧ atet serrpare'tatyenetpa' ama añeyaye alloch huomenc yepa' yeyoŧher Yomporecop. Ñaña ñeñŧ atet petsapa' atteña'pa' o'ch allo'na senet puesuanmuet ñeñŧ atet yeŧhateney Yompor. ¹⁷ Ñaña ñerra'm allo'nach yeŧhatnenet ñeñŧ ama es sherbetsopa', atteña'pa' ñerra'm o'chña epa'hua orapa' allo'nach senet puesuanmuet ñeñŧ atet muenen Yompor. Nato' o'ch netma'ntacha ñeñŧ atet pena atснаñets ñeñŧ otenet cáncer ñeñŧpa' mamesha o'ch epa'hua ora yechtso o'ch muetsay. Ñeñŧpa' atet pa' epsheña ñeñŧ pa'so'cheñ Himeneo ñaña Fileto, tarro'mar ñetpa' aña yeŧhatenet po'poñ cotapñats. ¹⁸ Ñetpa' atta ayŧha'natateññañet Yompor po'ñoñ all oteney esempopa' yetanterrach. Ñetpa' ahuo't serrpare'tatyaset acheñenesha' atet: "All oteney Yompor attoch yetanterra esempopa' ñeñŧpa' toma'nteñtsa. Ñeñŧpa' aña toma'ntena atto yapataretta ahuaña oño." Ñeñŧo'marña patanta'tets ñeñŧ ame'ñetsapa' alla queŧhpa'hueret atto ame'ñeñet Yompor. ¹⁹ Ama't atet pañ patantarrpa' tarraña Yompor po'ñoŧhpa' ama pueno po'ñoñ. Ama't Yompor po'ñoñ ñeñŧ aquellcareŧ ahuaŧoteña'pa' atet eñotateney eñallach pate'tets acheñ ñeñŧ po'ñoŧh ame'ñenaya. Ñeñŧpa' atet oten: "Yomporpa' cheme'tenan ñeñŧ po'ñoŧh ame'ñenaya." Añpa' arr eñotateney po'poñ Yompor po'ñoñ ñeñŧ aquellcareŧ ahuaŧoteñ, ñeñŧpa' atet oten: "Allohueney ñeñŧey cotene' Cristopa' yequeŧhpa'huerrepa' allohuen sosya'tsañ."

O'ch netma'ntacha ñeñŧ atet pena pocoll

²⁰⁻²¹ Po'ñoŧhpa' choch yesuanom allohuen sosya'tsañ, allochña'pa' attoch añach yema'yoŧhra attoch yesherbe' e'ñe cohuen Yompor. Tarro'mar allohueney ñeñŧey ame'ñetsapa' ama e'ñe attecmaye' yesherbeñe Yompor. Nato' puesheña'tetspa' nanaccha' cohuen sherbeñet Yompor, nato' po'potantañña'pa' amach. Nato' o'ch netma'ntacha ñeñŧ atet pena pocoll. Ñeñŧ acheñ eçllayoretpa' arrña pa'paclopa' shonte'ch eñall pa'namen coymeŧhno. Nato' patantarrpa' ororro'ch nato' po'potantañña'pa' asrerro'ch, nato' po'potantañña'pa' tsachrro'ch, nato' po'potantañña'pa' patsrro'ch. Tarraña allohuenpa' amach e'ñe attecmaye' sherbenano pamo'mte'. Atet ñerra'm ñeñŧ ororro'pa' nanaccha' coŧhneshoŧ sherbenano pamo'mte', tarraña atet ñerra'm patsrro'pa' amach tama coŧhneshoŧey' sherbenano pamo'mte'. Ñeñŧo'marña yapa'cho'ña ñerra'm yemneñ o'ch

yesherbe' e'ñe cochneshot Yamo'mte' Cristopa' añ palltetsa čhoch ñanom yesuanom allohuen sosya'tsañ attoch añach yema'yočhrena ñeñt' cohuentetsa Yamo'mtayecop. Allochñapa' ama't erra'tsena es yepa'yenpa' e'ñech cohuenacma yocshateñ Yamo'mte' Cristo.

²² Ñeñto'marña p'apa' notenep' o'ch pesuanom allohuen sosya'tsañ ñeñt' atet muenatse'tyen huepaneshachno ñeñt' ama po'ñočhaye' sherbenaye Yompor, allochña p'apa' añach pema'yočhrena ñeñt' cohuentetsa Yomporecop, ñaña čhoch p'ame'ña Yompor e'ñe peñmañesha', ñaña čhocmach pemuerya allohuen p'amo'tsesha'. Allochñapa' attoch peparrocmat epap' allohuen ñeñt' e'ñe cohuen pueyočher pene' Yepartsesharecop. ²³ Ñaña ñerra'm esempo es otnare'tanna'tyenetpa' p'apa' amach pe'mñotatstaneto, tarro'mar ñeñt' atet otatse'tyetspa' e'ñe orrena atet penet. Ama't p'apa' peñoteñ ñerra'm čho es yotnare'tanna'tapa' alloč huena shonte' atsrre'mueñets. ²⁴ Tarro'mar ñeñt' torretsa Yepartsesharecoppa' ama pocteyaye o'ch atta atsrre'mare'tyesa allemeñ. Elloña čhochña ya'muerañta allohuenacop. Ñaña čhochña yeyčhatyes e'ñe cohuen acheñenesha' ñeñt' atet cohuen enten Yompor. Ñaña ama't ñetpa' erroč p'a'yetpa' yapa' e'ñe yemorrenteñočpa' o'ch ya'huantoñ. ²⁵ Ñaña añ pocte' o'ch alla yoctape'chater cohuen ñeñt' ye'moñe'tene'. Tarraña e'ñech acopa yoctape'chatyerranet e'ñe cohuen. Ñaña o'ch yecuenanet e'ñe acopa esempohuañencha' čhapanet pueyočhro ñeñt' e'ñe po'ñočh cohuen enten Yompor. Ñaña o'ch yecuenanet esempohuañencha' coťape'cherret ello e'ñe cohuen Yomporecop. ²⁶ Ñerra'm atet yep'apa' ñato' attotpa' o'ch a'royerranet oneñeč atto huanquēnanet atto te'pa' p'a'yenet sosya'tsañ ñeñt' atet muenatenanet ña.

3

Ñeñt'cha' atet perra esempoch mellapoterrmocha

¹ Ñehua, te'pa' o'ch neñotatap' po'poñ ñeñt'cha' atet perra esempoch mellapoterrmocha. Allempopa' nanaccha' echarr attoch yocte' Cristo. ² Tarro'mar allempopa' atet'cha' perra acheñenesha'. Allempo acheñpa' nanaccha' moparrareret, ñaña añach paterr coťape'chenet ñeñt' atet muenenet e'ñe ñoçpueta. Ñaña allempopa' nanaccha' ye'chapretenet quelle. Ñaña allempopa' nanaccha' ommo'chenet ñeñt' ečhyenet, atar'cha' cohuen entyerret e'ñe ñañeñeta, po'potantaññapa' amach esoye' asherben entyere'to. Ñaña allempopa' nanaccha' achm'are'teret Yompor, ñaña allempopa' o'huañcha' ame'nyet ama't ñeñt' pamo'mte' penet, ñaña ñetpa' amach es coshatenahueto ama't coñe'ta. Ñaña allempopa' nanaccha' tsena'teret allohuen ñeñt' anareč Partsocop. ³ Ñaña allempopa' o'huañcha' esesha' mueranna'terretsa, ñaña o'huañcha' muenet o'ch amo'tstanna'terret. Ñaña allempopa' nanaccha' toma'tam'psanna'tyerret ñaña allempopa' erročen'cho' muenetpa' atet'cha' p'atse'tyenet, ñaña allempopa' nanaccha' mueročtatanna'tyerret attoch nanac coshenet, ñaña nanaccha' tsena'terret ñeñt' cohuentetsa. ⁴ Ñaña nanaccha' apomatatañterret, ñaña allempopa' amach es yepuer entyerreto, ñaña allempopa' e'ñech ñañeñeta nanac cohuen entetset, ñaña allempopa' ñañeñetach e'nenet alloč nanac coshenet, amachña añeye' e'neneto atet muenen Yompor. ⁵ Ñaña allempopa' ama't'cha' ottenetañ ñerra'mrrate' ame'ñenetpa', tarraña amach po'ñočhaye' ame'ñeneto. Tarro'mar ñetpa' amach po'ñočhaye' mueneñeto o'ch čhapanet pueyočhro ñeñt' cohuentetsa Yomporecop attoch huomenc p'a'nmuet pueyočher e'ñe po'ñočh.

Ñeñt' atet acheñpa' amach pecua'psatsche. ⁶ Tarro'mar ñeñt' acheñ atetpa' attach mueneñ o'ch sheca'yesan acheñenesha'. Ñato' o'ch ahuanmuet po'ppauño'marpa' ñerra'm be'toset a'nahua pocollopa' añña coyaneshachno ñeñt' ama es eñotopa' o'ch atta

ame'ñateñet e'ñe ñet poctapñet. Tarro'mar ñeñt coyaneshačhnopa' nanaccha' yorateñet po'chñar. Ñaña ñetpa' añach e'nenet pa'namen ñeñtcha' coshatenahuet. ⁷ Ñeñto'marña añ coyaneshačhnopa' pa'namencha' topatyenetañ cotapñats. Tarraña ama't ahuařapa' amach errotenoř enterreto ñeñt po'ñočh Yompor poctapña. ⁸ Yacma ñeñtcha' atet shequerre' acheñenesha'pa' ñeñtpa' aña muenen o'ch epatare'tan añ cotapñats ñeñt e'ñe po'ñočh Yompor poctapña. Atet pa' ñaña ahuař Janes epuet Jambres ñeñt muenatseñ o'ch epatare'tan Moisés. Ñeñt yacma ñeñt atet shequene' acheñenesha'pa' amach cotape'chenano ñeñt cohuentetsa ama't mamesha. Ñetpa' čhach a'po'poñetenet ñeñt atet yame'ñena. ⁹ Tarraña ñet poctapñetpa' amach allohuenacmaye' anetso'mar epuerro tarro'mar esempopa' ñato' allohuen acheñenesha'pa' o'ch eñotuet ñeñt atet otatse'tyenetpa' ñeñtpa' shequēñtsa. Ñato' atetcha' pa' atet pa' ahuař epsheña yacma ñeñt muenatseñ o'ch epatare'taneñ Moisés.

Arrpa' all cotape'chatan e'ñe cohuen Timoteo

¹⁰ Tarraña pa'pa' ama atteye' pepeno. Tarro'mar pa'pa' añ pocta'nen ñeñt atet nepena na. Ñaña pa'pa' peñotuennan ñeñt atet neyčhatyen Yomporecop, ñaña ñeñt atet nocrrena e'ñe cohuen Yomporecop, ñaña atto e'ñe patrra nema'yochrena ñeñt cohuentetsa. Ñaña pa'pa' peñotueñ ñeñt atet nanac neyemteña Yompor ñaña atto nanac na'huanten allohuen ñeñt echarr nentyen, ñaña atto nanac nemorrenteña allohuen acheñenesha', ñaña atto ama't nemueročhteñořpa' čhocma nocteñ Cristo. ¹¹ Ñaña peñotueñ atto pue'moñe'teñořetanpa' čhocma cotare'tnete't atto mueročhtatyenesete't. Ñaña ama't pa'pa' peñotueñ ñeñt atet mueročhtatyenesnet a'yo anetso ñeñt pa'so'cheñ Antioquío, ñaña Iconio, allotpa' ñaña Listro. Tarraña ama't atet pa'yesnete'tpa' Yomporña'pa' čhocma a'queshpa'tyesne't allot. ¹² Ñehua, yapa' yeñoteñ erra'tsencha' muenats o'ch cotan e'ñe cohuen Cristo Jesús'pa' čhocmach mueročhtatanet ñeñt e'moñe'tenahuet. ¹³ Tarraña ñeñt ama cohuenayaye acheña'pa' allo'nach senet pa'tse'tnomuet sosya'tsañ. Ñaña ñeñt atta sheca'yetspa' allo'nach senet shecanna'tatset.

¹⁴ Tarraña pa'pa' čhocmach poctape'ch ñeñt atet ayčhatareteř, ñeñtara ñeñt ama't pa'pa' o' peñoter ñeñt e'ñe po'ñočh cohuen cotapñats. Tarro'mar pa'pa' peyemtenya ñeñtey peyčhate' ahuařoteñ. ¹⁵ Ñaña pa'pa' e'ñe cheshoteñ ayčhatareteř Parets po'ñoñ ñeñtara añ ñoñets ñeñt peñotaterre' atto e'ñe yame'ñeñořa Cristo Jesús'pa' o'ch yequeshperra. ¹⁶ Allohuen Yompor po'ñoñ ñeñt aquellcareřpa' e'ñe Partseshotecma anare't. Ñeñto'mar añ ñoñetspa' nanac sherben ñeñtcha' yeyčhate' ñeñt atet muenen Yompor, ñaña ñeñtcha' alla yotape'chaterre' cohuen ñerra'm esempo es yepanten, ñaña ñeñtcha' yeñotatene' e'ñe cohuen ñeñt atet poctetsa Yomporecop. ¹⁷ Allochña'pa' attoch ñeñtey o' puechemer perrey Yomporpa' e'ñech yeñotuen allohuen ñeñt cohuentetsa Yomporecop, ñaña attoch huomenc yeřa' yeyočher allohuenacop ñeñt cohuentetsa Yomporecop.

4

Añ pocte' čhocmach yeserrpare'toñ Yompor po'ñoñ ama't erroteno'tsenya

¹⁻² Te'pa' o'ch alla noterrperr ñeñtcha' atet peřa: Chocmach peserrpare'toñ Yompor po'ñoñ ama't esempo erroteno'tsenpa. Tarro'mar Yomporpa' enteney epuet Puechemer Jesucristo, ñeñtara ñeñt Yepartseshar yepen, ñaña ñeñtarach huerřtsa ama't esempohuañen, ñaña ñeñtarach amčha'taretetuerrřtsa esempohuañen, ñeñtcha' acrerre' allohuen acheñenesha' ñeñt e'ñe cohuenare', ñaña ama't ñeñt ama cohuenayaye. Atetcha' pa' allohuen ñeñt corřetsmeñ allempo, ñaña ama't ñeñt o' colla'huenta. Ñaña te' pa'pa' o'ch peñotatyenes acheñenesha' ñerra'm esempo ñetpa' ama pocteye' es peneto.

Pañapa' p̄ach otyesahuet amach atet yeṗatsto, allotpa' o'ch p̄octape'chatyerranet e'ñe peñmañesha'. Ñaña ḥocmach peyḥatyesanet ñeñt̄ p̄octetsa Yomporecop. ³ Tarro'mar esempohuañenpa' ḥapcha' allempo acheñenesha'pa' o'huañcha' muenet o'ch ame'ñet ñeñt̄ e'ñe paḥharr coṭaṗñats, ñeñt̄ atet yeḥateney Yompor po'ñoñ. Allempopa' añach e'nyerret erra'tsente' serrpare'tene' coṭaṗñatser ñeñt̄ e'ñe cohuen entenet ñet attoṭcha'ña atonterraña ñeñt̄cha' yeḥaterrahuet ñeñt̄ e'ñe ñet p̄octaṗñet. ⁴ Allempopa' amach esesha' muenerraye o'ch e'mñotet coṭaṗñats ñeñt̄ e'ñe po'ñoḥ. Atteñapa' o'ch añe e'ñe coṭape'cherret ñeñt̄ e'ñe ñet pueserrparñet. ⁵ Tarraña p̄apa' añach paṭerr p̄octape'ch ñeñt̄ cohuentetsa Yomporecop, ñaña ḥocmach p̄a'huanta' ñerra'm huaponaña mue-roḥteñets, ñaña añach paṭerr pema'yoḥra serrpare'tatyesets cohuen ñoñets alloch yequeshperra. Ñaña ḥocmach peṭorra ñeñt̄ atet petaruas apaṗ Yompor.

Allempo o' muetsamochet Pablo

⁶ Napa' amach erroṭ nepere'te tarro'mar o' ḥapmoch allempoch na'mtsareṭta Yomporecop. Te'pa' neñotena napa' o' muetsamochet. ⁷ Tarraña napa' o' epaye' neṭorra'nma Yomporecop atet ñerra'mrrate' ḥo neḥllarena Yomporecop. Ñaña napa' o' netsotua ora ñeñt̄ atet oterren Yompor. Ñato' o'ch netma'ntacha ñeñt̄ atet nepena: Ñerra'm ḥo erra yesechapa' ḥocmach yeḥap all yesechena. Ñaña napa' ama't mameshapa' ama nequeḥpue'te atto name'ñeña Yompor. ⁸ Te'ña napa' añe necuen esempoch nagap ñeñt̄ o'patatenna Yompor ñeñt̄cha' nanac nocshattere', tarro'mar napa' añ neṗa'yese't ñeñt̄ atet muene't Yompor. Ñeñto'marña te' esempoch huerra Yepartseshar Cristopa' allempo napa' aphuerrencha' ñeñt̄ o'patatenna. Tarraña amach naṗta aphuerrno ñeñt̄ o'patatenya. Añe'nachña aphuerr ñaña allohuen ñeñt̄ ḥocma cohume'tene' te' Cristo o'ch huerra. Ñeñfara Yepartseshar Cristo ñeñt̄cha' yeñotattere' ñeñt̄ po'ñoḥ atet yeṗa'yena te'.

Arrpa' all otyesan Timoteo ñeñt̄ atet aṗareṭtena

⁹ Te'pa' o'ch notaṗ ñaña ñerra'm erroṭenotpa' o'te' p̄on arr tayecma. ¹⁰ Tarro'mar arr masheñ Demaspa' o' a'ypo'ña'nerren arr napueṭ, ñapa' o' ahuerresalónico, tarro'mar ñapa' añe nanac morrentena ñeñt̄ patso'marecpa. Añpa'ḥo'ña masheñ Crescentepa' o' ahuo' ñaña Galacio. Ñaña masheñ Titopa' o' ahuo' anetso Dalmacio. ¹¹ Te' arrpa' añe arro'tsen masheñ Lucas. Ñaña o'ch p̄a'sech masheñ Marcos ñeñt̄cha' epaṗ p̄on arr, tarro'mar ñato' ñapa' o'ch yenpa'n arr. ¹² Masheñ Tíquicopa' o' nemñe a'yo anetso Efeso. ¹³ Ñaña o'ch notaṗ ñerra'm p̄oncha' arrpa' p̄anmoncha' necapa ñeñt̄ nena'nom Troaso e'ñe Carpo pa'paclo. Ñaña p̄anmoncha' allohuen nelibroḥno, ñaña nepaṗlleḥno. Ñeñfara añ nepaṗlleḥnopa' ñeñt̄ nanac nemnen.

¹⁴ Alejandro ñeñt̄ po'taruas pene' asreḥnopa' ñapa' atta nanac a'metare'tam̄psen. Tarraña Yomporpa' tsa'taterach ñeñt̄ atet p̄a'n. ¹⁵ Ñeñto'mar p̄apa' e'ñech peñota ñocop, tarro'mar ñapa' nanac epatare'tenan Yompor po'ñoñ ñeñt̄ atet yeserrpare'ten.

¹⁶ Ñaña o'ch notaṗ. Ama't ahuañmo'cha allempo ñanom na'p̄octat neñoñ am̄cha'tareṭeshopa' ama't puesheñarrapa' ama esesha' neñosapretaye. Elloña ñeñt̄apa' ḥa a'ypo'ña'hanet. Tarraña ama't atet p̄a'netañpa' napa' ama nemno Yomporpa' o'ch tsa'tateranet. ¹⁷ Tarraña Yepartseshar Cristopa' ama a'ypo'ña'no, elloña nanac ahuañmocat p̄a'n. Ñeñto'marña o' alla neserrpare'terrerr Yompor po'ñoñ attoḥ e'mare'ch allohuen acheñenesha' ama't ñeñt̄ ama judioneshayaye ñeñt̄ alloch yequeshperra. Atto nequeshperra allempo all atarr amueroḥtatareten, napa' atet nenteñ ñerra'mrrate' Yepartsesharpa' o' a'queshṗaterren e'ñe ma'yarr puenamoṭ. ¹⁸ Ñeñto'marña te'pa' neñoteñ Yepartsesharpa' ḥocmach a'queshṗaterren arroṭ all ama cohuenayaye, ñaña napa' neñoteñ ḥocmach cohuañpenen, attoḥña ḥapaterren

all añcha'tarettena ña pue'ntaño. Ñeñto'marña chocmuepa'ch ya'ye'chochtatoñ errponohuañen. Ñeñtpa' attetepa'ch.

Arrpa' all huomcha'tyesnerranet po'cartot

¹⁹ Ñaña añ necartotpa' nemneñ o'ch nehuomcha'ch noçh Prisca epuet puerrollar Aquila, ñaña o'ch nehuomcha'ch Onesíforo pamo'tsesha'. ²⁰ Ñaña masheñ Erastopa' alla a'pa anetso Corinto, ñaña masheñ Trófimopa' alla nesa'nemñ patsnañoñ Mileto. ²¹ Ñaña p'apa' ñerra'm errotenotpa' chocmate' pehuapa allempo ama huapuenta'. Ñaña añ necartotpa' mueneñ o'ch huomcha'taḡ masheñ Eubulo, ñaña Pudente, allotpa' ñaña Lino, ñaña noçh Claudia ñaña allohuen masheñ neshachno ñeñtey ame'ñetsa arr Romo.

²² E'ñe allohuanenpa' o'ch notaḡ, Yepartseshar Jesucristopa' chocmuepa'chña e'ñe parro'tseneḡ. Ñaña Yomporepa'ch sa'natenaya allohuenes. Ñeñtpa' attetepa'ch Nompore. Allohua.

Pablo

AÑ SAN PABLO PO' CARTA ÑEÑT̃ QUELLCAN TITO TITO

Atto Pablopa' quellcan carta Titocop

1-4 Masheñe Tito ñeñteḡ e'ñe parro yame'ñeñoḡ e'ñe atet nenteneḡ ñerra'mrrate' e'ñe nechemer nepeneḡ, na Pablon pequellquene'ña añ carta ñeñten nanac torretsa Yomporecop. Ñaña napa' ñeñten Jesucristo puellsensaren. Ñapa' atto llesenserren attoch nach ame'ñaterre'ña allohuen acheñenesha' ñeñt̃ acre't̃ Yompor ahuatoteñ attochña ñetpa' o'ch ame'ñeret. Ñaña añecop llesensa'n attoch nach eñotaterahuet ñeñt̃ e'ñe po'ñoḡ atet poctetsa Partsocop, ñaña nach eñotaterahuet e'ñe yeyemteñoḡ ña yañapa' corretsayach yocsheñeshocmañen tayoteñ e'ñe errponañohuen. Tarro'mar ñeñt̃pa' atet oteney Yompor ama't̃ ahuatoteñ ñeñt̃cha' atet ḡonay, ñaña yapa' yeñoteñ Yomporpa' ama puenesho po'ñoñ. Ñeñto'marña te'pa' o' ḡherr allempo e'ñe pocte' enteñ ña o'ch eñotaterrey ña po'cohuenña. Ñeñto'marña napa' o' llesenserren Yompor ñeñt̃ Ya'qeshḡatañer yepen, nach serrpare'terre' po'ñoñ ñeñt̃ atet otenen. Te'pa' e'ñe nehuom̃cha'teñoḡeḡpa' o'ch notaḡ: Yomporepa'chña pebensare'tam̃pene' ñeñt̃ atarr Parets epuet Puechemer Jesucristo ñeñt̃ Yepartseshar yepen ñeñt̃ara Ya'qeshḡatañer yepen. Ñetepa'chña pemuerenaya. Ñetepa'chña ḡocshatene' e'ñe ḡa peyoḡhro.

Ñeñt̃ po'taruas ḡa' Tito Yomporecop all anetso Creto

5 Te'pa' o'ch notaḡ, napa' atto nena'nmaḡ ahuaña Creto attoch ḡach a'poctatyese' ñeñt̃ pallta'yetsa, ñaña ḡach acra'yese' puesheña'tets ñeñt̃cha' pena'yes allemeñ anetso'mar ñeñt̃cha' pompornesha' ḡa'yes ñeñt̃ ame'ñetsa. Añmapa' ñeñt̃ña atet notnomueḡ ahuañmo'cha. 6 Ñeñt̃cha' pompornesha' ḡa'yeseḡpa' añcha' pena'yes acheñ ñeñt̃ e'ñe cohuenare' es ḡa'yets, ñeñt̃ amach eñalle attoch tanmare'teña acheñenesha'. Ñaña ñeñt̃cha' pompornesha' ḡa'yeseḡpa' añcha' pena'yes erra'tsente' penten e'ñe patrra puetapor pen (ñerra'm̃ ataporet̃), ñaña erra'tsente' penten ama't̃ puechemereshapa' e'ñech ame'ña'huenet, ñaña puechemereshetpa' amach atteye' enteñe acheñenesha' atet ḡa'yena po'poñeḡhno acheñenesha' ñeñt̃ atta coshatse'tyenet, ñaña ñeñt̃ ama atpare'tetso puechemereshapa'. 7 Tarro'mar ñeñt̃cha' pa'm̃cha'tareter ḡa' ñeñt̃ ame'ñetsapa' añcha' pena'yes acheñ ñeñt̃ e'ñe cohuenare' es ḡa'yets, ñeñt̃ amach eñalle attoch tanmare'teña acheñenesha', tarro'mar ñapa' anaret̃ ñach a'poctatyene' pa'namen ñeñt̃ poctetsa Yomporecop. Ñaña ñeñt̃cha' pa'm̃cha'tareter ḡa'yes ñeñt̃ ame'ñetsapa' amach añeyaye acheñer ñeñt̃ añach pocte' enten o'ch ḡhocma ḡatanet ñeñt̃ atet muenen e'ñe ña, ñaña amach ḡha atsrre'moḡhen entueno, ñaña ñeñt̃ ama posa'tare'tetso, ñaña ñeñt̃ amach orroñaḡeyaye, ñaña ñeñt̃ ama nanac ye'chapretetso quelle ñeñt̃ apencoḡhenot̃ o'ch gana. 8 Añña e'ñe pocte' o'ch añcha'tareta ñeñt̃ e'ñe cohuen aguene' acheñenesha' pa'paclo, ñaña ñeñt̃ nanac muenene' o'ch e'ñe cohuenare' es ḡa'yes, ñaña ñeñt̃ e'ñe eñotene' ñeñt̃ cohuentetsa, ñaña ñeñt̃ e'ñe pocte' es ḡa'yets acheñeneshacop ñaña Partsocop, ñaña ñeñt̃ e'ñech puetpara es ḡa'yen. 9 Ñaña ñeñt̃cha' pa'm̃cha'tareter ḡa'yes ñeñt̃ ame'ñetsapa' e'ñech yemtenana poctacma añ ñoñets ñeñt̃ e'ñe po'ñoḡ Yompor po'ñoñ ñeñt̃ atet yeḡhateñet. Allochñapa' ñapa'ḡho'ña e'ñech attecma yeḡhatan ñaña po'potantañeḡhno ñeñt̃ e'ñe paḡharr cotaḡñats, ñaña ñeñt̃ eñotene' attoch anapuenan e'ñe cohuenacma ñeñt̃ achm̃are'tene' Yompor po'ñoñ attoch ñetpa' amach errotenoḡ anapeto.

¹⁰ Tarro'mar eñall shonte' ñeñt atpare'tets, ñaña ñeñt e'ñe orrena otatse'tyets, ñaña ñeñt shecare'tyets. Po'ñoçh ñeñtpa' atet pena shonte' judionesha'. ¹¹ Ñeñto'marña añ palltetsa o'huañcha' yeçhatyenet po'poñe'ttsocma cotapñats. Tarro'mar ñetpa' atta nanac moñne'tateñet acheñenesha' poçtapña; ama puesheña'ttsayaya atet petso ama't allohuen ñeñt parro yeçha'yenet. Ñetpa'çho'ña añ yeçhatenet ñeñt ama pocteyaye. Ñaña añecpa yeçhatenet attoch ganet quelle, tarraña ñeñtpa' apencoçhena.

Ñeñt atet pena creto'marnesha'

¹² Puesheñarr creto'marnesha' ñeñt nanac etsotene' e'ñe ñañeñeta poçtapñetpa' ñeñtña acheñer ama pocteye' entenano pamo'tsesha' ñeñto'marña atet oten pamo'tseshacop: "Allohuen namo'ts creto'marnesha'pa' ñetpa' çhocma nanac toma'tampeñet pamo'tsesha', ñaña ñetpa' nanac atsrre'mñañet e'ñe attet ñerra'mrrate' berr ñeñt nanac bellac, ñaña nanac quellañtsareret, atarr araquët ama ayetñañeto."

¹³ Ñeñt atet a'metampanan pamo'ts ñeñtpa' e'ñe po'ñoçh atet. Ñeñto'marña o'ch notap, te'pa' p'ach otahuet, "te'pa' amach allo'na atet sepanna'tneno." Allochñapa' attoch allo'na ame'ña'nmuet añ cotapñats ñeñt e'ñe paçharr, ¹⁴ ñaña allochñapa' amach allo'na e'mñotneññañeto ñeñt pueserrparña pe't ahuatnaneshañ judionesha', ñaña allochñapa' amach allo'na e'mñotneñe acheñenesha' ñeñt atet yeçhatyenenet ñeñtcha' atet pet, tarro'mar ñetpa' çhach atpare'tenet ñoñets ñeñt e'ñe po'ñoçh Yompor po'ñoñ.

¹⁵ Ñaña o'ch señoçh: Ñeñt acheñer e'ñe cohuenare' es cotape'chen pueyoçhro Yomporecoppa' ñocoppa' ama es eñalle attoch sosey enteñ Parets. Tarraña ñeñt nanac sosey cotape'çhets pueyoçhro ñaña ñeñt ama ame'ñetsopa' ñocoppa' ama eñalle ñeñt cohuen enten ña. Tarro'mar poçtapñetpa' atarr sosey. Ñeñto'marña ñetpa' amach çhapaneto pueyoçhro ama't esempo o' pohuet ñeñt ama pocteye' enteno Yompor. ¹⁶ Ñeñt atet acheñpa' ama't otenetañ eñoteñeto' Yomporpa' tarraña ñeñt atet p'atse'tyenetpa' yeñoteñ ñeñtpa' ama atteyaye. Ñeñt Yomporpa' ama pocteye' entapretenaneto, tarro'mar ñetpa' ama es otapahueto, ñaña ñetpa' ama es sherbeneto ama't mamesha.

2

Ñeñt e'ñe paçharr cotapñats Yomporecop

¹ Tarraña p'ocoppa' añña poctetsa o'ch peyçhateñ acheñenesha' ñeñt e'ñe paçharr cotapñats Yomporecop. ² Ñaña ñeñt po'nmeneshaçhno yacmapa' o'ch peyçhatanet atet: Amach orrare'tatsteto attoch çhocma cotape'chenet e'ñe cohuen, allochñapa' pamo'tsesha'pa' am'cha'na'tpo'ch enteñ, ñaña attoch nanac eñotenet ñeñtcha' atet p'ayeset ñeñt cohuentetsa Yomporecop. Ñaña o'ch p'otanet e'ñe cohuenacma, ame'ñetepa' ñeñt e'ñe paçharr cotapñats Yomporecop, ñaña morrentanna'tetepa' ñaña ahuanta'huetepa'ch allohuen topateñets. ³ Attecmach peyçhach ñaña po'nmeneshaçhno coyanesha' ñetpa' añepa'ch orrtatyenet ñeñt e'ñe pocte' enten Parets ñaña ama't allohuen acheñenesha'. Amachña çhaña atomañetteneto, ñaña ñetpa'çho'ña amach orrare'tatsteto. Añña pocte' o'ch yeçhachet pacmanesha' ñeñt cohuen enten Yompor. ⁴ Ñetpa' yeçhachetepa' pacmaneshaçhno ñeñt shopshare' ñeñt o' some'tua allochñapa' attoch e'ñe cohuen mueryet puerrollaret, ñaña attoch e'ñe cohuen mueryet puechoyoreshet, ⁵ ñaña attoch ñetpa' eñotenet nanac ñeñtcha' atet p'ayeset ñeñt poctetsa ñaña attoch mueçhettenet, ñaña attoch amach muenme'cheneto ñeñt po'taruas penet pa'pacletto, ñaña e'ñech amuerañtenet, ñaña e'ñech ame'ñeñet puerrollaret. Allochñapa' e'ñe ñeshoçetpa' amach errotent' acheñenesha'pa' achm'are'toñeto Yompor po'ñoñ.

⁶ Attecmach peyçhach ñaña yacmanesha' ñeñt huepaneshameñ attoch ñetpa'çho'ña o'ch eñochet ñeñtcha' atet p'ayeset ñeñt poctetsa. ⁷ Papa'çho'ña e'ñech cohuenare'

es peḡa'yes ḡaña, allochñapa' attoch entap̄ acheñenesha' ñeñt̄ cohuen enten Yompor. Ñaña allpon peychatenanetpa' e'ñepa'chña paḡharr peychatenanet, amachña ḡha muene' peyellsheñoḡa peychatenaneto attoch añcha'na'tpo' entoñet Yompor po'ñoñ. ⁸ Tarro'mar e'ñe peychateñoḡ Yompor po'ñoñ ñeñt̄ e'ñe paḡharrpa' amach errotenoḡ ama't eseshapa' oto añpa' ama atteyaye. Ñaña ama't ñeñt̄ pe'moñe'tyene' ñerra'm e'ñe peychateñoḡ e'ñe cohuenpa' allempoña ñetpa' o'ch penquēt, tarro'mar e'ñe peychateñoḡ cohuen paḡharr. Allempoña ñetpa' amach errotenoḡ alla sasare'terrpeterro.

⁹ Ñaña e'ñech cohuen ḡoctape'chatyes acheñenesha' ñeñt̄ ataruasatareḡtetsa e'ñe at̄a. O'ch ḡotanet ame'ñyetepa' e'ñe cohuen ñeñt̄ po'patronar penet. Ñaña añ pocte' allpon muenenet po'patronaretpa' e'ñepa'chña ame'ña'hueñet, allochñapa' attoch coshateñet po'patronar. Amachña ḡha anapare'teñeto. ¹⁰ Ñaña amachña ḡha etyenet attoch po'patronaretpa' e'ñech yemtenanet poctacma. Allochñapa' e'ñe pame'ñeñoḡet cohuen po'patronaretpa' añña acheñenesha'pa' e'ñech cohuen entapretenet Yompor poctap̄ña, ñeñt̄ara ñeñt̄ Ya'quesḡpatañer yepen.

Atto Yomporpa' orrtatan puemuereña allohuenacpay

¹¹ Yomporpa' orrtaterrnay pomuereña e'ñe allohuenacpay pa'namen acheñenesha'cop attoch yequesḡperra. ¹² Ñaña ñeñt̄ ama cohuen enteno Yomporpa' añ pocte' o'ch ya'ypo'ña'huer, ñaña ñeñt̄ allpon yemnatse'tyen arr patsropa' añ pocte' ñaña o'ch ya'ypo'ña'huer, tarro'mar puemorrenteñoḡ Yomporpa' ñeñt̄o'mar yeḡhatey atet̄. Añña pocte' ama't añe patsropa' o'ch yepena ñeñt̄ cohuentetsa, ñaña o'ch yepena ñeñt̄ atet̄ pocte' enten Yompor, ñaña ñeñt̄ atet̄ muenen o'ch yetsotoñ. ¹³ Añpa' attoch yecuame'teñ e'ñe yocsheñesha' esempohuañencha' huerra po'cohuenño Jesucristo ñeñt̄ nanac Parets ñeñt̄ Ya'quesḡpatañer yepen. ¹⁴ Tarro'mar ñapa' ña pocte' ente' o'ch rroma yocop attoch o'huañcha' allo'na yeḡatse'tnena sosya'tsañ. Ñaña ñapa' attoña e'shohuerrnay allohuen ñeñt̄ ama pocteyaye. Allochñapa' attoch pueyochresha' perrey, ñaña attoch yapa' yema'yoḡhrena ñeñt̄ cohuentetsa.

¹⁵ Allohuen ñeñt̄ atet̄ o' notuap̄ ḡapa' ñeñt̄cha'ña peychatyesanet. Ñaña o'ch ḡoctape'chatyesanet e'ñe cohuen, ñaña ñerra'm ḡa'yenet ñeñt̄ ama pocteyayepa' o'ch ḡotanet, amach ḡatsteto atet̄, tarro'mar ḡapa' ñeñt̄ecop anareḡḡ. Ñaña ñeñt̄ ama pocteyayepa' amach atet̄ peḡatsto, te't acheñenesha'pa' amate' acua'ḡsenaye' entenpeto.

3

Ñeñt̄ atet̄ poctetsa allohuenacop ñeñt̄ey ame'ñetsa

¹ Ñaña o'ch peyerpacha acheñenesha' añ pocte' o'ch ame'ñeñet ñeñt̄ nenet nanac añcha'tareḡ, ñaña allohuen po'psheññeḡhno ñeñt̄ añcha'tareḡetyetsapa' añ poctetsa o'ch ame'ñeñet. Ñaña añepa'chña pocsheñesha' ḡhocma torra'yenet erra'tsente' cohuen enten acheñenesha'. ² Ñaña o'ch peyerpatanet amach allo'na sasare'tneñeto ama't puesheñarra, ñaña e'ñepa'chña cohuen entannenet, ñaña e'ñepa'ch acoḡa es penet po'psheññecop ñaña e'ñepa'ch cohuen amuerañtenet allohuenacop.

³ Ñeñt̄pa' e'ñe pocte' atet̄cha' ḡannenet tarro'mar yapa'ḡho'ña yeñoteñ ahuatpa' añña yeḡatse'tyese't̄ ñeñt̄ ama pocteyaye. Yapa'ḡho'ña attach ama es yepḡhe'te allempo nanac yeḡatse'tyese't̄ sosya'tsañ. Ñaña nanac yaḡpare'te't̄ ahuat, ñaña añña yeḡhatyesyete't̄ ñeñt̄ ama po'ñoḡhoyaye coḡap̄ñats. Yechetspa' añña nanac muenatse'tatye't̄ ñeñt̄ ama cohuenayaye ñaña allempopa' añña nanac yocshe't̄ pa'namen sosya'tsañeḡhno. Ñaña allempopa' nanac atsrre'moḡhen yentanna'tyese't̄ ñaña nanac es yeye'chapretanna'tyese't̄. Ñaña allempopa' ñerra'm esesha' ye'moñe'te'pa' yapa'ḡho'ña o'chḡho' ye'moñe'chḡho' yaña. ⁴ Tarraña allempoña Yomporpa' eñotatey

e'ñe ña puemuereño'tpa' mueneñ o'ch yenpa'y, e'ñe allempocma yapa' attotña a'queshpaterrey, ñeñto'marña Yomporpa' ñeñt Ya'queshpatañer yepen. ⁵ Ñeñtpa' ama añoteyaye atto e'ñe cohuen es ye'pa'yen, añña e'ñe puemuereño'teya ñapa' a'queshpaterrey. Attoña e'shohuerrnayña yo'chñar attochña ellopa' o'ch yoctape'cherr e'ñe cohuen etserra ñocop, ñaña Puecamquëño'tpa' o' e'ñe etserrataterrnay yoctapña.

⁶ Ñeñto'marña Puechemer Jesucristopa' attoña a'pocatuonay yocop attoch Pomporpa' chorraterrya Puecamquëñ e'ñe pocmacma. Jesucristopa' ñeñtña Ya'queshpatañer yepen.

⁷ Ñeñto'marña te'pa' yeñoteñ e'ñe puemuereño'tey Yomporpa' o' pocte' entuerrey allohueney, ñeñto'marña te'pa' e'ñe yeyemteño't chocma yecuame'ten ñeñt o'patatenya, ñeñtpa' attochña yapa' corretsayach yocsheñeshocmañen tayoteñ e'ñe errponañohuen.

⁸ Ñeñt atet notenpa' e'ñe po'ño'ch. Ñeñto'marña napa' atarr nemneñ o'ch p'octape'chatanet e'ñe huomenco atet, allochñapa' ñeñt ame'ñenaya Yomporpa' e'ñech añña ma'yo'chrenet o'ch penet ñeñt cohuen enten ña. Ñeñt o' notuapa' ñeñtña cohuentetsa ñaña ñeñtña nanac sherbets allohuenacop. ⁹ Ñaña o'ch notap, amach pa'na anapare'tatstahueto ñerra'm esempo anapare'tanna'tyena acheñenesha' e'ñe ñet p'octapño'maret. Ñaña amach pa'na anapare'tatstahueto ñerra'm esempo anapare'tanna'tyenet atet pa'yesete't pa'tañeshañet. Ñaña amach pa'na otnare'tatstahueto ñerra'm esempo pueserrparño'tetpa' es otnare'tanna'tyenet. Ñaña amach pa'na anapare'tatstahueto ñerra'm esempo anapare'tanna'tyenet e'ñe Moisés po'ñoño'mar. Tarro'mar atto yanapare'tannenapa' ñeñtpa' ama es sherbeno, ñaña ñeñtpa' e'ñe orrena.

¹⁰ Ñaña ñerra'm esesha' ñeñt muenets o'ch atta e'moñe'tatyesan acheñenesha'pa' ñeñtpa' atet'cha' pepe', o'ch peñotach atetpa' ama a'papahuo. Ñerra'm ama huenano ñeñt atet penapa' ñato' o'ch alla p'otererr po'pocheño. Ñerra'm allempoña ama huenererropa' añ pocte' o'ch sa'ypo'ñe'. ¹¹ Tarro'mar ñeñt atet acheñpa' yeñoteñ ñeñtpa' po'chñarot'cha' nanac es panten. Ama't ñapa' eñoteñeñ ñeñt atet pena ñeñtpa' ochña'teñets.

¹² Ñehua, o'ch noterrperr po'poñ. Ñerra'm esempoch chap pesho masheñ Artemas amapa' masheñ Tíquico ñeñt'cha' nemña peshopa' ñerra'm errotenotpa' chocmate' p'pon, o'ch pe'chap Nicópolis, tarro'mar napa' noctape'cheñ ñato' allcha' nechara'perra.

¹³ Ñaña chocmach peyenpue' masheñ Zenas ñaña masheñ Apolos attoch ñetpa' chapuet all sechenet, ñaña attoch amach es pallteto. Zenaspa' ñeñt nanac etsotene' ñoñets ñeñt atet anare't. ¹⁴ Allochñapa' ñeñt parro yame'ñena allpa' añ pocte' o'ch pa'yenet ñamet ñeñt atet cohuenteyetsa, ñaña attoch ñetpa' yenpueñet ñaña ñeñt nanac es palltetsa. Allochñapa' ñetpa'cho'ña o'ch sherbeñet pamo'ts.

Arrpa' all huom'cha'tyesnerranet po'cartot

¹⁵ Allohuenet ñeñt parro'tsenenpa' mueneñet o'ch huom'cha'tapet ñamet añ necartot. Ñaña o'ch pehuom'cha'ch allohuen ñeñt pame'ñeño'tetpa' chocma morrentenyet. Yomporepa'chña sa'nataya allohuenes. Te'pa' ñeñt'ach notap, ñeñtpa' attetepa'ch Nompore. Allohua.

Pablo

AÑ SAN PABLO PO' CARTA ÑEÑT̃ QUELLCAN FILEMÓN FILEMÓN

Atto Pablopa' quellcan carta Filemónacop

¹ O'ch masheñe Filemóna nequellconap̃ añ carta, na Pablon epan masheñ Timoteo. Napa' o' yottam̃pennet e'ñe neserrpare'teñoť Cristo Jesús po'ñoñ. Te'pa' o'ch masheñe yehuom̃cha'tap̃ pa' ñeñteṽ atarr yemorrentena ñeñteṽ atarr yetorrapretenaya Yomporecop. ² O'ch yehuom̃cha'teñ ñaña allohuen ñeñt̃ pame'ñeñoťet chocma apchenet pepaclo. Ñaña o'ch yehuom̃cha'teñ yočh Apia ñaña masheñ Arquipo ñeñt̃ nanac yetorrapretenaya ñaña Yomporecop. ³ E'ñe nehuom̃cha'teñoťes sapa' napa' o'ch notas: Yomporepa'ch sebensare'tam̃pene' ñeñtara Parets epuet Puechemer Jesucristo ñeñt̃ Yepartseshar yepen. Ñetepa'chña socshatene' e'ñe sa seyočhro allohuenes.

Atto Filemón e'ñe pame'ñeñoťan Cristo atarr morrentenana allohuen ñeñt̃ ame'ñetsa

⁴⁻⁵ Ñaña te'pa' o'ch notap̃ masheñe. Napa' atet ne'mare'teneṽ pa' nanac peyemteña Yepartseshar Jesús ñaña atarro' pemorrenteña allohuen Yompor pueyochreshachno. Ñeñto'marña na atet ne'mare'teneṽpa' chocma neparasyoso'teñ Yompor allempo nema'yocham̃penpa. ⁶ Ñaña o'ch notap̃, añ nenamueñ Yompor p̃ocop, ñeñt̃ allpon pame'ñatena e'ñe p̃ame'ñeñoť Yompor, ñetpa'cho'ña chapanetepa'ña pueyočhreto atto nanac shonte' e'ñe cohuen bensare'tam̃peney Yompor e'ñe yame'ñeñoť Puechemer ñeñt̃ Cristo Jesús. ⁷ Ñehua, masheñe atarr nocshena atto pa'pa' atarr pemorrenteña allohuen ñeñt̃ pueyochresha' pen Parets. Atto atarr pemuerenanetpa' ñeñto'marña na'ña atarr p̃ocshaten neyočhrohuen.

Atto Pablopa' otenan Filemón e'ñech cohuen aguërran pa'taruasañer Onésimo

⁸ Ñeñto'marña te'pa' o'ch noterrperr po'poñ: Napa' ñeñten Cristo puellsensaren ñeñto'marña p̃ocoppa' e'ñe poctet̃ o'te' atet notapeñ e'ñe ne'mueñocma ñeñt̃ poctetsa atetcha' peṽa. ⁹ Tarraña neñoteneṽ pa'pa' atarr amuerañaṽ ñeñto'marña te'pa' o'ch notap̃ e'ñe pa' pemuereñoť atetñaca'yeña peṽa. Ñehua, na Pablon ñeñten atet p̃otene' napa' po'nm̃oťa o' yottam̃perrnet e'ñe neserrpare'teñoťa Cristo Jesús po'ñoñ. ¹⁰ Tarro'mar na p̃otene' añecop ñeñt̃ atet nenteñ ñerra'mrrate' nechemer. Ñehua, ñapa' o' name'ñacha arr all ayottam̃psareten ñeñto'marña te'pa' e'ñe nechemer nepeñ. Ñeñt̃pa' añ pa'so'cheñ Onésimo ñeñt̃ pa'taruasañer pepe't̃ allempo ama yetam̃penpa'.

¹¹ Ña ahuatpa' ama es asherben peñche'te allempo petaruasache't̃ e'ñe atta. Te'ñapa' nanaccha' asherben penter e'ñe atet atarr asherben nenteñ nam̃a. ¹² Te'pa' o' alla nemñer pesho, e'ñepa'chña cohuenacma alla p̃aguë, e'ñech atet peṽapuer ñerra'mrrate' e'ñe no nechemer p̃aguën, tarro'mar ñapa' e'ñe neyočhrocmañen atarr nemorrenteña. ¹³ Napa' atarrcho' nemneñeñ o'ch na'pacheñ arr ñeñt̃cha' epan atto ñapa' ñate' nesherbenañeñ. Ñehua, napa' neñoteñ ñerra'm̃ pa' arro'tsenpeñcha'pa' p̃ate'ña nesherbenañeñ arr all ayottam̃psareten e'ñe neserrpare'teñoť Cristo po'ñoñ. Tarraña pa'pa' amaña arro'tsenayape ñeñto'marña napa' nemneñeñ o'ch na'patonapeñ pa'cheñer ñeñt̃cha' nesherbenañeñ. ¹⁴ Napa' ama't atarr nemneñeñ o'ch atet nepeñ, tarraña ama nemno o'ch atet neṽa ñerra'm̃ ama pa' atet notaye, attoña e'ñe pa' p̃oc̃ap̃ñoťpa' añcha'ña p̃orrtatonay pemuereña. Ama nemno o'ch e'ñe na ne'mueñocmapa' o'ch notap̃ atetcha'ña peṽa'y, ñeñto'marña te'pa' o'ch alla nemñer masheñ Onésimo pesho. ¹⁵ Ñaña o'ch notap̃ ñato' tarreca'te' yetam̃psapa' mame' attoch e'ñe parrocmaterreṽ e'ñe tayoteñ

errponañohuen. ¹⁶ Te'pa' o'huañcha' atet peñch ñerra'mrrate' pa'taruasañra pepeñ ñeñt ama esoye' pente'te. Te'pa' e'ñechña atet penter ñerra'mrrate' e'ñe pemo'nasheñ ñeñt atarr pemorrentena. Napa' atarr nemuereña elloña papa' o'ch atarr pemuerya nanac tarro'mar ñapa' ama e'ñe atta pemo'nasheñ pepeñe atet yeßannena allohueney acheñey, te'ñapa' e'ñe yame'ñeñot Yompor o'ch e'ñe pemo'nasheñtera e'ñe poptacma.

¹⁷ Ñerra'm po'ñoçh atette' pentenen na ñeñtey parro attecmay yeyemtannena, ñeñtepa' e'ñechca'ye cohuen paguërña yemo'nasheñ Onésimo atet ñerra'mrrate' na e'ñe cohuen paguën. ¹⁸ Ñerra'm çhote' errot pennaß ñeñt ama cohuenayaye amapa' ñerra'm çhote' tebeneß, te'ñapa' nach petsa'terraya. ¹⁹ Na Pablonpa' te'pa' o'ch nequellconañ e'ñe na notot attoch e'ñe cohuen neñotataß nach petsa'terraya. Tarraña ñato' o'ch neyerpatapa' atto na pame'ñaterraya attoch pa'queshpataretterra, ñeñto'marña pocoppa' añ poptetsa te'pa' o'ch alla pocshatterren naña. ²⁰ Po'ñoçh masheñe, napa' añ e'ñe nemnen te'pa' o'ch alla pocshatterren naña e'ñe pame'ñeñot Yepartseshar Jesucristo. Allochñapa' napa'çho'ña attoch e'ñe cohuen nocsherra neyoçhro e'ñe name'ñeñot naña Cristo.

²¹ Napa' neñoteneß papa' çhocmach pe'mñnoten ñeñto'marña nequellquënnaß añ carta. Neñoteneß amach ñeñtayaya atet peþo ñeñt o' notuaß, papa' ellochña atarrcha' cohuen peþa'yes allohuen ñeñt atarr cohuentetsa. ²² Te'pa' o'ch noterrperr po'poñ: pañño'toncha' ñaña nocop allcha'neçhap ñerra'm esempoch a'rroyerrnet. Sema'yochampeñoften Yomporpa' napa' añ atarr necuen ñato' esempopa' a'rroyerrnetcha'. Allempopa' eshecte' neta sesho o'ch nemo'terrsa'.

Arrpa' atto so'tner po'cartot

²³ Arr necartot all huomcha'teneß ñaña masheñ Epafraß ñeñt parro yottampenyet e'ñe yeserrpare'teñot Cristo Jesús po'ñoñ. ²⁴ Huomcha'teneß ñaña masheñ Marcos ñaña masheñ Aristarco ñaña masheñ Demas ñaña masheñ Lucas. Ñetpa' çhocma torrapretennet Jesucristocop.

²⁵ Te'ñapa' ñeñtach notaß masheñe. Yepartsesharepa'chña Jesucristo sa'nataya allohuenes. Ñeñtpa' attetepa'ch Nompore. Allohua.

Pablo

AÑ CARTA ÑEÑT̃ HEBREONESHACOP HEBREOS

Te'ña Yompör Puechemerpa' ña e'ñe ye'ñorana'terraya ñeñt̃ atet̃ oteñ Pompor yocop

¹ E'ñe ahuaŋoteñ Yompörña'pa' čhocma eñorana'tyesane't̃ ñeñt̃ pueyochresha' pe't̃ ñeñt̃cha' a'mta'yesaye't̃ po'ñoñ ñeñt̃ara profetanesha'. E'ñe pa'namenot̃ eñotatyesanete't̃. Ñetñapa' o'ch eñotatenayet̃ yatañneshañ judionesha' ñeñt̃ atet̃ otenanet̃ Yompör. ² Tarraña te'ña yapa' e'ñe ña Puechemer o' eñorana'terrya ñeñt̃ atet̃ eñoreññaña Yompör yocop. Ñehua, ñeñt̃pa' ñeñt̃ara Puechemer ñeñt̃ Jesucristotets̃ ñeñt̃ ne't̃ Pompor ahuaŋoteñ, ñach o'patenaya allohuen ñeñt̃ ora allpon eñall, tarro'mar ña yečcataprete' ahuaŋ Pompor añ patser ñaña allohuen ñeñt̃ esocmañen pa'namen eñalletyetsa. ³ Ñeñt̃ara Cristo atto atarr cohuentena ña pa'tsnomueño't̃, ñeñt̃pa' Pomporña orrtaten po'partsoña. Ñeñt̃ atet̃ cohuen orrtatyen ñapa', Pomporpa'cho'ña e'ñe parro attecmet. Ñapa' e'ñe po'ñoñoŋa orrtatuan ora esocmañen ñeñt̃ allpon pa'namen eñall tarro'mar ña po'ñoñpa' atarr huomenc. Ñeñt̃ara ñeñt̃ rromats attoch e'ñe e'shamperrey yo'chñar. Allempoña o' orrtatuan atto e'shamperrey yo'chñar allempoñapa' o' alla anorruerr Pompor Parets po'cohuenrot̃ allña atarr partsotapretuerrana Pompor po'conaño e'ñe all pue'ntaño.

Ñeñt̃ Yompör Puechemerpa' ña metana'tuene' allohuen mellañoŋeññanesha' atto atarr sherben ña

⁴ Ñeñto'marña te'ña ñapa' atarr añcha'tarettena, ello metana'tuenan allohuen mellañoŋeññanesha', tarro'mar ñapa' ñeñt̃ otenet̃ ñapa' e'ñe Parets Puechemer. Ñeñt̃ña mellañoŋeññanesha' ñetpa' ama atteye' otarettteneto. ⁵ Ñaña yeñoteñ ñapa' ña e'ñe metana'tuenahuet tarro'mar mellañoŋeññanesha' ama't̃ puesheñarroŋetapa' ama otaneto ñeñt̃ atet̃ otan Puechemer, ñeñt̃pa' atet̃ ot Puechemerecop: Papa' pa' ñeñteŋ e'ñe Nechemereŋ, te'ña'pa' o'ch e'ñe neñotach acheñenesha' po'ñočh pa'pa' e'ñe Nechemer nepeneŋ.

Po'pocheñoña'pa' atet̃ oterrerr Puechemerecop:

Ñapa' na ñeñten Pompor, ñapa' no Nechemer.

⁶ Po'pocheñoña allempo čhapatan Puechemer po'moŋer ñeñt̃ atarr nanac sherbets añe patsro atet̃ eñora ñocop, ñeñt̃pa' atet̃ ot:

Te'pa' concorpana'teñepa'ch allohuen nemillañoŋeññaneshar.

⁷ Po'millañoŋeññaneshar ñetpa' añecpa anaretttenet̃ ñetcha' sherbenet̃ Yompör. Ñeñto'marña atet̃ eñorena ñocpuet:

Ñerra'm erra nemñayenanet̃ e'ñech poma'yorñecma erra senet̃ e'ñe atet̃ penet̃ ñerra'm mōrr. Atarr cohuen sherbennet̃ atet̃ ñerra'mrate' tso' ñeñt̃ atarr cohuen huoretyets.

⁸ Tarraña Puechemerecoppa' ama atteye' oteno. Ñocoppa' atet̃ eñora:

Papa' atarr Partsoŋ, ñeñteŋcha' čhocma añcha'tarettetsa peconaño ñeñt̃ errponañoñhuen. Ñaña ñeñt̃ atto pa'mcha'tarettena pa'pa' e'ñe pocte' es pepa'yenanet̃.

⁹ Ñaña ñeñt̃ e'ñe pocte' nenten napa' ñeñt̃ña atarr pōcshatene'. Ñaña ñeñt̃ ama pocteye' nenteno napa', pa'pa'cho'ña ñeñt̃ atarr petsena'ten. Ñeñto'mar napa' ñeñten Peyompōrer pepenen, ahua't̃ atarr nanac nocshaterreŋ. Atto atarr pōcshena pa'pa' ello peñtana'tueñ allohuen po'potantañ ñeñt̃ nesherba'yene' ñamet̃.

- ¹⁰ Yomporpa' alla eñorerrerr Puechemerecop, ñeñt'pa' atet otererr:
 Partseshacha' pa yečcatue' ahuat pats, e'ñe echarr p'orratue. Enetpa'cho'ña e'ñe
 pehuamencotecma peyečcatue.
- ¹¹ Ñeñt' e'ñe peyečcatuapa' ñeñt'pa' huañerrcha' e'ñech chenca'huerra esempo, tarraña
 p'apa' ama arromñat'eshayape ama't e'ñe errponaña. Allohuen ñeñt' peyečcatua
 ñeñt'pa' e'ñech mellasha'tua e'ñech atet pena ñerra'mrrate' shetamuets ñeñt' atarr
 amllasha'tña.
- ¹² Ateřcha' peperr peyečcatar atet ñerra'mrrate' shetamtoshe'm ñeñt' o' mellasha't.
 O'ch a'metatse'chet o'ch huapore'chet allempo chorrenet po'poñ ñeñt' atarr co-
 huen emarr. Tarraña p'apa' atterapach errponañohuen. Atto p'ocrrena p'apa' ama't
 ahuatapa' amach ahuañaña'terro.
- ¹³ Po'pocheño Yomporpa' alla oterranerr Puechemer, ñeñt'pa' atet och:
 Te'pa' o'ch alla p'anorruerr arr necohuenrot allcha' pepartsotapretuerrna. Esem-
 p'ohuañencha' allohuen ñeñt' pe'moñe'tene' o'ch e'ñe na'mchechuerranet attochña
 pomnaren pe'pohuerranet.
 Tarraña mellaño'teñnanesha'ñapa' ama atteye' oche ñeñt' atet otan Puechemer.
 (Ñeñto'mar yeñoteñ Yompor Puechemer ña atarr sherbets, ello metana'tuenan allohuen
 mellaño'teñnanesha'.) ¹⁴ Yeñoteñ allohuen mellaño'teñnanesha'pa' añecpa allsensare'ttenet
 atet ñerra'm Yompor Puecamquëñ, ñetcha' sherbenet Yompor. Attochña ñetcha'
 yenpuenet allohuen ñeñt'cha' a'qeshp'atare'ttertsa.

2

Amach atta es yepčhatsto esheccha' ya'qeshp'atare'tterra

¹ Te'pa' atto o' yeñoterrñañ Yompor Puechemer atto atarr nanac partsoten
 ñeñto'marepa'chña te'pa' elloch yema'yočherra o'ch ye'mñoter e'ñe poctacma ñeñt'
 atto o' ye'muerrñañ po'ñoñ. Ye'mñoterrepa'chña e'ñe cohuen te't aco'pote'ña' ñato'rraña
 o'te' alla yepserrñañ ñeñt' atet o' yečhaterrey Yompor Puechemer. ² Tarro'mar yeñoteñ
 Yomporpa' ama puenesho po'ñoñ ñeñt' atto eñorana'tanet ahuat. Tarro'mar allempo
 ñeñt' ama e'mñotaye ñeñt' atta atpare'te'pa' e'ñe tsa'tatuanete't allohuen ñeñt' allpon e'ñe
 pocte' ent ña. Ama't añ ñoñets ñeñt' orrtat po'mllaño'teñrenesha' chocma tsa'tatanete't
 ñerra'm esempo atpare'tenet ñeñt' ñoñets. ³ Ñeñto'marña yapa' yeñoteñ ñerra'm ama
 ye'mñoterrñañe e'ñe ña Puechemer, yañapa' erroteno'tuachñaca'yeña yeqeshperrate'ña
 ñerra'm atta ama es yepčheno; e'ñe atta eñalleñca'yeña attoch ya'qeshp'atare'tterrañ
 e'ñe cohuen. Ñehua, ñenma'tpa' Yepartseshar Jesúsña serrpare'tatahuet attoch
 ya'qeshp'atare'tterra. Allempoña ñeñt' e'muene' atet otanet Yepartseshar Jesús, ñet'ña'pa'
 o' serrpare'tatyet yaña attoch yeñoch ñeñt' e'ñe po'noch ña a'qeshp'atañtetsa. ⁴ Ñaña
 Pomporña'pa' ñaña yeñotate' Puechemer po'ñoñ ñeñt' atet oteneypa' e'ñe po'ñočh. Ñapa'
 orrtatyesanet po'partsoña ñaña po'huamenc ñeñt' acheñenesha'pa' ama puentareto.
 Ñaña ña Puecamquëño'tpa' o' apa'yese'y e'ñe puesheña'ttsoy errotencha' muenatey ña
 ñeñt'cha' atet yetorra'yesa ñocop.

*Atto Jesucristopa' e'ñe poctacma acheñetos arr patsro attoña e'ñe pa'mo'nasheñ
 p'ohuerrey*

⁵ Te'pa' o'ch noterrser po'poñoneñ añ patser ñeñt'cha' huerrtsa tsapatonet. Ñeñt'pa'
 ama mellaño'teñneshaye' noña Yompor ñeñt'cha' pomnaren perre'. Ñapa' aña na' acheñ
 ñeñt'pa' arromñatenesha'. ⁶ Tarro'mar atet anaret Yompor po'ñoñ ahuatoteñ allempo
 puesheñarrpa' atet otan Yompor:

Ama't acheñaya ama't mamesha ama esoyayye, tarraña ða Nomporepa' atarrepa't peyerpuenya. Ama't ya ñeñfey arromñañena'taraya tarraña ða Nomporepa' atarrepa't pemuerenya.

⁷ Ñeñf arromñañenesha'pa' ama tama ahuamencateyayeto atet atarr sherben mellañoñeñnesha'. Tarraña ñeñfpa' mamecpa atet pemnach. Tarraña ama't atteñpa' elloña o'ch alla pecohuentater atet ñerra'mrrate' esempo o'ch net ñeñfcha' añcha'tarettertsa, allempopa' o'ch nachet po'choyo'm ñeñf atarr cohuen.

⁸ Ñeñfpa' tarro'marña atet pene' arromñañena'tar allochñapa' attoch e'ñe pomnaren penan allohuen ñeñf allpon es peyeçhcatua. Arrpa' allohua atet oten ñoñets ñeñf ahuatoteñ anaret.

Ñehua, ñeñf ñoñets all oten arromñañena'tar ñeñfcha' e'ñe pomnaren perre' allohuen, ñeñfpa' añca'yeña oteney allohuenacop ñeñf errañaren eñall; amach eñalleña ama't e'ñe patrra ñeñfcha' ama pomnaren perreto. Tarraña ama't atet oteneñ ñeñfpa' amaña yentera' allempoch pomnaren es perr arromñañena'tar, tarro'mar ama çherra' allempoch etsoterra ñeñfecop anaret. ⁹ Tarraña e'ñe yeñoteñ puesheñarr ñeñf arromñañecoptartostsa ñeñf atet ðostsa ñeñfca'yeña Jesús. Allempo acheñetos arr patsro Pomporña muenate' amach tama ahuamencattoso atet atarr ahuamencattena mellañoñeñnesha'. Tarraña ñeñfpa' mamecpa atet muenach attoch e'ñe arromñañecoptartosa arr patsro. Ñeñfpa' añecopña atet ða attoch mueroçhtosa o'ch rromos allohuenacpay ñeñfey arromñañenesha'. Yompor e'ñe puemuereñoñey ya attoña muenatan Puechemer o'ch rroma yocop. Ñeñfo'marña Pomporpa' o' alla atarr cohuentaterran Puechemer allempo o' alla ner ñeñfcha' atarr añcha'tarettertsa.

¹⁰ Ñehua, Yomporpa' yeçhcatan allohuen ñeñf eñalleyetsa. Ñaña allohuenpa' tarro'mar yeçhcatue attoch cohuentateññañet ña. Ñaña ñapa' añ muenen shonte' ñeñfcha' e'ñe puechemerasha' perr ñeñfcha' cohuentapreterrera ña. Yomporpa' e'ñe pocte' enteñ o'ch muenatan Puechemer attoch mueroçhtateñ acheñenesha'. Attochña e'ñe etsotatoñ Puechemer esheccha' a'quesþaterran allohuen ñeñfcha' puechemerasha' perr, attochña e'ñe ahuanerranet allcha' cohuentapreterrñañet Pompor. ¹¹ Ñehua, Puechemer ñeñf Jesús, ñapa' a'cohuentatan acheñenesha' Partsocop, attoña e'ñe e'shamþesuanet po'chñar. Te'ña ñeñfey a'cohuentatuaretey ñaña ñeñf ya'cohuentaterre' ñeñfpa' ñeñfña e'ñe ñeñfena'tarecmay tarro'mar ñeñfara Yompor yepen ñeñf Pompor pen ña. Ñeñfo'marña Jesúsapa' ama puepencñoñey pa'mo'nasheñ penye. ¹² Yeñoteñ ama penquënyo tarro'mar Yompor po'ñoñ ñeñf anaret ahuatoteñ ñeñfpa' atet oten ñerra'mrrate' Puechemer otets:

Napa' neserrpare'tachcha' nemo'nasheñnesha' atet e'ñe cohuenare' es peþa'yen ða. E'ñe nachoteñoñeþ þapa' çhocmach na'ye'choçhtatonap all apçhena allohuen masheñneshaçhno.

¹³ Yompor po'ñoñ ñeñf aquellcaretpa' atet oterrerr ñerra'mrrate' Cristo o' alla oterrerr: Napa'çho'ña neyemteña Yompor.

Ñaña atet oterrerr Cristo:

Te' arro'tsenen epan Nompor puechemerasha' ñeñf cohuanþsatenen ña.

¹⁴ Ñehua, allohuen ñeñf e'ñe pa'mo'nasheñecmuet þannetsa, ñetpa' e'ñe ñeñfena'tarecmuet. Ñeñfo'marña Jesúsapa' e'ñe acheñetos attoch pa'mo'nasheñ þosey. E'ñe arromñañena'tartosa e'ñe atet ñerra'mrrate' ya. Ñapa' tarro'marña atet þosa allochñapa' attoch rromos. Tarro'mar allempo rromapa' attoña puerratañpesuan oneñeþ po'huamenc atto atarr añcha'noçhtana'teney allempo yerromuen.

¹⁵ Ñeñfpa' Jesúsña a'huañatañpesuose' ñeñf ama't cheshoteñ çhocmach yençha'ten atto yerromuen, ñeñfpa' atarr añcha'noçhen yenteñ. ¹⁶ Ñehua, yeñoteñ ama

mellaño'teñnaneshaye' llequënoña Jesús ñeñtcha' yenpos arr patsro. Yaña llecosa ñeñtey arromña'teneshay ñeñtey e'ñe po'ño'ch po'm'renñey pen Abraham; ñeñto'marña ñapa' mueneñ o'ch yenposey. ¹⁷ Ñeñto'marña ñocoppa' e'ñe poctoña o'ch acheñetos, o'ch e'ñe attetos ñerra'm ya ñeñtey pa'mo'nasheñnesha' pen. Allochñapa' e'ñe puellcapreteño'tey ya ñeñtey e'ñe pamo'ts penpa' e'ñech cohuen a'poc'taterrey Partsesho. Attoña ñapa' chocma e'ñe cohuen sherbenan Pompor atet ñerra'mrrate' ñeñt corneshatyets Partsocop. Ñapa' e'ñe po'ño'ch Pa'm'cha'tareter peñ allohuen ñeñt cornaneshatyets Partsocop. Ñeñto'marña ñapa' e'ñe ña tsa'tuerraya allohueney acheñeneshay yo'chñar allempo ashataretta e'ñe ña po'rras. Attoña e'ñe a'poc'taterrnay yo'chñar Yomporesho. ¹⁸ Ñapa' atarr muero'chtosa allempo huapo'ne't topateñets; ñeñtpa' attoch a'ypo'ñereñ Pompor. Ñeñto'marña te'pa' e'ñe puellcapreteño'tey ya ñapa' e'ñe eñoteñ o'ch yenpa'y attoch ahuamencat ponay yeyo'cher allochñapa' amach alla a'puerrataterrye topateñets ñeñtcha' allpon yehuapoya yaña.

3

Jesús ñeñt Yompor Puechemer ña metanene' ama't Moisés atto atarr sherben ña

¹⁻² Ñehua, masheñneshacha' ñaña no'chaneshacha' sapa' ñeñtes o' sa'cohuentataretterra Partsocop ñeñtes o' chore'terres Yompor o'ch chapaterres all pue'ntaño. Te'pa' o'ch notas, o'ch soctape'ch e'ñe cohuen ñeñt atet perrnay Cristo Jesús ñeñt yame'ñerra. Ñapa' atto allsensarettapa' e'ñe cohuen etsotuan ñeñt atet llesense' Pompor. Ñaña ñapa' ña Yecorneshar yepen ñeñt atarr sherbets Partsocop allohuenacpay ñeñtey ame'ñenaya Yompor. Ñapa' e'ñe attecma cohuen etsotuan ora allpon ñeñt atet muenach Pompor acheñeneshacop atet pe't ñaña Moisés ñapa'cho'ña e'ñe etsotan ñeñt atet och Yompor allohuen pueyochreneshacop. Ñehua, allohuen ñeñt pueyochrenesha' pen Yomporpa' ñetpa' pa'paquëll penanet Yompor. ³ Ñehua, yeñoteñ ñerra'm eñall puepahuarr pocoll ñeñt tomatenet e'ñe cohuen añcha'ña atarr cohuen yenten ñeñt tomatene'. Amachña aña cohuen yenteno pocoll tarro'mar pocollpa' ama ñofaye' cohuenteno; eñallca'yeña pamo'mte' ñeñt a'cohuentatene'. Attecmach yeñch ñaña Jesús atarr cohuen tarro'mar ñapa' atto ame'ñatana shonte' ñeñtcha' pueyochrenesha' pa' Pompor attoña tomatosan ñaña pocoll ñeñt atarr cohuen ñeñtcha' pa'paquëll pen Pompor. Moiséspa' amachña ñañeña atarr cohuen yenteno tarro'mar ñapa' ama ñaye' tomataye ñeñtcha' pa'paquëll perr Yompor. ⁴ Ñehua, yeñoteñ allohuen pocollpa' ama ñofaye' ye'chquëno; chocmaca'yeña eñall ñeñt ye'chcatene'. Ñeñt ye'chcate' esocmañen ñeñt eñal'tyetsa ñeñtpa' Yomporña ye'chcatuahue'. ⁵ Añña Moiséspa' e'ñe cohuen etsotan ñeñt atet yechya Yompor; ñeñtpa' o'ch es eñotatyesan acheñenesha' tarraña ñeñtpa' toma'nteñtsa. Tsapatonetña Yomporpa' o'ch eñotaterranet ñeñt e'ñe eñotochen. Ama't e'ñe cohuen etsotenaneñ Moisés allohuenacop ñeñt pa'paquëll pen Yompor allempo, tarraña ñeñt atto sherbenan Yompor pa'pac'llopa' ñapa' atta pueñañra peñ Yompor. Amaña Puechemereye'ña peñe. ⁶ Ñapa' añca'yeña Puechemer pen Cristo ñeñtcha' sherberrets tsapatonet allohuenacop ñeñtcha' e'ñe pa'paquëll perr Pompor. Ñapa' e'ñe cohuen etsoterran ñeñt e'ñe Pomporecop. Allohueneypa' e'ñe pa'paquëll pohueney Yompor allcha' ye'chena ña ñerra'm allo'nach huomenc yeyemuetneña attochña e'ñe yocsheñeshocma yecua'huanom ñeñt o'patatenya.

Yomporpa' e'ñech cohuen amesaterran pueyochreshachno ñeñtcha' e'ñe cohuen ame'ñerraya attoch e'ñe cohuen cosherret

⁷ Ñeñto'marña Parets Puecamquëño'tpa' atet oten all aquellcare't Yompor po'ñoño ñeñtpa' atet oten:

Ñerra'm se'mueñ Yompor atto chore'tenes te',

⁸ sañapa' chochña se'mñooh, amachña cha se'charrtatatsto seyocher. Amach cha satpare'tatsche atet pe't israelnesha' ahuať allempo chopeñe'chyesete't amayo. Allñapa' epaye' atsrre'moçhtana'tyesnete't.

⁹ All amayo satañneshaññapa' atarr topatnete't atto'ch eñotnet po'ñocho'te' atsa'tatañen. Ñetpa' atet pa'yesnete't ama't chocma entyesonete't ñeññ norrtatyesanete't. Pa'tatsoch çharra' charohua entyesonete't ñeññ chocma negatyesanete't.

¹⁰ Ñeñño'marña napa' atsrre'moçhen nentyesanet, napa' atet not: "Ñeññ atet cotape'chenet pueyoçhro ñeññ ama cohuenayaye ñetpa' atarr panteñet nocop. Ama añeye' mueneneto o'ch cotape'chet ñeññ cohuen nenten na."

¹¹ Atarr atsrre'moçhen nentanete't. Ñeñño'marña atet not ñocpuet: "Ñetña po'ñooh ama't ahuaťapa' amach neçhapaterraneto allcha' pocsheñeshoťpa' o'te' amesapreterretañ." Ñeñño'marña ñocpuetpa' atet nena' neñoñ e'ñe na neso'chño.

¹² Ñeñño'marña masheñneshacha' ñaña noçhaneshacha' te'pa' o'ch notas saña, e'ñech señoata seyoçhro atet soçtape'chyen e'ñe puesheña'ttsos, ñato'pa' amate' cohuenayey soçtape'cheno, ñato'pa' amate' po'ñoçhaye' same'ñeñoña Yompor. Ñerra'm po'ñooh atet sepenapa' ñeññpa' ñeññach sequeçhpaterre' Yompor ama't ñeññ Yomporer ñeññ ama arromñaťeshayaye. ¹³ Sapa' e'ñepa'chña cohuen soçtape'chatanna'tnoma pate'tets yet tayepa'tñapa' orameñ yet allempoteñ o' chore'terrey Yompor. Attochña so'chñarpa' amach erroťenot alla shequërrserro. Attoch amach cha se'charrteno seyoçhro allochñapa' amach alla satpare'tere Yompor, ama't e'ñe puesheñarroťesa. ¹⁴ Allo'nepa'chña e'ñe huomenc yeřa'nom yeyoçher. E'ñepa'chña yeyoçhrocmañen yeyemteña Cristo atet yeřa' allempo e'ñe errtey ame'ñenaya. Ñerra'm atetcha' yeyemuetnoña allempopa' yagapapretercha' Cristo ñeññ o'patateña Pompor.

¹⁵ Ñeñño'marña o'ch alla neyerpaterrser ñeññ atet oten Yompor po'ñoñ ñeññ aquellcaret ahuaťoteñ, ñeññpa' atet oteneý:

Ñerra'm se'mueñ Yompor atto chore'tenes te' sañapa' chochña se'mñooh, amachña cha se'charrtatatsto seyocher. Amach cha satpare'tatsche ñeññ atet pe't israelnesha' ahuať allempo chopeñe'chyesete't amayo.

¹⁶ Ñaña te'pa' o'ch neyerpaterrser ñeññ atpare'tyesaye't Yompor allempo pueçhore'teñoťpa' eñorana'tanete't, ñetpa' ñeññareta ñeññet cha'nmaçha'taterr Moisés Egiptot. ¹⁷ Ñaña o'ch neyerpaterrser, ñeññ atarr atsrre'moçhen entyese't Yompor ahuať ama't pa'tatsoch çharra' charohua, ñetpa' ñeññareta ñeññet atarr ochña'tare'tatsete't.

Ñeñño'marña ñet allempopa' e'ñe alla colla'huet amayo. ¹⁸ Ñaña o'ch neyerpaterrser, ñeññ otareťtatsa allempo ñetpa' ama't ahuaťapa' amach amnataretterreto attoch pocsheñeshoťeta' o'te' amesapreteretañ Yompor, ñeññpa' ñeññara ñeññet atarr atparñaťtatsete't. Ñeññ atet otareťtete't allempo, Yomporña nahuet po'ñoñ e'ñe ña pa'so'chño, țarro'mar ñapa' ama puenesho po'ñoñ. ¹⁹ Attoña yeñotenanet ñetpa' ama't puesheñarroťetapa' amach eshcaye' çhapueto allcha' yeçha'huerretañ e'ñe cohuen pueñmañesha' țarro'mar ñetpa' ama eseshaye' cohuen ame'ñayo Yompor.

4

¹ Ñehua, Yomporpa' po'ñooh oteneý yeçhapcha' allcha' yamesapretera allcha' e'ñe cohuen yocsha'huera Yompor ñerra'm po'ñoohcha' yame'ñera yaña. Tayepa'tñapa' orameñ atet oteneý yaña e'ñe yeñcha'nañoťpa' yame'ñyepa'ch te't puesheña'ttsotespa' amate' seçherro saña all. ² Tarro'mar ñeññ atpare'taye't all amayopa' aserrpare'tatareťtetañña cohuen ñoñets Yomporeshoť țarraña ama huenetoña patparñet țarro'mar ama't e'metañpa' ama eseshaye' ame'ña'pahuoye' entaye. Yapa'çho'ña o' serrpare'taterryet

yaña cohuen ñoñets Yomporeshot. ³ Ñeñteycha' e'ñe po'ñoçh ame'ñerraya Yompor ñeñteycha'ña çherrets allcha' yamesapretera allcha' e'ñe cohuen yocsha'huera Yompor. Ñeñña ama ame'ñetsopa' ñetpa' amach esesha' çhertso allcha' coshapreteret Yompor. Ñeñtpa' e'ñe atecma ñeññ atet otaretta ahuat ñeññ ama ame'ñatso. E'ñe atet otene Yompor po'ñoñ all aquellcaret, ñeñtpa' atet oten Yompor:

Atarr atsrre'moçhen nentanete't ñeñto'marña atet nena' neñoñ ñocpuet: “Ñet po'ñoçh ama't ahuatapa' amach neçapaterraneto allcha' amesapreterrnet allcha' e'ñe cohuen cosha'huerrnetañ.”

Attoña ñetpa' amach eseshaye' çhertso allcha' e'ñe cohuen coshapreteret Yompor. Ñehua, ahuat Yomporpa' ña orrtate' ameseñets e'ñe allempoteñ yeçcatuahuan pats ñaña enet. Ñeñña ameseñetspa' atarr coshateney yeyoçhrocmañen. ⁴ Tarro'mar all po'ñoño yeñoteñ atet aquellcaret, ñeñtpa' atet oten:

O' yeçcatuan Yompor allohuen ñeññ allpon yeçcatyesua, po'cançherrmatñoña' o' ames Yompor.

⁵ Tarraña po'pocheño all oterrerr Yompor po'ñoñ ñeññ aquellcaret, ñeñtpa' atet oten:

Ñeññ ama name'ñenayopa' amach eseshaye' çhertso allcha' amesapreterrnet attoch e'ñe cohuen coshapreterrnet.

⁶ Ñeñto'mar yeñoteñ ñeññ e'mayeñ ahuat cohuen ñoñets ñetpa' amach eseshaye' çhertso allcha' amesaterranet Yompor attoch e'ñe cohuen pueyoçhrohuen cosherret tarro'mar ñetpa' ama eseshaye' ame'ña'pahuoye' entaye Yompor. Tarraña ama't atteñpa' yeñoteñ Yomporpa' ama puenesho po'ñoñ. Ñeñto'marña te'pa' yeñoteñ Yomporpa' atterach e'ñe cohuen amesaterran ama't erra'tsena ñeñtcha' po'ñoçh ame'ña'po' enterre', attochña ñetpa' çherretcha' allcha' e'ñe cohuen cosherret. ⁷ Ñehua, ñeñto'marña Yomporpa' onañcherran po'poñ po'yeter, ñeñtpa' o' çherr te' esheccha' ama't patantarra acheñpa' o'ch ame'ñeñet. Ñeñto'marña yeñoteñ Yomporpa' ora attera cohueney tarro'mar ama't metuen aton char allempoteñ atpare'chete't all amayopa' o' çhap allempo atto eñosatan David. Ñeñtpa' ñeñtara ñeññ o' notuanmas:

Ñerra'm esempoch se'mueñ Yompor atto çhore'tenes saña'pa' çhochña se'ññoçh tayepa'tña orameñ yet allempo o' çhore'terres Yompor, amachña çha se'charrtatststo seyoçher.

⁸ Ñehua, yeñoteñ Josué ahuatpa' e'ñe çhapatan israelnesha' puechemereshachno all patso ñeññ all sechete't ahuatoteñ allcha' yeçhoret. Tarraña ama't çhapatanetañ allpa' ama eseshaye' pocsheñeshot pueyoçhrohuen amesostsoña all. Ñerra'm e'ñech cohuen amesatuerranetañ Josuépa' amach onañcherranñerroña Yompor po'poñ po'yeter attoch coshaterrey e'ñe cohuen yeyoçhrohuen. ⁹ Ñeñto'marña yeñoteñ te'pa' eñallmeñ ñeññ o'patatenya Yompor ñeñtey pueyoçhresha' pen allcha' e'ñe yocsheñeshocmañen yamesuerr. Ñeñtpa' e'ñe atet ñerra'mrrate' allempo ames Yompor ahuat po'cançherrmatño. ¹⁰ Tarro'mar allohuen erra'tsencha' çherrets allcha' amesaterranet Yomporpa' ñetña'pa' amach alla es llecaterrahuete'te; e'ñe pameseñotet cohuenpa' e'ñech eñmaterret pueyoçhrohuenet atet ñerra'mrrate' allempo e'nuan e'ñe poctacma Yompor po'taruas, e'ñe pocsheñeshocma ames. ¹¹ Yapa'çho'ña añepa'chña ye'nen attoch yeçherr yaña allcha' amesaterrey Yompor attochña e'ñe yocsherra yeyoçhro. Te'ña'pa' ama't puesheñarrotayapa' amuepa'ch alla yatpare'terre'te te't ama yeçherro yaña all.

¹² Yompor errof otene, po'ñoña'pa' atarr ahuaamencat ñeñtpa' ama ahuañañaate. Ñeññ po'ñoña'pa' e'ñe atet etsotenan ñeññ atet muenen ña. Po'ñoña'pa' allo çhocma ñerra'mrrate' cochell ñeññ atarr etsotañtaref emoto'mar. O'ch es yepata' allopa' e'ñech be'tosua ora, e'ñech pecha'tampesuoñ ama't posapohuen. Atetca'ye penaña Yompor po'ñoñ e'ñech çhaponaya e'ñe yeyoçhro ama't e'ñe yecamquëñohuen, ñeñtcha'ña e'ñe yeñotaterre'

ñeñt̄ yeyoçhro'tsen ama't ñeñt̄ allpon yoc̄tape'chyen ora esocmañen. ¹³ Ama't puesheñarrofeya amach erroteno't ye'potam̄pesyoña Yompor ñeñt̄ yeyeçhcate'. Amate' erroteno't ya'nasotam̄pesyoña, ñapa' e'ñeca'ye entuennayña yeyoçher ñeñt̄ ora allpon es yoc̄tape'chyen. Ñapa' ñach ya'metatatuerre' allohuen ñeñt̄ allpon yoc̄tape'chyen.

Jesúspa' ña corneshaterrets, e'ñe metana'tuerran allohuen cornaneshachno atto atarr sherben ña

¹⁴ Ñehua, yeñoteñ eñall ñeñt̄ Yecorneshar yepen ñeñt̄ atarr Partseshatets, ñeñt̄pa' ñeñt̄ara Jesús ñeñt̄ Yompor Puechemer. Ñaña'pa' o' alla çherr allohuanen pue'ntaño e'ñe all Pomporesho, allña e'ñe cohuen a'poc̄tatennay yocop. Ñeñto'marña yapa'cho'ña allo'nepa'ch yeyemuetneña. Amuepa'chña yequeçhpatstere. ¹⁵ Tarro'mar Jesús ñeñt̄ Yecorneshar yepen ñapa' e'ñe eñoteñ attoch e'ñe cohuen llecapretenya allempo ama e'ñeye' huomencaye'yenteno yeyoçhro. Tarro'mar ñapa'cho'ña attecma huapoñe't allohuen pa'namen topateñets, e'ñe atet yepena ya te' çhocma huennaya pa'namen topateñets. Tarraña ñapa' ama't pa'namen huapoye't topateñets, ñapa' ama't parrocha ama ãano ñeñt̄ ama poc̄teye' enteno Pompor. ¹⁶ Ñeñto'marepa'chña e'ñe yeyemteño't Yompor Puechemer, amach yem̄cha'nañofey'e' yeçhore'teñe Yompor ama't ñeñt̄ atarr partsotets po'conaño. E'ñe puemuereño'fey e'ñech cohuen e'mñoteny, çhocmach yepuene'y. Ñaña ñerra'm esempo huennaya ñeñt̄cha' yelcatene' ñachña e'ñe ahuamencat yepene'.

5

¹ Ñehua, yeñoteñ allohuen ama't erra'tsena ñeñt̄ pa'm̄cha'tareter pen ñeñt̄ corneshatyets judioneshacop, ñeñt̄pa' acheña, arromñaña. Ñapa' añecop acrare'tta ñach anare'ttatsa attoch eñen acheñeneshacop Yomporesho. Allempo es apueñet Yomporpa' ñach anene' o'pono Yompor pa'pac̄llo. Allempo muetsenet payara ñeñt̄ allo sherbeñet Yomporpa' ñach nene' eyarra po'rrias allo tsa'tenana pueyochreshachno po'chñar. ²⁻³ Ñapa'cho'ña ama huomencaye' enteno pueyochro tarro'mar ñapa' arromñaña ñeñto'marña ama e'ñe pueyochreshacpayaya nenanoña eyarra po'rrias; ñeñt̄pa' ñocpa'naña neñ allo tsa'tenana ñaña po'chñar Yomporesho. Atto ñapa'cho'ña ama huomencaye' enteno pueyochro ñeñto'marña ñapa' e'ñe eñoteñ o'ch llecapretana pueyochresha' allempo es pantenet ñet ñaña allempo yeçhcatenet ñeñt̄ sosey enten Yompor tarro'mar amaña e'ñe ñeñt̄a neneto pueyochreto; çhocmaña pueseñet Yompor.

⁴ Ñaña yeñoteñ ama't e'ñe puesheñarrapa' ama eseshaye' netso e'ñe ñañaña attoch corneshat Partsocop. Ñeñt̄pa' Yomporña çhore'tene' ama't erra'tsena puesheñarr ñeñt̄cha'ña corneshatats. Ate't pa' ñaña Aarón, ñapa' Yomporña ne' atto corneshate't Partsocop. ⁵ Cristopa'cho'ña attecma pa' ñaña ama ñaye' otatso, "ñapa' nach corneshatats." Pomporña ne' ñeñt̄cha' corneshatats attoch yecohuentateññañ. Yeñoteñ Pomporpa' atet cohuentateñ tarro'mar Yompor po'ñoñ ñeñt̄ aquellcare't ahuat ñeñt̄pa' atet oten: Papa' Nechemerep̄, te'ñapa' o'ch neñotach acheñenesha' po'ñoçh pa' Nechemer nepene'p̄ tarro'mar te'pa' o'ch nena'p̄ pach am̄cha'tare'ttertsa.

⁶ Po'poñ aquellcare'topa' all otererr:

Papa' attoch pecorneshaterrpa' ñeñt̄pa' amach huañerro ama't e'ñe errponaña. E'ñe atet o' pa'llsensare'tterra atet ñerra'm Melquisedec ñeñt̄ corneshatatse't ahuat.

⁷ Allempo allo'tsenmeñ Cristo arr patsropa' ma'yocham̄psa ñañaña. Ma'yocham̄psa e'ñe huomenc puellquēñesha'. Pueya'chpeñesha' enaman Pompor ñeñt̄ atarr ahuamencatesha' attoch a'queshpach puerromueño't. E'ñe pom̄cha'na'teño'tan Pomporpa' atet och: "Amach añeye' atet pe'patstono ñeñt̄ nemnen na; añcha'ña atet pe'pon ñeñt̄ pemnen pa." Ñeñto'marña Pomporpa' e'ñe e'mñoch. ⁸ Ñehua, Cristo ama't e'ñe

Yompor Puechemerpa' ñapa'cho'ña atarr mueroçhta, attoña e'ñe yeçhan attoch e'ñe cohuen e'mñotenan Pompor. ⁹ Atto yeçhan pue'mñoteña' ñeñto'marña e'ñe etsotuan ora attoch a'qushpataña, allochña' attoch a'qushpaterran e'ñe poctacma allohuen erra'tsencha' e'mñoterre' ña. ¹⁰ Ñeñto'marña Pomporpa' ne' ñach corneshaterrets Part-socop e'ñe atet corneshate't ahua't Melquisedec.

Ñeñi ama huomencaye' penaye pueyoçher Yomporecop çha ottena ñerra'm ematoll

¹¹ Ñeñtpa' orameñ shontemeñ nemneñeñ o'ch notaseñ. Tarraña ama'tcha' no-taseña' atarr torrapo' o'ch neçhapatonas seyoçhro tarro'mar te'pa' o'huañ tama semne' ama't erra'tsenapa' o'ch se'mñoteñ. ¹² Sapa' ahua'toteñ same'ñenañ ñeñto'marña te'pa' socoppa' añ poctetsañ o'ch seyçhatyeseñ po'potantañeçhno ñeñt allpon shonte' señotyeneñ. Tarraña saña' amaña atteye'ña sepeno tarro'mar sapa' teme'ttsen sepa-lltena o'ch alla yeçhaterrseterr Yompor po'ñoñ ñeñt yeçhatuaset e'ñe ñenmañ ama't ñeñtpa' ama torrapahuoyaye yocop o'ch yeñoçh. Sapa' ama huomencaye' sepeno seyoçher tarro'mar sapa' çha sottena ñerra'mrrate' ematoll ñeñt añach orren pachor pomosos ñeñt ama etsotenana' o'ch rran rreñets ñeñt yerren ya. ¹³⁻¹⁴ Ñaña yeñoteñ allohuen ñeñt añach pocrramñ pen pomosos, ñeñtpa' ematolla ama eñotenana' o'ch e'nan rreñets ñeñt çhocma yerren. Ñaña ñeñt ottetsa ñerra'mrrate' ematollpa' ama eñotenanoña Yompor po'ñoñ attoch pocte' eñch Yompor. Tarraña ñeñt po'ñoçh atet enten Yompor ñerra'mrrate' po'nanasha' ñetpa' e'ñech eñotenet ñeñt pocte' enten Pom-poret ñaña ñeñt ama pocteye' enteno; tarro'mar ñetpa' ahua'toteñ ame'ñeret Pomporet. Ñeñto'marña ñetpa' allo'na senet etsotnomuet Yompor po'ñoñ ama't ñeñt atarr echarr ñeñtña e'ñe pocrramñ penet.

6

¹⁻³ Allo'nepa'ch yesen e'ñe yeçha'nmue' Yompor poctapña ama't ñeñt atarr echarr. Allochña' yepeñoñ atet muenen ñapa' e'ñech po'n enteneyña Yompor. Ñehua, sapa' o' e'ñe seyçherr ñeñt ñenmañ yeçhataset Cristocop, attoch sequeçhpa'huerrña ñeñt atet seyeçhcatyeseñ ñeñt ama a'qushpatañeyaye. Añca'yeña o' ello soctape'cherr cohuen Yomporecop çhoca'yeña o' same'ñera. O' seño'terr ñaña ñeñt atet yap-atare'ttena Yomporecop, ñaña atto çhocma yenen yot ñesheto ñeñt ame'ñatsa. Ñaña o' sa'yçhatare'tterra attoch yetanterra ñaña attoch esempohuañenpa' ya'crare'tterrach allohueney erro'tencha' entyesuerrey Yompor, ñato' cohuenta' yeña'yen, ñato' amate' cohuenaye' yepeno. Ñeñt o' yeçhatuanmaset ahua'ño'teñ Cristocoppa' amachña ñeñtñaña alla seserrpare'tame'terre'te. Añcha'ña allo'nepa'chña yesen eñotnomue' po'poñeçhno Yompor poctapña ñerra'm Yomporcha' yemnate'.

⁴⁻⁶ Tarro'mar yeñoteñ ñerra'm esesha' o' çhapoña pueyoçhro ñeñt cohuen enten Yompor ñaña ñerra'm o' agapan Yompor ñeñt apueney attochña yapa' corretsayach tayoteñ errponohuañen pue'ntaño, ñaña ñerra'm o' agapan Yompor Puecamquëñ ñaña ñerra'm çho yomenana Yompor po'ñoñ ñaña ñerra'm eñotuanman Yompor po'huamenc ñeñt ama ahuañañateyaye, tarraña ñerra'm o'ch alla puerrerret, ñetpa' amach erro'tenoñ alla yoc'tape'chaterranete'te attoch cotape'cherret etserra cohuen Yomporecop. Tarro'mar ñeñt acheñerpa' añ toma'ntena ñeñt atarr muenene' o'ch alla corso'tam'perranerr po'pocheño Yompor Puechemer; attoña o' alla achm'are'tererr allo'tsa'yen shonte' acheñenesha'. ⁷ Ñeñt atet petsapa' o'ch netma'ntacha ñeñt atet pena pats. Ñehua, allempo e'ñe cohuen huapotam'psatenan Yompor pats ñerra'm o'ch chepares pa'namen narmetsoçhno ñeñt'cha' coshatene' pamo'mte' ñeñt nare'tene', Yomporña çhocma a'torene' ñeñt pats esheccha' pa'namen yeçhquëtsa all. ⁸ Tarraña

ñerra'm aña cheparsats pa'namen ajachno ñeñt ama cohuenayaye, ñeñña patspa' amach es sherbeno. Yomporshotpa' arrnomare'terrach attoch a'poyare'tterra.

Atto e'ñe yeyemteño't Yompor chocmach yecuen ñeñt o'patatyenya

⁹ Tarraña ama't atet notensoñ masheñneshacha' sa ñeñtes atarr nemorrentena, napa' necuenes ñaña neñotenes sapa' o'ch alla sorrtyeryer e'ñe cohuenare' ñeñt atet orrtatyen allohuen ñeñtcha' qeshperrtsa. ¹⁰ Tarro'mar Yomporpa' e'ñe pocte' es pennay. Ñapa' chocma po'ño'ch entenes ñeñt atet setorra'yena ñocop ñaña atto semorrenteñña allohuen ñeñt pueyochresha' pen Parets. Ñeñto'marña e'ñe same'neño't ñapa' e'ñe cohuen seyempa'yeñ allohuen masheñneshachno ñeñt pueyochresha' pen ña, ama't teme'ttsen attecma sepena. ¹¹ Añña atarr nemnen ama't allohuenespa' allo'nepa'chña sesen orrtatyenesnomue' ñeñt cohuen enten Yompor, e'ñechña socsheñeshocmañen sorrtyesuanom allohuen ñeñt cohuen enten Yompor e'ñe atet socsheño't chocma seyempa'yeñ ñeñt pueyochresha' pen Parets. Attoña e'ñe seyemteño't Yompor secuen ñeñt o'patatenya. ¹² Attochña amach cha se'lllatsto Yomporcop, añcha'ña sepena samña ñeñt atet pa'yena po'potantañe'chno ñeñt pame'neño'tet Yomporpa' ama't erro'tuaneno'tsa'yenet ñetpa' chocma ahuanta'huaneñet. Attochña e'ñe o'patueññañet Yompor ñeñt oteney Yompor ñeñtcha' apguerrey.

¹³ Tarro'mar yapa' yeñoteñ chocmach apguerrey ñeñt atet oteney. Ñehua, yeñoteñ Yompor ahua'tpa' atet otane't Abraham ñeñtcha' atet perrñañ tsapa'onet po'mrenñecop. E'ñe ñañaña pa'so'chño atet otan Abraham tarro'mar ama eñalle po'poñ ñeñt atarr ahua'mencatesha' atet ñerra'm ña allcha' a'pocatan po'ñoñ. ¹⁴ Ñeñto'mar e'ñe ña pa'so'chño atet otan Abraham: "Na po'ño'chpa' atarrcha' nebensare'tam'psa'p attochña na'm'raterrna'p ñeñtcha' pem'reneñ peperr." ¹⁵ Ñeñto'marña Abrahampa' e'ñe pueyemteño't Yompor po'ñoñ atet oteñ ñapa' ama que'chpueñe, chocma cohuanan ñeñt atet oteñ Yompor. Ñeñto'marña Abrahampa' po'ño'ch agapater Yompor ñeñt atet oche't ahuatoteñ. ¹⁶ Ñehua, yapa' yeñoteñ acheñ arr patsro ñerra'm es muenenet o'ch es otenet e'ñe po'ño'ch, ñetpa' o'ch otenet e'ñe añ pa'so'chño ñeñt atarr ahua'mencatesha'. Ñerra'm atet penetpa' attoña eñoteñet ñeñt ñoñetspa' o' anare'tta, o'huañcha' allo'na otnare'tanna'tnenet po'ño'ño'maret. ¹⁷ Yomporpa'cho'ña e'ñe attecma nan po'ñoñ e'ñe ña pa'so'chño tarro'mar ñapa' mueneñ o'ch eñotateney amachña a'po'poñeta'm'perryeña po'ñoñ, allohueneñ ñeñtey o'patatena ñeñt atet oteney o'ch apguerrey. ¹⁸ Ñeñto'mar yeñoteñ Yomporpa' e'ñe epoch eñotateney e'ñe po'ño'ch atetcha' perrnay, ñaña Yompor po'ñoñpa' ama choye' shequënye. Ñeñto'marña e'ñe yeyemteño't ñapa' yeñoteñ po'ño'chpa' a'qesh'patuerreycha' ñeñt atet oteney. Ñeñto'marña yecueñ ama't allohueneñ ñeñtey e'nene' ña ñachña ya'qesh'patuerre'. ¹⁹ Ñeñto'marña yeñoteñ ñeñt yecuen ya o'ch a'qesh'patuerrey Yompor ñeñt'pa' e'ñe po'ño'ch, ñeñt ama ahuañañayaye. Ñeñto'marña yeñoteñ e'ñe yeyemteño't ña yecamquëñña' e'ñe cohueno'tsen amach erro'teno't chenquërro. Yeyemteño't Yompor ñeñt'pa' añ toma'ntena ñeñt orrene' barco oño ñeñt otenet ancla. Allochña barcopa' amach erro'teno't chenco. Ñeñt atto yeyemteña Yompor ñeñtña anclatetsña yecamquëñecop ñaña ñeñt'pa' e'ñe po'ño'ch allo e'ñe huomenc orrena yecamquëñ tarro'mar ñeñt'pa' Yomporshot anaret e'ñe allohuanen ñeñt allo'tsen Parets pa'paclo pue'ntaño, e'ñe allohuanen allo'tsen besom allo yottam'peññañet Parets po'poner. Allca'yeña anare'ttenaña ñeñt toma'ntenaya ancla atto ya yeyemteña Yompor. ²⁰ Tarro'mar e'ñe all Partseshopa' allña o' cherrña Jesús ñeñt o' otam'perrya allcha' a'pocatosnay e'ñe cohuen yocop Pomporesho. Allña'pa' o' corneshatuerr Partsesho. Atto o' corneshatuerr ñeñt'pa' amach huañerro ama't errponaña. E'ñe atet o' allsen-sare'tterra o'ch corneshatuerr ñerra'm'rate' atet corneshate't ahua't Melquisedec.

7

Jesús pa' atarr cohuen corneshatos Partsocop atet corneshate't ñaña Melquisedec Partsocop ahuat

¹ Ñehua, te'pa' o'ch alla neyerpaterrsa ñeñt atet pe't ñeñt corneshatatse't ahuat ñeñtpa' añ pa'so'cheñ Melquisedec. Ñapa' ñeñt corneshatatse't Partsocop ñeñt atarr partsotets. Ñaña ñapa' ñeñt ancha'tarettatse't all anetso ñeñt pa'so'cheñ Salem. Allempopa' correna ñaña yatañ Abraham. Parrochña Abrahampa' ahua' allcha' quellarenana' po'potantañechno ñeñt ancha'taretyetsa allo'mar. E'ñe a'mchechuahuenaneta'pa' huerra. Allempo err; toñopa' all poctapueñ cornesha' Melquisedec. Allña pocteñpa' allenta bensare'tam̄psapuenan Abraham. ² Ora ñeñt allpon yoram̄psan ñeñt o' quellara'huena'pa' allempoña Abrahampa' aphuenan cornesha' Melquisedec allpon ñeñt Partsocop. Allpon aphueña' ñeñtpa' ñeñt allpon otenet la décima parte. Ñeñtpa' atet ñerra'm es eñall ñeñt yechen çharrapa'ttsocma, pate'tetsñapa' o'ch yeneñ e'ñe Partsocop. Ñehua, ñeñt so'chñetser Melquisedecpa' añ otenet “ñeñt pompor pen allohuen ancha'taretechno ñeñt e'ñe pocte' enten Parets.” Allo'tpa' ñaña ñapa' arr ancha'tarettena anetso añ pa'so'cheñ Salem. Ñeñt anetser pa'so'cheñ añ otenet “muechetteñt sompañño” tarro'mar all ancha'tarettena ñapa' ña orrtatene' e'ñe cohuen morrentanna'teñets attoña yeçhenet e'ñe cohuen muechet. ³ Ñeñt Melquisedecpa' ama eñotpahuoyayeña ñeñt pompor pe't ñaña ñeñt pachor pe't tarro'mar ama aquelcareteyaye ñeñt pa'so'cheñ. Ñaña ñeñt pa'tañneshañ pe't ñeñtpa'cho'ña ama eñotpahuoyaye. Ama't ñaña allempoteñ eñalleta Melquisedec ama't ñaña allempo rroma ñeñtpa'cho'ña ama eñotpahuoyaye. Ñapa' tarro'mar atet pe't añ toma'ntena ñeñt Puechemer pen Parets. Ñeñto'marña atto corneshaten ñeñtpa' amach huañerro ama't errponaña.

⁴ Señoche'pa'ch cornesha' Melquisedec ñapa' atarr sherben. Ama't yatañ Abrahampa' çhocma es apane't Melquisedec atet ñerra'mrrate' ñeñt es yenen ñeñt Partsocop. Añ aphueñ ñeñt allpon yoram̄psan ñeñt o' quellara'huena'. Allpon aphueñ ñeñt atet ñerra'm çho es yenen Partsocop ñeñtpa' atet ñerra'mrrate' ñeñt allpon es yechyen e'ñe çharrapa'ttsocma, pate'tetsñapa' o'ch yeneñ e'ñe Partsocop. ⁵ Ñehua, yeñoteñ levína'tarnesha'pa' ñeñtena'tarña anarettatse't judioneshacop ñeñtcha' corneshatets Partsocop. Ñocpuetña nanña Moisés po'ñoñ, ñeñtña ñoñetspa' atet oten ñocpuet: E'ñe pocte' secobreñ acheñenesha'. Apa'yenetepa'ña allponapa'tets ñeñt Partsocop, atet ñerra'mrrate' ñeñt allpon yechyen e'ñe çharrapa'ttsocma, pate'tetsñapa' o'ch yeneñ e'ñe Partsocop (ñeñtara otenet diezmo). Ñeñto'marña çhocma cobreñetña pamo'tsesha' ama't e'ñe ñeñtena'tarecmuet, tarro'mar Abrahampa' ñeñtara pa'to' pohueñet allohuenet. ⁶ Tarraña Melquisedec ama't ñapa' ama levína'tarneshayaye ñaña'pa' ello metana'tuenanet ñet tarro'mar ñapa' ama't yatañ Abrahampa' agapoñe't allpon ñeñtcha' a'p Partsocop. Elloña bensare'tam̄penan Abraham ama't Abrahampa' o' otue Yompor ñach bensare'tam̄pse'. (Abrahampa' e'ñe pocte' enteñ tarro'mar atarr ahua mencatesha' entenan Melquisedec.) ⁷ Ñehua, yeñoteñ po'ñoçh ñeñt atarr nanac ancha'tarettetsa ñapa' ñachña bensare'tam̄pene' po'potantañechno ñeñt ama tama ancha'tarettetso atet ñerra'm ña. Ñeñto'marña yeñoteñ Melquisedecpa' atarr sherben tarro'mar ama't ancha'tare't Abrahampa' ñapa' ello bensare'tam̄peñ. ⁸ Ñeñt yenten arr patsro ñeñt corneshatets Partsocop, ñetpa' arromñafo'ta atet penet. Tarraña ama't arromñafo'ta atet penet çhocma aguëññañet acheñenesha' ñeñt apa'yenet Partsocop. Melquisedecpa'cho' ñaña agapaye't ñeñt apa'yesete't Partsocop. Tarraña Melquisedec ñeñt atet anare't Yompor po'ñoño ñocop ñeñtpa' atet oten ñerra'mrrate' ñapa' ama arromña'teshayaye.

9-10 Ñehua, ñato' o'ch yot Leví ama't allohuen pue'ñareshohuen, ñeta'naña agapanñpsanet Melquisedec ñeñt allpon apueñet Partsocop e'ñe allempocma agapan ñeñt ap Abraham Partsocop. Ama't ama eñalletena' Leví allempopa' te'pa' o'ch yot ñapa' e'ñe pa'to' Abraham po'chtso'tsen allempo, allempo pocten Melquisedec. Ñeñto'mar te'pa' o'ch yot levína'tarnesha' ñeñt po'taruas pene' o'ch cobran acheñenesha' attoch allpon apa'yenet Partsocop, ñeta'netepa'tña cobra'ña allempo Melquisedec. Ñeñto'marña yeñoteñ Melquisedecpa' atarr sherben, ello metana'tuenan levína'tarnesha' ñeñt corneshatyets Partsocop.

11 Ñehua, yeñoteñ ahuat allempo apareta israelnesha' ñoñets ñeñt atet anaret, ñeñtpa' añ orrtate' levínesha' ñeñt corneshatyestset ahuat Partsocop. Tarraña añ ñoñets ñeñt orrtat cornaneshachno ñeñtara levínesha'pa' ñeñtpa' amach errotenot a'cohuentaterranetoña Yomporecop. Ñerra'm po'ñoçhcha' a'cohuentatenyeñ amate' eso'mar huapoña Cristo ñeñtcha' corneshatosets ello ñeñt atet corneshate't Melquisedec, ñeñtpa' ama atteye' corneshatoso ñeñt atet corneshaten Aarón ñeñtara levína'tarnesha'. 12 Ñehua, yeñoteñ ñerra'm esempo Yomporpa' orrtaterran po'psheñeñ ñeñtcha' corneshaterrets po'poñonet, yeñoteñ añ ñoñets ñeñt atet anaret ñeñt orrtat cornaneshash' levína'tarnesha' ñeñt ñoñtsorpa'cho'ña o'ch cha po'poñetuerr. 13-14 Yeñoteñ Yepartseshar Cristo ñeñtña otenña Yompor po'ñoñ ñeñtcha'ña ello corneshatosets. Yeñoteñ ñapa' ama levína'tareyaye, ñapa' judámereñtsoro't eñalleta, ñeñt po'poñ mereñtsor ñeñtara israelena'tar. Ñetpa' ama anareteyayeto o'ch corneshatet Partsocop ñeñt atet anareta levína'tarneshacop. Moiséspa' ama esoye' sochaneto ñocpuet ama't puesheñarrofa attoch corneshatet. Ñaña ñetpa' ama't puesheñarrofeta ama eseshaye'tetso altaro allotecma sherbeñet Parets.

15 Elloña yeñoteñ o' po'poñet ñeñtcha' e'ñe cohuen corneshaterrets tarro'mar allempo orrta Cristo, ñach corneshaterrets atet anarete't Melquisedec. Ñapa' ama atteyaye ñerra'mrrate' atet anarete't levína'tarnesha'. 16 Atto corneshatos Cristo ñeñtpa' ama añecpayaye attoch allo'na corneshatnen levína'tar ñeñt atet anaretenet ñocpuet. Ñapa' añecopña corneshaterr Partsocop tarro'mar ñapa' ña atarr ahuamencatesha' ñeñt ama arromñañeshayaye ama't errponaña. 17 E'ñe Cristocop eñotateney añ ñoñets ñeñt atet anaret Yompor po'ñoño, ñeñtpa' atet oteñ Pompor:

Papa' attoch pecorneshaterrpa' ñeñtpa' amach huañerro ama't e'ñe errponaña. E'ñe atet o' pa'llsensare'tterra atet ñerra'm Melquisedec ñeñt corneshatatset ahuat.

18-19 Ñeñt ahuatoteñ ñoñets ñeñt atet nonaye't Moisés ñeñtcha' atet yepohueneñ ñeñtña te'pa' o'huañcha' ye'cua'per tarro'mar ñeñtpa' ama eñalle po'huamenc attoch ñeñtcha' ya'cohuentaterre' Yomporecop, e'ñe orrena atarr yetorra'yese't. Tarraña te'pa' o' orrtterranya po'poñ ñeñtña'pa' ello atarr sherben ñeñtcha' ya'cohuentaterre' Yomporecop esheccha' yecherr Yomporesho ñeñtcha'ña atarr yeyemterraña te'.

20 Yomporpa' e'ñe ña pa'so'chño nan po'ñoñ allempo llesensan Cristo ñach corneshaterrets errponañohuen. 21 Po'potantañechno ñeñt corneshatyets ñeñtara levína'tarnesha' allempo acornesha'tareteyaset ñetpa' ama Yomporeye' nahueto pa'so'chño attoch corneshatyaset. Tarraña Cristo allempo allsensare'tta attoch corneshatos, ñeñt eñoraten Yompor Cristocoppa' ñeñtña'pa' atet oten:

Yompor o' nan po'ñoñ e'ñe ña pa'so'chño ñeñto'mar amach errotenot a'po'poñetuerrano po'ñoñ; (ñeñtpa' atet ot Cristocop): "Papa' attoch pecorneshaterrpa' ñeñtpa' amach huañerro ama't e'ñe errponaña. E'ñe atet o' pa'llsensare'tterra atet ñerra'm Melquisedec ñeñt corneshatatset ahuat."

22 Ñeñto'marña Jesúsapa' eñotochtaterrnay po'ñoçh atto Yomporpa' a'pocpaterrnay et-serra ñeñtña atarr sherbets, ello o' metana'tuerran ñeñt atet a'pocpatonaye't ahuat.

23 Ñeñt' ahuaŧoteñ cornaneshachno ñeñt'ara levína'tarnesha', ñetpa' epaye' shonta'nmuet tarro'mar chocmach rromayesete't attoña o'huañcha' allo'na corneshatyenesnet. Ellopa' o'chcho' huapa po'psheñeñ ñeñt'ara levína'tar ñeñt'cha' alla corneshaterrets. Ñeñto'mar epaye'shonta'nma ñeñt' corneshatyenesnomtse't ahuaŧoteñ. 24 Tarraña Cristopa' errponañohuencha' corneshaterr tarro'mar ñapa' ama arromñañeshayaye. 25 Ñeñto'mar Cristopa' ña eñotene' attoch chocma a'queshpátenan allohuen ñeñt' e'nene' Yompor ñerra'm e'ñe pueyemteñoŧet ña, tarro'mar ñapa' chocma allo'tsen Pomporesho allecma a'pocstatennay ñeñt' e'ñe cohuen yocop. 26 Ñeñt'pa' e'ñeca'ye pocte'ña yocop o'ch yechen Yecorneshar ñeñt' Cristo tarro'mar ñapa' e'ñe cohuen Parets, ama eñalle po'chñar ama't mamesha ñeñt'cha' a'sosyatene'. Ñapa' o' sohuanerran allohuen ñeñt' cofene' sosya'tsañ o' alla cherr allohuanen Yompor pue'ntaño allña partsotapre-tenan Pompor. 27 Ñapa' ama atteye' p'oso ñerra'm po'potantañ cornaneshachno ñeñt' ahuaŧoteñ. Ñet pate'tets yetpa' epaye' muetsete't payarachno; ñeñt' eyarra po'rraspa' alloña peretnatane'tña cornaneshachno po'chñar. Ellonetpa' o'ch peretnateñet ñaña allohuen acheñenesha' po'chñar ñeñt'ara eyarra po'rroso. Tarraña Cristo ñapa' e'ñe parrocha shatan e'ñe ñañaña po'rros allohuenacop ochñartsocop allempo rroma yocop e'ñe ña puemnenñoŧ; ñeñt'pa' attoña tsa'tuerrnaya yo'chñar Pomporesho. 28 Moisés ñeñt' atet nan ñoñets ahuaŧpa' ñeñt'pa' acheña na'yes ñeñt'cha' corneshatyets atteta ñerra'mrrate' ya ñeñt'ey ama cohuenacmaye' es petso. Tarraña allempo met allpon charpa' allempoña Yomporpa' o' alla nerran po'ñoñ e'ñe ña pa'so'chño. Allempoñapa' nerran Puechemer ñeñt'cha' corneshaterrets ñeñt' e'ñe cohuenare' es pa'yets Partsocop; ñeñt'pa' amach huañerro ama't errponaña. (Ñeñto'marña Cristopa' e'ñe etsotuan ñeñt' nanac sherbets.)

8

Jesúspa' ña a'pocatañtertsa e'ñe etserra yocop

1 Ora allpon ñeñt' o' notuanmas ñeñt'pa' e'ñe po'ñoŧh atet notenes: ñeñt' atto atarr sherben Cornesha' Cristo te'ña ñapa' o' alla anorruerr Parets po'cohuenroŧ all anen po'conaño all pue'ntaño. Allña'pa' o' alla partsotuerr ñaña. 2 Allña'pa' o' atarr sherba'huerr e'ñe allohuanen Parets po'prahuo all e'ñe po'ñoŧh allo'tsen Yompor. Ñeñt'pa' ama atteyaye ñerra'm patso'mar puerahua' ñeñt' tomaten acheñ. Allpa' Yomporña tomatene'ña po'prahua' e'ñe ña pue'ntaño. 3 Yeñoteñ allohuen ñeñt' corneshatets Partsocop, ñetpa' añecopña anarettenet attoch ñetcha' es apuenet Yompor ñaña ñetpa' o'ch muetsenet payarachno Yomporecop attoch peretnatenet po'chñaret. Ñeñto'marña Cornesha' Jesús, ñocoppa'cho'ña e'ñe pocte' o'ch es apan Pompor. (Ñeñt'pa' aña apuerran Pompor e'ñe ñañaña po'chets attoch rroma yocop.) 4 Ñehua, ñerra'm ñapa' allo'tsenaraña aña patsropa' ama't mamesha amate' pocteye' enteññaña ñeñt' corneshatyets aña patsro, tarro'mar ñetpa' añach e'ñe cohuen entenet o'ch es apueñet Yompor ñeñt' e'ñe atet nanete't Moisés po'ñoñ. 5 Ñeñto'marña yeñoteñ ñeñt' atet sherbenet ñet ñeñt'pa' atta toma'nteñet ñeñt' atto po'ñoŧh Cristo e'ñe cohuen sherben Parets po'prahuo ñeñt' pue'ntaño'tsen. Añach sherbenet ñeñt' attema'ttetsa ñeñt' e'ñe po'ñoŧh atet muenen Yompor. Yeñoteñ ñeñt'ecma sherbete't tarro'mar ahuaŧ allempo Moiséspa' ahua'ch tomataneñ ñeñt'cha' po'prahua' pa' Parets arr patsro, all aspenŧo Yomporña gate' ñeñt' toma'ntenaya e'ñe ña po'prahua' ñeñt' pue'ntaño'tsen. Allempoñapa' atet otan Moisés: "Po'ñoŧhpa' e'ñech atet peyeŧcaton ñeñt'cha' neprahua' nepa' añ patsro allcha' yeŧhena Necamquëñ." Arrpa' allohua atet otan Yompor Moisés. 6 Tarraña Cornesha' Cristo te' atto sherberr all pue'ntaño, ñeñt'pa' e'ñe po'ñoŧh poctacma cohuen. Ello metana'tuenan ñeñt' atet sherba'yese't ahuaŧoteñ cornaneshachno arr patsro. Tarro'mar te' ñeñt' atet

o' a'pocstaterrnay Pomporeshopa' ñeñña e'ñe pocstacma cohuen yocop, tarro'mar añ a'pocstateñetspa' pa'namen oteney ñeñtcha' atet perrnay coshateñtso.

⁷ Yeñoteñ ñerra'm e'ñe cohuen a'pocstatyeñe't ñeñt ñenmañ allempopa' amach palltenañe o'ch alla a'pocstaterryeterr e'ñe ello etserra. ⁸ Yeñoteñ ñeñt ahuat a'pocstateñetspa' ama e'ñeye' cohuen yenpa'ye'te tarro'mar allempo Yomporpa' ama pocteye' entane'te israelneshá'. Tarro'mar po'ñoñpa' atet oten ñeñt aquellcare't ñeñt'pa' atet ot Yompor:

Chapcha' allempoch nenerrerr po'poñ neñoñ israelena'tarneshacop ñaña judána'tarneshacop, ñeñt'pa' allochña na'pocstaterranet e'ñe cohuen etserra.

⁹ Ñeñt'pa' amach atteyaye ñerra'm ñeñt atet na'pocstatanet ñenmañ pa'tañneshañ allempo nerraneta' Egipto't e'ñe cohuen na nehuamenco't. Tarro'mar allempo ñetpa' ama atteye' p'neto ñeñt atet nenanet ñeñt'cha' a'pocstatahuetañ. Ñeñto'mar napa'cho'ña atta na'ypo'ñanet. Ñeñt'pa' atet ot Yompor allempo.

¹⁰ Allempoñapa' o' alla oterrerr Yompor ñeñt'ara:

Esempohuañenpa' o'ch alla na'pocstaterrerr po'poñ ñeñt israelena'tarneshacop. Ñeñt'pa' atet'cha' neperranet allempo esheccha'ña nechapaterranet neñoñ e'ñe ñet pueyo'chreto, ñeñt'pa' ñato' o'ch netma'ntacha atto neñoñpa' o' aquellcare'tterret e'ñe ñet pueyo'chreto ñeñt'cha' co'tape'chaterrahuetña e'ñe cohuen. Allempoña po'ño'chpa' e'ñech Po'yomporer perrnet, napa'cho'ña e'ñech neyochrenesha' neperranet ñamet.

¹¹ Ñaña allempo allohuenetpa' e'ñech eñotuerranet ñeñt'cha' atet noctape'chaterranet cohuen pueyo'chreto. Allohuenetpa' e'ñech attecma eñoterrnet pompor-neshohuenet ama't ñaña añe'tolleshohuen ama't ñeñt atarr sherbets ama't ñaña ñeñt ama esoye' enteñeto. Ñeñto'marña allempo ñeñt añcha'na'tpo' entetsapa' ama pallteno o'ch ye'chatan po'potantañ pamo'ts ama't ñaña pa'mo'nasheñ. Amach esesha' oterrahuete'te te'pa' añ pocetsa o'ch señoter Yompor, tarro'mar allempopa' o'ch e'ñe eñotuerrnet.

¹² Ñaña napa' e'ñe nemuereño'anetpa' ne'pret'nerranet'cha' po'chñaret, amach alla ney-erpuerranete'te po'chñaret. Arrpa' allohua atet ot Yompor ahuat.

¹³ Ñeñto'marña yeñoteñ ñeñt atto Yomporpa' all oten e'ñe etserra o'ch a'pocstaterry, ñeñt'pa' tarro'mar ñapa' o' a'ypo'ñerran ñeñt attoch ñanom a'pocstatyeñ. Ñaña ñeñt ahuatoteñ a'po'tateñets te'pa' o' a'ypo'eñare'terra, ñeñt'pa' huañerrcha'.

9

Ñeñt patso'mar Yompor po'prahua'pa' añ toma'ntateññañet ñeñt e'ñe ña pue'ntañ'tsen po'prahua'

¹ Ñehua, yeñoteñ ñeñt atet a'pocstatanetañ ahuat Yompor ñeñt'pa' echenan ñoñets anare't ñeñt'cha' atet sherba'yeset Parets. Ñaña arrcha' e'ñe etsotetña ñeñt Yomporecop e'ñe ña po'prahuo, ñeñt puerahua'pa' ama't acheña tomatene' arr patsro. ² Ñehua, ñeñt puerahuatase't ahuat ñeñt'pa' shetamtso'p'. Ñeñt tomatenet ñehuapo'tpa' ñeñt otenet Partso'pahuesho allo'tsen all orratenet huerare ñaña allo'tsen mesa allecma nenet pan Partso'cop. ³ Allohuanen allohua ayottam'psare't besmo po'ppahueñ shetamtso'p' ñeñt otenet, E'ñe Partso'pahuesho Po'ponro. ⁴ Allña'pa' allo'tsen altar, eno'tña'pa' allecma a'crratenet tsach puese' ñeñt atarr eñmosa'tetsa Partso'cop; ñeñtña altar eno'marpa' e'ñe cohuen orotattena. Ñaña allohuanen po'ppauño allo'tsen tsapot; ñeñt'pa'cho'ña eno'marpa' orotaten. Allña añño'tenet mapuettall allo aquellcare't Yompor po'ñoñ ñeñt a'pocstat Yompor ahuat acheñeneshacop. All añño'tenet ñaña pajo' orotaten, allña esha'tare't coñe't maná ñaña tsapoto allo'tsen Aarón po'carr ñeñt tapa'llatse't ahuat. ⁵ Tsapoto eno't all ten epsheña mellaño'eñma't ñeñt aye'chcatare't ñeñt otenet querubín

ñeñt toma'ntenaya Parets po'partsoña ñeñt chorrets all. Querubín pa'pa'yopa' alloña ca'matenan tsapot enof allot e'tamipenet tsapot. Allñapa' allecma peretnanete't Yompor po'chñaret. Ñehua, te'pa' o'ch noterrser po'poñe'chno ñeñt pa'namen atma'ntataret all.

⁶ Allpa' pa'namen añño'taretetyetsa ñeñt all puerahuo. Ñaña ñeñt cornaneshatyets Partsocoppa' chocmach be'tosyenet ñeñt all puerahuo ñehuapo't, allcha'ña etsotayenet ñeñt atet anaret Partsocop. ⁷ Tarraña ñeñt allohuanen po'ppahueñ Parets po'poner ama eseshaye' be'tetsoña all. Allpa' añach be'tets puesheñarr cornesha' ñeñt pa'm'cha'tareter pen po'potantañ cornaneshachno. Ama't ñapa' pa'terr charpa' e'ñech parrocha be'ten. Ñaña chocmach anman eyarra po'r'ras alloch peretnenanet Yompor po'chñaret. Ñeñtpa' e'ñe ñocpa'na po'chñarecop ama't ñaña allohuen acheñenesha' po'chñarecpuet. ⁸ Ama't ñeñt ñehuapo'te'tsen puerahua' allecma sherba'yen cornaneshachno ñeñt atet anaret Partsocop, tarraña e'ñe allohuanen Parets po'ponro añach be'tets ñeñt nanac corne-shatets e'ñe ñapueñ. Ñeñto'marña te'pa' Parets Puecamquëñña yeñotatene' atto ama atoram'psaretayaye allohuenacpay attoch ye'chapan'peña Yompor all partsoten. ⁹ Ñeñt allempopa' aña toma'ntena ñeñt'cha' atet cohuen posa tsapa'onet Cristo allempoch huapa; atet ñerra'm te'ña o' huapa Cristopa' o' etsotua. Tarro'mar allempo all Parets po'prahuo ama't es apuenetañ Yomporecop ñaña ama't es muetsayenetañ Yomporecop, ñeñtpa' arepa't a'cohuentatenanoña añ pocta'ña ñeñt atet sherbenayeñ Yompor. ¹⁰ Tarro'mar ora atet anaret tet allempo ñeñtpa' añecpa sherben ñeñt e'ñe po'chtsocpueta ñeñt atet ñerra'm ñeñt'cha' rrenet ñaña ñeñt'cha' orrenet ñaña atto apa'yese't Partso-cop. Ñeñt orapa' añecpa sherbe't attoch a'pocpatenet po'chets Partsocop. Ñaña ñeñtpa' mamecpa anare'tta esempohuañeñña Yomporpa' orrtaterrnaycha' po'poñ ñeñt'cha' ello nanac yesherberre'.

¹¹ Ñeñtpa' e'ñe tarremphua e'ñe etsoterra allempo huapa Cristo, ñeñt'ña orrtatose' ñeñt ello nanac sherbets te' yocop. Ñapa' atto corneshatospa' o' alla be'tosuerr allohuanen Partsopahuesho all pue'ntaño ñeñt'ña ello nanac sherbets Partsocop. Ñapa' e'ñe metana'tuerran ñeñt sherba'yestse't ahuat puerahuo Partsocop ñeñt tomaten acheñ arr patsro. Tarro'mar ñeñt Parets po'prahua' ñeñt pue'ntaño'tsenpa' ama acheñeye' tomatenaye ñaña ñeñtpa' ama añe patsroye' atomataretayaye. ¹² Ñaña Cristo allempo be'tosuerr allohuanen Partsopahuesho ñeñtpa' e'ñe parrocha be'tosuerr all pue'ntaño. Ñaña ñapa' ama añeye' anmo eyarra po'r'ras — cabra amapa' huacshetoll. Ñapa' e'ñe ñañaña po'r'ras pomhuerr. Ñaña ñapa' e'ñe parrocha pomanña po'r'ras all ama't allohuen pa'namen acheñeneshacop po'chñarecop. Attoña e'ñe cohuen a'pocpatonay attot'cha' a'queshpaterrey, ñaña ñeñtpa' amach ahuañañat'erro ama't errponaña. ¹³ Ñehua, yeñoteñ ñeñt atto shellcapechyesane't cornesha' acheñenesha' cabra po'r'raso amapa' huaquësh po'r'raso amapa' huacshetoll po'tsapñero ñeñt a'poyenet altaro, ñeñtpa' attoña a'pocpatenan ama't erra'tsena acheñer po'chets Partsocop, ama't erroteno a'sosyatena Partsocop. ¹⁴ Tarraña ñeñtpa' e'ñe po'chtsochaya a'pocpatarettenet Partso-cop. Tarraña allempo ashataretta Cristo po'r'ras, ñeñtpa' ellonet añecopña nanac sherbos attoch a'pocpaterrnay ama't ñeñt atet yoc'tape'chyen yeyochro. Ñeñto'marña allempoteñpa' amach alla yeyemtererro ñeñt atet yeye'chcatyen arr patsro ñeñt ama a'queshpatañeyaye. Añcha'ña e'ñe cohuen yesherven Yompor ñeñt ama arromñañeshayaye. Cristopa' ñeñto'marña ello atarr sherbeney atto pomuerra ñañaña o'ch rroma yocop ama't ñapa' ama eñalle po'chñar ama't e'ñe mamesha. Ñeñtpa' e'ñe Yompor Puecamquëño't atet posa; ñeñt'ña Camuecñetserpa' ama ahuañaño.

¹⁵ Atto Jesucristopa' ña eñosets yocop attoch a'pocpatuerrnay e'ñe cohuen etserra. Tarro'mar allempo rroma Cristo ñeñtpa' añecopña sherben attoch peretna'huerrnay

yo'chñar ñeñt o' allpon yeḡohuen ahuatoteñ allempoteñ yoc'ta'nom ñeñt ñanom a'poc'tatañtatsañ. Allochñapa' allohueney ñeñt'ey o' ya'hua'ñareḡterra o'ch yame'ñera, ñapa' aphuerreycha' ñeñt o'patatenya ñeñt atet oteney attochña yapa' corretsayach errponohuañen. ¹⁶⁻¹⁷ Ñehua, yeñoteñ arr patsro ḡhocma eñall puesheña'tets acheñ ñeñt atet petsa o'ch quellca'nman ñoñets all oten ñeñt'cha' allpon puechatsreḡhno apa'nman pamo'tsesha' ñerra'm esepoch rroma. Tarraña allempo orameñ correna ñeñt quellquene' e'ñe ña po'ñoñ, añña ñeñt o'patatyenapa' amach errotenoḡ amnataret'teto o'ch yoret e'ñe allempocma. Tarraña ñerra'm esepoch eñoteñet po'ñoḡh o' rromuen ñeñt o'patatenahuet, allempoñapa' apareḡetyesetcha' ñeñt allpon o'patatareḡetyenet. (Ñeñto'marña yapa' yeñoteñ allempo rroma Cristo atto ashatareḡta po'rraspa' ñeñt allpon o'patatyenya yañña ñeñt'pa'ḡho'ña e'ñe yocma.) ¹⁸ Ñeñto'marña ahuaḡ allempo ñenmaḡ a'poc'tateteḡ Partsocop, ama't allempopa'ḡho'ña o'ch muetset eyarra, po'rrasoñapa' allochña shellcata'tyeset. Ñeñt'pa' attoña e'ñe a'poc'tateteḡña po'ñoñ. ¹⁹ Ñehua, Moisés'pa' atet ḡa allempo. E'ñe eñotatuan acheñenesha' ora allpon atet oten Yompor po'ñoñ ñeñt'cha' atet pet, allempoña ñapa' o' yoran carrnero pue'ch ñeñt e'ḡhomareḡ tsama'to ñeñt'ñapa' huanquē' hisopoch puetacro, alloḡñapa' yoran ñaña huacshetoll po'rras ñaña cabra po'rras, tsech epuet oñ. Allña e'ḡhoman carrnero pue'ch ñeñt huanquēn tsachḡo allempoñapa' shellcata'tan allo libro ñeñt all anareḡ Yompor po'ñoñ, attoña shellcana'tamḡpesuan ñaña allohuen acheñenesha'. ²⁰ Allempoñapa' atet otan acheñenesha': "Añ po'rras ñeñt'pa' alloña Yomporpa' a'poc'tatennas ñeñt atet nenan po'ñoñ socop ñeñt'cha' atet seḡa." ²¹ Ñaña attecma ḡan ñaña puerahua' ñeñt shetamt-sopo' o' shellcapo'ch ñeñt'ara errasatso. Ñaña ora allpon coymeḡhno ñeñt allo'tsa'yen allecma sherbeñet Parets, ñeñt'pa'ḡho'ña e'ñe shellca'ta'tue. ²² Ñehua, yeñoteñ ñeñt atet oten ñoñets ñeñt atet anareḡ, allohuen es po'rrasochña e'ñe a'cohuentatenet Partsocop. Allohuen pa'namen ñeñt allo'tsa'yenpa' e'ñe autsa allohuen a'cohuentatue atto ashell-cana'tareḡta eyarra po'rraso. Ñeñto'marña yeñoteñ ñerra'm ama es muetseneto attoch shatatoñet po'rraspa' amach eseshaye' aḡreḡnareḡtetso po'chñaret.

Atto amtsareḡta Cristo yo'chñarecoppa' attoña e'shohuerrnay yo'chñar

²³ Ñeñto'marña yeñoteñ añe patsro puerahua'pa' eyarra po'rrasoña a'cohuentatyenetña allohuen ñeñt Partsocop. Ñeñt puerahua' añ patso'marpa' añ toma'ntena Parets po'prahua' ñeñt pue'ntaño'tsen, ñeñt'pa'ḡho'ña attecma errasatso a'cohuentatareḡtena allohuen ñeñt allpon allo'tsa'yen. Tarraña ñeñt rromats Parets po'prahuacop ñeñt pue'ntaño'tsen ñeñt'pa' añ muenen errasats ñeñt ello atarr cohuen sherbets. ²⁴ Ñeñto'marña Cristopa' ñeñt'ecopña rroma. Tarro'mar Cristopa' ama arreye' beḡtosuerro ñeñt patso'mar puerahua' ñeñt yeḡcaten acheñ ñeñt atta toma'ntenaya Yompor po'prahua' ñeñt pue'ntaño'tsen. Allña beḡtosuerrña Cristo Parets po'prahuo ñeñt pue'ntaño'tsen ñeñto'marña te' ñapa' allo'tsen e'ñe allohuanen Yomporeḡho allña torra'huerra cohuen yocop. ²⁵ Ñaña Cristopa' ama atteye' ḡoso atet pena cornaneshachno ahuaḡ. Ñetpa' ḡhocma beḡtoseteḡ allohuanen Parets po'ponro e'ñe pate'tets char. Ñaña errasats ñeñt'cha' anenet o'pono ñeñt'pa' ama ñetoyaye po'rraset. ²⁶ Tarraña Cristopa' e'ñe parrochecpa anareḡ o'ch pomuerra ñañañña o'ch rroma attoch ashatareḡta po'rras. Tarro'mar ñerra'm ama atteye' anareḡeñepa' ḡhocmate' rromame'tañ ama't tarrempoteñ allempoteñ e'ñe erreḡ ayeḡc'catareḡtetsa pats. Tarraña ñeñt'pa' ama atteye' ḡo. Ñapa' añecopña huapa attoch e'ñech parrocha amtsareḡta allohueney yo'chñarecoppa' attoch ñachña yahuanmanḡperre' yo'chñar. Ñeñto'marña huapa allempohuach ḡherr yet allempoch mellapoterrmocha. ²⁷ Yeñoteñ ama't allohueney acheñey ḡhocmach yerromuen. Tarraña e'ñech

parrocha yerroma allempoñapa' o'ch huerrnaya attoch Yomporpa' eñotatyesserrey e'ñe errotentcha' entyesserrey — ñato' e'ñech cohuen entyesserrey amapa' ñato' amach cohuenaye' entyesserrey. ²⁸ Attecma ña ñaña Cristo e'ñe parrocha rroma allempo amtsaretta allohuen ochñartsocop. Attoña ñapa' e'ñe ahuanmanperrey shontey allohueney yo'chñar. Ama't amtsarettañ ochñartsocop, tarraña Cristopa' allach orrterra po'pocheño. Allempoch huerra po'pocheño' po'cohuenño amach añecpaye' huerro o'ch alla rromuerrerr ello ochñartsocop. Añecopcha'ña huerra po'pocheño o'ch e'ñe a'queshpatuerran allohuen ñeñt' chocma cohuen'e' ña.

10

¹ Ñeñto'marña yeñoteñ Moisés po'ñoñ ñeñt' atet anaret ahua't judioneshacop, ñeñtpa' ama e'ñeye' cohuenteno ñeñt' atet cohuentena te' ñeñt' orrtatosnay Cristo. Añ ñoñets ñeñt' atet anaret ahua't ñeñtpa' aña toma'ntena ñeñt'cha' e'ñe po'ñoñ cohuenetuer-rtsa ñeñt'cha' orrtertsa tsapatonet. Ñeñto'marña añ ñoñets ñeñt' atet anaret ahua't ñeñtpa' amach errotent' a'cohuentatanoña acheñenesha' ama't puesheñarra ñeñt' muenenayeñ o'ch yemtenanañ Yompor. Ama't chocma muetsa'yesetañe't eyarračno po'chñarecop e'ñe atet oteneñ añ ñoñets ñeñt' atet anaret, ñeñtpa' amach errotent' e'ñe a'cohuentatanoña acheñenesha'. Ama't pate'tets char chocma muetsa'yesetañe't ñeñt' Yomporecop, ñeñtpa' ama e'ñeye' a'cohuentatane'teña acheñenesha' Yomporecop ama't puesheñarra ñeñt' muenenayeñ o'ch yemtenanañ Yompor. ² Ñerra'm e'ñe po'ñoñ a'cohuentatenaneñña acheñenesha' eso'marte'ña o'ch alla muetserreterra po'poñečno shonte' eyarra. Ñerra'm po'ñoñ a'cohuentatenaneñ acheñenesha' ñeñt' atet cotape'chyene' sosya'tsañ pueyo'chreto, eso'marte'ña alla yerpapa'taterranete'ña po'chñaret ñeñt' pueyo'chro'tsa'yenet. ³ Tarraña po'ñoñ epaye' yerpapa'taterranete'ña po'chñaret. E'ñe pate'tets char allempopa' o'ch alla muetserreterr eyarračno añecop ñeñt' atto yerpapa'taterraneterr po'chñaret. ⁴ Ñeñto'marña yeñoteñ eyarra po'rraspa' amate' errotent' ahuanmanperryeña yo'chñar ama't toro po'rras amapa' cabra po'rras.

⁵ Ñeñto'marña Cristopa' atet otosan pompor allempo acheñetos arr patsro ñeñtpa' atet ot:

Pa te'pa' ama a'ñeye' pemneno eyarra ñeñt' amtsarettetsa p'ocop ñeñt'cha' atarr p'ocshatene'. Ama't ñaña ñeñt' es apa'yenet p'ocop. Ñeñto'marña nocop te'pa' o' p'eyechcatuerrnan nechets añ patsrecop ñeñt' e'ñe atet pemnen ña, e'ñech nechso't nesherb'osep' attoch e'ñe cohuen nocshatenep'.

⁶ Po'ñoñ te'pa' ama a'ñeye' atarr p'ocshatenaye atto chamuenet eyarra p'ocop amapa' allempo muetsanatenet eyarra ñeñt' po'chñarecpuet.

⁷ Ñeñto'marña Nompore te' napa' o'ch notap': "Napa' añecopña nohuapa arr patsro attoch netsotosnap' ñeñt' atet pemnen ña, ñeñt' e'ñe atet anaret peñoño nocop." Arrpa' allohua atet otan Cristo pompor.

⁸ Ñehua, ñeñt' atet ot Cristo arr ñeñtpa' atto Yomporpa' ama a'ñeye' mueneno eyarra ñeñt' amtsarettetsa ochñartsocop attoch coshateñet ña. Ama't ñaña ñeñt' es apa'yenet ñocop ñeñtpa'cho'ña ama ñeñteye' e'nenno ñeñt'cha' coshatene' ama't ñeñt' achamaret' ñocop ama't ñaña ñeñt' amtsarettetsa ochñartsocop. Ñeñt' ora añečno ñeñt' atet nane't Moisés po'ñoñ atet'cha' es apueñet Yompor, te'ña ñeñtpa' ama coshatenano Yompor; atet oten Cristo. ⁹ Elloña ñapa' atet oten, "Napa' añecopña nehuapa Nompore, o'ch netsotosnap' ñeñt' atet pemnen ña." Ñeñtpa' añ eñotatosey, ña a'huañatose' ñeñt' ahuañoteñ atto muetsete't eyarra po'chñarecop. Attoña ñapa' nosan po'ñoñ ñach rromosets yo'chñarecop.

¹⁰ Ñeñto'marña Jesucristopa' pomosa ñañeña yo'chñarecop. Ama't parrocha rromapa' ñeñtpa' allohuenacpay. Atto ñapa' etsotenan ñeñt' atet muenen Pompor yañapa' e'ñe a'cohuentaterrey Partsocop. ¹¹ Ñaña ñeñt' cornaneshatyets judioneshacop ñet pate'tets

yetpa' chocma tenet all altaro allotecma sherbeñet Yompor allecma muetsanater-
retañe't eyarračno ñeñt ochñartsocop. Tarraña ama't amtsarettenañpa' amach er-
roteno't ahuanmanofña ochñarets. ¹² Tarraña Jesucristopa' e'ñe parrocha pomuerra e'ñe
ñañeña ñach amtsarettertsa ochñartsocop. Ama't parrocha rroma ñeñtpa' allohuena-
cop e'ñech errponohuañenacop. Allempoñapa' o' alla anorruerr Pompor po'cohuenro't
allña partsotuerr. ¹³ Alotña cohuenan allohuen ñeñt e'moñe'tene' esempohuañenpa'
a'mchechatuerranetcha'. ¹⁴ Jesucristo allempo pomuerra ñañeña, ñapa' e'ñe etsotat-
uerrnay attoch e'ñe a'cohuentaterrey Partsocop. Ama't parrocha rroma ñeñtpa' e'ñe
allohuenacop ama't ahuatoteñ errponohuañenacop añecop ñeñt pueyochresha' pen
Parets. ¹⁵⁻¹⁶ Ama't Yompor Puecamquëñ ñeñtpa'cho'ña eñotochtatennay tarro'mar ñapa'
añ eñotatye't ñeñt atet otye't Yompor, ñeñtpa' atet ot:

Esempohuañenpa' napa' o'ch na'pocatterranet po'pocheño. Ñeñtpa' atetcha' neper-
ranet. Allempo esheccha'ña neçapaterranet neñoñ e'ñe pueyochreto. Ñeñtpa'
ñato' o'ch netma'ntacha atto neñoña' o' aquellcaretterret e'ñe ñet pueyochreto
ñeñtcha'ca'yeña cotape'chaterrahuetña e'ñe cohuen.

¹⁷ Ellone'tpa' atet ote't allempo:

Napa' amach alla neyerpuerranete'te po'chñaret. Ama't ora atto atpare'tnete'tpa'
amachña ñeñña alla neyerpuerranete'te.

¹⁸ Ñeñto'marña yeñoteñ atto Yomporpa' o' peretna'huerrnay yo'chñar amach alla yer-
puerrnaye'te ñeñto'marña amach alla es yemtserre'te ñeñt yo'chñarecop.

Te'pa' ama es palltetso yocop attoch e'ñe cohuen ye'ñorana'tera Yompor Parets

¹⁹ Ñeñto'marña masheñneshacha' ñaña noçhaneshacha' te'pa' yeñoteñ e'ñe pocte'
yocop e'ñe ya yeçhore'teñoñ Yomporpa' e'ñech yeyemteña e'ñe atet ñerra'm yamo'ts
yeyemtena e'ñe allame'tets. Ñeñtpa' añ toma'tena ñerra'mrrate' o' yebe'terr e'ñe
allohuanen Parets po'ponro all po'prahuo atet pe't ahuat cornaneshá' ñeñt be'tostse't
ñapueñ ñeñt anmaye't eyarra po'rras all, tarro'mar te'ña atto o' rroma Jesucristo
yocop, po'rrasña ñeñtña e'ñe ya'pocatterre'ña ya attoch ye'ñorana'tera ama't ñeñt atarr
Parets. ²⁰ Po'ñoçh Jesucristo e'ñe ña po'chtso't orrtaterrnay po'poñ etserra attoch
yapa'cho'ña o'ch yeçhapanpera Yompor attoch ye'ñorana'tera. Ñeñtpa' e'ñe cohuen
attoch yeyemteña e'ñe po'ñoçh. Ñeñtpa' añ toma'tena ñerra'mrrate' Cristopa' o'
çhapterrey allohua yottampeññañet besmo Parets po'ponro all po'prahuo. ²¹ Jesús
te'pa' yeñoteñ ñeñtña atarr Yecorneshar yepen ñeñt çhets Yompor pa'paclo, ñapa'
allña añcha'taretetuerra Yomporpahuo añecop allohuen ñeñt pueyochresha'čno pen
Parets. ²² Ñeñto'marña e'ñe yeyemteño'tpa' amach yemcha'nañotayaya yeçhore'teñe.
E'ñepa'chña yeñmañesha' yeyoçhrocmañen yeçhore'teñ, tarro'mar Cristo po'rrasoña
o' a'cohuentaterrnay yeyoçher atto te'pa' o' e'ñe cohuen yocape'chyerr, amachña
allo'na yerpapa'tatnenye yo'chñar. Ñeñtpa' añ toma'tena atto yapa' e'ñe cohuen
apatare'tey oño ñeñt pocetsa Partsocop. ²³ Chocmuepa'chña yecueña ñeñt yeyemtena
allochñapa' a'quespaterreycha', amuepa'chña çha ye'charrtatatstenoña yeyoçher
tarro'mar Yompor ñapa' chocmach a'pocatterrnay po'ñoñ ñeñt atet otene'y. ²⁴ Ñaña
añepa'chña e'ñe cohuen ye'nen attoch yeyenpannena allohueney allochñapa' attoch e'ñe
cohuen yeychen morrentanna'teñets ñaña e'ñech cohuen es yeyenpannena. ²⁵ Ñaña
çhocmuepa'ch yesen all chocma yapçhena e'ñe yame'ñeño't Cristo. Amachña atta
yepatsto ñeñt atet pena po'potantañ ñeñt ama huetso allecma yapçhena. Añcha'ña
atet yepena allempo yapçhena e'ñech cohuen yocape'chatannena Yomporcop. Elloña
te'pa' chocmach yapçhena ñeñt nanac cohuentetsa yocop tarro'mar yeñoteñ te'pa' o'
çherrmoch allempoch huerra Yepartseshar Cristo.

²⁶ Tarro'mar ñerra'm o' yeñoter po'ñoçh Cristo rromats yocop attoch a'queshpaterrey ñaña ñerra'm ñeñto' yame'ñerra tarraña ñerra'm allo'na yesen ochña'tare'tnomuets e'ñe ya yemneñño'tpa' allempopa' amach eñalleña ñeñtcha' rromuerttserr po'pocheño ñeñtcha' yetsa'terroyerr ello yo'chñar. ²⁷ Ñeñt allo'na sets ochña'tare'tnomuets añach o'paterrahuet coñcheñets ñeñt atarr amcha'noçhtetsa ñeñtara Yompor po'yoroçhenña ñeñt tso'pa' e'ñech e'nuerran allohuen ñeñt e'moñe'tene' Yompor. ²⁸ Ñehua, ahuañ ñerra'm eñall ama't puesheñarra ñeñt atpare'taye't Moisés po'ñoñ, ñerra'm eñall epsheña amapa' ma'psheña ñeñtcha' a'metampene' ñeñtña atparña'tpa' ahuo'ch muetse allohuen acheñenesha'. Ama't puesheñarrapa' amach eñalleña ñeñtcha' morrentaya. ²⁹ Elloña ñeñt ama esoye' entenaye Yompor Puechemerpa' atarrcha' nanac a'coñchatare'tterret. Elloña po'rras ñeñtcha' a'cohuentaterrahuetañ Partsocop ñeñtpa'cho'ña ama esoye' enteñeto ama't ñeñt errasatser ñeñt etserra a'pocatañtetsa. Elloña ama't Yompor Puecamquëñ ñeñtpa'cho'ña çhach sasare'teññañet ñeñtara Puecamquëñ ñeñtcha' morrenterrahuetañ attoch chorrerranetañ. Ama't seño'teñeña elloña atarrcha' nanac acoñchatare'tterra ñeñt atet atarr tsena'tene' Yompor Puechemer. ³⁰ Tarro'mar yapa' yeñoteñ Yomporña atet otets: "Napa' ñeñtencha' coñchaterrahuet, napa' ñeñtencha' tsa'taterrahuet." Elloñapa' atet oten Yompor: "Napa' ñeñtencha' otteñe'cherrahuet attochña necoñchatterranet ama't ñeñt neyochresha'çhno nepeneñ." ³¹ Ñeñto'marña yeñoteñ atarr yoroçheno'tsen ama't allohuen ñeñt aña o'patenaya ñeñt po'yoroçhenña pen Yompor ñeñt ama arromña'teshayaye.

³² Tarraña te'pa' o'ch notas, o'ch alla seyerpuerra atet sepa ahuañmo'cha allempo e'ñe errtes eñoterre' po'ñoçh Cristepa'tña a'queshpatañ. Ñeñtpa' allempo ñanom a'puetarsam'psare'tta seyoçhro soçtapña. Allempopa' ama't atarr amueroçhtatare'teseñ sañapa' e'ñe sa'huanta'huanom pa'namen topateñtsoçhno ñeñt setantyesoya; ñeñtpa' e'ñe atet ñerra'mrrate' sapa' cho atarr seçllarena. ³³ Patanta'ttsospa' atarrca'ye che'tatsetasete't e'ñe allo'tsa'yen allohuen acheñenesha'. All atarr sa'mueroçhtatare'tta. Elloña ñerra'm esempo mueroçhtateñet po'potantañ samo'tsesha' sapa'cho'ña çhocmach semueroçhtapretanete't. ³⁴ Po'ñoçh ñeñt arrmanatare'ttatse't o'ch ayottam'psare'ttet, sañapa' e'ñe sellcapreteño'fanetpa' çhocmach e'ñe cohuen seyenpuenanet. Ama't allempo puerrata'm'psatsre'tase't ñeñt se'moñe'tyesaye't, sañapa' e'ñech socsheñesha' sa'huantenanet. Tarro'mar sapa' seño'teñ o' secherr ento ñeñt atarr sherbets ñeñt ello metana'tuene' atto sherbenes sechatser, tarro'mar ñeñtpa' ama aptsaño. ³⁵ Ñeñto'marña masheñeshacha' o'ch alla noterrtserr, amach alla sequeçhpatsterrñañe ñeñt atto atarr seyemteña Cristo tarro'mar Yomporpa' ñachña atarr cohuen setsa'terraya. ³⁶ Te' sapa' aña sepalltena attoch e'ñe aco'pa sa'huanta'huanom ñeñt atarr echarr sentyen, attochña allo'nach sesen pa'yesnomue' ñeñt atet muenen Yompor, attochña Yomporpa' apuerrescha' ñeñt e'ñe atet otenes. ³⁷ Tarro'mar yeñoteñ Yompor po'ñoñ ñeñt aquellcare't ahua'toteñ ñeñtpa' Cristocop atet oten:

O' mameshamerra o'ch orretuerra ñeñtcha' huerrtsa, te'pa' amach alla atomato pue'ntaño.

³⁸ Tarraña Yomporpa' atet oten:

Ñeñt e'ñe pocte' nenten na ama't erra'tsena acheñer tarro'mar e'ñe pueyemteño'en na, ñeñtña'pa' corretsach. Tarraña ñerra'm esesha' nepuerram'perraya ñapa' o'huañcha' allo'na coshatenen.

³⁹ Tarraña yapa' ama atteyayye ñerra'mrrate' ñeñtcha' puerram'perraya Yompor ñeñtcha' chenquërrtsa. Yapa' añeyca'yeña ñeñteycha' çhocma yemterraya Yompor ñeñteycha' a'queshpatare'tterrtsa e'ñe yecamquëñohuen.

11

E'ñe yeyemteñoŧ Yomporpa' e'ñech cohuen es yetsotayen ñocop

¹ Ñehua, allempo po'ñoŧh yeyemteña Yompor e'ñe yeñoteñ ŧhocmach apuerrey ama't esempo ñeñŧ atarr yecuen te' e'ñe yenamueñoŧ. Ama't ama yenteña' e'ñe yeyoŧhroña yeñoteñ ñeñŧ yecuen te' po'ñoŧhpa' apuerreycha' ama't esempo. ² Yatañneshañ ahuatpa' atarr yemuetyesete't Yompor. Ñeñŧ atto yemuetyesyete't Yomporña' e'ñe pocte' entyesanete't.

³ Ñaña ya e'ñe yeyemteñoŧ Yompor te'ña' o' yeñoter allpon ñeñŧ yentyen arr patsro ñeñŧpa' e'ñe po'ñoñoŧa yeŧhca'hua. Allempopa' ama't coñe'ta ama es orrtetso ñeñŧcha' pa'namen yeŧhcatyes ñeñŧ atet yentyen te'.

⁴ Ñaña Abel ahuat atto yemtane't Yompor, ñapa' apan Yompor ñeñŧ atarr coshate'. Pa'mo'nasheñña Caín ama't apaneñ ñaña Yompor, ñeñŧña' ama coshatano Yompor. Ñeñŧo'mar Yomporpa' e'ñe cohuen agapan ñeñŧ aŧ Abel; attoña Yomporpa' eñotatanet e'ñe pocte' entapretan Abel. Tarraña Abel ama't rromaña' atto atarr yemtane't Yompor, ñeñŧpa' e'ñe teme'ttsen eñotateney ñeñŧ cohuen enten Yompor. Ñeñŧpa' attema't ñerra'mrrate' Abelpa' teme'ttsen serrpare'tateney cohuen.

⁵ Ñaña ahuat Enoc ñeñŧ atarr cohuen yemtaye't Yompor, ñapa' e'ñe ora aner Yompor pue'ntaño e'ñe be'naŧoŧ. Ñapa' ama ŧchoye' rromo arr patsro. E'ñe atta a'chencach pamo'tsesha' ama esesha' enterraye tarro'mar Yompor erraya'. Ñehua, allempo ama a'tapatera' Yompor pue'ntaño ñapa' atarr cohuen coshatane't Yompor allempo aña patsro'tsen, tarro'mar ñeñŧpa' atet oten Yompor po'ñoñ ñeñŧ aquellcare't. ⁶ Ñerra'm ama yeyemteñe Yompor amach errotenoŧ yocshateñe ama't e'ñe mamesha. Tarraña ñerra'm esesha' muenene' o'ch yemteret ñamet Yompor añ poctetsa o'ch otet po'ñoŧhpa' Yomporpa' eñall, ñaña eñoteretepa'chña Yomporpa' ŧhocmach coshaterran allohuen ñeñŧ e'nene' ña. ⁷ Ñaña ahuat Yomporpa' eñotatan Noé ñeñŧcha' atet e'choŧan oñ tsapaŧonet. Allempo atet otan Noé ama't mameshapa' ama huate'te. Tarraña Noéña' e'ñe yemtenana atet och Yompor allempo. Ñaña' yeŧhcatuan po'compuer allochña' attoch a'qeshŧatan pamo'tsesha'. Atto yeŧhcatan po'compuer e'ñe ñapueŧ e'ñe pueyemteñoŧ Yomporpa' eñotataneñña allohuen po'potantañechno pamo'tsesha' ñetpa' coñchatuerranetcha' Yompor. Ñeñŧo'marña e'ñe pueyemteñoŧ, Yomporña' e'ñe pocte' entenan Noé.

⁸ Ñaña ahuat Abrahampa' allempo ŧhore'ch Yompor o'ch mueñe allaŧar allcha' apuer pats, ñaña' e'ñe pueyemteñoŧ Yompor e'ñe cohuen ame'ñya. Allempoña' sa'nman pa'netser o' ahuo' ama't ñapa' ama eñoteñe allcha' ta tarro'mar ama puentare all sen. ⁹ Allempo ŧhap anetso all oteñ Yompor ñeñŧcha' apuer esempohuañen, allña' all yeŧhosa e'ñe pueyemteñoŧ Yompor. Tarraña ña allpa' atta yeŧhosa atet ñerra'm ahupaña. Ama't ñeñŧ patspa' ñeñŧ o'patateña Yompor ñeñŧcha' apuer, tarraña allempopa' ama apueña' Yompor ñeñŧ atet oteñ. Ñeñŧo'mar ñapa' atta shetamtsopo'tos all manatoset. Ñaña ama't ñeñŧcha' po'mreneñ perr Isaac ñaña Jacob ñetpa'cho'ña attera yeŧherret shetamtsopahuo. Ñetpa'cho'ña atta cohueñet esempohuañencha' apuerranet Yompor ñeñŧ patser e'ñe atet otenanet ñamet. ¹⁰ Abraham po'ñoŧhpa' aña cohuen ñeñŧ Yompor pa'netser ñeñŧ e'ñe echarr aŧare't tarro'mar Yompor yeŧhcatene' e'ñe echarr peñ.

¹¹ Puetapor Sarapa'cho'ña e'ñe pueyemteñoŧ Yomporpa' cheyore'terr ama't ñapa' o' atarr po'nme'ten. Ama't o' meten allempo atto cheyore'ten coyanesha' e'ñe pueyemteñoŧa Yomporpa' ña ahuamencat pe' attoch cheyore't. Tarro'mar ñapa' atarr ayemuetpo' entenan Yompor atet oteñ. ¹² Attoña e'ñe Abrahamo'ta atarr mererra shonte' acheñenesha' nanac ama't ñapa' o' atarr nanac po'nme'ten allempo. Allpon acheñenesha'

ña e'ñe po'm'reneñ pohuenahuet ñeñt' allpon shonte' nanac atet ñerra'mrrate' ora allohuen rantochno ñeñt' ento'tsa'yen ñaña atet yenteññañ sa'p po'm'ner ñeñt' ama e'ñotuapahuoyaye.

¹³ Ñeñtet allponet atarr yemuetnomuet Yompor ama't allempo Yomporpa' ama apuenaneta' ñeñt' patser ñeñt' o'patatanete't. Tarraña ama't ama aparetterreta' ñeñt' patser ñeñt' o'patatanete't Yompor, ñetñapa' pueyemuetneño'tet Yompor eñoteñet ñetpa' aparetterretcha' ñeñt'cha' po'ño'ch pa'netser perret. Ñeñt'cha' atarr coshaterrahuet. Tarro'marña ñetpa' eñoteñet añ patser po'ño'ch ama pa'netsreye' peñeto. Ñetpa' ahuapñanesheta entenet arr patsro.

¹⁴ Ñehua, yeñoteñ acheñ ñeñt' atet entetsa ñerra'm ahuapñanesheta ñetpa' añña e'nenet ñeñt'cha' e'ñe pa'netser perret po'ño'ch. ¹⁵ Ñaña ama añeye' pa'netser peneto allot onet tarro'mar ñerra'm ñeñt' e'nenetañpa' po'ño'chpa' o'ch alla puerrerretañ allot onet tarraña ñetpa' ama ñeñt'eye'ña e'name'teneto. ¹⁶ Ñetpa' añña e'nete't ñeñt'cha' e'ñe pa'netser perret po'ño'ch ñeñt' atarr nanac cohuen, ñeñt'pa' añepa't Yompor pa'netser ñeñt' pue'ntaño'tsen. Ñeñto'marña Yomporpa' e'ñe pocte' entenanet ama penquënaneto atto Po'yomporer peñet. Ñaña'pa' o'patatenanet ñeñt'cha' e'ñe po'ño'ch pa'netser perret all pue'ntaño.

¹⁷ Ñaña allempo Yomporpa' atarr topatan Abraham; ñeñt'pa' atet otan Abraham: "Te'pa' o'ch pemptser pechemer Isaac e'ñe atet ñerra'm ñeñt' muetsenet nocop." E'ñe pueyemteño't Yompor Abrahamñapa' e'ñe pocte' eñch o'ch poman puechemer Isaac o'ch muetse Yomporecop. Ñehua, Yomporpa' atet o' otuan Abraham ahuatoteñ: ¹⁸ "E'ñe pechemereshot Isaacpa' mererrach shonte' acheñenesha' ñeñt'cha' e'ñe pem'reneñ peperr." Tarraña ama't atet oteñeñ Yompor, ñaña'pa' e'ñe pueyemteño't Yomporpa' e'ñe pocte' eñch ahuo'ch muetsan po'patror allempo atet otererr Yompor. ¹⁹ Tarro'mar ñapa' atet oten, Yomporpa' atarr ahuamenca'tesha' ñach tantatuerre' ama't ñeñt'cha' rromats. Ñeñt'pa' atet ñerra'mrrate' Yomporpa' o' alla tantaterrñañ puechemer rromot, o' alla agapuer pompor po'pocheño.

²⁰ Isaacpa'cho'ña allempo po'n e'ñe pueyemteño't Yomporpa' enaman puechemereshacop Yompor pa'nateña añecop Jacob ñaña Esaú; ñeñt'cha' atet bensare'tam'perranet tsapatonet. ²¹ Jacobpa'cho'ña allempo rromamoch e'ñe pueyemteño't Yomporpa' enamatnoman Yompor pa'nateña pue'ñare'tolleshacop ñeñt' puechemer José puechemeretollesha' puepo'nmeño'tpa' po'carra quellpuena allña ma'yochenanaña Yompor. ²² Josépa'cho'ña e'ñe pueyemteño't Yompor allempoch rroma alla'par all anetso Egipto, ñapa' atet otnoman pamo'tsesha': "Po'ño'chpa' chocmach chap allempoch allohuenes israelena'tarneshas se'cha'nerrcha' arro't Egipto't, o'ch sahanerra allo'tsen pats ñeñt' o'patatye't ahuatoteñ Yompor ñeñt'cha' apuerrey. Ñaña ñerra'm esempoch ahuerres arro'tpa' sanerrnancha' nenpa'ts."

²³ Ñaña allempo eñalleta Moisés, pamo'mte'ñapa' e'ñe cohuenatoll entan ematoll. Ñetpa' e'ñe pueyemteño'tet Yomporpa' o' e'pochet. Ama mecha'teññañeto añcha'taret po'ñoñ ñeñt' atet nen attoch chocma muetsanachet allohuen asheñorro'tollesha' ñeñt' eñalletyetsa. E'ñe ma'pña arrorr alla e'poteñet. ²⁴ Tarraña Moisés allempo o' po'n ñapa'cho'ña e'ñe pueyemteño'ta Yomporpa' ama mueno o'ch oteñet ño' pue'ñar penña añcha'taret, tarro'mar ñapa' atta ñañreteña añcha'taret po'señ ñeñt' egipto'marnesha'. ²⁵ Ñapa' añña e'ñe pocte' ent o'ch muerochtapretana israelnesha' ñeñt' e'ñe pamo'tsesha' pen ñeñt'ara ñeñt' pueyochreshachno pen Yompor. Ama pocteye' entano o'ch coshapretana egipto'marnesha' ñeñt' atet ye'chenet ñeñt' ama pocteye' enteno Yompor tarro'mar ñapa' eñoteñ ñeñt'pa' e'ñe mamecpa atet coshenet. ²⁶ Ñapa' atta ahuantenan atto atarr

sasare'teñet israelnasha'. Tarro'mar ñapa' añ pocte' enten o'ch mueroçhta Cristocop. Ñapa' ñeñña atarr cohuen enten, ello metana'tuenan ñeññ atet sherben allohuen ñeññ esocmañen ñeññ atarr morrentena egipto'marnesha'. Tarro'mar ñapa' aña cohuen ñeññcha' apuer Yompor ñeññcha'ña atarr coshaterre'.

²⁷⁻²⁸ Ñeñño'marña Moisés e'ñe pueyemteñoñ Yomporpa' atet otan allohuen israelena'tar ñeññ Egipto'tsa'yen: "Te'pa' o'ch semtsa carrnerotoll tarro'mar Yompor otets. Ñeñña po'rraspa' o'ch seshellcata'tyes allot sebe'ten so'ponro, allochñapa' ñerra'm esempoch huapa mellañoñeñ ñeññ amñareñ ñeññcha' muetsanatuenaya' allohuen egipto'marnesha' po'moñernesha' attochña sa ñeññes israelena'tarneshaspa' ama't puesheñarroñesapa' amach muetsenso." Ñaña Moisés e'ñe pueyemteñoñ Yomporpa' sa'nerran anets Egipto, ama mecha'tnomano ñeññ añcha'tarettetsa all Egipto ñeññ atarr atsrre'mñañ. Moiséspa' atfa ahuanata'huanman allohuen ñeññ atarr echarr entyen tarro'mar ñapa' añ e'ñe yemtena Yompor ñeññ ama't ama entpahuoyaye. ²⁹ Ñaña allempo onacherr allohuen israelena'tarnesha' Egiptoñ allempo cha'cha'tet atarr sa'po ñeññ otenet Sa'p Tsasasen, israelena'tarnesha' e'ñe pueyemteñoñet Yomporpa' e'ñe atfa ahuanmoset all chope'chnomuet atet ñerra'mrrate' e'ñe porrare' patso chope'chenet. Egipto'marnesha'ña ñeññ coñahuetaña' ñetpa'cho'ña ahuanmosetañ ñamet all sa'po, tarraña ñetñapa' e'ñe allohuenet ño'shrra'tuoksetña all oño.

³⁰ Ñaña allempo cha'cha'tet all anetso Jericó ñeñña allo'marnesha'pa' ama mueneñeto o'ch abe'tosamñsaretet. Tarraña israelena'tarnesha' e'ñe pueyemteñoñet Yomporpa' cancherrmatoset; o' canchrrroch puetesamñsame'toset ñeññ anetser Jericó ñeññ atet otanet Yompor. Allempoña e'ñe pueyemteñoñet Yomporpa' ñeñña conchet allo aconcha'tamñsaret ñeññ anetser all puetesme'tet canchrrroch e'ñepa'tcha' ñoña mata'nom. ³¹ Ñaña Rahab ama't ñeññ atarr ecañoresha'ttatset' ahua'tpa' atto atarr yemterrana ñaña Yompor, ñeññ coyansharpa' ama rromo allempo a'cllataretta allohuen pamo'tsesha' ñeññara jericó'marnesha' ñeññ atarr atpare'tyesaye't Yompor all anetso. Tarro'mar ñapa' e'ñe cohuen agapan pa'paclo allponsheña israelena'tar ñeññ ñanom amñarettatsa all anetso ñeññcha' eñotenaya' errotente'ña ñeññ anetser ñaña ñeññ yeçhetsa all, ñato' ahuanencañarere'tte' ñato'pa' amate'.

³² Po'potantañechnopa' shontemeñ ñeññcha' alla neyerpaterrsañerr ñeññ atarr yem-taye't Yompor ahua't. Tarraña ama eñalle allponmat yet attoch alla neyerpatuerrsa allohuen ñeññ atarr yemtaye't Yompor, atet ñerra'm Gedeón, ñaña Barac, ñaña Sansón, ñaña Jefe'té, ñaña David, ñaña Samuel ñaña allohuen ñeññ a'mña'tyesaye't Yompor po'ñoñ ahua't. ³³ Tarraña allohuenet e'ñe pueyemteñoñet Yomporpa' pa'namen etsotayenet ñeññ atet muenatenanet Yompor. Puesheña'ttsetpa' e'ñe a'mchechueñet po'potantañ añcha'tareñneshachno ñeññ e'moñe'tenahuet. Po'potantañapa' e'ñe pueyemteñoñet Yompor e'ñe cohuen añcha'tareñnenet. E'ñe pueyemteñoñet Yompor ñapa' alla yenpuerranet ñeññ atet otanete't. Ama't po'psheñeñpa' e'ñe pueyemteñoñ Yompor ama muenatano ma'yarr o'ch erro't pe'. ³⁴ Ñaña ama't tso'ña ama't atarr huomenc huorten ama muenache o'ch atserrpe'. Po'psheñeñpa' e'ñe pueyemteñoñ Yompor ñapa' a'queshpach attoch ama muetseto espado. Po'potantañpa' ama't ama eñallete po'huamenc, e'ñe pueyemteñoñet Yompor atarr ahuanencañ panet. Ñeñña huomencñatserpa' alloña quellarenet. Atto e'ñe a'mchechuet ñeññ e'moñe'tenahuet. ³⁵ Ama't po'potantañ coyanshachno ñetpa'cho'ña e'ñe pueyemteñoñet Yompor, o' alla atantatare'tterret pamo'ts ñeññ rromuets.

Po'potantañ ama't atarr atserrpatsetare'ttenet, ñetpa'cho'ña e'ñe pueyemteñoñet Yompor ama mueneñeto o'ch quechpuet Yompor attoch a'rroyare'tetyerret. E'ñe pocte' enteñet o'ch rromuet pueyemteñoñet Yompor tarro'mar ñetpa' eñoteñet allach tanterret

ello ñeñt atarr nanac cohuentetsa. ³⁶ Po'potantañechno ñetpa'cho'ña e'ñe pueyemteñoŕet Yompor ahuenta'yenet pa'namen atto atarr atserrp̄atse'tareŕetyesete't — attoña atarr ache'tatsetareŕtete't, all ashtareŕtete't, ehuananatareŕtete't, ayottam̄psareŕetyesete't. ³⁷ Po'potantañ amsanatareŕtete't atto arrollapechareŕtete't. Po'potantañpa' asheshareŕetyesete't e'ñe puerrochreto atto amsanatareŕetyesete't, atarr huomenc huapanete't topateñets. Po'potantañ espado amsanatareŕetyesete't. Po'potantañ at̄ta chopeñe'chyesete't, aña chorra'yeseŕt carrnerorrom, ñaña cabrarrrom. Atarr huocchañetyesete't at̄taña atarr amuerochtatareŕtete't atto atserrp̄a'yeseŕtete't. ³⁸ At̄ta chopeñe'chyesete't amayo'mar, aspenŕo'mar. Esho'tyeseŕt aroroŕo'mar, mapuetpono'mar aña patsro. Allohuenet ñet ñeñt atto atarr amuerochtatareŕtete't, Yomporñapa' atarr cohuen entanete't. Ello metana'tueñet ora allohuen acheñenesha' arr patsro. ³⁹ Allohuenet ñeñŕet atarr yemteŕt Yompor ahuaŕ, Yomporñapa' e'ñe cohuen entanete't, ŕarraña ñetpa' amaña enterretoña ora allpon ñeñt at̄et otanete't Yompor ahuaŕ ñeñtcha' at̄et apuerranet. ⁴⁰ Tarro'mar Yomporpa' ama't ahuaŕoteñ añ coŕape'chen ñeñt ello nanac cohuen enten ña. Ñeñt̄pa' yocpa'na allohuenacpay. Ñapa' añ muenen allohueney parro o'ch etsotaterñay ñeñt o'patatenya ñeñtcha' e'ñe cohuen ya'cohuentaterre' allohueney.

12

Chocmuepa'chña e'ñe yeyemuetneña Yepartseshar Jesús

¹ Ñeñto'marña yeñoteñ shonte' acheñ ñeñt orrtatyeseŕt ahuaŕoteñ; e'ñe pueyemteñoŕet Yompor e'ñe etsotayeseŕt Yomporcop ñeñt atarr echarr. Ñaña ñet te'pa' o'ch netma'ntatanet ñerra'mrrate' allohuenetpa' o' cohupreŕterryet yaña o'ch entyesyet erroŕtencha' yetsota yaña ñeñt at̄et muenateney Yompor. Ñeñto'marña yocoppa' añ poctetsa o'ch e'ñe yesuanom ama't erra'tsena ñeñt yepatare'tene' ama't ñaña yo'chñar ñeñt atarr yetpatyene'. Ñaña e'ñepa'ch ya'huanŕa'huanom allohuen ñeñt echarr yentyen. Allochñapa' at̄toch e'ñe cohuen yetsoteññañ ñeñt at̄et muenateney Yompor. Ñeñt̄pa' e'ñe at̄et ñerra'mrrate' ñeñt matetsa ñetpa' chocmach chapuet allohua onañchareŕtenet ñocpuet. ² Añcha'ña chocmuepa'chña e'ñe yeyemuetneña Jesús ñeñt orrtaterre' at̄toch yeyemtera ñaña ñeñtcha' yetsotaterre' ñeñt atto atarr yeyemuetneña. Tarro'mar ñapa' e'ñe pocte' eñche't o'ch ahuanŕa'huan allohuen ñeñt echarr ente't ama't atto rroma corsocho. Ama't ñeñt atarr apencochen entyenet, ñapa' e'ñe poctacma ahuanŕa'huanem̄. Tarro'mar e'ñe pueyemteñoŕa Pompor ñapa' eñoteñ ñach apapuerre' ñeñtcha'ña atarr coshatuerre'. Ñeñto'marña te'pa' o' alla anorruerr Pompor po'cohuenroŕ all anen po'conañño allña partsotuerr ñaña.

³ Ñehua, te' sapa' o'ch alla seŕerpuera Jesús atto ñapa' atarr muerochtater ñeñt atarr ochñaŕenesha' ñeñt atarr e'moñe'taye't. Tarraña ñapa' allohuen muerochteñetspa' e'ñe ahuanŕa'huanem̄. Allochñapa' sapa'cho'ña amach cha semuenme'chatsche ñeñtcha' atarr echarr sehuapoya, at̄tochña amach cha llecatenso. ⁴ Tarraña saña ama't atarr satpare'tyeñeñ atto atarr topatase't so'chñar amaña choŕe' muetsenseto ñeñt at̄et aŕareŕta Jesús, ashatareŕta po'rras ochñaŕtsocop. ⁵ Ñaña sapa' o'te' cha sepuesua ñeñt at̄et coŕape'chateney Yompor po'ñoño allohueney ñeñteŕ puechemer pen. Ñeñt̄pa' at̄et oteneŕ po'ñoñ:

Nechemere, ñerra'm esempo coŕape'chaterres cohuen Yompor amachña at̄ta sentatsche ñerra'm ama esoye' sherbeno. Ñaña ñerra'm esempo coñchatas mame' at̄toch o'ch alla soctape'cherr cohuen amachña ñeñtoŕa cha muene' sequechpatstere.

⁶ Tarro'mar allohueney ñeñteŕ morrentena Yompor ñeñteŕcha'ña coŕape'chaterr

cohuen. Ñaña allohueney ñeñey puechemerasha' pen ñeñeycha'ña coñchatyes mamesha'tets attoch o'ch alla yoctape'cherr cohuen ñocop.

⁷ E'ñepa'chña ya'huanta'huanom atto coñchateney mame' tarro'mar ñapa' añ muenen o'ch e'ñe puechemer perrey poctacma. Ñehua, yeñoteñ e'ñe pocte' atto ñeñ achemereshat errotenopa' o'ch coñchachet puechemer mame' allochñapa' attoch e'ñe cohuen ame'ñenanet puechemer. ⁸ Tarro'mar ñerra'm esesha' ama coñchatenaye mame' puechemer attoch e'ñe cohuen ame'ñachet ñeñtpa' po'ñoçh ama puechemereye' peñe; ñeñtpa' cha ottena ñerra'm ellapnanesha'. Ñeñto'mar sapa'cho'ña ñerra'm ama coñchatenso Yompor mame' attoch same'ña e'ñe cohuen po'ñoçh amaca'ye puechemereye' penso. ⁹ Elloña yeñoteñ allempo cheshenya' ñeñt yompor yepen arr patsro atto e'ñe cohuen coñape'chatyesye't, ñeñtpa' e'ñe pocte' yeñche't tarro'mar yeñoteñ ñeñtpa' e'ñe cohuen yocop. Ñeñto'marña te'pa'cho'ña e'ñepa'chña cohuen yenteñ atto Yomporpa' o' coñape'chaterrey cohuen ñeñtara Yompor ñeñt pue'ntañotsen ñeñt pamo'mte' pen yecamquëñ attoña yapa' corretsayach. ¹⁰ Ñehua, ñeñt yamo'mte' yepen arr patsro ñetpa' e'ñe allponmata coñape'chatyesyete't allempo yapa' cheshenya'. Ñetpa' chocma coñchatyesyete't allpon pocte' entyesete't ñet. Ñaña Yompor atto allpon coñchatyeney mamesha'tets ñeñtpa'cho'ña e'ñe cohuenacma yocop allochñapa' yapa'cho'ña e'ñech cohuenare' es yorrtatyen e'ñe atet ñerra'm ñapa' e'ñe cohuenare' es orrtatyen. ¹¹ Ñaña yapa' yeñoteñ ñerra'm esesha' yecoñchatene' ñeñtpa' ama cohuenaye' yenteñe e'ñe allempo coñchatenyet, tarro'mar ñeñtpa' chocmach llecatenyet. Tarraña puecoñchateñoñetaypa' o'ch yeñoterr ñeñt atarr cohuen enten Yompor. Allochñapa' attochña e'ñech yocsheñesha' yeychena cohuen muechet.

Ñato'tña atta es sepçhampena'ña ñeñt atet anaret Partseshot socop te'tña ama seçherro ñesho

¹² Ñeñto'marña te'pa' o'ch notas, o'ch alla setanterra o'ch alla sa'huamencatterra Yomporecop. Atetcha' netma'ntatasa atet ñerra'mrrate' o' alla ahuamencat seperr sot ñeñt cha yoncota'ten ñaña atto seyonllocme'chenpa' o'ch alla ahuamencat seperr selloquëñ. ¹³ E'ñepa'ch cohuen es sorrtatyen allochñapa' ñerra'm esesha' ama e'ñeye' huomencaye' penaye pueyoçher Yomporecop, sañapa' amach aña sorrtateno ñeñtcha' a'puerrataterrahuet. Añcha'ña sorrtateññañ ñeñtcha' e'ñe cohuen yenpuene'. Ñeñtpa' atetcha' netma'ntatasa ñerra'mrrate' sapa' añ se'nen toñ ñeñt atarr cohuen pacharr sets muepñarero allcha' e'ñe cohuen sechope'chen. Allochñapa' ñerra'm eseshas checa'repuets amach cha sepoto'tatse'tnomo amach cha sa'tserrpa'nmo attochña e'ñe cohuen sechope'chnom e'ñe huomenc.

¹⁴ Añepa'chña sema'yochrena attoch e'ñe cohuen samo'tstannena, e'ñech muechet seyçhena epas allohuen samo'tseshaçhno. Ñaña añcha'ña soctape'chyen ñeñt e'ñe cohuenare' enten Parets. Tarro'mar ñerra'm añ ama yoctape'cheno ñeñt cohuenare' enten Paretspa' amach errotenot yentereña Yompor. ¹⁵ Ñaña señoanna'tnomuepa'ch, ñato' eseshaspa' ama aye'e' neno Yompor ñeñtcha' yenpue'. Ñaña señoanna'tepa'ch ñato'tña ama't e'ñe mameshapa' sorrtatena'ña attoch se'moñe'tanna'ta. Ñerra'm atet sepenapa' acoñoteñpa' o'ch e'ñe epa'huapa' çhach orrtatan atsrre'moçhen. Attoña ñerra'm shonte' acheñenesha'pa' çhach a'sosyatuanet; ñeñtpa' ama pocteye' enteñe Parets. Ñeñtpa' atetcha' netma'ntacha ñerra'mrrate' narmets ñeñt atarr pesherr ye'muen. ¹⁶ Ñaña señoanna'tnomuepa'ch ñato'tña esesha' chetenaya'ña ñeñt ama pueñaporeyaye. Amapa' ñato'tña atta es sepçhampena'ña ñaña ñeñt atarr sherbets Partsocop, ñeñt atet pa' ahuat Esau. Ñapa' e'ñe pa'chporrñoña pomhuan ñeñt anaret ñocop Partseshot. Ñeñtpa' ñeñt

o'patacha pompor ñeñt metana'tuene' ñeñtcha' allpon apa'nman po'poñ puechemere-sha' tarro'mar ñapa' ñeñt e'ñe po'moter pen pompor. Tarraña Esaúpa' ama esoye' enteñe ñeñt anaret ñocop Partseshot ñeñto'mar e'ñe pomhuan ñeñt o'patacha pompor ama't e'ñe parrocha rrachet. ¹⁷ Tarraña e'ñe allponmatapa' yeñoteñ o' alla muenerran ñeñt anaret ñocop Partseshot, tarraña allempopa' amach errotenot alla apuereterro. Ama't pueya'chpeñsha' enamuerreñ allempopa' amate' errotenot a'po'poñeterretoña ñeñt atet o' pohuet ñenmañ.

¹⁸ Ñehua, yeñoteñ ahuat allempo Yomporpa' eñotatan israelena'tarnesha' attoch a'pocatanetañ Parets all aspeno Sinaíño, ñeñtpa' atarr yorochen. Allña aspeno ñerra'm esesha' chapats ama't pa'rrpapa' allorocmach errotto set all. Ñeñña aspeno' terpa' all huorten tso' ñaña ama machecmeto, añcha'noçhtena, huomenquëshaten.

¹⁹ All e'morrtena ñaña pactor atarr yorochen. Atto eñorana'tanet Paretspa' atarr añcha'noçhen enteñet. Ñeñto'marña acheñenesha' ñeñt e'mñotene' atto eñorena Parets, ñetñapa' atet otyenet. “Ñeñtepa'ta amach allo'na eñorana'tnenye Parets.”

²⁰ Ama eshcaye' ahuantenaye' enteñeto ñeñt atet otarettenet: “Ñerra'm esesha' chapats ñeñt aspeno' terpa' ama't pa'rrpapa' amsarettepa' — arrolle'tarettepa'ch amapa' enapecharettepa' panmeto. Ama't ñaña eyarra muetsetepa'.” ²¹ Ama't Moiséspa'cho'ña atarr yorochen enteñ, ama't ñapa' atet otanet: “Ama't napa' nemcha'na'teño'tpa' cha neyonshema'ten.”

²² Tarraña sapa' ama sentare aspenet all añcha'noçhtena Parets. Sapa' ñaña senterr ñeñt Siónapen ñeñt toma'ntenaya all yeçhena Yompor ñeñt ama arromña'teshayaye. Ñaña ñaña senterr Jerusalén ñeñt toma'ntenaya Yompor pa'netser ñeñt pue'ntañot'sen. Allñapa' shonte' coshame'tampeña mellaño'teñnesha' shonte' nanac. Ñeñt allpon allo'tsa'yenpa' ama e'ñotuapahuoyaye. ²³ Ñaña sapa' ñaña senterr allohuen ñeñt puechemerasha' o' perr Parets ñeñt apçhetsa pame'ñeñotet ña. Ñetña allohuenetpa' ñeñtet aquellcaretet pa'so'chñeçhno Yompor pue'ntañot. Ñaña sa te'pa' o' senter Yompor ñeñtcha' yeñotaterre' allohueney erra'tsencha' cohuen entyesuerr ñaña erra'tsencha' ama cohuenaye' entyesuerr. Ñaña allo'tsa'yen allohuen acheñenesha' puecamquëñeçhno ñeñt e'ñe pocte' enten Yompor; ñeñtñapa' o' e'ñe etsotatuanet all pue'ntañot. ²⁴ Ñaña te' o' senter ñaña Jesús ñeñt eñosets yocop Yomporesho attoch e'ñe cohuen a'pocatonay etserra. Ñaña o' seño'terrñañ po'rras ñeñt ashata'rettatsa alloña o' ap'renare'tterraña yo'chñar. Ñeñtpa' elloña e'ñe cohuen yenpuerrey. Ñeñtpa' ama atteyaye ñerra'm Abel po'rras ñeñt ashata'rettatsa ahuat.

²⁵ Ñeñto'marña te'pa' o'ch notas, se'mñoterepa'ch Yompor ñeñt se'ñorana'tenaya te'. Tarro'mar ahuat israelena'tarnesha' ñeñt ama e'mñotaye'te Yompor allempo eñorana'tanete't arr patsro, ñetñapa' ama eseshaye' queshpatso. Ñeñto'marña yeñoteñ ñerra'm yapa' amach ye'mñotere yaña Yompor ñeñt ye'ñorana'tenaya te' pue'ntañot, elloña yapa'cho'ña ama't pueñeñarro'teyapa' amach eseshay queshperrtso. ²⁶ Ahuat allempo eñorana'tanet aspenot, po'ñoñña'pa' cha pelle'llchatenan pats. Ñaña te'pa' elloña o' alla atet oterrerr Yompor ñeñtcha' atet perrerr; ñeñtpa' atet oten: “Elloña esempohuañen po'pocheño'pa' o'ch alla nepelle'llchatererr pats, tarraña amach ñapfayaya pats nepelle'llchaterro, enta'nachña nepelle'llchater.” ²⁷ Ñeñña po'ñoñer all oten “po'pocheño” ñeñña yeñotatene' esempohuañenpa' ahupore'taretterrach allohuen ñeñt ayeçhcataret ñeñt apelle'llchatpo'. Allempopa' añach a'puerrtsa ñeñt ama apelle'llchatpahuoyaye. ²⁸ Ñaña atto añcha'tare'ttena Yompor; ñeñtpa' ama apelle'llchatpahuoyaye. Ñeñto'marña yeparasyoso'chepa'ch Yompor tarro'mar ñeñt o'patatenyapa' ama ahupore'tpahuoyaye. E'ñe yeñcha'na'teño'tpa' e'ñepa'chña cohuen

yesherbeñ Yompor ñeñtcha' e'ñe coshatene' ña. ²⁹ Tarro'mar yeñoteñ ñeñt Yeyomporer yepen ñapa' atarr Parets e'ñe atet ñerra'm tso' ñeñt e'nuene' ama't erra'tsena ñeñt ama errof apen yenteno.

13

Atetcha' yeña attoch e'ñe cohuen yocshach Yompor

¹ Atterepa'ch chocma semorrentannena allohuenes atet ñerra'm e'ñe semo'nasheñ sepanna'tuena. ² Ñaña amach sepsatsto attoch e'ñe cohuen sagaḡ allohuen ama't esesha ñeñt huapyetsa sepaclo. Tarro'mar ama señoatanna'tueno; ñato'rraña añ saguën ñeñt mueñen Yompor atet pena po'potantañ ñetpa' añepa't agapuet mellañoñeñ.

³ Ñaña chocmuepa'chña seyerepya ñeñt ayottamḡsaretetyetsa. E'ñech cohuen sellcapretenanet atet ñerra'mrrate' sapa'cho'ña ayottamḡsaretes e'ñe parro. Ñaña ñeñt amuerochtataretetyetsa e'ñepa'ch cohuen sellcapretenanet ñamet tarro'mar sapa'cho'ña señoatet attecma errotenopa' chocmach semuerochtana saña e'ñe sechtso.

⁴ Ñaña o'ch notas po'poñ: Allohuenes ñerra'm esempo sesna'tena o' e'ñe seyoranna'ta epas setapor e'ñepa'ch cohuen sentña ñeñt atto seyorannena. Ama't parrochapa' amuepa'chña se'namḡsanna'tatsto. Yacmapa' amach chetatstano coyanesha' ñeñt ama puetaporeyaye ama't e'ñe parrocha. Coyanesha'pa'cho'ña amach agapatstanoña ñaña ñeñt ama puerrollareyaye ama't e'ñe parrocha. Tarro'mar Yomporpa' chocmach tsa'taterrana ñeñt chetene' ñeñt ama puetaporeyaye ama't ñaña ñeñt aguëne' ñeñt ama puerrollareyaye.

⁵ Ñaña te'pa' o'ch noterrser po'poñ: Amuepa'chña añña atarr seye'chapretatsetyesatsto quelle. E'ñepa'chña añña socshena ñeñt e'ñe allpona sechyen. Tarro'mar Yomporpa' atet oteney: "Napa' ama't ahuatapa' amach nequechpuerrso, amach na'ypo'ñerrso ama't ahuata." ⁶ Ñeñto'marña yeyemteñoñ Yompor e'ñech yocsheñeshoñ chocmuepa'ch atet yoten:

Yomporpa' ñeñtña yeyenpuene' ñeñto'marña amach es yemcha'tatsto. Ama't errotuanen muene' peney po'potantañ Yomporpa' ñach yecuanḡpene'.

⁷ Ñaña seyerpueñoñ chocmuepa'ch cohuen senteñ ñeñt a'potene' Yompor po'ñoñ socop, ñeñtcha' señoatatnomue' cohuen. Ñaña o'ch soctape'ch ñeñt atarr cohuenare' orrtatyesnomuet sesho, atto ñetpa' e'ñe cohuen yemteñet Yompor; sapa'cho'ña atetcha' seña saña yemtenaya Yompor e'ñe cohuen.

⁸ Jesucristo ñapa' atterach yeyemteña ama't ahuatoteñ, ama't teme'ttsen, ama't ñaña errponañohuen ñeñtach attera ayemuetpotena. ⁹ Ñeñto'marña amach seyemtatstoña ñeñt po'poñechno yeçhateñets ñeñt ama atteye' ayçhatareteso ahuañmo'choñeñ. Tarro'mar añña poctetsa o'ch huomenc yeña' yeyoçher e'ñe Yompor puemorreneteñoñey atto atarr yenpueney e'ñe atta. Ama añoteye' huomenc yepenoña yeyoçher atto es yerra'yen amapa' atto es yetore'tyena. Tarro'mar ñeñt cotene' añ yeçhateñets rreñtsocpa'na, ñeñt yeçhateñtsorpa' ama yenpuenaneto attoch huomenc pa'nmuet pueyoçher Yomporecop.

¹⁰⁻¹¹ Ñehua, yeñoteñ ñeñt corneshatets judioneshacop ñerra'm esempo muetsenet eyarra all altaro ñeñt po'chñarecuet, ñeñtña eyarra po'rraspa' ñeñtpa' o'ch anem cornesha' e'ñe allohuanen Parets po'ponro ñeñt ochñartsocpatets. Tarraña ñeñtña eyarra po'chetspa' amach esesha' rrenaye. Ñeñtña po'chetspa' o'ch anmet a'yo all ama acheñempañoñyaye, allcha' chamoset. Tarraña te'ña yocop ñeñt amtsaretterrtsa yo'chñarecop ñeñtpa' Cristo. Yapa' ñeñt po'ñoñ pocrramḡ pen yecamquëñ allohueney ñeñt yemtenaya ña. Tarraña ñeñt attera corneshatets judionesha' poctapñacop all po'prahuo peñet, ñetpa' amach errotenoñ pocrramḡ petoña Cristo. ¹² Ñaña atto anenan

judionesha' eyarra po'chets a'yo all ama acheñempañooyaye, ñeñtpa' añ toma'ntena atto Cristopa'cho'ña anmet a'yo all ama acheñempañooyaye allcha' e'ñe puemue-rochtateño'tetpa' o'ch rroma. Attoña e'ñe ña po'rroso a'cohuentaterrey Partsocop. ¹³ Ñeñto'marña te'pa' e'ñepa'chña yesuanom ñeñt ahua't yoc'ta'pña ñeñtara ñeñt ya'netser yepenpa' o'ch ahuey a'yo allo'tsen Jesús. Allcha'ña yemue-rochtapretosya yaña all atarr otnare'tyeñet. ¹⁴ Tarro'mar añe patserpa' ama añeyaye ñeñt po'ño'ch ya'netser yepen tarro'mar ñeñtpa' huañerrcha'. Yapa' añña ye'nen ñeñtcha' ya'netser yeperr ñeñtcha' yenterr Yompor pue'ntaño ñeñt ama ahuañaño ama't e'ñe errponaña. ¹⁵ E'ñe yeyemteño' Jesucristo chocmuepa'chña ya'ye'chochtateññañ Yompor. Atto chocma ya'ye'chochtateññañ ñeñtpa' añ toma'ntena ñeñtcha' yapueñ Yompor atet pete't ahua't o'ch muetset eyarra ñocop. E'ñepa'chña ya yenamot ya'ye'chochtateññañ pa'so'cheñ attochña e'ñech yocshateñ. ¹⁶ Ñaña chocmuepa'chña e'ñe cohuen seyenpannena ñaña e'ñech cohuen sa'muerañtena. Tarro'mar te'pa' ñeñtña atto es yapueñ Yompor ñeñtcha' atarr coshatene' ña.

¹⁷ Ñaña ñeñt sa'mcha'tareternesha' sepa'yenpa' chocmuepa'chña same'ñenanet, tarro'mar ñetpa' añecop anarettenet ñetcha' cohuañpenet secamquëñ Yomporecop. Ñaña Yomporpa' eñotatuerranetcha' ñeñt atet pa'yenet, ñato' e'ñete' cohuen cohuañpenset ñato'pa' amate' cohuenaye' cohuañpenseto. Ñeñto'marña socoppa' añ poctetsa e'ñechña cohuen same'ñenanet attochña ñetpa' e'ñech pocsheñeshocmañen torrenet socop. Amuepa'ch cha sellcatatstenaneto tarro'mar ñerra'm atetpa' amach errotenot coshaterrsetoña samña.

¹⁸ Ñaña te'pa' o'ch notas, chocmach sema'yochamñpenya. Yapa' yeñotena yeyo'chro ama eñalle attoch po'poñ yentannena. Yapa' añña yemnen chocmach yorrtatyen ñeñt atarr cohuen enten Yompor. ¹⁹ Ellopa' o'ch alla noterrser chocmach sema'yochamñpesna allochñapa' amach atarr atomatatstopa' o'ch alla ne'cherrerr sesho.

Arrpa' all so'tnerranet po'cartot

²⁰⁻²¹ Te'ñapa' Yomporepa'chña e'ñe ahuañencat sepene' ama't allohuen pa'namenacop ñeñt atarr sherbets ñocop. E'ñe yame'ñeño' Puechemer ñeñt Jesucristo ñachña ya'cohuentatene'ña ora yoc'ta'pña ñeñt atet yoc'tape'chyen yeyo'chro allochñapa' attochña e'ñe cohuen yoc'tape'cherr ora allohuen ñeñt cohuen enten ña. Attochña e'ñech cohuenare' sorrtatyen ñeñt e'ñe atet muenen ña. Ñeñtpa' ñeñtara Yompor ñeñt e'ñe yocshatene' yeyo'chro ñaña ñeñtara ñeñt tantaterre' Puechemer rromot ñeñt Yepartseshar yepen, Jesucristo ñeñtña atarr cohuen yecuañpene' atet ñerra'mrrate' ñeñt atarr cohuen cohuañpene' po'carrneror. E'ñe po'rrosoña alloña a'poctatonay ñeñt e'ñe etserra ñeñtña a'poctateñetspa' ama't errponañapa' amach huañerro. Te'ña e'ñe tayoteñpa' yecohuentatoñepa'ch Cristo ama't errponohuañen. Ñeñtpa' attetepa'ch Nompore yocop.

²² E'ñe allohuanen masheñeshacha' ñaña no'chaneshacha' o'ch alla noterrser, e'ñepa'ch cohuen se'mñoton neñoñ ñeñt allpon o' alla noctape'chatterres tarro'mar ama atonaye' ñoñets nequellquënnaso. ²³ Ñaña o'ch neñotatas masheñ Timoteopa' o' alla a'rroyeret. Ñerra'm ahuencha' chap arrpa' epsheño'mareypa' o'ch ahuey o'ch yemo'tensa'.

²⁴ Ñaña napa' nemnen o'ch nehuomcha'ch necartot allohuen ñeñt sa'mcha'tareternesha' sepa'yen, ñaña allohuen masheñeshachno ñeñt pueyochresha' pen Parets all sesho. Ñaña italo'marnesha' ñeñt ame'ñetsapa' ñetpa'cho'ña mueneñet o'ch huomcha'taset ñamet añ necartot.

²⁵ Te'ñapa' Yomporepa'ch sa'nataya allohuenes. Ñeñtach notas, ñeñtpa' attetepa'ch Nompore. Allohua.

AÑ SANTIAGO PO' CARTA SANTIAGO

Atto Santiago quellcan carta allohuenacop ñeññ atta parratse'tyets allemeñ

¹ Masheñeshacha' ñaña nochaneshacha' ñeññes Israel puechemerasha' po'mrenñes, ñeññ charrasheña puechena epsheña ñeññña po'mreneñ sepene'ña sa, ñeññes atta parratse'tyets allemeñ anetso'mar. Na Santiagon sequellquëne'ña añ carta ñeññen torretsa Yomporecop ama't ñaña Puechemerecop Jesucristo ñeññ Yepartseshar yepen. Te'pa' o'ch nehuom'cha'tas allohuenes añ necartot.

Attoch ya'huanten allohuen topateñets

² Ñaña te'pa' o'ch masheñeshacha' ñaña nochaneshacha' notas, ñerra'm esempo huaponasa pa'namen topateñetspa' sapa' socshepa'ch nanac. ³ Tarro'mar sapa' señoñeñ ñerra'm cho huaponaya topateñets, ñeññpa' añecopcha' huapa attoch topatenya' ñerra'm po'ñochte' yame'ñena. Allochñapa' attoch chocma es ya'huanten. ⁴ E'ñe pocte' allo'nepa'ch sesen ahuenta'huanmue' allohuen topateñets, allochñapa' attoch poctacma huomenc sepa' seyo'cher Yomporecop, ñaña attoch amach es sepallteno ama't mamesha atto same'ñeña Yompor.

Yomporpa' chocma mueneñ o'ch es eñotatey

⁵ Ñerra'm eseshaste' ama e'ñeye' eñotenaye ñeññ cohuen enten Yomporpa' sapa' añcha'ña senam Yompor, ñapa' chocmach es eñotatey, tarro'mar ñapa' e'ñech pocsheñesha' es apuñey allohueney, amachña ñeññapa' cha che'ptare'tye. ⁶ Tarraña ñerra'm esempo es senamueñ Yomporpa' e'ñech seyemteño' es sanamñ. Amach cha se'charrtatsto seyo'chro ama't mamesha. Tarro'mar ñeññ chocma echarrtetsa pueyo'chropa' amach e'ñeye' yemtenano Yompor ñeñño'marña ñeññ atet petsapa'chach ottena ñerra'mrrate' oñ pue'mo'yer ñeññ allemateñ anen mōrr. ⁷⁻⁸ Ñeññ atet petsapa' eñochetepa' po'ño'chpa' amach es ape Yompor, tarro'mar ñeññ atet petsapa' amach patrraye' co'tape'cheno. Atet ñerra'm te'pa' ñato' po'poñcha' co'tape'chen, ñato' tsapañña' o'chcho' co'tape'chenan po'poñ. Ñeññ acheñerpa' chocmach atet pa'yena.

⁹ Tarraña ñerra'm eseshas masheñre esempo atet sentena ñerra'm ama esoshe'mayaysopa' socshepa'ch, tarro'mar allempo Yomporpa' atetcha' entenes ñerra'mrrate' ñeññes nanac sherbets. ¹⁰ Ñaña añ masheñer ñeññ echene' shonte' po'çllayorpa' coshepa'ch ñerra'm esempo es huapoya. Allempopa' amach esoshe'maye' entereto. Tarro'mar ñeññ eçllayore' ñeññpa' mamecpa atet pena ñerra'mrrate' ta'te' puerorer ñeññ nanac auyaña. ¹¹ Tarro'mar ñeññ ror atetpa' ñerra'm o'ch huapa'muena atsne', ñerra'm o'ch atserrtapa' chach a'uyatoñña pue'chor, añña puerorerña' o'ch shorna'tua; ñeññña atto cohuentenapa' o'ch huañ. E'ñe atet penaña ñeññ eçllayore'. E'ñe puehecma'teño'pa' huañerrcha' ñaña.

E'ñe yañeña yemnenño' topateney oneñe'

¹² Nanac cosheñtso'tsen allohuen ñeññ ahuantene' ora pa'namen topateñets, tarro'mar ñerra'm esempo ahuenta'huan ora topateñetspa' nanaccha' cohuen entuer Yompor. Allempopa' aphuercha' Yompor ñeññcha' atarr coshaterre' alloch ñapa' corretsach tayoteñ ama't errponañohuen. Ñeññpa' aña o'patatena allohuen ñeññ morrentenaya ña. ¹³ Ñaña te'pa' o'ch notas, ñerra'm esempo e'ñe sañeña semnenño' o'ch sepa' ñeññ ama cohuenayayepa' amach sotatsto, "añpa' Yomporte' o' topaten." Tarro'mar Yomporpa' ama esesha' topatenaye attoch ñapa' o'ch pa' ñaña ñeññ ama cohuenayaye. Ñeñño'marña ñapa'cho' amach erro'teno' topatye yaña. ¹⁴ Elloña añmapa' e'ñe sañeña semneñño'

attoch huaponasa topateñets o'ch sepa ñeñt ama cohuenayaye. ¹⁵ Tarro'mar ñerra'm es-empo es yemnatse'tyen yeyochro, ñerra'm o'chcho' ye'pa atetpa', ñeñtpa' ñeñña yo'chñar yepen. Ñaña ñerra'm chocma allo'na yesen pa'nmue' ñeñt ama cohuenayayepa' e'ne yo'chñarotpa' o'ch yechenquerra.

¹⁶ Masheñeshacha' ñaña nochaneshacha' e'ne nemorrenteño'fesa' o'ch alla noterrser, amach sepantatsche sañeña. Po'ño'chpa' ama Yomporeye' yetpatenaye attoch ye'pa' ñeñt ama cohuenayaye. ¹⁷ Yomporpa' e'ne cohuenare' es apuene' ñeñtcha' allo'na yeyenpuene' ñeñtara ñeñt mueñennay pue'ntañot. Ñaña ñeñtara Yompor ñeñt yechcate' allohuen ñeñt yechoyo'tañpene' pue'ntañot. Tarraña erroteno e'ne puechope'cheño'tpa' amach tama choyo'tañpenye. Tarraña Paretspa' ama atteye' peno. Ñapa' amach ellopa' alla a'po'poñetañperrye ñeñt atet muenateney. ¹⁸ Allempo yame'ñerrñaña po'ñoñ ñeñt e'ne po'ño'ch atet oteney ñeshoñña' ye'ñallettera atet ñerra'mrrate' e'ne puechemerey ñeñt e'ne po'moter pen ñeñt anaret e'ne ñocop. Tarro'mar ñeñtpa' atet muenen ña.

Añpa' ñeñtcha' atet yesherbe' Yompor e'ne cohuen

¹⁹ Ñeñto'marña masheñeshacha' ñaña nochaneshacha' e'ne nemorrenteño'fesa' o'ch neñotaterrser po'poñ. Sa allohuenes añ poctetsa chocmach pocte' señch o'ch se'mño'ch cohuen ama't erra'tsena ñeñtcha' serrpare'tatets. Añcha'ña chocmach serrmuen señoñ. Ñaña amach e'ne atto'ta sa'tsrre'ma'yeno, chochña ñanom es soctape'ch ñato' atsrre'mochente' ñeñt atet otenset, ñato' amate'. ²⁰ Tarro'mar e'ne ya'tsrre'mueño'tpa' amach errotenot yetsotoña ñeñt atet pocte' enten Yompor. ²¹ Ñeñto'marña sapa' o'ch seque'chpa'huerr sosya'tsañ ora allohuen ñeñt shonte' sepa'yen ñeñt ama pocteyaye Yomporecop. Añcha'ña sapa' o'ch sagapoñ Yompor po'ñoñ e'ne señmañesha'. Tarro'mar ñerra'm o'ch chaponaya Yompor po'ñoñ e'ne yeyochropa' ñeñtpa' ñeñtcha' ya'queshpaterre' esempohuañen yecamqueno't.

²² Ñaña sapa' amach e'ne orrena se'matstoñe Yompor po'ñoñ, chochña sorrtatyesña ñeñt atet oteney. Tarro'mar ñeñt e'ne orrena e'muene' Yompor po'ñoñpa' ñeñtpa' ñañeñach shequëtsa tarro'mar chate' otenapañ ñato' ñeñtate' poctetsa ñocop attoch queshperra. ²³ Ñaña ñeñt atet petsapa' chach ottena ñerra'mrrate' ñeñt atta cohuetsa rerpo. ²⁴ Añecpach cohuen o'ch entan erro'tente' orrtena pa'clloyot. O'chña entuan ñeñt atet orrtenapa' allempoñapa' o'ch ahuer. Allempoña cherr a'yopa' o'ch alla puesuerran ñeñt atet orrtena pa'clloyot. ²⁵ Tarraña ñeñña e'ne pomnenño't ma'yochrenaya Yompor po'ñoñ ñeñt e'ne cohuen atet oteneypa' ñeñña'pa' ama atteye' peno ñeñt atet pena ñeñt e'ne orrena e'muene' Yompor po'ñoñ ñeñt atta puesene' ñeñt atet oteney Yompor. Añcha'ña chocmach orrtatyenan ñeñt atet oten Yompor po'ñoñ. Elloña ñeñt atet petsapa' nanaccha' cosheñtso'tsen.

²⁶ Ñerra'm esesha' otets ñapa' nanaco' cohuen sherbenan Yompor, tarraña ñerra'm ña ama anenano po'ñoñpa' ñeñtpa' ñañeñach shequëtsa. Tarro'mar ñerra'm atterach yeñosatsé'tyenpa' amach po'ño'chaye' yesherbeñe Yompor. ²⁷ Añña e'ne pocte' enten Yompor Apa ñeñtcha' atet yesherbeñ ña e'ne cohuen: O'ch yeyenpueñ huocchane-shachno, ñaña rretorranesha' ñerra'm esempo es muero'chtatenahuet. Ñaña yapa' amach ya'sosyatatsto yechets ñeñt atet patse'tyena ñeñt ama ame'ñetso arr patsro.

2

Atto amach puesheña'ttsa cohuen yentatsto

¹ Masheñeshacha' ñaña nochaneshacha' te'pa' o'ch noterrser po'poñ. Sa e'ne same'ñeño't Yepartseshar Jesucristo ñeñt e'ne co'chneshare' orrtatetspa' amach puesheña'ttsa e'ne cohuen sentatsto. Sapa' e'ñech cohuen senteñ allohuen acheñesha'.

2-3 Ñato' sa errotēnopa' o'ch sapčhena allohuenes Yompor pa'paclo. Allempoña sapčhenapa' ñato' o'ch huapa puesheñarr ñeñt chorrenaya ñeñt nanac cohuen, ñeñt nene' anillo orotlillen. Ñato' ñapa' e'ñech cohuen sagaṗ o'chčo' sotaṗ: "Panorros arr allame'tets e'ñe cohueno." Ñato' e'ñech allempocma o'ch huapa ñaña ñeñt atarr huocchañ ñeñt čha shetsre'she'muen pa'shtam. Ñato' ñeñtñapa' čhach sotaṗ: "Papa' alla ṗatomos tarronet, amapa' alla ṗanorros patso." ⁴ Tarraña ñerra'm atet sepenapa' ñeñtṗa' amach allohuenacmaye' cohuen sentanneno. Ñaña čhach sottena ñerra'mrrate' sañeña eñotene' ñeñt acheñer nanac sherbets. Tarraña ñerra'm atet yepenapa' ñeñtṗa' amach cohuenaye' yocṗape'cheno. ⁵ Masheñeshacha' ñaña nočhaneshacha' e'ñe nemorrenteñoṗes te'pa' nemneñ o'ch se'mñnoten ñeñtčha' atet notas. Elloña Yomporpa' añña nanac muenen o'ch acerrran allohuen ñeñt nanac huocchañetets añ patsro, attoch e'ñe pame'ñeñoṗet ñetṗa' echerretcha' esocmañen Yomporeshoṗ. Esemphuañenñapa' o'ch aguērret ñaña ñeñt o'patatenanet Yompor all añcha'tarettena pue'ntaño. Ñaña ñeñt o'patatenya allohueney ñeñtṗey morrentenaya ña. ⁶ Tarraña sañapa' čhaña semneñ o'ch sepencach ñeñt huocchañetets. Sapa' ama't señoṗeñeña ñeñt nanac ečllayoreṗa' ñeñtña es aprratañṗsañ, amapa' o'ch temantas añcha'tareṗesho. ⁷ Ñaña ama't señoṗeñeña ñeñt nanac ečllayoreṗa' ñeñtña nanac achmāre'tene' Cristo pa'so'cheñ ñeñtara ñeñt nanac añcha'na'tṗo' yenten ya ñeñtṗey Cristona'tarey.

⁸ Ñerra'm čhocma semorrentannenapa' allempopa' o'ch setsotua añ ñoñets ñeñt atet anareṗ Yompor po'ñoño ahuatoteñ, ñeñtṗa' atet oten: "O'ch atarr cohuen pemuerya ṗamo'ts e'ñe atet atarr pemorrentena ṗañeña." Añ ñoñets ñeñtña nanac sherbets, ello metana'tuenan po'poñechno. Ñerra'm atetčha' seṗapa' allempopa' amach es sepallteno Yomporecop. ⁹ Tarraña ñerra'm sapa' e'ñe puesheña'ttsa semorrentenapa' ñeñtṗa' allotña čhocma yo'chña'ten. Ñaña ñerra'm atet yepenapa' nanaccha' yeyoren yo'chñar, tarro'mar ama atet yepeno ñeñt atet oteney Yompor po'ñoñ ñeñt atet anareṗ. ¹⁰ Ñaña ama't e'ñe yeyčhatset allohuen Yompor po'ñoñ ñeñt atet anareṗña', ñerra'm paṗerrñapa' ama atteye' yepeñepa' Yomporñapa' o'ch enteney ñerra'mrrate' o' ora yepanta'huoñ. ¹¹ Añ Yompor ñeñt yotene' "amach sechtapretatsto ṗaporets" ñeñtara Yompor ñeñt yotene' ñaña "amach semtsanna'tatsto." Ñeñto'marña ama't ama yechtapretatsto ṗaporetsña' ñerra'm errotēnopa' machayoṗa yemtse acheñ Yomporñapa' o'ch enteney ñerra'mrrate' o' ora yaṗpare'tuoñ po'ñoñ ñeñt atet anareṗ. ¹² Ñeñto'marña sapa' čhocmach seyerpa atto esempohuañen Yomporpa' eñotatyesserreycha' e'ñe errotēncha' entyesserrey. Tarro'mar ñato' yepena ama't ñeñt atet oteney te' Cristo po'ñoñ ñeñt atet anareṗ ñeñt ama amuročhtatañeyaye. Ñeñto'marña sapa' e'ñe señoṗeñoṗ atetṗa' ama't errotēna señenpa' e'ñepa'chña cohuenare' señosyen. Ñaña e'ñe señoṗeñoṗ atetṗa' e'ñepa'ch cohuenare' es sorrtatyen. ¹³ Ñaña sapa' señocheṗa'ch ñeñt ama morrentenayo te' pamo'tspa' ñapa'čo'ña esempohuañen allempoch eñotatyesserrey Yompor e'ñe errotēncha' entyesserrey, ñapa'čo'ña allempopa' amach eseshaye' morrenterrayo. Añña ñeñt morrentenaya te' pamo'tspa' esempohuañenñña allempoch eñotatyesserrey Yompor e'ñe errotēncha' entyesserrey, allempoña ñapa' nanaccha' amuerareṗterra.

Ñerra'm po'ñočh yame'ñenapa' čhoch yorrtat ñaña ñeñt cohuentetsa ñocop

¹⁴ Masheñeshacha' ñaña nočhaneshacha' te'pa' o'ch notas. Po'ñočh ama sherbenoña añ acheñer ñeñt otets ñapa' ame'ñeno', tarraña ñerra'm ama orrtatenano ñeñt cohuentetsa Yomporecop. Ñeñtña acheñer atetṗa' amach po'ñočhaye' ame'ñeno'. Amachca'ye a'queshṗatereña ñeñt atto oten e'ñe orrena ñapa' ame'ñeno'. ¹⁵ Ñehua, ñato' o'ch netma'ntacha atet. Ñerra'm puesheñarr masheñ, amapa' yočh palltenet ñeñtčha' chorret, amapa' ñeñtčha' rret allempo, ¹⁶ tarraña ñerra'm sapa' atṗa sotyeyñ:

“Ahua'ta, Yomporepa'chña p̄a'nataya. Eñalletepa' ñeñtcha' pechorra, ñaña ñeñtcha' perra'.” Tarraña ñerra'm amaña es sape ñeñt palltenapa' atetpa' amaca'ye choye' es sesherbena. ¹⁷ Ñeñtpa' atet pena ñaña ñerra'm esempo atfa yoten, “napa' name'ñena”, tarraña ñerra'm ama yorrtateno ñeñt cohuentetsa Yomporecoppa', ñeñtña atfo yoten, napa' name'ñenapa' amach es sherbena. Chach yottena ñerra'mrrate' o' huañerr atfo yame'ñena.

¹⁸ Ñato' o'ch netma'ntacha atet. Ñato' puesheñarrpa' o'ch otan po'psheñeñ: “Papa' e'ño' peyemteññaña ñeñt atet otene y Yompor po'ñoñ, tarraña amaña p̄orrtatyenoña ñeñt atet otene y Yompor po'ñoñ. Tarraña napa' e'ñe neñohuen ñeñt cohuentetsa Yomporecop. Ñehua, ¿erra'tsenoteyte'ña e'ñe pocte' enten Yompor?” Ñehua, te'pa' o'ch notap̄ ñeñteñ atet otets: Po'ñoñch ñerra'm ama yepeno ñeñt cohuentetsa Yomporecoppa' amach errotenoñ yeñotache po'psheñeñ ñato' po'ñoñchte' yeyemteññaña Yompor po'ñoñ. Tarro'mar ñerra'm po'ñoñch yame'ñenapa' chocmach yorrtat ñaña ñeñt cohuentetsa Yomporecop. ¹⁹ Ñaña p̄apa' peyemteño'tpa' peñoteñ Yomporpa' e'ñe patrra. Ñehua, ñeñtpa' e'ñe pocte' atet, tarraña oneñe'tpa'cho'ña eñotenan ñaña atet. Tarraña ñapa' ama't eñotenaneñña Yomporpa' ama't e'ñe patrra, tarraña po'yorño'fach eñoteñ, tarro'mar ñapa' eñotena amach qeshperro. ²⁰ Te' p̄apa' amate' peñoteña'. Chote' pemneñ o'ch neñotatañ atfo ñerra'm ama yepeno ñeñt cohuentetsa Yomporecoppa' ama't yoteneñ yame'ñena e'ñech orrena atet yoten. ²¹ Ñehua, Yomporpa' e'ñe pocte' entan ahuat yatañ Abraham allempo muene' muetsaneñ puechemer Isaac Yomporecop, * tarro'mar ñapa' añ orrtaten ñeñt cohuen enten Yompor. ²² Ñapa' e'ñe pocte' entan Abraham tarro'mar e'ñe pueyemteño'tpa' orrtatuan ora ñeñt atet och Yompor. Ñeñto'marña yeñoteñ Abrahampa' e'ñe poctacma ame'ñane't Yompor. ²³ Allempo atet pe'tpa' attotña e'ñe etsotuan Yompor po'ñoñ ñeñt atet aquellcare't ahuatoteñ Génesis, ñeñtpa' atet oten: “Abrahampa' nanac yemtana Yompor, ñeñto'marña e'ñe pueyemteño'ta Yomporña' e'ñe pocte' eñche't. Ñeñto'mar Abrahampa' atet ochete't, añmapa' ñeñt e'ñe parro yemtana epuet Yompor.”

²⁴ Ñeñto'mar yeñoteñ Yomporpa' e'ñech pocte' entene y ñerra'm esempo yorrtatyeneññañ ñeñt cohuentetsa ñocop. Ama't errpon yotatset yapa' e'ñe cohuen yame'ñena tarraña ñerra'm ama yeñohueno ñeñt atet muenen ñapa' amach errotenoñ pocte' entyeña Yompor. ²⁵ Tarro'mar ama't Yomporpa' e'ñe pocte' entan ahuat coyanesha' ñeñt pa'so'cheñ Rahab, ama't ñapa' allempo p̄a ñeñt e'ñe pocte' ent Yompor ñocop. Ama't ñeñt coyanesha'pa' nanac ecañoreshat, tarraña ñapa' e'ñe año'ta pocte' eñch Yompor atfo ñapa' agapan e'ñe cohuen pa'paclo ñeñt mueña ahuat Josué ñeñtcha' entenaya' ñanom pats. Allo'tpa' ñaña ahuo't gaterranet po'poñ toñ allcha' oñerret atfoch ama rromuerraneto allo'marnesha' ñeñt e'moñe'tenahuet. E'ñe atet puepeño'ta Yomporña' e'ñe pocte' eñch e'ñe attecma ñerra'm Abraham. ²⁶ Ñeñto'marña te'pa' yeñoteñ ama't errpon yotatset yapa' e'ñe cohuen yame'ñena, tarraña ñerra'm ama yorrtateno ñeñt poctetsa Yomporecoppa' amate' eso yesherbeña Yompor. Ñato' o'ch netma'ntacha atet. Allohueneypa' e'ñe yeñotueñ ñerra'm esempo yeñch yamo'ts o' rromapa' o'ch yeñoch ñeñtpa' o' sa'neñ puecamqueñ tarro'mar ñerra'm ñeñto' o' yerromapa' añ yechetspa' amach es sherberre'te.

3

E'ñe yeñosatse'teño'ta nanac yochña'ten Yomporecop

* **2:21** Ñehua, ahuat Yomporpa' ahuo't otan Abraham muetsanepa'to' puechemer ñocop. Tarraña ñapa' añecpa atet och atfoch topach ñato' po'ñoñchte' ame'ñeña. Ñeñto'marña Abrahampa' autsa muetsayeñ puechemer Yomporecop, tarraña ello'pa' ama muenache Yompor.

¹ Masheñshacha' ñaña nochaneshacha' te'pa' o'ch notas po'poñ. Ama pocteyaye o'ch sechen shonte' ñeñt muenets o'ch cotape'chaten ñeñt cohuentetsa Yomporecop. Tarro'mar señoñeñ ñeñtey cotape'chatets cohuen Yomporecoppa' ello nanaccha' yoro'cheno'tseney ñerra'm esempo yepena ñeñt ama cohuenayaye tarro'mar Yomporpa' amach pocteye' entenye ama't e'ñe mamesha. ² Tarro'mar allohueneypa' chocma es yepanten. Ñerra'm esesha'ña ama es panteno pueñosatse'teño'pa' ñeñtña po'ño'chpa' e'ñech cohuen cotape'chen, ñaña ñeñt atet acheñpa' e'ñech eñoñeñ attoch huenatan ora ñeñt atet muenatse'tyen yechets. ³ Atet pena ñaña cahuall. Ñerra'm echenan attoch yame'ñacha, E'ñe puenamo'tpa' esheccha' yanemñ all yesechateñ. E'ñe puenamo'tpa' o'ch yame'ñacha ora pue'mocrohuen. ⁴ Ñato' o'ch netma'ntacha ñaña ñeñt atet pena bote ñeñt chope'chets oño. Ñehua, botepa' ama'tcha' nanac añecmuen noñtpa' e'ñe puepopa'po'tpa' o'ch aneñet all sechateñ pamo'mte'. Ñaña ama'tcha' puepopa'ppa' añeñollpach, ñaña ama't miorrpa' mueneñeñcha' o'ch anemñ a'yenet allenet ama yesechateñe, e'ñe puepopa'po'tpa' o'ch e'ñe cohuen aneñet allenet sechateñ pamo'mte'. ⁵⁻⁶ Atet pena ñaña yenam. Yenampa' ama't añeñolla yechetspa' atarrcha' pa'namen esocmañen yeñosyen allot. Ñaña ñeñt atto yeñosatse'ten sosey e'ñe yenamotpa' ñeñtpa' atet pena ñerra'mrrate' tso'. Ñehua, tso'pa' ama'tcha' añeñolla ya'torapa' mameshapa' o'ch epa'hua erracmañen puetsato'mar, allotpa' o'ch a'poyuonay ama't ora ñeñt nanac yemorrentena. Ñeñtpa' atet pena ñaña eñosatse'teñets. Eñosatse'teñetspa' ama'tcha' mamesha yeñosatse'tpa' mameshapa' o'ch epa'hua erracmañen. Allempoñapa' o'ch cha a'huañerran ñeñt cohuentetsa Yomporecop. Tarro'mar ñeñt atto yeñosatse'tyenpa' allot huena esocmañen sosya'tsañechno ñeñt añe patsro'tsen. Ñaña ñeñtpa' a'sosyatennay ora allohuen yoc'apña. Ñaña allohuen eñosatse'teñetspa' arroñ huena e'ñe oneñeñ pa'netsroñ, allara coñcha'puetso all parraren tso' erra'paren. Ñeñtcha' a'sosyatene' ora allohuen ñeñt atet yocrrena arr patsro. ⁷ Ñehua, allohueneypa' e'ñe pomnaren ye'pohueñ allohuen berro'chno, ñaña o'echno, ñaña allohuen shechpechno, ñaña ama't ñeñt ye'cha'yetsa oño'mar. Ora añechnopa' e'ñe pomnaren ye'pohueñ. ⁸ Tarraña atto yeñosatse'tyen yenamotpa' ama esesha' pomnaren penaye. Tarro'mar atto yeñosatse'tenpa' amate' erroteno't yeunache, ñeñto'marña chocmach yeñosatse'tyen. Ñeñto'marña yeñosatse'teñapa' e'ñe atet pena ñerra'mrrate' sheche'p ñeñt nanac amtsañ. Sheche'p amtsañpa' ñerra'm cho a'chay mameshapa' o'ch muetsay. ⁹ Ñaña añ ñeñtara yenamotpa' ñato' errotenopa' o'ch ya'ye'cho'chtatoñ Yompor ñeñt Yepartseshar yepen. Tarraña errotenopa' ñeñtara añ yenamotpa' ñato' o'ch yesasare'ch yamo'ts ñeñtara ñeñt ye'chcat Yompor ñeñt puetma'ntatara atet ñerra'm ña. ¹⁰ Ñeñto'marña masheñshacha' ñaña nochaneshacha' sapa' amach atet se'patsto tarro'mar ama pocteyaye e'ñe yenamotpa' allot yenamateññañ yamo'ts Yompor pa'nateña, ñato' elloñapa' o'ch'cho' alla yesasare'ter yamo'ts ñeñtara añ yenamot. Sapa' amach atet se'patsto tarro'mar po'poñ Yompor pueye'chcatar, ñeñtpa' ama atteye' p'anneneto. ¹¹ Ñato' o'ch netma'ntacha atet: Ama't sapa' señoñeñ ñerra'm erro't poten oñ e'ñe cohuenpa' amach erro'teno poto ñaña all oñ ñeñt cha rreno'sen. ¹² Ñaña masheñshacha' ñaña nochaneshacha' ama't sapa' e'ñe señoñeñ, ñerra'm yenare't poporrpa' amach pue'mer p'anoña ñaña parte allempo me'ten, amapa' ñerra'm yenare't ompa' amach pue'mer p'anoña ñaña poporr.* Ñaña ellopa' e'ñe señoñeñ, ñerra'm erro't poten oñ e'ñe cohuenpa' amach erro'teno't poto ñaña all oñ ñeñt cha poserrastena. Ñeñto'marña yeñoñeñ yocoppa' ama pocteyaye o'ch

* **3:12** Po'ño'ch arrpa' añ toma'ntatanet higo'ch ñaña uva ñaña aceituna tarro'mar ñeñt chopuets Palestino. Ñeñtpa' atet oten: "Ñerra'm yenare't higo'chpa' amach pue'mer p'anoña ñaña aceituna, amapa' ñerra'm yenare't uvachpa' amach pue'mer p'anoña ñaña higo."

yorrtat ñeñt epa ñeñtara yenamot. Ñeñt paterrpa' atto ya'ye'chochtateññañ Yompor, po'poññapa' o'chcho' alla yeñosatse'terr allohuen pa'namen sosya'tsañ ñeñtara yenamot.

Añpa' ñeñt atet pena eñoteñets ñeñt huetsa e'ñe yañeña yocapño

¹³ Ñehua, te'pa' o'ch noterrser po'poñ. Ñerra'm eñall sesho ñeñt otets ñapa' nanaco' eñotenan esocmañen, ñaña ñapa' e'ño' es etsotuen, ñehua, orrtepa' atet pena ñeñt e'ñe cohuen acheñ attoch acheñenesha'pa' eñochet po'ñoche'pa't eñotuenan ñeñt cohuentetsa Yomporecop. Tarraña ellopa' amachña cha ommo'chatsteto atto e'ñe cohuenare' es pa'yenet. Tarro'mar ñerra'm po'ño'ch es yeñotenpa' o'ch yeñoch ñaña ñeñt atto es ye'pa'yen e'ñe cohuenpa' ama ommo'chpahuoyaye. ¹⁴ Tarraña ñerra'm sapa' attera nanac sa'tsrre'muena seyo'chro e'ñe sesope'chapreteño' samo'ts ñaña ñerra'm aña sema'yochrena ñeñt e'ñe socpa ñeñt'epñapa' ama pocteyaye o'ch sommo'chena atto es seño'tyeneñ mamesha'tets. Tarro'mar ñerra'm ñeñt'atarr yommo'chatene'pa' ñeñt'pa' attaca'yeña yeshquën. ¹⁵ Tarro'mar ñeñt atet eñoteñetspa' ama arroteye' hueno Yomporeshot. Ñeñt'pa' arrota huena e'ñe ya yocapño' ñeñt patso'marecpa. Ñaña ñeñt atet eñoteñetspa' arrota huena e'ñe oneñet poctapño'. ¹⁶ Tarro'mar ñerra'm chocma ya'tsrre'muena yesope'chapreteño' yamo'ts amapa' ñerra'm aña yema'yochrena ñeñt e'ñe yocpa, ñeñt'pa' allot huenaña e'moñe'tanna'teñets, ñaña allohuen sosya'tsañe'chno.

Atet pena eñoteñets ñeñt huetsa Yomporeshot

¹⁷ Tarraña ñerra'm po'ño'ch Yompor eñotañ yepene'pa' ñeñt'pa' atet'cha' yepena: Ñanompa' o'ch yesuanom allohuen sosya'tsañe'chno ñeñt ama pocteye' enteno Yompor, ñaña amach allo'na atarr atsrre'mo'chen yenteno, ñaña e'ñech cohuen yentueñ allohuen yamo'tsesha', amachña cha po'poñ yentueno. Ñaña ñerra'm po'ño'ch Yompor eñotañ yepene'pa' chochña ya'muerañtena, ñaña e'ñech cohuenare' es yorrtatyen yamo'tseshacop, ñaña ñerra'm erro'ten yotenpa' e'ñech po'ño'ch atet yepena, amachña cha yeshcare'tanneno. ¹⁸ Ñeñt'ña ma'yochrenaya attoch e'ñe cohuen yentannenapa' ñeñt'pa' añ muenen o'ch etsotan attoch allohuene'ypa' o'ch ye'pohuerra ñeñt atet pocte' enten Yompor.

4

Ñeñt coshatse'tyenaya ñeñt patso'marecpapa' ñeñt'ña e'moñe'tene' ñeñt cohuentetsa Yomporecop

¹ Ñehua, te'pa' o'ch yocape'ch po'poñ attoch seño'ch erro'tte' huenaña e'moñe'tanna'teñets ñaña orroteñets ñeñt chocma orrtatyenet sesho. Ñehua, ñeñt'pa' arro't huena e'ñe sa seye'chapretanna'teño' pa'namen ñeñt'ña quellara'yetsaña seyo'chro. ² Tarro'mar ñerra'm erro'teno nanac es ye'ye'chapretena, ñerra'm yapa' ama yecheñepa' o'chcho' ñeñt'o'mara yemtsanna'ta. Ñaña ñerra'm esempo es yesope'chapreten, ñerra'm yapa' ama yecheñepa' o'chcho' ñeñt'o'mara yorrota, amapa' o'chcho' ñeñt'o'mara ye'cllaranna'ta. Ñehua, yapa' año' ama yecheno ñeñt nanac yemna'yen, tarro'mar ama añ yenamueno Yompor. ³ Ñato' ama'tcha' es yenam'pa' amach yagape, tarro'mar ñato' añe'pach es yenamueñ ñeñt ama pocteyaye ñocop. Tarro'mar ñato' añe'pach es yenamueñ attoch yañapa' o'ch nanac es yocshatse'tyena allo. ⁴ Ñehua, ahuañapa' soten ahuo'ch same'ñera Cristo, tarraña te'ñapa' aña socshatse'tyena po'poñ. Ama't seño'teñe ñeñt coshatse'tyenaya ñeñt patso'marecpapa' ñeñt'ña e'moñe'tene' ñeñt cohuentetsa Yomporecop. Ñeñt'o'marña ñerra'm yapa'cho' o'ch alla yocshatse'terra ñeñt patso'marecpapa' o'chcho' alla ye'moñe'ter yaña Yompor. ⁵ Ñeñt'pa' ama orrena oteno Yompor po'ño'ñ ñeñt aquellcare't ahuatoteñ, ñeñt'pa' atet oten. "Yompor Puecamquën ñeñt chorratenya ñapa' e'ñe puemorrenteño'te'ypa'

nanac mopa'teney.” ⁶ Ñeñto'marña Yomporpa' chocmach mueneñ o'ch ahuaencat pa'y attoch amach alla yepsere ña. Ñeñto'mar ama't Yompor po'ñoñopa' e'ñe anuaet' ahuatoteñ ñeñtpa' atet oten: “Yomporpa' amach erroteno't yenpano ñeñt' e'ñe cohuen entetsa ñañeña, amachña Yomporeye' ame'ñeno. Ñeñto'marña Yomporpa' añach nanac yenpuen ñeñt' e'ñe pueñmañesha' ame'ñenaya ña.” ⁷ Ñeñto'marña sapa' chocmach e'ñe cohuen same'ñeña Yompor. Añcha'ña satpare't oneñet tarro'mar ñerra'm atetcha' seřapa', oneñetpa' quechpa'nerrescha'. ⁸ Ñeñto'marña o'ch alla separrocmaterr epas Yompor. Tarro'mar ñapa' chocmach alla aguërres. Te'pa' ama't o'te' seřohua ñeñt' ama cohuenayaye Yomporecoppa' te'pa' añ poctetsa o'ch alla soctape'cherr cohuen attoch Yomporpa' o'ch alla enterres e'ñe cohuen. Tarro'mar sapa' ama't semneñeñ o'ch semorrentera Yomporpa', tarraña chocma semorrentena ñaña ñeñt' patso'marecpa. Ñeñto'marña te'pa' añ poctetsa o'ch sa'ypo'ña'huerr sosya'tsañ ñeñt' seyo'chro'tsen. ⁹ E'ñe satpare'teño't Yomporpa' chosa llequërrtsa. E'ñe sellquëño'tpa' seyahuepa'ch. Ñaña amach allo'na seche'tatsetneno, chocña seyahua. Ñaña amach allo'na nanac es socshatse'tneno, chocña sellca. ¹⁰ Ñaña o'ch sa'meterr so'chñar Yomporesho attoch Yomporpa' o'ch alla tantaterres.

Atto ama atompare'tpahuo yamo'ts

¹¹ Masheñeshacha' ñaña no'chaneshacha' amach sesasare'tanna'tatsto. Tarro'mar ñerra'm esesha' sasare'tene' pamo'ts, amapa' ñeñt' tompare'tene' pamo'tspa' po'ño'chpa' o' achmare'tan ñaña Yompor po'ñoñ ñeñt' atet anaret'. (Tarro'mar Yompor po'ñoñ ñeñt' atet anaretpa' atet oten, yemorrentanna'tepa'ch allohueney.) Tarro'mar ñetpa' chach otenapuetañ Yompor po'ñoñ ñeñt' atet anaretpa' ñato' amate' es sherbeno. Tarraña ñerra'm esempo atet yepenapa' chach yottena ñerra'mrrate' yañeña e'ñe es eñotuets. Tarraña ñeñtpa' ama atteyaye. Añña pocte' chocmach yame'ña Yompor po'ñoñ ñeñt' atet anuaet'. ¹² Tarraña yapa' yeñoteñ e'ñe puesheñarra ñeñt' nene' añ ñoñets ñeñtara Yompor ñeñt' e'ñe po'ño'ch es eñotets. Ñeñtara Yompor ñeñt' eñotene' ñeñt'cha' allpon a'queshpaterr, ñaña ñeñt'cha' allpon chenquërrtsa. Eso'mare'tña sañapa' chate' sotena-pañ ñato' e'ñech sañeña eñote' ñeñt' ama cohuenayaye acheñ.

Atto ama eñotpahuo ñeñt'cha' yetantoya tsapa'tone't

¹³ Te'pa' o'ch notas ñaña po'poñone't. O'ch se'mñoten ñeñtes atet otets: “Te'ch amapa' ñato' tsapatcha' o'ch ahuen ñachayo po'poñ anetso, allcha' netaruasena' paterr char attoch negana shonte' quelle.” ¹⁴ Tarraña ama't atet soteneñpa' amaña seño'teñeña ñato' escha' setantoya tsapa'tone't. Tarro'mar añ patsropa' e'ñe mamecpa yocrrena. Atto yocrrena arr mame' añ patsropa' e'ñe attey ñerra'mrrate' os ñeñt' yenta'muene't ahua'tecma chach rrema'chen e'ñe patso. O'chña enome'ta'muen at-sne'pa' o'ch huañerr. ¹⁵ Ñeñto'mar añ pocte' o'ch soten atet: “Ñerra'm Yomporcha' muenatspa' a'natnepa' attoch neřa'yes ñeñt' atet noctape'chen.” ¹⁶ Tarraña sapa' ama attey'e'ña sepeno. Ñeñtapa' attachña pa'namen sotyen e'ñe sommo'cheño't. Tarraña ñeñt' atto yommo'chyenapa' ñeñtpa' ama cohuenayaye. ¹⁷ Ñeñto'marña ellopa' o'ch alla noterrser: Ñerra'm esempo yeñoteñ yeyo'chro ñeñt' cohuentetsa Yomporecop, ñerra'm amaña atet yeřopa' ñeñtpa' ñeñt'ña yo'chñar yepen.

5

Ñeñt' atet otan eçllayoret'nesha'

¹ Te'pa' o'ch se'mñoten ñeñtes nanac eçllayoret'es. Te'pa' e'ñe seya'chpeñesha'pa' serranare'ta tarro'mar po'ño'ch chocma eñall ñeñt'cha' sehuapoya esempo ñeñt'cha' semuero'chtate'. ² Ama't te'pa' o' atta puetsana'tuen sechecom. Sapa' ñeñt'ña atarr

semorrentena. Ñaña ñeñt nanac cochnesha' ñeñt sechorra'yenapa' o' atta pom-pere'chua. ³ Ñaña ama't te' seçllayorpa' o' atta chomatlle'chuen. Te'pa' ama es sher-beno. Yeñoteñ e'ñe puechmatlle'cheñot seçllayorpa' ñeñtcha'ña se'nuerre' saña sechets esempohuañen atet ñerra'mrrate' achamarettes tso. Te'ña ama't o' mellapoterrmochapa' sañapa' allo'na seshonta'huanen seçllayor. ⁴ Ñaña te' ñeñt atta setaruasatyese't ñeñt ama setsa'tyese'tepa' te'ña ñetpa' puellquëño'tetpa' nanac eñenet socop. Ñeñto'marña te' Yompor ñeñt nanac Paretspa' e'muenanet ñeñt atet pueya'chpeñesha' chocma eñenet socop. ⁵ Ñaña sa añe patsropa' esocmañen sechen ama es sepallteno ama't mamesha. Ñeñto'marña ñerra'm errotencho' nanac cohuen sentenpa' atetcha'cho' sepene. Chach sottena ñerra'mrrate' chañcho ñeñt nanac errataret attoch nanac ota'. Ñerra'm o'chña nanac esoya'tpa' allempoñapa' o'ch muetset. Sapa'cho'ña atetcha' perres saña Yompor esempohuañencha' huerra. ⁶ Tarro'mar sapa' chocma semueroçhtatyeyñ acheñ ñeñt ama es yeçcatetso attachña sapa' semtsatyenanet. Ñaña ñetpa' amach errotenot a'qeshpateto ñañeñeta allempo sapa' soteñe'chenanet.

Atto ama amuenme'chpahuo cohuame'te' Cristo

⁷ Ñeñto'marña masheñeshacha' ñaña noçhaneshacha' o'ch notas, chocmach e'ñe sa'huanta'huanom ñeñt echarr sentyen, attoch secuame'ch Yepartseshar Cristo esempohuañencha' huerra. Atetcha' sepa atet yepena ñerra'm esempo yemneñ o'ch es yenare't. Ñerra'm yemneñ o'ch es yenare'tpa' chocmach ñanom yecuen esempohuañencha' huapotyena esheccha' e'ñech cohuen es yeçcatsa ñeñt nanac yemorren-tyena. ⁸ Ñeñto'marña sapa'cho'ña chocmach es sa'huanten. Amach semuenme'chatsche tarro'mar o' mameshamerrapa' o'ch huerra Yepartseshar. ⁹ Masheñeshacha' ñaña noçhaneshacha' amach setanmare'tanna'tatsto, attoch Yompor ñeñt e'ñe es eñotetspa' amach otteñe'chuerrso saña ñerra'm esempoch huerra. Tarro'mar Yomporpa' o' allanerrmoch. ¹⁰ O'ch masheñeshacha' ñaña noçhaneshacha' soçtape'ch ñeñt atet pa'yese't ahuat ñeñt a'mta'yese't Yompor po'ñoñ. Tarro'mar ñetpa' nanac ahuan-tete't atto nanac amueroçhtatarettete't. Ñeñto'marña sapa'cho'ña atetcha' sepa saña. ¹¹ Po'ñoçhpa' yeñoteñ ñeñt nanac ahuantene' mueroçhteñetspa' ñeñt pa' nanaccha' cosheñtso'tsen. Ama't sapa' señoñueñ ñeñt atet pa' ahuat Job. Ñapa' nanac ahuantan topateñets. Ñaña sapa' e'ñe señoñueñ ñeñt atet poñ Yompor. Allempo mueroçhetua Job Yomporña' alla apuer esocmañen attoch eñoch Yomporpa' nanac amueraña.

¹² Ñeñto'marña sa masheñeshacha' ñaña noçhaneshacha' añ pocte' sapa'cho'ña añcha' ñanom sequeçhpa'hua. Ama't e'ñe erra'tsena pa'so'chñopa' ñato't senena'ña señoñ; amach sotatsto o'ch sena' señoñ Yompor pue'ntañ pa'so'chño, ñaña amach sotatsto o'ch sena' señoñ Yompor po'patseñ pa'so'chño. Añcha'ña ñerra'm esempo e'ñe pocte' es sentenpa' attach sanap: "Ate'te'ca'ye." Ñaña ñerra'm esempo ama es pocte' sentenopa' attach sanap: "Ama atteyaye." Allotpa' ñeñt ach. Allochñapa' amach eñalle attoch otteñe'chuerres Yompor.

Añ pocte' chocmach yema'yochamñpsannena

¹³ Añña ñeñt poctetsa ñeñtcha' atet sepa. Ñerra'm erra'tsenotes mueroçhtatsapa' çhochña sema'yocha. Ñaña ñerra'm esesha' e'ñe coshetsapa' e'ñe pocte' morrechetepa' allo ya'ye'choçhtateñ Yompor. ¹⁴ Ñaña ñerra'm eseshas atsna'tetspa' añ pocte' o'ch sagotach ñeñt pompornesha' pen ñeñt ame'ñetsa, attochña ñetcha' ma'yochamñpset atsnañe't. Allotpa' e'ñe pueçhore'teño'tet Yomporpa' noñetepa' coñe't es puese' at-snañe'tesho. ¹⁵ Ñerra'm e'ñe pueyemteño'tet Yompor ma'yochetpa' atsnañe'tña'pa' cor-rerrach. Tarro'mar Yomporpa' ñach ahuamencat perre'. Ñaña ñerra'm añ o' pohua ñeñt ama pocteyayepa' allempo Yomporpa' o'ch alla peretnerrñañ po'chñar.

16 Ñeñto'marña añ pocte' o'ch sa'meta'huerr allohuenes so'chñar. Allochñapa' chocmach sema'yocham̄psannena attoch soçrerra e'ñe cohuen. Ñaña ama't erra'tsena acheñer ñerra'm e'ñe cohuen coçape'chen Yomporecop ñaña ñerra'm e'ñe pueyoçhrocmañen ma'yochetpa' atetña e'mñotenña Yompor. 17 Atet pa ahuañ Elías ñeñt a'mtaye't Yompor po'ñoñ. Ñeñña Elías ama't atta ñerra'm ya ñeñtey arromñañey. Tarraña allempo ma'yochana Yompor atto enam amach huaterropa' e'ñe allempoteñña ama huaterro ma'pa char ñaña meterrerr pechapña arorr ama huateno. 18 Allempoñapa' o' alla ma'yocherrerr attoch enamuerran Yompor huaterrepa'. Allempoñapa' o' alla huaterra, ñaña allempopa' o' alla choparesyerr narmetsoçhno.

19 Masheñneshacha' ñaña noçhanesha ñerra'm sa puesheñarrotes o'ch alla sepuer-rerra ñeñtes te'pa' coçene' cohuen Yompor po'ñoñ, tarraña ñerra'm esesha'ña alla soçtape'chatterre' e'ñe cohuenpa' 20 sapa' señoche'pa'ch ñeñt atet coçape'chatets e'ñe cohuenpa' choch a'qeshpātenan pamo'ts puecamquēñ ñeñt atarr ochñañ ñaña choch peretnateññañ allohuen shonte' po'chñar. Te'pa' ñeñtach notas. Allohua.

Santiago

AÑ ÑANOM SAN PEDRO PO' CARTA 1 SAN PEDRO

Atto Pedropa' quellcan carta allohuenacop ñeñt ame'ñetsa ñeñt atta a'parratse'tataret

¹⁻² Masheñeshacha' ñaña nochaneshacha' ñeñtes a'yetaten ñeñt sa'muerochtatene'. O' e'ñe sesuanom seney o' atta a'parratse'tataset allemeña anetso'mar, all anetso Ponto ñaña Galacia, ñaña Capadocia, ñaña Asia ñaña Bitinia. Sapa' ñeñtes ahuatoteñ nase't Yompor Parets e'ñe ñocop. Ñapa' e'ñe eñotuase't sach a'cohuentatarettertsa Partsocop. E'ñe ña Puecamquëñpa' ñeñtña sa'cohuentaterre'ña sa attoña e'ñe same'ña'hueraña Jesucristo. Attoña ña po'rraspa' ñeñtña o' e'shohuerrnasña so'chñar. Na Pedron sequel-lquëne'ña añ carta, napa' ñeñten Jesucristo puellsensaren. E'ñe nehuomcha'teñofes sa napa' o'ch notas: Yomporepa'chña atarr sebensare'tam'pene', ñepa'chña socshatene'ña e'ñe sa seyo'chro allohuenes.

E'ñe yeyemteño' Yepartseshar Jesucristo chocmach yecuame'ten ñeñt o'patatarey

³ Te'ñapa' aye'chochtaterrapo'ch Yompor Parets ñeñt Yepartseshar Jesucristo Pompor ñeñtara ñeñt Po'yomporer pen, tarro'mar o' ye'ñallettera etserra e'ñe ña nanac pemuereño'ey. Allempoteñña ya e'ñe yeyemteño' ña chocmach yecuame'teñ esempohuañen tarremphua allempoch ama ya'rromña'tterro. Atto Jesucristopa' o' tanterra, ñeñto'marña yapa'cho'ña yecuen yamã attoch amach ya'rromña'tterro. ⁴ Ñaña yeyemteño' chocmach yecuame'ten ñeñt o'patatarey pue'ntaño' tarro'mar allpa' allña añño'tarettenaña alloch yequeshperra. Ñeñtña qeshpeñetspa' amach ahuañaña'tterro, ñaña ama asosyatño, ñaña ama amllasha'tño. ⁵ Sapa' e'ñe seyemteño'ña Cristo Yomporpa' a'natasepa'ch. A'natasepa'ch chocma attoch sequeshpa'huerra esempohuañencha' mellapoterra. Yompor po'huamencopa' a'natasepa'ch attoch e'ñe seño'tuerr po'ño'ch e'ñech sequeshpa'huerra.

⁶ Ñeñto'marña te'pa' allohuenespa' socshepa'ch. Ama't te'ña atto semuerochtenapa' ñeñt'pa' e'ñe mamecpa. Tarraña ama't o' chaponasa pa'namen topateñetspa' sapa' chocmuepa'ch socsheña Yompor. ⁷ Tarro'mar nanac huomenc echarr yenteñ, tarraña Yomporpa' eñochcha' ñerra'm po'ño'ch e'ñe yame'ñeña ña. Ateñ ñerra'm oropa' choch ñanom atserrtchet huomenc allochñapa' o'ch eñochet ñerra'm po'ño'ch ñeñt'pa' e'ñete' oroche'. Ñeñtña ama't oropa' huañerrcha' esempo. Ama't nanac tsa'te' oro, tarraña atto po'ño'ch yame'ñera Cristo, ñeñtña ello nanac sherbets. Ñerra'm po'ño'ch yeyemteña ña, yeyemteño' ñapa' e'ñech cohuen entyesuerrey esempohuañencha' huerra Jesucristo, attochña e'ñe cohuen yecohuentapretera, e'ñech cohuen ya'mcha'tarettapretera.

⁸ Jesucristo ama't ama sentarñepa' te'ñapa' o' semorrentera. Ama't ama senteñe, te'ñapa' o' same'ñera. E'ñe socsheñeshocmañen o' same'ñeña, ñeñtña cosheñetspa' atarr nanac cohuen. Te'pa' amach erra yenerre'te yeñoñ ñeñtcha' atet yoterrerr. ⁹ Attoña e'ñe same'ñeño' Cristopa' sa'qeshpaterrcha' secamquëñ.

¹⁰ Ñaña o'ch notas, ama't ñeñt a'mta'yesaye't Yompor po'ñoñ ahuatpa' ñeñtña serpare'tete't allempo attoch orrtaterrnay Yompor pemuereña alloch yequeshperra. Tarraña ñetpa' ama e'ñeye' eñochete'te erro'tente'ña alloch yequeshperra. (Ñehua, allem-popa' amaca'ye orrtena' Cristo arr patsro.) Ñetpa' ñeñtña nanac e'netañe't erro'tente'ña ñeñtcha' a'qeshpatañtertsa. Ñetpa' nanac a'p'to'tanna'tyesete't e'ñe ñagattseta erro'tente'ca'yeña Yompor pemuereña alloch e'ñe yequeshperra. ¹¹ Ñetpa'cho'ña e'ñe Cristo Puecamquëñña chorrahuete't ñeñtña eñotatahuete't o'ch orrterra ñeñtcha' Cristoterrets arr patsro. O'ch chap añe patsropa' elloña'pa' o'ch muerochtateret.

O'ch amuerochtataretetuapa' allempochña orrtaterranña po'cohuenña. Tarraña ñeñt a'mta'yesaye't Yompor po'ñoñ ahuatpa' o' alla a'p'to'tanna'tyerretter, ta', ¿essha'chña Cristoterrets? ¿Esempo'tcha'ña orrterra? ¹² Yomporpa' eñotatanet ñeñtpa' amachca'ye ahuenaye' etsoterra; shonte'ch char allempochña etsoterra atet eñotatanet Yompor. Tarraña ñeñt eñotat allempopa' ñeñtpa' ama ñocpuetayaye, ñeñtpa' e'ñechca'ye yocop. Te'ñapa' ñeñt seserrpare'tatene' cohuen ñoñetspa' ñeñña señotatene' e'ñe cohuen ñeñt atet penaña ñeñt co'apñats. Parets Puecamquëñ ñeñt huetsa pue'ntañotpa' ñeñña eñotatenahuetña attoch serrpare'tataset saña añ cohuen ñoñets. Ama't Parets po'millaño'feñnashar ñetpa'cho'ña atarr mueneñet o'ch eñochet ñamet ñeñt o' señotuerra.

Añ poctetsa o'ch yepomhuerra yañeña e'ñe Partsocop

¹³ Ñeñto'marña te'pa' añ poctetsa e'ñe sa seño'ño'pa' e'ñech cohuen soctape'chen. E'ñe seyemteño' ñapa' o'ch secuame'teñ esempoch huerra Jesucristo. Allempopa' ellochña nanac muera'huerra, cohuencha' es aphuerres. ¹⁴ Se'mño'ch Yompor atet ñerra'm ñapa' puechemerasha'ch perres. Amach añ seychatsto atet ñerra'm ahuat allempo ama seño'ña'; allempopa' añ semnatse'tyese't ñeñt ama cohuenayaye. ¹⁵ Yomporpa' e'ñe cohuenare' es pen. Ñeñtara Yompor ñeñt o' hua'ñerrey ya. Ñeñto'marña yapa'cho'ña añ poctetsa o'ch yepomhuerra yañeña e'ñe Partsocop. Atet ñapa' e'ñe cohuenare' es pen, yapa'cho'ña añ poctetsa o'ch ye'pa' atet es pen ña. ¹⁶ Atet oteney Yompor po'ñoño' ñeñt anuaret ahuatoteñ: "Atet nepena na ñeñten Seyomporer sepen, napa' e'ñe cohuenare' es nepen, sapa'cho'ña e'ñepa'ch cohuenare' es sepen."

¹⁷ Yomporpa' ñach tsa'taterrahuet allpon ye'chcatyese'te't ñeñt ama cohuenayaye. Amach eñalleña ama't pueheñarra ñeñtcha' queshpatsa ñeñt ama ame'ñenaye ña. Atto yema'yocheña Yompor ñeñtcha' yetsa'tatuerraya, ñeñtepñapa' te'pa' añcha'na'tpo'ch Yompor. Ama't allponmat socrena arr patsro ñeñtpa' ama sa'netsreyaye, e'ñech tayoteñ semcha'na'tnom Yompor. ¹⁸ Sapa' satañneshaña' apa'nmaset poctapña atet pete't e'ñe orrena. Te'ña sapa' o' seño'ter Yomporpa' o' tsa'tuonasa attoch sesuanom ñeñt ahuatnashañ poctapña. Ama quellayoye' tsa'tonaye. Quellepa' ahuañaña. ¹⁹ Añña atto tsa'tonaya po'rroso Puechemer ñeñt Cristo. Po'rraspa' ñeñt nanac sherbets atet ñerra'm carrnerotollpa' e'ñech co'chnesha' muetsete't Partsocop. ²⁰ Ama't ama aye'chcatarettena' pats Yomporpa' o' nan Puechemer Cristo, ñach tsa'terraya yo'chñar. Ama't ahuatoteñ anaretpa' tarraña ama orrteno añe patsro. Te'ñapa' orrta e'ñe yocop, tarro'mar te'pa' o' mellapoterrmocha. ²¹ Yame'ñeño' Cristopa' o'ch yeyemterrñaña Pompor, tarro'mar Pomporpa' o' tantater ama't o' rromhua. Tantater attoch alla e'ñe cohuentater Pompor. Ñeñto'marña te' yapa' o'ch yeyemcha Yompor, o'ch yecuame'toñ ñeñt o'patatenya.

²² Sapa' o' same'ña'hua ñoñets ñeñt e'ñe po'ño'ch Yompor po'ñoñ. Ñeñto'marña e'ñe Parets po'huamenco' o' sesuanom allpon sosya'tsañ ñeñt seyo'chro'tsen, attotcha' e'ñe semorrentanna'ta. Te'ñapa' semorrentanna'tepa'ch poctacma e'ñe seyo'chrocmañen. ²³ E'ñe yame'ñeño' Yompor po'ño'ña' o' ye'ñallettera etserra. Añ eñalleteñetspa' ama atteyaye ñerra'm allempo eñalletey yachor. Atto eñalletey yachorpa' ñeñtpa' huañerrcha'. Añña Yompor po'ño'ño'ña ye'ñallettera ñeñtpa' amach ahuañañaterra ama't errponaña. ²⁴ Tarro'mar Yompor po'ñoñ ñeñt anuaret ahuatoteñ ñeñtpa' atet oten: Allohueney ñeñtey arromña'eypa' attey ñerra'mrrate' ta'te' tarro'mar mamecpa yocrena. Ñaña ñeñt cohuen yentyen ya, ñeñtpa' atet ñerra'mrrate' ta'te' puerorer. Ta'te'pa' o'ch hueya'hua pue'chorpa' puerorerpa'cho'ña ama't co'chnesha'tenaña' shor'cha'tuach.

²⁵ Tarraña ñeñt Parets po'ño'ña' amach ahuañaña'atto ama't errponaña.

Ñeñt po'ñoñpa' ñeñtara cohuen ñoñets ñeñt o' serrpare'tatuaset samã.

2

¹ Te'ñapa' añ poctetsa o'ch sesuanem allohuen ñeñt ama cohuenaye' enteno Yompor. Atto ora allpon allo seshcanna'tenapa' o'ch sequeçhpa'huer. Añ shecaneñets ñeñt attoch entenes po'psheñeñ e'ñe cohuenpa' ñeñtpa'cho'ña añ palltetsa te'pa' o'ch sequeçhpa'huer. Atto seye'chapretannenapa'cho'ña o'ch sepuesuer ñaña. Sasare'teñetspa'cho'ña o'ch sepuesuer. ² Añña poctetsa atarrcha' yeye'cheññaña Yompor po'ñoñ e'ñe atet pena ematollpa' nanaccha' ye'chenana puemomos. Yapa'cho'ña añ poctetsa o'ch yeye'chya atet ñerra'm ñeñt yemomos yepen, tarraña ñeñtpa' ñeñtara Yompor po'ñoñ. Yompor po'ñoñpa' nanac cohuenare' alloch yocshaten yecamquëñ, attotcha' allo'na yesen eñotnomue' ñeñt poctetsa Yomporecop attochña a'queshpatareycha'. ³ Sapa' o' señotuerrñañ Yompor puemuereña atto ñapa' nanac muerensa. Ñeñto'marña añ poctetsa sapa'cho'ña o'ch seye'choña po'ñoñ.

Atto Cristo atma'ntataretta mapue'; elloña ñapa' nanac sherben alloch e'ñe yocrrerra

⁴ Añ poctetsa o'ch separrocmaterr epas Cristo. Cristo ñeñt atarr sherbets atet ñerra'm mapue' ñeñt nenet quellpach pa'rrpõt allo orratenet pocoll ñeñt nanac echarr. Tarraña mapue' ama't nanac sherbenpa' ama añeyaye alloch e'ñe yocrra. Añña Cristo atto sherbenpa' allochña e'ñe yocrra po'ñoçh. Ama't acheñenesha' ama't ama cohuenaye' enteñeto Cristopa' Pomporñapa' e'ñe pocte' enteñ. Pomporñapa' ña acre' ñeñtcha' nanac sherbats ñocop atet ñerra'm mapue' ñeñt nanac cohuen allochña tomatenan pa'paquëll. ⁵ Yomporpa' pa'paquëll penan allohuen ñeñt ame'ñenaya ña. Yapa'cho'ña attey ñerra'mrrate' mapue' alloch tomatenan pa'paquëll. Tarraña yapa' atteyëñ ñerra'mrrate' mapue'pa' tarraña yapa' ñeñtey o'rrerrñaatõt yocrrena. Yapa'cho'ña añ poctetsa o'ch yattecmatuerr ñerra'mrrate' Parets pa'paquëll. Allñapa' yesherberrcha' Partsocop. Yecamquëñoïpa' o'ch yepomhuerra e'ñe yeyochrohuen yepomuerra attoch Paretspa' coshena. Yame'ñeñoï Jesucristopa' o'ch yesherber errotencha' muenateney Parets. ⁶ Tarro'mar atet oteney Yompor po'ñoñ ñeñt anuaret ahuatoteñ, ñeñtpa' atet oten Yompor Cristocop:

All anetso Sión ñeñtara Jerusaléñ o'ch nemñanet puesheñarr ñeñt atarr sherbets ñeñt atet ñerra'mrrate' mapue' ñeñt acrare't ñeñt nanac sherbets ñeñt alloch natomat nepaquëll. Ñerra'm esesha' ame'ñenaya ñapa', ñetñapa' amach alla e'nerrete'te po'psheñeñ.

⁷ Ñeñtey ame'ñenaya Cristopa' e'ñech yocsheñeshocmañen yenteñ. Añña ñeñt atpare'tene' Yomporpa' atetcha' enteñet Cristo ñerra'mrrate' mapue' ñeñt huapore'ten ñeñt tomatene' pocoll tarro'mar atet enteñet Cristo ñerra'mrrate' ama es sherbeno. Ñeñto'marña Yompor po'ñoñpa' atet oterryerr:

Añ mapue' ñeñt huapore'ten ñeñt tomatene' pocoll, ñeñtña mapue'pa' Yompor nene' ñeñtcha' nanac sherbets.

⁸ Añ ñeñtara Cristo ñeñt toma'ntenaya

Mapue' allcha' epoto'tena ñeñt ama ame'ñetso ñeñtcha'ña a'shoratahuet chenquëntso.

Añ epoto'teñetspa' añ toma'ntena atto atpare'teññañet Cristo po'ñoñ. Ñeñto'marña atet anaret, ñerra'm ama yame'ñyopa' e'ñech yechenca'huerra.

Ya ahuatpa' ama esona'tareyaye, te'ñapa' e'ñe Yomporena'tarey

⁹ Tarraña sapa' ama añeyayso ñeñt atpare'tene' Yompor. Ya ñeñtey ame'ñenaya Yomporpa' atetcha' enteney ñeñtey acrare'tterrtsa ñocop. Ñaña atetcha' enteney ñeñteycha' sherberrets Partsocop, ñeñteycha' anare'tterrtsa ñocop. Ñaña e'ñech Yomporena'tar enteney. Ñeñto'marña yocoppa' añ poctetsa o'ch yorrtatyesoñ

po'cohuenña. O'ch yeserrpare'toñ atto ñapa' cheterrey checmetoť all sosya'tsañoť, te'ñapa' o' chapaterrey e'ñe ña po'puetarenño all e'ñe cohuentena ña. ¹⁰ Ahuatpa' ama esona'tareyayye, te'ñapa' Yomporena'tarey. Ahuatpa' ama amuerareteyayye, te'ñapa' o' ya'muerareťterra.

Atto cohuen es yepen attochña e'ñe cohuen yesherbeñ Yompor

¹¹ O'ch masheñneshacha' ñaña no'chaneshacha' e'ñe nemorrenteñoťes o'ch notas: Sapa' ama't sey'chenañ a'ñe patsro ñeñťpa' ama sa'netsreyaye. Ñeñťo'marña a'ñ poctetsa o'ch sa'ypo'ña'mpes ñeñť muenatse'tyese't sechets. Ateť muena'yen yechetspa' ñeñťña quellarene'ña yecamquēñ; mueneñ o'ch a'chencatonay yecamquēñ. ¹² Ñeñť ama ame'ñetso seshopa' a'ñ poctetsa o'ch sorrtatoñ ñeñť ateť e'ñe cohuenare' es sepen. Allochñapa' ñerra'm mueneñet o'ch sasare'tasetpa' o'ch entonaset atto e'ñe cohuenare' es sepen. Allochñapa' ñerra'm esempo huerra Cristo attoch e'ñotaturrey ñeñť ateť ye'pa'yena, ñetpa'cho'ña o'ch aye'cho'chtaterrñañet Yompor.

¹³ Te'pa' o'ch notas ñaña, allpon ñoñets ñeñť nen a'ñcha'tareť a'ñ patsropa' a'ñ poctetsa o'ch same'ñya. Yame'ñeñoť Yepartseshar Cristopa' a'ñ paltetsa o'ch yame'ñera ñaña allpon ñoñets ñeñť nen ñeñť atarr a'ñcha'tareťtetsa arr patsro. ¹⁴ O'ch same'ñera ñaña ñeñť mueñen a'ñcha'tareť ñeñťcha' a'coñchatuene' allohuen ñeñť ama pocteye' es petso, ñaña ñeñťara ñeñťcha' coshapretene' allohuen ñeñť e'ñe cohuenare' es pets. ¹⁵ Tarro'mar ateť muenen Yompor: 'chocmach yorrtaten ateť e'ñe cohuenare' es yepen. Ñato' yorrtateñoť e'ñe cohuenpa' o'ch que'chpa'huerret atto e'ñosatse'tyenet. Ñetpa' patpare'teñoťet e'ñosatse'tyenet tarro'mar ama es e'ñoteneto. Ñato' yorrtateñoť e'ñe cohuenpa' o'ch ye'que'chpatuerranet atto e'ñosatse'tyenet.

¹⁶ Ñaña e'ñech same'ña cohuen ama't Yompor po'ño'ña' ama a'ñcha'no'chenaye' senteñe socop. Tarraña ama't ama a'ñcha'no'chteno po'ño'ñ yocoppa' amach allo'na ye'pa'yesneno ñeñť sosya'tsañ. A'ñcha'ña o'ch ateť yame'ña atto pueyochresha' perrey Yompor. ¹⁷ A'ñ poctetsa o'ch sem'cha'na'ch allohuen acheñ. O'ch semorrentanna'ta allohuenes ñeñťes ame'ñetsa. O'ch sem'cha'na'ch ñaña Yompor. O'ch same'ñya ñaña ñeñť a'ñcha'tareťtetsa arr patsro.

A'ñ poctetsa o'ch yemuerochtaprecha Cristo

¹⁸ Ñeñťes ataruasatareťespa' o'ch notas, a'ñ poctetsa socop. Sem'cha'na'teñoťpa' o'ch same'ñya samo'mte'. O'ch same'ñya samo'mte' ñeñť amueraña. Alloťpa' o'ch same'ñya ñaña ñeñť ama't ama amueraño. ¹⁹ Ñaña ama't po'psheñeñ muerochtatene'y ama't allempo yepen ñeñť cohuenare', e'ñe yame'ñeñoť Yomporpa' amach ya'tsrre'matsto, ñeñťpa' e'ñech pocte' enteney Yompor. ²⁰ Ñerra'm esempo 'cho erroť yepeñ po'psheñeñ ñerra'm coñchatuerrey, ñeñťpa' e'ñe pocte' yecoñchepa'. Ama't ama ya'tsrre'mo allempo, tarraña amach cohuenaye' enteney Yompor, tarro'mar ñeñťpa' 'chocma mueneñ o'ch yecoñcha. Tarraña ñerra'm esempo ama't yepena ñeñť cohuenare' ñato' ama't muerochtatatey po'psheñeñpa' ñerra'm ama ya'tsrre'mopa' ñeñťpa' e'ñech pocte' enteney Yompor. ²¹ Ñeñťo'marña te'pa' yapa' o' hua'ñerrey Cristo attoch yame'ña'huera, allochñapa' o'ch yemuerochtaprecha ña. Ñapa' ña ñanom muerochtatetsa, tarraña ñapa' ye'chatnerrey attoch a'ñ poctetsa o'ch yemuerochtapretera ña. ²² Ñapa' ama e'ñalletatane'te po'chñar ama't coñe'ta. Ñapa' ama sheca'ye'te ama't parrocha. ²³ Ama't allempo sasare'chete'tpa' ñapa' amach ellopa' sasare'terraneto ñaña. Ama't allempo muerochtachete'tpa' ñapa' amach ellopa' o'terraneto o'ch nemuerochtaterres saña. Ñapa' a'ña e'ñe yemte't Pompor, tarro'mar e'ñoteñ Pomporpa' a'poctaterrñañcha', tarro'mar ñapa' ña e'ñe pocte' es pets. ²⁴ Ñapa' ña yecoñchaterr e'ñe ya yo'chñarot

allempe mueroçhta all corsocho. Allempoña rroma e'ñe ña po'chtso'tpa' o' ahuanmamperrey yo'chñar. Te'ña yocoppa' añ poctetsa o'ch ya'ypo'ña'huerr ora yo'chñar o'ch yeperra ñeñt atet poctetsa Partsocop. Atto atarr atserrparetterra ahua't ñeñtpa' attoña a'queshpaterrey ya. ²⁵ "Yapa' ahua'tpa' attey ñerra'm carrnero. Ya'ypo'ña'uye't ñeñt yecuam'pene'." Tarraña te'ñapa' o' alla yoctape'cherr e'ñe cohuen, o' yeyemtera Cristo ñeñt yecuam'pene', ñeñtara ñeñt Pamo'mte' pen ñaña yecamquëñ.

3

Arrpa' all cotape'chatan ñeñt arrollaretnesha'

¹⁻² Sapa'cho'ña ñeñtes arrollaretes, o'ch notas samña. Añ poctetsa o'ch same'ñya serrollar. Chocmach same'ñya serrollar ama't serrollarpa' ama ame'ñenano Yompor po'ñoñ. E'ñe cohuen same'ñeño't serrollarpa' ama't ama erro'ten es sotenno ñato' attotpa' o'te' ame'ñerra ñaña serrollar. Ñetpa'cho'ña o'ch cotape'cherret e'ñe cohuen ñerra'm esempo entennaset atet e'ñe cohuenare' es sepen. ³ Amach e'ñe patrra sema'yoçhratsto atto secohuentena e'ñe orrena. Atet ñerra'm sechpa' amach ñeñta sellquëno o'ch sañño'teñ e'ñe cohuen attoch enteney yamo'tsesha' e'ñe cohuen, tarraña ñeñtpa' e'ñe orrena. Ñaña amach e'ñe patrra sema'yoçhratsto attoch sech alloch secohuenta atet ñerra'm oro, tarraña ñeñtpa'cho'ña e'ñe orrena. Amach sema'yoçhratsto ñaña attoch sechorra'yesa e'ñe coçhnesha'. Añ añño'teñets ñeñt yentapretannena e'ñe yechtsopa' ñeñtpa' e'ñe orrena orrtateney e'ñe cohuen. ⁴ Añcha'ña yema'yoçhra o'ch yecohuentena yeyoçhro attoch Yomporpa' entapretey e'ñe cohuen. Añ cohunteñets yeyoçhro ñeñtpa' ama entpahuoyaye tarraña ñeñtpa' amach ahuañañat'erro. Atet ñerra'm muereñets ñeñtpa' e'ñech cohuen entapreteney Yompor. Ñerra'm ama atsrre'mña'teyayye ñeñtpa'cho'ña e'ñech cohuen entapreteney Yompor. Ñerra'm e'ñe cohuen yoctape'chen, Yomporpa' entapreteney yoctapña atet ñerra'm ñeñt nanac sherbets, ñaña ñeñt nanac coçhnesha'. ⁵ Atet pa'yese't ahua't coyanesha'çhno ñeñt e'ñe cohuenare' es pa'yestse't Partsocop. Ñetpa' e'ñe pueyemteño'tet Yomporpa' e'ñe cohuen ame'ñyete't puerrollaret. Ñetña pueyoçhretpa' e'ñe a'cohuenchete't Yomporecop. ⁶ Atet pe't ñaña ahua't Sara. Ñapa' e'ñe cohuen ame'ñane't puerrollar Abraham. Ñapa' e'ñe atet entane't puerrollar ñerra'mrrate' ñeñt pamo'mte' pen, nanac ame'ñye't. Sapa'cho'ña te'pa' sachorcha' seper Sara ñerra'm ama señchaño'ta es pocte' sepa'yeno samña.

Attecmach cotape'chatan ñaña ñeñt ataporettesha'

⁷ Attecmach notas samña ñeñtes ataporettes. O'ch semuerya setapor e'ñe cohuen. Sapa' o'ch senteñ samña setapor e'ñe cohuen, tarro'mar coyanesha' ama tama ahua'mencate. Añcha'ña o'ch sagaphuer parro ñeñtcha' apas Yompor. E'ñe pueyuereño'tes sapa' apascha' allochña sapa' corretsasach socsheñeshocmañen e'ñe tayoteñ errponañohuen. O'ch seyçha e'ñe cohuen epas setapor, attotcha' Yomporpa' e'mñotas ñerra'm esempo sema'yoçhya.

⁸ Te'ñapa' o'ch notas allohuenes. Añ poctetsa o'ch soctape'cherr e'ñe patrra ñeñt amuerañtetsa. Ñaña o'ch sellcapretanna'ta ñerra'm esempo es sellcatyene'. Ñaña e'ñech cohuen yemorrentanna'ta allohueney ñeñtey ame'ñetsa, ñaña e'ñech cohuen yemueranna'ta. O'ch es yentaprech po'psheñeñ e'ñe cohuen, amachña yañeña e'ñe cohuen entatstatso. ⁹ Ñerra'm po'psheñeñ erro't paspa' sapa' amach setsa'tatatsche eso. Ñerra'm po'psheñeñ sasare'taspa' sapa' amach sesasare'tatsterraneto. Añcha'ña o'ch senamoñ Yompor a'nachepa', tarro'mar atet muenen Yompor atetcha' ye'pa. Allochñapa' ñerra'm atet ye'papa' ñapa' o'ch a'natenya yaña. ¹⁰ Tarro'mar atet oteney Yompor po'ñoñ:

Ñerra'm yemneñ o'ch yeycha e'ñe cohuen, ñaña ñerra'm yemneñ o'ch yocsherrapa' ñeñtpa' añ poctetsa, amach yesasare'tatsto, ñaña añ poctetsa, amach yesh-care'tatsto.

11 Ñerra'm yemneñ e'ñe cohuen yocsherra, añ poctetsa o'ch yesuanem ñeñt ama cohue-naye' enteno Yompor. Ñeñt e'ñe atet muenen Yomporpa' ñeñtcha'ña atet yeña. Ñaña añ poctetsa, o'ch ye'nerr attoch yentannena e'ñe cohuen epay yamo'tsesha'. Te'ñapa' allo'nepa'ch yesen entanna'ttsa e'ñe cohuen.

12 Yomporñapa' e'ñech cohuanpeneñ ñeñtey e'ñe pocte' es pets. Ñapa' e'mñoteny allempo es yenamueñ e'ñe ñesho. Añña ñeñt petsa ñeñt ama pocteyayepa' Yomporñapa' amach cohuenaye' enteñe ama't mamesha.

Ñerra'm esempo e'ñe attota muerochtatenyet yapa' atarrcha' cosheñtso'tseney

13 Ñerra'm sapa' chocma sema'yochrena ñeñt cohuentetsa Yomporecop, allem-poñapa' amach esesha' errotenoñ semuerochtataye. 14 Tarraña ñato' errotenopa' o'ch muerochtataset ama't añ sema'yochrena ñeñt cohuentetsa Yomporecop. Tarraña ñerra'm e'ñe attota muerochtatasetpa' sañapa' atarrcha' cosheñtso'tsenes. Amach semcha'tatstaneto ñaña amach sellcatsto. 15 Añcha'ña o'ch seyemcha Cristo e'ñe seyoçrohuen. O'ch senteñ Cristo atarr cohuen Parets ñeñt Yepartseshar yepen. Ñerra'm esempo esesha'pa' o'ch a'p'to'tas ¿eso'marte'ña atarr same'ñeñaña Cristo? sapa' chocmuepa'chña e'ñe cohuen señoñeña atetcha' sanap e'ñe cohuen. E'ñe semuereñoñ e'ñech acoña sanapanet e'ñe cohuen e'ñe semcha'na'teñoñanet. 16 Chocmach e'ñe señañesha' seyoçhro e'ñech cohuenare' es sepen. Allochñapa' ñerra'm ama't esempo sasare'tenyetpa' ñeñtña atto e'ñe pocte' es yeña'yen Cristocoppa' ñeñtpa' ñeñtcha'ña pen-catahuet. 17 Añ pocte' ama't yemuerochta atto ama't e'ñe cohuenare' es yepen. Ñerra'm atet muenen Yomporpa' pocte' o'ch yemuerochta. Añña ñerra'm e'ñe yo'chñaroñpa' o'ch yemuerochta, ñeñtpa' orrenach yemuerochta.

18 Ama't Cristopa'cho'ña ahuañpa' atarr muerochtachete't. Ñapa' ña rromats e'ñe parrocha allohuenacpay attotña tsa'tuerrnaya yo'chñar. Cristo ama't ña ñeñt e'ñe pocte' es petspa' attotña rroma yocop ñeñtey ama pocteye' es petso. Tarro'mar rroma yocop attotcha' yeparrocmaterr epay Yompor. Ña ama't rroma po'chtsoñpa' puecamquëññapa' ama rromo. 19 E'ñe puecamquëñoñpa' arr ahuo' allo'tsa'yen ahuatnaneshañ puecamquëñnesha' ñeñt alla ayottamñsaret, ñeñt ama cha'netso. Ñaña puecamquëñ allñapa' serrpare'tatosanet. 20 Ñehua, añ puecamquëñ ñeñt ahuatnaneshañ ñeñt nanac atpare'taye't Yompor po'ñoñ allempo corre't Noé. Allempopa' Yompor nanac cohume'tanetañe't o'ch ame'ñyet. Allempoteñ Noépa' yechcatane't po'compuer, Yomporpa' cohume'tanete't esesha'ch ame'ñatsa. Tarraña ama eseshaye'ña ame'ñatso, e'ñe posocsheña ñeñt ame'ñatsa. Añ posocsheña ñeñt ame'ñaya Yomporpa' ñeñtara posocsheña ama esesha' ño'sha'tso, ñetpa' queshpet oñoñ. 21 Tarro'mar yapa'cho'ña te' ñerra'm yapataretta oñoñ Partsocop e'ñe atet pena ñerra'm ahuañ Noépa' o' queshpa e'ñe oñoñ. Ñeñto'marña yapa'cho'ña ñerra'm yame'ñeñoñ o' yapataretta Partsocop e'ñe oñoñpa' yeñoteñ o' yequeshpa. Ñehua, ñeñt apataretteñetspa' ama añecpayaye o'ch yapa oñoñ attoch huañ yepatser. Añcha'ña ñeñt alloch yequeshpa. Atto yapataretta Partsocop o'ch yenamñ Yompor etserrataterrnayepa' yocñapña e'ñe cohuen. Atto yapataretta Partsocoppa' yeñoteñ o' yequeshpa tarro'mar Jesucristo atto tanterra ama't rromhua. 22 Allempo tanterra Cristopa' o' ahuer pue'ntaño. Te'ñapa' allo'tsen epuet Pompor e'ñe po'cohuenroñ, allñapa' all partsoten. Ama't allohuen ñeñt Pompor po'millañoñeñnanesarpa' ñetpa'cho'ña te'pa' e'ñe cohuen ame'ñeñet ñamet. Ñaña

ama't allohuen ñeñt' am'cha'taretetyetsa pue'ntañopa' ñetpa'cho'ña ello ame'ña'hueñet ñamet. Ama't allohuen ñeñt' ahuamencatechnopa'cho'ña ello ame'ña'hueñet.

4

Atto e'ñe yemuerochteño'pa' o'ch huomenc ye'pa' yeyo'cher Yomporecop

¹ Cristo allempo añe patsro'tsenpa' ñapa' e'ñe pocte' enteñ attoch muerochtateñet nanac. Ñeñto'marña sapa'cho' e'ñepa'chña pocte' senteñ o'ch semuerochta e'ñe ñocop. E'ñe yemuerochteño'pa' o'ch huomenc ye'pa' yeyo'cher. Yemuerochteño' yechtsopa' o'ch yequechpa'huerr ñeñt' ama pocteyaye Yomporecop. ² Allochñapa' amach allo'na ye'pa'nenno atet muenatyese't yechets ahuat. Yocoppa' añ poctetsa o'ch yoctape'chen ñeñt' atet muenen Yompor. ³ Te'ñapa' ñeñteshañach atet se'pa atet se'pa'yese't ahuatoteñ ñeñt' atet pena te' ñeñt' ama ame'ñetso. Ñetpa' añ pa'namen pa'yenet ñeñt' atarr sosya'tsañechno ñeñt' allohuen pa'namen muenatse'tyeñets sosya'tsañ ñaña posa'tarñats ñaña coshatse'teñets ñaña orrare'teñets ñaña muechatse'teñets ñeñt' ama't mameshapa' ama pocteye' enteñe Yompor. Te'ñapa' ñeñteshañach atet se'pa' ñeñt' semnatse'tyen sa. ⁴ Ñeñt' peyemte't ahuat ñeñt' epa'p' porrare'te'tpa' te'ñapa' amach chapaneto pueyo'chro eso'marte' o'huañ porrare'tapretanet. Attoña ñetpa' mueneñetcha' o'ch achm'are'taset. ⁵ Tarraña te'pa' o'ch notas, ama't ñeñt' ama ame'ñetso, esempohuañenpa' a'metatuerranetcha' Yompor. Po'ño'ch ñapa' ñach tsa'taya ñeñt' ame'ñetsa. Ñaña ama't ñeñt' ama ame'ñatsopa'cho' ñach tsa'tatuerrahuet, ora allohuenet, ama't ñeñt' corretsa, ñaña ama't ñeñt' o' colla'huena. ⁶ Ñeñto'marña ama't ñeñt' arromñañtesha' o' aserrpare'tatuarettet cohuen ñoñets. Allochñapa' ama'tcha' a'coñchatare'tetañ po'chtso'tet atet pena allohuen arromñañtesha', puecamquëño'fetñapa' corra'huerretcha' e'ñe atet correna Yompor.

⁷ Te'ñapa' o' mellapoterrmocha. Ñeñto'marña añ poctetsa, e'ñe yeñotateño'pa' o'ch yema'yochera Yompor. E'ñech yetpara es yepen atto'tcha' amach yepseñe Yompor ma'yochaya. ⁸ Añpa' ñeñt'ña ñanom nanac sherbets: o'ch yemorrentanna'ta nanac e'ñe yeyo'chrocmañen. Yemorrentanneño'pa' o'ch ye'pretnanna'ta atto erro'ten ye'panna. ⁹ Ñaña e'ñech socsheñtesha' o'ch sagapannena e'ñe sepaclo. ¹⁰ Yompor puemuereño'pa' o' e'ñe apa'yenas attoch setorra'yesa e'ñe ñocop. Te'ñapa' o'ch notas, o'ch seyepanna'ta año ñeñt' apuenes Yompor. Attochña sesherb'atyesñañña Yompor puemuereña. ¹¹ Ñeñt'pa' atet ñerra'm eseshas serrpare'tatspa' Yomporepa'chña po'ño'ñ seserrpare'ten. Ñerra'm eseshas yenpuene' po'psheñeñpa' Yomporepa'chña po'huamenco't seyepanna. Allochñapa' yeparrocmateño' epay Jesucristopa' o'ch ya'ye'cho'chtatuerrñañ Yompor. Yomporepa'chña aye'cho'chtatuapo' allohueney. Am'cha'na'tpahuepa'ch po'partsoña tayoteñ errponohuañen. Ñeñt'pa' attepa'chña Nompore.

Ñerra'm esempo sasare'tenyet atto yapa' yecristona'tarterra yañapa' atarrcha' cosheñtso'tseney

¹² Amach masheñneshacha' ñaña no'chaneshacha' seyorenatsto ñerra'm huaponasa topateñets nanac huomenc; tarro'marcha' huaponasa o'ch topatensa'. Amach seyorenatsto atet sepena ñerra'm esempo huaponasa ñeñt' ama sentare. Attecma ama't masheñtesha' ñeñto' ame'ña'huapa' attecma o' topatuanet. ¹³ Allempoteñ o' semuerochtaprecha Cristo, e'ñe semuerochteño'pa' socshepa'ch. Allochñapa' ñerra'm esempo'ch orrterra po'cohuenñapa' sapa'cho'ña socshapreterach e'ñe cohuen. ¹⁴ Ñerra'm cho sasare'tenset atto o' secristona'tarterra, sañapa' atarrcha' cosheñtso'tsenes, tarro'mar e'ñe allempoteñ Yompor Puecamquëñ ñeñt' cohuenñatsotetspa' chaponasa sesho. Po'ño'ch ñetpa' Cristo'na sasare'tenet tarraña sapa' e'ñe cohuen secohuentateññañ Cristo. ¹⁵ Añña ama cohueno o'ch yemuerochta yemtseño' acheñ, ama't ñaña yeteño',

ama't ñaña yepenoť ñeñť ama cohuenayaye, ama't ñaña ya'metam̄peñoť attochcha' ye'moñe'tanna'ta. Ñerra'm attotña yemueročhtapa' ñeñťpa' e'ñech orrena yemueročhta.

¹⁶ Añña ñerra'm añecop yemueročhta tarro'mar o' yecristona'tarta, amach yepencatsto. Chocmach yecohuentatoñ Yompor tarro'mar o' yanerrñañ pa'so'cheñ.

¹⁷ O' chapmoch allempoch Yomporpa' acranatuerrey allohueney ya. Yapa' yanomcha' a'meterr atet enteney ama't ñeñťey puechemereshay o' perrey Yompor. Ñerra'm yapa' yanomcha' a'metam̄perr ama't ñeñťey ame'ñatsapa', allempopa' errotenotuachca' queshperrate' ñeñť nanac atpare'tene' cohuen ñoñets ñeñť Yompor po'ñoñ.

¹⁸ Ama't ñeñťey e'ñe pocte' es petspa' e'ñech yemuerochenñoťa yequeshperra, allempopa' errotenotuachca' chapña ñeñť ochñañenesha' ñeñť atarr atpare'tene' Yompor.

¹⁹ Ñeñťo'marña ñerra'm esempo yemueročhta e'ñe Yompor puenneññoťpa' allempopa' amach yellcatsto. Añña poctetsa o'ch alla yeyemtera Yompor e'ñe yocsheñeshocmañen yeyoçhro, tarro'mar ñapa' ña ñeñť yeyeçhcate'. Ñapa' ña ñeñť e'ñe pocte' es pets, ñapa' e'ñech a'poctatonay. Añcha'ña allo'nepa'ch yesen cotape'cherre' ñeñť cohuentetsa Yomporecop.

5

Atto cotape'chatan allohuen ñeñť pompornesha' pen ñeñť ame'ñetsa

¹ Te'pa' o'ch notas saña ñeñťes pompor pen ñeñť ame'ñetsa sesho. Napa'cho'ña nach pompor pen ñeñť ame'ñetsa nesho. Napa' neñche't atet mueročhte't Cristo. Tarraña ñerra'm esempo huerra po'cohuenño'pa' yapa' o'ch yecohuentapretera yaña.

² Napa' te'pa' o'ch notas sa ñeñťes pompor pen ñeñť ame'ñetsa. Atet pena ñeñť cohuañpene' po'carrneror, sapa'cho'ña secuañpescha' e'ñe cohuen ñeñť ame'ñetsa sesho, tarro'mar ñetpa'cho' po'carrneror penanet Yompor. Amachña seçllañoťa secuañpsatstaneto atet sepeñ ñeñť ama tama cohuenaye' senteno. E'ñechña socsheñesha' secuañpenanet atet muenen Yompor. Tarraña amach sagapueñoťa quelle secuañpsatstaneto. Ñerra'm quellayecop yecuañpeñpa' o'ch yepenca. Añcha'ña e'ñech yocsheñesha' yecuañpsanet.

³ Amach cha sa'mcha'noçhteñoťeye' secuañpenaneto, ñeñťes atet anaretēs sach cohuañpenahuet. Añcha'ña chocmach yentatanet atet e'ñe cohuen es yepen. E'ñe yocape'chateñoť cohuenpa' o'ch yeychatenanet allohuen ñeñť e'ñe po'carrneror pen Yompor. ⁴ Cristoñapa' ñeñť yecuañpene' allohueney atet ñerra'm po'carrnerorey. Ñerra'm esempo huerra, allempopa' yapa'cho' atsa'tareťeycha'. Atsa'tareťeycha' po'cohuenño ñeñťcha' atarr nanac yocshaterre' ñeñťpa' ama ahuañaño ama't errponaña.

⁵ Ñeñťes huepaneshas, te'pa' napa' o'ch notas saña. Añ poctetsa o'ch same'ñeña ñeñť po'n yacma ñeñť sompor sepen. Po'ñoçh o'ch notas allohuenes, e'ñech cohuen same'ñannena amach sañeña e'ñe cohuen entatstatso tarro'mar:

Yomporpa' ama pocteye' entenano ñeñť atet ommo'chetsa. Añña ñeñť ama esoye' entetso ñeñťña atarr muerenaña Yompor.

⁶ Yapa' yeñoteñ Yomporpa' nanac ahuañencat. Yapa' ama ya yehuamencoteye' yommo'cheno. Ñeñťo'marña yeñoteñ Yomporpa' ama cohuenaye' entenano ommo'cheñets. Amach yeyematsto e'ñe yañeña, tarro'mar yapa' ama es yesherbena. Añcha'ña e'ñe cohuen yeyemtena Yompor, allochñapa' ñerra'm esempo ña muenats, ñachña yocshatuerre'ña e'ñe cohuen. ⁷ Ora allpon ñeñť yellcatene' añ poctetsa o'ch yotue Yompor. Tarro'mar ñapa' po'ñoçh chocma llecapretenya ñeñť yellcatene'. Allochñapa' ñachña ya'metuerre' yellquëña attoch yocsha'huerra e'ñe cohuen.

⁸ E'ñe señotateñoťpa' señota'tach, tarro'mar oneñeť ñeñť se'moñe'tene'pa' chocma chopeñe'chen erraparen atet ñerra'm ma'yarr, çhach añcha'noçhetnena e'nyese'

ñeñtcha' a'chencat. ⁹ Añcha'ña satpare't oneñeñ. E'ñe yame'ñeñoñ Cristo o'ch huomenc yepa' yeyoçher. O'ch señoçh attecnoch muerdochtatuan allohuen masheñnesha' ama't ñeñt o' ame'ña'huerra ora errañaren añe patsro. ¹⁰ Ama't muerdochtatyesasetcha' mame'tarraña Yomporpa' nanac amueraña. Ñapa' ñachña a'pochtaturre'ña socop, attoch huomenc perrnas seyocher. Allochñapa' amach alla sepuesuere. Atetcha' ptonay Yompor, ñeñtey muenene' o'ch yecohuentaprecha po'cohuenño. E'ñe yame'ñeñoñ Cristo yecohuentapreterach po'cohuenña ñeñtcha' ama ahuañañaaterrtso. ¹¹ Yomporepa'chña aye'chochtatuapo' allohueney. Amcha'na'tpahuepa'ch po'partsoña tayoteñ errpono-huañen. Ñeñtpa' attetepa'chña Nompore.

Arrpa' all so'tnerranet po'cartot

¹² Te'ñapa' ñeñtach e'ñe notas necartot. Te'pa' o' notuas o'ch same'ña'huera e'ñe po'ñoçhocmañen. Ñaña o' notuas añpa' ñeñtña e'ñe po'ñoçh Yompor puemuereña alloch atarr bensare'tampeney. Te'ñapa' o'ch alla noterrser, po'ñoçhpa' o'ch seyemtoña Yompor puemuereña. Ñeñt masheñ Silvanopa' ña nequellcaten attoch neserrpare'tatas mame' añ necartot. Ateñ nenteñ masheñ Silvano, ñapa' nanac cohuen ame'ñenana Yompor.

¹³ Ñaña ñeñt ame'ñetsa arr Babilonia* mueneñet o'ch huomcha'taset ñamet añ necartot. Ñetpa'cho'ña o' acerranet Yompor e'ñe atet ñerra'm sa. Ñaña neyoçher Marcospa'cho'ña mueneñ o'ch huomcha'tas ñaña necartot. ¹⁴ E'ñe semorrentanna'teñoñ o'ch sehuomcha'tanna'ta.†

E'ñe seyemteñoñ Jesucristo, Yomporepa'chña socshatene'ña e'ñe cohuen seyochro. Te'pa' ñeñtach notas, ñeñtpa' attetepa'chña Nompore. Allohua.

Pedro

* **5:13** Anets ñeñt pa'so'cheñ Roma te'ñapa' añ toma'ntateñet anets Babilonia. † **5:14** Po'ñoçh oteneñ, "E'ñe semorrentanna'teñoñ choch setso'ttsa'pa'tannena ñerra'm esempo sehuomcha'tanna'tena." Ñeñtpa' atet yeçhete't ahuat.

AÑ PUEPAÑ SAN PEDRO PO' CARTA 2 SAN PEDRO

Atto Pedropa' quellquërranerr carta allohuenacop ñeñt ame'ñetsa

¹ Masheñeshacha' ñaña nochaneshacha' allohuenes ñeñtes e'ñe attecma cohuen same'ñena atet yame'ñena yaña, tarro'mar allohueneypa' e'ñe ñapta Jesucristo ñeñt Yeyomporer yepen ñeñtara ñeñt Ya'queshpatañer yepen, ñeñtña e'ñe pocte' es pets. Na Simón Pedronpa' o'ch alla nequellquërrnaserr po'poñ carta, ñeñten torretsa Jesucristocop, ña puellsensaren. ² E'ñe nehuomcha'teñotes sa napa' o'ch notas: Yomporepa'chña atarr sebensare'tampene'; ñepa'chña socshatene'ña e'ñe sa seyoçhro allohuenes e'ñe seyemteñoñ Yompor ñaña Puechemer Jesús ñeñt Yepartseshar yepen.

Atetcha' yepa'yena allohueney ñeñtey e'ñe cohuen ame'ña'yenaya Cristo

³ E'ñe yeyemteñoñ Yompor ñapa' çhocma apueney allohuen ñeñt allpon yepalltena alloch yocrrena e'ñe cohuen ñocop. Ñaña apueney attoch yoctape'cherr ñeñt e'ñe pocte' enten ña. Ñeñtpa' e'ñe ña po'partsoteñoñ apueney. Ñapa' añ muenen o'ch yecohuentapretera ña. Ñaña añ atarr muenen o'ch yorrtatapreter po'cohuenña. ⁴ E'ñe po'cohuenñoñ ñapa' atet otnerrey ñeñtcha' apuerrey ñeñtcha' nanac cohuen yenterr, ñaña ñeñtcha' atarr nanac sherberrets yocop. Añ apuerrey po'huamenc attoch amach añ atarr yemna'yeno ñeñt yentyen arr patsro. Attochña amach atarr nanac ya'sosyateno e'ñe yañeña. Allochñapa' e'ñe yeyemteñoñ Paretspa' o'ch yaguërrñañ ñeñt e'ñe atet pena ña. ⁵ Ñeñto'marña añ poctetsa, ñanomcha'ña Cristo yeyemta. Allotpa' ñaña o'ch yorrtaten atto e'ñe pocte' es yepen. Allotpa' ñaña añ poctetsa, o'ch yeñotua e'ñe ora atet muenen Yompor. ⁶ Allotpa' ñaña o'ch yepuesuanom ñeñt atet yemnatse'tyen ya. Allotpa' ñaña e'ñech ya'huanta'huanom allohuen ñeñt atarr echarr yentyen, alloteññapa' o'ch yoctape'ch ñeñt poctetsa Partsocop. ⁷ Allotpa' ñaña o'ch yemorrentanna'ta, e'ñech yemo'nasheñsha' yepannena. Allotpa' ñaña e'ñech yemuerannena.

⁸ Ñerra'm atetcha' sepa añeçhno atet ñeñt o' notuaspá, allempoñapa' allo'nach sesen parrocmatats epas Yepartseshar Jesucristo. Allochñapa' amach e'ñe orrena señotere, añcha'ña e'ñe sorratyen ñeñt atet muenen Yompor. Allempoñapa' nanaccha' sesherberr Cristocop. ⁹ Ñerra'm ama allo'na yeyemuetneño Cristopa' yapa' amach e'ñe es cohuenaye' yeñotueno. Chach yottena ñerra'mrrate' puesheñarr ñeñt ama cheme'tetso a'yo. Añach cheme'ten ñeñt alla'tsena. Amapa' çhach yottena ñerra'mrrate' puesheñarr aporo'yet ñeñt ama entetso, ama't e'ñe mamesha. Tarro'mar ñapa' o' cha puesuerran atto Cristopa' e'ñe e'shohuerrñañeñ po'chñar. ¹⁰ Ñeñto'marña masheñeshacha' ñaña nochaneshacha' te'pa' o'ch alla noterrser. Allo'nepa'ch sesen yemuetnomaya Cristo atto ñapa' o' hua'ñerres attoch same'ñeño'tpa' o'ch sequeshperra. Ñerra'm atetcha' sepa' ama't ahuatapa' amach sepsere, ñaña amach alla sepuererro atarr toñoneñ. ¹¹ Allochña sapa' seçherrcha' all añcha'tare'ttena Yepartseshar Jesucristo ñeñt Ya'queshpatañer yepen. Allñapa' o'ch aguerres e'ñe pocsheñeshocmañen all partsoten. Ña po'partsoñapa' ñeñtpa' amach ahuañaña'tterro ama't e'ñe errponaña.

¹² Ñeñto'marña napa' noten, çhocmach neyerpatasa atet noctape'chen. Ama't sapa' o' señotue añeçhno, napa' o'ch alla noterrser. Ama't o' çhaponasa seyoçhro ñeñt ñoñets po'ñoçhpa' napa' nemneñ allo'nach neyerpatnensa. ¹³ Napa' noten, te'pa' orameñ nocrrena e'ñe pocte' o'ch neyerpatnomsa attoch o'ch setorroña Yompor po'ñoñ. ¹⁴ Napa' neñoteñ o' mañamenapa' o'ch nerromuen, tarro'mar atet otne't Yepartseshar

Jesucristo. ¹⁵ Allochñapa' amach nemnatenso o'ch sepuesuer ama't errponaña. Ama't allempoch o' nerromuenpa' sapa' allo'nach seyerpuerra ñeñ atet o' notuanmas.

Pedropa' e'ñe entane't Cristo allempo orrtatyesanete't po'partsoña

¹⁶ Ya te'pa' o' e'ñe yeñotatas atto Yepartseshar Jesucristo ña partsotets, ñapa' ñach huerrtsa po'pocheño. Añ ñoñets po'ñoçhpa' ama shequëñtsoyaye ñoñets ñeñ o' yotuas. Ñeñtpa' ama yaye' yocapña yotenso, ñaña ama ahuañneshañeyaye pueserrpareñ. Ya po'ñoçhpa' e'ñeca'ye allame'ttsa yeñche'tña Yepartseshar Cristo. Yapa' e'ñe yentuoñe'tña po'partsoña. ¹⁷⁻¹⁸ Tarro'mar yapa' e'ñe parro allo'tseney all aspento allempo Yompor Parets gatey Puechemer po'cohuenña. Yapa' allempopa' e'ñe ye'mhuaña ñoñets ñeñ ye'morrtoya ento'. Yompor ñeñ nanac partsotets pue'ntaño, po'cohuenñopa' atet cohuentatenan Puechemer, ñeñtpa' atet oten: "Añmapa' ñeñ Nechemer ñeñ nanac nemorrentena, ñapa' ña nanac nocshatene'." Ñeñtpa' attoña aye'chochtatenan Puechemer.

¹⁹ Te'ña ñeñ otyese't ahuañ ñeñ a'mta'yesaye't Yompor po'ñoñpa' te'ña e'ñe po'ñoçhpa' o' e'ñe etsotuerra. Ñeñto'marña yapa' attoña yeñoteñ ñapa' e'ñe po'ñoçh otye't po'ñoñot. Ñeñto'marña yocoppa' añ poctetsa o'ch yame'ña ñaña ñeñ a'mta'yesaye't ahuañ Yompor po'ñoñ. Ñeñña ñoñetspa' a'puetarsampennay yocapña atet ñerra'mrrate' lampareñ a'puetarene' checmete'. Te'ña o' huapa Cristo; ñapa' ñeñtcha'ña a'puetarere' yaña yeyoçher. Yapa' atarr cohuen yenteñ Cristo atet ñerra'm ranto atarremñ. ²⁰⁻²¹ Ñaña señoche'pa'chña ñeñ a'mta'yesaye't ahuañ Yompor po'ñoñ ñetpa' ama añaye' orrtatete'te ñeñ atet cotape'chete't ñet. Atto ñet ma'yochrete't Partsocop, Paretsña Puecamquëñña eñotatahuete't atetcha' serrpare'toñet Yompor po'ñoñ. Ñeñto'marña señoche'pa'ch ama pocteyaye e'ñe yañeña yocapño' o'ch ye'nachatañña po'ñoñ.

2

Ñeñ ashcañtetsa amach Yomporeye' po'ñoñ serrpare'teno (Jud 4-13)

¹ Te'pa' o'ch notas ñaña po'poñ. Ahuañpa' orrte't ashcañ ñeñ ama Yomporeye' po'ñoñ orrtatete'te, ñeñtpa' atta shecane't israelena'tarnesha'. Sapa'cho'ña attecnoch orrtonasa ñeñ amach Yomporeye' po'ñoñ a'poteno. E'ñe a'nahuapa' o'ch yeçhatas po'poñ poctapña. Tarro'marcha' ñetpa' atet pet attotcha' a'chencatatuerrres. O'ch a'nasotamñpsasa atto Yepartseshar Cristopa' ñeñña tsa'terroyaña yo'chñar. Tarraña ñetpa' machayotach a'chencatatuerrret ñañeñeta. ² Esemepoch orrta, shonte'ch achen ñeñtcha' ame'ñaya atetcha' yeçhatanet. Ashcañpa' e'ñech pocte' entan ama't ñeñ atarr yeçhene' sosya'tsañ. Ñeñto'marña e'ñe ñoñot achenesha'pa' o'ch achmare'teñañet Cristo po'ñoñ ñeñ po'ñoçh Yompor po'ñoñ. ³ E'ñe pueye'cheñotpa' o'ch shecaset attoch yoramñpesuas seçllayor. E'ñe poctapño'tpa' shecasetcha'. Tarraña ama't ahuañtoñ Yomporpa' ote't ahuo'ch mueñanet coñcha'puetso. Yomporpa' ama orrena ote'te, ama pueno po'ñoñ; atet oten, atetcha' pa. Ñeñ ama Yomporeye' po'ñoñ yeçhatetsopa' chenca'huerretcha'.

⁴ Tarro'mar ahuañpa' ama't Yompor po'mllañoteñneshar allempo atpare'chete'tpa' ama esesha' queshpatsete. Yomporpa' allempoña huapore'tanete't o'pono coñcha'puetso, allña' all ehucanare'ttenet checmeto. Allotpa' amach cha'nerreto, allotña esempohuañenpa' a'coñchatare'terrach. ⁵ Ñaña achenesha' ahuañpa' ama esesha' queshpatso allempo nanac atpare'chete't Yompor. Ñaña' e'choñamñpsanet oñ, ora erraparen patso. Ñapña Noé a'queshpat epuet cançherrsheña ñeñ pamo'tsesha'. Tarro'mar Noépa' serrpare'te't ñeñ atet poctetsa Yomporecop. ⁶ Ñaña ahuañpa' ñeñ yeçhatsete't anetso ñeñ pa'so'cheñ Sodoma ñaña Gomorra, Yomporpa' etomanñpsanet

pa'netser. Atto etomanipesuerranet pa'netserpa' allohuenetpa' e'ñe poctacma poyuerret. Ora e'ñe tsapñere'tuet, o' a'chencatuerranet e'ñe poctacma. Atto te'pa' eñotatenan po'psheññechno ñerra'm o'ch a'pare'teñet Yomporpa' attecmaçh perraneterr. Ñeñto'marña yeñoteñ erra'tsencha' orrtatene' ñeññ ama Yomporeye' po'ñoñ a'po'teno, ñetpa'cho'ña attecmaçh chenca'huerret ñamet. ⁷ Tarraña Yomporpa' a'queshpatan puesheñarr ñeññ pa'so'cheñ Lot ñeññ e'ñe pocte' es patse't. Ñaña'pa' epaye' entenan pamo'tsesha' atto' pa'yesete't ñeññ nanac sosey enten Yompor. Ñapa' epaye' llecachete't. ⁸ Ñapa' e'ñe cohuen cotape'che't. Pamo'tsesha'ña'pa' nanac pa'yesete't ñeññ ama cohuenayaye. Ñaña'pa' epaye' entapretanete't ñeññ cotape'chete't ñet, ñaña epaye' e'mapretanete't atto eñosatse'tyesete't. Ñaña'pa' epaye' llecane'te't tarro'mar ñapa' e'ñe cohuen cotape'che't pueyoçhro. ⁹ Ñeñto'marña Yomporpa' eñoteñ attoch a'queshpatan ñeññ e'ñe pocte' es pets, ñerra'm esempo o' huapanet topateñets huomenc. Ñaña eñoteñ attoch mueroçhtatan ñeññ ama pocteye' es petso. Allo'nach mueroçhtatnenanet esempohuañencha' acrare'tetuerra allohuen acheñenesha'. Allempopa' mueñuerranetcha' coñcha'puetso.

¹⁰ Po'ñoçhpa' coñchatancha' ñeññ aña ma'yoçhrenaya ñeññ atta muenatse'tyets e'ñe po'chtso't, atto nanaccha' sosyare' ye'cha'yenet, añach e'ñe yomenet ñeññ e'ñe ñet pocta'pñet. Ñeñto'marña ama't Yepartsesharpa' ama añcha'na'tpahuoye' enteñeto, attoña ama't ñaña allohuen ñeññ ahuamencatetyetsapa'cho'ña e'ñe achmñare'tueñet. Amach añcha'na'tpahuoye' enteñeto. ¹¹ Tarraña Yompor po'millaño'eññaneshar ama't nanac ahuamencatet, ñaña ama't nanac añcha'tare'tet, ñetña'pa' ama't Yomporesho'tsenet, ama sasare'teñetoña ñeññ ahuamencattetsa.

¹² Tarro'mar ñeññ ama Yomporeye' po'ñoñ ye'chatetso ñetña'pa' sasare'tenet tarro'mar ama es eñoteneto, e'ñe atet ñerra'm es berr ñeññ ama es eñotetso. Atet muena'yenetpa' atetcha' penet. Ñeññ atet eñalletetsa atet ñerra'm es berr; tsapatonetpa' o'ch rromueñet. O'ch rromuetpa' o'ch muetset. Ñeññ ama Yomporeye' po'ñoñ ye'chatetsopa' ñetpa'cho'ña esempohuañen attecmaçh a'cllatuaretterret. ¹³ Tarro'mar attoch atsa'tatuaretterret allohuen po'chñaret. Tarro'mar e'ñech ellapenete't coshatse'tatset ñeññ ama pocteyaye. Ama't atto rrallme'chapretasetpa' nanaccha' pencatenset tarro'mar ñetpa' nanac sosyare' es penet. E'ñech pocsheñesha' mueneñet o'ch shecaset.

¹⁴ Ñeññ ama Yomporeye' po'ñoñ ye'chatetsopa' çhocmach mueneñ o'ch cohua'yesan coyanesha' attoch nanac cañoresha'tenet. Amach huañeno atto cotape'chenet sosey. Nanaccha' shequëñet coyanesha' ñeññ ama tama es eñoto attoch aguëñet. Añach ye'chenet atto es ye'chatse'tyenet. Tarraña ñeññ atet petsapa' o'patataretetcha' coñcheñets. ¹⁵ Tarro'mar ñetpa' o' puesuerret ñeññ poctetsa. O' sa'nmet Yompor nanac ella'par. Ñetpa' cota'neñet atet pe't Balaam ñeññ Beor puechemer. Ñapa' ahuatpa' añach cohuen ente't o'ch pa'yesa ñeññ ama pocteyaye alloña gane't shonte' quelle. ¹⁶ Allempoña atet pe't Balaam ñeññ ama pocteyaye, pashanorña'pa' o' che'ptare'ch, atto' eños atet ñerra'm acheñ eñets, ama't ashenpa' yeñoteñ ama eñeno. O'ña eñosuapa' Balaamña'pa' allempoteñña o'huañ atet pa'yesan sosey.

¹⁷ Ñeññ ama Yomporeye' po'ñoñ ye'chatenetopa' ñetña'pa' amach es sherberrtso. Ñetpa' ama't attetañ ñerra'mrrate' oñ allot potenpa' te'ña'pa' o' masohua. Ñetpa' amach es sherbatso ama't attetañ ñerra'mrrate' os, tarraña ñerra'm o' matach mōrr a'yopa', amach huato. Tarraña ñeññ atet petsapa' o'patataretetcha' all ama machecmeto o'pono.

¹⁸ Ñaña nanaccha' ommo'chenet atto pa'yenet ñeññ nanac sosyare'. Ñaña o'ch a'secheñet po'psheñeñ attoch o'ch pachet ñeññ nanac muenenet po'chets attotcha' a'psataretterret, allempoña'pa' o'chcho' alla puerrret. Shonte' acheñ ñeññ e'ñe etserra puesuanmue' ñeññ atet ye'cha'yese'te't ñeññ nanac sosyare', tarraña allempoña'pa' o'ch

alla muenereterr ñeñt o' puesuanmuetañ ahuat poctapñet. ¹⁹ Ñeñt ama Yomporeye' po'ñoñ yeçhatetsopa' o'ch alla oterraneterr: "Ama palltenoña o'ch es yesuanom. Yapa' e'ñe cohueno'tseney. Yocoppa' ama eñalleña ñeñtcha' yeyore'terre'." Ama't atet oteneñ ñeñt atpare'tetspa' tarraña napa' o'ch notas, ñeñt atetpa' aña yeçhenet e'ñe ñet poctapña ñeñt nanac sosyare'. Tarro'mar ñerra'm erra'tsen es yeyçhatene' ñeñtpa' ñeñtaña pomnaren yepene'. ²⁰ Attecma ñerra'm ya. O' yeñotuer Yepartseshar Jesucristo, ñeñtara Ya'queshpatañer yepen. Yeparrocmateño' Cristo o' yesuanom sosya'tsañ. Tarraña ñerra'm yo'chñarpa' alla a'psaterrey Yompor po'ñoñpa' yañapa' elloña nanaccha' yoroçheno'tseney. ²¹ Ahuatpa' yoroçheno'tseney tarro'mar ama yentare ñeñt poctetsa Partsocop. Te'ñapa' o' yenter ñeñt poctetsa. Tarraña ñerra'm te'pa' o'ch alla yepuerrerra ñaña o'ch alla yepuesuerrñañ po'ñoñ atet oteneñ Parets, te'ñapa' yañapa' elloña nanaccha' yoroçheno'tseney. ²² Yapa' po'ñoñ ñerra'm o'ch alla yepuerrerra ÷ha yottena ñerra'mrrate' ochec. Yapa' o'ch alla yepuerrerra "atet ñerra'm ochec o'ch a'tatsta; o'ch a'tatsetuapa' tematempa' o'ch alla puerrerra allo'tsen pa'tatsña." Amapa' ÷ha yottena ñerra'm atet pena ñaña chañcho. "Chañchopa' o'ch apa; o'chña apuapa' o'chcho' alla puerrerra atstso allcha' e'ya'pna'tuerra o'ch alla atsotseñe'chuerr." Ama't ahuatoteñ atet otete't atet pena ochec, ñaña atet pena chañcho.

3

Esempoch huerrmocha Cristopa' orrterrach ñeñtcha' achmare'terre' Yompor

¹ Te'ñapa' masheñneshacha' ñaña noçhaneshacha' o'ch notas, po'pocheño o'ch alla nequellquèrrnaserr carta. Tarro'mar añecop nemneñ o'ch alla noctape'chaterrserr; o'ch alla neyerpaterrserr soctapña e'ñe cohuen. ² Ñaña o'ch alla noterrserr; añ poctetsa amach sepsatsche ñeñt otye't ñeñt a'mta'yesaye't Parets po'ñoñ. Atet otye'tpa' atetcha' etsoterra esempohuañen. Ñaña amach sepsatsche atet o' otuas ñeñt Yompor puellsen-sarnesha'. Ñetpa' o' yeçhatuaset Yepartseshar Cristo po'ñoñ ñeñtpa' atetcha' sepa, ñeñtara Cristo Ya'queshpatañer yepen.

³ Ñanom o'ch señoçh añ, ñerra'm esempoch o' huerrmocha Cristopa' huapach ñeñtcha' achmare'tene' Yompor poctapña. Ñeñtpa' attach cotape'chen atet muenatse'tyenet ñeñt cohuen entenet po'chets. ⁴ Pachmare'teño'tpa' o'ch otet: "Cristopa' otrerr esempopa' ahuo'ch huerra. Te'ñapa' ¿eso'marte' amo' huerro'? Ama't yatañneshañpa' o' colla'huenet; teme'ttsen yenten ora erraparen e'ñe attera atet orrte't ahuatoteñ allempo errete' ayeçcataret pats." ⁵ Ñetpa' mueneñet o'ch puesuerret atto ahuat Yompor e'ñe po'ñoñoña o' yeçcatuan enet. Patspa'cho'ña e'ñe po'ñoñoña yeçca'hua. Ñaña e'ñe oño'tpa' yeçca añ pats. ⁶ Ahuatpa'cho'ña e'ñe puechopeño' oñpa' chenca'hua pats allempo e'ñe chorra oñ erraparen. ⁷ Ñaña Yompor po'ñoño'tpa' te'pa' ama't patspa' esempohuañenpa' poyuerrcha'. Enetpa'cho'ña attecma'ch poyuerrcha' ñaña. Aña cohuen esempohuañencha' acrare'tetuerra allohuen acheñenesha'. Allempochña mellapoterra. Ñeñña ama ame'ñenaye ñapa' o'ch mueñanet coñcheñtso.

⁸ Tarraña te'ña masheñneshacha' ñaña noçhaneshacha' amach atta es sepçhatsto. Añcha'ña o'ch señoçh; Yomporpa' entenan ama't mil char atet ñerra'm pamtarra. Ama't ñeñt ñapa' pamtarr enten, yocopñapa' yenteñ atet ñerra'm mil char. ⁹ Puesheña'tets acheñpa' otenet o' meten shonte'char amo' huerro. Tarraña yapa' yeñoteñ Yepartseshar çhocmach a'poctatan po'ñoñ o'ch huerra. Yapa' yeñoteñ tarro'mar amo' huerro añ cohuen ñato' esempoch o'ch yoctape'chuerr ello cohuen Yomporecop allohueney. Ñapa' nanac muerenya ama mueno ama't eseshapa' o'ch chenquerra.

¹⁰ Tarraña ama't amo' huerro, esempopa' machayotach huerra. Atet ñerra'm eñeñ amach es yepchenopa' machayotach huapa tsapo. E'ñech atet perraña ñaña Yepartseshar Cristo, e'ñech machayota huerra. Allempopa' huañerrcha' enet. E'ñe puepotr-rareño'pa' huañcha'. Huañcha' ora ñeñt orreyetsa ñaña ama't ora allpon eñall, paña'tuerrcha' ñaña e'yohuach. Tso'ñapa' ñach e'ñe e'yatuerre' allohuen ñeñt eñall. Patspa'cho'ña ñaña ora ñeñt ayeçhcataret arr patsropa' poyuach.

¹¹ O'ch poyuapa' o'ch e'yohua ora esocmañen. Ñeñto'marña sapa' añ poctetsa socop. O'ch soctape'cherr e'ñe cohuen Partsocop, ñaña o'ch sepomhuerra sañeña e'ñe Yomporecop. ¹² Ñaña añ poctetsa o'ch secuame'teñ esempoch yoroçhtatuer Yompor. Sapa' o'ch setorreññaña attochña mameshapa' o'ch huerra. Esemppoch yoroçhtatuer allempopa' ñachña a'crratuerrre' enet. O'ch a'crratuerran enetpa' allemppochña pottle'chuerr e'ñe poctacma. Ñaña ora ñeñt orreyetsa entopa' ñeñt'pa'cho'ña e'ñech poyuahuerr. O'ch poyuahuerrpa' o'ch e'yohuerra poctacma. Tso'ñapa' ñach e'ñe e'yatuahuerre' ora allohuen ñeñt eñall. ¹³ Tarraña yapa' yecueñ o'ch etsoterra atet otnerrey. Ñapa' ña yotnerre', eñalleterro'ch po'poñ enet etserrare', Patspa'cho'ña o'ch eñalletterra etserra. Allña'pa' añach orrtatsa ñeñt e'ñe cohuenare' es pa'yets.

¹⁴ Ñehua, masheñneshacha' ñaña noçhaneshacha' o'ch secuame'teñ. Secuame'teño'pa' o'ch sema'yochrena attoch entuerres Yompor e'ñe pocte', attoch amach eñalle ñeñt'cha' sepencate'. O'ch cohuen sentannena epas samo'tsesha'. ¹⁵ Ñaña o'ch señoçh e'ñe eso'marte' amo' huerro Yepartseshar Cristo. Ñapa' atarr muerenana allohuen acheñenesha'. Ñapa' mueneñ yapa' o'ch yame'ñatuera acheñenesha' attoch yequeshpa'huerra allohueney. Ñeñtara o' quellconas ñaña masheñ Pablo po'cartot. E'ñe Yompor pueñotateño'tey atet quellconas ñaña. Yapa' nanac yemuerrannena. ¹⁶ Ora allpon Pablo po'cartotpa' o' eñotatey atet'cha' perra esempo. Pate'tets ñoñets ñeñt quellquë't Pablopa' nanac echarr yenteñ o'ch yeñoçh e'ñe atet oteney. Puesheña'tets acheñ ñeñt ama tama es eñotopa' atarr moñne'toñete't Pablo po'ñoñ. Tarro'mar ñetpa' ama tama cosheññañeto Yompor po'ñoñ ñeñto'marña çhocmach mueneñet o'ch e'nachaterrñañet atet oteney Pablo po'cartot. Ñaña po'poñ Yompor po'ñoñ ñetpa' çhocma mueneñet o'ch e'nachaterrñañet atet oteney. Ñetpa' attot'cha' a'chencatatuerrret ñetañeña.

¹⁷ Ñeñto'marña masheñneshacha' ñaña noçhaneshacha' te' napa' o' notuas necartot ama't ama etsotena' atet notenes, attochña señoçh. Te'ñapa' seño'tat'ach allochña'pa' amach shecaseto atto es panten ñeñt atpare'tets. Saña te'pa' amach sequeçhpatsterrñañe Yompor po'ñoñ atet atarr same'ñena te'. ¹⁸ Añcha'ña e'ñe Yompor puemuereno'pa' allo'nepa'ch sesen cotape'chnomue' e'ñe cohuen, ñaña allo'nepa'ch sesen yemuetnomaya Yepartseshar Jesucristo ñeñtara Ya'queshpatañer yepen. Ya'ye'choçhtatoñepa'ch tayoteñ e'ñe errponohuañen. Te'pa' ñeñt'ach notas, ñeñt'pa' attetepa'ch Nompore. Allohua.

Pedro

AÑ ÑANOM SAN JUAN PO' CARTA 1 SAN JUAN

Jesucristo ñeñt̃ po'ñoñ pen Yompor, yañapa' allochña e'ñe yocrrerra

¹ Te'pa' o'ch neserrpare'tatas arr nequellcof̃ ñeñt̃ atet pena Jesucristo; ñapa' chocma eñall ama't ahuatoteñ ama't allempo ama ayeçhcatarettena' pats. Ñeñt̃ña yapa' e'ñe ye'me't̃ atet serrpare'tatiesye't̃ allempo orrtosa arr patsro, ama't ya yecloyoṭpa' e'ñe yeñche't̃ e'ñe allame'tets, ama't e'ñe ya yotoṭpa' ya'p̃lla'yese't̃. Ñeñt̃ña Jesucristo ñapa' ñeñt̃ña po'ñoñ penña Pompor Parets tarro'mar ñach e'ñe eñotaterre'ña acheñenesha' atet oten Pompor Parets. Ñeñt̃ña ña po'ñoñpa' po'ñoçh yapa' allochña corretsayach. ² Ñeñt̃ña Jesucristo allempo acheñetos arr patsro yañapa' e'ñe yeñche't̃. Ñeñto'marña te' yapa'cho'ña chocma yeñotatenes sam̃a. Ñeñto'marña yeserrpare'tatenes ñeñt̃ña Cristopa' ñeñt̃ alloch yocrrena ama't tayoteñ e'ñe errponañohuen. Ña ahuatpa' e'ñe parro'tsen epuet Pompor Parets. Te'ña atto orrtosnaya arr patsro yapa' e'ñe yeñche't̃ e'ñe ye'me't̃ atet serrpare'tatiesye't̃. Ñeñto'marña te' ya ñeñt̃ atet yentyese't̃, ñeñt̃ atet ye'myesoñe't̃, te'ñapa' o'ch yeserrpare'tatas sam̃a. ³ Allochñapa' attoch allohueney yeparrocmaterr epay Yompor Parets ñaña Puechemer ñeñt̃ Jesucristo. ⁴ Ñeñto'marña nequellquënnas ñeñt̃ e'ñe po'ñoçh yeñoten attochña sapa'cho'ña o'ch e'ñe socsherra sam̃a.

Yomporpa' añ toma'ntena puetare' tarro'mar ñapa' e'ñech cohuen es orrtatyen

⁵ Añ ñoñets ñeñt̃ ye'mapretyese't̃ Jesucristo, te'ñapa' o'ch yeserrpare'tatas. Ñeñt̃pa' atet eñotateney: Yomporpa' ña e'ñe cohuenare' es p̃a'yets, ñapa' e'ñe atet pena ñerra'm puetare' e'ñech cohuen yenteñ. Ñapa' ama't mameshapa' ama orrtatenanoña ñeñt̃ ama cohuenayaye; ñeñto'marña yoten, ñeshopa' ama't coñe'tapa' ama eñalleña checmete'. ⁶ Yapa' ama't yoteneñ o' e'ñe yeparrocmaterr epay Yompor, tarraña ñerra'm ora yorrtatyen ñeñt̃ ama cohuenaye' enteno ña, yañapa' atta yeshquën. Ñeñto'marña chach yottena ñerra'm checmeta yechope'chen tarro'mar ama e'ñe yeyçhena' ñeñt̃ e'ñe po'ñoçh cohuen enten Yompor. ⁷ Tarraña ñerra'm e'ñe cohuenare' es yorrtatyen atet pena Yompor, ñeñt̃ña e'ñe atet yepena ñerra'mrrate' arr yechope'chen puetaro e'ñe allo'tseney epay Yompor. Attoña allohueney e'ñech cohuen yeparrocmatuen ñaña Yompor Puechemer ñeñt̃ Jesucristo ña po'rrosoña chocma e'shennayña allohuen yo'chñar.

⁸ Tarraña ñerra'm cha yoten, “ñapa' amaca'ye eñalle no'chñar”, ñeñt̃ña yañeñaca'ye shequëtsa tarro'mar Yompor poçtaṭña ñeñt̃ e'ñe po'ñoçh cohuenpa' amaca'ye chennayoña yeyoçhro. ⁹ Tarraña ñerra'm cho ya'meten yo'chñar, Yomporña e'ñech peretna'huerrnay allohuen yo'chñar, e'ñech e'shohuerrnay allohuen ñeñt̃ ama poçteye' entapretenye tarro'mar ñapa' ama puenesho po'ñoñ, ñapa' e'ñe poçte' es pen, ñeñto'marña ñapa' chocmach peretnerrey. ¹⁰ Ñaña ñerra'm cha yoten, “ñapa' ama no'chña'tpeno”, Yomporña cha yottatateñ ñerra'mrrate' ñapa' atarr ashcañ tarro'mar po'ñoñpa' atet oteney ya allohueneypa' e'ñe yo'chña'tuen. Ñeñt̃ña po'ñoñpa' yañapa' ama't e'ñe mameshapa' ama çhappennayoña yeyoçhro.

2

Jesucristo ñeñt̃ e'ñe cohuen eñets yocop Yomporesho

¹ Nechemerneshacha' te' socoppa' o'ch nequellconas attoch amach allo'na sepa' neno ñeñt' ama't mameshapa' ama pocteye' enteno Yompor. Tarraña ñerra'm esesha' orrtatene' ñeñt' ama cohuenayaye, ñerra'm o'ch enamuerr peretneñets, Yomporpa' o'ch peretner tarro'mar eñall yocop ñeñt'cha' eñosets Apuesho. Ñeñt'ña' añ Jesucristo ñeñt' e'ñe pocte' es pa'yets. ² Ñapa' ña apare't attoch tsa'tuerrnaya yo'chñar. Ñeñt'pa' ama e'ñe yap'tecpayaye, añecpa'naña allohueney ñeñt'ey añe patsro'tsa'yeney.

³ Ñerra'm e'ñe po'ño'ch yame'ñerrñaña Yompor po'ñoñ ñeñt' atet' otene'y allempoñapa' e'ñech po'ño'ch yeñoter ñeñt' atet' pena ña. ⁴ Ñeñt' otets, ñapa' e'ño' eñoteñ atet' pena Yompor; ñerra'm attera atpare'tenan Yompor po'ñoñ ñeñt' atet' otene'y, ñeñt'ña atet' otetspa' ñapa' ataca'ye shequën. Ama't e'ñe mameshapa' ama cheññañoña Yompor po'ñoñ pueyo'chro ñeñt' e'ñe po'ño'ch atet' otene'y. ⁵ Tarraña ñerra'm esesha' e'ñe po'ño'ch ame'ñerraya Yompor po'ñoñ ñeñt' atet' otene'y, ña po'ño'chpa' o' morrenterrana Yompor e'ñe pueyo'chrocmañen. Ñeñt'pa' attoña yeñoteñ po'ño'chpa' o' yeparrocmaterr epay Yompor. ⁶ Ñerra'm esesha' otets, ñapa' e'ño' parrocmaten epuet Yompor; ñeñt'epñapa' orrtatyesanepa'ña ñeñt' atet' pa'yese't Yompor Puechemer ñeñt' Jesucristo.

*Cristopa' ña orrtaterre' etserra morrentanna'teñets attochña e'ñe cohuen yemorrentan-
nerra*

⁷ O'ch masheñneshacha' ñaña no'chaneshacha' notas, ñeñt' atet' notenes nequellcot' te' amorrentanna'tpahuepa'ch sentannena allohuenes ñeñt'pa' ama añeyaye ñoñets ñeñt' ama se'mare. Ama't allempoteñ e'ñe errte' same'ñerrapa' allempoteñ se'muerrña ñeñt' ñoñets ñeñt'cha' atet' sepa' e'ñe cohuen ñeñt'ara Yompor po'ñoñ ñeñt' e'ñe errtes e'muene' allempo. ⁸ Tarraña morrentanna'teñets ñeñt' atet' nequellquënnas te' ñeñt'pa' e'ñe atet' ñerra'mrrate' o' tayo' orrtatonasetña atet' morrentanna'teñets, tarro'mar Cristo e'ñe po'ño'ch orrtatonayña e'ñe etserra attoch e'ñe cohuen yemorrentanna'terra, ñeñt'o'marña sapa'cho'ña te'pa' o' e'ñe etserra sorrtaterrña samña attoch semorrentan-
nerra. Morrentanna'teñets po'ño'chpa' ñeñt'ña atarr sherbets tarro'mar ora allohuen ñeñt' ama cohuenaye' enteno Yompor; ñeñt'ña' allo'na sen huañuanmats. Ñeñt'pa' e'ñe atet' pena ñerra'mrrate' checmete'pa' allo'na sen metuanmats. Allohuen ñeñt' e'ñe po'ño'ch cohuen enten Yompor; ñeñt'pa' atet' ñerra'mrrate' puetare', ñeñt'ña po'ño'ch o' a'puetarsañperres.

⁹ Ñeñt'ña otets ñapa'cho'ña Yomporo' po'puetarenño'tsen tarraña ñerra'm orameñ e'moñe'tyenan pamo'ts, ñapa'cho' orameñ checmeto'tsena. ¹⁰ Tarraña ñeñt' e'ñe po'ño'ch muerenaya pamo'tsesha', ñeñt'ña' e'ñe Yompor po'puetarenño ye'chena. Allña' ama eñalleña ñeñt'cha' paterrayerr ñeñt' ama pocteye' enteno Yompor. ¹¹ Ñeñt'ña e'moñe'tyene' pamo'ts ñapa' orameñ checmeto'tsen. Ñaña' atet' pena ñerra'mrrate' puesheñarr ñeñt' checmetch chopene'chyen, ama eñoteñe errenette'ña sen tarro'mar checmete'pa' ñeñt'ña a'natacle'chene'.

¹² Nechemerneshacha' sa so'chñarpa' o' a'pretna'huare'tterra Cristesho't, ñeñt'o'marña te'pa' atet' nequellquënnas. ¹³ Ñaña te'pa' o'ch notas samña allohuenes ñeñtes e'ñe pompornesha' penset. Sa te'pa' o' señoter Cristo ñeñt' e'ñe ahuatoteñ eñall ama't e'ñe allempoteñ ama aye'chcatarettena' pats; ñeñt'o'marña te'pa' atet' nequellquënnas samña. Ñaña te'pa' o'ch notas samña allohuenes ñeñtes huepueshares, sapa' o' e'ñe satpare'ter oneñe't; ñeñt'o'marña socop te'pa' atet' nequellquënnas samña.

Ñaña sa nechemerneshacha' te' sapa' o' e'ñe señoter atet' penaña Yompor Parets; ñeñt'o'marña te'pa' atet' nequellquënnas e'ñe socop. ¹⁴ Ñaña sa ñeñtes pompornesha' e'ñe penset, sa te'pa' o' señoter Cristo ñeñt' e'ñe ahuatoteñ eñall ama't e'ñe allempoteñ ama aye'chcatarettena' pats; ñeñt'o'marña te'pa' atet' nequellquënnas. Ñaña sa ñeñtes

huepueshares, sapa' atarr ahuamencafes tarro'mar Yompor po'ñoñpa' o' e'ñe çhaponasa seyoçhro ñeñto'marña sapa' o' atarr satpare'ter oneñeñ; ñeñto'marña te'pa' atet nequellquënnas.

¹⁵ Amachña aña atarr semorrentatsto allohuen ñeñt yentyen aña patsro tarro'mar ñerra'm aña atarr yemorrentena ñeñt aña patsro'tsenpa' Yomporña Parets po'ñoçhpa' amach yemorrenteño, (ñeñto'marña amach errotenoñ çhaponayoña yeyoçhro ñeñt atet muenen ña). ¹⁶ Allohuen ñeñt eñall aña patsro, atet ñerra'm ñeñt atet muenatyenyey yechets, ñaña ñeñt yeye'chapretyena e'ñe ya yecueñoñ, ñaña ñeñt e'ñe yemnen ya o'ch e'ñe cohuen entapretyet, ñeñña allohuenpa' ama Yomporeshoteye' hueno, ñeñtpa' aña patsro'marnesha poçapña. ¹⁷ Allohuen ñeñt yentyen aña patsropa' ñeñtpa' atarr ahuañaña, ñaña ñeñt yemnatse'tyen aña patsro ñeñtpa'çho'ña atarr ahuañaña. Tarraña ñeñt atet petsa ñeñt e'ñe atet muenen Yomporpa' ñeñtñaapa' amach huañerro ama't errponaña.

Atet pena cotapñats ñeñt e'ñe po'ñoçh Yompor poçapña ñaña atet pena po'poñ cotapñats ñeñt shequëñtsa

¹⁸ Te' nechemerneshacha' o'ch notas po'poñoneñ. Te'pa' o' mameshamerra o'ch huañerr allempochña mellapoterra. Atet se'myen te' ñeñtpa' allempochña orrterra ñeñtcha' atarr e'moñe'terre' Cristo pueyochreshohuen. O' e'ñe tayoteñ orretyesa shonte' ñeñt çhocma e'moñe'tene' Cristo. Ñeñto'marña te'pa' yeñoteñ o' mellapoterrmocha. ¹⁹ Ama't ahuañmo'cha e'ñe parroçma yapçhañe't ñetña te'pa' o' ahuanmuet ellonet o' sohuanerryet tarro'mar po'ñoçhpa' ama allohuenacmaye' yeparrocmaterro. Ñerra'm po'ñoçhcha' allohuenacmay yeparrocmaterreñ allempoña ñetpa' allo'tsa'yenetañate' ñamet yesho. Tarraña te'ña ñetpa' o' ahuanerret ellonet attoña o' yeñoterranet po'ñoçhpa' ama allohuenacmaye' yeparrocmaterro.

²⁰⁻²¹ Tarraña te'ña sapa' Cristoña sechorratenayaña Parets Puecamquëñ. Attoña allohuenes o' e'ñe seño'tuer. Sapa' o' e'ñe seño'tuerr ñoñets ñeñt po'ñoçh, ñeñtpa' ama shequëñtsoyaye. Te' sapa' ama e'ñe sepallteño'teye' nequellquënnaso ñeñt atet poçtetsa socop. Tarro'mar sapa' seño'teñ ñeñt ñoñets shequëñtspa' ama Yomporeshoteye' hueno tarro'mar ñeñt Yompor po'ñoñpa' ñeñtña e'ñe po'ñoçh ama shequëñtsoyaye.

²² Te'ña sapa' seño'che'pa'ch ñeñt atarr nanac ashcañtetsapa' ñeñtca'yeña otets Jesús'pa' año' Cristoyaye ñeñt atarr yecuen ya ahuatoteñ ñeñtcha' llesenserr Yompor. Ñeñto'marña ñetpa' çha e'moñe'teñetña Cristo, ama çhoye' ame'ñeñeto, Pompor'e'ñaña ama ame'ñeññañeto, çha a'nasoteñet. ²³ Allohuen ñeñt a'nasotenaya Yompor Puechemer, ñetpa' Pompor'e'ñaña ama aguëññañeto. Tarraña allohuen ñeñt otets, Jesús'pa' Yomporo Puechemer ñeñt Cristotets, ñetñaapa' e'ñe aguëññañet Pompor.

²⁴ Ñeñto'marña o'ch notas, Yompor po'cohuenña ñeñt se'muerr ahuañmo'çhoteñ, te'ña sa atto o' e'ñe seño'ter seyoçhro allo'nepa'ch sesen ame'ña'nmatça allochñapa' attoch e'ñe cohuen separrocmaterre epas Yompor Puechemer ñaña epas Yompor Parets. ²⁵ Jesucristopa' atet otnerrey o'ch apuerrey e'ñe po'ñoçh attochña yapa' corretsayach yocsheñeshocmañen tayoteñ e'ñe errponañohuen.

²⁶ Ñeñt notenes añ nequellco't ñeñtpa' añeçpa nequellquënnas attoch sapa' e'ñech seño'ter allochñapa' attoch ama sa'shcare'tterro. ²⁷ Tarro'mar Jesucristo o' chorraterresa Parets Puecamquëñ, ñeñto'marña sapa' ama sepallteno o'ch esesha' yeçhatas tarro'mar ñapa' eñotatascha' allohuen. Ñaña ñeñtcha' atet yeçhaterres ñapa' e'ñeca'ye po'ñoçh atet, ñeñtpa' ama shequëñtsoyaye. Ñeñt atet yeçhatenes sapa' allo'nepa'ch sesen parrocmatenaya Cristo.

²⁸ Te'ña nechemerneshacha' allo'nepa'ch sesen parrocmatenaya Cristo allochñapa' ñerra'm esempoch huerra ñapa' ñachña e'ñe seyemtapuerra attoch sapa' amach çha

sepencapuero ñerra'm esempoch huerra. ²⁹ Ñehua, sa te'pa' o' e'ñe señoter Jesucristo ñapa' e'ñe pocte' es pa'yen. Ñeñto'marña señoche'pa'ch ñaña allohuen ñeñt e'ñe pocte' es orrtatyets ñeñt'ña' e'ñe po'ño'ch puechemer peñ Yompor.

3

Yomporpa' e'ñe puechemerasha' peney

¹ Te' sapa' chosaña e'ñe cotape'cherre', Yomporpa' atarrca'ye nanac morrentenya. Ña e'ñe puemorreneteño'tey ñapa' e'ñe puechemer peney, ñeñto'marña yapa' e'ñe po'ño'ch Yomporena'tarey. Ñeñto'marña acheñenesha' arr patsro ñeñt ama ame'ñetso ñet'ña' ama eseshaye' eñotenayeña ñeñt atet yoctape'chyen Yomporecop tarro'mar Yomporpa'cho'ña ama eseshaye' eñotenaye ñeñt atet cotape'chen ña. ² O'ch masheñeshacha' ñaña no'chaneshacha' o'ch alla noterrser; te'ña yapa' e'ñe po'ño'ch puechemer peney Yompor. Ama't ama e'ñe eñotatenya' erroteneycha'ña ya esempohuañen tarraña yapa' e'ñe yeñoteñ ñerra'm esempo orrterra Jesucristo, yañapa' e'ñech attey yaña ñerra'm ña tarro'mar allempo yapa' yentercha' ñeñt atet atarr cohuentena ña. ³ Allohuen ñeñt atet ame'ñetsa, ñetña e'ñe pueyemeteño'tet cohume'teñet, attoña ñetpa' e'ñech cohuen a'cohuentatare'tterret ñamet e'ñech atet ñerra'm Jesucristo ñeñt e'ñe cohuenare' es orrtatyets.

⁴ Allohuen erra'tsen ochña'tetspa' ñeñt'ña' cha atpare'tenan Yompor po'ño'ñ ñeñt atet anaret. Tarro'mar ñerra'm esempo yatpare'ten ñoñets ñeñt atet anaret, ñeñt'ña yapa' chach yeyoren yo'chñar. ⁵ Sapa' e'ñe seño'teñ Cristo ñapa' tarro'mar huapa arr patsro ñach ahuanerre' ya yo'chñar ama't ñapa' ama eñalle po'chñar ama't coñe'ta. ⁶ Ñeñto'marña allohuen esesha'ch parrocmaterre' Cristo, ñet'ña' ama choye' ochña'tare'teneto. Tarro'mar ñeñt atarr ochña'tare'tetspa' ñeñt'ña' ama puentaranoña Cristo, ama cheññañoña pueyo'chro ñeñt atet pena Cristo. ⁷ Nechemerneshacha' sapa' señoche'pa'ch ñeñt'cha' atet noterrser te', alloch'ña' attoch amach esesha' seshquërraye. Po'ño'ch ñeñt orrtatyene' ñeñt e'ñe pocte' enten Yompor, ñeñt'ña po'ño'chpa' e'ñe cohuen acheñer, e'ñech atet pena ñerra'm Cristo ñeñt e'ñe pocte' es pa'yets. ⁸ Tarraña ñeñt chocma orrtatyene' ñeñt ama pocteye' enteno Yompor, ñeñt'ña acheñerpa' po'ño'ch oneñetena'tar, tarro'mar oneñetpa' e'ñe ahuatoteñ ñapa' aña orrtatyets ñeñt ama't mameshapa' ama pocteye' enteno Yompor. Ñeñto'marña Yompor Puechemerpa' huapa, alloch'ña' ñach e'nuerre' atet patse'tyena oneñet.

⁹ Allohueney ñeñtey po'ño'ch eñalletertsa Yomporotpa' amach allo'na yo'chña'tare'tneno tarro'mar yapa' o' yeycherrñañ ñeñt atet pena Yompor Parets. Yapa' po'ño'chpa' o' ye'ñalletterra Yomporot ñeñto'marña amach errotentot alla yo'chña'tare'terre'te. ¹⁰ Arrpa' attoña yeñoteñña ñeñt Yomporena'tar ñaña ñeñt oneñetena'tar. Allohuen ñeñt ama pocteye' es orrtatyetso ñeñt ama morrentenaye pamo'tsesha', ñet'ña' amaca'ye Yomporena'tareyayeto.

Amorrentanna'tpahuepa'ch yentannena e'ñe allohueney

¹¹ Añ ñoñetspa' e'ñe ahuatoteñ eñotatasete't amorrentanna'tpahuepa'ch e'ñe allohueney. ¹² Amach atet ye'patsto atet pa' ahua't Caín, ñapa' oneñetena'tara. Ñaña'pa' pa'mo'nasheña muetsa. Tarro'marca'yeña muetse ñapa' amaca'ye cohuenaye' cotape'che'te; pa'mo'nasheñña Abel ñeñt muetsa, ñaña'pa' e'ñe cohuen cotape'che't Yomporecop.

¹³ Ñeñto'marña masheñeshacha' ñaña no'chaneshacha' e'ñepa'ch seño'ta sapa' ñeñto'mar'ña e'moñe'tasña acheñenesha' añ patsro ñeñt ama ame'ñetso. ¹⁴ Tarraña ya e'ñe yemorreneteño't yamo'tspa' e'ñe yeñoteñ yapa' o' yemtanerrña allcha' e'ñe poctacma yerromuerreñ. Yapa' o' yeycherr allña yapa' corretsayach. Ñeñt'ña ama muerenayo

pamo'ts ñetñapa' allo'tsenareta allcha' e'ñe rromuerret e'ñe poctacma. ¹⁵ Allohuen ñeñt'cha e'moñe'tyenan pamo'tspa' ñeñt' po'ñoçhpa' amtsaña enteñña Yompor. Ama't e'ñe sapa'cho'ña señoñeñ ñeñt' amtsaña' pueyoçhropa' ama eñalleña attoch ñapa'cho'ña corretsach tayoteñ e'ñe errponañohuen. ¹⁶ Arrpa' attoña e'ñe yeñoteñña ñeñt' atet penaña e'ñe po'ñoçh morrenteñets, attoña Jesucristopa' a'rroya ñañeña attoch rroma yocop. Yapa'cho'ña e'ñepa'chña pocte' yeñch o'ch ya'rroya yañeña attoch yerroma yamo'tseshacop. ¹⁷ Tarraña yaña ñerra'm yechyen attoch e'ñe cohuen yocrrena arr patsro, allempo yenteñ yamo'ts'cha atarr es pallta'yenet yañapa' ama yemorrenteño, Yomporpa'cho'ña ama't e'ñe mameshapa' amaca'ye yemorrenteñoña yeyoçhro. ¹⁸ Amach nechemerneshacha' e'ñe yeñoñoçhaya yotanna'tatsto atarr yemorrentannena. Chochña yorrtatyesña yemorrenteña e'ñe po'ñoçh atet es yeña'yen po'psheññecop e'ñe cohuen.

Attoch e'ñe cohuen yeyemtera Yompor

¹⁹ Alloña yapa' e'ñech yeñotena yapa' e'ñe po'ñoçhey ñeñtey atet petsa e'ñe cohuen. Ñeñto'marña yapa' e'ñech yeñmataten yeyoçher Yomporeshonet. ²⁰ Tarro'mar ñerra'm ama e'ñe yeñmañeshocmaye' es yeña'yeno Yomporecop, Yomporña'pa' elloña e'ñe po'ñoçh atet eñoteny tarro'mar ñapa' ña atarr eñotañesha'. ²¹ Tarraña nechemerneshacha' ñerra'm e'ñe yeñmañeshocmañen es yeña'yen Yomporecop ñeñteñapa' Yomporcha'ña e'ñe cohuen yeyemtena. ²² Atto yame'ñerrñaña po'ñoñ ñeñt' atet oteney, ñapa' atarr coshenya; ñeñto'marña ñerra'm es yenamueñ, ñapa' çhocmach e'ñe po'ñoçh apueney. ²³ Yompor po'ñoñoñ atet oteney o'ch e'ñe cohuen yame'ñerrñaña Puechemer ñeñt' Jesucristo. Ñaña oteney amueranna'terrapo'ch allohueny, atet oteneyña ña. ²⁴ Erra'tsencha' e'ñe cohuen ame'ñenaya Yompor po'ñoñ ñeñt' atet oteney, ñetñapa' e'ñe parrocmatenet epuet Yompor. Ñeñto'marña yeñoteñ yeparrocmaten, Parets Puecamquëñoñ ñeñt' chorratenya ñeñt'ña yeñotatene'ña e'ñe yeparrocmateña Yompor.

4

Attoch yeñoçh erra'tsente'ña ñeñt' e'ñe po'ñoçh eñoraten Yompor Puecamquëñ; attoch yeñoçh ñaña ñeñt' epatare'tene' Yompor poctañña

¹ Ñaña te'pa' o'ch masheñeshacha' ñaña noçhaneshacha' noterrser, sapa' ñato't same'ñena'ña allohuen pa'namen coñañats tarro'mar ñetpa' ama't otenetañ Partso' Puecamquëñ eñoratenahuet, sapa' çhochña señoñesña ñeñt' pa'namen coñañatser attochña sapa' e'ñe señoçh erra'tsente'ña ñeñt' e'ñe po'ñoçh huetsa Yomporeshot. Tarro'mar shonteñ ñeñt' otetseñ ñetpa' Yomporo' po'ñoñ a'mitenet tarraña ñeñt'pa' ama Yomporeyaye po'ñoñ. Ñeñt'pa' errañaren o' orretyesa añ patsro. ² Arr sapa' alloch señoçh erra'tsente'ña e'ñe po'ñoçh eñoratenña Parets Puecamquëñ: Erra'tsencha' otats Jesucristopa' ña po'ñoçh partso' acheñetos arr patsro, ñeñt'ña coñañatserpa' e'ñe po'ñoçh Parets Puecamquëñ eñoratene'. ³ Erra'tsencha' ñeñt' amach atteye' otetso Jesúsocop, ñeñt'ña coñañatserpa' ama po'ñoçh Parets Puecamquëñ eñoratenahueto. Ñeñt'pa' ñeñt'ña po'ñoçh e'moñe'tene'ña Cristo ñeñt' atet se'mare'tyese't o'ch huapa. Te'ñapa' o' orrtonaya añ patsro.

⁴ Saña po'ñoçh nechemerneshacha' e'ñe po'ñoçh Yomporena'tares tarro'mar sapa' ama aña se'mñoteno atto pa'namenot shecare'tyensetañ. Yompor Puecamquëñ ñeñt' sechorrenayapa' ñeñt'ña sapa' atarr ahuamencattatenes. Ñeñt'ña chorrenaya añ patso'marnesha'pa' ñapa' ama e'ñeye' ahuamencattatenaneto. ⁵ Ñeñt'ña shecare'tyets e'ñe ñet poctaññoçhet po'ñoçhpa' patso'marnesheta. Ñeñto'marña ñerra'm eñosetpa' añach serrpare'tyenet ñeñt' patso'marecpa. Ñeñto'marña ñetpa' patso'marneshach e'mñotenahuet. ⁶ Yaña po'ñoçhpa' Yomporena'tarey. Ñeñt' po'ñoçh eñotene' Yompor,

ñetñapa' e'ñech cohuen e'mñotenyet ya. Ñeñña ama Yomporena'tareyaye, ñetñapa' amach e'mñotenyeto. Yapa' alloña yeñotenña coṭapñats ñeñ po'ñoç huetsa Yomporeshoṭ attoña yeñotenña ñaña coṭapñats ñeñ shequëñets.

Atto Yomporpa' ña atarr amorrentañtetsa

⁷ Masheñeshacha' ñaña noçhaneshacha' amueranna'tpahuepa'ch allohueney tarro'mar ñeñtpa' Yomporeshoṭ huena. Allohuen amorrentñapa' ñetpa' o' eñalletteret Yomporoṭ, po'ñoçh o' eñoteret ñeñ atet pena Yompor. ⁸ Ñeñña ama amorrentñopa' ñocpuetpa' ama eñoteñetoña atet penaña Yompor, tarro'mar Yompor ñapa' ña atarr amorrentañtetsa. ⁹ Añpa' Yompor orrtate' yocop allochñapa' yapa' o'ch yeñoter Yomporpa' atarr morrentenya. Attoña mueñan Puechemer arr patsro ñeñ po'paṭror pen attochña yapa' corretsayach e'ñe ñeshoṭ. ¹⁰ Arrpa' all orrtatonay Yompor ñeñ e'ñe po'ñoçh morrenteñets: Allempo ya ama't mameshapa' ama yemorrentpeño Yompor, ñaña' allempoteñ atarr morrentenya ya. Ñeñto'marña ñapa' mueñonay Puechemer ñeñtcha' yetsa'terroya yo'chñar.

¹¹ Ñeñto'mar masheñeshacha' atto Yomporpa' atarr nanac morrentenya, yapa'cho'ña e'ñepa'chña yemorrentanna'tuena allohueney. ¹² Yomporpa' ama esesha' puentare. Tarraña ñerra'm e'ñe yemorrentannena allohueney, po'ñoçhpa' e'ñe yeparrocmaten epay Yompor. Ña puemorrenteña e'ñech chorrenya poctacma. ¹³ Ña atto apuerrey e'ñe ña Puecamquëñ ñeñña yeñotatene'ña yapa' e'ñe yeparrocmaten epay Yompor. ¹⁴ Ñaña yapa' e'ñe yentuoñe't Yompor Puechemer ñeñto'marña ya te'pa' o' ya'poṭonas samña atto Yompor po'ñoçhpa' mueñonay Puechemer ñeñtcha' ya'queshpaterre' ya ñeñfey yeçha'yetsa añ patsro. ¹⁵ Ñeñt ame'ñenaya Jesús ñapa' po'ñoçh e'ñe Yomporo Puechemer, ñetñapa' e'ñe parrocmatenet epuet Yompor.

¹⁶ Attoña ya te'pa' e'ñe yeñoteñ ñaña yame'ñeña atto Yomporpa' atarr morrentenya. Yompor ñapa' ña atarr amorrentañtetsa. Ñerra'm e'ñe po'ñoçh yemorrentannena po'ñoçhpa' o' yeparrocmaterr epay Yompor. ¹⁷ Attoña yapa' e'ñech cohuen yemorrenteña Yompor e'ñe poctacma, allochñapa' yapa' amach yemcha'ñañoṭayaya yeyemtero Yompor ñerra'm esempohuañen eñotatyesserrey e'ñe errotencha' entyesserrey. Tarro'mar e'ñe atet pena Jesucristo, yapa'cho'ña e'ñech atet yepena yaña arr patsro. ¹⁸ Ñerra'm po'ñoçh yemorrenteña Yomporpa' amachña cha yemcha'teñe. Tarro'mar atto e'ñe poctacma cohuen yemorrentannena epay Yompor, ñeñña po'ñoçh yehua-pore'tañpene'ña yemchañ. Ñerra'm esempo cha es yemcha'tenpa' attoña e'ñe yañeña coñchatetsa. Ñaña ñerra'm orameñ yemcha'ten amaca'ye e'ñe yeyçhena'ña attoch e'ñe cohuen yemorrentannena e'ñe poctacma.

¹⁹ Yomporpa' o' e'ñe morrenterrya yanom, ñeñto'marña yapa'cho'ña te'pa' o'ch e'ñe yemorrentera yaña. ²⁰ Ñerra'm esesha' otets, ñapa'cho'ña e'ño' cohuen morrentenana Yompor, tarraña ñerra'm cha e'moñe'tyenana pamo'ts, ñeñña atet otetspa' ataca'ye shequëñ. Atto ama morrentenano pamo'ts ama't ñeñtpa' e'ñe enteñ, amach errotenoṭ morrentanoña ñaña Yomporña' tarro'mar ñeñtpa' amaca'ye çoye' enteñe. ²¹ Yompor po'ñoñ ñeñt yotene': Ñerra'm po'ñoçh yemorrenteña Yompor, yamo'tspa'cho'ña e'ñepa'chña cohuen yemorrentenanet.

5

E'ñe yeyemteñoṭ Cristo çhocmach pomnaren yepen allohuen ñeñt ama pocteye' enteno Yompor arr patsro

1 Allohueney erra'tseneycha' ame'ñerraya Jesús pa' ña Cristotats ñeñteyña yapa' o' e'ñe puechemer perrey Yompor. Ñehua, yeñoteñ arr patsro ñerra'm yemorrenteña puesheñarr acheñ ñeñt' achemerasha, puechemerasha'ña e'ñe yemorrentuena. 2 Ñeñto'marña yeñoteñ ñaña ñerra'm esempo yemorrenteña Yompor ñaña yame'ñerrñaña po'ñoñ atet' oteneý, añe'ñaña e'ñe yemorrentuena ñeñt' puechemerasha' pen Yompor. 3 Atto yemorrenteña Yompor choc yame'ñerrñaña po'ñoñ ñeñt' atet' oteneý. O'ch e'ñe yepena ñeñt' atet' oteneý, ñeñtpa' ama torrapahuoyaye. 4 Tarro'mar allohueney ñeñtey puechemer pen Yompor, yañapa' e'ñe yeyemteñoñ Jesús chocma pomnaren yepen allohuen ñeñt' ama pocteye' entyeno Yompor arr patsro. 5 Allohuen ñeñt' ame'ñenaya Jesús ñapa' Yomporo' Puechemer, ñetña e'ñe ñap'tet pomnaren penetña allohuen ñeñt' ama pocteye' entyeno Yompor arr patsro.

Allpon ñeñt' yeñotaterre' Jesucristopa' e'ñe po'ñoçh Yomporeshot huapa

6 Ñeñta Jesucristo allempo huapa arr patsro eñall ñeñt' yeñotaterre'ña ñapa' e'ñe po'ñoçh Yomporeshot huapa. Ñeñt' ñanompa' allempo atto apatareta Yomporecop oño. Tarraña ama e'ñe ñap'ta oña yeñotataye ñapa' e'ñe po'ñoçh Yompor Puechemer. Po'rraso'ñaña yeñotate'ña allempo acorso'tam'psaretterra; ñapa' e'ñe po'ñoçh Yompor Puechemer. Ñaña Parets Puecamquëñ ñeñtpa'cho'ña ña yeñotaterre'ña Jesús pa' e'ñe po'ñoçh Yompor Puechemer tarro'mar Parets Puecamquëñpa' erroten es eñotateney ñeñtpa' e'ñe po'ñoçh atet'. 7 Ñaña eñall ma'pa ñeñt' pue'ntaño'tsen ñeñtña yeñotateneyña ya. Ñeñtpa' Yompor Parets ñaña po'ñoñ ñaña Puecamquëñ. Ñetpa' ama't ma'po'maret e'ñe patrra atet' petsa. 8 Ñaña arr patsro eñall ma'pa ñeñtña yeñotateney Jesús pa' ña po'ñoçh Yompor Puechemer. Ñeñtpa' Parets Puecamquëñ, allotpa' oñ allempo apatareta Yomporecop allotpa' ñaña po'rras atto acorso'tam'psaretterra. Ñetpa' ama't ma'po'maret eñotatenet, e'ñe patrra eñotateney ñeñt' Jesús ñapa' e'ñe po'ñoçh Yomporo' Puechemer. 9 Ñehua, arr patsro chocma e'ñe pocte' yenteñ ñeñt' atet' eñotateney acheñ tarro'mar ñeñtpa' chocma sherbeney. Ñaña ñeñt' atet' eñotateney Yompor elloña ñeñtpa' atarr nanac sherbeney. Tarro'mar ñeñtpa' e'ñe ña Puechemerecop eñotateney Jesús pa' Yomporo' Puechemer. 10 Ñerra'm esesha'ch ame'ñerraya Yompor Puechemer, ñeñtña' echer-rancha' e'ñe ña pueyoçhro ñeñt'cha' eñotaterre' e'ñe pocte' o'ch e'ñe yemterrana Jesucristo ñeñt' e'ñe po'ñoçh Yompor Puechemer. Ñeñtña ama ame'ñenayo Yomporpa' cha ottatateñ ñerra'mrate' ñapa' atarr ashcañ tarro'mar ñeñt' acheñerpa' ama ame'ñenano Yompor ñeñt' atet' eñotateney Puechemerecop. 11 Yomporpa' atet' eñotateney atto yapa' apuey Puechemer, e'ñe ñeshoña yapa' corretsayach yocsheñeshocmañen tayoteñ e'ñe errponañohuen. 12 Ñeñtña aguërre' Yompor Puechemer añe'ñaña o' aguërret attochña ñetpa' corretsetach tayoteñ e'ñe errponañohuen. Añña ñeñt' ama aguërraye Yompor Puechemer, ñetña' amach esesha' aguërraye alloch correrret.

All pa'namen cotape' chatnerranet e'ñe allohuanen allempo so'tnerranet po'cartot

13 Ñeñt' allpon o' nequellconas sa ñeñtes ame'ñenaya Yompor Puechemer, sapa' ñeñt'cha'ña señotaterre' po'ñoçh sapa' corretsasach socsheñeshocmañen e'ñe tayoteñ er- rponañohuen.

14 Yapa' e'ñe yeyemteñoñ Yompor ñeñto'marña yeñoteñ es yenam' ñeñt' pocte' enten ña, yapa' chocmach e'mñoteney. 15 Ñaña atto yeñoteñ ñapa' chocma e'mñoteney ñerra'm es yenam' ñeñto'marña yeñoteñ e'ñe allorocma o' yo'patatareta ñerra'm escha' yenamueñ.

16 Ñerra'm eseshascha' eñote' samo'ts ñeñt' atet' pene' ñeñt' ama pocteye' enteno Yompor, ñeñtña po'chñarpa' ñerra'm ama añecpayaye alloch rromuerr attoch chen-quërta e'ñe poctacma, sañapa' añcha' senamoñ Yompor attoch ñach a'crraterre' e'ñe

puecamquëñoť. Yomporpa' o'ch a'crrater ñerra'm po'chñarpa' ama añecpayaye alloch rromuerr attoch chenquërra e'ñe poctacma. Po'ñoçhpa' eñall yo'chñar alloch yerromuerr attoch yeçhenquërra e'ñe poctacma. Ñeñto'marña napa' ama añecpaye' notenso sapa' çhocmach sema'yochampeña ñeñtcha' chenquërrtsa e'ñe ña paťpare'teñoť. ¹⁷Ñehua, yeñoteñ allohuen ñeñť ama pocteye' enteno Yompor ñeñťpa' ochña'teñets enteñ Yompor. Tarraña eñall ñaña ochñarets ñeñťpa' ama añeyaye ñeñť alloch yerromuerr attoch yeçhenquërra e'ñe poctacma. ¹⁸Yeñoteñ allohueney ñeñtey po'ñoçh eñalletertsa Yomporotpa' amach allo'na yeřa'nen ñeñť ochñarets enten Yompor. Tarro'mar Yompor Puechemerpa' çhocma cohuañpeney ñeñto'marña oneñeťpa' ama't e'ñe mameshapa' amach alla errot perrye'te.

¹⁹Te'ña yapa' yeñoteñ o' yeyomporena'tarterra ya. Po'potantañña acheñenesha' arr patsro ñeñť ama ame'ñetso, ñetñapa' aña yochresha'tenahuet oneñeť.

²⁰Yañapa' yeñoteñ ñeñť Puechemer pen Yomporpa' ñaña'pa' o' huapa. Ñaña yeçhapterre'ña yeyoçhro attochña yapa' o'ch yeñoter Yompor ñeñť e'ñe po'ñoçh Parets. Ñeñto'marña yeñoteñ o' yeparrocmaterr epay ñeñť e'ñe po'ñoçh Yompor Puechemer ñeñťpa' Jesucristo. Attoña yapa' o' e'ñe yeñoter Yompor ñeñť e'ñe po'ñoçh Parets, ñeñťña yapa' allochña e'ñe corretsayach yocsheñeshocmañen tayoteñ e'ñe errponañohuen.

²¹Te'ña nechemerneshacha' sapa' e'ñech señoťnoma, ñato'tña seyomporer sepeña'ña po'poñ ñeñť ama po'ñoçh Partsoyaye. Te'pa' ñeñťach notas, ñeñťpa' attetepa'ch Nom-pore. Allohua.

Juan

AÑ PUEPAÑ SAN JUAN PO' CARTA 2 SAN JUAN

Attoch cohuen yemorrentannena e'ñe po'ñoçh atet oteney Yompor po'ñoñ

¹ Napa' na ñeñten pompor pen allohuen ñeñt ame'ñenaya Yompor, te'pa' o'ch nequellconas añ carta. O'ch nequellconap̄ p̄a ñeñteḡ e'ñe noçhesha' nepeneḡ, p̄a ñeñteḡ o' acerrr Yompor. O'ch nequellconap̄ ñaña ora pechoyoreshohuen ñeñt e'ñe pachor pepene'. Napa' e'ñe po'ñoçh atarr nemorrentensa, ama e'ñe nap̄ta nemorrentenso, elloña po'potantañeçhno ñeñt o' enterran ñeñt e'ñe po'ñoçh Yompor po'ñoñ, ñetpa'çho'ña e'ñe morrentuenset. ² Tarro'marña sapa' atarr yemorrentensa atto yapa' o' e'ñe çherrnaya ya yeyoçhro ñeñt e'ñe po'ñoçh Yompor po'ñoñ. Ñeñtpa' allach e'ñe a'puena yeyoçhro errponañohuen. ³ E'ñe nehuom̄cha'teñoñes sa napa' o'ch notas: Yomporepa'ch sebensare'tañpene' ñeñtara Parets epuet Puechemer Jesucristo ñeñt Yepartseshar yepen. Ñetepa'chña semuerenaya attochña sapa' e'ñech cohuen socshena seyoçhro. Ñeñtpa' añecop attochña sapa' señoterrñañ ñeñt e'ñe po'ñoçh Yompor po'ñoñ attochña sapa' o'ch semorrentannerra e'ñe cohuen allohuenes.

⁴ Te'pa' o'ch notap̄, p̄a ñeñteḡ e'ñe noçhesha' nepeneḡ na atto nentennap̄ puesheña'tets ñeñt pechoyoresha' pepen, ñetpa' çhocma e'ñe cohuen cotape'cheññañet Yompor Parets po'ñoñ ñeñt e'ñe po'ñoçh atet oteney, napa' ñeñtña atarr nocshatene'. ⁵ O'ch noçheshacha' neyerpataḡa, allo'nepa'ch amorrentanna'tpo' sentannena allohuenes. Ñeñt atet noteneḡ arr nequellcotpa' ñeñtpa' ama añeyaye ñoñets ñeñt ama se'mare. Ama't allempoteñ e'ñe errte' same'ñerrapa' allempoteñ se'muerrña ñeñt ñoñets. ⁶ Ñerra'm yemneñ yemorrentanna'tapa' añcha'ña atet yeḡohuerra ñeñt atet oteney Yompor. Ñerra'm añ yemneñ o'ch e'ñe atet yeḡohuerra ñeñt atet oteney Yomporpa' çhochña e'ñe cohuen yemorrentannerra allohueney. Ñeñtpa' e'ñe ahuañoteñ atet serrpare'tatyesasete't.

Atet pena ashcañnesha' ñeñt çhocma e'moñe'tene' Cristo

⁷ Ñeñto'marña te'pa' atet notenes tarro'mar ñeñt shequene' acheñpa' o' epa'hua añ patsro. Shonte'ch ñeñtcha' shequene' acheñ, ñetpa' atet otyenet Jesucristo ama partsoye' acheñetostso. Ñeñt otets atetpa' ñeñtña po'ñoçh ashcaña ñeñtña e'moñe'tene' Cristo. ⁸ Sapa' e'ñech señoñta allochñapa' amach shecaso. Ñerra'm shecas allempopa' e'ñete' orrena setorrerra Yomporecop. Añcha'ña setorrrena attochña sapa' e'ñech sagaphuerr ora allpon ñeñt alloch tsa'tuerrsa ña.

⁹ Ñerra'm erra'tsencha' ama attecmaye' yeçhatatso ñeñt atet yeçhateney Cristo, ñerra'm çha a'po'poñeteññañ po'ñoñ, ñeñt atet petsapa' amach Yomporeye' yemteno. Añcha'ña erra'tseneyte' allo'na cotene' Cristo po'ñoñ yapa' e'ñe po'ñoçh yeyemteña Yompor Parets e'ñe Puechemere'na. ¹⁰ Ñerra'm esesha'ch huapatsa sesho ñapa' atetcha' otos ñapa'çho' año' yeçhaten Yompor po'ñoñ tarraña ñapa' ñerra'm ama atteye' yeçhateno atet yeçhaten Cristopa' ñehua, amach sagapatsche sepaçllo. Ama't sehuom̄cha'teñoñapa' amach sotatsche, "Yompore't p̄a'natenaya." ¹¹ Amach sehuom̄cha'tatsche tarro'mar ñerra'm sehuom̄cha'teñ, sapa' ñeñtate' seyçhaprech ñeñt ama po'ñoçhoyaye.

Atto so'terranet po'cartot

¹² Shontemeñ po'poñeçhno ñeñtcha' notaseñ tarraña ama nemno o'ch e'ñe notuas arr necartot. Tarro'mar napa' nesechena o'ch nemo'tensa' allempochña attoch yeserrpare't e'ñe parro, attochña e'ñech cohuen parro yocsherra.

¹³ Añ pemo'nerr puechoyoresha'pa' ñetpa' huom̃cha'tenpet ñamet arr necartoŕ. Ñetpa'cho'ña ñeñfet o' acerrranet Yompor. Te'pa' ñeñfach notas, Yomporepa'ch sa'nataya. Ñeñtpa' attetepa'ch Nompore. Allohua.

Juan

AÑ POMA'PAÑ SAN JUAN PO' CARTA 3 SAN JUAN

Atto Juanpa' eñotenan Gayopa' e'ñe cohuen ame'ñena

¹ O'ch masheñe Gayo nequellconapñ añ carta, napa' na ñeñfen pompor pen allohuen ñeñt ame'ñenaya Yompor. O'ch notapñ, napa' e'ñe po'ñoçh atarr nemuerenpa.

² Ñehua, masheñe çhocma nema'yochamñpenpa allochñapa' Yomporpa' e'ñech a'natenpa. E'ñepa'ch cohuen pehuomñchena, tarro'mar napa' neñoteneþ e'ñe pecamquẽñoþpa' e'ñe cohuen þoctape'chen Yomporecop. ³ O'ch notapñ, napa' atarr nocsha allempo huerra masheñnesha' peshot. Ñetpa' atet serrpare'tatuerrnet þapa' e'ño' po'ñoçh cohuen þame'ñena, e'ño' cohuen þoctape'cheññañ Yompor po'ñoñ ñeñt e'ñe po'ñoçh atet oteneý. ⁴ Allempo ne'mare'tas atto sapa' e'ñe cohuen soctape'chen ñeñt e'ñe po'ñoçh atet oteneý Yompor po'ñoñ, napa' ñeñtña atarr nocshatene'; ama eñalle po'poñ ñeñt atet atarr nocshatene'. Napa' e'ñe atet nentenes ñerra'mrrate' nechemeres ñeñto'marña napa' atarr nocshensa.

⁵ Ñehua, masheñe o'ch notapñ, þapa' e'ñe pocte' atet pepena ñeñt atto þaguẽñ e'ñe cohuen pepaclo masheñnesha' ñeñt huapyetsa po'poñ anetsoþ. ⁶ Ahuaña allempo yapçhena allohueney ñeñteý ame'ñetsa, ñetñaþa' atet serrpare'tatuerryet atto þapa' e'ñe cohuen pemuerapanet. Ñaña o'ch notapñ, çhocmach peyenpuenanet, þapanetcha' ñeñt palltenet attoch anerret Yompor po'ñoñ po'poñ anetso. Ñerra'm atet pepenapa' ñeñtþa' e'ñech pocte' enteneþ Yompor tarro'mar ñetpa' Yompor sherbenet. ⁷ Ñehua, ñetpa' o' ahuanmuet attoch serrpare'teññañeta' Jesucristo po'ñoñ tarraña ñetpa' ama mueneñeto o'ch es apapanet ñaña ñeñt ama ame'ñetso. ⁸ Ñeñto'marña yapa' e'ñe pocte' o'ch es yapapanet tarro'mar ñeñtþa' attoña yetorrapretenanetña Yompor po'ñoñ.

Atto Diótrefespa' ama't mameshapa' ama cohuenaye' entenano ñeñt ame'ñetsa

⁹ O'ch noterrperr po'poñ. O' nequellca'hua carta allohuenacop ñeñt apçhetsa all þa'netsro. O' notuanet ora allpon atet notuapñ arr necartot, tarraña Diótrefespa' çha achmãare'tey. Ñapa' e'ñe pommo'cheñoþ e'ñe ñañañapa' aña muenen o'ch pomnaren þa'yenan acheñenesha' ñeñt o' ame'ñerrana Yompor, ñeñto'marña ama e'mñoteny. ¹⁰ Ñeñto'marña esempoch nechap peshopa' o'ch neyperpatosanet ñeñt atet pena Diótrefes. Ñapa' çhocma toma'tamñpeney attach eñosatse'tyen yocop. Ama ñeñtayaya atet peno, elloña ama aguẽnana masheñneshaçhno ñeñt anene' Yompor po'ñoñ. Ama aguẽnaneto ñaña ama muenatenano acheñenesha' o'ch aguẽnet ñamet masheñneshaçhno. Ñerra'm esesha'ña aguẽnahuetpa' ñañaþa' o'chçho' muevo'terranet arroþ all sapçhena.

¹¹ Ñehua, masheñe þapa' amach peýçhapretatsto ñeñt atet pentapreten ñeñt ama pocteyaye. Papa' añcha'ña peýçha' ñeñt pentapreten atto e'ñe pocte' es þa'yenet. Ñeñto'marña atet noteneþ tarro'mar erra'tsen ñeñt e'ñe pocte' es petspa' ñeñtca'yeña Yompor pueyochresha'; ñeñtña ama pocteye' es þa'yetso ñeñtña ama't mameshapa' ama eñotenanoña Yompor.

Atto e'ñe cohuen orrtaten Demetrio

¹² Ñehua, o'ch notapñ ñaña po'psheññecop ñeñtþa' añ pa'so'cheñ Demetrio. Ñaña po'ñoçhpa' e'ñe cohuen enteñ allohuen acheñenesha'. Ñapa' e'ñe atet pena atet oten Yompor po'ñoñ ñeñt e'ñe po'ñoçh cohuen. Ñeñto'marña yapa'çho'ña yeñoteñ ñapa' e'ñe

cohuen acheñer. Ñehua, p̄apa' e'ñe peñoteney ñerra'm erroten yoten, ñeñtpa' e'ñech po'ñoçh atet.

¹³ Shontemeñ ñeñtcha' notapeñpa' tarraña amach e'ñe notuape añ necartot.

¹⁴ Tarro'mar napa' atarr nemneñ ahuenepoña neçhap pesho. Ñerra'm esempoch neçhappa' allempochña e'ñe yeserrpare'tatanna'ta parro.

¹⁵ Ñeñt arro'tsa'yen masheñnesha' ñetpa'çho'ña huom̄cha'tenpet ñeñtara añ necartot. Pañapa' o'ch pehuom̄cha'tyesanet e'ñe puesheña'ttsoçma masheñnesha' ñeñt parro'tsenep̄. Te'pa' ñeñtach notaḡ masheñe, Yomporepa'chña p̄a'natenaya. Allohua.

Juan

AÑ SAN JUDAS PO' CARTA SAN JUDAS

Atto Judaspa' quellcan carta allohuenacop ñeñt pueyochresha' pen Yompor

¹ Masheñneshacha' ñaña nochaneshacha', allohuenes ñeñtes o' hua'ñerres Yompor Parets attoch pueyochresha' perres, ñeñtes o' sa'cohuentatare'tterra Partsocop, ñeñtes e'ñe cohuañpen Yompor e'ñe separrocmateño't Jesucristo. Ñeñto'marña napa' nequellquennas añ carta na Judason ñeñten torretsa Jesucristocop. ² E'ñe nehuomñcha'teño'tes sa napa' o'ch notas: Yomporepa'chña semuerenaya, ñaña nanquëpa'chña morrentensa, nanquëpa'chña coshatenes seyochro.

*Ñeñt ashcañtetsa amach Yomporeye' po'ñoñ serrpare'teno
(2Pe. 2.1-17)*

³ Te'pa' o'ch notas, masheñneshacha' ñaña nochaneshacha' napa' atarr nemneñ o'te' nequellconas attoch neñotatas ñeñt e'ñe errotenotcha'ña a'queshpatare'tey e'ñe allohueney ñeñtey ame'ñenaya Jesucristo. Tarraña te'pa' añ nenten ñeñt atarr palltetsa o'ch notas, nanquëpa'ch sema'yochra añ ñeñt atto yame'ñena attochña e'ñech cohuen semoñena, attoch amach semnateñe ama't puesheñarra o'ch a'po'poñetonaset ñeñt atet yame'ñena Jesucristo. ⁴ Añecopña notenes tarro'mar chocma orretyena acheñenesha' ñeñt ashcañtetsa ñeñt ama Yomporeye' po'ñoñ cotape'cheneto. Ñet puehquëño'tespa' ñato'rraña chate' a'po'poñeternayet ñeñt atto po'ñoñ yame'ñerrñaña Yompor po'ñoñ. Ñetpa' atetcha' otyeset, e'ñeca'ye pocte' o'ch sosya'tsañechna yeychen tarro'mar Yomporpa' chocma peretnened, ñapa' atarr amueraña ñeñto'mar amach coñchaterrye. Ñetpa' po'ñoñ ama pamo'mtayeye' peñeto Yompor ñeñt ñapue't Yamo'mte' yepen ya. Ñaña ñetpa' ama po'partseshareye' peñetoña Jesucristo. Tarraña sapa' señoche'pa'ch e'ñe ahuatoteñ anuaretta ñeñt atet petsapa' ñeñtña o'patatenetña coñcheñets.

⁵ Ñehua, sapa' po'ñoñ e'ñe seño'teñ ñeñt atet pa' ahuat, tarraña te'pa' o'ch alla neyerpaterrsa atto Yomporpa' cha coñchatuerran ñeñt alla quechpuerre' ñeñt e'ñe atet oteney Yompor. Ñeñtpa' atet pa' allempo a'queshpaterran israelnesha' allempo erraneta' Egiptot' all atarr amurochtatare'ttete't. Tarraña ama't a'queshpaterranetañ allempo, elloña tsapatonetpa' o' alla a'cllatuerran allohuen ñeñt ama cohuenaye' ame'ñaye'te. E'ñech attecma perran allohuen ama't te' ñeñt ama ame'ñetso. ⁶ Te'pa' o'ch alla neyerpaterrsserr po'poñ ñeñt atet pa' ñaña patanta'tets mellaño'teñnesha'. Ñetpa' anaretetañ ñetcha' sherbenet Yompor, tarraña ama't atet anaretetañpa' ñetña ellopa' o' a'ypo'ña'nmuet pue'ntañ e'ñe patpare'teño'tet Yompor. Ñeñto'marña Yomporpa' alla huancanet cadeno ñeñt ama apyapahuoyaye ama't errponaña alla huapore'tanet nanac checmeto. Ñetña'pa' alletach tarrempohua esempoch mellapoterra allempochña mueñerranet ñaña coñcha'puetso. ⁷ Te'pa' o'ch alla neyerpaterrsserr ñaña ñeñt atet pe't sodomo'marnesha' ñaña gomorro'marnesha' ñaña allohuen ñeñt allampaño'marnesha' all. Ñetpa' e'ñe atet pete't atet pa' patantarr mellaño'teñnesha' atto nanac ye'chcatenet ñeñt nanac sosey enten Yompor. Cañoresha'tyenet nanac ama't yacmapa' agapannena e'ñe parro yacmacma, ñeñtpa' amaca'ye atteye' anareteye. Ñeñto'marña Yompor allpa' attoña coñchatanet o' etomanñpsanet attoch e'ñe a'poyatatuerranet tso' ñeñt ama emaya'pahuoyaye. Ñeñto'marña yeño'teñ allohueney eñall coñcheñets ñeñt ama ahuañaño.

⁸ E'ñe attecma patse'tyena ñaña ashcañnesha' ñeñt orretyetsa te'. Ñaña ñetpa' po'poñonña es cotape'chyenet ñeñt ama po'ñoñ atteyaye. Attoña ñetpa' a'sosyatenet

po'chets e'ñe ñañeñeta. Ñeñto'marña ama't Yepartsesharpa' ama añcha'na'tpahuoye' enteñeto, atfoña ama't ñaña allohuen ñeñt' ahuamencatetyetsapa'cho'ña e'ñe achmāre'tueñet. ⁹ Tarraña ama achmāre'tpahuoyaye ama't Yepartseshar ama't ñaña allohuen ñeñt' ahuamencatetyetsa. Ñehua, ama't Miguel ñeñt' pa'mcha'tareter pen mellañoñeñnanesha' ñapa' ama achmāre'tapanoña oneñeñt'. Allempo rroma Moisés oneñeñt'ñapa' huapa, ñapa' añ atarr mueneñ o'ch enana' arromñañ, tarraña Miguelñapa' ama muenache o'ch aner. Ama't muene' es otnare'tanna'tetañpa' Miguelñapa' amaca'ye achmāre'tanoña oneñeñt'. Ñeñtpa' atfa och: "Ñehua, ñeñt' atet pepena te' Yomporpa' ñach potteñe'che'." ¹⁰ Tarraña ñeñt'ña ashcañnesha' ñeñt' orreyetsa te'pa' ñetñapa' chocma achmāre'teñet ama't ñeñt' atarr ahuamencatesha' tarro'mar ñetpa' ama eñoteññañeto po'huamenc. Añach e'ñe paterr eñotenet ñeñt' e'ñe patso'marecpa. Ñetpa' e'ñe atet penet ñerra'mrrate' berr ñeñt' añach pa'yen ñeñt' atet muenatyenanet po'chets, ama es cotape'chpenayeña o'ch eñotet erra'tsente'ña ñeñt' po'ñoñ cohuentetsa. Ñeñto'marña ñetpa' a'chencataterretcha' e'ñe ñañeñeta.

¹¹ Atarr yoroçheno'tsa'yenet tarro'mar ñetpa' ama morrenteñeto pamo'ts, e'ñe atet penet ñerra'mrrate' atet pe't Caín allempo muetsan pa'mo'nasheñ Abel. Attoch aparettet quelle, ñetpa' añach cotape'chenet o'ch shecare'teñet acheñenesha' atet pe't Balaam. Ñeñto'marña ñetpa' chenquërretcha' tarro'mar e'ñe atet penet ñeñt' atet pe't Coré ñeñt' amtsarettatsa ahuañ e'ñe ña patpare'teñoñ. ¹² Ñeñt'ña ashcañnesha'pa' sapa' ñeñt'ña sepercna'ntatene' allempo sapçhena o'ch serratallme'channena ñeñtes ame'ñenaya Yompor. Sapa' serratallme'channena e'ñe semorrentanna'teñoñ, tarraña ñetpa' attach nanac rratse'tyenet amach ayetñañteneto amach cohua'peñetoña ñaña po'psheñeñ ñeñt' cheporretsa ñeñt' muenets o'ch rra' ñaña. Ñetpa' e'ñe atet penetañ ñerra'mrrate' ñeñt' cohuanpenayeñ carrnero ñeñt'cha' rratenayeñ tarraña amachña carrneroye'ña rrateno, ñeñt'apa' ñañeñetach atarr rretset. Ñetpa' ama es sherbeneto e'ñe atfa penet atet ñerra'mrrate' os ñeñt' ama huatetso attach matateñ mōrr. Ñaña e'ñe attet ñerra'mrrate' narmetsoch ñeñt' ama ame'tño, ama'tcha' çhen pueme'teñporopa' amach me'teno. Ñaña ñeñt'ña narmetsocherpa' e'ñech atet pena ñerra'mrrate' rromuech o'ch ya'mare ora puerçhohuenpa' o'ch e'ñe puetsohua o'ch huañ. Ñeñt'ña ama't mameshapa' amach es sherberrye. ¹³ Amach pueñmañeshofoye' es orrtatyenet e'ñech pommo'cheñoñeta es orrtatyenet. E'ñe atet penet ñerra'mrrate' oñ apellche' puemo'yer. Ama't mameshapa' amach muechecheno. Ñeñt'ña emo'ypa' çhach huapore'tenan sosyare' topña'so all pa'so'ten. Ñeñt'pa' e'ñe atet penaña ashcañnesha' amach pasayaya orrtatenetoña apencoçhen. Ñetpa' e'ñe attet ñerra'mrrate' shepramño' ñeñt' yenten o'ch shora'nom o'ch ahua' patso ñeñt'pa' ama es sherbeno. Yomporpa' o'patenanet o'ch mueñanet coñcha'puetso all atarr nanac checmete', allotña ñetpa' amach çha'nerreto ama't errponaña.

¹⁴ Ñaña te'pa' o'ch notas, ahua'tpa' eñall puesheñarr yacma añ pa'so'cheñ Enoc ñeñt' Adán po'mreñeñ po'cançhrroñohua. Ñaña'pa' ñeñt' a'mtaye't Yompor po'ñoñ. Ñapa' eñotatan acheñenesha' atetcha' a'paretterra ama't ñeñt' ashcañnesha'. Nōcpueta'ñaña atet ote't: "Huerrach Partsesha' e'ñe pueyochresha'chnohuen ñeñt' nanac po'nnacaren patsopueñ. ¹⁵ Huerrach allochñapa' o'ch entuerran allohuen acheñenesha' ñato' cohuenette' ñato' amate' cohuenayayeto. Allohuen ñeñt'cha' ama cohuenaye' entuerro Yompor, ñetñapa' amñare'tterretcha' coñcheñtso. Attochña tsa'tatuerrana allohuen ochñañenesha' ora allpon patse'tyesete't ñeñt' ama pocteye' enteno Yompor Parets ama't mamesha. Ñaña atetcha' tsa'tatuerranet ora allpon atto sasare'chete't Yompor e'ñe pachmāre'teñoñet." Arrpa' allohua huañ ñeñt' atet eñose't Enoc ahuañ. ¹⁶ Ñaña ñeñt' ashcañnesha'pa' atarrcha' ñanmare'tyeñet, çhach po'poñ entuenet. Añach cotape'chyenet

ñeñt muena'yenet e'ñe ñocpueta. Cho'nate' ñetpa' atarrcha' ommoñatet. Ñaña ñerra'm esempo e'ñe cohuen eñosenet acheñeneshacop, ñetpa' añecpach e'ñe cohuen eñosenet attoch es apuenanet acheñenesha'.

Atto pa'namen cotape'chatenan allohuen ñeñt ame'ñetsa

¹⁷ Tarraña sa masheñeshacha' ñaña nochaneshacha' amachña ñeñta same'ñatsto. Sapa' añcha'ña seyerpa ñeñt atet otyese't Yepartseshar Jesucristo puellsensarnesha'. Ñetpa' ahuatoteñ atet otete't ñeñtcha' orretyerrtsa tsapañonet. ¹⁸ Ñeñtpa' atet otyete't: "Allempoch mellapoterrmochapa' orrterrach ñeñtcha' achmāre'terre' Parets. Añach yeçhenet ñeñt muenatse'tyenet ñañeñeta, ñeñtpa' ama't mameshapa' ama cohuenaye' enteñe Parets." ¹⁹ Ñeñt ashcañnesha'pa' çhocmach mueneñet o'ch ellopa'tetstateret ñeñt ame'ñenaya Yompor. Ñeñtara ashcañnesha'pa' añach cotape'chenet ñeñt atet muenatenanet ñet po'chets; ñetpa' ama chorrenaneto Parets Puecamquëñ.

²⁰ Tarraña sa masheñeshacha' ñaña nochaneshacha' e'ñe nemuereñoñespa' o'ch notas, amach seyçhatstaneto ñeñt atet penet ñet. Sapa' e'ñechña same'ñeñoñ Yompor huomenquëpa'ch sepa' seyoçher tarro'mar ñeñt same'ñena sapa' e'ñeca'ye Partse-shoçecma huena. Chocmach sema'yochena. Sapa' amach sotaye' se'ñoreno allempo sema'yochena. Añcha'ña se'ñoratene' Parets Puecamquëñ ñeñt atarr ahuañmencatesha'. ²¹ Atetcha' sepaña sa allochñapa' çhocmach señoñeñ atto atarr morrentenya Yompor, amach sepurratsterro. Socsheñesha'pa' çhocmach seyemteña Yepartseshar Jesucristo; ña e'ñe pueñuereñoñey esempohuañen a'queshpaterreycha', attochña yañapa' corretsayach yocsheñeshocmañen errponañohuen.

²² Ñehua, o'ch notas ñaña atetcha' sepe' po'potantañeçhno. Patanta'tets acheñpa' atarr echarr enteñet o'ch ame'ñerrñañet Yompor po'ñoñ. Ñetpa' çhoc soçtape'chaterranet e'ñe cohuen attoch ame'ñerret ñeñt e'ñe po'ñoçh Yompor po'ñoñ, ²³ atarr yoroçheno'tsenet po'chñarotet. Ñeñto'marña sapa' o'ch sa'queshpataerranet, ñeñtpa' e'ñech atet sepenanet ñerra'mrrate' chesha'toll ya'queshpaten o'ch yechter all poyapen pocoll. Po'potantañeçhno ñeñt yeçhene' atarr sosya'tsañeçhno, ñetpa' çhocña semuerenanet tarraña ama'tcha' semuerenanetañpa' amach socshapretatstanetoña ñeñt atet yeçhenet sosya'tsañ. Sapa' çhocña setsena'tapretanet ñeñt atet pa'yenet sosey, te't sa'naña a'shoratatenet.

E'ñe yame'ñeñoñ Yepartseshar Jesucristo aye'choçhtaterrapo'ch Yompor

²⁴⁻²⁵ Te'ña Yompor ñeñt e'ñe ñapue't partsotets, ñeñt allohuen es eñotyets, ñaña ñeñt Ya'queshpatañer yepen, ñañapa' atarr ahuañmencatesha', ñachña ahuañmencat sepene' allochñapa' amach alla seshora'nerro. Attochña sapa' çhapatuerrescha' e'ñe ñesho all atarr cohuentena ña. E'ñech socsheñeshocmañen seçhaçherr, amach eñalle ama't coñe'ta ñeñtcha' entapreterres ñeñt ama poçteye' enteno ña. Te'pa' e'ñe yame'ñeñoñ Yepartseshar Jesucristo aye'choçhtaterrapo'ch Yompor attoch e'ñe cohuen yecohuentaterrñañ. Chocmuepa'ch e'ñe ñapue't Yepartseshar yepeñ, çhocmuepa'ch añcha'tarettena e'ñe tayoteñ errponañohuen ñeñt atet pa' ahuatoteñ. Te'pa' ñeñtch notas, ñeñtpa' attetepa'ch Nompore. Allohua.

Judas

ATTO SAN JUANPA' EÑOTATER YOMPOR ÑEÑTCHA' ATET PERRTSA TSAPATONET EL APOCALIPSIS

Atto Yomporpa' gatyesan Puechemer Jesucristo

¹ Añ ñoñets ñeñtpa' atto Yomporpa' gatyenan Puechemer Jesucristo, allochñapa' ñachña eñotatyese' allohuen ñeñt torra'yetsa Yomporecop. Ñeñtcha' eñotatanetpa' ñeñtpa' ñeñtcha' ahuen atet perra ama't esempo. Atto eñotaten na, ñapa' ahuo't mueñon po'millañoñer, allochñapa' ñach negatyese' na ñeñten sochetsa Juan ñeñten torretsa ñocop, allochñapa' attoch eñoch ñaña allohuen ñeñt torra'yetsa Yomporecop. ² Tarro'mar napa' nach eñotatahuet allohuenet ñeñt e'ñe po'ñoñ ñeñt atet eñotatenen Yompor po'ñoñ ñaña ora ñeñt allpon eñotatenen Jesucristo ama't ñaña ñeñt ora allpon gatyennet.

³ Atarrcha' cosheñtso'tsen ñeñtcha' lleyatene' acheñenesha' añ ñoñets ñeñt huetsa Yomproshot ñeñt yeñotatene' ñeñtcha' atet perra esempo. Atarrcha' cosheñtso'tsa'yen ñaña allohuen ñeñtcha' e'mñotene' añ ñoñets ñaña e'ñech ayemuetpo' enteñet, ora allpon ñoñets ñeñt aquellcaret arr. Tarro'mar o' chapmoch allempoch etsotuerra añ ñoñets.

Atto Juanpa' quellcan cancherr ñeñt anetser all apcha'yena allohuen ñeñt ame'ñenaya Cristo

⁴⁻⁵ Napa' o'ch nequellconas carta allohuenacpas ñeñtes apcha'yetsa e'ñe same'ñeñoñ Yompor all ñeñt po'poñe'ttsocma anets ñeñt cancherr ñeñt Asio'tsa'yen. E'ñe nehuomñcha'teñoñespa' o'ch notas: Yomporepa'chña semueraya epuet ñaña Puecamquëñ epuet ñaña Puechemer ñeñt Jesucristo. Ñetepa'chña sebensare'tampane'. Añ ñeñtara Yompor ñeñt chocma eñall, ama't ahuatoteñ chocma eñall ñaña ñeñtara ñeñtcha' huerrtsa po'pocheño. Ñaña Puecamquëñ ñeñtpa' ñeñtara cancherr ñeñt sherba'yets e'ñe all po'conaño e'ñe po'poñe'ttsocma sherbenet. Ñaña ñeñtara Jesucristo ñeñt atarr ayemuetpo' yenten ñeñt ora allpon ñeñt eñotateney; ñaña ñeñtara Jesucristo ñeñt ñanom tanterrtsa puerromñoñ ñapa' amach alla rromuerre'te. Attoña pa'mñcha'tareter peñ allohuen ama't allohuen amñcha'tareteçhno aña patsro. Ya'ye'choçhtatoñepa'ch ñeñtara Jesucristo ñeñt atarr amorrentña, e'ñe ña puemorrenteñoñeypa' attoña rroma yocop allochñapa' attoch ashataretta po'rras e'ñe yocop allochñapa' attoch e'ñe e'shohuaretterra yo'chñar. ⁶ Ñaña ñapa' attoña e'ñe cohuen aguëney attochña ya'mñcha'tarettapretera attochña yesherbapreterrñañ Pompor ñeñt atarr Parets, attey ñerra'mrrate' ñeñt corne-shatets Partsocop. A'cohuentaterrapo'ch Jesucristo, amñcha'tarettepa'ch tayoteñ ama't errponohuañen. Ñeñtpa' attetepa'ch Yompore.

⁷ O'ch secueñ huerrach Cristo, oscha' a'suatamperre'. Ama't allohuen acheñenesha'pa' entuapueretcha' e'ñe pa'clloyotet. Ama't ñeñt pata'te'pa' entuapueretcha' ñamet. Allempoña ñeñt shonte' pa'namen acheñenesha' ñeñt yeçha'yetsa arr patsropa' ya'na'tapueretcha' e'ñe puellquëñoñet. Ñeñtpa' e'ñech atet perra.

⁸ Yompor ñeñt nanac Parets ñeñt Yepartseshar yepen ñapa' chocma eñall, ama't ahuatoteñ chocma eñall, ñeñtpa' ñeñtara ñeñtcha' huerrtsa po'pocheño. Ñapa' atetña ot: "Napa' e'ñe pa'motroteñ eñallen atten ñerra'mrrate' quellec A ñeñt pa'moter pen alfabeto. Allempoteñña napa' chocma eñallen esempohuañencha' huañerr ñeñt allpon eñall, napa' atten ñerra'mrrate' quellec Z ñeñt all puen alfabeto." Añpa' allohua ñeñt atet toma'ntatena Cristo.

Atto Cristopa' orrtana Juan e'ñe po'cohenteñoñ

⁹ Te' napa' ñeñten sochetsa Juan o'ch alla noterrser. Napa' ñeñten e'ñe semo'nasheñ sepohuenen sa. Napa' ñeñten semueroçhtapretenaya e'ñe yame'ñeñoñ Jesús. Ñaña e'ñe yeyemteñoñ ñapa' e'ñech acoṣa es ya'huanten esheccha' ya'mcha'tarettapretera. Ñehua, napa' o'ch neñotatas ñeñt atet nepena na arr. Ahuañmo'cha napa' e'ñe neserrpare'teñoñ Yompor po'ñoñ ñeñt atet eñotatenen Yepartseshar Jesucristo, añña ñeñt ne'moñe'tene'pa' o' huapore'tenneta' arr atarr allaṣar all rroçhpe'chañefollo ñeñt otenet Patmos. ¹⁰ Pamtarr allempo çhapa'muen añe yetro allempo çhocma yeyerpueña Yompor napa' neyerpueñoñ ñapa' e'ñe machayoṭa chorratna huomenc Yompor Puecamqueñ. Allempoñapa' machayoṭa ne'm ñoñets huapa necha'ñoñ. Atarr huomenc eñen atet ñerra'mrrate' poctor e'morrtetsa huomenc. Ñeñtpa' atet oten añ ñoñets:

¹¹ —Napa' ñeñten ñanom eñallen, allempoteñña napa' çhocma eñallen ama't esempohuañencha' huañerr ora allpon ñeñt eñall, napa' atten ñerra'mrrate' quelled A ñeñt ñanom huetsa alfabetoñ, arrohua all huañen alfabeto ñeñt yoten Z. Te' napa' o'ch notap ñeñt ora allpon ñeñtcha' negatyesaṣ añ poctetsa o'ch pequellca'yes pepaṣllo alloṭpa' o'ch pemñe all anetsoçhno ñeñt cançherr ñeñt apçha'yetsa all pa'namen anetso ñeñt ame'ñetsa. Ñeñt ñanom añ pa'so'cheñ Efeso, alloṭpa' Esmirna, alloṭpa' Pérgamo, alloṭpa' Tiatira, ñaña Sardis, ñaña Filadelfia, alloṭpa' ñaña Laodicea. Ora añeçhno anetspa' ñeñt Asio'tsen.

¹² Allempoña ne'muen atet ñoñetspa' nañapa' neptallsa o'ch neñch esesha'te' ne'ñorana'tenaya. Allñapa' nent cançherr ñeñt all orratenet huerare allo çhoyo'tenet ñeñtpa' oro ayeçhcataret. ¹³ E'ñe rroçho ñeñt cançherr all orratenet huerare all orrtena puesheñarr yacma ñeñtpa' Jesucristo ñeñtara Ñeñt Acheñetosets. Ashtamaṭ, pa'shtampa' e'ñe çhen pa'tcohua. Achanaret, po'chanarpa' orotommuen ñeñt allo chanena puesomapo. ¹⁴ Poñoñ pue'chpa' e'ñe ora atarr huallama't atet ñerra'mrrate' carrnero pue'ch ñeñt e'ñe huallama't. Amapa' o'ch not pue'chpa' e'ñe ora huallama't atet ñerra'm senet ñeñt otenet nieve ñeñt atarr huallama't. Pa'cille'pa' atarr poptena atet ñerra'mrrate' tso' po'huorter nanac a'rrechatañ. ¹⁵ Pa'tacpa'çho'ña attecma poptena atet ñerra'm aser yachamuen. Allempo eñorena e'ñe atet e'morrtena po'ñoñ atet ñerra'mrrate' shonte' oñ atarr huomenc ma'moreten. ¹⁶ Pot po'cohuenroṭpa' orrenan cançherr ranto. Puenamoṭpa'çho'ña all orrtena cochell ñeñt emoshenito'mar etsotañtaref. Ora pa'tsa'poṭ e'ñe atet poptena ñerra'mrrate' atsne' atarr huomenc a'rrechatañ.

¹⁷ Allempo neñchpa' e'ñe nemçha'na'teñoṭpa' nañapa' o' nerrmosa patso e'ñe pa'tco. Neyorñoṭpa' ama nepelleno ama't mamesha, çha nottena ñerra'mrrate' çho nerromuen. Tarraña ña potot po'cohuenroṭ a'ṣlla'n, oten:

—Amach pemçha'tatsto, napa' ñeñten ñanom eñallen, allempoteñña napa' çhocma eñallen ama't esempohuañencha' huañerr ora allpon ñeñt eñall. ¹⁸ Napa' ñeñten ama arromñañeshayayno. Ama't nerromhua ahuaña tarraña te'pa' o' alla nocrrerra, amach alla nerromuerre'te ama't ahuata. Ñaña napa' nechen llave, ñeñt nehuamenc nepen alloch pomnaren nepen rromueñets ñaña ñeñtcha' aguërre' allohuen ñeñt rromuets. ¹⁹ Te' ṣocoppa' añ poctetsa o'ch pequellca'yes ora ñeñt allpon o' negatyeseṣ ñaña allpon ñeñtcha' negatyerrperr ñeñtcha' atet perrtsa esempohuañen. ²⁰ Ñehua, te'pa' o'ch neñotataṣ ñeñt atet toma'ntena añ cançherr ranto ñeñt penten e'ñe notoñ necohuenroṭ ñeñt ama eñotenaye' penteno. Ñeñt cançherr rantopa' añ toma'ntena ñeñt cohuañpesyenahuet ora allohuen ñeñt name'ña'yenaya allemeñ ñeñt cançherr anetso ñeñt apçha'yetsa all. Ñaña ñeñt atet pent ñeñt ayeçhcataret oroch all orratenet huerare, ñeñtpa' añ toma'ntena ora allpon ñeñt apçha'yetsa allemeñ anetso ñeñt cançherr ñeñt name'ña'yenaya.

2

Atto Juanpa' quellcan carta añecop ñeñĩ ame'ñetsa anetso Efeso

¹ Ñeñĩ neserrpare'tatene' ñapa' alla oterrner, ñapa' atet oten:

—An poctetsa o'ch pequellca' carta añecop ñeñĩ cohuanĩpene' allohuen ñeñĩ ame'ñetsa all anetso Efeso, o'ch p̄otanet atet: “Napa' o'ch nequellconas carta attoch neñotatas ñeñĩ atet otenes Jesucristo ñeñĩ orrene' cancherr ranto e'ñe all pota po'cohuenrot, ñeñĩara Cristo ñeñĩ chope'chets rrocho e'ñe allo'tsen ñeñĩ aye'chcataret oroch all orratenet huerare. ² Ñaña'apa' atet otenes: 'Napa' neñotuennas ñeñĩ ora allpon atet sepa'yena all. Napa' e'ñe nentuennas ñeñĩ allpon nanac setorra'yena ñaña allpon ñeñĩ e'ñe cohuen aco'pa es sa'huan'ta'huanen. Ñaña napa' e'ñe nentuenes sapa' ama sagu'ñe ñeñĩ ama cohuenaye' es pa'yetso. Sapa' atto setpatyeñ ñeñĩ otetseñ ñetpa' allsensareteto' tarraña ñetpa' atta shecare'tenet. Attoña setpateño' o' señotanet ñetpa' atta shecare'tenset. ³ Ñaña napa' neñotuenes ñeñĩ allpon semuero'chtana nocop ñaña atto e'ñe cohuen sa'huan'ta'huen muero'chteñets, ama semuenme'cheñe allo setorra. ⁴ Tarraña ama't atteñpa' nentuennas paterr ñeñĩ ama cohuenaye' nentapretenso. Ñeñĩpa' añ atto sapa' o'huañ e'ñe semorrentna ñeñĩ atet sepa' ahua't allempo e'ñe errete' same'ñerrna. ⁵ Te'pa' o'ch notas, o'ch seyerpuerra atto ahuañmo'cha nanac cohuen semorrentenna. Te'pa' ama atteye' sepeno. Añ pocte' o'ch alla soctape'cherr e'ñe cohuen attoch o'ch alla seperra cohuen ñeñĩ atet sepa' allempo e'ñe ñenmat' same'ñenna. Ñerra'm amach ello soctape'cherro cohuen napa' tayecma o'ch ahuen o'ch neprratamĩperres ñeñĩ atma'ntataret socop ñeñĩara ñeñĩ all orratenet huerare. ⁶ Tarraña ama't atteñpa' napa' añña e'ñe cohuen nentuennas atto sapa' ama pocteye' senteno ñeñĩ atet p̄atse'tyen acheñenesha' ñeñĩ cotene' Nicolás poctapña. Napa'cho'ña ama pocteye' nenteno ñeñĩ atet p̄atse'tyenet sosya'tsañ. ⁷ Ñeñĩ e'mñotene' añ ñoñetspa' chapanetepa'ch pueyo'chreto ñeñĩ atet neñotatenanet na Necamqu'ño', ora allohuen ñeñĩ pame'ñeño'fet chocma ap'cha'yenet allemeñ anetso'mar. Ñeñĩ metana'tue' allohuen pa'namen topateñtso'chno, ñeñĩ ama nepuerramĩperrayo, ñetñapa' naphuerranetcha' ñeñĩ no'patatenanet ñeñĩcha' atarr yoma'huerret e'ñe poctacma Nomporecho, allpa' e'ñech cosheñtso'tsenet. Ñeñĩña napa' o'ch not, napa' o'ch nemnaterranet attoch o'ch tsohmuerret añ tsach pue'mer alloch corra'huerret e'ñe poctacma amach alla rromuerrete'te ama't ahua'ta.' ” Arrpa' allohua huañ atet ot efeso'marneshacop.

Atto Juanpa' quellcan carta añecop ñeñĩ ame'ñetsa anetso Esmirno

⁸ Allempoña ñeñĩ neserrpare'tatene' ñapa' alla oterrner:

—Te'pa' o'ch pequellqu'errerr carta añecop ñeñĩ cohuanĩpene' ñeñĩ ame'ñetsa all anetso Esmirna, o'ch p̄otanet atet: “Napa' o'ch nequellconas carta attoch neñotatas ñeñĩ atet otenes Jesucristo ñeñĩ ñanom eñall, allempoteñña ñapa' chocma eñall ama't esempohuañencha' huañerr ora allpon ñeñĩ eñall. Jesucristo ñapa' ñeñĩ rromhuats tarraña te'pa' o' alla betterra. ⁹ Ña te'pa' atet otenes: 'Napa' neñotuennas ora allpon ñeñĩ atet sepa'yena. Neñotuennas ñaña atto atarr sa'muero'chtatarettena, ñaña atto atarr huocchañes. Ñehua, ama't huocchañsoñpa' Yomporecho' shonte' esocmañen ñeñĩ sechyen. Ñaña ñeñĩ se'moñe'tene' neñotuennas atto atarr sasare'tenset. Ama't otenetañ ñetpa' judionesheto' tarraña ñetpa' ama Yomporeye' pueyo'chresha' penahueto; ñetpa' añ pueyo'chresha' penahuet oneñeñ ama't allohuenet. ¹⁰ Amach yore'tatstaso muero'chteñets ñeñĩcha' ahuen sehuapoya. Tarro'mar ñeñĩcha' seyottamĩpse' patanta'ttsos, ñeñĩpa' oneñeñeshot huena añecopña attoch topatuas ñerra'm po'ño'chte' same'ñena. Puesheña'ttsos muero'chtatasetcha' e'ñe charramat. Ama'tcha' muetsasetpa' añ pocte' o'ch serromapes atto same'ñena. Allochña napa' naphuerrescha' ñeñĩ no'patatensa

alloch socrra'huerra e'ñe socsheñeshocmañen. Ñeñtpa' ñeñtara noten po'poñ ñoñtso naphuerrescha' sepremio ñeñtcha' socshatuerre' e'ñe poctacma. ¹¹ Ñeñt e'mñotene' añ ñoñetspa' çhapanetepa'ch pueyoçhreto ñeñt atet neñotatenanet na Necamquëñoñ ora allohuen ñeñt pame'ñeñoñet çhocma apçha'yenet allemeñ anetso'mar. Ñeñt metana'tue' allohuen pa'namen topateñtsoçhno, ñeñt ama nepuerramñperrayo, ñetpa' ama't puesheñarroñetapa' amach amñareñterreto coñcheñtso ama't ahuata. Ñetpa' amach alla rromuerreterro po'pocheño.' ” Arrpa' allohua huañ atet ot esmirno'marneshacop.

Atto Juanpa' quellcan carta añecop ñeñt ame'ñetsa anetso Pérgamo

¹² Allempoña ñeñt neserrpare'tatene' ñapa' alla oterrerr:

—Te'pa' o'ch pequellquërrerr carta añecop ñeñt cohuanñpene' ñeñt ame'ñetsa all anetso Pérgamo, o'ch pōtanet atet: “Napa' o'ch nequellconas carta attoch neñotatas ñeñt atet otenes Jesucristo ñeñt orrtatene' cochell puenamoñ, po'cchellpa' ñeñt emoshemto'mar etsotañtareñ. ¹³ Ñapa' te'pa' otenes: ‘Napa' neñotuennas ora allpon ñeñt atet sepa'yena. Napa' neñotenes all seyçhena ñeñtpa' all atarr amçha'noçhtena oneñet. Tarraña ama't atteñpa' sapa' ama sequeçhpueno atto same'ñenna, ñaña çhocma sa'meten atto same'ñenna, ama't e'ñe allempo muetsennanet ñeñt name'ñenaya ñeñtara Antipas ñeñt çhocma neserrpare'tene' neñoñ sesho, allara ñeñt pa'netser peñ oneñet. ¹⁴ Tarraña ama't atteñpa' napa' nentuenas coñe't ñeñt ama pocteye' nentapretenso ñeñt atet sepatse'tena. E'ñe all Pérgamo patanta'ttsos ama semno o'ch sequëçhpa' ñeñt pueyçhateñ pe't atet yeçhate't Balaam ahuat. Balaam ahuatpa' atet coñape'chatane't Balac attoch shecare'tane't israelena'tarnesha' allochñapa' attoch ñetpa' o'ch pātse'tyenet ñeñt ama pocteye' enteno Yompor. Ñeñt atet pātse'tyenet ñeñtpa' atet pete't o'ch rrallme'chapretan po'poñ acheñ ñeñt po'yomporer pene' ñeñt ayeçhcataret, ñerra'm esempo rrenet po'chets ñeñt muetsenet allo sherbeñet pueyëçhcatar. Elloña allempo ñetpa' e'ñe pocshapreteñoñetpa' o'ch agapanna'tet ama't ñeñt ama puetaporeyaye, allñapa' o'ch cañoresha'tenet. ¹⁵ E'ñe attecma seshopa'çho'ña patanta'ttsos atarr ashcaretes ñeñtes puesheña'ttsos ñeñtes ama semno o'ch sequeçhpoñ Nicolás poctapña ñeñt atet yeçhatenes ñeñt ama pocteye' nenteno. ¹⁶ Tarraña napa' o'ch notas, sequëçhpa' ñeñt añ coñapñatser, o'ch alla soctape'cherr e'ñe cohuen. Ñerra'm amach ello soctape'cherro cohuen, napa' e'ñe tayecma o'ch ahuen o'ch neçllarenaneta' nocchelot ñeñt nenamo'tsen. ¹⁷ Ñeñt e'mñotene' añ ñoñetspa' çhapanetepa'ch pueyoçhreto ñeñt atet neñotatenanet na Necamquëñoñ ora allohuen ñeñt pame'ñeñoñet çhocma apçha'yenet allemeñ anetso'mar. Ñeñt metana'tue' allohuen pa'namen topateñtsoçhno, ñeñt ama nepuerramñperrayo ñetñapa' napanetcha' maná ñeñtcha' pocrramñ perret ñeñt ama entpahuesho. Ñaña o'ch napanet mapyetoll ñeñt atarr huallamemen allo aquellcarettena so'chñets e'ñe etserra. Ñeñtcha' agapue' ñeñtpa' ñapña eñotenan añ so'chñets ñeñt aquellcare't all.' ” Arrpa' allohua huañ atet ot pérgamo'marneshacop.

Atto Juanpa' quellcan carta añecop ñeñt ame'ñetsa anetso Tiatiro

¹⁸ Allempoña añ ñeñt neserrpare'tatene' ñapa' alla oterrerr:

—Te'pa' o'ch pequellquërrerr carta ñaña añecop ñeñt cohuanñpene' ñeñt ame'ñetsa all anetso Tiatira, o'ch pōtanet atet: “Napa' o'ch nequellconas carta attoch neñotatas ñeñt atet otenes ñeñt Yompor Puechemer, ñeñtara ñeñt pa'cclle'pa' atarr a'rrechatañ atet ñerra'mrrate' tso' po'huorter, ñaña ñeñtara pa'tacpa' atarr poptena atet ñerra'm aser ñeñt bronze ñeñt atarr cohuen poptetsa. ¹⁹ Ñapa' te'pa' atet otenes: ‘Napa' neñotuennas ora allpon ñeñt atet cohuen sepa'yen, atto atarr semorrentannena ñaña atto atarr same'ñena, ñaña atto atarr seyennannena, ñaña atto e'ñe cohuen sa'huanta'huen ñeñt atarr echarr senten. Ñaña elloña allo'na sesen atet pa'nmue' ñeñt atarr cohuen enten

Yompor. ²⁰ Tarraña ama't atteñpa' eñall paterr ñeñt ama pocteye' nentapretenso. Ñeñtpa' atto sapa' semnateñ coyanesha' ñeñt sochetsa Jezabel atto ñapa' aña yeçhaten ñeñt ama cohuenaye' nenteno na. Ama't ñapa' oteneñ ño' a'mtene' Yompor po'ñoñ tarraña ama atteyaye, ñapa' atta shecare'tenes ñeñtes torretsañ nocop. Ñaña ñapa' aña yeçhatenes ñeñt atto secañoresha'ten, ñapa' otenes ñeñtpa' e'ñe pocte' enteñ Yompor. Ñaña aña yeçhatenes ñeñt atto serrapreten po'chets ñeñt muetsenet ayeçcataretocop, ñapa' otenes ñeñtpa'cho'ña e'ñe pocte' enteñ Yompor. Tarraña Yomporñapa' ama't mameshapa' ama pocteye' enteñe. ²¹ Napa' atta necueñ allponmat, noten ñato' o'ch cotape'cherran cohuen tarraña teme'ttsenpa' ama mueno o'ch cotape'cherran cohuen. Ñapa' aña atarr cohuen enten atto cañoresha'ten. ²² Ñeñto'mar te' napa' o'ch nemnach o'ch atsna'ten attoch amach çha'nerro po'mayoť. Ñaña ñeñt epuet atet penet ñerra'm ama cotape'cherreto cohuen attoch queçhpuenet ñeñt atet yeçhatenanet ña, ñetpa'cho'ña o'ch necoñchatanet nanac. ²³ Ama't ñaña puechoyoreshohuen napa' o'ch ne'nuerranet. Allochñapa' attoch allohuen ñeñt pame'ñeñotet apçha'yetsa allemeñ anetso o'ch eñochet ñeñt atetpa' ama aþapahuo. Napa' e'ñe nentuennas ama't ñeñt atet soctape'chen seyoçhro. Napa' ñeñtencha' saphuerre' allpon ñeñt poctetsa e'ñe puesheña'ttsocpas, ñeñt allpon atet seþa'yen. ²⁴ Tarraña po'potantañes ñeñtes tiatiro'marneshas sapa' ama socteññañe ñeñt atet yeçhaten coyanesha'. Ama't ñaña ñeñt otenet oneñeť poctaþña ñeñt ama eñotpahuoyaye, puesheña'ttsa e'ñe etsotene' — ñeñtpa'cho'ña sapa' ama seyçheñe. Ñeñto'mar te'pa' o'ch notas, napa' amach nenonaso po'poñ ñoñets ñeñt atarr echarr senten. ²⁵ Añña notenes, amach sequeçhpatsche ñeñt atto soctape'chen cohuen Yomporecop, ama't tayoteñ ñaña esempohuañen allempoch nohuerra. ²⁶⁻²⁷ Ñeñt metana'tue' allohuen pa'namen topateñtsoçhno, ñeñt ama nepuerranþerrayo, ñeñt allo'na sets þa'nmue' ñeñt pocte' nenten na, ñetpa' naphuerranetcha' attoch añcha'taret entenanet allohuen pa'namen acheñenesha' ñeñt yeçha'yetsa aña patsro. Ñeñtpa' atet Nompor apuenen ñaña. Neyoroçhenñoçh añcha'noçhtapreterrnetcha'. E'ñe po'huamencotet ñerra'm ñet muenats atarrcha' mueroçhtateret allohuen pa'namen acheñenesha' arr patsro. Ñeñtpa' o'ch netma'ntacha ñerra'mrrate' ñeñt echene' po'carr asreþ, ñerra'm allo aso'tet patsro'pa' çhach a'mllo'tstach e'ñe poctacma. ²⁸ Ñeñt metana'tue' allohuen pa'namen topateñtsoçhno elloña ñetpa' napanetcha' ranto ñeñt atarr ateshamerr. ²⁹ Ñeñt e'mñotene' añ ñoñetspa' çhapanetepa'ch pueyoçhreto ñeñt atet neñotatenanet na Necamquëñoť, ora allohuen ñeñt pame'ñeñotet çhocma apçha'yenet allemeñ anetso'mar.' ” Arrpa' allohua ñeñt atet ot tiatiro'marneshacop.

3

Atto Juanpa' quellcan carta añecop ñeñt ame'ñetsa anetso Sardiso

¹ Allempoña ñeñt neserrpare'tatene' ñapa' alla oterrner:

—Te'pa' o'ch pequellquërrerr carta añecop ñeñt cohuanþene' ñeñt ame'ñetsa all anetso Sardis, o'ch þotanet atet: “Napa' o'ch nequellconas carta attoch neñotatas ñeñt atet otenes Jesucristo ñeñt e'ñe chorratena Yompor Puecamquëñ cançherr ñeñtara cançherr ñeñt sherþa'yets. Ñetpa' po'poñe'ttsocma sherbenet. Ñaña ñeñtara Cristo ñeñt orrene' cançherr ranto. Ñapa' te'pa' atet otenes: ‘Napa' neñotuennas ora allpon ñeñt seþa'yen. Ñaña neñotuennas atto sa acheñenesha'pa' atet entensetañ ñerra'mrrate' e'ñe cohuen socrena Yomporecop. Tarraña ñeñtpa' ama atteye' sepeno çhaña sotena ñerra'mrrate' cho serromuen, amaña es sesherbenaña Yomporecop. ² Ama't atto same'ñenañ mame' tarraña ñeñtpa' allo'na sen huañuanmats. Napa' nentuenes ama

setsotenoña ñeñt e'ñe pocte' enten Nompör. Te'pa' o'ch notas, e'ñechña señoa, o'ch alla setanterra Yomporecop. ³ Chocmachña seyerpueña ñeñt atto aserrpare'tatare'es ahuaño'mo'choñ. Amach sepsatsche añ ñoñets ñeñt same'ñataya. Ñeño'marña te'pa' añ poctetsa o'ch alla soctape'cherr cohuen Yomporecop. Ñerra'm ama atteye' sepeno napa' machayotach nohuerrnasa atet ñerra'mrate' eñe'pa' amach señoñe esempopa' machayotach huaponasa. ⁴ Tarraña ama't atteña' all anetso Sardiso e'ñe puesheña'ttsaña ñeñt ama ye'chenaye sosya'tsañ ñeñt ama pocteye' enteno Yompör. Ñetpa' atet atma'ntatare'ttenet ama't pa'shtamuetpa' ama a'sosyateñeto. Ñeño'mar ñetpa' e'ñe pocte' nentenanet ñaña attochña nemnaterranet o'ch ye'chope'cherr e'ñe parro tarro'mar ñet ñeñt neshtamtatenanetpa' ama a'sosyateñeto, e'ñe cohuenarer orrtenet e'ñe huallama'tareret. ⁵ Ñeñt metana'tue' allohuen pa'namen topateñets ñeñt ama nepuerram'perrayo, ñetpa' neshtamtaterranet shetamuets ñeñt atarr huallama't. Ñetpa' amach ne'sherraneto pa'so'cheñ all aquellcare'ttenet Yompör po'libro attochña ñetpa' corretsetach. Ñetña'pa' nechme'taterranetcha' ñeñt na Nompör ñaña allohuen po'millaño'feñnaneshar. ⁶ Ñeñt e'mñotene' añ ñoñets çhapanetepa'ch pueyoçhreto ñeñt atet neñotatenanet na Necamquëño' ora allohuen ñeñt pame'ñeño'tet çhocma ap'cha'yenet allemeñ anetso'mar.' ” Arrpa' allohua ñeñt atet ot sardiso'marneshacop.

Atto Juanpa' quellcan carta añecop ñeñt ame'ñetsa anetso Filadelfio

⁷ Ñeñt neserrpare'tatene' ñapa' alla oterrerr:

—Te'pa' o'ch pequellquërrerr carta añecop ñeñt cohuañpene' ñeñt ame'ñetsa all anetso Filadelfia, o'ch potanet atet: “Napa' o'ch nequellconas carta attoch neñotatas ñeñt atet otenes Jesucristo ñeñt e'ñe Parets ñeñt e'ñe po'ño'ch allohuen es oten. Ñeñtara Cristo ñeñt allsensaret ñach am'cha'tare'ttertsa e'ñe atet am'cha'tare'tte't David. Ñato' o'ch netma'ntacha o'ch not ñapa' echenan David po'llave. Ama't erra'tsencha' o'ch toram'penanet attoch çhapanet Yompör po'cohuenña ama't eseshapa' amach erro'teno't alla epatare'terraneto. Ñaña ñerra'm ñach yottañperre' ama't eseshapa' amach erro'teno't toram'pereto. ⁸ Cristopa' te'pa' atet otenes sa: ‘Napa' e'ñe neñotuennas ñeñt atet cohuen es sepa'yen. Ama't ama tama ahuañencateso Yomporecop, tarraña ama't coñe'ta sehuamenc sepen çhocma same'ñennana neñoñ ñaña çhocma sa'meten atto same'ñenna ama sa'nasoteno. Ñeño'mar napa' o'ch netoram'psonas allcha' sa'potennan neñoñ, ñaña ama't eseshapa' amach erro'teno't alla yottañperrnaso. ⁹ Ñaña añña ñeñt otetseñ ñetpa' judioneshto' — ñehua, ñetpa' ama Yomporeye' pueyoçhresha' penahueto tarro'mar ñetpa' añ pueyoçhresha' penahuet oneñe't, ñetpa' atta shecare'tenset. Tarraña ñetña te'pa' o'ch name'ñatanet allochña'pa' o'ch çhapanet pueyoçhreto sapa' ñeñtes atarr nemorrentena. Ñeño'marña ñetpa' o'ch huapuet sesho o'ch concorposet allo'tsenes. ¹⁰ Sapa' e'ñe cohuen aco'pa setsoton allpon neñoñ, ama sa'ypo'ñenno na, ñeño'marña napa'cho'ña amach na'ypo'ñaso. O'ch necuañperres tarremphua allempoch mueroçhteñsopoterra ñeñtcha' topaterre' ora allohuen acheñenesha' ñeñt ye'cha'yetsa añe patsro. ¹¹ O'ch e'ñe mamerrerrpa' o'ch nohuerrnasa. Ñeñt atto allpon same'ñena o'ch e'ñe seño'tuanem amach sequeçhpatsche. Allochña'pa' ama't eseshapa' amach erro'teno't puerratañpsaso ñeñt no'patatensa ñeñtcha' atarr socshaterre'. ¹² Ñeñt metana'tue' allohuen pa'namen topateñtsoçhno ñeñt ama nepuerram'perrayo ñetpa' amate' erro'teno't ahua'pore'tare'tterreto allot, ñetpa' e'ñe atet ñerra'mrate' all orratenet pocoll ñeñt pa'paquëll pen Nompör ñeñt e'ñe huomenc echarr a'pare't. Ama't eseshapa' amate' erro'teno't huapore'che. Ñaña e'ñe ñesheto napa' o'ch nequellcoñ Nompör pa'so'cheñ, allotpa' o'ch nequellcoñ ñaña Nompör pa'netser e'ñe allara ñesheto, ñeñtara pa'netser ñeñt sochetsa Jerusalëñ, ñeñtcha' sohuerrtsa ento't

e'ñe etserrare'. Alloṭpa' o'ch nequellca' ñaṃa neso'cheñ all e'ñe ñesheto ñeñt e'ñe etserrare' neso'cheñ. ¹³ Ñeñt e'mñotene' añ ñoñets ḥapanetepa'ch pueyoḥreto ñeñt atet neñotatenanet na Necamquēñoṭ ora allohuen ñeñt pame'ñeñotet apḥa'yenet allemeñ anetso'mar.' ” Arrpa' allohua ñeñt atet ot filadelfio'marneshacop.

Atto Juanpa' quellcan carta añecop ñeñt ame'ñetsa anetso Laodiceo

¹⁴ Ñeñt neserrpare'tatene' ñapa' alla oterrerr:

—Te'pa' o'ch pequellquērrerr carta añecop ñeñt cohuanṃpene' ñeñt ame'ñetsa all anetso Laodicea, o'ch ṗotanet atet: “Napa' o'ch nequellconas carta attoch neñotatas ñeñt atet otenes Jesucristo ñeñt ama puenesho po'ñoñ. Ñeñt atet oteney Pom-porecop ñeñtpa' atetcha' perrnay, ñaṃa ñeñt allpon oten, ñeñtpa' e'ñe po'ñoḥ atet, ñaṃa ñeñtara Cristo ñeñt ñanom eñall, allotña Pomporpa' yeḥcatyesan allohuen ñeñt allpon eñall. ¹⁵⁻¹⁶ Cristoña te'pa' atet otenes: ‘Napa' e'ñe neñotuennas ñeñt ora allpon atet seṗa'yen. Tarraña sapa' seḥllañoṭetsetsa same'ñenna, ama e'ñe huomencaye' same'ñenno. Ñerra'm ama semno o'ch same'ña'na huomencpa' amachña same'ñatsetno ama't mamesha. Tarraña sapa' seḥllañoṭetsetsa same'ñenna. Ñato' o'ch netma'ntacha atet. Sapa' ama atteyayso ñerra'mrrate' oñ ñeñt atarr sose', ñaṃa ama atteyayso ñerra'mrrate' oñ ñeñt atarr atserrrasen. Sapa' atta sepena ñerra'mrrate' oñ ñeñt mamesha shorrsastetsa ñeñt nanac netsena'ten. Ñeñto'marña napa' e'ñe atet nentenes atet ñerra'mrrate' oñ ñeñt ḥa aya'pesatañtena. Ñerra'm yorrpa' ḥach ya'pesatey o'ch ya'tatstera. Ñeñto'marña sapa' e'ñe atet nentenes ḥach nemneñ o'ch nehua-pore'tamṃperres. ¹⁷ Sapa' ama't soteneñ año' es sepallteno e'ño' sechuen ora ñeñt allpon poctetsa socop e'ñe sa setaruasoṭ. Tarraña ñeñt sherbets secamquēñecoppa' ama secheñe ama't coñe'ta. Napa' atta nentenes atet ñerra'mrrate' ñeñt nanac at-sena'tareṭ, atarrcha' amueroḥtatareṭtena ñeñt e'ñe huocchañ ñaṃa aporo'yet attach muelle'mquēn. ¹⁸ Ñeñto'marña na te'pa' o'ch noctape'chatterres sa o'ch notas sapa' ñeñt sepalltena. O'ch senamuen nesho ñeñt po'ñoḥ nanac sherbets secamquēñecop. Allochñapa' attoch sechuerr shonte' esocmañen ñeñt e'ñe po'ñoḥ sherbets. Ñeñt ama sherbetsopa' o'ch sa'ypo'ñer. Ñato' o'ch netma'ntacha atto allempo atserrtatenet oropa' o'ch nohuanña a'yo ñeñt ama sherbetso allempoñapa' o'ch e'ñe orochayaña ñeñt nanac sherbets. Ñeñt atarr sherbets atet ñerra'm oro ñeñtcha'ña se'nenña nesho. Elloña napa' o'ch netma'ntatasa atetcha' seṗa, o'ch seraña nesho shetamuets ñeñt atarr huallama't. Allochñapa' ñeñtcha' sechorrerra attoch o'huañcha' sepenca ñeñt atto semuelle'mquēn. Attoch serañtena ñaṃa quēllo'yeñtsopar alloch separterr seḥlle' allochñapa' attoch secuerr o'ch senterra e'ñe cohuen. ¹⁹ Ñehua, allohuen ñeñt po'ñoḥ atarr nemorrentenapa' ḥocmach e'ñe cohuen noctape'chaterranet ñerra'm esempo atpare'tennet. Ñaṃa erroteno allohuen ñeñt nemorrentena o'ch necoñchach mame', tarraña ñeñtpa' e'ñe ñocpueta allochñapa' attoch o'ch alla coṭape'cherret cohuen nocop, o'ch alla ame'ñerrnet huomenc. ²⁰ Señoche'pa'ch ñeñtcha' atet netma'ntaterrsa. Napa' atetcha' nepena ñerra'mrrate' esesha' ñeñt ḥocma ḥore'tets yetarroṭ. Ñerra'm eseshas se'mapuerrnan neñoñ ñaṃa ñerra'm setorañpenen, nañapa' o'ch nebe'tos all, allñapa' o'ch yerrallme'chen parro. ²¹ Ñeñt metana'tue' allohuen pa'namen topateñtsoḥno ñeñt ama nepuerranṃperraye, ñetñapa' nemnatanetcha' o'ch añcha'tarettapreterrnet e'ñe all neconaño. E'ñech atfet ñerra'mrrate' na, napa' e'ñe nemtana'tua allohuen pa'namen topateñtsoḥno. Ñeñto'marña napa' na'mcha'tarettapreteña Nompore'ñe all po'conaño. ²² Ñeñt e'mñotene' añ ñoñets ḥapanetepa'ch pueyoḥreto ñeñt atet neñotatenanet na Necamquēñoṭ ora allohuen ñeñt pame'ñeñotet apḥa'yenet allemeñ anetso'mar.' ” Arrpa' allohua ñeñt atet ot laodiceo'marneshacop.

4

Atto Juanpa' entan Yompor po'conaño e'ñe alla pue'ntaño

¹ Allempoñapa' alla gatyerrnerr po'poñ. Necuerrerr, allñapa' nentos yetarr atoraref allcha' nebe'tos o'ch nechap ento. Alla ne'muerrerr ñoñets ñeñf atef e'morrtetsa ñorra' atarr huomenc atef ñerra'mrrate' poctor atarr huomenc eñen. Ñeñfña ñoñetspa' atef oten: —Apon arr, o'ch pebe'tosam̄pesna o'ch negatyesaḡ allohuen ñeñfcha' atef perrtsa tsapaḡonef.

² Allempoña Yompor Puecamquēñ e'ñe chorrenna, atto nechap ento all nentos pueheñarr alla anen po'conaño. ³ Ñeñf anets all po'conaño'pa' atarr nanac cohuen aspanamcoquēno poptamco'tena atef ñerra'mrrate' mapue' ñeñf atarr cohuen poptetsa ñeñf otenet jaspe. Elloneḡpa' po'poñonfo atarr nanac cohuen tsamcoquēno poptamco'tena atef ñerra'mrrate' mapue' ñeñf otenet cornalina. Ñaḡa allo arca'tam̄penapa' ñeñfpa'cho'ña atef ñerra'mrrate' ayon tarraña ñeñfpa' atarr nanac cohuen aspano shemashro poptena; e'ñe atef poptena ñerra'mrrate' mapue' ñeñf otenet esmeralda. ⁴ Ñaḡa topño'mar ñeñf rroçhtam̄pene' all shonte' po'poñ conañeçhno. Ñeñf conañeçhno topño'tsa'yen ñeñf rroçhtam̄pene' allo'tsen epoch çharra' puechena pa'tats. Ñaḡa ñeñf anorrçhets allohuen conañeçhno ñeñfpa'cho'ña allo'tsen epoch çharrasheña puechena pa'tats ñeñf sherbene' Yompor all pue'ntaño. Coçhneshareret pa'shtam atarr huallama'tarer, po'choyo'met oro ayeçhcataref ñeñf choyo'm̄tenet. ⁵ E'ñe rroçh conañoḡpa' allot huena meratste', allot huena ñaḡa tatste'. Allpa' atarr huomenc ma'moreten. E'ñe alla allame'tets po'conaño ñehuapoḡ allot'sen cançherr huerare ñeñf huoretyets all. Ñeñfpa' ñeñf toma'ntenaya Yompor Puecamquēñ ñeñf cançherr ñeñf sherba'yets e'ñe po'poñe'ttsocma. ⁶ E'ñe alla a'yenet po'conañoḡ all orrtena erracmañen atef ñerra'mrrate' ñeñf añecmuen rerpat ñeñf e'ñe orrtatuene' ora ñeñf allpon eñall all.

Allo'tsen po'conañ e'ñe pa'tatsshem̄to'marot all tomçhen pa'tats ñeñf berrma'ttetsa. Ñeñfñapa' shonte' pa'cillo'yeçhno emota cohua'yen. Pa'chco'tagoḡpa'cho' shonte' pa'cille' allot cohuen. ⁷ Ñeñf ñanom ñeñf berrma'ttetsa all, ñeñfpa' e'ñe atef ñerra'mrrate' ma'ñor. Po'poñpa' allot'sen ñaḡa atef ñerra'mrrate' toro, po'poñ pa'tsa'pot pa'cloyoḡpa' e'ñe atef orrtena ñerra'mrrate' aheñ. Po'poñ all orrtena attema't ñerra'mrrate' ñeñf otenet contor ñerra'm esempo anena. ⁸ Ñeñf pa'tatso'mar berrma'tpa' e'ñe apa'pa'yetarerochet, pate'tetspa' echenan pechapa'ttsocmuet pa'pue' penet. Pa'pa'yoḡ enoḡpa' e'ñe aclo'yetarerochet, puelleca'noḡpa'cho'ña aclo'yetareret emoto'mar allot cohua'yenet. E'ñe ellapenete't arepenete't all açhoteñet Yompor, ama't mameshapa' ama ameseneto atto açhoteñet Yompor. Ñeñfpa' atef otenet:

Parets, parets, parets ñeñfara Yompor ñeñf atarr ahuamencaḡ nanac ñeñf Yepartseshar yepen ñeñf çhocma eñall. Ama't ahuatoteñ eñall ñaḡa ñeñfara ñeñfcha' ello huerrtsa po'pocheño.

⁹ Ñaḡa ñeñf berrma'ttetsa allpa' cohuentateññañet Yompor ñeñf anets all po'conaño, atarr añcha'na'tpo' enteñet, ñaḡa çhocma puema'yocheñoḡet parasyoso'teñet Parets ñeñf ama arromñañeshayaye ama't ahuaḡa. ¹⁰ Ñetpa' ñerra'm esempo aye'choçhtateñet Parets, añña ñeñf epoch çharrasheña ñeñf puechetsa pa'tats ñeñf sherbene' Yompor allpa' ñetpa'cho'ña o'chçho' concorpa'rretenet e'ñe all ñesho, o'chçho' ma'yocheñet ñamet Yompor ñeñf ama arromñañeshayaye ama't errponañña. Allotpa' o'ch a'meyet po'choyo'm̄ o'chçho' net e'ñe Yomporeshonet ñeñf anets all po'conaño. O'chçho' aye'choçhtateñet Yompor ñamet, ñeñfpa' atef otenet:

¹¹ Yompore, ñeñfep̄ Yepartseshareḡ, ñeñfep̄ nanac Partsoḡ, ya añ poptetsa o'ch yeco-huentatonap̄ ñeñfep̄ añcha'na'tpahueḡ ñaḡa atarr ahuamencaḡep̄. Tarro'mar pa

yechcatyene' ora allpon ñeñt' eñall, e'ñe ña pemneññoñ ahuo't eñalleyesa, e'ñe ña peñoñoñ ahuo't yechca'yena ñeñt' allpon eñall.

5

Atto Juanpa' entan Cristo ñeñt' atma'ntataret Carrnero, e'ñe ñapña toran Yompor po'libro

¹ Allempoñapa' alla necuererr ñeñt' anets all po'conaño. Potot po'cohuenrot'pa' all nent all orrenan libro apco'nottataret, e'ñe emoto'mar aquellca'huaret o'ponot ñaña enot. Echenan cancherr ñeñt' allo ayomrraret atto e'ñe echarr a'paret. ² Ñaña all nent puesheñarr mellañoñeñ ñeñt' atarr ahuamencañ. Ñaña'pa' rrana huomenc, ñeñt'pa' atet oten:

—Esesha'huaca' e'ñe cohuenare' cotape'chetsña Yomporecop ñeñt'cha' tore' añ Yompor po'libro allo echarr a'parettena.

³ Tarraña ama't puesheñarrapa' ama eñalle ñeñt'cha' tore' Yompor po'libro. Ama't puesheñarra ñeñt' ento'tsen ñaña ama't ñeñt' patso'tsen ñaña ama't ñeñt' o'pono'tsen patso, ama eñalle ñeñt'cha' muenatet ñeñt'cha' tore' Yompor po'libro attoch eñorachet.

⁴ Napa' ñeñt'ña atarr neyarre' atto ama't puesheñarrapa' ama neñche ñeñt' e'ñe cohuenare' es cotape'chets Yomporecop ñeñt'cha' muenatet o'ch toran Yompor po'libro ñeñt'cha' eñorate'. ⁵ Allempoña ñeñt' epoch çharrasheña ñeñt' puechetsa pa'tats ñeñt' sherbene' Yompor, puesheñarrña'pa' oten:

—Amach peyahuatsto, tarro'mar eñall puesheñarr ñeñt' e'ñe pocte' ñeñt'cha' tore' Yompor po'libro ñeñt' cancherr allo echarr a'parettena, tarro'mar ñapa' ñeñt' metana'tue' allohuen pa'namen topateñtsoçhno, ñeñt'ña'pa' añepa't Cristo ñeñt'ara atma'ntataret Ma'ñor. Ñeñt'pa' judámerena'tar ñeñt'ara David po'mreñeñ.

⁶ Necuererr, allña'pa' nent Cristo ñeñt' toma'ntenaya Carrnero. All ten e'ñe rroçho allo'tsa'yen Parets po'conañ ñaña añ pa'tatso'mar ñeñt' berrma'ttetsa ñaña e'ñe allo'tsa'yen ñeñt' sherbene' Yompor. E'ñe rroçho all ten Cristo ñeñt' atma'ntataret Carrnero. Orrtena atet ñerra'mrrate' carrnero ñeñt' amsarettetsa ochñartsocop. Ñeñt' carrneropa' cancherr po'ucor, echenan ñaña cancherr pa'c'le'. Ñeñt' cancherr pa'c'le'pa' ñeñt'pa' añ Yompor Puecamquëñ ñeñt'ara cancherr ñeñt'cha' sherba'yets e'ñe po'poñe'ttsoçma ora erracmañen añe patsro allcha' amñare'tetyerret. ⁷ Allempoña añ Carrneropa' o' huapa o' çhap allo'tsen Yompor ñeñt' anets all po'conaño. Ñaña'pa' chetsosan Yompor po'libro ñeñt' orren po'cohuenrot'. ⁸ O' chetan libropa' allempoña añ ñeñt' pa'tatso'mar berrma't ñaña ñeñt' epoch çharrasheña ñeñt' puechetsa pa'tats ñeñt' sherbene' Yompor, allohuenetña'pa' concorpa'rreteñet Cristo ñeñt' atma'ntataret Carrnero. Puesheña'ttsetpa' orrenet arpa ñaña pajo' ñeñt' orotaten all anaret ñeñt' atarr eñmosa'ttetsa Yomporecop. Ñehua, añ ñeñt' eñmosa'ttetsa añ toma'tena ñeñt' atto ma'yochena ñeñt' pueyochresha' pen Parets. ⁹ Añña ñeñt' concorpa'rrtetsapa' ñetña'pa' morrechenet ñeñt' etserra morreñets ñeñt'pa' atet a'çhoteñet Cristo ñeñt' atma'ntataret Carrnero:

Papa' e'ñe cohuenare' es peña'yen ñeñt'o'mar e'ñe pocte' ñach chete' Yompor po'libro, e'ñe pocte' ñach tore' allo echarr a'parettena tarro'mar ñapa' ña amsarettatsa, perrasoña ñapa' allo petsa'tuonaya yo'çhñar allochña'pa' attoch e'ñe puechemer perrey Yompor ama't allohueney ñeñt'ey pa'namen acheñey, ama't erra'tsena mereñtsorey allot yehuena, ama't ñaña erra'tsena ñoñtsor allo yeñosyen e'ñe po'poñe'ttsoçma, ama't ñaña pa'namenana'tarey allohuen errohuanen ñeñt' e'ñe ya'netser yeña'yen.

10 Ñeñtey allohueneypa' pa yemnatene' o'ch ya'm'cha'tarettapreta'pa attochña yesherbapretene'p Yompor ñeñt atarr Parets. Attoña yecorneshaten Partsocop. Ñaña attoch ya'm'cha'tare'terra aña patsro.

11 Allempoña alla necuererr o' ne'muererr mellaño'feñnesha' atet eñosyenet. Shontet nanac che'muechenet all rroçhtañpeñet a'yohuen erra'poren. Ñaña ñeñt berrma'ttetsa all ñaña ñeñt sherbene' Yompor ñeñt allohuenet ma'potanto'maretpa' ñeñt e'ñe rroçhtañpene' Yompor ñeñt anets all po'conaño. 12 Ñeñt mellaño'feñnesha' ñetñapa' e'morrtenet huomenc all a'choteñet Cristo ñeñt atma'ntataret Carrnero. Ñeñtpa' atet otenet:

Cristo ñeñt toma'ntenaya Carrnero ñeñt amsare'ttatsa, ñapa' e'ñe cohuenare' es pa'yen ñeñto'marña ñapa' e'ñe pocte' ahua'ncattena, agapanepa' shonte' esocmañen ñaña e'ñe pocte' eñotañtepa'ch, ñaña e'ñe pocte' partsotepa'ch, ñaña e'ñe pocte' añcha'na'tpahuotepa'ch. Ñaña e'ñe pocte' ya yecohuentateño' ya'ye'choçhtatoñepa'ch.

13 Allempoña ne'muerrerr atet ama't allohuen ñeñt Yompor pueyeçhcatar aye'choçhtateññañet Yompor ama't ñeñt ento'tsa'yen ñaña ama't allohuen ñeñt patso'tsa'yen, ñaña allohuen ñeñt o'pono'tsen patso ñaña oño. Ama't e'ñe allohuen pueyeçhcatar ñeñt allo'tsa'yen allohuenet aye'choçhtateññañet Yompor, atet otenet:

Ya'ye'choçhtatoñepa'ch Yompor ñeñt anets po'conaño ñaña Puechemer Cristo ñeñt atma'ntataret Carrnero. Añcha'na'tpahuepa'ch yenteñ, yecohuentatoñepa'ch tarro'mar ñetpa' atarr ahua'ncatet fayoteñ ama't errponañohuen.

14 Ñaña ñeñt berrma'ttetsa pa'tatso'mar all ñetñapa' otenet:

—Ñeñtpa' attetepa'ch.

Ñaña añña ñeñt sherbene' Yompor ñeñt epoch çharrasheña ñeñt puechetsa pa'tats o' concorpa'rrtet all ma'yocheñet Yompor ñeñt ama arromña'feshayaye.

6

Atto Cristopa' toran ñeñt cançherr allo echarr a'pare'tteta Yompor po'libro

1 Allempoñapa' nent Cristo ñeñt toma'ntenaya Carrnero attoch ñach tore' ñeñt cançherr allo echarr a'pare'tteta Yompor po'libro. Allempoña ñapa' o' tore paterr ñeñt e'ñe ñanom allo ayomrraret ñeñt libro. Allempoña o' tore, añña pa'tatso'mar ñeñt berrma'ttetsa, puesheñarrña'pa' eños. Nañapa' o' ne'muerrerr ñeñt atet eñen huomenc, po'ñoñpa' e'ñe atet e'morrtena ñerra'mrrate' cho tatstena. Ñeñtpa' atet oten:

—¡A'pon, pecue'!

2 Naña necue'pa' nent paterr cahuall atarr hualla'pnanen. Ñeñña montenayapa' echenan paterr po'ca'not ñeñt orra'nen potot. Allña'pa' apet paterr choyo'mets ñeñt'cha' choyo'metnoma. Nañapa' ahuo' o'ch quellara'yena' o'ch e'ñe a'mchechuan ñeñt e'moñe'tyen.

3 Allempo torerranerr ñeñt puepañ allo ayomrraret Yompor po'libro, nañapa' alla ne'muererr ñeñt puepañ berrma'tpa' o' alla eñorerrerr. Ñeñtpa'cho'ña ñeñtara atet oterrerr:

—¡A'pon, pecue'!

4 Allempoñapa' cha'nerrerr po'poñ cahuall, ñeñtña'pa' atarr tsa'pnanen. Ñeñña montenaya allña'pa' apet paterr espada atarr allpocha'p. Nañapa' o' muenateñet o'ch quellaratanna'tatan acheñenesha' arr patsro attochña muetsatanna'tatenanet. Attoña ñetpa' o'huañcha' muechet yeçhenet arr patsro.

⁵ Allempo torerranerr ñeñt puema'pañ allo ayomrraret Yompor po'libro nañapa' alla ne'muererr ñeñt puema'pañ berrma'tpa' o' alla eñorerrerr. Ñeñtpa'cho'ña ñeñtara atet oterrerr:

—¡Apon, pecue'!

Naña necuererrpa' nenterrerr po'poñ cahuall ñeñtña'pa' atarr quelluepnanen. Ñeñt montenayapa' orra'nenan paterr pesamets. ⁶ Allo'tsa'yen ñeñt berrma'ttetsapa' e'ñe all rrocho'tpa' ne'muererr ñeñt atet e'morrterrerr ñoñets, ñeñtpa' atet oten ñoñets:

—Paterr kilo trigopa' nanquëpa'ch tsa'teterr ama't ñeñt paterr denario*, ñaña ma'pa kilo cebadapa' nanquëpa'ch tsa'terra. Tsa'terrepa'ch ñaña paterr denario. Tarraña olivose' ñaña vinospa' chocmuepa'ch eñall, amach seprratam̄psatsetye.

⁷ Allempo torerranerr ñeñt puepa'tatseñ allo ayomrraret Yompor po'libro, nañapa' alla ne'muererr ñeñt puepa'tatseñ berrma'tpa' o' alla eñorerrerr. Ñeñtpa'cho'ña ñeñtara atet oterrerr:

—¡Apon, pecue'!

⁸ Naña necuererrpa' nenterrerr ñeñt paterr cahuall atarr shemashrepnaneno puer-rama'pnen. Ñeñt montenayapa' añ pa'so'cheñ Rromueñets. Ñeñt cotene' chenta'pa' añ toma'ntena ñeñtcha' aguëne' allohuen ñeñtcha' rromuets. Ñeñtpa' apare't llesens añecop attoch a'cclatatan shonte' acheñenesha' arr patso. Ama't pasheparr pats, allpon otenet un cuarto, allponcha' a'cclatatuerran acheñenesha'. Ñeñtpa' atetcha' a'cclatatanet, quellareñtsoterrcha', chaporrñatsoterrcha', atснаñtsoterrcha', orrterrach berr ñeñt atarr atsrre'mñañ ñeñt atarr bellac arr patso.

⁹ Allempoñapa' o' torerranerr ñeñt pa'mnareñ allo ayomrraret Yompor po'libro, naña necuererrpa' allña'pa' nenterrerr altar ñeñt allecma a'crratete't ñeñt eñmosatetsa Yomporecop. E'ñe all patso't altaro all nent shonte' camuecñetsočno ñeñt amt-sanatarettatset't all e'ñe pueserrpare'teño'tet Yompor po'ñoñ atto a'metete't ñaña atto ame'ñeñet Cristo. ¹⁰ Añaña ñeñt camuecñetsochnopa' ñetña'pa' rrannartenetpa' oteñet Yompor:

—Yompore pa atarr Partsoř, atarr ayemuetpo' atet poteney. Esemphuachca' pecoñchatuerña acheñenesha' all patso, esempohuachca' petsa'tateraña ñeñt acheñer yemtsanataye't ñeñt patso'tsen. Aña'pa' allohua atet ot camuecñetsnesha'.

¹¹ Ñetña puesheña'ttsetpa' apare'ttenet pa'shtam atarr huallama'tarer. Ñaña ñetña'pa' otare'ttet ato't e'ñe ameseta'. “O' mameshamña o'ch etsotua allpon po'potantañecop semo'nasheñ ñeñtcha' amtsanatarettterrtser ñeñtes e'ñe attecma sesherbeñ Cristo.”

¹² Allempo torerranerr ñeñt po'pechapueñ allo ayomrraret Yompor po'libro naña o' alla necuererrpa' nent ñaña cha puetalle'chena pats huomenc. Atsne'ña'pa' o' checmet atet ñerra'mrrate' shetamuets ñeñt atarr quellue ñeñt chorrena ñeñt atarr llequëtsa. Arrorrñapa' o' cha tsama'tta atet ñerra'mrrate' errasats. ¹³ Rantočno ñaña ñeñt ento'tsa'yen allohuenpa' o'cha shorcha'tua o' cha'cha't patso. O'ch netma'ntacha atet ñerra'mrrate' parte ñeñt e'meret o'ch huomenquëshatpa' pue'merña'pa' o'ch a'shore'tam̄pesue huomenquësha', ama't atarr emerñ pue'mer.† ¹⁴ Enetpa'cho'ña o' e'ñe chenca'hua atet ñerra'm papell epare'tpa' o'huañcha' orrta. Ama't ora allpon aspentarerpa'cho'ña o' e'ñe rrote'tyesuahua ñopa'tets. Ñaña ora allohuen oñečno ñeñt rrochpe'chañečno ñeñtpa'cho'ña o' e'ñe rrote'tyesuahua. ¹⁵ Allempoñapa' allohuen acheñenesha' ñeñt ye'cha'yetsa añe patropa' o' e'ñe e'potrra'tuet arroroto'mar ñaña mapuetpono'mar ñeñt aspentarero'tsa'yen. Ama't allohuen am̄cha'tareñnesha'čno o' e'ñe e'potrra'tuet, ñaña allohuen ñeñt atarr sherba'yets, ñaña ñeñt eçllayoretečno, ñaña ñeñt pa'm̄cha'tare'ter pen solltar, ñaña ñeñt atarr ahuamencat entyetsa, ñaña

* **6:6** Denariopa' quelle ñeñt allpon tsa'tenet pam̄tarr ñeñt taruasetts all pa'nyo. † **6:13** Ñehua, Juanpa' añ toma'ntatena higo ñeñt puenareñ penet all pa'nyo.

ama't allohuen acheñ ñeñt ama esoye' enteneto ñeñt ataruasatare't e'ñe atfa, ama't ñaña allohuen ñeñt ama ataruasare'teyaye ñeñt e'ñe cohueno'tsen, allohuenet e'ñe e'potrra'tuenet. ¹⁶ Allohuenetpa' chore'teñet aspenet ñaña mapuetačno atet otenet:

—Te'ñapa' yeñgatañperrepa' attotcha' e'poterrey attoch amach enterrye Parets ñeñt anets all po'conaño allochñapa' amach erroteno't coñchaterrye Cristo ñeñt toma'ntenaya Carrnero.

¹⁷ Tarro'mar te'pa' o' chap añ yetro allempoch yoroçhterra allempoch atsa'tataretterra allohuen acheñenesha'. Ama't eseshapa' amach erroteno't ahuanotoño Yompor po'yoroçhenña.

7

Atto Israel po'mreneñ ñeñtcha' ayato'ma'tare'tetyesta

¹ Allempoña napa' nent mellañoñenesha' pa'tatssheña. E'ñe allohuanen pats, ñeñt pa'tats po'toññaro'mar allñapa' all tomyen puesheña'tets mellañoñeñ ñeñt pa'tatssheña. Ñeñt pa'tatssheña ñetñapa' ñet epatare'tenet mōrr pa'tatsshemto'marot allo't huapyena mōrr. Allochñapa' attoch amach atarr mōrrarsañpeno añ patser, ama't ñaña oñečno, ñaña ama't pa'rra tsachpa' amach mōrrarsañpeno. ² Allempoña napa' o' alla nenter-rerr po'psheñeñ mellañoñeñ, arr orrtena allo't huena atsne'. Ñapa' añ orren yapets ñeñt alloch yanatan allohuen ñeñt pueyochresha' pen Yompor ñeñt ama arromñatēshayaye ama't ahua'ta. Ñaña' rrana huomencpa' otan mellañoñenesha' ñeñt pa'tatssheño'mar ñeñt añecop ahuanencattenet attoch ñetcha' pomnaren pet pats ñaña oñečno. ³ Ñeñtpa' atet otanet:

—Amach erro't sepatsto añ pats ama't oñ ama't tsach ato'tña yeyato'ma'tueya' allohuen ñeñt torra'yetsa Yomporcop.

⁴ Allempoña ne'muerrerr ñeñt atet oteñet ñeñtcha' allpon ayato'ma'tare'ttatsa. Ciento cuarenta cuatro mil ñeñtpa' allpon otenet. Ñeñt ciento cuarenta cuatro mil acheñenesha' ñetpa' e'ñe po'poñe'ttsoçmuet mereñtsoret. E'ñe ñeñta mereñtsoreçmuet ñeñt çharrasheña puechena epa ñeñt pa'tañ pene' Israel ñeñt corratset ahua't.

⁵ Ñehua, pate'tets mereñtsorpa' allponsheña ñeñtcha' ayato'ma'tare'ttatsa: Judána'tarpa' allo'tsencha' çharra' puechena epa mil acheñenesha'; Rubénna'tarpa' cho'ña allo'tsencha' çharra' puechena epa mil acheñenesha'; Gadna'tarpa' cho'ña allo'tsencha' çharra' puechena epa mil acheñenesha'; ⁶ Aserna'tarpa' cho'ña allo'tsencha' çharra' puechena epa mil acheñenesha'; Neftalina'tarpa' cho'ña çharra' puechena epa mil acheñenesha'; Manasésna'tarpa' cho'ña çharra' puechena epa mil; ⁷ Simeónna'tarpa' cho'ña çharra' puechena epa mil; Levína'tarpa' cho'ña çharra' puechena epa mil; Isacarna'tarpa' cho'ña çharra' puechena epa mil; ⁸ Zabulónna'tarpa' cho'ña çharra' puechena epa mil; Joséna'tarpa' cho'ña çharra' puechena epa mil; Benjamínna'tarpa' cho'ña çharra' puechena epa mil acheñenesha'.

Atto shonte' pa'namen acheñenesha' ñetpa' e'ñe huallama'tarerochet pa'shtam

⁹ Allempoña napa' o' alla nenter-rerr shonte' acheñenesha', nanac che'muechenet ama e'ñotuenteno ñeñt allpon allo'tsen. Shonte' pa'namen acheñenesha'. Ñeñtpa' pa'namen anetsot huacha'tyenet, shonte' pa'namen mereñtsoret ñeñt huachetsa all, shonte' pa'namen ñoñets e'ñe po'poñe'ttsoçma eñosyenet. Ñetñapa' all tomçhenet e'ñe ñehuapo't allo'tsen Yompor po'conaño allo'tsen ñaña Cristo ñeñt toma'ntenaya Carrnero. Ñetpa' e'ñe huallama'tarerochet pa'shtam. Pototetñapa' añ orra'yenet atet ñerra'm shequēpan. ¹⁰ Allohuenetpa' rranenet, otenet:

Yompor ñeñt po'conaño'tsen ñapa' o' a'queshpaterrey epuet ñaña Puechemer ñeñt toma'ntenaya Carrnero.

11 Ñeñt berrma'ttetsa pa'tatso'mar ñaña ñeñt sherbene' Yompör all, ñaña allohuen mellañoñeñnesha' ñeñt tomçhets a'yohuen erraparen, ñetña allohuenetpa' e'ñe rroçhtamñpesueñet Yompör ñeñt po'conaño'tsen. Ñeñt mellañoñeñnesha' all rrema'rrartenet Yompör po'conaño atet ma'yocheñet Yompör. 12 Ñeñtpa' atet aye'choçhtateññañet Yompör, ñeñtpa' atet otenet:

Attetepa'ch yocop ya'ye'choçhtatoñepa'ch, yecohuentatoñepa'ch, amuepa'ch ahuañaño atto eñotañtena Yompör, yeparasyoso'chepa'ch, amcha'na'tpahuepa'ch yenteñ, amuepa'ch ahuañañaatto ñeñt atto ahuamencattena Yompör, amcha'tareñtepa'ch tayoteñ errponohuañen. Ñeñtpa' attetepa'ch.

13 Allempoña puesheñarr ñeñt sherbene' Yompör, ñañaapa' a'p'to'ten, atet oten:

—Papa' ¿ama't peñoteñeña eseshachnote'ña ñeñt chorrenaya huallama'tarer, ñaña ama't peñoteñe erroñte'ña huachenet?

14 Nañapa' atet noch:

—Amaca'ye Nompore neñoteñe. Pate'ca'yeña eñotene'.

Ñañaapa' o' alla oterren:

—Añenesha' ñeñt chorrenaya huallama'tarer ñetña ahuanterret allempo orrterra pa'namen mueroçhteñtsoçhno. Ñaña ñetpa' atto e'shohuaretet po'chñaret e'ñe Cristo po'rroso, ñeñña ottetsa atet ñerra'mrrate' ñetpa' o' atsama'tareñtet pa'shtam attoch e'ñe cohuen a'huallama'ttaretet pa'shtamuet e'ñe cohuen. 15 Ñeñto'marña ñetpa' allo'tsa'yenet Yompör po'conaño. All çhocma sherbeñet Yompör — ellapenete't, arepenete't sherbatset all Yompör pa'paclo. Yompörña ñeñt anets all po'conaño, ñachña e'ñe a'natenahuete e'ñe ñesho. 16 Ñetpa' amach mueroçhterrete'te pa'chporrñoñ ama't po'ñpañoñ. Ñaña ñetpa' amach errotenot chemuerranete'te atsne' ñaña amach a'mñechaterranete'te ñaña huerate'. 17 Tarro'mar Cristo ñeñt atma'ntataret Carrnero ñeñt allo'tsen all Yompör po'conaño, ñachña cohuanñpenahuete e'ñe atet ñerra'mrrate' carrnero e'ñech cohuanñpeñ pamo'mte'. Ñapa' çhapatanetcha' all poten oñ ñeñtcha' apahuete attoch correnet errponañohuen. Yompörña ñach a'huañamñsahuete puellquëña ama't ahuañapa' amach yahuerrete'te.

8

Allempo Cristopa' toruan po'cançhroñ ñeñt allo ayomrrareñtena Yompör po'libro allempoñapa' orrta ñaña puesheñarr mellañoñeñ ñeñt orrene' po'pajo' orotaten

1 Allempoña Cristo ñeñt toma'ntenaya Carrnero, ñapa' allempo e'ñe toruan po'cançhroñ ñeñt allo ayomrraret Yompör po'libro, e'ñe muetsoñeñtua poctacma pue'ntaño tematuanen. 2 Allempoña napa' alla nenterrerr mellañoñeñnesha' ñeñt cançherrsheña ñeñt tomçhets e'ñe all Yomporesho. Ñetña puesheña'ttset allpa' apareñtet poctor. 3 Allempoña o' huapa po'psheñeñ mellañoñeñ. Huapapa' o' tomos all altaro. Añ altarpa' allecma a'crratenet tsach puese' ñeñña atarr amostetsa all. Pamosoññaapa' ñeñt atarr eñmosañtetsa Yomporecop. Ñeñt mellañoñeñpa' añ orren pajo' orotaten allcha' nenan ñeñtcha' eñmosañtetsa. Ñeñt mellañoñeñpa' allña apet shonte' eñmosañ ñeñtcha' eñmosañtate' ñeñt atto ma'yochena Parets pueyochresha'. Ñeñña eñmosañtetsapa' ñeñtcha' net altaro ñeñt ayeçhcataret oro ñeñt e'ñe ñehuapote'tsen Yompör po'conaño. 4 Ñeñt orramñpen mellañoñeñ eñmosañpa' çha amosoñe'chñen enonet allo'tsen Yompör, ñeñña eñmosañtatene' ñeñt atto ma'yochena Parets pueyochresha'. 5 Allempoña mellañoñeñpa' cheterran pajo'pa' o' esha'tan tso' puecallamñshor ñeñt cheta' altarot e'ñe e'chorran tso' pajo. Allempoñapa' huapore'ch patso. Chap patsopa' meratstosa, tatstosa, e'morrstosa huomenc, pellatan pats.

Atto Juanpa' entan cancherrsheña mellañoñeñ ñeññ poctorets

⁶ Allempoña mellañoñeñ ñeññ cancherrsheña ñeññ epoctorerarer puesheña'ttsetpa' o' echantyeset po'poctor o'ch a'toret.

⁷ Allempoña ñeññ ñanom mellañoñeñpa' o' poctora', poctora'huatsapa' orrta ñeññ ma'po'mar ñeññcha' ahuapore'tarettatsa patso. Ñeññtpa' añ hue' allo'tpa' ñaña tso' ñeññ tsetetsa errasatso. Atto ahuapore'taretta patso allempo chap patsopa' e'ñe a'huortatuosan ñeññ allo'tsen all chap patso. Tso'ñapa' errañaren e'ñe a'poyuosan ñeññ allpon tsachečno ñaña allpon ta'tečno ñeññ allo'tsa'yen ama't allohuanen pats allpon ñeññ otenet la tercera parte.

⁸ Allempoña po'psheñeñ mellañoñeñ ñeññ puepañpa' o' poctorerrerr. Pocrora'huerrtserrpa' orrterrerr atet ñerra'm ñeññ nanac atarr aspenet. Ñeñññapa' cha huorten. Ñeññ aspenetpa' ahuapore'taretta sa'po. O'ña chap oñopa' errañarenña oñpa' puenasa errasats allohuanen oñ ñeññ allpon otenet la tercera parte. ⁹ Ñaña ñeññ allpon yeçheta all oño errañaren, e'ñe colla'hua, allpon colla'huatsa ñeññ otenet la tercera parte. Ñaña ñeññ allohuen botečno ñeññ chope'chyets all oño errañaren e'ñe chenca'huet, allpon chenca'huatsa ñeññ otenet la tercera parte.

¹⁰⁻¹¹ Allempoña po'psheñeñ mellañoñeñ ñeññ puema'pañpa' o' poctorerrerr. Pocrora'huerrtserrpa' orrterrerr ranto ento ñeññ añecmuen atarremñ. Shora'nerrerr cha huerarere'tnena. Chap allo'tsa'yen po'ñesočno ñaña allot potayen oñečno errañaren arr patsro. Ñeññtpa' arrohua chap ñeññ allpon otenet la tercera parte. Ñeññ rantopa' añ pa'so'cheñ Peshrremñ. Chap allo'tsa'yen oñečno ñeññtpa' cha a'pesherrtuosan oñečno errañaren arr patsro. Ñeññtpa' allponohua a'pesherrtatan oñečno ñeññ allpon otenet la tercera parte. Oñ po'peshrroña ñeññña a'cllatue'ña shonte' acheñenesha' all.

¹² Allempoña po'psheñeñ mellañoñeñ ñeññ puepa'tatseñ o' poctorerrerr. Pocrora'huerrtserrpa' allempocma cho'e' erro'tetyesa atsne' ñaña arorr ñaña rantočno, o' attaña checmetyeset. Ñetpa' allpon checmetyesets ñeññ allpon otenet la tercera parte. Ñeññ atto çoyo'tenet ye'to ñaña tsapopa' o'huañ atsnomyeset. Ñeññ allpon o'huañ çoyo'tyeset ye'to ñaña tsapo ñeññtpa' allpon otenet la tercera parte.

¹³ Allempoña napa' o' alla necuererrpa' allñapa' nenterrerr po'psheñeñ mellañoñeñ ñapue't all anoma'mtena ento allpononet. Allñapa' ne'muerrerr ñeññ atet eñosnom huomenc. Panoma'mteño'tpa' atet oten:

—Llequëñtsa-bee ñeññ allohuenacop ñeññ ye'cha'yetsa añe patsro. O' mameshaña o'ch poctora'huerrerr po'poñ ma'psheño'mar mellañoñeñ.

9

Atto o' e'ñe ma'psheñaña mellañoñeñ ñeññcha' poctorerrtserr e'ñe allohuanen

¹ Allempoña po'psheñeñ mellañoñeñ ñeññ pa'mnareñpa' o' poctorerrerr. Pocrora'huerrtserrpa' nañapa' all nenterrerr ranto atarremñ ñeññ shora'nmats entot o' e'ñe chap patso e'ñe atet orrtosa ñerra'm mellañoñeñ. Ñeññña mellañoñeñ allñapa' apet paterr llave alloch toran allo e'tamñsaret arrorot ñeññ atarr o'pononet arrorottena pats. ² Ñaña'pa' o' toramñsan arrorot. Ñeññña arrorot allotña cha'nom amos shonte' atet ñerra'mrrate' cho chemue'chenet. Chepoten amos cha muene' emayenan ama't atsne', erracmañen chepoten, e'ñe chorren amos. ³ Atto atarr chepoten amospa' cha'nma'cha'tatan ñaña allot ahuañchenclla nanac shonte', pam'cha'tyesa erracmañen patso. Ñehua, ñeññ ahuañchencllapa' o' apet attoch epotaña atet pena ñerra'mrrate' yellas ñeññ atarr epotañ. ⁴ Ahuañchencllañapa' atet otaretta amach erro't patstano ta'te' ñeññ patso'tsen, amach erro't patstano ñaña tsach. Ama't ñaña allohuen ñeññ pa'namen chopyets añe patsro amach erro't patsche. Añcha'ña erro't pa' acheñ ñeññ

ama ayato'ma'tareteyaye Yompor pueyotsaparo. ⁵ Ama muenacheto o'ch muetsan ama't patrra acheñ allempo. Ñeñt ahuañchenclapa' añña oteñet o'ch muerochtatan acheñ amnarmña arrorr. Ñeñtpa' atetcha' atserrpanet atet atserrtena yellas ñerra'm cho epota'y. ⁶ Allempoña acheñenesha'pa' e'netcha' attoch rromuet tarraña amach errotenot rromueto. Ama'tcha' atarr ya'ñametare'tenetañpa' amach rromueto.

⁷ Ñeñt ahuañchenclla atet orrtena ñerra'mrrate' cahuall allempo o'ch natyeñet attoch quellarachet. Poñpa' e'ñe atet orrtena ñerra'm choyo'mets ñeñt orotaten. Pa'clloyotpa' e'ñe atet orrtena ñerra'mrrate' acheñ. ⁸ Echet, pue'chpa' añecmuen atet ñerra'mrrate' coyanesha' pue'ch. Pa'spa' e'ñe atet orrtena ñerra'mrrate' ma'yarras. ⁹ Pa'tallpa' e'ñe atet orrtena ñerra'mrrate' asertall ñeñtcha' moñenaya, amach etsoto allo saneñet. Ñaña ahuañchenclla ñerra'm esempo anomchenapa' e'ñech atet e'morrtena ñerra'mrrate' shonte' carro ma'moretets allempo matateñ cahuall huomenc attoch chapuet allcha' quellaroset. ¹⁰ Pa'sme'llpa' e'ñe atet orrtena ñerra'mrrate' yellas pa'sme'll allot epotañtena. Pa'sme'llotsen puepotañer allot atserrpenan acheñenesha'. E'ñech amnarmña arrorr muerochtatenanet. ¹¹ Ñeñt ahuañchenclla ñetpa'cho'ña añ pa'mcha'tareter penet mellañoñeñ ñeñt añcha'tarettetsa all allot'sen arroroñ ñeñt atarr arroroñ o'pononet pats. Mellañoñeñ ñeñt pa'mcha'tareter pen ahuañchenclla, hebreyachopa' añ socheñet Abadón; griega'choñapa' añ socheñet Apolión. Ñeñt epo'mar so'chñets ya yeñoño ñeñt yoten amtsanatañ.

¹² Allempopa' met ñeñt ñanam ñeñt allcatañtetsa, tarraña señoche'ch palltena po'poñ epa ñeñtcha' allcatañterrtterr.

¹³ Allempoña po'psheñeñ mellañoñeñ ñeñt po'pechapueñ o' poctorerrerr. Pocrora'huerrtserrpa' ñaña allpa' ne'muerrerr ñoñets ñeñt e'morrtetsa altar pa'tatso'maroñ po'ucoroñ. Añ altar ñeñt aye'chcataret oro, ñeñtpa' e'ñe ñehuapo'tsen Yompor po'conaño. ¹⁴ Ñeñtña ñoñetspa' atet otenan mellañoñeñ ñeñt po'pechapueñ ñeñtara ñeñt o' poctora'huerrerr. Ñeñtña ñoñetspa' atet otenan mellañoñeñ:

—Te'pa' o'ch pepyamper mellañoñeñesha' pa'tatssheño'mar ñeñt ehucarettetsa all ñeñt atarr po'neso ñeñt pa'so'cheñ Eufrates.

¹⁵ Ñehua, ñeñt mellañoñeñ pa'tatssheño'maretpa' añecop añño'tarettenet all atomat o'ch chap allempo onañchareñ allempochña ñetpa' o'ch a'cllatueret shonte' acheñenesha'. Ñeñt ora allpon acheñenesha' ñeñt ye'cha'yetsa arr patsro allponcha' colla'huerrtsa ñeñt allpon otenet la tercera parte. Te'pa' o' e'ñe etsotua ñeñt atet onañchareñ ñeñt hora, ñaña ñeñt yetro, ñaña ñeñt arrorr-ro ñaña ñeñt chararo. Allempoña ñeñt mellañoñeñ pa'tatssheño'marpa' o' a'rroyaretterret. ¹⁶ Ñeñt mellañoñeñ pa'tatssheño'mar ñetñapa' ahuanmet po'soltarar ñeñt monta'yesnetsa puecahualloro. Nañapa' ne'muen allpon ñeñt atet oten ñeñt allot'sa'yen. Ñeñtpa' atarr aton shonte'. Ñeñt che'muechets all, allot'sen doscientos millones soltarnesha'.

¹⁷ Ñeñt atet gatennet all nent ñaña cahualle'chno, ñaña nent ñeñt atet orrtena ñeñt montenaya. Puesomapo'tpa' añ chorra'yenet asrom. Patanta'tetspa' añ chorra'yenet tsamamuenare', po'potantañpa' añ chorra'yenet asollemamuenare', po'potantañpa' añ chorra'yenet shemashremamuenare'. Ñaña cahualle'chno poñpa' atet orretyena ñerra'mrrate' ma'yarroto'. Puenamo'tñapa' allot cha'nen tso' huorte' epuet ñaña amos epuet ñaña ñeñt huoretnets shemashrepñeñen ñeñt otenet azufre. ¹⁸ Añña ñeñt cha'nets puenamo't atsetaren ma'po'marpa' ñeñtpa' ñeñtña amtsañtetsa ñeñtcha' a'cllatuerre' shonte' acheñenesha' ñeñt allpon otenet la tercera parte. ¹⁹ Ña po'huamenc allo muetsenan acheñenesha' ama puenamo'tayaya atet peno, añña ama't pa'sme'llotpa'cho'ña amtsañtena. Tarro'mar pa'sme'llpa' shechpeto' ñeñt poso'sme'll pen. Ñeñtpa' alloña atserrpenan acheñenesha'.

²⁰ Allpon acheñenesha' ñeñt queshpatsa ñeñt ama muetsanato ñeñt amtsañtetsa ñetñapa' attera atpare'teñet Yompor. Ama cotape'cherreto cohuen attoch quechpuet ñeñt atet patse'tyenet sosya'tsañ. Ñetpa' attera mueneñet o'ch ma'yochyet oneñeñechno ñeñt ama cohuenayaye. Ñaña ñetpa' attera mueneñet o'ch yeçhcatatse'tyeset pa'namen ñeñtcha' ma'yochenet atet ñerra'm oro ñaña quellema't, ñaña bronce, ñaña mapue', ñaña tsach. Allohuenet ñeñt yeçhcatyenet ñeñtña po'yomporer penet, ñeñtña ma'yochenet ama't ama enteno, ama't ama e'mueno, ama't ama chope'cheno. ²¹ Ñaña ama quechpueneto ñeñt atto muetsanna'tenet ñaña atto tsamñannenet ñaña atto nanac cañoresha'tenet ñaña atto etatsre'tanna'tyenet. Ora añechnopa' alloña ama cohuenaye' cotape'cheneto.

10

Atto Juanpa' entan puesheñarr mellañoñeñ ñeñt orrene' po'librotoll

¹ Allempoña napa' o' alla nenterrerr po'psheñeñ mellañoñeñ ñeñt atarr ahuamencattetsa. Ñaña'p' sohua'nena entot, e'ñe osot sohuamñpena. Poñoññapa' añ arca'tamñpesnene' ayon. Pa'clloyotñapa' e'ñe atet poptena ñerra'mrrate' atsne' çhoyo'tetsa. Pa'tac pa'chepohuen ora atet orrtena ñerra'mrrate' tso' huortets enonet.

² Sohua'nenapa' orra'nenan po'librotoll. Ñeñtña librotollpa' e'ñe cohuen atoraret ñeñt rremuen potot. O' çhap patsopa' pa'tacña po'cohuenrotpa' tomos oño, po'ptecañña ñeñt pue'chcoterotpa' tomos patso. ³ Allempoña tomospa' rranosa huomenc. Po'ñoññapa' e'ñe atet e'morrtosa ñerra'mrrate' ma'yarr tecoretsa. Atto rranosapa' e'ñe atet e'morrtena ñerra'mrrate' tecore' anapuene' ñeñt cançhroche'tats tecorena.

⁴ Allempoña e'morrtta ñeñt cançherr tecore' napa' nemneñeñ o'ch nequellcañ ñeñt atet ne'm tecore', tarraña na allempopa' ne'muerrerr ñoñets all e'morrtena ento. Ñeñtña ñoñetspa' atet otenen:

—Amach pequellcatsche ñeñt atet pe'mueñ tecore' çhochña pa'nasocha.

⁵ Allempoña añ mellañoñeñ ñeñt tomosets oño ñaña patso, ñaña'p' echantosan pot enonet po'cohuenrot. ⁶ Allña eñosospa' e'ñe huomenc nosan po'ñoñ Yompor pa'so'chño, ñeñtapa' atet otos:

—Yompor ñeñt ama arromñañeshayaye ñeñt yeçhcate' enet ñaña ora allpon ñeñt allo'tsa'yen pue'ntaño, ñaña ñeñt yeçhcate' pats ñaña ora allpon ñeñt allo'tsa'yen po'patsño, ñaña ñeñt yeçhcate' oñechno ñaña ora allpon ñeñt allo'tsa'yen pueyeçhcatareso, ñaña'p' entenen ñeñt atet noten te' ñeñtapa' e'ñech po'ñoçh atet perra. Te'pa' amach alla yecuame'tere'te atomatuanen. ⁷ Ñerra'm esempoch poctorerrerr po'psheñeñ mellañoñeñ ñeñt po'cançhroñpa' allempochña e'ñe etsotuerra Yompor pocta'ña ñeñt ama e'ñeye' eñotpahuoyaye ama't ahuañtoñeñ ama't allempo ñanom eñotatyese'ñt ñeñtcha' a'mta'yese'ñt po'ñoñ ñeñtara ñeñt nanac torra'yestse'ñt ñocop. Allohua ñeñt atet eños mellañoñeñ.

⁸ Allempoña napa' o' alla ne'muerrerr ñoñets ñeñtara ñeñt atet ne'm ñorra' ñeñt e'morrtetsa pue'ntañoç, alla oterrerr:

—Te'pa' o'ch peponemña mellañoñeñ ñeñt tets oño ñaña patso o'ch pechtosñañ potot po'libro ñeñt e'ñe cohuen atoraret.

⁹ Nañapa' ahuen allo'tsen mellañoñeñ, neçhap ñeshopa' notos:

—Te'pa' o'ch pa'pauen pelibrotoll.

Ñaña'p' atet oten:

—Añca'ye peyore o'ch perre'. Penamo'tpa' atarrcha' nanac puetsarr pe'm atet ñerra'm pets po'moñ, tarraña ñerra'm o'ch çhap pa'topa' atarrcha' pesherr pe'm.

¹⁰ Allempoña napa' o' nechtosñañ po'libro pototpa' o' nerre'. Allempo nerruepa' nenamoña atarr puetsarr ne'm atet ñerra'm pets po'moñ tarraña allempo chap natopa' atarr pesherr ne'm. ¹¹ Allempoña napa' o' alla oterrneterr:

—Te'pa' añ pocte' o'ch alla peserrpare'terrerr ñeñtcha' atet etsotaterr Yompor esempohuañen. Añcha' peserrpare'tyes ñeñtcha' atet perra shonte' pa'namen acheñenesha' ñaña atetcha' perra pa'namen anetso'marnesha' ñaña atetcha' perra pa'namen mereñtsorečno ñeñt eñsyets po'poñe'ttsocma ñoñtso ñaña atetcha' perra pa'namen añcha'taretečno.

11

Atto epsheña ñeñt pueyochresha' pen Paretpa' ñetcha'ña eñerrtset Yomporecop

¹ Allempoña napa' apnet tepapets ñeñt atarr allpocha' p e'ñe atet ñerra'm carrots. Ñaña allpa' atet otnet:

—Te'pa' o'ch ahuep o'ch petpueññaña' Yompor pa'paquell allo, ñaña altar ñeñt allo'tsen. Ñaña o'ch pe'ñotena' errosheñate' ñeñt ma'yochetsa all. ² Tarraña amach petpam̄psatscheña ñeñt a'yote'tsa'yen cha'petot. Tarro'mar all ñetpa' aparettetcha' po'poñ acheñ ñeñt ama ame'ñetso. Ñetñapa' a'mama'terretcha' all anetso ñeñt anaret Partsocop. Pa'tatsoch çharrama puechena epña arrorr allponmatcha' a'sosyateñet all ñeñt anarettetsa Partsocop. ³ Ñaña allempopa' o'ch nemñe epsheña ñeñt neyochresha' nepen. Nach ahuamencat pahuet attoch a'potet ñeñtcha' atet perra esempohuañen. Mil doscientos sesenta yet allponmatcha' serrpare'tennanet neñoñ. Puellquëñoñet chorretcha' pa'shtamashe'm. Arrpa' allohua ñeñt atet otnet all Yompor pue'ntaño.

⁴ Ñehua, añ epsheño'mar ñeñtcha' eñerrets Yomporecop ñetpa' atma'ntatareñtenet epcha olivoch ñaña epa all orratenet huerare ñeñt e'ñe tomçhets all Yomporesho, ñeñtara Yompor ñeñt pomnaren pohuene' allohuen acheñenesha' arr patsro. ⁵ Ñaña añ epsheña ñeñtcha' eñerrets Yomporecop, ñerra'm ama't esesha ñeñt muenene' o'ch erroñ pet añ epsheña, ñetñapa' puenamo'tpa' o'ch cha'nmatet tso' huorte' ñeñtcha' e'nue' ñeñt e'moñe'tenahuet. Ñeñto'mar yeñoteñ ñerra'm esesha' e'moñe'tenahuet, ñetñapa' e'ñech rromhuet poctacma. ⁶ Ñaña añ epsheña ñeñtcha' eñerrets Yomporecop, ñetpa' atarrcha' ahuamencatet. E'ñe ñet po'huamencot epatare'teñet o' entoñ attotcha' ama huateno e'ñech allponmat eñorenet Yomporecop. Ñaña e'ñe ñet po'huamencot oññapa' o'ch a'pnaseret errasats. Ñaña e'ñe ñet po'huamencotet o'ch çhapterret añ arr patsro pa'namen ñeñtcha' amtsañterrtsa. Ama't esempo allempo atet muenenet ñet, allempocmach atet pet. ⁷ Tarraña ñerra'm esempoch e'ñe e'nuet ñeñtcha' allpon eñoret arr patsro, allempoñapa' o'ch cha'nom ñaña ñeñt berrma'ttetsa ñeñt atarr bellac. Arro'tcha' cha'nom arrorotoñ ñeñt atarr o'pononet arrorotena pats. O'chña cha'nompa' o'ch quellarosan añ ñeñt epsheña ñeñtcha' eñerrets Yomporecop. Ñeñt berrma'ttetsa ñachña ganatsa o'ch muetsan añ ñeñt epsheña. ⁸⁻⁹ Añña epsheña ñeñt amtsaretpa' atatch o'shshe'muet toño allecma chopeñe'chen allohuen acheñenesha'. E'ñe ma'pamuet ñaña po'poñ pueshmet yet allach o'shshe'muena all atarr anetso, ñeñtara anetser Jerusalén all corso'tam̄pset Yepartseshar Jesucristo ahuañ. Ñeñtña anetserpa' ñato' o'ch netma'ntacha ñerra'mrrate' ñeñt atet pete't anetso Sodoma ñaña anetso Egipto. Añña epsheña ñeñt amtsareñ attach o'shshe'muet all amach esesha' muenateto o'ch pampuet. Allñapa' allcha' huachena shonte' pa'namen acheñenesha' ñeñtcha' cohuanrrortene', shonte' pa'namen mereñtsorečno ñeñt eñsyets po'poñe'ttsocma ñoñtso. Shonte' pa'namen anetsočno alloñ huachena. ¹⁰ Acheñenesha' ñeñt ye'cha'yetsa er-raparen arr patsro ñetñapa' o'ch coshame'tam̄pesyet añ epsheña arromñañ. Atarrcha' nanac cosherret. Pocsheñeshoñetña ñetpa' o'ch es apanna'tyeset e'ñe atta. Ñetpa'

añecopcha'ña atarr coshenet tarro'mar o' rroma añ epsheña ñeñt atsrre'moçhen entenet ñeñt yore'tatenahuet po'chñaret e'ñe pueserrpare'teñoçet Yompor po'ñoñ. ¹¹ Allempoña o'ch met ma'pamuet ñaña po'poñ pueshmet yet, añña ñeñt epsheña machayotepa'tcha' alla tanterret tarro'mar Yomporña alla tantaterre'. Allohuen acheñenesha' ñeñt cohuanrrortene'pa' atarropa'tcha' nanac yorenet. ¹² Allempoña tanterret epsheño'maret, e'muet ñoñets ñeñt e'morrtetsa atarr huomenc ento. Ñoñetsña'pa' atet otenanet:

—Sa'tap arr ento.

Ñetña'pa' o'cho' a'tapuet, ospa' ñeñtña anmahuet ento. ¹³ Cohuanrrortets ñeñt e'moñe'tenahuetpa' e'ñe allempocmaña pella pats huomenc. Allña anetsopa' shonte' matna't pocoll, allpon otenet la décima parte. Ñaña cançherr mil acheñenesha' ñeñt allpon colla'huatsa. Ñeñtña allpon qeshpatsapa' atarr yorenet. Pueyornñoçetpa' e'ñe allempocma añcha'na'tpo' eñchet Yompor ñeñt pue'ntaño'tsen. Allña'pa' cohuentatoñet.

¹⁴ Allempopa' o' metuaña ñeñt puepañ ñeñt allcatañtetsa, tarraña señoçepa'ch palltena po'poñ paterr ñeñtcha' tecma allcatañtatsa ñeñtcha' puema'pañ.

Allempoch poçtora'huerr mellañoçeñ e'ñe allohuanen allempochña añcha'taretetuerra Yompor arr patsro

¹⁵ Allempoña po'psheñeñ mellañoçeñ ñeñt po'cançhrrroña'pa' o' poçtorerrerr ñaña. Poçtora'huerrtserrpa' entoña'pa' atarr huomenc e'morrterrerr ñeñt eñoçetsa all ento. Ñeñt'pa' atet otenet:

Ñeñt allpon añcha'taretetyetsa arr patsro te'ña'pa' o'huañcha' allo'na añcha'taretetnenet tarro'mar ñeñt atto añcha'taretetyenetpa' ñeñt'pa' allochña añcha'taretterra Yompor epuet ñaña Puechemer ñeñt Cristo. Ñeñtcha' atto añcha'taretterra Yomporpa' ñeñt'pa' amach ahuañaña'tterro ama't errponaña.

¹⁶ Allempoña añ ñeñt epoch çharrasheña ñeñt pueçetsa pa'tats ñeñt anorrçhets all e'ñe ñet po'conañoçeto alloç sherbeñet Yompor all pue'ntaño, ñetña'pa' rrema'rrartenet Yomporeshoneç atet ma'yocheñet Yompor. ¹⁷ Ñetña'pa' atet otenet:

Pa Yompor ñeñteç atarr nanac Partsoç ñeñteç Yepartseshar yepeneç, ñeñteç çhocma eñalleç ama't ahuaçoteñ ñaña ñeñteçcha' alla huerrtserr po'poçheño añe patsro, yaña'pa' atarr yeparasyoso'teneç tarro'mar te'pa' o'ch alla po'paterra pa'pehuamenc attoçcha' o'ch alla atarr pa'mcha'taretterra.

¹⁸ Shonte' pa'namen acheñenesha', pa'namen anets allo'tsa'yenet, ñet pa'tsrre'mueñoçetpa' e'ñe e'moñe'tuenpet, tarraña te'pa' o' çhap allempoch peçoñchatuerranet. Ñaña te'pa' o' çhap allempo onañchareç añecop ñeñt colla'huetsa ahuaçoteñ allempoch peñoçatuerranet ñeñt atet pa'yesete't. Añña ñeñt torra'yestse't atto a'mtonapete't peñoñ ñeñt e'ñe peyochresha' pepe't, te'ña'pa' o' çhap allempoch petsa'tuerranet. Ama't allohuen ñeñt pame'ñaye't pa'ama't ñeñt atarr asherben entyesete't ñaña ñeñt ama asherben entete'te, te'ña'pa' o' çhap allempoch petsa'tuerranet allohuenet ñeñt pame'ñenaya pa'. Ñaña te'pa' o' çhap allempoch e'ñe pa'chencatuer allohuen ñeñt a'chencatañtetsa añe patsro.

¹⁹ Allempoña añ Yompor pa'paquell ñeñt ento'tsenpa' e'ñe cohuen atorarettena. O'ponoña all nentoñ Yompor po'tsapot all çhocma añño'tenet ñeñt aquellcareç ñeñt a'poçtat Yompor yocop. Allña'pa' meratstena, tatsllaren ma'moreten huomenc, pellena pats ñaña atet huechen huomenc.

12

Atto Juanpa' entan puesheñarr coyanesha' ñeñt emareç, pue'mareçollpa' ñeñtara Cristo, añyañña'pa' mueneñeñ o'ch añyañpes pue'mareçoll

¹ Allempoña all pue'ntañopa' all orrtena ñeñt ama't ahuata ama't puesheñarrofeyapa' ama yentare. Ñeñtpa' ñeñtcha'ña yeñotaterre' ñeñtcha' atet perra esempohuañen. Allñapa' all orrtena puesheñarr coyanesha'; añ po'cashe'm pen atsne'. Pa'rrpoñapa' allo'tsen ñaña arrorr. Poñotñapa' echoyo'met. Po'choyo'mopa' all orrtena çharra' ranto puechena epa. ² Ñeñña coyanesharpa' açhomen, o' çhen allempoch eñalletatan pue'mar. Atto atsotenana pue'marpa' çha rranare'tena, atarr allpatateñ pue'mar. ³ Allempoña all pue'ntaño all orrtena po'poñ ñaña ñeñt ama't ahuatapa' ama yentare. Ñeñtpa' añ orrtetsa añyañ ñeñt atarr añcha'noçhen. Ñeñt añyañpa' atarr añecmuen ñaña atarr tsama't orrtena. Poñpa' cançherrmaga. Cançherrmago'mar poñpa' e'ñe echoyo'metareroche'. Ñaña po'ucorpa' allo'tsen çharra'. ⁴ Pa'sme'll ñeñt chetare'tnen alloña tarra'huanenanña shonte' rantoçhno e'ñe a'shore'tuaneñ patso. Ñeñt allpon ranto ñeñt ento'tsen, allpon a'shore'tuaret ñeñt otenet la tercera parte. Ñeñña añyañpa' alla tomos e'ñe coyaneshesho ñeñt atsotenaya pue'mar all cohueñ ñerra'm o'ch eñalletatan pue'marpa' ñach añyañpse'. ⁵ Allempoña coyanesha'pa' o' eñalletatan pue'mar ñeñtpa' asheñorr. Allempo eñalletua ñeñt asheñorrofolpa' e'ñe allempocma a'tapachet Yompor po'conaño tarro'mar ñapa' ñach anarettertsa ñeñtcha' añcha'tarettertsa allohuen pa'namen acheñenesacop. E'ñech po'yoroçhennoñ añcha'taretterranet, atet ñerra'mrrate' ñapa' a'sreperet o'ch añcha'noçhtana'terranet. ⁶ Allempoña coyanesha'pa' allorocma o' yeta o' çhap allañar all amarato. Allña Yomporpa' e'ñe cohuen añño'tatoñ allcha' cohuañpeñet allcha' rrateñet allponmat yet ñeñt otenet mil doscientos sesenta yet.

Atto quellarenet Yompor pue'ntaño

⁷ Allempoña quellarenet Yompor pue'ntaño. Ñeñt pa'mcha'tareter pen allohuen ñeñt e'ñe cohuen mellañoñeñnesha'pa' añ pa'so'cheñ Miguel. ⁸⁻⁹ Miguelñapa' all quellara po'mllañoñeñnesharohuen. Quellareñet añyañ, añyaññapa' o' quellara ñaña pueyochreshohuen. Miguelpa' chetanna'tet parro epuet añyañ all Yompor pue'ntaño. Ñehua, ñeñt pueyochresha' pen añyañ ñeñtpa'çho'ña mellañoñeñnesha' tarraña ñeñt mellañoñeñerpa' ama cohuenayaye. Tarraña añyañ atto quellaran Miguelpa' ñapa' amagano. Ñeñto'marña añyañpa' huapore'chet ento't pueyochreshohuen a'shoraretterret patso. Attoña ahuaapore'tarettaña añyañ ama't atarr nanac añcha'noçheneñ. Ñehua, añyañpa' ñeñt shechep ahuatoteñ ñeñtara yoten oneñet ñaña ñeñt otenet Satanás ñeñt atarr ashcañtetsa ora errañaren añe patso.

¹⁰ Allempoña napa' o' alla ne'muerrerr po'poñ ñoñets ñeñt atarr e'morrtetsa huomenc all Yompor pue'ntaño. Ñeñt ñoñetspa' atet oten:

—Te'ñapa' po'ñoçh o' çhap allempoch queshpa'huerra allohuen acheñenesha' ñeñt pueyochresha' pen Yompor, tarro'mar o'ch alla o'paterrana po'huamenc e'ñe poc-tacma o'ch alla añcha'taretterra ñapueñ epuet Puechemer ñeñt Cristo ñeñt nen ña ñeñtcha' añcha'tarettapretenaya. Añ oneñet ñeñt çhocma atta toma'tamñesyene' masheñneshaçhno all Yomporesho yeto ama't ñaña tsapome'tets ñeñtñapa' o' ahua-pore'taretta. ¹¹ Ñeñt masheñneshaçhnor ñeñt ame'ñenaya Yompor, ñetñapa' o' e'ñe a'mchechueret oneñet ñeñt toma'tamñesyenahuet e'ñe atta. Añ a'mchechaterre' ñeñt atto Cristo rroma, ashataretta po'rras ñeñt toma'ntenaya Carrnero ñeñt muetsete't ochñartsocop. Ñaña añ a'mchechaterre' ñeñt atto masheñneshaçhno çhocma eñosyenet e'ñe cohuen ñeñt atet pena Cristo po'cohuenña. Ama't amuroçhtataretetyenetpa' ñetpa' ama queçhpueñeto atto eñosyenet e'ñe cohuen Cristocop, tarro'mar ñetpa' ama mecha'teneto ama't mamesha o'ch rromuet e'ñe pame'ñeñoñet Cristo. ¹² Atarr cosheñets

Yompor pue'ntañño allohuenacop ñeñt' allo'tsa'yen. Tarraña atarr llequëñets allohuenacop ñeñt' ye'cha'yetsa añe patsro ama't ñaña ñeñt' oño'tsa'yen. Tarro'mar oneñe'tpa' o' sohuanperranet e'ñe pa'tsrre'mueñesha'. Ñapa' eñoteñ e'ñech mameshapa' o'ch alla ahuapore'tare'terrerr.

Atto añyañpa' attera cotare'tenan coyanesha' ñeñt' o' eñalletatuan puechoyor

¹³ Allempoña añ añyañ ñeñt'ara oneñe't o' eñota ñapa' o' ahuapore'tare'tta ento't, ña pa'tsrre'mueño'tpa' o' alla cotare'terranerr coyanesha' ñeñt' o' eñalletatuan puechoyor asheñorro'toll. ¹⁴ Tarraña coyanesha'pa' allempo cotare'terrerr añyañpa' ñeñt'ña coyanesha'pa' o' apet eppa'ya pa'pue' ñeñt' atesha' contor pa'pue'. Ñeñt'pa' alloch anomam'psana po'yallop' ñeñt'ara añyañ o'ch sa'neñ o'ch chap ba'chayo all amarato all añño'teññañet ñocop e'ñe cohuen allcha' cohuanm'peñet. E'ñech ma'pa char ñaña po'poñerrerr pueshmet char, ñeñt'pa' allponmatcha' rrachet all. ¹⁵ Allempoña añ po'yalloppa' e'ñe puenamot' cha'nmatan shonte' oñ atet' ñerra'mrrate' po'ñes apellchetsa. Ñapa' cha otapañ ñeñt'cha' rremuerraya' coyanesha' ñeñt' cotare'ten attoch a'ño'shach. Tarraña ñeñt'pa' ama attetache. ¹⁶ Ama't patspa' yenpan coyanesha', attoña tara'nom all esha'tañña oñ e'ñe masohua ñeñt' allpon cha'nmat po'yallop' puenamot'. ¹⁷⁻¹⁸ Ñeñt'ña atarr atsrre'mate'ña añyañ, ello alla atarr e'moñe'terranerr coyanesha'. Allempoñapa' ahuo' allo'tsa'yen po'potantañ coyanesha' puechoyoresha' o'ch quellarosanet ñamet. Tarro'mar ñetpa'cho'ña chocma ame'ñeñet Yompor po'ñoñ ñeñt' atet' anaret' ñaña chocma coteññañet Jesucristo pocta'pña.

13

Atto Juanpa' entan berrma't ñeñt' atarr am'cha'no'chen ñeñt' cha'nets oño't

¹ Allempoña napa' natomos sa'patop'ño, allña'pa' nenterrerr berrma't atarr am'cha'no'chen ñeñt' cha'nmat oño't. Poñpa' can'cherrm'aga, po'ucorpa' 'charra'. Pate'tets po'ucorpa' e'ñe echoyo'metoche'. Puenm'aga'ttso all aquellcare't sochatse'teñets ñeñt' pa'namen sosya'tañ allo achm'are'teñet Yompor. ² Ñeñt'ña berrma't pue'moquër e'ñe atet' ñerra'mrrate' ma'yarr tarraña pa'tacñapa' e'ñe atet' ñerra'mrrate' orranatec. Puenampa' e'ñe atet' ñerra'm ma'ñorenam. Añyañña'pa' ñeñt' apue' po'huamenc, ap' ñaña llesens attoch am'cha'no'chtaprecha all po'conañño. ³ Puenm'agarr poñpa' all orrtena cha atserrpena nanac huomenc cha mettaguën ñeñt'cha' muetsayeñ tarraña ama rromo alla correrra. Ñeñto'marña allohuen acheñenesha' arr patsro ñetpa' atta cohuanrrorteñet cha otapuetañ ñato' chach rroma, tarraña ama rromo. Ñeñt' atto ama rromopa' acheñenesha'ña arr patsro ñeñt'ña ame'ñatenahuet. Ñetpa' otenapuetañ ñato' ñeñt'e'ña Parets. ⁴ Ñeñto'marña acheñenesha' ma'yochene't ma'yarrma't. Ñetpa' atet' otanna'tyeset: —Ama eñalle po'poñ ñeñt' nanac ahuamenca't atet' ñerra'm añ ma'yarrma't ñeñt' yenten. Ama't e'ñe eseshapa' amate' errotent' a'mchechachetoña añ ñeñt' atarr ahuamenca't.

Ama't añyañpa'cho'ña ñeñt' ma'yochena acheñenesha' tarro'mar añyañpa' ña ahuamenca't pe' ma'yarrma't.

⁵ Añyañpa' muenatenan ma'yarrma't o'ch ommo'chatse'tyesa. Pommo'chatse'teño'tpa' o'ch achm'are'tenan Yompor. Ñaña muenatan ma'yarrma't o'ch am'cha'tare'tta pa'tatsoch charraña ñaña puechena ep'ma arrorr. ⁶ Atet' pa' ma'yarrma't achm'are'tenan Yompor, sochatse'teññañ pa'so'cheñ. Ñaña Yompor pa'paquëll ñaña allohuen ñeñt' allpon allo'tsa'yen pue'ntañño e'ñe achm'are'tueñ. ⁷ Ñaña muenateñ o'ch quellaran ñeñt' pueyochresha' pen Parets. Ñaña muenateñ o'ch ganana Yompor pueyochresha'. Ñaña muenateñ o'ch am'cha'tare'tta allohuenacop ñeñt' pa'namen acheñenesha', allpon ñeñt' pa'namen mereñtsor ñeñt' e'ñe eñosyets po'poñe'ttso'cma

ñoñtso ñeñt ora allpon allemeñ anetso'mar. ⁸ Ora allohuen acheñenesha' ñeñt añe patsro'tsa'yen añach ma'yochenet ma'yarrma't tarro'mar ñeñt acheñenesha'pa' ama aquellcareteyayeto pa'so'cheñ Cristo po'libro all aquellcarettena allohuen ñeñt corretsetach ñeñt ame'ñenaya Cristo ñeñt amtsarettatsa ochñartsocop atet ñerra'm carrnero. Ahuat allempo errte' ayeçhcatareta pats, Cristoña po'libropa' all aquellcaret so'chñetsoçhno attochña ñetpa' corretsetach.

⁹ Ñerra'm esesha' e'mñotene' añ ñoñets, çhapoñepa'ch pueyoçhro ñeñt atet yeçhateney añ ñoñets. Ñeñt ñoñetspa' atet oten: ¹⁰ Ñerra'm esesha' rromanateney po'potantañ attoch yottam̄psatanet, ñetpa'çho'ña ayottam̄psaretterretcha'. Ñaña ñerra'm esesha' muetsanateney po'potantañ espado, ñetpa'çho'ña amtsaretterretcha' espado. Ñeñto'mar añ ñeñt poctetsa yocop e'ñe yeyemteñoñ Yompör o'ch ya'huanten acoçpoteñ ñerra'm es yehuapoya, allohueney ñeñtey o' pueyoçhresha' perrey Parets.

Atto Juanpa' entan po'poñ berrma't ñeñt çha'nets o'ponot patsot

¹¹ Allempoña na allpa' nenterrerr po'poñ ñeñt berrma'ttetsa. Ñeñtapa' arroç çha'nom o'ponot patsot. Ñeñtña' e'ñe epa po'ucor atet ñerra'm carrnero po'ucor, tarraña ñeñtapa' atarr amcha'noçhen eñen e'ñe atet eñen ñerra'mrrate' añyañ eñoretsa. ¹²⁻¹³ Ñapa'çho'ña atarr amcha'tarettata e'ñe atet amcha'tarettena ma'yarrma't ñeñt ñanom nent ñeñt çha'nmats oñoñ. Allña' amcha'tarettapretenana ñeñt ma'yarrma'ttetsa all. Ñeñt çha'nmats o'ponot patsot ñeñtña' muenatenan allohuen acheñenesha' ñeñt añe patsro'tsa'yen o'ch ma'yochyet ñeñt ma'yarrma't. Ñeñtara ma'yarrma't ñeñt corrrrtsa e'ñe mamecma allempo mettaguën. Ñeñt atto mettaguën ñeñtcha' muetsayeñ tarraña ñapa' ama rromo. Añ berrma't ñeñt çha'nmats o'ponot patsotpa' ñerra'm esempo allo'tsen parro epuet ma'yarrma't ñaña' eñall attoch orrtatenan acheñenesacop pa'namen ñeñt ama puentareto ama't ahuaña. Attoña a'shoran entoç huorte' tso' ñeñtña' tso' huorte'pa' o' e'ñe çhap patso allña' cohuanrrortatan shonte' acheñenesha'. ¹⁴ Ñeñtña' allo shequënan shonte' acheñenesha' ñeñt añe patsro'tsen. Ñeñto'marña ñerra'm allempo otenan acheñenesha', o'ch seyeçhcat ma'yarrma't, ñetña' e'ñeçh pocte' enteñet. Añ ñeñtara ma'yarrma't ñeñt metto'ten espada tarraña ñapa' e'ñe mamecma o' alla corrrera. ¹⁵ Añña berrma't ñeñt çha'nmats o'ponot patsot ñeñtña' muenateñet o'ch o'rrerratan ayeçhcataret ñeñt toma'ntatenet ma'yarrma't. Allochña' attoch eñorana'tanet pueyeçhcatar. Ñaña ma'yarrma'tpa' atet nanet po'ñoñ, ñeñtapa' atet oten: Ñerra'm esesha' ama ma'yochenaye ayeçhcataret muetsanachetepa'ch. ¹⁶⁻¹⁷ Elloña' oterranerr acheñenesha':

—Te'pa' o'ch seyaco'mta'tyesa sotoç secohuenroç amapa' arr seto'mo'mar. Allcha' sena'yeson neso'cheñ amapa' sena'yeson ñeñt nenúmero nepen. Atet p̄atan allohuen acheñenesha' ama't ñeñt ama esoshe'mayaye acheñ, ama't ñaña ñeñt atarr sherbets, ama't ñaña acheñ ñeñt atarr eçllayoreç, ama't ñaña ñeñt atarr huocchañetets, ama't ñaña acheñ ñeñt e'ñe cohueno'tsen, ama't añ acheñer ñeñt ataruasataret e'ñe atfa. Allohuen acheñenesha' ñeñt ama ayaco'mta'tarete all neññañet ma'yarrma't pa'so'cheñ amapa' ñeñt po'número pen ma'yarrma't, ñetña' amach errotenoç es pomueneto ñaña amach errotenoç es rañteneto ñeñt muenenet ñet. ¹⁸ Ñehua, ñeñt allpon po'número pen ma'yarrma'tpa' ñeñtapa' allo'tsen seiscientos sesenta seis. Ñeñt número añ toma'ntena puesheñarr acheñ pa'so'cheñ ñeñtcha' ñanom orrrerrtsa tsapatonet. Ñerra'm esesha'ch atarr es eñoterrets eñoterrñañetepa'ch pa'so'cheñ ñeñt atma'ntataret añ número.

14

Allempo Juanpa' entan Cristo ñeñt atma'ntataret Carrnero, all ten Siónaño epuet ñaña shonte' acheñenesha'

¹ Allempoña na cohuerrotsanerrpa' alla nentererr Cristo all ten Siónaño. All or- rtena e'ñe atet orrtena ñerra'm Carrnero. All tomchen ñaña shonte' acheñenesha'. Ñeñt acheñenesha'pa' allo'tsen ciento cuarenta cuatro mil acheñenesha' ñeñt emchor- renaya Cristo. Ñeñña acheñenesha'pa' e'ñe ayato'ma'taretoche'. Pueto'muetopa' all na'yehñañet Cristo pa'so'cheñ ñeñt atma'ntataret Carrnero, ñaña Pompor pa'so'cheñ ñeñtara ya Yeyomporer. ² Allña'pa' ne'muen ñeñt huomenc e'morrtetsa, arrot huena entot. Atarr huomenc e'morrtena atet ñerra'm all etsase'tena shonte' oñechno ñeñt atarr huomenc ma'moretets. Po'ma'moreteña'pa' atarr huomenc e'morrtena cha ottena ñerra'm cho tecor-rraren huomenc ñeñt yoten tatsllare'. Ñeñt ma'moretets all añepa't ma'moretets ñeñt shontetsa acheñenesha' all añepa't a'ma'moretenet arpa. ³ Allña'pa' cohuentatenet morreñets ñeñt e'ñe etserra morreñets all Yompor po'conaño. Allo'tsen ñaña pa'tatso'mar ñeñt berrma'ttetsa, ñaña allo'tsa'yen ñeñt sherbene' Yompor ñeñt epoch charra' ñeñt puechetsa pa'tatssheña. Ama't e'ñe puesheñarrapa' ama eseshaye' yechenayeña añ morreñets ñeñt etserra. Añña eñotene' ñeñt ciento cuarenta cuatro mil acheñenesha' ñeñt a'queshpatarettetsa añe patsrot. ⁴ Ñetpa' ama a'sosyateneto atto yorayeñet coyanesha' tarro'mar ñetpa' e'ñe cohuen correnet. Ñetpa' añ e'ñe cohuen cofenet Cristo ñeñt toma'ntenaya Carrnero. All ama't erra muene' sen Cristo, ñetña'pa' e'ñech co'a'neñet cohuen. Ñetpa' e'ñe ñanom a'queshpatarettet attoña ñetpa' anarettenet atet ñerra'mrrate' ñeñt ñanom yapueñ Yompor ñeñt atarr cohuen, ñeñtara o'patena ñaña Cristo ñeñt atma'ntataret Carrnero. ⁵ Ama't puesheñarrofetapa' ama shequëneto ama't e'ñe mamesha. Ñetpa' e'ñe cohuen orretyenet amach errotenot otteñe'chare'tterreto ama't ahuata all Yompor po'conaño.

Allempo Juanpa' enterranerr ma'psheña mellañoñeñ ñeñt eñosyetsnets anoma'matot

⁶ Allempoña napa' alla nentererr po'poñ mellañoñeñ all anoma'mtena allpononet enonet. Ñapa' ñeñña serrpare'tatenahuet cohuen ñoñets ñeñt ama ahuañaño ñeñt alloch yequeshperra. Añ cohuen ñoñets ñeñtcha' serrpare'tatan allohuen pa'namen acheñenesha' ñeñt ye'cha'yetsa añe patsro, ama't ora allemeñ pa'namen anetso'chno ñeñt pa'namen mereñtsore'chno ñeñt eñosyets e'ñe po'poñe'ttsocma ñoñtso. ⁷ Ñeñt atto anoma'mtena all, eñosnen, atarr huomenc e'morrtena, ñeñt'pa' atet otnen:

—Sem'cha'na'chepa'ch Yompor, chochña secohuentatoñ tarro'mar te'pa' o' chap allempoch entyesas e'ñe puesheña'ttsos erro'tente' se'pa'yena. Te'pa' ñachña sema'yocha ñeñt ye'chcate' enet ñaña ñeñt ye'chcate' pats, ñaña oñechno ama't allot potayen oñ.

⁸ Allempoña'pa' alla co'a'nererr po'poñ mellañoñeñ ñeñt puepañ mellañoñeñ. Ñapa'cho'ña eñosnerrerr, ñeñtña'pa' atet otnom:

—Te'pa' o' ahupore'taretta añ anets ñeñt atma'ntataret Babilonia ñeñt nanac atarr anets. Tarro'mar ñeñt'pa' añ ye'chatyenan ora allpon po'poñe'chno anetso'chno ñeñt atarr sosya'tsa'ne'chno ñeñt atet muenatse'tatyenanet ñet po'chets.

⁹ Allempoña'pa' alla co'a'huererr po'poñ mellañoñeñ ñeñt poema'pañ. Ñapa'cho'ña eñosnerrerr, po'ñoñpa' atarr huomenc e'morrtena, ñeñtña'pa' atet otnerrerr:

—Ñerra'm esesha' ma'yochenaya ma'yarrma't amapa' aye'chcataret ñeñt toma'ntenaya ma'yarrma't, amapa' ñerra'm esesha' muenatenet o'ch yaco'mta'chet ma'yarrma't pueyotsaparo amapa' pueto'mo ayato'ma'taretta, ¹⁰ ñetña'pa' a'coñchataretterretcha', tarro'mar Yomporña e'ñe po'yoro'chenño'pa' ñachña e'ñe coñchatuerrahuet e'ñe poctacma. Tso'pa' ñeñtcha'ña muero'chtatuerrahuet ñaña ñeñt epuet huorten tso'pa' ñeñt'pa' atarr shemasher ñeñt otenet azufre. Allcha'

a'coñchatareñterret, allotcha'ña cohueretña allohuen mellañoñeñnaneshachno ñeññ pueyochresha' pen Parets. Cohueretcha' ñaña Cristo ñeññ atma'ntatareñ Carrnero. ¹¹ Attoch achamareñterret, tso'ñapa' chepoten pamosoñ enoneñ ñeñññapa' amach ahuañañañterro ama't errponaña. Amach huañerro ama't mamesha ñeññ atto a'coñchatareñtenet ama't yeño ama't ñaña tsapo. Tarro'mar ñetpa' aña ma'yochenet ma'yarrma't ñaña ayeçhcatareñ ñeññ toma'ntenaya ña. Ñaña muenateñet acheñ o'ch yaco'mta'chet o'ch noñet pa'co'meto ma'yarrma't pa'so'cheñ amapa' pueto'mo. Arrpa' allohua ñeññ atet ot mellañoñeñ ñeññ anoma'mtetsa eno'mar.

¹² Ñeñto'marña allohueney ñeññey e'ñe pueyochresha' peney Parets ñeññey ame'ñenaya Yompor po'ñoñ ñeññ atet oteney ñeññey e'ñe yemtenaya Jesús, yocopñapa' añ poctetsa o'ch ya'huanta'huen e'ñe acoña ñeññ allpon pa'namen es yehuenoya.

¹³ Allempoña na allpa' ne'muerrerr ñoñets arroñ huena entot, ñeññpa' atet oten:

—Te'pa' o'ch pequellca' añ ñoñets: “Te'ñapa' atarrcha' cosheñtso'tsa'yen allohuen ñeññcha' rromayets e'ñe pame'ñeñoñet Yepartseshar Jesucristo.” Po'ñoñch atet oten Yompor Puecamquëñ, ñetpa' amesatareñterretcha'. Te'pa' amach alla torrerrete'te tarro'mar ñeññ allpon o' torra'yenet añ patsro, ñeññpa' e'ñe eñotuareñ all Yompor pue'ntaño.

Attoch çherr ñeññeñpo allempoch apçherret narmets ñeññ o' pomella'huen

¹⁴ Allempoña na cohuerrtsanerrpa' nenterrerr os atarr huallama't. Ñeññña ospa' all anen puesheñarr ñeññpa' añepa't Jesús ñeññara Ñeññ Acheñetosets arr patsro. Ñeñññapa' echoyo'met, ñeññña po'choyo'mpa' oro ñeññ choyo'mtena. Potoññapa' orrenan cochell ñeññ atore'gorroñ ñeññ atarr nanac etsotañ ñeññ otenet hoz. ¹⁵ Allempoña Yompor pa'paclo'tpa' cha'nom po'psheñeñ mellañoñeñ. Ñañaapa' otosan ñeññ anets oso. Po'ñoññapa' atarr huomenc e'morrtena, ñeññpa' atet otenan ñeññ anets oso:

—Pamat pocchello ñeññ pomellets allochñapa' o'ch pa'yapache' tarro'mar o' chap ñeññeñpo allempo yapçhen ñeññ o' pomella'hua yenarenñ.

¹⁶ Allempoña ñeññ anets oso, ñañaapa' o'cho' amatan ñeññ o' pomella'huen ora eraparen aña patsro. Ñañaapa' o' a'yapachan allemateñ ñeññ pomellets aña patsro.

¹⁷ Allempoña cha'nerrerr po'psheñeñ mellañoñeñ Yompor pa'paclo't ñeññ ento'tsen. Ñapa'cho'ña orrenan po'cchell ñeññ atarr nanac etsotañ. ¹⁸ Allempoñapa' cha'nerrerr po'psheñeñ mellañoñeñ. Ñapa' arroñ huapa allo'tsen altar. Ñañaapa' ñeññ ahuamencattetsa attoch pomnaren penan tso'. Ñañaapa' otan ñeññ occhellet. Po'ñoññapa' atarr huomenc e'morrtena, ñeññpa' atet oten:

—Te'pa' o'ch pamat pocchello ñeññ atarr nanac etsotañ o'ch papçha' allo puechma'tets uva ñeññ aña patsro'tsen tarro'mar o' atarr nanac yen.

¹⁹ Ñeññña mellañoñeñ atet oteñetpa' atetcho' pa. Allempoña amatan po'cchello uva ñeññ aña patsro'tsen o'cho' a'yapachach. A'yapachatuepa' o' shontanña uva allcha' atmama'chet attoch cha'nmatoñet po'ñer. Ñeñññapa' añ toma'ntena atto Yompor po'yoroçhenñotpa' atarrcha' coñchaterran acheññenesha'. ²⁰ All atmama'teñet uva, poccolotpa' tama a'yente'tsen. Ñeññ atto cha'nen uva po'ñer ñeññpa' añ toma'ntena o'ch chorrerr errasats arr patsro a'yohuen ñeññ allohuanen trescientos kilómetros ñaña enoneñ chapcha' e'ñe cahuall po'frenohua ñeññ çhets e'ñe yelleca'nohua.

15

Allempo Juanpa' enterranerr cançherrsheña mellañoñeñ, ñetpa' o'ch orrtaterret ñeññcha' amueroçhtatañterrtsa

¹ Allempoña all ento napa' o' nenterrerr po'poñ ñeññ atarr yoroçhen ñeññ ama yentare ñeññcha' yeñotaterre' ñeññcha' atet perra esempo. Nenterrerr

mellañoñeñesha' cancherrsheña. Ñetña'papa' allsensareñtenet attoch orrtaterret ñeññcha' amuerochtatañterrtsa. Puesheña'ttsetpa' orrtaterretcha' ñeññcha' amuerochtatañterrtsa e'ñe po'poñe'ttsocma cancherrsheño'maret. Allempochña etsotuerra allohuen ñeññcha' atto Yomporpa' yoroçhtater.

² Allña napa' nenterrerr ñeññ atet orrtetsa erracmañen atet ñerra'mrrate' ñeññ añecmuen rerpat e'ñe atet huorten atet ñerra'm tso' huortets all. Allñapa' all tomchen allohuen acheñenesha' ñeññ e'ñe metana'tue' ora allpon ñeññ atet topatyenanet ma'yarrma't ñaña ñeññ pueyeçhcatar. Ñetpa' ama ayato'ma'tareteyayeto ma'yarrma't pueyotsaparo attoch noñet pa'so'cheñ amapa' ñaña po'número. All tomchenet e'ñe arpatochet ñeññpa' Yompor apuenahuet. ³ Ñetña puenñtana'tueñoñet allohuen topateñets morrechenet Moisés puemorreo ñeññ Moisés ñeññ atarr torratse't Yomporecop. Pa'queshpatareñeñet morrechenet ñaña Cristo puemorreo ñeññ toma'ntenaya Carrnero. Ñeññpa' atet açhoteñet Yompor:

Yompore, ñeññep nanac Partsoñ pa' ñeññep Yepartseshar yepen, atarr echarr es petso-tatyen, atarr coçhneshare' es peña'yen. Pa' ñeññep Pa'mcha'tareter pen allohuen pa'namen acheñenesha' ñeññep e'ñe pocte' es peña'yen. Ñaña e'ñe po'ñoçh atet ñeññ allpon es potyen.

⁴ Allohuen acheñenesha' e'ñe añcha'na'tpo' entenpet, Yompore. Ama't puesheñarrapa' ama eñalle ñeññ ama añcha'na'tpahuoye' pentenaye, Yompore. Allohuen acheñenesha'pa' e'ñe paptá cohuentatennapet, tarro'mar e'ñe paptá pa' ñeññep atarr Partsoñ. Tarro'mar allohuen acheñenesha' ñeññ pa'namen anetsoñ huaçha'tetcha' pesho attoch ma'yochapet pa' e'ñe papuet tarro'mar ñetpa' o'taya çhapanet pueyoçhro atto paptá e'ñe cohuen pocte' es peña'yen.

⁵ Allempoña napa' cohuerrtsanerr nenterrñañerr Yompor pa'paquell ñeññ pue'ntaño'tsen. Ñeññña pocoll popellrrarpa' e'ñe cohuen atorareñ. O'ponoñapa' allo'tsen all añño'tenet mapuettall ñeññ allo aquellcareñ Yompor po'ñoñ ñeññ atet anareñ ama't ahuatoteñ. ⁶ O'ponoñña Yompor pa'paclotpa' çha'nmaçherrerr ñeññ cancherrsheña mellañoñeñesha'. Puesheña'ttset orrtaterretcha' ñeññcha' amuerochtatañterrtsa e'ñe po'poñe'ttsocma cancherrsheño'maret. Añ chorra'yenet ñeññ atarr nanac cohuen ñeññ otenet lino ñeññ ama asosyatño ama't e'ñe mamesha. E'ñe cohuen poptama'tyena. Achanaretareret, po'chanaretpa' orotommuenare' ñeññ allo chana'yenet puesomapo.

⁷ Allempoña añ ñeññ pa'tatso'mar berrma't, paterrña'apa' apa'yesan mellañoñeñesha' cancherrsheño'mar pajo'. Apa'yesanet puesheña'ttset po'pajo' ñeññ orotaten. Ñeññña pajo'pa' all e'chorrayesareñ alloch coñchaterran Yompor pa'namen acheñenesha' ñeññ añe patsro'tsen, ñeññara Yompor ñeññ ama arromñateshayaye ama't errponaña ama't ahuata. ⁸ Allña Yompor pa'paclo e'ñe chorren amos. Ñeññña amospa' añepa't ottetsa Yompor po'cohuenña ñaña po'partsoña. Allñapa' ama't puesheñarrapa' ama muenateñeto o'ch be'toset all Yompor pa'paclo tarremphuach esempoch orrtatan ñeññ cancherrsheña mellañoñeñesha' muerochteñets. Allempochña be'toscherret all Yompor pa'paclo.

16

Allempo Juanpa' enterranerr cancherrsheña mellañoñeñ ñeññ echene' po'pajotollesha' all na'yenet ñeññcha' amuerochtatañterrtsa pa'namenot

¹ Allempoña napa' alla ne'muerrerr ñoñets ñeññ e'morrtetsa huomenc Yompor pa'paclo. Ñeññña ñoñetspa' atet otenan mellañoñeñesha' ñeññ cancherrsheña, atet otenanet:

—Te'pa' o'ch sahuanna allcha' seyo'panat errañaren patso ñeññ sena'yen sepa-jotollesho ñeññ cançhro'mar attoch sorrtaño Yompor po'yoroçhenña.

² Allempoña puesheñarr ñanom mellañoñeña' o'cho' ahuo'. Allña'pa' yo'posan ñeñt' po'pajotollo'tsen patso. Allempo chap patsopa' ñeñt'ña'pa' orrtatan puetsarñats ñeñt' ama amapoçhatatañe ñeñt'pa' ama eñalle pa'par alloch partet attoch metuerranet. Ñeñt'pa' aña a'ptsarsat ñeñt' ayato'ma'tarefetyetsa ma'yarrma't pueyotsaparo ñaña ñeñt' ma'yochenaya ayeçhcataret ñeñt' toma'ntatenet ma'yarrma't.

³ Allempoña po'psheñeñ ñeñt' puepañ mellañoñeña' o'cho' ahuererr o'ch yo'puenana' oño ñeñt' po'pajotollo'tsen. Allempo yo'pos oño all atarr sa'po, oñña'pa' cha errassastach, e'ñe atet orrta ñerra'mrrate' arromña't po'rras. Ñeñt'ña'pa' e'ñe a'cllatuosan allohuen ñeñt' allpon yeçhetsa all oño'mar.

⁴ Allempoña ñeñt' puema'pañ mellañoñeña' o' ahuererr ñaña o'ch yo'puenana' ontapo ñeñt' po'pajotollo'tsen ñaña allot potayen oñ. Ñeñt'ña' allempo ayo'paretta oño cha a'pnasatosan oñ errasats. ⁵ Allempoña napa' ne'muen ñeñt' atet otenan mellañoñeñ Yompor. Ñehua, ñeñt'ña' mellañoñeña' atarr ahuamencat attoch pomnaren penan ora allohuen oñeçhno. Ñeñt'ña' mellañoñeña' atet otenan Yompor:

—E'ñe pocte' Nompore ñeñt' atet peçoñchatyenenet, pa' ñeñtep' chocma eñallep' ama't ahuatoteña' ñeñtep' atarr nanac Partsoþ. ⁶ Tarro'mar acheñenesha' ñeñt' pe'moñe'tene'pa' chocma muetsanatennapet ñeñt' peyochresha' pepen ñaña ñeñt' a'mta'yene' peñoñ, chocma shatyeññañet po'rras. Te'ña pa'pa' o' ponerranet errasats. Ñeñt'pa' e'ñe pocte' tarro'mar ñetpa' añ o' þohuet ñeñt' ama pocteye' penteno pa'.

⁷ Allempoña e'morrterrerr ñoñets arr e'morrta altarot, ñeñt'ña'pa' atet oten:

—Attesha' Yompore, pa' ñeñtep' atarr nanac Partsoþ ñeñtep' Yepartseshar yepen. Ñeñt' atto pentyenenet ñeñt'pa' e'ñe po'ñoçh atet, e'ñe pocte' ñeñt' atet o' peçoñchaterranet.

⁸ Allempoña po'psheñeñ mellañoñeñ ñeñt' puepa'tatseñ o' yo'puerranerr ñeñt' po'pajotollo'tsen. E'ñe arr yo'pue' allo'tsen ñeñt' yeçhoyo'tamþene'. Ñeñt'cha' ahuamencat pe' atsne' attoch chemuerran acheñenesha' atet ñerra'm tso'. ⁹ Acheñenesha' ama't atarr etomuenanetaña' atsne'pa' tarraña ama es queçhpuenayeña ñeñt' atet correnet sosya'tsañeçhno. Ama eseshaye' coþape'cherraye cohuen Yomporecop attoch cohuentateññañet Yompor. Elloña ñetña'pa' atarr nanac achmare'teññañet Yompor pa'so'cheñ ama't ñeñt' atarr ahuamencattetsa atto chapatanet ñeñt'cha' muerochtaterrahuet.

¹⁰ Allempoña po'psheñeñ mellañoñeñ ñeñt' pa'mnareñ, ñapa'cho'ña o' yo'puerranerr ñeñt' po'pajotollo'tsen. E'ñe arr yo'pue' ma'yarrma't po'conaño all añcha'tarettena. Ñeñt'ña' all añcha'tarettenapa' cha a'cheçmetue. Acheñenesha'ña allpa' epaye' muerochtatetanet pa'namen atserrpeñets. Ñeñt' atserrpeñetspa' cha muellatstame'tatyesanet, açhañeñe'chatyesanet atserr. ¹¹ Tarraña ñetpa' ama't atet o' aparettetaña' ama queçhpuenetoña ñeñt' atet þatse'tyenet sosya'tsañeçhno. Elloña ñetpa' allo'na achmare'tneñet Yompor ñeñt' ento'tsen ñeñt' atto atserrpenanet puetsarñats.

¹² Allempoña ñeñt' po'pechapueñ mellañoñeñ, ñapa'cho'ña o' yo'puerranerr ñeñt' po'pajotollo'tsen. Arr yo'pue' po'ñeso ñeñt' añecmuen atarres ñeñt' po'ñes añ pa'so'cheñ Eufrates. Yo'pose'pa' cha emasa'huosanña po'ñes ama't atarr añecmuen. Ñeñt'ña' allot masohuapa' ñeñt'ña' toñeterrets ñeñt'ña' pa'tep' perret allcha' oñem añcha'tareteçhno ñeñt'cha' huaçha'ttsa allot huena atsne'.

¹³ Allempoña napa' nenterrerr añyañ epuet ma'yarrma't epuet ñaña ñeñt' a'mtene' ma'yarrma't po'ñoñ añe patsro tarraña ñeñt'pa' ashcaña. Ñetña' e'ñe puenamotetpa' cha'nmatyeset puesheña'tets oneñe't ñeñt' ama mapoçho. Ñeñt' oneñetpa' ma'psheña. Ñetña'pa' e'ñe atet orretyenet ñerra'mrrate' rrehuancro. ¹⁴⁻¹⁶ Tarraña ñeñt'pa' oneñetca'ye ñeñt'cha' orrtaterre' ñeñt' ama puentare allohuen acheñenesha' ñeñt'cha' cohuanrrortaterrahuet. Ñetpa' o'ch chopeñe'chyerret erracmañen attoch apçheret

allohuen ñeñt̃ añcha'tareťetyetsa añe patsro. Allochñapa' attoch quellareret Yompor ñeñt̃ atarr ahuaencať, attoch quellaret allempoch čherr ponañcho ñeñte yetroch yoročhtater Yompor. Allohuen añcha'tareťnesha' ñeñt̃cha' quellarerre' Yompor, arrcha' apčhatareťterret anets ñeñt̃ pa'so'cheñ Armagedón, allotcha' quellareret Yompor. Añ Armagedónpa' ñeñt̃pa' hebreonesha' sochene' añ ñeñt̃ anetser. Ñehua, o'ch neyerpatasa ñeñt̃ atet̃ ote't̃ Yepartseshar Jesús, ñapa' atet̃ ote't̃: "Señochepa'ch napa' e'ñech machayota nohuerra atet̃ ñerra'mrrate' eñet̃ amach esesha' eñotenaye esempoch huapa. Tarraña atarr cosheñtso'tsa'yen ñeñt̃ chocma neñose'rttenaya ñeñto'marña ñetpa' e'ñe cohuen añño'tenet pa'shtam ñeñt̃cha' chorra'nmuet allochñapa' amach muelle'mcota čha'nmueto amach čha apencočhterreto."

¹⁷ Allempoña po'psheñeñ mellañoťeñ ñeñt̃ pocančhroñ, ñapa'cho'ña o' yo'puerranerr ñeñt̃ po'pajotollo'tsen. E'ñe arr yo'pue' mörresho. Allempocma e'morrta ñoñets ñeñt̃ huetsa Yompor po'conañoť ñeñt̃ pa'paclo'tsen all pue'ntaño. Ñeñt̃ña ñoñetspa' atarr huomenc e'morrtena, ñeñt̃pa' atet̃ oten:

—Te'ña po'ñočpa' o' etsotuerra, huañerrcha' ñeñt̃ ahuaťoteñ.

¹⁸ Allempoñapa' meramerta o' tatsllares, e'morrta ñaña ñeñt̃ ma'moretets, atarr huomenc e'morrtena. Puetalle'cha ñaña pats nanac huomenc ñeñt̃ ama't ahuaťapa' ama atet̃ pueparo allempoteñ e'ñe pa'motroteñ eñalleta acheñenesha' arr patsro.

¹⁹ Añ ñeñt̃ atarr anets ñeñt̃ atma'ntatareť anets Babiloniapa' ñeñt̃ña anetserpa' o' rrara'pes ma'pshemta. Ama't ora allpon pa'namen anetsočhno añe patsro all shonta'yena pa'namen acheñenesha', ñetpa'cho'ña e'ñe ñegatañpesuahuet. Yomporpa' añcha' yerpaterranet ñeñt̃ allohuen allpon p̃atse'tyenet ñeñt̃ atarr sosya'tsañ all atarr anetso ñeñt̃ atma'ntatareť Babilonia. Ñeñt̃ allpon allohuen allo'tsa'yenet e'ñe coñchatuerranet Yompor, o' e'ñe tsa'tatuerranet po'yoročhenño. ²⁰ Allempoña ama't ñeñt̃ rročhpe'chañečhno ñaña aspenťečhno o' e'ñe chenca'huerra. ²¹ Shora'nom ñaña entoť hue' ñeñt̃ atarr añecmuesheñ ateshamerr. Pate'tetspa' eñerrtena cuarenta kilo. Ñeñt̃ña e'ñe a'tpetse'tuose' allohuen acheñenesha'. Allempoña ñetpa' atarr achm̃are'teñet Yompor tarro'mar o' coñchaterranet atarr huomenc.

17

Attoch a'coñchatareťterra coyanesha' ecañoreshať ñeñt̃ toma'ntenaya anets Babilonia all ama esesha' yerpa'penayo Yompor

¹ Allempoña mellañoťeñ ñeñt̃ cančherrsheña ñeñt̃ echyene' po'pajotollesha', puesheñarrñapa' o' huapa. Huapa neshopa' otosen:

—Te'pa' o'ch p̃oc̃ta'n o'ch negatenpa' allcha' a'coñchatareťta añ coyanesha' ñeñt̃ atarr ecañoreshať ñeñt̃ ame'ñatenaya pa'namen añcha'tareťnesha' ñeñt̃ pa'namen anetso'tsa'yen e'ñe allohuanen čhen oñečhno añe patsro. Ñapa' po'conañ penan oñečhno all anen. ² Ñeñt̃ añcha'tareťetyetsa añe patsropa' pame'ñeñoťet ñetpa' e'ñe po'cañoreshacma peñet ñeñt̃ coyanesha'. Allohuen ñeñt̃ añe patsro'tsen acheñenesha' e'ñe a'posa'tuenanet tarro'mar ñeñt̃ atto cañoresha'tenanet ñeñt̃pa' čhochña a'posa'tenanet attoch e'ñe cohuen ame'ñeñet.

³ Allempoña ñeñt̃ mellañoťeñpa' arr anmuen amarato, e'ñe Yompor puecamquēñoť anmuenet. Allñapa' nentos puesheñarr coyanesha' ñeñt̃ anets berrma't pa'che'ño. Ñeñt̃ berrma'tpa' atarr añcha'nočhen, atarr tsañnanen. Poñpa' cančherrm̃aga, po'ucorñapa' čharra'. Ora pue'mocro'marpa' e'ñe aquellca'huaret̃ allemeñ. Ñeñt̃ña quelledpa' allo sochatse'teñet Yompor. ⁴ Ñeñt̃ña coyanesha'pa' añ chorrena yetsñorromamuen epuet tsamamuen. Ñaña allo añño'tena ñeñt̃pa' atet̃ ñerra'm orollmemen ñeñt̃ atarr cohuen, ñaña mapyellmetollesha' ñeñt̃ nanac poptallme'chyetsa ñeñt̃ nanac tsa'te' ñaña po'ser

ñeñt atarr cohuen orrtatene' ña. Potot orrenan po'pajo' orotaten. Ñeñt pajo'pa' e'ñe e'chorrenan pa'namen sosya'tsañechno ñeñt atarr yetsena'ten ñeñt atto nanac cañoresha'ten. ⁵ Pueto'mpa' aquellcato'ma'taret. Añ so'chñets ñeñt quellquënet allpa' ñeñtpa' attoch eñotatanet ñeñt ama e'ñeye' eñotpahuo, ñeñtpa' atet oten: "Añpa' ñeñt toma'ntenaya anets Babilonia ñeñt nanac atarr anets ñeñtara pachor pen ñaña allohuen ñeñt atarr ecañoresha' ñaña pa'namen sosya'tsañechno ñeñt atarr yetsena'tyen arr patsro." ⁶ Allempoña ñeñt coyanesha'pa' neñoch atarr posa'ten. Ñaña'pa' añ posa'tena errasats ñeñt po'rras ñeñt muetsanate't ñeñt pueyochresha' pen Parets tarro'mar ñapa' atarr cohuen entenan o'ch muetsachet ñeñt serrpare'tene' atto ame'ñeñet Jesús. Allempo neñch ñaña'pa' atta necuana'ch ñeñt coyanesha'. ⁷ Ñaña allempo mellaño'feña' o' alla oterren:

—¿Eso'mare'tña atta pecuana'teñ? Te'pa' o'ch neñotatañ ñeñt toma'ntena añ coyanesha' ñaña ñeñt toma'ntena añ berrma't ñeñt allo anen ñeñt cancherrmaga poñ, po'ucorñapa' charra'. ⁸ Añ berrma't ñeñt penten, ñeñtpa' añ toma'ntena ñeñt corratset' ahuañmo'cha te'pa' ama eñalle o' rroma. Tarraña o' mameshamerra o'ch alla tanterra o'ch cha'nerr arrotot. Tarraña ñeñtpa' mamecpach atet perra, ellochña o'ch alla rromuerrerr. Allempochña o'ch chenca e'ñe poctacma. Acheñenesha' ñeñt ye'cha'yetsa añe patsro ñeñt ama ame'ñetso ñetñapa' atarrcha' cohuanrrorteret añ berrma't tarro'mar ama puentareto ñeñt atet pena añ berrma't. Ama't ñeñt corratset' arr patsro, tarraña ahuañmo'chapa' o' rroma. Ama't o' rromhuañ tarraña o' alla orrterrerr. Ñeñto'marña acheñenesha'pa' atarr cohuanrrortet. Ñehua, ñeñt cohuanrrortene'pa' ama aquellcareteyaye pa'so'cheñ Yompor po'libro all aquellcarettena pa'so'chñechno ñeñt pueyochresha' pen Yompor; ñetñapa' corretsetach errponañohuen. Ñeñt ama ame'ñetso ama aquellcareteyayeto pa'so'cheñ ahuañmo'cho'ñeñt allempoteñ e'ñe errte' aye'chcataretetsa pats.

⁹ Te' ñeñtcha' neñotatappa' o'ch poctape'ch e'ñe cohuen esheccha' peñot ñeñt atet toma'ntena añ berrma't poñechno. Ñeñt penten cancherrmaga poñ, ñeñtpa' añ toma'ntena cancherrpena aspenet all ye'chena añ coyanesha'. ¹⁰ Toma'ntenana ñaña cancherrsheña ñeñt añcha'tarettetsa añe patsro. Tarraña amnarsheña'pa' o'huañ añcha'taretteta. Te'pa' o' puesheñarraña añcha'tarettetsa. Tarraña puesheñarmeñ palltena ama orrtena'. Tarraña esempoch orrtapa' amach atarr atomat añcha'taretto. ¹¹ Ñaña añ berrma't ñeñt toma'ntenaya puesheñarr añcha'taret ñeñt corratset' ahuañmo'cha te'pa' o' rroma. Ama't o' rromaña'pa' tarraña ñeñtara o'ch alla orrterra o'ch alla añcha'taretterrerr ñeñtcha' posocsheñterre' ñeñt cancherrsheña añcha'taret ñeñt o' colla'hua. Tarraña ñapa'cho'ña chocmach rromuerrerr allempoch chenca e'ñe poctacma. Ñehua, ñapa' ñeñtara ñeñt añcha'tarettatset' ñaña ahuañmo'cha allempo cancherrsheñtete't.

¹² Ñaña añ berrma't ñeñt charra' po'ucor ñeñt penten, ñeñtpa' añ toma'ntena charrasheña añcha'taretnesha', tarraña ñetpa' ama añcha'taretteteneta' tarro'mar ama orrteteneta'. Tarraña esempoch orrteterret allempochña añcha'tarettapreteret berrma't e'ñe mame'. ¹³ Ñetpa' e'ñech patrra cotape'chenet ñeñt atet cotape'chen berrma't, o'ch neñet berrma't ñeñtcha' pa'mcha'tareter perret. Ñeñtpa' atto yenpueñet attoch ahuañmo'cha peñet berrma't. ¹⁴ Ñetñapa' pue'moñe'teñofet Cristo ñeñt toma'ntenaya Carrnero quellareretcha'. Tarraña Cristo ñeñt toma'ntenaya Carrnero ñach a'mchechuerrahuet tarro'mar ñapa' atarr ahuañmo'cha. Ama't ora allpon ñeñt ayochreshatetyetsa, Cristoña'pa' e'ñe Pa'yochreshater pohueñet allohuenet, ñaña ama't ora allpon ñeñt añcha'tarettetyetsa, ñetpa'cho'ña e'ñe Pa'mcha'tareter pohueñet allohuenet. Ñaña ñeñt epuet parro yemtena, ñetpa' Yompor acerrahuet ñeñt chore'ten ña ñeñt atarr yemtena ña.

¹⁵ Allempoña añ mellañoñeñ alla oterrerr; ñeñtpa' atet oten:

—Ñaña añ oñechno ñeñt penten ñeñt allo anen coyanesha' ñeñt atarr ecañoresha', ñeñtpa' añ toma'ntena shonte' pa'namen acheñenesha' ñaña pa'namen anetsochno all yecha'yenet ñaña po'poñe'ttsoema ñoñets ñeñt allo eñosyenet. ¹⁶ Ñaña añ berrma't ñeñt penten çharra' po'ucor ñeñt toma'ntenaya çharrasheña añcha'tareñnesha', ñetñapa' tsena'chetcha' ñeñt coyanesha', a'ypo'ñeretcha' e'ñe muelle'mcot. E'nuerrñañetcha' e'ñe ña po'chets allempochña chamueret tso. ¹⁷ Yomporpa' ña nene' allohuen añcha'tareñnesha' pueyoçhreto attoch ñetpa' e'ñech patrpa cotape'chenet ñeñt atet cotape'chen berrma't, attoch yenpueñet esheccha' ahuañmencat peñet berrma't. Allochñapa' attoch etsotateññañet Yompor po'ñoñ ñeñt atet oten. ¹⁸ Ñaña añ coyanesha' ñeñt penten ñapa' añ toma'ntena ñeñt atarr nanac anets ñeñt pomnaren pene' allohuen ñeñt añcha'tareñyetsa allemeñ anetso'mar ñeñt añe patsro.

18

Atto allohuen ecñlayoretenesha'pa' ya'na'teretcha' ñeñt anetser Babilonia o' ahua-pore'tareterra

¹ Allempoña o' alla nenterrerr po'psheñeñ mellañoñeñ ñeñt sohua'netza entot, ñeñtñapa' atarr ahuañmencat. O' e'ñe çhap patsopa' a'puetarsamñpsosan pats e'ñe ña po'popteñoñ. ² Ñaña' rranosa huomenc, ñeñtpa' atet otos:

—Te'ñapa' o' a'ypo'ñareterra añ anetser ñeñt atma'ntataret Babilonia ñeñt atarr añecmuen anets. Te'pa' añecpach sherberr allcha' shonterra pa'namen oneñetechno ñeñt atarr apoçhenare' ñaña allcha' shonterra pa'namen otechno ñeñt atarr yetsena'tyen. ³ Tarro'mar añ coyanesha' ñeñt toma'ntenaya anets Babilonia, ñapa' ahuañmo'cha e'ñe po'cañoreshacma pete't allohuenet ñeñt añcha'taretyetsa añe patsro. Allohuen ñeñt añe patsro'tsen acheñenesha' e'ñe a'posa'tuanete't tarro'mar ñeñt atto cañoresha'tanete't ñeñtpa' çhoch a'posa'tanete't. Ñaña allohuen ñeñt allpon pomatsre'tyestse't, ñaña atarr ecñlayorettatahuete't tarro'mar ñapa' shonte' esocmañen muenatse'tyese't.

⁴ Allempoña o' alla ne'muerrerr po'poñ ñoñets ñeñt e'morrtetsa entot, ñeñtpa' atet oten:

—Ñeñtes neyochresha' nepen, te'pa' o'ch sesa'neñ añ anets ñeñt atma'ntataret coyanesha'. Amach socshapretatsche ña po'chñar te't sa'na mueroçhtapretenaya. ⁵ Tarro'mar ña po'chñarpa' allo'na sen atonetnomtsa nanac. Yomporpa' e'ñe eñoteññañ po'chñar ñeñt allpon pa'yese't. ⁶ Te'pa' atsa'tataretterrepa'ch allpon ñeñt atto erro't pa'yese't po'potantañ. Ñehua, ama't epoche'tats atsa'tataretterrepa'ch allpon ñeñt atto es patse'tyese't. Ñeñt atto allpon llecatyese't po'potantañ, ñapa' epoche'tatsepa'ch atsa'tataretterra llequëntso. ⁷ Ñeñt allpon coshatse'tyese't, te'ñapa' ñeñtepa'chña allpon llecaterrayerr. Ñeñt allpon echyese't, te'ñapa' ñeñtepa'chña allpon mueroçhtaterre'. Tarro'mar ña ahuañmo'chpa' pommo'cheñoñ atet ote't pueyoçhro: “Napa' atto nanen na neconaño'pa' atarr na'mcha'taretena. Napa' ama añeyayno ñeñt rretorrnanesha'. Na ama't ahuatapa' amach nellquërro tarro'mar amach es nemueroçhtaterraye.” ⁸ Tarraña ama't atet ommo'chenañpa' mamerrerrpa' o'ch çhapaña ñeñtcha' mueroçhtaterre' pa'namen mueroçhteñets — rromueñets, llequëñets ñaña muecheñets. Ñapa' a'poyatueretcha' tso. Tarro'mar Yompor ñeñt Yepartseshar yepen ñapa' ñeñt atarr Parets ñachña coñchaterre'.

⁹ Ñeñt añcha'taretechno ora errañaren añe patsro, ñetña e'ñe puellquëñoñtetpa' ya'na'teretcha' ñerra'm esempo enterrñañet pamosoñ ñeñt atto poyen. Ñeñtara añcha'tareñnesha' ñeñt e'ñe po'cañoreshacma pe't ahuañmo'cha ñeñt parrocmá epuet

atarr coshete't. ¹⁰ Ñetpa' pueyorñoŕetpa' cohuanrrortetcha' a'yot tarro'mar atarrcha' yoren et ñeñt atto o' a'coñchatare'terra. Ñet puellquëñoŕetpa' atetcha' otet:

—Atarr llequëñets-bee, ama't ñeñt atarr añecmuen anetser ñeñt atarr ahuamencat, machayota o' çherrñaña ñeñtcha' coñchaterre'.

¹¹ Ñaña allpon ñeñt pomatsre'tyetsa erraparen añe patsro, ñetpa'çho'ña e'ñe puellquëñoŕet ya'na'teñet, tarro'mar te'pa' ama eñalle ñeñtcha' rañta'yeshahuet ñeñt pomyenet. ¹² Tarro'mar ñet ñeñt po'checom penetpa' shonte' esocmañen pa'namen — oro, ñaña asreçhno ñaña mapyetollesha' ñeñt poptame'te' nanac tsa'te', ñaña serets ñeñt otenet perla, ñaña shetamtsoçhno ñeñt atarr coçhnesharer — yetsñorromamuenare', tsamamuenarer, sedamamuen. Shonte' ñaña pa'namen tsacheçhno ñeñt atarr eñmosaŕeçhno, ñaña marfil ñeñt elefantas ñeñt allot yeçhcatyenet pa'namen, ñaña pa'namen ñeñt yeçhcatyenet tsachoŕ ñeñt atarr nanac tsa'te', ñaña ñeñt yeçhcatyenet bronsoŕ ñaña hierroŕ ñaña mapyoŕ ñeñt otenet mármol. ¹³ Ñaña ñeñt pa'namen po'checom penet atet ñerra'm ñeñt otenet canela ñaña pa'namen aspanatollesha' ñeñt eñmosaŕe' ñaña tsachese' ñeñt pa'çho'ña eñmosaŕe' ñerra'm esempo a'crrateñet e'ñe atet ñerra'm ñeñt otenet mirra ñaña incienso. Alloŕpa' po'poñeçhno checmañatsoçhno ñeñt pa' añ vinos, oliveŕe', harina ñeñt atarr cohuen ñaña trigo. Ñaña po'poñeçhno ñeñt pomyenet ñeñt pa' añ huacsheçhno, carrneroçhno, cahualleçhno ñaña carrotollesha' ñeñt matatyen cahualleçhno. Ñaña allpa' ama't acheñ pomueñet ñeñtcha' taruasatenet e'ñe atta. Ñeñt acheñerpa' allña pomueññañet pocreña ñeñt atto correna arr patsro. ¹⁴ Ñeñt pomatsre'tyetsa allpa' ñetña'pa' serrpare'tenet, çha ottenet ñerra'mrrate' çho es oteñet ñeñt anetser, ñeñt pa' atet oteñet:

—Ñeñt allpon atarr payoma'yese't atet ñerra'm puetsarr ñeñt atarr ayoma'po' te'ña'pa' ama eñalle o' huañerr. Ñaña ñeñt allpon nanac cohuen pentyese't ñeñt nanac coçhnesha'tatse't, te'pa' o' chenca'huerra. Te'ña'pa' ama't ahuatapa' amach alla pen-tere'te. Arrpa' allohua ñeñt atet oteñet ñeñt anetser.

¹⁵ Ñeñt allpon pomyenet allpa' ñetña'pa' epaye' ganatanet nanac aton quelle. Tarraña ñet te'pa' po'yorñoŕet attach tomçha'tet a'yot allotcha' cohuerret ñeñt atet o' a'coñchatare'terra. Ñetña'pa' epaye' ya'na'teñet e'ñe puellquëñoŕetpa' ¹⁶ atet otenet:

—Llequëñtsa-bee añ atarr anets tarro'mar ñapa' o' atet perrate' ñeñt atarr añecmuen anetser ñeñt atet ñerra'mrrate' puesheñarr coyanesha' ñeñt nanac cohuen añño'tetsa. Añcha' chorrena ñeñt atarr coçhnesha' yetsñorromamuen epuet ñaña tsamamuen ñaña ñapa' nenan oro, ñaña mapyetolleshma't ñeñt atarr coçhnesha' poptallme'chyetsa ñaña nenan coçhnesha' seretsoçhno. ¹⁷ Te'ña'pa' e'ñe mamecmapa' o' e'ñe huañerr ñeñt atto atarr nanac esocmañen echyese't. Arrpa' allohua ñeñt atet ot ñeñt pomatsre'tetsa all.

Allempoña allohuen ñeñt po'taruas pene' bote ñeñt anmatsetene' checmañats all ñeñt anetsro, ñetpa'çho'ña o' alla tomçha'tet a'yot — atet ñerra'm ñeñt pamo'mte' pen bote ñaña ñeñt achopeñañnesha' ñaña marineronesha' ñeñt taruasets all boto. ¹⁸ Ñetpa'çho'ña allohuenet all tomçhenetpa' rrannartenet allempo enterrñañet pamosoñ ñeñt atto poyen ñeñt anetser. E'ñe puellquëñoŕetpa' atet otenet:

—Ama eñalle po'poñ anetser ñeñt atarr cohuen atet ñerra'm añ anetser.

¹⁹ Allña'pa' atarr yahuanrrortenet. Puellquëñoŕetpa' pampato'tyeset patso. Rrannaretyesetpa' atet otyeset:

—Llequëñtsa-bee añ atarr anetser tarro'mar allohuene' ñeñtey echyene' yebote ñeñt çhocma yanene' oñopa' shonte' quelle ganatyet tarro'mar ñeñt anetserpa' shonte' echane't quelle nanac aton. Tarraña ama't atet pe'tpa' te'ña'pa' e'ñe mamecmapa' o' e'ñe huañerr.

Atarrcha' cosheñtso'tsa'yen allohuen ñeññ pueyochresha' pen Parets

²⁰ Te'ña sapa' socshepa'ch ñeñtes pue'ntañ'o'tsenes ñaña allohuen ñeñtes pueyochresha' pen Parets ñaña allohuenes ñeñtes allsensaretes Yomporecop ñaña allohuenes ñeñtes a'mtene' Yompor po'ñoñ tarro'mar ñeññ atto Yompor o' coñchatterran ñeññ anetser, ñeññpa' attoña o' chemnaterrsa sa.

²¹ Allempoña mellañoñeñ ñeññ atarr ahuamencatpa' ñañapa' chetan mapue' ñeññ atarr añecmuenmen atet ñerra'mrrate' ñeññ allocma es puetse'tenet ñeñññapa' huapore'ch sa'po cha chencostsa poctacma. Allempoña ñeññ mellañoñeñpa' atet ot:

—Attecmach huapore'tareterra añ atarr anetser ñeññara ñeññ atma'ntataret Babilonia. Amach orrterre'te ama't ahuata. ²² Te'ña allpa' amach es e'morrterrtse'te ñeññ atto toquënet arpa ñaña atto penclla'tenet ñaña ñeññ atto poctorare'tyenet po'poctoro. Ñaña ñeññ po'taruas p̄aye't ñeññ es yeçhcatyesaye't pa'namen esocmañen all, te'ña ama't ahuata amach orrterre'te. Ñaña atto e'morrte't allempo es puetse'tete't allpa' te'ñapa' amach alla e'morrterre'te. E'ñe muetsoñeñtuerra. ²³ Ñaña ñeññ allo çhoyo'tam̄psete't, te'ñapa' amach alla çhoyo'tam̄perranete'te. Ñaña ñeññ coshame'tam̄psaye't ñeññ sena'tetsa ñaña coyanesha', te'ñapa' amach alla e'morrterre'te pocshañña. Ñaña allpon ñeññ pomatsre'tyesatse't all ñeññ atarr anetsro, ñetpa' atarr asherben entete't. Ora errañaren añe patsropa' ama eñalle ñeññ atet sherbets. Ama't atarr asherben entyesetañe't tarraña çhocma shecare'tyesete't allohuen pa'namen acheñenesha' ora errañaren añ patsro. E'ñe atet es ame'ñatena amase'ñetpa' e'ñe attecma shecare'tenanet ñeññ anetser.

²⁴ Ñaña all anetsro, ñeññpa' all amtsanatarette't ñeññ a'mtaye't Yompor po'ñoñ ñaña allohuen ñeññ pueyochresha' pen Parets. Allña ashatarettete't po'rras ñaña ama't allohuen ñeññ amtsanatarettatse't ora errañaren añe patsro, ñeññara anetsro't allotña amtsanatarettete't.

19

¹ Allempoña o' alla ne'muerrerr ñeññ e'morrretsa huomenc ento, shonte' acheñenesha' e'ñe parrocma rrannartenet, ñeñññapa' atet otenet:

¡Aleluya! Aye'choçhtatpo'ch Yompor tarro'mar ñapa' ña ñapue't a'qushp̄atañtetsa, acohuentatpo'ch Yompor ñeññ ñapue't atarr ahuamencatesha'.

² Ñaña ñeññ pocte' enten Yompor ñeññpa' e'ñe pocte' attecma, ñaña allpon ñeññ atet oten ña, ñeññpa' e'ñe po'ñoçh attecma. Tarro'mar ñapa' o' coñchatterran coyanesha' ñeññ atarr ecañoreshañtetsa tarro'mar e'ñe ña po'chñaro'tpa' atarr a'sosyatenan acheñenesha' ora allohuen ñeññ yeçha'yetsa añe patsro. Te'ña Yomporpa' o' e'ñe tsa'tatuera ñeññ allpon muetsanataño'e't ñeññ torra'yestse't ñocop.

³ Po'pocheñoñapa' alla oterreterr:

—¡Aleluya! Aye'choçhtatpo'ch Yompor tarro'mar te'pa' Yompor o' amosoñe'chatterran ñeññ atpare'taye't. Attoña o' chepoterr pamosoñ enone't; ñeññpa' ama't ahuatapa' amach huañerro.

⁴ Allempoña añ epoch çharra' ñeññ puechetsa pa'tatssheña ñeññ sherbene' Yompor po'conaño, ñetñapa' concorpa'rrtenet epuet ñaña pa'tats ñeññ berrma'ttetsa. Allohuenet concorpa'rrtenet all Yomporesho. Allohuenetpa' ma'yocheñet Yompor all anen po'conaño. Ñetñapa' atet oteñet:

—Aye'choçhtatpaupepa'ch Yompore, attetepa'ch pocop errponohuañen.

⁵ Allempoña all Yompor po'conaño'tpa' allotña e'morrterrerr po'poñ ñoñets, ñeññpa' atet oten:

Sa'ye'choçhtatoñepa'ch Yompor, allohuenes ñeñtes torra'yetsa ñocop, ama't sa ñeñtes atarr sherbets ama't samña ñeñtes ama tama sherbetso. Ama't

allohuenes erra'tseneste' ñeñtes atarr añcha'na'tpo' entene' Yomporpa' te'ñapa' sa'ye'chochtatoñepa'chña.

Atto Cristopa' e'ñe cohuen aguërran allohuen ñeñt ame'ñenaya ña ñeñt atma'ntataret atet ñerra'mrrate' ña puetapor penahuet

⁶ Allempoña napa' o' alla ne'muerrerr shonte' acheñenesha' rrannartenet, atarr huomenc e'morrtena atet ñerra'mrrate' all etsase'tena shonte' oñ atarrcha' huomenc ma'moreten. Po'ma'moreteñña' cha ottena ñerra'mrrate' cho tecor-rraren. Acheñenesha'ña ñeñt rrannartetsapa' ñetñapa' atet otenet:

Aye'chochtatpo'ch Yompor tarro'mar te'pa' o' chap allempoch añcha'taretterra ña e'ñe ñapuef ñeñtara Yepartseshar ñeñt atarr ahua mencatesha'.

⁷ Te'ñapa' yocsherpepa'ch, yocshame'tam̄perepa'ch, yecohuentaterrñañepa'ch tarro'mar te'pa' o' chap allempoch yocshame'tam̄pesya Cristo ñeñt atma'ntataret Carrnero. Te'ñapa' o' chap allempoch sena'ta. Ñaña ñeñt coyanesha' ñeñtcha' puetapor pa', ñaña'pa' o' e'ñe añña'tareta.

⁸ Ñaña'pa' o' apet ñaña ñeñtcha' chorra ñeñt atarr cohuen huallama't atarr cochnesha' shetamuets ñeñt otenet lino ñeñt ama asoyatño ama't e'ñe mamesha, atterach poptame'tena.

Ñehua, añ shetamuets ñeñt otenet lino ñeñt ama a'soyatpahuoyaye ama't e'ñe mamesha, ñeñt'pa' añ toma'ntena ñeñt atto e'ñe cohuenare' es pa'yen ñeñt pueyochresha' pen Parets. Ñetñapa' añ toma'ntenet Cristo puetapor penahuet.

⁹ Allempoña mellañoñeñpa' alla oterrerr:

—Te'pa' o'ch pequellquërrerr añ ñoñets ñeñt noteneþ, ñeñt'pa' atet ot: “Atarr cosheñtso'tsen allohuen ñeñt ahua'ñarettetsa o'ch rrallme'chaprechet allcha' coshame'tam̄peñet Cristo ñeñt atma'ntataret Carrnero ñeñt sena'tatsa.”

Mellañoñeñpa' alla oterrerr:

—Ora allpon ñeñt atet oteney Yompor arrpa' ñeñt'pa' e'ñe po'ñoch atet.

¹⁰ Nañapa' neconcorposa mellañoñeñ pa'rrpo ñeñt neserrpare'tatene' o'ch nema'yochyañ, tarraña ñapa' atet oten:

—Napa' amach pema'yochatsetno, napa' añana ñeñten petorrapretenaya Yomporcop ñaña allohuen pemo'nasheñneshachno ñeñt serrpare'tene' atto ame'ñeñet Jesús. Papa' añcha'ña pema'yocha Yompor ñapuef.

Tarro'mar allohuen ñeñt a'm̄tene' Yompor po'ñoñ, e'ñe ña Puecamquëñoñpa' añ serrpare'tenet ñeñt atto yame'ñeña Jesús.

Cristo ñeñt montenaya cahuall ñeñt atarr huallaþnanen

¹¹ Allempoña po'pocheñopa' alla nenterrerr atoraret enet. Allña'pa' allo'tsen cahuall ñeñt atarr huallaþnanen. Ñeñt montenaya cahuallpa' añ socheñet, Ñeñt atarr Ayemuetpotetsa ñaña ñeñt e'ñe Po'ñoch Yompor Po'ñoñ. Tarro'mar ñapa' erra'tsen pocte' ent o'ch coñchach, ñeñtña ñocoppa' e'ñe pocte'. Ñaña ñerra'm ña quellaratahuet ñeñt'pa'cho'ña e'ñe pocte' ñocop. ¹² Pa'clloyoñña' atarr nanac a'rrechatañ atet ñerra'mrrate' tso' po'huorter. Poñoñapa' shonte' po'choyo'm̄ ñeñt choyo'm̄tena. Allña'pa' anaret ñaña pa'so'cheñ ñeñt'pa' e'ñe ñapña eñoteñ. ¹³ Pa'shtampa' año e'chomaret errasatso. Ñaña añ socheñet Yompor Po'ñoñ. ¹⁴ Ñaña ñeñt allpon pa'çllarañeshar pen all pue'ntaño, ñetñapa' coteñet chenta' monta'yesnenet ñamet puecahualloro ñeñt atarr huallaþnarren. Ñetpa'cho'ña ñeñt pa'shtam penet atarr huallama'tarer. Ñeñt shetamuetspa' atarr cohuen ñeñt otenet lino ñeñt ama sosyatetso ama't mamesha. ¹⁵ Ñeñt anenahuet, e'ñe puenamoñ all orrtena cochell ñeñt atarr etsotañtataret. Ñeñt cochellpa' añecop sherben alloch ame'ñatuerrana ora allpon pa'namen acheñenesha' arr patsro. Allochña'pa' po'yorochenñoñpa' o'ch

añcha'taretterranet atet ñerra'mrrate' ñapa' a'sreperet o'ch añcha'nochtana'terranet. Ñaña ñach coñchaterrahuet. O'ch netma'ntacha atet ñerra'mrrate' ñach atmama'te' uva esheccha' cha'nom po'ñer. Ñeñt atet atmama'teñet uvapa' añ toma'ntena atto Yompor ñeñt atarr ahuaamencat e'ñe ña po'yorochenño'pa' atarrcha' coñchaterran acheñenesha' ñeñt atpare'tetsa. ¹⁶ Ñaña pa'shtamo e'ñe pa'tapacoptaro allñapa' all aquellcaret ñoñets ñeñtcha' atet enteñet Cristo, ñeñt'pa' atet oten ñoñets: "Allohuen ñeñt añcha'taretečno añmapa' ñeñtña e'ñe Pa'mñcha'tareter pohueñet allohuenet. Ñaña allohuen ñeñt ayochreshatečno añmapa' ñeñtña e'ñe Pa'yochreshater pohuenet allohuenet."

¹⁷ Allempoña napa' o' alla nenterrerr mellaño'feñ ñeñt tets all ñeñt yeçhoyo'tampene'. Ñaña'pa' atarr huomenc eñen, chore'tenan allohuen tse'machno ñeñt anomcha'tyetsa eno. Ñeñtña'pa' atet otenanet:

—Sehua'cha'ta allohuenes o'ch sap'cha arr o'ch serren po'chets ñeñt atarr aton rratenes Yompor. ¹⁸ Attoch serroñ po'chtso'chno shonte' acheñenesha' ñeñt añcha'taretetyetsa, ñaña shonte' ñeñt capitanyets, ñaña shonte' ñeñt atarr ahuaamencat entyenet. Serroñ ñaña shonte' cahuallečno po'chets ñaña añ po'chets ñeñt montenaya. Ama't shonte' pa'namen acheñenesha' o'ch serroñ po'chets ama't ñeñt acheñer ñeñt atarr sherbets ñaña ama't ñeñt ama sherbetso, ama't ñeñt e'ñe cohueno'tsen acheñ, ama't ñaña ñeñt ataruasataret e'ñe atta — o'ch e'ñe serruanet po'chets allohuenet.

¹⁹ Allempoña napa' o' alla nenterrerr ma'yarrma't epuet ñaña allohuen añcha'taretečno ora erraparen ñeñt añe patsro'tsen epuet ñaña allohuen ñeñt pa'çllarañeshar pen. Ñetpa' añecop ap'chenet allochñapa' o'ch quellareñet ñeñt montenaya puecahuallor ñeñt atarr hualla'pnanen ñaña epuet ora allpon ñeñt pa'çllarañeshar pen ña. ²⁰ Allempoña quellaranna'tet ma'yarrma'tñapa' cha rremuet epuet ñaña ñeñt a'mtene' e'ñe ña po'ñoñ tarraña ñeñt'pa' ashcaña. Añ ñeñt ashcañerpa' e'ñe ma'yarrma't po'huamencot gatenan acheñenesha' ñeñt ama puentareto. Ñeñt'pa' alloña shequënan acheñenesha' attoch ame'ñeñet. Ñeñtña acheñenesha'pa' o' e'ñe yato'matuanet ma'yarrma't pueyotsaparo. Ñetñapa' añ ma'yochenet aye'chcataret ñeñt toma'ntatenet ma'yarrma't. Allempoña rremuet ma'yarrma't epuet ñaña ñeñt a'mtene' po'ñoñ allempoñapa' ahua'pore'taretet epsheño'maret e'ñe betareret all parraren tso' erraparen. Ñeñt tso'pa' atarr shemasher huorten. ²¹ Po'potantañe'chnoña ñeñt epuet quellarañ ma'yarrma't ñetpa'cho'ña o' e'ñe amtsanataretetuet. Año amtsanataretet cochllo ñeñt puenamo'tsen ñeñt montenaya puecahuallor ñeñt atarr hualla'pnanen. Allempoña ñeñt allohuen tse'machno epaye' ochare'ch po'chets allempo rret añ po'chets ñeñt o' e'ñe amtsanataretetua.

20

Attoch çherr allempoch mellapoterra

¹ Allempoña o' alla nenterrerr po'psheñeñ mellaño'feñ ñeñt sohua'netsa ento'. Ñaña potot'pa' añ orren llave alloch toram'psan aroro'ñ ñeñt atarr o'pononet aroro'tena pats. Potot'ñapa' orrenan ñaña cadena ñeñt atarr añecmuen cadena. ² Ñeñtña mellaño'feñpa' rremosan añyañ. Añyañpa' ñeñtara sheche'p ñeñt ahua'oto'feñ ñeñtara yoten one'neñ ñaña ñeñt otenet Satanás. Atto rremue'pa' allempoñapa' huanquë'. Ñeñt atto ehuanca'rettapa' e'ñech errponañohuen char ñeñt otenet mil char, atterach ehuanca'rettena. ³ Allempo huanca'huepa' o' huapore'ch o'pono aroro'fo. Allña yottam'pes o' noñ alloch e'ñe echarr p'am'pes. Allochñapa' amach alla shecare'terranerro allohuen pa'namen acheñenesha' arr patsro. Ñehua, ñerra'm o'ch çhap mil charpa' allempoñapa' o'ch alla a'rroyeret. Tarraña ñerra'm o'ch alla a'rroyeretpa' ñeñt'pa' mamecpach a'rroyare'tterra.

⁴ Allempoña o' alla nenterrerr ñeñt anorrcha'tyets po'conaño'mar. Ñetñapa' allsen-sarettet attoch ñetpa' o'ch añcha'taretetyenet. Ñaña napa' o' e'ñe nentuerrñañ puecamquëñechno allohuen ñeñt apecha'tanatarettatset e'ñe pueserrpare'teñoñet Yepartseshar Jesús ñeñt atto a'potoñete't Yompor po'ñoñ. Ñaña ñetpa' ama muenete'te o'ch ayato'ma'tarettet ma'yarrma't pueyotsaparo ama't pa'co'metofetapa' ama ay-aco'mta'tarettete'te. Ñetpa' ama ma'yochyete'te ma'yarrma't ama't ayeçhcataret ñeñt toma'ntenaya ña ama esesha' ma'yochaye'te. Ñaña ñetpa' ama muenete'te o'ch ayato'ma'tarettet ma'yarrma't pueyotsaparo ama't pa'co'metofetapa' ama ay-aco'mta'tarettete'te. Ñetña allpa' corretseta all añcha'tarettapreteñet Cristo shonte' char allpon ñeñt otenet mil char. ⁵ Ñetñapa' ñanmuetcha' atantataretterret. Tarraña po'potantañechno arromñañnesha' ñetña allpa' ama allo'tseneto tarro'mar ñetpa' ama atantataretyeyeto tarremphuach allempoch çherr mil char. ⁶ Atarr cosheñtso'tsen allohuen ñeñt e'ñe pueyochresha' pen Parets tarro'mar ñetpa' ñanmuetcha' atantataretterret. Tarro'mar ñetpa' amach alla rromuerrete'te po'pocheño ñeñtcha' atet rromuerr po'potantañ ñeñtcha' chenquërrtsa e'ñe poctacma. Tarro'mar ñeñtcha' tanterrtsa ñanompa' ñetpa' amach erroteno't o'pataneto po'pocheño rromueñets ñeñtara chenquëñets. Ñetpa' añcha'ña sherbenet Yompor epuet Puechemer Cristo. Ñetpa' Yompor po'corneshar penahuet, añcha'tarettapreteretcha' nanac aton shonte' char ñeñt mil char.

Atto Juanpa' entan oneñt o' ahuapore'taretta all parraren tso' errañaren

⁷ Allempoch metua añ mil charpa' allempochña a'rroyeret oneñt all ayottam̄psarettena mil charohua. ⁸ Ñañapa' o'ch auyes ora errañaren pa'namen anetso'mar arr patsro allcha' shecare'tyerran pa'namen acheñenesha'. O'ch shecare'terran Gog ñaña Magog attoch a'yapaçhaterranet o'ch quellaraterranet. Ñeñt atet yenteññañ ontap po'mñer atetcha' shonerran ñaña pa'namen acheñenesha' arr patsro, ñeñt ama e'ñotuapahuoyaye. ⁹ Atet nentanet ñetpa' ahuanmuet mopñarero'mar o'ch parratsettet errañaren allcha' orreyeset. Ñetpa' arrentach ahuanenet Yompor pa'netsronet ñeñt atarr morrentena tarro'mar allpa' allo'tsa'yen ñeñt pueyochresha' pen ña. O' e'ñe arrotam̄pesuosyet attoch rremanatoñet Yompor pueyochresha'. Tarraña Yompor pue'ntaño'tpa' e'ñe allempocma a'shoranet tso' attoch e'ñe a'poyatatuanet. ¹⁰ Allempoña oneñt ñeñt shecare'tenahuetpa' o' huapore'teret ñaña all parraren tso' errañaren ñeñt huortets shemasher. Allo'tsa'yen ñaña ma'yarrma't epuet ñaña ñeñt a'mtene' po'ñoñ. Allñapa' allempoteñ a'coñchataretetuerret e'ñe parrocmā, yetome'tets, tsapome'tets ama't ahuaña ñeñtapa' amach ahuañaña'tterro ama't errponaña.

Ñeñt atto allohuen arromñañnesha'pa' tomçherretcha' Yompor po'conaño allñapa' allcha' entyesaretterret errotente' ñeñt atet pa'yese'te e'ñe puesheña'ttset

¹¹ Allempoña o' nenterrerr atarr añecmuen conañ ñeñt atarr huallama't ñaña ñeñt anets all. Ñaña e'ñe po'partsoteño't a'chencatuan añ pats ñaña enet, o' e'ñe chenca'huerra poctacma. Ñocpuet ama eñalle allcha' a'puet ama't e'ñe coñe'ta. ¹²⁻¹³ Nent ñaña allohuen arromñañnesha' all tomçhenet Yompor po'conaño. Ama't allohuen arromñañnesha' allo'tsa'yenet ama't ñeñt atarr sherba'yestset ama't ñaña ñeñt ama asherboyenaye' entete'te. Ama't allpon omarrñañechno ñeñt omarrcha'tyestset ahuatpa' ñetña ama't oño'tpa' o' alla tantrra'tuerret. Ama't allohuen arromñañnesha' ama't o' çhapuet all o'patenanet rromueñets, allotña o' alla tantrra'tuerret allohuenet. Ñeño'mar ñet te'pa' e'ñe Yompor po'conaño tomçha'tuenet allohuenet. Allempoña allpa' tore'tet shonte' libro, ñeñtña librorpa' all aquellca'huaret ñeñtcha' yerpatterahuet ñeñt allpon atet p̄atse'tyesete't e'ñe puesheña'ttset. Allempoña Yomporpa' all entan

ñeñt libro all aquellcaret ñeñt ama cohuenaye' es petso. Ñeñto'marña ñapa' attoña otteñe'cherranet o'ch mueñanet coñcheñtso. Alloñapa' tore'tet po'poñ libro ñeñt libropa' all aquellcaret añ pa'so'chñechno attochña ñetpa' corretsetach. ¹⁴⁻¹⁵ Allohuen ñeñt ama enteññañeto pa'so'cheñ libro all aquellcaret añ pa'so'chñechno ñeñt corretsetach, ñetñapa' asaprrotarettet o'pono all parraren tso' errañaren. Ñeñtpa' attochña rromuer-reterr po'pocheño ñeñt puepocheñ rromueñets ñeñt e'ñe poctacma chenquëñets. Ñaña añ rromueñets ñeñt o'patenaya arromñatechno ñeñtara pa'netser pen rromueñets, ñeñtpa'cho'ña ahupore'tarettta o'pono all parraren tso' errañaren.

21

Atto Juanpa' entan po'poñ enet ñeñt e'ñe etserra ñaña patspa'cho'ña o' etserraterr

¹ Allempoña na ñeñten Juanan allpa' o' nenterrerr po'poñ enet ñeñt e'ñe etserra, patspa'cho'ña o' etserraterr. Tarro'mar ñeñt atet yenten enet te' ñaña pats, ñeñtpa' o' e'ñe chenca'huerra o' huañerr. Ñeñt etserra patspa' allña ama't sa'p ñeñt yenten añecmuen ama eñalle. ² Nenterrerr ñaña Parets pa'netser ñeñtara Jerusalén ñeñt o' etserraterr. Ñeñtñapa' entot a'suataretterra e'ñe Yomporeshot. Ñeñtñapa' atarr cohuen orrtena e'ñe atet orrtena ñerra'm puesheñarr coyanesha' allempo some'tenapa' o'ch añño'tena e'ñe cochneshot attochña puerrollarpa' atarrcha' cohuen enteñ. ³ Allempoña napa' o' alla ne'muerrerr all e'morrtena ñoñets ñeñt huetsa entot e'ñe Yompor po'conañot. Ñeñtñapa' atet oten:

—Te'pa' señoche'pa'ch, o' cherr allempoch ye'cherra Parets e'ñe parro epuet acheñenesha'. Ñeñtcha' e'ñe parro ye'cherra ñetpa' e'ñe pueyochreshoche' penanet Yompor. Ña ama't atarr Paretspa' ye'cherrach epuet acheñenesha' ñeñt e'ñe Po'yomporer penet. ⁴ Te'ña Yomporpa' o' a'huañamperrnay yellquëña, te'ña ama't ahuatapa' amach alla yeyahuerre'te. Te' ama't ahuatapa' amach yerromuerre'te amach yellquërrer'te. Te' ama't ahuatapa' amach eñallettere'te yahueñets ama't ñaña atserrpeñets amach eñalle. Tarro'mar añechno ñeñt allpon yellcatyesaye't te'ñapa' o' e'ñe huañerr.

⁵ Allempoña Yompor ñeñt anets po'conañopa' alla eñorana'terrnerr, ñeñtpa' atet oten:

—Te'ñapa' o'ch seño'ch, napa' o' netserrataterr ñeñt allohuen esocmañen eñall.

Allempoñapa' alla oterrerr:

—Te' pōcoppa' añ pocte' o'ch alla pequellquërrerr ora allohuen añechno tarro'mar añ ñoñets ñeñtcha' atarr seyemtena ñeñtpa' e'ñe po'ño'ch atet.

⁶ Allempoña ñapa' alla oterrerr:

—Te'ña po'ño'chpa' o' e'ñe etsotuerra, o' huañerr ñeñt sentyese't ahuatoteñ. Napa' e'ñe pa'motroteñ eñallen atten ñerra'mrrate' quellec A ñeñt pa'moter pen alfabeto. Allempoteñña napa' chocma eñallen esempohuañencha' huañerr ñeñt allpon eñall, napa' atten ñerra'mrrate' quellec Z ñeñt all puen alfabeto. Te'pa' allohuen ñeñt ama e'ñeye' coshetso pueyo'chro ñeñt chocmach es e'nenet, nañapa' napanetcha' ñeñt alloch e'ñe eñmaterret. Tarro'mar atto ama cosheneto cha ottenet ñerra'mrrate' ñeñt atarr nanac oñpa'tets. Ñeñto'marña te' napa' notenes allohuenes ñeñtes oñpa'tetspa' napuerrescha' oñ ñeñt ama ahuañañañe ñeñt chocma potets all. Ñeñtña oñ alloña sapa' corretsasach. Tarraña ñeñtñapa' ama't coñe'tapa' amach setsa'tero. E'ñe atta napuenes. ⁷ Allohuen ñeñt metana'tue' pa'namen topateñtsochnopa' ñetñapa' no'pataterranet ora añechno a'nateñets. Attochña ñetpa' e'ñech Po'yomporer pennet, nañapa' e'ñech nechemerasha' nepohuenanet allohuenet. ⁸ Tarraña allohuen ñeñt ama name'ñenayo ñeñt echarttetsa pueyo'chro, ñetñapa' aña o'patenahuet all parraren tso' errañaren, ñaña allohuen ñeñt etsotene' sosya'tsañechno ñeñt atarr atsena'tpo' ñaña ñeñt amtsañesha' ñaña ñeñt cañoresha'tets, ñetpa'cho'ña allohuenetpa' aña o'patenahuet all parraren tso' errañaren.

Ñaña ñeñt amase'ñetechno ñaña ñeñt po'yomporer pa'yene' ayeçhcataretechno ñaña allohuen ashcarñaetechno, ñetpa'cho'ña aña o'patenahuet all parraren tso' erraþaren ñeñt huortets shemasher. Ñeñtpa' allcha' puepocheño rromuerret.

Atto Juanpa' entan Yompor pa'netser ñeñt so'hua'netza entot ñeñtara ñeñt sochetsa Jerusalén

⁹ Allempoña ñeñt cançherrsheña mellañoeteñnesha' ñeñt echyesaye't po'pajotollesha' all e'chorrayesarete't ñeñt allot e'ñe orrtatuerret allohuanen muerochteñets, puesheñarrña mellañoeteñpa' o' huapapa' otosen:

—Aþon o'ch þocta'n o'ch negatenþa' ñeñtcha' puetapor perr Cristo ñeñt atma'ntatare't Carrnero.

¹⁰ Allempoña napa' o' alla chorraterrenerr Yompor Puecamquëñ ñeñtña nanmue' a'yo allo'tsen ñeñt atarr añecmuen aspenet. Allostña napa' nentapoñ Parets pa'netser ñeñt sohua'netza entot e'ñe Yomporeshot ñeñtara ñeñt Jerusalén. ¹¹ Ñeñtña anetserpa' cha popuetnena atarr coçhnesha' atet cohuentena Yompor po'cohuenña. Po'popteña e'ñe atet ñerra'mrrate' mapue' ñeñt atarr poptame'te' ñeñt mapyer otenet jaspe ñeñt nanac amorrentare't. Ñeñtpa' e'ñe ora orrtatuenan allohuen ñeñt allo'tsa'yen e'ñe all. ¹² Ñeñt anetserpa' e'ñe aconcha'tamþsare't a'yohuen. Ñeñt allo aconcha'tamþsare'tpa' atarr añecmuen enonet. Ñaña allo'tsen çharra' puechena epa yetarr allot be'tenet. E'ñe pate'tets yetarr allo'tsa'yen ñaña puesheña'tets mellañoeteñ ñeñt cohuanþpene' yetarr. Pate'tets yetarropa' all aquellca'yesare't añ pa'so'chñechno Israel po'mreneñ ñeñt çharrasheña puechena epa. ¹³ Ñeñt conchet, allot huena atsne' allo'tsen ma'pa yetarr. Ñaña allenet emuena atsne'pa' allo'tsen ñaña ma'pa yetarr. Tenoteñta'npa'cho'ña allo'tsen ma'pa yetarr. Topoteñta'npa'cho'ña allo'tsen ma'pa yetarr. ¹⁴ Ñeñt conchtar allo echarr aþare'ttena pa'rrþopa' e'ñe allohuenpa' allo'tsen çharra' puechena epa mapue' ñeñt allo echarrtateñet. Ñaña pate'tets mapue' allo echarrtateñet conchetpa' all aquellca'yesare't añ pa'so'chñechno ñeñt çharrasheña puechena epa ñeñtpa' ñeñt puellsensarnesha' Cristo ñeñt atma'ntatare't Carrnero.

¹⁵ Mellañoeteñ ñeñt neserrpare'tatene' ñañapa' echenan tepapets ñeñt oropepen allo tepuenan Parets pa'netser ñaña allo aconcha'tamþsare't ñaña pueyottarohuen.

¹⁶ Mellañoeteñ atto tepuenan Yompor pa'netser e'ñe allponeshacma tepa'hue allenñateñ — onnañonet ñaña pa'lpocha'peronet ñaña enonet e'ñe allponeshacma cha'nmach — dos mil doscientos kilómetro allenñateñ. ¹⁷ Allempoña tepan ñaña conchet po'bateña ñeñtñapa' allo'tsen sesenta cuatro metro. Ñehua, mellañoeteñ e'ñe atet es tepa'yen atet es yetpa'yen yama ñeñtey arromñatey.

¹⁸ Ñaña añ conchetpa' añ ayeçhcatare't mapue' ñeñt atarr cohuen aspanamemeno poptame'tyena ñeñt otenet jaspe. Pa'netserñapa' añ ayeçhcatare't oro — ora allohuenpa' e'ñe oroche'. Añ oropa' atarr nanac cohuen ñeñtpa' e'ñe orrtatuenan pa'namen ñeñt allpon allo'tsa'yen. E'ñe atet ñerra'mrrate' rerpap ñeñt atarr cohuen e'ñech orrtatuenan allohuen pa'namen ñeñt allo'tsa'yen. ¹⁹ Ñehua, añ econach allo orratenet conchet, ñeñt econach puecllo'ya'tetspa' atsetareno poptena ñeñt allo a'cohuentateñet. Ñeñt ñanom econach puecllo'yarr allñapa' añ ana'yesare't atarr cohuen poptame'te' aspanamemenatollesha' ñeñt otenet jaspe. Ñeñt puepuecllo'yañ econach allñapa' añ ana'yesare't atarr cohuen poptame'te' asollememenaretollesha' ñeñt otenet zafiro. Ñeñt econach puema'puecllo'yañ allñapa' añ ana'yesare't atarr cohuen poptame'te' huallamemenatollesha' ñeñt otenet ágata. Ñeñt puepa'tatsecllo'yañ econach allñapa' añ ana'yesare't atarr cohuen poptame'te' aspanamemenatollesha' ñeñt otenet esmeralda. ²⁰ Ñeñt econach pa'mnarecllo'yañ allñapa' añ ana'yesare't ñeñt atarr cohuen

pa'namenot poptame'tyena ñeñt otenet ónice. Ñeñt po'pechapuecillo'yañ econach allñapa' añ ana'yesaret atarr cohuen poptame'te' tsamemenatollesha' ñeñt otenet cor-nalina. Ñeñt econach po'cancherrecllo'yañ allñapa' añ ana'yesaret atarr cohuen pop-tame'te' shemashrememenatollesha' ñeñt otenet crisólito. Ñeñt econach po'psoclo'yañ allñapa' añ ana'yesaret atarr cohuen poptame'te' aspanamemenatollesho asolleten ñeñt otenet berilo. Ñeñt econach pue'sconeclo'yañ allñapa' añ ana'yesaret atarr co-huen poptame'te' e'ñe shemashrememenatollesha' ñeñt otenet topacio. Ñeñt econach po'charraclo'yañ allñapa' añ ana'yesaret atarr cohuen poptame'te' ama e'ñeye' as-panamemenaretolleshayaye ñeñt otenet crisoprassa. Ñeñt econach po'charraclo'yañ puechena puecillo'yarr allñapa' añ ana'yesaret atarr cohuen poptame'te' asolle-memenma'tetollesha' ñeñt otenet jacinto. Ñeñt econach po'charraclo'yañ puechena epuecillo'ya allñapa' añ ana'yesaret atarr cohuen poptame'te' yetsñorromemenatollesha' ñeñt otenet amatista. ²¹ Allohuen yetarročno ñeñt charra' puechena epa e'ñe co-huen huallatrrren atet ñerra'm chempeshtall o'ponotpa' atarrcha' huallatllellen ñeñt otenet perla. Pate'tets yetarr e'ñe patrre perla ayečcataret. Ñaña añ calle ñeñt all chopeñe'chenet ñeñtpa' e'ñe oroche' ayečcataret atet ñerra'm rerpat ñeñt e'ñe orrtatuene' ora ñeñt allpon allo'tsa'yen all.

²² All Parets pa'netsro ama't patrre pocoll ama neñche ñeñt all ma'yocheñet Yompor. Tarro'mar allpa' ama pallteno pocoll allcha' ma'yocheñet Yompor, tarro'mar ñeñt nanac Parets ñeñt Yepartseshar yepen ñapa' e'ñe allo'tsen all ñeñtcha' ma'yochena allohuen acheñenesha' epuet ñaña Puechemer Cristo ñeñt atma'ntaret Carrnero. ²³ Ñaña Parets pa'netsro allpa' ama muenenano atsne' ama't arorra ama mueneñeto ñeñtcha' čhoyo'tetsa all. Tarro'mar Yompor ñeñt atto poptena pa'tsnomueño'tpa' ñeñtña čhoyo'tetsa all epuet ñaña Puechemer Cristo ñeñtña lamparñetets. Ñeñtara Cristo ñeñt atma'ntaret Carrnero. ²⁴ Ñeñt atto poptena Yompor pa'tsnomueño'tpa' ñeñtña a'puetarsañpene' erracmañen allohuen pa'namen acheñenesha' attoña correnet e'ñe co-huen. Allohuen añcha'taretnesha' ñeñt atto cohuentenet añe patsro, huapatueretcha' Parets pa'netsro alloch cohuentateññañet ñamet Parets pa'netser. ²⁵ Ñeñt Parets pa'netser ñeñt pueyottar pen allot be'tenet, amach yottañperre'te e'ñech ellapene't atoraret. Allpa' ama't checmetapa' ama eñalle. ²⁶ Allohuen pa'namen acheñenesha' ñeñt añcha'na'tpotyetsa añe patsro ñeñt atto cohuenteyenet, huapatueretcha' Parets pa'netsro alloch cohuentateññañet ñamet Parets pa'netser. ²⁷ Allpa' ama't ahua'tapa' amach orrtateto ñeñt sosya'tsañečno tarro'mar allpa' ama't puesheñarrapa' ama be'teno ñeñt cotape'chene' sosya'tsañečno ñeñt atarr tsena'ten Yompor ñeñt atet ñerra'm ashcarñañ. Allpa' añ be'tets ñeñt aquellcaret pa'so'chñečno Cristo po'libro attochña ñetpa' corretsetach.

22

¹ Allempoña mellaño'teñpa' o' alla gaterrnerr po'ñes. Ñeñtpa' arrot huena conañot allo'tsen Yompor epuet ñaña Puechemer Cristo ñeñt atma'ntaret Carrnero. Ñeñt oñpa' atarr cohuen, atarr llancasaseno poptaso'tena. Oñ ñeñt atarr cohuen añ toma'tena atto apueney Yompor attochña yapa' corretsayach e'ñe yocsheñeshocmañen errpono-huañen. ² Ñeñt Parets pa'netsro e'ñe rrocho allecma chopeñe'chenet, allñapa' all oñen oñ. Ñeñt oñ emoto'mar popame'tar-ro all chopyen tsach. Ñeñtña tsachpa' atarr nanac me'ten, puenña'tets arorrpa' chocma me'ten. Paterr charpa' charroch me'ten puechena epa. Ñeñt pue'mer ñeñtcha' apuerrey Yompor añ toma'tena alloch yocrrerra errponañohuen ñeñt ama ahuañaño ama't ahua'ta. Ñaña pasopanerpa' añecop sherben ñeñtcha' a'crraterre' allohuen pa'namen acheñenesha' e'ñe puecamquëñohuenet. ³ Parets

pa'netsropa' amach eñallettero ama't patrira ñeñtcha' a'cmareterrtsa. Tarro'mar Yompor epuet ñaña Puechemer Cristo ñeñt atma'ntataret Carrnero, ñetña part-sotetset all po'conañeto. Ñaña allohueney ñeñtey torretsa Yomporecop e'ñech cohuen yesherberr yaña all. ⁴ Yentercha' Parets yecuacлле'channerrach parro epay Yompor. Yeto'moña yapa' quellquërrancha' e'ñe ña pa'so'cheñ. ⁵ Allñapa' amach eñallettero checmete'. Ñeñteycha' ye'cherrtsa allpa' amach yemnerro ñeñtcha' ye'choyo'tam'pse'. Atto te'pa' chocma yemnen lampareñ alloch ye'choyo'tam'pena. Allempopa' amach yemnerro ñaña o'ch choyo'tam'peney atsne', tarro'mar Yompor ñeñt Yepartseshar yepen, ñapa' ñaña pa'tsnomueña ñeñtcha' ye'choyo'tam'perre' all. Ñaña yapa' ya'm'cha'tarettapreterach allempoteñ errponohuañen.

Arrpa' all eñotateney Jesucristopa' ahuencha' huerra po'pocheño arr patsro

⁶ Allempoña mellañoñeñpa' o' alla oterrerr, ñeñt'pa' atet oterrerr:

—Ora allohuen añ ñoñetspa' e'ñech seyemcha tarro'mar ñeñt'pa' e'ñech po'ño'ch atet perra. Ñaña Yompor ñeñt Yepartseshar yepen ñaña'pa' chocma eñotatenan ñeñtcha' a'm'tene' po'ñoñ. Ñeñtara Yompor ama't te'pa' o' llesensan po'm'llañoñeñer ñeñtcha' gatyene' ñeñt torretsa ñocop ñeñtcha' ahuen atet perra ama't esempo. ⁷ Ñaña Cristo ñapa' atet oten:

—Señoche'pa'ch napa' ahuencha' nohuerra.

Atarr cosheñtso'tsen allohuen ñeñt yemtenaya ora allpon añ ñoñets ñeñt aquellcaret all Yompor po'libro ñeñtcha' atet perra esempo. Arrpa' allohua huañ ñeñt atet eñotaten mellañoñeñ.

⁸ Na ñeñten Juananpa' naña e'muene' ñeñt ora allohuen añ ñoñets ñaña naña entene' ñeñt allpon gatyennet. Allempoña napa' neconcorposa e'ñe mellañoñeñ pa'rrpo ñeñt negatyene' ora allpon pa'namen esocmañen o'ch nema'yochyañ. ⁹ Ñaña'pa' oten:

—Amach pema'yochatsetno na, tarro'mar napa'cho'ña e'ñe parropa' atta netorrapretenpa Yomporecop ñaña allohuen ñeñt pemo'nasheñeshachno pepen ñeñt a'm'ta'yene' Yompor po'ñoñ, epuet ñaña allohuen ñeñt atarr yemtenaya añ ñoñets ñeñt atet aquellcaret añ libro. Papa' Yomporña pema'yocha.

¹⁰ Allempoña ñeñt mellañoñeñpa' alla oterrerr:

—Ñato't cha pa'nasotena' añ ñeñt allpon Yompor po'ñoñ ñeñt o' pequellca'hua. Tarro'mar allpon ñeñt o' pequellca'hua ñeñtcha' atet perra esempo, te'ñapa' o' chapmoch allempoch attoch e'ñe etsotuerria esempohuañen. ¹¹ Tarraña e'ñe allempoteñ allohuen ñeñt ama cohuenaye' es petso ñeñt'pa' allo'nepa'ch senet patse'tyeset ñeñt ama cohuenaye' enteno Yompor. Allohuenet ñeñt añach ye'chenet sosya'tsañe'chno, ñetpa' allo'nepa'ch senet ye'chcatyesnomuet ñeñt atarr sosya'tsañe'chno. Tarraña allohuen ñeñt e'ñech cohuen es pa'yenetpa' ñetñapa' allo'nepa'ch senet e'ñe cohuen es pa'yestset. Ñaña allohuen ñeñt ma'yochrenaya ñeñt atto sherbeñet Parets, ñetpa'cho'ña allo'nepa'ch senet ma'yochrenet ñeñt atarr cohuen enten Parets. ¹² Ñaña Cristo ñapa' atet oten:

—Te'pa' señoche'pa'ch napa' ahuencha' nohuerra. Nehuapaterrnascha' ñeñt no'patatensa alloch netsa'tuerrsa e'ñe puesheña'ttsos sa erro'tente' setorra'yese't. Tarraña o'ca'ye nehuapaterr ñaña alloch netsa'tatuera ñeñt ama pocteye' es petso. ¹³ Napa' e'ñe pa'motroteñ eñallen, atten ñerra'mrrate' quelled A ñeñt pa'moter pen alfabeto. Allempoteñña napa' chocma eñallen esempohuañencha' huañerr ñeñt allpon eñall, napa' atten ñerra'mrrate' quelled Z ñeñt all puen alfabeto.

¹⁴ Atarr cosheñtso'tsen allohuen ñeñt e'ñe pocte' enten Yompor o'ch tsomhuerrñañet Yompor puenaren alloch e'ñe correrret poctacma. Allempopa' amach alla rromuerrete'te. Ñeñt'pa' ñeñtcha'ña e'ñe yoma'huerret ñesho. Ñehua, ñeñt e'ñe pocte' enten

Yompor ñeñtapa' allohuen ñeñt e'ñe e'shohuaretterra po'chñar e'ñe pame'ñeñoťet Cristo. Ñato' o'ch netma'ntacha atet: Ñetpa' o' e'ñe tsama'tuerret pa'shtamuet attoch e'ñe pocte' entanet Yompor o'ch be'toset yetarro esheccha' chapuet Yompor pa'netsro. ¹⁵ Tarraña allohuen ñeñt ama ame'ñenayo Cristo ñetñapa' a'yote'tsa'yenetach Yompor pa'netsroť. Ateť ñerra'm amase'ñeťechno, ñaña ñeñt ecañoreshaťechno, ñaña ñeñt amtsañechno ñaña allohuen ñeñt po'yomporer pene' ayeťhcataret ñaña allohuen ñeñt cohuen entene' allohuen shequēntsochno. Ñetpa' e'ñe ñeñta eñotenet o'ch shecare'chet acheñenesha'.

¹⁶ Allempona Jesúsapa' alla oterrerr; ñeñtapa' atet ot:

—Napa' ñaña ñeñten llesensene' nemllañoťeñer ñeñt o' eñotaterres ora añechno, allohuenes ñeñtes e'ñe same'ñeñoťen na sapa' chocma sapcha'yena allemeñ anetso'mar. Napa' ñeñten allot huapa amcha'taret David, elloñapa' o' alla po'mreneñ perrnerr ñaña. Ñaña napa' atten ñerra'mrrate' ranto ñeñt atarr atarrenñ ñeñt atarr huomenc atsnets o'ch puetarenmoch. Attoña na'puetarsampeñ allohuen acheñenesha'.

¹⁷ Allohuen ñeñt pueyochresha' pen Parets ñetpa' atma'ntatarettenet atet ñerra'mrrate' Cristo puetapor penahuet. Attoña ñet Parets Puecamquēñoť oteñet Cristo: —Apon.

Ñaña allohuenes ñeñtes e'mñotene' o'ch soch samña Cristo:

—Apon.

Ñaña allohuenet ñeñt oñpa'tets ñeñt ama eñmatetso pueyoťhreto ñeñt chocma es e'nyenet, ñetpa'cho'ña huapuetepa'. Yoretapa' añ oñ, allochñapa' ñetpa'cho'ña corretsetach. Ñeñt oñpa' e'ñech atta aparettet, amach es tsa'tayo ama't e'ñe coñe'ta.

¹⁸ Na te'pa' o'ch noctape'chach allohuen ñeñt e'mñotene' añ ñoñets all oteneñ ñeñtcha' atet perra esempo. O'ch notanet: Ñerra'm esesha' atontatene' ñet poctapñet ñeñt ama atteye' oteneñ añ ñoñets, Yomporñapa' o'ch atontatanet ñocpuet ñeñtcha' muerochtaterrahuet ñeñt atet o' aquellca'huaretta añ libro. ¹⁹ Ñaña ñerra'm esesha' cha a'chencatenan ama't patrra ñoñets ñeñt allpon aquellca'huaretta añ libro, Yomporñapa' amach muenataneto o'ch es o'patapreteret all aquellcarettena libro allpon ñeñtñapa' corretsetach. Ñaña ñetpa' amach be'tosapo'tampereto Parets pa'netsro ñeñt atet o' aquellca'huaretta añ libro.

²⁰ Ñeñtara Jesús ñeñt yeñotatyene' ora añechno, ñañaapa' alla oterrerr:

—Napa' po'ñoťhcha' ahuen nohuerrerr po'pocheño.

Yañapa' allohueney yoteñ:

—Apon Yepartseshare Jesucristo. Ñeñtapa' attetepa'ch yocop.

²¹ Yepartsesharepa'chña Jesucristo sa'natenaya e'ñe allohuenes. Ñeñtapa' attetepa'ch Nompore allohuenacpay. Arrpa' e'ñe allohua puen Yompor po'ñoñ.